


DR
557
C48
1891
cilt 5-6

PLEASE DO NOT REMOVE
SLIPS FROM THIS POCKET

UNIVERSITY OF TORONTO
LIBRARY





فهرست جلد خامس

	صفحه
بقیه وقایع سنه ۱۲۰۴	۲
حمیدی زاده نك مشیختی	
غازی حسن پاشانك صدارتی و دیگر بعض وقوعات	۴
بندرک استیلا اولندیغی	۸
بروسیا و ایله عقد اتفاق اولندیغی	۱۵
غازی حسن پاشانك وفاتی	۱۶
روسچقلی حسن پاشانك صدارتی و دیگر بعض وقوعات	۱۸
قره محمود پاشانك وزارتی	۲۰
وقایع شتی	۲۶
بعض وقوعات طریق علمیه	۲۷
احوال عربستان	۳۵
مخاربه بخر سفید	۳۸
مخاربه بخر سیاه	۳۹
بحث حرب و صلح	۴۱
احوال اردوی همایون و بعض وقایع حربیه	۴۳
آطه قلعه سنك استیلاسی	۴۴
یرکوک مظهرتی	۵۴
نچه لو ایله متارکه اولندیغی	۵۵
ریشنباش معاهده سی	۵۸
وقایع سنه ۱۲۰۵	۶۲
ماوریانی بکک اعدامی	۶۳
مرخصلرک زشتوی به اعزامی	۶۸
وقایع شتی	۷۰
جزارک امیر الحاج اولدیغی	۷۱
اسوج ایله روسیه نك مصالحه سی و عزمی افندی نك برلینه اعزامی	۷۲
کلی قلعه سیاه سنه بوغازینك استیلاسی	۸۱
اردوی همایونك بعض احوالی	۸۶

	صخيفه
اسماعيلك استيلاسى	۹۴
سردار آكرمك اعدامى	۹۹ -
قوجه يوسف پاشانك ثانيا صدارتى	۱۰۲
مخطره	۱۰۴
عصمت بك افدينك اردو قاضيسى اولدينى	۱۰۶
حميدى زاده نك عزل ونفى	۱۰۷
توفيق افدينك مشيختى ووفاتى	۱۱۱
مكى افدينك مشيختى وديكر بعض وقايع	۱۱۲
عزل و نصب	۱۱۴
بعض وقايع اردوى هايون	۱۱۶
روسيه نك ابرايل وماچين طر فلرينه تعرضى	۱۱۸
اردوى هايونك رجعتى	۱۲۶
بطل پاشا حادثه سى واناپه نك استيلاسى	۱۳۳
حوادث بحر سياه	۱۵۴
روسيه متاركه سى	۱۵۷
فالمنك دولتلك اجمال احوالى	۱۶۵
زشتوى مجلس كبيرينك صور مذاكراتى	۱۶۷
نمچه مصالحه سى	۲۲۰
وقايع سنه ۱۲۰۶	۲۲۳
سواری او جاقلرينك حركات عصيانیه لری	۲۲۵
راتب افدينك ويانه يه اعزامى ووقايع سائر	۲۳۲
كانى افدينك ترجمه حالى	۲۳۴
حسن افدينك ترجمه حالى	۲۳۵
ياشده مجلس مكالمه عقدى و صورت مذاكره وقرارى	۲۴۲
روسيه مصالحه سى	۲۴۴
اردوى هايونك ادرنيه عودتى و بعض اجراءات	۲۵۲
نورى پاشانك اعدامى	۲۵۳
عبد الله وخير الدين ومقداد پاشالرك اعدام لرى	۲۵۴
جوره زاده نك اعدامى واسماعيل پاشانك رفع وزارتى	۲۵۷


بعض وقایع استانبول	۲۵۷
اردوی همایونک در سعادتہ عودتی و بعض وقایع	۲۶۱
فذلکہ	۲۶۴
یوسف پاشانک عزلی و ملک پاشانک صدارتی و بعض وقایع	۲۷۰
آق دکز اشقیاسنک تأدیبی	۲۷۴
وقایع مصریہ	۲۷۷
بختکرای خانک نفی و وقایع سائرہ	۲۸۲
وقایع چلدر	۲۸۳
ترسانہ نظامی	۲۸۶
تجدید قانون تیمار و زعامت	۲۸۹
رؤس امتحانی و تبدل مشیخت	۲۹۱
ذیل	۰۰۰
پروسیا اتفاقنامہ سی	۲۹۴
صدر اعظمک استقلالانی حاوی خط ہایون	۲۹۶
جزارک شقہ سی . پروسیا مرخصنک تقریری	۲۹۷
پروسیا ایلچیسنک لایخہ سی	۲۹۸
انگلین مرخصنک مقدمہ سی	۳۰۵
نمچہ و دولت علیہ مرخصلرینک مقدمہ لری	۳۰۶
دانیمارقلونک تقریری	۳۰۷
یوقووینہ سندی	۳۱۲
زشتوی مصالحہ نامہ سی	۳۱۵
معاهدہ مخصوصہ	۳۲۴
بغدان بکلکی حقندہ تقاریر	۳۲۷
یاش مصالحہ نامہ سی	۳۳۰
بخارا خاننک نامہ سی	۳۳۹
تقریر نامہ رس بخارا	۳۴۲
عزیمی افندینک سفارنامہ سی	۳۴۶
زشتوی مجلس مکالمہ سنک رسعی	۳۷۱

ترتیب جدید

جدید مسائل


(از)

نایب محمد



معارف نظارت جلیله سنک رخصتنامه سیله

(ایکتبی طبی)



در سعادت

(مطبعه عثمانیه)

۱۳۰۹



DR
557
C48
1891
c1175-

844006

جلد خامس
(از)

تاریخچه

بِسْمِ اللَّهِ الرَّحْمَنِ الرَّحِيمِ

بقیه وقایع سنه ۱۲۰۴

اشبو ایکیوز درت سنه سی محرمنک سکزنجی کونی رکابدار شهر یاری ردوسلی احمد اغا متقاعداً سرای هایوندن اخراج ایله یرینه باش چوقدار بولنان عبدالله اغا رکابدار اولمغله یرینه مظهر نظر پادشاهی اولان ماینجی حسین اغا تعیین بیورلمش وبرکون صکره سلحدار یحیی اغا دخی متقاعداً معزول اولهرق عبدالله اغا سلحدار وبهزاد زاده مصطفی اغا رکابدار اولمش ایدی .

آرہ سی چوق کچمیوب بوستانجی باشیقله کسب نفوذ تام ایتمش اولان فرهاد اغانک قصر شیرین اقبالی منززل اولهرق عزل بی هنکام ایله تلخکام اولوب احق منتسب اولدیغی اندرون اغالرینک همتیله فی الحال عهده سنه رتبه وزارت ویریله رک روم ایلی سورجیلکی عنوانیله درسعادتدن چیقارلمشدر .

* حمیدی زاده نک مشیختی و سلفنک وفاتی *

شیخ الاسلام اسعد افندی زاده شریف افندی حسیب واصیل و علم و معارفده بی عدیل و عنیف و پرہیزکار و متصلب و دیندار و رسم طریقه پک زیاده رعایتکار

(غیور)

غیور و وقور بر ذات کامل الشعور اولوب انجق بر مقتضای وقار هر کسه اماله انظار ایتدیکندن حقنده بعضیلر زباندراز اعتراض اولورلر دیسهده بودخی بعض نااهلانک دلبند امید اولدقلری مطالب غیر لایقنهک تخلفندن ناشی ایدی دیو تاریخ واصفده محرردر . بوجهته اقدمجه مشیخته سزاوار کورلمش ایسهده سلطان سلیم خان حضر تلی مجدد عصر اولمق اوزره کافه قوانین ملکیه وعسکر یه تیجدید ایلمک نیتنده اولوب بویله بروقت نازکده ایسه جری وجر برزه لو بر ذلک مقام مشیخته بولنسی لازمه خالدن اولدیغنه و شریف افندیکنک ضعف پیری وعات مزاجی و زناکت حالی حسبله بویله وقت نازکده مشیخته عاڈ اولان خطوب جیمههک بروفق دلخواه عالی اداره سنه موفق اوله میه جعی درکار کورلدیکنه مبنی نصبندن ایکی آی صکره یعنی اشبو درت سنه سی محرمنک یکرمی دیدسنده عزل ایله یرینه اقدمجه عهده سنه روم ایلی پایه سی توجیه ایله مقام فتوا یه تقریب اولنمش اولان حمیدی زاده مصطفی افندی شیخ الاسلام اولدی .

چند ماه مرورنده یعنی سنه مرقومه رمضانک طقوزنده شریف افندی منصب حیاتندن دخی معزول اوله رق ارتحال دار بقا ایلمشدر . ولادتق (۱۱۳۰) تاریخنده اولوب ایکی دفعه کی ایام مشیختی درت سنه بش آیدر السنه ثلثه ده شعر وانشایه مقتدر اولوب بوقطعه زاده طبع شریفلر یدر .

* قطعه *

* حق عالمست ندانی بحقیقت احکام * چون تحقیق در افلاک مقوم باشی *
 * عالم الغیب خدا وند حکیم است همان * سخت کذب بودگر تو منجم باشی *

* وله نظم *

* ایتدم کوزلر ایچره علاقه افندیمه * صد آفرین طبیعت دلبر پسندیمه *
 * طرف رخنده کاکلن اولمه کوروب دیمش * قلم ر بوده مهره وارنجه کندیمه *

* وله بیت *

* چیمیز سحر اوشه دردولت سراینه * تا آفتاب دوشمیچک خاکپاینه *
 حمیدی زاده افندیکنک احواله کمنجه مشار ایله دخی فضلالی عصر دن بر ذات اوله رق حتی یوز التمش یدی سنه سنده واقع مراتضی افندی امتحاننده علی الاعالی اوقویوب بو حیثیته مدرس اولمشیدی بعده سرای خواجه سی اولوب انجق مبادیء حالندنبرو بر طرفدن اکتساب علوم و فنون وطریق نقشبندیهده سیر وسلوکی اولدیغنه مبنی بر طرفدن دخی صفات صوفیه اوزره تصفیة درون ایله مشغول

اولدیغندن اندرون و بیرونده نازکانه تعایم طالبین وارشاد سالکین ایله ظاهر و باطنی معمور اولوق اوزره مشهور اوله رق خواص مقر بین کندویه معتقد اولنریله خواص رفیعہ مولوتیبه کسب رفعت و اختصاص ایلمشیدی . بعدہ نفس و نسخہ سنک تأیری عبدالمحید خان حضر ترینه عرض والقا اولنوب آنلر دخی کرک نفس هایونلرنده و کرک شهزادکان کرآمنده برکت انفاسنی بالمشاهده اعتقاد تامله کندویه متوجه اولغین ظفرات متوالیه ایله اناطولی پایه سنه قدر چیقوب سفر مناسبتیله مجالس مکانات و مذاکرانده دخی فضلادن برینک بولنسی لازم کلکین برمنوال سابق بومثالو مجلسلرده بولنه رق محرم اسرار دولت اولمشیدی . تجدد سلطنت حسینیه بونک دخی سقوط کوبک کوبه اقبالی ملحوظ ایکن اندرون و بیرونده طرفدار و معتقدلری کثیر اولدیغندن و پادشاه نوجاه حضر ترینک اجراسنی تصمیم ایلدیکی اصلاحات ملکیه و نظامات سائردهک تسویه سنده بویله بر ذاتک سرکارده بولنسی موافق مصاححت کورلدیکندن جلوس هایوندن بر آی سرورنده مقدمه مشیخت اولوق اوزره عهده سنه برمنوال سابق روم ایلی پایه سی توجیه اولنوب بوکرده دخی شیخ الاسلام نصب اولنه رق حل و عقد امور دولت ید استقلالنه تفویض اولنش و اودخنی بر موجب مأموریت طریق علمیه نک نظاماتی توثیق ایله وضع قدیمه اعاده اسبابنه تثبیت ایلمش ایسه ده ایجاب وقت و حال اوزره بویولده حکیمانه و موشکافانه حرکت لازمه دن ایکن تلطیف و تعینف خصوصلرنده افراط و تفریطدن خالی اولماغله نتیجه مأمولیه و اصل اوله مدینی زیرده بیان اولنه حق و قوعا تندن معلوم اولور .

* غازی حسن پاشانک صدارتی و بندرک استیلاسی و دیگر بعض *

* وقوعات ایله پروسیا اتفاتی *

صدر اعظم و سردار اکرم بولنان کتبخدا حسن پاشانک مهدیه محاربه لرنده واقع اولان مظفرتی بین الانام موجب ممدوحیتی اوله رق مقام صدارته کتورلمشیدی . حالبوکه سوق الجیش ماده سی بشقه مصاححت و خطوب جلیله صدارتک اداره سی بشقه کیفیت اوله رق بونلرک برینی حسن اداره اید بیلان دیگرینه مقتدر اولوق لازم کلیه جکی مسلماتنددر لکن ظاهر بیلانک سیئسی اوله رق بومقوله خصوصاتده بیوک خظالر واقع اوله کشدر . بوجه بالا حسن پاشانک مقام صدارته کتورلسی دخی بوقیلدن اولدیکه بیچاره بومقامه ترفیع اولنوبده بونجه مصالح جسمیه و مشاغل کثیره ایچنه دوشدیکی کبی بیچاره نه یابه جغنی شاشیروب همان کافه اموری بعض متفدان دولته سپارش و تحمیل ایله معقول و مناسب دیو شونک بونک رأینی تنسیب

ایتمکدن بشقه برتدیره موفق اوله مدیغندن اردوی هایونده قوال چوق فعال یوق
 کبی برحال تشویش اشمال ظهور ایدرک بوکا نظر حیرت ایله باقیلورکن زماننده
 فوقشان و بوزه وقعه لری ظهوره کلکله انظار عسکریه ده وقع ونفوذی زائل
 اولوب بوآلام واکدار ایله خسته وزجاج مزاجی شکسته اولغله فیما بعد برایشه
 موفق اوله میه جنی ظاهر اوله رق عزلی لازم کلکین وزرادن برینی صدارته انتخاب
 ایچون شیخ الاسلام ایله قائم مقام پاشا حضور هایونه جلب واحضار اولندولرنده کرک
 جنسک اری و کرک پوست وزیری اولمق اوزره هر صنفدن بشر التیشر وزیرک
 اسمارینی بر پوصله یه تحریر و عرض ایدرک هر برینک مزاج و مشواری بیان
 ایتمار ایسه ده بویله خطوب جسمیه ده هر کس مسئولیتی اوزرینه آلمقدن احتراز
 ایتمکله بریبی ترجیح اولنه میوب مصاحت ملاحظه واستخاره یه توقیف اولنمشیدی.
 شیخ الاسلام افندی استخاره ده برشی فهم ایده مدیکنی عرض وافاده ایدوب
 سلطان سلیم خان حضر تلی ایسه اوچ دفعه عالم معناده اسماعیل سر عسکری
 جزائرلی غازی حسن پاشانی کورمکله و مشار ایله قدمای وزرادن قوی الهمه
 و شدید الشکیمه بر پیر روشن ضمیر اوله رق بونجه بیوک وقوعاتک عهده سندن
 کلبش ودولت علیه یه پک چوق ایشار کورمش ایدو کندن بشقه بوکره اسماعیلده
 دخی موفق و مظفر اولدیغندن مقام صدارته لایق و مستحق کورلمکله کندوسنه
 مهر هایون ایصالی ایچون بواننده سر چوقدار حضرت شهر یازی اولان حسین اغا
 مأمور بیور یله رق اغای موصی ایله اوائل ربیع الاولده مهر هایونی شمیندن اخذ ایله
 غازی حسن پاشایه ایصال و تسلیم ایتدکده صدر مشار ایله همان بر منوال محرر
 آفکرمان قابعه سنک کرتار دست اعدا اولسنه سبب اولان وزیر طیفور پاشانی قتل
 و اعدام و جوره زاده احمد پاشایه اناطولی ایالتیله اسماعیل حاجی سر عسکر لکینی
 بالتوجیه بر قاج کون ظرفنده اول حوالینک امر تقویت واستحکامنی تمام ایتدکده نصره
 ربیع الاولک اون سکرنجی کونی قوبان خانی بختکرای خانی استصحاب ایله اسماعیلدن
 حرکت و ماه مرقومک یکر می طقوزنجی پنچشنبه کونی مشتای اردوی هایون اولان
 شمینی مواصات ایلیوب چونکه مشار ایله مهیب و خونریز بر وزیر اولدیغندن
 اردوی هایون ارکانی دوچار خوف وتلاش اولمشلردر حتی واصف افندی بوه قامده
 مشار الیهک بوکره اسماعیلدن کیفیت حرکت و عزیمتی بیان ایدرکن جوانب
 اربعه سنده نادیه مرک مفاجات و دلال شدائد عقوبات

* بیت *

* کلور اول وزیر جائر قلیجی برالد قاکاو * صاول ای کوکل یولندن که یمان کلشدر بو *

نداریه هیت انداز خواطر انام اوله رق شعی به واصل اولدیغنی تخریر ایلمشدر .
 الحاصل کمال هیت ووقار ایله وقت و حاله کوره مقام صدارته شان وهر کسک قلبه
 خوف و خاجان ویردرک شمنیده مقام صدارته قعودنده ابتدا هزار غرادده بولنان
 سانی سالف الذکر کتبخدا حسن پاشایی روسجق محافظی نصب و تعیین و قائم مقام
 سابق صالح پاشا عهده سنه بوسنه ایالتی توجیه ایله سلفی میر علم پاشانک اردوی هایونه
 کسینی تخریر و سابقا ارضروم والیدی اولوب صوفیه جانبه طوغری عزیمت اوزره
 اولان داماد السید احمد پاشا عهده سنه دخی روم ایلی ایالتی توجیه ایلدی بعده
 ایساجی محافظه سنده بولنان کرد عثمان پاشا ایله کندوسنک اسماعیل سرعسکر لکنده
 تفکیجی باشیمی ایکن میر میرانلق ایله چراغ بیوروب اسماعیل پیشکاهنده برمنوال سابق
 واقع اولان محاربه ده چرخه جیلری اولمق حسیهله یرارانلی و بهادرلنی مشهورلری
 اولان علی پاشا عهده لرینه رتبه وزارت احسانیه عثمان پاشایی ینه ایساجی محافظه سنده
 ابقا و علی پاشایی ایجابنه کوره آطه قاعه سنه امداد ایلمک اوزره و دین جانبه اسر ایلدی .
 ایشته بو مثللو مصالح دولتی تنظیم و تسویه اثناسننده یعنی ربیع الاخرک اوننجی بازار
 کونی کسنه نیک خبری اولدیغنی خالد دیوان یرینه بعد الخروج کتبخدای صدر عالی
 سلیمان راشد افندی ایله مکتوبی صدر عالی امین افندی بی بالا حضار ایکسینک بردن
 بنک طاشنده باشلری کس دیروب فی الاصل اوچ دفعه دفتر دار و براییک کوره کتبخدای
 صدر عالی اولمش و بو ائناده دفتر امینی بولمش اولان بیکی حسن افندی بی جلب ایله
 کتبخدای صدر عالی نصب ایلمش و سایر مناصب دیوانیه و جانلک دخی بعضیلری غزل
 و تبدیل ایتمشدر .

بو وقعه نا کهظهورک سبب اصلیدی معلوم اولدیغندن بعضیلر بونک سببی اردوی
 هایون ایساجی معبرندن گذار ایده جک ایکن سلیمان افندی ابرائیل اختیار لرینک
 کلاملرینه الدانه رق مرحوم رئیس الکتاب خیری افندی و مکتوبی امین افندی ایله
 بالاتفاق ماچیندن عبور اولمسنه و بالاخره بوزه بوزغوننک وقوع بولمسنه علت
 اولمسیدر و بعضیلر دخی خود رأیلک ایدرک فوقشان اردوسنک انهزامنه بادی
 اولمسیدر دیو هر کس برر معنی ویردرک جمله بی خوف و خشیت احاطه ایتمشیدی .

حسن افدینک کندوسندن منقولدر دیرایش که اولوقت که صدر اعظم حضر تلرینک طبع
 خونریز لرینه مطابق بر شخص بوالعجب دعوته کلوبده عنف و شدتاه قالیق سنی افدیمز
 ایستر دیهرک اسبوزه بندیردی و آندن سرای صدر اعظمی به کلندکده مقتولین
 مرقومینک هنوز قانلری ریزان و اتباعلری کریان و هر کس خوف و تلاش ایله
 حیران و هراسان ایدی اوقدر خوف و دهشت استیعاب ایتمشیدی که اصلا کندیمه
 مالک اوله میوب بنک طاشنک وسعتی اولدیغندن بر طرفدن دخی مباشر مرقومک
 تعجیلی ایله مقتولین مرقومینک جسدلری اوزرندن گذار ایدرک حضور صدر

اعظمی به نسل کیرلدیکنی ونه وجهله خامت کیدرلدیکنی بیله مم . انوری تاریخده بو وجهله محرر اولوب اما واصف افندی دیر که صدر اعظم کتخداسی اولان سلیمان افندیکنک بهانه جوی کفتکو اولان عسکری طائفه سی بیئنده حدت و غلاظت و خواص میاننده کبر نفس و خشونت ایله شهرتی اولوب بوزه وقعه سندن صکره آستانه سعادتیه وارد اولان اشخاص مومی الیهی ذم و قدح ایله اشتغال و کیدرک بوحوادث سمع هایونه اتصال و بحکم (من یسمع یخجل) حقنده غیظ شاهانه تقرر ایدوب معاقب اولمی خصوصی مقدا صدر اعظم طرفه ایما اولمشیدی . مشار الیه دخی رجال دولت و خدمه سلطنت صدر اعظم لک محکومی اولوب زمام حل و عقد یدلر نده اولمدیغندن غیری خود بخود بر فاعله جسارت ایدمه جکلری آشکار و بوزه وقعه سی انجق صدر سابق فتور و رخواستندن نشئت ایلدیکی بدیدار اولوب شمئی به وارلقده هر کیفیت تحصیل اطلاع و قوف عقببنده هر صنفک حال و شانمه کوره لدی التصحیح تأدیب و کوشماللری اجرا اولنور دیو تلخیص ارسال و بووضع عاقلانه جمله به مستحسن کوریلوب غضب ملوکانه بی دخی اقلال ایتمشیدی . انجق مشار الیه قبودان دریا ایکن مالکانه مشترک نندن بری فوت و حصه سی محلول اولوب جزئی معجله ایله استخلاصنی دهندنه تصور ایتمشیکن تصور ینک ضعیفه قرار داده سی چکلدیکنی او زمان دفتر دار بولنان مومی الیه سلیمان افندیکن بیلدیکنی و حقنده اضمار غیظ و کین و فرصتی دوشد کده سوء جزا ایله مکافات ایلیه جکنی بعض محرمارینه تلمیح و تبیین ایتمشیدی کذلک مکتوبجی اولان امین افندی دخی اردوی هایونده مشار الیهه قپو کتخداسی اولوب بعض مصالحت ضمننده کلان آدملرینه روی درشتی و غلاظت ارانه و پائالرینه واروب سنی فصل و ذم ایدهور دیونفاق و سعایه ایلدکر نندن غیری ایکیده براسماعیلدن آنچه ایستدجکه میرینک مضایقه سی اولوب پاشا حضر تارینک مطلوباتنه دولت عالیهنک ایرادی متحمل اولمیوب کندولری متمول وزرادن اولملر یله دین و دوات ایچون بر مقدار آنچه صرف ایتسون دیدیکنی دخی مشار الیهه ایصال ایلدکرینه بناء مومی الیه حقنده دخی غضب نهایی سی استقرار بولوب صدر اعظم اولدینی کبی تذکر ماجرای قدیم و حادث زوال صبر و آرامنه باعث اولوب ایکینسی دخی اسوء حل ایله اعدام و حکمت ملک علام مقتضاسی اوزره مثمر اولمدیغندن ماعدا نفوس بشریه ده مشار الیهه بغض و عداوت پیدا اولوب هر کس زوالنی تمنی ورجا وحتی بعض محللرده قهریه به مداومت اولندیغنی تصحیح کرده اولی التهادر (من خف سو طک تمنی موتک) دنیای فانی کندوسنه دخی باقی اولمیوب سنه سی ایچنده دفین خاک سیاه و دامن عمری کوتاه اولدی .

واصف کلامی بوراده ختم بوالدی اشرف مخلوقات اولان نوع بشرک قدری
بیانمیوب قباحتی و قباحتمز نیجه باشلر کسبلان اعصار غدر آنارک خونریزلرندن
بری دشمنی ایشته بوجز اثرلی حسن پاشا ایدوکی معلوم اولان مواددن اولدینی حالده
بوعادت مکر وهه اول عصر لک وزرا و رجال سائردهسی بینلرنده قدر مشترک بر کیفیت
اولوب انجق یکدیگره سبتله بعضیلری حقیقده دهامر حتملوچه واهونجه دینله بیلور .

واصف افندی هم مادهنی بولندینی دورک پولتیقه سنه توفیقاً تحریر ایده کلدیکندن
بویله خصوصاً سوزینه امنیت اولنه میوب سلیمان افندی بختنه کلنجه سیاستاً
موجب قتلی اوله جق بر تهمتی وارمیدی یوخسه قتلی مجرد صدراعظمک غرض
ونفسایتندتمی نشئت ایلدی و یاخود صدراعظم اسماعیلده ایکن بروجه محرر در سعادت
تایخیص کوندر دکن سکره قاتنه تکرار اراده قطعی می کش ایدی بورالره دائر
معلومات صحیحه مز اولدیغندن بومادنگ حقیقتی نزجه مجهول قلمشدر .

بو حالده و دین جانبنده تیموق نهری کنارلرینه بر مقدار عساکر اعدا کله رک تحصن
ایدجک بعض اینه انشاسیه اورالرد برلشمک زعم قاسدنده اولدقلری معلوم
اولدقده و دین سر عسکری قوجه یوسف پاشا طرفندن کوندر یلان عساکر اسلامیه
اوزرلرینه واروب جنکه ابدار ایله غالب ومظفر اوله رق اخذ ایلمش اولدقلری
یکرمی سکر قدر اسرا یوسف پاشا طرفندن اردوی همایونه ارسال اولنگله
ربع آخرك یکریمی التیمی کونی شعنی به وصول بولمغین موجب انشراح اوله رق
در سعادت ارسال اولنمش ایهده قریباً روسیه لونک بندری استیلا ایلدیکی خبر
حزن اثری وارد اوله رق بومسرتی اونوتدیر مشدر .

شویله که : صدراعظم حضر تلی اسماعیل سر عسکری ایکن روسیه لولر اسماعیلده
وقوع اولان محاربه ده منزهماً عودت لرنده بندری حصر و تضییقه مباشرت ایدوب
بندرده عساکر و ذخیره قاتی ومحافظلرینک رخوتی درکار اولدقندن بشقه اهالیسی
مقدماً بر دفعه دشمنی استیلا کورمش اولدقلرندن وهمم وخوفه تبعیتله مال وجانلرینی
محافظه قیدینه دوشه رک ویره ایله قلعینی ویرمک خصوصاً روسیه لولر ایله بعض
شرائط مذاکره سنه کیریشدکارنده سر عسکر بولنان کمر کچی اسماعیل پاشا غیرت
وحیث اظهار ایله هر نقدر اهالینی جنکه تشویق ایلمش ایهده مفید اولمیوب لطفاً
وعفناً سائر پاشالری مراملرینه رام ایدرک بندر قلعه سینی ویره ایله دشمنه ترک
وتسليم ایتدکلری حدنسی هنوز بین الناس شیوع بولمندن سردار اکرم حضر تلی
امر محافظه ده بولنوب بروجه مشروح اهالی به موافقت و مماشات ایتمش اولان
یکیکچری اغلی اسبق وزیر احمد پاشای ورزده لی زاده وزیر عبدالله پاشای و بندر

و جوهندن براقچ کیمسینی طونه سواخاننده برر برر قتل و اعدام ایله سائره عبرت کوسترمشدر . اما سرعسکر بولنان مشارایه اسماعیل پاشاک تسلیم قلعده مخالفتی اولدیغنی مؤید یننده سنندی اولدیغندن مصادره اموالیله اکتفا و تکفور طاغنه نفی و اجلا اولمشدر .

اشبو اسماعیل پاشا فی الاصل ثروت و یسار ایله معروف اولان رجال دولتن ایکن عهده سنه رتبه وزارت و یرلمش اولوب واصفک تحریرینه نظر آهر خدمته قابلیتی و علی الخصوص ترسانه و مطبخ امانتلی کی خدمتده حسن سلوک و سیرتی ظاهر اولدیغنی حالده مجرد قوه مایله اداره لوازم وزارتیه کفایت ایدر ملاحظه سیله (لکل عمل رجال) مآلندن غفلت اوله رقی عهده سنه رتبه وزارت توجیه اولتمش ایدی . حالبوکه حال وزارتنده جزئی و کلی برخدمته موفق اوله میوب بوکره دخی وقتیه بندرک لوازم محافظه سنی تدارک و ترتیب ایدمه ریک هم نفسنه وهم دولته ضرر عظیم ایلی .

ایشته بوخلالده سردار اکر مک استقلالنی متضمن خط هایون ایله تشریفات ملوکانه کله ریک کندوسنه باعث تعیین وجود و موجب نفوذ تام اولمشدر شویله که : برمنوال محرر مهر هایون تسلیمی ایچون کلش اولان سرچوقدار شهیریاری حسین اغانک نزد شاهانده حیز و اعتباری معلوم اولدیغنه بنهء صدر عالیقدر کندوسنی نقد و مالکانه ایله ممنون ایدرک بعض ملتسماتنک خاکپای شاهانیه عرض وافاده سنی دخی اکا سپارش ایلمش اولغله رکاب خسروانیه رخسوده اولدقده معروضات صدراعظمی بی برر شمارنده بنان حسن تعبیر و فی الحقیقه صدراعظم و سردار اکر مک بولنان ذوات حضراتنه استقلال تام و یرلمک مصالحک حسن تمشیت و تسویه سنه مدار اوله جفن افاده و تقریر ایتمکله سلطان سلیم خان حضر تلی دخی سردار اکر مک کمال استقلالنی حاوی اوله رقی کتخدای بواین جایر زاده ابراهیم آغا ایله مشتای اردوی هایونه ارسال بیورمش اولدقلی خط هایونلرنده جزئی و کلی کافه امور دولتی سردار اکر مک حضر تلیینه مفوض و حتی متارکه و مصالحه خصوصنده دخی کندوسنی مرخص بیوروب بر فردک کلامی مسموع اولیه رقی بیلدیکی کبی حرکت ایتمسنی و کرک در سعادتده و کرک اردوی هایونده بولنان بالجمله رجاله امورینه مداخله ایتمیر مامسنی اراده و ترسانه امورینی و قودانلغه یارار بر وزیر کار گزار تدارکنی دخی رأی صدارتینساهییه احاله بیورمش و بونکله برابر بر عدد سمور کورک ایله مجوهر شمشر احسان ایلمش اولدقلرن دن غازی حسن پاشانک نفوذی بر قاندها انظار انامده زیاده لشمدر .

انجق قریباً بعض مصاحبت کرده اراده شهر یاری ایله رأی سهسالاری بیننده مبیانت وقوعه کله رک سر رشته مصالحینه دو چار عقده تشویش اولمشدر شویله که : قپودانلغه یازار بروزیرک انتخاب و تعیینی بروجه مشروح کندو رأینه تفویض اولنش ایدوکنه مبنی سرداراکرم حضرتلری در حال قپودان دریا بولنان کریدلی حسین پاشانی عزل ایله و دین سرعسکری صدراسبق یوسف پاشانی قپودان دریا نصب ایدوب اردوی هایونده اولان قپو کتخداسنه الباس خلعت و طرفه تحریر و اشاعت ایلدیکی خبری سمع هایونه واصل اولیجق یوسف پاشانک قپودانلغی تجویز بیورلیوب الحاله هذه و دین جانبنده دخی نام آور بروزیرک وجودی لازم و یوسف پاشان غیرى اولحوالیده اداره عسکر ایده حک وزیر منعدم اولدیغندن بشقه و دیندن در سعادته کلنجیه دک موسم دریا حلول ایدوب وقتیه ترتیبات بحریه کوریه مز دیو سرداراکرمک رأی ابطال اولهرق حسین پاشاینه قپودانلغده استقرار بولمشدر .

واصف افندی بوراستی بووجهله یازار ایکن سلطان محمد خان رابع دورنده ملک احمد پاشا و مرادپاشا صدرتدن بعدالانفصال قپودان اولدقلمی امر مسبوق ایسه دخی سنین متواوله دنبرو مثلی مشاهده اولمیان ماده بی فعله چیقارمق غائله سنه دوشمک زوال وقع و نفوذی مؤدی اوله جنی امور ضروریه دندر دیو تحریر ایتمشدر انجق مصاحبت ضمننده بر ماده نک شرع و قانونه طوقنور یری اولدیغی صورتده ولوکه هیچ مثلی سبقت ایتماش اولسون اجراسی معیباتدن اولیوب بلکه محسناتدن اولدیغنده شبهه یوقدر .

کدک در سعادتده کتخدا و کیلی اولان ابراهیم افندی اردوی هایونجه بعض خدماتده استخدام اولنجق اوزره بوائنده اردوی هایون طرفندن طالب اولنوب بوایسه کتخدا سلیمان افندی وقعه سندن صکره ظهور ایلدیکندن ابراهیم افندی و سوسه یه ذاهب اولمغه چاره جوی خلاص اولوب بعض محال منیعیه التجا ایله صره امامته طالب اولهرق کوچ حال ایله جزا لرینک پنجه سندن تخلیص کریمان ایتدکده منحل اولان رکاب هایون کتخدانغی عقیف مصطفی افندی یه احسان بیورلمش و بوکامقابه اردوی هایون طرفندن بویه غرض و نفع ایته محمول وقوعات کتخدا حسن افدینک سوقیه ظهوره کلیور دیو او دخی طرف هایونندن عزل ایله مصطفی رشید افندی با اراده هایون کتخدای صدر عالی نصب اولمشدر .

وینه مواد اختلافک بری دخی حرب و صالح معارضه می اولدیکه بره موال سابق استانبولده پستر نشین عز و حضور اولان صدور ایله سائر ارکان سلطنتک اذهانی قریمی آلمق سوداسنه صارمش ایدوکنندن و پرسیالو دخی بونک کبی ارکان سلطنت سنیه بی حرص و طمعه دوشوره حک و عد و وعیدلر ایله اتفاقه طالب اولدیغندن شرع شریفه تطبیق ایله

اتفاقه صورت ویرلمسی ضمننده اراده سنیه دخی صادر اوله رقی بر منوال سابق اردوی
 هایونه امر و اشعار اولوب اردوی هایون رجالک رأی ایسه هر اصل اولوز ایسه
 اولسون مصلحتی صلح ایله بتور مکدن عبارت ایدی . بوزده بوزغونندن صکره
 کتخدا حسن پاشا اردوی هایون ایله شعیفه و رودنده نمچه دولتی طرفندن دولت
 علیه تقدیم ایتمک اوزره در سعادتده مقیم فرانسه ایلیچیسنه بر قطعه تحریرات کاوب
 خلاصه مضموننده حربك منشئ خاقان مرحومك بر طاقه القات خار جیهه فریفته
 اولسندن عبارت اولدینی حالده ابتدای سفر دن برو فرانسه ایلیچیسنک ممالک عثمانیه ده
 ترمیم مبانی صلح و صلاح خصوصنده واقع اولان مساعی کلیه سنی غیر مضمرا ایدن
 ملحوظات و امالک باطل اولدینی نزد دوات عثمانیه ده تبیین ایدرک صاحبه راغب
 و خواهشکر بولمنسی ملحوظ و مظلون اولوب بو صورتده روما امپراطور یله متفق
 اولان روسیه امپراطور یچیه سی دخی نجت حرب ایله متغیر اولمیان اشتیاقات صاحبه لری
 اقتضاسنجه امتداد سفر ایله ملحوظ و درکار اولان منافع جدیده کلیه لرندن بشقه
 مظفریت حاضر لری ثمراتک بیله بر مقدارینی فدا ایله صاحبه راغب و مائل اولملریله
 سلطان سایم حضر تلرینک افکارینی اکلایوبده لاونم جواب لرندن برینی و قتیله اشعار
 ایلمکمز موجود دیو اشعار اولتمش و بوتحریراتک بر صورتی لف اوله رقی بلغرادده کی
 نمچه قوماندانندن صدر مشارالیهه دخی بر قطعه مکتوب کوندر یلوب خلاصه مضموننده
 امر امپراطوری ایله در سعادتده مقیم فرانسه ایلیچیسنه یازیلان تحریراتک بر صورتی
 دخی بزه کوندر لمش اولمغله و بوسنه مظهر اولدیغمز مظفریت حربیهه و بوندن سنه
 آتیه ایچون ملحوظ اولان فوائد غیر مکتسبه یه نظر آتحریرات مرقومه نك مفهومی
 دولت عثمانیه یه باعث محظوظیت تامه و غیر مأموله اوله جفی مأمول قوی بولمغله جناب
 سعادت مابلریکزی دخی بو محظوظیتدن بر آن اقدم حصه دار ایتمک اوزره تحریرات
 مرقومه نك بر صورتی لفأار سال اولندی . لدی شرف الوصول چونکه متادی سفرک
 و عزیمت ثالثه نك اندفاعی همان مرخصلرک تعیینی و محل مکله نك تخصیصی ایله مکله
 صاحبه یه مباشرت اولتمسنه موقوف اولدیغندن خصوص مذکورده دائر جواب
 صادقانه لرینک بر آن اقدم ورودی مأمولدر دیو بیان قاتممش اولمغله نمچه جاسارینک
 بوزده وقعه سی اوزرینه بو قدر سر کرم نخوت اولوبده بو درجه لرده متعظمانه و بالا
 پروازانه اطواری ارکان سلطنت سنیه یی داغدار ایلدیکی حالده طرف صدراعظمیدن
 دخی بر قطعه جوابنامه یازیلوب خلاصه مؤداسنده صلح و حرب نوجهله بر برینی
 تعقیب ایده کلوب لازم و ملزوم کبی ایسه حصول مراد و عکس قضیه ظهوری دخی
 توأم ایدوکی اصحاب تجر به عندنده مستغن عن الیابندر قالدیکه ترمیم مبانی و داد و آسایش

جانبین مطلوب اولدینی جانب دوستی جالبکزدن بیان اولنمش و دولت علیه عثمانیه نك
محبول و مفظور اولدینی شیم مرضیه نصف و اشفاق لازمه سی و عامه رعایا و کافه برایا
حق لرنده جاری اولان مرحمت کامله و شفقت شامله سی مقتضای اوزره اراقه دماء
عباددن و ازعاج رعایادن احترازاً مسالمة و صفوتی حرب و جداله ترجیح ایلدیکی و بو
باده بعض خواهشکاران مطالب مرموزه نك تشویق و اغرالیله مسلکندن عدول
ایتمدیکی عالملرک معلومی و سزك دخی مجز و مکز اولدینی و دولت علیه اظهار خصومت
و محاربه یه دعوت ایلملرک دخی عون حقه انکالاً مقابله لرندن تحاشی ایتمدیکی مثللو
ینه صلح و صلاح و قوعنده شاننه لایق و جهله سلم و صفوت عقدندن دخی قاجردینی
آشکاردر . فقط امنیه مذکور نك حصولی مقتضای بعد مسافه حسبیه امتداد وقتی
موجب اوله رق اول امرده هر طرفده بر متارکه تنظیمنه محتاج اولدیغندن ابتدای
کارده مقدمه حسن نتیجه اوله جق صورتک اجراسنه تثبث اولنه جغنی موجب
تحریرات ارسال ایلمکز و سیاه میل و رکون درون اوله جغنی بی اشتباهدر (و السلام
علی من اتبع الهدی) دینلرک مقدمه مصالحه اولان متارکه به میل و رضا کوسه ترلمش
و غازی حسن پاشا باراده سنیه روسیه لونک افکارینی یوقلا یوبده ممکن اولور ایسه
بر متارکه تنظیمی ایچون اسماعیل اردوسی دفتر داری قپوجی باشی حاجی بکر اغای
اسماعیلدن بندر جانبنده بولنان پرنس پوتمکینه کوندرمش ایدی متعاقباً برمنوال
سابق غازی حسن پاشایه صدارت توجه ایتمکله شمنیه و رودنده (باروج) نام روسیه
سفیری شمنیه کله رک دولت علیه نك بو محاربه ده استیلا اولنان اراضیسی رد اولنق
کبی اساس مصالحه اتخاذ اولنه جق شرائطه دائر ایراد ایلدیکی بعض مقالات مصاحبت
آمیزی قوبان خانی بختکرای خان ایله سردار اکرم نرندده مستحسن کورلمکله مجلس
مشورت عقد اولنوب جمله ایله لدی الاستشاره حاضر اعدا طالب ایکن صلحه رغبت
اولنق مناسبدر دینلرک کبرک سردار اکرم و کبرک سائر ارکان اردو طوغریدن
طوغرییه دوشمنلر ایله مصالحه ایتمکی ترجیح ایتمکدن صکره پروسیایه اتقاق
ماده سی در میان اولندی .

چونکه در سعادتده پرسیالو ایله عقد اتقاق اولنمشو بلمشاوره تنسیب اولنوب فقط سردار
اکرم دن استیذانه موقوف اولنغله کیفیت طرف قائم مقامیدن غازی حسن پاشایه تحریر
و اشعار اولنمش ایدو کندن بو کره برمنوال سابق مجلس سالف الذکرده خصوص
مذکورده نقل کلام اولندودده بوجه مشروح حضار مجلس دشمنلر ایله همان مصالحه
عقد اولنق طرفنی ترجیح ایتمکری کبی پروسیایه اتقاق صورتی امتداد حربی
موجب اوله جغندن بونی تهجین و تقیم ایلمکری صرده اردو قاضیسی شانی زاده

افندی دخی (یا ایها الذین آمنوا لاتخذوا عدوی وعدوکم اولیاء) آیت کریمه سنی
 او قویوب عدم مشروعت اتفاق تصریح ایتشدر .

الحاصل روسیه ونمچه دولتتری منفرداً مصالحهیه خواهشکر اولوب سردار اکرم
 دخی اردونک پریشانلغدن ناشی امتداد محاربه دن اجتناب ایله بو صورتی ترجیح
 اتمش ایسه ده مصاحتک جسامت واهمیتنه نظر اگمسنه بونک مسؤلیتینی اوزرینه
 آله میوب اردودن استانبوله واستانبولدن اردویه آتیه کیمکله بوکره دخی رأی قطعی
 بیان اولنمیوب مصاحتک قرار قطعیمی در سعادتده صدور علما ایله بالمشاوره صادر
 اوله جق اراده سنیهیه بالتعلیق مجرد بیان مطالعه اولمق اوزره مجلس مذکورک صورت
 مذاکره وقراری قلمه آلتوب و طرف صدر اعظمیدن دخی قائم مقام پاشایه بو باده
 اذن ورخصتی حاوی تحریرات یازیلوب دفتر امینی علی رائق افندی وکتبخداکاتبی
 اولوب صدر اعظم دائر سنه قدم تردد ومنسویبتی اولان حسن افندی ایله در سعادتده
 ارسال و تقدیم اولندقدده اقدمجه مقدمه مصالحه اولان متارکبه رغبت اولنمش ایسه ده
 دولت علیه مقدما روسیه ونمچه دولتلرندن کوردیکی بیوقالقلره بناء آنلردن مناسب
 الامنیه اولمغله عقد اولنه جق مصالحه نک کفالت دولیه تحتنه قونلمسی امانده اولوب
 پروسیالو ایسه لهستانه دائر اولان مصالحنی تسویه ده قوت آلمق ایچون مصالحهیه توسط
 ایامک اوزره اشبو ضمان وکفالت صورتی در عهده ایتدکن بشقه بر چوق منافع
 زائده ازانه سیله عقد اتفاق مطالبه مندن خالی اولمغله در سعادتده ذهنلر پروسیا
 طرفته مائل اولدینی حالد بو ائناده بندر قلعه سی روسیه لونک گرفتار پنجه استیلاسی
 اولمغله بونک اوزرینه مغلوبانه مصالحهیه میل ورغبت کوسترمک سلطنت سنیهیه کران
 کلدیکندن بونک ایچون حضور هایونده مجلس مشورت عقد اولندقدده اگر چه صالح
 هر حالد خیرلو ایسه ده برکره اولسون روسیه لو ایله مقابله اولنه رق مغلوبیت
 او طرفده ظهور ایلدکن صکره صلح طرفی ترجیح اولمق اوزره قرار ویریلوب
 فقط علی رائق افندییه دفتر دارلق و حسن افندییه روژنامهجه اول منصببری توجیه
 اولمق اراده بیوریله رق بو جواب ایله اردوی هایونه اعاده اولمشلدر .

اسکیدن اوروپا احوالنه وقوف اولمدیغدن باجمله دول نصاریه یکجهت نظریه
 باقیلوب لدی الاقتضا بریه عقد اتفاهه رغبت اولتماز ایدی حتی روسیه ایله تمچه نک
 اتف اقلرینه مقابل دولت علیه دخی بعض دول اوروپا ایله اتفاق ایتک لازمه دن
 اولدینی مقدا اخطار اولمشیکن رغبت اولتماشیدی دول اوروپا ایسه اختلاف
 مسلک و مذهب حسیدیه بربرینه مخالف اولدقلرندن بشقه برمدتدبرو دین و مذهب
 محاربه لرینی ترک ایله جنک وجدالری منافع مخصوصه لری داعیه سنه منحصر اوله رق

مدار اتفاق بینرنده منافع ملکیده اشتراکدن عبارت قالمشدر بو حالده جای ملاحظه
 انجق اتفاق اولنه جق دولتک مقصد صحیحی ندر و پولتیقه سی نه یولده در و جنک و صالح
 بخشنده نه در جهیه قدر کیده بیله جکدر شورالرنی تخری و استنباط ایتمکدن عبارتدر
 اما پروسیا اتفاقک مشروعیته و عدم مشروعیته بحثه کنجه بو مثلوه استعانه مسبوق
 بالامثال و تجویز کرده فقهاء موثوق الاقوال اولدینغی حالده سردار اکرمک و سائر
 اردو رجالتک رأیلرنی تأیید ضمنده شانی زاده افندینک بونی شرعاً منع صدندنه
 بولنسی علم فقهده قلت بضاعه سنه دلالت ایدر فقط بو ملامسه ایله مصلحتک اصل جای
 مطالعه اولان جهتی مسکوت عنه قاله رق بر مسئله علمیه میدانه چیقوب شیخ الاسلام
 وقت اولان حمیدی زاده مصطفی افندی ایسه فحول علمادن و ظاهر و باطنی معومور
 اولوق اوزره معروف اوله رق انظار خواص و عوامده سوزینه اعتماد اولنور ذواتدن
 اولدینغی حالده سائر فضلالی عصر ایله مباحثه و مذاکره ایدرک بو بحثی خارجه بالاخراج
 آیت مذکور حاطب بن بلتعنه حقه نازل اوله رق ائمه حنفیه اجتهادینه کوره صد
 آخره محمول اولدقندن بشقه (ان الله تعالی لیؤید هذا الاسلام برجال ما هم من اهله)
 حدیث صحیحنده وارد اولان رجالدن مراد اهل اسلام اولیان رجال اوله رق یا زمان
 سعادتده بولنانلرک یا خود اخبار بما سیکون قیلندن اوله رق بعد برهه من الزمان ظهوره
 کله جک رجال اولغله بو تقدیرجه قول اخیر معجزات باقیه حضرت مصطفویه دن معدود
 اولدینغی جهابذده اهل حدیث تألیفات معتبره لرنده تصریح و بعضیلری قول اولی
 و بعضیلری عموم لفظ اعتبار ایله قول اخیر تر جیح ایلمش اولدقلرنی و دیگر حدیث
 شریفده (ان الله لیؤید الدین بالرجل الفاجر) وارد اولوب فاجردن مراد کافر و دیندن
 مراد دین محمدی اولدینغی و صحیح مسامده (انا لانستعین بمشرك) حدیث شریفی
 بو حدیثه معارض اولوب اول وقت معینه مخصوص اولدیغندن بشقه صفوان بن
 امیه نك مشرك اولدینغی حالده حنین غزاسنده حضوری دلیل نسخ ایدوکنی و بوندن
 بشقه بنی قریظه معاهده سی کبی صدر اولده کفار قبائل عربدن لمصلحه استمداد
 و قوعنی سلطان سلیم خان حضر تلرینه بنفسه عرض و افاده ایدوب آنلر دخی فی الاصل
 پروسیا اتفاقنه مائل اولدقلرندن بو وجهله مسامع شرعی اولدینغی معلوملری اولیجق
 همان پروسیا اتفاقک تمویبه و تنظیمی اراده بیور مشدر .

واصف تاریخنده حمیدی زاده افندینک ترجمه حالی تخریر صدندنه جزائر لونک
 حللی معلوم و اتفاق مرضیسی اولدیغندن خلافتنه حرکت ایدنلره غیظی مجزوم ایکن
 حمیدی زاده افندی جسارت ایدوب طرف هایونه ماده نك مشروعیته طلاق
 لسان ایله تخریر ایتمکله دولته عرض خدمت ایلدی و طرفندن غدر کونه و قوعبولان
 اوضاعه بو خدمتی مقابل اوله جنغی مسامدر دیو محرردر .

بو سفرک و قوعنده قترینه کندوسنه او توز بیک سواری ایله اغانه اولمق اوزره لهلولر ایله بر معاهده اتفاق یایمق ایستمش ایسه ده روسیه لونک انک اولکی نشانگاه طمع و تهاکی له ممالکی اولدیغندن له حکومتی طرفندن موافقت اولمدیغنی پروسیالو فرصت انخاد ایدوب دولت علیه ایله خفی اتفاقه کیریشوب و لهلولری بتون بتون کندو طرفنه جلب ایدوب حتی بو خلالده له دولتی دخی دولت علیه ایله عقد اتفاقه طالب اولغله رئیس الکتاب و کیلی راشد افندی درسعادته مقیم له مرخصی ایله مکالمه مأمور اولوب انجق هر ماده پروسیالویه بیان اولنور ایدی . بزینه صده کله م .

علی رائق افندی ایله حسن افندی جواب مذکور ایله شغنی یه وارد اولوب انجق دولت عایه تدارکات سفریه سنی اکل ایچون بر مدت اعدایی اغفال ایله امرار وقته محتاج اولدیغندن و سردار اکرم بوایشی صالح ایله بتورمک صورتندن بتون بتون قطع امید ایلمیوب خصوصیه پروسیا اتفاق اردو طرفندن درسعادتك قرار قطعینه حواله اولمش ایسه ده درسعادته بوکا هان قطعی وجهله قرار ویریه جکنی بکده امید ایتدیکنندن ینه سر رشته مکالمه منقطع اولیه جق صورتده روسیه سفیری اعاده اولمش و برمنوال سابق مصلحتک قرار قطعیمی درسعادته احاله اولندقدنصره ینه طرف سردار اکرمیدن قائم مقام پاشایه مصالحه محاربه اوزرینه تقدیم اولنسه مطلوب هایون بیوردینی اوزره شانلو و دولت علیه خیرلو اوله رق امر مصالحه نك تمشیت پذیر اولسی نامعلوم و پروسیا و اسوجلونک ضامن اوله جقلمری و ایراد ایلدکاری منافع اعتماداً محاربه مصالحه اوزرینه ترجیح اولنسه اسباب محاربه نك فقدانی جهتیه محذور کلی اولان امتداد محاربه قضیه سی آشکار و مجزومدرکی ذهلری شکوک و شبهاته دوشوره جک و بلکه جانب صاحبه اماله ایده جک تعیرات ایله برقطعه تحریرات یازلمش ایدی .

درسعادته عقد اولنان مجلس مشورتده ایسه پروسیا ایله اتفاق ماده سی در میان اولوب حضارک بوبابده رأی استفسار اولندقدنه بزبونی مقدماتی مناسب کورمشیدک انجق اجراسی سردار اکرمیدن استیذانیه موقوف اولغله اذن ورخصتیرینه تعاقب اولمشیدی شمدی مادامکه اذنلری سنوح ایلدی هان ایچانه باقلسون دنلمکله روم ایلی قاضیمسکری عاشر افندی ورکاب هایونده رئیس الکتاب بولنان راشد افندی پروسیا ایلیجیسی ایله مکالمه مأمور اوله رق (۱۷۹۰) سنه عیسویه سی کانون ناینسک او توزنجی یعنی اشبو (۱۲۰۴) سنه سی جمادی الاولاسنک اونالتنجی کونی شروط خمسینی حاوی برقطعه عهد نامه اتفاق تنظیم و امضا ایشلر ایدی که صورتی زیرده (۱) رقمیه قید اولنور .

ارتق مصاحبتك شورايه بورايه آيامسنه محل قالمیوب همان تداركات حربيه به تشبث اولمق لازم كلديكنه دائر طرف قائم مقامیدن سردار اكرمه يازيلان قائمه ايله برابر سند مرقومك اردوى هايون طرفندن دخى تمهيري لازم كلديكندن صورتى اردوى هايونه ارسال اولمش ايسه ده جزا تولى حسن پاشا وقتنده امضاسى ميسر اولميوب خلفك زمانه قالمشدر . زيرا بواثنا ده مشار اليهك وفاى وقوعبو لمشدر .

شويله كه : بروجه بالا قائم مقام پاشانك قائمه سيله صورت سند اردوى هايونه كلد كده سردار اكرم غازی حسن پاشا نژنده بولنان باروج نام روسيه سفيرينه يول ويردكدن صكره تداركات سفريه به تشبث ايدوب حتى رجبك ايكنجى كوني بر معناد توغ آصفي نردبان باشنه اخراج اولمشيدي . لکن ماه مرقومك سگنژنده سردار مشار اليه همای محرقه دن طوتيلوب اون دردنجي صالى كيجه سى ساعت ايكي به قريب ارجعي امرينه اجابت ايلديكي وساطت محرمان ايله اردوى هايون رجاله اخبار اولدوقده عجباً صحيح و واقعي ديه رك هزار خوف و احتراز ايله باب آصفیده اجتماع ويكديكرى ايلرويه سوق ايله بر قاچ دقيقه توقف و نزاعدن صكره كيمي قان طومش و كيمي خواب راحت و وارمش ديه رك ترسان ولرزان نغشى اولان محله دخول ايله قضيه ني تصحيح ايلديكرى كبي في الحال خزينه سنى تمهیر و شمینده وزرادن كمنه اولديغندن روسجق محافظى بولنان قائم مقام اسبق حسن پاشايه ارسال پیام ايله برابر واقع حالی در سعادت و تحریر ايتدكارندن صكره صدر مر حومك نمازی جم غفير ايله ادا واقده خارج شمینده بنا ايتمش اولديغى بكتاشى تكيه سنده دفن ايدمش و وصولتندن زهره چاك خوف و هراس اولنلر نمون و مستريح قالمشدر .

* ترجمه حال *

مشار اليه غازی حسن پاشا في الاصل تكفور طاغى قصبه سنده حاجى عثمان نام بر تاجرك كوله سى اولوب صغر سنده

* بيلت *

* عرام الصبي في الصغر * دليل على رشد في الكبر *

سرينه مظهر اولدوق محله چوققنر يله غوغا وجدال دن خالى اولديغى جهتله عثمان اغا آنى بر طرفه بيع ايله دفع ايتك ايتدجكه زوجه سى اولاد مثابه سنده اتخا ايتمش اولديغندن منع ايدر مش لکن اون يدى اون سگنر ياشارينه بالغ اولدوقده مملكت دلى قانلور يني دوكمكه و شوکا بوکا سلاح چككمكه باشلايوب هر طرفدن شكايه خيلر پيدا اولغله عثمان اغا آنى تكفور طاغندن دفعه مجبور اولمغين آزاد ايدر ك كندوسنك تجارت سفينه لرينه وضعله بعض محالره كوندرمش . يوز الى ايكي تاريخنده سنى

یکرمی بشه بالغ اولدینی حالده درگاه عالی یکچیری زمهره سندن یکرمی بش بلوگک اورته سی قره قوللقجیانی ایله بلغراد سفرینه عزیمت وموراوه وحصار جق جنککرنده فرط جلادت ایله کسب شهرت وتکفور طاغنه عودت ایله کدن صکره جزائر کیتمک اوزره راکب اولدینی جزائر کمپسی دکزه آچیلدقده تصادف اولنان براجنبی کمپسینه رانیه ایدلمش ایسه ده شدت تلاطم حسسیله درحال کمیلر بر بردن آیرلمش انجق حسن اغاکمیلر یکدیگره چاقدینی آنده اول اجنبی کمپسینه آتمش بولندیغندن همان یتاغانی چکوب اون بش قدر طائفه لری قتل واعدام ایتمش وباقیسینی قاره یه قاتمش اولمغین کندوسی یتاغان انده یالکنز قلوب کمی دخی دکزک اورته سنده قومانداسز طولاشمقده بولتمش اولدینی جزائر لور کور بچک همان اوزرینه واروب ضبط ایلمش لر وآلوب جزائر کوتوردکلرنده اوراده حسن اغانک بو جراتی وصف ایدرک اصولری اوزره مذکور کمی بی اکا ویردکن بشقه بر قهوه خانه دخی بخش ایدوب دفعه دایملر ساکنه اد خال ایتمش لر بوضورتله حسن دایی جزائرده زیاده شهرت قازانه رق آز وقت ظرفنده تلمسان بکلکی ایله سر افراز اولمشدر .

عادت دهراوزره جزائرک کبرای ایله بینلرینه منافرت کیره رک اسپانیاه هجرته مجبور اولوب اسپانیالونک معاوتیله در سعادت کلد کده سلطان مصطفی خان ثالث دورینک اولئنده دریا قبودانلری زمهره سنه الحاق اولتمشیدی مرور زمان ایله بحسب الطریق والاستحقاق قبودانه همیون اولدقند نصکره سکسان درت تاریخنده لمی جزیره سنی روسیه لودن استخلاص خصوصنده ظهوره کلان دل اولرکی حسسیله غازی دیو تلیق اولنوب عهده سنه دریا قبودانلی احسان اولتمشیدی . بعده بر آراق قره سر عسکر لکیله طونه یالسنه ارسال اولتمق حسسیله قبودانلقدن عزل اولتمش ایسه ده قریب العهده ینه قبودان دریا اوله رق ایکیموز اوچ سنه سی رجینه دک قبودان بولنوب بعده بر منوال سابق روسیه جانی سر عسکر لکی ایله سفره تعیین اولندقده اوزی طرفنه کیتمک اوزره اسماعیله لدی الوصول روسیه لویله بعد الحاربه اسماعیله دخول ایدوب اسماعیل قلعه سنده ایکن صدر اعظم اوله رق شمعی یه وصول برله اوراده وفات ایلمشدر . ترسانه عامر ده قالیونخیلر ایچون یسنا ایتمش اولدینی کار کیر قشله حالا باقی اولوب در سعادتده عساکر بحریه ایچون الک ابتدا یالتمش اولان قشله بودر بوندن بشقه جزائر بحر سفیده ومحال سائر ده دک چوق خیرات وحسانای اولوب خصوصیه مدلاو جزیره سنده درت ساعت یردن صوکتورده رک ساحلده چشمه لر وبافله قریه سنده کذلک بر کوزل چشمه و پتره قریه سنده جامع وحمام واوچ چشمه و درون

جزیره ده پاشا کوشکی دینلان محله جوانب اربعه سی مرمرایله مفروش بر بیوک
حوض بنا واحیا و کذا لمنی و ساقز و ردوس و استانکوی جزیره لرندہ دخی چشمه لر
انشا و سائر میرات کثیره لر یله نامنی ابقا ایدوب کیتمشدر .

بدایتدن نهایته قدر اولان احوالی ضبط و تحریر ایتدرمش اولمغله تفصیل حالی
بیلمک ایستیانر اول کتابة مراجعت ایلسون دیو انوری افندی تحریر ایتمشدر .
هله اول عصرک اک مشهور وزرانندن اولوب دولته بک چوق خدمت لر ایتمشدر .
خصوصا بو محاربه نك بدایتده اعانه حربیه اولمق اوزره عبد الحمیدخان حضر تلرینک
طلب وارادہ سی اوزره اون ایکی بیک کیسه آچمقلق آتون ویرمش دیومرویدر فقط
مورخ سعید افندی نك تحریرینه کوره صدر اسبق خلیل حمید پاشا نظامات عسکر به یه
یولیه تشبث ایتمشیکن حسن پاشا احمد نظیف افندی ایله بالاتحاد خلیل حمید پاشانک
اعدامنه علت اولمش اولوب بوراسی صحیح ایسه حسن پاشا دخی هدف طعن مورخین
اولمغه سزاوار واکر چه اولوقت خصمه غلبه تحتده کندی جاتی تخلیص ملاحظه سی
مستتر ایسه ده بویه عموماً ملت و دولتک استفاد ایدہ جکی مواد تنظیمیه تشبث ایتمش
اولان برذاتک اعدامیله بویه بر مصلحت خیریه نك تأخیرینه سبب اولمق عفو
ناقابل بر قباح اولدیغنده شبهه یوقدر .

جلد ثانی و نالنده بیان اولندیغی اوزره واصف افندی غازی حسن پاشانی تاریخک
بعض محلندہ قرح و ذم ایدوب بعض محلندہ دخی اکا کرامت اسناد ایدرجه سنه
مدخنده اطرا ایلر . آنک حقدہ کلاملری متناقضدر و بوجهته اعتباردن ساقطدر .
حقیقت حالده غازی حسن پاشا اول عصرده نادر الاقران و دولته بک چوق
خدمتی سبقت ایلمش بروزیر عالیشان ایدی . (رحمة الله علیه)

* روسجقلی حسن پاشانک صدارتی *

غازی حسن پاشا اول عصرک نادر الامثال آدم لرندن اولوب وزرا ایچنده یرنی
طوته جق بر آدم یوق ایدی . بناء علیه و فاتی خبری واصل سمع هایون اولیجق
یرینه برینک انتخاب و نصی امرنده حیرت الویرمکله شیخ الاسلام حمیدی زاده
افندی نك رأی اوزره روم ایلیده موجود اولان وزرانک اسملری برر کاغده
تحریر ایله خرقة سعادت او طه سندہ یدمؤید ملوکانه یه هر قنغیسی کلور ایسه صدر اعظم
ایتمک اوزره ارانه ایلد کده قرعه صدارت قوجه یوسف پاشا صدارتندہ و دین
صحر اسنده لواء شریف قائمقامی اولان و حالا رحوه محافظی بولنان روسجقلی شریف
حسن پاشا نامنه اصابت ایتمکله تبدیل خاصکیسی جلاد محمود مباشر تیله مهر هایون
کندوسنه ارسال بیورلمش و رحوه دن شمعی یه وصولنه دک روسجق محافظی حسن

باشانك اردوى هايون قائم مقاملغنه دائر اردوى هايون نه بر قضعه خط هايون كوند رلمشدر .
 اشبور روسجقلى شريف حسن باشا اولكى سفر لرده روسجق اعيانلغندن نائل رتبه
 وزارت اولوب بعد المصالحه وزارتى رفع اولنه روق بوسفر ك كشادينه دك كوملجنه ده وبعده
 روسجق وسلانيكده منفي اقامت اوزره اولوب اشبورسفر ك بدایت كشادنده وزارتى ابقا
 ايله ودين وبعده رحوه محافظه سنه مأمور اولمشیدی . لکن جلوس عبدالحمید خانیدن
 بو وقتلره دك چكديكي محن و مشقت قابل تعريف اوليوب بو خالاده دخى بلامنصب
 رحوه محافظه سنده اوقات كدار اولغله جزا ئلى حسن باشانك وفاتى ايشتكده عجا
 صدر اعظم اوله جق ذات شريف بر منصب عنایت ايدر ك بزیده قايررمى ديوخوليا
 ايدر كن جلالد محمود ايله مهر صدارت رحوه ده يدینه واصل اوليجق نه اولديغنه
 كندوسى متحیر اولديغى كې كندوسنك اندرون ويرونده بر حامى ومعين وظهرى
 اولديغندن بويله من غير مأمول صدارته كلديكنده السنه ناده رشوت ايله اولمشوق
 فلان كباره تعلق وارمش كې حوادث منتشر اولمش وبعضيلر دخى مشار اليه سلانيكده
 منفي اقيم ايكن سلانيك منلاسى بولنان كچه جى زاده صالح افندى ايله الفت و اختلاطلرينه
 بناء صالح افندى در سعاعته عودتنده مشار اليهك مدح و ثنائسنده بولنه روق در سعادتجه
 معروفيته بادی اولديغندن بو كره جزا ئلينك وفاتنده طشره ده تربيه پذير اولمش
 روزير لين الجانب اولديغنه منى صولتندن خاص وعام امين اولور ايميديله سلطان سليم
 خان حضر تارينه توصيف اولنه روق صدارته كتورلمش كې مغالير و يرديلر .
 هر نه ايسه من غير مأمول خاتم صدارتى زيور صدر اقتضار ايدوب رحوه دن
 حر كت و اثنای راهده

* بيت *

ديار بها حل الشباب تيممى * واول ارض مس جلدی تراها
 مضمونى كويان اوله روق روسجقده بر كيجه خانه سنده بيتوت ايلد كدن صكره شعبانك
 غره سى ونيسانك بشنجى جمعه كونى شمعى يه مواصلت بر له مقام صدارته صعودنده
 بعض مناصب ديوانيه نك تبديل و تحويلى صره سنده على رائف افدينك دفتر دارلغنى
 دخى اجرا ايلمشدر .

تاريخ واصفده بيان اولنديغى اوزره على رائف افدينك دفتر دار اولسى اچون مقدا
 اراده اولنمشيكن اوزمان كتخدای صدر على بولنان حسن افندى ماده ي تسيب
 ايتمه رك نهانى تاخير ايله منغه سى اتمش وقتا كه اساس صالحه دائر اولان مواد ايله
 على رائف افندى در سعاعته كیده جك اولديسه هر حال اورا ده بو كيفيته مطلع
 اوله جنى ملاحظه سيله حسن افندى حين وداعده سرك دفتر دارلغنى اكر چه اراده

اولنمشیدی لکن غائبهء موجب تأخیر اولمغله آستانه به
 واروب کلد کدن صکره منصبکیز حاضر در کلامیله کندو صنیعه و خیانتی تأویل
 ایشیدی . رائق افندینک دفتر دارلنی در سعادتده تأکید اولمغله بوکره اجرا
 اولنهرق سلفی فیض الله افندی دخی دفتر امینی اولمشدر .

بروجه بالا اردوی هایونه کوندرلمش اولان پروسیا اتفاقنامه سی اوائل شعبانده بالجمله
 رجال دولت و او جاقلو طرفدن تمهیر و تصدیق اولمشدر .

اشقودره لی قره محمود پاشاقدجه عفو اولنهرق یکی بازار جانبی باشبونغی نصب اولنوب
 نیاز واستدعاسی وجهله رتبهء وزارت اعطاسی دخی وعدا اولنش ایسهده صدر
 مرحوم غازی حسن پاشا مومی الیهه وزارت اعطاسی مناسب دکلدر دیورکاب هایونه
 انها اتمکله پیمانده قالمشیدی . بوکره خصوص مذکور صدر جدیدک رأینه تفویض
 اولمغله وعد شاهانه نك افذازی لازمهء حالدن کورلدیکنه مبنی اردوی هایونده عقد
 اولنان مجلس مشورتده کیفیت در میان اولنهرق حضاردن رأی صورلدقده محمود پاشا
 شمیدی یه دک مضامین ارادات سنیهی درک واذعان ایله موجبنجه حرکته دامن در میان
 اولدیغنه نظراً کندوسنه وزارت اعطاسی استحسان ایتیز لکن نمچه لو بلغراد
 و بکوردان و دیگر بعض قلاع بوسنه یی استیلا ایدوب بوسنه نك دیگر جهتلرینه دخی
 سوء قصدی آشکار اولمغله کرک بلغرادی استخلاص و کرک یکی بازار طرفدن دشمن
 اوزرینه هجوم مصلحتلرندن برینک پاشای مشار الیهه احاله سی لازم کله جکی حسبیله
 شمیدی وزارت ویرلسه یرندن حرکت ایتیه جکی ظاهر در . بناءً علیه تعیین اولنه جنی
 محله مستقیمانه خدمت ایلمک و مقدمات خلافتده بولنانلری تکدیر ایتامک شرطیله
 وزارت ویرلمک ایجاب حالدن کورینور دیملریله عهدۀ مشار الیهه رتبهء وزارت ایله
 یکی بازار سرعسکر لکی توجیه و اشقودره سنجاغنه الحاقاً اناطولی ایالتی احسان
 اولنهرق ایالت مرقومه دن برسنده حاصل اوله جق التیوز کیسه مصارف حربیه سنه
 مدار اولمق اوزره بوجه پیشین کندوسنه ارسال اولمشدر .

موسم بهار حلول برله ایام کارزار تقرب ایلمش اولدیغندن اردوی هایونک صحرا یه
 اخراجی تدارکنه تشبث اولدینی صره ده صدر متوفاغازی حسن پاشانک اسماعیل
 سرعسکر لکننده دلی باشیدی اولوب اسماعیل معرکه لرنده یارارلنی ظاهر اولان عثمان
 اغا معیتده کلینلو دلی عسکری اولمغله تفرقلرندن احترازاً و کندوسندن خدمت
 مأمول اولدیغنه بناءً عهدۀ سنه میر میرانلق توجیهله ایساجنی محافظه سنه مأمور
 بیورلمش و آندن دخی مأموریتی طوترقان سواحلنک محافظه سنه تحویل اولنوب
 اوراده دخی یارارلنی ظاهر اوله رق کسب اشتهار ایلمشدر .

وایام بهار حلول برله اعدادن اخذنار ایچون طرف بطرف سوق عساکر اولنمق
زمانی کلد کده (من جهز غازياً فقد غزا) مدلولنجه والده سلطمان حضرتلری
بشیوز نفر بستانجی وباش چوقدار حسین اغا الی نفر یکیمچری تجهیز وخر جراهلرین
اعطا ایله اردوی هایونه ارسال ایتشلردر .

یکیمچری اغاسی اولان یحیی اغا اداره امورده موفق اوله مدیغندن عزلی لازم کله رک
یکیمچری اغاغنه سابق قول کتخداسی ابوبکر اغا ایله دیوان افندیسی دینمکله
معروف اولان میر میران عثمان پاشادن برینک اتخاب و تعیینی ایچون اراده سنیه
صادر اولمش ایسه ده ابوبکر اغا حالا اسماعیل اغاسی اولوب بوانشاده اسماعیل
قلعه سنک تقوی لازمه دن بولندی حالد اغالرینک اخراجی ایجاب وقته منافی
اولدیغندن بشقه ملک محمد پاشا و دین محافظی ایکن ابوبکر اغا و دینه ترتیب اولنان
اورتله ر ایله اردو اغاسی اوله رق و دینه واروب اولوقت و دینه وقوع بولان اختلال
واختلافه سبب اغای مومی ایله اولدیغندن شمعی اغالق خدمته چندان مناسب
اولدیغنه و دیوان افندیسی عثمان پاشا دخی او جاقده تربیه پذیر اولمش اولمیوب
خارجدن سلسله یه دخول ایله احراز رتبه ایلمش اولمسیله اغاغه کتورلسه او جاقدن
یولسیله یتشمش کبی اولدیغندن شاید او جاقلو نمون اولماق احتمالی وارد خاطر
وبو حالد کندوسی دخی رتبه وزارت طلبنده اوله جنی ظاهر اولدیغنه مینی
هر قغیسی اولسه یکدیگری نه ترجیحی ممکن اوله میوب ایکسنک دخی یحیی اغایه
وجه رجحانیتلری اولیه جنی واردوی هایوندن روسجق محافظه سنه عزیمت ایتمک
اوزره اولان وزیر حسن پاشا ایکی اوچ دفعه قائم مقام وایکی دفعه اغا اولغله سائرندن
زیاده نفوذی اوله جنی او جاقلو دخی کندوسندن خشنود ایدوکی ویت المالی
صیانت ایده چکی جهته اغاغه جمله دن زیاده انب اولدیغنی صدر جدید طرفندن
رکاب شاهانه یه عرض اولندقدده تقریرک بالاسنه تحریرک اوزره حسن پاشایی یکیمچری
اغاسی نصب ایده سین عسکرینک نظامنه و جنمکده کچن سنه کبی ایتیموب ثبات
ومتانت ایتلرینه کمال دقت ایلمسینی طرفندن کندویه کرکی کبی تنبیه ایده سین
اولکی کبی عسکر دن آنچه آلدیغنی ایشیدر ایسه م وایشنده کوشک طاوراندیغنی
طویار ایسه م المدن قورتوله مز حقندن کلورم دیو خط هایون کشیده بیورلمش
اولدیغندن حسن پاشا یکیمچری اغاسی نصب اولندقدده اول امرده برجیله کوسترمک
اوزره در حال محلولاتی تحریر ایتدکده سلفی یحیی اغانک اسماعیل اردوسی اغاغنده
تحریر اولنان دالقلیج نفر اتندن ایکمیوز قرق یدی نفرک مهور سنداتی بلا صاحب
اوله رق یاننده آیقودیغنی لدی التحقیق نفرات مرقومه نک درتیوز سکسان آنچه
یومیه لرینی تنزیل ایله سعی میری ایلدیکی رکاب هایونه عرض اولنمشدر .

هر حال وزمانده و خصوصاً بویله ایام حربده عسکر باشبوغی اوله جق ذاتلر
 تجر به سی سبقت ایتمش مجرب و کار گذار و افراد عساکرک حسن ظن و اعتقادینه مظهر
 اولان ذواتدن انتخاب اولنمسی ایجاب مصلحتدر انجق صدر جدید حسن پاشانک دور
 حمید خانیده ایام عمری عالم ادبارده کچوب بوکره من غیر مأمول نائل مسند صدارت
 اولیجق مصلحتده درت ال ایله پاشوب سلطان سلیم خان حضر تلرینه نصل صدقله خدمت
 ایده جکی بیلمز ایکن بو خصوصده مداهنه کارلق یولنه کیتمیوب ایجاب حالک
 طوغریجه سنی عرض و تقریر ایتمسی تحسین اولنه جق بر حرر کندر ایشته صدور عظام
 حضر اتنه لازم اولان خصال حمیده نک باشلوجه سی بودر . زیر ایشک اصل صاحبی پادشاهلر
 اولوب فلان یا خود فلانک قایلنندن ایسه مصلحتک حسن حصولنی جمله دن زیاده آنلر
 آرزو ایتمک امر طیبی اولدیغندن آنلره صداقت حقیقت حالک طوغریجه سنی بیاندن
 عبارتدر بناء علیه سلطان سلیم خان حضر تلری سردار اکرمک بو عرضندن مغبر
 اولیوب بروجه تقریر اجراسنی اراده بیوردیغندن بشقه ممنون و محظوظ اولدیغنه
 بودخی شهادت ایدرکه بوائنده سردار مشار الیه خطاباً رأساً بیاض اوزرینه
 برقطعه خط هایون صادر اولوب مضموننده اردوده اولان بعض کسینه لر بزم
 شوکتلو افندمره تعلق تائمز واردر دیو نابرجا حرکت ایلدکاری مسموع اولوب
 حالبوکه طرف هایونمه تعاقی اولنلر انجق دین و دولتمه صداقتله خدمت ایدنلر در
 دیو بیورلمشدر فی الواقع پادشاهلره تعلق تامک وسیله صحیحه سی صدقله خدمتدن
 بشقه برشی اوله میه جفی مسلمانلندر فقط بعض خصوصاتی لغرض یوروتدیرمک
 اوزره ایجاب مصلحت قاغنه قویوبده عرض واجرا ایتمک برنوع اغفال دیمک
 اولدیغندن جزئی بر ملاحظه شخصییه شائبه سی طبع ملوکه کران کلور و بو مقوله افکار
 غرضکار یسی محسوس اولان اتابکان سلطنت حسن ظن ملوکن دور اوله رق
 صکره طوغری و یولو ایشیده کوره مز اولورلر اما غرضدن عاری اوله رق مصلحتده
 یایشانلر مظهر نظر ملوکانه اوله رق هر خصوصه ظفر بولورلر لکن شخصیاتی بتون
 بتون ترکله محضاً مصلحتده حصر نظر ایدن ذوات پک نادر اولدیغندن اتابکان دولت
 ایچنده موفقیت تامه ایله بنام اولنلر دخی نادر ظهور ایتمشدر صدر جدید حسن
 پاشا اگر چه بدایت حالده بویله خالصانه ایشه یا شمش ایشه ده حسب البشریه اودخی
 بتون بتون افکار شخصییه و اغراض ذاتیه دن تصفیاً دماغ ایده مدیکی بعده ظهوره
 کلان بعض حرکتندن مستبان اولور .

حتی بوخلالده سلانیک متصرفی اولوب سوریحیلک ایله اردوی هایونه مأمور اولان
 سلیم پاشانک ایفای مأموریتنده بطاقت و رخواقی مسموع اولدیغنه مبنی مالی بالمصدره

لمنی جزیره سنه نفی واجلا اتمسی مجرد حقهده عداوت قدیمه سی اولدیغندن ناشی
ایدوکی مرویدر .

کتبخدا قلمندن نشئت ایدوب ایکی سنه ظرفنده کتبخدا کاتبایکنندن برمنوال سابق
روزنامهچہ اول اولان حسن افندیکنک اوغلی محمد راشد افندی پدیری کبی مساعده
ایام ایله ایکی اوچ سنه ظرفنده قلم مذکورده خلیفه وکاتب و نهایت سواری مقابله جیسی
اولوب فی الاصل احتشام و تمایشه مائل و حدائت سنی حسبیله زمانه تجربہ بی سبقت
ایتماش اولدیغندن ایجاب عصرک سسوق و نصیحت ایده کلدیکی حال و حرکتدن
غافل اوله رق توسیع دائره و تکثیر اسباب فاخره ایله عصرک متحمل اولمدینی وجه
غیر وجیه اوزره حرکت ایلدیکنندن فضله برر تقریب ایله صدر اعضملره تخصص
و تمحض وحد و وظیفه سنندن افزون عظامت امورہ تعرض ایتمکده اولدینی جهتله
کندوسنی خلقک لسانته دوشورمش و کیدرک بومقوله حرکاتی سمع هایونہ ایرشمش
اولمسيله بوخلالده مصادره و نفی اولنسی ضمننده سردار اکر مه خطاباً برقطعه خط
هایون اصدار و ارسال بیورلمش اولوب صدر جدید ایسه فی الاصل متحیزان
وزرادن اولمدینی حالده مساعده بخت ایله مقام صدارته کلدیکنده رجال دولتی
کندوسنه ایصنیرمق صورتیله کسب تحیز ایلمک سوداسنده اولدیغندن راشد
افندی بی دخی بوورطه دن تخلیص داعیه سنه دوشهرک مذکور خط هایونہ جواباً
رکاب هایونہ برقطعه تقریر یازوب مضموننده بوچاکرلری کرامتلو افندیکنک والد
جنت مکانلرندن موروث قوللری اولدیغمدن اجرای امر هایونلری فریضه ذمت
عبیدانه مدر حق عایمدرکه مرادم مرقومه صیانت دکادر فقط یوسف پاشا قوللری
جزائرلی حسن پاشا تربیه سی اولوب عباد اللهک مال و جانلری عندلرندہ مباح
منزله سننده اولدیغندن راشد کبی نیجه نیجه آدملر کندولرینه مدار انتساب اولور
ملاحظه سیله ارتکاب ایتمکلری ماغت قالمدینی افندیمه معلومدر وقت مذکورده
ارتکاب فواحش ایلدیکی ایچون شمدی تربیه سی فرمان بیوریلور ایسه خلاف رضای
هایون حرکت حدم اولیوب درعقب اجر اسنده قصور غیرمتصوردر اکرچاکرلری
وقتنده بومثللو امر کریه وقوع بولدی دیو سمع هایونہ القا اولندیسه حق تعالی
شاهد عادلدرکه مرقوم یدیله طشره اعیانلری مأموریتلرندن عفو و یاخود اخافه
ایتمک اوزره بش غروش الدیغ یوقدر مالم اولمسه افندمدن طلب ایدرم افندمک
دخی دریغ اتمیه جکی یقیناً معلوم عبیدانه مدر حق چاکرانه مده درکار اولان حسن
ظن شاهانه لری تیرندن نشئت ایلدی خونی چاکرلرین غریق بحر حیرت و بالکلیه
پریشان حال ایلدیکنندن عرضحال تخریر یله تصدیعه مجبور اولمشمدر رجال دولت

عليه لری صدر سابق کوننده بر مرتبه وحشته دوچار اولمشل در که تعیری ممکن
 دکل بوعبد مور مقدار لری مشتای هاپونه کلدیکم کوندنبرو هزار کونه نوازش
 والتفات وروی دل واعتبار ایه مهما ممکن ازالهء وحشت ودهشت ایلیوب هر بر لری
 امور مأموره لرنده خدمته متعهد اولمشلر ایکن وباخصوص دشمن اوزرینه
 حرکتیز ایامنده مرقومک بو کونه عزل ونفی ومصادره سی جمله سنک دوچار خوف
 وخشت اولملرینه وانکسار درونلرینه سبب اوله جنی عند چا کریده ظاهر اولمغله
 مرقومک تادیبی وقت آخره تعلیق ایه شمذیلک عفو بیورلمسی رجا ونیاز اولنور
 دیو انها ایلمش ایسه ده تقریر مذکورک بالاسنه راشدک طرد وتبعیدی هم جنابکزنه
 وحمده دولتمه محضا خیردر زیر دواتک رشوت ایه بو حاله کر قنار اولسنه بو اوغلان
 ایه باباسی سیدر لکن بودخی اولکی ایتدکارینه مبنی اولوب یوخسه سن صدارته
 کله لی دکل اصلی مردار اولان طهارت قبول ایتمز رضای هاپونمی ایستر ایسه ک مقدم
 ارسال اولنان خط هاپونم موجنبجه عمل ایده سن سائر رجال دولتمه وسوسه اوله جق
 شی یوقدر بونلرک نه ماعون اولدقلرینی بیولرلر دیو خط هاپون کشیده بیورلمش
 اولدیغندن مومی ایه راشد اقدینک کافه اموال واشیامی بالمصادره قبریسه نفی ایه
 سائر حدینی بیلمیانلره عبرت کوسترلمشدر .

صدر جدید حسن پاشا حال حاضرک فنالغنی سلفنه تحمیل ایه هر خصوصه تبرئه
 ذمت ایتک ومسند صدارته الک بیوک رقیب اولان صدر اسبق قوجه یوسف پاشانک
 بومقامه تقرب احتمالی دفع ایده بیامک ایچون بر طرفدن رجال دولتی اوخشایه رق
 کندویه جلبه سعی وبر طرفدن دخی ادارهء سابقه نک فنالغنی بجئی بو وجهله رکاب
 هاپونه تقدیم ایده کلدیکی تقریر لرینک بعضیسنده درج ایتمکند خالی اولمز دی قالدیکه
 سلطان سلیم خان حضر تلی عدل ومرحمت قاعده سنی اساس اتخاذا یدرک بو بایده کافه
 مأمورینه تنبیهات ووصای لازمه ایفاسندن خالی اولمیوب حتی بوخلالده صدر جدید
 بر قطعه خط هاپون اصدار وارسال ایدرک مضمون شریفنده کافه امورده توفیق
 حقه مقارنت تعظیم لامر الله وشفقت علی خلق الله رعایت ومنفور انام اولان
 رشوت وتجریم عباددن بجانب ایه حصوله کله جکی ظاهر ایکن بر مدتد نبرو وباخصوص
 سفر ظهورند نبرو ظلم وستم درکار ورشوت وتجریم آشکار اولوب شدت وغضب
 ایه قلوب رؤسا وابطاننه نفرت کلدیکی سببیه بوندن بویه استمالت والتفات وقدر لرینه
 رعایت وفقرا ورعایایه لطفله معاملیه دقت برله عند الله والناس ممدوح الاثر اولمقاق
 ایه دعای خیر شاهانمه مظهر اوله سین دیو بیورلمشیدی . بناء علی ذلک (الناس
 علی دین ملوکهم) مؤداسنجه هر کس عدل ومرحمت یولنده جمیله کوسترتمک اوزره

صرف مساعی به راغب اولمشار ایدی . و برده سلطان سلیم خان حضر تلی هر نقدر بعضیلر حقتده زیاده جه اظهار توجه ایتسه دینه کاملاً استقلال و یرمک منافی مشرب شاهانه لری اولغله خاقان مرحوم عبد الحمید خان حضر تلی کجی بتون بتون صدر اعظم لره تفویض امور ایده مز ایدی .

بوآناده کتخدا بولنان مصطفی رشید افندی صدر جدید طرفدن عزل ایله یرینه دفتر امینی فیض الله افندی کتخدای صدر عالی نصب اولنسنده دخی شائبه غرض و صحابت استشعار اولندیغندن و مصطفی افندی درسمعات طرفدن نصب اولنمش ایدو کندن عزلی موجب اغبرار شاهانه اولدیغی مرویدر .

واصفک بیاننه کوره تجدد نوبت صدارتده کتخدا بولنانلر دخی اکثریا عزل اولته کلشیکن حالا کتخدای صدر عالی بولنان صدر اسبق امین پاشا قانی مصطفی رشید افندی ممتزج و مختلط ورشته آتسابی هر طرفه مرتبط اوله رق هر موسمه استخدای ممکن و قابل و کیمک وقتده بولنسه رضاجویلق صورتنده مسلك صداقته مائل اولدیغندن عزل و تبدیلنه صدر جدید ابتدار ایتماش ایسه ده مصطفی افندی علیل المزاج اوله رق بوآناده بر مقدار فراغ بال ایله تصحیح مزاجه محتاج اولغله رمضان شریفک اون بشنجی کونی عزل ایله یرینه دفتر امینی فیض الله افندی کتخدای صدر عالی و طوغرامه جی زاده عبدالله افندی دفتر امینی نصب اولمشدر .

اما جاوید احمد بکک تحرینه نظرأ رشید افندی رخاوتنه مبنی عزل ایله یرینه رئیس سابق فیض الله افندی نصب اولنوب لکن بو تصرف محضاً فیض الله افندی کتخانه ده بعض محله انتسابندن ظهور ایتش یعنی شیخ الاسلامه منتسب اولنلرک اردوی هایونده اخذ واعطالرینک تسهیل تمشیتی غرضیه و قوعه کتورلمش بر ماده اولدیغی عالم بالایه عکس ایتکله سلطان سلیم خان حضر تلی ایکی کونده بر کتخدا عزلی مناسب معنی اولیوب باخصوص مصطفی افندی کجی فن حربی کاله ایردرمش آدمک یرینه شعوری منسلب صاغر و کوزی کور مز آدمی نصب و ترجیحه باعث ندر دیدیکی ثقه دن منقولدر . چونکه طریق علمیه بی وضع قدیمه ارجاع ایچون سلطان سلیم خان حضر تلی شیخ الاسلام حمیدی زاده افندی به زیاده سیاه نفوذ و استقلال و یرمش ایدی آنجق مرحوم غازی حسن پاشا دخی صدارتده مستقل اولدیغندن آنک سیل نفوذی بعضاً جد اول طریق علمیه ده دخی جاری اولوردی اما آنک وفاتنده حمیدی زاده افندی بتون بتون کندو باشنه قاهره ایشنه قاریشان قالدیغندن بشقه آنک متسبلرینک بیله کرک اردوده و کرک سائر لرده نفوذ لری جاری اولغله باشلامش ایدی .

* وقایع شتی *

خلال جمادی الآخره طوفان ثانی دینکه شایان بر عظیم باران یاغوب استانبولده وجوارنده نیجه خانه لری خراب ونیجه خاتمانلری غرقاب ایتمشدر و بیک یوزالمش درت تاریخده نازل اولان مشهور باران عظیم کچی بونک دخی طعمی عادی یغمور صوبی کچی اولیوب دکتر صوبی کچی آجی اولدینی بعض تورایخنده محرردر .

شوالک یکریمی ایکنجی بازار کیجه سی دخی ساعت بشده بدأ ایدوب صباحه دک یکر میشر اوتوزر دقیقه فاصله ایله بش دفعه خفیجه و صباحدن اخشامه دک درت دفعه و کیجه سی ینه اوج و بازار ایرتسی ایکی دفعه زلزله وقوع بولمشدر احکام زلزله منجم باشی طرفندن عرض اولتوب بالظن والتخمین ولایت یونانده جنک واشوب وقان دوکلیسی زیاده اوله جغه ودول نصاراده قحط وغلا وقتنه وفساد ظاهر اولوب مصیبتدن خالی اولاملرینه وملوک اعدادن برینک هلاکنه واهل اسلامک بحرورده منصور اوله جقلمرینه دلیل ایدوکی تحریر اولمشدر .

حالبوکه سلطان سلیمک احکام نجومه اعتقاد واعتماد ایتدیکی بعض خطوط هایوننده مصر حدر شویله که : تخته جلوسند نصکره برمنوال سابق دونمای هایونک خروجی ایچون وقت مسعود اختیارینه دائر منجم اول وثانی افندیلر طرفلرندن تقدیم اولنان زایجه لر متفاوت ومتخالف دوشمکله قغیسیله عمل اولنسون دیوقائم مقام باشا طرفندن سلطان سلیمه عرض اولندقدده هر کون جناب اللهک کونیدر بنم اصلا نجومه اعتقاد یوقدر توکلت علی الله نه کون مناسب کورر ایسه کز چیقسون جنک دخی نه کون مناسب ایسه اولسون دیوقائم مقام باشایه خطا با خط هایون اصدار بیورمشدر فقط بومقوله خطوب جسیمه ده منجملرک زایجه لر یله عمل اولنمق عادت حکمنه کیرمش اولدیغندن بعده ینه سلطان سلیمه برزایجه عرض اولندقدده مادامکه عادت کچی اولمش اولوجهله عمل اولنسون دیوخط هایون کشیده بیورمش اولدینی کورلمشدر . چونکه اذهان عمومییه یرلشمش اولان عادات جاریه واصل قدیمه نک تبدیل وتغییری غایت مشکل ومخاطره لی اولدیغندن سلطان سلیم خان هر خصوصه مجددیت سوداننده بولنسیله برابر معاملات قدیمه نک تبدیل وتغییرندن افراط اوزره اجتناب واحتراز ایدردی حتی قائم مقام باشا طرفندن کندویه عرض اولنان برقطعه تقریرده کرک بوغاز کسن قلعه سنده وکرک زندانده ومواضع سائرده تهمتلری موجبجه بوغدیریلوب اعدام اولنان مسلمین بعد اجراء الجزا بجره القا اولنه کلدیکی معلوم هایونلریدر بو وجهله حیاتلرنده جزالری کورر کدنصکره بحر القالری ایسه میتلرینه مجازات قیلندن اوله یور مع هذا کثرینک اقربا وتعلقاتلری لاجل الدفن میتلری آلفه طالبلر ایکن ویرلیور دیمک ایسترم که فیابعد مسلمیندن مظهر جزا اولنلرک میتلری بحر القا اولنیوب دفن ایچون

صاحب‌الریسه ویرلسی و بلا صاحب اولنلرک قاعه مذ کوره دزداری و چاوشی طرفلرندن دفن اولنسی باعث اجر جزیل اولور دیو تحریر اولندقده تقریرک بالاسنه بو خصوص ملاحظه کوتورر ماده در زیر بو کیفیت قدیمدر سلف بو قاعده لری بیهوده وضع ایتماشدر قدیم اولان قاعده لری بوزمق انجامنده محذوری موجب اولور دولتمزده مرحمت زیاده اوله لی هر نظام بوزلدی ملاحظه ایده جک ایش واجرا ایده جک ثواب چوقدر شوسفردن فرار ایدنلری واختلال سفره باعث اولنلری بولوب ترتیب جزا ایسه کزدها زیاده ثواب اولور قیاس ایدرم دیو خط هایون کشیده بیورمشدر.

* بعض و قوعات طریق علمیه *

بر منوال سابق حمیدی زاده افندی شیخ الاسلام اولدقده رئیس زاده عاشر افندی روم ایلی قاضی عسکر لکیله و عطاء الله افندی زاده محمد عارف افندی استانبول قاضی اغیبه بکام اولمشلر در اناطولی قاضی عسکر لکنک وقت توجیهی دخی تقرب ایدوب نوبت صدارت اکر چه عوض محمد پاشا زاده منلا بکک مخدومی مصطفی بک افدینک ایسه ده اول عصرده نانی تفتازانی و علامه بی مدانی اولان عثمان افندی زاده تاتارجق عبدالله منلا افدینک فضل و کالی و امور دولته و قوف تامی هر کسک عندنده مسلم بولندینی و تحیزی حمیدی زاده افنیدن بیله اقدم اولدینی حالد صدر اسبق یوسف پاشا کندوسنی اردو قاضی عسکر لکندن عزل ونفی ایله ترقیسنه مانع و حائل اولوب اما شمدی ینه مجالس مشورتده بولنه رق اقبالی عودت ایتمکله بر کون مجلس شیخ الاسلامیده اناطولی صدارتته دائر بحث آچلدقده عبدالله منلا کبی بر عالم و فاضل ذات وار ایکن آخره توجیهی محالدر کلامی لسان فتواینها بیلرندن صادر اولدینی بعضیلر مصطفی بک افندی به یتشدر ملریله تلاشه دوشوب همان قدم طریق ادعاسنی موضوع بحث ایدرک اول اثناده بالاستقلال صدر اعظم و سردار اکر بولنان غازی حسن پاشایه مراجعت ایلمش و اودخی حصول مطلبی ایچون در سعادتته تحریرات سامیه کوندر مکله شاید میانده موجب قیل و قال اولور ملاحظه سیله حمیدی زاده افندی دخی حسن پاشانک التماسنی رد ایده میوب ولی افندی زاده محمد افندی مدت عرفیه سن اکمال ایلدکده اشبو (۲۰۴) سنه سی جمادی الاول سنک اون التنجی کونی اناطولی قاضی عسکر لکی مشارایه مصطفی بک افندی به توجیه اولنوب انجق بووضع غریب طبع شیخ الاسلامی به کران کله رک مصطفی بک حفته اضمار غیض و کین ایتمش ایدی.

وینسه اول اثناده اردوی هایون قاضیسی طراحتی زاده عزل ایله اردوی هایون قاضیلنی بوکره مکه پایه سیله بکام اولان صدق مصطفی افندی به توجیه بیورلمش و بوخلالده سابق روم ایلی قاضی عسکر و حالا نقیب الاشراف اولان درویش افندی

وفات ایتش اولدیغندن ماه مرقومک یکر می یدنجی کونی رئیس العلماء السیدیحی توفیق افندی نقیب الاشراف اولمش ایدی .

عاشر افندی دخی مورخ واحقک تخریرینه نظر آا کرچه عقیف وصلاح حال ایله موصوف برذات ایسهده خواص متعلقاتک حرص وطعمه دائر بعض اطوار ناپسندیده لری کندوسنی خلقک لسانه دوشور دیکندن فضله خانم سلطان ترکه سی وقوعنده زیاده جه محصول طلیله کندویه عذر واعتساف صورتی اسناد اولندیغنه وصاحب وجود ولیاقت اولدیغی نزد فتوی پناهیده محقق اولدیغندن نفی وتغریبی اراده سنده اعانه وامداد اولندیغنه مبنی پدرینک مسقط رأسی اولان قسطنیونی به نفی واجلا اولندی .

عاشر افدینک سبب عزلی بیان مقامنده جاوید احمدبک دیرکه ظاهرآ نفینه ارتکابی سبب اولوب لکن احبابسندن بریسی اسکدارده وداعنه واروب باعث عزلندن سؤال ایلدکده صوگ دیوانمزده عرض اوپه سنده شوکتلوافدیمز بوقولارینه خطابآ بیوروب پروسیا ماده سنی سؤال ایتدکده توفیق افندی دخی آنده اولوب مضبوط اللسان اولدیغی ایچون شو وجهله نظام ویرلدی دیه میوب انشالله مراد هایون اوزره اتمامه رسیده اولور دیمش ایدم دیواند نصکره اغا باغچه سنه رکاب اولوب کدران ایلیان صحبتی شیخ الاسلام افندی به واروب افاده ایتدکده وقت قالدی رکابده شیخ الاسلام افندی داعیلرینه عرض اوپه سنده مکالمه بی سؤال ایتدم انشالله کوزل اولور دیوب نه کونه اوله جفنی تفصیل ایتدی دیوبیور مشلر وینه اثنای کلامده پروسیا لویایله اولان مکالمه تقریرلری خاکپای هایونمه عاشرک کندی خطیله عرض وتقدیم اولسون امری صادر اولمش برقاچ کون مرورنده واردقده نه ایچون افدیمزک سؤال بیوردقاری پروسیا ماده سنی بیان ایتدک دیدکده او مجلسده توفیق افندی رفیقمز اولغله بوماده لر امریکز اوزره آندن کتم اولندیغنه بناء جرأت اولندی دیوب جواب ویردم بعده کلامه آغاز ایدوب سزک مکالمه تقریرلریکز طرفمزدن بیاضه چکیلوب عتبه عالیاه عرض اولنور ایدی افدیمزک امر هایونی اوزره شمدنصکره کندی خطکز ایله کیده جکدر دیو صورت انفعال اظها ایتش ایدی سبب نفی بزری رقیب عد ایلدکاری اولوق کرک دیو نقل ایتمشدر .

هرنه حال ایسه عاشر افدینک بروجه مشروح عزلی وقوعنده مصطفی بک افندی روم ایلی قاضیسکر لکنه دخی سعی وعمل ایتدکده کندی ایغیله بردامه دوشمک وبراده یوکسکدن دوشورملک ملاحظه سیله بوکره دخی طرف فنوا پناهیدن تعرض اولنمیوب شوالک طقوزنجی کونی بروجه مشروح منحل اولان روم ایلی

قاضی عسکر لکی مشار الیه مصطفیٰ بک افندی به و اناطولی قاضی عسکر لکی سالف الذکر عبدالله منلا افندی به توجیه بنور لدینی صروده فتویٰ امینی ابراهیم افندی به دخی اناطولی و یشمقجی زاده محمد سلیم افندی ایله طاغستانی ابراهیم افندی به استانبول پایه لری ویرلمشدر.

مصطفیٰ بک افدینک انجم حالته کلنجه بر وجه مشروح روم ایلی قاضی عسکر لکی اولدینی کبی فی الاصل زینت و احتشامه مائل اولدیغندن وهله اولاده بو مقوله داراته صرف ایچون قسام طرفندن نهج شرعی اوزره ادانه اولنان ایتم آچقلمری استقراض صورتنده اخذ و اسراف و نانیار شوت قپوسنی کشاد و اجرای حکومت کویا که مجرد حکم قاضی ایله حاصل اولور کبی وقوعبولان دعاوی ناسی کندی رأینسه تطبیق ایله رؤیتی اعتیاد ایتسیله بن بو مادهنی شو یله حکم ایتدم اعلام یازلسون کلامی بین الناس موضوع بحث اولدیغندن بشقه بعض لیا لیده پدیری زیارتنه عزیمت ایدوب عودتنده فوق العاده بیوک فنار لر ایله جم غفیر عمر به سنک اطرافنی احاطه ایلدک لری حالده خدمتنده اولان ساده رولردن برینی عمر به سنه آلوب تماشای یال و بال ایله دفع اندوه و ملال ایده کلدیکندن عالی و اسافل بیننده لسانه کلوب بو صورتده وقت و حاله نظراً کندوسنه بر چکی دوزن و یرمک لازمه دن ایکن ایجاب حالدن بتون بتون غفلت و استاوروزده کی ساحلخانه سی واسع و مفرح و دائره سنه کفایت ایلدیکی واضح ایکن قصد شهرت ایله مشهور و مقبول احمد نظیف افدینک یالیسنه طالب اولوب بعض متعینان رجالی توسط ایله قائم مقام پاشای تصدیع ایدرک و خواه و ناخواه تلخیص ایتدیروب هنوز بر جواب شافی آمدن اراده سنه موافق اراده سنیه صدورینی بی اشتباه بیلهرک همان بعض خواصنی استحساب و مذکور یالی به شتاب و اقدمجه مرتب اولان سازنده و خواننده لری استجلاب ایله احبای آیین دیرین جم و آیینۀ خاطرندن ازالاه غبار الم ایلدیکی و اصل سمع هایون اولیجق عساکر اسلامیه اعدا ایله یقه یقه یه کشا کشته اولمسیله اهل اسلام اولنلره کوره کریه و انین ایله درگاه الهیدن رجامند نصر مبین اولمق فریضۀ ذمت ایکن قاضی عسکر افدینک بو اطوار ناهمواری عوام ناسه حجت اولوب شو یله که : افندی جناب لری مسئله سنی بولسه بو یولده حرکت ایتزدی دیو سبب افساد عقاید عباد اوله جفی ظاهر اولدیغندن قبریسه نفی اولمسی ایچون خط هایون صادر اولدقده طرف فتویٰ پنهایدن شفاعت اولمق شو یله طورسون شیخ الاسلام افدینک آرادینی دخی تمام بو صورت اولدیغندن همان دیوتی بالتأدیه منفا سنه عزیمت ایتسی امر و اراده بیوریلوب انجق تدارک ایلدیکی تجملات دیوننه وفا ایتمه رک نیجه بیچاره لری

دو چار بلای افلاس ایدوب کیتمشدر. بوصولته منحل اولان روم ایلی قاضیسکرلکی سنه مرقومه ذی الحجه سنک یکریمی دردنجی کونی بالفعل اناطولی قاضیسکرلی اولان سالف الذکر عبدالله منلا افندی به و اناطولی قاضیسکرلکی صالح زاده احمد اسعد افندی به توجیه واحسان بیورلمشدر . واصف تاریخنده بووجهله محرردر والعهدة علی الراوی مصطفی بک افندی قبریس آطه سنده مقیم اولدینی لففوشه قصبه سنک آب وهواسیله امتزاج ایده میهرک نامزاج اولوب برسنه ظرفده وفات الیمشدر .

وفاتنده پدیری شیخ الاسلام اسبق ابرهیم بک افندی یاننده بولنان مخدومه برقطعه مدرسلک رؤسی احسان بیورلمسی ابرهیم بک افندی طرف شیخ الاسلامیدن نیاز واستدعا ایتمکله شیخ الاسلام افندی دخی عتبه علیه به عرض الیمش ایسه ده بو ائنده طریق علمیه نیک ممکن مرتبه اصلاحی سلطان سلیمک ملتزمی اولدیغندن ملتجی اولدینی زمان مدرس اولسون دیو خط هایون کشیده بیورلمشدر .

جاوید احمد بک تاریخنده اشبو ایکیوز درت سنه سی وقوعاتی صره سنده دیرکه موسم بهار حلولیله دونمای هایونک وقت خروجی تقرب ایلدکده مائر جمیله ارازینه سی ایتمسی ایچون قبودان دریا حسین پاشایه خطاباً استقلالی حاوی برقطعه خط هایون اصدار بیورلمش اولوب بوسنه دخی کچن سنه کبی بحرسفید و سیاهه دونمال ترتیبی لازمه خالدن اولمسیله رجب شریفک ایکنجی ومارتک التنجی کونی اوچ قالیون وسکزر فرقتین و برشتهیه وایکی نو ایجاد ودرت قرلنچ واون شالوپه که جمعاً یکریمی سکزر پاره سفائن تجهیز اولنهرق آمدوشد ایدن تجاری محافظه ایچون قره دکزه اخراج وآقدکزه دخی برطاقم دونما ارسال اولندقدن صکره قبودان پاشانک دخی کلیتلو دونما ایله قره دکزه خروجی مصمم اولوب بوصولته تجهیزی لازم کلان صغیر وکبیر ایکیوزدن متجاوز سفائنک ترتیب و تکمیل مهماتی وقته محتاج اولدینی حالدغه غضب پادشاهیدن خوفله ناچار عسکردن تهی اولان دونمای هایونی آلازغه ایدرک شعبانک یکریمی بشنجی وینسانک یکریمی طقوزنجی بازار کونی قانون قدیم اوزره یالی کوشکنده حضور هایونه چیققدده سلطان سلیم خان حضرتلری کورهم سنی کچن سنه کبی رخاوت ایتمه و دشمندن یوز دوندرمه دیو تنبیه بیوروب قبودان پاشا ایسه کچن سنه دوشمنی خوجه بکده تیمور اوزرنده طور رایکن علی الغفله دشمن دونماسی باصدقده تیمور براغوب فرار ایلمش ایدوکنه پادشاه عالمناه حضرتلرینک واقف اولدیغندن غافل اولهرق بووجهله جوابه تصدی ایلدیکه کچن سنه چوق آراشدیردم بوله مدم واولیته لیانی اوکنده جنکه

دعوت ایلام باش کوسترمدی ان شاء الله بودفعه دونمای هایونک اماده اولنریله
 بوقوللری محل مأموریمه کیدرم باقی دونمای هایونه عسکر کلدکجه وضع اولنوب
 قولکزمعیتنه ارسال اولنسی خصوصنده امر افدیمز کدر دیوتقریر ایتدکنصکره
 طولمه بغچه ضیافتنه مأذوناً عودت ایلدی وسکنز قالیون بشکطاش ساحلنده لئکرانداز
 اولوب عسکرک کلسنه انتظار اولنور ایلدی بو ائشاده تکرار برقدم اقدم حرکتی
 ایچون امرهایون صادر اولمغله اوج دانه سیاه پکسمات نمونه کوندروب بوپکسمات
 نه کونه اکل اولنور اولنسه دخی جمیع دونمایه ویریلان انجق برماه کفایت ایدر
 عسکر وکفایت مقدراری پکسمات احسان اولنسه بوکون قالمق اوزریم دیو افاده
 ایلدی بونک اوزرینه اگرچه پیدرپی دونما عسکری ترتیب اولمغده ایسه ده
 اطراف واکنافتن کلان قالیونجی عسکری وفا اتمدیکندن وکله جکره انتظارایله
 دخی وقت مرور ایده جکندن با اراده سینه اوائل رمضان شریفده اندرون
 و بیرون رجالی طرفلرندن هرکسک حالنجه بشر اوزر ویکرمیشرف نقر درسعادتده
 تدارک و تجهیز وخرچراهلری اعطا اولنهرق قبودان پاشایه ارسال وتسایم اولندیفی
 سردهده ایاعلما دخی سرحدات منصوره محافظه سنه امداد ایتزلرمی دیو استفساری
 حاوی صادر اولان خط هایونی قائم مقام مصطفی پاشا شیخ الاسلام افندی طرفنه
 ارسال ایتدکده مضمونه بعد الاطلاع برمدت سر بحیب تفکر اولوب بعده علما
 دعاجیلری سائر عوام ناسه قیاس اولنه میوب تهی دست وقوه مالیه لری مقفود
 اولمغله شمتته باعث بر کیفیت اولغین ینه امر من له الامر کدر دیو قائم مقام پاشایه
 افاده اودخی ایچرو تلخیص ایتدیکنده سلطان سلیم خان حضر تلی تلخیصک
 بالاسنه آنلردن کلهجک اللهدن کلسون خدای متعال آنلره محتاج ایلمسون دیو
 خط هایون کشیده بیورمشدر دیو جاوید احمد بک تاریخنده محرردر حالبوکه
 بالاده بیان اولندیفی اوزره اصل علما گروهی اولوقت صحیحاً فقر وفاقه حالنده
 ایدیلر اما یالکیز بررتبه علمیه ایله سایه دولتده متمتع اولان علمای رسمیه نیک
 اعانه بخشنده دعاجی گروهی دیویان چیزملری وقت و حاله جاسبان اولندیفی
 وارسته کلفت بیاندر .

وینه جاوید احمد بک تاریخنده محرردرکه (۱۸۲) سفرنده وقوعه کلان پریشانقلر
 حبسیله صدور عظام و سائر وکلای فحام حضراتی دولت علیه کسب قدرت ایدنجیه دک
 مسامحه طریقه سلوک ایده کلشدر ایکن یوسف پاشا کویا که کافه لوازمات مهیا
 اولمش کبی حرکت سریعه ایله چاپوله کیدر کبی (۱۲۰۱) سنه سی ذی القعدة سنک
 ایکنجی پنجشنبه کونی مسقو ایلچیسینی قالدیروب (۱۲۰۲) سنه سی جمادی الآخره سنک

طقوزنجی کونی سنجاغ شریف ایله سفره چیقدی اما سفر سابقدنبرو اناطولی
 وروم ایلی ظلم و تعدی ایله خراب اولوب وزرا دخی صیق صیق تبدل ایدرک سنه ده
 بر منصب درت وزیره توجیه وهر منصبدن جائزه سی اخذ ایله منصبنه وارمهدن ینه
 عزل اولنه کلمسیله صاحب مکنت وزرا دخی مفقود اولدی کبار دولت علیه دخی
 حضره اعتیاد ایله زیب و زیور و عنوان و احتشامات کاذبه ایله آرامش و راحت مائل
 اولوب وارینی یایلره و سائر ملاحیه به صرف ایدرک هر بری قلابی قوزکچی قالدقلمی
 جهته بنو دولت کبارک صرافلر دخی خدمتلرندن نکول ایتمکله قوه مالیه لری
 معدوم و حرکتلی ناقابل اولدیغی متحقق اولدقده یوسف پاشا هر صراف خدمت
 ایلدیکی دائره نك تدارکاتی کوروب قالدیرسون دیو امر ایتمکله آنلر دخی اقدیلرینی
 چیقاردیلر لکن خزینه کش بارگیر و قاطر و دوه و عرب به کلوب یتشم دیکندن اردو
 داود پاشان حرکت ایتمدیکنک ایرتسی کونی بوستانجی باشی آستانه ده واسکدار ده
 تقدیر کرا و حمال بارگیر و عرب به لری وار ایسه سوروب آغرانی ایکی کون صکره
 ارسال ایده بیلدیلر اول تاریخدن عبدالحمیدخان حضر تلیرنک وفاته کننجه الی اوج
 بیگ کیسه آنچه ارسال اولندی بر ایشه یارامه دی یوسف پاشا نفسنده مقدم و مبرم
 و هر وجهه خیر خواه دین و دولت بر ذات شریف اولوب لکن امور دولت علیه ده
 مستخدم اوله رق دور مناصب ایله نیک و بدجهانی کوروب بیلدکن صکره وزارتله
 دخی ممالک کوروب احوال علمی تجرب به دن بری نیچون اولماز دین ذاتلر دن اولوب
 غیرت مفرطه ایله عجماله بومشوم سفرک ظهورینه باعث اوله رق نابجاهمت اولندی
 و کندوسی اوصانمز و اوشونمز روزیر حمیت سمیر ایسه ده جلوس هایونده حرباً
 و سلماً بر خدمت حمیه وجوده کتورمک ایچون کندوسنه مهر جدید ارساله
 استقلال و یرلمش ایکن کندوسنک سفر بر سنه ده بر طرف اولور دیو ایتمدیکي
 ملاحظه لری نتیجه و یرمیوب سنه بسنه بو قدر مال اتلاف اولنه رق بهار عسکری
 کلسون قیش عسکری کیتسون دیمدن گیری برایش کور به مدی و مرحوم عبدالحمید
 خان حضر تلیرنک عصرنده کرک درسعادته و کرک اردو ده قحط و غلادن پک
 چوق محنت و مشقتلر چکلدکن بشقه بر سنه ده ایکی جبهلو و بر دفعه دخی بیکده
 اوج جبهلو بدلی آلتوب بوند نصکره متصرف مالکانه اولنلر دخی ادادن عاجز
 اولدیغنی کبار دولت دخی ادراک ایدوب بر دفعه ینه دور مشار الیهده هر کس
 حسن رضاسیله زائد اولان سیم وزر او انیلرینی ضربخانه به بیع ایتمکله مأمور اوله رق
 هر کس حالته کوره بعض زواندینی ضربخانه به تسلیم ایله قال اولدقد نصکره اونر
 باردهن آنچه سنی المش و فقط علمادن بریسی بر درهم کومش و یرمامش ایدی جلوس

هایونده متعدد مشورتلر اولوب خزینه جمعنه بر چاره بولنه مدیغندن خاتمدن غیرى
 سیم وزر استعمال اولمسون هرکس مالک اولدینی سیم وزری ضربخانه عامریه
 تسلیم وقال اولدقدن صکره بهاسی اوزر پاره دن ویرملک اوزره رأی اولنوب بشقه
 چاره قالدیغندن جمله کبار دولت و او جاقلو و علمانک خلاصه افکارلری عتبه
 پادشاهییه عرض اولهرق موجبجه خط هایون اصدارندفکره خاتم واسلحه دن
 ماعدا سیمی اولوب ویرمیان اولورسه مجازات اولنه جقلری منادیلر نداسیله اعلان
 اولدینی عقینده اندرون هایون و حرم هایونده تقدر سیم وزره متعلق رخت
 وغاشیه و اوانی وار ایسه ایکی کون ظرفنده ضربخانهیه تسلیم اولندی وطشره لره
 دخی فرمانلر نشر اولنوب و بزازستان باصیلوب کتم ایدنلرک دخی سیم وزر اشیا سی
 آنوب بهالری ویرلدی لکن بوکره دخی بر درهم سیم ویرمیان سفهای علمادن
 بعضیلری کندولرینه یاقشمیه جق سوزلر تفوه ایتمکه باشلادیلر مع هذا امیر المؤمنین
 اولان پادشاه اسلام حضرتلری جمیع مؤمنینک کفاف نفسلرندن فضله سنی الوب
 امور سفره صرف ایتمک مشروع ایدوکنی میرزا زاده سالم اقدی نیل الرشاد فی
 امرالجهاد نام کتابنده تحریر بیورمشدر و شروع کتاب هدایه دن کفایه نام کتابده
 (ولا بأس بالجعل اذا کان بالمسلمین حاجة لانه دفع الضرر الاعلی باحتمال الادنی)
 دیو تصریح ایتمشدر که اهل اسلامه حاجت مس ایتدکده جعل لا باسدر زیرا جعل
 مرقوم اعدانک استیلاسی وقتنده بر ادنی شیئی یوکلتمک ایله بیوک ضرری دفع ایلر
 وخلیفه انام حضرتلری جهاده ترتیب اولنان عسکر اسلامه یتیشه جک قدر شیئی
 تخمین صحیح ایله تخمین بیوروب اولقدر شیئی ناسدن جمعه مصارف عسکره صرف
 ایتمک و اول مال ایله آنلره قوت ویرمک جائز ایدیکی مصرح اولدیغندن غافلر
 اولوب باخصوص اوانی سیم استعمالی حرام ایدوکی شرعاً ثابت اولهرق ترکی لازم
 ایکن عرف بلده اولوب مباح مقامنه تنزیل ایله اوانی سیمی اولمیان آدم دکدر کبی
 معامله دن خلاص اولماقه برابر بووسیله ایله امور جهاده دخی اعانه اولمش
 اوله جغندن کندویی بیلانلر مسرور اولمشلر ایدی اما بر طاقم نان و نعمت قدرینی
 بیلمز بی عار و بی حیمتلر طعن و تشنیع ایله بعض تفوهاته جرأت ایتدکلری طرف
 پادشاهییه عکس ایدیحک اللهمدن قورقیوب و پیغمبردن اوتانمیوب بو مقوله تفوهاته
 جرأت ایدنلره حدلرینی بیلدیرمک ایچون قائم مقام پاشایه خطابا بر قطعه خط هایون
 اصدار بیوریلوب مضموننده جلوس هایونم وقوعنده ضربخانه ده سرمایه آچهمی
 اولهرق ایکی بیک کیسه دن زیاده موجود آچمه اولیوب و اندرون و حرم هایون
 خزینه لرنده دخی یوزالی کیسه دن زیاده موجود ظهور ایتیوب میری خزینه سنده

دخی بر کیسه اولدینی ظاهر اولدوقده مسقو و نمچه لویه سفر آچلمش اولدیغندن
ایکی قوی دشمنه سفر کلیتو آچمه به محتاج ایکن دولتده هیچ آچه اولدینی معلوم
اولدوقده بر چاره سنه باقلمق ایچون بو قدر مشورتلر اولدی نهایت جمله اتفایقه
شرعاً استعمالی حرام اولان سیم و زرك منعی و آچه سیله ضربخانه به بیعی خصوصه
قرار ویریلوب بوبابده شیخ الاسلام داعیمز دخی فتوی ویرمکله بن اللهک نهی
ایتدیکی ماده به خط ویردم علما ورجالدن کندی بیلمز و دین دولته خیر نه
ایدوکنی ادراک ایتمز بعض کیمسه لر پادشاه بزى قره چناقلی ایتدی دیو اللهک نهی
ایتدیکی ماده بی نهی ایتدیکم ایچون قوناقلرنده درلو کلامه ابتدار و نظام دولته محل
اکاذیب و اراجیفی و آغز لرینه کلانی سویلدکارینی ایشیده یورم بو ایکی دشمنه سفری
بن اچادم و دولتی بوغائیه بن اوغرا تدم جلوس هایونمدن اشبو ذی الحجه به کنجه امور
ایدی یه کندی رایلریله بونی اجرا ایتدم هنوز ایکی بیگ کیسه فائض حاصل
اولدی یه بعض اداره و تدارکادن جلوس هایونمدن اشبو ذی الحجه به کنجه امور
سفر ایچون صرف اولنان آچه نک قیدینی چیقارتدم یالکز ضربخانه دن یکر می بش
بیگ کیسه بی متجاوز آچه ویرلمش و بوتدارک آنلرک کومشندن دکدر انجق عنایت
حقدر هنوز بیت المالدده بودرجه مضایقه اولوب ایکی دشمن ممالک اسلامیه به هجوم ایدر
ایکن دفعی ایچون هر کس وارینی دینی ایچون بیت المالدده ویرمک شرعاً جائز و پادشاهلر
اخذ ایلدکده ظلم ایتمش اولور ایکن علما افندیلر شمدی یه دک بیت المالدده قاج غروش
ویردیلر جهلک کچمنسی بودولت سایه سننده دکیدر عیاذاً بالله بودولته بر سکتده
کلور ایسه حاللری نشکل اولور هیچ ملاحظه اولنیور می اعانه لرندن کچدم دین
و دولته مضراوله جق کلومی سویلمسه لر ایدی اولمازمی اشبو خط هایونمی مطالعه ایدوب
رجال دولته سن سویله سین و سماحتلو افندی داعیمزه دخی کوندروب قاضی عسکر لره
وسائر اقتضایدنلره کوسترسون بو کلومی سویلینلری سن و افندی داعیمز تجسس
ایدوب هر کیملر ایسه عرض و فیما بعد امور دولتک اختلالنه دائر بر کیمسه طرفندن
برحرف ایشیدرسم تأدیب ایده حکم تفهیم اولنسون دیو امر و فرمان بیسور لمغله
قائم مقام پاشا بالنفس تبدیله چقبوب و قول قول تبدیللر کزدیروب جنک و صلحه متعلق
سوز سویلینلرک تأدیبلرینه مبادرت قانمشدر .

الحاصل طریق علمیه نک نظامات اصلیه سی منسخ اولمق حسیده نیجه جهلا داخل سالك
علما اولوب اگر چه اولوقلر دخی هم علم و فضیلت همده اداره امور مهمه به لیاقت ایله
ذو الجناحین اولان ذاتلر آره صره بو طریق فیض ریفده بونوردیسه ده جهله سی
غالب اولغله ایچلرنده علما نامنه پیدا اولان برطاق نااهلر دخی دوه قوشی کبی

ذو الجهین اوله رق نه پر وبال علم وکمال ایله اوج اعلاى معارفه اوچارلردى و نه ده سائر رجال کبی کار و بار دولت غائله سنی چکرلردى .

* احوال عربستان *

اشبو (۲۰۴) سنه سی خالانده برأ و بحر آ روسیه و نمچه دولتلیله محاربه متبادی اولدقدن بشقه زیرده بیان اولنه جق میللو تیمورک غائله سیله اتعاب افکار اولدنی ائشاده مصره دائر نیجه اراجیف منتشر اوله رق تخدیش اذهان ایشیدی شویله که : مرحوم غازی حسن پاشانک مصر دن رهن طریقیله در سعاده کتورمش اولدنی ایکی بک ایله ایکی کاشف تک طور میوب ابراهیم و مراد بکر ایله مخبره دن خالی اولماملریله مالفریح مصادره اولنه رق لمنی آطه سنه نفی اولمشلر ایدی جلوس هایون وقوعنده عفو ایله در سعاده کتورمشلر ایسه ده ینه طرفیکرک ایلدکندن تکرار لمنی یه نفی اولنسدیلر لکن بر تقریبله اورادن فرار ایدرک طرفدارلرینه التحاق ایلدکندن بکار عفو اولمش یه مصره کیره جکر ایش کبی مصر والیسیله طرفداری بولسان امرانک نفوذلرینه خلل ویره جک حوادث چوغاندیغندن لدی التحری بو مقوله حوادث ارتین نام صرافدن چقدنی تحقیق اولنه رق بو خصوصه دائر بعض تحریراتی دخی اله کچوب طرف قائمقامیدن لدی الاستطاق مهرینی اعتراف ایتمکله قتل اولمشدر . و بو ائشاده سعید مصر جانبنده بولنان مومی الیها ابراهیم بک و مراد بک بعض دول اجنبیه دن طوب و سائره استدعا و استعانه ایله ادوات حر بیله رینی استکمال ایتدکد نصرکه مصر اوزر یینه حرکت ایده جکلری و حتی بعض دول افرنجیه دن اوفچیللر ایستملریله بو خالانده بر نفر اوفچیللر بر مستامن سفینه سنه را کباً اسکندریه یه کیتمش اولدنی و فر نکدن دوئمسه اسکندریه ده مقیم بر مهتدی اولوب امرای مرقومه یه جاسوسلق ایتمکده اولمسلیله مرقوم اوفچیللر دخی آنک و ساطیله امرای مرقومه یه التحاق ایده جکی مسموع پادشاهی اولغله کیفیت بالتحقیق مهتدی مرقومک ترتیب جزاسی و اوفچیللرک دخی ممالک محروسه دن طرد و تبعیدی ایچون مصر والیسی اسماعیل پاشایه بر قطعه امر عالی یازمشدر مصر والیسی دخی بو مقوله حالاتدن طولانی بعض مرتبه حرکات احتیاطیه یه تشبث ایلدیکندن و امرانک شقاوتندن ناشی بعض مرتبات مصر یه تحصیل اولنه مدیغندن بحثله مصر ارسالیه سنک بر مقدراری عفو اولنق نیازیه در سعاده تحریرات کوندرمش اولوب دولت علیه ایسه بونجه مصارف سفریه یه مبتلا اولدیغندن مرتباتک بر آنچه سندن حکمک احتمالی اولدنی بیانیله مصر والیسنه او امر علیه ارسال اولمشیدی .

بو او انه بغداد والیسی سلیمان پاشا دخی نجد قطعه سنده عبدالوهاب نام خار جنك طغیان
حسیله بصره وامام زبیر وسائر بعض قلعه لرك تعمیری ومجدداً قلعه بناسی خصوصاً صلینك
لزومندن بجنه نقداً یا خود حواله كندوسنه کلی آنچه احسان بیولسنی استدعا ایوب
حالبوکه دولت علیه نك برآ و بجز آ بو قدر مصارف سفریه سی وار ایکن میریدن آنچه
ایستمك سلیمان پاشانك درایتنه یا قشمرز دینلمش ایسه ده بین العربان نفوذینه خلل کلامك
ایچون ناچار بغداد ارسالیه سندن حواله كندوسنه الی بیک غروش کوندر لمشدر .

وینه بو ائنده مهبط وحی الهی اولان مکه مکر مه ده دخی شرفا محار به لری وقوعیه
نیجه قانر دوکشیدی شویله که : امیر مکه مکر مه شریف غالبك برادر لری کچن سنه
طریق خلافه سلوک ایتملریه طرفیندن تجهیز عساکر اولنه رق خیلی قتال وقوعه
کلیسیکن مکه مکر مه قاضیسی ومذاهب ار بعه مقتیلری توسط ایدرک آره لری بولنوب
بارشدر لمشرایدی اشبو (۲۰۴) سنه سی خالانده دخی دارالسعاده اغاسنه وارد
اولان تخریر ائدن استنباط اولندیغی وجهله مکه مکر مه ده شریف غالب ایله برادر
زاده سی شریف عبدالله درون مکه مکر مه ده صفرا خیرک بکر می طقوزنجی کونندن
بو ایامه کلنجه وافر قتال ایوب و اوچ کون قلعه دن آتیلان طوب و تفنك کثرتندن
ناشی اون سکز وقت نماز قیلنمیوب و اذان اوقمیوب حتی حجر اسعدك اوچ پارمق
مقداری محله قورشون اصابت ایتمکله شکست اولوب دوشمکله جنك ختامنده ینه
محله لو کون ایله یاشیدر لمشدر بعده اهالی جمع اولوب شریفه نصیحت ایدرک باری
عادت قدیمه کز اوزره حرم شریفدن خروج ایله طشره ده جنك ایوب حرماً یا صلحاً
مصلحته ختام ویریکز دیو رجا ایتملریه شریف عبدالله عسکر یله هذیل قبیله سنه
واروب وافر جمعیتله ینه مکه مکر مه یه متوجه اوله رق معاهده نام محله نزول ایلدکه
شریف غالب دخی عساکر کایه ایله مقابله یه چیقوب بینلرنده برقتال عظیم وقوعه
کله رك طرفیندن خیلی آدملر تلف اولدقدن صکره شریف غالب ینه مکه یه چکلمش
وشریف عبدالله دخی طائفی ضبط ایلمش اولوب حال بو منوال اوزره باقی ایدوکی
استخبار اولغین حالاً امیر مکه مکر مه بولنان شریف غالبه امر عالی اصدار اوله رق
بو مقوله او یغونسز لقلرک دفعی و فقرای حرمین شریفینک بوجهله رنجیده ایتدیر لمامسی
توصیه و تنبیه اولغیسیله برابر ایکسنه دخی نصح و پند ایدرک اصلاح ذات البینه چالشمق
اوزره امیرالحاج اوزون ابراهیم پاشایه دخی امر نامه کوندر لمشدر .

مورخ عبدالشکور افندیك بیاننه کورده بو اختلاله بادی شریف غالبك برادر می مرحوم
شریف سرورک باش اغاسی اولان یحیی سلنوح نام کیمنه اولوب شویله که ناصیه
حالندن فتنه و فساد اماره سی مشهود اولدیغنه مبتی کندوسنی شریف غالب حبس ایتمش

ایسه ده برارلق محبسدن فراریه شریف سرور زاده لرك خانه سنده کیزلنوب شریف غالب هر تقدیر جستجو ایتدیسه نه طرفده اولدیغنه دائر بر خبر آله مدیغندن براوزاق محله صاوشدی ظننه ذاهب اولمش ایدی یحیی سلطوح ایسه کیزلوجه اسباب فتنه وفسادی تهینه ایدرك شریف سرورک اوغلی شریف عبداللهی امارت ادعاسنه تشویق ایدوب شریف عبدالله اگرچه سنی هنوز اون ایکی یه بالغ اولمامش بر طفل نابالغ ایسه ده آنک سوزینه قاپیله رق بیلور بیلمز امارت سوداسنه دوشمکله شریف غالبک خانه سنی احاطه ایله قورشون آتدیرمغه مبادرت ایلدکلرنده برو طرفدن دخی مقابله اولنهرق درت کون درت کیجه علی التوالی مکة مکر مه ایچده طرفیندن قورشونلر آتیه کلدیکندن زوقاقلرده کیمسه کزه مز و حرم شریفده نماز قیلنمز اولوب حتی بر جمعه نمازی دخی قیلنه مامش ایدی . بعده بروجه مشروح شریف عبدالله ایله برادری شریف محمد طرفدارلری اولان بر نیجه اشراف ایله چیقوب عابدیه طرفه متوجه اولدقلرنده یحیی سلطوح و تقدیر مرحوم شریف سرورک کوله واتباعی واریسه جمله سی آنلره برابر چیقمشلر ایدی بعده شریف غالب تجهیز عسکر ایدرك اوزرلرینه حرکت ایتدیکنده وقوع بولان محاربه ده شریف غالب طرفی غالب کلش ایسه ده آنلر دخی کیدوب طائفی ضبط ایتدکن صکره بر طاقم قبائلی باشلرینه جمعه قوه کافیه تدارک بره مکة اوزرینه حرکت ایدوب شریف غالب دخی مکة دن چیقوب وادی الزریان نام محله و قوع بولان ملحمة کبراده نسیم ظفر و غلبه شریف غالب طرفه وزان اولهرق شریف عبدالله ایله برادری طویلوب عسکرلری بسبتون پریشان وپراکنده اولغله شریف غالب برادر زاده لری شریف عبدالله ایله شریف محمده عفو و نوازش معامه سی ایدرك کندولرینه تعینات و معاش تخصیص ایلمشدر . یحیی سلطوح بوانهزامده حرب دیارینه واندن مدینه منوره طرفیه شامه بالورود امارتک شریف عبداللهه توجیه بیورلمسی ضمنده بر عرفحال ترتیب ایتدیروب بعده در سعادت کاهرک عرفحال مر قومی دولت علیه یه تقدیم ایلمش ایسه ده استدعاسنه مساعده اولمدیغندن مأیوساً جانب مصره عودت ایلمشدر . شو مفسده باق که بر صبی نابالغی مسند امارته کچوروبده زمام اداره نی کندنی اله آلمق ایچون مهبط وحی آلهی اولان مکة مکر مه ده بویله بر اختلال عظیم چیقاروب اگرچه نائل امل اوله مامش ایسه ده بونجه قانلرک دوکلسنه سبب اولمشدر .

بو اوآنده جزار پاشانک کیتخدا سی اولان کوچک سلیم پاشا ایله آرله لری بوزلمین جبل درز حاکمی امیر یوسف اوزرینه سلیم پاشا قومانداسیله سوق ایتیش اولدینی قوه عسکریه کندو علیه نه حرکتله کلوب عکدی محاصره ایتدکلرنده وقوع بولان

مخاربه ده جزار غالب کله رڪ سليم پاشا شامه و آندن در سعاده بالورود روم ايلي جانبنده سفر هايوننده استخدام اولنمشدر و محاربه مرقومه دن صكره جزار درزي طاي اوزرينه مجدداً اردولر سوق ايدرڪ عظيم محاربه لرله مشغول بولنمشدر .

* محاربه بحر سفيد *

بر ايكي سنه دنبرو آق دكزده مسقو بانديره سيه دونما شكنده كشت و كذار ايدن اشقاي يونانيه سفينه لري ابنای سيبه ظلم و جفا و مرتد آطه سني استيلا ايله در سعاده مرتب اولان ذخيره كميلرينه تصادف ايتدجكه اخذ و ضبط و مذكور آطيه ربط و جزائر و سواحل اسلاميه به تعرض برله في الاصل مائل فساد اولان رعاياني جلب و انقياد و سر فرو ايتميرينك اموال و اشيا سني نهب و غضب و لاجل التحصن مذكور آطه ده طابيه لر انشا و طوپلر و بشيوز قدر محافظ نفراتي وضع ايله محافظه سنه اعتنا ايتمش اولدق لرن دن دفع و رفع مضر تلري ايجون (۱۲۰۴) سنه سي خالانده چتالجه لي علي پاشا كتخداسي مير ميراندن كوسه مصطفى پاشا باشبوغ نصب اولنه رق صغير و كبير اون سكيز قطعه سفائن ايله اول طرفه ارسال اولنمشيدي جزائر و كيلى اولوب در سعاده مقيم و فرط شجاعته مشهور اولان سیدی علی قپودان دخی غرب او جاقلری سفائننه یعنی جزائر دن و تونس دن کلان چند قطعه سفینه لره باشبوغ نصب اولنوب معینه ترسانه عامره دن بر قطعه کبير سفینه دخی و يريله رڪ آق دكزه اخراج اولنمير ايله اول طرفه بادبانكشای عزيمت اوله رق اعدانك اولدق لري صولره ياقلاشدق لرنده مكر كه مصطفى پاشا استدليل بوغاز ايله مرتد آطه سي بيننده سفائن اعدايه ملاقي اوله رق جنكه كيرشمش اولديغندن سیدی قپودان اوزاقدن طوب صداسني استماع ايله محاربه يني استدلال ايتمكين في الحال او طرفه طوغری عزيمت و محل محاربه به مواصلت و همان جنكه مبادرت ايتمير ايله سفائن اشقيا ايكي دونما بيننده قالدیني حالدۀ ناچار بر ساعت قدر جنكه قیام ايتدك لري ائنده جزائر داييلري قاعده جزائر اوزره بردن الاابنده ايتدك نصكره هر بری سفائن اعدادن برينه رانپه ايدرڪ ضبط و تسخير ايتدك دن بشقه سر کرده اشقيا اولان لامبرونك راكب اولديني سفینه يني دخی طوب ايله رخنه دار ايدرڪ اخذ و ضبط اولنه جق هنگامنده سر کرده مرقوم كمينك جبه خاسنه آتش و يروب كندوسي صندال ايله تخلص جان و سفینه لر ينك بعضیسي اخذ و ضبط اولنوب باقیسی فرار ايتمكله مرتد آطه سنده كي طابيه لر پاشای مومی ايله طرفدن هدم و تخریب و طوپلری دونما يه نقل و ليانده ذخيره ايله مملو ايكي قطعه كميل ضبط اولنديني و آطه ده موجود اولان اشقيا نك كيمي مقتول كيمي اسير اولديني خبر بشارت اثری در سعاده واصل اولدقده مذكور

کمبر میری یہ ضبط اولنوب ایچلرنده اولان بغدادی فروخت اولنهرق آچه سنک
 بین الغزاة تقسیم اولنمسی ایچون دونمایه امر عالی کونیدرلرلکدن بشقهباشبوغ مصطفی
 پاشایه برقطعه مجوهر چلنک ایله بشیک غروش و معیتده اولان قپودانلره و سائر
 غزانه تقسیم اولنق اوزره بشیک غروش ایله وافر چلنک و جزائر غازیلرینه
 دخی آروجه بشیک غروش ایله چلنکر احسان وارسال بیورلدقدنصرکه
 مرند آطه سی رعایاسندن قورسان طائفه سیله اتحاد ایدنرلر تأدیپ ایله سائرلری
 تحویف و ترهیب اولمشدر بعده (۱۲۰۵) سنه سی اوائلنده سیدی علی قپودان
 موجود معیتی اولان دونمایه درسعاده ورونده کرک کندوسنه و کرک معیتده
 بولنان جزائر و تونس غازیلرینه طرف شاهانه دن پک زیاده التفات بیورلمشدر
 غرب او جاقلرینک مدار تعیشلری قورصلانغه منحصر اولغله دریا جنبکنده
 مهارتلری اولوب لکن جاوید احمد بک سیدی علی قپودان روایت ایدوب دیرکه
 طرابلسه طرف دولت علیه دن والیر نصب و صیق صیق عزل اولنه کلدیکندن
 بو او جاغک قوتی زائل و تونسلیلری دخی برمدنبرو ضعف حاله دوچار اولهرق
 انجق اون بش یکرمی پاره کمی ایله دشمنه مقابل اوله بیلوب بوصورنده بحرأ
 قدرتلوجه یالکنز جزائر او جاغی قاهره بوکره یوز کوسترن قفوحات دخی هان
 آنلرک اثر همتلری ایدی بوسفرده جزائر لولر صحیحاً ایشه یرامشدر ایشه ده بونلرک
 ضبط و ربطلرینه کرک قپودان پاشا و کرک ضابطان سائر طرفلرندن نظارت
 اولنهمیوب معتاد قدیملری اوزره باشی بوش برطائفه غیر خائفه اولدقلرندن
 درسعاده و اسکدارده ایتمکلری فساد و خیانت قالیوب نهایت بعض خانه لره جبرأ
 دخول ایله اهل عرض خاتونلری اخذ و اخراج ایتمه درجه لرینه قدر ارتکاب
 فضاحت ایتمکلرندن بشقه سائر قالیونجیلر دخی آنلره باقره رق درلو درلو فضاحتلره
 اجتسار ایدر اولوب هر قغیسنی ضابطلر طوتسه بن جزائر لولیم دیوب جزائر لولر
 دخی درحال آلورلر و بوسزک نفریکز دکدر فلان کمینک نفریدر دینسه دخی کرک
 قپودان پاشانک و کرک سائر ضابطانک سوزلرینی اصفا ایتیمه رک اول مجرمک کلامی
 تصدیق ایله اخذ و استخلاصنه مسارعت ایدرلر ایدی . بناء علیه استانبولک
 ضابطه سنه خلل و یرملریله خانلرده اوتور میوب قشله لرده اوتور مق و سلاح ایله
 کزمامک کبی نظاماته ربط ایله و سائر صور حکیمانانه ایله ممکن مرتبه ضبط و ربطلری
 خصوصی دولت علیه یه بریوک باش آغریسی اولمشیدی .

* قره دکرده دونمای همایونک محاربه سی *

اشبو (۲۰۴) سنه سی موسم بهارنده صغیر و کبیر یوز قطعه دن زیاده تهیته واحضار

اولسان دونمای هایون ایله قپودان دریا حسین پاشا شعبانک یکرمی بشنجی کونی قره دکنه بادبانکشای عزیمت اولمشیدی .

شوالک یکرمی دردنجی کونی سنه بوغازندن فک لنگر اقامت وقریم لیمانلری اوکلرندن کچهرک انابه قلعه سی پیشکاهنه مواصلت وبطال پاشا ایله ملاقات ایلدکده روسیه دونماسنک کرش حوالیسندن اولدینی استخبار اولنغله قپودان پاشا هان متوکلاً علی الله اول جانبه عزیمت ایدوب نخل برونی دیمکله معروف اولان محله بش قطعه قیاق واون التی کبیر فرقتین وباقیسی سفائن صغیره اولمق اوزره جمعاً اوتوز ایکی قطعه روسیه سفائی مشاهده اولنوب دونمای هایون اکر چه صغیر وکبیر الی قطعه دن متجاوز ایدی انحق شالوپه لر شدید روزکار ایله یلکن اوزرنده جنکه متحمل اولدیغندن جنکه تقرب ایدهمیوب قصور اون التی قطعه قالیون وطقوز قطعه فرقتین وشهتیه وبرغندی وقرلنغچ که جمعاً یکرمی بش پاره صغیر وکبیر سفینه لر ایله ساعت درتده جنکه مباشرت اولندقده براییکی ساعت ظرفنده روسیه لولورک درت قطعه فرقتینی غرق اولنوب بو حال اوزره یدی ساعت قدر محاربه تمتد اوله رق طرفینک سفینه لرنده کلی سقطمق وقوعه کلوب اخشام دخی تقرب ایتمکله صباحه انتظار ایله جنکه فاصله ویرلمشیدی انحق اول کیچه روسیه دونماسی ثبات ایدهمیه رک کفه لیمانه طوغری چکیلوب کیتدیکی قپودان پاشانک معلومی اولدقده تعقیبه امکان مساعد اولیوب صویه دخی احتیاج درکار اولدیغندن صولانمق و محرو حله تیمار ایله جبر نقصان اولمق اوزره دونمای هایون دخی سنه بوغازینه عودت ایتمش ایدی .

محاربه مرقومه ده دونمای هایونده دخی خیلی خسارات وقوعه کلوب یالکز قپودان پاشانک سوار اولدینی قالیونک سستون ویلکن وآلات سائرله رینه اصابت ایدن دانه لردن بشقه تکه سنده یوزدن زیاده کله رخنه سی وخیلی شهید و مجروح وار ایدی لکن روسیه دونماسی دخی صالحم صچاق موقع حربی ترک ایله لیمان مذ کوره فرار ایلدکلرندن میدان حرب دونمای هایونده قاهره ظفر وغلبه بزم طرفرنده رونما اولدی دیو قپودان پاشا طرفدن تحریر اولمشدر .

وبوقعه ده بودشمن ایله مقابله ممکن اولمز اعتقادنده بولسان نیجه کمسنه لر تبدیل افکار ایلدیکی جاوید احمد بک تاریخنده محرردر .

واخری ذی القعه ده سنه دن حرکت وخواجه بک لیمانه وصول ایله برقاچ کون اول صولرده کشت وکدار ودشمن دونماسی نه صولرده اولدینی استخبار اولدینی ائنده قلیرون جانبندن اوتوز یدی قطعه روسیه جنک کیمیری کورولدکده هوا کشلمه اولمق حسبیله دشمن دونماسه موافق ودونمای هایونک حرکته مخالف

اولدینی حالده قپودان پاشایه همتنه قور کتور میهرک یلکن اوستنه چیقوب سفان صغیره دن بشقه اون طقوز قطعه سفان کیره ایله مقابله اولدقده هر بری کندو اقرانیله اوغراشور ایکن پاشا کیسندن آیلان مر مر کلهر روسیه لونک برقطعه کیر سفینه سی طرف طرف حرق وغرق ایتمش ایسه ده دیگر برقطعه روسیه قباغیله جنکه کیریشد کده دشمن طرفدن آیلان درونی اجزای ناریه ایله مملو دانه لردن دخی پاشا کیسی برقاچ محادن آتش آغله قپودان پاشا برطرفدن آتشی اطفا و برطرفدن دخی غزات مسلمینه غیرت واستالت اعطای ایدرک یازارکار زار کسب امتداد ایدوب نهایت اخشام ایریشمکله ایکی دونما بربرندن آریله رق صباحه منتظر اولمشلر ایدی ناکاه برشدتلو فورطنه ظهور ایتمکله روسیه دونماسی اوزی صولرینه کیدرک تیمور براقمش اولوب دونمای هایون سفائی ایسه بحمکه الله بربرینه چاتهرق خیلی صقطلق نمایان و هر بری برطرفه پریشان اولدینی ائنده قپودانه هایون دشمن کیمیری قربنده صباحه مش اولمسلیله علی الصباح اوزرینه سفان اعدا عموماً هجوم ایتدکلر نده مجاهدین اسلامیه منفرداً بتون روسیه دونماسه قارشو التي ساعت قدر درت طرفه آیشلر یاغدی ره رق اغور دین ودولته جانسپارانه ثبات ایلدکلرینی سائر سفان اسلامیه اوزاقدن کورمکده بولمشلر ایسه ده روزکار آلتنده بولندقلرندن نگاه حسرت ایله باقوب اعانه قابل اولدیغندن نهایت قپودانه هایون برقاچ محادن مشعل وستون و سرنی شکست و دروننده کی غزاتک اکثری شهید اولهرق هان غرق اولق درجه سنه کلد کده بقیه بهادران اسلام تکنه یه آتش ویره رک بر روسیه سفینه سی سوزان اولغله دامن حشره دک ابقای نام ایتمشلر در .

بوندن صکره قپودان پاشا دونمای هایون ایله کاغراد اوکلرینه کلوب لئکرانداز اولدقده بووقوعاته دائر یازدینی تحریراتی خلال ذی الحجه ده درسعاده لدی الوصول سفن هایونک اکثری صواتمکه باشلایوب تعمیره محتاج اولدقلری جهته اعاده لری لازم کلمکین بر معتاد دونمای هایون ایله قپودان پاشا درسعاده جلب ایدمشلر .
 و بوجهته قره دکز نهاییه الامر روسیه دونماسنک نفوذی آلتنده قالمشدر .

* بحث حرب و صلح *

بالاده بیان اولدینی اوزره دولت علیه ایله پروسیا دولتی بیننده عقد اولنان اتفاق سندی بیک یدی یوز طقسان سنه میلادیه سی کانون ناینسنک اوتوزنجی کونی درسعاده امضا اولدینی کبی پروسیا قرالی فره دربق کلیوم دولت علیه دشمنلرینی صلحه اجبار ایچون حدودلرینه یوزالی بیک قدر عسکر سوق ایدوب وبالذات

اردوسنه كيدوب حتى بو اتفاقك تصديقامه سنی سنه مزبورہ جزیرانك يكر منجی
كونی اردوكاهنده امضا ايلمشدر .

روسیه ونمچه دولتری دولت علیه ایله منفرداً عقد مصالحه املنده اولوب روسیا
اتفاقی هر نقدر آنلردن مکتوم طوتلمش ایسه ده عهد نامه مذکورک بر صورتی
الرینه کچمش ایکن ینه منفرداً مصالحه یه دولت علیه یی ارضا ایده بیلمک وادیسنه
سلوک ایله خیلی مدت نامه رسلری اردوی هایوندن اکیسک اولمامشدر . دولت
عایه دخی بتون بتون جواب یأس ویرمک ایستمیوب حتی پرنس بوتمکین طرفدن
هان طرفین مرخصلرینک موقع مکالمه به ارسالی تعجیل اولندقدہ مواضعه یولو
مرخصلر تعیینی تذکر اولنمشیدی . لکن در سعادته مقیم روسیا ایلیجیدی ولو
مواضعه اولسون مرخص تعیینی جائز دکادر . زیرا حقیقت حال بو طرفدن قرالمه
اشعار اولنمازدن مقدم اعدا طرفدن اخبار اولنه رق قوتورینه بادی اولور بوسنه
دولت علیه هان صیقی صیقی به جنک ایتملی که اعدا قوتلرینی روسیا اوزرینه ویرمیوبده
بوکوزین برکوزل مصالحه به دسترس اوله لم دیمکله مرخص تعییندن صرف نظر
اولنق لازم کلشیدی .

برده روسیا ایلیجیسی دولت علیه نك باشلوجه قوتی یعنی بیوک اردوسنی نمچه اوزرینه
سوق ایتمنی ایستیوب اسوجلو ایسه بیوک اردونک روسیه اوزرینه حرکتی ایستمکله
طرفینک اخطارلری یکدیگره منافی اولمقدن ناشی دولت علیه بر حال تردده دو شمشیدی .
حالبوکه روسیالو برمنوال مشروح حدوده عسا کر کلیه سوقیه نمچه وروسیه
دولتسیرینی تهدید و تخویف ایتمکده ایکن اشبو اکیبوز درت سنه شجریه سی
جمادی الاخره سنه مصادف اولان بیک یدی یوز طقسان سنه میلادیه سی شباطنک
یکرمیسنده نمچه جاساری و المانیا ایمراطوری اولان ژوزف رزمکاه جهانی ترک
ایدوب کیمکله جانشینی اولان (لیوبولدو) کرک مصائب سفریه دن و کرک وقایع
داخیه دن اوستریا دولته عارض اولان ضعف و پریشانلغنه مبنی بر مدت آرام
و آسایشه محتاج اولدیغنی درپیش و اشاغیلرده تفصیل اولنه جنجی و جهله اول ائشاده
ظهور و نوبنو ثمر شر و شور ایدن فرانسه اختلالنک نمچه الکاسنه سرایتی
اندیشه سی کندوسنی دلریش ایتمکدن ناشی بالطبع صلحه خواهشکر اولدینی مثللو
بتون اورویایه مضرتی ملحوظ اولان اشبو فرانسه وقوعات غریبه سی اورویا
بولتیقه سنی تغییر و کافه دول اورویا بینلرنده کی اغراض و نضائیتی ترک ایله فرانسه به
قارشو اتحاد و احتیاط اوزره بولنه رق اول مضرتک دفعنی رکیز ضمیر ایتمکله روسیا
دولتی دخی نمچه وروسیه دولتری اوزرینه آچیقدن آچیغه سفر آچیوب هان

حدود لرینه عساکر کایه سوقیه نمچهی دولت علیه ایله مصالحه به اجبار ایتک اوزره بولمشدر . کله لم اردوی هایونک احوالنه .

﴿ احوال اردوی هایون و بعض وقایع حربیه ﴾

ایام شتا مرور ایله هنگام و غا تقرب ایله یکندن طرف طرف تدارکات حربیه به شروع اولنوب اشبو اکیوز درت سنه سی شعبانک دردنجی ونسانک سکنزنجی کونی لواء شریف ستونه بند اولنهرق همان اردوی هایونک صحرا به اخراجی تصمیم اولنمشیکن شدت اوزره فورتنه لر ظهور و برف و باران نزول ایتدیکندن صحرا به آرام و حرکت قابل اوله میه جنی جهته اردوی هایونک مشتادن خروجی هوالرک کشایشنه تعلیق اولنوب نهایت شعبانک یکر می بشننجی کونی اردوی هایون شمنی صحرا سنه اخراج اولنه بیامشدر .

انجق اول امرده اردوی هایونک سمت حرکتی بیلنوبده اکا کوره ذخائر و مهمات ترتیب اولنمق لازمه حال و مصالحتدن اولدیغنه مبنی مشتاده ایکن دخی بورالری دفعات ایله مذاکره و مشاوره اولنوب نهایت صحرا به چیقاده مقضای حاله کوره حرکت اولنمق اوزره قرار ویرلمش ایدوکی طرف سردار اکر میدن رکاب هایونه عرض و تقریر اولندقدقه تقریرک بالاسنه (بونلر کوزل لکنهپ اولمشیدی اوله جق ایدی تعبیرلرندن عبارت اولوب میدانده کورلمش ایش یوق دشمن طور میور بویله کوشکلک ایله ایش کورلمز بن ایش ایسترم کوزیکزی آچوب باقه سکنز کیجه و کوندوز دیمه سکنز یاز کچمکه یا قلاشیدی سز دخی شو یله اوله جق بویله اوله جق دیور سکنز الله کوسترمسون دشمنلر بر طرفدن فرجه بولمق لازم کلور ایسه صکره بکا کیم جواب ویرر بن سکا کلی استقلال ویردم هر بر رأی و حرکتک عنده مقبولدر امور دین و دولتده اقدام و غیرت ایدنلره اکرام و قصور و رخاوت ایدنلرک تأدیبلرینه اهتمام ایده سین اسماعیل ونیش وودین و یکی بازار و سائر اردولرک حاللری نیجه در . یکی بازارده ذخیره یوق نیچون تدبیر ایتمز سین بر طرفی دوشونوب دیگر طرفی فراموش ایتک اولور می بویله کوشک حرکتدن بکا حیرت کلپور اللهی سورسه ک غیرت ایده سین) دیو خط هایون کشیده بیورلمشیدی . حالبوکه صحرا به خروجک تاخیری کچن سنه بوزه بوزغوننده او جاقلرک اکثر خیامی تلف اولوب در سعادتدن ورودینه انتظار اولنان خیمه و خرگاه و سائر مهمات دخی هنوز وارد اولدیغندن ناشی ایدی . قالدیکه مشتاده عسکره نصف تعیین ویریلور ایکن اردوی هایونک اداره سنده ضرورت چکیلوب حتی هزار غراد و نیکبولی ولو فجه قضالرینه اوزرون بشر بیسک غروش ارسال ایله ذخیره اشترا سنه ابتدار اولنمش ایسه ده

اورالردن تدارك اولنه جق الی بیک کله قدر ذخیره دخی اردونک صیقندیسنی دافع اوله میه حفندن صحرا به چیققدقه تمام تعینات ویرلمک لازم کلوب عسکر دخی تکثر ایلدیکی حالده بروجهله اداره قابل اوله میه جنی اندیشه سیله اردوی هایون ارکانی نه یاه جقلرنی شاشیرمشلر واردوی هایونک یا ایساجی ویاخود و دین طرفه حرکتی ایجاب حالدن اولغله اولانسانی راهده یول ذخیره سی ترتیب اولتمق ایچون ایکی طرفه دخی اوامر علیه تحریر اولتوب انجق بو ذخیره نك تدارکی قضالر اهالیسنك وسعتده اولدیغنی دخی اصحاب وقوفدن خبر آلمشلر ایدی قالدیکه بو ایکی طرفدن هر قفسینه عزیمت اولنه جق اولسه دیگر طرفك احوالی کرکی کچی بیلنوبده کرک عساکر و کرک مهمات و ذخائر ایله تقویت ویرلمدیکه حرکت جائز اوله ماز ایدی . بوخلالده ایسه کمال متانت و منعته بناء طوب و خمبره ایله تسخیری دشوار اولان آطه قلعه سنده ذخیره قالدیغندن وبر طرفدن اعانه و امداد امید ی اولدیغندن ابرام عسکری ایله محافظی اولان ارناود ابراهیم پاشا قلعه مذکور دینی نمچه لویه تسلیم ایلمش اولدیغنی خبری آله رق هر کس متالم اولوب خصوصیله سردار اکرمک اوائل صدارتنده بویه بروقه موحشه نك ظهوری پک زیاده کدرینی موجب اولمشدر .

بالاده بیان اولدیغنی اوزره اشقودره لی محمود پاشایه وزارت ویریلوب اودخی جوارنده بولنان بعض ممالک اوستریایه دخول ایله چاپول ایتش ایسه ده اردوسنده آلات قلعه کیری اولدیغندن استخلاصی مطلوب اولان بکوردلن قلعه سنی آله میوب ذخیره جه دخی مضایقه سی اولدیغندن مامور محافظه سی اولدیغنی یکی بازاره عودت ایلمشدر .

اول خلالده تیه دللی علی پاشا دخی نمچه نك بعض ممالکنی اوروب چاپول ایتش ایسه ده یاننده طوب و خمبره اولیوب ذخیره مضایقه سیده اولدیغندن اودخی مور او به عودته مجبور اولمشدر .

ذخیره مضایقه سندن بشقه بوسنه کرک روم ایلی و کرک اناطولی عسکر لرینک ورودلری تأخر ایلدیکندن اردوی هایونه هنوز بر طرفدن عسکر لکه که باشلامیوب دشمنلر ایسه حاضر ومهیا اولدقلرندن قول قول حدود اسلامییه هجوم ایده جک اولورلر ایسه کوندریله جک عسکر اولدیغندن ضروری اردوی هایونک بر طرفه حرکتی لازم کلوب حالبوکه ذخیره اولدیغندن و اطرافدن عسکر ورودینه دک وقت مرور ایده جکندن چادر سز همان بر ایکی کونک پکسمات ایله سبکبارجه حرکت لازم کلور لکن هنوز آرپه تدارک اولنه مدیغندن بوصول دخی مشکل اولغله سرحداتک محافظه سی باعث خدشه و خلجان درون اولمشیدی .

كرك روم ايلي و كرك اناطولى عسا كرينك سبب تاخر لرني صدر جديد حسن
 پاشا ركاب هاپونه بووجهه عرض و تلخيص ايتمشدر كه : صدر سابق جزا ئلى حسن
 پاشا صلح اولورم اميديله مهام سفر يه به باقيوب اراقه دماء عباد و استجلاب منافع
 و غضب اموال ايلمكدن غيرى ملاحظه سي اولديغندن كرك طوائف عسكريه و كرك
 مأمورين سائره كندوسندن نفرت و وحشت ايدوب مجرد آنك غدر و ظلمندن
 خوف و خشيتلرينه مبنى سفره گلگي خاطر لرندن چيقارمش اولدقلرندن ايشلر
 بو مرتبه يه گلش و آنك وفاتيله قلوب ناسه امنيت گلش ايسه ده محللرندن قالقوبده
 محل مأموريتلرينه و رودلرى وقته محتاج اولديغنى اصحاب و قوف خبر ويريورلر
 ديوب تحرير ايلمشدر . لکن اوراق سائره نك شهادتنه نظراً عسا كر مرتبه نك سبب
 تاخرى جزا ئلى حسن پاشانك فرط شدندن خلقك نفرتى اوليوب بالعكس آنك
 وفاتيله مجازات خوفى بر طرف اوله رق هر قفادن برسس چيقمغه باشلامسندن
 نشئت ايتمشدر ظن ايدرم . از جمله اول خلالده روم ايلينك صول قول عسكرى
 سفره سورمكه مامور اولان سلا نيكي نعمان بكك در سعاده تحرير ايلمش اولديغنى
 مکتوبنده روم ايلينك كلى عسكرى صول قول اولمغه آستانه دن سلا نيكه وارنجه
 اقلى اوتوز بيك آدم اخراجى مأمول ايكن هر كس برر محله انتساب و سوريجيلر
 دخى طريق ارتكابه سلوك ايله شونى بونى استصحاب ايدم كلدكلرندن كوچ ايله يدى
 بيك عسكرا اخراج ايدم بيلديكنى و حالبوكه نيشدن اسماعيله وارنجه محافظه لازم
 اولمغه بوسنه يوزالى بيك عسكرا احتياج دركار اولديغندن كرك روم ايلیده و كرك
 اناطولىده مصالحتك كوشك طوتلمامسنى و الا بصورتله روم ايلي و اناطولىدن الى
 بيك عسكرا چيقارملق احتمالى اولديغنى تحرير و انها ايلمشدر . و ينه اول خلالده
 سكر عدد سردن كچدى بيراغى آجيلوب سفينه لر ايله اسماعيل جانينه كوندرلش
 ايسه ده اكثريسي بوغازدن چيقدقلى كچى طريق سر كشى يه سلوك ايله جبراً و قهراً
 وارنجه چيقوب پريشان اولملىله جزئى مقدارى اسماعيله ايصال اولنه بيلديكى بعض
 اوراق رسميه ده كورلمشدر .

وقوبان خانى بختكراى خان برمنوال سابق مشتانشين اولمق بهانه سيله مر حوم غازى
 حسن پاشا ايله برابر شمنى به كله رك كلفچه ده اقامت اوزره بولمغه باباطاغنه و آندن
 اسماعيل جانينه حركت ايتمى كندوسنه اشعار و طرف شاهانه دن كلى آقچه ارسال
 اولمش ايكن چونكه حرباً برايش كوريله ميوب بالضروره صالح ايله مصالحتك
 بتورلمسى لازم كله جيكي اعتقادنده بولنه رق صلحه مائل اولديغندن اسماعيله سواري يه
 احتياج يوق باباطاغنده دخى ذخيره بولمناز ديوب اعتذار و تكرار حركتى امر و تكليف

اولدئجه درلو عذر وهانهلر ایراد ایدوب انجق هر تکلیفه اردوی هایون طرفدن مساعده و بهر حال حرکتی ایچون صادر اولان اراده سینه قطعیه کندوسنه ارانه اولمغله ارتق مدار اعتذار قالدیغدن ناچار کلفچه دن حرکت ایلمش ایسه ده اوتوز بش ساعت مسافه سی اولان باباطاغنه الی بش کون ظرفده وصولی تحری ایلمش اولدیغی انوری تاریخنده مصر حدر .

الحاصل اردوی هایونک و سرحدات اسلامیه نك كرك ذخیره و كرك عسکر چه مضایقه سی برکال اوله رق اردو خلقنی حیرت استیعاب ایدوب اگر چه برمنوال سابق اورویا پولتیقه سنك تغیری حسیده كرك نمچه و كرك روسیه دولتری صلحه میل ایتمش ایسه ده آنر منفر دأ مصالحه آرزوسنده اولوب دولت علیه ایسه پروسیالویی توسط ایتك اوزره عقد معاهده ایلمش اولدیغدن منفر دأ مصالحه اوله میوب فقط بروجه مشروح اسباب حریه نك كمال نقصانندن ناشی دولت علیه تدارکاتی اكمال ایدنیجه دن برمدت دشمنلری اغفال لازم گلکین ایکسیله دخی سر رشته مکلمه نی قطع ایتدیکندن و كرك روسیه و كرك نمچه دولتری حسب الوقت مصالحه نی آرزو ایتکده اولدقلرندن دأما نامه رساری اردوی هایونه کلوب کتمکدن خالی اولیوب واردوی هایوندن دخی طرفینه بعض کاغدلر یازیله رق وشویله بویله دینلهر ك امرار وقت اولتور ایدی .

لکن موسم حرب تقرب ایتدکجه وسائل اعتذار قالمیوب ایکی طرفك نامه رساری دخی یامرخصلر تعیین ایله مکلمه یه و یا خود محاربه یه مباشرت اولمق اوزره جواب قطعی ایستمکه باشلایوب نمچه نك اردوی هایونده مقیم استرمر نام نامه رسنه نمچه قوماندانی پرنس قوبورق طرفدن برقطعه تعلیمات دخی کلوب مضموننده بوقدر وقتدنبرو سز شمنیده اقامت برله دوات علیه طرفدن مرخصلر کوندریله جکدر دیو اغفال اوله رق بی وجه توقف و آرام ایتکده سکز همان مکتوب بمزك وصولنده عودت ایده سکز دیویازلمش اولدیغدن نامه رس مرقوم کیفیتی صدر اعظمه عرض وافاده ایلدکده چندروز مقدم طرفزدن پرنس قوبورغه برقطعه مکتوب یازیلوب مضموننده مقدما ایمپراطورك وفاقی حسیده طرفکزدن ظهور ایده جك خبر جدیده انتظار اولتور ایکن صدر سابق حسن پاشا دخی وفات ایتکله مصلحت تأخر ایدوب هنوز طرفکزدن دخی خبر وارد اولمغله منتظر اولدیغمز خبر جدید ورودنده مرخصلر کوندریله جکدر دیو اشعار اولنشیدی . اول مکتوبك جواب نامه سی گلدکه اقتضاسنه کوره حرکت اولتور دیو جواب ویرمش ایسه ده ارتق بوندانصکره بروجهاه وسیله اغفال و اعتذار قالمامشیدی .

روسیه قوماندانی پوتمکیندن دخی بوخلالده اردوی هایونده بولسان باروج نام نامهرسنه برقطه تعلیمات کلوب مضموننده دولت علیه مصالحه ایستیمور ایش سن یچون بیهوده توقف ایده یورسین همان حرکات حربیه به مباشرت ایده سین دیو بکا ایمپراطور یچه طرفدن امر کلدی اکر صحیحاً مرخص کوندرلیه جک ایسه سن دخی همان شمنیدن حرکت و بو طرفه عودت ایت و اکر مرخص کوندره جکلری صحیح ایسه اون ایکی کونده ک دولت علیه طرفدن مرخصلک حرکت ایلدیکی خبری کلور ایسه ان شاء الله تعالی مصالحت نظام بولور والا ابتدای مایسده حرکتیه مأمورم آندنصکره بنم المده غیری ایش قالماس دیو قطعی وجهله تحریر ایلمش اولدیغندن اون ایکی کونده ک مرخص تعیین ایلرز دیمکدن غیری مدار اغفال اوله بیله جک برصورت قالمدیغندن اولوجهله پوتمکینه برقطه مکتوب تحریر اولنق اوزره قرار ویرلمشدر .

لکن ایام معدوده ختام بولدقده نمچه لونک یرکوک اوزرینه و روسیه لونک ابرائیل اوزرینه هجوم ایده جکلری و یرکوکیده انجق ایکی بیک قدر آدم اولغله کلیتلو دشمن ظهورنده مقاومت ایده میه جکلری درکار اولوب ابرائیل قلعه سنک محافظه سی ایسه لا اقل اون بش بیک پیاده به محتاج ایکن موجودی ایکی بیک کشیدن عبارت اوله رق هجوم دشمنده تجربیه سی سبقت ایلدیکی منوال اوزره همان قلعه بی تخایه و تسلیم ایتملی اغلب احتمال و بو کوندرده اورایه عسکر یتشدر لک محال ایدی بوندن بشقه و دین جانبنه دخی کلیتلو عسکر ارسال لازمه دن اولوب اردوی هایوندن اعانه قابل اولدیغندن پلونه ولو فیه و طرنوی و سلوی قضالرینک ارباب حرب و ضربنی جبراً و قهراً اورایه سوق ایتمدن بشقه چاره اولدیغندن بو خصوصه نیکبولی محافظی وزیر ارسلان پاشا سورجی تعیین اولنمشیدی .

بناءً علی ذلك بوانداده دشمن هجوم ایلدیکی تقدیرده مقابله به مجال و امراروقته دخی مرخص تعیینندن بشقه وسیله اغفال اولیوب وقتلر ایسه تنک اوله رق بو کوندرده بر طرفه دشمن هجومنده اردوی هایوندن بشقه بر جمعیت اولماق حسینله بالذات اردوی هایونک اول طرفه حرکتی لازم کلدیکی حالدیه دیگر طرفدن هجوم ایده جک دشمنک مقابله سنه کوندریله جک بشقه عسکر بولندیغندن بو ملاحظه لر باعث حیرت اولمقده و اکر چه ظفر و نصرت ید قدرت الهیه ده اولغله یأس و حرمان اقتضا ایتمز لکن اسباب ظاهریه نیک فقدانی ذهنلره خلجان و یرمکده و حالا عسکرک توارد ایتماسی واردویه فاصل اولان مهمات اوچ بیک عربیه به محتاج ایکن اطرافدن ترتیب اولسان بیک مقداری عربلر ضعف حال رعا یا حسینله اخراج اولنه میوب جبر و تهدید ایله اخراج

اولنق اوزره متعدد مباشرلر ارسال اولنمقده و بوحالده بحسب الضروره مهمات وادواته باقلمیه رق شویله جه کیدیلویره جک اولسه محذور درکار اولسلیله انحق و رای عقول بشرده خارق العاده الطاف الهمیه نك ظهورینه انتظار اولنهرق کمال عجز و مسکنت ایله درگاه چاره سازدن استدعای عون و غایت قلمقده در دیو طرف سردار اکر میدن رکاب هایونه عرض حال اولنمقده تقریرک بالاسنه بووجهله خط هایون کشیده بیورلمشدرکه : (بو حیرت نیجه دهک بویله دردیوهایشی براغوب دشمنلرصل ایستلر ایسه یاپسونلرمی براز طاوراملی دکلی سن اردویه کلدیگک ائنده بویله دکل ایدک اردوده اولنلر سنی تشویشه می قودیلر فله الحمد عسکر یوریمکه باشلادی ایشته مواجی دخی کاملاً کوندردم وارنه یه مهمات کیتدی ذخیره کیتدی ترتیب عربه لرخی بکلمک نه دیمک اردوده حیوان یوقیدر بودین خصوصیدر هر کس کندو حیوان و یروب کتورمک لازم ایکن مهمات وارنده قالدی دیوبونی نیجه یازدیگر بن بوندن خصکی کوندردم قالدیره جقدر باقه سکر متفق دولتر برابر صلحده دخی اولما نیجه صالح یوقدر قطعی جوابدر جنک ایچون تدارک ایدوب بر ساعت اول جنک ایتمکه سعی وغیرت ایده سکر و من الله التوفیق) دیو بیورلمشدر .

بو ائنده ایسه پرنس قوبورقندن اردوی هایونده کی نیجه نامه رسنه تعلیمات کلوب مضموننده بو کره کندوسنه ایمراطور طرفندن وارد اولان رخصتنامه موجنبه صلح و حربیه رخصتم وارد اقدحجه صدر اعظم طرفندن وارد اولان مکتوبک مضمونی ملاحظه ایتم برایی کونه دک جوابنامه سنی ارسال ایدرم دیو تخریر ایتمکله سیاق اشعاره و مقتضای حاله کوره وقایه ناموس سلطنت سنیه التزام اولنهرق سلم و صفوته اظهار میل برله مکتوبک جوابی وارد اولدقده مرخص تسیری مذاکره اولنوردینلمش و برایی کون صکره مکتوب مذکورک جوابی دخی وارد اولوب خلاصه مؤداسی مسالمه و مصافاته نیجه لولرک کمال میل و موافقتلرینی بیانندن عبارت بولنمش و نامه رسلرینک تقریرلری دخی صفوت و خلوصلرینی مشعر اولمقندن ناشی اقتضاسنه کوره ترجمانه حسن مقابله اولنمش ایسه ده فیما بعد توقف ایتموب محاربه یه آماده اولدقلمری تخریر و تقریرلرندن مستبان اولغله همان مرخص تعیینندن غیری امرار وقته وسیله قالمدینی و بوضورته قرق الی کون قدر امرار وقت اولنه مزایسه چونکه روم ایلیدن و اناطولیدن اردوی هایونه مرتب اولان عساگر هنوز وارد اولمديغندن و اسماعیله لا اقل یکریمی بیک و ابرائیله اون بش بیک عسکر لازم کلوب حالبوکه اطرافدن ایکیسی ایچون ترتیب اولنان عساگرک مقداری اوچ دوت بیک قدر اولوب آنلرک دخی محللرندن حرکته صوب مأموریتلرینه مواصلتلری یکریمی

کونه محتاج اولدیغندن بوگون ندرده دشمنلر طرف طرف هجوم ایده جک اولور لر ایه
 حال مشکل اوله جنی تکرار رکاب هایونه تقریر اولمغه بوکا جواباً کشیده بیور بلان
 خط هایونده (نمجه جاساری بن دولت علیه ایله مصالحه اولورم وانکلتره لویی
 توسط ایدرم دیوانکلتره قرانته نامه یازمش اولدیغنی حوادث اوله رق
 انکلتره ایلچیبی بو طرفه خبر ویرمش ایدی . اردوده اولان نمجه نامه رسنه
 سز انکلتره لویی توسط ایتمشسکز مصالحه کز آستانده سویلشیه جکدر دیمک یاخود
 مرخص آستاندن کیده جک ایتمش دیمک ویاخود بونک کی اغفالاتی موجب بر صورت
 بولمق ایله بر ازدها امهاله باقه سکز قالدیکه بو طرفه اولان روسیا ایلچیبی روسیا
 قرالی اواخر نیسانده ویامایس دخولنده جنکه مباشرت ایده جکنی بیورم شمیدیکی
 حالده محاربه اوله جغنده شبهه یوقدر دشمنلرک دولت علیه حدودنده کی عسکر لرینی
 روسیا حدودینه چکدکلری دخی دلیدر سز نه طوره یورسکز دیمکن خالی دکدر
 بوصورته سز دخی طرف طرف طاور اتمق لازم دکیدر یوخسه جنک
 ایتمه جکمی سکز تخریر انکزدن بکا حیرت کلیور فرصت الده ایکن فوت ایتمک معناسی
 ندر کوریم سزی الله تعالان نصرت ایستیه رک محاربه یه اقدام ایده سکز) دیوبیور لمشدر .
 بناءً علی ذلک مسقو و نمجه نامه رسلرینه برمدت دخی اغفالی موجب اوضاع ایله
 معامله اولنه رق نهایت کارده متفق لیمز برابر اولمغه مصالحه ممکن اولماز دینلک
 اوزره قرار ویرلیدیکی و بوخالده ایسه سرحدات اسلامیه عسکر دن خالی اولدقن
 بشقه طونه سواحلنک کلیدی مثابه سننده اولان اسمعیل سر عسکری جوره زاده
 احمد پاشا ترکان مقوله سنندن اوله رق آچیق برلرده اوتارمغه آلمش اولمسیه
 کندوسنده سر حد نشین اولمق و امور عسکر یه نی اداره ایتمک حال وصفی اولدیغندن
 مقدا محافظه سنه مأمور اولدیغنی خوتینک استیلا سنه دخی سبیبی مروی اولوب
 بورخاوق سببیه دخی دولت علیه نک کندوسندن دلکیر اولدیغنی درک واحساس
 ایله مسلوب الشعور اولدیغنی حالده اوچ کونده بر عسکر ینک تعیین مطالبه سیله
 وقوعبولان مهاجمه لرندن اورکمش اولمسیه سر ایندن چیقه میوب عسکری معاینه
 ایدمز اولدیغندن عزلی لازم گلش ایسه ده اول حوالیده سنه محافظی آیدوسلی محمد
 پاشان بشقه وزرادن اسماعیل سر عسکر لکنه برمناسی اولیوب حلبوکه محمد پاشا
 سر عسکر نصب اولدیغنی صورته هیچ اولماز ایسه کندوسنه یکر می بیک وایساقچی یه
 وسنه و سائر محافظه سی لازم کلان میر میراندره بشر اوزر بیک غروش اعطاسی
 لازمده دن بولدیغنی حالده اردوی هایونده قدرت مالیه اولدیغندن بو مقوله مصلحتار
 ضروری کیرو قالدیغنی و کافه سرحداتک محافظه سی آچیه یه موقوف اولدیغنی حالده

مضایقهٔ مالیه بر کمال اولدیغندن هزار خون جگر ایله جمع و تدارك اولنه بیلان طوائف عسکر به دخی ذخیره سز لکدن تفرق ایتمکده اولوب حتی بو کونلرده رحوه یه لوفخدن بر بیراق عسکر وارد اوله رق بر کیجه بیتوتت و بیه جک بوله مدقلندن فر داسی ینه بیراقلرینی کشاد ایله عودت ایلدکری و سائر طرفلرک احوالی دخی بوکا مقیس اولوب اما آقچه اولسه قری اهالیسنک ما کولاتلرندن اطماع ایله اولدجه مواد تعیش بولنه بیله جکی طرف صدر اعظمیدن پیدرپی رکاب هایونه عرض اوله رق سر یعاً اردوی هایونه آقچه ار سال بیورلمسی نیاز اولنور ایدی .

اول عصرده وزرا و میر میرانلر اعصار سالفه ده اولدیغی کبر اصحاب ثروت و قدرت اولیوب خصوصیه سفر انساننده وزرانک تکثری حسیله اکثر محافظه ده بولنانلر بی منصب و منصوب اولنلرک دخی منصبلری متسلم ایله ضبط ایتدیرلدیکندن اللرینه جزئی شی کیروبا کثری بی وایه و مضطرب اولمقدن ناشی وزرا و میر میرانلرک یالکز بر نام و شانلرندن بشقه مدار نفوذلری اوله جق حالتلری قالمق حسیله انظار عسکر یه ده دخی عاجز و بی نفوذ کورندکلرندن ایش کورمک مشکل اولمشیدی .

صدر جدید حسن پاشا دخی مدت مدیده بی منصب قالغه واقف حال اولوب خصوصیه رحوه دن شمنی یه کلور ایکن ره راستنده واقع نیکبولی محافظه سنده بولنان وزیر ارسلان پاشانک اقوات یومیه سنی تدارکدن عاجز اولدیغی کورمکله و سائرینک حالی دخی بوکا مقیس اولمغه وقوع حالی بسط و بیان ایله بو مقوله مضطرب اولنلره خزینه هایوندن اعانه لازم اولدیغی مستقلاً بر قطعه تقریر ایله رکاب هایونه عرض ایتمشیدی . در سعادتده ایسه مضایقهٔ مالیه پک زیاده اولوب حتی بر منوال سابق دونمای هایون عسکرینک اکمال نقصانی ایچون بعض رجال و مأمورینک اعانه لرینه احتیاج مس ایتمشیدی .

الحاصل اسباب محاربه و مقابله هر جهته ناقص اولدیغی حالده پروسیا ایله اولسان معاهده موجبنجه منفرداً مصالحه دخی قابل اولیوب پادشاه نوجه حضرتلری ایسه همان جنک دیو قطعاً امر و فرما ایده کلکله ناچار اردوی هایونک بر طرفه حرکتی لازم کلهرک سخرایه بعد الحروج رمضان شریفک اوچنجی و بشنجی کونلری خیمهٔ سردار اکر میده مجلس مشورت عقد اولنوب چونکه بو ائنده اردوی هایونه مرتب اولان عسکرک اوچی ظهور ایله ذخیره دخی توارد ایتمکه باشلا دیغندن روسحق وودین طرفلرینه تقویت ویرلدکن صکره اردوی هایون ایله ایساقچی طرفه عزیمت اولمق اوزره قرار ویرلمس و مرتب اولان عساگردخی پیدرپی شمنی سخراسنه آقوب کیمکه باشلامش ایدی .

بوحالده سلطان سلیم خان طرفندن سردار اکرمه تهديد يولنده غایت اکیدوشدید
 برقطعه خط هایون دخی کشیدی . شویله که : (بنم وکیل مطاقم وسردار اکرم
 پادشاهه لازم اولان وکیل مطلق اولنلره رخصت کامله واستقلال ویروب یازدقلری
 اجرا ایتمکدر وکیل مطلق اولنلره دخی لازم اولان رجال دولت وواجقو
 وسائر خدمت ازبابی اویدیروب هرايشی اهانه اصهارلیوب طور وحر کتلیزینسه
 دقت ایدوب صداقت ایدنلری یرنده ابقا وخدمتلرنده تکاسل وخیانت ایدنلری
 عزل واجرای مایلیقلریله سائر عبرت ایدوب یرلرینه اربابی نصب وبویله سفر وقتنده
 هرکسه وظیفه سی اولان خدماتی کوردیروب کندوسی دخی کیچه وکوندوز وقتینی
 امور سفره صرف ایدوب دشمندن خوف ایتیموب لازم اولان تدابیرده قصور
 ایلمیوب اخذ انتقامه نه لازم ایسه کوروب الله تعالی به توکل ایله حرباً وتدیراً
 دشمنه غلبه وعون حقله اخذ انتقام وشان دولتی تکمیل ایله حق نعمتی اجرابه
 مقتضای دیانت ووکالتی ایفایه بذل مقدور ایتمکدر سوق الهی ایله سنی وکیل مطاق
 ایدوب مهر هایونم اعطاسیله سردار اکرم ایتدم واستقلال تام ویردم مأموم
 بوایدیکه سن سائر وزرا کی اولمیوب قونداغک سرحدده چوزلمکله هر برامور سفری
 ودشمنلرک حاللری و عسکرک احوالی بیلور مقوله دن اولماکله شمدی یه دک هر طرفک
 تدیری احاطه ایدوب شویله تدیر اولندی وفلان ایش کوردی همان مقابله اعدادن
 غیرى ایش قالدی آنی دخی فلان کون شویله ایده جکم فضل حق ایله برشی یوقدر
 دشمندن اخذ انتقام الله تعالی دن مأمولدر دیه سین وشمدی یه دک طرف طرف
 دشمنلری شایره جق وقهر وتدمیر ایده جک حرکته شروع ایده سین سن ایسه
 شمدی یه دک بر ایش کورمیوب کوندر دیکک تحریراتلر عجز ویا سدن عبارتدر
 حال بویله در دیو هرايشی براغوب دشمنلر نه ایدرلر ایسه ایتسونلر بز طوروب
 باقه لمی بوصل شیدر یاز اورته سی اولدی حالا نه ایده جک کیزی بیلمیورسکن
 بو حیرت بوتکامل سنده میدر یوقسه اردو رجالنده میدر بکا بیلدیره سین عسکره
 بهانه بولنور ایسه کیانلری نیچون تأدیب ایتمیورسین ذخیره بهانه بولنور ایسه
 آنچه سنی کوندردم هرکس یرلرنده ذخیره بولوب کچمیورلر اول ذخیره لری عسکر
 ایله نیچون جاب ایتمیورسین معاذ الله بو بواطت حسیده یازین دشمنلر طرف طرف
 یوریدکلری زمان سن ورجال دن کیم بنم المذن قورتیلور بونی ملاحظه ایتمیوره سین
 فرمان یازمقدن غیرى بر تدیر یوق آنک دخی کثرتی عدم نفوذینی موجب اولدی
 اطاعت ایتیمانلرک حقدن کلنمکده فرمانک نه فائده سی وار فرمان ارسال اولندقد
 آردی آرانوب اجرا اولمانک سبی کیمدر تصحیح و سیاست ایتک اقتضا ایتزمی .

عالمده فسادك ازالہسى اسبابك قویسى سیاست دكيدر البت مؤثر اولور الله تعالى كوسترسون بوسنه دخى برایش كورلمديكى حالده صكره حال نصل اولور بر كره ملاحظه ایتزمسین علم الله تعالى سزك بومثللو حر كتكزدن بكا حیرت واضطراب كدى اردویى بو حالده كورنلر سفر یوق ظن ایدرلر سر عسكركلرك نه حالده اولدقلىنى الله بیلور آنره هیچ باقدیغی یوق روم ایلی والیسی نیشه كلش توجیهات صدر سابق وقتنده لندن آلمش قطعاً نفوذى قالماش نیش محافظى سوزینی دكیوب باشلو باشنه ایدوكنی تصحیح ایتدم بونلری نیچون بیلوب نظام ویرمیورسین صدارت ورجاللق همان اطرافدن كلان كاغدلىرى كوندرك و فرمان یازمه قמידر سندن مأمول اولان بومیدر نام و شان و تحصیل رضای رحمان ایستزمسین حسبنا الله ونعم الوکیل بن آنی بونی بیلمم بالله الكریم بو حالتره سبب اولنلر و امور دینده تكاسل ایدنلر كیملر ایسه اولادم دخى اولسه المدن یقه سنی قورتاره من و دشمنلر بر طرفدن ایشلرین كورمكده و سز ایسه حالا حیرتده سكرز ایشته پروسیا اسوج جنك ایدیور دشمنلرك او طرفده اولان عسكركلرینك چونی پروسیا اوزرینه كیتدیكى و سزى قورقودن جزئی عسكرك ایدوکی عندمده محقق اولمشدر ادنی همت اولنسه افلاق و بغداددن دشمنلر طرد اولنور و لهلو ایله آرده حائل قالمیوب ذخیره و لوازمات سائره نك سهولته لهدن تداركی ممكن اولور بو غیرتسزك نیجه یه دك آچه دیرسه كز مواجبدن صكره بیک كیسه آچه كوندردم ایشته بیک كیسه دخى كیدیور بوندن بشقه ینه ارسال ایدرم سزك برایش كوردیككز یوق هنوز بر منزله نظام ویرمیورسكز تانارلر سكرز كونده كلیور شغنی اطرافده دلی هیئتده اشقیقا ظهور ایتش آنی بیله دفع ایتمیورسكز ایشته بوتنیهدر صكره كندوكن بیلورسكز) دیو بیورلمشدر .

الحاصل اردوی هابیونك پریشانلی افزون و توارد ایدن خطوط هابیون ایسه زهر عتاب و تهدید ایله مشحون اولدیغندن سردار اكرم نه یابه جغنی شائیروب مدت مدیده بی منصب مضطرب قاهره ق تلخكامیء اذار ایله كچوردیكى كونلری تمنی ایدر اولدیغی حالده یركوكی مظفریتی ظهور ایله بعض مرتبه یوزخی آغارتمشدر . شویله كه : برمنوال سابق ایمپراطور ژوزفك فوت اولسی واقدمجه ممالك نمچه مضافاتندن اولان پائیزی باسی اهالیسنك عصیانلری و وقوعات سائره حسبیه نمچه دولتك بعض مرتبه دوچار ضعف و قنور بولنسی و فرانسه و قعه غریبه سی نمچه دولتك بولتیقه سنی تغیر ایدرك ایمپراطور جدید (لیو بولدو) بالطبع صلحه خواهشكر اولوب دولت عایهجه دخى صلحه مجبوریت دركار ایسه ده پروسیا

اتفاقی مقتضاسنجه دولت علیه منفرداً مصالحه ایده میوب بروجه معاهده پروسیالو ایله برابر حرکت مجبور اولدیغندن دولت علیه صالحه اجبار ایچون پرنس قوبورغ روسجق طرفه مرور ایله شمنیده اردوی هایونی تضییق ایتمک و چونکه بر دولتک منافعه مواد مصالحه نك درجه موافقت و مساعدسی نتیجه کار وانجام کار زار اولان زمان مکمله ده مالک اولدیغی قوت و اقتدارینه کوره اوله کلدیکندن عقد اوله جق مصالحه نك ممکن مرتبه نمچه دولته مساعد اولسیچون هیچ اولماز ایسه افلاق ایالتی کاملاً قبضه تصرفه آلق اوزره یرکوکی قلعه سنی ضبط و تسخیر سوداسنه دوشوب نمچه لو طرفه مائل اولان انلاق اولردن بعضیلری دخی یرکوکی قلعه سنده بیک بشیوز قدر عسا کر اسلامیه وار آنلر دخی نمچه عسا کری کورندیکی کبی قلعه نی ترک و طونه نی عبور ایله روسجق طرفه کنار ایده جکلری بی اشتباهدر دیو تشویق ایتملریله پرنس قوبورغ بکرشدن حرکتله رمضان شریفک اون التیجی کونی یرکوکی یه قریب محله کلد کده قلعه نك تخلیه و تسلیم اولنمسیچون امر محافظه ده بولنان میرمیران چاوش زاده عبدالله پاشا ایله جنکیز محمد کرای سلطاننه متحکمانه خبر کوندروب آنلر دخی ارأئه صفاچ سیوف ایله رد جواب ایدیجک پرنس قوبورغ همان ایانچی توزیله قلعه یه کیرمک اوزره واروشنه یوروش ایستدکده عبدالله پاشا ایله جنکیز کرای سلطان اعدا تستر ایتمک ایچون ابتدا قلعه نك اطرافنده اولان ابنیه نی احراق ایستدکن صکره ترتیب اصول جنکه ابتدار ایتملردر .

بوکره قوبورغک موجود معیتی اولان عسا کر قرق بیک قدر اولوب التمشدن زیاده طوب و خنبره لری موجود اولدیغی بعض تواریخنده مسطور ایسه ده رکاب هایونه طرف صدر اعظمیدن تقدیم وارسال اولنان بعض تلخیصانده یرکوکی اوزرینه کلان نمچه عسا کری یکر می بیک قدر اولوب انجق مؤخرأ التی بیک قدر امداد لری دخی کلدی دیو محرردر .

بووجهله یرکوکیده جنکه مباشرت اولدیغی روسجق طرفندن مشاهده اولاندکده همان روسجقده بولنان صدر اعظم برادری سید محمد افندی پیدر پی یرکوکی طرفه عسکر امراریله اعانه یه بذل مساعی ایدوب بوصورنده قلعه نك تسخیرینه قولایقله ظفر بوانه میه جغنی قوبورغ جزم ایتمکله همان اطرافنده طابیه و مترسار حفر ایدرک طوب و خنبره ایله تضییقه قرار و یروب ایشته بودفمه نمچه لولر سکسان قیه لک خنبره آتدقلری مرویدر . فقط روسجق جانبنده کی آطه دن دخی نمچه لولر اوزرینه کله و خنبره یاغدیلمقده قصور اولنمیوب بوصورتله یدی کون قدر طوب و خنبره جنکی اولندقدن صکره نمچه لولر وار قوتلرین بازویه کتوره رک

و محترق اولان ابنه دیوارلری سپر ایدرک قلعه یه تقریب ایله یوروش افکارینی ترتیب ایتدکلیری وقت که رمضان شریفک یکریمی بشنجی کونی ایدی وقت عصر دن مقدمه عساکر اسلامیه دن بری که مبدأ ظهور نصرت ونوید فتح وغنیمت ایش حیوانه علف تدارکیچون قلعه خندقدن طشره چیتدقدده اوزرینه کلان برقاچ دشمنه مقابله ایتدیکنی قلعه دن کورن عساکر اسلامیه دن برقاچ کشتی امدادینه کیتملریله نمچه لولردن بالمقابله بعض نفرات کلدیکنه برو طرفدن ینه مقابله اولوب وبوصورتاه طرفیندن هجوم و ازدحام چوغالوب وارهرق غوغا بیومکله درون قلعه ده بولسان عساکر اسلامیه نک عروق حیمت وغیرتلی حرکت ایدرک هان طیش قلعه قبولرینی کشاد ایله براغوردن دشمن اوزرینه هجوم وبرحله ده بر ایکی بیسک قدر اعدایی قلیچدن اسرار ایدوب بو حال اوزره درت بش ساعت قدر یقه یقه جنک وجدال اولنهرق بش التیوز قدر عساکر اسلامیه بر تقریباه نمچه لولرک طونه طرفنده کی مترسارینک آرقه سنه کچوب مترسی ضبط ایدیچک دائر امدادیرر کوکی احاطه ایش اولان مترسارنده کی عساکرلرینه خوف وخشیت طاری اولوب بر کوکی واروشنده ذوق وصفایه طلمش اولان نمچه عساکری دخی براغوردن فراره شتابان اولملریله نمچه لولر بتون بتسون منهزم اوله رق خیمه وخرکاهلرین و اکثر مهمات وطوب وخبردلریله یوروش ایچون تدارک ایلمش اولدقلری لوازمات سائر دلرین ترک ایله فرار ودوشه قالمه وقیریه دوکیله اوچ درت ساعت ایلروده کائن طابه باغلرنده استقرار و تحفظ قصدیه کندولرینی طوپلایوب استحکاماته ایتدار ایتدکرنده عساکر اسلامیه دخی برقاچ ساعتدن برو اعمال سیف و سنان ایله بی تاب وتوان اولدقلرندن بوفوز و نصرته قناعت برله دفن شهیدایه مسارعت ضمنده عودت ایلمشدر .

بو کره نمچه لولرک بش بیسک قدر تلفاتی اولدقدن بشقه قرق قدر طوب واون قدر هاون وکلینلو مهمات وجبه خانه لری عساکر اسلامیه انه کچمش و بیسک قدر عساکرلری اسیر ایدمش اولغله آنلرک تلفاتنه نظراً شهدای اهل اسلام اقل قلیل اولدینی بعض تواریخنده مصر حدر .

سردار اکرم ایسه نمچه لولرک بر کوکی محاصره ایتدکرنی استماع ایتدکه چونکه اردوی هایونک عساکر مرتبه سی هنوز تجمع ایتدیکندن یکچیری او جاغنده پیاده عساکرک مجموعی ایکی بیکه بالغ اولیوب آنلر دخی اکثری کسب و کاریاه مشغول بولدقلرندن زیاده سیله تلاشه دوشه رک هان اطرافدن توارد ایتدکه اولان عساکر دن تدارک ایده بیلدیکی درت بیسک قدر پیاده ایله بیسک قدر سواری بی رو سحج جانبنه سوق ایلمش ایسه ده دشمن کلینلو اولدیغدن اردوی هایون خلقنک اذهانی دوچار

خاجان و پریشانی ایکن مظفریت سابقه‌نك خبر مسرت اثری اردوی هایونه واصل اولیجق طوپ شنکریله اعلان مسرت اولندیغی عقینده معرکه مرقومه‌ده بولنان عساکر اسلامیه‌نك غیرتلیینه کوره مکافات و مجر و حلزینه مداوات ایچون سرداز اکرم بالنفس تبدیلا روس‌جغه واردقده اقدجه یرکوک‌کی طرفندن امرار اولنمش اولان اوچوز قدر مجر و حلری بالذات کوره‌رك یاره‌لرینی صاردیرمق و مناسب اطعمه و اشربه تدارك ایتدیرمك و هر برینه بخششله و عطیله یرمك مثللو اسباب استراحت و مسروریتلرین استحصال ایتدکدن صکره بیرام کونی یرکوک‌کی طرفنه مرور ایله عبدالله پاشایه وزرات و کندی برادری محمد افندی‌یه بیوک امیر اخورلق پایه‌سی اعطا و جنکیز کرای سلطان ایله معینده بولنان سلطان و میرزالر و سائر رؤسا و اوضابطان و نفرات عسکریه‌یه چلنکله و عطیله و خلعتله احسان و اکسا ایدوب قلعه‌نك دخی لازم کلان محالرینك تعمیر و ترمیمی امر و اراده ایتدکدن صکره روس‌جق طرفنه عبور و عودت و شوالک بشنجی کونی اوردوکاه هایون اولان شمنی صحرا سنه مواصلت ایتدکده یرکوکیده آلتان طوپ و هاو نلرك بر مقدار یله کرک معرکه مرقومه‌دن و کرک بو ائنده قله و طوترقان و سلاستره طرفلرند و واقع قره‌غول محاربه‌لرند و ائنان اسیرانی جزار پاشا قیو کتخداسی اولان قره‌قولاق صدر عالی ایله در سعادتیه ارسال ایلمشدر .

واصف تاریخنده بو وقعه‌دن صکره عارضه‌نك و عار ایله نمچه ایمراطوری دخی وفات ایتدی دیو محرر ایسه‌ده ایمراطورک وفاتی بو وقعه‌دن چند ماه مقدم واقع اولدیغی بالاده بیان اولمغله و اصف افندی ایمراطورک وفاتی کیج خبر آلمش و بو بحثی کیج اکلامش دیمک اولور .

بو وقعه‌ده جمیه عید فطر کونی عید بر بالای عید اولمق اوزره رسیدیه سمع هایون اولدقده عبدالله پاشا ایله جنکیز کرای سلطانی عطیه مخصوصه شاهانه اولمق اوزره اوچر بیک غر و شلق آلتون ایله برر قطعه چلنک احسان و ارسال بیورلمشدر .

سردار اکرمه دخی ساچدار شهر یاری عبدالله اغا سمور کورک و مرصع سیف و استقلالی حاوی خط هایون ارسال بیورلمش اولمغین باش چوقدار حسین اغا مرحوم غازی حسن پاشایه خط هایون کتوروب نقد و مالکانه ایله مرفه الحال اولدیغی کی عبدالله اغا دخی بو کره قایلرلمش اولدی خط هایون مذکورک بر صورتی زبرده (۲) رقمه قید اولنور .

* نجه‌لو ایله متارکه اولندیغی *

اردوی هایون التمش طقوز کون قدر شمنی صحرا سنده اقامت ایلدیکی ائنده روسیه و نجه‌دن قغیسنك اوزرینه حرکت مناسب اوله جغه دائر بالدفعات مجلس مشورت

عقد ایله روسیه طرفی اهمیتته منی ترجیح اولمق لازم کله رک ایساقچی جانبته کیدمک قرار کیر اولوب حتی ایساقچی بهدک مراحل و منازلده اقتضا ایدن ذخائر دخی ترتیب اولمش ایسه ده یرکوککی وقعه سنده عساکر اسلامیه نك مظفر و غنائمه مظهر اولملری هر کسک عنان شوق و خواهشنی نمچه سفرینه اماله و سردار اکرم دخی معموریت طرق و مسافات و قریت سموت و جهات حسیدله او طرفی ترجیح ایدرک قوناقچیلری روسجق جانبته اعاده ایلمشدر .

حالبوکه بویه عظام امورده (فاذا عزمت فتوکل علی الله) مدلولی اوزره عزم و نیتده ثبات لازم کلوب خصوصیه حرکات حربیه ده تلون و تردد غایت مضر اوله رق ضرورت مس ایتمدکجه تبدیل نیت موجب خطر و مضرت اولدینی ظاهر اولدقدن بشقه نمچه لورک یرکوکیده واقع اولان انهزاملری دکه حال ایله التیام قبول ایتمه رک سرعسکر نصیبه دخی بوسنه لک او طرفک عائله سی بر طرف اوله بیلور ایکن سردار اکرمک غفاتی کندوسنک پرده چشم بصیرتی اوله رق طوائف عسکریه نك هوالرینه تبعیتله رأی اولی فسخ ایتمدیکي ایچون صکره دن ندامتی چکمشدر دیو بعض مورخین بیان ایتمشدر در هاله روسیه ضابطلرینک دها مهارتلی وار دوسنک دها منتظم و قوتلو اولسنه نظراً نمچه طرفی برسر عسکر ایله محافظه اولتوبده سردار اکرم اردوسنک روسیه اوزرینه حرکتی لازمه حال و مصاحبتدن ایدی انحق سردار اکرم نمچه طرفنده قوجه یوسف پاشا کبی کسب صیت ایتمک سودا سیله طوائف عسکریه نك خواهشله تبعیتله حرکت ایلمش اولمق کرکدر .

هرنه حال ایسه اشبو (۲۰۴) سنه سی ذی القعدة سنک دردنجی و تموزک التنجی جمعه ایرتسی کونی شمعی محراسندن حرکت برله روسجغه مواصلت اولندقده طوغرامه حی زاده عبدالله افندی ناظر نصب اولته رق سپاه و سلحدار او جقلری لوای شریف ایله روسجقده براغیلوب و کرد عثمان پاشا ایساقچی محافظه سندن جلب ایله اردوی هایون چرخه جیبسی نصب اولنوب قایلقلر ایله عساکر منصوره قارشو طرفه امرار و سفر سابقده یرکوککی خارچنده حفر اولمش اولان متریس خندقلرینک تطهیرینه ابته دار اولته رق دروننده پیاده و خارچنده سواری عساکری یرلشدر یلوب ذی الحجه نك واغستوسک ایکنجی جمعه کونی عموماً احوال و ائقال روسجعه ترک ایله سردار اکرم دخی اردوی هایون رجالتی بالاستصحاب قارشو طرفه عبوز و خیمه سه نزول ایلدکن صکره حرکات حربیه دایر مشورتلره مباشرت اولمش و نمچه نك بیوک اردوسی بکرش طرفنده اولوب زشتوی و طو ترقان قارشولرنده دخی برر فرقه عسکریه لری موجود اولدیغندن سردار اکرم اردوی هایون

ایر و به حرکت اید و بده معاذ الله رجعت لازم کلدیکی تقدیر چه بو ایکی فرقه
عسکر به دخی یر کوکی به طوغری حرکت و هجوم ایله اردوی هایونک آرقه سنی
آله جق اولور لر ایسه حال مشکل اولور دیو سردار اکرم بر مقدار عسکر له یر کوکی
مترسلر نده اقامت و بر سر عسکر نصب اولنه رق سائر سواری و پیاده ایله نمچه
اوزرینه حرکت ایتمک اوزره تدارکاته مباشرت قلمشدر .

انجق یکیکچر یلر ایله ارناود سکیانلر ینک اکثری بر حیوان تدارک ایدوب سوار
اولملریله اردونک پیاده سنه ضعف کلکین یکیکچر ینک نظام قدیم لری اوزره پیاده
اولملری خصوصه تشبث اولنمشدر . حلبوکه کرک نظامت عسکر به نک استقراری
و کرک اسباب ولوازمات سفر به نک تدارک وادخاری ایام حضر و آسایش کاریدر .
بناء عایه ایام حضرک هر دقیقه سنی کرا نقدر یله رک هنکام سفرک تدارکاتی کورمک
ملوک ستوده سلوکک شعار ممدوح آتاریدر . اما بونجه سنه لر دنبرو مختل اولان
نظام عسکر ینک یر کوکی صحرا سنده هان احیاسی قابل اوله مدیغندن اردوی هایون
بر حسن صورته قونیه میوب مقابله دشمنده معاذ الله تعالی ینه بوزه بوزغونی کبی
بربادرۀ بارده وقوعندن خوف اولنوردی .

جاوید احمد بک دیرکه ایکیوزدرت سنه سی شوانک واسطده او جاقلرک اصلاح
نظاماته اراده سنیه تعلق ایدوب بوکا دائر سردار اکرم شریف حسن پاشایه بر قطعه
خط هایون اصدار وارسال بیور یلوب مضموننده یکیکچری او جاغنک اسکی قانونلری
احیا اولنق خصوصی جلوس هایون دنبرو املمدر بونلرک اکثر نظاماتی بوزلمش ازجه
یومیه لری کون بکون تزیاید بولوب مواجبلرینه اموال میریه کفایت ایتیه جک درجه به
واردی . مع هذا اکثر نفرانک اللرینه بر شی کیر میور دیو فیما بعد او جاقلرک اسکی
قانونلرینه رعایت اولنق و یومیسه آتوب صاتمماق کبی بعض تنبیهات ووصایا درج
اولنمشدر و از قدیم یکیکچر یلرک مترسلر ده ایکن فزانلری قینایوب چور بالری
ایاقلرینه واریر ایکن الیوم شیرازه نظاملری خلل پذیر اولمغه آنلره هیچ باقلمز
اولوب آج و محتاج قالدق لری جهتله پیدر پی اردودن فرار ایتمکده اولدق لری استماع
اولمغه سر یعا بر چاره بولنق ایچون ذی القعده او اخر نده سردار اکرمه خط هایون
ارسال بیور لمشدر . بعده اردوی هایونک یر کوکی صحرا سنه مرورنده یکیکچری
عسکر یله ارناود سکیانلر ینک سواری اولدق لری مسموع هایون اولوب حلبوکه یکیکچری
پیاده عسکر ی دیمک اولوب آتیه سوار اولملری قانون قدیمک خلافی اولدیغندن و سکیان
عسکر ی دخی پیاده عسکر دیمک اوله رق سواری اولملری خلاف معتاد ایدو کندن
جهه سنک آتلی بر طرفه کچور یله رک پیاده اولملری ایچون خلال ذی الحجه ده
سردار اکرمه خطابا خط هایون اصدار وارسال بیور لمش ایسه ده هنکام حر بده

عسکری طائفه سنی کو سترمک دخی جائز اولدیغندن حکیمانانه صورتله اصلاح نظاملرینه باقالمق اوزره کیفیت سردار اکر مک رأیته تفویض قانمشدر .

الحاصل یکچیرینک و سائر طوائف عسکریه نك نظامات قدیمه سنی در حال تمامیه اجرایه وقت و حال مساعد دکل ایسه ده بتون بتون بویه بر حال اختلال اوزره براغملری دخی بوجهله جائز اولیه جغندن ممکن مرتبه اصلاح حاللریه تدارکات حربیه به مباشرت اولمشیدی .

پروسیا قرالی ایسه بالاده تفصیل اولدیفی اوزره حدودلره کلینلو عسکر سوقیه نمچه و روسیه طرفی تهید ایتمکه اولدیفی حالده ایمپراطور جدید (لیوپولدو) دخی ایجاب وقت و حاله نظر مصالحه بی لازمه دن کورمسیله نمچه حدودینه قریب پروسیا مالکی مضافاتندن (ریشنباش) یعنی رایخنیاخ نام شهره طرفیندن مرخصلر ارسال اولنرق فلمنک وانکاتره مرخصلری دخی حاضر بالمجلس اولدقلمری حالده نمچه و پروسیا دولتلری بیننده اشبو (۲۰۴) سنه هجریه سی او اخرنده یعنی (۱۷۹۰) سنه عیسویه سی تموزینک یکرمی یدیسنده شروط عدیده بی محتوی برقطعه عهدنامه تنظیم اولنوب دروننده دولت علیه ایله نمچه دولتی بیننده متارکه عقد اولنرق عقینده مصالحه خصوصی دخی قبل السفر اولدیفی منوال اوزره ربط اولنرق شرطی اساس اولق اوزره ادخال اولمش اولغله بر منوال سابق اردوی هایونده تدارکات حربیه اشتغال اولتمده ایکن

* بلیت *

قاصد ناکاه درین کهنه دیر * غلغله انداخت که الصلح خیر

مفهومی اوزره اشبو (۲۰۴) سنه سی ذی الحجه سنک التبیجی کونی پروسیا ایلجیسی لوزی و دین طرفدن ظهور ایله اردوی هایونه بالورود اقدمجه دولت علیه ایله پروسیا دولتی بیننده منعقد اولان اتفاقک منتظر اولان تصدیقنامه سیله برابر پروسیا قرالی و نمچه ایمپراطوری بینلرنده عقد اولنان سالف الذکر ریشنباش معاهده سی . و جنبجه دولت علیه ایله نمچه لونک مصالحه سی مکمله سنه سفیر من قومک مرخص اولدیغنه دائر اعتماد نامه کتوروب نمچه دولتی بو حرب ائناسنده استیلا ایلدیکی ممالک دولت علیه بی رد و بمحاربه ده کاملاً بی طرف اوله رق روسیه به معاونتدن کف ید ایتک و فقط دولت علیه ایله روسیه لونک مصالحه سنه دک خوتین قلعه سی نمچه لو یدنده امانه قالمق شرطیله پروسیا قرالی قوه جبرییه ارائه سیله ایمپراطوری قبول صلحه مجبور ایتمکه ریشنباش نام محله اول منوال اوزره معاهده مر قومه امضا اولمش ایدوکنی و خوتینک اولوجهله امانت اوله رق ابقاسی دخی شایدکه تکرار مسقولو استیلا

ایدر ملاحظه سنه مبنی اولوب روسیه مصالحه سی دخی صورت پذیر اولدوقده قلعه
 مرقومه نك رد اولنه جغنه پروسیا قرانك ضامن اولدیغنی بیان ایله کدنصره هان
 متارکه به نظام ویرلمسنی تعجیل ایتمش ایسه ده دولت علیه نك نمچه متارکه و مصالحه سندن
 مقصد اصلسی وار قوتیله روسیه اوزرینه یوکنتمک ماده سی اولدیغنی حالد اردوی
 هایون یرکوککی طرفنه کچمش بولندیغندن تکرار برو طرفه مرور و عودت ایله سلاسته
 اوزرندن کیدلسه ایکی دفعه طونه نه ری عبور ایله و قتل مرور ایدرک بوسنه بونجه
 تدارکات کورلمشیکن بلا محار به عسکرک عودتی لازم کلوب بوا یسه مطلوب هایونک
 خلا فی اولسیله عسا کر اسلامیه یرکوکیدن طوغری ابرائیل جانبه کیتمک اوزره
 اول امرده نمچه لونک افلاقی و هیچ اولماز ایسه طونه سواحلی تخلیه ایتمی شرطیه
 متارکه به نظام ویرلمسیچون سردار اگر مه خطاباً متعدد خط هایونلر اصدار وار سال
 بیوریه کلدیکندن و حالبوکه خصوص مذکور پروسیا ایلچیسى مرقوم لوزی به افاده
 اولندیجه بو صورت قاعده متارکه به منافی اولوب مصالحه نظام بولمدیجه تخایه اراضی
 ماده سی نمچه لویه تکلیف اولنه مز اولنسه دخی مفید اولماز زیرا نمچه لو عسا کر
 اسلامیه به افلاق ایچندن یول ویردیکی تقدیرجه روسیه لو دخی ایستدیکی طرفدن
 سوق عسکر ایتک اوزره یول ایستر نمچه لو آنی منع ایسه اعلان حرب ایتمش اولور
 منع ایتسه افلاق ایالتی ختام امر مصالحه به دک بیکانه و بی طرف قالمق لازم ایکن معرکه کاه
 اولمق لازم کلور . الحاصل نمچه لویه بویه خام تکلیف اوله ما ز دیمکله مباحثه
 و مخابره چوغالوب خلی کونلر بوجهله بیهوده امرار ایلمش و مومی ایله لوزی
 و دین طریقله کلور ایکن ریشاباش معاهده سنک حکمنجه ترک خصومت لازم
 کاه جکی کرک و دین جانی سر عسکری صدر سابق قوجه یوسف پاشایه و کرک
 قارشو طرفده بولنان نمچه سر کرده سنه افاده ایلمش اولدیغنی حالد و دیندن
 برو طرفه حرکتدن صکره مشار ایله یوسف پاشا قافلات جانبه بر مقدار عسکر امرار
 ایله موقع طوندوقده نمچه لولر منعه قادر ایکن مجرد کندوسنک تنیه و توصیه سنه مبنی
 تمناعت صدندده اولما مشر شمدی ایسه مقدمه مصالحه اولمق اوزره متارکه اولنه جق
 متارکه نك حکمی ایسه هر طرف اولدیغنی محله قالمقدر دیو عسا کر مرقومه نك
 و دین جانبه امرار واعاده اولنسنی برمانه تکلیف واعاده اولتماز ایسه پروسیانک
 شانه طوقه جعی ایراد ایتدیجه برو طرفدن دخی یوسف پاشانک قافاته عسکر
 امراری کندوسنه اردوی هایون طرفدن متارکه خبرینک و وصولندن مقدم اولغله
 اعاده سی حوادثی موجب اولور اما بوندن صکره هر طرف عسا کری بولندقلری
 موقعلرده توقف ایتک لازم کلور دیو جواب ویر یله رک بومباحثه ایله دخی
 برمدت اوغرا شلمشدر .

و بر دفعه دخی مومی الیه لوزی ایله عقد مجلس مکمله اولوب دولت علیه‌نک دشمن قویسی اولان روسیه‌لو ایله جنکی اختیاردن مرادی قریمک استخلاصی مصاحتی اولدینی معلومدر بناءً علیه اشبو سنه مبارکه ده تدارکات قویه و ترتیبات جسمیه ایله روسیه‌لو اوزرینه هجوم ایده‌جک ایکن در سعادتده مقیم روسیا ایلیچسینک تبلیغاتنه نظراً روسیا قرالی نمچه اوزرینه حرکت ایده‌جک اولدیغندن مجرد آنک تسهیل امور یچون اردوی هایون دخی نمچه اوزرینه حرکت برله روسیا قرالنک حرکتیه انتظار اوزره ایکن محاربه دکل اعلان حرب بیله ایتیه‌رک و مجرد قوه عسکریه ارائه‌سیله نمچه‌لوی اخافه ایدرک صلحه دعوت ایله اکتفا و دولت علیه ایله عقد ایلیکی معاهده اتفاقک تصدیق‌نامه‌سنی تأخیر اتمسی حکم اتفاقک عکس و خلافه بر حرکت دیمک اولدیغندن مرأت خاطر پادشاهی‌یه ایراث غبار اشتباه ایلمش ایکن مؤخرأ متارکه و مصالحه خبریله برابر تصدیق‌نامه‌یی ارسال ایلمسی اگرچه بو اغبزارک اندفاعنه بادی اولدیه ده بوضورتله اردوی هایون روسیا قرالنک رأینه اتباع ایله حرکت ایدرک حالاً جانب مقصوده عزیمت ایده‌مدی و اگرچه نمچه متارکه‌سی رابطه بولدیگی کبی بلا تأخیر روسیه اوزرینه هجوم اولتق مصمم ایسه‌ده و قتلینک اولدیغندن بوسنه اوزی و بندرک استخلاصی و قریمک فتحی خصوصی مشکل اولغین قریم ماده‌سی بالطبع سنه آتیه‌یه قله جغه منی اول بهار ایچون دولت علیه شمیدن برأ و مجرداً تدارکات جسمیه ایله مشغولدر . انجق دولت علیه‌نک بونجه مصارفی اختیار اتمسی روسیا قرالنک اتفاقه استناد ایله اولدیغندن روسیا قرالی دخی روسیه‌یه اعلان حرب ایله شرائط اتفاقی اجرا ایده‌جکمی یوخسه نمچه‌لویه ایتدیگی کبی روسیه‌یه دخی یالکر قوه عسکریه ارائه‌سیله اکتفا ایلیه‌جکمی اول امرده بوراسی بینوبده دولت علیه دخی ایشی اکاکوره قوللانمق لازم کور دیو رئیس افندی طرفندن افاده اولندقدده سفیر مرقوم فی الواقع بوراسی اول امرده بیاتمک لازم‌کله‌جکمی اعتراف ایله برابر روسیا قرالی دولت علیه ایله اولان اتفاقی اجراده وسی مرتبه سعی ایدر دیمک کبی تعیرات مبهمه ایله جوابه ایتدیکندن ورئیس افندی ایسه روسیا قرالنک بوسنه روسیه‌یه اعلان حرب ایده‌جکمه دائر بروعد صریح آلق ایتدیکجه سفیر مومی الیه قاعده دیپلوماسی اوزره هان عبارات مبهمه ایراد ایده‌کلدیکندن شمیدلک بوباده روسیا لودن برصراحت آله‌مامشدر .

الحاصل روسیه جنکی سلطان سلیمک ماترمی اولدینی حالده افلاق ایچندن یول ایستمک کبی بعض مباحثات ایله برخیلی کونلر کچوب حلبوکه افلاق ایچندن یول وریلوبده وقتیه روسیه اوزرینه واریله‌جق اولسه بیله اردو رجالی عساکرک

نظامسز لغنه نظر آروش حالی پکده بکنه میوب نومقوله بهانه لراه ایام حربك
مرورینی المهدن آرار لر و بوآراقده روسیه مصالحه سنه دخی بریول بولنهرق بتون
بتون غائبه حربیه نك اندفاعی تمنی ایدر لر ایدی .

فقط امرار وقت ایدلمیه رك هان روسیه اوزرینه حرکت و هجوم اولنسی سلطان
سلیم خان حضر تلرینك پك آشوری ملتزمی اولدیغندن سردار اکرم بوبابده اظهار
تجد ایدرك حربك تأخیرینه مجرد پروسیا سفیرینك ورودی باعث اولدیغنی عرض
ایله برابر نمچه متارکه سنه دائر رکاب هایونه تقدیم ایتمش اولدیغنی تقریرنده عساکره
کوه نه مدیکنی دخی اشراب ایتمش ایدی بونك اوزرینه سلطان سلیمك جانی
صیقوب سردار اکرمه عتاب آدیز برقطعه خط هایون کوندرمش ایدی شویله که :
(بم وکیل مطالقم و سردار اکرم تقریر موجنبجه نمچه متارکه سنه برکون اول نظام
ویروب قطع ایده سین بوندن صکره بر ساعت تأخیر ایتدیر میه سز ایشته سکا قطعی
یازدم قالدیکه اشبو تقریرده ابتدا متارکه یه رخصت ویردیکز صکره افلاقدن یول
استدیکز دیویازمش سین بن یول خصوصنی ابتدا یازدیغ خط هایوننده تصریح
ایتمش ایدم نیچون آکلیوب دقت ایتمیوب بویله یازار سین تقریرك بر محلنده بز حاضر
ایدك پروسیا ایلیجیسی ظهور ایتدی دیویازوب آخر محلنده عسکرده جنك ایده جنك
حال یوقدر دیویازمش سین بونصل شیدر بونك کبی بر برینه او یماز شیلرک بر قاجی دخی
وار یازیلان شیئی بر کره دوشمنز مسین بو طرفده کیجه و کوندوز دیمیوب برکون
بر ساعت راحتی آرامیوب و کمنه یه راحت آرام ویر میهرک درلودر لواقدام و اهتام
ایله جلب و جمع ایتدیردیکم بو قدر منتخب عسکر نیچه اولدی بویله شی اولورمی
پروسیا توسطی ظهور ایتسه ایدی . جنك ایتمیوب کیرومی دونه جنك ایدیکز
بهی آدملر بویله دین و دولت غیرتی اولورمی المهدن خوف و بیغمبردن حیا ایتمز میسر
اجدادم وقتنده بو قدر غیرت ایدنلر بشردن دگمیدی واه واه یازق بو قدر اقدام و دقتمه
یازق دشمنلر یاز قیش دیمیوب ایشلرین کوره یورلر آنلر آدم دکلی آنلره باقوب
نفسکنزی لوم ایتمور میسر بو قدر بیک کیسه بیت المال صرف اولندی باری برایش
کوره لم بوشه کیتسون دیمز میسر یازین اللهه نه جواب ویررسز ده یازه جغم چوق
لکن غفلتکزه کوره فائده سی یوق بن آنی بیلم نمچه متارکه سنی افلاقدن یول اولمز سه
دخی برکون اول کسوب بتوروب برو طرفدن اولسون علی ای حال ابرائیل
طرفلرینه کیتلوسز بونده عذرو بهانه دکلم پروسیا لومسقولو علیه نه اولهرق اسوج ایله
مجدداً عقد اتفاق ایتمش اسوجه آچه دخی ویرمش مسقو ایله جنك ایده جنك بن دخی
قریمی عون حقله تسخیر ایدنجیه دک مسقولو جنکندن فارغ اولم اکر قریمی پروسیا

توسطیله جنکسز ویررسه پروسیا واسوچ برابر اوله رق مصالحه یه اولوقت رخصت ویریرم والا ممکن دکل همان ابرائیل طرفلرینه واروب کلی واسماعیل وسائر یرلرک محافظه لرینه بقه سز صکره بریکتر جوابه قادر اوله مز سز (دیو بیور مشدر .
 بناءً علی ذلک ارتق افلاق ایچندن یول ایستمک ماده سندن فراغت برله همان رئیس الکتاب عبدالله بری افندی مکالمه یه مأمور اولوب نجه مرخصی دخی روسجغه جلب اوله رق مواد متارکه نك مذاکره سنه شروع اولمشدر .
 لکن نظامسز عسکرک دشمن اوزرینه سوقده صعوبت اولدینی کچی بویله وقتلرده امساک واداره لری دخی مشکل اولمغین امر متارکه نك ختامنه دک جنک انتظار یه جانلری صیقیلوب بیهوده نیه بکلرز دیو بر ایکی دفعه صدر اعظم دأره سی عایینه خروج ایتمکی تصمیم ایلمش اولدقلرندن و ایچلرندن بعضیلرینک بو وسیله ایله عودت و فرار ایده چکی ملحوظ بولندیغندن ختام مصلحته دک حسن تدبیر ایله توقیقلری ضمننده اقدام و احجام صورتیله بعض حرکات حربیه اظهارینه قیام اولنق مناسب کور یه رک اولا سلا نیکی حاجی نعمان بک بر مقدار سواری ایله بکرش طرفه ارسال و برقاق کون صکره قره عثمان اوغللری مباشرتیله اردیج نهری اوزرینه انشا اوله جق جسرک محللری کشفنه استعجال اولندیغندن بشقه واسط ذی الحجه ده کاملاً اردوی هایون ایله یر کوکیدن ایکی ساعت قدر ایلر یه حرکت اولمشدر .

* وقایع سنه ۱۲۰۵ *

بو مقوله حرکات صوریه ایله امرار اوقات اولدینی ائناده برو طرفدن سردار اکرمک و اوته طرفدن اوستریا قوماندانی قوبورغک نظارتلریله ایراد اولنان ماده لر جرح و تعدیل اوله رق مکالمه ختام پذیر و طقوز آی مدتله متارکه خصوصی قرار کیر اولغله اشبو ایکیوز بش سنه سی محرم الحرامنک طقوزنجی و (۱۷۹۰) سنه عیسویه سی ایلولنک سکیزنجی بازار کونی متارکه سندلری امضا و مبادله اولمشدر .
 بو صروده روسیه ایله دخی مصالحه اولنق صورتی اردوی هایوننده تمی و تصور اولمش و روسیه لو دخی طوغریدن طوغری یه دولت علیه مصالحه سنه اظهار میل و رغبت ایده گلش ایسه ده در سعادتجه روسیه سفیرینک دوامی ملتزم اولدیغندن سلطان سلیم حضرت تلری سردار اکرمه بر قطعه خط هایون کوندروب مضموننده (منفرداً روسیه لو ایله مصالحه پروسیا اتفاقی فسخ ایده جکینی بر کره ملاحظه ایتمز میسکز بویله تدبیری اولور قالدیکه پروسیا قرالی روسیه حدودینه عسکر تعیین ایلدیکنی رسا بیان ایلدی وسکا یازدینی مکتوبنده دخی روسیه لو هر نه ایراد

ایلر ایسه معرفتم اولمدیجه قبول اولنسون دیویازمش قریم التمدیجه دولت علیه مک اصل دشمنی اولان روسیه لویایله صلح یوقدر) دیوقطعا اراده بیورلمغه هنوز نمنجه . صالحه سنک مکالمه سنه مباشرت اولنندن محرک اون طقوزنجی کونی اردوی هایون ایله سردار اکرم روسجق جانبه عبور واورادن دخی محرک یکریمی یدنجی کونی مستو سفرینه عازم اوله رق ساستره جانبه حرکت و صفرک ایکیسنده سلیستره جوارنده واقع ای دمر صحرا سنه و صفرک طقوزنجی و تشرین اولک یدنجی کونی سلیستره جوارندن حرکتیه درت ساعت ایلروده واقع باقی قیری صحرا سنه مواصلت اولنمشدر . و روسیغه عبور اولندقده سر حدانک تقویت واستحکامنه ابتدار اولنه رق قره حصار ی احمد پاشا کلی یه وارسلان پاشا ابرائیه و سکیان باشیاقندن بعد الانفصال نائل وزارت اولان یکن محمد پاشا حرصوه محافظه سنه و یکن سنه وزارت ی رفع ایله کافه اموال و اشیای مصادره اولنمش اولان مرحوم جانیکلی حاجی علی پاشا زاده مقدار پاشانک وزارت ی ابقا اولنه رق اسماعیل جانبه سوق عسا کر مصلحتیه و اردوی هایون چرخه جیبی کرد عثمان پاشا ایساجقی محافظه سنه مأمور قنوب صفرک ایکننجی کونی سلیستره جوارنده واقع ای دمر صحرا سنه مواصلت اولندقده دخی مقام صدارتیه رقیب قریب کورینان صدر اسبق یوسف پاشا و دین سرعسکر لکنندن عزل ایله عهدیه سنه کوستندیل سنجاغی و بعده بوسنه ایالتی توجیه اولنوب و دین سرعسکر لکی دخی پکمزجی محمد پاشایه احاله قلمشدر .

* سابقاً افلاق و یوه ده سی ماوریانی بک قتل و اعدامی *

سردار اکرم بروجه مشروح روسیه سفرینه عزیمت ایتمک اوزره روسیغه عبورنده قلیجینی ابتدا ماوریانی بکده دنه مش اولدیغندن اول امرده آنک تفصیل احوالی بیان ایده لم .
 ماوریانی بک فی الاصل پاروس آطه سی ساکنندن اولوب بعض ارباب و قوفندن روایت اولندیغه کوره عنفوان شبابنده در سعاده کله رک جزا ترلی غازی حسن پاشا صرافی اولان حاجی نیقولا کینک دائره سنه انتساب ایتمدیکی ائنده ایتالیا لساننک شهرت و اعتباری اولدیغه مبنی نیقولا کینک اوغلی که مؤخرأ ترجمان دیوان هایون اولان استاورا کیدر اول ائنده لسان مر قومی تحصیل ایله مشغول اولمق حسینه ماوریانی دخی لسان مزبوری تحصیل ایتمکدن صکره نیقولا کینک رجاسیله دریا ترجمانی معیته یازیحیاقلمه مأمور اولدقده جرزه لو و آچیق کوز اولمق حسینه حسن پاشانک کوزینه کیرمش اولدیغندن دریا ترجمانی منجل اولیجق حسن پاشا رأسا اراده سی استحصال ایله کندوسی دریا ترجمانی نصب ایتمشیدی . اولوقت ایسه افلاق و بغدان

و یو ده د لقلری فنارلو بکیزاده لرینه مخصوص اولوب شویله که : بونلر اکثریا مملکتین قیوکتخدالقلرندن ترسانه ده دیوانخانه ترجمانی وبعده دیوان هایون ترجمانی اولوب آدن منتهای طریقلری اولان ویوده ده لغه کسب استحقاق ایده کلدکلرندن بویله برصراف اوشاغنک آیقیریدن کلوبده دیوانخانه ترجمانی اولمسندن بتون فنارلولر سینه سوز غیرت و حسد اولمشلر ایسه ده حسن پاشانک صرصر شدت و غضبندن خوفله برشی دینیه مدیکندن بشقه ینه حسن پاشا همتیه افلاق ویوده ده سی اولوب اثنای حریده باشنه جمع ایلدیکی عساکر اسلامیه بی کوزل اداره و استخدام ایلدیکندن بوسفرده انک زیاده صیت و شهرت قزانش اولان سرعسکرلردن بریسی اولدینی مسلماتندره . نزد دولت علیه ده دخی بدایت سفرده خدمتک نه درجه لرده مقبول و مشکور اولدینی (۲۰۳) سنه سی محرمنده عبدالحمید خان حضر تلری طرفدن کنده سونه اصدار و ارسال بیورلمش اولان برقطعه خط هایون ایله مثبت و مستبان اولغله صورتی بومحله درج و ایراد اولنور . شویله که : (سنکه صداقتشعار افلاق ویوده ده سی ماوریانی بکسین صدق و استقامت ایله ایلدیکک خدمت اجداد عظام سلطان سلیمان خان زماننده کرک مجار و کرک اول طرف بکلرینک بری ایلمامشدر . مملکت بغداد دخی سنک حکمکنده کچی اولغله اسماعیل جانی سرعسکری حسن پاشا و سائر قولارم ایله بالخباره و المذاکره مملکت بغدادن دشمنک طرد و تبعیدی و خوتین قلعه سینه امداد امرنده اتفاق ایدرک منج و دافی و امداد خصوصنده سنک دخی اعانت ایلمک انحق بوخصوص سندن مطلوب هایونتمدر آچه ایچون جمع عسکرده همتکه فتور کلمسون هر نه مصرفک اولور ایسه اعانت اولنور . شمذیکک مصرفکه مدار اولمق ایچون الی بیگ غروش ارسال اولته جقدر . کوره ییم سنی دولت علیه مه اولان خدمتک نزد هایونتمده ضایع اولماز جناب حق سنی و سنکله صداقت و اسقامت ایله خدمتمده بولسانلری اکلاردن حفظ ایدوب برخوردار و امورلرنده موفق ایلسون آمین) دیو بیورلمشدر .

انوری و واصف افندیلرک خلاصه تخریرلری بووجهله درکه ماوریانی پروس سکانندن اولوب استانبوله کلدکده جزائرلی غازی حسن پاشا دآرمنه دخول و مشار الیهک عروقه حلول ایله ترسانه ده دیوانخانه ترجمانی اولمشیدی برمدت مرورنده بکلک تحصیل سوداسنه دوشهرک تحصیل خصوصنه حسن پاشا طرفندن سی اولدینی و مملکتین بکلکاری بکیزادله مخصوص ایدوکی افاده سسیله بعض طرفلردن سد چکلدیکی ائنده حسن پاشا قائممقام اولدقه افلاقی ویوده ده سی میخال طرفنه بعض محالردن کاغدلر کوندروب شویله که : سلامت نفسک لازم ایسه ویوده ده لقلدن کف

ید ایده سین دیو ایما اولمغله میخال دخی خوف جان ایله استعفا ایتدکده ماوریانی افلاق و یوه ده لغنی تحصیل ایتدکن صکره میخالک طرفدار لر نی تجسسسه قالمیشوب جمله دن بریسی ضربخانه صرافی پتر اکی که مقدما ماوریانینک بکلکی اجرا اولنه جوق ایکن مانع اولمشیدی . اعدام و ازاله سی خصوصنی بو کره ماوریانی بکلک تعاملنه الحاق ایدرک حقه سده بعض تهمت سرد ایله سرای میداننده پتر اکنک باشی قطع اولنوب ماوریانی افلاق بکی اولدینی کون خصمنک لاشه سی تماشایله اخذ انتقام ایتدکن صکره افلاقه عزیمت ایدوب چوق زمان کچمدن سفر ظهورنده افلاقک اموانی طوائف عسکریه به بذل ایتمکله هر طرفدن ایشیدن طوائف عسکریه افلاق بکی دیو آقوب کیتدکنرندن باشنده کلی جمعیت پیدا اولمغله نمچه لولر ایله وقوعبولان محاربه لرک اکثرنده غالب ومظفر اوله رق نمچه لوی تشویش وتلاشه دوشورمشیدی . بو وسیله ایله طرف دولت علیه دن دخی کندوسنه کلی آچمه کوندردلکن بشقه مصارف عسکریه بهانه ایدرک افلاق اهالیسنی دخی مصادره ایله اغنیای مملکتی فقر و فاقه به دوچار ایدوب نهایت افلاقده تقود نهایت رسیده اولمغله یاننده کی عساکر تفرقه باشلا دقلرنده جمعیتنه ضعف و خلل کیکله کچن ایکینوز درت سنه سی خلالنده مصارف عسکریه اداره سنه قدرتم قالدی فیما بعد ممالک افلاقی محافظه ایده م دیو اردوی هایبونه تحریر ایدوب بکرشی ترک ایله برمدت برکوکیده اقامت ایتدکن صکره روسجق طرفه گذار ایتدیکی ائنده منتسب اولدینی غازی حسن پاشا مقام صدارته کیکله ینه عساکر جمعنه مباشرت برله تجدید صیت وشهرت ایدوب اقتضای حاله کوره دشمن اوزرینه هجوم ایتک اوزره زشتویده براردو ترتیب ایتمشیدی مؤخرأ صدر اعظم اولان روسجقلی حسن پاشادن بعض ماجرا لردن طولانی امین اولموب کاه زشتوی وکاه رحوه طرفلرنده کشت و گذار ایتدیکی ائنده معیتده کی عساکر ایله و دین سرعسکری صدر اسبق یوسف پاشا معیتنه مأمور اولمش ایسه ده بعض اعذار واهیه سردیله او طرفه کیتمکن دخی استکفاف ایتمکله و افلاقی تخریب ایتدیکی مثللو برو طرفده زشتوی وحوالیسنی دخی معیتده کی عساکر پازده خسار ایده کیکله مجلس مشورته بالذاکره قتل و اعدامنه قرار ویرلدیکی رکاب هایبونه عرض واستیدان اولدقدن صکره قتل و اعدامنه خفياً مأمور مخصوص دخی تعیین اولنوب انجق سواری و پیاده اوله رق معیتده بش التی بیک قدر کزیده عسکر اولمغله یانه یاقلا شیلور مقوله اولدیغندن چاره سی بولنوب بشقه صورتله قیدی کورملک اوزره صورت اکرآمده اردوی هایبونه دعوت اولدقدده معیتده کی عساکر ماهیه مطالبه سیله کندوسنی رنجیده ایتدکنرینی ایراد ایله اعتذار ایتمکله بر ایکی دفعه

اردوی هایون خزینه سندن او تر بیک غروش ارسال و اولدجه عسکرسی بخشش لیرین
 و یروب اردوی هایونه وصوله استعجال ایلمسی خبر لری بالدفاعات کندویه ابلاغ
 و ایصال اولندی بونک امثالی تدایر عاقل فریب ایله اله کتورلمسی مقدماتی تمهید اولندی
 ایشلرده باشنه کله جکن استشعار برله فرار ایلمک زعمنده ایدوکی بالتحرری استخبار
 اولمغین نهر طونه نك صول طرفندن صدر اعظم تفنکچی باشیسی زشتوی محاذاتنه
 تعیین و روسجق جانبندن بیوک امیر اخور پایه سیله درگاه عالی قپوچی باشیلرندن
 سردار اکرم برادری چلبی اغا زاده سیدی محمد اغا و سلاطین جنکیزیه دن جنکیز
 محمد کرای سلطان عساگر کایه ایله اخراج و ارسال اولتوب مرقوملر دخی
 مأموریتلری اقتضاسی اوزره ماوریانی طرفنه حرکت ایتملرله ماوریانی کیفیتنی حس
 ایتمکین معیتده بولنان عساگر کثیره ایله زشتویدن حرکت و صورت فرارده روسجق
 قصبه سنه سکیز اون ساعت مسافه ده بلا نام قریه ده بیتوت اوزره ایکن اطرافنی احاطه
 برله معیتده کی عساگره کیفیت اخطار و اعلان واکر حرکت ایده جک اولور لر
 ایسه برفردک آتش غضب پادشاهیدن خلاص بوله میه جغنی بیان ایله تحویف و تحذیر
 ایتدکنصکره بغته ساکن اولدینی محله هجوم ایله قتل و اعدامنه مظفر اولمشلردر .
 انوری و واصلک خلاصه افاده لری بووجه اوزره اولوب وجوه ایله مجروحدر
 زیرا ماوریانی بک غایت مدبر و عسکر پرور اولدیغندن معیتنه تعیین اولتان میر میرانلری
 و سائر سرکرده لری ایستدیکی کبی اسوق و اعماله قادر اولوب سرعسکرلر اطاعت
 ایتمیان عساگر اسلامیه اکا رام اولمشلر ایدی بو صورتله بدایت محاربه دنبرو نتیجه
 دولتنه مقاومت ایدرک افلاق پایالتی محافظه ایدوب بو اغورده کافه ماملکنی صرف
 ایلدی و کندو کیسه سنده و داخل حکومتنده بولنان ایالتده تاب و طاقت قالینجه یه دک
 اوغرا شوب ماحصل اقتدارینی بذل و اقبای ایتدکنصکره بوزه بوزغونی اوزرینه
 یرکوکی جانبنه چکلکه مجبور اولمشیدی بو سفرده بنسکان دولت علیه دن
 بو مرتبه لرده کیم چالشدی و فرار ایده جک اولیدی قاچوب قور تلمق کندو نتیجه
 برایشمیدی بویه سفر لرده مملکتین بکلاری اعدایه دخالت ایدوبده مصالحه و قوعنده
 دشمنلرک محابیتله بکلکه ابقا اولنه کلمشکن ماوریانی اگر اغراض شخصییه سنه
 خدمت ایدر بر کیمسه اولمش اولیدی نتیجه و یا خود روسیه لورده دخالتی و قوعنده
 آنلره میل کویستره رک ینه بکلکه ابقا اولنه جغنی پک اعلی بیلوردی انجق اولوقت
 اوروپاده نوظهور اولان غصیرت وطن افکارنده بر آدم اولدیغندن یالکنز مملکته
 بر خدمت ایتک اوزره افلاق لوری آدم ایتک سوداسنه دوشوب بومراق ایله کافه
 ماملکنی صرف ایتمشدر و مراننه مظفر اولمش اولسیدی بو صورتدن حیحاً استفاده

ایده جنگ احد افلاق اهلایسی ایکن بویارلری خدمات سفریده استفاده ایلدیکندن
 آنلر دخی کندوسندن مشتکی اولدقلری مثلو منتسب اولدیغی غازی حسن پاشادن
 بشقه کمنه یه سرفرو ایتدیکندن مملکتین بکارندن تمتعه آشمش اولان برچوق
 کیمسه لر دخی علیهنده اولدقلرندن فضله غازی حسن پاشانک صدارتنده بوزه
 بوزغونی اردو ارکان وضابطاننک رخاوتلرندن نشئت ایلمش ایدوکنی یوزلرینه
 قارشو سویلهرک جمله سنی کندویه خصم ایتمشیدی و کندوسنک بوقضایه اوغرامسی
 برمنوال سابق پتراکیه ایتدیکنه برنوع مجازات الهیهدر دینله بیلور ایسهده بوقدر
 خدمتار ایش برشخصک طرف دولت علیهدن مکافات کوره جنگ یرده مجازات
 کورمسی پک یاقیشقمز برشی اولمسیله بوندن طولانی سردار اکرم دخی انظار
 ناسده غرضکارلقه متهم و مقذوح اولمشیدی و بوقعهدن سلطان سلیم خان
 حضر تلی دخی دلگیر اولوب حتی ماوریانی بکک سرمقطوعی بر معتاد باب هایونه
 موضوع اولوق اوزره درسعادته کلد کده سلطان سلیم باب هایونه وضعی جائز
 کورمیه رک بحره القاسمی ایچون قائم مقام پاشایه خط هایون اعدار بیورمشیدی .
 جاوید احمد بک دیرکه ماوریانی بدایت محاربه دنبرو افلاقده لیل ونهار بذل اقتدار
 ایدرک ظاهرده سلفلرندن ظهور ایتماش صداقت واستقامت ایله کچن سنه یه کانتجه
 دولت علیه خدمت ایدوب افندیسی غازی حسن پاشا صدارته کلد کده حضورنده
 جمله ببارک مواجهه سنده کندویه مضر کلامه جرأت ایدوب اردوی هایونی و جمله
 طوب و جبهه خانیهی نوجهله براغوب بوزلدیغکنزی بوزه صوی بکا سویلیدی
 وین افلاقی سزک امریکز ایله براغوب بری کچدم حالا اون بیک اتلو ویرک واروب
 سزک براقدیغکنز طوپلری کتورهیم دیمسی رجال اردوی هایونه کران کلش اولوب
 اول ائنده کتخدابک ایله مکتوبچی افندیکن قتلی دخی آنک دسیسه سنه حمل اولنهرق
 بوسیلله جمله ننگ منفوری اولدیغی حالده آطه ده و یاخود آستانهده اقامت ایده جنگ
 اولور ایسه تک طور میوب سر رشته ویره جکنده اشتباه اولماغله نفی و حبسیله
 اکتفا اولنمه یغندن بوقدر خدمتی فراموش اولنوب قتلله متسلی اولدیله لکن
 عسکری طائفه سنی کوروب کوزدهدوب کندوی سودیر مش اولماغله برآلای ساده دلار
 باخصوص عسکری طائفه سی دولتزه ایلدیکی خدمت مقابله سی بویله می اکرام
 اولندمی دیو کفت و کویه سبب اولدی واکرچه بعضیلری نمچهلو ایله کیزلو
 مخبره سی وار ایش دیدکاری صحیح ایسه قتله شایسته ایسهده بر محله نفی مناسب
 ایدی زیرا بوندنصکره نصب اولنهرق بکار سلفلری کچی فراری کندولرینه
 نعمت اتخاذایده جککاری خاطره کلور .

* مرخصی زشتوی به ارسال اولدقلری *

برمنوال مشروح ریشباش معاهده سی مو جینجه ایام متارکه ده مصالحه عقدی مصمم اوله رق یروسیا و متفق اولان انکلتزه و فلمنک دولتری متوسط و متکفل اولملری به آنلرک مرخصی دخی حاضر بالمجلس اولدقلری حالد هر کونه و سائل تأخیر و تراخی بر طرف قلنه رق مدت متارکه ظرفده مصالحه مصلحتک ختامی طرفیندن التزام اولمق شرطی متارکه سندرلنده مندرج اولدیغندن طرفین مرخصی برآن اقدم محل مکالمه ده اجتمع ایتملی لازم کلوب انجق تمچه لولرک استدعالری وجهه بکرشک محل مکالمه اتخاذ اولمنسی پروسیا ایلیجیسی سالف الذکر لوزی دخی تنسیب ایتمکله و حالبوکه مصلحت صالحی کندی مملکتده کورمک دول اوروپا میاننده شعار قوت و غلبه عد اولدینی بعض طرفلردن اخطار اولنغله سلطان سلیم خان حضر تلی بکرش نمچه معسکری اولدیغنه نظراً اورانک محل مکالمه اولمی تمچه لولرک ایاغنه وارمق کبی اوله رق دولتمه شاندر پروسیا قرالی ایسه بن دولت علیه به برشانلو مصالحه قزاندیردم دیورمش محل مکالمه بهر حال طونه نک برو طرفنده کی قصبه لردن بری اولمیدر دیو قطعاً اراده ایلمکله برمدت بو مناقشه ایله اوغراشیلوب طرفیندن ادله عیدیه درمیان اوله رق حتی محل مکالمه طونه نک برو طرفنده اولدینی حالد درت دولت مرخصی نک مصارفی طرف دولت علیه دن اولمق لازم کلور بز دولت علیه بی مصارفدن صاقینورز دیو لوزی رئیس افندی بی اقلعه چالشدقه رئیس افندی دولت علیه نک کرک در سعادتده و کرک خار جده بو مقوله بی نهیاه مصارفی اولوب سایه شاهانه ده بو مقوله مصارفی بز لسانه بیله آلمز قنده قالدیکه وزرا و صدور بویه ملاحظه لره تنزل ایله لر بویه مصرفی طرف هایونده کل صدر اعظم لره بیله افاده ایتمزلر دفتر دار لر معرفتیه کور یولور کیدر بز کندو حالمزه باقم بویه ملاحظه لرتجار ایشیدر بشقه جوابکز و اریسه آنی سویلیک دید کد نصرکه نهایت زشتوی و یاخود طونه نک برو طرفنده دیکر بر قصبه نک محل مکالمه اتخاذ اولمنسی مطلوب عالی ایدوکی قطعاً بیان اولنغله و قوبورغ طرفندن دخی مامشات کوسترلمکله زشتوی قصبه سی محل مکالمه تخصیص و رئیس الکتاب عبدالله بری افندی مرخص اول و مکه پایه لولردن اسماعیل رائف پاشا زاده عصمت بک افندی مرخص ثانی و صدر عالی مکتوبیحیسی و پیاده مقابله جیسی محمد دری افندی مرخص ثالث و دیوان قلمی کیسه داری محمد عونی افندی مکالمه کاتبی و بکلکچی کیسه داری عبدالرحیم محب افندی مکالمه کاتبی رفیق و مکتوبی صدر عالی خلفا سندن خلیفه زاده محمد سعید غالب افندی وقایع کاتبی واردوی هایونده نزل امینی اولان جبه جیلر کاتبی حسن افندی مکالمه دفتر داری

و اسبق بغداد و یووده می قسطنطین بك زاده علكساندرى بك مكلمه ترجمانى تعیین اولنش و بوخلالده عصمت بك ایله برابر مومى ایله علكساندرى دخى در سعادت دن حرکت ایلمش اولغین اردوی هایون سلسره جاننده ایکن خلال صفرده مأمورین مومى الیهم زشتوی یه ارسال اولنش اولدق لرندن ریاست وکالتی دفتر امینی حقى بك افندی یه و مکتوبی وکالتی تذکره ثانیه فر دوسی افندی یه احاله اولمشدر .

بومقوله مکلمات وقوعنده نمچه مرخصی اراضی عثمانیه یه واصل اولدقده جانب دولت علیه دن دخى رهن اوله رق کندویه معادل برینک نمچه لویه ارسالی عادت قدیمه ایکن حین فسخ مصالحه ده در سعادتده نمچه سفیری بولتان هربرت بوکره زشتوی مکلمه سنه دولتی طرفندن مرخص ایلچی تعیین اولنش اولمسيله بوکره لوزی یه ارسال ایتمش اولدیغی تحریر اتنده فسخ مصالحه دن اقدم در علیه ده نیجه زمان ایلچیلک ایتمش و جانب دولت علیه دن وجوهله مکرم و ماتفت اولدیغندن ماعدا در علیه دن ولایتی طرفه مکرماً عودت ایتمیش و حتی در علیه ده امانه وضع ایلدیکی اموال و اشیاسی سایه دولت علیه ده امین و محفوظ ایتمش . بناء علیه ایضای تشکرندن عاجز اولدیغی و بر معتاد کندویه مقابل برینک رهن اوله رق ارسالی خصوصندن فراغت اولدیغی درج و تسطیر ایلمشدر .

پروسیا دولتی طرفندن دخى بومکلمه یه لوکز نام سفیر تعیین و ارسال اولغله متارکه ضمنده گلش اولان سالف الذکر لوزی دخى سردار اکرم معیتده بولمق اوزره دولتی طرفندن مأمور اولمشدر . بوندن بشقه کوچ نام قولونل دخى امور حربیه ده مستخدم اولمق اوزره پروسیا قرالی طرفندن مأموراً اردوی هایونه گلشدر . بو ائنده بعض انکلیز او فچیللری دخى اردوی هایونده استخدام بیورلمق استدعاسيله گلشدر ایدی .

برمنوال مشروح محل مکلمه طونه نك برو طرفنده اولمق خصوصی سلطان سلیمك قطعاً مطلوبی اولمقندن ناشی رئیس افندی دخى مصرف خصوصنده بك بوجه طوغرامش وزشتوینك محل مکلمه تخصیص اولمشندن سلطان سلیم ممنون اولمش ایسه ده اولوقتک عادتق اوزره بالجمله سفیر لرك مصارفی طرف دولت علیه دن ویرلک لازم کلدیکی حالده زشتوی مکلمه سی بروجه آتی مدت میدده قرار بولیوب سورینه رك بیهوده برچوق مصارفی موجب اولدیغندن بشقه بر طرفندن دخى برمنوال سابق برطاقم اجنبی ضابطلرك ورودی حسیله معتاددن فضله مصرفلر آچیلوب اول وقت ایسه ایام حربده اکثریا میری خزینه سننده موجود آچه بولمق دیندن لدی الاقضا تعویضاً ضربخانه دن اخذ اولنه گلشيله مرخصلر طرفندن آچه ایستلدکجه سلطان

سایم دلتک و غضبناک اولوردی . حتی بردفعه مرخصلر حقنده عتاب آمیز تعییرات ایله اولمیه جق بهانه لری سرد ایدرک درسعادتن آچه ایستما لری ضمنده سردار اکر مه خطاباً خط هایون اصدار وارسال ایتدکن صکره مکمله دفتر داری یدنده آچه قالمدیغدن ناچار ایلیجیلره ویرلمسی لازم کلان قرق بیگ بوقدر غرو شک ارسال بیورلمسی لازم کلدیکنی رئیس افندی انها ایتکله کیفیت قائم مقام پاشا طرفندن سلطان سلیمه باتقریر عرض اولندقدنه پک زیاده جانی صیقیلوب انجق آچه نک ارسالندن بشقه چاره دخی اولمدیغدن تقریر مذکورک بالاسنه (مرخصلرینه آچه ایسته مشلر اموره متعلق برایشلری یوق همان آچه ایسترلر ایش و طیفه لری دکل کبی کورینور غالباً رئیس افندی دفتر دار ایله اورتاق اولمش زیرا پک التزام ایدیور یوز کیسه آچه دخی ضربخانه دن آلوب کوندره سین لکن دفتر داری نهایت قتل ایده جکمی دخی یازمه سین) دیو خط هایون کشیده ایلمشیدی .

قالدیکه سلطان سلیم خان حضرتلری خزینه دولتک پک زیاده مضایقه حالده و آچه به انک زیاده احتیاج کوریلان ایام حرب خلانده تحته جلوس ایلمش اولدیغدن آچه نک قدرینی بیلوب بیت المالك تلف و سرفدن وقایه سنی آشوری درجه ده التزام ایتمشیدی حتی بوخلانده حلب قاضینک برقطعه اعلامیه حلب محصلنک برقطعه عرضی کلوب مضمونلری خارج حلبده واقع هندولر تکیه سنک شیخی طریق قادریه دن عبدالکریم دده ایل ونهار بش اون فقراسیله تکیه مرقومه ده ذکر وتوحید ایله اوقاکنذار وصالح و متورع برذات اولدیغی حالده بریردن مدار معاشی اولماغله کندویه حلب محصلنی مانندن قدر کفایه وظیفه عنایت بیورلمسی استعاسندن عبارت اولغین ذکر اولسان اعلام و عرض برقطعه تقریر مافوفا قائم مقام پاشا طرفندن سلطان سلیمه تقدیم اولندقدنه تقریرک بالاسنه (نک طورر ایکن بیت المال مسامینی نیچون ویره لم بومثللو شیلره سز جواب ویرمیوب نکا یازمق نه اولسون رکاب عرضحالی دکلکه جوایی یازملق اقتضا ایتسون) دیو خط هایون کشیده بیورمشدر .

* وقایع شتی *

اردوی هایون قاضیسی محمد صدقی افندی سنی طقسانه قریب بریر فانی اولدیغی حالده کچن ایکیوز درت سنه سی او اخرنده منزولاً وفات ایدوب بو اوانده درسعادته حبوبات ناظری بولسان مکه پایهلورندن کچه جی زاده صالح افندی دخی مقتضای ماموریتی اوزره اطراف واکناف ایله کشاکشه دوچار اوله رق ذوات متشخصه دن قازانمش اولدیغی خصاصی طرفندن برفالق ایرات اولنه جغنی حس ایتکله مصائب

ملحوظه دن تخلیص کریبان فکرینه دوشوب سردار اکره مناسبی دخی اولدیغندن اردوی هایون قاضیلغنه طالب اولمغین اشبو ایکییوز بش سنه سی محر می اوائلنده عهده سنه اردوی هایون قاضیلغی توجیه اوله رق اردوی هایونه عزیمت ایله درسعادته ملحوظ اولان مخاطره دن خلاص بولمش ایسه ده اردوی هایونده دخی هرایشه قاریشوب سربستجه لسان قوللاندیغندن پک چوق لسانه کله رک وخامتی چکدیکی زیرده بیان اولنه جقدر .

والده کتخداسی بولان محمود بک بروقتنبرو اقبالندن سقوطه یوز طوتمشیدی . واصف افندی دیرکه محمود بک بابای عالم ورویتی مسلم خیراته ساعی وحقوقه راعی جوانمرد برپیر ارجمند اولدیغی حالدله سلطان سلیم خان حضرت تلیزینه سابقه خدمتی اولمقدن ناشی جلوس هایونلرنده آنی والده کتخداسی نصب ایتمشیدی . انجق حقوق سابقه ادعاسیله مترصد فرصت اولان ابنای زمانه میر مشار الیهک درت طرفنی احاطه ایدوب اودخی ایفای لازمه مروته قیام وهر طالبک حصول مطلبنی التزام ایتمکله کیدرک غائله نی چوغالدوب بوصورته پیدا اولان معارض و مزاحله کندوسنک معایب ومثالبنی تذکاره مداومت ایلملریله بالتدریج نظر التفات شاهانه دن ساقط اولوب بواضطراب وحیرت ایله اسیر بستر اوله رق نهایت عقابیه سفر ایتمکله اشبو ایکییوز بش سنه سی صفرینک اون سکنزنجی کونی والده کتخدانی ضربخانه امینی یوسف آغایه توجیه بیورلدی .

سنه سابقه وقایعده بیان اولندیغی اوزره عربستانک احوالی کسب نزاکت واهمیت ایلیوب شام والیسی ابراهیم پاشانک اطوار لوندانه سی ایسه رضای هایونه منافی وحرکاتی شرع وقانونک خلافی اولمغله تسویه امور حجاج ایچون قوی الاقصدار ومدبر وکارکنار بروزیره احتیاج درکار اولوب بونک ایچون عقد اولنان مجالس مشورته تذکر اولنان وزرادن بریسیده عکه محافظی جزار احمد پاشا ایدی . اول ائناده جزار پاشا دخی جبل لبنان محاربه لریله مشغول بولندیغی حالدله دارالسعاده اغاسیله سلحدار آغایه کوندردیکی شقه ده شام حوالیسنک وحجاج مسلمینک احوالی دولت علیه نک معلومی اولوبده امارت حاجک تبدیلی لازم کلورسه جیب هایونه درتیوز کیسه وسائر لازم کلنلره ایکییوز کیسه آچه ویرمک شرطیله صیدایه الحاقاً شام شریف ایالتیله امارت حاجی قبول ایده جکنی اشعار و بووجهله آغای مشار الیهمایه شقه کوندردیکنی قائممقام پاشایه یازمش اولدیغی قائمه سنه دخی درکنار ایتمشیدی . بناء علیه اشبو بیک ایکییوز بش سنه سی خلاننده امارت حاج ایله شام ایالتی جزار پاشا عهده سنه بالتوجیه ابراهیم پاشایه رقه ایالتی احاله اولندیغی صره ده

سیواس مباحه جیسی ایکن اعانه ارباب مکتت ایله نائل وزارت اولان ترنج زاده سلیمان پاشایه دخی حلب ایالتی احسان بیورلمشدر .

مذکور شقه زیرده (۳) رقیله قید اولتور . مطالعه سندن مستفاد اوله جنی اوزره جزار پاشا بوندن مرامی منصب اولمیوب مجرد ذات شاهانه بی انکسار قلوب فقرادن صیانت ایدوکنی یمین ایله تأمین ایتمشدر . حالبوکه بو استدعا دن غرضی انجق اقطار شامیه ده نفوذینی توسیع و تزییددن عبارت ایدوکی اشاعیده ایراد اولنه جنق تفصیلاتدن معلوم اولور . حکمران ممالک فاس اولان مولی محمد بن المولی اسماعیل مقدهما ماطه لو بدینه کر قنار اولان ترسانه لو احمد قبودان ایله بشیوز اوتوز التی نفر اسرای اسلامیه بی آنچه ایله اسارتدن تحایص برله جمله سنی درت قطعه فرقتین هدیه لرلیله برابر کچن ایکییوز درت سنه سی خالانده عتبه علیه سلطنت سنییه ارسال ایتمش اولمسيله محمد مکی نام سفیری در سعاده کتوروب تقدیم ایتدکده رجال دولت طرفدن ضافتر اولنه رق و بعضاً هدیه لر و یریه رک سفیر مومی ایله حقنده اصول احترامیه ایفا اولمشیدی مؤخرأ حاکم مشار ایله وفات ایتمکله یرینه اوغلی مولی بایزید حاکم فاس اوله رق ارسال ایلدیکی محمد قائد نام سفیری در سعاده وصولنده ربیع الاولک یکرمی اوچنجی صالی کونی ترتیب اولتان دیوان عالیده نامه سنی حضور ملوکانه عیرض و تقدیم ایتدکده کندوسنه کورک و رفقاسنه خلعتلر الباس اولمشدر حاکم مشار ایله نامه سنده جلوس هایونی تبریک و اسعاد ایله کندوسنک سریر حکومت غرب اقصایه جالس اولدیغنی ایراد و جهت وحدت اسلامیه حسینیه دولت علیه اولان اخلاصندن و اسپانیلو ایله سفر آچمش اولمسندن بجه توجیه درون استدعا بوندن اقدام بدری طرفندن فقرای حرمینه توزیع اولتمق اوزره کوندرلمش اولوب ایوم خزینه عامر ده بوجه امانت محفوظ اولان معلوم المقدار التون سیکه لرینک استجالیله طرفندن حرمین اهالیسنه ارسال اولتمسنی التماس ایتمش ایسه ده سبائک مذکور ه نک هیئت مخصوصه سیله ارسال و تقسیم ایوه میوب بهر حال مسکوکا^۱ ارسالی لازم کله جکی مرحوم پدر لرینه تحریر و استمزاج اولتمشیدی انجق خبر واروب کنجه به قدر وفات ایلدیکندن و بو کره وارث و جانشینی طلب ایتمش بولدیغندن سفیرینه تسلیم اولتمسنی ایچون ازاده سنیه صادر اولمغه مذکور آلتونلر سفیر مرقومه تسلیم و بومضمونده نامه سنک جوانی دخی ترقیم ایله مطیبا مملکتته اعاده اولمشدر .

* اسوچلو ایله روسیه لونک مصالحه سی و عزمی افندیکنک سفارتله *

* برلینه عزیمتی *

دولت علیه نمچه لو ایله متارکه ایدوب ایام متارکه ده مصالحه به صورت و یرملک دخی

برمنوال سابق مشروط اولديغندن بوصولته تخفيف غائله سفریه ايلمش اولديغنه مبنی بوندن صکره وار قوتی روسیه اوزرینه اعمال ایله اخذ ناز سودا سنده بولنش ایسه ده روسیه ایمپراطور یچه سی قترینه دخی اسوج قرالی ایله عقد مصالحه ایدرک بو بوزدن تخفيف غائله سفریه ايلمش ایدی چونکه روسیه لو ایله اسوجلو بیننده وقوعه کلان محاربات عیدیه ده ظفر وغالیت بر طرفه منحصر ومستقر اولمیوب (الحرب سجال) قاعده سنجه بالمناوبه کاه اسوجلویه وکاه روسیه لویه رونما اوله کدیکی واسوج دونمائی دوچار اولدینی تهلکه عظیمه دن رهیاب سلامت اولدقندن صکره اسوج ایجه دونمائی غلبه کامله یه مظهر اولدینی بالاده بیان اولنش ایدی . انجق اسوج قرالی فیما بعد سفره دوامدن ثمره حاصل اولیه جغنی و بر طرفدن دونما و خزینه سنه عارض اولان پریشانی وزیان اوزرینه ماتی بیننده مستعد ظهور اولان فتنه وعصیان روسیه لویه بادی فرصت اولمق احتمالی فکر دوراندیش ایله در پدش ایدرک مصالحیه عرض خواهش ایلدیکی صره ده اسپانیا دولتک پترسپورغده مقیم ایلجیسی دولتی طرفندن مأموراً اصلاح ذات البنیه سی وکوشش ایدوب حتی اول کونلر فرانسه ده علو کبر اشتعال اولان آتش فتنه واختلال سببیه جمیع دول اوروپانک دوچار تلاش واضطراب اولدقاری و قتلر اولغله اسوج دولتی دخی فرانسه اوزرینه تسلیمت واعمال اولته بیلور دیو ایلچی مومی ایله قترینه یه بسط مقال ایدرک ترویج مصلحت مصالحه ایتدیکنه و ایمپراطور یچه دخی اسوج غائله سنک دفعنی عین نعمت عد ایلدیکنه مبنی حدود طرفین قبل السفر اولدینی منوال اوزره ترک وابقا اولنمق شرطیه کچن ایکی یوز درت سنه سی او اخرنده وارن نام شهرده امضای سند مصالحه اولنش ایدی .

حالبوکه شمعی یه دک روسیه نک بحر بالطقده کی دونماسنک آق دکره چیقوب کلامی اسوج سفریه مشغول بولنمندن ناشی اولوب بوندن صکره ورودی محتمل اولدیغنه مبنی مصالحه مرقومه حوادثی سلطان سلیم خان حضر تتری لدی الاستماع مغبر ومنفعل اوله رق اسوجلویه بوقدر آچه ویرلدی بویه بی و فالح اولورمی بو کیفیتی تحقیق ایدک اصلی وار میدر دیو قائم مقام پاشایه امر و فرمان ایتسیله پشای مشار ایله در حل اسوج ترجمانی باب عالی یه احضار ایله مصالحه ماده سنی استفسار ایتدکده مصالحه نک اصلی اولوب انجق اسوج قرالی دولت علیه بی آچقده بر اقیوب قریم جزیره سی سربست اولمق ومسقولو طرفندن آنان ممالک دولت علیه ره رد اولنمق شرطاری درج اولنه رق روسیه لونک دولت علیه ایله دخی مصالحه سنی شرط ايلمش دیو جواب ویرمش ایسه ده اسوج قرالنک بویه بغته مصالحه سی اقدجه دولت علیه

ایله عقد ایلمش اولدینی عهد نامه اتفاقه مخالف اولدیغندن هر کس اسوجلویه طعن و تعریض ایتمکده بولنش و بوباده در سعادتده مقیم اسوج ایاجیسی مؤاخذه اولنش اولوب ایاجی مرقوم ایسه یاوز خرسین اوصاحبنی صوچلی کوسترر خواسنجه قصوری بتون بتون برو طرفه تحمیل و دولت علیه نی دخی صاحبه تشویق ایله برابر طرف دولت علیه دن ویرلمسی مشروط اولان اعانه سفریه آچه سنک باقی تقیطرینی ایستمدکن اصلاحجاب ایتمه رنک (۲۰۵) سنه سی اوائلنده غایت مغاطه لو برقطعه تقریر قامه آلوب مابین هایونه عرض و تقدیم ایلمشدر . شویله که : اسوج قرالی دولت علیه لرینه خبر ویرمکمزین مسقولو ایله مصالحه مذاکره سنه مباشرت ایلدیکی و منفرداً صالح اولدینی و مصالحه عقدینه متارکینی ترجیح ایتمدیکی ایچون بو قوللری مؤاخذه اولندیغ جهته بو اوچ ماده یه دخی بروجه آتی جواب ویریلور اسوج قرالی مسقولو ایله مصالحه ایی مذاکره ایدر ایتمش دیو تقیح اولنان اولکی ماده دور و دراز مباحثه یه محتاج دکدر زیرا دولت علیه لری اون سکر آیدنبرو مسقولو ایله خفیه مصالحه مذاکره سندن خالی دکل ایدی . مسقولو مصالحه ماده سنی ابتدا پترسبورغ شهرنده مقیم اسپانیا ایلیجیسی معرفتیه کچن ماه نیسانده عرض ایلدکده اسوج قرالی دولت علیه نک مصالحتی برابرجه مذاکره اولمنسی اساس اوله رق ایراد ایتمکله روسیه لو طرفندن بوکار دایله جواب ویرلدیکندن اودخی ماده مصالحه نی رد ایلدی مسقولو کرک استوقولم شهرنده و کرک اردوی هایونده صالحی عرض ایتمکن خالی اولدینی تموزک اوائلنده تقدیم اولنان تقریر داعیانه مزله عرض و تصدیق اولمش ایدی . بعده مسقولو طرفندن تکراراً اسوج قرالنه بردفعه دخی ایراد صالح اولمشکن اسوج قرالی ینه رد ایلدی بعدهذا اسوج قرالی پترسبورغ شهری پیشکاهنده کندی طویلرینک صداسنی مسقوچاریچه سنه اسماع ایلدیکی ائنده تکرار اسپانیا ایلیجیسی ورود ایلدکده فلاندا ایالتی مجدداً توسیع و دولت علیه نک مقتضای مصالحتی دخی برابرجه مذاکره اولنق شرطیه اسوج قرالی ایراد صالحی قبول ایدوب بوتقدیرجه اساس اوله رق اشبوایکی شرطک مضمی سندی اسوج قرالنه ارسال اولنق ازر دایکن تموزک اوچنده وقوع بولان مصائب مسقوچاریچه سنه قوت قلب ویرمک جهتیه محاربه منقطع اولدی بعده شهر تموزک طقوزنجی کونی اسوج قرالک غالیبتندن سکرده مسقوچاریچه سی اسوج قرالیله مصالحه مذاکره سنه رغبت ایدوب دولت علیه ایله مابینی تصفیه یه مستعد اولدیغنه و ایراد اوله جق مواد حق و انصافه مقرون بولندیغنه مبنی دولت علیه طرفندن دخی قبول اوله جنی مأمولدر دیو مسقورجالی اسوج قرالنه تخریر ایلدکارندن ناشی اغستوسک ابتداسنده

مذاکره به مباشرت اولنوب اون دردنجی کونی مصاحبت مصالحه ختام بولدی بو تقدیرجه اشبوتلریخندن اقدم مذاکره صاح واقع اولدیغی اشبوت تفصیلاتدن عیاندر اسوج قرالی دولت علیه لریله متفقاً یوم واحده مصالحه سندینه وضع امضا ایامک کندی شانی ومملکتک مصاحبتی مقتضاسندن اولوب انجق دشمنلرک باجمله قوتی مجتمعا کندی علیه اعمال اولغله بارکران محاربه سلطنت سنیه لریله اسوج دولته مساوات اوزره تقسیم اولنوب یالکز کیندو اوزرینه تحمیل اولغق جهتیله بلا تاخیر عقد صاح ایتماش اولیدی مضمحل اولغق لازم کلورایدی اسوج اولر برأ و بجر آفداکارانه حرکت ایدوب انجق مضایقه مالیه به دوچار اولدیغی حالده پروسیا قرالی اسوج قرالنه مال وعسکرله وعد ایتمش اولدیغی اعانه دن ابا ایستدکن بشقه دولت علیه دخی بردرلو حرکت ایتمدیکندن ناشی اسوج قرالی بویه عاجز ومملکتی ضبط اولغق درجه سنه رسیده اولمشیدی ۱۸۷۹ تموزینک اون برنده سلطنت سنیه لریله اسوج دولتی بیننده عقد اولنان شروطی اسوج دولتی ایفا ایتماش دیومنقول اولوب انجق تجاویزی هر براتفاق مشترک اولان دشمن اوزرینه متفقلرک عسکری مقدار متجاوز اوزره اعمال اولغق قاعده سنه مبنی واشبو قاعده او مقوله اتفقلرک اساس شروطندن اولدیغی دولت علیه لرینه وسفره مأمور اوللره دخی کرات ایله افاده اولمشیدی انجق دولت علیه لری اسوج دولتیله عقد ایلدیکی اتفقلک اشبواساس شروطنی ایفا ایتمدی وسفره مأمور اولنلر دخی دوات علیه نیک نیت خیری صائبه سی اوزره حرکت ایلدیمی اسوج قرالی محاربه نی یالکز ایدوب عم امجدلری مرحوم ومغفور سلطان عبد الحمید خان حضر ترینک یالکز مطالبه سیله سلطنت سنیه لری ایچون کندی کرانقیمت وجود مبارکئی وتاج مملکتئی تهلکه به القا ایتمشدره اسوج قرالی مسقولو ایله صلح اولدیغی ایچون بو قوللری تعییبه جسارت ایدن کیمسه لر اعانت مالیه نی محتوی عقد اولنان سندک تاریخنه بودفعه نظر ایدرلرایسه سند مذکور اسوج طرفنه کیمتزدن اول اسوج قرالی سلطنت سنیه لری ایچون ایکی دفعه وجه قطعی اوزره عظیم محاربه ایلدیکی ظاهره اخراج اولنور بو آرالقده جنود اسلامیه مسقولو اوزرنده برایش کورمیوب بندر وآفکرمان مسقولویه ترک اولندیغی وبوقوللری طرفندن عرض اولنان ترتیبات حربیه اجرا اولندیغی بو ترتیباتی بو قوللری ایله مذاکره ایتمک اوزره طرف واضح الشرف ملوکانه لرندن مأمور اولان نعمان بک افندینک تدابیر صائبه وغیرت وکریمت مستحسنه سی بر درلو فائده نی منتج اولدیغی ورئیس الکتاب افندینک بو قوللریله قرار ویردیکی ترتیباتی اجرا ایستیره مدیکی آشکار اولوب بو تقدیرجه اسوج قرالینک یالکز محاربه به مداومت برله قاچ غروشه مالک ایسه آنلری دخی

صرف ایلمسی و بالجهه اسوجونک قانی سنک ایتدی رومی مناسب اولدیغندن بشقه
 (۱۷۷۲) سنه سنده عقد اولنان معاهدات لازمه سنجه اسوج مملکتک اساس نظامی
 تغییر اولنوب قرال مومی ایسه مسقولو توابعندن واسوج مملکتی دخی مضافات
 ممالک مسقودن اولمش اولیدی سلطنت سنیه لرینه بر درلو فائده حاصل اولیه جنی
 کذلک بدیدار دره اسوج قرالی مصالحه رینه متارکه ایتمک اقتضا ایدر دیو بو قوللرینه
 سویلنوب انجق ایام متارکه ده اسوج قرالی امنیت داخله سنی اعاده ایتمک مأمولی اولمق
 حسینیه متارکه خصوصی روسیه یه مضر اولمقدن ناشی روسیه چاریجه سی مصالحه ده
 اصرار ایدر ایدی قالدیکه متارکه خصوصی سلطنت سنیه لرینه بر درلو فائده نی منتج
 اولدیغندن بشقه مصلحت مصالحه سببیه روسیه چاریجه سی دولت علیه مصالحه سنه
 میل ورغبت ایلدی و الا اسوج مصالحه سندن صکره وار قوتیه ممالک بحر وسه یه یوکنمک
 لازم کلور ایدی واسوج قرالی مصالحه نی قبول ایتماش اولیدی اون ایکی قطعه مسقو
 سفینه سی آق دکزه کلک اوزره مهیا اولوب بونلرک منع و توقیفی متارکه صورتده
 ممکن دکل ایدی انجق مسقو چاریجه سی مصالحه نی تسهیل ایچون سلطنت سنیه لری
 اوزره حرکتدن فراغت ایلمک ملاسه سببیه سفینه لرینک آق دکزه ورود ایتماسی
 مصالحه سببیه حصول پذیر اولدی امامتارکه صورتده مسقو سفینه لرینک بحر
 بالطقندن خروج ایتماسنی شروط متارکه یه ادخال ایتمک اسوج قرالنک وسعندن
 خارج ایدی اسوج قرالی کندو مملکتی ایچون امید وار اولدیغی اراضینک ادعاسندن
 کف ید ایدوب یالکز سلطنت سنیه لرینه اولان ارتباطی لوازمه رعایت و طرف
 واضح الشرف هایونلری ایچون بغایت فائده لو بر صورتیه اهتمام واشتغال و دولت
 علیه لریه مسقولینک صالحی مذاکره اولمق خصوصیه تمشیت برله شمیدی یه قدر ایراد
 اولتماش منفعتلو شرائط تحصیل ایدرک دولت علیه لری ایچون کندو مصالحه سندن
 شانلو و منفعتلو بر مصالحه صورتی تنظیم ایلدی اسوج غسا کرینک اظهار ایلدیکی
 غیرتی جنود اسلامیه دخی ابراز ایتمش اولیدی مصالحه صورتی احسن بر قابله افراغ
 اولمق ممکن ایدی . قالدیکه سفره مأمور اولنلرک بطائت حرکتی اسوج لوره دخی
 عاڈ اولمق جهتیه اشبو محاربه خالانده بومقوله مأمورلرک او یغونمز حرکتلری
 و دشمنلرک محو و ازاله سنه صالح اولان فرصتلی اغتنام ایتملری بو قوللری طرفندن
 کرات ایله عرض و شکایت اولمشیکن بر فائده نی منتج اولدیغنه اسوج قرالی دائماً
 تأسف اوزره ایدی بوسنه مبارکه ده جنود اسلامیه یالکزالتی بیک دشمن عسکری
 و جزئی دونما ایله محافظه اولنان قریم جزیره سنی تسخیر ایده جکلرینی دولت علیه
 تصدیق ایلدیکنه بناء بو قوللری صحیح اولمق اوزره قرالمزه تحریر ایلدم و قبودان

باشانك غيرت وشجاعتنه نظرأ بوسنه قریمك ضبطی میسر اولماق کال تأسفمز مباعث اولوب قالدیکه اوقدر اهما تمز قریمك استردادینی منتج اولمديسه باری جزیره مذکور هك سر بستینه دائر روسیه لو دن تعهد آلمدجه اسوج قرالتك مصالحه سندینی امضا ایتدیکی خصوصنك اخباری بوقولارینه سرمایه افتخار بیشارد. اسوج قرالی اوائل محاربه ده وعدایتدیکی اوزره قریمی آلیویرمك مقصدینه نائل اوله مدیغندن کال تأسف اوزره اولدیغنی قولارینه تحریردن خلی دکدر . اسوج دولتی دولت علیهك الك زیاده دوستی اولوب بوکا قنور ویرمك ایچون اعدا طرفدن سعی وعمل اولدینی اسوج قرالتك بودفعه دولت علیهلرینه تدارك ایلدیکی خیرلو مصالحینی تقییح ضمننده اعمال ایده جکری اقاویل بیماسندن استدلال اولنق امر سهلد بوقولاری مصلحت مصالحهك معرفتمز ایله رؤیت اولنسی استدعا سنده اولیوب انجق خصوص مرقومه دائر قرالمر طرفدن تقدیم اولنان ایرادانك افاده سی وظیفه ذمتمز اولدینی آشکار وجناب ملوکانه لری طرفدن دخی اشبو ایرادات میزان درایت ایله وزن وطرف آخردن تقدیمی ملحوظ اولان ایرادات ایله مقابله اولنق عقل سدید اقتضاسندن ایدیکی بدیدارد . سلطنت سانیه لرینه اولان خلوصمز حسیلله طرف آخردن تقدیم اولنه جق مصالحه مسقو چاریچه سنك اسوج قرالنه رسماً ویردیکی سندات متعدده ایله وباحصوص اغستوسك اون اوچنجی کونی ایراد ایلدیکی مصالحه شرائطندن فائده لو ایسه اومقوله مصالحینی استحسان ایده جکمز بی اشتباه اولوب بنا برین اوزرینه هجوم اولنق ایچون امر اولنسون دیو کرات ایله الحاح و ابرام ایلدیکمز قریم جزیره سنی کلیاً استرداد ایدر لر ایسه خلوص اوزره تبریکنه مسارعت اولنور . زیرا بودفعه عرض اولنان لوازم مصافتمز کارکر اولیسوب بویله بر خیرلو مصالحهك قبول اولنمدینی ایچون سکوت ایله تأسف اولنور بر آیدنبرو ارکان دولت علیهلرینه اسوج حقنه نقل ایتك اوزره اولدق لری افك واقترالره بودفعه جواب ویرمك تکلفی دخی ارتکاب اولنمیوب زیرا بد زبانلرک مرام ومقصد لری نه ایدوکی براق آی ظرفنده خارجه چیقار بومقوله موادك کرکی کبی ظاهره چیقارلمسی ایچون مراسم مرعیه دولت علیهك الك ایجاب ایلدیکی مرتبه جمعیتلو برمکله مجلسی عقد اولنق خصوصه مساعدت هاپونلری ارزان بیورلمق استدعا ودولت علیهلری باقی قلان تقسیط لرینی اداسی خصوصنی دخی بوقولار یله مذاکره وتنظیم ایلمك ضمننده امر هاپونلری استرجا اولنور دیو بسط مقال ایلمشدر .

مقدما اسوج قرالی دولت علیهك الك برسوزیله اعلان حرب ایتدی دیو اسوج ایلچیمی اعانه نقدیه مطالبه سیله وکلای دولت علیهه ایتدک تقاضا لر قویامشیدی

حاله که اسوجلویه آنچه اعطاسی ایچون دولت علیه بر کونه عهد و شرط ایله مربوط
 دکل ایکن مجرد مروءت و قوتندن ناشی اسوجلویه آنچه ویریه مدی دیو اسوج
 قرانندن زیاده متأسف اولوردی نهایت بین الدولتین عهدنامه اتفاق امضا اولنوب
 سلطان سلیم خان حضرتلری طرفندن مقسطاً اعطاسی مشروط اولان یکریمی
 بیک کیسه آنچهک ایکی بیک کیسه می درت تقسیط ایله ادا اولنمشیکن اسوجلونک
 بو کره بغته روسیه لو ایله مصالحه سی متفق دولترک قوتلری شویله اجرا
 اولنمیدی دینلمک کبی مغالطه لر تاویل قبول ایدر مواددن اولمدیغنه مبنی تقریر مذکور
 ایله اسوج قرالی نظر دولت علیه ده عهدشکنک لیکه سندن تطهیر دامن قوت
 ایدم امش ایدی . قالدیکه اسوج ایلیجیسی بو تقریرنده کویاکه اسوج قرالی قریمک
 سربستی ایچون روسیه لودن تعهد آلمدقنه سند مصالحه یی امضا ایتدی دیو مباحات
 و افتخار و اسنادخی شوراده بوراده بوضورتی تکرار ایدردی بونک ایسه اصلی اولیوب
 اولوقتک حکمنجه قترینه نک قریم سربستیتنه موافقتی قابل دکل ایدی . واسوج قرالنه
 موقع مکالمه ده روسیه لو طرفندن بوسفرده دولت علیه نک استیلا اولنان ممالکی
 رد ایله مصالحه اولنق صورتک شفاهاً وعد اولندیغی مروی ایسه ده بو کره قترینه
 ایله عقد ایلمش اولدیغی عهدنامه ده دولت علیه نک نامی بیله مذکور دکلدر . فقط دولت
 علیه پروسیا اتفاقیه مربوط اوله رق منفرداً مصالحه ایدمه جکنی اسوج ایلیجیسی رعنا
 بیلدیکندن بویه اعلیٰ فصلی یوق شرط ایله مصالحه یه توسط عرض ایدردی حتی بوندن
 چندماه مرورنده ایلیجی مرقوم عزل ایله دولتی طرفندن یرینه بشقه سی نصب اولنغله
 بو عزل و نصبک سببی طرف دولت علیه دن تحری اولندقده اسوج بکرزاده لرندن
 در سعادتده بولنان (بارون برانتانو) نام ضابطک اسوج ایلیجیسی اولمق سوداسیه
 سفیر مرقوم علیه نده واقع اولان غمز و سعایتندن و اکثر روایاته کوره سفیر
 مرقومک بویه اصلمز بر ماده یی صورت رسمیه ده دولت علیه یه ایراد ایلدیکی
 زشتویده مرخص افدیلر طرفلرندن پروسیا ایلیجیسه تقریر و پروسیالو طرفندن
 دخی پترسبورغه تحریر اولندقده قترینه نک اسوجلویه بن سزه قریم سربستیتی
 ایچون سوز و یردمی که استانبولده کی ایلیچکنز اوله تقریر و یرمش دیو واقع اولان
 شکایتندن نشئت ایلدیکی و یاخود سفیر مرقومک نظر دولت علیه ده محجوبیتی
 ملاحظه ایله دولتی عزل ایتش ایدوکی خلاصه تحقیقات اولمق اوزره اولوقتده
 یازلمش اولان بعض اوراق رسمیه ده کورلمشدر .

و چونکه لهولر دخی روسیه و نمچه دولترینک اتفاقندن وهم و خشیت اوزره
 اولمیریه کندو حقلرنده ملحوظ اولان سوء نیتلرندن تخلص کریمان ایچون

اسوجلو کبی دولت علیه ایه عقد اتفاق آرزو سنده بولنه رق در سعادتده مقیم له ایلچیسی مواد معاهده مذاکره سیاه مشغول اولوب انجق اسوجلو کبی همان جنکه مباشرت برله آنلر دخی بر طرفدن دشمنلری اشغال ایده جنکلرینه عواقب اموره انتظار ایه تراخی و بطائت صورتن اختیار ایلدکلرندن بشقه زمام مصالحترین بتون بتون پروسیا قرالنک دست دسیسه کارینه تسلیم ایتمش بولندقلری جهتله هر مادهده پروسیالویه مراجعته محتاج اولدقلرندن و قتلری مذاکرات و مخابرات ایه کچوب بوکره بر منوال مشروح اسوجلونک خلاف مأمول اوله رق دفعه روسیه لو ایه مصالحه سندن وکلای دولت علیه منفعل و متأثر اولدیغی کبی مرقوم له ایلچیسی دخی بو واقعه غیر مترقبه دن مضطرب و متحیر اوله رق سریعاً پروسیا سفارتنه واروب استکنانه احوال ایتدکده پروسیا قرالی چند روز مقدم مالاً اعانه و امداد ایتمش اولدیغی اسوج قرالنک بو حرکت سندن منفعل اوله رق همان اهلولر ایه متحداً کمال شدت ایه روسیه اوزرینه حرکت نیتنده اولدیغنه دائر برلیندن تحریرات کش اولدیغی پروسیا ایلچیسی افاده ایتمکله له ایلچیسی متسلی اوله رق دولت علیه یه دخی تسلیمت و یرمک سیاقده باب عالی یه تقدیم ایتمش اولدیغی تقریرنده جنکه مباشرت ایچون پروسیالونک حرکت منتظر اولدیغی اعلان ایدن له جمهوری ایه متحداً پروسیا قرالنک جنکه مسارعت ایده جنکی جهتله دولت علیه ضایع ایتدیکی اسوج عسکرینه بدل پروسیا وله عساکرینی قزائمش اولدیغنه نظراً تأسف ایتیه جنکی وله جمهوریله دردست اولان اتفاقک تمشسته اگرچه موانع ظهور ایتدی ایسه ده دولت علیه نک مصالحتی ترویج ایچون لازم کلان اسباب و مقدماتی وقتیه له جمهوریله بالاخطار ترتیب و تنظیم ایده بیله جنکی عرض و بیان ایتمکله سلطان سلیم خان حضرتلری همان پروسیا قرالی جنکه باشلامق سوداسنه دوشوب تشویقات لازمه نی ایفا ایچون مرحوم رسمی احمد افندینک قانی اولوب مقدمه آنکله برابر پروسیایه کیتمش اولان رکاب هایون مکتوب بچیسی احمد عزمی افندی عهده سنه موقتاً حرمن محاسبه جیلکی بالتوجیه قدری ترفیع و تنویه اوله رق برلین ایلچیسی تعیین اولنوب اشبو (۲۰۵) سنه می ربیع الآخری اوائلنده یوله چیقارلمش و افندی مومی ایه پروسیا ایلچیسنه هدیه ملوکانه اوله رق بوجه تخمین تمش بیک غروشاق اولوق اوزره اون طقوز یچق قیراطاق بر ختم و یوز بیک غروشاق حکمدارلره مخصوص جیغلی سرغوج بچوهر کوندرلمشدر .

وشایدکه عزمی افندی یوللرده تأخر ایدر ملاحظه سنه مبنی وراسندن پروسیا قرالنه

بر قطعه مکتوب سامی تحریر و چفته تاتار ایله تسییر اولنوب مضموننده دولت علیه نك سزكله اتفای تجاوزی اولدیغی حالده اعلان حرب ایتمدیككزدن روسیه لو اولطرفدن امین اوله رق وار قوتیه برو طرفله هجوم ایله طونه سواحلنه تعرض و تجاوز ایتمکین موسم شتاده مدافعه و مقابله دولت علیه محتاج اولدی . حالبوکه متفق اولان له جمهوری مسکو محاربه سیچون نهر طورله ساحلنده یکر می بش بیک عسکر تهیه سیله جنابکزه مترقب اولوب سز اعلان حرب ایتمدیككزدن آنلر دخی تأخر ایتمیلر و اگر شمدی به دك جنکه قیام ایتمش اوله ایدیككز اوچ طرفدن مسقولو اورته به آلهرق اخذ انتقام قابل ایدی دیو افاته وقت فرصت اولندیغی اخطار و بر مقتضای اتفاق همان بوکونلرده جنکه قیام ایدیجکی و شمدی به دك تأخیره سبب ندر دیو قرال مشارالیه دن استفسار اولنمشدر .

انحی دول سائر دن بعضیاری دخی دولت علیه نی صلحه تشویق ایده کلدکلرندن وکلای دولت یسه تردد و تحیردن خالی دکلر ایدی . از جمله درسعادته مقیم اسپانیا ایلیچیسنك صلحه تشویق ضمننده باب عالی به تقدیم ایتمش اولدیغی تقریرنده امتداد حربله روسیه به ضعف و قوتور عارض ونهر طورله نك برو طرفنده اولان عسکری اقل قیل اولوب مجدداً ورود ایده بیله جك عسکر لرینه دخی لهولر مانعه به مستعد بولنش و پروسیالو دخی دشمنی کرکی کبی اشغال ایچون حرکت حاضرقوی براردو ترتیب ایلمش اولسیله بونك اوزرینه عساکر اسلامیه دخی بر طرفدن حرکت و هجوم ایدیجك آچه و اسباب سائر سفریه دن محروم اولان روسیه لو مغلوباً مصالحه به راغب اوله جفی مطالعاتی عرض و افاده ایله کندو اغراض مخصوصه لرینی ترویج ایچون دولت علیه نی دوام سفره تشویق ایدنلرک بومقوله ایراداتی کرچه عساکر اسلامیه نك تراید غیرت و شجاعت لرینه بادی اولور و روسیه لونك ایکی دولتله علی التوالی بوقدر مدت محاربه سی فی الواقع ضعفه باعث اولغله میل و خواهشی صحیحدر . انحی روسیه لونك اولوجهله اسباب حربیه سی نقصان بولدی ایسه بر مدت ایچنده ایکی دولته مقابله به مجبور اولان دولت علیه نك حالی دخی اول نوال اوزره اولمق لازم کلور . قالدیکه روسیه لو دخی اسوج مصالحه سیله تخفیف بار سفر ایلدی و دولت علیه حدودینه تعیین اولنش اولان روسیه عساکری رعایای دولت علیه صرتندن کچنککاری جهته امر اداره لری روسیه لوجه کلی مصارفه محتاج دکلدر . وله جمهوری کندی امورینی کرکی کبی تنظیم ایتمکجه محاربه نی اختیار ایله کندویی تهلیکه به القا اتمز و روسیا قرالی اگر مسقولوی فیخ صالح ایله تحویف ایدرایسه کندوسنك اجرای مقاصدینه قترینه نك درکار

اولان ترتیباً تنیدن بشقه دول سائرہ دخی قرال مومی الیہک خلا فکیری اولمق
 ما حوظ اولدیغندن دوات علیہنک یالکز مسقولو ایله دکل بلکه نمچه لو ایله
 بیله منفرداً مقابله یه مجبور اولمسی صورتی امور محتمله دندر . بناءً علی ذلک
 دوات علیہ بو محاربہ دن اول بولدیغی منوال ویا خود بوکا مشابہ بر حال اوزره قالمق
 شرطیله مسقو مصالحه سنه ثلثات ایدر ایسه انسب واولی کورینور دیو تحریر
 ایلمشدر . بزینہ اردوی هایونک احوالنه کله لم .

* کلی قلعه سنک و طونه بوغازلرینک استیلاسی واسماعیلک شدت *

* محصوریتی واردوی هایونک مشتایه عودتی *

روسیه باش قوماندانی پوتیمکین خیلی وقتدنبرو کلی واسماعیل قلعه لرینک ضبط
 واستیلاسی اسبابی جستجو ایتمکده اولمسیله اشبو (۲۰۵) سنه سی صفرینک
 سکننجی کیجه سی روسیه لولر کلی قلعه سی اوزرینه کلوب قلعه نک متانتنه و خلیجنده
 بولنان شالوپه لردن کندولرینه ضرر ایریشه بیله چکنه نظراً لیللاً هجومه قرار
 ویرمکله کلی پیشکاهنده حفر اولنمش اولان متریس لر اوزرینه جوف لیلده ایکی
 فرقه روسیه عسکری هجوم ایتمک نده عساکر اسلامیه قلیل اولدیغندن قلعه یه طوغری
 چکلمکله مجبور اولوب متریس لردن تباعد ایلمک لری ائشاده روسیه لولرک سالف الذکر
 ایکی فرقه عسکریه لری بربرینه چاتوب کیجه لین یکدیگری فرق ایده میه رک بربریه
 چکنه تصدی ایلمک لری اهل اسلام کوروب قلعه دن وشالوپه لردن طوبلره آتش
 ویرملریله صباح اولوبده کوز کوزی کوره چک وقته کلنجه یه دک روسیه لولرک
 بر خیلی عسکر لری وبر معتبر جنرال لری تلف اولدیغندن علی الصباح اورادن
 چکله رک برایکی ساعت ایلموده متریس آلوب قرار ایلمک لری اسماعیل سر عسکری
 طرفندن تحریر اولنمغله و روسیه لولرک کلی یه تعرض و برو طرفلره تحطی یه
 مبادرت لری اوردی هایون اول حوالی یه تقرب ومشتا عسکری تجمع ایتمزدن مقدم
 حدود اسلامیه یه هجوم ایله برایش کورمک مقصدینه مبنی ایدوکنه دائر اطرافدن
 خبرلر آلمغله همان کلی واسماعیل طرفلرینه اعانه ضمننده بر منوال سابق سلستره دن
 ایلمویه حرکت اولنهرق باقی قیری سحر اسنه مواصلت اولنمش ایسه ده سردار اکرمک
 فی الاصل مرامی بعض وسائل ایله امرار اوقات اولنهرق نمچه ایله اولدیغی کبی
 روسیه ایله دخی بر متارکه عقیده سفر غائله سی بر طرف اولمق صورتی اولدیغی
 مثللو روسیه لولر دخی پروسیا وانکلتره دولترینک اطوار خصمانه لرینه نظراً
 بو محاربته قزاندقلری وقزانه بیله چک لری غلباتک نتیجه ماموله سنه دسترس

اوله میه جقلرینی جزم ایله کندو حقلرینده دخی صلحک خیرلو اولدیغنی کوروب حتی پوتمکین طرفدن دولتین بینتی تالیف ضمننده اقدیجه اردوی هایونه کلش اولان (سرچو) نام روسیه سفیری اردوی هایون روسجقده ایکن بعض مواد جسمیهی دولته قبول ایتدیرمک تعهدیله بش اون کون ظرفنده عودت ایتک اوزره روسیه اردوسی طرفه کیتمشیدی . حالبوکه سلطان سلیم خان حضر تلی روسیه سفیرینک دوامنی التزام ایلدیکی مثللو قترینه دخی هر نقدر کندی حقدنه مصالحه صورتی وقت و حال اقتضاسنجه خیرلو اولدیغنی تیقن ایلمش ایسه ده مفظوره اولدیغنی کبر ونخوتی اقتضاسنجه مصالحه دن استغنا صورتی اظهار ایله وار قوتی بازویه کتوره رک ممالک دولت عاییه هجومه قرار ویرمش اولدیغنه بناء جزائرلی حسن پاشا وقتنده بعض مواد صالحیه مذاکره سی ضمننده روسیه اردوسنه کوندرلمش اولان بکر اغایی دخی پوتمکین اعاده ایلمشدر بو جهته مرقوم سرچونک ایام موعوده معدوده سی بوخلالده منقضی اوله رق عودتدن بتون بتون یاس کلکله مصالحه امیدلری منقطع اولدیغنی کبی یازین کلوب قیشین کیتمه آلمش وخیلی وقت یرکوککی صحرا سنده انتظار ایله جانلری صیقلمش اولان عسا کر اسلامیه نک ضبط وربطی قابل اولدیغندن پیاده طاقی همان روسجغه امرار اولدیغنی کبی مملکتلرینه عودت وسواریلری دخی اگرچه قیشین اردو بکلر عسا کر دکلر ایسه ده بللو باشلی آدملر اولدقلرندن خودبخود کیده میوب انجق اردی هایون ایله سلستریه قدر کلکلرینده سنه آتیه ده ینه کلک اوزره اذن ایستمکه مبادرت ایلمش اولدقلرندن اردوی هایوننده ایشه یارار عسکر قالدیغنی کورلیجک سردار اگر مک جان باشه سچرایوب همان (الفرصة تمر مرالسحاب) مضمونتی تذکر وکمال تلاش وتخیر ایله مجلس مشورت عقد ایتدیروب بالجمله حضاره توجیه خطاب ایدرک مسقولو ایله بالنفس محاربه مطلوب پادشاهی اولدقدن بشقه اسماعیل جانبنده بولنان امت محمده امداد واعانه جمله مزه فریضه ذمت اولمغله بوندن صکره نوجهله حرکت اولنق لازم کلور بو بایده هرکس خاطرینه کلانی سویلسون بو امر دیندر بونده کیمسک سوزینه موم یایشدیرلر ومعاذالله نیچون سویلندی دیو مؤاخذه اولنر دیو حضار مجلسدن سؤال ایتدکده حضارک جمله سی سر بزمن افکار اوله رق کسنده مجال گفتار قالمیوب بالآخره اردوی هایون قاضیسی اولان کیچه جی زاده صالح افندی فتح کلام ایدرک بووجهله بسط قالیچه مرام ایلمشدرکه تشرین اول دخول ایله اوائل شتا حلول ایلدی ارتق بوندن ایلرونه انسان کیده بیلور ونه حیوان حرکته مقتدر اولور یرکوکیدن بورایه کنجیه دک کل یوم سواری و پیاده نک

جمله سی آرزوی وطن ایله آزر آزر عودت اوزره اولدقلرندن الحاله هذه اردوی
 هایونک موجودی رجال دولت ایله اوجاق اغالرندن عبارتدر بوصورتده ایلرویه
 حرکتک نه فائده سی اولور دیو سرد ایلدیکی مقدمه سی طرف طرف تصدیق
 اولتوب کیفیت اوجاق اغالرندن لدی الاستکنانه دشمنه مقابله اولنه جق قدر نفرات
 اولیوب ایلرویه حرکتده خوف وخطر واردر دیدکارنده سردار اکرم ینه
 ایلرویه حرکت ایتمکی تکرار درمیان ایلدی ایسه ده کرب آچه وکرب ذخیره
 وعسکرجه اسباب حرکتک نقصانی اثبات وایضاح اولنه رق حرکت اولنه میه جفی
 تقرر ایدوب سردار اکرم ایسه اسماعیل طرفندن شبهه واندیشه ده اولغله عسکرک
 فقداتی وهمت وغیرتک فتور ونقصاتی موازنه وانجام کاری ملاحظه ایدرک
 اردوی هایونی بولندینی محله ترک ایله اسماعیله اعانه ایچون برقاچ بیک سواری
 ایله بالنفس ایلرویه حرکت ایتمک ایستیوب کتخدای صدر عالیلی فیض الله افندی
 دخی کندوسنی بورای اوزره سوق وترغیب ایتمش ایسه ده بعضیلر بوصورتی
 تقبیح وکیدلدیکی صورتده قوه کلیه ایله کیدلیدرکه برشیئ مفید اولسون یوخسه
 بویله فئه قلیله ایله کیدلدیکی صورتده بر فائده نی منتج اولیه جغندن بشقه دو بریجه
 اهالیسی غیرتسز وامور دینه لرنده قیدسز بر طائفه اولدقلرندن معاذ الله صورت
 اخری ایله عودت اولنه جق اولور ایسه سزی یغما وبلکه افنا ایده جکلرنده
 شبهه یوقدر دیو تصریح ایله سردار اکرمی توحیش وواصفک تحریرینه نظراً
 بو حالده صدر اعظمده اولان جبن طبیعی داعیه شوقنی برهمزده تشویش ایدوب
 فسخ عزیزمته عنان بیانی بشقه تدبیره تحویل ایلدی . شویله که : منفرداً عزیمتمز
 مناسب اولدینی حالده یا اردوی هایون ایله برلکده کیده لم یاخود بر محضر
 تحریر وجملة تمهیر اولسونده در سعادتیه تقدیم ایده لم دیدکده حضارک اکثری اول
 امرده محضر خصوصنه جسارت ایده مامشدر ایسه ده اردوی هایون قاضیسی
 کیچه جی زاده افندی حقیقت حالمزی اولدینی کیچه پادشاهمزه عرض و بیان ایتمکده
 نه باس وار محضری ابتدا بسمله ایله کندم مهر لرم دیمکله جمله سی محضری تمهیر
 اوزره اتفاق ایدرک اسباب حرکتک تمامجه مفقود اولدیفنه دائر بر قطعه محضر تحریر
 وتمهیر ایله در سعادتیه تسیر اولندقدنصکره کلی واسماعیل طرفلرینه تقویت واستحکام
 ویرمکه قیام اولنمشیدی .

حالبوکه روسجقندن باقی قیری یوردینه کلنجه بر منوال سابق عساکر اسلامیه نیک
 اکثری عودت ایتمش اولدیفندن اردوی هایونده عسکرجه بر طرفک مضرتی
 دفع ایده بیله جک درجه ده قدرت اولیوب بقیه قالا نلرینک سرحدلره ارسالی

دخی بویله قیش آغزنده مطلقاً اطماع ایله اوله بیاه جکندن تقدماً اون بشر غروش
بخشش ویر ملک وسنه سی ختامنده مواجبه مستحق اولق و دیلیدی اوجاقدن
یازلق شرطیله اردوی هایونده و سلسلته دروننده منادیلر ندا ایتدیر یله رک ایکی
اوج کون ظرفده یکچیری اوجاغندن بش التی یوزوجه جی و طویجی و عربه جی
اوجاقلرندن یوزر و یوز الیشر نفر دالقیج تحریر ایله کلی یه تسیر اولندقلرندن بشقه
اردوی هایون رجالی و سواری اوجاقلری اغالری حاللرنجه سواری عسکر تجهیز
ایلملری تدیر اولتوب هرکس قدرتی اولدینی مرتبه لرده برر مقدار عسکرک
بخشش لرنی ادا ایله بر ایکی کون ظرفده بشیوز قدر سواری عسکر تدارک اولنه رق
بودغه عهده سنه میر میرانلق احسان بیورلمش اولان محمود پاشا معیتله محاله کلی
امدادینه بالارسال ایکی کونده بر اردوی هایون اها لیسنک تعیناتی قطع اولنه رق
بویله سرحدلرده بولنان عساکره تسیر و وقتک تحملی نه ایسه اجر اسنه ابتدار ایله
ورای پرده غییدن نه کونه صور غریبه رونما اوله جغه انتظار اولنور ایکن عساکر
مرقومه نک برازی طولچیده و برازی اسماعیلده قالب کلی یه واره مدقلرندن کلی
اهالیسی امداد و اعانه دن محروم و مایوس اولیجق اشبو (۲۰۵) سنه سی صفرینک
یکرمی برنجی کونی ویره ایله قلعه نی ید دشمنه تسلیم ایدوب وقوع حالی بیان ضمننده
رکاب هایونه بر قطعه عرضحال کوندر مشلر ایدی .

بوصورتله روسیه لو کلی قلعه سنی اله کچیروب ایکی کون صکره دخی کلید نهر طونه
اولان سنه بوغازینی و متعاقباً یعنی سنه مرقومه ربیع الاولنک طقوزنده طولچی پی
واون سکزنده ایساقچی پی استیلا و احراق و اسماعیل ایله طولچی میاننده واقع آطیه
عسکر ادخال ایدرک بر مدتدنبورو روسیه باش قوماندانی پوتیمکینک بالذات تعرض و تضییق
ایتمکده اولدینی اسماعیل قلعه سنی برأ و نهر آحاطه و جهله محاصره یه ابتدار ایلمشدر .
حالبوکه مقدا اکر کلی و ایساقچی و طولچی و اسماعیل حوالیسنه برأ و نهر آ بر ضرر
ایریشور ایسه نقطه وجودک صحیفه عالمدن حک اولنور و بوموققلردن بریسی دشمن
یدینه گرفتار اولور ایسه المدن خلاص اوله میه جغنی اذعان ایدوب تضییع اوقات ایتمه
دیو سردار اکر مه خطاباً اکید و شدید خط هایونلر اصدار و ارسال بیورلمش
ایدو کندن بر منوال سابق کلینک دشمن اینه کچدیکی خبر وحشت اثری باقی قیری
یوردنده سردار اکر مه واصل اولیجق تهدیدات سالفه نی یاد ایله سلطان سایمه
نه جواب ویره جکم دیو عقلی باشندن کیدوب نه پیا جغنی شاشرمش اولدیغندن هان
ارباب مشورتی جمع ایله عقد مجلس ایتدیروب جمله خطاباً کلی اها لیسنی محافظ
و ضابطان اوزرینه هجوم ایله قلعه نی دشمنه تسلیم ایتشلر و زه امداد و اعانه اولندیغندن

ضروری قلعه‌ی دشمنه و یردك دیو ركاب هایونه عر ضحال کوندر مشلر دیدکده حضارک جمله سی وقت و حاله نظراً اول طرفه وسع و امکانك مساعد اولدینی مرتبه اعانه و امداد اولنوب بوندن زیاده سی خارج از وسع و قدر تدر لکن اسماعیل سر عسکرینك حالی معلوم عسکر ی بیننه اختلال و یره رك کلی قلعه سنی بو حاله قویه جنی مقدم دخی امر مجزوم ایدی بونك بر چاره سنه باقلمز ایسه اسماعیل قلعه سنك دخی اندیشه سی چکیله جکی بی اشتباهدر دیدکدرنده سردار اکرم ایکی آیدر اول محله بر سر عسکر آرادیم و بو بایده نقدر کفتگو ایلدیکم جمله کزك معلومیدر اما وقت و حاله نظراً تبدیلی ارتق واجب اولدی دیوب بونك او زینه بر خیلی مذاکره لر اولندقدنصکره نهایت عبدی پاشا کتخداسی اولوب اسماعیل محافظی بولنان میر میراندن محمد پاشا لدی الاقتضا سر عسکر لکده استخدام اولنق اوزره عهده سنه رتبه وزارت احسان و صدر اعظمك و دین طرفنده ایکن کتخداسی اولوب محاربه لرك برنده اسیر اولمش و بو کره متارکه و قوعیله خلاص بولمش اولان محمد امین افندی که اسکدارده زعیم اوغلی دیمکله معروف ایدی اکادخی رتبه وزارت و یره رك اسماعیل طرفنده بولنان رؤسا و ضابطان ایله بالمخاره وقت و حالك ایجابنه کوره حرکت ایتمك اوزره طولجی به تعیین و ارسال اولنمشدر .

انجق مقدمات احمد پاشانك چکن سنه وزارتی رفعله کافه اموالی مصادره اولنمش اولمسیله اقدمجه بویله بی وایه اولدینی حالده بر منوال سابق سوریحیلک امر اعمنه مأمور بیورلمش اولوب مشار ایله ایسه یکیدن وزارت دبدبه سنی دوزمک سوداسیله بولندینی محللرده اهالی به ظلم و تعدی ایده کلدیکندن و کدا جورده زاده احمد پاشانك ظلم و تعدیدن بشقه نندن برایش کلدیکنندن و قره حصار ی احمد پاشا دخی اقدمجه کلی محافظه سنه مأمور قلمش ایکن طولجیده مدت مدیده مکث و اقامتله طونه بی عبورده تقصیر و رخاوت ایتدیکنندن اشبو اوچ احمد پاشا لرك او چنك بردن وزارت لری رفع اولنه رق برر محله نفی اولنمشدر .

ایساقی و طولجی حوالینك امر محافظه سی بختکرای خانه مفوض اولدیغندن اول حوالینك حفظ و حراستی و روسیه دونماسنك دفع شر و مضرتی قطعاً کندوسندن مطلوب ایدوکنه دائر کندویه امر عالی یازلدینی کبی معیتنه مأمور اولان وزرا و میر میرانره دخی بالاتحاد امر محافظه به اعتنا ایلملری امر و اشعار قلمشیدی بختکرای خان ایسه یا آمده بولنان بر ایکی بیك تاتار پریشان اطوار ایله بوکار جسمیه نصل مقتدر اولورم دیو عسا کر و مهمات ارسال بیورلمسیچون اردوی هایونه فریاد نامه لر ارسالندن خالی اولماز ایدی .

قالبه و قتیله بر محله بروزیر کوندرمک براردو سوق ایتمک مثابه سنده ایکن بو کره شورایه بورایه کوندر دکبری وزرا ایکشر اوچر آیلق نوظهور وزیر لر اولمغه مدت مدیده نمالو منصب لر ضبط ایدوبده موقع و اعتبار و یسار و اقتدار کسب ایدمه میوب یالکتر بر نام وزارت له دخی ایش کورلمدیکندن دائرہ سی خلقی مکمل و اسباب وزارتی مستکمل اولان اسلاف وزرا مثللو اجرای نفوذ ایدمه مدکبری حسیله ترتیب ایتدکبری عساکرک اکثری یانلرینه وارمیوب اقل قلیل تجمع ایدن عساکری دخی آنلر اداره ایدمه مزلر ایدی .

بو جهته طولی و ایساجی محافظه لرنده بولنان وزیر کرد عثمان پاشا و وزیر امین پاشا یانلرنده اعدا یه مدافعه ایدمه بیله جک قوت اولدیغندن روسیه لور کلی بی آلدقدن صکره اسماعیل قارشو سنده کی آطیه کذار و بر طرف دن دخی ایجه دونمائی سنه دن ادخال ایدرک طولی و ایساجی طرف لرینه عسکر امرار ایدیجک کرک قوبان خانی و کرک سالف الذکر عثمان و امین پاشا لر بلا محاربه اول سواحلی ترک و فرار ایه بابا طاغنده استقرار ایدوب انجق جزئی دشمن کور ونسه اورادن دخی فرار و تفرقه مستعد ایدلر ایساجی و ماچین و طولی خلقنک تفرقی ایسه برو طرفک اهالیسنی توحیش ایدرک آنلر دخی ترک دیار ایتمک افکار و اندیشه لرینه دوشمشلر ایدی بو صورتده اگر بابا طاغنده کی جمعیت عسکر یه دخی متفرق اوله جق اولور ایسه تابلقانه قدر اولحوالی اهالیسنک کافه ترک وطن ایدمه جکبری ملاحظه سی ذهنلری تحذیش و برمنوال سابق روسیه لور کلی بی آلدقده اوراده مأمور محافظه بولنان التمش بو قدر شالو په لر دخی اسماعیل جانبه عودت ایه اسماعیل آطه سنک محافظه سنده قالمشلر ایکن ایچلرنده عساکرک قلاتی و ضابطان و رؤسانک رخاوتی حسیله اول حوالی بی محافظه قیدندن فارغ اوله رق عساکری طایغلوب شالو په لرک برازی اسماعیل و طولی ساحل لرنده ترک و برازی دخی دشمنه قالمسون دیو احراق اولمش ایدو کندن روسیه لونک ایجه دونمائی بلا مانع و مزاحم طونه ده کشت و کذاره فرصتیاب اولمغه اسماعیل قاعه سنک هر طرف دن محصوریتی خصوصی سردار اکرمی دلریش ایلمشیدی .

ابرائیل قلعه سی نمچه متار که سی شر و طنجه بی طرف قالان افلاق طو پر اغنده اولسیله قلعه مرقومه یه بر آ روسیه تعرضندن دولت علیه نک تأمین اولنسی نمچه لویه ایراد اولنوب و بو کادائر زشتویده مرخصلر بیننده بعض مذاکرات وقوع بولوب امانه ر آ تعرض وقوع بولمجه اولور ایسه بوکا صحیح بر دیه جک اولدیغندن بو کره برمنوال مشروح طونه نهرنده مستقلاً روسیه دونمائی نفوذی جاری اولمغه باشلا ییجق

ابرائیل قلعه سندن دخی اندیشه اولنق لازم گلکین اولطرفك تقویت واستحکامی
دخی برغائله مستقله اولمشیدی .

بو ائنده ایسه مقدمات شتا بلوردیکندن برحکک مشتاتخاذ اولنسی لازم کلوب
خالبوکه شمنی ویاخود روسجق مشتاتخاذ اولنسه اردوی هایون راحت و واردی
دیو سرحدلرده بولنانلرک همت وغیرتلیرنه فتورکک احتمالی درکار اولغله
سردار اکرم یرکوکلی وروسجق صحرازلرنده بیهوده افاتنه اوقت ایلدیکنه نادم
و پشیمان وانجام کار مخوف اولدیغندن متالم و حیران اولدیغی حالده واصف اقدینک
تحریری اوزه وقت وسعتده یار قفادار وزمان شدتده حصم طرار اولان یادکارلرکه
عقل فراطونی تزییف و ابن سینایی حق و بلادت ایله تعریف ایدرلرایدی شمدی
تباعد صورتی اختیار ایله سردار اکرم طرفنه احياناً کلهرک اوزاقدن مرحبا
ایتمکه ونه سؤال ایدر ایسه انت اعلم منادیمکه باشلادیلر .

* شعر *

ولم ار کالایام للمرء واعظا * ولا کصروف الدهر للخلق هادیا

اذا ساعد الاقبال فالناس خالص * وان دار صار الخلق اسداضواریا

نه حال ایسه سردار اکرم تکرار ار باب مشورتی جمع ایله مقدما اسماعیل طرفنه
کیتمکلکمه رخصت ویرمدیکنز اگر کیده ایدم شمدی یه دک سوق عساگر ایدرک
اولطرفك استحکامی ویرر ایدم ایشته کلی کیتدی واسماعیل و ابرائیلک حالی معلوم
موسم شتادخی کلدی بوندنصکره نوجهله حرکت اولنق لازم کلور دیو جمله دن
سؤال ایتدکده افکار غائله شتا جمله نک قریحه سنی طوکدیروب کمنه ده مجال اداره
افکار و گفتار اولدیغندن وافرجه سکوت اولندقدن صکره اردوی هایون قاضیمی
کچه جی زاده اقدی زمین جسارت اوزره بو وجهله بسط قالیچه مرامه مبادرت
ایلمشدرکه : الیوم روز قاسمه بر ایچی کون قالدی برقرار یاغه جق اولور ایسه حیوانات
تلف اولوب احوال و ائقال یرده قالور وهرکسه پریشانلق عارض اوله رق هر خصوصه
مامورلر آمرلره معارض اولور مناسب اولان مشتایه رجوع ایله اورادن سرحدلره
سوق عساگر و ذخیره شروع اولتمقدر دیدکده سردار اکرم اقدی موسی الیهه
معامله بالجماله صورتنده مقابله ایدرک بو محلدن قشلاق یرینه حرکته برقاچ قوناق
کیرو عودت اولنق بزدن ایلرو سرحدلرده بولنانلری ترک ایله آسایش واستراحت
میل کوسترمک و آنلرک همتلرینه فتورکتورمک دیمک اوله جغندن بزه لازم اولان
ممکن مرتبه ایلرویه کیدیه رک سرحد نشینانه موجب قوت قلب اوله جق وجهله
برحرکت اولمیلدر دیمش ایسه ده ایلرویه حرکتک اسبابی مقفود و باقی قیری یوردنده

اردوی هایون خلقنک روزمره تعیین تدریجی اداره مشکل اولدیغندن جواریت مناسبیله حاجی اوغلی پازرینک مشتاً اتخاذ اولمسنی بعضیلر اخطار ایلدکلر نده فی الواقع قصبه مرقومه دن بروجه سهولت سرحدلره اغانه و امداد قابل اوله جغندن بصورت اوزره آرای ارباب شوری قرار بوله جغنی وقتنده سردار انکرمینه قصبه مرقومه یه عزیمت دخی مشتایه عودت کبی بر حرکت اولغله سرحدلرده اولنلرک فتورینی مورث و پادشاه عالم حضر تارینک اغبرارینه باعث بر کیفیتدر دیدکده اولطرفه کیدلک آسایش ایچون اولیوب سرحدلره امداد و اغانه یه چاره ساز اولمق ایچون اولدیغنی سرحدلرده اولنلره اخبار و عتبه عامیه یه اشعار اولندیغنی صورتده بو محذورلر مندفع اولور دینلرک حاجی اوغلی پازرینه کیدلک قرار کیر اولمشیدی .

انجق انوری افندینک تحریرینه کوره بو مجلسده دفتردار علی رائق افندینک صدر اعظمه مناقشه سی وقوع بولدیغندن همان عقیب مجلسده عزل ایله یرینه دفتردار مکتوبجیسی محمد شریف افندی دفتردار اولمشدر . اما واصف افندی آنی رد ایله دیرکه : رائق افندینک حرص و طمعه دأر احوالی و سابقا کمر کچی سلیمان اغادن لاجل الابقا تمسک آلدیغنی بعضیلر سامعه هایونه القا و بیت المالی عدم صیانت تقصیرینی اسناد ایله حقدده افک و افترا ایدرک نظر پادشاهیدن سقوطنه سبب اولملریله عزلی تصمیم اولمشیدی . صدراعظم دخی رکاب هایونده دفتردار و کیلی اولان عثمان افندینک بعضاً کندی رضاسنه مخالف حر کتده بولندیغنی تفرس و برهانه ایله اضرار ایده بیلمک اسبابی تجسس ایدر ایدی رائق افندینک مرکز اصلیندن سقوطنی تصحیح ایدیجک عثمان افندینک محاسن اخلاقندن بختله اردو دفتردارلغنه تعیین بیورلمسنی تلخیص ایتدکده

* بیت *

اری تحت الرماد و میض نار * و یوشک ان یگون لها اضطرار
مؤداسنجه عثمان افندی شبهه یه دوشه رک انجام کاری ملاحظه ایله دفعنه سی ایدوب
بعض طرفلره التجا ایله چاره سنی بولوب اردوی هایونک مرتباتی تسهیل و تنظیم
ایچون عثمان افندینک آستانه ده دخی وجودی لازمدر و دفتردار مکتوبجیسی محمد
شریف افندی برمدتدنبرو دفتردار دأره سنده استخدام اولمش ایدو کندن امور
دفتری یه کسب و قوف ایلمش اولمسنه نظراً دفتردارلغه الویرر دیو صادر اولان
اراده سنیه ذکر اولنان مجلس مشورت کونی سردارا کرمه و اصل اولدیغندن عقیب
مشورته رائق افندی عزل ایله روزنامه چه اول منصبته تنزیل و باش دفتردارلغله
شریف افندی تجیل اولندی . واصفک کلامی بوراده ختام بولدی .

وقایع مهمه آرسنده بویه تبدل دفتر دار فقره سنی صو قشیدیر مق بر صغوق شی کورینور ایسه ده خزینهلر آچهدن و سر حدلر عسکر دن تهی واردوی هایونک پریشانلی درجه غایته منتهی اولدیغی حالده باکال حیرت واضطراب مشتایه رجعتی ایجاب ایدن موسم تلاش و بیختابده کرک در سعادت طرفنده و کرک اردوی هایونده اویله افکار ذاتیه و اغراض شخصیه ایله اوغراشلمسی انسانک صبری یانه حق وقایع غریبه دن اولدیغنه مبنی بو و ایدنه عنان خامه ضبط اولنه میوب ناچار شاهراه صدددن چیقلمش اولمسیله ینه کریزگاه اعتذاردن ره راست مقصده کله لم .

برمنوال مشروح حاجی اوغلی بازارینک مشتتا اتخاذ اولنسی مجلس مشورته قرار کیر و بوصول آستانه ده و قوعبولان مجلس مشورته دخی مستصوب اهل تدبیر اولدیغنه مبنی اتحاد اجتهاد جانبین ایله صادر اولان اراده سنیه موجبنجه ارتق باقی قیری یوزندن حرکت لازم کله رک لوای شریف صندوقه سنه وضعله ربیع الاولک دردنجی و تشرین اولک اوتوز برنجی کونی محل مرقومدن حرکت و اوچ کونده حاجی اوغلی بازار ی قصبه سی جوارنده واقع صحرایه نصب خیام اقامت اولندقه اینکی طرفک اجتهادی دخی خطا اولدیغی تبین ایلمشدر .

شویله که : موسم شتا احکامنی اجرایه باشلامغه ارتق صحرا ده اقامت قابل اولمیوب حاجی اوغلی بازار ی ایسه بر کوچوک قصبه جق اولمغه اردوی هایونک آنده قشله سی ممکن اولمیه جنی مشهود اولیجق سردارا کرم ینه ارباب مشورتی خیمه سنه احضار ایله جمله با خطاباً باقی قیری صحرا سنده عقد اولنان مجلس مشورتک قراری و اراده شهر یاری اوزره بورایه کلندی لکن بحکمة الله قار یاغوب قیش باصیدردی حاجی اوغلی بازارینک خانه لری ایسه یوز یکر می عدددن عبارت اولدیغی حالده هربری برر ایکیشر اوطیه منحصر اولوب مع هذا مذکور خانه لک احتجابی اخراج اولنسه مسکن و مأوالری اولمامغه تلف اوله جق لردن بشقه عموماً اردوی هایون دکل یالکز یکچیری او جانغی آلمیه جنی درکاردر بوتقدیرجه هر تقدیر مرام هایون بوتصبه ده قشله مق صورتی ایسه ده بوراده ساکن اولمق محال وقیش دخی باصیدرمش اولمسنه نظراً صحرا ده اقامت عذیم الاحتمال اولدیغندن نوجهله حرکت اقتضایدر دیو جمله دن سؤال ایتدکه اردوی هایون قاضیسی کیچه جی زاده افندی فی الواقع بوتصبه ده قوناق اولدیغی درکار و برقاچ کون دخی بوراده اوتوریلور ایسه عموماً حیوانات تلف اولوب احوال و ائقال یرده قاله جنی و بز لر نه حال اولور ایسه ک اوله لم لکن او جاقلو غریب یکتیلردن برچوق نفرات تلف اوله جنی امر آشکاردر دیو شمنی طرفه کیدلمک مناسب اوله جنی ایراد ایلمسی

اوزینه سرداراکرم ینه تکرار مقال ایله حاجی اوغلی بازارنده قشالانسی مراد
 هایوندر و بز بورایه انجق اسماعیله عسکر سوقیچون کلدک هیچ اولماز ایسه احوال
 و اتقالی شمنی قصبه سنه ارسال ایله سبکبارجه بو طرفده اقامت ایلسه ک دیو الحاح
 و اصرار صورتن اظهار ایدیجک کتخدای سابق توقیعی عبدالله افندی معاذالله
 برقاچ کون صکره اعدادن توحش برله طونه ساحلرندن متفرق اولان نسا
 و صیان بو قصبه یه دو کیلوب کلدکلر نده اهالی یه دخی دهشت عارض اوله رق نفوزه
 خلل کلور بو حوالده سوق عسکر دکل برایش کورمک ممکن اولماز دیمکله بونک
 اوزینه برخیلی مباحثه لر جریان ایتدکدن صکره نهایت شمنی جانبه کیدمک اوزره
 قرار ویریلوب ظهور ایده جک مشتا عسکرینی طونه سواحلنه سوق ایتک اوزره
 اسبق یکیکچری اغاسی میر میراندن کله جی عثمان پاشا حاجی اوغلی بازارنده ترک
 اوله رق اردوی هایون ایله محل مرقومدن حرکت و ربیع الاولک اون اوچنجی
 و تشرین ناینسک طقوزنجی کونی شمنی مشتاسنه مواصلت اولمشدر .

و برمنوال سابق کلی طرفندن عودت ایتمش اولان شالوپه لردن برارینک عسکر دن
 خالی اوله رق اسماعیل و طولچی ساحلر نده قالدق لری اقدمجه درسعادته استماع
 اولندقدن خراب اولنلری تعمیر و ترمیم و نقصانلرینی تمیم ایله اول حوالینک
 محافظه سنه قیام ایتک اوزره بطروئه هایون اولان احمد قپودان عهد سنه میر میرانلق
 ایله طونه باشبوغانی توجیه و بوجهته جزائر و کیلی سید علی قپودان بطروئه هایون
 نصب و تعیین اولنمشیدی انجق احمد قپودان بابا طاغنه وارد اولدقدن روسیه لورک طونه
 بوغازلرینی بالاستیلا برو طرفله تخطی ایتدکلرینی خبر آغله ناچار اودخی شمنی به کمشدر .
 اردوی هایونک بووجهله واقع اوله کلان احوال مکدره سی پیدرپی درسعادته
 استخبار اولندقجه طبع سلیم شهر یاری متکدر اولوب انجق بحسب الموسم برکونه
 تدبیر و چاره سی اولمدیغندن مظفریت استدعاسیله ادعیه مأثوره و بعض خواص
 حجر به قرائت ایتدیرلمکده اولدینی اثناده ترحاله شیخی حاجی مصطفی افندی
 بعض امور فقرای رؤیت ضمنده درسعادته کله رک اعدانک بو صورتله قوت
 و غلبه لری اندیشه سیله خواجه واردقدن قائد کتیبه انیساعلیه من الصلوات ازکاه
 افندیمر حضر تریخی عالم معناده مشاهده ایدوب دهان معجز بیان نبویدن یارین
 شیخ الاسلامه واروب نیم امریمی تبلیغ ایله نهی منکرات و منع اسباب خطیئات ایله
 اشتغال و تقید اولنسون و فقرا و ضعفا ی امته وسع و طاقتلرندن زائد تحمیل اولنان
 تکلیف عنیف تحفیف اولنسون و قلوب مؤمنیندن غل و غش و حقد و حسد ازاله
 اوله رق اعظم اسباب نصرت اولان اتحاد و اتفاقه رعایت قلنسون ان شاء الله فتوحات

غیبه و نصرت الهیه میسر و اعدا مقهور و مدمر اولور کلام دری النظام صادر اولدینی عقینده شیخ افندی او یانمغله علی الصباح مفتی الانام حضورینه کیدوب مأمور اولدینی اوزره یمین ایدرک تبلیغ فرمان نبوی ایدیجک کیفیت طرف شیخ الاسلامیدن حضور هاپونه عرض و ابلاغ اولنوب سلطان سلیم خان حضر تری ایسه بونجه احوال مؤله سفریه دن سفهای استانبول حصه دارغم و غصه اولیوبده هر کون عیش و صفالیله مشغول اولدقلرندن مکدر و ملول اولهرق اسباب عشرتک تعطیلانی خولیا ایتمکده بولنسیله بوخولیا سی شیخک اول رؤیاسیله تأکد ایتمکین همان خرستیان تبعه سی ایچون خارج سورده بعض میکده لر ابقا اولهرق سائر میخانه و کارخانه لر قیادریلوب سائر عبرت اولوق اوزره ممرناس اولان محللرده برقاچ فاحشه لر دخی سیاسة صلب اولنمش و بر طرفدن دخی مظالم و تعدیاتک منع و رفعی اسبابنه تشبث قانمشدر . انجق عشرت یسانی خرستیانلر بیننده بشقه صورتله حوادث اولوب شویله که : کویا سنه باشی پاسقالیاسنده بتون خرستیانلری قتل ایده جکر ایمش آنکچون مسلمانلر سرخوش بولنما مق مطالعه سنه مبنی عشرت یساغ ایدلش کبی نیجه اراجیف شیوعولمش ایدی .

الحاصل سلطان سلیم خان حضر تری اردوی هاپونک پریشانلغندن متأم و متحیر و سردار اکرمک رخاوتندن مغبر الحاطر ایسه ده کلینک استیلا سندنبرو سردار اکرم مقدما کلی و اسماعیل حوالینسک محافظه سنه دائر تهدیدات شدیدینی متضمن کندوسنه متوارد اولان خطوط هاپونی یاد ایله حیرت و اضطرابی کوندن کونه متزاید اولدیغندن شایدکه طرف شاهانه دن خوف و خشیته ذهانی و اردوی هاپون خلقنک اختلاف و انقلابی حسیدیه بتون بتون یأس و فتور کتوروبده ایشدن ال چکر و بوضورتله اسماعیل دخی الدن کیدر دیو کندوی اغفال و استتالت صورتیه برمدتجک دخی اشغال ضمننده امیر اخور ثانی شهر یاری ایله استقلالنی حاوی خط هاپون اصدار و ارسال بیورلمغله اردوی هاپونده علی رؤس الاشهاد قرائت اولندوقده کندوسنه موجب اطمینان و تسلیت اولمش ایسه ده اسماعیل طرفندن و سوسه سی غالب و روسیه عساکرینک برو طرفله تخطیلاری ملاحظه سیله عقل و شعوری منسب اولهرق شمنی قصبه سی باشنه طار کملکله بروجه آتی حاجی اوغلی بازاری طرفه عزیمته قرار ویرلمشدر .

* سردار اکرمک قوزلیجه و حاجی اوغلی بازاری *

* طرفلرنده کشت و کذاری *

سردار اکرم اردوی هاپون ایله شمنی به داخل اولدقدن صکره بروجه مشروح

قصه مذکورده طوره میوب باباطاغنده کی جمعیت عسکریه نك ثباته و سیاه اوله بیامک و بلکه ایلرویه حرکت و ایساجتی و طولچی طرفلرنده استقرار ایله اسماعیله امداد ایتک اوزره سبکبارجه کلفچه و پراوادی و حاجی اوغلی بازاری طریقیله بابا طاغنه عزیزتی قرارلشدیردقه بویله اوچ بشیوز آدم ایله اعدا قارشوسنه وارمقدن برفانده اولیه جغندن بشقه معاذالله امر برعکس اوله جق اولور ایسه موجب مضرت اولور دیو بعض طرفلردن اعتراض اولنمش و بویله ایام شتاده فرمانه اطاعتله اسماعیله کیدر کمسنه اولمدینی معلومی و کیدنلر اولسه بینه اسباب حرکتک فقدانن حسیله کیدنک امکانی اولمدینی مجزومی اولان مواددن بولنمش ایسه ده هیچ اولماز ایسه شمینده راحتیه واروب هواسنه تابع اولدی دینلمسون دیو اولوجهله حرکتکی تصمیم ایتمش ایدی .

انجق ایام شتاده روسیه عساکری برو طرفله تخطی ایده جک اولور لر ایسه مدافعه یه کافی قوت اولمدیغندن طونه دن بالقانه قدر اول حوالیدن خیر قالمیه جتی درکار و بو افکار دافکار ایله سردار اکرم بک زیاده متالم و غصه دار ایدی .

واکرچه پروسیا قرالی برمنوال سابق دولت علیه ایله عقد ایلدیکی معاهده اتفاق موجبجه دشمن طونه یی مرور ایدرایسه موازنه اوروپایی اخلال ایتمش اوله جتی جهتله وار قوتیله اعلان حرب ایتکی متعهد اولمش و بو کره روسیه لونک طولچی و ایساجتی طرفلرینه تعرض و تجاوزی وقوع بولمش ایسه ده روسیه لونک اصل مقصدی ایجه دونمائی طونه آغز لردن امرار ایله اسماعیل و ابرائیل طرفلرینه ایصال خسار دن عبارت اولمسیله طونه نك برو طرفنده استقرار ایتمه رك همان سواحل محافظه سنه مأمور اولنلری قاجیروب سفینه لرینی سر بستجه طونه ده اجرا ایتمکه اولدیغندن پروسیا قرالک اعلان حرب ایتسی مشکوک و ایتسه بیه موسم بهارده ایتسی ملحوظ اولدیغنه مبنی روسیه لونک ایام شتاده برو طرفله تجاوزلری خاطره سنه بر مدت متار که نامیله اغفال و اشغالدن بشقه بر چاره تصور اولنمماغه آستانه ده بوکا بر رابطه ویرمک واردونک ضرورت و مضایقه سنی لسانا افاده ایتک اوزره اردوی همایونده رئیس وکیلی بولنان حتی بک افندی نی در سعاده ارسال و اغا حسن پاشایی شمینده اردو قائم مقامی تعیین و حقیقت حالده اردوی همایونک امر اداره سنی اردو قاضیسی کیچه جی زاده افندی یه ترک و سپارش ایتدکن صکره سردار اکرم دنخی بالذات ربیع الاولک یکر می اوچنجی کونی یوز الی قدر قپوسی خلقیله سپاه و سلحدار او جاقلرینی بالاستصحاب شمیندن حرکت و کویا اسماعیله امداد ایتک آوازه سنی اشاعه ایدرک حرکت مذبو حانه ایله کلفچه یه و اندن قوزلیچه و حاجی اوغلی بازاری قصه لرینه عزیمت و هر برنده اون بشر یکر میشر کون اقامت برله

سوق عسا کره غیرت ایله یکی ائنده حقی بک در سعادتہ وارد اوله رق حامل اولدینی
تجیرات سامیہنی تقدیم و کندویہ تودیع اولنان امور مهمہنی شفاہاً تبلیغ ایلمشدر .
روسیہ سفرینک دوامی ایسہ در سعادتجہ ماترم اولوب حتی لهلولری دخی دائرہ
اتفاقہ آلہرق پروسیا قرالی جنکہ مباشرت و قریمک استخلاصنہ قدر سفرہ مداومت
ایتمک ایچون لازم کلان تشویقاتی اجرا ایلمک اوزره برمنوال سابق احمد عزمی
افندی بو خالده سفارتلہ پروسیا جانبہ ارسال اولمشیدی .

بناءً علی ذلك حقی بک در سعادتہ کلوبده مأمور اولدینی تبلیغاتی عرض و ایفا
ایلدکده بو موسملرده حدود اسلامیه نک عسکر دن خلوی اعدانک بالتجربہ معلومی
اوله رق طرف طرف ممالک اسلامیه به هجوم اوزره ایکن متارکبه میل ورغبتمزی
کمال عجز و ضرورت مزہ حمل ایله صورت استغنا کوستره جکی و یا خود مدت متارکبه
اقل قایل وقت و زمانه حصر و مدت محصوره میانده مکمله و بلکه تکمیل مواد
مسائله ایچون مستقلاً سند طلب ایله جکی واردات خاطر دن اولوب بوجه ایله برابر
پروسیا دولتیه بلا مخبره متارکبه شروع ایتمک شرط اتفاقه منافی و مخبره و استمزاج
ایسہ امتداد وقت و زمانی مستلزم و علی کل حال اسباب متارکبه بو طرفده منعدم
اولدیغدن اتفاقه خلل کلکسزین اردوجه صورت متارکبه نک امکانی بولنور ایسہ
جائز کوریلور دیو طرف ملوکانه دن سردار اکرم جانبہ تحریر و تنبیه اولنوب
انحق روسیہ لونک غرور و استکباری معلوم و تضييع وقت فرصت ایتیه جکی امر
مجزوم اولدیغدن دولت علیه نک دلخواهی و جهله متارکبه قبول ایتمک احتمالی
اقرب اولمسیله مشتاعسکرینک برآن اقدام اردوی هایونه التحاق ایچون قوجیسر
کتخداسی و میراخور ثانی و کیلی عبدی بک روم ایلی طرفلرینه خطوط هایون ایله
موشح اوامر علیه ایله اخراج و حقی بک دخی ذاتنه متعلق بعض تبشیرات ایله
اردوی هایونه اعاده اولنوب خلال راهده آرقه سندن کتخدالح امری کندوسنه
واصل اولمشدر . شویبه که : اردوی هایونده کتخدای صدر اعظمی اولان
فیض الله افندی و اصفک افاده سی اوزره عاقل و فطین و صداقتکار اوله رق بین الناس
برفالقلم مذموم و مقذوح اولمامشیکن بعض اصحاب اغراضک سعایت و نفاقلریله حقنده
حسن ظن ملوکانهنی تغییره سبب اولدقلرینه بناءً عزل و نفيه اراده هایون تعلق
ایدرك بروجه سابق صدر اعظم کتخدالحی ایچون خلال راهده حقی بک افندی به
خط هایون ایصال اولنوب قوزلیجه ده صدر اعظمه ملاقات و خط هایونی ابراز برله
صدارت کتخدالحی احراز ایتمکله سلفی فیض الله افندی اراده سنیه اوزره و اواخر
ربیع الآخرده قبریسه نفی و اجلا و منحل اولان ریاست و کالتی فردوسی افندی به

وروز نامچه اول زشتویده مرخص ثالث اولان دری افندی به و مکتوب بحلیق باش خلیفه صادق افندی به احاله و بوتقسیمدن صدر اعظم برادری محمد اغایه دخی حصه چقه ریله رق عهده سنه چاوشباشلیق توجیه اولمشدر بوجهتله حتی بکک در سعاده کلوب کیتیمی توجیهاتده قرار قیله رق مصلحتجه برشئی مفید اولماشدر .
ایشته بوندن صکره سردار اکرم قوزلیجه دن حاجی اوغلی بازارینه واروب اسماعیله امداد نامیله برادرینی باباطاغنه کوندرمک اوزره اولدینی زمان تأسف نشان که کانون اولک اون طقوزنجی کونی اولمشیدی اسباب استخلاصی تحصیله جویان اولدینی اسماعیل قلعه سنک ایادیء مسلمیندن خروج ایلدیکی استخبار ایلمشدر .

﴿ اسماعیلک کیفیت استیلاسی ﴾

برمنوال سابق روسیه عساکری هر طرفدن اسماعیل قلعه سنی احاطه و تضییق ایتشلر ایدی طونه طرفنده خندق و شرانپو مثللو استحکامات قویه اولمدیغندن اشبو (۲۰۵) سنه سی ربیع الاولک اون یدنجی کونی قایقلمه عسا کر کلیه املا ایدرک اول طرفدن هجوم ایتدکلی آنده برآ دخی عسا کر کلیه ایله یوروش ایتدکرنده عسا کر اسلامیه کمال متانتله مقابله ایدرک روسیه لولرک برقاچ قایقلمه یوروش ایله حرق و غرق ایلدکلی رندن روسیه لولر آطیه طوغری عودته و برآ هجوم ایدنلر دخی کلی تلفات و یردکدن صکره رجعته مجبور اولمشدر .

بوندن صکره روسیه لولر اوزاقدن محاصره یی التزام و آرائق آرائق قلعه نك تسلیم و تخلیه سی ایچون ارسال پیام ایدوب بناءً علیه اهالی ایله عسکری بیننده تسلیم قلعه خصوصنده بعض مرتبه منازعه و جدال دخی وقوعبولش ایسه ده بندری و یرنلرک جزائرلی حسن پاشا زماننده کوردکلی جزالرئ تذکر و هیچ اولمز ایسه لوم لائمدن خلاص اولمش اولورزدیو انجام کاری تفکر برله صبر و ثبات اوزره اتفاق و ویره لقر دیسی بینلرنده محکم یساق ایدوب روسیه فلد مارشالی اولان پوتنکین ایسه یدی آیدنبرو بوراسنی محاصره ایدرک تسخیرینی لازمه دن عد ایلدیکی حالده هجومسز تسخیری قابل اولمیه غغنی جزم ایلدیکنه مبنی عسا کر کلیه ایله سواروف نام جزالرئ مأمور ایتمکله سهولتلی طرفلرینی ارائه ایتمک اوزره اسماعیل قلعه سنی یاپان (بارقو پورنار باشی) نام معماری دخی استصحاب ایله کلوب برقاچ دفعه ایتدیکی هجوملرده کلی تلفات و یره رک عودته مجبور اولمشدر .

نهایت ربیع الآخرک اون التیجی و کانون اولک اون برنجی کونی یوروش ایتمک اوزره قرار و یروب اول کیجه صباحین ساعت سکزده ایکن اوچ درت طرفدن خندقلمه مکین اولان مجاهدین اوزرینه هجوم ایتدکرنده طرف اسلامیاندن مقابله

اوله رق محاربات شدیدہ وقوعہ کدیکی و روسیہ لولر قیریلانہ باقیوب نردبان ایله طرف طرف قلعہ به صعود ایتکه چالشدقلری ائناده قوجه کول طرفندن خندقلره دخول و تمکن و کیجه قراکلوغنده برر محله اختفا و تحصن ایتش اولان روسیہ عساکری شرانیو قازقلرندن طابیه به دخول ایتدیکجه تلف اولنلرک برلرینه کیرودن بشقلری کلهرک و بوصولته طاقم طاقم روسیہ طاپورلری قیریلوب دوکیلهرک نهایت طابیه نی ضبط ایله اسماعیله کیروب کنار شهرده اهل اسلام ایله مضاربه و محاربه به شروع ایتدکلر نده مذکور طابیه به اعدانک دخولی هرکمه دهشت و یرمش و بوجهته عسکری بینه دخی اختلاف کیرمش اولدیغندن روسیہ لولر هر طرفدن قصبه به دخول ایتکه مباشرت ایتدکلری حالدہ قوبان خانی بختکلرای خانک برادرلری قبلانکلرای وغازیکلرای سلطانلر و معیتلر نده بولسان چوبانکلرای و مقصود کلرای زاده محمد کلرای و دیگر مقصود کلرای زاده سلیم کلرای نام اوچ نفر سلطانلر ایله سابقا جزار احمد پاشا کتخداسی اولان سلیم پاشا برقاچ یوز مقداری آدم ایله بر محله تحصن ایدرک جمله سی شهید اولنجیه دک جنکه قیام ایله الی یوم القیام ابقای نام ایتمشلردر . بوخلالده سفینه لردن خروج ایدن روسیہ طاپورلرینک دخی بر طرفدن شهره هجوملر نده رعایا طاقمی کندولرینه تبعیت ایتلریله اهالی قصبه اولاد و عیال غائبه سنه دوشدکلر نده سواریدن بعضیلری دشمنه تسلیم اولمشلر ایسه ده پیادکانک اکثری شرانیو و طابیه محاربه لرنده کندو مقدارلرینک اونر قاتی اعدایی اتلاف ایتدکلر نده صکره کندولری دخی شهید اولوب بقیه لری دخی قصبه ایچنده بیوک خانلره قبانهرق تکرار محاربه به مباشرت ایتلریله اول کون ساعت اونه قدر بازار کار زار تمتد اولمشدر .

قلعه محافظی اولان وزیر محمد پاشا بر طابیه نک امدادینه کیدر ایکن روسیہ لوانه اسیر دوشدیکلی ائناده سرعسکر اولان آیدوسلی محمد پاشا دخی اسارتی اختیار ایتمکین طابیه نک برنده مجتمع اولان اهل اسلام مال و جانلرینه تعرض اولنماق شرطیله سرعسکر مشارالیه کفالتیله تسلیم اولمشلر ایسه ده روسیہ لولر عهدلرنده طورمیوب غدر و خسار ایتکه باشلادقلرینی فرقه مذکورہ مشاهده ایتدکلر نده دخی جانلرینی فدا ایدرک و بر فرد قالمینجیه دک جنک ایدرک جمله سی شهید اولوب حین محاربه ده روسیہ لولرک بر متعین و معتبر جنراللری تلف اولمش ایدوکلندن سانکه قصاص اولمق اوزره سرعسکر محمد پاشانی دخی شهید ایدرک بردولته یاقشیمان غدیری اجرا ایلدکلر نده بشقه اهالی حقنده دخی حقوق ملدن خارج اولهرق زیاده سیله اظهار شدت و خشونت ایدوب اوتوز بیک نفوسدن زیاده اهل اسلامی قتل ایتمشلر ایدی .

روسیه عساکرینک بویله طرف طرف غلبه لری و خصوصیه اسماعیلی استیلا

ایتدکری اخباری پیدر پی قترینه یه واصل اولدجه پک زیاده کبر وغرور کتوروب حتی برکون یاننده بولنان انکلیر ایلچیسنه زمین استهزاده خطاب ایله چونکه انکلتره باش وکیلی بنی پترسبورغدن طرد ایتک ایستور ظن ایدر مکه قسطنطنیه یه واروب چکلماهمه رخصت ویرر دیدیکی روایات صحیحهدن اولمق اوزره قترینه تاریخنده مذکوردر . فقط روسیه لولرک دخی اون بشییک قدر عسکرلری تلف اولوب بوقدر معلم عسکرک تلف اولمسی ایسه دول اوروپا نظرنده عظیم مصیبت اولوب حتی قترینه بوقدر عسکرک ضایع اولسندن پک زیاده مکدر اولدینی روسیه لولرک دخی شوقدر عسکرک تلف اوله جغنی معلوم اوله ایدی اسماعیل ترک اولنور ایدی دیدکری مشهوردر .

انوری افتدی اگر سردار اکرم یرکوکیدن روسجغه کچدیکی عقینده طوغری طولجی ساحلنه ورود و صرف اموال ایدرک طایه انشاسیله اسماعیل آطه سنی محافظیه بذل مجهود ایتش اوله ایدی اسماعیل قصبه سنک محافظه سی متیسر ودخول اعدا متعسر اولور ایدی دیو تحریر ایتشدر .

واصفک خلاصه افاداتی دخی بو وجهه درکه : سردار اکرم حسن پاشا روسیه اوزرینه تدارک کورمشیکن نمچه طرفنه تحویل نیت برله اظهارتلون وتردد ایلمش ایسه ده زماننده یرکوکلی نصرتی ونمچه متارکه سی ظهورایله منظور پادشاهی اوله رق صنوف عساکر متفرق اولمازدن اقدام روسیه اوزرینه حرکت ایلمسی اکید وشدید خطوط هایون ایله امر واشعار اولندیغنه نظراً مرخصلری موقع مکمله ده ترک ایدرک وقتیه روسیه اوزرینه حرکت موافق مصلحت و نفسنه موجب سلامت ایکن (ع) توفیق عزیزست هرکس ندهند : مفهومی اوزره طریق صوابه عدم اهدا برله عقد وتمهیدی محقق اولان نمچه متارکه سنک نهایته مدنظر انتظار ایدوب بعد خراب البصره روسجغه کذار ایلمش ایسه ده سلستره یه کلنجه عساکر طاغلمغه باشلادیغندن بوخالده ایلرویه حرکت ایده جک اولدقده قیش تقرب ایلدی بویله تدارکسز زره یه کیده بیلورسین دینیلوب کندوسنک عزمنده دخی ثبات اولمادیغندن اقامت صورتی استحسان ایله اوزاقدن سرحداته امداد فکرینه دوشدیکی ائنده کاینک دشمن اننه کچدیکی استخبار ایدیجک متالم وایلرویه حرکت ایتدیکنه نام اولمش ایسه ده چه فائده که شتا کرکی کبی تقرب ایتمکله آندنصکره کیدهیم دیسه دخی حرکت قابل اولمادیغندن واردوی هایونده موجود اولان عساکرک تمامجه طاغلمش اولسنه منی اطرافدن عسکر تدارک وارسالی قیدینه دوشدیکی خلالده دخی قیش باصیرمغله ایستدیکی کبی عسکر جمع ایده مدیکندن نه پایه جغنی شاشیروب

اردوی هایون ایله شمنی مشتاسنه داخل اولدقدن صکره چیقوب قوزلیجه حاجی اوغلی پازاری طرفلرنده کشت و کذار ایلدیکی ائنده اسماعیلک برمنوال سابق استیلا اولدیغنی استخبار ایلمشدر .

هرنه حال ایسه اسماعیلک استیلاسی خبرینی آلدقده سردار اکرمک جهان باشنه طار و عقل و شعوری تارمار اولدیغی حالدده بووقعه مکدره اوزرینه سلطان سایم خان دخی اردوی هایونه کوندرمش اولدیغی خط هایونده غیرت بویله می اولور دیو کندوسنی مؤاخذه و تکدیر ایلمش واقده در سعادتدن اردوی هایونه آنچه کوندرملک استدعاسنه دائر طرفندن در سعادتده کوندرلمش اولان تحریرات سامیه سلطان سلیمه عرض اولندقدده نه ایش کورلدیکه آنچه کوندرلسون دیو بیورمش اولمی اوزرینه سردار اکرم دخی وقوع حالی اولدیغی کبی طوغریدن طوغری به شرح و تفسیر سیاقنده رکاب هایونه تقدیم ایلدیکی تقریرنده بو کیفیت قولارینک صنع اولدیغنه جناب حق شاهد عادل اولدیغندن غیری سفرلرده صدر اعظملردن قغیبی مشتادن حرکت ایتمش قوللری بویله قیش موسمنده یولاره دوشوب انواع تعب و محنتی ارتکاب ایله عسکر جمع ایتمیکم غیرتمدن ناشی دکلیدر مشتادن طوغری اسماعیله کیتمک ایچون چیقمد وایلروسی تجسس ایتم طولچیدن سوار اولوب قارشویه کچه جک بر آچیق یول قالمش اون بیک عسکر ایله طولچی به وارسهم قارشویه کچه مدکدن صکره نه فائده سی اولور آنک ایچون برورده توقف ایتم معلوم عالیلری اولسونک قوللری بر کوکیده ایکن دریا طرفی قپودان پاشا قوللرینه و طولچی طرفی خان بنده لرینه احاله اولندی وقتا که ایکی دفعه دونمای هایون مسقولو ایله محاربه ایدوب عودتی اختیار ایله سنه ده وکلی بوغازلرنده انجه دونما و شالوپه لری مکمل نفرات ولوازمات ایله توقیف ایتم دیو قپودان پاشا قوللری تحریر ایتمشیدی مکر برادیغی سفینه لک مالزمله لری اولدیغندن بشقه نفراتنک دخی علوفه لری ویرلماش اولدیغندن اکثری متفرق اولمش اردوی هایون ایله حاجی اوغلی پازارینه ورودمه شالوپه لک تجهیزی و نفراتنک علوفه لری ایچون التمش بیک غروش کوندرلدیکنه اول وقتده قدر آکاه اولیوب آنچه نک بابا طاغنه کلدیکی ونه ماده ایچون کوندرلدیکه امین پاشا طرفندن چاکر لرینه تحریر اولمشیدی اولوقته قدر آکاه دکل ایتم بعده نفرات تدارکی ضمننده حامی زاده احمد قپودان کوندرلمش اولوب اولوقت ایسه قاسم دخول ایده لی یکر می کوندن زیاده اولمشیدی دشمن اغزنده ترک اولنان سفائنک نقصان نفراتی اولوقت تدارک اولنه بیلور می بالمله دونمای هایون قایونلریله محاربه ایدن دشمن سفائنه نظامسز عسکر ایله

نصف ایجه دونما نیجه مقابله ایده بیلور دشمن بوحاله واقف اولوب سفینه لرینی یوروتمش خان دخی طولیچی و اول سواحدله بولنان شالوپه لری احراق ایتمش ایساقچیده اولان کرد عثمان پاشا دخی قراری فراره ترجیح ایلمش برطرفدن اول حوالی سکنه سنه پریشانلق کلدی برطرفدن دخی عسکر فراره باشلدی بوحالاره واقف اولدم خاکپای خسروانه لرینه عرض وتفهیمه تأدب ایتدم بوحالاره سبب اولان غیرتسزلی حضرت حقه حواله ایدرز قلعه مرقومه نك دست دشمنه گرفتار اولسی هر تقدر مورث تأثیر ایسه دخی ویره ایله اولیوب مردانه ودلیرانه دروننده بولنان امت مرحومه نك مقابله ومحاربه لری بروقتده اولمش دکل خصوصیه دشمنك کمال هزیمتی موجب تسلیت اولور الحاله هذه باباطاغنده بوقدر عسکر مز موجود اولوب طولی وایساقچی طرفلرینك محافظه سنه و دشمنك بروطرفه کچورلما سنه اعتنا اولنقده اولدینی معلوم هایونلری اولمق ایچون افادیه جرأت اولندی دیو تسطیر وقائم مقام پاشایه کوندردیکی قائمه سنده دخی کندی غیرتندن بختله قپودان پاشانك عودتنی و خان ایله سائر محافظه ده بولنانلرک حالی معلوم دیو شکایاتی تکرار ایتدکد نصرکه سلطان سلیمك برمنوال سابق نه ایش کورلدیکه آچه کوندرلسون دیسنه جواب اولمق اوزره شمعدی بویله اولدی دیو آچه کوندرلمسه وطرفزدن دخی کلنره یأس جوابی ویرلسه انجام کار مشکل اوله جنی باهردر احسان بیوریلان ایکویوز الی کیسه ایله نه ایش کوریلور باباطاغی نزل امینی اون بیک غروش ایستر سرعسکر عثمان پاشا دخی اون بیک غروش خر جاق ایستر خان حضر تلی ایکی ماهیه سنی ایستر پوتقالی قزاقلرینک یدی ماهیه لری اولوب طلب ایدرلر مایوس اولورلر ایسه مسقولو طرفنه کیتملری ملاحظه دن بعید دکلدر زیرا کندولرینی اداره ایده مزلر ابرائیل طرفدن اون بش بیک غروش ایسترلر دشمن مواجهه سنده سرحد نشین اولان وزیرایه اعانه لازم کلزمی بزه ویریلان جواب کبی نه ایش کوردیلرکه اوتانمدهن آچه ایسترلر دیسه ک نه کونه نتیجه ویرر شوکتلو افندمزه تسلیت بیوره رق دوچار اولدیغ اضطرار بدن تخلیص بیورملری مرجودر دیو تحریر ایلمشیدی.

سردار اکرم کاه خانه وکاه قپودانه وقپودان پاشا دخی کاه بوکا وکاه اکا عزو قصور ایدوب خان ایسه بوقدر فریادم کارکر اولیوب یاتمه عسکر ومهمات کوندرلمدی دیو شکایتدن وسائر ارکان دولت دخی یکدیگرینه عزو تهمت ورخاوتدن خالی اولیوب سلطان سایم خان حضر تلی ایسه وقوعات حالیه مکدردهن متأم اولدینی حالده مأمورینک بویله یکدیگرله منافسه ومشاجرهلرندن زیاده سیله منفعل اولمغله

بن قان اغلیورم سز بر بر یکزله اظهار نفسانیت ایدیورسکز سبحان الله بونه کیفیتدر ذره قدر ایمانی اولان بونی بووقتمده ایلمی نفسانیت ایدنلر خدانک قهرینه اوغراسون بوندنبویله طرف طرف بیلنلری جلب واستشاره ایله طونه سواحلنک تقویه سنه ونفسانیتی بینکزدن دفع ایدوب شوایشلرک نظامنه بقاسکز دیو برقطعه خطهایون اصدار بیورمشیدی .

جاوید احمد بک دخی سردار اکرم مشار الیهک ذکر اولنان تلخیصنی مغالطه اولمق اوزره تحریر ایدر حالبوکه اصل قصور بویله نظامسزلق ایله ایکی دولته مدافعه قابل اولمدینی بالدفعات اردوی هایوندن اعلام اولنه کلشیکن درسعادتمده بولنان ارکان سلطنت دولت علیه نک قوتیه دشمن قوتنک موازنه سندن واحوال سفریه دن کلیاً غفلت ایده رک بهر حال روسیه اوزرینه هجوم اولنسون دیو اصرار ایلملریله اردوی هایونه تکلیف مالایطاق اولنمیدر واکرچه سردار اکرم حسن پاشانک ابتدای حالدیه روسیه سرحداتنک امر محافظه سنی براغوبده یرکوککی سحر اسنده اصرار اوقات ایلمسی کبی بعض تقصیراتی وار ایسه ده هپ یازدیغی شیلره مغالطه در دینلمک دخی خلاف قاعده انصافدر فقط طشره تر بیه سی اولمغین مزاج عالمدن غافل وحوصله سی تنک بر وزیر اولدیغندن وقوع حالی بویله طوغریدن طوغری به سرتجه وسر بستجه یازمسی استانبولک ترا کتنه نظراً بر نوع خشونت وفوق العاده بر حرکت اولوب بونکله برابر بوخلالده ارتکاب وار تشایه دائر بعض اطواری دخی مسموع اولمغله حقتمده سلطان سلیمک توجهی بالکلیه متغیر وکلی واسماعیله امداد خصوصنده قره حصارلی احمد پاشانک واقع اولان قصورینه مبنی وزراتی رفع اولنمش اولوب انحق قضیه کندوسنک مسموعی اولدینی کبی اطراف واکنافتدن باشنه برطاق حشراتی جمع ایله صورت عصبانده بولندیغنه نظراً تأدیجی لازم کلشیکن سردار اکرمک بووجهله بنای اقبالی متزلزل اولمش ایدو کندن بحسب الوقت قره حصارلینک معروضاتی سردار اکرمک تلخیصاتندن ده ز یاده شمیر و مؤثر اولمشیدی .

* سردار اکرم روسجقلی حسن پاشانک قتلی *

وقوعات سالفه اوزرینه سردار اکرم حسن پاشانک عزل ایله تأدیجی مضموم اولمغله اول امرده اردوی هایونک اصلاح احوالی ضمننده شمنی به کتورلمسی تصور اولندیغی ائنده سائق قضا و قدر عنان عزیمتی جانب مشتایه سوق ایدوب ارتاق طشره لرده اقامتمه لزوم کورنمدیکی جهتله مشتایه عودتنه کندوسی رخصت استدعا ایتدیکنده (ع) صیدرا چون اجل آیدسوی صیاد رود * مضمونجه کندی رجانسه مبنی مشتایه عودتله بهار تربیانه اقدام وغیرت ایلمسی باخط هایون امر و اشعار

بیورلمش و چونکه صدر مشار ایله طرف شاهانه دن بینک و کندو سنجه سلامت نفس
 مکن اولماق ملاحظه سیله کریبان چاک اولدیغی معلوم شه ریاری اولغله بوخلالده
 کندو سنه کوندریلان خطوط هایونده کرکی کبی امنیت واستالت ویرلمش اولدیغندن
 کندو سنه ایچه اطمینان و امنیت کله رک حاجی اوغلی بازار جفندن شمنی به عزیمت
 ایلمشیدی حالوکه برمنوال مشروح قوزلیجه و حاجی اوغلی بازاری طرفلر نده
 سر سری کشت و کذار ایلدیکی ائنده آستانه ده اراجیف چوغالوب شو یله که : صدر
 اعظم عزلی طویمش و عصیان ایلمش و کچه جی زاده آستانه دن پاشایی تحریکه کیتمش
 و حتی بک کلام حق افاده سنه ککش رد اولتمش و کوچک میراخوره مهری آلمغه
 سنی کوندریلر بن مهری یو تدم ویرمک احتالم یوقدر دیمش معاذالله دشمن بو حله
 مطلع اولور ایسه طونه نی مرور ایله اجرای مافی الضمیرینه اجتماسار ایده چکی
 ظاهر در قره حصار ی احمد پاشا دخی صدر اعظم دن توحش برله روی شدت
 کوسرتوب بش بیک قدر عسکرا له مشتاده رجالی شیخون ایده جک ایش یوق
 صدر اعظمی باصه جقمش کبی کونا کون حوادث مده شه ظهور ایدوب جاوید احمد
 بک دیرکه بوندن عوام و خواص متالم اوله رق کویا دنیانک صوک کونی ظن
 اولنوردی بوخلالده سردار اکرم طرفندن در سعادتت تقدیم اولنان تحری راتده
 دخی بو حوادتی تأیید ایده بیله جک و سلطان سلیمی غضبه کتوره جک دیکه
 و سر بسنجه تعبیرات مندرج اولدیغندن ارتق یالکز عزلیله اکتفا اولتمق
 درجه لر نی گذران ایتمکله قتلنه قرار ویریلوب بو امرک اجرامی ضمننده
 اولا اغا حسن پاشا بازار جق محافظه سنه مأمور وودین سر عسکری اولان پکمز جی
 محمد پاشا یکچیری اگاسی و شمنی قائممقامی تعیین بیورلدق دتصکره سردار اکرم حقنده
 ایکی قطعه خط هایون اصدار اولوب بری بلغرادک نجه عسا کرندن تخلیه سی عقبنده
 محافظه سی ضمننده همان صوفیه جانبه حرکت ایتمسندن عبارت اوله رق اغفال ایچون
 یازلمشیدی و دیگری کندو سنک قتلیله سره مقطوعنک در سعادتت ارسال اولتمسی امرندن
 عبارت ایدی ذکر اولنان خط هایونلر خاصه خاصکیسی ایله اردویه ارسال و مقدا
 خط هایون ایله اول جانبه کوندرلمش اولان میراخور ثانی حسین اغا بو خصوصه
 مباشر تعیین قلمش ایدو کندن سردار اکرم حاجی اوغلی بازار جفندن حرکتله
 جمادی الآخره نک طقوزنجی و شباطک ابتداسی جمعه کونی دبدبه ودارات ایله
 شمنی به داخل و اخشامه قدر هر کس کندو نی زیارت ایله مشغول اولوب اخشام جامه
 خوابنه یاتدقده بووقته قدر میراخور ثانی ایله خاصه خاصکیسی دخی بر بر یله ملاقات
 و کیجه لین مخفیجه شمنی به دخول ایش اولملریله کیفیت برمنوال سابق قائممقامقله

شمینده بولنان پکمزجی محمد پاشایه عرض وافاده ایتدکلرنده وزیر کتخداسی ایله بعد المذاکره اولاصوفیه جانبته حرکت ایلمسنه دائر اولان خط هایون کندوسنه ارانه اولنهرق کیجه ساعت اوچده ایکن مهر هایون استرداد وشمی اعیانک قوناغی جوارنده بر محله اقعاد اولندقدنصکره جامه خوابنده قورشون ایله اور یلوب قتل اولمش وبو خلالده بابا طاعی جانبته کیتمش اولان برادری محمد اغا دخی قرابت صهریسی حسبیله ملجاً وپناه اعتقاد ایلدیکی قوبان خانی معرفتیله اعدام قلنمشدر .

وزیر مشار الیه عن اصل روسجق اعیانی چلبی اغانک اوغلی اولوب کثرت مال ووسعت دائره و حال ایله راحتکزین فراغ بال ایکن اولکی سفیرلرده درگاه عالی قوجی باشیلرندن اولوب یرکوککی و بکرش محاربه لرنده اعانه کلیه سی وجوده کلک مناسبیله محسن زاده مرحومه جاتوب کسب تعین و اعتبار اتمشیدی . طاعستانی علی پاشا روسجق سرعسکری ایکن آنکله امتزاج ایده میوب حقنده بر کونا ضرر و خساری موجب اوله جغنی ملاحظه ایدرک بعض محلله بذل مال ایله رتبه وزارتی تحصیل و تساوی منزلت و تفاوت قوت و ثروت ایله نفوذ سرعسکری نی تقلیل ایتدیکی ائنده یرکوکینک کیفیت استردادی کندوسیلهدی المخبره سرعسکرک کندوسنه توجیه بیورلدینی صورتده حصولنی تعهد ایلمش ایدی امور دولت ایسه خارجدن کورندیکی کبی برامر سیر اولوب درجه صعوبتی ایشه کیریشلیدیکی وقت اکلاشیله کلدیکندن مشار الیه دخی سرعسکر اولدینی کبی مصلحتک نزاکتی درک ایله ایفای وعد و عهد ایده مدیکندن هر کون برر بهانه ایله امرار اوقات ایده کلسیله سرعسکر لکدن عزل ایله یرینه جزا ئرلی حدن پاشا سرعسکر اولمشیدی صلح وقوعنده عهده سنه اوزی محافظه سی توجیه اولنوب عزیمتده اختیار تاخر وتوانی ایلدیکندن وزارتی رفعله بر زمان کوملجنده وبعده روسجق وسلانیکده اقامت ایدوب واشبو سفر وقوعنده وزارتی ابقا وودین ور حوه محافظه لرینه مأمور بیوریلوب جزا ئرلی حسن پاشا وفات ایلدکده بالاده بیان اولندینی اوزره فوق المأمول اولهرق مقام صدارته کلش ایسه ده وقوعات مؤلئه سالفه اوزرینه بوجه سابق قتل و اعدام اولنمشدر .

واصف افندی دیرکه مشار الیه حسن پاشانک سوابق خدمته نظراً سرزده ظهور اولان قصورندن اغماض وعزل مجرد ایله اکتفا اولنوب اعدام وازاله سنندن اعراض اولنه جغنی مراح و اشفاق شاهانه یه نسبتله محقق اولوب انحق جلالی صورتده بلا سبب ولافائده کشت و کذار و مشتای شمنیده عدم استقرار ایله تعطیل مواد دولت ایدرک سنه آتیه ترتیبانه موجب نقصانیت اولدیغندن بشقه آستانه سعاده کوندردیکی تحریرانده هتک پرده حرمت وادب و تحریک رک تهوور و غضب ایدوب کچیدی دخی بو یوزدن اولمغله سر فلاکتزده سی بریده قهر سلطانی اولمشدر .

مشارایه اوائل حالده غایت زکی وهوشمند ودرایت ورویتی مسلم بر مرد جوانمرد اولوب انجق کثرت اوزره عیش وعشرت مشربی وصدارتنده غلبه حرص و آزار ایله اموال ناسه دست دراز اولق مسلك و مذهبی اولدیغندن فضله حقدوغرضدن دخی خلی دکلدی تجاوزه الله عن سیئانه هدایی محمود افندی به ادعای انتساب ایله اسکدارده واقع هدایی تکیه سته بعض خیرات قید ایلیوب آندن بشقه بر عمل صالحه موفق اوله مامشدر . العهده علی الراوی .

بوصورتله حسن پاشانک غائله سی بر طرف اولمش ایسه ده بروجه آتی دفعه وقت و حاله مناسب بر صدر اعظم بولنه میوب بوکا دائر غایت خفی اوله رق خواص وکلا بیننده بر خیلی مذاکرات جاری اوله رق کیمک صدر اعظم اوله جفی بر خیلی کونلر کیمسه ننگ معلومی اوله مدیغندن آستانه ده ینه اراجیقک آرقه سی کسلمیوب قرعه قریحه شاهانه دن سهم صدارت کیمک نامنه اصابت ایده جکنه انتظار وهر کون بیک درلو حوادث ایله و قتلر امرار اولنورکن آستانه ده بیوجک بر حریق ظهور ایله بعض مرتبه اراجینی باصدیر مشدر . شویله که : جمادی الآخره ننگ اون سکزنجی کیجه سی چارشو ایچنده حریق ظهور ایندکده بلا رخصت چارشویه کیرمک ممنوع اولدیغندن مامورین وضابطان یتشنجیه دک آتش دخی کرکی کبی مشتعل واطفاسی مشکل اولغله بتبازاری و یورغانچیلر ویاغلقجیلر و خفافلر و سلاجیلر دکا کینی کافه محترق اوله رق حرب مناسبیله اسعارک غلاسنی بهانه ایدرک دکرندن قات قات زیاده و آغر بهالزایله اشیا صاتوب اصحاب ضرورتک جانلرینی یاقان اصناف بی انصافک مال و منالدری خاکستر و قضیه ده مدخلی اولمیانلر دخی آنلرک نارینه یانوب (ولا ترکنوا الی الذین ظلموا فتمسکم النار) مضمونه مظهر اولمشلردر (ع) آتش اندر بیسه چون افتد نه تر مانده خشک .

* قوجه یوسف پاشانک ثانیاً صدارتی وارد و قاضیسنک نفی و تعریبی *
بر منوال سابق صدر مقتولک شمنی به عودتی ایچون کندوسنه امر کیتد کده قائم مقام پاشا صدارته وزرادن برینی انتخابه مأمور اولغله وزیر بن وزیر ملک محمد پاشا و کذا وزیر بن وزیر فضالادن ابو بکر پاشا و مجموعه علم و معرفت اولان سینوب محافظی فیضی سلیمان پاشا و قره حصاری احمد پاشا و یکچیری اغلغندن نائل وزارت اولوب بوشانده اوردوده یکچیری اغاسی اولان پکمزجی محمد پاشا و سابق ضربخانه امینی عزت محمد پاشا و دیمتوقه ده بولنان سابق قائم مقام مصطفی پاشایی بر بوصله به یازوب سلطان سایمه عرض و تقدیم ایندکده قائم مقام پاشایه بر قطعه خط هایون کوندروب شویله که : ملک محمد پاشانک اختیار و مسلوب الشعور اولدیغنی خبر ویر یورلر عزت محمد پاشانک دخی مسیب

اولدینی ضرر بخانه ناظر لغنده تجر به اولمشدر دیمتوقهده اولان مصطفی پاشا اگر چه امور
 دفتری بی بیلور لکن اختیار اولمق حسیلله سفر وزیر ی اوله جغنی عقلم کسمز بالاده
 تحریر اولنان وزیر لر بنده خاطر یه کلدی یازین رئیس افندی بی دخی برابر آله رق
 ارکنجه شیخ الاسلام افندی یه کیدوب الله ایچون بونلردن برینی انتخاب ایله قطعی
 جوابی یازه سکنز بوبابده متحیرم البته سز بندن ایوسنی بیلور سکنز برینی بولوب شو
 اضطر ابدن بی خلاص ایده سکنز دیوار اده بیور لمغله قائم مقام پاشاعلی السحر شیخ الاسلامه
 واروب افاده ایلمش ایسهده شیخ الاسلام افندی برینی ترجیح و تخصیص ایده میوب
 وهان براز سربجیب تفکر اوله رق الخیر فیما اختاره الله جناب حق هر حاله دین
 ودولته خیر لوسن ویره دیوب اختیار سکوت ایتمکله قائم مقام پاشا وقوع حالی ینه
 عتبه علیه پادشاهی یه عرض ایتمدیکندن و کیمسه بویله بر امر خطیرده رأی صریح
 ویرمکه جسارت ایده مدیکندن بوبابده سلطان سلیم خان حضر تلی قریحه سنی
 خلیجه اتعاب ایتمکدنضکره نهایت بوسنه والیسی بولنان صدر اسبق قوجه یوسف
 پاشایی انتخاب ایلمشدر .

واصف افندی بوسایق اوزره تحریر ایدرکه حسن پاشانک اوزرینه وقت و حاله
 مناسب بر وزیر آرانیلوب مقربان سلطنت طرفلرندن بوغاز سر عسکری وزیر عزت
 محمد پاشا سوق و تعریف اولمش و عقل و درایتی فی الواقع مسلماتدن بولمش ایسهده
 امور حر بیهده تجر به سی سبقت ایتمدیکندن مزاج شاهانه یه موافق کلدیکنه مبنی
 دیکری جستجو اولدینی صر ده آستانهده کائن صداقتکاران عصر و عربده جویمان
 دهرک بعضیلری صدارته تقریباً لسانه آلوب تمایل و قبول صور تلی دخی نمایان
 اولمشیکن استتلال تام اراده سیله بعض شروط ایراد اولتوب ایفاسی تامجه نفوذی
 آخره تفویض دیمک اوله جغندن طبع سلیم خانی آخره محکوم اولمق عارضه سندن
 استغنا کوسترمکله قریحه ملوکانه لرندن مهر هایون بوسنه والیسی صدر اسبق یوسف
 پاشا طرفنه ارسال اولتمق اوزره میراخور ثانی حسین اغا شمنیدن بو خدمته مأمور
 اوله رق مهر هایونی آلوب شمنیدن بوسنه یه حرکت برله یوسف پاشایه تسلیم ایتمکله
 علی جناح الاستعجال حرکت و جمادی الآخره نک یکر می او چنجی کونی شمنی یه
 مواصت ایلیوب طرفداران سائر ه پرده بر انداز ظهور اولان نقش غریب دن انکشت
 خای فکر و خیال اولمشدر .

یوسف پاشا خاقان مرحوم زماننده صورت استقلاله مألوف اولدیغندن آنک صدارتی
 دخی پکده دخلخواه موافق اولمق لازم کلور ایسهده ظن ایدر مکه بو اوانده آندن
 بشقه مقام صدارتک وقعنه کافل و کافی و قدرت و کفایتجه احوال حاضر ه نک اداره سنه

وافی بروزیر بولنه مدیغندن و بدایت سفرده نمچه طرفده ظهور کلان موفقیتدن
صدارت اهلیتی السنه ناسده مذکور اولدیغندن وقت و حالک سوق و ایجاب ایلدیکی
طریقدن دخی جیقیه میوب ناچار صدارت کتوریلدرک اصول حکیمانه اوزره اعمال
واستخدامنه ایتدار اولمشدر .

بناءً علیه بوکره کندوسنه صدارت عظمی توجیه اولندیغنه دائر اردوی هایونده
قرائت اولتمق اوزره رسمی اولهرق یازیلان خط هایوندن بشقه سلطان سلیم خان
حضرتلری تنبیهات و وصایای لازمی حی حوی خفی اولهرق دیگر برقطعه خط
هایون دخی اصدار وارسال ایلمشدر شوپله که : سنکه یوسف پاشاسین صدارت
سابقه کده طرفندن رضای شاهانم اوزره حرکت اولنسه سنی عزل ایتزدم لکن
سن مطلوب اوزره حرکت ایتیموب صدر اعظم لره دکل سائر وزیریه و بلکه بیانی
آدملره یا قشیمان ظلم و تعدی و اخذ رشوت و اصلندن انفعالک اولان آدملره اجرای
غرض و جلب مال داعیه سیله نفسانیت و سفر وقتنده نوازش و التفات لازم اولان
رؤسای عسکریه بی عنف و شدت و تهدید ایله توحیسه جسارت و بووجهله نیجه
امورک و باخصوص امور لازمه سفریه نک تعطیلنی و ایشلرک کورلامسنی موجب
اطواردن عدم فراغتک و بونک امثالی رضای شاهانمه مغایر حرکاتک جهتیه
صدارتدن عزل اولغشیدک شمدی یهدک بومثللو حرکاتدن فارغ اولمش سندر دیو
سنی ایشته ینه صدر اعظم ایتدم معاذالله بو صداریتکده دخی اومثللو حرکاتدن
برسنه جسارتک سراً و علناً مسموع شاهانم اولور ایسه بودفعه عزل ایله اکتفا
ایتم البته قضایه اوغزارسین سکا کوره لازم اولان عفت و استقامت و فقرایه شفقت
و مرحمت و کمسنیه غرض و نفسانیتدن و کیزلو و آشکاره رشوت اخذندن مجانبت
و طور و حرکتکی رضای حقه و رضای پادشاهانمه تطبیق و انظلم اسباب سفر یهدن
اولان ذخیره و عمر به و بارگیر و بونلرک امثالی لوازماتک وقتندن اول تماماً جلبنه
دقت و شمیدین ابرائیل و ماچین و ایساجی و طوولچی و سائر سواحل و سرحدلرک
کرکی کبی تقویله رینه کیجه کوندوز صرف مقدرت ایدرک سین سائر کبی کیچ
قلیوب حزیران دخولی وقتلنده مسسقولو اوزرینه قول قول هجوم ایله باعون
باری اخذ انتقامه دامن در میان غیرت ایتمکدر رضاء الله موافق حرکت ایتدیکنک
حالد هرایشک سهوات کسب ایدوب اولکی صداریتک کبی اولمیوب ان شاء الله تعالی
غالبانه ختامی دخی سنک معرفتکله اولور دیو بیورلمشدر .

* مخطرہ *

چلد رابعده بیان اولندیغنی اوزره قوجه یوسف پاشا احوال عسکریه نک اختلالنی

وحر بک موقوف عملیهی اولان اچهنک فقداننی کوزلجه ملاحظه وروسیه نیک
 درجه اقتدارینی موازنه ایتمکمزین روسیه سفرینی آچوب و نمچه لو دخی روسیه لو
 ایله اولان اتفاقیه مبنی دولت عالییه اعلان حرب ایتمکله نه طرفه حرکت ایده جگنی
 شاشیروپ نهایت روسیه طرفه سرعسکر تعیینیه اردوی هایونک نمچه اوزرینه
 حرکتی تقرر ایتمش ایسه ده اسباب سفریه ده کلی نقصان اولوب از جمله طونه اوزرینه
 انشاسی لازم کلان کوپری ادواتی احضار اولنه مدیغندن بلغراد جانبنه کیدیه میوب
 ودین طرفه عطف عنان عزیمت اولنه رفق قایقارله قارشو طرفه مروره مجبوریت
 کشیدی بو حاله نظر آصورت ظفر دن یأس حالتلری رونما اوله رفق سفر کشادنن یوسف
 پاشایه ندامت و حرب طرفلیرینه خجالت کشیکن بوسنه اها لیسلی جنگ آور بر طائفه اولوب
 اوتهدنبرو نمچه لویه مدافعه برله حدودلرین محافظه ایده کلدکار ندن نمچه عساکری
 اول طرفدن ایلر و لویه میوب و افلاق ویوده سی ماوریانی بک باشنه کلیتو عثمانلی عسکری
 جمعه نمچه مالکنه محجوم ایتمدیکندن اول طرفدن دخی نمچه لولر حدودلرینی محافظه یه
 مجبور اولوب بو حالده اردوی هایون ایله دخی اورته قولدن هجوم اولیدوقده بدایت
 حربده افراد عساکر اسلامیه نیک جنکه شوق و خواهش لری فوق العاده اوله رفق
 دشمنه بک فداکارانه صولت و هجوم ایتمک لردن وجبار زاده و قره عثمان اوغلاری
 کبی دره بکاری یانلرنده بک چوق جنگاور و فدایی یکتلر اولدیغندن ماء منهمر
 وسیل منهدر کبی نمچه مالکنی باصوب اثر عنایت آلهیه اولمق اوزره فتوحات
 عظیمه رونما اولیجق یینه حرب طرفلیرینک زبانیلری دراز اوله رفق
 شمدی یهدک محاربه دن خوف و احتراز ایله روسیه و نمچه لویه هر خصوصه صورت
 مامشات ابراز اولمسی صرف خطا ایتمش دیوبو خطالری کاه و کلای دولته و کاه جانب
 سنی الجوانب سلطنته عزو و اسناد ایتمک میدان بولمیریه یوسف پاشا دخی خیلی نام
 و شان قزاقمش ایسه ده روسیه جانبنده کلی ضایعات وقوعه کلدیکندن بشقه متعاقباً
 نمچه لولر دخی استیلا اولنان یرلرینی استرداد ایتمکدن صکره برو طرفلره دخی
 تعدی و تخطی ایتمک لردن یوسف پاشا کار ایده میم دیرکن سرمایه دن ضرر ایتمش
 اولدینی و بر سنه ایچنده ایش بتر و اقلیم قریم اله کچر اعتقادنده ایکن ظنی کبی
 چقمیوب غائله سفریه متکثر و ممدود و آنچه و ذخیره مفقود اولدینندن و دولت
 علیه نیک اکثر عساکر مرتبه سی یازین کلوب قیشین کیتمه کله ایام شتاده سر حداتک
 محافظه سیچون بشقه جه ترتیبی لازم کلان شتا عسکرینی دخی و قتیله جلب و تدارک
 ایده مدیکندن حدودک محافظه سندن عاجز و مضطرب قالدینی حالدیه سلطان عبدالحمید
 خان حضر تلرینک و فاتیه سلطان سلیم خان حضر تلری جلوس ایتمکین یوسف پاشا

عزل اولمئش ایسه ده خلفنك رخاوتی و جزائرلی حسن پاشانك وفاتی وبعده روسجقلی حسن پاشانك عدم موفقیتی حسیده کوندن کونه اردوی هایونك ضعیفی مشته اوله رق صلحه مجبوریته صحیحه کلدیکی ائنده یوسف پاشا آچمش اولدیغی باب سفری سد ایلمك اوزره ینه مقام صدارته کتورلمش ایدی .

* کچه جی زاده نك عزل و نفی و عصمت بك افندینك اردوی *

* هایون قاضیسی اولدیغی *

بروجه بالا یوسف پاشا صدارتی اعلان ایتدیکی عقبنده استانبول پایه سیله اردو قاضیسی بولنان کچه جی زاده صالح افندی نی قونیه یه نفی ایتمشدر .

چونکه صالح افندی در سعادتده حبوبات ناظری ایکن بر منوال سابق اطراف ایله کشا کشه دوشه رنك متشخصان زمانه دن بر خیلی خصما قزائمش اولمسیله بویوزدن بر قضایه اوغرامامق ایچون اردو قاضیلغیه آستانه دن چیه رنق یقه یی صیروب و ذاتا جر برزه لو و جری اللسان و صدر مقتوله منسویتی نمایان اولمسیله مشار الیهك عقل خواجهمسی مقامه کچه رنك اردوی هایونده حل و عقد اموری اله کچوروب بو صورتله کچه یی صودن چیقاردم ظن ایدرکن اولکیدن زیاده خلقك لسانه دوشمکله صدر مقتولك عدم موفقیتله نجم اقبالی ساقط اولیجق نحوست ادباری بحسب الاقتران اکا دخی ساری اولمغین بر منوال مشروح قائم مقام پاشا مقام صدارته بر وزیر انتخابنه مأمور اولدیغی کونلر صالح افندینك دخی تنزیل طریقینه نفی و اجلاسنی سلطان سلیم خان اراده ایلدکده شیخ الاسلام حمیدی زاده مصطفی افندی تنزیل طریق خلاف رسم طریقدر دیو جواب و یرمش ایدی . حالبوکه حمیدی زاده افندی اساطین علمادن نیجه ذواتی همان بر اشارتله در سعادتدن طرد و تبعید ایدر کیش و بوخلالده کوکب اقبالی غروبه تقرب ایلمش ایکن شمعی بر صالح افندینك تأدیسی اراده بیورلدقده عدم مماشات صورتیه طیانمسی سلطان سلیمه غایت کوچ و کران کلهرک جاوید احمد بك تاریخنده مسطور و مقید اولدیغی اوزره قائم مقام پاشایه کوندرمش اولدیغی خط هایونده بو آدمك حبوبات ناظر لغنده صورت حقندن کلهرک اخذ ایلدیکی رشوتك نهایتی اولیوب و خاص کویده حوره بناسنه رخصت و یردیکی متواتر اولدیغندن غیری جلوس هایوننده آرپه قنلر مقاطعه کبی مقطوعاً التزام اولتمسون امانه اللهك امری اجرا اولنسون دیوخط هایون ایله نظام و یرمش ایکن بو آدم خلاف خط هایونم حرکتیه سبب اولوب آرپه قنلر و سائر نیابتلر اولکیدن زیاده آیلقاه و یرلمکه آلت مستقل ایکن تنزیل رتبه قاعده طریق دکدر

ديرك تاديپ اولنماسى طوغرىسى لايق دكلر ديو بوكا باب عاليجه بر صورت
ويرلمنى اراده ايتمكله قائمقام پاشا قيو رجالى ايله لى الاستشاره صالح منلا مفسد
ومحرك وفسا بر آدم اوله رق حبوبات ناظر لغنده ايتديكى فساد قالميوب وهله ميرى
فيئاتي اوزره بغديك كيله سنى يكرى ياره يه آلهرق آستانه ده اوچر بچق غروشه
توزيع ايلديكى بروجهاه عفو اولنه ميوب اعدامى لازم ايسه ده شيخ الاسلام افندى يه
كلى تعلق اولغله دفعه تاديپي قابل اوله ميه جغندن شمديك يالكز نفي لازمه
حالندر دينلهرك همان نفيه قرار ويرلديكى طرف قائمقاميدن عتبه عليه عرض
اولندوقده باب عالينك راي دخى اراده شاهانه يه توافق ايدر كن يالكز حميدى زاده دن
احتراز ايله اجراسنه جسارت اولنه مامسى سلطان سايمك حدت و غضبى تشديد
وحميدى زاده حقنده ظهوره باشلامش اولان اغبرار وتوجهسزلكنى تزديد ايتمكله
تكرار باب عالي يه ارسال ايلمش اولديغى خط هايوننده (بوماده واقعه مطابقدر
وكچه جى اوغلى اشد عقوبت ايله تاديپه محتاجدر زيرا غايت مفسد ومحرك وكنودن
هردرلو حرکت مأمول اولنور بر آدمدر اردو قاضيلغندن عزل اولندوقده سائر
عبرت اولمق ايچون استانبول ومكه پايله رى رفع ايله بلاد اربعه پايله سى قاهره بلاد
بعيده يه نفي اولتمق لازمدر بوخصوصى افندى دايمزه افاده ايده سين ومهرى
اخذ خبرى كلد كده همان بودخى اجرا اولنسون اردو قاضيسى مرخص ثانى عصمت
بك اوله مامزى ايشنى تكميل ايتد كدن صكره اردويه كيتسون شمدي نائى ايله اداره
ايتسون افندى يه افاده ايله مناسب ايسه بويله جه اولسون دكل ايسه مناسبى نصب
ايتسون والسلام) ديو بيورمش اولديغى شيخ الاسلام افنديك معلومى ووقتك
كسب ايتمش اولديغى نزاكت بوندن زياده اصراره متحمل اوله ميه جنى مجزومى
اوليجق ناچار مامشات اظهار ايدرك صالح افنديك نفيه قرار ويرلديكى سلطان
سايمه عرض اولندوقده ينه قائمقام پاشايه برقطعه خط هايون كوندروب مضموننده
(كچه جى اوغليك مخرج رتبه سنده اولان ريفقلى شمديكى رتبه سنه كانجه اطلاق
اولنماسى واناطولى پايله سى ويرلماسى شروط قويه اولمق اوزره دفترله قيسد
وفرماننده ذكر اولنهرق بلاد بعيده دن برينه نفي اولتمق اوزره تنظيم اولنه والسلام)
ديو اراده بيورمش ايدوكنه مبنى برمنوال سابق يوسف پاشانك شمنى يه بالورود
مقام صدارته قعود ايتديكى كون صالح افندى عزل ونفى ايله اردو قاضيلقى زشتويده
مرخص ثانى بولان سالف الذكر عصمت بك افندى يه توجيه اولتمشدر .

* حميدى زاده نك عزل ونفى اولنديغى *

شيخ الاسلام حميدى زاده مصطفى افندى برمنوال سابق علمائى عصرينك سر بلندى

اولدینی حالده صلاح و تقوی ایله موصوف و اوقاتی اوراد و اذکاره مصروف اولمغین مفتی الانام اولدوقده یوزندن دین و دولتجه پک چوق فواید کورلسی مأمول انام ایدی و فی الواقع اهل و اربانه تفویض امور دولت و سفهای طریقه اظهار روی درستی و شدت ایدرک طریق علمیه نك اصلاح و تصحیحنه سعی بلیغ و بالجمله مصالح دین و دولتک حسن تسویه سنده همتی بیدریغ ایدوب حتی مهم امورده حصر وقت ایتک ملاحظه سیله مکاتب و فتواده امضا رینه خاتم استعمالی عادت ایتمش ایدی .

بالاده خاقان مرحومک ترجمه حالی ذیلنده بیان اولندیغی و جهله طریق علمیه و قتیله هر جهته معلومات صحیحه اصحابی اولان ذوات فضائل سماتدن مرکب بر طریق منتظم ایکن مرور زمان ایله نظا ماتی منفسخ اوله رق علما زینده جهلا چوغالمش وارکان طریق ایچنده صحیحاً عالم دیه جک ذوات آزالمش ایدی . و اصل علما صنفی اولان خواجه افندیار دخی امور دولتدن بی خبر اولدقلری جهته دعاجی کروهی اولوق اوزره مراتب رفیعه علمیه اصحابی اولان علمای رسمیه مابین برفرقه اولمشلر ایدی . و اوته دنبرو علمای رسمیه ایچنده دقایق امور دولت و واقف ذاتلر بولنه کیشیکن رفته رفته بومعلومات دخی قلمیه رجانه منحصر اوله رق صدور عظام رسماً و اسلاف کراملرینه تقلیداً مجالس مشورته کلدکلرنده رأیلرندن استفاده اولنیه جق درجه یه کیشیدی . لکن زی ظاهریلری و حیز و حیثیت ذاتیه وزمانیه لری حسیله نظر عسکری و اهالیده معزز و محترم و نزد دولتده سوزلری مسموع و مسلم اوله رق مهم امورده کندولرینه مراجعت اولنوق لازم کلور ایدی . بناءً علیه بو طریق فیض رفیقک تطهیر و تنقیحی و نظام اصلینسه ارجاع ایله اصلاح و تصحیحی اقدم واجبات دینیه و دنیویه دن اولغله سلطان سلیم خان حضر تلی بو طریقک اصلاح و تصحیحی اراده ایدرک حمیدی زاده افندی یه مقام مشیختده استقلال و یروب اولدخی اهل و اربانی استخدام ایله طریق علمیه نك مندرس اولان اصول و نظاماتی تجدد و تمهیده و نفوذ و استقلالنه خلل ویره بیله جک عظمای طریقی قرب سلطنتدن تبعیده قیام ایتشیدی . حتی مشیخت معزوللرندن دری زاده محمد عارف افندی کوتاهیله و آندن حج شریفه کیتمک و مفتی زاده احمد افندی ایله محمد کامل افندی آرپه قلری اولان انقره ده و کشانده اقامت ایلمک اوزره او چنک بردن تبعیدلرینی عرض ایلدکده بویله مقام مشیختدن منفسل اوج ذاتک دفعه اولاد و اقر بالردن افتراقلری طبع سلیم شاهانه یه مغایر ایکن حمیدی زاده افندی یه وقت و حال اقتضاسی اوزره ویرمش اولدینی استقلال ایچون مساعده لازم کلکله مشار الیهم اوجی بردن اشبو ایکیبوز بش سنه سی اولننده در سعادتدن اخراج

ایله منفالرینه ارسال اولمشلر ایدی چوق کچمیوب حمیدی زاده افندی شیخ الاسلام
 اسبق ابراهیم بك واسبق حکیم باشی خیرالله افندی ایله بعض موالینک دخی آرپه لقرینی
 رفع ایله نفی واجلالرینی اشارت ایلدکده (شیخ الاسلاملقدن معزول برقاچ افندی
 کیتدی نه فائده سی مشاهده اولندی وقباحتلری ندر معلوم اولدی وبونلر بنم
 بر شیم دکل لکن بك چوق اولدقده هم افندی داعیمز وهم بن لسانه کلورز
 فساده باعث اولور آرپه لقرینی آلدی کفایت ایدر افندی داعیمزه بویله بیلدیره سین)
 دیوقا مقام پاشایه خطا بآر قطعه خط هایون اصدار بیورلمشدر که عیناً منظور فقیر اولمشدر .
 طریق علمیه نك اصلاحه محتاج اولدیغی جای تردد اولیوب انحق وکلای دولته کوره
 بومللو عظامم امورده تائی لازم کلور ایدی . حمیدی زاده نك ایسه ایام گذشته عمری
 علوم شتی وعزائم ورقایه مصروف ومحصور وبوجهته وکلای دولته سرمایه تسویه
 امور اولان معلومات دوله دن محروم ومهجور اولدیغنه منی عالمک مزاج ومشواری
 فاسد وبوعصرده کندوسنک نقدینه افکاری کاسد اولدیغنی موازنه ایده میه رک
 بونجه سنه لردنبرو اساس قدیمه وهن واندراس عارض اولمش اولان طریقک رسوم
 موضوعه سنی تغییر وتبديل ایله دفعه وضع اصلینسه ارجاع وتحویل قیدینه دوشوب
 بوجه بالا حد معروف اعتدالی تجاوز وتعدی وزمانه نك هضم وتحمل ایده میه جکی
 وجهله عتف وشدت اوزره معاملاته تصدی ایلدیکندن بشقه بعض مورخینک روایاتنه
 نظراً بر مقتضای بشریت طبیعتده حقد ونفسانیت اولدیغندن منفعل اولدیغنی
 اشخاصدن اخذ انتقام داعیه سنه قیام ایتمکله بغیر حق علمای اعلامدن نیجه کیمسه لری
 مقذور ونیجه لرینی وطنلرندن مهجور ایلمشدر .

حتی مشهور کلبوی اسماعیل افندی بو اوانده یکیشهر فنار منلاسی ایکن بر خصوصدن
 طولای حمیدی زاده طرفندن کندوسنه بك شدتلو بر قطعه تکدیر نامه کوندرلمکله
 انفعال وتاثرندن ناشی اصابت علت نزول ایله وفات ایتدیکی وبویله یکانه عصر اولان
 برزات جلیل القدر حقنده حمیدی زاده نك بومعامله سی رقابت علمیه داعیه سی
 اولمق کرک ایدوکی بعض ارباب وقوفدن استماع اولمشدر .

بوجهته حقنده افکار عمومیه متغیر وا کثر ارکان دولت کندوسندن رنجیده خاطر
 وکیدرک اطوار خشونت آتارندن وخصوصیه بوجه مشروح کچه جی زاده حقنده
 اولان معامله صحابتکارانه سندن سلطان سلیم خان حضر تلری دخی متضرر اوله رق
 ارتق مقام مشیخته ابقاسی الویرمیه جکی تذکر وتأمل اولدیغنی ائنده بر منوال
 سابق صدارته کلان قوجه یوسف پاشا ایله بینلرنده برودت ومبایت تحیل اولمغله
 اشبو (۲۰۵) سنه سی رجبنک سکرنجی کونی مشیختدن عزل ایله انچیر کوینده اقامته

مأمور اولدوقده چونکه اقبالنه مغرور اوله رق عزل دکل حقتده برکونه معامله
عتابه وقوعی بيله خاطرینه خطور اتمز ايکن ولوکه بويله برقریب محله اولسون نفی
وتغریب صورتيله انفصالی پک زیاده موجب تأثر وانفعالی اولدینی حالدده انجیر کوبینه
عزیمتی خلاننده زخم خوردده آزار وتادیبی اولان جموع خلقک هوادار ومتعلقاتی
انکسار وسرزنش صورتنده یوزینه قارشو خیلی قال وقیل ایدرک کندوسنی
تکدیر وتذلیل اتمشلردر .

حدیقه المشایخ ذیلنده بومنوال اوزره محرردرکه حمیدی زاده افندی قاعده حکمت
اوزره تأسیس اولنان تناب مناصبدن بهره دار ودواعی نفس اماره دن هنوز
برامری قضاو (کاش دیدی وگذشتی) مصلحتی رؤیت وامضایله کامکار اولمش
اولدیغندن دفعه اقصای مراتب بشریه راتب واعلای مناصب علمیه وئائب
اولدوقده قدیمی معروف ومألوف اولدوقلری صورت حلم وتواضع وسیرت زهد
وتورعلرندن تباعد وفرط شدتله تضییق قلوب انام ومیل زینتله توسیع دائره
احتمامده اسلاف کراملرندن تفرد ایلدکلرندن بشقه احقاق حق واجرای عدل
مطلق قصدی ایله اجتهاده مخطی وحداعتدالدن جانب افراطه متخطی اولوب
ازقدیم کابرا عن کابر نعمت مادرزاد وعزت خداداد ایله محسود اولان نیجه اکابر
عالمسودی عزل ونضیه بی حضور وقضات ونواب ومقتین ومدرسین وطلابدن نیجه
ضعفانی دخی انواع تکدیر ایله خواب وراحتدن مهجور ایتلریله آشنا وپیکانه سمت
معارفهلرندن کریزان وتقی وشقی دست مؤاخذه لرندن اشکر یزان اولدیغندن
احساندیده لری دخی زوال جاهنه نکران (وما ترک الحق لعمر صدیقا) ادعایی
صورت حاللرندن نمایان اولمشیدی بومرتبه فضل وتقوی ایله بنام وقرب شهریار
کامکار ایله مغبوط الانام اولدیغندن مسند والای مشیخته هرسرکشی امرینه رام
وقید حیاتله بروفق مرام قرار وآرام ایده جکلری ملحوظ خواص وعوام ایکن
اون یدی آی اون کون طرفنده پرتو اقبالی منطقی وکوکب اجلالی محتفی اولدی .

واصف افندی حمیدی زاده حقتده بعض ارباب وقوفدن روایت ایدوب دیرکه
مشاریله دامنی پاک ومعتمد وامین وعلمیه عامل برذات حقیقت بین اولوب اصلاح
طریقه یولیه مباشرت وزجر وعنف امرنده اعتداله رعایت وتانی وتدریج ایله
امورینه مبادرت ایتسه ایدی وقتنده علم وکمال رواج داشته اشتهار وحدانشناسان
روزکار ادبی طاقوب تهذیب اخلاق وتطهیر اعراق فضائلی نقاوه افکار ایدرلر
ایدی تناول ازمه ایله فساد بولمش طریق مدت قلیله ده هیئت اصلیه سنه اعاده
ومناصب عامیه اربابی وضع ونهاده ایدرم زعمیله بلاتانی مقتحم غمرات هموم

و مشاق و مضغه افواه ارباب نفاق اولوب سعي هباء منشور وبالضروره خدمتی غیر مشکور اولدی حکمادن منقولدر که مدر مزاج مصلحت اولدر مجرب و بیغرض اولدقلری حالد امتداد وقت ایله استقلاللاری شرطدر . زیرا عوارض مفاسد مالکیه مرور دهور ایله انفس ناسده ریشه کیر استقرار اولوب ازاله سی دفعه غیر ممکن و علی کل حال تدریج و تانی به محتاجدر امورنده عجله ایدنلر اکثر احیانه خاسر و خائب و بلکه سایه سنده مظه نشین اولدینی دولته موجب مهالک و معاطب اوله جنی ظاهر در .

* توفیق افندینک مشیختی و متعاقباً وفاتی *

برمنوال سابق حمیدی زاده افندینک لسانه کلمسی حسبیه عزلی لازم کلدکده یرینه نقیب الاشراف بولنان رئیس العلمایحی توفیق افندینک نصی تذکر اولنوب اکر چه آنک حال و حرکاتی دخی طبع سلیم شهر یاری به موافق دکل ایسه ده بعده مناسبی نصب اولنق اوزره بر ایکی ایلق اوله رق شیخ الاسلام نصب اولنوب عقیب نصبنده دخی اقدجه طریق علمیه به دائر یامیلان نظامک خلافتنه حرکت و حظ نفسی چون کسنه به نفسانیت ایتماسی و طریق طمع وار تکابه کیتامسی و شریعت غرادن ایرلماسی و سانی وقتنده مغضوب پادشاهی اولمغله تادیب ایچون نفی اولنمش اولنلری اطلاق داعیه سنه دوشامسی و صایاسنی حاوی بر قطعه خط هایون دخی صادر اولمشدر .

توفیق افندی ایسه اکیوز اوج سنه سی خلالنده مکرراً روم ایلی قاضی عسکری اولوب هنوز مدت معینه سی ختام بولدن حمیدی زاده مقام مشیخته کلدیکی کونک فرداسی کندوسنی عزل ایتمش اولدیغندن اودخی حمیدی زاده زخمخوردلرندن معدود اولمغین اوزرینه شیخ الاسلام اولمسيله تشفی صدر ایتمش اولدی قالدیکه توفیق افندی غیرت اقران بلاسیله منصب جلیل فتوایه غایه الغایه حریص اوله رق حتی ولوکه بر کون اولسون شیخ الاسلام اولدن الله جانی آلسون دعا و نیازیه دمساز اولدینی مروی اولوب الحقی (ان البلاء مؤکل بالمنطق) مؤداسنجه ایام مشیختی اون اوج کون اولمغله اشبو (۲۰۵) سنه سی رجبنک یکر می ایکنجی کونی وفات ایتمکله کوچوک قرمان قربنده بنا ایلدیکی مدرسه سنده دفن اولمشدر .

متوفای مشارالیه مدرسیندن ایوب افندینک اوغلی اولوب (۱۱۲۷) ده و علی روایه (۱۹) ده تولد ایلمشدر (۴۹) تاریخنده واقع امتحانده بقیه امتحان اعتباریه مدرس اولمشدر بعده بعض خدمات و نیابتلرده استخدام اوله رق (۸۰) تاریخنده سالنیک منلاسی اولوب بعده دور مراتب علمیه ایدرک برمنوال سابق نقش سنک مزار اوله جق قدر مقام مشیخته استقرار ایلمشدر علوم شتاده بضاعه سی درکار

والسنه ثلثه شعری وارد در (۸۶) تاریخنده شام مناجی اولوب هنگام ذهابده .

* قطعه *

صیح وصلت اولوب اثر نابود * شب هجرت جهانی تار ایتدی
 هوس زلف یار ایله توفیق * شام جنت مشامه دک ایتدی
 نشیده سیله تودیع احباب ایتمشدر عودتنده دخی شیخ الاسلامه تقدیم هدایا ایلدکه
 بو قطعه نی عرض واهدا ایلمشدر .

* قطعه *

لطف واحسان و کرم سید منعم ایشیدر * جرم وتقصیر وکنه بنده ناکام ایشیدر
 یوق تفاریق حلب کیم آنی قیلسون آخاف * قاضی شام هدایای دخی شام ایشیدر
 مرحوم مشارالیه قدر شناس و هنر پرور برذات اولوب انجق مدت مشیختی غایت
 قصیر اولدیغندن برشی یایمغه وقتی مساعد اولمامشدر فقط بهار شیرازی به برقطعه
 رؤس تدریس اعطاسنه موفق اولمشدر .

اشبو بهار افندینک نامی علی اولوب فنون شتاده بضاعه سی وعلی الخصوص علوم
 ریاضیه ده مهارت تامه سی والسنه ثلثه ده اشعار مقبوله و مرغوبه سی واریندی انجق
 کیمیا کرک مراقبه دوشمش ایدو کندن عمرینی سحوق اجزایه و وارینی بویله برخام
 سو دایه صرف ایده کلدیکندن یقه سی سفلیتدن خلاص ایده ممشدر و فی الاصل ایران
 اهالیسندن اولدیغی حلد شاهه تشیعندن تخلص ایچون کندوسنی بخارالی طانتدیرمق
 ایسترمش حتی بوکره مدرس اولدیغنده دفتر مدرسینه اسمی بهار بخاری دیو
 یازلمشدر . مع هذا شیعیلک شعارندن تطهیر دامن اشتهار ایده میوب ینه طریقک
 ایچنه قزلباش قارشدی لاقردیلری تفوه اولنوب اول عصرده ایسه طریق علمیه ده
 قره عبدالله نامنده بری اولدیغندن سروری افندی مزاح طرزنده

* شعر *

چونکه وار بونده او جنکانه قره عبدالله * هی افندی نه اولور برده قزلباش اولسون
 بیتنی انشاد ایتمشدر و بهار افندینک نقش خاتمی (بادا همیشه کاشن عمر علی بهار)
 مصراعی اولغله عمر لفظک فتح میم ایله او قونوق احتمالی اولدیغندن بونی مهر کزده
 قبول ایتمکنز برنوع قیه در دیو بعض طرفا طرفدن کندویه سویلندیکی مریدر .

* مکی افندینک ثانیاً مشیختی و منفی اولان علمانک عفو واطلاقلری *
 برمنوال سابق توفیق افندینک وفاتنده شیخ الاسلام اسبق مکی افندی دفعه ثانیه
 اولوق اوزره مفتی الانام اولمشدر . واصف افندی بعض ارباب وقوفدن نقل ایدوب

دیر که صدر جدید یوسف پاشانک مقام فتوایه مأمون الغائله برداتی تقریب ایله کسب امنیت مطلبی واستظهار واعانه ایله رؤیت اموره تصدی مسلك و مشربی اولوب دخواستی اولان ذات کیم ایسه آنی رجا ایتمک اغلب احتمال اولدیغنه بناء طرف هایبوندن صدر مشار الیه برقطعه خط هایون کوندریلوب مفهوم حکمت لزومنده شیخ الاسلام وقت اولان توفیق افندی فوت اولوب معزوللرک حالی معلوم وقضات عسا کرده مقام مرقومه لایق ذواتک وجودی مجزوم ایسه ده بوخلالده نصب اولتمق مناسب کورلیوب شیخ الاسلام اسبق محمد مکی افندی درویش نهاد و خلوص اوزره معتاد وامورندن غیرى شیئه مداخله ایتدیکی مجرب اولدیغندن مقام فتوایه اصعاد اولندی معالری درج اولنوب باب رجاسد و بدایت صدارنده آخری قلمه آلامسی ایچون مقدمجه ارائه صورت رد اولندی .

بعض اوراق رسمیه کورلیدیکی وجهه حمیدی زاده افدینک انفضالنده سردار اکرم یوسف پاشا شیخ الاسلامق رتبه سنی احراز ایدنلردن منفاده بولسان مفتی زاده احمد افدینک ودری زاده عارف افدینک و سید کامل افدینک عفو واطلاقلیله حمیدی زاده نک آخر دیاره نفی و تغریب اولتمسنى تلخیص ایتمش ایسه ده بوکا دائر قائم مقام پاشا سلطان سلیمه عرض و تقدیم ایلیدیکی تقریرنده چاکرلرینک ملاحظه مه کوره بونلرک اوچی بردن اطلاق وحمیدی زاده نفی اولنسه علمانک حاللری معلوم اولمغله اولدقجه صنوف تأدیب ایله خلاف مرضی حرکتن محتنب اولمشلر ایکن بونلرک نفیلری تأدیب ایچون دکل ایتمش حمیدی زاده نک الحاحیله ایتمش بویله اولمسه آنلر اطلاق وحمیدی زاده نفی اولنمازایدی دیوب ینه اولکی حاللرینه رجوع ایده جکلری ظاهر اولدیغندن بشقه حمیدی زاده نک عزلی برتھمت ضمننده اولیوب حدث مزاجی جهتیله بعض مرتبه لسانه کلدیکندن نشئت ایلیدیکی والحاله هذه ایخیر کوی دخی بوغاز ایچنک نهایتده بلاد سائره کبی اوله رق کندویه منفا ایدوکی باهر اولمغله صدر اعظم لرینه یازیله جق جوابده التماسک اوزره منفاده اولان شیخ الاسلام معزل لرینی اطلاق ایدرم لکن اوچی بردن یاقشماز برر برر اطلاق اولنور قالدیکه حمیدی زاده نک ایخیر کوینده اقامتی اکراماً اولیوب نفی طریقیله اولمغله بریره چیقه ماز کافیدر شمعی آندن دخی آخر محله نفی ایتسه سائرلرک اطلاقه مضر اولور وادیلرنده بعض مناسب تعییرات یازلمق وبعده اوچندن قنغیسی تقدیم بیوریلور ایسه جالا شیخ الاسلام افندی داعیلرینه اشارت ایتدیرلمک مناسب ظن اولنور دیو تحریر ایتمکله و بوتقریرک بالاسنه تحریرک پک کوزلدر شمیدلک کامل اطلاق اولنسون دیو خط هایون کشیده بیورلمغله یالکز کامل افندی اطلاق

اولمش اولوب انحق آره سی چوق کچمکسزین دری زاده عارف افندی ومفتی زاده احمد افندی وصدوردن عاشر افندی دخی برر برر عفو واطلاق اولنه رق درسعادته ککشلردر حمیدی زاده افندی دخی برمنوال محرر دیار بعیده یه تغریبدن خلاص اولدیغندن بشقه بعده ایوبده واقع مسکن مختصر لرینه نقل ایله فی الجمله منشرح القواد اولمش ایسه ده جلد آئیده تحریر اولنه جنی وجهله مؤخرأ زخم خوارده لرندن سالف الذکر دری زاده عارف افندی مکرراً شیخ الاسلام اولدقده تذکر ماجری ایله کندوسنی دارالسرور استانبولدن تبعید واجلا ایتمکله آخر عمرینه دک دیار غربته دوچار الم وکربت اولمشدر .

* عزل و نصب *

کتخدای صدر عالی محمد حق بک افدینک اطوار و مشاوری صدر جدیدک مزاجنه موافق کلدیکندن درسعادته کتخدا وکیلی بولان رشید مصطفی افندی بی کتخدا نصب ایتمک اوزره اردوی هایونه طلب ایدوب طرف شاهانه دن دخی مساعده بیورلمغه رشید افندی کتخدالقه اردوی هایونه ارسال اولمغین منحل اولان کتخدا وکالتی اناطولی محاسبه جیسی وکیلی بولسان کوچوک علی افندی یه توجیه اولمش ایسه ده مومی الیه یکریمی اوتوز سنه دنبرو باب دفتریده امور مالیه ده مستخدم اوله رق امور دیوانیه ایله چندان الفتی اولدیغندن بشقه غوغایه مائل واعاظم ناس ایله الفت ومؤانست خصوصنده متکاسل برذات اولدیغندن چوق کچمکسزین عزل ایله بیوک تذکره جی وکیلی اولان عارف افندی کتخدا وکیلی نصب اولمق مناسبیه سلسله وقوعبوله رق رکاب هایون مأمور لرندن بعضیلرینک عزل ونصلری اجرا بیورلدیغی منللو اردوی هایونده دخی بعض توجیهات وقوعیله صدر جدید کندو مرام ودلخواهنه موافق مأمورلری نصب وابقا ایلدیکی صروده برمنوال سابق اقدجه درسعادته عشرت یسانغی اجرا اولمش ایدوکنندن سردار اکرم دخی اردوی هایونده شرب خمر وعرقی یساق ایدرک شمنیده تقدیر میکده ومظنه تهمت اولان محللر وار ایسه سد وبند ورجال دولت وواجاقلو وکتبه وسائر ارباب حرفت دأره لرنده اولان تازه رولری طرد ایتدیرمشدر .

وبو ائنده خدیجه سلطان حضرتلرینک زوج اکرم لری اولان موره والیسی سید احمد پاشا بوغاز محافظلی نصب اولمغله مکمل دأره سی خلیقه کلوب خنکار اسکله سنده خیمه نشین اقامت اولمش وموره آالتی مصر والیسی اسماعیل پاشایه ومصر ایالتی عزت محمد پاشایه توجیه اولمش ایدی .

هر کس سفره کیتمکه خواهشکر اولمق حکمتنه منی بالفعل اصحاب مناصب جمله اردوی

هایون ایله برابر کیدرک رکاب هایونده برر وکیلری قالمق دأب دیرین دولتعلیهدن اولوب بوجهته اردو مأموریتلری ده شرفلی اولدقدن بشقه واردات دولت دخی طوغریدن طوغری به اردوی هایونه آقوب کلدیکندن هرکس اردویه جان آتوب کیدر ایدی مرور زمان ایله ملت اسلامیه ده آسایش و حضرت غالب وهر داعیه عکسنه منقلب اوله رق در سعادتده وکالت اردوده اصلته ترجیح اولنور اولدیغنه مبنی بواشاده استانبولدن اردوی هایونه کوندریلان بعض ذوات ایله برابر ایکی سنه قدر در سعادتده اناطولی محاسبه سی وکالتی خدمتده بولنان مورخ واصف افندی دخی بولنوب اردوی هایونه ورودنده چوق کچمکسزین اناطولی محاسبه جیسی اولمشیکنینه تاریخنده بو کیفیتدن شکایت ایلمشدر . شویله که : موکب سلطانی واردوی جهانبا نیده استخدام اولنق عنوانیه آستانه سعادتدن بعض کیمسه لرك ارسال اولنسی بادفتر مطلوب اولوب بعض ناخلف بو بیچاره نی نصل فلاکته هدف ایلیه رک عمر ووزید ایله دفتره قید واجرای مکر وکید اتمشیدی ضعف حال وفقدان ایراد و مال حبسیله مروتمندان زمانه دن بعض خیر خواه سد راه اولنق داعیه سیله بوبی برک و سامانه ملجا و پناه اولوب باب عالیدن بر ایکی دفعه عفو ی متضمن تقریر تحریر ایتدیر دکده سودمند و مفید اولوب بالا آخره یأس کلی بدید و طریف و تلید و سیاه و سفید رونق بازار کله ربایان اسواق قلندیغندن غیر ی دیون و افره و انقلابات متکآثره ایله اردوی هایونه عزیمت و با خط هایون عهدء عاجزانه مه احاله بیوریلان وقایع نویسلک خدمتیه امرار وقت ایلر ایکن اناطولی محاسبه جیسی علی افندی آستانه سعادتده عودته مآذون و بوجهته منصبی انحلاله مقرون اولمغه ذکر اولنان منصب بوفقیره موجه کورلدی دیو واصف افندی تاریخنده تحریر ایلمشدر .

بعض اوراق رسمیه ده محرر و مندرج بولندیغی اوزره سلطان سلیمک جلوسندنبرو یازلمش اولان وقایع جریده لرینک تصحیح و تنقیحی و مستقبلک دخی ضبط و علاوه سی خصوصی مقدما قائم مقام پاشا طرفندن واصف افندی به امر و سپارش اولنمش اولسیله بوکره بر منوال سابق واصف افندی نک اردویه مأموریتی اردو طرفندن ظهور ایدیجک ضبط وقایع ایله مشغول اولدیغی قائم مقام پاشا عرض ایلدکده سلطان سلیم خان حضر تلی اصل وقایع نویس ازدوده لازمدر انوری ایده بیور اردویه کیتسون وقایعی آنده ضبط ایتسون دیو قائم مقام پاشایه خطاباً خط هایون اصدار و ارسال ایلدیکی آنده دیگر خط هایون لر ننده دخی حالا وقایعی ادیب ضبط ایلیور می و ضبط ایلدیکی صورتده بعض ماده یه ظفر یاب اوله میوب صکره تاریخی وظیفه سی اولیه رق حوادث جمع ایلر احباب مراق مجموعه لرینه دو نسون اسرار دولتدر دیو وقوعاتی

کندون کتم ایتدیر میوب تخریر ایتدیرک نهایت بر کسنه بی واقف ایلمسون و تسویداتی نظر اجنبیه دن محافظه ایلمسون دیو کندویه تنیه ایده سکر آچیق عباره ایله مورخانه ربا و مداهنه سرجه یازسون دیو اراده بیورمشیدی . ادیب افندی ایسه مقتضای مأموریتی اوزره جلوس سلیم خانی به قدر وقایعی ضبط ایدوب مؤخرأ عسکر سوقیچون کوتاهیبه مأمور قلمغله ضبط وقایع مصلحتی کیرو قالمش ایدو کندن بو کره قائم مقام پاشا کندوسنی احضار ایله کیفیت استفسار ایتدکده جلوس هایوندنبرو ضبط وقایع ایتدیکنی افاده ایتمکین سلطان سلیمه عرض واستیدان اولنهرق ادیب افندی تکرار ضبط وقایعه منوال مشروح اوزره مداومت ایتمک اوزره تکرار اراده سنیه ایله مأمور بیورلمشدر .

* بعضی وقوعات اردوی هایون *

صدر جدید یوسف پاشا بر منوال مشروح مقام صدارته کلدیکنده موسم کارزار اولان ایام بهار تقرب ایلمش اولدیغندن همان تدابیر سفریه به ابتدار ایدوب انحق پروسیاقرالی بر منوال سابق دولت علیه ایله تجاویزی و تحفظی عقد اتفاق ایلمشیکن کچن یازک لیت و لعل ایله امرار وقت ایدرک نهایت نمچه مصالحه سنه توسط ایلدیکی کبی بوسنه دخی بویله افاتة اوقات ایده جکمی یوخسه روسیه به اعلان حرب ایله جکمی حقیقت حالی حکیمانه استکناه و استیضاح و پروسیالوی حربه تشویق خصوصنده اقدام و الحاح ایلمک اوزره سفارتله برلینه کوندرلمش اولان احمد عزمی افندی دن بو ائنده وارد اولان تخریراتده بوسنه دولت علیه بر سه سالار قوی الاقترار معیتله مقابله دشمنه یوز الی بیگ قدر عسکر سوق ایتمک لازمه دن ایدوکی مقاله سی پروسیالونک زبانتکذاری اولدیغی مندرج واکر چه بوسنه برأ و بحر آروم ایلی و اناطولی طرفلری ایچون دولت علیه نک ترتیب ایتمش اولدیغی عساکر ایکی یوز بیگه قریب ایسه ده اردوی هایونده مضایقه مالیه برکال اولدیغندن مشتای شمنیده عقد مجلس مشاوره ایله آچه ماده سی در میان و مذاکره اولندقدده مصارف لازمه به کفایت ایده بیلجک قدر آچه تدارکنه بر صورت ویریه میوب نهایت طرف شاهانه دن آچه یتشدر ملک اوزره رکاب هایونه عرض حال اولتمقدن غیری چاره بولنه مامشدر .

بعده اسوج اتفاقک تجدیدی صورتی در میان اولتوب شویله که : اقدجه بیان ایتدیگمز وجهله اسوج قرالی خلاف عهد اولهرق بغته قترینه ایله عقد مصالحه ایتمشیدی مؤخرأ دولت علیه ایله اسوج قرالک اتفاقلری کماکان تجدید اولنق خصوصنه برسیالو توسط ایدرک بو ائنده زشتویده دولتیله مرخصلریله پروسیا مرخص ایلچیمی بیننده خصوص مذکورده دائر بعضی مذاکرات جریان ایلمش اولمسیله اسوج اتفاقک کماکان تجدیدی

مجلس مذکورده بلمذا کرده تنسیب و بعده آستانه ده عقد اولتان مجاس مشورته دخی تصویب اولنوب حتی اسوج قرالی دولت علیه ایله تجاوزی اتفاقی تجدید ایتمک و فیما بعد بر کونه عذرا یله منفر دأصاح ایتمیه چکنه پروسیالو کفیل اولمق شرطیله اسوج دولته اعطاسی مشروط اولان یکر می بیک کیسه دن غیر از تسلیم باقی قالان اون سکزی بیک کیسه نك اول و بر یله چک درت بیک کیسه سندن ایکی بیک کیسه سی اتفاق سندیك تجدیدی عقبنده و دیگر ایکی بیک کیسه سی سنه سی آخرینه دک مقسطاً ادا اولمق شرطی حاوی پروسیالویه طرف دولت علیه دن بر قطعه سند دخی اعطا اولمش و بر سنه دنبرو نزد دولت علیه ده مقیم اولان له اورته ایلچیسنه بواننده دولتی طرفدن بیوک ایلیچلیک اعطا اولمغه دبده ایله باب عالی یه و مابین هاپونه کتور یله رک رسوم عادیه اجرا اولنوب بر طرفدن دخی لهلو ایله روسیه علیه نه اتفاق عقیدینه تشبث قلمش ایسه ده بریسنه نتیجه و بر یله مدیکی وقایع آیه دن معلوم اولور .

سلطان سلیم خان حضرتلری روسیه دن اخذ نثار سودا سنده اوله رق بوابده پروسیا اتفاقه استناد ایدر ایدی بواننده ایسه فرانسه اختلالی اورویا پولتیقه سنی تغییر ایتمکله بالجمله دول اورویا غوائل سائر دبی بر طرف ایدرک بوانتی باصدیر مرق داعیه سنده بولمیر یله روسیه نی دخی بواشده قوللائمق اوزره شرق طرفده کی محاربه لرک بتون بتون دفعی ایستلر ایدی پروسیالونک اسوج اتفاقی تجدید ایستدیر مکه سعی ایتمی دخی اسوج قرالنه طرف دولت علیه دن اعانه آچه سنی آدی ره رق بعض مرتبه اقدار ایله فرانسه علیه نه اعمال ایتمک دقیقه سنه مبنی اولمق کرک ایدی بونکله برابر پروسیا قرالی حمایه ادعا سنده بولندیقی لهستان مصالحتنده قترینه نی ایستدیکی کرته یه کتوره بیلیمک و سائلنی تدارکدن خالی اولمیوب پولتیقه سی سلطان سایمک دخواهی اوزره روسیه ایله جنک ایتمک صورتندن پک بعید ایدی لکن سلطان سلیم خان حضرتلری بورالزه واقف اولدیغدن روسیه جنکنده اصرار ایله بیهوده یه اعجاب افکار ایدر ایدی .

قالدیکه نتیجه مصالحه سی متحقق الوقوع فرض اولنهرق قوه موجوده ایله روسیه اوزرینه هجوم اولمق مطلوب ایدی امپراطور ایسه هر نقدر پروسیا قرالک اجبار یله متارکه ایدرک بی طرفلق صورتی اختیار ایلمش ایسه ده یه روسیه پولتیقه سندن بتون بتون آریله میوب انجامکاره انتظار ایله امرار وقت داعیه سنه دوشمکله زبرده تفصیل اولنه جنی وجهله زشتویده نتیجه مرخصلری بی وجه تطویل بحث ایدرک مصالحه ختام بولمدن مدت متارکه تمام اولور ایسه اوچ درت آی ده اتمدید اولنور دیو تفوه ایتمکله باشلا یوب اوچ درت آی صکره ایسه عسا کر اسلامیه نك عودتلری

موسمی اولمغله بوجھله متارکه دولت علیه حقده مضر اولمقدن ناشی اکر تمديد متارکه اولمق لازم کلور ایسه بر سنه قدر تمديد اولمق لازم کله چکی فقط اتمام مواد مصالحه نیتیه یکر می او توز کون قدر تمديدنه باس اولیه جنی کرک اردوی هایونده و کرک در سعادتده بعدالذا کره زشتویده کی مرخص افندیلره اشعار اولمشیدی انجق نمچه لولرک بو حر کتیرینه نظر آ دولت علیه ک امنیتی منسلب اولمغله بوجه آتی بو اوانده روسیه اوزرینه کیتلو تدارک کورلمکده ایکن بر طرفدن دخی نمچه بر حداتنک تقویه سی ضمنتده طرف طرف محافظ و باشوغلر تعیین وارسالنه ابدار اولدینی صره ده او توز بیکدن زیاده عسکر ایله و دین جنبه کلش اولان اشقودره لی وزیر قره محمود پاشا دخی و دین سر عسکری نصب اولمشدر .

و نمچه مصالحه سی منعقد اولدینی کبی افلاق و یوده ده سی نصب اولمق اوزره فنارلو بکلر ندن برینک در سعادتدن جلبی لازم کله رک سابقبغدان و یوده ده سی عکسکاندی اقدمجه اردوی هایونه کلشیدی انجق وظیفه ذمتی اولان استیجاب خفایای امور خصوصنده بروفق مأمول ابراز حسن خدمت ایده مدیکندن آخربنک جلبی لازم کلوب سابقا افلاق و یوده ده سی اولان میخلا کی بک ایسه کرک مقده دیوان تر جانلغنده و کرک مؤخر او یوده ده نی هنکامنده ابراز حسن خدمت و صداقت ایلمش اید و کندن بشقه اور و پا احوالنه و قوف نامی اولدیندن بوخلالده اردوی هایونه جلب اولنوب بر طرفدن جاسوسلر ارسالیله احوال اعدایی استطلاع و بر طرفدن دخی بو یاران و رعایای استیجاب سی ایتمک اوزره مأمور قلندی دیو بعض مورخین تصریح ایتمشدر . الحاصل ایجاب وقت و حاله نظر آ مصالحه یه مجبوریت درکار ایکن سلطان سلیم خان حضر تری روسیه طرفده بروقه جق اولسون قزانوبده بعده غالبانه صورتده عقد مصالحه ایدرک انظار انا مده سلاحی شان ووقاریله الدن براقش اولمق آرزو سیه لیل و نهار بی حضور و بی قرار اولوب حتی رمضان شریفک اون دردنجی کونی تر به حضرت خالدی زیارت ایتدکلر نده بو قطعه بی انشاد بیورمشدر .

* قطعه *

جناب خلدین زید اولمشدر علمدارک * عنایت قیل آنکچون ای حیب حضرت باری سورریوز خلک پاک روضه که شوقیه الهامی * شفاعته مدد قیل یا ابا ایوب انصاری * روسیه لولرک ماچین و ابرائیل طرفنه تجاوز و تعرض و یا با طاغنه *

* هجوم ایتدکلری *

بوجه سابق یوسف پاشا مقام صدارته کلدیکی کبی صیقی صیقی به تدارکات سفریه یه

تثبت ایتدیکی صرہ ده سستره و روسجق و نیکیولی و وودین ایسکله لرنده قرق الی قدر سفینه انشاسنه مباشرت و چونکه بروقتنبر و قاعدۀ دولت اوزره طونه اوزرینه کوپری انشا اولمدیغدن عزیمت و عودتده عسکری طائفه سی زحمتکش و طوب و مهمات نقلنده مأمورینک حال و حرکتی مشوش اوله کلدیکندن سستره پیشکاهنده پیکی حسن افندی نظارتیه کوپری انشاسنه مبادرت اولمش و آز وقت ظرفده جسر مذکورک کافۀ اجزا و ادواتی ختام بولمش ایسده استعمالنه دشمن میدان ویرمیوب هنوز محله وضع اولمندن روسیه عساکری طونهک برو طرفه تخطی ایتشاردر .

شویله که : روسیه عساکری نهر طونه بی عبور و ماچینه هجوم ایتدکه قصبۀ مذکورده ده بولنان وزیر خلیل پاشا قدرتی یتدیکی قدر مقاومت ایدوب نهایتده اعدانک غلبه سی حسیله موقع محاربه بی ترک ایله سمت سلامتہ چیقمشدر اما محافظ بولنان وزیر ارسلان پاشا و سکسونجی باشی اقل قلیل یکیچری نقراتی ایله مقابله و مقاتله ایدوب بالاخره نفرات مرقومهک بر مقدراری شهید اولغله ایکسی دخی بر قاج قطعه طوب و بر مقدار مهمات ایله گرفتار دست اعدا اولوب عودت ایدن بقیۀ عساکر دخی حرصوه به کلهرک دکانلری یغما و میری ذخائرینی اتلاف و افشا ایتدکدن صکره راصوت و سائر محالره متفرق اولمش ایدی .

واحد افندی بعضیلر دن نقل ایدوب دیرکه ارسلان پاشا میدان معرکه دن سالمآ چیقوب عسکرک وراسنی آلمش ایکن اتباعدن بر شخص عاقبت بین مشارالیهک عنان کش عزیمتی اولوب ماچین محافظی اولدیغک حسیله صورت فرارده تخلص نفس ایلدیکیکی دولت تیقن ایلدیکی تقدیرده سنی بهر حال اعدام و سر فلاکتزده کی غلطان سیاستگاه انام ایدر بوصورته قید اسری اختیار فراردن اسلم و محافظۀ نفس جمله دن اقدمدر دیدکده مشارالیهه شخص مزبورک کلامی تأثیر ایدوب سمت سلامتی تحصیل ایتمش ایکن متردد بین الامرین قالوب رؤسای عسکرک بعضیلری (الفرار نمالایطاق من سنن المرسلین) مفهومی مشارالیهه تلقین و بش اون اتباع ایله قرب اعداده بولمسنی تهجین ایتدکلرندن غیری دست اعدایه و زرانک گرفتار اولسی دولت علیه به برنوع نقیصه بی مستلزمدر دیدکارنده ملزم اولمیوب بر قچ نفر اتباعی ایله توقف و آرام ایله کیروندن کلان اعدایه اسیر اولوب سکسونجی باشی دخی اکاتبعا اسارتی اختیار ایلمشدر .

بوندن صکره روسیه لو ابرائیل قلعه سنی محاصره ایچون قاروان نام محلدن اخراج ایلدیکی عسکرینی قلاصده اولان ایجه دوئماسنه الحاق ایله طرف دولت علیه دن ابرائیل قارشوسنده کائن آطهده مجدداً بنا اولان طابیه به هجوم ایدوب محافظه سنه

مأمور اولان عساكر اسلاميه برقاچ ساعت قدر مقابله و مقاتله ايتمشر ايسه قلعہ طرفدن امداد و اعانت اولنه مديغندن اكرتيرسي شربت شهادتي نوش و غم عالمي فراموش ايتمريله روسيه لولر ذكر اولنان طابيه ي استيلا و ابرائيل قلعه سني تضيقه ايتدار و طوب و خبره ايله برقاچ محليريني تحريب و سوزان ايدوب انجق كرك قلعہ و كرك طابيه جنكنده روسيه لولر دخی بر خيل عساكري تلف اولدقدن بشقه اوج بش قايقلري غرق و شكست و بايقلري دخی طوب ايله رخنه دار اولديغندن روسيه جنرالی طريق حيايه سلوك ايله قلعہ اهاليسني تحويف و توهم سياقده بر مکتوب يازوب دروننده ماچينده وقوعبولان كيفيتي تسطير واليوم حرصونه بيله عسكردن خالی اولديغني بيان و بلا محاربه قلعيه دسترس اولورلر ايسه شخص واحده زيان ايتمه چكني افاده و برمدت قطع ايله قطعي جوابي مطالبه ايلمش ایدی .

سردار اكرم ايسه وارنه قلعهنك كيفيت استحكامني معايه قصديله اردوي هايونده بولنان پروسيالايچيسيني بالاستصحاب اشبو ايكينوز بش سنه سي رجبك التنجی كوني شميدن حر كته و ارنيه و ارووب لدی الاقتضا نسا و صيبانه جای امان اولمق ايجون زير زمينده مخزنلر حفر و قلعهنك جبخانه سي مخاطره لو محله بولدديغندن بر محل محفوظده مخزن احدائي كبي بعض امورك تسويه سني امر و توصيه و مهماتك نقصاني اكمل ايتدكدن صكره شمعي به عودتنده برآن اقدم عساكر ك اجتماعه و اسباب سفر يه نك سرعت تدارك و استكمالنه مدار اولمق اوزره شعبانك طقونجي و نيسانك ايكنجي چهارشنبه كوني لوای شريفی استصحاب ايله مشتادن چيقوب شمني صحرا سنه نصب خيام ايلديكي عقينده سالف الذكر ماچين وقعه سني لدی الاستماع ابرائيل قلعهنك محافظه سي ايجون حرصوه طرفه تقويت و استحكام و يرملك لازم كلكين سلستره سر عسكری اولان قره حصارى احمد پاشايي ماچين سر عسكری تعيين و بالاده بيان ايتديكمز و جهله مقدما طونه باشبوغلتي عنوانيله در سعادتدن اردوي هايونه كلوب مؤخرأ عهده سنه رتبه وزارت و يرلمش اولان حمایي زاده احمد پاشانك دخی انشا ايتدير مكدہ اولديغني سقائله ماچين طرفه حر كت ايلمسي ايجون كندوسنه تحريرات ساميه ازال ايدوب سرحداتك تقويت و استحكاميله مشغول ايكن برهنوال سابق روسيه لولر ك ابرائيل قلعه سني محاصره و اهاليسني جواب قطعي مطالبه سيله تضيق ايتمكده اولدقلري خبر و حشت اثری اردوي هايونه اصل اوليجق در حال سردار اكرم دائره سي خليفه بالنفس سلستره و ارووب سر عسكر مشاريله ايله مشاوره عقينده مشار اليهك آچه و لوازمات سائرجه اولان بقايای مستديعاتي بعدالاتمام حرصوه طوغرى سوق و اعزام و ابرائيله دخی سقائله ايله

بر مقدار عساکر و ذخائر ارسال ایلدیکي خلالده باباطاغی جانبندن دخی وافر عسکر
ماچینه طوغری حرکت ایتمش اولدینی روسیه لوره منعکس اولمغله ماچین و ابرائیل
حوالیسنی ترک ایله قلاصه چکلمش اولدقلرندن سردار اکرم دخی اردوی هایونه
عودت ایلمشدر .

انجق ابرائیل محافظه سنه مأمور اولان طوائف عسکر به نك برازی و قتمز روز
حضره قدردر دیو عودت و فراره باشلادقلرندن بشقه رؤسای عساکر بینه
دخی شقاق کیرمش اولدیغندن عساکرک استقرارینه اقوای و سائل اولان امر
اتفاقک استحصالی لازم گلکین سابقا کتخدای صدر عالی اولان حقی بک افندی بو
خصوصه مأمور اوله رق اوائل رمضانده ابرائیله کوندرلمشدر .

بوندن صکره اردوی هایونه مرتب اولان عساکر فوج فوج شمنی سحر اسنه آقوب کله ریک
رمضانک سوکنه دک اکثری وارد اولمغله اردوی هایونک مقابله اعدایه توجه و عزیمتی
زمانی گلش و لوای شریفک شمنیده قلمسی مصمم بولنش ایدوکنندن صدر سابق
شریف حسن پاشا کتخداسی اولان وزیر محمد امین پاشا لوای شریف قائم مقامی
نصب و تعیین اولندقدن صکره سردار اکرم شوالک سکننجی کونی اردوی هایونی
قوزلیجه طرفه سوق و تحریک ایدوب کندوسی دخی اناطولی محاسبه جیسی بولنان
مورخ و اصف افندی ایله تشریفاتی حاجی مصطفی افندی نی بالاستصحاب بعض
خواص اتباعیله سبکبارجه روسجق و یرکوککی و ساستره طرفلرینی کشت و گذار
ولازم کلان تدارکات تحفظیله نك استکماله ایتدار ایتدکن صکره عودت و قوزلیجه ده
اردوی هایونه مواصلت برله تدابیر سفریه به مبادرت ایلمشدر .

روسیه لو ایسه هنوز اردوی هایون طونه سواحانه واصل اولدن عساکر اسلامیه به
تفرقه و دهشت و یرمک قصدیله طولچی به برفرقه عسکر به امرار ایله باباطاغنه هجوم
ایتدکده سواریان اهل اسلام ایکی ساعت قدر جنک ایتدکن صکره دشمنک غلبه سی
حسیبله متریسله طوغری عودت ایدر ایکن پیاده لر آغز اوتی قالدرمق سزین
متریساری ترک ایله فراره یوز طوندقلرنده وزرا و ضابطان هر نقدر فرار لرینه ممانعت
قیدنده اولمشلر ایسه ده فید اولیوب سیل کی قره صو طرفنه آقوب کیتمشلر ایدی .

انوری دیرکه بو خلالده یعنی اردوی هایونک یوله دوزلدیکي ائناده مسقولینک گاه
ماچین و طولچی و گاه باباطاغی اوزر لرینه هجومی عساکر اسلامیه نك شمنی سحر اسندن
حرکت ایلدکلرینی استخباردن صکره واقع اولمشدر . زیرا دشمن بر مدت دخی
هجومنده تاخیر ایلسه یاز اولمق تقریبیله تجربه ایلدیکي اوزره کون بکون عساکر
اسلامیه نك تکثریله قوتلری مزداد و اوزر لرینه کملک مشکل اوله جنی و بوزغون

عسکر کندی اوزلرینه متوجه اولان اردوی هایون عساکری اوزرینه دوکلدیکی صورتده آنلره دخی برکونه دهشت کلهجکی ملاحظه لرینه مبنیدر واعدانک بوفکر ایله حرکت ایده کلدیگری مره بعد اخری تجرب به اولمشدر بوتقدیرجه اوچ بش بیك آدم ایله براز مهماتی بویله وقتلرده بویله لازملو محلمره قویمق کل بونلری اورکوت ومهماتلرین آل دیمک کیدر بناء علیه بودشمنک اوزرینه نه طرفدن عسکر سوق اولنور ایسه ثباتلو عسکر سوق ایتمک وقوتلو بولمق لازمدرکه حین حاجتده کندوسنه مقابله قابل اوله انورینک کلامی تمام اولدی .

نه حل ایسه وقعۀ مذکوره باباطاغنی سرعسکری مورملی سلحدار احمدپاشا طرفدن تحریر اولنسوب کیفیت سردار اکرمک معلومی اولدقده مجلس مشورت عقديه لدی الاستشاره همان بازارجق طرفنه عزیمت اولتمق اوزره قرار ویرلمشیدی برکون صکره روسیه لولر باباطاغنی بعد الاحراق کلدیگری سمته کیتمش اولدقلمری لدی الاستخبار همان قوزلیجه دن بازارجغه وآندن دخی حرصویه حرکت اولندیغی ائناده میرمیراندن یانیه متصرفی تپه دلنلی علی پاشا بش اتی بیك قدر کزیده سواری و پیاده ایله ومتعاقبا جبار زاده سلیمان بك عساکر کایه ایله اردوی هایونه کلهرک موجب قوت اولمشدر .

بوندن صکره تدابیر حربیه مذاکره سی ایچون مختکرای خان بش اون آدمی ایله حرصویه جلب اولنوب برقاچ دفعه مجلس شورایه ادخال اولندقده طولجی وایساجی استحکام بولمقجه ابرائل طرفنه مرورده خطر وتهلکه اولدیغی ایراد ایدوب اکثرناس دخی آنی تصدیق ایتمکله ایساجی وماجین وطولجی وطاش برون طرفلرینه بشقه بشقه باشوغلر تعیین وارسال ایله اول امرده اسباب محافظه لری استحصالنه تشبث اولندیغی ائناده روسیه لولرک ماچینه عبور ایله مترصد هجوم اولدقلمری تحقیق اولنوب سردار اکرم ایسه بوکره مقام صدارته کلدیکنده عساکرک شیرازۀ انظاملری بتون بتون بوزولمش ورؤسا بینه شقاق ونفاق کیرمش اولدیغی مشاهده ایدرک مواجهۀ دشمنده اردوی هایونک ثبات ایده بیله جکنه امنیت ایده مدیکندن ایلرویه حرکت اولنمزدن اقدام عساکرک ثباتی اسبابی استحصاله برچاره بولمق ایچون ذی القعدة نک بشنجی وحزیرانک یکرمی التنجی کونی حرصوه صحراسنده ترتیب ایلدیکی مجلس عمومیده کندی لساندن اولمق اوزره قلمه آلدیرمش اولدیغی سانحه کاغذینی قرائت ایتدیروب عساکرکدن مواجهۀ دشمنده ثبات ایده جکارینه عهد ایسته مشدر سانحه مرقومه نی وقعه نویس واصف افندی قلمه آلمش اولوب برصورتی زیرده تسطیر وایراد اولنور .

* صورت سانحه مرقومه *

دولت عليه نك قديم دشمنی اولان مسقولو مدت میده دنبرو مملکتلر یززه کوز دیکوب سکسان ایکی تاریخلرینه کلتجه گاه غالب و گاه مغلوب اوله رق غرض و مقصدینه واصل اولامش ایدی تاریخ مذکورده واقع اولان سفرلر سوء تدبیر و عدم نظام عسکر ایله نتیجه پذیر مرام اولیوب بالاخره انواع حیل و دسائس ایله حسره الملوک اولان قریم اقلیمنه مستولی اولوب نقصانیت عقلاری نمایان اولان تاتار طائفه سنی پراکنده و پریشان و بعضی سنی مملکتته سوق ایله رعایای سنی حکمنه ادخال ایلدیکی مستغن عن الیاندن قریمدن سنوی اخبار ثقات ایله یدی بیک کیسه ایراد تدارک ایلدیکنه قناعت ایتیموب آق دکز و قره دکز تجارتی تحصیل و دولت علیه رعایاسنه مخصوص اولان فوائدی تقلیل ایله قوت و مکنته مالک اولدی عن اصل مسقو مملکتی حرث و زراعتدن خالی اولوب اراضیسندن حاصل اولان برنوع حبوبات ایله رعایای سنی تمتع و اغنیای سنی له مملکتدن جلب ارزاق ایله بلاضطرار تعیش و کسب توسع ایدرلر ایکن شمعی قریم جری رسندن حاصل اولان حبوبات ایله مستوفی کسب اقوات ایلدکلرندن غیری زیاده سنی دولت علیه رعایاسنه فر وخت ایله کندولری یوما فیوما قوت و نما اکتساب و دولت علیه ده متداول اولان نقودی بوسبيله استجلاب ایدوب من جهة النقد ضعف دولته علت اولدیلهر بو گونه منافع ایله مألوف اولان قوم دقیقه بدقیقه توسیع ملکه راغب و تحصیل فوائد جدیده به طالب اوله جقاری ظاهر درر بوضورتده داخل حرم مملکت و متفکر جلب منفعت دولت اولان دشمنی دفع ایتمه چاره بوله منر ایسه ک حال مشکل و نتیجه امر نه به منجر اوله جغنی ادنی تأمل ایله معلوم اولور بو دفعه ظهور ایدن محار بهلرده متفق اولان نمچه لونک اهانت و خیاتی ایله میدانی خالی بولوب اوزی و اسماعیل ضبط ایتدکده اهالی به ایلدیکی حقارت و اهانت تفصیل اولنسه باعث حزن و الم و موجب درد و غم اوله جغنی بدیهیدر حق سبحانه و تعالی بزی فطرت اصلیه اوزره مؤمن و موحد خلق ایدوب جهاد و غزا سببيله سعادت دارینه نائل ایله جگنی بیلدیروب باخصوص قلیجمز کسکین و آتمز یوکروک ایکن بر آلائی قلیجی کسمز و آتی باشلی باشنه یوریمز خزلهدن قاجوب کز یوروز و شجاعندن بی بهره بر طائفه خاشهدن داتما ترسان اوله رق لعب مقوله سنی اولان ترینندن و هوای فشنک جنسندن اولان آتشدن زهره مز چاک اوله یور ایشته مقدم و مؤخر وقوعبولان محار بهلرده فعله کتوردیکی آتشبازلقدن نه مقوله ضرر مشاهده اولندی وقاج بیک آدم مجروح اولوب رؤسادن کیملر شهادته نائل اولدی مجلسمزده بیاتلر وارددر سویلسونلر

محضا کورولتی و آیق باطردیسیله مصلحتنی کوروب صنایع حیایسه ایله عسکریمزه
 ایرات وهم و خشیت ایتمکدر . مابینمزه اولان تخالف درون و بغض و حسد
 کونا کون یوما فیوما افزون اولوب اوامر و نواهی الهیه دخی کما ینبغی اتباع
 ایتمدیکمز حسینله جناب حق عصیان و طغیانمزه مجازاة اخس قوم نصاری اولان
 مسقو طائفه سنی اوزریمزه تسلیط ایله نصاری دولتلیری الیوم دولتیمزه میت
 متحرک تسمیه ایتمکدری شایع اولوب بیانی ادنالیری بیه بزه دیک کورنمکه
 باشلادی غیرت نه کون ایچونددر . حیت اسلامییه اظهار ایله جنک و قتلر دکلیدر
 بو رذالت و سفالتله حیات مستعاری نیلیم شو مملکتلر نه قائلر دو کلسیله تسخیر اولدی
 بو ولایتلی چرک شرکدن تطهیر ایدنلر بزم کبی بنی آدم ایدیلر بز ایسه مملکت
 اخرادن نظری قطع ایله الیمزده اولان ولایتلی محافظه ایده میورز عسکریمز
 توقف ایله دیدیکمز یرده توقف ایتمز و بر عبد حبشی بیله اولور ایسه سر کرده
 عساکره اطاعت لازم ایکن عدم انقیاد سببی ایله بو فلاکتلره اوغرادق
 حق تعالی یه قسم ایدرم خلوص قلب ایله ایتمدیکمز معاصی یه توبه ایلسک و اتفاق
 و اتحاد مسلکنه سالک اولسق و ثبات و استقرار صورتلرینی التزام ایله
 حین محاربه ده دشمنک بر ایکی ساعت آتشبازلغنه تحمل ایتمک طبیعتیه دشمنک
 شیرازه نظامی منحل اولور حق سبحانه و تعالی کلام قدیمنده جهادی بزه فرض
 ایدوب جنک و قتلری ثبات کوسترلیدیکی حالده البته اعدایه غالب اوله جغمزی تبشیر
 ایلمشدر . عدم ثبات و اتحاد ایله فوز و نصرت نیجه مأمول اولنور عسکریمز اعدایه
 ملاقی اولدقده بر مقداری جنک ایله مشغول و اکثریسی سواد اعظم کبی تپه لرده
 و دره لرده اوزاقدن سیرجی اولوب آز عسکر چوغه طبیعتیوب امداد احتمالی دخی
 مسلوب اولدیغندن جزئی متأخر اولدقلمی کبی چوق عسکریمز فراره یوز طوتوب
 ایلر و سنه سرایت ایله رنک پریشانلق ظهور ایده کلدیکی هزار بار تجربتکنذار اولی
 الابصار اولمشدر حق تعالی بوندن صکره بومصیبت عظامانی بردخی بزه کوسترمیه
 فرار عن الزحف کیره سنی ارا تکاب ایدنلره شرعاً نه لازم کلور علمادن استفتا
 اولنسه حال معلوم اولور الحاله هذه دولت علیه نك خزینة حقیقیه سی حکمنده
 اولان رعایاسنه ضعف کلی طاری اولوب وزیرای عظامده دخی بعض اسباب ایله
 قوت و مکنت قلیوب مملکتلریمز داخلنده اولکی کبی مقتدر اغنیا مفقود اولدیغندن
 ماعدا امور سفره مدار اولان خزینهلره نفاذ کلوب و بر مصاحت نافع کورمدیکمز دن
 شوکتلو اقدیمزدن آچه ایستمکه یوزیمز قالدی و حجاب ایده یورز الله ایچون اتفاق
 و اتحاد ایله شو دشمنه هجوم ایده لم و قلبمزه غل و غش وار ایسه کیدره لم و حق

تعالی طرفدن مأمور اولدیغمز کبی صواش وقتنده ثبات قدم کو ستره لم ان شاء الله
 تعالی دشمنلریمز دن اخذ انتقام ایله غصب اولنان یرلریمزه نائل اوله جغمز دن غیر ی
 دنیا و آخرت سعادتتی والی یوم القیام دللرده خیر ایله یاد اولتمق دولتتی احراز
 ایده جگمزده اشتباه یوقدر ایشته اعدایه قریب کلک اردوده اجتماع ایدن وزرای
 عظام شجاعت وقتوت ایله مشهور و بنام اولوب سائر رؤسای عساکر دخی جلادته
 معروف آدملر اولملر ایله حق تعالادن امیدیمزی عدم قطع ایله مبشر اولدیغمز
 نصرت ربانیه ایله مسرور اولورز قالدیکه جمله به اطمینان قلب کک ایچون برنوع
 قوی معاهده به محتاجز اگر چه سنین سابقه ده کذران ایدن معاهده به حین حاجتده
 وفا اولنمدی لکن بودفعه ان شاء الله ایفای عهد اولنور امیدنده یز شویله که : بودفعه
 دخی عهد مزده ثبات ایتمز ایسه ک شوکتلو پادشاهمزه جواب ویره میز و جمله مزه
 ندامت حاصل اولور زیرا بونک وراسی قالمدی . خان حضرتلری جنابکر آل
 جنکیزک غیرت و دیانت ایله نامدارلرندن و هر حالده دولت علیه نک صداقتکارلرند نسکر
 روز مصافده دائره قدر تکیز محیط اولدینی درجه لرده جانسپارلق و اغانسکارلق
 شیمه سهر عایت بیورر میسکر و ذاتکرده مرکوز اولان جوهر شجاعتی ابراز ایدر میسکر
 اغا پاشا حضرتلری نه بیورر سکر سائر اوجاق اغالری نه دیرسکر بزم ایله
 معاهده ایدر میسکر و جنک وقتنده مردانه طوریشوب اعدایه سینه کر مکه کفیل
 اولور میسکر و اوجاقلو کزدن کرکی کبی قاعده کز اوزره عهد آلدقن صکره
 ایمان مغالظه ایله بزنی ایناندرر میسکر سز دخی وزرانک نامدارلرند نسکر غیرت
 و حیتکر معلوم اولدیغندن سزی استصحاب ایلدک حین حاجتده بزه یار وفادار
 اولور میسکر و معیتکره ویربله جنک عسکری لایقی اوزره اعمال ایدوب مقابله
 اعداده بایدار اولور میسکر و سز لر که روم ایلی و اناطولی مملکتلرندنه شان و شهرت
 صاحبی اغالرسکر سزدن دین و دولته کلی خدمت مأمولدر معیتکرده اولان عسکری
 تحت معاهده به ادخال ایله عسکر یکنزی تحلیف ایدر میسکر ان شاء الله تعالی بو معاهده نک
 مقتضاسنی اجرایه موفق اولورسق اعدایه غالب اوله جغمز بی اشتباهدر . ایشته
 بو معاهده نظام بولدینی کبی اردو نائینه حجت ایتدیروب عظمتلو پادشاهمزه
 کوندره جگم نه دیرسکر بویله جه حجت یازلسونمی بندخی ان شاء الله جمله به لایقی
 اوزره اگر آمده قصور ایتیم دین اوغورینه مال و جان فدا ایدنلری دیرلک و نانیاره
 و منصب و جهات سائر ایله وکالت مطلقه هم حسیده تطیب ایدرم و محاربه ائماننده
 مجروح اولنلری بالنفس نظارت ایله تیمار ایتدیروب طعملرینه ویتاجق یرلرینه
 باقدیروب بخشش و عطیه ویر مکده ان شاء الله تعالی لازمه مروءت و شفقتی اجرا

ایدرم قالدیکه سواری عسکری پیاده عسکری جنک وقتده فدا ایتمک معاهده سی دخی لازم اولوب ایکی فرقه نك رؤسای بر برینی نه وجهله ایناندر مق ممکن ایسه ایناندرسون وبومعاهده تحتہ دخول ایتمانلر کیملر ایسه کیرو قالسون زور وجبر یوقدر کیرو قالدیغی ایچون معاقب ومعاتب اولمز زیرا بومعاهده ارباب شجاعت وغیره مخصوص اولوب نفسنه اعتمادی اولیان ودنیایه الدانوب مقدری بیلیمیان ایچمزدن چیقسون نه دیرسکمز دیدیکم مناسب دکلمی بویله اولدیغی صورته هرکس وارسون زیر حکم واطاعتده اولان عسکری تحت رابطه یه ادخال ایسون وکرکی کبی اعتماد تحصیلندن صکره قبول معاهده خبرینی کتورسون ینه بر مجلس ایدهلم .

* تته *

سانحه مرقومه برمنوال سابق سردار اکرم لسانندن اولمق اوزره ایراد اولنه رق مجلسه ختام ویرلدکنصکره ارباب شوری متفرق اولوب رؤسای عساکر نفرلرینی جمع واحضار وسانحه نك مفهومنی افاده واطهار ایله رابطه تعهده ادخال اولندقلرینی برر برر کلوب طرف صدر اعظمی یه افاده و اخبار ایلدکلر نده فی الجمله اطمینان قلب حاصل اوله رق ماچینه حرکته جسارت کشیدی .

* اردوی هایونک حرصوه دن ماچین طرفنه عزیمتی ودرعقب *

* انہزام صورتیله عودتی *

برمنوال سابق هرکس تحت اداره سنده بولنان عسکره نظام ویرمک ایله مشغول اولدیغی ائناده روسیه لولر دخی ماچین طرفنه کچمک فکر بنده اولدقلری جهته بوکره سرعسکر نصب اولنان روم ایلی والیسی مصطفی پاشا مأمور معیتی اولان سواری وپیاده ایله ماچین طرفنه تعیین وارسال اولنمش و سردار اکرمک اقامت ایلدیکی حرصوه صحرا سیله ماچینک بعدتی سکمز اون ساعت قدر اوله رق قریباً اردوی هایون ایله ماچین طرفنه حرکت اوزره اولدیغندن مصطفی پاشا ماچینه ورود ایله اردوی هایونک وصولنه دک طیانیه بیله جک قدر استحکام داعیه سنده بولنمش ایدی . ذی القعدة نك التسبی کونی اغا پاشا وسائر اوجاقلو ووزرا علی الترتیب حرصوه دن ماچینه اعزام اولندقدنصکره اردوی هایون حرصوه ده قالمش صورتی کوسترمک ایچون دفتر دار افندی ودفتر امینی وسائر کتبه اقلام حرصوه ده ایقا اولنوب سردار اکرم دخی سائر رجال دولت وروم ایلی وانا طولی اغالری ایله متعاقباً دایه قریه سنه نزول ایلدیکی ائناده سرعسکر مشار ایله مصطفی پاشانک مکتوبی کلوب مضموننده برمقدار روسیه سواریسی قزطاشنه کچمکله برو طرفدن سواری عسکری واروب

مقابله ایدرک دشمنی کیرولدوب انجق ساحلده کی سازلقده پیاده عسکری مختق اولوق ملاحظه سیله احتیاطاً ارقه سنه دوشمدکاری وساحله چیقان اعدانک بعده ینه آطیه چیققلرینی افاده وانها فقط تکرار عودت ایتملی ملحوظ اولمقدن ناشی امداد اولمسنی استدعا ایتمدیکنه مبنی در حال اغا پاشا و تپه دنلی علی پاشا و جبار زاده سلیمان بک و قره عثمان اوغلی حاجی محمد انانک بر ساعت اقدم ماچینه یتملمری اراده اولندیغی آوانده تکرار ماچیندن خبرلر توار دایدوب روسیه لو قارشوده کی عسکرینی ایلاً ماچینه یقه سنه کچورمش ایدوکی و ذی القعدنه ک یدنچی جمعه ایرتسی کونی ماچینه هجوم صدندنه اولدیغی استخبار اولندقده ایلروده بولنان سالف الذکر رؤسایه سرعت حرکتلری ایچون تکرار خبر کوندرملکله یوم مذکورده وزرا و تپه دنلی و بیکچیری او جانچی بریرینی ولی و تعقیب ایدرک علی السحر ماچینه اصل اولمشلر و بیکچیریلرک مقدمجه وصول بولانلری متریس حفرینه شروع ایتمشلر ایدی لکن روسیه لولر بر کون اقدم ایلاً طونه نی برو جانبه کچوب و طول و عرضی بر بچق ساعت مسافه نی شامل و نهر طونه یه متصل دروننده آتلو ستر اولنه بیلور بر سازلقه کیزلنوب جمعه کونی سحر یجه اول سازلقک درونندن ظهور ایلدکده اورادن لشکر اسلامک متریس لرینه کنججه آرقده واقع یارم ساعت مسافه سی اولان صحرا ده عساکر اسلامیه اعدایی قارلشوب بر مقدار جنک ایلدکن صکره اعدا فرار و سازلق ایچنده استتار ایلمشلر ایدی . حال بوکه : نهر طونه نک طغیانده صو باصم شددر دیو هنوز عساکر اسلامیه طرفندن اول سازلق کشف اولنماش ایدوکنه مبنی اعدانک قلاصدن برو جانبه تمام عسکریه کچوب کچمدیکنی بیلمزلر ایدی و برمنوال محرر بر کون مقدم اول سازلق ایچنده ظهور ایتمش اولملریه ینه اورادن کلورلر دیو متریس لرک طوپلری و عساکر اسلامیه نک اکثری اول جهت توجیه و ترتیب اولمشیدی روسیه لونک بر کون اقدم اورادن ظهوری ایسه عساکر اسلامیه نی اغفال ایچون ایدوکندن فرداسی جمعه ایرتسی کونی ساعت سکزده ایکن عسکرینی قول قول ایدوب عساکر اسلامیه اوزرینه هجومه ابتدار ایتمشدر . شویله که : ذکر اولنان سازلق طرفندن جزئی عساکر یوریدوب عساکر اسلامیه دخی آنلره مقابله ایله تمام اخذ انتقام قیدنده ایکن روسیه عساکرینک اکثریسی ماچینه اردوسی و متریس لری اوزرینه ناظر اولان صرت اوزرندن یوری یهرک متریس لر جانبه طوغری طوب و خیمه ایله آتش فشان اولدقلرندن اول صرت اوزرنده ابتدا تپه دنلی علی پاشا و بعده جبار زاده سوارسی یتمشوب یول یورغو نغیله بر کره دشمن اوزرینه هجوم ایتمشلر ایسه ده سکز ساعت مسافه دن ایلغار ایله کمش اولدقلرینه

مبنی بی تاب و توان بولندقلری حالده روسیه لولر عادت قدیمه لری اوزره سواری
 عسکرینک اوزرینه طوب و خمیره یاغیرمغه باشلایحق ارناود عسکر یله جبار زاده
 سوارینک اکثری پریشان اولمغه روسیه لولر فرصت بولوب متریس لره هجوم
 ایتدکلر نده یکچیری طائفه سی براز متانت کوستروب تپه دانی علی پاشا دخی یاننده
 بقیه قالان بشیوز قدر عسکر یله بر ساعت قدر جنک ایدوب بر قاچ دفعه دشمن
 طابور لرینه هجوم ایتدیکی خلالده جبار زاده و قره عثمان اوغلی دخی بقیه عسکر لر یله
 بر ایکی دفعه دشمن صف لرینه هجوم صد دنده بولمشلر ایسه ده دشمنک آتشی هجوم لرینه
 مانع اوله رق عودتی اختیار و محل معرکه یه بر ساعت مسافه سی اولان بر تپه ده
 انبام کاره انتظار ایتدکلری ائنده وزرا و رؤسا سیف و سنان ایله عسکرک اوکنه کچوب
 اعاده لرینه چالشمشلر ایسه ده مفید اولیوب بالآخره ماچینده کی اردوی بیغما و کبرویه
 عودت و فرار ایتلمی متریس لره اولان پیاده عسکرینه دخی موجب وهم و وحشت
 اوله رق آتله دخی متریس لری ترکله فرار ایتمشلر در .

واصف افندی بعض ارباب و قوفدن روایت ایدوب دیرکه : کثرت و جمعیت ایله ماچینده
 بلکه بر مصلحت کورلمک ممکن ایدی لکن اعدا و قتیله طاورانوب ماچین اردوسیه
 صدر اعظم اردوسنی بر بره کتور مکمزین اجرای مرام ایلدی بعضیلری بونی رد
 ایدوب دیرلرکه اردوی هایونک مجموع قوتی ماچین اردوسنه و یریلوب مقاومت
 قادر ندر عسکر و ارایسه اول طرفه تعیین اولمش ایدوکنه نظراً دشمنک بر قاچ قاتی
 ایدیلر بوصور تده یولیه محاربه یه تصدی ایتسه لر ایدی اعدایه غالب اوله جقلری
 درکار ایدی و سردار اکرمک معینده قالان جزئی عسکرک بر لشوب برلشمه سی
 سیان ایدی فقط بیغمانی عادت ایدن ارناود عسکر یله ترکان فشاریلری انهمز امه باعث
 اولدیلر و اصفک کلامی بوراده ختام بولدی .

انورینک تحقیقنه کوره بوباده اصل قصور سر عسکر بولان روم ایلی والیسینکدر
 زیرا بوریشانلغه اصل باعث و بادی دشمنک نه و قتده ونه طرفدن هجوم ایده جکنه
 کسب اطلاع اولنم مسیدرکه دشمن بر کون مقدم طونه بی کچوب بر منوال سابق
 سازلق دروننده اختفا و صاحبین اورادن ظهور ایله جزئی محاربه دنفکره چکلمسی
 بردسیسه حریبه اولدینی خاطره کتورلیه رک اردونک قوه کلیه سی او طرفه
 چوریلوب بر و طرفه ضعیف بر اعلمشیدی روسیه لو ایسه فردامی عسا کر اسلامیه بی
 اغفال و اشغال ایچون اوسازلقدن جزئی عسکر ارانه سیله قوه کلیه سی مذکور صرت
 اوزرندن متریس لره طوغری یوروتدکده ابتدا تپه دانی علی پاشا و بعده جبار زاده
 سوارسی یتیشوب دشمنه دلیرانه هجوملر ایتمشلر ایسه ده یورغون آرغین اولملر یله

بوزلمشدر در دشمنك بويله بر دسيسه ظاهره سنه آلدانامسي دخي عمر نده جنك كور ميوب احوال جنكدن بتون بتون غافل اولان بر آدمك عهده سنه اوچ توغ ايله حسره الووزرا اولان روم ايلى اياالى احسان اولنه رق بويله خطوب جسيمه سر عسكريده استخدام اولمسنندن نشات ايلمشدر مع هذا بو محاربه آلتى ساعت قدر نمتد اوله رق طرف اعداده دخي كل تلفات وقوعه كمشدر بويله احوال جنكدن بي بهره بر سر عسكرك زير ادرار سنده بولندقلرى حالده عساكر اسلاميه نك بو قدر بهادر لقلرى دخي شايدان تحسیندر .

الحاصل قصور سر کرده بولسان ذاتك اهليت سزلكي اولديني بي اشتباه اولوب حتى روسيه لو عسكرينك نصفى ماچين طرفنده كي آطيه امرار اينديكيكندن كوپر يسي قيريلوب شايدكه ماچين طرفندن قضيه به وقوف برله شبخون اولنور ديو پك زياده تلاش ايدرك اطراف و اكنافدن عمله احضار ايله كوپر يني اتمام ايتمش اولدقلرى ني اولوقت روسيه اردوسنده بولنان اسراى اسلاميه صكره دن روايت ايتمشدر در بويله بر فرصت عظيمه ميسر اولمشكين غريق غفات اولان سر عسكرك پاشا واقف حال اوله ميديغندن بويله بر زمان فرصت فوت اولمشدر حالوكه اعدانك طرف طرف بر و جانبيره سر روى سر عسكرك مشار اليه طرفندن پيدر يني اردوى هايونه تحرير و اشارت اولنور ايكن كوپر ينك قيرلديغنه واقف اولماق مواقع لازمه به قره غولار تعيين و جاسوسلار ارسال اولنماقندن نشئت ايتمكله بو خصوصه قصورى محل نزاع دكلدر ديو و اصف تاريخنده مصر حدر .

قالديكه و اصفك روايت ايتديكي اوزره يكيچرى اغاسى متريسلره واروب يكيچر يلىر ي جنكه تشويق ايلمك و قوت قلب اوله جق سوزلر سويلمك لازمه دن ايكن متريسلره بر قاچ فرسخ بعدى اولان بر تپه نك اوزرينه چيقوب مستصحي اولان ايكي اوچ قطعه چرخه طوپلر يله باليمز يتشميه جك ير لره طوغرى آتديغي كله لرك بر فائده سي اولديغندن بشقه طوپلرك بر ايكيسنى بولنديني محله ترك ايله عودت ايلدى كندلك وزرادن برايكي ذات عسكرى جنكه تشويق و ترغيب ايدده جكلرينه آتش حربك اشتعالى وقتنده شرب دخان و ترويح نفس و جان قيدينه دوشوب احجاب حيتسندن بعضيلرى بونلره تصادف برله بويله جنك وقتنده معر كدن چكيلوبنده بويله قيد سزلق صورتى كوسترمك ناروا اولديغندن فضله ميدان جنكده اولان صنوفى عسكريه حالكنزه مطلع اولور ايسه شوق و غيرتلى زائل و پاي ثباتلى متزلزل اولور ديدكده كيمك ميان افبخارى خنجر مجوهر ايله تزيين و كيمك دوش اعتبارى فروه سمور ايله نوازنده دست تحسین قلندي ايسه دشمن ايله جنك ايلسون ديو غرضكارلق اظهار ايتكلرى نهدن مقولدر .

واصفك بوفاده سنه نظرأ اغا پاشانك جباتى وايڤاى لازمه ماموريتده قصور وقباحتى معلوم و ذكرا اولنان و زرانك غرضكارلق حسبيله لازمه ديانت و فريضه مأموريتلرني ايڤاده واقع اولان قیدسزلقلرى پك بيوك حيتسزلك و صحيجا انسانيتسزلك اولديني امر مجزوم اولوب انجق دكرسز و امور حريه ده معلوماتسز بردانك معيته بونجه وزرا ورؤسايي تعين ايله بويله بريوك ايشده استخدام ايتك دها بيوك قباحت و (ان الله يا مكرم ان تؤدوا الامانات الى اهلها) امر جليلته منافي برحرکت اولديني جاي منازعه دكلدر .

الحاصل في الاصل عسكرده رابطه و نظام مفقود اولديني حالده مصلحته اهل و اربابي آرانميوبده شخص التزام اولتمقدن ناشي واقع اولان سوء تدبير بلاسي اولمق اوزره ماچينه اجتماع ايدن عساكر اسلاميه دفعه منهزم و پريشان اولمشلدر . بزكلهلم سردار اكرم اردوسنك حالته .

في الاصل حرصه دن دايه قريه سنه و آندن بوغاز كوينه و آندن اوچنجي كوني ماچينه وارلمق مصمم ايكن اعدا دها اول طورانوب ماچين اردوسنه قصدي تحمقق ايلديكنه مبنى جنكه يتشيلمك اميله دايه كويندن ايلروده اولان قوناغى طى ايتك و ماچينه قريه بر محله اردو يري اختيار اولتمق اوزره يوم مذكوره سحر يجه قريه مرقومه دن حرکت اولنوب بر ساعت مروردن صكره طوب صداسي استماع ايله محاربه وقوعى استدلال اولندقده سردار اكرم آتى اوزنكيليوب براز ايلرويه كيدر كيمز ناكاه سپلار كبي بوزغون عسكرك آقوب كلديكنى كوريجك اولكرينه واروب اعاده و توقيفلرينه بذل جهد ايلمش ايشده مفيد اولمقدن بشقه فراريلرك شامتي كندو معتلرنده اولان عساكره سرايت ايتكله آنلر دخي راست كلدكلرى اموال و اشياي يغما ايدرك طرفه العينده پريشان اولمشلدر . شوييله كه : هنوز محل محاربه به وارممش طوپلرك قوشوملريني قطع ايله باركيرلرينه سوار اولوب و جبخانه عربهلرندن طاشي به بيلدكلرى قدر قورشون و باروت اخراج و غضب و باقيسنى احراق ايتدكلرينه قناعت ايتيوب ادخار اولنان يكرمى كونلك ذخاى اتلاف و فقيرى غنيسنى و قويسى ضعيفنى قتل و اعدام ايدرك بر فرقه سى قره صويه و بر فرقه سى حرصويه طوغرى عودت و فرار ايلمشلدر الحاصل برسندنبرو ادخار اولنان ذخاى و مهماتى يك لحظه ده افنا ايتمليله فرط جسارت ايله ايتدكلرى خسارت دشمندن كورلماشدر بو حالده سردار اكرم بريوكسك تهنك اوستنه چيقوب اجتماع ناس ايچون طبلزن دعوت اولدقده رجال دولتدن انجق اوچ بش كشي يانته كلوب باقيلرى كناره كير سلامت اولمش ايدى هر نه حال ايسه ايلروده قورقش و اوركش اولان وزرا

ورؤسایه تسلیت ویرلمك لازمەدن اولمغله بو خدمتک اداسنی سردار اكرم اتباعندن برینه امر وسپارش ایتدکده زوال وار تفاع نفوذ حسبيله شخص مرقوم اجرا سندن روگردان اولدیغنی کور یجک کمال انفعال ایله بالنفس عزیمت ایچون ایلرویه آت سورمک ایستدیکنی یاننده بولنان رجال دولت کوروب حفظ ناموس داعیه سیله در حال سدراه اولدقلری حالده کتخدای صدر عالی مصطفی رشید افندی غیرته کله رک توقمیز صدور امر شریفکزه انتظار ایچون اولوب ایشته بو عبدعاجز یکنز او خدمتی ادا ایله امر یکنزی انفاذ ایدرم دیو ایلرویه ایلغار ایدوب چاوش باشی کنج عثمان اغا دخی اکاپرو اولوب ماچینه بر ساعت قالنجه دک عزیمت ووزرا ورؤسایه وصایای سردار اکریمی افاده ایله اعطای تسلیت ایدرک اطراف واکنافه قره غوللار تعیین ایله بربری آرقه سی صره عودت ایتملدر .

بعض ناس سردار اكرم بولندیغنی محله متریس حفرینی تدبیر ایدوب حالبوکه بوکا لازم اولان آلات وادوات مهیا اولدیغندن بشقه بالفرض حفر اولمش اولسه محافظه ایدرک پیاده عسکری یوق حکمنده اولسیله بومقوله تدابیر غیر موجهه نک ایراد وردیه تضييع اوقات اولمقدن ایسه متفرق اولان عسکرک هیچ اولمز ایسه برمقداری شایدکه حرصوه ده توقیف اولتور دیو حرصوه محافظه مکتوب تحریر وفراریان وبغما کرانک طریققری سد و بند اولتمق واطاعت ایتمانلرینک جزالری ترتیب قلمق اوزره دربندلرده بولنان محافظله او امر علیه اصدار وتسیر اولندقدن صکره سردار اكرم پیاده لرک و یاره لیلرک آرقه لرینی آلوب کیروده قالان طویلری ودو کیلوب قالان مهمات بقایاسنی و عربه لری حرصوه به نقل ایچون بعض کیمسه لره وافر نقد اعطا ایدرک کندوسی حرصوه عودت ویکیدن تحصیل اقتدار واستعداد ایله تکرار ماچینه حرکت اسبابنه مباشرت ایدوب روسیه لو دخی یوم محاربه نک اوچنجی کونی ماچین طرفنی ترک ایله قلاص طرفه عبور ایلمشدر .

بعض ناس دشمنک بلا سبب قارشویه کچدیکنی اشبو محاربه ده عسکرینه طاری اولان ضرر و خسار کلی به حمل ایتدیله بعضیلری دخی اعدا بیوک اردونک حالنه مطلع اولیوب شاید جنک یوزینی کور مامش بر نوع دنج عسکر ایله وزیر اعظم کلور و بوضور تده زده لشمش عسکر ایله مقاومت مشکل اولور فکر ایله قارشویه کذار ایلدی دیدیلر دیو بعض توار یخده محرر در انجق بوندن اقدام اشعار اولندیغنی وجهله بو او انده فرانسه نک اختلافی و روسیه نک اوروپا پولتیقه سنه نظراً بولندیغنی موقع وحلی اقتضاسنجه طونه نک بر و طرفنده استقرار ایله دول اوروپایه موجب فکر وتلاش اولمق دخی ایشه الور میوب غرضی غالبانه مصالحه دن عبارت اولسیله بوضور ته دولت علیه یی

اجبار ایچون طرف دولت علیه دن طونه سواحلنه عسکر سوق اولدنجقه تشیت و اعاده لرینه سرعتله اکتفا ایدر ایدی ظن ایدرم یوخسه طونه ک برو یقه سنده استقرارینه بویله بوزغون عسکرک مانع اوله میه جنی و بلکه شمنی به قدر کلسه اوکنده بر حائل بویله جنی امر آشکار ایدی زیرا عسکرک ضابطه سر لغندن و مهماتک نقصانندن فضله رؤسا بیننه پک زیاده شقاق و نفاق کیرمکله اردوی هایون عملدن معطل کبی قلمشیدی .

از جمله قره حصارلی احمد پاشانک بر منوال سابق وزارتی رفع اولدقدده باشنه بر طاقم حشراتی جمع ایله صورت عصیانده بولنمشیکن روسجقلی حسن پاشانک ایام ادبارینه تصادف ایتمکین و اصف تاریخده مصرح اولدینی اوزره قره حصارلینک معروضاتی رسیدء حیز قبول اوله رق سلستره محافظه سیله وزارتی ابقا اولنمشیدی انجق باشنده خدم و حواشیسسی کثیر اولق حسیله سلستره اها لیسندن پک چونگک اموالی اخذ و غضب ایندکدن بشقه نم کبی بر فرسران میدان شجاعت لایق میدرکه طول قاریلر کبی امر محافظه ده اضاغه اوقات ایلسون یوللو اردوی هایونه خبرلر ارسال ایده کدیکندن آغزینی قیامق وایلروده بر امر مهمده استخدام اولنق اوزره اقدار اولنق نیتله عهده سنه سیواس ایالتی احسان بیورلشیدی وقتاکه ارسالن پاشا و خلیل پاشا ماچین طرفده بوزلدیلر ایسه قره حصارلی عهده سنه ماچین سر عسکرلکی توجیه اولدینی کبی دعوی سابقه سنی فراموش ایدرک اظهار جنین و رخاوت و دولت علیه نک حد اقتداردن خارج تکالیفه مبادرت ایدوب نه حال ایسه بعض مقدمات مرغوبه ایله تشجیع و مطلوبی اولان نقود و مهمات لازمه اردودن جلب اوله رق فضای سلستره یه اخراج و بعده حرصوه جانبنه ارسال اولدقدن صکره ماچین طرفه عزیمتی اراده اولدقدده یه عزیمتدن ابا و بیانغی عصیان صورتی انبا ایدرک مدت مدیده حرصوه ده مکث ایله معینده کی عساکر متفرق اولدیفندن و دائره سی خانی دخی فرط خسته متحمل اوله میوب تفرقه باشلا دقلرندن یوسف پاشا غضبه کله رک عزل و تأدیبی تذکر ایلدیکی ائنده کندوسی دخی ناچار معینده کی جمع قبیل ایله ماچینه واروب مال حالی تفکر ایدر ایکن افا حسن پاشا ماچین سر عسکری اولوب قره حصارلینک حقندن کانمسی ایچون کندوسنه نهانی فرمان ارسال اولنمشیدی حسن پاشا وارنجه قره حصارلی دخی باشنه کله جکنی سوء حرکتندن استدلال ایله همان مأمور محافظه سی اولدینی مقالیه یه عزیمت ایدوب اردوی هایون حرصوه یه واردقدده دخی سیئات سابقه سندن انغاض عین اوله رق حرصوه محافظی نصب اولنوب بوکره اردوی هایونک انهزام صورتیله ماچیندن

عودتی وقوعه شہادت مللو اوضاعی و معاذ اللہ کندی مصاحبتی ترویج ایچون انکسار اسلامی مدار انبساط و نشاط ایلدیکی مسموع ارکان دولت اولوب انجق ترتیب جزاسی وقت آخره تعایق اولتمش ایدوکی وادف تاریخنده محرردر . رؤسای عسکر بینده شقاق و نفاق بوراده لره واردینی صورتده مظفریت حصولی مأمولدن بعید بر کیفیتدر .

صدراعظم یوسف پاشا مقدا حرصوده دن حرکت ایده جکی هنکامده عسکرک مزاجنده فساد و رؤساده بووجهه شقاق و عناد اولدیغنی ادراک ایله پریشانلق وقوعنی صورت تشامده یاد و ایراد ایدوب حتی حین مقابلهده شایدکه عساکر اسلامییه تفرق و انہزام عارض اولهرق نتیجه سنده مواد مصالحه کسب صعوبت ایدر دیو صلحی جنکه ترجیح و مسقو جزالی ایله مخبردییه مباشرت ایده جکنی کتخدا بکه افاده و تصریح ایتمشیدی انجق دولت علیهنک بونجه خزائن اتلافیه جمع ایتمش اولدینی عساکری هنوز اعدا ایله روبرو کلوبده غالب و مغلوب معلوم اولدن مصالحیه میل و رغبت ایتک اظهار جیانت و رخاوت دیمک اوله جنی ظاهر و بو صورت مزاج هایونه مغایر در دیو کتخدا بکک واقع اولان افاده سنی بعض خیر خواهان دولت دخنی تصدیق ایتمکله بو صورتہ تشبث اولنه مامشیدی بر منوال مشروح ماچین پریشانلقی وقوعنده سردارا کرم کتخدا بکه و آنکله بو بایده بالاتحاد مخبردینی منع ایدنلر ستم و عتاب ایدوب ایسته بو کیفیتک وقوعنه سبب سز اولدیکز بنم رأیمه موافقت ایده ایدیکز بو حادنه وقوعه بولیوب شان دولت یرنده ایکن بلکه مزاج عصره موافق بر مصلحتہ ظفر یاب اولمق ممکن اولور ایدی دیهرک اظهار اسف ایلمشدر .

بعده مجلس مشورت عقد اولنوب وزرا و او جقلو و رجال و سائر رؤسای عسکر طرفلرندن ترتیب اولنسان محضر عمومییه حادنه مرقومه درج اولنلر ق رجال دولتدن یرله در سعادتہ بالارسال افاده حال اولتمق قرار کیر اولمغله چاوشباشی اغانک عزیمتی صدراعظم استحسان ایتمش ایسهده اغای مومی الیه بعض موانع اظهار یله خدمت مذکورہ دن استنکاف ایتدیکندن صدراعظم منفعل اولوب در حال ایچ چوقدارینی محضرله در سعادتہ ارسال وبعده تلافی مافات قیدینه دوشوب تکرار ماچین طرفه عزیمت ایتک اوزره تدارک کورمکه ایتدار ایلمشدر . بوخلالده اناپهنک استیلاسی خبری دخنی وارد اولهرق اهل اسلامک کدزی قات قات اولمغله حادنه مرقومه نک تفصیلی دخنی بوجه آتی ایراد اولنور .

* بطل پاشا حادنه سیله اناپهنک کیفیت استیلاسی *

ادیب افدینک تحریری اوزره قینارجه عهدنامه سنده قبار طایلر روسیه دولته ترک

اولنگاه روسیه لولر اول حوالیده قلعه لر انشاسنه مباشرت ایدیجک قبارطای خاقی اول امرده منعه چالیشه رق جنک وجداله تصدی ایتدکلر نده روسیه لولر آنلره آدملر کوندروب دولت علیه نک کندولرینه امداد ایدمه جگنی بعض وعد ووعیدلر علاوه سیله بیان ایدرک بعض مقاوله لره ربط ایله اهالیء مرقومه بی اقیاع ایتد کدنصره کر جستانه یول آچق خصوصه دخی خواه و ناخواه ارضا ایدرک برقاچ سنه ظرفده کر جستانه قبارطای ایچندن یول آچوب و محل بمحل قلعه لر یایوب کر جستان خانلریله اتفاهه رابطه ویردی بومناسبتله کر جستانه کوندرمک اوزره اون بیکه قریب عسکر ترتیب ایدوب انجق او ائنده ترجمه حالی جلد نالنده مسطور اولان شیخ منصور ظهور ایتمکله عسا کر مرقومه بی روسیه لو آنک اوزرینه سوق ایتدیکنده منهزم اولدقلرندن قبائل خلقنه شوق و خواهش کله رک شیخک باشنه اجتماع برله قزلر قاعه سی طرفه طوغری هجوم ایدرک روسیه لویه خیلی رخنه لر ویردی لر روسیه لو طریق حیلله یه سلوک ایله بزلر پادشاه اسلام ایله مصالحه اوزره ایکن سزک محاربه کز شرع کزده موافق دکلر دیدیکنی قبائل علماسی دخی تصدیق ایتمش اولدقلرینه منی قبائل خاقی عزیزتملرینه فتور ووروب چکلدی لر لکن داغستان لولر دن عمه خان واقوشه قاضی فارغ اولمیوب یکر می بش بیک عسکر ایله تفلیس اوزرینه یوریه رک تفلیسه تابع کمشخانه قلعه سی و آچیق باشدن داخان نام قاعه بی تسخیر ایله خیلی غنائم و اسیر اولدقلر نده چلدر والیسی سلیمان پاشا صلحه منافیدر دیو منع ایتمکله آنلر دخی چکیلوب کیتدی لر روسیه لولر بو خصوصات و خساراتی در میان و دولت علیه دخی بونلرک سببی خلاف معاهده اوله رق آنلر کر جستانه یول آچلرندن عبارت ایدوکنی بیان ایدوب طرفین بوکشا کشته ایکن صدر اعظم ایله بعض ارکان سلطنت داغستان و قبارطای خلقنک حسین اقتضاده ایشه یرایه جقلرین ملاحظه ایدوب داغستان و قبارطای و سائر چرکس قبائله عطایا و هدایا ترتیب اولنهرق متحیز آدملر و کوتایسی محمد بک نام غیر تکش برکمنه ایله ارسال اولندیغندن قبائل خلقی جوش و خروشه کلدیکنی روسیه طویوب فارغ اولک سزه دولتک الی ایرشمز متضرر اولورسکنز قالدیکه عثمانلو عسکری نهر قوبانی کچوبده قبارطایه ایاق باصار لر ایسه معذورسکنز لکن ممکن دکلر دیمش ایسه ده آنلر اصفا ایتیه رک یته غیرت اسلامیه بی الدن براقیوب اگر دولت علیه بش اون بیک عسکر ایله بروزرینی بو طرفه کوندریر ایسه جان و باشمزله طور میشردر دیو عهد و پیمان ایله هر قبیله دن ایکشر آدم و بومضمونده محضر لر ایله محمد بکی در دولتله ارسال ایدیلر مرقوملر در علیه یه کلکلر نده روسیه ایلاجیسنک بالقخانه یه قالدیرلدینی وقت

ایدی مضمون محضر معلوم اولیجق طریزون والیسی بولسان کوسه مصطفی پاشا بیک نفر ایله اناپایه مامور اولغله محضر جیلر عودتلرنده مشارالیهی برقاچ یوز آدمله اناپده بولدیلرکه (۱۲۰۲) سنه سی محرمی ایدی او ائنادده اون بش بیک قدر روسیه عساکری قوبانی مرور و بسنی نام چرکس قبیله سیله جنکه ابتدار برله گاه غالب وکاه مغلوب اوله رق قرق کون قدر یالکز برقیله ایله اوغراشدیلر آنلر دخی اناپدن طوب و عسکر رجا ایجک انابه خلقی مشورت ایدوب قوتلری اولماق حسیله امداد ممکن اولدیغندن محمد بکی ایچارینه کوندریکارنده اودخی یدنده کی استمالت امرلری ارئه ایله طرف دولت علیه دن کلی تدارکله امدادیمز کاور دیو تسلیتیر ویرمکه امداده مترقب اولدیلر او اوانده روسیه ایچندن جاسوسلری کلوب روسیه فلد مارشالی پوتنیکنک اوزی قلعه سی اوزرینه و تکلی جنرالک انابه اوزرینه نامزد اولدقلری و مرقوم تکلی جنرال ابتدا قبار طای غائله سی حرباً و سلماً بر طرف ایته دکن صکره انابه اوزرینه کله جکی استخبار اولنوب قبائل خلقی اناپده کلی تدارک اولدیغنی دخی بیلدکلرندن جاسوسلرک تقریریه استمدادی حاوی محضر لر ایله محمد بکی در سعادت کوندر دیلر محمد بک بو طرفه کلدکده سردار اکرم یوسف پاشا اردوی هایون ایله صوفیه ده بولمغله در سعادتین صوفیه کوندریلوب کیفیت معلوم سردار اولیجق اول حینده اناطولی صول قول سوریحیسی اولوب جانیکده بولسان بطل حسین پاشایه مقدا امر عالی کوندریله رک تعهد ایته دیکی عساکردن اون بیک نفری اوزی قلعه سنه و اون بیک نفری اردوی هایونه تسیار و اون بیک نفر ایله کندوسی سریعاً اناپیه کذار ایتمک اوزره امر و تأکید اولمیش اولغله بودغه دخی تکرار او امر عالیه و قبار طای خلقنه و قبائل ساثره یه افاده حال ایله استمالتاملر یازیلوب محمد بک ایله ارسال اولدی محمد بک جانیکه واروب بطل پاشا ایله ملاقات ایته کده بطل پاشا منفعل اوله رق محمد بکه عنفله معامله و انابه یه کتمکدن ابا صورتی ارئه ایدوب بعض بهانه لر ایله دور و دراز مکث ایته ر دکن صکره محمد بک ناچار انابه یه یالکز جه واروب پاشا کلی عسکر ایله کله جکدر دیو خلقه و کوسه مصطفی پاشایه تسلیمت ویردیکی ائنادده روسیه لوینه قبائل اوزرینه مسلط اولغله اناپدن طوب و جبهه خانه و عسکر رجاسیله آدملر کلوب انابه لونک دخی امداد ویرمکه طاقلری اولدیغندن ینه محمد بکی قبائل ایچنه کوندروب بطل پاشانک قریباً کله جکئی افاده ایله باعث قوت قلب اوله جق خبر لر تجریر ایلدیلر بونک اوزرینه قبائل غیرته کله رک اون بش بیک قدر کزیده عسکر چیقاروب او یون نام محلده روسیه لو اوزرینه واردیلر سکز ساعت قدر محاربه تمت اوله رق کلی مسقوتلف

وقبائلدن دخی نیجه نامدارلری شهید اولوب انجق طوپلری اولمدیغندن ناچار آیرلدیلر روسیهلو قاعه نك خالی ایدوکنی بیایدیکندن اناپهیه توجه ایتمکله قبائل وراسندن آیرلمیوب محاصره یه شروع ایتدکده ایچرودن وطشره دن مدافعه یه غیرت اولانه رق روسیهلو منهزماً عودت ایلایدیکندن صکره ینه حیله یه باشلایوب قبارطای خلقی ایله مصالحه داعیه سنه دوشدکده اگرچه راضی اولمیدیلر ایسه ده مشورت ایدوب اگر اعدا ینه تدارکات قویه ایله کلور ایسه حال مشکل اولور ملاحظه سنه مبنی بطال پاشانك کیله جکندن بخله ترتیب ایتدککری مفصل محضر لری محمد بک ایله ینه در سعادته کوندر دیلر محمد بک آستانه یه کلدکده جلوس هایونندن ایکی ماه مرور ایتمش ایدی .

سالف الذکر محمد بک در سعادته کلدکده (۲۰۳) سنه سی رمضانك اوچی تاریخیه مورخ اوله رق قاعه آلتمش اولان تقریرینك برصورتی بومقامده درج و ایراد ایله ایضاح مواد قانور .

شویله که : قولکنز کچن سنه اردوی هایونندن قبارطه بکلرینه وقوبانده اولان ابازه وچرکس قبیله لری امراسنه صادر اولان اوامری استصحا بله طوغری آستانه یه ورود وچوق کلنمبوب جانیک طرفه عزیمت ایلدیکمه بناء صغوجق واناپه سرعسکری وزیر بطال پاشا حضر تلرینی بافره ده بولوب ملاقات ایتمش ایدم مشار ایله ایله ملاقاتم کچن سنه نك رمضانده اولغله مقدا قوباندن عودتمده قبارطه خلقی وعموماً ابازه وچرا کسه بکلری اگر دولت علیه دن بزه عسکر ومهمات ایله اعانت اولتماز ایسه مسقو عسکری اوزریمزه کلدکده حال مشکل اولور دولت علیه دن بزه امداد کله جک ایسه اولجه بزه خیرینی کتور امداد کیله جک ایسه دخی برکاغذ ایله بزه بیلیر بزدخی آکا کوره حرکت ایده لم دیمشیر ایدی . قولکنز دخی دولت علیه دن سزه امداد کلور بن تکفل ایدرم و امداد کله جکی خبریله قریباً سزه کلورم دیمشیدم و بیلور ایدمکه مسقولونك قبائل خلقنه دائماً جوابی بنم سزکاه جنکم یوقدر مادامکه سزه عثمانلور دن امداد کیله بنمله صواش ایتمه سکز و اگر امداد کلور ایسه معذور سکز جنک ایدیکز و الحاصل دولت علیه دن سزه معاونت اولتماز ایسه نه سز بنم اوزریمه حرکت ایدیکز ونه بن سزک اوزریمکزه عسکر چکیم حالکنز اوزره طورک بنم غوغام عثمانلور ایله در کلامر ایله قبائل خلقنی فریفته ایده جکدر . سرعسکر پاشا حضر تلرینه ملاقاتمه بو کیفیتی کندویه افاده ایلدم و بنی بر مقدار عسکر ایله بر قدم اقدام اناپهیه کوندر دولت علیه دن کندولره امداد کله جکی قبائل خلقنه خبر ویردیم و عثمانلور عسکرینك نمونه سنی کوستروب سزک تشریفکری دخی تبشیر ایدیم دیو وافر اقدام ایلدیکمه بناء مشار ایله دخی اوچویوز نفر مقداری عسکر یله قولکنزی

انابه ارسال ایلدی وقتا که انابه واردم کوسه پاشا حضر تلی حضورینه بر نفر
 چر کس کلوب حتوقای قیله سنی مسقولو عسکری کلوب باصدی دیو خبر ویردی
 مشارایه مسقولونک بووجهه و رودینی قبائلک دعوتلرینه حمل ایله تدایر و حر کتده
 بطائت و صغوجق و انابه محافظه لریله اکتفا صورتلرینی اظهاره مبادرت ایده جکی
 مجزوم اولدقده افندم مسقولو قبائلک دعوتلریله کلسه ابتدا کندولرینی باصوب
 اضرار ایتمز ایدی . دشمنک نیتی بو نلره بریشانلق ویر مکدر نوجهله ممکن اوله بیلور
 ایسه برقاچیوز نفر عسکر اخراج و حتوقای قیله سنه لاجل الاعانه ارسال بیور ملوسکنز
 ایلروده دشمنی اشغال ایتمدیکنز صورتده انابه اوزرینه کلور صکره حال مشکل
 اولور دهرک نه حال ایسه برقاچیوز عسکر تدارک وایپکلی زاده مصطفی پاشا ایله قیله
 مذکورده طرفه ارسال اولدی . لکن سائر قبائل ختی امداده کلیوب انابه دن کیدن
 عسکر دخی دشمن ایله مقاومت ایدمه جکلرینی حس ایتملریله عودته مهیا اولمشلر
 ایکن قولکنز حتوقای قیله سنه واروب بنده فرمانلر واردر یوقارو قبائل خلقتنه
 کتوره جکم جمله سنی سزک امدادیکزه کوندره جکم سزلر همان ثابت قدم اولوب
 دشمنی طرفکنزه اوغراتمیه سکنز دهرک وافر تسلیتلر وروب آندن حرکت و یوقارو
 قیله لرکه شایشوق و ابازک و ثمر کوی و بسنی و موخوش قیله لریدر هریرینه اوغرایوب
 فرمانلری ابراز ونه طور رسکنز ایشته حتوقای قیله سنده جنک وار امدالرینه عثمانلو
 عسکری کلدی کیرودن یر کونور من عسکر ایله پاشا دخی کلیور سز دخی آتلیکنزه
 سوار اولوب حتوقای قیله سنه امداده ایریشوب دشمندن اخذ انتقام ایدک دیو جمله
 ترغیب ایلدیکنده فوج فوج قبائل ختی ایریشوب عون حقله مسقولونک اردوسنی
 بریشان ایلدیلر بو فتوحاتک خبری اولوقت در علیه واصل اولمش اولغله دولت
 عایه نک معلومیدر .

قوبانده اولان قبائل خلقتی بووجهله محاربه یه تشویق ایتدکن صکره قولکنز قبارطه لر
 طرفلرینه عزیمت ووصولده قبارطه بکلرینه اولان اوامر شریفینی ابراز ایلدیکنده
 قبارطه بکلری جوابلرنده بور قوری فرماندر بونی نه یاملو بزد عسکر و مهماتله
 اعانت اولندیغی صورتده الیزدن نه کلور مقدمات دولت علیه طرفدن امدادیمزه عسکر
 کله جکنی اخبار ایتمشیدک عسکر نیجه اولدی دشمن ایله محاربه منر مطلوب ایسه خیلی
 وقتدنبرو بوکافر ایله مقاتله ایتدک بالاخره باشه چیقمه میوب مصالحه اولدق شمدی
 بو حال ایله امرار وقت ایده یورز بزی کندو حالزه براقسه کنز اولمازمی دیدکلرنده
 قولکنز بو نلره خطاب ایدوب دولت علیه یه کوره هیچ بر نسنده کوجک یوقدر
 مطلوبکنز عسکر دکلی ایشته بو قدر بیک عسکر ایله سر عسکر پاشا کلیور سزک ایش

کورمک مقصود یکز ایسه فرصتی فوت ایتیموب دشمنه خسارت کوستره سکز سزه
 نسبت ایله ابازه و چرکس برآلای و حشی و مسلمانقلری نامعلوم برقوم ایکن غیرت
 ایدوب مسقو ایله محاربه اوزره در دولت عایه آنلره امداد دخی کوندردی سزک
 ایسه بوقدر مساجد و معابدیکز وار و علما کز دخی وار و اسلامکزده شبهه یوق
 بویله و قتده غزادن نکول ایتمکز دنیا و آخرتده خجالتکزی موجبدر و سزه کتوردیکم
 فرمان واجب الاذعان بتون مملکتکزی دکر و بونی شوکتلو پادشاهمز اوچ توغالر
 باشالره کوندریر سزه نمقدار اعتباری وارکه فرمان کوندردی بو فرمانی ایوجه
 ضبط ایدک معاذالله مملکتکزی الکزدن کیتسه بو فرمانی دولت علیه کتوروب شو
 فرمانه امتثالاً محاربه ایتدک و چالشدق لکن بختمز یوغمیش مملکتمز الیزدن کیتدی
 دیسه کز دولت علیه سزه اعلا مملکتلر احسان ایدر و اولا اولادکزدن برینک
 النده بولنسه ینه دولت علیه دن اکرام کورر و شویله اولور بویله اولور دیهرک
 جمله سنی جنکه تشویق ایلدیکمه بناء قبارطه خاخی غیرته کلوب در حال مسقولو ایله
 مصالحه لرینی فسخ و جوارلرنده اولان ممالکنه هجوم و قرا و قصباتی احراق و مال
 و اشیا لرینی یغما و بیک ایکیموز خانه مقدارینی اسیر و کندو طرفلرینه نقل ایتلریله
 قبارطه یه قریب تفایسه آچیلان یول اوزرنده واقع انکوش قبیله سی خاقیکه برقاچ
 بیک خانه دن عبارتدر بونلر فی الاصل مجوس ایکن مقدا مسقولو بونلره ایلچی
 و آدملر کوندروب نصاری مذهبه ادخال ایتشیدی ذکر اولنان قبیله خاخی قبارطه لک
 بو غیرتی کورد کده مسقولونک تحت اطاعتدن طبیعتیه خروج و قبارطه له تبعیت ایلدیلر
 شمعی قبارطه لو بو حال اوزره اولوب دولت علیه دن عسکر ایله اعانته منتظر لردر .
 سر عسکر بطال پاشا حضر تلریله کچن سنه بافرده ملاقاتمه ابازه و چراکسه و قبارطه لر
 خلقنی اله آلوب مسقولو ممالکی اوزرینه هجوم ایتسه کز چوق فتوحات ظهوره کلور
 تمام شان قرانه جق و فیض آله جق محلدردیدیکمه اولطرفک احواله چندان وقوفی
 اولماق حسیله قبائل خاقلنه نه حاجت و قوبانه نیچون صرف ذهن ایتلی برمقدار عسکر
 ایله قریمه کچلوب الله یازره ویرر یاخود کفاره ویرر طمان و تمرک قلعه لری الهیزه
 کیرر دیمکله قولکز مقابله ایدوب طمان و تمرک قلعه لری آلآن بوشدر آنلری ضبط
 ایتمک یوزآدم ایله ممکندر ایش آنده دکل قریم آطه سنده در قریم آطه سنک برو طرفدن
 فتخی مشکلدردیرا ساحله اخراج اولنه جق عسکر و ذخیره و مهماتی ایلر و سورمکه
 حیوانات و عربیه لازم نه محلدن تدارک ایدر سکز متصل کویلر یوق چول کچی بر محلدرد
 بر قلعه سنک محاصره سی اون بیک اهل اسلامی شهید ایدر اعدایه قطعاً ضرر ایتمز
 وارسون مسقولو قریمه تقویت ویره طورسون قوبان طرفدن قبارطه لر اوزرندن

پتره بورغه د کین مسقولو ممالکني خراب و بیاب ایتک ممکندر اولوقت قریمی کندوسی
 براغوب شمدی سزلر اون بیك عسکر ایله ابازه و چرکس دروننه دخول ایتسه کنز
 پاره سز پولسزالی بیك کنزیده عسکر باشکنزه جمع اولور واکر یکر می بیك عسکر
 ایله قبارطه لره وارسه کنز یوز بیك عسکر جمع اولور بوجعیته ممالک اعدایه هجوم اولنسه
 اژدرهان وقران تاتارلری طبیعته تبعیت ایدوب و مال و عمر ضارینه تعرض اولنمدیغی
 صورتده اولحوالیده اولان مسقولو رعایاسی دخی دولت علیه رعیتی قبول وجان
 و باشله خدمت ایدر لر بو کوبه وسطوت ایله درون ممالک اعدایه آبتشلر براغیلور
 بوصولتی اختیار ایدر ایسه کنز قیامته دك نام و شانکنز السنه ناسده دوران ایدر دیدیم .
 فی الحقیقه دشمنه غلبه و مسقولو دن مرام اوزره انتقام آلتیق مطلقا قبارطه لره بش
 اون بیك عسکر ایله اعانت و اولطرفدن دشمن ممالکني اوزرینه هجومه توقف ایدر
 سائر محللرده اون بیك کیسه آچه خرج اولنوب دنیا قدر مشقت چکلسه دشمنه
 کینبغی پریشانق عارض اولماز اما بودیدیکم صورتله در حال بوسنه مبارکه ده قریم
 و اوزی و سائر محللری ترکله مطلوب دولت علیه اوزره مصالحه یه اظهار رغبت
 ایدر مسقولو دولت علیه یه ایراث ضعف ایده جک صورتلری دائما جستجودن خالی
 اولماغله قریم آطه سنی اله کتورنجیه دك نه تکلفلر اختیار ایلدی قریمی اله کتوروب
 بعده اوزی بی استیلا ایلدی و آخر طرفلره هجوم مسقولو یه آسان اولدی مسقولو
 ممالکني تاخت و تاراج ایله مسقولو دولتی بر باد ایتک و مرام اوزره اخذ انتقام اولنق
 صورتک دولت علیه یه کوره سهواتی دخی مجرد قوبان طرفدن قبارطه لره تقویت
 و یروب سر عسکر پاشایی اولطرفدن مسقولو ممالکنه یور و تمکدر قولکنز مسقولو
 ممالکني باشند باشه کزدم جمله سنی بیلورم مسقولو یه غلبه بو طرفدن آسان ایدوکی
 مجزومندرینه هر حالده اراده افندیلریمز کدر . سر عسکر بطال پاشا حضر تلری
 ابازه و جراکسه خلقتی اعمال و قبارطه لره عسکر کوندر مکی ایسته مز و کندو
 مزاجنه قالور ایسه اناپه دن برخطوه ایلر و کیتمز دولت علیه بکا آچه ویرمز کندو
 کیسه مدن خرج ایتدیرر ملاحظه سنده در برقاچ آدم ایله کوجه صغوجغه کچمی
 دخی دولت علیه دن خوفدن ایدی یه اخافه و اقدام اولنماز ایسه صغوجقدن
 حرکت ایتمز ایلر و قبارطه اوزرینه عسکر کوندر و یاخود کندک عزیزیمت ایله
 دیو اقدام اولنسه دخی دولت علیه یه ایکی قات مصارف کوستره جکی و بلکه ابازه
 و چراکسه قبائلندن برتقریب مهر آلوب محضر ترتیب و قبائل خلقتی مناسب
 کور میورلر دیو تحریر ایده جکی ملحوظدر بو باده تدبیر نه ایسه اجرایی اراده
 دولت علیه منوطدر .

مسقولونك فكر فاسدى قريم آطهسى تحت ضبطده اولمغه اوزى ني دخى اله
 كتوردى شمدى قباثه محل اعانت اولان اناپه وصغوجنى دخى استيلا وقبائلى
 تماجه اله آچيق باش وتفليس خانلىرى طرفكبرى اولمغه بالاتفاق برأ اخسخه
 وارضروم اوزرلرينه يوريمكدر معاذالله تعالى اناطولى به دخى دغدغه صالوب بحرأ
 سقان منحوسه سنى بحرسيه ياليرينه تسليط واولوجهه دولت عليه ني تضيق ايتمك
 ايدىكى تحقيقكردده بندكانهم اولدى كچن سنه بومرامنى اجرا ايدهميوب اناپه ده
 پریشان اولدى لكن اشبو سنه مباركه ده بطائت اوزره حركت اولتور ايسه
 اولطر فلردن قورقيلور بوصورتده آخر محللر ايله مشغوليتدن ايسه اناپه وصغوجفك
 بقاسنه وسيله اولان قبائل خلقى وقبارطه لره تقويت لازمدر قبارطه لره عسکر
 كله جكنى تبشير ايدوب كلم خلاف چيقيلور ايسه بر دخى اعتماد ويرملك اوله مز
 مسقولو قبارطه لره آچه وسائر سنه تكليفندن خالى دكلدر والحاله هذه مدارا
 اوزدهر شمدىلك بر نسنه لرینی قبول ايتديلر لكن دولت عليه دن عسکر وامداد
 كوندرلمز ايسه نه شكل اوله جغنى بيلهم .

تفليس خانى اركللى خان مسقولويه ايلچى كوندروب عثمانلويه برچوجق رهن ويردم
 شمدىلك فريخته اولديلر سنك قوتك وارايسه بكا بكرمى بيك عسکر كوندرد دولت
 عليه يه المدين كلان خيانتى ايديم ديمش مسقولو دخى رهن اولان اوغلى اركليخانه
 كوندروب عسکر كوندره جكنى دخى وعد ايلمش لكن قبارطه لك بالاده مذكور
 حركتى مسقولونك تقايسه كوندره جكى عسكروه مانع اولدى زيرا قبارطه تقايسه
 اولان يولك تمام باشنده در بوجهتله طريق مذكور مسدود كيدر شمدى قبارطه لره
 عسکر ايله امداد اولنسه داغستان خلقى دخى دورانوب آچيق باش ملكنه وتفليس
 خانه نفس آديرمزلر . مسقولو ممالكندن قزان تاتارلرينك ساكن اولدقلى محل
 ايله اژدرهان مملكتى بيننده اولومبورغ نام شهرده برفته حدوث ايتمشدر بعضيلرينك
 روايته كوره سفر سابقده مصاحبه عقدى ائناسنده ينه اولحواليدده فتنه احداث ايدن
 ايمراطورچهنك زوجى كويا حياتده ايشم بودفعه دخى اولحواليدده اختلال ظهورينه
 باعث اولمش هر نه صورتاه ايسه فائدهسى دركارددر قبارطه لك بوحر كتند نصكره
 اولحواليدده فتنه اكسك اولماز . قزان تاتارلرنده وازدره اناپه قرقه قاليباق تاتارلرنده
 قتي چوق مسلمان وعلما وارددر مسقولون دلكيردرلر ومسقولو دائماً بونلردن
 احتراز اوزره در حتى اشبوسفر آچيدقده قبارطه لره وقزان وازدرهان تاتارلرينه
 مخصوص كاغدلر كوندرمش مضمونلرنده دولت عليه يه غلبه اولمشيكن يالكز بزه
 لازم اولان قريم ايله اکتفا ايلدك ودولت عليه ني تضيقدن فارغ اولدق بو ايلكى

بیلیمک لازم ایکن دولت علیه بزی غافل آولایوب اوزریمزه سفر آچدی بویه حرکت قنئی کتایده وارد سز دخی مسلمانسکنز کندو حالنده اولان آدمی انجتمک کتایبکزه وارمیدر دیو کال حیلہ سندن براز خلطیات وهذیان یازمش بوندن دخی آنلردن کال خوفی اولدیغی منفهم اولور . حاصل کلام اشبو وقت فرصتی دولت علیه الدن چیقارمیوب نوجهله ممکن ایسه بش اوزن بیک آدمله شو قبارطه لره امداد وخزیننه نک کتدیکنه باقیوب صغوجق واناپه کچی ثانی قریم برحلی وقبائل خالق کچی برآلای عسکری الدن چیقارماغه سی واقدام بیورسون الحاله هذه اولطرفک تقویه سی فرض مثابه سنده در . اناپه ده اولان زان اوغلی محمد بک دیدکلری نمک بحرام دولت علیه دن بوقدر احسان وانعام کورمشیکن قوبانده اولان بهادر کرای سلطان وارسلان کرای سلطان ایله یکدل اولوب کچن سنه مسقولوی اناپه اوزرینه دعوت ایتشلر حتی کلان طابور دروننده بهادر کرای سلطانک مسقولوده اولان اوغلی برابر ایدیکی متواتر اولغایه بو اوچ کسنه نک قوبانندن دفعی لازمدر . بودخی دولت علیه نک معلومی اولسونکه قبائل خالق یعنی ابازه وچراکسه وخصوصا قبارطه لر بز دولت علیه نک پاشالو عسکری یز سرعسکریک رای وامریله حرکت ایدرز قوبانه کلان سلطانلر بحسب الجنسیه تاتاره یعنی نوغایلیویه سوز کچوررلر بزه دولت علیه دن تعیین اولغان پاشا امر ایدر دیو افتخار ایدرلر سلاطیندن محظوظ اولدقلرینک حکمتی بر تاریخده قبارطه لو سلاطیندن بر ایکی سلطانی قتل ایتشلر مقتول اولان سلاطینک دمنی بز لردن دعوی ایدرلر زعمیله نصل سلطان اولور ایسه اولسون وسوسه ایدرلر بو جهته بیلرینی تألیف غایت کوجدر دیو سالف الذکر محمد بک تقریر ایلمشدر .

محمد بکک بوتشویقانی اوزرینه بطل پاشایه تکرار اکیدوشدید او امر علیه اصدار وارسال اولنه رق بو خیرله محمد بک یه اناپه یه اعاده اولتوب بو خالاده ایسه یه ادیب تاریخنده محرر اولدیغی اوزره بطل پاشا دخی پادشاه نو جاه حضر تلرینک تیغ سیاست خسروانه لردن خوف ایله درحال سخوم اوزرندن بر قاچ یوز آدم ایله اناپه یه واروب داخل اولمش وروسیه لو دخی ایکنچی دفعه اولمق اوزره اناپه یی محاصره ایدوب آلمق اوزره ایکن یه طشره دن قبائل وایچرودن اهالی غیرت ایدرک روسیه لولر کرکی کچی مقهوراً اعاده اولتوب بو محاربه نک عقینده محمد بک دخی اناپه یه وصولبولمش ایدی .

جاوید احمد بک تاریخنده ایکیوز درت سنه سی وقایعی صره سنده بو محاربه یی بو وجهله تحریر ایدرکه اشبو رمضان شریفک غره سی اولان جمعه کونی اناپه جانبی

سر عسکری جانیکلی علی پاشا زاده بطال الحجاج حسین پاشانک طرفدن فتوحاتی
 مبین توارد ایدن قائمعلری هر کسی دلشاد ایلشدر خلاصه قائمه بودرکه اشبو
 بیک اکیبوز درت سنه سی جمادی الآخره سنک اون بشنچی کونی روسیه سر عسکری
 نهر قوبان ساحلنده مجدداً اعمار ایلدیکی اون ایکی عدد قلعه مثللو پلنقه لر نده موجود
 اولان عساکر سنک ممتازی اوله رق اون ایکی بیک کزیده عسکر اوزرینه بولغا قوف
 و بلیقوف نام جنراللری باشبوغ ایدوب مجرد اناپه قلعه سی تسخیر ایتک اوزره
 محوش قریه سنه هجوم و اطراف نهب و غارت و احراق بالنسار ایدرک نهر قوبان
 ساحلنده متمکن قصای و قصبولات و توروز اوغلی قیبه لرلی ایچنه علی الغفله دخول
 ایتدکارنده قبائل مرقومه شدت شتا حسبیله فرار ایده مکاری مثللو مدافعه یه
 دخی مقتدر اولدق لرندن ضروری تبعیت ایتلرله ایچلر نده مقیم سلاطین
 جنکیزیه دن ارسلان کرای اوغلی سلیم کرای سلطان اونی ایکی میر زال یه قلاغوز
 ایدرک روسیه لولر اناپه یه طوغری حرکت ایتک اوزره اولدنی بطال حسین پاشایه
 اخبار اولدقده در حال محافظ بولتان میر میراندن ایچکی مصطفی پاشای باشبوغ
 تعیین و کندو تفکچی باشینی معینه رفیق ویدی عدد چرخه طوی و مقدار کفایه
 عساکر و مهمات اناپه مقابله اعدایه ارسال ایدوب کندوسی قلعه ده توقف برله
 ویران اولان محللر سنک تعمیر و ترمیمه ایتدار و جوار قلعه ده ساکن اولان
 نوغای تانار لر یله آطه خلقتی جمعه قلعه یه ادخال ایدرک مترقب انجام کار اولمشیدی
 روسیه لولر اناپه یه طرفه حرکت ایدوب خطوقای و جانه جانبلرینه کنتجه قبائل
 و عساکر اسلامی اناپه متعدد موقع لرده محاربه ایدرک خیلی تلفات و یرمش اناپه ده
 ینه هجوم و حرکتدن کبرو قالمیوب پیدر ی تخطی ایدوب ایام شتا اولمق حسبیله
 مقاومت مشکل اولدیغندن عساکر اسلامی ایاق ایاق کبرو یه رجعت ایتمکله
 روسیه لولر اناپه دن درت ساعت بعدی اولان بغان بوغان بوغازی نام محله نزول و بطال
 پاشا دخی اون قطعه طوب اناپه عساکر موجوددی استصحاب و اناپه دن خروج
 و اناپه یه بر بچق ساعت بعدی اولان شایقه قریه سنه دخول برله فرداسی بوغاز
 مذکور ی طوتمق ایچون اورایه حرکت و روسیه لولر دخی بر طرفه کچمک
 داعیه سیله جنکه مباشرت ایدوب بو صورتله بر عظیم و جسم محاربه وقوعنده
 دشمنک غلبه سی حسبیله موقع مرقومک طوتیه میه جغنی بطال پاشا جزم ایتمکین
 عساکر اسلامی هیئت مجموعه سیله اناپه یه اعاده ایتمکله روسیه لولر جمادی الاخرانک
 یکر میسنده اناپه اوزرینه یوروش ایتش اناپه ده قلعه دن طوب اناپه مقابله اوله رق
 روسیه لولر شایقه قریه سنه رجعت مجبور اولمشدر در بونک اوزرینه بطال پاشایه

مصطفی پاشایی باشبوغ ایدرک بر مقدار عسکر ایله قریه مرقومه اوزرینه کوندروب واردقلرنده اوچ درت ساعت قدر جنک ایتشلر ایسه ده ینه عساکر اسلامیه مغلوب اوله رق انابه یه رجعت ایتلمه یله روسیه لولر دخی بوزغون عسکر ایله برابر قاعه یه یوروش ایدوب حتی طایه لره صعود ایله طو پجیلرک اتکارینه یا پنشمه مرکزینه قدر کیشلر ایکن عساکر اسلامیه کمال متانتله مدافعه و یقه یقه یه محاربه ایدرک دشمنی مقهوراً اعاده ایتشلر و بوجنکده روسیه لونک ایکی بیک قدر تلفاتی و اوچ بیک قدر مجروحلری اولدینی مرویدر بو صورتله روسیه لولر منهزم آرجعت ایتدکلرنده مصطفی پاشا ینه تعقیبه مأمور اولغله جانه بوغازنده روسیه لولره یتیشوب اتی ساعت قدر وقوعه کلان محاربه ده روسیه لولر بو کره دخی کلی تلفات و یردکن بشقه خیلی مهمات دخی ضایع ایتلمه یله یک فنا حالده قوبانی اوتنه طرفه مرور ایلمشلردر .

ایشته بو محاربه نك ایکنجی کونی محمد بک انابه یه دخول و بطلال پاشا ایله ملاقات برله یدنده کی او امری کوستروب الحمد لله بوندن بویه بر شیئه مضایقه مز یوقدر امر پادشاهی اوزره اردوی هایونی قبارطایه ادخال بیورک نیجه یوز بیک اهل اسلام قدومکنزه منتظر لر دیدکده بطلال پاشا تکذیب و درلو عذر و بهانه لر ایراد ایلوب و قبائل امراسنه موجب نفرت اوله جق کلاملر سویلوب اما آنلرینه فتور کتورمیه رک هر نه طلب ایتدی ایسه اعطا و عربه و طوپ بارگیری یوق دیمکله طقوز یوز الی عربه و ایجابی قدر بارگیری تدارک و تسلیم و فقط یازق سزک کی نمکبجرام خلقه پادشاه اسلامک بوقدر نان و نعمتین بیوب سوزده کلکده دین اسلامده نر و پادشاه و زراسندن ورجالنده نر دیرسکنر بونه خیانتدیرکه بوقدر خزینه یا نکزده موجود ایکن وقتیه عربه و بارکیر تدارک اولنیه دیو تشنیع ایتدیلر .

بو حالده بطلال پاشا ینه اکمل نقصان داعیه سیله آیاق سوریوب سائر مأمورلر طرفندن دشمن اوزرینه حرکتی تکلیف و ابرام اولدنجه ادنی بهانه لر ایله امرار وقت ایدرک روز قاسمه الی کون قالدنجیه دک توقف ایلدی اول وقتیه دک خیلی عسکر مجتمع اولوب اکر وقتیه حرکت اولنسه ایدی چوق ایشلر کور بولور ایدی .

منوال مشروح اوزره بیهوده تضييع اوقات ایدوب نهایت قومدان پاشا دوتمای هایون ایله انابه پیشکاهنه لکر انداز اولدقده معیتده بولنان محمود خصکی حامل اولدینی خط هایونی ابراز ایدیجک ارتق اعتذاره مجال قالدیغدن قالقوب همان مجتمع اولان عساکر اسلامیه یی استصحاب و بیک ایکی یوز درت سنه سی ذی القعدة سنک یکر می یدنجی کونی انابه قاعه سندن خروج و اوتوز بر قطعه طوپ و مهمات آلوب قبارطای نیتیه حرکت ایتدیکنده امرای چرا کسه برر برر کلهرک عهد و پیمانلرنده

تا بقدم اولد قلمین بیان ایله اردو لوازما تی تدار کده سی و غیرت ایتشلر ایسه ده بطال پاشا کندولرینه عنفله معامله و رؤسای عسکر یه ایله دمدم معارضه و مجادله ایدرک و انانی راهده عبث یره اوچر بشر و سکنزر کون مکث و توقف و اظهار عجز و قنور ایله اون ایکی کونلک مسافه بی آلتش اوچ کونده قطع ایلیه رک کوچ حال ایله کنار نهر قوبانه واصل اوله بیلدیلر و محل مرقومه هنوز واصل اولدن بش قوناق یرقاله درت یوز قبارطای عسکر یله بش نفر بکلری محمد بکک دلالتیه اردوی هایونی استقبال ایدوب نهر قوبانه وارانجه ما کولات و مشروباندن برشینه مضایقه چکدیرمدیلرکن بطال پاشا کوکلسز باشبوغ اولدیغدن هر مجلسنده قبائل امراسنی تلطیف ایده چکنه تکدیردن خلی اولمز ایدی .

هر نه حل ایسه قوبان کنارینه کلنوب (۲۰۵) سنه سی محرمنک بشنجی کونی نهر قوبانک اوتنه طرفه مرور اولدقدده جمله عسکر و قبائل خلقی منبسط اولوب ایرتسی کونی امرای قبارطای سرعسکر پاشایه کلوب اقدام بوراسی اوتوره جق محل دکدره . ایشه قبارطای کویلیری ایکی ساعتدر اطرافی قرا و قصبه و مستحکم محللردر واروب دشمندن اقدام ضبط ایدلم زیرا مسقولولرایله بزم مصلحه مز اگر عثمانلو ایانی کومی به بشار ایسه جمله کنز آنره تابع اولک دیو منعقد اولغله معاذالله دشمن کومی بی ضبط ایدر ایسه حال مشکل اولور و حالا اوتوز بیکی قریب قبارطای اهالیسی آماده در کومیده مجتمع اولورلر همان جنابکز شمدی حرکت بیورمکنز وقت و حاله کوره لازمدر دیدکرنده جواب قطعی و یروب ایشه نهر قوبانی چکدک فرمان پادشاهی رین بولدی برخطوه حرکت ایتم دیو عنف ایله جواب و یروب اوراده توقف ایتدی . الحاصل اورادن طوغری قبارطای ایچنه کیریه چک ایکن اوراده توقف ایدوب اول حوالیده درت بش بیک قدر روسیه عساکری اولدیغی خبر آنغله بطال پاشا آنی بهانه ایدرک ابتدا آنلرک غائله سی برطرف اولمق کرکدر دیو اوزرلرینه عسکر سوق ایتک استیوب هر نقدر امرار وقت مناسب دکدر قبارطای ایچنده اهالیء داغستان و چرا کسه دن اولمق اوزره اقل ماکان یوز بیک عسکر سزه مترقیدر بویله بر مقدار اعدایه نه اعتبار واردر دینامش ایسه ده فی الاصل روسیه لو ایله مخبره سی اولدیغدن قبول ایتوب کیدلدیکی صورتده باری بیوک اردو ایله اوزرلرینه واردم دنیلکده آنی دخی دکله میوب صفرک اوچنجی کونی عساکر مرقومه اوزرینه درت بش یوز عسکر ایله واقف بطانء اموری اولان تفکجی باشیسی تعیین وارسال ایتدیکنده ناچار قبائل خاقندن دخی برازی برابر کیدوب بویله رابطه سی یوق جزئی عسکر برایشه یارایه میه جفی امور ضعیفه دن اولمسیله روسیه لونک آتشنه طیانه میوب

وفي الحال متفرق اوله رق عودت برله سرعسكر اردوسى اوزرينه دو كيلوب اعدا دخى آرقه دن يتشمكله اردوده بولنان طوائف عسكريه دخى جنكه متعلق بر استعداد كورمدكرندن ترك جهاد ايله نهر قوبانه طوغرى عودت ايتدكلى خلالده بطل پاشا بر قاج اتباعيله كندوسى اعدايه تسليم ايلديكنى قبائل خلقى كوريجك متحير قلوب اغلايه رق برايشر اولدى بارى عودت ايدن اهل اسلام اسير اولسون ديو اردوى هايوندن بر شينه و كسنه نك بر خلالته وضع يد ايتيمه رك و دشمن ايله جنك ايدر ك و اثنای راهده خوف جان ايله بعضيلرينك بر اقدىنى اشياي دوشىروب ينه اصحابنه رد و تسليم ايدر ك بوزغون عسكرى اناپه يه ايصال ايله اثبات صداقت ايلديلر بوضورتاه صفر ك اون سكرنجى كوفى اناپه يه كلنمشدر .

بطل پاشانك مقدا روسيه لو ايله مخبره سى اولوب ياننده موجود اولان سكرنجى يوز كيسلك خزينه سنى چادر ايچنده دفن ايلمش ايدو كندن اردو بر طرف اولدقن صكره كلوب اخراج ايتمشدر .

مقدا اردوى هايون ايله اون سكرنجى كونده قطع اولنان مسافىنى بو كره بوزغون عسكر اون ايكى ساعتده آله رق بسنى يه وصولبولدقن رنده قبائل خلقى بر يره كله رك مشورت ايدوب بر خائن دينك كيتمسيله دولت عليه بز دن كچمز ديو ينه دولت عليه دن بر سر عسكر ايتتمكه قرار و ير مش اولدقن رينه مبنى واقع حالى عرض وانها و بر سر عسكر ارسالنى استدعا معرضنده ترتيب اولنان محضر عمومى ايله محمد بك ينه در سعاده كوندر لى اديب تاريخنده بومنونال اوزره محرر در .

فقط اولطر فلرى كز مش و اول جنكلرده بولنانلرى كورمش بعض كيمسه لر دن بو وجهه مسموع فقير اولمشدر كه بطل پاشا او توبىك عسكر ايله قوبانى مرور ايتمش و بردفعه روسيه لولرى بوزمش ايكن پدري نك كتخدالغندن نشئت ايتمش اولان صارى عبدالله پاشا عهده سنه بو ائنده ارضروم و طربزون و ايلكارى توجه ايله اناپه سر عسكر لى استعداى و ير مش و بطل پاشا دخى غرض نه اولديغى حس ايدر ك دولته انفعال ايله وهمه دوشمش اولديغى حالده بو كره قپودان پاشا ايله كلان و جلاد محمود ديو معروف اولان محمود خصكينك ياننده شايدكه كندو اعدامنه دائر خط هايون وارد ديو بتون بتون خوفه دوشه رك اسارتى اختيار ايتمش اولديغى اولطرفده مروى ايتمش .

اول خلالده اناپه دفتر دارى بولنان ممش اقدىنك بعض محللره يازديغى تحريراتنده دخى بو وجهه محرر در كه بطل پاشانك نه مرتبه خائن دولت اولديغى قپودان پاشانك اناپه يه تشر يفته برر برر تقرير ايلدم آستانه يه يازدم ديو افاده ايلمشيدى

آندن سؤال بیوریه وصغوج محافظی ایکی مصطفی پاشایه وزارت کلدی کرکی کبی
 چله دن چیقوب کرک اهایلی و کرک عسکری جمله سنه قنور کتور مشدر و بازار کاتلرک
 یاغلیخی اوتوز پاره یه کچر ایکن یکر میشر پاره یه جبراً آلوب آقچه سنی و یرمدیکندن
 ایوم برقیه روغن کلز اولدی سرعسکر اولدیغندن بش آقچه صرف اولنه جق یرده
 بش غروش و یرر و بر طرفدن دخی مال میری بی کندوسی اکل و بلع ایدر اولدی .
 وینه ممش افدینک والده کتخداسی محمود بکه یازدینی مکتوبنده بو وجهله محرردرکه
 (۱۲۰۴) ذی الحجه سنک اون برنجی کونی تبدیل خصکیسی محمود اغا اناپه قلعه سنه
 کلوب پاشا خاننه روی دل کوسترمیوب شدت ایله هر جوابده چین جبین ایله نزه یه
 کیدر ایسه ک و حتی مسقوه دخی فرار ایسه ک سنی بولور چیقار یرم دیو کندوسنه و متعین
 آدم لرینه حدت ایله نمایش ایتمی کوندن کونه پاشای خانک مسموعی اولدقچه قلبه
 دهشت کلوب بو حال ایله اناپه دن حرکت اولنوب چرا کسه دن کمر کوی قیله سنه واروب
 اوچ دفعه قریم خانی اولان سلیم کرای خانک اوغلی حاجی کرای سلطان بوقائک باشی
 اولوب عالیجناب بر سلطان اولمغله محمود خصکی کندوسنک شاننه یاقشمز کلامه جرأت
 ایدوب حدینی تجاوز و اطاله زبان ایتدیکندن حاجی کرای سلطان دخی انفعال ایتمکین
 قیائلدن بر فرد یانمزه کلز اولدی و بوسورت اون یدی کون مکشمزه سبب اولدی
 آندن قانلیوب بسنی یه واردقده مر قوم محمود نامحمود سردن کچدی لر له نزاعه
 باشلا یوب جمله سنی سیاست اولنور سکر دیو تهدیده و پرده بیرون کلامه آغاز ایتمکله
 آنلر دخی محموده خطاب ایدوب بزسنک نه کونه منحوس و مشوم قدم اولدیغی
 بیلورز اولکی سنه اوزی یه واردک بویله اولدی کین سنه بیوک اردویه واردک
 بویله اولدی غالباً بز لری دخی او یله ایده جکسین دیمش لر ایدی نهایت الامر چرخه
 کونی مزبور محمود اغا بر مقدار جنک اولدقدن صکره چرا کسه ایله عودت ایدوب
 اردو کنارندن کچدی کینی پاشایه خبر و یردکاری کبی جمله عسکرینی جمع ایدوب سزی
 بو محله کتورن محمود اغا فرار ایده لی اوچ ساعتدر غیر سز نه طور رسکر دیو
 اذن و یروب جمله عسکر دخی بیر اقلرینی صاروب قوبان نهرینی مرور و کندوسی
 روسیه اردوسنه ملحق اولدی مر قوم پاشایه مر قوم محمودک معامله بارده سی
 وعدوسی اولان عبدالله پاشایه بطالک اوزرنده اولان طربزون منصبی آلوب
 و یرمکله جانندن کلیاً مایوس اولوب و همسه تابع اولمغله مراد بنم هلاکدر دیو
 استعمار ایدوب بو اهاتی ایلدی دیو تحریر ایلمشدر .

واصف افندی دیرکه حقیقت حالی فهم و ادراکده ناسک اذهانی متشت اولوب
 بعضی لری بو وقعه ک ظهورینی بطل پاشانک جن و رخاوتنه حل ایدوب عسکرک

نظامسز لغتی وقبائلک (الحکم لمن غلب) وادیسندہ طور وحرکتلرینی حسن ایدرک
 تفرقهٔ عسکر ووقوعندہ کندوسنجه سلامت متصور اولدیغنی تیقن ایله محافظهٔ نفس
 ایچون مذلت اسارتی اختیار ایلدی دیدیلر بعضیلری دخی بونی رد ایدوب دیدیلرکه
 بطال پاشا مأمور معیتی اولان عساکرله حسن امتزاج واخلطاط وقبائلی کرکی کبی
 کندو طرفه جلب ایدرک یوليله جنکه مباشرت و ممکن مرتبه مدافعهٔ اعدایه غیرت
 ایدہ ایدی نصرت وهزیمت حکم باریده اولمق ملبسه سیله عسکر متفرق اولوبده
 میدان جنکده بالضروره اسیر اولسیدی بیله وقتيله چیقوب طرف پادشاهیدن مکرم
 اولور ایدی لکن مشار ایله اناپه یه کچدیکی کبی قید اسری اختیار افکارنده اولوب
 دولت علیه یه انفعالی سببیلہ بر نوع تقیصه یه سببیتی قورمش اولدیغندن دشمن
 کورلدیکی کبی اضمار ایلدیکی خیاتی اظهار ایلدی وبعضیلر دیدیلرکه اناپه دن بطال
 پاشا حرکت وقبائل چراکسه دولت علیه طرفه متابعت ایندیکنی روسیہ لو ایشیدوب
 بذل مال بیشمار ایله قبائلی کندو طرفه جلب ایتمکله جنک ووقوعندہ بوزغونلق
 ایراث ایدہ جنک حاللر احداث ایتمک اوزره بینلرنده قرار ویرمش اولدیقلرینی
 بطال پاشا تحقیق ایدیلجک همته قصور وبازوی اقتدارینه فتور کلهرک یأس ایله ماده
 بوصورتی کسب ایدوب عسکری طائفه سی دخی سلامت نفس داعیه سیله انہزام
 عارینی بسبتون بطال پاشا اوزرینه تحمیل ایلدیلر وبعضیلر دیدیلرکه طوائف
 عسکر یه فی زماننا سر عسکرلره غالب ومتحکم اولوب حال بورایه منجر اولدقده
 میانه لرنده برینی بالانتخاب سردار اتخاذا ایدرک جنکه تصدی ایله دین ودولت
 اغورنده بذل مقدرت ایتملری امور ممکنه دن ایدی لکن ضعف دیانت وفقصدان
 صداقتلری حسیله هر جنکده عوارض جزئیہ یی بهانه ایدرک عار فراری ارتکاب ایله
 دنیا وآخرتلرین خراب ایتمکده درلر فرض ایدہ لمکه سر عسکر حین محاربه ده قضا زده
 اولدی یاخود قرب دشمنده آکسزین وفات ایلدی شخص واحدک فقدانی شو
 قدر بیک عسکرک تفرقی استلزام ایتمز وتأیید دین ودولت ایچون تجمع ایدن
 عسکر بومقوله حودانات ایله متأثر اولیوب مقتضای غیرت ودیانت نه ایسه وقتنده
 اجرا ایتمک لوازم اسلامیه دندر باش کیدنجه پایدار اولماز ایاق مثلین العوام شهرتکیر
 ایسه ده احتجاجه صالح دکدر اولکی سفردہ قوجه نعمان پاشا قینارجه قرینده
 عساکر کثیره ایله اقامت ودشمنک بیوک اردوسیلہ مقاومتہ تحصیل قدرت ایتمش
 ایکن سلستره دن انہزام فاحش ایله اسماعیل طرفه عازم اولان روسیہ عساکری
 عن جهل اوزرلرینه اوغرادقلرنده عساکر اسلامیه دخی غافل ونه حال ایسه
 دشمنه مقابل اولوب محاربه نک ابتدا سندنہ روسیہ سرکرده سی اولان ولیبان نام

جنرال فوت اولمش ایسه ده روسیه لولر آنی کتمله صدمات اسلامیه صبر و تحمل ایدوب وجود نظام عسکریدن ناشی نعمان پاشا اردوسنه غالب اولدقلری محققدر چونکه نعمان پاشا صاغر اولدیغندن سرعسکرلکه تقریبی جائز دکل ایکن سوق قضا و قدرله اوخلالده بویله برکزیده اردویه سرعسکر اولوب اعدانک تقریبی صوت بلند وهزار تکلفات ایله کندویه افاده واسماع اولنجیه دک دشمن کلوب چاتمشی ایدی دالقیلیج عسکر دخی فاصله بعیده ایله متریمی ترک ایدوب یوروش کوستردکلرنده مقدا هزیمت واضطراب کورمش دشمن هول جان ایله آتش یاغدیردقده دالقایجلر عودت و متریسلرده دخی توقف ایتیمه رک فرار ایلدیله دشمن عسکری بعید ایکن یوروشده حصول مضرت اوزمان دخی تجربتکنذار ارباب بصیرت اولمش ایدی . زیرا طابور اعدایه وصول ممکن اولسه بیله بعد مسافه عسکری اتعاب ایدرک ایش کورمکه قدرت بر اقیه جنی بی ارتیبدر . صدر اسلامده و بلکه دولت علیه ده بوحالت کراراً و مراراً واقع اولوب فقدان رؤسا ایله هم طوائف عسکریه یه فتور عارض اولدیغی تواریخده مذکوردر و اصف تاریخنده بومنوال اوزره مسطوردر .

لکن عساکر منتظمه قارشوسنده نظام و رابطه سی اولمان اردو برایش کوره میوب نادراً غلبه یه مظهر اولسه بیله راست کله برشی اوله رق اکا حکم ویرلمز بطل پاشا اردوسی ایسه قبائل مختلفه دن ودرینتی برطاق طوائف عسکریه دن مرکب اولوب فقط بطل پاشانک اوکیله برهیئت اجتماعیه کسب ایده بیلمش ایدی بطل پاشا آرهدن چیقوبنده بوجمعیتم و حدتی زائل اولیجق طوائف متخالفه دن عبارت قاله رق تفرق و تشتتلی امر طبیعدر امانعمان پاشا اوزرینه کلان روسیه لو برمنتظم اردو اولوب رؤسای متعدده مرتبه سی اوله رق باشوغ تلف اولدقده الت طرفنده بولنان ضابط درحال آنک یرینه کچهرک و مقتضای قانون و نظام عسکری اوزره قوماندنی در دست ایدرک باشوغنک فقداننی بیایدیرمز یوخسه قوماند شاسدیغی آده روسیه نفراتی برایشه یارامدقلری معلوم و مجرب اولان مواددندر مقدملری اهل اسلام اردولرنده وقوعبولان امثال دخی بوقیلیدن اولوب شویله که : برطرفه براردو سوق اولدقده شاید که سرعسکر قضا زده اوله جق اولورسه درحال زمام اداره نی اله آلمق اوزره معینه بردیگری مأمور و آنک ایکنجیسی اولمق اوزره بردیگری وهکذا درده قدر تعیین اولدیغی واردر الحاصل حین محاربه ده عسکرک باشسز طورمی بروجهله جائز اوله میوب بو باده مقدم ومؤخر احتیاط اولنه کلشدر وباش کیدنجه پایدار اولمز ایاق مثلی قضیه مسلمه اولوب بوآنه قدر آنی کیسه انکار ایتماشدر .

بطل پاشانك حالته كلنجه برمنوال سابق بديت مأموريتدنبرو اعتذار صورتيله اياق سوريمكده اولوب جلوس سليم خانيده كندوسنه اصدار بيورلمش اولان اوامر اكيده وشديده مقتضاي اوزره ناچار اناپهيه وارمش ايسهده اسبابك نقصانندن بحمله اوراده مكث واقامت ايله تحفظي حركت ايتمك اوزره ايكن بهر حال دشمن اوزرينه تجاوزي حركت ايتمي اچون جلاد محمود ايله قطبي المفاد خط هايون وارد اوليحق مجبوراً ايلرويه حركت ايدوب ايلرويه مغلوبيت انديشهسي و كيروده صاري عبدالله پاشانك اناپه سرعسكر لکنه تهيه اولديغني تلاشهسي حسييله حياتندن نااميد قالدغي حالده محافظه جان قصديه بويله برحالت مكر وههنگ ايقاعنده كندوسنك تهمتي اولسه بيله برآدمي جبر والحاح ايله بويله برامر جسيمده قوللانمق دها بيوك قصور ايدوكي مسلم و جلاد محمود كبي اسم و مسماسي مخوف و منفور برخصكينك تازيانه جبر و تهديديله تحريك اولنان سرعسكرك نتيجته حالي بورالره منجر اوله جغي وارسته كلت رقدر.

زيرا اعتذاري ياچين ورخاوتندن و ياخود صحيحاً اسبابك نقصاني مشاهده ايدرك دشمنه مقابله ايدمه جگني بيلايكندن ناشي اولوب بوايكي صورتده دخي اول خدمتدن عفوي لازم كلور ايدى و چوق كره خارچدن اسباب محاربه مكمل ظن اولنور حالبوكه نيجه نقصانلر واردركه آني حقيقت حاله واقف اولنلر بيلور خصوصيله اناپه كبي اميد امدادي منقطع اولان برحمله چيقوب واردونك كافه لوازماتي تدارك ايدوبده ايلرويه حركت نه درجه لرده مشكل اولديغني اربابنك معلوميدر .

ورده اولوقتلر محاكمه شويله طورسون كوزلجه تحقيق و تجسس اولتمق سز ين آدم اولدرمك اصول قبيحه سي جاري اولديغندن حفظ جاه ايله حفظ جان دخي برابر ملاحظه اولنور ايدى بناء عليه او عصرده غيور و حمتكار ديو دين و دولت اغورنده جاني ميدانه قويمش برطاقم فدائي كيمسه لره دينلوب ايسته بطل پاشا آنره نسبتله غيرتسزلكله اتهام اولنور يوخسه عصر يمز رجالنه نسبت اولنور ايسه اكا هيچ برشي ديمكه حقمز يوقدر زيرا عصر مزده عزل و انفصال ايله جان قورقوسي اولدقدن بشقه سايه شاهانه ده امر معاشجه مضايقه بيله چكلمز ايكن ينه حب جاه و حفظ اقبال داعيه سي بركمال اوله رق ترويج مصالح دولت اچون منافع جزئيه شخصيه لر يني فدا ايدنلر آز بولنوب جزئي منفعت شخصيه و ناجا اغراض مخصوصه ضمننده دخي نيجه مصالح جسيمه فوت اولديغني واقع اولمسيله ايشته اصل نفرين و لغته سزا و انسايتدن مبرا بومه قوله كساندر كه منافع مخصوصه لري اچون ولي نعمت لري اولان دولتك مصالحنه سگته و ير مكي تجويز ايدرلر .

قالدیکه انابه دفتردارى سالف الذکر ممش افندینک (۲۰۴) سنهسى ذى الحجىسى
 اواسطنده در سعادته ارسال ایتمش اولدینى تخریر اتنده انابه اردوسنک قبارطایه
 عزیزمتنک تأخیرینه سبب قوی ترتیب بیوریلان عساکر و ذخائرک عدم ورودى
 اولوب ذى القعدةنک اون اوچنجى کونى درت بیراق عسکر و بش طوپ و اصل
 اولغاه بوندن صکره سر عسکر بطل پاشا حرکت ایده جک ایسه ده جمله دن اقدم الزم
 اولان خزینه و باروت و چرکه و چادر و لوازم سائر هونوز کلدى و ذخیره
 و مهماته احتیاج درکاردر دیو تسطیر و (۲۰۵) سنهسى اوائلنده کوندرمش اولدینى
 تخریر اتنده دخى ذخیره جه مضایقه دن بخته صامسون اسکله سندن توارد ایدن ذخیره
 ایکی بیک کيله ده در تیوز کيله نقصان ظهور ایتدیکنى و قبارطای ایچنده قشلاقمق
 مصمم اولدیغندن مناسب محلنده برقلعه انشا اولتمق و او تونز ایکی قطعه طوپ استحصابى
 مصمم ایسه ده عسکرک قاتى حسیله صخوم طرفدن کلش بک و سائره معرفتلیله
 بر مقدار عسکر ترتیب و ارسال بیورلمق لازمه دن ایدوکنى تخریر و کدا کوتایسلى
 محمد بکک حمل اولدینى او امر علیه و تشریفات و عطایای سنیه یی قبارطای امراسنه
 ایصال ایتمشى اوزرینه قبارطای اهالیسى سلاحلنوب جنکه مهیا اولدقیرینى عرض
 و اشعار ایله برابر چراکسه و نوغای قیلهلری معیت سر عسکرى ایله قبارطایه عزیزمت
 برله اغور دولت علیه ده بذل مقدور ایده جکلری مسلماتدن ایسه ده بونلر سواری
 عسکر دیمک اوله رق مملکت محافظه سنه مقتدر اوله میه جقلری درکار اولوب انابه
 قلعه سنک ایسه بعض محللری تعمیره محتاج اولدقندن بشقه سر عسکر معیتنده موجود اولان
 اون ایکی بیک قدر عسکر دن ماعدا اول حوالی یه تعیین بیوریلان عساکر دن فرد افریده
 ورود ایتدیکنى و بوضورتده قلعه محصور اولمق لازم کلور ایسه حال مشکل اوله جغندن
 قلعه نک تعمیرى و ترتیب بیورلمش اولان عساکرک ارسالى لازم کلهرک عساکر و ذخائر
 کلز ایسه یالکز سواری مقوله سى اولان قبائل ایله مقاومت قابل اوله میوب هم قلعه نک
 وهم قبائلک مضمحل و پریشان اوله جقلرینى و درون قبائلده قشلاقمق ایچون مقدار
 کافی عسکر و ذخیره و طوپ ترتیبى لازمه دن بولندینى تذکیر ایتمشیدى .

جاوید احمد بک تاریخنده محرر اولدینى اوزره اکیوز درت سنهسى رمضان شریفندن
 مقدم ترجمه حلی جلد نالنده مسطور اولان محمد رضادن بطل پاشایه تخریرات کلوب
 ذى الحجى نک اون بشنه قدر یوز بیک عسکر ایله آناهیه و اصل اوله جغنى افاده ایلمش
 ایکن وقت موعود مرور ایله وعدى خلاف چیقمش ایدی .

و بو خالده داغستان خانلرندن هرت حاکمی علی خان و جانکنتای حاکمی حاجى
 احمد خان و اندرای و سالتو حاکمی علی خاندن بطل پاشایه سیاق واحد اوزره

وارد اولان اوچ قطعه عربی العبارة مکتوبلرک خلاصه مؤدالرنده اباعن جد معتاد من اولدیغی وجه اوزره خدمات دولت علیه ده بولمغه مترقب ایکن ارسال اولتان فرمان واجب الاتباع طرفزه واصل اولوب مضموننده بوسنه مبارکه ربیع الاولنده قبارطای جانبندن حدود داغستانه قریب مسقوک سرحداتنده اولان قزلقلعه سنک تسخیری قصدیه روم عسکری و آرازه و چرکس و نوغای قبائلی و قبائل سائر ایله جنابکنز عزیمت ایتمک مأمور اولدیغکنز بیانیه اول حوالیه و وصولکنزده بزلردخی متجدداً غزایه اقدام ایتمککنز فرمان بیورلمش جناب خدا سزی بو طرفله کلیمکه موفق ایتمککنز صورتده اولا اجر جهادی احراز و ثانیاً دولت علیه نک خدماتنده بولمغه کسب امتیاز ایتمک قصدیه بر موجب فرمان عالی اتفق اوزره حرکت مهیا و حاضر اولوب سزک بو طرفه عزیمتکنز خبری صحیحاً طرفزه واصل اولدقده امور دنیایی ترک ایدوب سزکله جهاده عزیمت اوزره بو بایده خدمت دولت علیه ده اثبات وجود ایلرز دیو افاده مرام ایتمکله برابر روم عسکرینک اول طرفه وارمسی مشکلجه اولدیغی دخی اشعار ایتمش ایدی .

وینه ترجمه حالی جلد نالنده مسطور اولان شیخ منصورک ساکن اولدیغی چیچندن اقدجه بطل پاشا طرفدن کندوسنه ارسال اولنمش اولان تحریراته جواباً بوخلالده وارد اولان مکتوبنده کوندردیککنز مکتوبکنز طرفزه واصل اولدقندن صکره دشمنی انابهده بوزدیغکنز مسموعنز اولدی بو خصوصده بزلرنو جهله نمون اولدق ایسه حق تعالی دخی سزدن اولو جهله راضی اولسون بوندن صکره بزه و جمیع مسلمینه خیرلو ایشلری افاده ایده سکنز اگر معیتکنزه کلم مراد اولنور ایسه خبره منتظرم و اگر بالنس واریوب عسکر کوندرمک مرادکنز ایسه اولو جهله حرکت ایدرم سزه لازم اولان امر ایتمکنز بزه واجب اولان دخی امره اتقیاد ایلمکنز دیو تحریر ایلمش ایدی لکن چیچنه وارنجه بونجه قبائل چراکسه و قبارطای اولوب جمله سی روسیه نک خصم جانی اولدقبری حالده بر مکمل اردو معینده قوللانیله جق خیف سواری عسکری دیمک اولدقبرندن اول امرده دشمنک آتشنه کوکس کرده رک لازم کلان موقعی طوته بیله جک بر منتظم اردونک ایجلیینه ادخالی لازم کلوب انابه اردوسی ایسه بر منوال مشروح هر وجهله ناقص و بوزوق دوزن اولسلیله بو حالده انابه نک امر محافظه سنی براغوبده ایلرویه حرکت موافق مصلحت دکل ایکن در سعادتجه اول حوالی احوالی کرکی کئی معلوم اولیوب ترتیب اولتان عساکر و ذخائرک نه مقدار ی محل مطلوبه واصل اوله بیلدیکی و محلنجه نه ترتیب قوللانمق لازم کلدیکی تذکر و تحریر اولنمشیزین همان دفتر ترتیباته نظر اولنهرق ایلرویه حرکت اولنسون دیو اصرار

اوانه کلدیکندن حادث اولان وقعه مذکوره قوه موجوده دخی مضمحل ایدرک اناپه قلعه سنی بر حال خطر و تهلکیه دوچار ایتشد .

سالف الذکر محمد بک محاکمه احواله کلتجه بعض اوراق رسمیه ده کوتایسلی محمد بک دیو کوریلوب بعض مورخین دخی بوسفرده واقع اولان غیرتی ثنا ایلمشدر اما هاشم افندی مرقومک ترجمه احوالی بو وجهه تحریر ایتشدر که مرقوم اجاره لی کرجی الاصل بر امرد ایکن اسفار سابقه ده جانیکلی حاجی علی پاشانک آدملی یاننده خدمتکار قلعه قریمه کیدوب انای محاربه ده قید اسارته کرفتار و بر روسیه جنرالسه خدمتکار اوله رق جنرال مرقوم ایله بر لکده قریمک درون و بیروننده کشت و گذار و مؤخرأ جنرال مرقوم قبارطه طرفنه مأمور اولوب کیتدیکنده دخی یانندن فرار و نوغای قبائلنه دخیل دوشوب بر مدت ایچلرنده کزه رک ابازه طرفنده استقرار ایله قبائلک رسم و عادتلرینه کسب و قوف ایتدکن صکره بر ایکی رأس اسیر ایله بر سفینه یه راکبأ در سعاده کلدیکی ائنده اسیر پازاری تجارندن بیجان اوغلی علی پاشانک میر میرانقله اناپه محافظی اولدیغی لدی الاستماع طوغری علی پاشایه واروب و کندوسنه یالکیز بر عنوان شرف اولق اوزره باد هوا خزینه دارلق خدمتیه بر لکده عزیمت ایده جکنی بیان ایدوب اولدخی بو صورتی جاننه منت بیلهرک مرقومی اناپه یه کوتوردکده ناسک ظاهرین اولنلری آنی بر مدت صحیحأ خزینه دار بیلور لر ایدیج . بعده اسیر تجارتیه در سعاده کلوب بو مناسبتله اولیای امور حضراتنک دائره لرینه کسب تردد ایدرک بو طرفده دخی کندوسنی بکزاده و کشی زاده طانیدوب حتی قبائل خلقی کویا بستون کندو رأیله عمل و حرکت و عهده سنه وزارت و بر لسه کافه سی تبعیت ایده جکلرینه دائر قبائل طرفندن محضر کونه مهمور و مصنوع کاغدلر ابراز ایتک و قبارطای اهالیسنه اعانه بیورلدیغی حالد روسیه ممالکنه آقین ایدرک شهر و قریه لرینی خراب و یسبب ایده جکلری بی اشتباهدر دیمک کبی صنعه لر ایله و کلای دولتی فریفته ایتد کد نصکره بطل پاشانک قبارطایه کیتسنی واکر بو باده بر کونه اعتذار ایلر ایسه اعدام اولنسون دیو یاننده بولنه جق مباشرک یدنده بر قطعه خط هایون بولمنسنی حسن تدیر اولق اوزره و کلای دولته ارانه ایدرک بو صورتی فعله کتوروب و بطل پاشانک دخی بر از عطیه آلق غرضیه مواجهه اعدایه وارد قدده مباشرک یاننده بویله بر خط هایون اولدیغی سولیوب نهایت جان خوفیه بطل پاشانک ترک دارات وزارت و اختیار قید اسارت ایتسنه سبب مستقل اولدقد نصکره بتکرار بش اون نفر ابازه بی دولت علیه دن سزه پای و تفنک و سائر اشیا هدیه لری الیویر یرم بن نه دیر ایسه م سز

دخی قبائلک سوزی بزده در دیه رك بنی تصدیق ایدیكز دیو الدادوب استانبوله
 كتوره رك برشیدن خبری اولمیان بیچاره لرك لسانلردن باب عالی به تقاریر مصنوعه
 تقدیم ایله ینه دولت علیه دن وافر اموال و اشیا اخذ ایله انابهیه عودتی ائساننده
 باغچه قیوسی داخنده فقیره تصادف ایدوب حقیقت حالی سویلمیهیم دیو امان بنی
 تصدیق ایت شمدی بکا محمد بك دیرلر دیو رجا و نیاز ایلدیکنده افندیلریمز
 حقیقت مادهینی سؤال ایدرلر ایسه طوغری سویلمکه مجبورم دیو رد جواب ایلدم
 دیو هاشم افندی تحریر ایلمشدر . بزینه صده کلهم .

مذکور حادثه خبیعه دنصکره ادیب تاریخنده بیان اولدینی وجهله برمنوال سابق
 رؤسای عساكر و قبائل وقوع حالی عرض وانها و سرعسکر دیگر ارسال بیورلمسی
 استدعا ضمننده محمدبکی محضرایله درسعاده ارسال ایتلمریله و جانیکولر دائره سندن
 نشئت و بین الناس فرط شجاعت و درایتله کسب شهرت ایتمش اولان سالف الذکر
 صاری عبدالله پاشاکه نیجه زماندنبرو ارضروم و طربزون کبی ایکی جسم ایلته
 والی و کیف مایشا متصرف و مستولی اوله رق کلی ثروت و یساره مالک اولوب
 اقدیجه انابهیه سرعسکر نصب اولنق نیتیه طربزون طرفنه جلب و اول امرده
 خفی اوله رق انابه سرعسکری نصب اولنمش اولسیله بطال پاشا حادثه سی درسعاده
 منعکس اولدینی کبی درحال عبدالله پاشانک انابه سرعسکرلکی اعلان و برآن اقدام
 حرکت ایتسی کندویه امر و فرمان بیورلمش ایسه ده اودخی افندیسی مرحوم
 علی پاشاکبی اول حوالیده کسب نفوذ و استقلال ایچون انابه مصاحتی برطرفه
 براغوب همان برطاقم دره بکاریه جنک و جداله اشتغال ایتدیکندن و انابهیه کیتیمی
 ایچون استیجال اولدنیقه بوکون یارین دیو برطاقم اعذار واهیه سرد و ایراد ایله
 برسنه قدر بیهوده و قتلر مرور ایدرک بو انتظار ایله انابه لویه و قبائل خلقنه دخی
 فتور کلدیکندن روسیه لو بوفرستی غنیمت بیلوب اوخنجی دفعه اولق اوزره
 انابهیه هجوم ایتمشدر .

شویله که : روسیه لو بطال پاشا غائله سنی برطرف ایتدکنصکره قبائلک کیمیسنی نهب
 و ضرب و کیمیسنی طرفنه جلب ایدرک ایشنه نظام و یروب بعده انابهینی محاصره
 ایتدکده ینه قبائل آرقه سندن آیرلمیوب ایچلرنده بولتان محمد کرای سلطان ایله برابر
 و سعاری مرتبه سی ایدرک خارجدن روسیه سواریمی ایله محاربه دن خالی اولمدیلر
 درون قلعه ده دخی یرلو و یبانتچی اوله رق اون بیکنن زیاده آدم اولوب قلعه نك
 استحکامی دخی اولکی دفعه لردن زیاده اولسیله روسیه لولر تسخیر قلعه دن مأیوس
 اولوب حتی برقاچ گونه قدر عودته قرار و یرمش اولدقلمی صکره دن طوتیلان

دیالردن خبر آلمشدر . و عبدالله پاشا اکر قوسى خلقیه اناپه وارمش اوله ایدی روسیه لو قاعه اوزرینه بيله کله مز ایدی هر نه حال ایسه بو منوال اوزره اون اوچ کون قدر طوب جنکی اولوب اون دردنجی کیجه روسیه لولر کیجه ساعت یدیده یورویش ایتدکلرنده قاعده اوزره ایچرودن طوب و تفنک ایله مقابله لازم ایکن بر مقدار عسکر قلعهدن طشره خروج ایله دشمن اوزرینه هجوم ایدوب در عقب منهزمآ عودت ایتلریله اعدا فرصت بولوب بوزغون عسکر ایله برابر قلعه یه دخول ایله بر ایکی ساعت قدر مملکت ایچنده یقه یقه جنک اولنوب و حتی طائفة نسا دخی بر طرفدن آناج و طاش ایله بر مدت مدافعه ایدوب انجماکار قلعه اها لیسندو ضعف کلی بیدیدار اولیجق محافظ بولنان ایکی زاده وزیر مصطفی پاشا و دقتدار اولان ممش افسدی قید اسره گرفتار اولمغله روسیه لولر بوسورتاه اناپه استیلا و دروننده بولنان رجال و نسوانی قریم طرفه امرار ایلدیلر .

قلعه مز بوره عن اصل بر قاچ طایسه و بر خندقدن عبارت و دروننده بولنان مستحفظین دخی اقل قلیل ایکن روسیه لو ایکی دفعه کی هجومنده منهزمآ و خاسراً عودت ایتشیدی . صکره دن قلعه یه کلی استحکام و یریلوب دروننده کلی عسکر دخی موجود ایکن روسیه لونک بر یجق ساعت ظرفنده بوزغون عسکر ایله برابر قلعه یه دخول و استیلاسی محیر عقول بر کیفیت اولدی دیوبعض مورخین تحریر ایتشدر . بوندن صکره یه امرای قبائله استالتامه لر کوندریلوب و تکرار عسکر و سر عسکر کوندریله جنکی کبی و عدلر اولنوب فقط صغوج قلعه سی مأمورلری دخی قلعه یی تخایه ایتمش اولدقلرندن صخوم و فاش محافظه سی تدارکاته تشبث قلمشدر .

* وقایع بحر سیاه *

قپودان دریا حسین پاشا دونمى هایون ایله قره دکزه عزیمت ایدولیدنبرو دشمن دونمى جستجو ضمنتده روم ایلی و اناطولی سواحلی کشت و گذار ایدرک (۲۰۵) سنه سی ذی القعدة سنک او اخرنده اناپه صولرینه وصولنده استیلا اولدیغی کور یجک اورادن عودت و اولیته لیمانه طوغری عزیمت ایدیکی ائشاده روسیه دونمى دخی صغیر و کبیر قرق ایکی قطعه سفائندن عبارت اولدیغی خالد لیمان مذکوردن چیقمش بولمغین فریقین بر برینی کوردرک جنکه آماده اولوب انجق هواده سکونت اولدیغندن طرفین قارشودن بر برینه ناظر و روزکاره منتظر اولدقلری ائشاده روسیه دونمى منه موافق روزکار اسمکه باشلامسیره همان جنکه مباشرتلى ملحوظ ایکن روسیه امرالک و رودینه منتظر اولدیغی چند قطعه قیاقلر هنوز وارد اولدیغندن قوه موجوده سی ناقص اولمق حسیهله جنکه جسارت

ایده میوب زیر وبالایه اولطه اوره رق برتقر یسبه دونمائی آولتسه لیمانه ادخال
ایتدکده قپودان پاشا لیمان اغزینه کلوب بر مدت دشمنی جنکه دعوت صورتیسه
توقف ایتمش ایسه ده روسیه لولر اصلا باش کوسترم دکرنندن و دونمائی هایونده
دخی صوآزالدیغندن قپودان پاشا اورادن دخی عودت برله کلغراد پیشگاهنه کلهرک
لنکر انداز اولدیغنی ائشاده روسیه لولرک منتظر اولدقلری قباقلر کلوب دونمالرینه
ملحق اولمش ایدوکنندن هان لیمان مذکوردن خروج ایله کلغراد صولرینه کلک اوزره
اولدقلرینی دونمائی هایون قره قوللری کوروب فی الحال دشمن علی الغضله باصمق
داعیه سیله کلیور دیو قپودان پاشایی خبردار ایلدکلری آنده که ذی الحججه نک اوننجی
وتموزک اوتوز برنجی کونی یعنی عید اضحانک ایتداسی ایدی قپودان پاشا در حال
دونمائی هایونه مهما ممکن نظام ووروب انجق روزکار جانب اعدایه مساعد اولدیغندن
روزکار اوسته چیقمغه سعی ایدرک اعدایی استقبال صورتیسه دریاه آچیلدیغنی
خلالده بین الناس فرط شجاعته مشهور وبنام اولان سیدی علی قپودان رفقاسی
اولان جزائر و تونس قپودانلریله برابر قپودان پاشادن آروجه دوشدکلری حالده
روزکار اوسته چیقمش بولملریله سیدی علی قپودان ساعت طقوز بچقمده ایکن
راکب اولدیغنی قپودانه هایون ایله دشمن دونمائه هجوم صدندده اولوب اگرچه
منفرداً دشمن دونمائه هجوم خطر وضرری درکار ایدوکی بعض اشارات ایله
کندویه افاده اولنش ایسه ده آق دکزده قورصان جنکنه مألوف اولدیغندن اراده سی
الدن کیتمکله تجار کیملرینه رانیه ایدرکی هان دشمن دونمائه ایچنه صالدریوب
فی الواقع درت طرفه آتشلر صاحقرق برخیلی سفائن اعدایی رخنه دار ایتمش ایسه ده
یاکزر اولدیغندن سفائن اعدا درت طرفدن احاطه ایدرک ضرب طوب ایله قپودانه
هایونی زیاده جه رخنه دار ایتدکلرینی دونمائی هایون قپودانلری کوروب غیرته کلهرک
شربت اوغلی وسائر قپودانلر امداده یا شملریله قپودانه بی تخلص ایلمشله ایسه ده
بو حالت جمله سنک پریشانلغنه سبب اولمغله سفائن اسلامیته نک قانون محاربه اوزره
هر بری کندو اقرانیله برر برر جنکه موفق اوله میوب محاربه به ظفریاب اولان
یاکزر اون بش کیدن عبارت اوله رق سائر لری تقرب ایدمه دکرنندن بشقه دشمن روزکار
اوستنده بولنق حسیله سفینه لرینی دیلدیکی کبی قوللانمغله ایچلرینه دوشن سفائن
اسلامیه بی اوشوندی ایله طوبه طوته رق رخنه دار ایتمشله ایکن ینه غزات اسلامیته
اظهار غیرت وشجاعت ایلدکلرندن روسیه دونمائه دخی خیلی خسارت وقوعه
کلهرک کیجه ساعت بره دک محاربه تمت اولوب بعده روسیه لولر طرفدن بایدوس
ایچون ایکی کره بوش طوب آلمغله بر مقدار طرفین بر بردن افتراق ایله هر

کس زیاتی یوقلایه رق ینه جنکه حاضر اولوق اوزره صباحه منتظر اولمش ایدی .
 انجق قپودانه هایونک غایه سی شکست وسیدی علی قپودان مجروح اولغله محل
 جنکدن ایرلدقده طوغری بوغاز جانبی استیوب سائر رخنده دار اولان یدی سکنز
 قطعه سفائی دخی قپودانلری آلوب قپودانه هایونه تبعیله بوغازه طوغری عزیمت
 ایتملیله قپودان پاشا کیجه حائده مرقوملرک کیتدکلرینی تحقیق ایدمک و رالرنده
 اعاده لری قیدیله اون میلدن زیاده مسافه قطع ایدوب اعاده لری قابل اولمدیغندن
 بالضروره دریاه آچیلوب تعمیر سفائله مشغول اولمشیدی .

روسیه دونمسنک دخی اگرچه کلی خساری وارایسه ده روسیه امرالی دونمای
 هایونک تفرقی و میدان کندویه قالدیغنی تحقیق ایدمک بلاتحاشی روم ایل ساحلنده
 امنه نام محل پیشکاهنده لنگرنداز اوله رق رخنده دار اولان سفینه لری تعمیره
 ومجروح لری تیاره باشلا یوب حتی برقاچ قطعه سفینه سی عمل مانده اولمسیله محل
 مرقومه آتش ویردیکی کورلمشدر .

بعده قپودان پاشا موجودلری تعمیر ایله ینه اعدا اوزرینه عزیمت سوداسیله
 اوچ کون دریاه آچیلوب روزکار اوسته چیمق قیدنده اولدقجه بامرالله تعالی
 غایت شدید یلدیز پورازی قارشولوب بولندقلری محلدن برخطوه ایرویه کیتمه
 امکان اولمدیغندن غیری ظهور ایدن بوره وفورتنه لر بعض سفینه لرک دیرکلرینی
 اوچورمغله خواه وناخواه بقیه سفائی دخی آلوب بوغاز آچیققرینه گلدیکی حوادثی
 هرکسه وهم ووحشت ویرمش وکیفیت رکاب هایونه عرض اولندقده مرما تلرین
 ایدوب ومجروح لری جیقاروب بعده ینه قره دکزه عزیمت ایتمک اوزره
 بوغازدن ایچرویه دخوللر ینه رخصت سنیه ارزان بیورلمغله دونمای هایون
 بوغاز ایچنه کیرمشدر .

تلفات ومجروح لری یوقلاندقده بیکنن زیاده شهید و اوچویوزی متجاوز مجروح
 قید دفتر اولتمشدر .

ادیب وواصف تاریخچرنده بومنوال اوزره مسطور اولوب انجق انورینک خارجدن
 استماع ایله یازدیغنه نظراً بوملحمه ده سیدی علی قپودان ایله معیتده بولان جزائر
 وتوس قپودانلری ورفقاسی اولان سائر قپودانلر دلیرانه مثلی نامسوق برجنک ایلمشدر
 لکن قپودان پاشا طرفندن اعانه ده قصور اولمش واکر آنک طرفندن دخی غیرت اولمش
 اولسه ایدی اعدادن کرکی کبی اخذ انتقام قابل اولور ایدی دیو مرویدر .

هرنه حال ایسه دونمای هایونک بوضورتله عودتسندن قره دکزه امنیت تاهه
 قالمیوب ابتدا قره دکزه بوغازینک محافظه سی ایچون عساکر ومهمات کافیه ترتیبه

ابتدار و برمنوال سابق روسیه لولر اقدمجه اناپه بی دخی استیلا ایتش اولملریاه اناتولی جانبنده واقع سواحل بحر سیاهک محافظه سی لازم کله رک میرمیراندن قوغو زاده سلیمان پاشایه درحال طربزون ایالتی و بطلال پاشا زاده خیرالدین بکه رتبه میرمیرانی و وان محافظی احمد پاشایه رتبه وزارت ویریه رک اولطر فلرک محافظه لری کندولرینه امر و اشعار اولمشدر . دونمانک بویله بی وقت عودتندن سلطان سلیم خان حضر تلیری پک زیاده متاثر اوله رق برمنوال سابق دونمای هایون ایله قپودان پاشانک بوغازدن ایچرو کیرمسی استیداننه دائر قائم مقام پاشا طرفندن تقدیم اولنان تقریرک بالاسنه (بوغازدن ایچرو کیرمسنه اذن هایونم اولمشدر . لکن قپودان پاشایه بوسفری برشیئ منتج اولدیغنی و اناپه یه امداد ایدمه دیکین ودونوب وقتسز کدیکن تفهیم ایدوب کندویه وجهه قپودانلره مغبرال خاطر اولدیغ سویلیه سین آنلردن بویله مأمول ایتزدم یازق آنلره اولان التفاته) دیو خط هایون کشیده بیورمشیدی . بزکلم سردارا کرم اردوسنک احواله .

* نچمه مصالحه سیله روسیه متارکه سنک انعقادی *

برمنوال سابق ماچین قصبه سنده ظهوره کلان تفرقه عسکر یه دن صکره یه حرصوده جمع عساکر و ادخار مهماته ممکن مرتبه سی اولنوب تکرار اردوی هایونک ماچین طرفه حرکتی تحقق ایلدکده یکچیری ایله ارناود عسکری بینده شقاق و عداوت ظهوره کلمکدن ناشی تقریرلری تسبب اولنغین روم ایلی والیسی وزیر مصطفی پاشانک احراز ایتش اولدیغی اردوی هایون سرعسکرلکی عنوانی یه تقریر وابقا و ارناود عسکری جمعیتنه علاوه اولنوب اشبو (۲۰۵) سنه سی ذی القعدده سنک اون التنجی کونی متوجه سمت اعدا اولمشیدی حرصوده دن تخمیناً بش اون دقیقه انفصالنده عات نزول ایله وفات ایتدیکندن بالفعال یکچیری اغاسی بولنان وزیر پکمزجی محمد پاشایه روم ایلی ایالتیه اردوی هایون سرعسکرلکی و مقدا ماچینده غیرت و حمیتی مشهود جنود اولان اسبق قول کتخداسی سلیمان اغایه یکچیری اغالغی توجیه و عبدی پاشا دلی باشیسی ترکان اوغلی اسماعیل اغا بهادرقله نامدار اولدیغی حالده باشنده وافر دلی عسکری اجتماع ایتش اولدیغندن عهدده سنه میرمیرانلق احسان بیوریلوب چند روز طرفنده خلیجه ذخائر و مهمات تدارکی دخی میسر اولمسلیاه و عساکر متفرقه نک بعضیسی فکر انجاسکار ایله حرصوده عودت و بعد مسافه تقریبیه اولکی معرکه یه یتشامش اولان بقسایای عساکر مرتبه دخی بوخاللده اردوی هایونه مواصلت ایلمش اولدقلرندن اردوی هایونده اولدقجه حرکت قدرت مشاهده اولنغله همان ذی القعدده نک اون یدنجی کونی اردوی هایون ایله سردارا کرم دخی حرصوده دن حرکت و اوچنجی کونی

على الصباح ماچينه مواصلت ايلدكده متريس حفرينه مباشرت اولنوب انجق پيادەنك
 قلتى ويكيچريلرك رخاوتى حسيبله متريس حفرنده خيلى زحمتلر چكلمشيدى .
 بوندن صكره پكمزجى محمد پاشايه ابرائيل سرعسكرلكى تفويض اولنوب مأمور
 معيتى اولان عساكر ايله قارشو طرفه امرار وبواننده قلاص مقابلنده واقع آطهده
 مجرداً انشا اولنان طابيهيه مأمور دالقليج نفراتنه ميرميراندن كرجى عثمان پاشا
 باشبوغ تعيين قنوب بعده بعض مورخينك افادهسنه كوره طرف سردارا كرميدن
 كندوسنده وزارت لياقت ملاحظه اولنهرق جنسيت دخى محرك عرق حيت اولغله
 عهدهسنه رتبه وزارت احسان بيورلمشدر .

بووجهله بعض تدابير حريبيه تشبث اولمش ايسهده مقدمكى وقعهده مهمات
 وذخائر اكثري تلف اولوب عساكرده ايسه ثبات اولمديغندن قارشو طرفه
 مرور ايله اعدا اوزرينه هجوم ايتمك شويله طورسون اكر اعداينه طونهنك
 بروطرفه مرور ايدجك اولور ايسه عساكر اسلاميه بلامحاربه موقع حربى ترك
 ايله يوللرده اموال ناسى غارت وبربرينى اتلاف ايدرك فرار ايدجكلرى متبادر
 خاطر ودولت عليه ايله تحفظى وتجاوزى عقد اتفاق ايدن پرسوسيالو دخى متعهد
 اولدينى اوزره اعلان حرب ايتيوب اتفادن غرضى نه اولدينى ظاهر وسوارى
 اوجاقلرى ايچنده برنوع فساد محسوس اولوب مأمور اولدقلى محلك محافظهسنى
 ترك وبرقاج بيك آدم ايله شعنىيه توجه ايدجكلرى متواتر اولغله اردوى هايونه
 خلل طارى اولدن وعساكرده اولان اختلال قوت بولمى دشمنك مزاجنى
 يوقلامق وحاله موافق كلور ايسه صلح ايلمك قراركير اهل مشورت اولمغين سردار
 اكرم طرفندن روسيه سركردهسى اولان ربنين نام جنرال برمكتوب يازيلوب
 شويلاه كه: ير كوك كوتورمز عسكرايله ماچين صحراسنه نزول ايلدك حربك نتيجهسى
 امر موهوم وبوكره غلبه نه طرفده ظهوره كلهجكى نامعلوم اولدينى حالده دولت
 عليه جنكه حاضر اولدينى كې فقرا ورعايانك آسايش واستراحتى وسفك دما
 ماده سنك برطرف اولمى ايچون صلحه دخى آمادهدر درجه مأموريتكزى افاده
 وبرمتعين آدمكزايلاه اساس صلحى ارسال ايله سكر ديواستمزاج اولندقدده روسيه
 سركردهسى اولان جنرال ربنين دخى اساس اولهرق اوچ ماده بيانيله اردوى
 هايونه برالچى كوندرمشيدى .

(ماده اولى) قيتارجه صلحى وبهده واقع اولان معاهده لر شروطى مرعى اوله .

(ماده ثانيه) افلاق وبغدان مملكتلرى منفعتلو شروط ايله دولت عليه استرداد اولنه .

(ماده ثالثه) طوروله دن قطع حدود اولنه .

مواد مرقومه ارباب مشورت ايله استشاره اولندقدن صكره بعض مرتبه حظ وتزيلي

ضمننده بواساس انصاف و اعتدال در جهل نردن خارج اولوب توسيع و تنقيحی و مهمل
ذکر اولنان موادك تصريحي لازمدر زمينده جنرال ربينه بر مکتوب يازلمش ايسه ده
بنم مأموريم بودر جهل رده اولوب تغيری دائره عهده مدن خارجدر و نتیجه کلامی
من غير قصور افاده ايلدم بوندن صکره سؤال و جواب عبثه اشتغال قیلندندر اگر
بواساس قبول اولنور ايسه مرخص تعيين اولنسون قبول اولنديغی صورتده آدم
کوندلمسون مألده جوابنامه ارسال ايله قطع رشته قيل و قل ايلديکی خلالده طرف
شاهانه دن دخی مذاکره صلح ايجون اذن ورخصتی حاوی خط هايون گلش اولديغنه
مبنی قوبان خانی بختکرای خان ووزرا ورجال و او جاقلو ايله تکرار مشورت اولندقدده
فقدان اسباب حسيله و جوب صلح خصوصنده جمله سی متفق اوله رق رجال
دولت عليه دن برينک مأموریتی تنسيب اولنغله مورخ و اصف افندی بالانتخاب اوچ
بش نفر اتباعيله ابرائیل سرعسکرينه بعض و صایا تبليغی عنوانيله قارشويقه يه امرار
اولنوب قارشو طرفه مرورنده هان قلاصه ورود و جنرال ربين ايله بالملاقه
مکتوب صدر اعظمی بی تسلیم ايتدکده مذاکره مصلحت يارينه توقيف اولنغله
فرداسی و اصف افندی جنرال مرقومک قوناغنه واروب مکالمه يه مباشرتلی
هنکامنده جنرال ربين سوزه باشلايوب دونمالر بر برينه پک زياده تقرب ايله جنکه
مهيا در لر حالبوکه ايکی دولت عن صميم القلب مصلحه يه ميل اتمشیکن دونمالر بو کيفيتدن
بی خبر اولملر يله شايدکه يکديکره تصادف و تصادم برله بومصلت خيره يه خال
ويره لر نهايت ماده معلوم اولنجه دک توقف و سکونلری مناسب کوريلور سزدخی
مناسب کورر ايسه کز روسيه دونماسی امراله برکاغد يازه يم کذلک صدر اعظم
دخی قپودان پاشايه برکاغد يازسون قریت حسيله طرفينک کاغدلری دخی صدر
اعظم طرفندن علی العجله دونمالره ايصال اولنسون جانين مأمورلری غایت امره
منتظر اولسونلر دیدکده و اصف افندی دخی بحسب المصلحه تنسيب ايتکله جنرال
ربين همان روسيه امراله خطاباً بر مکتوب يازوب و اصف افندی يه تسلیم او دخی
مکالمه ورقه سيله برابر صدر اعظم جانبنه ايصال ايتکين اردوی هايونده مجلس
مشورت عقد اولنهرق کيفيت درميان اولندقدده اردوی هايونده بولنان عقلای
رجالدن بر شخص صاحب وجود دشمن بزم دونماده قوت و غلبه فهم ايدوب
در ياده محاربه واقع اولور ايسه مغلوب اوله جقلرينی تيقن ايلديکندن ناموس دولتی
محافظه ايجون بو وضع غريب غير مأمولی اختيار ايلمشدر بنم بيلديکم بو کاغذک ارسالنده ضرر
واردر دونمازک صورت حاله نظراً قوت و مکتبی اولوب بر مصلحته موفق اولور سه ق
مصلحه فائده لو اولور دیدکده کاغذک ارسالنده فائده درکار اولديغنی ادر ائک ايدن ارباب
عقل شعور سکوت ايتکله مجبور اولملر يله جنرال ربينک کاغدی اردوده توقيف اولنوب چند

روز مرورنده برمنوال سابق دونمانك منكسراً قره دكر بوغازينه چكديكي خبر آندی واكر جنرال ربنيك كاغدی وقتيله روسيه امرالنه ایصال واو مآلده صدر اعظم طرفدن قبودان پاشايه دخي برمکتوب ارسال اولنش اوله ایدی دونمای هایون سالم قالور ایدی لکن عقلا دن کینن بریادكارك رأی سقیمي بوفالغه سب اولدی دیو واصف افندی تاریخنده تصریح ایتمشدر .

الحاصل هرجهته صلحه لزوم کورنمش ایسه ده برکره اولسون روسیه یه غایه اولنوبده صورت غالبیتده عقد مصالحه اولنق ملتزم پادشاهی اوله رق برمدتنبرو بو صورتك استحصالنه چالیشلمش اولوب حالبوکه کیتدکجه طرف اسلامیانده آثار مغلوبیت تأکد وتزاید ایتمکده ومدت میدیده دنبرو در دست مکالمه اولان نمچه مصالحه سی هنوز قرارگیر اولماسیله دولت علیه نك او طرفدن دخي امنیتی منسلب اوله رق بر خیلی عساکرینی احتیاطاً نمچه سر حدلرنده توفیقه مجبور اولوب حتی اشقودرلی محمود پاشا اوتوز قرق بیک عسکرا یله ودین جانبنده مصالحه یه انتظار ایله توقف ایلدیکنه نظراً نمچه غایه سی دخي بتمامش حکمنده اولدیغندن روسیه جانبنده دخي برایش کور یله میوب دولت علیه جه هروجهله مصالحه یه مجبوریت حاصل اولغله واصف افندی برمنوال سابق قلاصده متارکه مکالمه سنه مأمورقلنه رق مهما امکان ذکر اولنان مواد ثلته نك تعدیل وتقیحنه سعی اولنش ایسه ده جنرال ربنيك رخصتی محدود اولغله قطعی المفاد اوله رق عرض ایلمش اولدینی اشبو مواد ثلته نك تغییری الندن کیه جکنی بیان ایدوب انجق ایکنجی ماده ده مندرج اولان منفعتلو شروط ایله قیدی قینارجه مصالحه سنده وآندنسکره منعقد اولان معاهده لرده درج اولنش اولان منفعتلو شروط ایله افلاق وبغدان دولت علیه یه رد اولنه دیو شرح وایضاح اولنق وطورله یه کلنجه روسیه دولته ترک اولنان مللک استحقاقاتنه دائر وافر بحث اولنوب تنظیمی اشبو مصالحه خیریه نك تکمیلی ایچون جمع اوله جق مرخصلرک سعی ودقته حواله اولنمشدر وسائر لرده اولان سنورلر اشبو محاربه یه کلنجه نوجهله ایسه یه اولوجهله اوله دیو دیگر ایکی ماده علاوه سیله بش ماده یی حاوی برقطعه اساس سندی تنظیم ایله بونک اوزرینه متارکه سندرلی قلمه آلتق اوزره راضی واون کون بومکالمه لرایله منقضی اوله رق بوندن زیاده یه رخصتک تحملی اولدیغنی وبووجهله کوستردیکی تنزل جزئی دخي حوصاه مأموریتندن خارج اولدیغنی حالده حجر دآسایش طرفین ایچون کندو طرفندن برنوع جسارت قیلنندن اولدیغنی تصریح وفیبا بعد احوال صلحه دائر برشی تفوه اتمیه جکنی وسند تمهیر اولنوبده اردودن کلدیکی تقدیرجه واصف افندی نك اعاده اوله جغنی کسندویه تلمیح ایتمکله واصف افندی کیفیتی علی التفصیل اردوی هایونه تحریر ودولت علیه یه جنک وصاح

شقرینک قغیسی خیرلو ایسه بالاختر طرفه امر و اشعار بیورلمسی عرض و انها ایلدیکی اننده زشتوی مکالمسی دخی ختام بوله رق ذی الحجه نك او چنجی کونی نمچه مصالحه سنک انعقادی خبری اردوی هایونه واصل و بو صورتله دولت علیه نك نصف غائله سی زائل اولمش ایسه ده اردوی هایونك پریشانلی کالده اولدیغدن ماچینه بر بیوک مجلس عقد اولنه رق و اصف افندیك انهای حصاره تبلیغ و تفهیم اولدوقده اردوی هایونك ماچینه وصولده متریسلره تعیه اولنان پیاده ایکی بیك بشیوز قدر اولوب آنلر دخی کل یوم آزر آزر فرار ایدرک آزالقده درلر سواری عسکری ایسه طوبه وار میوب ادنی بهانه یه مترصد اولدقلری بی اشدباهدر و دشمن او کمزردن و یاخود آرقه مزدن ظهور ایتمک لازم کلسه مقاومتک امکاتی اولمیوب بو فرصتک فوتیله ندامت مقرر در دیو اهورن شرینی اختیار قیلندن اولمق اوزره صلحی ترجیحده جمله سی اتفاق و رکاب هایونه عرض اولتمق شرطیله واقع حالی مبین سند دخی اعطا ایده جکلرینی عرض و بیان ایتملیله اساس مذکور قبول اولنه رق آنک اوزرینه سکز ماه مدت تعیینی ایله امر متارکه قرار گیر اولغله اشبو ذی الحجه نك او ننجی و تموزک او تونز برنجی کونی قلاص قریه سنده سندلر مبادله اولنه رق فر داسی و اصف افندی عودت ایلمش و جنرال ربینک یالکز اساس وضعنه مأذونیتی اولوب مواد سائرده مارشال پوتیمینک رأینه مفوض اولدینی حالده قریباً قلاص اردوسنه کلمک اوزره اولدیغدن محل مکالمه تخصیصی و مرخصلرک تعیینی آنک کلسنه توقیف اولنمشدر .

و اصف افندی بو مقامده غریبه اولمق اوزره بر فقره یازوب دیرکه : وقت و حالته نظر آ انعقاد متارکه خیر محض اولوب وقت و زمان مساعد ایکن تنظیمنه اقدام اولتمق خصوصی آن بان وزیر پکمز جی محمد پاشا طرفدن تشویق اولندی وقتا که جمله اتفاقیله مصالحته نظام و یریلوب صدر اعظم طرفدن متارکه سندی تمهیر اولندی ایسه وزیر مشار الیه وسعت صدرایله ابرائیل جانبنده اولان اردوسنه کچوب عالی و اسافل ناسه صدحیف که روز مصاف ایچون بیله دیکم سیفمی خون اعدا ایله آلوده ایتمدن مقدمه مصالحه صورتیاب حصول اولدی دیو اظهار تأسفه باشلامشیدی وقتا که قلاصده سندلر مبادله اولندی ایسه ایکی دولت عسکرینک شکرانه سلامتلی ایچون روسیه جنرالی طوب شنلکی سپارش ایدوب تخمیناً یوز قدر طوب آتدقلر نده پکمز جی محمد پاشانک متریسنده اولان پیاده لر آهنگ احتمالی و یروب دشمن باصدی دیهرک متریسلری ترک ایله ابرائیل قلعه سنه عزیمت ایتملیله اعاده صورتنده محمد پاشانک دخی آرقه لر ندن خیلی منزل قطع ایدوب بو خبر ماچین متریسلرینه منعکس اولدوقده قضیه تبدیل مکان آنلره دخی سرایتله اوراده دخی بو حالت ظهوره کلدیکی کبار قومک معلوملری اولدوقده جمله سی بویله رابطه سز عسکرله خصمه مقاومت ممکن اولیه جغنی جزم ایستدیلر .

شوحالده هر نصل اولور ايسه اولسون مصلحتی صلحه بتورمك فریضه دن اولدیغی مسلماتدن ايسه ده قریمی تسخیر قصدیله كشاد اولنان اشبو سفرك نتیجه سنده طورله دن قطع حدود اولنه رق اوزی ایالتك دخی روسیه یه ترك وفرانگی اساس سندنده مندرج اولمسیله صكره بوبابده هر كس قصوری بر برینه عزو واسناد ایدیه جكي و خصوصیه عسكری طائفه سی بز شویله كسر دك وبویله بچر دك دیه جككری بی اشتباه اولدیغندن وبووجهه مصلحه نزد شاهانده دخی مقبول اولمیوب غالبانه صورتده مصلحه مطلوب ایدو كندن سردار اكرم بوبابده متحیر واندیشه ناك اوله رق ذی الحجه نك اون برنجی پنجشنبه كونی ماچین سحر اسنده مجلس مشورت عقد اولمشیدی .

شویله كه : التي عدد وزرای عظام وبالجمله میر میرانلر ورجال دولت واو جاقراغالری وضابطلری وسائر خدمه دولت ابتدا كتخدا بكك چادرنده اجتماع ایلدك رنده كتخدا بك طرفدن حضاره خطاباً مصلحه و جنك ماده لرینك قفغیسی ترجیح اولنور ايسه صاحب دولت افندیمز بوكون جواب ایستر شوكتلو پادشاهمز جنك اولنوب دشمندن انتقام آلنسی و اویله جه شانلو مصلحه اولنسی خط هایونلریله امر بیور مشلر بناء علیه افندیمز جنك ایدرم وغیری درلو حرکت ایدیه مم دیورلر جواب ایسترلر مناسب اولانی بو محله بیان ایدوب صكره افندیمزك حضورنده دخی طوغریسی نه ايسه سویله سكرز دیمكله بین الحضار جنك وصلحه دائر وافر بحثلر كذران ایدوب هر بری عسكرك حالتندن بحثله كونا كونا شكایتلر ایراد و جمله نك بیلدیكي و تجربیه ایلدیكي وجهه عدم ثباتلری حالاتی و ادنی بهانه ایله فرار ایتمكده اولدقلری بی یاد وبو عسكرايه جنك اولنك امكانی اولدیغنی اعتراف و جمله سی صلح طرفنی ترجیح ایدوب بوراده و افندیمزك حضورنده و الحاصل دنیاده و آخرتده دخی بو وجهه سهویلر زغیری درلو دیه جكمز یوقدر دیدیلر بعده جمله سی خیمه صدراتپناهی یه احضار اولنلریله طرف صدر اعظمیدن جمله یه خطاباً اقدمجه دولت علیه ایله مسقولو بینلرنده عقد مصلحه ضمننده ربین جنرال طرفندن كلان كاغد سائر تحریراتمز ایله ركاب هایونه تقدیم اولنمشیدی انجق بودفعه وارد اولان خط هایون ایله قائم مقام پاشا طرفندن كلان تحریراتك مفهوم لرینه نظراً دشمن ایله جنك اولمقسزین مصلحه اولمق شان دولت علیه یه نقیصه بی موجب و مرام دولت علیه اوزره مصلحه نصل اوله بیلور طورله دن حدود اولسی طونه دن قطعدن نه فرقی وارد رهان بر طرفدن محاربه و بر طرفدن مصلحه مذاكره اولنسون و محاربه ده عون حقله بر غالبیت تحصیل اولنوب مصلحه نك شانلو اولنسی موجب اولسون بونلر جنك سمتیه اوغرامیورلر دیو باعون باری دشمندن اخذ انتقام اولنسی تا كید اولنمش ایشه مضمون خط هایون

بود بن شوکتلو پادشاه عالیشان حضرتلری طرفدن جنکه مأمورم بعد ازین
 مصالحی ترجیح ایدم سز دخی واروب عسکریکزی آماده ایدرک متوکلام
 علی الله حاضر اولک همان یاریکی کون جنکه شروع اولنه جقدر . بنم غیری درلو رأی
 ونیم قالدی دیوقطی وجهله افاده حال اولندقدده حصار مجلس برازسکوت ایتد کدن
 صکره اولامر پادشاهی به نایا اراده کزه امتثال جمله مزه واجبه ذمت ولازمه دیانت
 اولغله هر بریمز واروب دشمن اوزرینه حرکت قیام ایلرز . انجق بوامر عظیمک
 بر کره انجمانی دخی کرکی کبی ملاحظه وعسکریمیزک احوالی تفکر ایدم بوخسه نفسمره
 قالدور ایسه بز جانمزی فدا ایدرز اما بر کره دخی شور رابطه به خلل کلک لازم کلور
 ایسه دولت علیه به ترتب ایدم جنک خسارات کلیه ظاهر در وسواحل طونده بو قدر
 ممالک اسلامیه نک وباخصوص ابرائیل قلعه سنک و دروننده بولنان بو قدر عجزه
 ونسوان وصیبانک حاللری مطالعه ایدم اگر بزم فدای نفسمز ایله دشمنه غلبه
 وبوقلعه ومملکتک محافظه لری ممکن اوله بیلور ایسه بوندن اعلاشی اولمز لکن
 عسکریمز کون بکون بویله یاز ائناسنده فرار ایتمکده وبوقدر فراری طوتلدقچه
 بورونلری وقولقلری کسلیور وا کثیری قتل ایله سیاست اولنه یورینه ممکن
 اولیوب کل یوم ولیسه حسابسز عسکر قاققدده در قالانلر دخی بر ایکی یاغمووره
 باقیورلر جمله سنک کوزلری فرارده در بو حالده جنکه شروع ومباشرت ایدم
 دیسک دخی دشمن طونه نک قارشو یاقه سنده طونه ایله سیرت بیتنده طوپراغه
 کیروب متین ومستحکم طایبه ومتریسلر ایله وکلیتلو طوپلر وانواع ادوات حربیه
 ایله متانت ویرمش اطرافنی صو وبطاقلق احاطه ایتمش جنک اولندیغنی صورته
 میدان جنکی ایتنک امکانی یوق اولسه اولسه طایبه ومتریس ایله طوپ جنکی
 اوللی دشمن بزمه برقاچ آی طوپ جنکی ایدر طایبه ومتریسنه خلل کلز بزم
 عسکریمز طورمیوب وایکی کون طوپه طیانمیوب کیدرلر اما شمعی بواردوی
 هایونه مهما امکان رابطه ویریلوب وبوقدر پریشان اولمش عسکر خارق عاده
 قیلندن اوله رق جمع ایدیلوب دشمنه برکوسترش ایدم جنک قدر حال کسب ایلدک
 اگر دشمن برو طرفه کچوب جنک ایدم جنک اولور ایسه بو عسکر دن بری قالدیوب
 فرار ایدم جکاری وهان وزرا واونجاق ضابطانی واغالی برقاچ نفر آدم لریله
 قاله جقلری کون کبی آشکاردر . شمعی خیرلو ملاحظه مصالحه در واندن غیری
 چاره سنی بیلمیورز وبومصالحه هر نقدر مرامه موافق دکل ایسه ده مادامکه دشمن
 قارشو سنده یرو یریمزده متانت کوستریلیور شان دولت علیه له الحمد یرنده
 اوله رق نظام بوله جقدر والاجنکه شروع ایدوبده بر کره پریشانلغه یوز طوتار

ایسه دشمن شیریننوب انواع تکالیفه ابستدار ایده جکی و صکره مغلوبیت عاری اوزریمزده قاهره صلحه مجبوریت حاصل اوله جنی درکاردر صورت حالمزه نظراً مجبوریت یوغیکن بودفهلوق امر مصالحهیه شروع ایله ختام ویرلدکن صکره عون حقله مملکتلرمزه واهالی ورعایا مزه نظام ویروب و عسکره عارض اولان فتور برطرف قلوب هر بر خصوص کرکی کبی تسویه و ترتیب اوله رقی بش اون سندن صکره دشمندن اخذ انتقام ایله الیزدن کیدن قلاع و بقاءک استخلاصی چاره سنه باقلیدر والاغیری امکائی یوقدر دیو جمله حضار یکران وفاق اوله رقی جواب ویرجک صدراعظم حضرتلری مقابله ایدوب بوایشک هر درلوسنی ملاحظه ویکجه لرده خواب وراحتی کندیمه حرام ایدوب ایا شودشمندن نه تقریبه اخذ انتقام اولنور و بوعسکره نوجهله جنک ایتدیره بیلورم و فراردن منعلری نه یوزدن اوله بیلور دیو بحر افکار و اندیشهیه گرفتار اولشم یوقدر آدم اولدیریورم و یوقدر نفوس تکدیر ایدیوروز بر چاره بولنه میوب ینه عسکریمز قاقچقده در بونلری جمله بیلدم و تحصیل و قوف ایدم و عسکریمزک دشمن قارشوسنده ثبات ایتیمه جکی تجربه ایلدم بناءً علیه دولت علیه نک شو حالده شانی وقایه ضمنده مصالحه طرفه میل و رغبت کوسترمش ایدم انجق شمیدیکی حالده بن طرف شنشاهیدن جنکه مأمور اولدم خلاف رضای پادشاهی سرموحرکت ایدم دیمکله حضار ینه یکران اوله رقی بونک رذالت و مضرتی دولت علیهیه راجع اولوب بزلرکی عاجزلرک الندن نه کلور عسکر جنک ایتدیکی صورته شواطرافده قالان ممالک اسلامیه بی و باخصوص ابرائیل قلعه سنی صیانت لازم دکلی اردوی هایون شو محلدن برخطوه حرکت ایدم جنک اولور ایسه ابرائیل اید اعدایه گرفتار اوله جغنده ودها نیجه رسوا یلقر ظهور ایدم جکنده شهبه مز اولمدیغندن بومصالحه بی ترجیح ایدم یوزر دیملری اوزرینه سردارا کرم دخی بعدازین مصالحه نک ترجیحی خصوصی بن رکاب هایونه تحریر ایدم سز بینلریکرده مناسب اولانی یازوب قرارینی ویررایسه کر سز بیلورسکر دیدکن صکره مصالحه ایچون طرفیندن بالمخبره اساس سندی اوله رقی نهایت قرار ویریلان صورت تمسک قرائت ایله مضمونی جمله به تفهیم اولنوب ایشته دولت علیه مسقولو ایله بوا اساس اوزره صلحی اختیار ایدم جکدر بونی ملاحظه ایدوبده تمسکی تمهیر مناسبیدر دکلیدر و جنکه شروع ایدم لمعی ایتیمه لمعی بوکون معلوم اولمیدر بکا جواب ویرک نیم جنکدن غیری نیتیم یوقدر هر بریکره رخصت ویرلمشدرکه الله ایچون سولیسون یارین حضور باریده ایکی الم یاقه کرده در روز جزاده نه کونه جواب ویره جنک ایسه کر بونده دخی کم و ملاحظه ایتیموب طوغریسنی سویله یکر دیو خطاب

ایتدکده جمله سی صلحی ترجیح وسند مذکورک تمهیر اولنسنی تجویز وجهه نك
سؤال وجوابی و بوجلسك قراری بروجه تفصیل بر مضبطه یه درج و تحریر اولنوب
هربری بشقه بشقه تمهیر ایده جکلرینی بیان ایله دین ودولت عایه یه بز بومصلحتی
خیرلوعد ایلدك اما شوکتلو پادشاهمز بزلره عتاب ایدرایسه امرینه مطیع ومنقادز
بز دولت علیه نك شانی وقایه ودینمز خیرلو اولانی اختیار ایلدك . زیرا شو ابرائیلک
محافظه اولنوب طورمسی پریشانلقدن صکره تجمع ایتمش عسکرایله اردوی همايونك
شومحمله اولمسی تقریبیله اولوب دشمن اگر اردوی همايونك بوحالی بیلسه مصالحه یه
رغبت ایتیه جکی نمایاندر اما لله الحمد حاملزی کرکی کبی بیلمدیکندن صلحه راغب
اولدی . مع هذا صفوجق وناپه دشمن انه کجدی آنلری دخی بومصلحه ده رد
ایده جکلر اگر عوق و تأخیر سببیه دشمن ایکیوز بیکدن زیاده چراکسه و آبازه
قبائلی ایچنده برمدت طوروب قبولنمق لازم کلورایسه ردینی بردرلو تجویز ایتمز
بونلری ملاحظه ایدوب بو خدمته موفق اولمغه سسی ایده لم دیو مصالحه یه قرار
ویریه رك مجلس ختام بولدقده اساس مذکور اوزره متارکه صورتی طرف صدر
اعظمیدن دخی تصدیق و اشبومذا کرات وقراری عینیه بر مضبطه یه درج و تحریر
ایله جمله سی طرفندن تمهیر اولنه رق رکاب هایونه عرض و تقدیم قلمشدر .

واقدمجه محل مکالمه تخصیصی و مرخصلرک تعیینی پوتمکنک قلاصه کلکسنه توقیف
اولنمش ایدی متعاقباً قلاصه ورودی خبری آندوقده اولا بالخباره طرفین یکدیگرک
خاطرینی استفسار ایتدکن صکره تسهیل مصلحت ضمننده طرف صدر اعظمیدن
تشریفاتی مصطفی افندی ایله پوتمکنه زمینی یشم سراپا الماس ایله مزین بر قوشاق
وبر بوغچه اقمشه متوعه و قلاص اردوسی قوماندانی سالف الذکر جنرال ربینه
وطونه ده اولان روسیه دونماسی قبوداننه مناسب هدیه لر ارسال اولنوب بعده
بالخباره یاش قصبه سی محل مکالمه تخصیص اولنه رق طرفیندن مرخصلر بالاجتماع
مذاکره مواد مصالحه یه مباشرت اولنمشدر .

فلمنک دولتک مرخصی بروجه بالا ریشنباش مکالمه سنده بولندیفی کبی دولت
علیه ایله نمچه مصالحه سنده دخی متوسط اوله رق زیشتوی مجلس مکالمه سنده بولمغه
اول امرده دولت مشارالیهانک اجمالاً حال وموقعی بیان ایده لمده بعده زیشتوی
مکالماتک تفصیلنه ابتدار ایلیلم .

ندرلانده یعنی فلمنک دواتی اورویانک مشاهیر دول بحریه سندن بر جمهور بلند
اعتبار اولوب موقعی حسبیه انکلتره وفرانسسه دولتری بیننده منافسه و محاربه
ظهورنده کاه آکا وکاه بوکا میل ومماشات ایتک مقتضای بولتیقه سی اولدیفی حالده

امر تجارته خلل ویرماید ایچون بیطرفلق سمتی ترجیح ایده کیش ایکن اقدجه
 نمچه دولتیله محارب اولمق ملاسه سیله نمچه نك دولت علیه ایله محاربه سی وقوعنده
 بالطبع انکلتزه و پروسیا دولتیله اتحاد اوزره بولمشدنر چونکه رن نهر کیرینک
 بحر شماله منصب اولدینی سمتده ایکی طرفنده کائن اون سکر سنجاقدن عبارت
 اولان ممالکه ندرلانده و پانی باس تعیر اولنورکه ممالک سفلی دیمکدر الویه مرقومه
 فی الاصل المانیا ایمراطورلغی داخلنده اوله رق وراثت صورتیله ودوقه و مارکیر
 وقونت یعنی سردار و مرزبان و سنجاق بکی عنوانلیله مستقل متصرفلری و ارایکن
 اکثری صهریت مناسبتیله اوستریا خاندانه انتقال ایدوب باقیسنی دخی المانیا
 ایمراطوری مشهور شارلکن ضبط و بر آراق الویه مرقومه نك مجموعنی بر ایالت
 شکلنه قویه رق اسپانیا حکومتته ربط ایتمش ایدی پروتستان مذهبک ظهور و انتشارنده
 اسپانیا قرالیرینک امر اداره حکومتده درکار اولان تعدیلرندن بشقه قتلکلک
 تعصبی داعیه سیله بورالرده تبدیل مذهب ایدنلر حققرنده زیاده شدت کوسترملریله
 الویه مرقومه اهالیسی کلیوم نام ذات شهرت شعاری کندولرینه ایستات هولدر یعنی
 مدیر حکومت عنوانیله سردار ایدرک اسپانیا دولتی علیهنه قیام ایله مدت مدیده
 محاربه دن صکره الویه جنوبیه تکرار اسپانیانک دست تصرف و تحکمنه کچمکین دیگر
 یدی سنجاق اهالیسی جمهوریته قرار ویره رک اداره مملکتی ایستات جنرال نامیله
 تشکیل اولنان مجلس وکلای ملته تفویض ایدوب مذکور الویه سبعة دن هولانده
 و فلمنک سنجاقلرینک جسامت و ثروتلری حسینیه بوالویه متحده جمهورینه هولانده
 جمهورئی و فلمنک دولتی تعیر اولمش و (۱۶۴۸) سنه میلادی سه قدر کلیومک اولادی
 ایستات هولدر عنوانیله جمهور ریاستنده بولمشدنر . اول اوانده اوروپا ایله امریقا
 بیننده جریان ایدن تجارت جسمیه اسپانیا بندرلری مر ایکن اسپانیا دولتک سوء
 اداره سندن خلق ناخشنود اولوب جمهور مذکور ایسه کرک تجارتک و کرک امور
 مذهبه نك کمال سرستی ایله اجراسنه رواج ویرمکله هر طرفک اهل هنر و صنایعی اشبو
 الویه متحده یه تجمع ایدرک آزوقت طرفنده کلی قدرت و ثروته مالک اولوب یوز
 قطعه قدر جسم قالیونلر ایله انکلتزه نك قوه بحریه سنی مضمحل ایتدکبری و فرانسه
 قرالی اون دردنجی لویی وقتنده فرانسه دولتک مظفریت و فتوحاتنه سد سدید
 چکدکبری جهته دکرلر بسبتون کندو اللرنده قالمش و تجارت و حکومتلری امریقا
 و افریقا و هند و چین و چاپون طرفلرینه ودها بومقوله اسلافک واره مدقلری
 یرلره منتشر و مستولی اولوب فلمنک و برابان لوارلرنده هر درلو صنایع ایلر ولیه رک
 فابریقه لرینک محصولاتی عالمه کفایت ایدر اولمش ایکن مؤخرأ ایستات هولدرلرک

تحکم واستقلاله میل ایله ایستات جنرال مجلسه مخالف بولمخرندن داخل مملکتده ظهور ایدن بر طاقم اختلالات ایله رنجیده اولان بر چوق اصحاب هنر و صنایع انکلتزیه کچوب اوراده صنایعک برقات دها ترایدینه و فنون بحریه نك پك زیاده ترقیسنه خدمت ایتمکده اولدقلری و اختلالات واقعه فلمنك دولتك ضعفی موجب اولدیفی حالدده فرانسه دولتی انکلتزه قرالی کندو پولتیقه سنه جلب ایدرک ایکسی بر دن دولت مرقومه اوزرینه مدت مدیده هجوم ایله بروقتدنبرو روی دریاده باد بانکشای اقبال واستقلال اولان قوه بحریه سنی کسر وشکست و دیار بعیده ده اولان ممالکن الدن نزع ایله قدر و نفوذ قدیمی پست ایتدکلرندن بشقه اختلالات مذکوره ائناسنده الویه متحده دن ارتیزبا سنجاجی و فلمنك سنجاغنك بر مقداری فرانسه دولته کچمش و اندن صکره بتون دکترلر انکلتزه دونمالرینک سطوت و نفوذی التنده قالمشدر . ایشته ذکر اولنان اختلالات ائناسنده دردنجی کلیموم سربستلک طرفداری اولان ایستات جنرال مجلس اعضاسی اوزرینه فرجه بوله رق (۱۷۴۷) تاریخنده ایستات هولدرلکی وراثت صورتیه کندو خاندانه تخصیص ایتدیرمشیدی . بعده مذکور یایی باس الکاسنك اولوقت الویه جنوبیه سنه متصرف بولنان المانیا ایمراطوری ژوزف ایله فلمنك دولتی بیننده وقوع بولان محاربه به دول سائره مداخله ایتمکله فلمنك دولتك غائله سی آرتمش اولدیفی حالدده مؤخرآ ژوزف بر منوال سابق دولت علیه سفیرینی کشاد ایتدکده آنک علیهنده بولنان انکلتزه و پروسیا دولتلریله فلمنك دولتی بالطبع متحده اولمق لازم کلوب بوجهته بروجه آتی مصالحه ده دخی متوسط بولنمشدر .

* زشتوی قصبه سننده منعقد اولان نمچه مصالحه سنك صورت *

* مذاکره وقراری *

جلد رابعده بیان اولدیفی اوزره پروسیا قرالیله المانیا ایمراطوری بیننده ریشنباش نام شهرده منعقد معاهده ده تعیین اولنمش اولان اساس اوزره دولت علیه ایله نمچه دولتی بینلرنده مواد مصالحه قرارلشدیرلمق اوزره اول امرده متارکه عقد اولنمش اولسیله کرک طرفین مرخصلری و کرک متوسط اولان پروسیا وانکلتزه و فلمنك دولتلرینک مرخصلری بر آن اقدام محل مکمله تخصیص اولنان زشتوی قصبه سنده اجتماع ایتلمی لازم کله رک (۱۲۰۵) سنه سی ربیع الاول خالانده دولت علیه مرخصلری افدیلهر و متعاقباً پروسیا مرخصی (لوکرینی) و سنه مرقومه ربیع الآخرینک طقوزنده فلمنك مرخصی (بارون دهاقته) و اون برنجی کونی

انکلتره مرخصی (قوالیرکیت) واون اوچنجی کونی نمچه مرخصی (هربرت) زشتوی قصبه سنه داخل اولشلر ایدی .

پروسیا مرخصی لوگزینی زشتوی به وارد اولدینی کبی ابتدا دولت علیه مرخص اولی رئیس الکتاب عبدالله بری افدینک قوناغنه وبعده برر کون فاصله ایله مرخص ثانی عصمت بک افدینک و مرخص ثالث مکتوبی دری افدینک قوناقلرینه و بالمقابله مرخص افدیلر دخی سفیر مومی الیهک قوناغنه و فلمنک وانکلتره و نمچه مرخصلری کذلک مرخص افدیلره و آنلر دخی بالمقابله سفرای مومی الیهمه کیدوب رسم دور و زیارتی تکمیل ایتدکلر ندن صکره لوگزینی برقاچ دفعه دهار رئیس افدینک قوناغنه کلوب کیتمش و بوملاقاتلر ددر رسمی مصاحبتلر ائناسنده بالمله مرخصلر ایله صده دائر خیلی مذاکرات جریان ایتمش اولمسيله خلاصه وجهه بر وجه آتی بیان اولتور .

ریشنباش معاهده سنده حدود دولت علیه نک حریدن اول اولدینی صورته ارجاعی و روسیه مصالحه سنه دک خوتینک بی طرف قلمسی و روسیه محاربه سنک امتدادنده تمچه لونک بی طرف طور مسمی ماده لری اساس اتخاژ اولندیغنه نظر آ میانه ده بادیء کشمکش اوله جق برحالت یوق کبی کورینوردی ایسه ده طرفینک مطالب و ماجوظاتی یکدیگر دن خیلجه بعید ایدی زیرا سلطان سلیم خان حضر تلری مقدا متارکه به اعطای رخصت بیورد قلر نده نمچه سفینه لرینک قره دکزده کشت و کذار ی و بغداده قونسولس نصب ایتلری و جزائر اوجاغنک نمچه لویه خسار تلری وقوعنده طرف دولت علیه دن تضمینی ماده لرینک طی اولنمسی تأکید بیورمش اولمسيله برمنوال سابق پروسیا ایلچیس ی لوگزینی ایله ملاقات اولندقده مواد ثلثه مذکور ه حقنده سعی و غیرت ایتسی مرخص افدیلر طرفندن کندویه ایزاد و تکلیف اولنشیدی .

نمچه لو ایسه ایرشوه نک و بوسنه طرفلر نده اوتهدنبر و منازع فیه اولان بعض محللرک کندویه ترک اولنمسی امانده اولوب بناء علیه ریشنباش مکالمه سنده نمچه مرخصلری طرفندن پروسیا و کلاسنه و یریلان برقطعه ساحه ده محاروچه قرالی اولا در علیه ایله متارکه وبعده قبل السفر اولان حالته کمال دقت ایله رعایتی اساس ایدرک اعاده مصالحه به رضا داده اولنغه قرار و یرمکین قرال مشارالیه مأمول ایدرکه در علیه دخی ضبط اولتان بونجه اراضی و سعیه نک ردینه امعان نظر برله عقد اوله جق مجلس مکالمه مصالحه ده حدود یمزک لامحاله امنیته لازم و دولتینک تمهید آسایش و استراحتته مدار کلی اوله جق بعض تحویلات مصالحانه به میل و رغبت ایلیه و بوبابده وقوعبوله جق نظام و رابطه دوستانه مکتبلو پروسیا قرالنک و متفقلری اولان دول بحریه نک الضمام همم و اعانتلریله تسهیل و تسویه اولنه دیو مسطور و بو ساحه به

جواباً پروسیا و کلامسی طرفندن ویریلان سأنجه ده دخی مجار و چه قرالنک قبل السفر اولان حالته کال دقتله رعایتی اساس ایدرک اعاده صالح و صلاح عقینده سفر حاضرده ضبط ایلدیکی جمیع اراضی عثمانیه یی درعلیه یه رد و تسلیم اتمک شرطی قطعاً قبول ایللمسی و مجار و چه قرالنک درعلیه ایله عن قریب عقد اولنه جق مکلمات مصالحده حدودینک امنیتی ضمننده مأمول ایلدیکی تعدیلاتک محضاً دولت علیه نك رضاسنه منوط و پروسیا دولتی ایله متفق لرینک توسطنه مربوط اولمسی و مجار و چه قرالی بو وجهله بعض محاله یا خود منافع سائرده نائل اولور ایسه پروسیا قرالنه موازن بدلنی درحال اعطا ایللمسی پروسیا قرالنک مرامی ایدوکی مذکور اولغین مقدا متارکه ایچون اردوی هایونه کیش اولان پروسیا ایلچیسی لوزی ریشنباش مکالماتی مضبوط سنک صورتی کتورمش اولمسیله اشبو تعدیلات فقرده سی کورلد کده بوندن مراد نه اولدیفی اکلاشامدیغندن اولوقت لوزیدن لدی الاستیضاح بو تعدیلات ماده سنی نمچه لو ایراد ورجا ایلدی بویه مبهم بر کلامدر بن دخی تفصیلات بیله مم اما دولت علیه کندولره بر محل ترک ایللمک مثللو اولمق کرک لکن بتون بتون دولت علیه نك اراده و رضاسنه منوط اولمغله جبر اولنه ماز دولت علیه کندوسی بیلور بر دوست بر دوسته هدیه ویرسه اولدخی اکا مقابلاً بر هدیه ویرمک مثللو بر شیدر بو باده دخی اراده دولت علیه نكدر قطعاً ابرام اولنه ماز دیو جواب ویرمشیدی شوحاله کوره طرفینک افکاری یکدیگره پک مغایر اولدیغنه منی دولت علیه مرخصلری طرفندن تعصیب مصلحت اولنسون دیو پروسیا مرخصی لو کزینی مرخص ایلدیله بر قطعه تقریر اعطا ایدرک او جاقلر طرفندن ضبط اولنان نمچه سفینه لرینی دوات علیه نك رد و تضمینی و افلاق و بغداده نمچه قونسولس لرینک اقعاد و تعیینی و قره دکزده نمچه سفائنک کشت و کذاری ماده لری مقدا دولت علیه ایله نمچه دولتی بیننده ایام مصالحده تنظیم اولنان معاهده تجارت شروطندن اوله رق ریشنباش معاهده سنه داخل اولدیغندن شمعی بونلرک رفی ادعاسی قاعده سداد و حقانیته مخالف اولدیغنی تذکار و بو مقوله مذاکرات و مکلمات ایله مصلحت خیره نك تأخیری جائز اولمیه جغنی اخطار ایلمشیدی تقریر مذکورک صورتی بو جلدک ذیلنده (۴) رقمیه ایراد اولنور . وینه صورتی ذیلده (۵) رقمیه محرر اولان بر قطعه لایحه سنده دخی لو کزینی ریشنباش معاهده سی معاهده مستقبه نك اساسی عد و اعتبار اولمق لازم کلدیکندن ریشنباش مکالماتی مضبوط سنه مراجعت اولندوقده ریشنباشده اساس اتخاذ اولنان (استاتسکو استرقت) یعنی حالی اوزره ابقا و بعبارة اخیری ابقاء ماکان علی ماکان تعبیری رد ممالکه مصروف و ضمان و کفالت دخی انجق ریشنباش

معاهده‌سنده مذکور اولان شروطه ملحق و معطوف ایدوکی مستبان اولمسیله
 كرك دولت علیه‌نك و كرك نمچه دولتك بوندن خارج مواده پروسیا قرالنك
 ضمان و كفالتنی صرف ایلمكه استحقاقلری اولیه جفنی تسطیر و محرمانه اوله‌رق اعطا
 ایلمش اولدینی دیگر برقطعه تقریرنده دخی عقد و تنظیم اولنه‌جق معاهده‌یه متوسط
 نصب اولنان انكلیز و فلنك مرخصلری الی‌الآن معاهده مذکوریه ضمان
 و كفالتلرینی درج و الحاقه ترخیص اولمقدقلری مسموعی اولدیغندن مومی‌الیهما
 مرخص افندیلر ایله ملاقات ایتدكلرنده پروسیا دولتی كبی انكلتره دولتیله فلنك
 جمهورینك دخی ضمان و كفالتلری مأمولدر وادیسنده استیضاح حال اولنور ایسه
 بو‌بایده ایضاح ماده ایدرك جوابه مجبور اولورلر و دولتلرینه تحریر برله اقضا
 ایدن رخصت لازمه‌یی بعدالاستحصال پروسیا قرالنك كندو اراده‌سیله عرض
 ایلدیكی ضمان و كفالتله كندو كفالتلرینی ضم و الحاق ایده بیلورلر دیو تحریرینه
 دیگر برقطعه تقریرنده عقد اولنه‌جق معاهده نامه‌نك سبكنه و مقدمه‌سنده ریشنباش
 معاهده‌سنگ اساس اولدینی فقره‌سنگ درجی خصوصنده مرخصان دولت علیه
 طرفندن اصرار اولنمق لازم كله‌جكنه دائر بعضی اخطارات صره‌سنده مقدماتجه‌لو
 ایله دولت علیه بیننده منعقد اولان معاهده‌لرده حدود کیفیتیه مبهم براغلمش
 اولدیغندن وقت و نمچه‌لو طرفندن نزاع چیقارلمقدله ایدوکی معلوم اولمسیله
 بو‌كره حدودك فیما بعد نزاعه محل قالمیه‌جق صورتده توضیح اولنمشی اخطار
 و تذکیر ایتشیدی .

لوکزی‌نك بو‌افاداتی اوزرینه مرخص افندیلر متحیر اوله‌رق طرف صدراعظمی‌یه
 تقدیم ایلدكلری معروضات مشترکه‌لرنده خصوصات مشروحه‌یی بسط و تمهید
 ایله قوللرینك مأموریتیز و مقتضای حیت فطریه‌مز بهر حال مواد ثلثه‌نك طبق
 اراده خسرwane اوزره تسویه و تنظیمنه منحصر اولدیغندن غیرى مواد ثلثه
 مرقومه اساس نظامات ملكیه‌دن اولمسیله بهر حال اولبایده اصرار و خلافته تنزلدن
 احتراز ایلرز مواد ثلثه‌نك الغاسی ایچون معاهدات سابقه و حتی بلغراد معاهده‌سی
 دخی فسخ مصالحه جهتیله کلیاً مانعی اولمشدر دیو ادعا ایتسك كرك و حدود قدیمه‌یی
 تغییردن اجتناباً اساس مصالحه‌مز اولان قلاع و بقاعك هیئت اصلیه‌سیله دولت علیه‌یه
 رد و تسلیمی اساسنه پایشوب بووجه‌له حدود قدیمه‌یی تجدد مراد ایدرز . پروسیا
 ایلیجیسی ایسه کویا مشكوك ماده‌لری ایضاح ایچون بوسنه حدودینه بر بشقه نظام
 ویرمك فکرنده‌در . او ایسه بزم هیچ ایشمزه رامز . زیرا بوسنه حدودینك
 کاهی حقیقتنی بیلمیز مقید اولان حدودنامه‌لر و حجج قیدلری اغنا ایتمز اونه صوینك

قارشوسنده اولان خرواتلق اراضيسنده دولت عليه نك قلعہ و پلنقه لری اولديغی
 قارلوفچه مصالحه سنده مسطور اولوب و بلغراد عهدی دخی قارلوفچه حواله
 ایدوب الی الی تاریخنده ویریلان تمسک سبرواج و سوحانیچ اراضیسی ماده سیله
 سوغورطه آطه سنك دولت علیه تسلیمی ماده سندن عبارتدر بودخی تبیین حدود
 ایده مز اونه صوبی حدودی نزاعی خلیل پاشا وقتنده نمچه لوطرفندن ایراد اولنوب
 قتی چوق نزاع وقوع بولمشیدی نهر اونه نك قارشوسنده خرواتلق اراضيسنده
 دولت علیه ضبطنده بعض قلعہ و پلنقه لر اولق کرک کیفیتنی بیلمیز بوسنه لوزه بویرلری
 ویرمیز دیو غالباً بر جواب ویرمک کر کدرلر تفصیل ماده خاطر دین چیقمش
 هر نه ایسه بزم و جمله نك بوسنه حدودی مجهول مطابقدر تحقیق ایده میز و تحقیقی
 ایچون بوسنه یه یازلق و آدم کتورلمک مثللو تکلفاته دوشلسه امرار وقت ناز کدن
 فضله بزم جلب ایده جکمز سرحد اختیار لرینك قولنه بهر حال نمچه لوطرفی اولماز
 بوسورته بزم تکلیفمز عبث اولق لازم کلور بوقوللرینك اکلادیغمز بودرکه
 عمومی حدود ماده سنی بشقه جه بر ماده ایدرک دولت علیه رد و تسایم اولنه جق
 جمیع قلاع و بقاع و اراضی بین الاهی متعارف و مشهور و معلوم اولان حدود
 قدیمه سیله قطع اولنق مناسب ظن اولنور الی ایکی تاریخندن ایکیوز ایکی تاریخنده
 اشبو حدود ماده سنی نه و جهله رابطه بولمش ایسه ینه اوله جه مرعی اولسی مناسب
 ملاحظه اولنور معاهدات سابقه یی فسخ ایتمه لم دیسه ک مواد ثلثه یی ضمنی قبول ایتمش
 اولورز بودخی مطالعه اولنه جق محلدر . پروسیا ایلچیسینك اخطار اتنه باقیلور ایسه
 مواد ثلثه معهوده و تجارت نامسعوده دن قطعاً بحث ایتمیوب همان جمله سنی قبول
 و سفردن اول اولان شروط سابقه و احوال سالفه و اوصاف لاحقیه یی تأکید
 و متفقمز اولان پروسیا قرالنك ریشنباشده امضا ایلدیکی شروط نامعلومه سنی
 تصدیق لازم کلیور وینه سفیر مرقومک لساناً تقریرنده علی ای حال حدود
 و سنورلر دقت اوزره کشف و توضیح اولنمیدرکه حتی بر دخی نزاع اولسون
 و بلغراد صلحندن احسن واقوی اولسون دیمسی مکر بر ملاحظه فر نکیه یه مبنی
 اوله رق شوماده لر بلغراد صلحه ربط اولنوب آندن استنباط اولنمشدر . نمچه لوطرف
 سزه شوقدر اراضی رد ایده یور سزده سکوت ایدک دیهرک تحدید حدودده نمچه
 طرفه برازیر استحصال سودا سنده میدر بیلمیز بوسنه حدودی هنوز معلوممز
 دکدر مستصحبمز اولان محمد سعید پاشا حدود نامه سی کیسوی فر نکی کبی بیچاییچ
 و تمیز ادراکنده افلاطون لر عاجزدر بوسنه دن استعلام وقته محتاج بوسنه لونك
 خلیل پاشا کوننده نمچه لوطرفه نزاعلری قتی قلعہ در ونه محلددر حتی دولت علیه

ردینی اراده ایلسه بزلر ویرمیز دیو جساترلری خار جدن مسومومزد اصرارلری
 حقمدیر و بلغراد صلحی داخلنده فروعاندنمیدر مجهولمزددر مبدا غفلت ایله بر محل
 ترک اوانه مجدداً خریدله محتاج خریدله تحریری رأی العین مشاهدهیه موقوف جمله سی
 فرض اولنسه اویله جغرافیا بیلور آدمز یوقدر خلاصه مجهول مطلق مثابه سنده
 اولان تحدید سنوره بروجله جساتر اولتماز بالاخره اساسده اولان حدود
 قدیمیه رعایتدن غیری چاره یوقدر دولت علیه مرخصلری سیر سفائن و جزائر
 ضمانی وقونسوس دفعی و بوقونیه ایالتی استردادی و مصارف سفینهک تضمینی
 مواد خسه سنی ادعا و اجرایه باخط هایون مأمورلردر خلافتی ارتکاب بروجله
 ممکن دکلدرد پروسیا ایلیچینک افاده سنه نظراً بونلرک وجهاً من الوجوه ذکر ی جائز
 دکلدرد عجب و وسایونک خلاف رضای اولدیغندنمیدر یوخسه بکر شده نتیجه مرخصلیله
 بغایت استیناس ایلمشله نهانی بر مکرلری اولوب فساد اتمه بعیدمیدر اطوار واقوانه
 نظراً کندولرندن هروجهله مکر و دسیسه ملحوظدر عهد سابقه نی نقض و الغا
 ایلیکمزده شروط جدیده ربطنده کونا کون تکالیف بارده ایراد ایده جکلری
 باهردر عهد سابقه الغا اولتماز ایسه محاذیر شتی ظاهردر نوجهله حرکت وقتی
 ماده دن مباشرت ایده لم افندیلمز اعلامدر بر طرفی ترجیح ایده مدک دیو نه طرفی
 ترجیح اولتور ایسه امر و اشعار بیورلمسنی استدعا ایتمشلردر .

وینه دیگر بر قطعه عریضه لرنده دخی پروسیا ایلیچینی ورود ایده لی اون کون
 اولدی اولدی درت دفعه واقع اولان مکالمه لرده تقریراً و تحریراً واقع اولان
 مذاکرات و ابخات قامه آلتق لازم کلسه جهانکشا تاریخی قدر مفصل بر کتاب
 اولور ایدی اون کوندر لیل و نهار محبت و کتابت ایله و قتمز گذران ایتمکده در
 امور مأموره مزک اطرافنی مطالعه و دعاویسنک رد و جرحه و نقض و ابطاله ادله
 تدار کیچون کیجه لرده فکر و خیال ایدرک قتی چوق کیجه لر صباح ایتمکده یز
 هروجهله حسن توجه عالییه احتیاجز درکاردر انکلتزه و فلمنک ایلیچیری دخی
 بوکون یارین کلورلر نتیجه مرخصی دخی تعقیب ایله کله جک ایش هریری اوروپانک
 افکار عمیقه و خیالات دقیقه اصحابندن برر متشیطن و محیل و هر بریمی بر دولت
 رجالی ایله بحث و مناظرهیه قادر درت حیله کاران و اعوانک برمدتدنبرو مطالعه
 و مذاکره ایله بریره جمع ایلیکلری نخبه افکار مکر و آلرندن مرتب تمهید ایده جکلری
 مقدماتلریه نه کونه مقابله اولتور علی الخصوص بزم کبی ساده مطالعه اصحابی نه یاپسون
 همان الله عظیم الشان انطاق و اقدار ایلیه دیو عر فحال ایلمشلردر .

بوند نصکره فلمنک مرخصی مرخص افندیلر ایله ملاقات ایتمکده مصاحبت رسمیه

انسانسندہ شو مسقولو مادہ سی دخی بر نظام بولہ ایدی پک کوزل اولور ایدی
 میانہ ده اولان منازعہ نك اندفاعی وقیل وقالک بر طرف قلمسی بالجملہ دول اوروپانک
 مطلوب و مرغوبلر یدر اما مسقولو کمنسہ نك توسطنی قبول ایتیمور حتی دولتم
 طرفندن اتی آی مقدم عرض توسط اولمشیدی الان جوابی کلامشدر دیمک
 وایمپراطور جدیدک طور و مشوارینی تحسین ایتک کبی پولتیقہ یہ دائر بعض سوزلر
 و فرانسہ نك اختلالہ دائر بعض بحثلر در میان و مرخص افندیلر طرفندن عقد
 اولنہ جق مصالحہ یہ ضمان و کفالت خصوصی استیضاح اولندقدہ فلمنک جمہورندہ
 علی الاطلاق رخصت اصولدن اولمیوب ابتدا مواد میدانہ چیقار بعدہ تکفل
 اولنور مجہولہ ضمان و کفالت نصل اولہ بیلور دیو عقد اولنہ جق مواد مصالحہ یہ
 ضمان و کفالت ایدہ میہ جکفی بیان و بعدہ انکلترہ مرخصیلہ لدی الملاقاة بو خصوص
 کندوسنہ آچیلدقدہ او دخی ضمان و کفالت انجق معلوم اولان مواد حقندہ
 اولہ بیلہ جکفی و تکفل اولنہ جق مواد نہ اولدیغی معلوم اولوبدہ دولتہ بالارسال
 جلب تعلیماتہ محتاج اولدیغنی آیان ایلمشدر .

بوخلالده پروسیا مرخصی لوکزینی مرخص اول افندینک قوناغنه کلہرک فلمنک
 و انکلترہ ایلچیلرینسک کیفیت ملاقاتلرینی موضوع بحث ایدرک صدہ دائر بعض
 مواد ایراد ایلدیکی صرہ ده اول کون درعلیہ دن کلوبدہ کندوسنہ اولان مکتوبک
 وصول خبری قائم مقام باشاطر فندن مطلوب اولغہ جوابی درعلیہ یہ کوندرملک اوزرہ
 تحریر ایتسی کندوسنہ ایراد اولندقدہ مکتوب درسعادتدہ بولسان لہ ایلچیسنک
 اولوب مالی زشتوی یہ کلہرک مجلس مکالمہ یہ داخل اولسی خصوصندن عبارتدر
 لکن درعلیہ دن مساعده اولغماش غایت حظ ایتدم مقدا بومادہ یی بجدہ اولان
 لہ ایلچیسنی دخی در میان ایلدکدہ محار بہدہ مدخلی اولیمان دولتک ایلچیسنی مصالحہ یہ
 نوجہلہ ادخال اولنہ بیلور دیو جواب ویرلمشیدی پروسیا قرالتک عادتی دائما
 دوستلرینہ نوازش ایتمکدر بوندن بویہ مسقولو ایہ بر مصالحہ اولنق لازم کلسہ
 دولت علیہ نك دخی رضاسی اولسہ اولوقت لہدن بر ایلچی کلسہ احتمالکہ مجلس
 مکالمہ یہ داخل اولسنہ مساعده بیورلسنی قرالمز التماس ایلہ دیدیکندہ مرخص
 افندیلر طرفندن مقابلہ اولنوب لہلو ایہ مراد دولت علیہ اوزرہ اتفاق عقد
 اولنقمیزین ایلچیسنی نیجہ مکالمہ یہ داخل اولہ بیلور دینلمکین لہلویہ دائر کرک قرالمک
 و کرک بنم مداخلہ مز یوقدر و التزام ایتیز فقط درعلیہ ده اولان ایلچیسنی دولت علیہ
 ایہ لہلونک عقد اولنہ جق اتفاقہ درعلیہ ده اولان پروسیا ایلچیسنی باعث تأخیر
 اولمش دیور . وبلکہ بکا دخی سوء ظن ایلہ شونی رجا ایدر مکہ پروسیا ایلچیسنک

بوافق ماده سه مانع اولدیغی یوقدر دیو له ایلیجیسه افاده بیورلمق اوزره آستانه ده اولان وکلای دولت علیه به تحریر بیورمکزی رجا ایدرم دیوب بوماده نك در علیه به تحریری ضمنده مرخص افندیلردن وعد آلدقندنصرکه پروسیا قرانک مرادی و بو آنه قدر سعی بوندن بویله لهلو دروننه مسقولوی اوغرا تمامق صورتی اولدیغنی علاوه کلام ایلمشدر .

پروسیا قرالی گویا که لهلوی روسیه نك نچه تغلبدن خلاص ایده جکم دیو اول اوانده لهستانده تکثیر نفوس ایتمکده اولوب لهلولر دخی بوکا آلدانه رق استقلال حکومتلرینک بقا و تأکید املنده بولغریله بوکره دول فخیمه بیننده منعقد اوله جق مکمله مجالسنده بولنه رق ایشلرینی صاعلامق آرزوسنده ایدیله پروسیا قرالی ایسه لهستانک مقاسمه سنده زیاده حصه آلمق اسبابی حاضر لامقده ایدو کندن لهلونک بومکالماتده بولمنسی ایسته میوب فقط افکار دسیسه کاریسنه لهلولر واقف اولسون دیو زشتوی مکمله سنده له مرخصنک بولمنسه پروسیا لو مانع اولیورمش لقر دیسندن احتراز برله بو خصوصده دخی لهلولری اغفال داعیه سنده بولنه رق برموال سابق در علیه به یازلمق ایچون مرخص لو کزینی مرخص افندیله تکلیف و رجا ایلمشدر . حالبوکه : دولت علیه ایله بر معاهده اتفاق تنظیم اوزره خیلی وقتدیرو در علیه ده مقیم اولان له ایلیجیسی اقدجه قره دکزده له تجاری سفاننک سربسیت سیری وروم مذهبنده بولنان له رعایاسنه استانبول روم بطریق طرفندن بر نصیحتنامه کوندرلمسی ولهستانه طرف دولت علیه دن بر معتبر ایلیچی ارسال بیورلمسی کبی بعض مواد عرض ایتدکده ایلیچی و بطریق طرفندن نصیحتنامه ارسالی خصوصلری مصالحه وقوعندنصرکه اجرا اولنور دیو تأخیر وقره دکزده الی قطعه له کمیسنک رخصت و یرلمک صورتیله تحدید اولنوب بودخی لهلولرک همان روسیه علیه به اعلان حرب ایتمریله مشروط قلمغین واولوقت دولت علیه پروسیا پولتیقه سنه اعتبار ایدوب خصوصیه لهلوماده سنده پروسیا ایلیجیسیله مشاوره ایده کلکین بومقوله تصعیبات پروسیا ایلیجیسی طرفندن القا اولمش اولمق ملاحظه سنه منی له ایلیجیسی پروسیا ایلیجیسندن شکوا و پروسیا لورک سائر اطوار وحرکتلرندن دخی لهلو مسلوب الامنیه اوله رق پروسیا لونک سوزینه اعتماد وامنیت جائز اولدیغنی بو ائنده دولت علیه به اخطار و القا ایتمکده ایدی . پروسیا قرالی دولت علیه به دخی اغفال و روسیه چاریجه سنه قارشو ایستدیکی کبی اعمال ایلمک اوزره گویا که همان روسیه به اعلان حرب ایده جک وانکلتره وفلمنک دولتلرینی دخی برابرجه جنکه باشلاده جق کبی کورینوب مرخصان دولت علیه طرفندن حالا پروسیا قرالی

اعلان حرب ایتدی دیو سفیر مومی الیه تعریض اولندجه نجهلوبی صلحه اجبار و روسیه طرفی تهدید ایله پروسیالونک دولت علیه یه ایلمش اولدنی خدمتی تذکار و تکرار ایلر ایدی وکلای دولت علیه دخی بودسیسه لره واقف اولدقلر ندن پیدرپی دول متوسطه یی جنکه تحریص و تشجیع ایله اوغراشورلر ایدی حتی مرخص افدیلر برمنوال سابق دور و زیارت طریقیله انکلتره مرخصنک قوناغنه کتدکر ندن انکلتره دولتی طرفندن مسقولو علیهنه بر مقدار دو نما ترتیب و اخراج اولنه جنی مسقولو یه انکلتره دولتی طرفندن افاده اولنش دیو مسموعدر دیدکر ندن سفیر مرقوم بر مقدار تأمل ایله بویله خبر کوندرلدیکی یوقدر بوصولت تخویف و انداز دیمکدر . بو ایسه درجه ثانیه ده اوله جق ماده لر دندر چونکه مقدا توسط اولنشیدی . مسقولو قبول ایتیموب جواب و یردی شمدی تکرار عرض توسط اولنمه جنی مثللو اول امرده صورت تخویف دخی اجرا اولنمه ماز ابتدا فقط بر نصیحت اوله رق دولت علیه یه سفردن اول اولان هیئت ایله رد قلاع و اراضی برله مصالحه یه میل ایچون افاده اولنشدر . مرخص افدیلرک دیدکری کبی قطعی جواب و یرلماشدر . وهنوز بو نصیحتک رد و قبولی خبری کلامشدر الحاصل پترسبورغده اولان انکلتره ایلچیبی دولت علیه ایله مسقولونک مصالحه سی خصوصه سعی و اقدامه مأمور در دیمکله مرخص افدیلر طرفندن مقدا توسط قبول ایتدی . دیدیککز نه وقتده و نه صورته ایدی دیو استکشاف اولنغین پروسیالونک اولو جهله مصالحه یی عرض ایلدیکی زماندرکه انکلتره و فلنک و پروسیا دولتلری بردن عرض ایتشیدی . لکن مسقولو محکوم اولماق داعیه سیله بر دولنک توسطنی قبول ایتمز . بناءً علیه دول مرقومه نك دخی توسطلرینی بر درلو قبول ایتیموب رد ایله جواب و یرمکین بوندن صکره عرض توسط اولنمه ماز الحاله هذه نصح و پند ایله دول مرقومه ایلچیلری شرط مذکور اوزره اصلاح ذات البینه مأمور لر در و هر حاله دول نلته مرقومه منفرداً حرکت ایتیموب مجتمعاً حرکت ایدر لر دیوب بو مذاکره ده ایکن انکلتره باش ترجمانی پیزانی در سعادتدن زشتوی یه و رود ایتمکله مجلسه داخل اولوب ایلچی مرقومه خطاب ایدرک مرخص افدیلره نماشات ایله تسهیل مصلحه حسن سعی ایتکنری آستانه سعادتده اولان وکلای سلطنت سنیه مخصوصاً افاده ایتدیلر دیوب اودخی حسن سعی و اقدامه قصور ایتیه جکنی بیان ایله مجلسه ختام و یرلماشدر .

الحاصل دول متوسطه نك مقصد و مراملری همان صلحه بوغالبه حریبه یی دفع و ازاله یه مقصور اولوب انجق پروسیا قرالنک روسیه مصالحه سنده هیچ اولماز ایسه رأی و معلوماتی منضم اولق ملتزمی اولدیغندن کندوسنه مراجعت اولنقسزین

دولت علیه‌نک روسیه ایله مصالحه ایدیورمسی دخی ایستمدیکنه مبنی دولت علیه‌نی
 برمدت ده‌ها آوودوب آلداتمقدن خالی اولمازدی قالدیکه مقدم روسیالو بیوک
 وعدلر ایله دولت علیه‌نی روسیانک توسطی اولمدجّه روسیه‌لو ایله عقد مصالحه
 ایتمامک شرطیه مربوط ایلمش اولدیغندن شمدی بردن بره نظر دولت علیه‌ده
 کوچک دوشاماک ایچون درجه درجه وقت و حالک ایجاب ایلدیکی مرکز پولتیقه‌یه
 تنزل ایلمک مسلکنده ایدی بناء علیه‌لو کزینی بروجه مشروح له ایلچیسنه دائر
 اولان مکالمات عقینده شویله اصلی یوق برحوادث ایستمد کویاکه دولت علیه
 طرفندن مسقولوده بر مبعوث وارایمش پوتمکین ایله بر مصالحه عقدی مذاکره‌سنده
 ایتمشله دیدکده مرخص افندیلر طرفندن ایلچی بک دوستمزنک دخی معلومی
 اولق کرکدرکه جزائری حسن پاشانک اسماعیل سرعسکرلکی اوآننده کوندردیکی
 حاجی بکر اغایی بوآنه قدر مسقولو تعویق ایلمشیدی بوآننده بر چوقدار ازسالیله
 عودتی مطلوب اولدقده بکر اغا دخی عودت ایلمش اولدیغنی مسموعمز اولدی
 بوآنه قدر اردوی هامیونه واصل اولماش ایسه شمدی به‌دک ابرائیه و رودی
 منقولدر دیو جواب ویرلمشیدی مؤخرأ مرخص مرقوم دیگر ملاقاتنده ینه حاجی
 بکر اغادن بحث آدقده طرف صدراعظمیدن مقدمه پوتمکینه یازیلان مکتوبده
 روسیانک توسطی اولمدجّه متسارکه و مصالحه اولتماز دیو قطعی وجهه مندرج
 اولدیغنی و حاجی بکر اغانک عودتنده برابر اوله‌رق پوتمکین طرفندن برمایور ایله
 صدراعظمه بر مکتوب وارد اولدیغنی مرخص افندیلر طرفندن بالیمان مکتوب
 مرقومه نه صورتاه جواب یازلمق مناسب اوله‌جفی استشاره صورتنده سفیر مرقومدن
 سؤال اولندقده مایور مرقومک و رودی اوچ ملاحظیه میندر بریسی صدراعظم
 حضر تلرینک اردوسنی تفتیش ایتک وایکنجیسی اسماعیلی آورسه مایور موجود
 ایکن در حال ایستدکیری کبی مصالحه‌یه نظام ویرمک و اوچنجیسی اکر اسماعیلی
 آله میوب کندولری بوزیلورلر ایسه براهونجه مصالحه یایمق خصوصلریدر صدراعظم
 حضر تلرینه اولان مکتوب دخی مقدم کوندریلان مکتوبک جوانی اولغله جواب
 اوزرینه جواب اوله‌مز دیدکده مقابله اولنوب دولت علیه‌روسیا قرانک توسطی
 اولمدجّه مصالحه و متارکه اولماز دیو بر مقتضای اتفاق پوتمکینه تحریر ایلدی و مسقولو
 توسطی قبول ایتدی شمدی دخی پوتمکینک مکتوبی بومعانی مؤکددر بصورتده
 مایورک ارسالنده پوتمکین عبث یرده حرکت ایلمش دینلکده دولت علیه‌یه شانلو
 و مرامنه موافق صالح عرض ایدرایسه بلاتوسط دولت علیه مسقولو ایله مصالحه
 ایدر و اتفاقن جهتله مسقولودن رد قلاع و اراضی به برضمان و کفالت ایدرز دیو

داعیه توسطدن فراغت صورتی اشعار ایتدکن صکره دولت علیه ایله اتفاق اولوق
 حسینیه رد قلاع و اراضی ایله عقد مصالحه ایتمز ایسه کز اعلان حرب ایلرز دیو
 مسقولویه افاده ایتمشیدک انکلتزه دولتی دخی بویه دیمدیهده معتدل تعیرات ایله
 افاده ایتدی یعنی پروسیا ایله رابطه مز واردر دیدی فلمنک دخی بویه در انکلتزه
 دولتی پروسیا ایله اولان رابطه سنه بناء بحر بالطغه قرق کمی کوندر مکه مجبوردر
 دیمکله محاربه ایدر لرمی دینلکده مسقو سفینه سنه تصادف ایلدکرنده محاربه ایدر لر
 انجق بومحاربه مسقولو ایله مصالحه و تجارتلرینه مانع دکلدر دیو افاده ایلمشدر .
 برمنوال مشروح مرخصلر یکدیگری زیارت ایله تکمیل مراسم عادیه دن صکره
 ربیع الآخرک یکرمی اوچنجی پنجنه کونی مکاله قوناغنده بالاجتماع مصلحته
 مباشرت اولمشدر شوپله که : ابتدا متوسط اولان پروسیا و انکلتزه و فلمنک ایلچیلری
 مکاله قوناغنده بالاجتماع پروسیا ترجمانی دولت علیه مرخصلرینی و انکلتزه ترجمانی
 نمچه مرخصنی دعوت ایتمکه مرخص افندیلر آلائی ترتیبیه مکاله قوناغنه
 لدی الوصول زردبان باشنده متوسط ایلچیلر استقبال ایدرک تبریک قدوم برله دولت
 علیه مرخصلرینه مخصوص اوطیه ایصال ایتدکری حینده نمچه مرخصی دخی
 ورود و کندویه تخصیص قلمش اولان دیگر اوطیه قعود ایتمکه متوسط ایلچیلر
 آنک اوطیه سنه واروب استفسار حال و خاطر ایتدکرندن صکره مکاله اوطیه سنه
 ایراد اولنه جق مقدمه لر بعدالترتیب ساعت سکزی کهرک مکاله یه تخصیص قلمش
 اولان ایکی قپولی اوطیه ده متوسطلر قائم و موجود اولدقاری حالده مرخص اول
 اولان رئیس الکتاب عبدالله بری افندی و مرخص ثانی مکه پایه لولرندن عصمت
 بک افندی و مرخص ثالث اولان مکتوبی صدر عالی محمد دری افندی و مکاله کاتب
 اولی اولان دیوان هایون کیسه داری محمد عونی افندی و کاتب ثانیسی بکلکچی
 کیسه داری عبدالرحیم محب افندی وضبط وقایعه مأمور اولان مکتوبی خلفاسندن
 محمد سعید غالب افندی صاغ طرفده کی قپودن دخول برله ترتیب اوزره اوطیه نیک
 صاغ جانبنده واقع صدره صعود و صول جانبنده اولان قپودن نمچه مرخصی داخل
 اوله رق اودخی سرکاتب لریله برابر صول طرفده متوسط ایلچیلرک تحتیه قعود
 ایدوب ایکی طرفک ترجمانلری دخی ایکی اوجده قرار قیلدقارنده اولان انکلتزه
 ایلچیبسی فرانسزجه اوله رق ترتیب ایلمش اولدینی مقدمه سنی قرائت ایله فتح کلام
 ایتدکن صکره نمچه مرخصی و بعده مرخص اول اولان رئیس افندی دخی
 مقدمه لرینی قرائت ایتمشلردر . انکلتزه و نمچه مرخصلرینک صورت ترجمه
 مقدمه لری (۶) و (۷) اشارت لریله و رئیس افدینک مقدمه سی (۸) اشارتیه
 ذیلده محرر اولمغه مراجعت اوله .

ذکر اولنان مقدمه قرأت اولندقدن صکره ابتدا نمچه مرخصنک رخصتنامه سی وبعده دولت علیه مرخصلرینک رخصتنامه لری قرأت اولنوب چونکه رخصتنامه لرده عقد اولنه جق مصالحه یه دول ثلثه متوسطه نك ضمان و کفالت لری علاوه و الحاق اولنمق فقره سی مندرج اولدیغندن رخصتنامه لرك قرأتی ختام بولدقده انکلتره ایلچیسسی کلامه آغاز ایدوب جانب حضرت شهنشاهیدن افدیلر حضراتنه اعطا بیوریلان رخصتنامه لرك ترجمه سنده ونمچه مرخصنک رخصتنامه سنده انکلتره دولتنک ضمان و کفالتی لفظی استماع ایلدم حین قرآتده سکوت ایلدم بوسکوتی قبول معرضند، اکلامسونلر انکلتره دولتنک ضمان و کفالتی بنم معلوم دکدر دیدکده بروطرفدن مقابله اولنوب ریشنباش معاهده سنده انکلتره و فلمنک ایلچیلری زمین و کفیل اولوب بعده دولتلری طرفدن دخی تصدیق اولندی دیو ردکلام اولندقدده دولت اول سنندی تصدیق ایتدی دکل لکن ضمان ایله تصدیق بیننده فرق واردر . لفظ ضمان و کفالت صریح دکدر و جانب صدر اعظمیدن یازیلان مکتوب آنجق محل مکالمه یه دعوتدن عبارتدر دیمکله دعوتنامه ده ضمان و کفالت ماده سی درج اولنمق اقتضا ایتز بوضمان و کفالت ریشنباشده واقع اولمشدر . دعوت مکتوبنه تحریری نیه اقتضا ایله دینلده کده ضمان ماده سی مطالبه اولنمقچه الحاق اولنه ماز مرخص افدیلر مقدمه منزلی تشریف لرنده بوماده بی افاده بیودر قلیینه بناء دولتمه یازدم دیدکده چونکه تحریر اولمش بونی دخی تمش بیلورز دینلده کدن صکره نمچه مرخصی دخی کلامه مبادرت برله بوضمان و کفالت ماده سی بن دخی متوسط لردن مطالبه ایدوب مقدمه دولتلریینه یازدر دم دیمسی اوزرینه روسیا ایلچیسسی کلامه شروع ایدوب انکلتره ایلچیسسنک بوفاده سنی یعنی ضمان و کفالتی عدم قبولی بن دخی تجویز اتم تجویز و قبول اتمدیکی مضطبه قید وثبت ایدرم دیدکده فلمنک ایلچیسسی دخی بوضمان و کفالتی شمدیکی حاده بن نه قبول ایدرم دیرم ونه قبول اتم دیرم جمهوریمه تحریر ایلدم خبره منتظر م دیدکده انکلتره ایلچیسسی بوماده مصلحت خیریه نك تأخیرینه سبب اولمازینه بز ایشمزنک تنظیمنه اقدام ایلرز دیره ک رخصتنامه سنی ابراز ایله قرأت اولنوب متعاقباً روسیا و فلنک ایلچیلرینک رخصتنامه لری دخی او قونهرق مجلسه ختام ویرلمشدر .

بالاده بیان اولندیغنی اوزره هر طرفه سرایتدن خوف و تخاصی اولنان فرانسه اختلالی اوزرینه اوروپا پولیتیکه سی تبدل ایدرک بوانشاده دول اوروپا یکدیگرله اتحاده میل ایتدکر نندن دولت علیه نك روسیه علیه نه آرزو ایلدیکی اتفاق احتمالی بر طرف اولوب برمنوال سابق مجلس مکالمده جلوسلرینک ترتیبی دخی بومعنائی اشعار اتمز دکدرکه

دولت عليه مرخص و مأمور لریه نمچه مرخص و مأمور لری متوسط لرك بر طرفنده قارشو قارشویه و یا خود جمله سی دائره شکننده اوتور مق لازم کلور کن او طه نك بر طرفنده دولت عليه مرخص لری و مقابلنده كرك مصالح و كرك متوسط دیگر دولتر مرخص لری بولمق غریب معنادر .

مجلسك بوهیئی اور و پالولر طرفندن عینله ترسیم اولنه رق دولت عليه مرخص لریه اهدا ایلمش اولدق لری انفیله قو طیلرینك اوزر لر نده دخی بور سملر منقوش اولوب اولوقت مرخص ثانی عصمت بك افندی یه ویرلمش اولان قو طی آنك مخدومی اولوب قریب العهده ارتحال دار بقا ایلان شیخ الاسلام اسبق و هر حاده ذکر خیر ایه یاد اولمغه الیق عارف حکمت بك افندی طرفندن فقیره اهدا اولمغله آدن هیئت مجلسك رسمی اخدی ایه بوجلدك ذیلنه (۹) رقمیله علاوه اولمشدر .

ربیع الآخر ك یكرمی التبی كونی دفعه ثانیه اولمق اوزره مكمله او طه سنده لدی الاجتماع انكلتره ایلچیسی فتح كلام ایه ریشنباش معاهده سنه دولتك ضمان و كفالتی اقرار خصوصنده مقدمی مجلسده واقع اولان ترددی دولتی طرفندن معاهده مذکوره یه بشقه ایلچی مأمور اولمغله بوماده یه کندوسنك كركی کبی معلوماتی اولدیغندن نشأت ایلمش و مقدماتی دولتی طرفندن سالف الذکر ایلچی یه مبعوث اوراقه لدی المراجعه ضمان و كفالت خصوصنده صراحت بولمش اولدیغی بیانیله اولکی افاده سنی لغو ایدرك ریشنباش معاهده سنه دولتك ضمان و كفالتی اولدیغی صراحت بیان و فقط دولتی طرفندن تعلیمات کلنجیه دکین زشتویده عقد اولنه جق مصالحه قطعیه یه ضمان و كفالت خصوصنده دائر بر درلو تعهد ایه مربوط اوله میه جغنی در میان ایلد کدنصکره پروسیا ایلچیسی لوکزینی کلامه مبادرت برله اولنه جق مذاکره ک کیفیت جریانی و مضطهلرک صورت تحریر و تسویه سی خصوصنده دائر بعض شیر افاده ایلدیکی عقبنده نمچه مرخصی هر پرت کلامه مباشرت برله مقتضای مأموریتیم اوزره شمدی ماده یه شروع ایده حکم و بر قطعه تقریر اوقویه جغ دیرهك کندوسی فرانسزجه سنی و ترجمانی ترکیه سنی قرائت ایلدیکی تقریرنده ایمر اطورک زبده مطالعاتی واک صوگ سوزی ایه مکالماته مباشرت و ابتدای امرده اکثریادعای عظیمه درپیش ایدرك تاثیر اولدن انکساب منافع قیدیله تدریجی مرام و مقصوده و طرف آخرک راضی اوله بیله جکی ماده یه قرار ایدن پولتیقه دسیسه کارانندن احتراز و مجانبت ایتمه ک طرف ایمر اطوریدن مأمور اولدیغی جهتله کندوسنك آغزنده فقط بر لفظ بر ماده اولوب آندن مجانبت ایده میه جکنی و فقط یه بر و طرفندن کشف اولنه جق موادك استماعنه حاضر و آماده و عرض اولنان جمیع موادی تفهمه

والدن کلیدی مرتبه تحصیل رضا ورعایت خاطر حضاره اراده و خواهش کاملی ایله مائل و راغب اولدیغنی و مذکور لفظ دولتینک مصالحه عزیزه سنی توفیق و اعلان حربدن مقدم اولان روابط حقیقه لرینی تجدید و اوچ سنه دنبرو جانبینی تفریق ایلیان محاربه مکدره نك آثار و نتایجینی دفع ایذب لفظ مذکور دولتین بیننده حالت قدیمه مطلقه نك قبل السفر اولدیغنی وجه اوزره بلا تبذیل و تغییر تجدیدنده قرار قلمغله بر جانبدن جمیع معاهدات و سندات و فرمانلر و سائر بومقوله نظاملر کافی السابق دولتین بیننده تأیید و تأکید قلمق و جانب آخردن ایمراطورک سلاحلریله ضبط و استیلا اولنان جمیع ممالک و قلاع دولت علیه رد و تسلیم اولنوب یالکز خوتین قلعه سی امانت اوله رق حفظ اولنمق لازم کله چکنی افاده ایتمکین تقریر مذکور بعدالاستماع برو طرفدن کلامه مبادرت برله ایلیچی بک دوستمزک ملاحظه سی معلوم اولدی بوملاحظه لرده زائد و غیر مفید مقالی وارد بزمن دخی اکر چه ترتیب ایلدیکمز ملاحظاتمز اولوب انجق شمعی آنلردن بحث اقتضا ایتمز ابتدای کارده بنانک تملی قورلملیدر یعنی اساسک مذاکره و تنظیمی اقتضایدر ریشنباش معاهده سی و بعده متارکه سندی موجبجه قبول اولنان اساسک طرفیندن تأییدینه اعتنا و دقت اولنمق مزاج مصلحتدندر شمعی آنک مذاکره سنی ایده لم دینلد کده نمچه مرخصی مقابله ایذب بیوردیغکز ریشنباش معاهده سنده اولان اساس ایشته بنم سویلدیکم مقالاتک ایچنده در دیمکله برو طرفدن سررشته بجئی ینه سمت اساسه عطف ایله ایلیچی بکک تقریرنده اکر چه اساس مذکور در لکن زائد و غیر مفید کلمات دخی واردر ایشته بزمن قلمه آدیغمز صورت دخی منظور اولسون بعده مذاکرات سائره به شروع اولنور دینلوب قلمه آلمش اولان کاغذ مذکور قرائت اولندی خلاصه مؤداسی پروسیا قرالتک ریشنباشده عقد و ربط ایلدیکی معاهده نك خلاصه سنی حاوی دولت علیه به کوندر دیککی اعتماد نامه سنده و طرف صدر اعظمیدن نمچه ایمراطورینه اعطا اولنان متارکه سندنده مندرج دول ثلثه محترمه نك ضمان و کفالتلریله قبول اولنان اساس صلح اوزرینه اشبو محاربه و وقوع دنبرو نمچه عسکری طرفدن استیلا اولنان باجمله حصارلر و شهر و ایالتلر قبل المحاربه به حاله ایسه اول حال ایله اعاده و مستقولو ایله اولان اشبو محاربه ده من کل الوجوه بی طرفلق شقی اختیار و خوتین قلعه سی روسیه مصالحه سنه دکن نمچه یدلرنده امانت و جهله طوروب روسیه ایله صلح اولندوقده بلا تأخیر دولت علیه به رد و تسلیم اولنمشی مطلوب ایذو کندن عبارت اولمغله نمچه مرخصی بو کاغدی بعدالمطالع کندم دخی دیگر صورت ترتیب و ملاقات آتیده تفهیم ایدرم دیدکدن صکره مجلسه ختام ویرلمشدر .

ربیع الآخرک سلخی اولان چهارشنبه کونی دفعه ناله اولق اوزره ینه مکله اوپه سنده لدی الاجتماع مباحثه سابقه اعاده اولنوب برقاچ ساعت مناقشه تمتد اوله رق بو ائنده نمچه ایلچیسی هر پرت ریشنباش معاهده سی اساس اولدیغدن معاهده مذکورده مندرج اولان استاسقو عباره سنک بعینه ایرادی اقتضا ایدر دیمکله مرخص افندیلر دخی بز بوسوزی اکلایه مدق جموع قلاع و اراضی هیئت اصلیه سنه ارجاع اولنق اوزره معاهده مذکوره عقد اولنمشدر دینلده نمچه مرخصی محاربه دن اول دولتین بیننده اولان روابطک بطقها اعاده سی ایراد ایتمکله بونک اوزرینه مباحثات کثیره جریان ایدوب برو طرفدن بو تعیرک معناسی نه در دیو سؤال اولندقدن نمچه مرخصی صحیح تعیری دولت علیه نک لساننده وارد . علی حاله دیمکدر دیدکده برو طرفدن مقابله اولنوب علی حاله دیمک اساسمه منافیدر و متارکه سندنده یوقدر دیوایی بچق ساعت مقداری مناقشه اولنوب نهایت مرخص افندیلر کندولره مخصوص اوپه یه کیدوب و متوسط طبری جلب ایله ینلرنده دخی برخیلی مباحثه و مذاکره لر جریان ایدوب پروسیا ایلچیسی لوکزینی کلامه مبادرت برله پروسیا قرالی یالکز نمچه حقدن اولان حالاتی اجرا ایلدی یعنی جمیع اراضی پی رد ایتدیره جک و نمچه لو مسقوه فیابعد اعانه ایتیه جک و خوتین قلعه سی نمچه لو یدنده امانت قاله جق انجق پروسیا قرالی بو مرامه واصل اولق ایچون نمچه ایمپراطوریه بر اساس وضع ایتمه ک مجبور اولمسیله استاسقو استرقت تعیرینی اساس اوله رق وضع ایلمش اولدیغنی وریشنباشده اولان معاهده پی قبول ایتدیکجه جمیع مواد قبول اولنماش اوله جغنی و استاسقو بیلدی کمز هزار شیلرک تجدیددی دیمک اولدیغنی و بونلردن رد قلاع و دیگر ایکی ماده معلوم اولوب سائر معلوملری اولدیغنی بیان ایتمکله بوکا دخی مرخص افندیلر طرفلردن مقابله و مدافعه اولنهرق برخیلی مباحثات جریانندن صکره ینه لوکزینی کلامه مبادرت برله پروسیا قرالی اعتمادنامه سنده ذکر اولندیغنی اوزره اتفاقی برو جهله اجرا ایلمشدرکه استاسقو قاعده سی اوزره بالجمله قلاعی هیئت اصلیه سی اوزره رد و تسلیم ایلمارینه قرار ویرمشدر . انجق نمچه مرخصی هر پرت طرفدن ایراد اولنان سندات و اوامر و عهود سائرینی بیلمیورز مرخص مرسوم تعیر مذکور قلاع و بقاع و عهود سائریه دخی حمل ایده یور و بویله معنی ویردیکنی بز بجدن کلورکن استماع ایلدک انجق پروسیا قرالی استاسقو معناسی قلاع و بقاعه صرف ایتشدر . مواد سائرینی بیلکم وظیفه سی دکلدرد دیدکده برو طرفدن حل بویله ایکن شمدی نمچه مرخصی جمیع مواد حمل ایدیور بوضورتده بو حمل و افاده دن فراغتی اقتضا ایدر دینلمکله

لوکزینی جواب ویروب نمچولو طرفدن بو خصوص ریشناشده ایراد اولنش
 انجق پروسیا طرفدن نهره اولندی ونه قبول اولندی . شوقدر وارکه مرخص
 افندیلرک رشد و رویتلرینه بناءً سؤال ایدر مکه نمچه قرالی شمدی مجاره نظام
 ویروب پائیز ییاسی نی دخی کندویه تبعیت ایتدیرمش شمیدیکی حالدده اصرار سر
 رشتهسی ویرلمک جائز میدر دیدکده بو صورت اخافه در بونک ذکر ی لازم دکل
 دیو مقابله اولدقدن صکره پروسیا ایلیچیسینک قرائت اولنق اوزره قلمه المش
 اولدیغی کانغدی ترجمه ایتدیرلکده پروسیا قرالی ریشناش معاهده سسیله ضبط
 اولنان محلا راک رد و تسلیمنی استاتسکو یعنی هیئت سابقه سی اوزره تأیید ایلمش
 اولوب دولتین بیتمده جمیع روابط سائرّه همجواریدن بحث اولندیغدن ناشی طرد
 و قبول اولنماش و خصوصاً که اتفاقنامه ده وجها من الوجوه ذکر و بیان قلمامش
 اولسی حسیله نمچه ایمراطوری استاتسکو اساسنک کندویه مضر اولان طرفی
 قبول ایدوب بوکا مخالف بر درلو تعهد ایله مربوط دکل ایکن استاتسکو استرتق
 اساسنی ایراد اولنمیان مواده صرف و تمیدده استحقاقی درکاردر مألنی مفید اولسیله
 مرخص افندیلر طرفدن قبول اولنه مدیغنه مبنی بعده مکمله او طه سنه کیدلکده
 دخی ینه مذکور مواد ثلثه اساس اتخا ذ اولنهرق مواد سائر برر برر مذاکره
 اولنسنی ایراد و نمچه مرخصی دخی استاتسکو قاعده سنک اساس اولق اوزره عمومی
 اوزره قبولانی یاد ایدوب قرار سر اولهرق مجلسه ختام ویرلمشدر .

جمادی الاولانک ایکنجی کونی پروسیا ایلیچیی مرخص اول افندیلرک قوناغنه
 کله ریک کلامه مباشرت ایدوب پترسبورغده اولان پروسیا وانکلتره ایلیچیلری دولتلی
 طرفدن مأموراً برسانحه ترتیب ایدوب مسکو و کلاسنه تقدیم ایتک منوی ضمیرلری
 ایکن سانحه مألنی پروسیا ایلیچیی مسکو باش و کیلی قونت اوستورماته افاده ایتدکده
 وکیل مرقوم دخی دولت علیه ایله الیوم محاربه اوزره اولان پوتمکنیک بو ائاده
 غلبه سنه و تدایرک حسن ختامی حوادثه مترقب ایکن بویله وقتده رد قلاع و اراضی
 عرض ایتک مناسب دکلدر دیمکله ایلیچیلر دخی بو حوادثی دولتینه تحریر ایلمش
 اولدق لری و روسیه دولته اعطا اولنق اوزره لوندرده سانحه مرقومه نک قوی
 تعیرات ایله تحریری تصمیم اولنش ایدوکنی بیان ایتدکدن صکره سانحه مرقومه نک
 بو آنه دک تأخیری انکلتره پارلمنتنک متفرق اولدیغنه مبنی در زیر انکلتره پارلمنتی
 یعنی جمعیت کبری اصحابی وقت صیفده متفرق و هنکام شتاده مجتمع اولورلر وانکلتره
 دولتنک پروسیا ایله اولان روابطنه بناءً اعانهً للحرب اول بهار ایچون قرق کمی
 تجهیزینی مراد ایتمش اولوب سفان مذکور مصارفی تدارکی دخی پارلمنته توقف

ایدر بود دفعه پارلمنته انکلتره باش و کیلی (پیت) اوروپانک اختلالی وانکلتره لو ایله اسپانیانک محاربه سی مندفع اولمش ایسه ده دولتمزک روابطنه متعلق اوله رق اول بهارده قرق کمی لازمدر و مصارفک تهیه سی مطلوبدر دیو عاناً پارلمنته افاده و تصریح ایتمش وانکلتره لو ایکی فرقه اولمقدن ناشی فرقه مخالفه سر کرده سی بو قرق کمینک مصارفی ایچون آچه تدارک ایده لم امانه ایچون ترتیب اولنه جقدر بیله م دیو سؤال ایلدکده باش و کیل مرقوم دخی سزه بونی بو قدر افاده ایدر مکه بو مقدار سفینه نك تهیه سی انکلتره و دول متفقہ نك روابطنه نظر آ لازم کلدی بو پولتیقه سرخی شمدی سزه بن افشا ایده م دیو کتم راز ایلدکده جمله سی ملزم اولوب مصارفک تهیه سنه تعهد ایلمش لر و بوجعیتک وقوعی اوتوزیدی کون اولمشدر ایشته سانحه مرقومه نك سبب تأخیزی بودر زیرا مصارف سفائن تهیه سندن اول سانحه ار سال اولمش اولسه مسقولینک استهزا ایده جککاری آشکاردر و شوائنده تخمین ایدر مکه سانحه مذ کوره انکلتره ده ترتیب ایله برلینه و آندن پتره بورغه کوندر یله جکدر دید کدنصرکه سانحه مرقومه نك مألنی تعریفه باشلایوب مالی بودر که پروسیا وانکلتره دولترینک مرامی اوزره مصالحه یه راضی اولمز ایسه کز پروسیا دواتی جمع قوتیله برآ وانکلتره لو بر مقدار قوتیله بحرأ محاربه ایده جککاری محققدر دیمکله بر مقدار قوتی تعیرندن سؤال اولندقدده انکلتره جمع قوتی تخصیص ایتمز وفامنکلویه دخی روابطنه سی اقتضاسنجه شو قدر امداد ایله دیر و میزان اوروپا یه موافق دولت علیه یه خیرلو اوله رق مصالحه یه مسقولو راضی اولمز ایسه بو وجهله محاربه سانحه مذ کوره ایله اعلان اولتور غیر کونه اعلانه محتاج دکدر دید کده یه برو طرفدن کلامه مبادرت برله اوروپانک میزان کبیر روابطنی دیمن ایلچي بکک افاده لرندن بغایت محظوظ اولدق بو صورتده دولت علیه نك اصل مقصودی اولان قریمک دخی مسقولو دن ردی لازم کلور دینلدکده لو کزینی بلی اوله در لکن بو میزان اوروپا لفظی معناسنک بوبنده تمديد و صر فی ایله قریمک استرداد ی بهر حال دولت علیه نك همت و غایه الغایه اقدامنه موقوفدر دیمه سنه مقابله بواقدام و همتک لزومی ظاهر انجق میزاندن سؤال ایدرز قریم میزانه داخل دکیدر دینلدکده فی الحقیقه بویله در لکن ادخاله محتاجدر قالدیکه بو محاربه ده دولت علیه نك ضایع ایلدیکی برلرک استرداد ی بزم ایشمزه موافق و قبل المحاربه ضایع ایلدیکی ممالکک استخلاصی دولت علیه نك همتنه موقوفدر و قریمک ردی میزانه داخل اولور لکن شوشرطله که اتفقنامه موجبجه دولت علیه اقدام ایلیه زیرا اتفقنامه نك اوچنچی ماده سنده دولت علیه عون حقله غالب کلوب بتون قلاع و اراضی و خصوصاً قریم رد اولتمقمزین مصالحه یی قبول ایتمیه دیو مصر حدر

دیدیکنه بناءً در حال اتقاقامه نك صورتی ابراز و شرط ثالث قرائت و مضمونی تفهیم اولندقدنصکره ینه لوکزینی قریمك ردی بزم مصالحه موافقدر واستردادی خصوصه المزدن کلدیکی مرتبه سعی ایدرز بوخصوص روسیا دولتک مطلوب و مرغوبیدر زیرا قریمك ردیله دولت علیه کمال امنیت تحصیل ایدر و بو وجهله روسیا دولتی دخی گرفتار محاربه اولمقدن وارسته اولور هله روسیادولتی رضاسیه محاربهی اختیار ایلدی و شمدیکی حالده مسقولویه اراضی بی الطوع والرضا ترك ایتدیرمك استرز وردنده ضمان و کفالتی الحاق ایلرز و قریمك دخی استردادی مطلوبمزدن دولت علیه ایله برابر محاربه ایده جکمز و چونکه دولت علیه نك امنیتی قریمك استردادی ایله حاصل اوله جغنه بناءً هر نقدر اتقاقامه یه مطابق دکل ایسه ده قریمك استخلاصه سعی ایدرز دیو تطویل مقال ایدوب انحق غرض نمچه مصالحه سنك مذاکره سی اولدیغندن بوخصوص صرده سؤال و جواب ایله اطناب مقال اولنمبوب نمچه ماده سنه عطف کلام اولندقدن لوکزینی ریشنباش معاهده سنی طرفین مضطهلرینه قید ایتدیرمکدن مرادم نمچه مرخصی الدن قاجامه سنه مینی ایدی زیرا افندیلر کچن مجلسده ریشنباش معاهده سی لفظنی ذکر ایتیب اعماد نامه دیدیلر و اوچ ماده یی ایراد ایلدیلر آنک ایچون خوف ایدرم و نمچه مرخصی سمت آخره سلوک ایدوب برشی پایه مز لکن رد اولنه حق ممالک اللرنده در بزی یورارلر دیدکده برو طرفدن هر بار بزریشنباش معاهده سنی ذکر ایدرز اصل سندیمز اولدیغنه شبهه یوقدر دینلمکله فی الحقیقه ریشنباش معاهده سی مقبولمزدن دیور سز ریشنباشده استاتسکو تعیری مذکوردر بو حالده ریشنباش معاهده سنك جمله قبولی اقتضا ایدر روسیا قرالی استاتسکو تعیری رد قلاع و اراضی یه صرف ایتشدرو. نمچه لو دخی تعیر مذکور ی جمع حالاته حمل ایدیور مرخص افندیلر دخی بوتعیری رد ممالکه صرف ایدرک ریشنباش معاهده سنی قبول ایدرز دیمش اولسه لر مناسب اولور دیدکده مقابله اولنوب بونیچون اکلاشامیور بز هر مجلسده و خصوصیه کچن مکله ده کوچک او طه ده استاتسکو یی اراضی یه شامل اوله رق قبول ایدرز دیدک و حتی فلمنک ایلچیس یی نمچه مرخصی بونی بویله قبول ایلسه دونما ایدر ایدم دیمدی دیو مقابله اولندقدن ینه ایلچیء مرقوم جواب و یروب مرخص افندیلر استاتسکو تعیری قبول ایده مز دیدیلر بوندن شمدی یه دک اکلا دیغمز معنی شودر دیوب بعده نمچه ایلچیس یی عموم اوزره استاتسکو قبول اولمقدنجه بحثه کیرمیه جکنی در میان و مرخص افندیلر دخی اول امرده مواد ثلثه اساس اولمق اوزره قبول اولمقدنجه مواد سائره مذاکره سنه کیریشه میه جکلینی بیان ایتمش اولدقلرندن نمچه مرخصی مطالعاتی برکاغده تخریر وانکلتره ایلچیسینه اعطا ایتمش اولغله صورتی آلدم دیهرک سفیر مرقوم برکاغده

ابراز وقرائت ایلدی مفهوم ترجمه سی بوکه صالح مؤید معاهده سی و بوقووینا فراغنگ تجدیدی و جزا لرودن ایمراطور بیراغنگ تامینی و تجارت عهدنامه سی و سربسیته سیر سفائن واردل سوریلرینک افلاقده قشلاملری ایچون ویرلمش اولان سندات و فرمانلر اولدینی اکلاشلمغله ایلچی بک بزغوغانن اوصانماوز ایلچی بکلر دخی متوسطلقدن اوصانماز دیوب بعده بقالم الله نیسه منجر ایدر دینلکدن صکره لوکزینی کلام آخره شروع برله سزه محرمانه سویلمکه یاشدن برحوادث کلدی مسقولو اسماعیلی استیلا ایلمش و ابرائیله دخی سوء قصدی وار ایش معاذالله ابرائیلی دخی استیلا ایدر سه بزله بو محل الویرمنز مکله محلنک تبدیلی اقتضا ایدر شمیدین تنظیمی لازم کلزمی و دینه یاخود محل آخره کیدلمک ممکندر دیمکله اسماعیل استیلا اولنمش ایسه بزهمتمزه فتور ویرمیز قرق سنه مال و عسکر ایله محاربه ایلرز قالدیکه مسقولونک استدراجی عقینده ادباری واردر الله فرصتی دائما اکا ویرمنز برکون اولورکه دولت علیه مظفر اولور مع هذا اسماعیل و ابرائیل طونهنک قارشوسنده درو بورایه بعیددر آرده سلستره و روسجق و امثالی شهرلر و عسا کر کثیره واردر الحمد لله نه وار بولسانه کلورشی دکلدردیورد جواب اولنمشدر .

جمادی الاولانک اوچنجی کونی دفعه رابعه اولمق اوزره مکله قوناغنده اجتمع اولنوبینه استاسقوا سترقت بحئی درمیان اولدوقده نمچه ایاجیسی نهایت بن استاسقو اساسی اوزره مصالحه قطعیه عقدینه حاضریم ایسترایسه کز بو کون تحریر و امضا ایدرم دیوب مرخص افندیلر دخی مواد ثلثیه اساس اتخا ایدوبده مواد سائره ی فرداً فرداً مذاکره ایتک صورتی ایراد ایلمه لریله استاسقو عباره سی اوزره اول کون مباحثات کثیره جریان ایدوب و بوضورتله مجلس اوزایوب طرفیندن کلامه قدرت قلامقله مکله یه ختام ویرلمشدر .

برمنوال مشروح درت دفعه و قوعبولان مکالماتک اجمالی رکاب هایونه و سردار اکرمه بشقه بشقه عرض ایله عرض و اشعار اولنوب بو عرضیه لرده بواننده روسیا مرخصنک ضمان و کفالت تصدیقنامه لری مبادله اولنه جنی وقت مرخصلر تعیینیه بعد انقطاع المحاربه دستور العمل طو تلمق اوزره روسیه و نمچه علیهنه اوله رق دولت علیه ایله روسیا دولتی بیننده براتفاق تدافعی عقد اولنه جغه دائر شمیدین برسند مطالبه ایله یکی تذکیر و آراق آراق روسیانک بوقدر آنچه صرفنی درمیان ایلمسنه نظراً روسیه محاربه سنی التزام ایله یوز الی بیک اولسون عسکر سوق ایتدیکی صورتده تقدر مصرفه اولور ملاحظه یریدر نمچه ایله مصلحت ملکیه سی اولسون اکا بناءً التزام ایش دیرز روسیه محاربه سنی برای خاطر التزامی

عقل قبول ایتمز واردوده کی مرخصنک توسطدن کفید ایتمک کلامنی ایرادایلمش دقت اولنسه بلمم بومعناری مفیدمیدر نمچه مصالحهستی اوزاتمقده خطر اولدینی کبی تعجیلنده دخی خطر درکاردر زیرا مسقولو افلاقه دخول ایدر و نمچه مرخصی استاتسوقواساسی قبول اولتمقدجقه مواد سائریه کیریشه میه جکنی بیان ایتدی بز دخی بر موجب اراده سنیه مواد ثلثهده اصرار ایتمک اوزره بالاتحاد قرار ویرمش اولدیغمز دن ماده یا اوزار و یا خود منقطع اولور دیو تحریر اولمشدر .

انجق اقدجه پروسیا ایلچیسنک ورودنده واقع اولان مکالماته دائر تقدیم اولنان معروضاتک جوایی اولوق اوزره در سعادتدن صدر اعظمه و آندن دخی مرخص افندیله کوندرلش اولان تخریرات مجلس سالف الذکر اثاسنده وارد اولوب خلاصه مؤداسنده حدود مادهسی فی نفس الامر مرخص افندیلرک تحریر و ملاحظه لری وجهه قاریشدریه جق شی دکدر و پروسیا قرالنتک وارد اولان مهور اعتماد نامه سنده اشبو محاربهده نمچه عسکری طرفندن استیلا اولنان بالجملة ممالک دولت علیه رد و محاربه وقوعندن اول جملهسی نه حالده ایسه اول حاله اعاده ایله تسلیم ایلمه شرطی مسطور اولوق جهتیله تعداد و تعیین مواقع و مواضع اقتضا ایتمیوب اولوجهه اکتفا رأی حسن ایدوکی ظاهر در زیر خلیل پاشا وقتنده نمچه لونک ایراد ایلدیکی دعوی اونه صوبی دخی بوسنده اراضی دولتی فاصل حدود اولوق بلغراد عهدنامه سنک مقتضاسندن ایدی بوکا نظراً اونه صوبی وراسنده اولان اراضی نمچه لونک اولوق اقتضا ایدر ایدی حین تحریرده نمچه لونک دولت اخری محاربه سیله مشغول اولدیغندن ادعا ایدمیوب علی حاله بوسه لو یندنه قالدی شمیدی ادعا ایدرز صورتنده ایتمش شمیدی تعیین و تعداد اولنسون دینلسه نمچه لونک شاید بو ادعا یه دوشه بو ایسه اساس اولان ریشنباش سندینه مخالف ایدوکی بدیهیدر اگر نمچه مرخصی صکره حدود نزاعی ظهور ایدر دیو تعداد مواضع حدوده اصرار ایدیم دیرسه اساس معلومدر هر نه محله نزاع ظهور ایدر سه قواعد سرحدات اوزره طرفینک حدود ضابطاتی بالخبره بریره کلوب منازع فیه اولان محل اشبو سفردن اول قنغی طرفدن ضبط اولدینی تحقیق برله ضبط ایتدیروب دفع نزاع ایدر لر جوایی ویریلوب اسکات اولتملیدر قالدیکه مواد ثلثه دن احترازا عهد سابقه تعبیری و اونه صوبی حدودندن احترازا علی الاطلاق بلغراد عهدنامه سی تعبیری یاد اولنمیوب حدود ماده سنده ریشنباش اساسی و شرائط سائرده بلغراد معاهده سی شرائطی درپیش اولنسه محذوردن سالم اولوق کرک اگر چه وقوع حرب عهد سابقه یی فسخ ایدر لیکن اعاده صلحده طرفین مرخصاری دیلر سه بر عهدنامه یی مصاحته توفیق ایله اعاده و تجدید ایدر لر و ایسترلر

ایسه مجدداً شرائط مذا کرده ایدر لر مرخص افندیلر تحریری مقتضای اوزره
 عهد سابقه درپیش اولمق مواد ثلثی دفعه قبول ایتمک کبی اولور ملاحظه سی
 واردر وعلی الاطلاق بلغراد معاهده سی درپیش اولمق صورتنده دخی اونه صونی
 وراسنده اولان اراضی دعواسنه نمچهلو صلاحیت قیدینه دوشر بوملاحظه دخی
 درکاردر و بونلرده اولی اولان بروجه محرر حدود ماده سنده ریشنباش سنیدینه
 یایشوب شرائط سائرده بلغراد عهدنامه سی شرائطنه تطبیق اولمق قدر ظن اولنور
 بونده دخی عهد سابقه وقوع محاربه ایله فسخ اولندی دینلور ایکن بلغراد عهدنامه سنک
 در میان اولمنسی قول مذکوره منافی اولمز می سؤالی اگرچه وارد اولور لکن بلغراد
 عهدنامه سی مرعی کبی طوتمق لازم دکل فسخ اولدیغنی بیان واثبات ایدرک مواد
 ثلثه وقوعنه کانهجه دك بلغراد عهدنامه سنده مسطور شرائط طرفیندن امنیت ایله
 مرعی ایدی شمیدی ینه اول شرطلری مبین اوله رق بر عهدنامه یاپسه ق تطویل
 مذاکراتی موجب اولمز ایدی دینلرک صدده کیرلسه تعریض مذکوردن سالم اولمق
 کرک قالدیکه دولت علیه یه مواد ثلثه نك درجه مضر تی تعریفندن مستغنی بونلرک دفعنه
 مرخص افندیلر موفق اوله بیولرلر ایسه بر عظیم خدمت ایتمش اوله جققلرنده قطعاً
 شبهه یوقدر لکن البته بونلر ترک اولنایدر ترک اولنماز ایسه مصالحه اوله من صورتنده
 سویلانیوب بو اوچ ماده محدندر اساس مسقولودر دولت علیه مسقولو ایله حالا
 محاربدر بونلر ایکی دولتک امنیتنی سالب شیلردندر نمچه دولتک بونلردن فراغتی
 مقتضای مروندر وادیلرنده سویلنه رک ایراد اولمق وایشی اوزاتیموب بو اصوله
 تطبیق ایله بتورمک و نمچهلو بو اوچ ماده دن بروجله کچمیوب ایش بوزیله جفی
 بالاخره کرکی کبی محقق اولور ایسه مصالحه یی بوزمقدن بونلرک ترکی ادعاسندن
 حکیمانه فراغ اقتضا ایدر دیو مسطور بولمشدر .

جادی الاولانک بشنجی کونی دفعه خامسه اوله رق مکمله اوطنه سنده بالاجتماع
 استاتسکو تعبیری اوزره مباحثات کثیره وقوعیله بر صورتیه قرار ویریله میوب
 مجلس آخره تعلیق اولمشدر .

چند روز مرورنده روسیا ایلیجیسی لوکزینی مرخص اول افدینک قوناغنه کلوب
 استاتسقونک قبولنی نصیحت یوزنده بعضی اخطاراته ابتدار ایتدیکی صر دده فی الواقع
 متانت لازمدر انجق دولت علیه متارکه عقدندن بو انسالره کانهجه بر حاله ایدی
 شمیدی نوعما تغییر ایدی دیو نمچهلو کندویه عصیان اوزره بولنان پاتیزیبایی ایالتی
 اهالیسی دائره اقیاده ادخال ایتمش و مجارستان خلقنی تألیف ایلمش اولدینی حاله
 روسیه لو دخی اسماعیلی استیلا ایتمش اولدیغنی اشراب ایلمشدر .

وفي الواقع اسماعيلك استیلاسی دولت علیه چه خیلی تأثر و اندیشه‌ی موجب اولوب
 حتی روسیه لولرک آندنصکره ابرائیه تعرض ایلملری ملحوظ اولدیغندن و ابرائیل
 ایسه افلاق طور اغانده بولندیغندن اقدجه مسقولو ابرائیه هجوم ایده جک اولور
 ایسه نمچهلو مسقوه اعانت ایتمش و بی طرفلنی اجرا ایتماش اولوردیونمچه ترجمانی
 استرمه افاده اولندقدده در حال قوبورغه تحریر ایلدکرینه مبنی اودخی دولت علیه
 بوبابده امین اولسون مسقولو افلاق اراضیسنی چکنه یوب ابرائیه هجوم ایده من
 وفي نفس الامر شروطه منافیدر قالدیکه متارکه شروطنک ایفاسنی نفسمه فرض
 بیلورم دیو جواب یازمش و نمچه مرضی هر پرت بکرشده ایکن بوبابده مؤکد
 جوابلر تحریر ایلدیکنی بالیمان مقدا متارکه خبریله اردوی همایونه ککش اولان
 پروسیا سفیری (لوزی) سردار اکر مه تأمینات ویرمش ایکن بوخلالده روسیه نك
 سیرت اوزرندن ابرائیل قلعه سنه سوء قصدی احساس اولمغله خصوصات مشروحه
 بسط اولنهرق روسیه لو افلاق اراضیسندن مرور ایله ابرائیل قلعه سنه تعرض
 ایده جک اولور ایسه نمچهلو بیطرفلق شرطنه رعایت ایتماش اوله جنی بیانیله
 مرضی افدیله طرفندن هر پرت برقطعه تحریر ویرلمکله اکا جواباً هر پرت طرفندن
 برخریطه ایله برقطعه تقریر کوندریلوب مضموننده ابرائیل قلعه سنک حقیقته محتمل
 اولان حال ضیق اشتهالندن نشئت ایدن اضطرابه مبنی مرضی افندیله حضر آتی
 طرفندن ارسال اولنان تقریر نمچه مرضی داعیلرینک یدینه اصل اولمشدر عالم
 بیلورکه نمچه دولتی اشبو قلعه نك وقایه سنی تعهد ایتیموب انجق حال حاضره نظراً
 محارب اولان ایکی دولتک حقنه کمال دقتله بیطرفلق شقی اختیاری تعهد ایلمش
 و تعهد مذکور کور کمالاً اجرا وایفا ایتمشدر زیرا مسقوه عسکری متارکه عقدندنبرو
 افلاق طور اغانده دخول ایتامشدر و اراضی مذکوره نك خریطه سنه امعان نظر
 اولدیغنی عقبنده نمچه دولتک تصرفنده اولان اراضی به وضع قدم ایتیه رک و خفی
 و جلی بردلور طرفداری و مداخله و قوعبولیه رق بغداد مملکتیه ابرائیل قضاسی
 بیننده اولان معابر کثیره غیر حائله منظور عالیلری اولوب معابر مذکوره دن مرور
 برله مسقولونک ابرائیل قلعه سی محاصره سنه مباشرت ایده بیله جککری بدیدار اولور
 دیور د جواب ایتمش و کیفیت پروسیا مرضی لو کزینی ایله مذاکره اولندقدده
 اودخی ابرائیل قضاسنی اراضی مرقومه دن تفریق ایلمشدر .

و بوخلالده پروسیا و روسیه مصالحه سنه توسط ادعاسندن یکمیش اولدیغنی فقط عقد
 اولنه جق مواد مصالحیه کمالاً معلوماتی اولمق لازم کله جکنی بیان ایتمکده بولمشدر
 شویله که : در دست اولان نمچه مصالحه سنک ختامنده رد اولنه جق افلاق ایالتی

روسیه نك تعرض واستیلا سندن محافظه اسبابی اولجه تصور اولمق لازم كله رك اشقودره متصرفی محمود پاشا افلاق حاجی سرعسكری نصب اولنوب اكر مدت متاركه نك اقتضاسندن مقدم مصالحه صورت بولیویرر ایسه نجه عساكرندن تخلیه سنك ختام مدت متاركه یه دك تأخیری صورتی تذکر و مطالعه اولنمغه باشلامش ایدی . جمادی الاولانك اون التبیجی كونی مرخص لو كزینی دولتی طرفندن تعایات جدیده آلدیغنی بالیمان مرخص افندیلر ایله ملاقاتنده افلاقك تخلیه سنه و محمود پاشانك كلوب ضبط ایلمسی کیفیتنه دائر واقع اولان مذاكرات ائناسنده اولا مسقو مصالحه سنه توسط شرفندن پروسیالونك كف ید ایلدیكنی و نایا دولتین بیننده دركار اولان روابط اقتضاسنجه وقت مقدرده دولت علیه یه شانلو مصالحه عقدینه چالشه جققلرینی و توسطدن كف ید ایتشله ایسه ده نوجهله مصالحه اولورسه ضمان و كفالت الحاق ایده جكلرینه مبنی معنای توسطدن كچماش اوله جققلرینه نظر آ ظاهرده پروسیا ایلچیسی اكر چه مكالمه ده بولغا ز ایسه ده جمله شرائطه و قوفلری لازم اوله جغنی بیان ایلدكدن صكره پوتمكینك صدر اعظم حضر تریله مصالحه مذاكره سنه یم دیو نشر اقوال ایتمكده اولدیغنی ایراد ایلدكده برو طرفندن مقابله اولنوب سبحان الله سنك بوفاده ك غریبدر بویله اولسه دولت علیه بزدن كتم ایدرمی دولت علیه مسقولودن اخذ انتقام و تحصیل مرام ایتدكجه مصالحه یه میل ایتمه جكنی و بو قدر ترتیبات کلیه یه بذل همت ایتمكده ایدوكنی و پروسیانك مسقولو محاربه سنه شروعی مطلوب اولدیغنی اكلامش ایكن بویله اراجیفه اعتبار منافی درایتدر و حاجی بكر اغا ایله كلان مایورك برو طرفه حاجی مطلوب اولیوب قره لاشدن كیرو عودت ایتدی و حتی حاجی بكر اغا ایله پوتمكیندن كلان مکتوبه جواب اقتضا ایتدیكنی مقدم سویلمش اولدیغكزدن جواب یازلمدی الحاله هده مسقو طرفندن كسنه نك كلدیكنی و بر كونه مذاكره و قوعی بو قدر دیو جواب ویرلدكده مذاكره اولدیغنی بنده بیلورم پوتمكینك اراجیفدر دیوب برو طرفندن دخی حالاً پروسیا بزمله محاربه ایتمز و مراد ایتسم شمدی طرفه جلب ایدرم دیر ایتش دیو اغصاب مراد اولندوقده بلی پوتمكین بویله سویلر حتی انكلتزه ده اولان مسقو ایلچیسی دخی سز نیچون حاضر لانیور سکن بز دولت علیه ایله مصالحه ایتك اوزره یز دیو انكلتزه یه فتور ویررمش دیدكدن صكره استاتوقو اساسنك قبول اولمسنی قرالی توصیه ایلمش اولدیغنی افاده و بونك ایچون مرخص افسدیلری خلیجه ترغیب و تاخیره ارتق میدان اولیوب همان مجلس مكالمه نك عقدیه برآن اقدام مصلحت مصالحه یه صورت ویرلمسنی ایراد ایله تعجیل ایلمشدر .

مجارستان اراضی دولت علیه اراضیسنه متصل اولدیغندن مجارلورلك ایمراتوردن استعدا ایلمش اولدقلری امتیازات ایچنده زشتوی مکلمه سنده مجارستان کبراسندن برینک بولنسی ماده سی دخی مندرج اولمغله بوخلالده مجارلو قونت دسترهازی نام بکراده نك مرخص تانی اولمق اوزره نمنجه دولتی طرفندن تعیین اولنوب کک اوزره اولدینی استخبار اولنمشیدی .

جمادی الآخره نك یکر می ایکنجی کونی دفعه سادسه اولمق اوزره مکلمه اوطنه سنده بر معتاد اجتماع اولندقدن نمنجه ایلچیبسی هر پرت قرائت ایلدیکی کاغندنده مجار قرالی اولان المانیا ایمراتوری مجارستان کبراسنک استدعالرینه مساعدده ایدرک دسترهازی نام ذاتی ایکنجی مرخص نصب و تعیین ایلمش اولدیفنی فقط آنک ماموریتی شروع اولتان مکلمتانک بروجهله تأخیرینی ایجاب ایتدیکنی بیان ایلمشدر بعدده صده کیریشیلوب متوسط ایلچیلر طرفندن استاتوقو اساسی قبول اولندقجه هر رتک بجنه کیریشیمه جکی و کندولری دخی اجرای توسط ایده میه جکلری افاده اولنمغله مرخص افدیلهر طرفندن قلمه آنهرق مجلسده قرائت اولسان کاغدنک خلاصه مؤداسنده استاتوقو استرقت لفظنک قبولنده رونما اولان صورت تردد ایکی مقتضادن نشئت ایتمشدر بریسی بودرکه لفظ مرقوم سندلر مزده یوقدر و غیر مذکوردر و بولفظ شمده یه قدر مسموعمز اولماشدر معناسی مجهولمزدر بویه مجهول المعنی اولان لفظی من غیر رویه و رویه قبول اسحاب عقوله کوره ناروادر ایکنجیبسی بودرکه محدث اولان مواد ثلثه که مضراتی تعداد اولماز بونلرک مضرته نظراً رأساً رفعلری بالکلیه مطلوبمزدر مواد ثلثه نك بری بحر سیاهده علی العموم سیر سفائن ماده سنک مضرتی اولمغله بوماده بالکلیه دولت علیه نك امنیتتی سالدیر و مسقولو ایله محاربه مادامکه درکاردر اجراسی بروجهله ممکن اوله مز و دیگرلی دخی اجته ماده سیدرکه مملکتین رعایاسنه نیجه نیجه مفاسد القا و نیجه محائلی اجرا برله صاف دلان رعایانک مسامعنی برطاق مز خرفات ایله مالامال ایدرک صورت ظاهرده حمایه ایله بالکلیه دولت علیه رعایاسنی باشند چیقاردیلر و دیلنکبری رعایایه پانته و یروب حکم رعیتدن چیقارهرق اموال میریه نك تخصیصانه مانع اولیورلر و هر دولتک امور مخصوصه ملکیه سنه مداخله حقوق ملله مخالف ایکن اجته لر بومقوله ارتکابات ایله مملکتلری افساد ایتدیلر و یوده دلرک امورینه تسلط ایدوب ادنی بر اجته قونسلوس مقوله سی کمنه و یوده دلر کبی ازباب رتبک امورینه مداخله ایله محافظه مراتب لازمه سنه دخی رعایت مفقود اولدی بونلرک مضراتی ثابت و ظاهردر و مواد ثلثه نك بری دخی غرب اوجاقلرینک خسارلری تضمینتی تأخیر ایلدکده دولت علیه نك حدودندن

اراضی تضمینی ماده سیدر بوضورت دولت علیه نك شان والاشانه یاقشدر یلمز ومثلا نامسبوق بر صورت بیجا اولدیغندن بشقه وقتیه نزاعی مؤدی اوله جغنی باهردر نمچه مرخصی دوستمزك تعلیماتی محدود ایتمش صفوته بناءً مواد ثلثه نك رفی ادعاسندن کیلوب خصوصات مذکوریه حسن تمشیت ویرلمك اوزره اشبو وجهله رابطه سنه ابتدار قنور سیر سفائن ماده سی مستقولو ایله مصالحه عقد اولندقده اجرا اولتمق وقونسلوس ماده سنه بر حسن صورت ویرلمك وجهله استاتوقو استرقت عهود سابقه نك ابقاسی وبالجمله قلاع و اراضی وممالك دولت علیه نك هیئت مأخوذه وحدود قدیمه لریاه رد و تسایمی معناسنه اوله رق قبول اولتمشدر دیو ایضاح مرام قنمشدر .

بوضورت قرائت اولندقده اساس مذکورك قبولی مطلق اولمش اولیوب مشروط اوله یور دیو هر پرت اعتراض و شرط وقید قبول ایتمیه جگنی تا کید ایتمکله بروطر فدن دخی بز مواد ثلثه تنقیح اولنسون دیرز یوخسه قبولزی بونکله مشروط ایتمیز دیو جواب ویریه رك بونك اوزرینه مباحثات کثیره جریان ایدوب بو باده هر پرتی اقطاع قابل اولدیغندن بشقه متوسطلر دخی علی الاطلاق اساس مذکورك قبول اولنسی لازم کله جگنی واساس قبول اولندجه توسطه مجال اولیه جغنی بیان ایتملریاه نهایت اساس مرقومی اطلاق اوزره قبولدن غیری چاره اولدیغندن اولوجهله قبول اولنه رق وضع اساس اولتمشدر .

جمادی الاولانك یکرمی التنجی بازار ایرتسی کونی دفعهً سابعه اولق اوزره مکاله او طه سنده لدی الاجتماع نمچه مرخصی برکاغد او قویوب خلاصهً مضمونی استاتوقو استرقت اساسی اوزره نمچه عسا کرینك استیلا ایتمش اولدق لری ممالکک دولت عامیه رد و تسلیم اولنسی فقط خوتینک امانت اوله رق روسیه مصالحه سنه دکن قلمسی ونمچه لونک روسیه محاربه سنده بیطرف طور مسی ماده لرینک تصدیقندن عبارت اوله رق بونی بعد القرائه نمچه مرخصی ایشته شوسندی امضایه حاضر م لکن شمدی قرائت ایده جکم سندی مرخص افندیلر امضا ایتمک شرطیه دیه رك بشقه برکاغد او قودی خلاصهً مضمونی استاتوقو اساسی اوزره غرب او جاقلرینه دأر ۱۷۸۴ سنه سی اغستوسنده عقد اولنان تعهد تمسکی و سربسیت تجارت ایچون یه ۱۷۸۴ شباطنده وافلاق و بغدادن مملکتنده اردل راعیلرینک مرور و عبور واقامتلرینه دأر ۱۷۸۶ کانون اولنده ویریلان سندلر وبالجمله اعلان حربه کنجیه دک مرعی اولان عهود و سندات و او امرک کماکان ابقاسندن عبارت اولسلیه مرخص افندیلر استاتوقو طرفیندن قبول اولنمش بر اساس اولوب اساس دخی ذاتاً بر اوله رق طرفیندن بر اساس سندی امضا اولتملیدر . ایشته ایکی طرفک مصالحتی شامل

اوله رق بز بر سند قلمه آلدق او قونسون دیو سند مر قوم صورتی قرائت اولمشدر . خلاصه مضمونی ریشنباشده عقد وتمهید وبعده متارکه سندیه تایید اولندیغی اوزره استاتوقو اساسی اوزره استیلا اولنان ممالکک بین الاهالی متعارف اولان حدودلریه ردی و خوتینک امانت قلمسی و بو حریده ایمپراطورک بیطرفانی خصوصلریه دولت علیه دخی بوندن مقدم ریشنباش معاهده سنده بو وجهه قبول اولنان استاتوقو واسترتق اساسی اوزره دولتین بیننده مضافات و همجواری علتنه بناء اشبو محاربه نك وقوعنه قدر مرعی اولان عهد و مواتیق و سنداتی تصدیق و تجدید ایتسی افاده سندن عبارت ایدی بوسند قرائت اولندقدن صکره نمچه مرخصی بوسند کندو تعلیماته مطابق اولمق لازمدر . بعد التطبيق تمهیر ایچون مطالعه دخی لازمدر . وابتدا شونی دخی سویلر مکه سندات و عهد و واوامر فردا یاد اولناز ایسه تمهیر ایده نم دید کده استاتوقو قبول اولندقدن صکره دیه جک قالمز دینلوب بونک اوزرینه برخیلی مباحثه لر جریان ایلدکن صکره متوسطلر دخی مرخص افندیلرک سند صورتی تحسین ایتلریله آنلر دخی نمچه مرخصلریه برخیلی مباحثه لر ایدوب نهایت نمچه ایلجیسی مجلس آتی به توقیف ایتمشدر .

جمادی الآخره نك غره سنده دفعه ثامنه اولمق اوزره مکالمه او طه سنه وارلدقده نمچه مرخصی هر پرت فتح کلام ایدوب کچن مجلسده مرخص افندیلر حضراتی طرفندن اساس تمسکی صورتی اولمق اوزره اعطا اولتوب ملاحظه به تعلیق اولنان کاغدی کرکی کبی مطالعه ایتدم اولنده ریشنباش معاهده سی ذکر اولندقدن صکره معاهده مزبورده محرر اولان مواد ثلثه تفصیلاً ایراد و آخرنده جمیع عهد و روابطک و سنداتک تجدید اولنه جنی یاد اولمش بندخی تعلیماته تطبیق ایدرک برشی قلمه آلدق قرائت ایده جکم دیهرک برکاغد او قویوب خلاصه مضموننده ریشنباشده عقد اولنان مواتیقک ذکر ایدرک ایتدکجه معاهده نك متنده مبسوط اولان سبک و عباراتک غیر یستی قبول ایده میه جکی و ریشنباش مواتیق زشتویده عقد اولنه جق عهد ایه مخلوط اولمق سزین دولتین بیننده قبل السفر بغیر واسطه مرعی اولان روابطه نسبتاً و مصالحتیرینه توفیقاً زشتوی مکالمه سنده بر اساس مخصوص وضعه خالصانه خواهشکر واجابت و قبولنه نمچه دولتی مهیا اولدیغی و حدود جانبینه دائر اولان عهد و مواتیقک تجدید و ابقامی خصوصنده بشینجه جانبین تواقف ایتدن ضبط اولنان ممالکک ردینه دائر بر درلو محبته کیرشمیه جکی و دولت علیه مرخصاری اشبو وجه اسهلدن مباحثه ایه بین الاهالی متعارف اولان حدود قدیمه و محل آخردنه حدود معلومه بی الفاظ مبهمه و غیر معینه ایه افهام مرام ایدوب نمچه

دولتی ایسه الفاظ مذکورہی حدودی صراحتہً وصف و تعریف ایدن عہودہ
تقدیم ایدہ میہ جکی و دولت علیہ مرخصلری قلمہ آلمش اولدقاری صورت
سابقہدہ مذکور اولان مصافات و همجواری علتہ بناءً عبارہ سندہ اصرار
ایدہ جک اولدقاری حالہ کندوسی دخی دولتک تعہدینی بیان ضمنندہ بہر حال
بوعبارہی استعمال ایدہ جکی افاداتیلہ مرخص افندیلرک ویرمش اولدقاری مذکور
کانغدی تمہیر ایدہ میہ جکی بیان اولنغلہ بونک اوزرینہ برخیلی مناقشلر اولندقدن
صکرہ مباحثہ نمچہ مرخصیلہ متوسطلر بینہ نقل ایدرک آنلرک میانلرندہ دخی
برخیلی بحثلر جریان ایدوب نہایت متوسطلر بر اساس سندی قلمہ آلمق اوزرہ
مجلسہ ختام ویرلمشدر . بعدہ متوسطلر بر صورت قلمہ آلوب ابتدا مطالعہ ایتک
اوزرہ ہر پرتہ کوندر مشلر انجق صورت مذکورہدہ ینہ ریشنباش معاہدہسی
اساس اتخاڈ اولنوب ہر پرت ایسہ ریشنباش معاہدہسنک جمیع موادینی ایراد وبلکہ
ریشنباش معاہدہسنی یاد ایتک ایستمدیکندن استاتوقو استرتق اساس اتخاڈ و خوتینک
امانت قالمسی و بیطرفلق مادہسی برر قید اولمق اوزرہ ایراد اولنہرق طرفندن
اولنہجق سنددہ ریشنباش معاہدہسنہ مغایر برشی اولمامسنی التزام ایلہ اکتفا ایدوب
حالبوکہ استاتوقو استرتق اساسی جمیع موادی محیط اولیوب وسند مرقومک معاہدہ
مذکورہ یہ مغایر اولمامسی معاہدہ مذکورہدہ مندرج اولان جمیع موادی محیط اولمق
اقتضا ایتوب بو صورتدہ روسیا قرالتک کفالتہ استحقاقی مسکوت عنہ قالمق لازم
کلہ جکی و بو استحقاق ایسہ معاہدہ مرقومہدہ مقید اولان سائر مادہلر کبی تصریح
اولمق لازمہدن اولدینی و ہر حالہ ریشنباش معاہدہسی زشتوی معاہدہسنہ اساس اتخاڈ
اولیق طبیعت مصاحت ایجابندن ایدوکی ہر پرتہ افادہ اولندقدہ استاتوقو کفالتہ روسیا
قرالتک استحقاقی تصریحندن کندوسی دولتی طرفندن منع اولندیغنی ایراد ایدیجک
ہر پرتک بو جوابنہ متوسط مرخصلر اظہار حیرت و تعجب ایدرک جملہسی کیفیتی
ویانہ یہ تحریر ایلہ کلہ جک جوابنہ انتظار اولنمشدر .

انجق ویانہدن جواب ورودی کسب تأخر وامتداد ایدرک شعبان شریفک اولنلندک
مکالمہ منقطع اولدیغندن مرخص افندیلرک جانلری صیقلوب فقط آرہ صرہ روسیا
مرخصی لوکزینی ایلہ مخابره وکاہ بلالملاقا مکالمہ ایلہ اصرار وقت ایدرلرایدی .
اول خلالدہ روسیہ لونک مفتاح قریم اولان اوزی قلعہسنی رد ایتماک نیتدہ اولدینی
حوادثی لوکزینیدن استماع اولنمش ایدی ارکان سلطنت سنہ ایسہ روسیہ لویہ
برقاریش یر ترک ایتماک اوزرہ صورت غالبیتدہ مصالحہی دردست ایدہ بیلیمک
اسبانی تحریدہ اولہرق بو اواندہ انکلیز ضابطان بجزیہ سندن برقاچ کیمسہ در سعادتدن

سلسله‌تیره کوندرلمش و روسیه‌لو علیه‌له لهلو ایله اتفاق اولمق تصور اولسه‌رق کیفیت لو کزینی ایله سویلشمک اوزره مرخصلره تحریر و اشعار بیورلمش اولوب بناءً علیه جمادی‌الآخره‌نک یکرمنجی کونی لو کزینی مرخص اول اقدینک قوناغنه بالورود مرخص افسدیلرله واقع اولان مصاحبت و مذاکراتی ائناسنده یوسف پاشانک مقام صدارته گلنندن پروسیا قرالنک ممنون اوله‌جغتی بیان ایتدکن صکره آستانه‌دن کلان تحریراتده برقاچ نفر انکلیز اوفچیالی آتش قایق‌لری تدار کیچون سلسله‌تیره کوندرلدیکی یازلمش بونده چوق فائده اوله‌جقدر زیرا متفنن آدم‌لردر آتش انداز قایق‌لر تدار کیله دشمن سفینه‌سنه ایصال خسار ماده‌لرینی کوزل بیولرلر لهلو اتفاقه دائر سلطان سلیم خان حضر تلری آستانه‌ده کی ایلیچی ایله بنم ملاحظه‌می ایسته‌مشر کمال تواضع ایله ملاحظه‌می عرض ایده‌جکم باعث افتخار مدر قالدیکه له ایلیچسی تجارت‌له اتفاقی بر ایتمک ایستر بو بایده ملاحظه‌م مناسب‌در یعنی طرفینک وسطنی بولدم و لهلو ایله اتفاق احسندر زیرا دولت علیه‌نک و بزم مصالحه‌زده موافق‌در لهلو غیورانه حرکت ایدیور و بزمله متفقاً مسقو اوزرینه اعلان حربه حاضر‌در اسوجده اولان ایلیچیمز مأموراً اسوج قرالی ایله مذاکره‌یه باشلدیدی انجق وفات ایتمکله رینه آخر متفنن و مجرب ایلیچی تعیین اولمش فقط اسوج حکومت مشروطه اولدیغندن کبرای قومه مراجعه محتاج‌در دیو ختم کلام ایلمشدر .

الحاصل دولت علیه جمیع قوتیه روسیه اوزرینه حرکت ایتمک نیتیه نتیجه مصالحه‌سنی تعجیل ایدردی ایمپراطور ایسه هم دولت علیه‌نک بر مقدار قوتی اشغال ایله متفق اولان روسیه‌یه معنوی معاونت ایتمک و همده روسیه‌لونک غلبه‌سی تقدیر‌نده مصالحه‌یی ممکن مرتبه مرانمه موافق صورت‌ده تنظیم ایلمک مطالعه‌سیله وقت قرانمق داعیه‌سنده ایدی قالدیکه ایمپراطور هر تقدیر پروسیا قرالنک اجبار یله بی طرفانی اختیار ایلمش ایسه‌ده معنوی روسیه اتفاق‌دن ایرلیوب هر حالده روسیه چاریجه‌سنه نماشاته مجبور ایدی حتی انکلتیره مرخصی کیت بو ائناده و یانه‌دن نوقت تعلیمات جدیده کاه بیله‌جکنه دائر هر پرت ایله بر کون مذاکره و مصاحبت ایدر ایکن مجلس مکالمه‌یه نوقت رابطه و یر یله‌جک دیو سؤال ایتملی دکل بجدن سؤال ایتمیم که پرنس پوتیمکین پرنس قاتوچیه (یعنی نتیجه باش وکیلنه) زشتوی مکالمه‌سیچون نه زمان اذن و یره‌جک دیو تعریض ایلمشدر .

بو ائناده ایمپراطورک اوغلنی طوقسانه دو قه‌لغه اقعاد ایچون ایتالیا به عزیمتی استماع اولنسدقده بو دخی زشتویده کی مرخصنه کوندره‌جکی تعلیمات جدیده‌نک تأخیر و امهاله بادی اولمق اندیشه‌سیله زشتویده انتظار اوزره بو ائتان مرخصلرک خیالیجه

جانلری صیقلماغله لوکزیئی قریبا ویانه دن تعلیمات کله جکی ونمچهلونک مهمات سفریه ولوازم حر بیئی تقلیل ایتمکده اولمسنه و پائیز پیاسی مالکنده اختلاک دوامنه وکلنار تحت الرماد اشتعالندن احتراز اولنان فرانسه سربستی مرضنک سرایتی خوفنه نظراً ایمراتورک التزام ایتمش اولدینی طریقه صلح وصلاحدن انحراف ایدهمیه جکی افاداتیله مرخص افدیله تسلیت ویرردی .

حتی اول انشاده بح طرفندن ورود ایدن غزته نك مسئله حاضریه دائر اولان برقره سنی اخراج ایله مرخص افدیله کوندرمشدر .

فقره مذکورنک خلاصه ترجمه سی بودرکه ایمراتورریشنباش معاهده سی انمقاندده واقع اولان بعض اطوار جبرییه نظراً معاهده مذکورنک وقایه سنه مجبورمیدر دکمیدر دیو بعض مجالسده بر وقتدنبرو بوماده دائر مباحثه لر اولمقده در انجق ایمراتورک بالتجربه معلوم اولان متانت وحقانیت طبعیه سنه وکرك حکمدارلر وکرك آحاد ناسدن اولنلر تعهد ایلدکلری ماده ده ثابت قدم اولمیدن دیو اتحاد ایلدیکی قاعده سنه نظراً سرمو ریشنباش معاهده سندن مباعدت ایتیب لکن بدرلو بهانه ایله دخی پروسیا قرالنک استجلاب منافع ایلمسنه جواز ویرمز پروسیا وروسیه بیننده عن قریب محاربه وقوعه دائر اولان ابخات هر درلو ملاحظاته بادی اولمشدر وفی الواقع بونجه وقتدنبرو استراحت اوزره اولان پروسیا لویکرمی سنه دنبرو محاربات سببیه یتاب اولمش اولان مسقولویه زحمت ویره بیامنی اغلب احتمالدر انجق پروسیالو مسقولو علیه غلبه یه موفق اولسه دخی بوضورتله ممالکی خراب وخرزینه لری تلف وقوه عسکریه سی ضعیف اولوب اولوقت نوبت ایمراتوره کله رک اودخی پروسیا دولتی ایستاقواسترفت اصولی وقایه وتوسیع ممالک داعیه سندن فراغت ایلمکه مجبور ایدر پروسیا قرالی بودیققلری اطرافیه ملاحظه ایدرک دولت عثمانیه نك بوانشاده مصالحه یه رابطه ویره که سعی واقدامی مرتبه پروسیا قرالی دخی وقایه مصالحه یه راغب اولدیغنده شهه یوقدر پروسیالونک بولندینی بر موقع مشکله نظراً ایمراتور دخی پک کوزل حرکت ایدر وپروسیالویه ویردیکی سوزده ثبات ومتانتله مجبول اولدینی حقایق طبعیه سنه بر دلیل کافی کوستروب بالجمله اوروپا دولتلری بومثللو واقعلرده اوستریا خاندانی حقنده طور مذکور ایله عامل اولور دیو مذکوردر .

ایمراتورک ایتالیا یه عزیمتنه دائر لوکزیئی ویانه دن آلدینی تخریرانده مندرج اولان اخباری مرخص افدیله تبلیغ ضمننده رجیک یکرمی ایکیسنده برقطه تذکره یه لفا دیوان ترجمانه کوندرمش اولدینی تقریرنده ایمراتور رجیک طقوزنده

ایتالیا حوالیسنه عزیمت ایلی عزیمتدن ایکی کون اول انکروس یعنی مجار مشورتنه ختام ویرمک اوزره پرزبورغ شهرینه واروب ارباب مشورت اولان کبرای قوم انکروسی حین تنوجنده تعهد ایلیکی مواددن بعضیسنی تغییر ایله قولنده ثبات ایتمدیکنه بناءً خوشنود اولمیوب تبدیلات مذکورهنک ترقینی و بوندن اقدام انکروسدن افرازلرینی مراد ایلیکی اردل ولایتینی وطمشوار ایالتینی وخروالنگک برطرفینی ینه انکروس ممالکنه الحاق ایلمسنی کمال اصرار ایله مطالبه ایلدکرنده ایمراطور مجارلو ملتک ذکر اولنان تکالیفی ناچار قبول ایلیوب مراملرینه مساعدده ایتمکله مقابلهسنده کچن سنه مجار طابورلرندن فوت اولان نفراتی تکمیل ضمننده الی بیک نفر جمعه ارباب مشورتدن رخصته موفق اولمشدر بوندن بشقه دیرلرکه مجار مشورتی اربابی هررقنی دولت ایمراطوره عزم سفر ایدرایسه مصارفی مجارلو طرفندن کورملک اوزره درت سنه متوالیاً التمش بیک عسکر اعطا ایلمکی تعهد ایتمشر بوصورته نیمچه لونک مصالحه مکلماتینی تطویل و تأخیر سوداسنده اولدیغی شک وشبهه دن عاریدر لکن اسباب تأخیر نامعلوم اولوب استنباط ایلمک دخی متعسردر اغلب احتمال اولان بودرکه بووجهله معامله مسقولونک استدعاسنه مبنی اوله زیرا بغدادنده اولان عسکرلری قلیل المقدار اولمغه نیمچه لونک افلاقده بولمنسی صدراعظم حضر تارینک حرکاتنه مانع اوله بیلور دیو تحریر ایتدکنصکره مدت متارکهنک انقضاسندن اول مصلحت مصالحیه ختام ویرملک متارکه سنندده مندرج اولدیغی متوسط مرخصلره مرخص افندیلر طرفندن رسماً افاده اولنسه نیمچه مرخصلرله متوسطلر بینده سؤال واستکشاف احواله بادی اولور ایلی دیو اخطار ایلمشدر .

بناءً علی ذلك غرة شعبانده مرخص افندیلر متوسط مرخصلرله ملاقات ایدرک رسماً استعلام حال وکیفیت ایدوب آنلر دخی نیمچه مرخصلرینه افاده ایتملرله شعبانک اوچنجی پنجشنبه کونی دفعهً ناسعه اولق اوزره مکمله اوطنهسنده لدی الاجتماع اقدیمجه زشتوییه کلش اولان نیمچه مرخص نانیسی دسترهازینک رخصتنامهسی ابتدا قرائت اولنوب بعده متارکه سندینک اوچنجی مادهسنده مصالحهنک تعجیلی مشروطدر طرفینک قبول ایلدکلری استاتوقو اساسی اوزره رابطهسنه شروع اولنسون دیو مرخص افندیلر طرفندن ایراد اولندقدده هررت بن دولتک نهایت جوانی ابتدای امرده سویلدم افندیلر ایله براز مباحثه دن صکره استاتوقو قبول اولندی اما اساس وضعیله تمسکلری امضا اولندی و منازعه ظهور ایدوب بعده متوسطلرک ترتیب ایلدکلری سنندی قبول ایدهمدیکمدن دولتمه

یازمشیدم بویله جه قالدی شمدی خبره منتظرم دیمکله برو طرفدن دخی التمش کونی
تجاوز ایتدی بیج ایله بو محکک مابینی یدی کوندر دینلوب بونک اوزرینه بعض
مکلمات وقوعی اثناسنده هر پرت هر کون تعلیماتک ورودینه منتظرم وکلان
تحریراتده عن قریب کوندریز دیو محرردر دیوب بونک کی بعض هوایی سوزنرایله
وقت کچوریلهرک چند روز ظرفنده جواب کله جکنی هر پرت افاده ایدوب جوابک
ورودیه همان شو کونلرده ینه اجتماع اولنق تمناسیله مجلسه ختام ویرلمشدر .

بوصورتله وقتلر مرور ایتمکده اولوب شایدکه مدت متارکه ایچنده مصالحهیه رابطه
ویریلهر من ایسه متارکه تمید اولنور لاقردیلری نمچه لولرک آغزنده دوران ایلدیکی
اقدجه استماع اولنهرق بوندن غرضلری ایام شتاده عسا کر دولت علیه نک تفرقی
حسیله اولوقت نمچه لو دولت علیه بی توحیش ایدرک مواد مصالحنی ایستدیکی
قاله افراغ صورتی اولق ملاحظه سنه مبنی صدراعظم حضر تلی و دین و روسجق
وسلستره طرفلرنده بررمقدار عسکر تدارک واقامه ایدوب طرفیندن صعوبت
برطرف اولدقدن صکره مد متارکه عبشر طورنده بولنسه مصالحه نظام بولور
بم رأیم بودر دیو لو کزینی اقدجه مرخص اقدیلره اخبار و اشعار ایتمش ایدی
شعبانک بشنده مرخص اقدیلر ایله ملاقاتنده ویاننده مد متارکه لاقردیلری نمچه
مأمورلرندن استماع اولنمسیله شایدکه طرفلرندن بویله برافاده و تکلیف وقوع بولور
ایسه بوبابده دولت علیه نک مرادی ندر بیانمک بزجه الزم اولدیغی کی مرخص
اقدیلر دخی بوش بولنماق ایچون وقتیه بوکا دائر صدراعظم ایله مخابره ایتلری
ایجاب ایدر دیوب مکلمات اثناسنده اشقودره لی محمود پاشانک عسا کر بیشمار ایله
مخندن حرکتی افاده اولندقده ایلچیء مرقوم کرم ایدک محمود پاشانک کلمی تعجیل
اولنسون مشارالیهک عسکرندن الی نفری و دین طرفنده کورنسه نمچه لو براز
یلکنی آشاغه ایندیرر قالدیکه هر پرت محمود پاشانک کله جکنه اعتماد ایتمز دیدکده
انشاء الله اوتوز بیک عسکر ایله اون بش یکر می کونهدک و دین طرفه کلور
اولوقت هر پرتک تعلیماتی ایریشور می یوخسه مرخصاتی اجرا ایدر می دینلکده
بک مضطرب اولور ایسه قویندن چیقاریر دیدکدن صکره اسوج اتفاقک تجدیدی
خصوصی در میان ایتمشدر .

لو کزینی زشتوی به کله لی اسوج اتفاقک تجدیدی آرائق آرائق مرخص اقدیلره
اخطار ایتمکده و بوخصوص ایچون در سعادتده دخی پروسیا ایلچیسلیله مکله
اولنمقده ایدی بواشاده طرف سلطنت سنیه دن بوخصوص ایچون در سعادتده مقیم
پروسیا ایلچیسینه برقطعه سند ویریلوب خلاصه مضموننده دولت علیه ایله اسوج

دولتی بیننده بودند اقدام تجاوزی عقد اتفاق اولدینگی و بر مقتضای شروط اتفاق اسوج دولتته علی وجه التقاسیط اعطاسی مشروط اولان یکر می بیک کیسه آچهنک ایکی بیک کیسه سی درت تقسیط ایله اسوج ایلیچیسنه ویرلمش اولدینگی وبعده اسوج دولتی شروط اتفاقه رعایت ایتیموب مسقولو ایله منفرداً عقد مصالحه ایله یکی افاداتندن صکره الحاله هذه سلطنت سنه نك دشمنتری علیه نه تجاوزی متفق اولان پروسیا قرالی اسوج دولتتك مصالحه مذکورده سنی فسخ ایله کافی السابق اتفاق و محاربه به داخل اوله جغنی بیان و فیما بعد شروط اتفاقه مخالف حرکت ایتیه چکنه تکفل ایتمکله دولت علیه دخی پروسیا قرالتك استصواب و کفالتته اعتباراً اسوج دولتی بوسنه برأ و بجزراً مسقولو اوزرینه هجوم ایتمک و بر کونه عذر و بهانه ایله منفرداً مصالحه ایتیموب مصالحه هر نوقت مقرر ایسه دولت علیه و پروسیا و اسوج دولتری برابر عقد صلح ایلمک شرطیه مقدمات دولت علیه ایله اسوج دولتی بیننده امضا اولنمش اولان سند اتفاق تجدید اولنه رق سند مذکورده مسطور یکر می بیک کیسه دن غیر از تسلیم باقی قلان اون سکرز بیک کیسه دن اول ویریه چک درت بیک کیسه نك ایکی بیک کیسه سنی اتفاق سندی تجدید اولدینگی عقبنده و ایکی بیک کیسه سنی سنه آخیرینه نك مقسطاً و باقی اولان درت بیک کیسه بی دخی سند مذکورده مسطور اوقات تقاسیطه تأدیبه ایتمکی دولت علیه تعهد و خصوص مذکورک بوجه مشروح تنظیمی پروسیا دولته حواله ایلمشدر دیو محرر در .

اشبو سندی در سعادتده مقیم پروسیا ایلیچیبی زشتویده پروسیا مرخصی بولنان لوکزینی به ارسال ایتمکین لوکزینی مرخص افندیلر ایله ملاقات ایتدکده بوسند کافی دکدر مقدمکی وعدک اوزرینه بر ازشی ضم اولنمق لازمدر زیر اسوج قرالی ایکی شرط ایله روسیه به اعلان حرب ایدرم بری طرف دولت علیه دن اولنه جق اعانه مالیه نك ترقیبی و دیگری انکلتره دو نمانسک بحر بالظغه ورود ایتسیدر دیمش بونی در سعادتده عرض و انها ایدیکز دیو مرخص افندیلره توصیه ایلمش و دولت علیه نك استیلا اولنان ممالکینی رد ایتمک شرطیه مصالحه بی دول متفق روسیه به تکلیف ایدوب قبول ایتدیکی صورتده اعلان حرب ایتمک اوزره اولدقیرنی دخی بیان ایتمشدر .

حالبوکه بونلرک جمله سی مغالظه قییلندن ایدی زیرا بوانشاده بر منوال سابق فرانسه ده مستعد اشتغال اولان آتش اختلال اوروپا دولترینی یکدیگر له اتفاقه مجبور ایتمکله روسیه چاریچه سنک دخی غائبه حریبه دن وارسته اولوبده برابر بولنمش ایچون آنک دخی نمچهلو کبی استاتوقو استرقت اصولی اوزره دولت علیه ایله مصالحه سنی ایتیموب اولدینگی صورتده دولت علیه بی بر ازر فدا سنه ارض ایتمک مطالعه سنه ایدیلر انجق

اركان سلطنت سینه بورالره لایقیسه واقف اولدقلرندن دول متوسطه نك فرانسه علیهنده اولان حاضر قلمرینی روسیه علیهنه اولمق اوزره ظن و تخمین ایدرک بوضورتاه قریمی روسیه لوردن استرداد آرزوسندن هنوز فارغ اولمامش ایدی روسیه لوی ایه اوزی قلعه سی و آق صو ایله طورله نهری بیننده کی اراضی کندوسنه ترك اولنمق اوزره مصالحه عقد اولنمسی صورتنده اصرار ایدوب بوینتی دول سائرده به افاده ایتمک اوزره دائیما رقه دولته کشف و ایضاح ایتمکله دولت مرقومه دخی بوئانده روسیه لوی نك بو مرانی دول متوسطه به عرض و بیان ایتمکده بولمشیدی .

حتی ماه شعبان معظمک یکریمی اوچنده روم ایلی قاضی مسکری عبدالله منلا افندی ورئیس و کیلی راشد افندی کاغد خانه ده عقد معاهده اتقاق مذاکره سی ضمننده له ایلیجیسییه عقد مجلس مکالمه ایستدکر نده له ایلیجیسی دول علییه بی دوام سفره تشویق ایچون روسیه لوی نك مرامی طورله دن قطع حدود ایدوکنی اثبات سیاققتنده بوکا دائر دائیما رقه لوی نك پروسیا دولته ویرمش اولدینی ایکی قطعه تقریری ابراز واعطا ایلمشدرکه ترجمه لری زیرده (ی) اشارتیه ایراد اولنور .

اول تقریر لریک مؤداسنه نظر آستاقوقو استرقت اصولی اوزره مصالحه بی دول متوسطه قترینه به تکلیف ایتمش ایه ده قترینه بونی قبول ایتموب آکا باقره ق نجه لوی دخی تنظیم مواد مصالحه ده غایت آغر طورانه رق ایام متارکه ده تسویه مصلحت قابل اوله میه جفی اماره لری رونما اولدیغندن مرخص افندیلر دخی برمنوال سابق ایجاب ایدر ایه تمدید متارکه اولنوب اولنمامسی خصوصنده تعلیمات ایستدکر نندن کیفیت در سعادتده واردوی هایونده لدی المذاکره اون بش یکریمی کون قدر تمدید اولنمقده بر بآس اولیوب اما درت آی متارکه اولنمق لازم کلور ایه مدت مرقومه نك ختامی تمام عساکر اسلامیه نك تفرقی هنکامنه تصادف ایده جکندن بوکا اصلا جواز ویریله مز مکر کله جک سنه نك مایسنه قدر تمدید اولنه دیو قرار ویریله رک مرخص افندیلره اولوجهه تعلیمات کوندرلمشیدی .

روسیه نك دولت عایه سفریه مشغولیتی و پروسیانک معاوتی ایله لهولور روسیه تحکمنندن موقتاً تخلص کر بیان ایلمش اولدقلرینه مبنی نظامات ملکیه لرینی اکمال ایله تحصیل استقلال حکومه انتهاز فرصت ایچون روسیه نك امتداد مشغولیتی املنده اولدقلرندن دولت علییه بی تمدید سفره تشویق ایدرلر ایدی حالبوکه له دولتی نقدر روسیه نك تحکم و تسلطدن وارسته اولدی ایه اولقدر پروسیانک تحکم و مداخله سنه کر فتار اوله رق انظار دولده استقلال حکومتلری اولدیغندن ادعا واستدعالری پروسیا طرفندن تأیید اولنمقجه مشر و مؤثر اوله میوب بناء عایه دولت علیه ایله

اتفاق و تجارت معاهده لرینی تنظیم ایچون استانبولده مقیم اولان له ایلیجیسی بو قدر
وقدنبرو بر معاهده امضاسنه قدر تیاب اوله مدی .

اواسط رمضان شریفده هر پرتک تعلیماتی کلمش اولدیغندن مکالمه به آماده اولدیغنی
متوسطلر تبشیر کونه مرخص افندیله اخبیار ایتمکله ماه مرقومک اون یدنچی
کونی دفعه عاشره اولوق اوزره مکالمه قوناغسده لدی الاجتماع نجه مرخصلری
مقدمه اوله رق برورقه چیقاروب فرنگجه سنی هر پرت و ترکیه سنی ترجمانی قرائت
ایلمشدر . ترجمه مالی بودرکه : بروقدنبرو واقع اولان انقطاع مکالماتدن صکره
بودفعه دولتمزك ارسال ایلیکی تعلیمات جدیده بی ابتدای مکالمه ده دولتمزك التزام
ایلمش اولدیغنی طور و مسلکنه تطبیقاً تامیسه دفعه حضور کزه عرض ایلرز بسط
اولنه جق عهدنامه شروطنک مفصلاً قرائت و استماعی حامل اولدیغمز تعلیماتک تفهم
واحاطه سنه کافی اولمسی تمی ایدرز . قرائت انسانسده سکوتکنز بالکنز عریضه مزه
صرف ذهن و دقت بیورلدیغنی اشعار ایدوب آخر معنایه حمل اولماز واسئله و مطالعاتکنز
دخی عرض اولنان صورتک بعض دقایقنی ایضاح و تبیین رغبتندن نشئت ایتمش اوله جغنی
ملاحظه برله سکوتکنز دن قبول واقرار بروجهله فرض و تصور اولمیه رق صراحه لسان
صفوت نشانکنز دن اقرار کز صدورینه منتظر اولوروز و بشینجه بیان ایلرز که : اشبو
شروط منظوقنجه ایکی دولت بینسده مصلحت مصالحه بی امضایه شمیدین حاضر
و آماده یز هر پرت اشبو مقدمه بی قرائت ایتدکد نصرکه کندو مراملرنجه عهدنامه
صورتی اولوق اوزره اون سکزماده بی حاوی برکاغد ابراز ایله برر برر تعداد مواد
ایدرك آخرینه رسیده اولدقده اون سکزنچی ماده تصدیقنامه لرك مبادلنه سنه دائر
اوله رق قرق کون ظرفنده مبادلله اولنسی مقید اولدیغندن مقدا عقد اولنان
عهدنامه لرده تصدیقنامه ل مبادلنه سنه اتوز کون تخصیص اولنه کلوب بودفعه اون کون
زیاده تخصیص اولنسی ایمراطورک ایتالیا سده بولندیغنی جهتندرز . ایشته تنبیهاتی
افاده ایلم مرخص افندیلرک هر نه ملاحظه لری وار ایسه بو کون یاخود ملاقات
آیته استماعنه حاضر م دیو ترجمانی واسطه سیله افاده ایتدکده ملاقات آیته ده جرح
و تعدیل و تسقیح اولنوق اوزره قرار ویریلرک طی بساط مکالمه اولمشدر .

هر پرتک برمنوال سابق عرض ایلیکی عهدنامه ده ایرشوه قصبه و انحاسنک و اونه
صوینک قارشو سنده تصرف دولت علیه ده بولنوب اوتد نبرو فرصت بولدجه نجه لولرک
مطالبه ایده کلدکلری اراضینک نجه لویه ترکی و بلغراد عهدنامه سنسده بعض محالرک
استحکامی منع اولنمش اولمغه طرفینک مناسب کوردکلری محالره استحکام ویرمه
مأذونیتی و اسرانک بلا بدل ردی محرر اولوب آحاد ناسک لارنده بولنان بونجه

آنچه اسرا سنك بلا بدل ردی متعسر و آنچه لونك ایستد یکی موقبله استحکام ویر مکه
 مأذون اولدیغی صورتده بوسفرک بدایتنده قولایلقه آنچه ممالکنه دخول و هجوم اولنان
 انحانك مداخل و مخارجنی سد و بند ایده جکی جهته ایلروده محاربه و قوعنده آنچه
 ممالکنه دخول و مهاجه اولنه میوب بوا یسه دولت علیه مضر و اراضی ترکی استاتوقو
 اساسه مغایر اوله رق جمله سی قبول اولنور مواددن اولدیغی حالده و قتلر دخی تنك
 و نازك اولمغله پروسیامرخصی لو کزینی مرخص اول افندیك قوناغنه دعوت اولنوب
 مرخص نانی بك و مرخص ثالث افندی دخی حاضر اولدقلمری حالده مکالمه به بالابندار
 هر پر تك ارائه ایلدیگی کاغد معلوم بو حالده مصالحه ماده سی نصل اوله جق بو کون
 یارین تعلیمات کلور دیو امرار وقت ایدرک آنچه لولر نهایت یاس جوانی عرض
 ایتدیلر ایرشوه و اونه کندولرنده قالمق و ایستدکاری یرلرده قلعه یا بمق کبی قبول
 اولنیه جق بر طاق ماده لر تکلیف ایدیور لر جمله سی استاتوقو استرقت اساسه مغایر در
 انجق وقت دخی تنك اولمغله ایسته مراملری ظاهر اولدی دینلوب بونك اوزرینه
 لو کزینی ایله خیلی مذاکرات و مکالمات جریان ایلمش و بر کیجه دخی متوسط
 مرخصلر ایله ملاقات اولنور ق خیلی بحثلر اولمش اولوب انجق متوسطلرک جمله سی
 گوشك طاور اندقلمرینه و حتی مرخص افندیلر طرفندن مقدمکی مجلسلرده استاتوقو
 اساسی طرفیندن بر کونه قید و شرط اولمقسزین اطلاق اوزره نه و جهله قبول
 اولدیغی تذکار و اراق متوسطلرک اجرای شهادت و کفالت ایتلمری لازم کله جکی
 اشعار اولندقدنه انکلیز مرخصی بودلیلرک قوتی عندمزده مسلمدر لکن شمدی
 ماضیدن بحث اولتماز آنچه لو طرفندن خارج ازماملر در میان اولنان تکالیفدن دولت
 علیه نك تأثری نه مرتبه در و بونك اوزرینه نیتی ندر بیلنوبده بعده اكا کوره التزام
 و اعمال اولنه جق تدابیر و حرکاتی مطالعه ایتلویز دیوب لو کزینی دخی افندیلری متوسطلره
 اولان امنیتلرندن و دولتلری طرفندن ماملر ایلدکاری همم حسنه دن کچور مک و مایوس
 ایلمک معناسی اکلا شامسون انجق اول امرده اولکی مضطهلر در میان اولنور ق
 متوسطلرک شهادت و کفالتلرینه مراجعت اولنور ایسه چونکه کفالت دعوا سنك
 مذاکره سی دول بیننده اولمق لازم کله جکندن بوسورت انقطاع مکالمه یی موجب
 اولور دیدیکنه و بر منوال سابق بو وقته قدر مکالماتک انقطاعنه پروسیامرخصنك اخطار
 و اصرار یله ریشنباش سنديك اساس انخاذ اولتمامسی مسئله سی اولدیغی حالده ریشنباش
 سنديك تنظیم اولنه جق معاهده ده درج و ذکر اولتمسی داعیه سنندن پروسیالونك مؤخرأ
 فارغ اولدیغی دخی بواننده لو کزینی اشعار ایتدیکنه نظراً متوسطلرک معاوتلرندن
 یأس کیکله ایسته بو کره مرخص افندیلر اوروپانك پولیتقه سنجه دولت علیه نك
 نه موقعه ده بولدیغی اکلامغه باشلا یوب اولو جهله دولت علیه یه افاده حال ایتشلر در .

اِسْتِطْرَادُ

بيك يوز اون سنه سنده منعقد اولان قارلوفچه عهدنامه سنك بشنجي ماده سنده اونه صوينك اوته سنده صاوه صويندن آلا رغه محافظه جي ايله ضبط اولتوب طرفينك اللرنده اولان يرلر بوجنكدن اول اولان ارضيسي ايله ينه اللرنده اولتوب وخر و اتلق جانبنده طرفينك اللده قاله جق يرلرك انتھاسنه وارنجه نواحى و اراضيلريني بشقه بشقه حدود ايله آيروب خندق و طاش و قازق و علائم سائر ايله قطع و تعيين قلمق تعبیرلری مسطور و بيك يوز اوتوز سنه سنده منعقد اولان پوزروفچه عهدنامه سنك التنجي ماده سنده نهر اونه نك فراجه طرفنده سانه صويندن آلا رغه محافظه جي ايله ضبط اولتوب طرفينك اللرنده اولان يرلر قارلوفچه مصالحه سنده قرار و يرلديكي اوزره اراضيلر ايله ينه اللرنده اولوب آندن صكره ضبط اولتمش يرلر وار ايسه حدود قطعنه تعيين اولنان طرفينك و كيللری اختلالی دفع ايدوب خرو اتلق جانبنده طرفينك اللرنده قاله جق يرلرك انتھاسنه وارنجه اراضيلرين بشقه بشقه حدود ايله آيروب تمیز و تفريق و وضع علائم ايله لر ديو مذکوردر بعده بيك يوز الی ایکی سنه سنده منعقد اولان بلغراد عهدنامه سنك اوچنجي ماده سنده نهر طونه و نهر صاوه ایکی دولت ایالتلری بینده حدود اوله و صرب ایالتلرينك حدودلری كذلك بوسنه طرفنده قارلوفچه نام محله عقد اولنان مواد اوزره اوله لر ديو محرردر بوضورتده دولت عليه نك خرو اتلق اراضی سنده یعنی اونه صوينك قارشو جانبنده اراضیسی اولديغی مثبت اولوب انجق بلغراد معاهده سنده برمنوال سابق نهر طونه و نهر صاوه دولتين بینده حدود اوله جنی کوسترلمش اولديغی حالده نهر صاوه نك قنی محله نك حدود تعیین اولنه جغده شك و اشتباه عارض اولمخله بر سنه صكره درسعادته تنظيم اولنان سندده نهر صاوه نك نهر طونه به منصب اولديغی بوغازندن بوسنه ایالتنك نهایتده واقع نهر اونه نك صاوه به منصب اولديغی محله نك و محل مرقومدن دخی بوسنه طرفنده واقع نهر اونه نك ساحلیله کیدیلوب حالدا دولت عليه تصرفنده اولان نووی قلعه سی حدودینه نك قارلوفچه حدودی و نهر اونه دن ایلر و یعنی قارشو طرفلری پوزروفچه حدودی ايله محدود اولوب صرب ایالتنك نهایتی اولان نهر دیریندن یوقارو بوسنه طرفلرنده ایکی دولت ایالتلرينك حدودی نهر صاوه و نهر اونه اولوب طرفیندن نهرین مذکورین تجاوز اولنیه دینیه رك اکر چه نهر اونه نك قارشوسی و پوزروفچه حدودی تعبیرلری قارشو طرفنده دولت عليه نك اراضیسی اولديغی

اثبات ایدر ایسه ده نهرین مذکورین تجاوز اولنیه تعیر صریحی بوکا معارض اوله رق نهر اونهنك قارشو جانبنده خرو اتلق اراضیسنده دولت علیه نك علاقہسی قالماسی اقتضا ایتدیکنه و اولوقت قطع حدوده محدودلر تعیین وار سال اولندقدہ بوسنه اها لیسنك مخالفتدن ناشی اوله منازع فیه اوله رق یوزی اوسته براغلمش ایدوکی روایتنه مبنی اونہ صوینك قارشو سنده واقع اون سکز دن زیاده قلعه و قصبه و پلنقله لر دولت علیه طرفدن فضولی ضبط اولنمش دیونمچه لولر آرد صر د اعدادن خالی اولمازلر ایدی . ایرشوه بختہ کلانجه : بلغراد عهدنامه سنده ایرشوه قصبهسی دولت علیه طرفنه ترک اولنوب انحق دولت علیه نك رزنه ایرماغنی برسنه طرفنده تماماً عتیق ایرشوه قصبه سنك وراسندن و اتصالندن آقتمسی شرط قانمش وبعده حدودنامه سنك تنظیمنده نمچه لولر بوکا دائر بعض مرتبه قیل وذل ایشملر ایسه ده بشقه مشغولیتلری اولدیغندن هر فصل اولور ایسه اولسون قطع نزاع اولنمش کندو مصالحتلی اقتضاسندن بولندیغنه مبنی بر منوال سابق الی اوج تاریخنده درسعادته صدر اعظم ایله نمچه بیوک ایلیجیسی بیلر بده مبادله اولنمش اولان سنده حدوده دائر بر درلو نزاع قالمدیغنی مندرج بولمش و التمش تاریخنده نمچه ایمر اطوریجهسی ماریه تره زدنك التماسنه بناء مصالحه ممدوده تعیر بیله تجدید اولنمان معاهده سنندنه عهد سابقه ایقا اوله رق حدود ارضیه دائر میانده اصلا نزاع قالماش ایکن نمچه لولر دولت علیه نك سکسان ایکی سنهسی سفرینك نتیجه سنده مشهود اولان یورغونلغنی فرصت اتخا ز بونکشلك طریقہ سنه سلوک ایله اول ائاده وقوعبولان له مقاسمه سنده نمچه لونك حصه سنه اصابت ایدن بوقوچیا ایله مجارستان آرمسنه کیرمش اولان بوقوونیا قطعہسی که بغدادن ایاتی مضافاتندن ایدی بوقطعه بهمان عسکر ادخالیه ضبط ایتدکن صکره اردل ایالتندن طوغریدن طوغری به بوکره ممالکنه الحاق ایلدیکی له اراضیسنه کیدلک ایچون بوقوونیا قطعہ سنك نمچه دولته لزومندن بشقه قطعہ مذکورہ فی الاصل له اراضیسندن ایکن برآراق بغیر حق بغدادن طرفندن تخطی او انہ رق ضبط اولنمش ایدوکی ادعاسیله قطعہ سر قومهنك کندولرینه ترکی و حدودجه بادی منازعه اولان موادك کلیاً قطعنی درسعادته مقیم اولان بارون توغوت نام ایلیچی ایله دولت علیه به تکلیف ایلدیکی صر ده اشبو ایرشوه ماده سنی دخی ایراد ایلمشیدی بوقوونیا ماده سنده نمچه لویه نماشات و مساعدده اولنماسیچون بغدادن یوه ده سی غره غوار کیغه بک درسعادته فریادنامه لر تقدیمیله اخطار و اصراردن خالی اولیوب وحتی وکلای دولت علیه نك بوخصوصه کوشك طاوور اندقلرخی کلادینی کی بو باده طرف دولت علیه دن قیدسزلق کوسترلدیکی تقدیرجه روسیه طرفندن طلب حمایت و معاونته مجبور اوله جغندن بختله باب عالی به

بر شدت لو مکتوب یازوب حالبوکه کیغه بک فی الاصل روسیه ک صحابته بغداد ویو دده سی
 نصب اولمش ایدو کندن اکثر وکلای دولت ذاتا کندوسندن دلکیر ومتفر ایکن
 بویه شدید لسان قولانمی وکلای دولتی بتون بتون غضبندیره رک کندوسندن
 بیایغ اخذ نار داعیه سنه دوشور مکه آنک اخطاراتی مفید اولدقدن بشقه وکلای
 دولتک بر قاندها نمچه طرفه تمایللرینه سبب اولدیغه و بو وسیله ایله دولتین بیننده
 سائر حدود منازعه لر ی دخی بالکلیه قطع اولمش اوله جفی ملاحظه سنه مبنی بوقوونیا
 قطعه سنک نمچه لویه ترک و فراغنه دائر بیک یوز سکمان طقوز سنه سی اوائلده
 در سعادتده درت ماده ایله برخاتمینی حاوی بر قطعه سند تحریر و امضا اولنه ر ق بارون
 توغوته اعطا اولمش ایدی که بر صورتی ذیلده (۱۱) رقمیله ایراد اولنور .

قطعه مرقومه تک بوضورتیه تمچه لویه ترکی کیغه بکدن بر نوع اخذ انتقام مثابه سنه
 ملاحظه اولنه ر ق اولوقتک ساده دلان وکلایسی بوندن چندان متأثر اولدقارندن بشقه
 سند مذکورک دردنچی ماده سنده دولت ایمپراطوریه تک ایرشوه حقیقده اولان
 ادعا سندن فارغ اولدیغی وخاتمه سنه دخی فیابعد دولتین بیننده حدودده دائر باعث
 منازعه حالت قالدیغی مصرح اولسیله ارتق نمچه حدودی منازعه سندن بتون بتون
 قورتلق دیو مطمئن البال اولمش ایدی .

حالبوکه روسیه لو قریم الکاسنی غضب واستیلا ایتدکن صکره جلد نائیده بیان
 اولدیغی وجهه خلیل حمید پاشا صادر تنده نمچه لولرینه وونه اراضیسیله برابر اشبو
 ایرشوه بی دخی ادعا ایتدکنر نده کندولرینه قطعی وجهه جواب ویریه میوب شمدی
 بونلرک وقتی دکل یولوو کچشدیرلمش ایدی لکن بووعد ضمنی بی نمچه مرخصلری
 بودفعه سررشته ایدرک ایرشوه و اونه اراضیسی استاتوقواساسنه داخل اوله ر ق طلب
 و ادعا ایتمشلردر . شوبه که : استاتوقو استرقت کافه حالانک تجدیدی دیمک اولسیله
 طقسان سکنر سنه سنده کی منازعه دخی عودت ایدوب منازعه فی اولان برلر ایسه
 الحاله هذه بدیمزده اولدیغندن آنلری رد ایتسه ک بو حقمزدن کچمش اولورز
 شمدی اول امرده بونزاعک دفعیه حدود ماده سنک تنظیم وتسویه سی لازم کلور
 دیوب بروجه آتی نیجه مجالس مکمله بومنازعه ایله کچمشدر .

رمضان شریفک یکر می دردنچی پنخشنه کونی اون برنجی دفعه اولوق اوزره مکمله
 قوناغنده لدی الاجتماع مرخص افندیار کلامه مبادرت ایدرک مجلس سابقده تمچه
 مرخصلری طرفندن ویریلان ورقده سندانک تجدیدی ایکنجی و اوامرک تجدیدی
 اوچنجی ماده اولوق اوزره ترتیب اولنه ر ق ردقلاع و اراضی ماده سی تأخیر اولمش
 حالبوکه اساس اوله ر ق قبول اولنان استاتوقو استرقت اصولی مقتضاسنجه رد قلاع

و اراضی و تجدید عهود و اوامر مادهٔ واحده اولمق لازم گاه جکندن اولو جهله
 بزده بر صورت قلمه آلدق دیو افندیلر طرفندن قلمه آلمش اولان ورقه قرائت
 اولندقدنه بونک اوزرینه بعض مباحثات جریان ایدوب نمچه مرخصلری ابتدا
 عهود تجدید اولنوبده رد قلاع و اراضی آکابناء اولمق لازم کلور دیملرینه مقابلهٔ
 بونلرک بر ماده ده درجی اساسمز اولان استاتوقو اقتضاسنددر دینلمکله نمچه
 مرخص ثانیسی دسترهازی استاتوقونک طرفیندن اساس اولدیغی صحیحدر انجق
 اراضی مادهسندده حدوده دائر نزاع و آرانک تنظیمندن صکره رد قلاع و اراضی
 اولنور و سنداتک تقدیمی بوندن اقتضا ایدر دیمنسه جواباً برو طرفندن دخی
 استاتوقو ردقلاع و اراضی و تجدید عهود و سنداته محمول اولهرق بلاقید و لاشرط
 قبول اولندقدن صکره منازعهیه محل قالماز دینلرکده دسترهازینک قبل السفر بعض
 حقلمز وارکه ادعا اولمش ایدی و حالاجرا اولنمدی آنلرک شمدی تنظیمیه دفع منازعه
 اقتضا ایدر دیسی ایرشوه و اونه مادهلرینه کریزگاه اولهرق بونک اوزرینه برخیلی
 بحثلر جریان ایدوب برو طرفندن بو ادعانک اساسه مغایر اولدیغی ایراد اولندقدنه
 هر پرت مقدمکی افادهم شمدیکی افادهمه مغایر دکلدر ایستاتوقو اساسی بلاقید
 و لاشرط قبول اولندی انجق اعلان حربدن درت سنه مقدم تا اعلان حرب زمانه
 کلنجیه دکن بر نزاعمز اولوب دولت علیه ایله مذاکره سنه مباشرت اولمش ایدی که :
 ایرشوه و اونه مادهلری ایدوکی افندیلرک معلومیدر شمدی آنی ایراد ایدرم دیمنسه
 مقابلهٔ اولوقت دولت علیه جواب ویردیغی دینلرکده دولت علیه بو ایکی مادهینی
 نه رد ایتدی و نه قبول ایتدی لکن اولوقت دوستانه بر تسلیت وعد ایلدی دیمکله
 افدیلر بلغراد عهدنامهسندده ایرشوه قصبهسیله حوالیسنک دولت علیه به ترک اولندیغی
 ایراد ایتدکلر نده هر پرت رزنه صوینک ایرشوه اتصالنندن اجرامی مشروطدر
 اول شرط اجرا اولنمدی دیوب بعده الی درت تاریخنده ایرشوه حدودینک تعیین
 اولندیغی و رزنه صوینک محل معلومدن آقدیغی و بردرلو مجادله قالمیوب کلیاً قطع
 نزاع و تجدید حدود اولندیغی مبین در علیهده وزیر اعظم ایله نمچه امپراطورینک
 بیوک ایلچیمی بپننده آلوب ویریلان سنک اوچنجی مادهسندده بو وجهله مقیددر
 دیدکلر نده دخی رزنه صوینی محل مرقومدن آقیدلماش ایکن خلاف واقع اولهرق
 آقدی دینلمش دیو سند مرقومه اعتراض ایدیلچیک ایلچی بکک بو افادهمی کندی
 دولتک مأمورلرینه عز و ارتکاب کذب و خلاف دیمک اولور بو صورتده زشتویده
 کدران ایدن صحبتلر دخی و قتیله یلان چیقاریلور و ویریلان سندلر اعتباره شایان
 اولماز بو مقوله شیلر ملاحظه اولنوبده سولینمک مناسب اولور ظن ایدرز دیو

تعریض اولمغله دسترهازی سوزه قاریشوب کویا مجارلو بومصالحهیه راضی اولیوب
ایمراطوری جنکه سوق و تشویق ایتمشر ایسهده ایمراطور قبول ایتموب انحق
مجارلونک استدعاسنه مبنی انکروس ملتک تاملین حدودی ایچون کندوسنک
صورت نظارتده مأموریتی بالتصویب تعیین اولمش ایدوکنی درمیان ایتدکده مرخص
افدیله بز دسترهازی بی نمچه ایمراطورینک مرخصی وهرپر تک رفیقی بیلورز
رخصتنامه سی دخی بویله در انکروس جمعیتی وکیلی بیلمیورز دیملریله دسترهازی
بنده کندومی ایمراطور مرخصی اوله رق عرض ایدرم انحق انکروس حدودینک
تأمینی ضمنده ماده نک ترویجی ایچون مأمور قلنمشمدر و مأموریم ایمراطور اسکی
استحقاقزه مساعده ایلدیکندنشای و مصالحه وقوعنده انکروسلی طرفدن بریسی
بولوبده امنیت حدوده مضر حالاته نظارت ایتمک مصلحتنه مینسدر دیدیکنه
سبحان الله دسترهازی ایمراطورک امرینه ناظرمی اولمش بویله بی معنی سوزلر
امرار وقتدن بشقه نسنه بی مفید اولمز دیو مقابله وهرپر ت دخی دسترهازی اشبو
افاده سنی مأموریتک اسبابی افادهیه وسیله ایتمشدر یوخسه اودخی بم کبی مرخصدر
ایمراطورک حین تتوجنده مجارلو طرفدن عرض اولنان اورا قده محاربه نک تمیدی
استدعاسی دخی مندرج ایدی ایمراطور قبول ایتموب بونی کوندرمشدر بودغه
استاتوقونک تمدید ووسعتی اوزره مصلحتنه رابطه ویرلمیدر دیسنه برو طرفدن بز
تمدید ووسعت بیلمیوز استاتوقو بلاحضر ولاقید اوله جقدر دیو مدافعه اولنوب
بونک اوزرینه ینه اجاث سابقه اعاده و تکرار اولنهرق برچوق مناقشه لر وقوعیله
برشیده قرار بوله مدیغدن نهایت متوسطلره مراجعت اولمغله آنلر دخی وقت
قالمدی مجلس آتیده سولیشیلور دیهرک مکالمهیه ختام ویرلمشدر .

رمضان شریفک یکریمی التتجی کونی اوزن ایکنجی دفعه اولوق اوزره مکالمه قوناغنه
واریلوب مکالمه او طه سنه قبل الدخول متوسطلر ملاقات طاب ایتمریله بشقه او طه ده
مرخص افدیله ایله ایدی الاجتماع نمچه لولرک ادعالی واهی و دیلیری بی معنی
و حق دولت علیه یدنده اولدنی ظاهر ایسهده نمچه مرخصلری تعایامتز بویله در
بوندن بر خطوه خارجه حرکت ایدهمیز مأموریتمز قطعی و صریحدر دیو کلام
اولرنده اصرار ایلدکلی باعث تأثریمز اولمشدر دیملریله مرخص افدیله بز دخی
مأموریتمز قطعیدر اساس مصالحهیه مفاخر حرکت ایدهمیز نمچه لولرک مراحمی صفوت
اولدنی ظاهر اولدی چونکه مکالمهده بویله اصرار ایده جکر بویله بی معنا معارضه دن
ایسه بز دخی اقتضاسنی ملاحظه ایدلم ینه متوسطلر ایله خبرلشورز دیمشدر ایسهده
متوسطلرینه بر کره مکالمه او طه سنده اجتماع و مباحثه اولمنسنی تنسیب ایلدکلرندن

مکمله او طه سنه وارلدقده صده لدی الشروع ایرشوه ماده سنک استاتوقو اساسندن خارج اوله رق بلا دلیل بر ادعا اولدیغی ایراد اولنوب هر پرت دخی بلغراد معاهده سنده رزنه سوینک اجراسی مشروط ایکن اجرا اولمدیغی ورزنه سوینک طبیعتیه جریانیا محال ایکن استانبولده عقد اولنان سنده خلاف واقع اوله رق جاری اولمش دنیلمسنی و التمش تاریخنده منعقد اولان معاهده مدودهده مبهمانک تأکید و تصریح اولمدیغی و بوقوونیا سنندنده ایرشوه اهالیسنک ضبط و ربطی قیدینک اجرا اولنماسنی و اعلان حریدن درت سنه مقدم بوماده در میان اولندقده اولوقت تسویه سی طرف دولت علیه دن وعد اولنمش ایدوکنی سر رشته مقال و بو صورتله ایرشوه دعواسی اوزره استدلال ایدوب برو طرفدن دخی کافی السابق مقابله و مجاوبه اولنهرق بر شیه قرار ویرلمکیزین طی بساط مکمله اولمشدر .

ماه شوالک غره سی اولان پنجشنبه کونی اون اوچنجی دفعه اولمق اوزره مکمله او طه سنده لدی الاجتماع منازعات سابقه اعاده و تکرار اولندقدن صکره مرخص افندیلر طرفدن بوقوونیا سننیک ایرشویه دائر اولان ماده رابعه سی و خاتمه سی قرائت اولنهرق سنند مرقوم موجبنجه ایرشوه و اونه نزاعلری و بالجمله حدود منازعه سی بر طرف اولمشدر بوندن صکره ارتق دیه جک نه واردر دینلدکده هر پرت ماده مرقومهده مندرج اولان شرطه رعایت اولمدیغی ایراد ایتمکله برو طرفدن شمده یه دک ایرشوه اهالیسنک نمچه الکاسنه تعدیلری و نمچه لولرک بونلردن شکایتلری و قوعوبولدیغی بیانیله هر پرتک اسکاتنه چالیشیلوب مباحثه تمت اولمغه سنند مذکورک خاتمه سنه نه دیه جک بالجمله حدود منازعاتنک قطع اولمدیغی اثبات ایدر دینلدکده سنند مذکور بوقوونیانک فراغی واردرل حدودینک تنظیمی و ایرشوه ماده لرینه مبنی اولوب خاتمهده اراضیه دائر منازعه قالمق سوزی دخی ینه بو اوچ ماده یه مصر و قدر دیو هر پرت جوابه تصدی ایتمکله و برو طرفدن دولتین بیننده اولان جمیع حدودک نزاعی قطعنه دائر درر و مطلقدر دینلدکده ختمه بشقه ماده یه دائر اولوب ایچنده کی مواد بشقه اولمز ینه آنلره دائر درر دیتمکله برو طرفدن فیابعد دولتینک اراضی و حدودلرنده باعث منازعه حالت قالماشدر تعیری اله آلتوب و بونک عمومی اولدیغی ظاهر درر دینلوب بونک اوزرینه برچوق مناقشات ایله وقت مرور ایتمکین مجلس آتی یه توقیف ایله مکمله یه فاصله ویرلمشدر .

شوالک ایکنجی کونی متوسطلر ملاقات ایستمکله یوم مرقومهده رئیس افندینک قوناغنده مرخص ثانی بک و مرخص ثالث افندی حاضر اولدقلری حالده پروسیا و انکلتره و فلمنک ایلیچلیری بالورود لدی الاجتماع پروسیا ایلیچسی دولتک تدارکات

سفریہ سی ترقی بولمقدہ ایدو کئی وانکلترہ ایلیجیسی دخی دولتک تدارکات بحرہ سی
 آمادہ اولوب پروسیالونک تدارکات برہسنہ الحاقہ قرار ویرمش اولدیغنی وچونکہ
 مقدما قترینہ بہ استاتوقو اساسی اوزرہ دولت علیہ ایله عقد مصالحہ ایلمسی تکلیف
 اولمش ایدو کندن قترینہ شمدی دائیمارقہ بہ مراجعتلہ استاتوقوی بشقہ صورتہ
 عرض ایلمش ایدو کئی بعدالیان انکلترہ ایلیجیسی تکرار کلامہ ابتدار ایله اسپانیا
 دولتی روسیہ لو محار بہ ایله تضییق واجبار اولنہ جق اولورایسہ بی طرف قالمیوب
 جنکہ مجبور اولدیغنی انکلترہ دولتنہ بیان وقترینہ طرفدن استاتوقویہ علاوہ سی
 مطالبہ اولتان قیود بک جزوی اولہرق محار بہ بی موجب اولمیوب مسقولونک
 شانہ رعایة قبولی وآسایش عامہ ایچون دولت علیہ نک دخی جزوی اراضی ترکنہ
 راضی اولسی موافق حال ومصالحت اولدیغنی درمیان ایلمش اولدیغنه نظراً اسپانیا
 مسقوہ اعانت ضمنندہ محار بہ یہ مداخلہ ایتدیکی صورتدہ جمیع اوروپادہ نائرہ حربک
 اشعالی درکار در فرانسه واسپانیا ودائیمارقہ وسیجلیاتین متفق اولدقلمری ظاهر در
 فرانسه لونک شمدیکی ضعف حالہ و پریشانغنه نظراً برتکنہ ویرمیوب انجق
 دونمسی ملاحلرینہ رخصت ویردیکی صورتدہ آخر دولترہ کیدوب خدمت
 ایتسہلر آنلرہ اعانت و بزہ اہانت ایتش اولور دیو موازنہ دول اوروپاہ دائر
 بعض معلومات ویردیکی تعقیباً پروسیا ایلیجیسی دخی آنی تأیید ضمنندہ بوآئندہ
 اسوج قرانہ کرک پروسیا وانکلترہ دولتری طرفلرندن وکرک طرف دولت
 علیہ دن موعود اولان اعانہ مالیه نظراً روسیہ لو علیہنہ قیام ایده ایدی لامحالہ
 دائیمارقہ لو دخی مسقوہ اعانہ ایده جک ایدوکی درکاردر ونمچہ ایمپراطوری ہر نقدر
 دولت علیہ ایله مسقوہ مصالحہ سنک تسہیلی املندہ ایسہدہ پروسیالونک مسقوہ اوزرینہ
 حرکتی مسامحہ ایله کچشدیرہ میہ جکئی بیان ایلمشدر بو حالہ قرالمک متفق اولان
 انکلترہ وفلمنک دولتری دول سائرہ دن عرض اولتان تبلیغاتہ اعتبار ایتسہلر
 اوروپادہ محار بہ عمومیہ تحدت ایده جک ودولت علیہ ایچون خیرلو مصالحہ
 استحصالنہ موانعک تکثیری موجب اولہ جق ایدی دیدکدن صکرہ پروسیاقرالی
 دولت علیہ ایله عقد اتفاق ایده لیدنبرو دائماد دولت علیہ مصالحنی ملاحظہ ایدوب
 کندو اموریہ مطالعہ ایتدیکنہ ریشنباش ولہ اتفاق مادہ لری دلیدر وقرالم اوروپادہ
 ہر درلو ظنوننی دفع ایچون و التزام ایلدیکی مصالحہ دن استفادہ مرادی اولمدیغنی بیان
 ایچون دانسقہ وطورون ملکترلرندن و مناظم تجارتن کف ید ایلدیکی اعلان
 ایتمشدر دیوب بعدہ اسپانیالونک عرض ایلدیکی موادک بیسانہ شروع ایلمشدر
 شویہ کہ: اسپانیالونک عرض ایلدیکی تقریردہ استاتوقویہ خلل کلیہرک و آئیدہ دولت

علیه‌نک امنیتنی سلب ایده‌جک حالت قالمیه‌رق بر صورت ویرلمک ممکن اولدیغی
 واوزی قلعه‌سی اراضیسیله برابر طورله نهرینه کلنجه مسقوایمیراطورپچه‌سنک منتهای
 آمالی اولوب دول سائر ایله محاربه ایتمک ایچون راضی اوله‌جغی و مسقولونک
 مرامنی حصر و نوعاً تعدیل ممکن ایدوکی مندرجدر تعدیلدن مرادی دخی اوزی
 قلعه‌سنک هدمی و طورله نهرینه کلنجه بریه قالمسی صورتیدر مع هذا که متفق اولان
 دولتله طورله نهرینک ایکی طرفنده کی ساحلرک دولت علیه‌تصرفنده قالمسندره درکار
 اولان فوائد کثیره‌ی ملاحظه ایله مسقوک مطالبنی تعدیل ایتمک ایسته‌میشلردر
 خصوصیه اول حوالیده بعض کوللر واردرکه برینه توره قول تعیر اولنور ذکر
 اولنان کوللر آق صو و نهر طورله ایله اوزی بیتنده اولغله اندن حدود قطعنی مراد
 ایلمشلردر و افندیلمر مقدماً صحبتی گذران ایدن صورت کفالتی خاطر لرینه کتورسونلر
 یعنی بر قاج دولتک کفالتی ظن ایدر مکه دولت علیه‌نک قبل‌السفر اولان حدودندن
 اقوی و کمال امنیتنی موجب اولدیغی تسلیم ایدر لر زیرا مسقو عسکرینک بغدادن و افلاته
 دخوللرینه اوزی قلعه‌سنک مانع اولدیغی و مسقو دونمسی اوزی پیشگاهندن کچوب
 قلعه‌نک طوبی سدره اوله‌مدیغی در خاطر ایدر لر و اوزی قلعه‌سی دولت علیه‌نک
 سائر اراضیسندن بعید اولغله حین حاجتده اعانت مشکدر . زیرا آناتولیدن و روم
 ایلیدن امداد کلنجه‌دک مضر ته دوچار اولدیغی معلومدر و قریم لیمانلری وافی اولغله
 مسقو دونمسی قریم لیمانلردن چیقوب مرورلرنده ایاب و ذهابلرینه اوزی قلعه‌سی
 مانع اوله‌مز دولت علیه‌یه سلفنده فائده‌سی اولمیان بویله ماده جزئیته‌نک فداسیله هان
 اوروپاده معتبر اولان کفالت خصوصنی تحصیل ایلر ایسه فائده عظیمه‌در دولت علیه
 علیه‌نه برآ و بجزراً بر طوب آتله دول مذکوره اول طوبی کندولرینه عد ایدر لر
 دیوب انکلتره ایلچیسینی دخی آنی تصدیق وانکلتره قرالنک بر طرفی قره دکر
 و بر طرفی تره قول کولی اولمق اوزره تحدید حدوده راضی اولدیغی بیان ایتمکله
 مرخص افندیلر بزم مأمور یتمز نمچه مصالحه‌سنه منحصردر بو افادانکزی حکایه
 طریقله استماع ایلدک فقط دیمین اوزی قلعه‌سی شویله‌در بویله‌در ایشه برار مقوله‌سی
 دکدر دیدیکز نیج‌ایسه یاراماز قلعه مذکوره قره دکزک کلیدی و منتهای سرحدده
 بر حصن حصیندر الی اوچ و سکسان درت تاریخلرنده و قریم خانلری زمانلرنده
 دریا کی مسقو عساکرینی محو ایتدی بودفعه‌دخی کذلک نصل اولدیغی معلومدر قلعه
 مرقومه الزمدر و طائی طوبراغی مسقوک قانی ایله یوغورلشدر دیدکارنده پروسیا
 مرخصی لوکزینی اوزینک هر تقدیر لزومی درکار ایسه دخی شمعی دفع شقاقه‌سبب
 اولور مقدماً وقت مصالحه‌ده قریم دخی فراغت اولمشیدی دیمسنه مقابله بوضورتده

استاتوقو نوجهاه اولور قالدیکه مستو ماده سنده دولت علیه نك مراعی نه اولدیفی معلومدر شمدی مغایری اوله رق بوافداتکزی استماعه سامعه ماموریتیز متحمل دکلدز دیملرینه جواب سیاقده لوکزینی دخی مسقولو ایله وقوعبوله جق استاتوقو معتدل بریستاتوقودر پروسیلو اون مایون آنچه صرف ایدرک یوزالی بیک عسکر ایله نمچه اوزرینه حرکت ایتمک ایله استاتوقونی تحصیل ایشدر لکن مسقوده ساماً بوایستاتوقونی قبول ایتدیرمک اوله مز حر با ایتدیرمک لازمکلور دیمسنی تاییدا انکلتزه ایلیجیسی دخی مسقولو بر طرفده مغلوب اولیوب بوقدر اراضی یدلرنده اولمغه بومنوال اوزره مصالحه انیسدر الیزدن کلسه هیچ اراضی قلمسنی ایستیز دیمکله برو طرفدن بزم اصل ماموریتیز نمچه مصالحه سنه دأردر دیو اصل مقصده نقل کلام اولتوب بونک اوزرینه دخی بعض مذاکرات جریاندا نیکره ختم کلام اولمشدر .

شوالک بشنجی کونی اون دردنجی دفعه اولوق اوزرینه مکالمه قوناغنده لدی الاجتماع وقوعبولان مباحثات مقدمکی مناقشاتک تکرارندن عبارت اوله رق برشیئی مفید اولیوب نهایت طرفین برخطوه ایلرویه حرکت ایدیه جکفی یکدیگره قطعیا بیان و بو مذاکرات اثناسنده پروسیا وانکلتزه ایلیجیلری دخی اشبو سفر اثناسنده استیلا اولنان جمیع اراضینک بلااستثنا رد و تسلیمی استاتوقو قاعده سی اوزره نمچه دولتیله دول متوسطه میانه لرنده قرار کیر اولان تعهد صریح اقتضاسندن اولدیغنی درمیان ایتلریله نمچه مرخصلری رسماً حرکاتیز انحق دوات علیه ایله عقدینه مامور اولدیغمز مصالحه ماده سنه محصور اولمغین دول متوسطه ایله نمچه ایمراطوری بیننده مخابراته دأر بیان ایتدکلری دقایقه برشی دیه میوب مجرد یارینکی پوسته ایله کیفیتی دولتمزه یازارز و بونکله برابر دولت علیه وجه مشروح اوزره بزم ایله اوزلاشماز ایسه بوکون دولتمز طرفندن ظهور ایدن تنیهاات ایله دخی بزه تأکید اولدیغنه کوره بر خطوه ایلرویه وارد میز دیدکلرینی تعقیباً مرخص افندیلر اوتهدنبرو سویادیکمز بونک اوزرینه درکه استاتوقو استرقت اساسی اوزره جمیع قلاع و اراضینک تماماً و کاملاً دولت علیه ره رد و تسلیمی و جمیع عهد و سندانک ابقاسی ایله تنظیمه آماده یز مأموریت عتیقه و جدیده مز بویه در ایلیجی بکار طرفندن دولته یازیلوب یازمانغنی بیلمیز والیوم بیان اولدیغنی اوزره مدت متارکه طرفنده مصالحه یه حاضرز دیملریله متوسطلر ایکی طرفله دخی آرو آرو مذاکره ایتمک لازم کلدی دیوب مرخص افندیلر کندولرینه مخصوص اوطیه و نمچه مرخصلری دیگر اوطیه چیققدلرنده متوسطلر ابتدا نمچه مرخصلرینک یانه وبعده مرخص افندیلرک اوطیه سنه بالورود نمچه مرخصلرینک دولتمزه یازارز

دیملرندن برئمره حاصل اولسه بیه تحریراتلری کیدوب کلنجیه دک وقته محتاجدر مادامکه بش اون کون قالدی مد متارکه وهیچ اولمز ایسه دفع حرکات خصمانه اولمنسی درمیان ایدوب الحق بو خصوصده دخی برشیئه قرار ویربله میهرک مکمله فردایه تعلیق اولمشدر .

شوالک التیجی کونی اون بشنجی دفعه اولمق اوزره مکمله او طه سننده بالاجتماع طرفین یکدیگره بعض مرتبه تعریض و اعتراض ایتمکدنصکره هر پرت برسائحه قلمه آلوب قرائت ایلمشدر . شویله که : بونجه مباحثات مدیده دنصکره معاهد اولان جانیسک مغایرت کامله آرالری بو طرفده وجود و اقامتمزک بی فائده لکنی بزه بیادیرییور بو صورتده کرک متوسطلره و کرک مرخص افندیلره افاده سیله مشرف اولوزرکه : پنچشنبه کونی مجلس مکمله بی فسخ ایتمکسزین و نفعسزنی مأموریتدن عزل ایتمکسزین عرض ایلدیکمز شروط معلومه اوزره شمیدین رابطه سنه حاضر اولدیغمز مثللو طرفکزدن دعوت اولندیغمز ساعتده مأموریتزه عودته حاضر اولهرق بکرشه دک بر طولاشمه ایتمک نیتنده اولدیغمز بی بیان ایدرز دیو تقریر ایتمسی اوزرینه لو کزینی بو حالتدن فسخ مکمله لازم کلدیکنی مأمول ایدرم دیو طرفینه افاده ایدوب بو مآلده برسائحه دخی تحریر و قرائت ایتمکله مرخص افندیلر پنچشنبه کونی بو او طه ده متوسطلر حاضر اولدقلری حالده بزده برسائحه تقدیم ایله جواب ویریز دیدکلرنده هر پرت یوم مذکورده ویریله جک سائهی بی استماع ایدر و بعده قاقوب کیدرز دیمکله یوم مذکورده تکرار اجتماع اولمق قراریه مجلسدن قاقلمشدر .

شوالک سکزنجی پنچشنبه کونی اون التیجی دفعه اولمق اوزره مکمله او طه سننده لدی الاجتماع ابتدا لو کزینی طرفندن تقدیم اولشان سائحه ده نمچه مرخصلرینک بکرشه عزیمتلرندن طولانی اظهار تأثر اولنوب اکا جواباً هر پرت در حال ترتیب و قرائت ایلدیکی سائحه سننده دعوت اولدقلری آنده زشتوی به عودته حاضر اولدقلرینی بیان ایتمشدر . بعده مرخص افندیلرک ترتیب ایلدکاری سائحه قرائت اولنوب مضموننده مضطبلرده مقید اولان استاتوقو اساسی اوزره همان صاحبک عقد وربطنه آماده اولدقلرینی و معابد اسلام اولمش اراضی دولت علیه دن برقرارش یر دکل بر طاش و یرمک امکانه اولدیغنی بیان ایتملریله هر پرت بعد الاستماع ترتیب و قرائت ایلدیکی سائحه سننده تعایات و اوراق وسائر سند اتیزی کوندرمش اولدیغمزه بناء بکرشه ورود مزده قطعی جوابیزی و یرمه که یقوروز اعضا سنندن معدود اولدیغمز مجلس مکمله بی دستور العمل و مفتوح عدایلرز و دولتمزک جمیع

مطالبی شامل اولوب بر درلو علاوه محتاج اولیان صورت عهدنامه بی مجلسده
 براغورز سر یعاماً تمهید مصافاته حاضرز دیمسنه مقابله مرخص افدیلهر مقدما
 و بودفعه افاده ایلدیگمز وجهله مصالحه به حاضرز و بو محادن ریره کیتیمز وانقطاع
 مکله بی تجویز ایتیمز دینلوب بعده هر پرت و دسترهازی وداع ایدرک بکرشه
 عزیمت ایدوب مرخص افدیلهرک سانحه سنده جواب اولمق اوزره وعدایتدگری
 وجهله بکرشدن کوندر دگری مکتوب شوالمک اون اوچنجی کونی زشتوی به
 واصل اولمغه متوسطر طرفندن افدیلهر اعطا و تسایم اولنمشدر . مضموننده
 بکرش قصبه سنه واصل اولدیغمز آنده اولظرفدن عزیمتمز هنکامده بزه قرائت
 واعطا ایلدیگمز سانحه به جواب ضمننده دستور العمل و باقی اولمق اوزره معتبر
 اولان جمعیت مکالمده میانه کزده بریمزی طومتق تصورینه مبادرت ایتمشدر سزه
 خطباً قطعی جواب وعدا ایلمشیدک لکن طرفزدن لفظاً بلفظ و تدریجی مقابله به
 منتظر اولمالمک زیرا معارضه ایکی اولو دولترک تقریرینی منتج اوله جق استعداد
 مصالحانه به کلیاً مغایردر . و مکتولو نمچه امپراطوری صالح و صلاحه اولان اشتیاقه
 و دولت علیه ایله تجدید مصافات اتمک آرزوی کاملنه بناءً ضبط ایلدیکی جمع اراضینک
 فداسنه رضاداده اولمش ایسه هنکام مصالحه ده دخی ترک و فراغتلی دولتین بیننده
 بادیء مذاکرات اولمش وار یکه سنک حقوق قدیمه ایله کسب استحقاق ایلمش
 اولدینی اراضی بی دخی رد اولنه جق اراضیء سائرده درج اتمک مراد ایتدی
 وبر وجهله مراد ایده مز ایدی دولت علیه حکمدار مشار الیه دن شا کر اولمق
 اقتضا ایدر . زیرا مؤبداً دولت علیه نک زیر تصرف و ملکیتده قالمق شرطیه اونه
 قضاسنک اک جسیم واک مستحکم اولان طرفنی ترک ایتمکه رضا و پروب دعوائی
 یالکنز تسلیمی ایله شرفیاب اولدیغمز خریطه ده مصرح اولان اراضی به حصر
 ایتسی اخلاق حسنه مصالحانه سی نتایج خیریه سندندر . بوندن قطع نظر شریعت
 محمدیه به دائر ابراد ایلدیگمز موانع دخی بی وجوددر . زیرا کرک اونه کنارنده
 و کرک ارشوة عتیقک دبل مللو اولان اراضینده بر مدت نبرو معابد اهل اسلام
 بولنیمور دیو بیان اولنمشدر .

دولت علیه نمچه غائبه سندن وارسته اولوبده جمیع قوتیه روسیه اوزرینه سفر
 ایتکی امل ایده کسلیله برابر افلاکک تحایه سنده روسیه لو ضبط ایدر مطالعه سی بعضیلر
 طرفندن ایراد اولنمغین بوکا مبنی بعضاً دخی نمچه مصالحه سنی استعجالدن خوف
 و اندیشه ایدر ایدی انحق بویه مکالمه تمتد اولدقچه نمچه حدودی دخی بوش
 براغیله میوب عساکر و مهمات ایله تقویه ویرلمک لازم کلهرک بوکا ایسه قدرت حایه

وافی اولدیغندن اولوريله نمنجه مصالحه سی بتورمکه مجبورت حالته کشیدی .
شوحالده برهنوال سابق هر پرتک تعلیمات جدیده سی کلدکده عرض ایلمش اولدینی
معاهده صورتی در سعادتہ تقدیم ونمنجه لولرک بو صورتله اصرار لرلی بیان اولمغله
رمضان شریفک یکریمی بشتجی کونی شیخ الاسلام قوناغده مجلس مشورت عقد
اولنوب قائم مقام پاشا و صدر روم تاتارجق عبدالله منلا افندی و سابقا صدر
اناطولی ولی افندی زاده امین افندی و حالا صدر اناطولی صالح زاده افندی
و صدر اناطولی پایه سی اولان استانبول قاضیسی ابراهیم منلا افندی و پشماقچی زاده
افندی و طاغستانی ابراهیم افندی ایله کتخدای قائم مقامی علی رضا افندی و ضربخانه
ناظری یوسف اغا و دفتر دار عثمان افندی و رئیس راشد افندی و لاله لیلی مصطفی
و روزنامه چی اول مابینی مصطفی بک افندی مجلس شیخ الاسلامیده بالاجتماع ذکر
اولان عهدنامه صورتی و اوراق سائرہ قرائت ونمنجه لولرک تکالیفی در میان اولنهرق
متوسط لولرک گوشه دکلری یاد ونمنجه لولرک اسکاکی قابل اولمز ایسه نه یالملق لازم
کلور سؤالی ایزاد اولندقدہ عبدالله منلا افندی ایرشود اراضیسی بو قونیا سندندہ
مصرح اولمغله ظن غالب بودرکه بوماده ده نمنجه لولرک اصرار ایتمز . لکن اصل مرادی
اونه صوبی وراسنده اولان خر و اتلق اراضیسی در بوندن فارغ اولورمی اولزمی
بیلمم ملاحظه محلی بودر دیمکله بو خر و اتلق اراضیسی نصل یردر دیو بعض حضار
طرفندن سؤال اولمغین نمنجه مرخص لرینک و یرمش اولدقلری فرینکی خر یطه یه
وبعدہ بوسسنده پایلان خر یطه شکلندہ بو یالی رسم مملکتہ امرار نظر اولندقدہ
اونه صوبی وراسنده اولان اراضی اون بشدن متجاوز بلنقه لری شامل اولدینی
و حالا بوسسنه لولرک تصرفندہ بولندینی بیانندککره سفردن مقدم نمنجه لولرک
بو یرلری مطالبه ایتمش اولدینی بحی در میان اولمغله راشد افندی تفصیله مبادرت برله
خلیل حمید پاشا زمانندہ نمنجه لولرک هم بو اراضی بی و همده ایرشودینی مطالبه ایتمشیدی .
صورتی خاطر ده شویله قالمشکه : بلغراد عهدنامه سنده سائر بعض انهار کبی اونه
صوبی دخی دولتین بیننده حد فاصل اولمق مصرح ایکن اراضی مذکورہ دولت علیه
یندنه قالمغه ایکده برده رأس حدودده انواع نزاعی موجب اوله یور ایرشودنک
دولت عایهده قالمسی دخی برصویک اجراسیله مشروط ایکن اجرا اولمماق حسبیله
ایرشود نمنجه یه و یرملک اقتضا ایدر ایدی بونزاع سفر ظهوری تقریبندک سورمشیدی
نمنجه لولرک بونزاعی در میان ایتدکجه خر و اتلق اراضیسنده حدود نامه واردر دینلوب
ایرشود ماده سنده دخی ذکر اولنان صو اجرا اولتمشیدی دینلور ایدی . لکن
تحدید حدودده قاعدہ دویله ایکی طرفک محدودلری دائرہ حدودده بونلوب بالمعیه

تحدید اولمقدر ایراد اولنان حدود نامه ایسه بویله اولیوب بلکه دولت علیه
 طرفدن اولوقت تعیین اولنان محدد واروب نتیجه محددی کما مکه دولت علیه محددی
 بولندیگی کیجه تحدید و بر حدود نامه تحریر ایله کتوروب قید ایتدیرمش بو حدود نامه
 نتیجه لویه ایراد اولدجه نتیجه ایلیچیبی قاعدیه مخالفدر اصل اعتبار عهد نامه یه در
 دیو جرح ایدر ایدی دیدکه بعضیلر بلغراد عهد نامه سندنبرو نیچون ادعا ایتماش
 دیمکه نتیجه لویه اولوقت زیون ایدی ادعا ایسه اعاده حرب لازم کلور خویله سکوت
 ایلمشدر . دینلمسی اوزرینه کتخدا بک جوابه ابتدار برله نتیجه لویه بونزاعی
 اولوقت ایتمش حتی عوض پاشا مرحوم قنیده ایکن بو صلحه سن نظام ویردک
 شمدی نزاعی چیقدی دینلمکه مشارالیه بوسنه بی بکا توجیه ایدک واروب قطع نزاع
 ایده بم دیمش بناء علیه بوسنه بی توجیه ایتمش وارمش نتیجه لویه اسکات ایتمش
 دیدک نصرکه عبدالله منلا افندی بو اراضی دولت علیه یدنده ایکن اونه صوی
 حدود اولمق اوزره عهد نامه یه در بی سهوه مبنی اولمق کرک نتیجه لویه دخی بونی
 بیلوب اولوقت اصرار ایسه سهوه میدانه چیقوب شاید عهد نامه دن طی اولنور
 وقتیه دعوی ایدرم دیو ترک نزاع ایتمش اولمق اقتضا ایدر شمدی صورت سهوی
 مرخصلر میز بیان ایسه لر اوله بیلور لکن اصرار ایدر لر ایسه نه یاسونلر دیوب
 بعضیلر دخی بو نتیجه لویه هیچ اسکاتک طریق یوقمی دیملر یله عبدالله افندی
 طریق نتیجه محاربه سنه وافی عسکرک ثبات اوزره نتیجه حدود نده بولمیلریدر بزم
 ایسه حالز معلوم دیوب بونک اوزرینه بر چوق مباحثه لر جریانندن نصرکه کتخدا
 بک چونکه بویرلر فی الاصل منازعه لی ایتمش باری هیچ اولمز ایسه بویله منازع فیها
 اوله رق قالبوده منازعه سی بعد المصالحه اولسه دیوب یوسف اغا دخی نه یا تملی بعض
 بونک کبی شیلر بولوب خصمی الزامه چالیشملی دیدیکنی تعقیباً عبدالله افندی هله
 ایرشوه ماده سننده بو قوونیا سنندینه تثبت اولنور لکن خرو اتلق اراضی سننده
 ایستاتوقو ایراد اولمقدور دیکک راشد افندی ایرشوه ماده سننده سند مذ کوره
 تثبت اولسه نتیجه لویه چونکه قبل السفر اولان سند معتبر ایتمش خرو اتاق ماده سی
 دخی بلغراد عهد نامه سننده مسطوردر بناء علیه ادعا ایلر دیه بیلور بو حالده
 بر سر رشته ویرمش اولورز همان هر حالده ایستاتوقویه استناد اولمق اولی کورینور
 دیمسی تحسین اولمشدر . بونک کبی مباحث کثیره جریانندن نصرکه نتیجه لویه اصرار
 ایدر لر ایسه اک نهایت نه یا تمق لازم کلور دیو سؤال اولندقه عبدالله منلا افندی
 مصالحه واجب اعاده حرب مضر در دیمنی تعقیباً ولی افندی زاده دخی بو سفرک
 فی الاصل بویله وقتده آچلمسی جائز دکل ایدی بویله مصالحه رونمون اولدقه

فوت ایتک هیچ جز دکلر دیوب سائری دخی آنلره پیرو اوله رق بورائی تأیید ایتلریله مرخصلر هر فصل دلائل واجوبه ایله اولور ایسه اولسون ایپ قیریلنجیه قدر چالیشوب الزام خصم ممکن اولماز وایپ قیریله جنی محقق اولور ایسه مصالحه نی قطع ایتک لازمدر دیو قرار و یروب انجق بوسرک ترشجی دولت علیه یه موجب خسار عظیم اولدیغندن زنهار بزنهار برفرده کشف اولنماق لازمدر . بونی کشف ایدن دین ودولته خیانت ایتش اولور دینه رک کتم ماده خصوصی جمله به صیق تنبیه اولمشیدی .

بناءً علی ذلك اول امرده نمچه لونک اسکاکنه چالیشیوب قابل اولدیغی صورته کلدیکی یرده باغلا یوب هان عقد مصالحه اولنمسیچون در سعادتیه مراجعتیه محتاج اولنمسیزین طرف سردار اگر میدن کندولره رخصت و یرملک اوزره طرف شاهانه دن سردار اگر مه مأذونیت امری ارسال اولنمغه اودخی سلم و حربیه مرخص اولدیغی بیانیله نمچه لولر بوتکالیفدن فارغ اوله جقلمری اولمیه جقلمری حقیقی بیاند کدنصرکه نهایتنده کندوسندن رخصت ایستلمسی لزومی حاوی مرخص افدیله کوندرمش اولدیغی تحریرات سامیه شوالک دردنجی کونی زشتوی یه واصل اولمشیدی .

انجق اولوقت علما ایچنده رأی واستشاره جه مرجع ارکان دولت اولان سالف الذکر عبدالله افندیکنک اخطاریله تسهیل مصالحت ضمننده براوزنکی پارلاتمق یولو پروسیا قرالی بحسب الاتفاق جنکه دعوت اولنمق صورتی مطالعه اولنمغه عرفه کونی در سعادتیه مقیم پروسیا ایلیچیبی ایله عبدالله افندی ورئیس رکاب راشد افندی بالملاقاته عقد مجلس مکالمه ایتدکلرنده نمچه لونک خرواتلق اراضیبی مطالبه ایتلری دورره و ندیک و قره طاغ طرفلری استیلا یه یول بولمق بووجهله توسیع دائره اقتدار ایلمک غرضنه مبنی اولوب بوایسه پروسیا یه دخی مضر و مواد سائره دخی بووجهله پروسیانک مرانمه مغایر اولدیغی عبدالله افندی طرفندن درمیان ودولت علیه ناک رسماً پروسیا قرالی نمچه لوله علیه نه بحسب الاتفاق جنکه دعوت ایلدیکی بیان اولنوب حتی سفیر مومی ایله باری پروسیه قرالنه خبر کیدوب کلنجیه دک اون بش کون قدر اعلان حرب خصوصنک تأخیر اولنمسی ایراد ایلمشیدی لوکزینی یه دخی بووجهله شدید لسان قولالانمق اوزره مرخص افدیله ره تحریر اولنوب بوتحریرات دخی شوالک یدیسنده زشتوی یه وصولبولمشیدی . حالبوکه سالف الذکر مجلس مشورته کتم اسرار اوزره اولنان مقاوله بیهوده اوله رق دولت علیه ناک برمنوال سابق انجام کارده اجراسنه قرار و یرمش اولدیغی تزلاتی و یاننده خبر اتوب

لو کزینی دخی نمچه لوردن اخذ واستخبار ایله مرخص افندیلره سویلد کده بادیء
 شرمساری اولغین عبدالله افندینک بومقوله حیل پولتیقه سی برشیئی مفید اولماشدر .
 برمنوال سابق نمچه مرخصلری شوالک سکنزنجی پنجشنبه کونی بکرشه عزیمت
 ایده جکلرینی برکون اول یعنی ماه مرقومک التتجی کونی خبر ووروب حالبوکه جمعه
 کونی ایام متارکه نك آخری اولغله جمعه ایرتسی کونی طبیعتیه عزیمتلی لازمکله جک
 ایدو کندن مرخص افندیلر شوالک التتجی کونی مجلس مکالمه دن اولجه نمچه لورک
 اسکاتلری قابل اولدیغنی بیان معرضنده سردارا کر مه عریضه کوندر مشلر ایدی .
 مجلس مذکورده نمچه مرخصلری بکرشه عزیمت ایده جکلرینی اخبار ایدیجک
 عقیب مجلسده تکرار سردارا کر مه تاتار چیقاروب رخصت کامله لری اوزره
 نه مقوله جواب ویریه جک ایسه پنجشنبه کونته قدر یتشدرلمسی استدعا اولمشیدی .
 سردارا کر م اولکی عریضه اوزرینه همان اوچ قطعه رخصت تمسکی تحریر ایتدیروب
 مضمونلرنده مدت متارکه نك ختامی کونی نهایت مکالمه ده استاتوقودن خارج ماده
 قبول اولغیوب فسخ مکالمه یه قرار ویرلد کد نصرکه ینه مفید اولمیوبده اعاده حرب
 ایده جکلری محقق اولور ایسه وکالت مطلقه م ورخصت کامله م لازمه سنجه سریعاً
 قضاغ منازعه وعقد مصالحه یه اعتنا اولنسی طرفدن تجویز اولنور دیو تصریح
 بیورمش ایسه ده رخصتنامه لر نمچه مرخصلری وداع ایدوب کیتدکلرندن صکره
 واصل اولوب نمچه مرخصلرینک دعوتی متوسطلره افاده اولنمش ایسه ده چونکه
 هربرت کیدر ایکن مکالمه مجلسینده معاهده صورتی ترهزه اوزینه وضع ایلدم
 نه زمان دولت علیه مرخصلری قبول ایله بی دعوت ایدرلر ایسه کلور تمهیر ایدرم
 و مجلس مکالمه یی فسخ ایتدم بووجهله امضایه حاضر م دهرک بکرشه عزیمت ایتمش
 اولدقلرندن دعوت اولنسلر یوکلرینی یوقارو بیغارلر و صورت مذکورده یی تمایله
 قبول ایتک لازمکلور دیو دعوت اولنلرینی متوسطلر تجویز ایتدکلرندن دولنلر
 بیننده مصاحتک مذاکره وقرارینه انتظار اولنمق لازمکلمشدر .

واکرچه مدت متارکه دخی منقضیه اولمش ایسه ده طرف دولت علیه دن تجاوز
 اولنمدنجه اوت طرفدن تجاوز اولنماق اوزره نمچه لولر حدودده کی عسکرلرینه
 تیبیه ایلمش اولدقلرندن دفع حرکات خصمانه خصوصی متوسطلر اخطار ایتکله
 برو طرفدن دخی تجاوز اولنماق اوزره ایجاب ایدن حدود مأمورلرینه امر
 اولنمشدر . انحق بواننده اشقودره لی محمود پاشا و دینه کلمش اولدیغندن ایکی آی
 بیهوده طورر ایسه م عسکر م طاغیلور دیو سویلنمکه باشلامش بووند نصرکه چدان
 ترقب وانتظاری طبیعی ایستیموب نمچه لو اوزرینه هجوم واقتحام صددنده اولدیغنی

استخبار قلمش و حالبوکه بوآراقده هرزده برطوب آیلور ایسه اوروپاده محاربه
عمومیه و قوعنی انتاج ایدر دیو متوسطلر اخبار ایلمش اولغین محمود پاشانک برمدت
دها ترقب و انتظار اوزره اولسی ایچون کندوسنه مؤکد امر اولمشدر .

بو حالده برلین ایله ویانه بیننده و قوعبوله جق مخبرانک نتیجه سنه انتظار اولنه رق
بوآرده کرک در سعادتده و کرک اردوی هایونده و کرک زشتویده مذاکرات
و مباحثات ایله امرار اوقات ایدلشدر و بوخلالده مرخص افندیلر نمچه لونک
تکالیفنده بعض کونه تعدیلاته راضی اوله جق لرینی لوکزینی به کشف ایلدک لری مثللو
نمچه و کلاسنک دخی تعدیلی اسانه آلمش اولدق لرینی و بوندن مرادلری ایرشوه و اونه
طرفلرنده شمدی یدلرنده بولنسان یرلره قناعت ایتک صورتی ایدوکنی استخبار
ایلمش اولدیغنی دخی لوکزینی افندیلره اخبار ایلمشدر . چونکه استاتوقو قاعده سی
اوزره استیلا اولتان یرلرک کافه سنی نمچه لولرک ردی و حریدن اول جاری اولان
منازعه نك دخی ابقاسی لازمکلوب انجق نمچه لولر سائر یرلری رد ایدلم و منازعه فیه
اولنلری دفع منازعه یه قدر آلیقویه لم دیمش ایسه لرده پروسیا قرالی اول امرده
جه سنک استاتوقو قاعده سنه نظراً ردی لازمکلور منازعه و ارایسه بعدالمصالحه
دولتین بیننده سولیشیلور دیو همان مصالحه نك عقدی لازمکلدیکنی و بو حالده
بعدالمصالحه دول متوسطه حکم اوله رق بو منازعاتک فصل اولنسی و یاخود مواد
تعدیلیه همان سولیشیه رک اولور یاه بر صورتیه ربط ایله بونک ایچون آیروجه سند
مخصوص تنظیم اولنوب بوسند مصالحه عهدنامه سیله برابر امضا قلمسی ایجاب
ایلدیکنی و ذکر اولنسان ایکی شقک اولکیسی یعنی حکمیت صورتی مدت میدیه
مناعه نك امتدادینی موجب اوله جغنی لوکزینی افاده ایدوب برمنوال سابق
دولت علیه دخی مصالحتی همان اولور یله قطعه مجبور اولدیغندن طبیعتیه شق
ثانیه مائل ایدی .

الحاصل متوسطلر درجه درجه طرفینی یکدیگره تقریب ایدرک بوآرده روسیه
مصالحه سنه دخی صورت و یرمک داعیه لرنده بولنوب حتی لوکزینی مرخص افندیلر
ایله ملاقات ایتدکجه بعضاً روسیه ماده سنی دخی آچار ایدی .

و بو ائنده پروسیا قرالی طرفندن برلینده مقیم نمچه ایلیچیسنه و یریلان تقریرک
خلاصه مضموننده زشتوی معاهده سنده استاتوقو صورتی مطلوب اولوب
نمچه لونک داعیه لرندن آطه قارشوسنده واقع اووه نك تصرفی بلغراد معاهده سنه
نظراً دولت علیه عائد ایدوکی بی اشتباهدر . دعاوی سائر یه دولت علیه مخالفت
ایتمیوب رضا داده اولدیغنی تقدیرجه پروسیا قرالی ریشنباش معاهده سنه بناء بدلی

ادعای کچیوب بوبابده حتمی اجرا ایچون ایجاب ایدن تدایره تشبث ایده جکی بوبابده برغرض مخصوصی اولمیوب مجرد متفی اولان دولت علیه نك مصاحتی مطلوب ایدوکی اثبات ایچون نمچه لونك بو مطالب جدیده دن فراغتی اقصای املی اولدینی و نمچه لو انجق ایرشوه قصبه سنه حصر مطلب ایدوب دولت علیه دخی راضی اولدینی صورتده یالکز ایرشوه قصبه سیچون بدل طلبنده اولدینی مندرج بولندیغنی لو کزینی اخبار ایتشدیر .

و ذی القعدة نك اون برنجی کونی لو کزینی مرخص افندیلر ایله ملاقات ایتدیکنده بر منوال سابق استاتوقو اصولی اوزره استیلا اولنان یرلرک ردی لازمکلوب انجق منازع فیه اولان یرلر دخی منازعه لی قالمش اوله جقلرندن بونلر ایچون آیروجه سند تنظیم اولنسی و بو سندك عهد نامه مصالحه ایله برابر امضا اولنسی خصوصی نمچه وکلایسی طلب ایلمش اولدقارینی بعد البیان فرانسه قبالی اهلی و ولی عهدی ایله فرار ایدوب حدوده قریب کلش ایکن مخالفلی طرفدن طوتیلوب محبوساً پارس شهرینه کتورلمش و ایمپراطور بوندن زیاده متأثر اوله رق اسپانیا قباله بالاتفاق فرانسه قبالنك حبسندن تخایصیله اعاده نفوذینی التزام ایلمش و کویا که حقوق دوله رعایت ضمننده جمیع دول نصارادن سیفاً و قلماً استعانه واستمداد ایده جکلر ایش دیو حکایه و چند روز ظرفنده نمچه مرخصلرینك بکرشدن زشتوی به عودت ایده جکلرینی افاد ایلمش ایدی .

چونکه بو ائنده ویانه طریقیله برلیندن زشتوی به کلان قوریرر نمچه باش وکیلی پرنس قاونج طرفدن بکرشده مقیم نمچه مرخصلرینه ارسال اولنمق اوزره برطاق تحریرات کتورمکله لو کزینی دخی برقطعه مکتوبه لفاً بکرشه تسیر ایلمش اولدیغندن تحریرات ملفوفه نك وصولتی بیان ضمننده نمچه مرخصلری طرفدن لو کزینی به کوندربان جواننامه ده محاسن مصالحه ده کائن رفقا مزه التحاق خصوصنده روز افزون اولان خواهش و رغبت صمیمیه مزه موافقت ایده بیلمک ارسالنه همت ایلدیککز تحریراته منوط اولوب وصولته مترقب و نکران ایدو کزنی دونکی کون وصوله مشرف اولدیغمز مکتوب جالب القلوب محبانکزه جواب اوله رق افاده به مبادرت ایلرز دولتریمز بینلرنده جاری اولان روابطه تمیمه صحیحیه نظراً میانه مزده دخی لازمکلان محرمیت مقتضاسنجه مرخص افندیلر حضراتیله تجدید شیرازه مکالمات ضمننده طرفکزدن دعوت اولندیغمز عقینده زشتوی به عزیمت و جنابکز ایله بالاتحاد مصالحه مصالحت خیریه سنه غیرت ایلمکه ارسال ایلمش اولدیغکز تحریرات مذکورده ایله مأمور و مرخص اولدیغمز

اخبار ایلرز و دقیقہ مفرحہ مذکورہ یہ منتظرز دیو محرر اولمغین بونک اوزرینہ لوکزینی طرفندن دخی بکرشہ برقطعه مکتوب یازیلوب خلاصہ مؤداسندہ علی الاطلاق استاتوقو قاعدہ سی اوزره مکالمہ یہ ختام ویرلمک صورتی بیان اولندقدنصرکہ یدی ماہدنبرو جمیع اوروپانک مترقت اولدینی مصاحت خیرہ یہ قیام ضمنندہ برآن اقدم بو طرفدہ بولنمغه مسارعتکز مأمول و مجزوم محبانہ مدر قالدیکہ مصالحہ مصاحتدن خارج اوله رق بعض اسباب دولت علیہ ایله نمچه دواتی بینندہ مذاکرہ مخصوصہ بی ایجاب ایدر ایسه طرفینک مصاحت واستحقاق ورغبتلرین توفیق وتجدید ایله عقدیله شرفیاب اوله جغمز بنیان مصالحہ بی تأییدہ قیام ایلمکہ مآذون ایدو کمکی اخبار ایلرم دیو محرر اولمغله ذی القعدہ نک اون التنجی کونی نمچه مرخصلری زشتوی یہ عودت ومروور ایتدکلرنده اصل عهد نامہ بی استاتوقو اساسی اوزره بالتنظیم مواد تعدیلیہ ایچون دخی آیروجه سند تحریر وبوسند مخصوصی عهد نامہ سندیلہ برآندہ امضا ایتمک اوزره مأمور اولدقلمرینی متوسطلره بیان وبوکره دخی عهدنامہ صورتی اولمق اوزره اون درت مادہ بی حاوی برورقہ اعطا ایتشاردر .

و طرفین مکالمہ او طہ سندہ اجتماع ایدرک تسویہ مصاحتدہ صعوبت مطالعہ اولدیغنه مبنی متوسطلر طرفین مرخصلریله آیرو آیرو مکالمہ وتنظیم مواد ایتدکدنصرکہ همان مکالمہ او طہ سنہ واریلوب سندلر مقابله ومبادلہ اولمق اوزره قرار ویرلمکین اصل عهد نامہ مذاکرہ سیچون ذی القعدہ نک یکرمی اوچنجی وساخی کونلری متوسطلر رئیس افندینک قوناغنه کاهرک مواد معاهده یکان یکان تعدیل وتقیح اولنوب مرخص افندیلر هر نصل اولور ایسه اولسون عقدہ مصالحہ یہ مآذون ایسه لردہ چونکہ نمچه لولر طرفندن اسرانک بلا بدل رد اولنسی واحد طرفیندن سفر دن اول یاسفر اثناسندہ آخرک ممالکنہ دخول ایله اول طرفک حکومتہ تبعیت ایدن رعایا استرداد اولنمیهرق تبعیت ایلدکاری دولتک سائر رعایاسی کبی بونلرک حقلرنده معامله اولنوب اما طرفین دیارنده املاک صاحبلری اولان مخرج رعایا مصاحتلری اقتضاسنجه دیلدکاری طرفدہ اسکان ایلوب بردلر ممانعت وماللری تصرفندہ قطعاً رنجیدہ اولنماللری تکلیف وادعا اولنوب حالبوکه آحاد ناس اللرنده بولنان بونجه اسرانک بلا بدل ردی اولوقتک حکمتنجه مشکل اولدیغنه ومادہ ثانیہ اقتضاسنجه دولت علیہ رعایاسندن ایکن نمچه یہ کیدوبده تبعیت ایدن رعایا بعدہ نمچه رعایاسندن اولهرق اراضی دولت علیہ دن اولان املاکنہ متصرف اولمق لازم کلوب مستامن طائفہ سنک ایسه دولت علیہ ممالکنده املاکہ متصرف اولسی

شرعاً و قانوناً بر وجهله جائز او لمذیعی جهتله بو ماده نك بر حسن صورته افراغی
 خاصه قائم مقام پاشا طرفندن تحریر و اشعار اولمش ایدوکنه و نتیجه مرخصلرینك
 ویرمش اولدقلری عهد نامه صورتنده مادتين مذکور تین کبی دولت علیه یه نیجه مضر
 ماده لر مندرج اولوب مرخص افندیلر ایسه بو مقوله مواده صوك درجه یه قدر طیامتغه
 مأمور بولندقلرینه مبنی مرخص افندیلر ایله متوسطلر بینلرنده پك چوق مباحثات
 و مناقشات جریان ایدرك مذکور ماده ثانیه ده متوسطلر برو طرفه حق ویردرك
 ماده نك اصلاحنه موافقت ایدوب اما اسرا ماده سننده طرفیندن اصرار اولنه رق
 نهایت متوسطلر فسخ مجلس مکالمه ایده جك درجه لرده اظهار اغبرار ایتملریله ناچار
 بو ماده ده دخی برو طرفندن مماشات ایدلمش و مواد سائر ده دخی نیجه ابحت و مناقشات
 جریانیه تعدیل اولنه بیلمشدر .

ذی القعدة نك یکرمی یدنجی و یکرمی سکرننجی کونلری دخی لوکزینی رئیس افندیك
 قوناغنده مرخص افندیلر ایله ملاقات ایدرك معاهده مخصوصه موادی مذاکره اولنوب
 چونکه بو خصوصه یامواد مصالحه ایله برابر مواد منازع فیهادخی تذکر ایله قطع نزاع
 اولنه رق بولنه دأر امضا اولنه حق اصل عهد نامه ایله برابر اشبو معاهده مخصوصه
 سندی دخی امضا اولنمق و یاخود عقد مصالحه اولنوبده مواد منازع فیها حکم اوله حق
 دول متوسطه نك حکم و قرارینه براغلمق لازم کلوب صورت ثانیه ایسه مدت مدیده
 مذاکرات و مخابرات ایله اصرار اوقاتی موجب اوله بغنه و مصالحتک برآن اقدام قطعی
 نزد دولت علیه ده ملتزم بولندیغنه مبنی صورت اولی ترجیح برله هر نه و جهله
 ممکن اوله بیلور ایسه نتیجه مرخصلرینك اقتناع و اسکاکنه چالشتمق اوزره مرخص
 افندیلر طرفندن لوکزینیه مأذونیت و یریله رك کیفیت آکا حواله اولنمش اولدیغندن
 نتیجه لو ایرشوه ایله اونه نهری طرفنده ادعا کرده لری اولان محللرک اکثرندن
 فراغت و محال مرقومه دن حالا زیر دست استیلا لرنده بولنان چتین قلعه سی
 و درزنبق بلنقه سی ایله سائر مواقع معینه یه قناعت ایتمک اوزره معاهده مخصوصه
 موادی دخی قرار بولمشدر .

بو آرا ده متوسطلر نتیجه مرخصلریله دخی ملاقات ایدرك بو صورتله تنظیم اولنان
 مواد طرفیندن قبول اولمش ایله ذی الحججه نك غره سی اولان بازار ایرتسی
 کونی اون یدنجی دفعه اولمق اوزره مکالمه قوناغنده بالجمله مرخصلر بعد الاجتماع
 مکالمه او طه سنه کیریله رك بر منوال سابق قرار کیر اولان مواد مصالحه بالمقابله
 مضبطه لره قید ایتدیریلوب پنچشنبه کونی سندلر مبادله اولنمق اوزره قرار ویرلکدن
 صکره مکالمه او طه سنندن چیقیلوب لوکزینی دخی مرخص افندیلرک او طه سنه

بالورود اننای مصاحبتده هله مصاحت مصالحه بتسون سزه چوق سويله جكم وار
انكلتره لو متفقمن اولديغندن شكایت ايدم لکن بزه يالكز زشتوی معاهده سنده
موافت ايتدی مسقو ماده سنده كوشك طاورانور واديسنده برديسه پوليقيه
مانوره سی قوالانمشدر .

ذی الحجه نك او چنجی كونی اون سكرنجی دفعه اولق اوزره مكمله قوناغنده اجتماع
اولوب شویله كه : مرخص افنديلر يوم مرقومده ساعت درتده مكمله قوناغنه
واروب كندولره مخصوص او طيه قعود وبعده متوسطلر ونمچه مرخصلری
ورود ايتكار نده متوسطلره ويريله جك عهدنامه صورتلری اول امرده ختم
وامضا اولنه رق تهيه اولمق لازم كلوب روسيا وانكلتره مرخصلری ايسه
تقدم وتأخر نزاعنده اولدق لردن لاجل الاسكات بر صورتده روسيا وديكر
صورتده انكلتره تقديم اولمق اوزره ايكي تمسك ویرلك بالاتفاق رأی اولمش
ایدو كندن اولو جهله تمسكلر آماده ایدلد كدنسكره متوسطلر معرفتیه خبر لشیاه رك
رسم اوزره مكمله او طه سنه دخول اولندقدنه ابتدا لو كزینی مقدمه رساله صفوت
اولمق اوزره فتح كلامه مبادرت ایدرك معاهد اولان ايكي اولو دولتلر مرخصلری
اشبو مكمله او طه سنده اجتماع ایدوب نيجه مدتد نبرو مذاكره و مباحثه سنده اولديغمز
مصالحه خيريه نك الحمد لله بو كونی كونده تمسكلری مبادله اولنه جق اولغله طرفينه
تبريك ورفیقلمه تبشیر ایدرم و بو كونی كوردیكم ایچون جناب حقه ادای تشكرده
عاجزم دیهرك اظهار سرور انبساط ایله صده كریزگاه ایلوب هر پرت دخی
متوسطلرك سی واقداملریله مصالحه خيریه نتیجه پذیر اولوب مبادله تمسكات
ایچون بو محله اجتماعزی بندخی جمله تبريك ایدرم دیو مقابله ایتكله مرخص
افنديلر طرفندن دخی دول ثلثه متوسطه ایلچیلرینك بوآنه قدر ظهور ایدن
اطوار وحر كترلردن حظ اولغله ثمره مكالمات اولان اشبو مجلسده بوانوب اراقه
دماء عبادك اندفاعیه حمد الله تعالی حصول آسایشه بادی حر كته موفق اولندی
حق تعالی خیرلر احسان ایلیه دیو تفصیل مقال اولندقدنسكره تركی وفرنکی
عهدنامه لر ترجمانلر معرفتیه قرائت و مقابله وبعده اصول اوزره مبادله اولندی
عقبنده طرفین یكدیكره عرض دوستی وبشاشت ایدرك یولو یرینه جلوس
ایتدكار نده طاتلو وشربت وقهوه وبخور رسملری اجرا سندنسكره ابتدا
متوسطلره ونمچه مرخصلرینه بول یكلو سمور كوركلر و سرکاتلرینه و ترجمانلره
دخی قونطوش سمور كوركلر وسائر متعلقاتلرینه قاقوم كوركلر و كراكه وسائر
خلعتلر كیدرلش وبعده مكمله او طه سندن چیقیلوب طرفین كندولرینه مخصوص

اوطه لره ورود و متوسطاير طرفينك اوطه لرينه كله رك تبريك ايله محالرينه كیده جك اولدقلرنده اوچنه دخی دونامش آتار كشيده اوانه رق قوناقلرينه اعاده ايدلمش وبعده طرفين مرخصلری مكالمه اوطه سنده لدی الاجتماع هر پرت ارتق متوسطه محتاج دكلز مصالح دولتينی يالكرجه رؤیت ايلرز ديو فتح كلام ايدرك معاهده مخصوصه تمسكلرينك تركی وفرنگیسی مقابله وامضا وتمهیر وبرر قطعله خريطه لری دخی ختم ايله مبادله و اظهار انبساط وموالات ايله ختم مجلس اولوب نمچه مرخصلرينه دخی كذلك دونامش اسبلر كشيده اولنه رق قوناقلرينه اعاده قلمش واولكون زشتوی قلعه سندن قرق الی پاره طوپ آتيلوب اعلان مسرت مصالحه اولمشدر . مؤخرأ طرفينك تصديقمه لری زشتوی به وارد اولوب بونكله بيله در سعادتن تصديقمه لك مبادله سی عقينده مرخصلره وديوان ترجمانه اكسا اولمق اوزره التي عدد بول يكلو سمور كوركلر وسر كاتبلری و ترجمانلری ايچون دخی سكر عدد قونطوش سمور كوركلر وسائره ايچون دخی قاقوم كوركلر و كراكه و خفتانلر دخی ككشيدي . ذكر اولنان التي عدد بول يكلو سمور كوركلر ك اعلاسی مخصوصاً پروسيا مرخصی لوكريني ايچون اشترا اولمش اولمغله در سعادتن يافته سی اوزرنده اوله رق ككشدر . وخرج راه اولمق اوزره انكلتره وفلمنك ايلچيلرينه اوتوز بيك غروش ولوكريني به دخی آنلره تطبيقاً ظاهراً اوتوز بيك غروش وسائرندن امتيازی اولمق لازمه دن كورلدیكنه مبنی خفياً دخی هديه بها اولمق اوزره بشقه جه اوتوز بيك غروش اعطای اراده سنیه اقتضاسندن اولوب انحق نقداً ارسالنده صعوبت اولديغندن ومرخصلر بهر حال آله جقلری عثمانلو آقچه سی كتورميوب پولیچه ايتمه كه محتاج اوله جقلرندن تسهيل ايچون حواله ايلدكلری محلالره ويرلك اوزره خزينه تذکره لری تحریر وارسال اولمش ومعتلری مأمورلرينه ويرلك اوزره بكرمی بيك غروش دخی نقداً كوندلرش ایدی .

ذی الحجه نك بكرمی ايتنجی كونی بر معتاد مكالمه اوطه سنده مرخصلر اجتماع ايدرك تصديقمه لر مبادله اولندقدن صكره بر منوال مشروح در سعادتن كوندلرش اولان كوركلر و خاتعلر الباس اولنوب متوسطلره دونامش آتار كشيده اولنه رق قوناقلرينه كوندلرش و بوخلالده قلعه دن يته طوپلر اندا ختيله اظهار شادی ايدلمش وبعده مرخص افنديلر ايله نمچه مرخصلری تكرار مكالمه اوطه سنده دخول به معاهده مخصوصه تصديقمه لری مبادله اولمشدر . كرك اصل عهدنامه مصالحه و كرك معاهده مخصوصه صورتلری ذيلده (۱۲) رقبیه تحریر اولنور . بو مصالحه ده نمچه لو ايرشوه واونه

طرفنده برازیر قزاقش ایسه ده محاربه سببیه کندوسنه عارض اولان ضرر و خسار
دهاز یاده ایدی بر منوال سابق تصدیقنامه لر مبادله اولمش اولسیله ارتق و متوسطلر
پا بر رکاب عزیمت اولدقلرندن بر منوال سابق مکمله قوناغه وارلمزدن مقدم انکلتره
فلمنک مرخصلرینه او توزر بیکلک برر ولو کزینی به او توزر بیکلک ایکی قطعه خزینه
تذکره لری دیوان ترجمانی و ساطیله ارسال اولنوب پروسیا مرخصنک مستشاری
اولان باش سرکاتبه دخی ایکی بیسک و ایکسچی سرکاتبه بیسک وانکلتره مرخصی
سرکاتبه کدک بیک غروش نقداً کوندرلمش ایدی .

تصدیقنامه لرک مبادله سندن صکره مرخصلرک اوچی دخی اولکون بر برینی تعقیباً
قارشویه مرور و عودت ایتشلردر و ترجمانلر زشتویده قلوب بعده استانبوله عزیمت
ایده جسک اولملریله آنلرک عطیه لری تأخیر اولمش ایدو کندن تصدیقنامه لرک
مبادله سندن صکره آنلره دخی ایکسچر بیک بشریوز غروش عطیه توزیع و نمچه
وانکلتره ترجمانلرینه برر مقدار ضم ایله وارد اولان سالف الذکر یکر می بیسک
غروشک اون التی بیسک بشیوز غروشی صرف اولنوب فلمنک ایلیچیسنک فی الاصل
سرکاتبی اولدیغنه و نمچه سرکاتبی دخی اول ائساده بولمندیغنه منبی قصور قلان
اوج بیسک بشیوز غروشی مکمله دفتر دارینه تسلیم اولنمشدر . برکون صکره
دستره ازی دخی قارشویه مرور و عودت ایلمش و هر پرت دولتی طرفدن کافی السابق
در سعادت ایلیچیسبی تعیین اولمش ایدو کندن زشتویده قالمشدر .

(وقایع سنه ۱۲۰۶)

* مرخصلرک زشتویدن عودت لری و یاش مکمله سنه مأموریت لری *

مرخص افندیلرک روسیه مصالحه سی مکمله سنه دخی مأمور بیورلمش اولدقلری
جهتله نمچه مصالحه سی مصالحتک عقیب ختامنده هان اردوی هایونه عزیمت ایلملری
ایچون بر منوال سابق تصدیقنامه لرک مبادله اولندیغنی کون زشتوی به امرکش
اولدیغندن و نمچه به یکده جسک دولت علیه ایلیچیسنک حرکتی کونی معلوم اولنجیه دک
هر پرت زشتویده قاله جغندن زشتویده بولندیغنی مدتجه کندوسنک لوازم محافظه
واکر امنه اهتمام اولنق اوزره زشتوی ضابطانه تنبیه و تأکید و هر پرت ایله وداع
اولندقدن صکره سنه جدیده محرمک غره سنده مرخص افندیلر زشتویدن حرکت
وماد مرقومک سکرنجی کونی سلسلتره ده اردوی هایونه مواصلت ایتشلردر .
چونکه بر منوال سابق نمچه مصالحه سی رابطه بولمش و روسیه متارکه سی دخی حاصل
اولمش ایسه ده روسیه مصالحه سی دخی رابطه بولنجیه دک احتیاطه رعایت لازم کلدیکندن

سنه آتیه ایچون ترتیبات سفریه کماکان آماده قلمق لازم کله جیکی اردوی هایونده بولنان رؤسایه افاده و اطراف و اکنافه اوامر جلیله ایله اعلام اولمش و فیما بعد ماچین صحرا سنده اقامتی موجب برشی قالمش ایدو کندن سنه مرقومه محرمنک ایکنجی و اغستوسک برنجی پخشنبه کونی اردوی هایون ماچین صحرا سندن حرکتله سلستره صحرا سنه مواصلت ایدوب چند روز مرورنده برمنوال سابق مرخص افدیلهر دخی سلستره یه ورود ایله مظهر اکرام و التفات سردار اکرمی اولمشلر در . پروسیاقرانک تصدیقنامه سی انسای راهده لو کونخی یه واصل اولغله تصدیقنامه یی اردوی هایونده بولنان قولونل کوچه ارسال و بونکله برابر مرخص افدیلهر دخی برقطعه مکتوب تحریر ایتمکله قولونل کوچ سلستره ده رئیس افدینک قوناغنه بالورود تصدیقنامه یی و مکتوب مذکور ی اعطایلمشدر . مکتوب مذکورده پروسیاقرالی طرفندن عهد نامه قطعی یه ضمان و کفالت الحاقی متضمن سندک و رودینه دولت علیه طرفندن اظهار انتظار و رغبت اولندیغنی بوداعیلری قرالم طرفنه عرض و اشعار ایلدیکمه منی قرال مشارالیهک تصدیقنامه سنی ایصاله مأموز اولان قوریر ایله تموزک التیسنده ماده مرقومه یه دائر ورود ایدن تحریراتده بودفعه طرفکرزه ارسال ایلدیکمز تصدیقنامه نک دولت علیه یه عرض و تقدیمی وسیله ایدرک طرفزدن مطالبه اولنان ضمان و کفالت سندی خصوصه دائر وجه آتی البیان اوزره افاده و تفهیم ایده بیلوروزکه ممالک دولت علیه یه الحاق ضمان و کفالتی شامل سند اعطاسی طرفزدن وعد و تعهد اولنمش ایدی و اشبو وعد و نیتمزده ثابتمز درکار در انجق روسیه لو ایله دولت علیه بیننده الی هذا الان تمدای سفر تقریبیه تصرف دولت علیه ده قاله جق ممالکک حدودی و تکفلی لازمکلان اراضی هنوز نامعلوم اولمق ملاسه سیله طرفزدن الحاق ضمان خصوصی روسیه لو ایله دخی انعقاد مصالحه یه توقف ایلدیکی ظاهر و وقت مرقوم حلوننده مطلوب اولان کفالت سندینک آستانه سعادتده اعطاسنه برسنه مانع اولیه جفندن بشقه معروضات سالفه و سوانح سابقه سنه نظراً انکلتزه و اسپانیادولتلیرنک دخی کفالتلری منضم اوله جنی مأمول و ملحوظمز در دیوروسیا قرالی جنابلرینک تحریر و اشعار ایلمش اولدینی مندر جدر .

ورئیس الکتاب عبدالله بری افندی ینه مرخص اول وار دوی هایون قاضیسی اولوب بو ائناد استانبول پایه سیله تلطیف بیورلمش اولان عصمت بک افندی کما فی السابق مرخص ثانی و دری افندی مرخص ثالث اوله رق الحاصل زشتوی مکالمه سنه مأموز اولنلر طاقیه روسیه مکالمه سنه دخی مأموز بیورلمش اولملریله محرمنک اون اوچنجی کونی سلستره دن قارشویه امرار ایله محل مکالمه تعیین اولنان یاش قصبه سنه ارسال اولنمشلر در .

برمنوال سابق نمچه مصالحه سی منعقد اولمق حسبله افلاق ویوه ده لنی میخال بکه
توجیه اولنمش و سابقا یکچری کاتبی عصمتی اسماعیل افندی معینه معمار حافظ افندی
ترفیق ایله بوسنه طرفنه محدد تعیین و سابقا مالیه تذکره جیسی عبدالله افندی به
ایر شوه حدودینسک قطع و تفریقی احاله قلمشدر و محرک اون برنجی کونی
اردوی هایونده یکچریلر کاتبی ابوبکر راتب افندی به موقتاً باش محاسبه پایه سی
توجهیله ویانه اورته ایلیجیسی تعیین اولنمش ایدوکی زشتویده بوخبره منتظر اولان
نمچه ایلیجیسی هر پرته تحریر اولنمغله هر پرت همان در سعاده عزیمت ایتمک اوزره
زشتویدن حرکت ایدوب سردار اکرم دخی زبرده بیان اولنه جنی وجهله سپاه
غائنه سنک دفعی ایچون سریعاً شمنی جانبنه حرکت ایتمش و متعاقباً اردوی هایون دخی
اولطرفه کیش اولمسيله اردوی هایون شمنی صحرا سنده ایکن هر پرت دخی شمنی به
کلوب حضور سردار اکرمیده کندوسنه و سرکاتنه و ترجمانه کورکلر اکسا
اولدقدن بشقه کندوسنه بردونامش اسب دخی کشیده قلمشدر .

* سواری او جاقلرینک حرکات عصیانیه لری و وقوعات سائر *

سواری یعنی سپاه و سلاحدار و بلوکات اربعه او جاقلری دولت علیه نك علوفه خوار
عساگردن اوله رقی ایام سالفده خدمات مبروره لری مشاهده اولنمش ایدی .
مرور دهور ایله نظاملری بوزیلوب دفتر خاقانیده اون ایکی بیگ نفر مسطور
ایکن الحاله هذه لدی الاقتضا ایکی بیگ نفر تدارکنده ضابطلری عاجز قالدینی
و اسامه لرك کلیسی کتبه و چاوشان زمره سنده بوزمه تعیریله تراکم ایتمش اولدینی
حاله بودفعه سفره مامور اولوب ایکنجی سنه ده اقتضای حال ایله باباطاغی مشتاسنه
عزیمتلی ایچون فرمان صدور ایتمکده نفرات مرتبه لری معدوم اولمسيله حین
حرکتلرنده عیباری معلوم اوله جنی مجزوملری اولیجق خلاف قانوندر بهانه سیله
عزیمتدن استنکاف ایتمکدن نهایت جبر ایله باباطاغنه کوندر به لرك حق لرنده اغبرار
حاصل و خدمت دولته یارامیه جقلری رتبه بداهته واصل اولوب شتاء مذکور اول
بهارنده اناطولی و روم ایلی طرفلرندن نفرلری اجتماع ایدوب یوقلمه لری مراد
اولدقدن بینلرنده بعض کونه نزاع چیقاروب ضابطلرندن بر ایکی کشتی بی اعدام
ایتمکدن بشقه اردوی هایون ماچین طرفلرنده ایکن ینه کالاول اردوی هایون
ایله سردار اکرم معیتنده بولنملریچون هر او جاقدن اردوی هایونه بر آدم ارسال
ایله عرضحال ویرمشلر ایسه ده بو حال ایله اردوی هایونه جلب اولنملرنده بر فائده
اولدیغندن بشقه برنوع ضرر تربی دخی وارد خاطر اولدیغندن اردوی هایوندن
تبعید ایله کلغراد محافظه سنه مأمور قلوب آنجق اجناس مختلفه بی باشلرینه جمع ایله

بو ائناده جمعیتلی اون بیک نفره بالغ اولدیغی استماع اولدیغنه مبنی اردوی هایونه کلان آدملیینه رفق ایله معامله وامر پادشاهی به انقیاد ایلملری تنبیه و تلقین اولغوش ایدی . لکن ماچین وقعه سندن صکره ارونک خرصودیه عودت ایلمسی کندولرینه مدار قوت قلب اوله رق یوقلمه یی قبول ایتمک لرندن بشقه شمنی به عزیمت ایتمک ایستیوب بونک ایچون ضابطلرینک اوزرینه هجوم ایلدکلر نده بویله خلاف رضا حرکتلرندن ضابطلری دخی نفرت وهربری برر تقریب ایچلرندن چیقوب خفیة برر محله اقامت ایتمک لری ائناده طوائف مرقومه رئجیده خاطر اولدقلری اشخاصدن بر قاچ کیمسه یی دخی مظلوما قتل و اعدام ایتمک لری وبعده متارکه به نظام ویرلدیکی معلوملری اولیه رق شمنی به طوغری توجه ایلدکلری ومعیترنده حشرات ناسدن ودلی اورمان یادکارلرندن وافر کسان اولدیغی سلستره به عودت اولدیغی هنکامده استماع اولنوب حالبوکه حرب غائله سی شمیدیک بر طرف قلغوش اولمسیله تأدیبلری امرسهل عد اولدیغنه مبنی سردار اکرم سلستره صحراسنده مجلس خاص ترتیب ایدوب تقریق جمعیتلرینک چاره سی درمیان مطالعه اولدقده خیرخواهان دولدن بعضیلری جمعیت سپاه بیکانه و فراریلر دن و خوف جان ایله مملکتلرینه عودت ایده میانلر دن عبارت اولوب ایچلر نده بولنان سپاهیلر اقل قلیل اولدیغندن و آنلر دخی ایکی فرقه اوله رق بری سیواس و دیکری اناطولی ایالتدن اولوب جبار زاده وقره عثمان اوغلی طرفلرینه متعلق بعض سپاهیلره استمالت اعطاسیله جلب اولدقلر نده بقایاسی یغما به آماده بر طاقم اراذل کروهی اولدقلر دن بعض جهته ایچلرینه تفرقه دوشورلدیکی کبی اشقیاطاقی طبیعتله پریشان ودر بدر اوله جقلری درکار و سردار اکرم دخی بر مقدار آتو ایله اردوی هایونک حرکتدن مقدم شمنی به عزیمت بیوردیغنده صدراعظم حددن آشوری سواری ایله اوزریمزه کلیور ایتمش دیو ایچلرینه خوف وهراس دوشه رک جمعیتلرینه خلل کله جکی امر آشکاردر لکن عسکر پادشاه عسکری اولغله زنه ار جنکه تصدی اولنیه زیر ماده اوزایوب مشکل اولور بوماده ده تدبیر همانخافه و القای دهشت ایله اتمام کاردر دیدکلر نده سآری دخی بونی تصویب ایتملر یله اولا جبار زاده وقره عثمان اوغلی شمنی به ارسال وبعده چرخه جی علی پاشا دخی تعیین اولدقدنصکره صدراعظم دخی بر مقدار سواری ایله شمنی به طوغری عزیمت ایتمشیدی . انجق صدراعظمک شمنی به وصولدن مقدم علی پاشا و جبار زاده وقره عثمان اوغلی جمعیت کثیره لر یله جمع سپاه اولان محله قریب واردقلر نده استکشاف مرام ایله برابر نهانی ایچلر دن بعضیلرینک جلب واستمالته قیام ایله سپاه آره سنه اختلاف دوشه رک بالا خره امر

واذ نسز وقوعبولان حرکتلری ضرورت حاله مبنی اولدیغنی و عفو اولسدقلری صورتده قرق بیک آنچه سعی میری ایلیه جکلرینی عرض وافاده ایدوب بو بازارلقدن چرخه جی علی پاشا دخنی تمتع ایدرک نهایت حاجی اوغلی بازارنده قشلامق اوزره مقیم اولدقلری محلدن حرکت و بازارجغه وارنجه اطرافدن جمعیتلرینه ملحق اولان اشخاص دخنی مفارقت ایدوب بو خلالده صدراعظم و متعاقباً اردوی هایون دخنی شمنی به وصولبولدقده دفع شرور سپاه خصوصنده خدمتی سبقت ایدنلر مظهر نوازش و اعتبار اولدقدنصکره بوقتنه به باعث اولنلر تقشیش اولنوب سلحدار کاتبی قدری اقدی که باباسی چوروم آلائی بکیسی ایکن اسکدارده خداوندکار اسبق جنتمکان سلطان مصطفی خان حضرتلرینک فرمانیه قتل و اعدام اولنمشیدی . بو مادهنک حدوشه علت و کذک سلحدار ایکنجی خلیفه سی علی بک مادهنک علولنسنه مدارقوت اولدیغنی واقع غیر واقع صدراعظم طرفنه القا اولنمش ایدوکندن مومی الیها و آنلر ایله برابر ده بر قاچ کیمسه بازارجق محافظی عبدی پاشا معرفتیه اعدام اولنشلردر .

واصف تاریخنده بومنوال اوزره مسطوردر اما انورینک تحریرینه نظر آسپاهیلرک شمنی به توجهلری متارکه خبرینی آلدقلرینه مبنی اولوب شوپله که : متارکه عقدندن صکره سردار اکرم اردوی هایون ایله سلستریه عودت برله آندن دخنی شمنی صحراسنده لوای شریفه واصل اولمغه عزیمت اوزره اولدیغنی زمره مرقومه لدی الاستماع بزله بو طرفده اسیرذل وهوان و پیمانده نسیان اوله جغز دیهرک هان اذنسز بولسدقلری محلدن باجمعهم حرکت و اکثریسی فقر و احتیاجه مبتلا اوله رق حاللری پریشان و مرسته شایان اولدقلرینی سردار اگر مه افاده ایچون شمنی صحراسنده زیر لوای شریفده بولمغه مسارعت ایلدیلر فقط آنلرک لوای شریف اوزرینه جمعیت ایله کلکده اولدقلری صورت مدهشده سلسترده صدراعظمه اخبار و کویالوای شریفی ضبط و تصحب ایلمک فکرلرنده اولدقلرندن بیمله واقع حالک خلاقی ایما و اشعار اولندقدنه فی الحال جبار زاده و قره عثمان اوغلو عسکریه مرقوملره قارشو ارسال اولنوب فی نفس الامر کیفیتلری اخبار اولندیغنی صورتده ایسه بحسب الاقتضا مدافعهلرینه ابتدار ایلملری امر و تئیه اولندی و آرقه لرندن اردوی هایون چرخه جیسی علو پاشا دخنی ارسال قلندی اوچی بردن شمنی صحراسنده لوای شریفک قرارگاهی اولان محلدن بر ساعت مقداری مسافده واقع بولانق دیمکله معروف نهرک کنارنده سپاهیلره قارشو ترتیب صف ایدوب نفرات مرقومه نک مراملرینی لدی السؤال فی الاصل سفر و قوعنده بش اون آنچه

علوفه ایله سفر ویرمه مقتدر اوله مدقلرندن نفرات مرقومه لوای شریف معیتده بعض کسانه خدمت ایدرک و اوت بچوب صاهر ق کچینور مقوله دن اولملریله بوکره ذکر اولندیغی اوزره اشبو سالده لوای شریف اردوسنه کیره مدکلرینه بناء حاللری دیگر کون اولدیغندن و پک چوغنی فقرندن حیوان و سلاحن صاتوب یالین ایاق و آچ و محتاج قالدقلرندن حال پریشانلرینه رحم اولنور امیدلریله ککش بولندقلری حالدده اعدای دین اوزرینه واریلور کجی جمعیت کثیره ایله اوزرلرینه و اولدیغین کور دکلری کجی نیه اوغرادقلرین بیلمیوب حاللری برقات دخی پریشان ونه طرفه کیده جکلر نده حیران اولملریله نهاییه الامر یوقلمه بدلی اوله رق قرق بیک آچه میری یه خدمت ایده جکلرین تعهد ایدوب استماع اولندیغی اوزره علو پاشایه دخی بر مقدار نقد آچه دفع و تسلیم ایتملریله صکره حاللریکنز افاده اولنه رق التماسکنزه مساعدده بیوریلور شمذیلک برمدت حاجی اوغلی بازارنده اقامت ایدیکنر دینلهرک قصبه مرقومه جانبنه سوق اولدیلر . علو پاشانک آرقه سنندن سردار آکرم دخی شمنی جانبنه متوجه اولمش اولوب متعاقباً اردوی هایون دخی ساستره سحر اسندن حرکت و محرک یکرمنجی کونی شمنی سحر اسنده لوای شریفه موصلت ایلمش اولدیغندن بر وجه مشروح سپاه نفراتی حاجی اوغلی بازارینه دفع وارسال اولندقدن صکره بوقته یه باعث کیملر اولدیغی تفحص اولندقدن بازار اهل نفاقه کر میت کلهرک بالآخره لزوملی آدمردن سلحدار کاتبی قدری افندی ایله سلحدار ایکنجی خلیفه سی علی بکک وغیر بکر اعداملرینه علت اولدیلر دیو انوری تاریخنده مذکوردر .

الحاصل سواری او جاقلرینک بوحرکتلرینه و اصف افندی عین عصیان نظر یله باقوب انوری افندی ایسه آنلری بتون بتون مغدور و معذور کو سترر و مصلحتک محاکمه سنه کیریشلده کده ایکی طرف دخی تنور سنده سوز بوله بیلور حقیقت حالده بو مقوله فوالقلر اختلال قانون و نظام مسئله سنک نتایج طبیعه سنندر سواری او جاقلری خاتی فی الاصل دولت علیه نیک الک معتمدا و معتبر عساکر موظفه سنندن و موکب هایونک اجزای اصلیه سنندن اولملریله سنجاغ شریف معیتدن تبعیدلری مناسب اولماق ادعاسی اگرچه درمیان اولنه بیلور لکن بونلر دولت علیه نیک علوفه لو سواری عساکری اولملریله برنفرلری خارجه بولماق اوزره جمله سی مواقع معینه ده موجود و مهیا بولملری قانون قدیملری اقتضاسندن ایکن قانون و نظاملری مختل و علوفه لری شوکا بوکا ما کل اولوب کندولری اطراف واکنافه پراکنده اوله رق هر بری بر بلده ده اقامت برله علوفه سنی شوکا بوکا حواله ایده کدکلرندن و الحاصل او جاقلری وضعندن چیقهرق وظیفه اصلیه لری اولان

ایشه یار آمدقوری حالده تماماً علوفه لری خزینۀ دولتدن اعطا اولمغله بیهوده یره مبالغ کلیه تلف اولمده بولندیغندن لدی الاقتضا بر محاکم محافظه سی کبی بر ایشده اولسون بولمغلی فر یضۀ ذمت و بالجمله قانون و نظام لری مختل اولمشیکن یالکیز کندو ایشلرینه یارایه جق جهتی التزام ایله بر منوال سابق بابا طاغنه کیتمکدن امتناع و بونجه غوائل سفریه آره سنده بر طرفدن دخی آنلرک بر طاق مشغله لر ایقاع ایتمغلی مغایر امر دیانت و منافع رسم عبودیتدر مع مافیه ایچلرندن جزئی علوفه ایله کچنمهدن عاجز اولان بر طاق بیچاره لر انوری افدینک سیاق افاده سنه نظراً مغدور اولوب بو بایده اصل کنهه و قباحت بر چوق علوفه لری مأکل ایتمش اولان سرکشلردر اما چه فائده که بو مقوله لر اکثریا اکل و بلع ایده کلدکلری مبالغت بر مقدارینی بذل ایله آلان و یرن او یوشوب او جاقینه اختلالده و بیچاره لر اسکی حالده قالمور و حق و عدل اوزره ماده محاکمه اولنه جق اولسه ایکی طرفده دخی قباحتلی بولنور .

ماچین محاربه سنده یارارلغی ظاهر اولدی دیو پکمزجی محمد پاشانک تعریفیه یکیچری اغاسی نصب اولسان سلیمان آغا اردوی هایون سلستره ده ایکن اوراده متمکن خاصکی متقاعدلرندن متمول بر کیمسه یی حبس ایدوب بعدالمصادره اطلاقتی تصمیم ایتمشیدی . سلستره اهالیسی مرقوم خاصکینک حسن حالته شهادت و اسناد اولنان تهمتدن بریء الذمه اولدیغنی بالیمان تخلیه سببانی رجا و شفاعت ایتمغلیه صدر اعظم دخی رجالیینه مساعده و مرقومک تخلیه سببلی ایچون سلیمان آغایه خبر ارسال ایدوب کتخدابک طرفندن سؤال ماده اولدوقده بر ایکی کون حبسی لازمدر دیو آغا جواب و یردیکندن کتخدابک تکرار خبر کوندروب بو خبر ایله کیدن آدم ایسه عشرت هنکامنه تصادف ایتمکین سلیمان آغا کیف باده ایله حبس و اطلاق ملعبه صبیانه دوندی او جاغ عامره ارتق کندوسی بونلره کوسترمک لازم کلدی دیمش اولدیغی صدراعظمه یتیشدیرلمش ایدوکندن بر منوال سابق سپاه غائله سنک اندفاعیه اردوی هایونک شعنی به ورونده اوائل صفرده سلیمان آغا قلبه ده اقامت ایتمک اوزره عزل ایله یرینه قول کتخداسی عربزاده احمد آغا یکیچری اغاسی اوله رق او جاقده سلسله و قوعیله مستعد مراتب اولنلر بحسب الطریق نائل مامول اولمشلردر . یکیچری اغاسنک فر یضۀ ذمتی او جاغک انتظام حالته سعی ایله یکیچری نفراتی سرکشانه و بی ادبانه حرکتدن منع ایتمک ایکن کندوسی او جاغه استناد ایله ناسک اموالی مصادره یه قالمشیمی بحق عزل و نفیقی موجب مواددندر . لکن مأمورینک نصبنده کندولرندن بر معتاد بر خیلی جائزه لر آلتدقدن بشقه اولوقت رشوت رایکان

اولدیغندن منصوب اولنار و یردیکنی چیقارمق ایچون دایما بویله مظالم و تعدیاته
تصدی ایده کلدکرینه نظراً آنلرک بو یوللره سلوکلرینه حین نصبرنده بیسولکر
طرفندن سبیت و یرلمش اولور ایدی بو دخی او جاقلرک قانون و نظاملری مختل
اولدینی ایچوندر یوخسه قانونلری مرعی الاجرا اولسه هر کس بویله ترقی ایده جک
اولدیغندن نه کیمسه رشوت و یرر ونه ده مرتشیلر رشوت آله جق آدم بوله بیلور .
او جاقلرک نظاماتی بویله مختل اولدینی کبی سرحدات احوالی دخی کذلک اختلاله وارمشیدی
زیرا سرحداتک محافظه سی ایچون مخصوص اولان مبالغ کلیه نك همان درت خمسی استانبولده
غارت و تلف اولنهرق باقی بر خمس سر حدلرده او جاقلو نامه اولان اشخاص معدوده النده
قالوب مرقوملرایسه سر حدنشینلک عنوانیه فقرایه مسلط اولهرق جبراً سلم طاغتمق کبی
بهانه لر ایله رعایانک اموالی اللرندن آلدقلرینه قناعت ایتموب اولاد و عیاللرینی اسیر
کبی قوللانهرق سفر وقوعنده اعدا طرفنه اتباعه مجبور ایده کلدکری حالده کندولری
دخی کاه بویله ظلمله وکاه تجارت طرفینه جلب و ادخار امواله مألوف و سرکشک
واظاعتسزک ایله موصوف اولدقلرندن قلاع پادشاهینک محافظه سنه بذل تقد حیات
ایده جکلرینه ماللرینی محافظه داعیه سنه دوشهرک همان ویره ایله دشمنه تسلیم ایتمک
مسارعت ایدرلر و ایچلرندن زیاده جه کسب یسار و اقتدار ایدنلر دخی عصیان
و سرکشک یولنه کیدرلر ایدی . از جمله بلغراد متفذلرندن دلی احمد پاشاکه و اصف
افدینک تحریرینه کوره فی الاصل بلغراد مفسدلرندن اولدینی حالده مقبول حسنی
افدی اعانه سیله کیدرک اول حوالی بی قبضه تصرف و تغلبه آلوب مقاطعات حاصلاتندن
وسائر یوزدن اموال کثیره ادخار و مصادرات ایله رعایای بلغرادی اضرار ایدرک
نهایت عصیانلرینه سبب اولمشیدی . انجق تغلبی حسینیله ولات و حکام برشی
دیه میوب جمله سی آنک راینه مماشات ایتمک مجبور اولور ایدی بو حالده نتیجه لولر
بلغرادی محاصره ایتمک رنده ادخار ایتمش اولدینی اموالی قاجیرمق ایچون ویره ایله
بلغراد قلعه سنک تسلیمنده سائرلرینی دخی اغوا ایدرک اون کون ظرفنده بویله بر حصن
حصینک استیلاسنه سبب اولمش ایکن باشنده حشرات ناسدن خیلی جمعیت اولدیغندن
اله کیرمسی ممکن اوله میوب ترتیب جزاسی وقت آخره تعلیق اولنهرق اول حوالینک
محافظه سی شرطیه عهده سنه میر میرانلق اعطا اولتوب مور او ده کوپرسنه محافظ نصب
و تعیین اولمشیدی . اولوقت اول حوالی سر عسکری بولنان قوجه عبدی پاشا دخی
آنی استصحاب ایله اولحوالی امورینک مستشاری و بلکه محرم هرکاری ایدوب
اولحوالی رعایاسنه استمال و یرلمک لازمه وقت وحالندن ایکن احمد پاشا پوزروغجه
طرفلرینه مسلط اولهرق رعایاسنه ایتمک ظلم و تعدیلر قالماشیدی . انعقاد مصالحه

تحققده ینه بلغراده مستولی اولوق خلیسیله اطراف واکنافته درکین فرصت اولان شقاوت پیشه لری باشنه جمع و بزمنه شمع ایلدیکی حالد ابو بکر پاشانک بلغراد محافظی نصب اولنه روق نیشه واصل اولدیغنی استماع ایتدکده اغلآن خائف مدلولنجه خوفه تابع اوله روق شوراده بوراده تحصن و اختفا صورتلریله احتیاطکارانه حرکت ایلدیکی ابو بکر پاشانک معلومی اولوب اعدای ایچون کندویه امرعالی دخی گلش اولدیغندن انواع لطائف الحیل ایله پاشای مر قومی دعوت ایدوب هر نه حال ایسه نیشه گلش ایسه ده پکده مطمئن اوله میوب حتی ابو بکر پاشانک سر اینه بش یوز قدر آدم ایله گلش ایدی انجق ابو بکر پاشا مر قومی بر تقریبله اندرون اغالرینه قورشون ایله اوردیروب سر مقطوعنی اردوی هایونه کوندر مکه اورادن دخی در سعادتیه کوندر لمشدر .

بالاده مشروح اولان فناقلر هپ نظامات عسکر یه نك اختلالدن ناشی اولغله زیرده بیان اولنه جنی وجهله اردوی هایون هنوز روم ایلیده ایکن نظامات عسکر یه نك اصلاحی و سر حداتک تقویتی بین الوکلا تذکر اولنقمده ایدی .

طریق علمیه نك قوانین و نظاماتی دخی بو وجهله مختل اوله روق طرق سائره کبی آنک دخی اصلاحی فریضه خالندن ایسه ده کلیاتنک تنظیمی و قته محتاج اولدیغندن بالدرنج تسویه سی مقرر اولسیله بو ائساده حر مین پایه سنک نظامی توثیق اولمشدر . شویله که : مکه مکرمه و مدینه منوره مولویتلری سائر مولویتلر کبی کثیرالما اولیوب انجق استانبول قاضیغنه موصل اولدقلرندن ایکسی دخی حصره الموالی ایکن بعضیلر بالفعل حر مینه کیتمدکلری حالدیه پایه ایله ترفیع و پایه آلدقلری زمان دخی مکه معز ولی اعتبار اولنملریله بالفعل حر مینه کیدوب کلنلره تقدیم اولدقلرندن حر مینه نوبتلری کلنلر هپ اعذار و اهیه ایله کیتمکدن امتناع ایدر اولدقلرندن شیخ الاسلام اسبق صالح زاده مرحوم محمد امین افندی نك مشیختنده حر مینه نوبتی کلوبده کیتیمانلرک بویله پایه ایله ترفیع و تقدیم اولنملری نظامه ربط اولمش ایسه ده بو نظامه دخی رعایت ایدلمیه رکه ینه بعضیلر هم کیتمیوب وهمده مکه پایه سنی تحصیل ایدرک هزار مشقت طریق ایله کیدنلره بحسب الطریق تقدم ایدوب مع هذا که عهده لرینه مکه و مدینه مولویتلری توجیه اولنان ذاتلره در سعادتیه جانب میریدن بشر بیک ایکیشر یوز الیشر غروش اعطا اولنوب مبلغ مر قوم ایسه بر آچقه سی اولمیان کمنسه یه اعطا و تملیک اولنسه اولوقتک حسابنه کوره اوزرینه ادای حج ایتمک فرض اوله جغنه و حر مین منالرینه مصر دن مرتب اولان غلال و سائرده و حر مینده موجود مدارس اوقافیله ظهورات حر مین حاصلاتی مدت اقامتلری مصارفه کافی وجده کمر کی مالندن کندولرینه مخصوص اولان اون اوچر بیک غروش دخی عودتلری مصارفه وافی اولدیغنه بناء حر مینه کیتامک

ایچون اعذار واهیه ایرادی امر حقدن عدول و فرمان پادشاهی بی عدم قبول دیمک اوله جغندن فیما بعد انجق خدمت شاهانده اولنره مکّه مکره پایه سی اعطاسنه اراده سینه تعلق ایدرایسه باخط هایون توجیه اولنوب بلا عذر کیتمکدن امتناع ایدنره قطعاً مکّه مکره پایه سی ویرلامک و آرپه لقرینه ضمیمه آرپه لقا اعطا اولنماق اوزره حر مین منصبیری مادونلرینه توجیه اولنماق خصوصلرینک نظام اتخاذا اولنمسی ایچون اواخر محرم الحرامده اراده سینه صادر اولمشدر . بزینه صدده کله م .

* راتب افندیکنک ویانهیه کیفیت اعزامی ووقایع سائر *

برمنوال سابق اردوی هایون سلسترده ایکن ابوبکر راتب افندی ویانه سفیری تعیین اولنوب نامه هایون ایله بر معتاد ارسال اولنه جق هدایایی سفیر اولنلردر سعادتده تسلیم ایلمک معتاد ایسهده مرور وقتی موجب اولماق اوزره ایمراطور ایچون در سعادتده ترتیب اولنان هدایا اردوی هایونه ارسال اولنهرق نامه هایون ایله برابر راتب افندییه تسلیم اولنمش ایدی هدایای مذکوره ایکی یوز یکر می بش بیک بو قدر غر و شلق اولماق اوزره مرصع سرغوج و کمروات طاقی اولوب اورته ایلچیار ایله فرانسه دولته ارسال معتاد اولان هدایا امثال اتخاذا اولنهرق ترتیب قلمش ایدی . انجق محاربه دن مقدم نمچه نک در سعادتده مقیم ایلچیبی وزشتوی مکالمه سنده مرخص اولی اولان هر پرت دولتی طرفندن در ساعات ایلچیبی تعیین اولنهرق برمنوال سابق شغنییه ورودنده بیوک ایلچی ارسال ایله ایجاب ایدن تکلفات رسمیه بین الدولتین بر طرف اولماق اوزره کندوسی اورته ایلچیلک ایله هدیه سز اولهرق کیش اولدینی تحقق ایتمکین مقابله بلثل قاعده سنه رعایه راتب افندییه تسلیم اولنمش اولان هدایای مرقومه استرداد اولنهرق یالکز نامه هایون ایله اعزام قلممشدر .

بوندن صکره نمچه لودن استرداد اولنه جق قلاعک تسلمنه ابستار اولنهرق بومأموریتله مورخ واصف افندی بلغراد جانبه عزیمت ایدوب واصف افندییه بوندن طولانی تاریخنده بث شکوی و سبب اولنلره طعن و تشنیع ایله یکندن خلاصه کیفیت برمنوال آتی بیان اولنور . باش محاسبه جی ابراهیم افندی اقدمجه اشتداد علتته مبنی در سعادتده عودته مآذون اولمسيله اناطولی محاسبه جیبی بولنان مومی الیه واصف افندی باش محاسبه جی و آنک یرینه سیواسی حسن افندی اناطولی محاسبه جیبی نصب اولنمش ایدی . لکن واصف افندی مقدماروسیه متارکه سنه مأمور اولهرق اساس معلوم اوزرینه عقد متارکه اولنمش اولوب بوجهله واصف افندییه باش محاسبه جیلک توجیهی دخی تراید قدر و اعتبارینی موجب اولهرق

اساسك استحسان اولمش ايدوكنى اشعار ايتمكله شايدكه روسيه او قضيه به كسب وقوف ايدرك اساس صلحك نزد دولت عليه ده استحسان اولمش ايدوكى زعيمه اساسدن خارج تكاليف ايله دولت عليه ي ازعاج ايله هر نقدر بوماده ده ظلم وغدر شائبه سى محسوس اولور ايسه ده تسهيل مصلحت دولت ضمنتده ينه شان ووقارى محافظه اولنه رق مومى اليهك برديكر خدمته مأموريتى طبيعت مصلحته موافق ملاحظه اولنور ديو بعض اعداسى طرفدن وقوعبولان القآته منى واصف افندى تحديد بوسنه وياخود تسلم قلاع مأموريتلرندن برينك ترجيخنده تحيير اولنوب اولدخى تسلم قلاع مأموريتنى ترجيح ايتمكله بلغرا ده متوجه اولدقده سيواسى حسن افندى باش محاسبه جى اولوب اناطولى محاسبه سى دخى ضبط وقايع دولت عليه خدمتيله تذكره اول اولان انورى افندى به احاله اولمشدر . واصف افندى خصوصات سابقه ي بيان ايتدكديصكره باش محاسبه نك رفى خط همايونده مصرح دكل ايكن سيواسى حسن افندى كه اعى من باقل وفرط جهل وغباوت ايله احق من هبتقه مثلنه نمائل وبلكه اعين ناسده برشخص ساقط وسافدر سى وعمله اشتغال ومرقوم ايله مشترك فى الماهيه اولان برشخص مثل عظيم الهيكلى اختلاف لغات وطمطراق واصطلاحات ايله علاقه اتحاده نظراً ترويح حال ايدوب نيشه وصولزكونى باش محاسبه يي ربوده چنكالك احتيال ايلدى وبوفلاكترده دخى كريان ونالان غريق يم ياس وحرمان اوله رق بلغرا ده واصل وسپرده عهدۀ صداقم اولان خدمت مهمه يي اكمل ايله منتظر عنایت شهريار ستوده خصائل اولمشيدم ديو تحيير ايدوب تاريخنك بعض نسخهلرنده دركنار اولنديغى اوزره حسن افندينك تصحبدن طولايي اسم تصریح ايتمه رك شكایت ايتديكى ذات حقى بك افندى اواق كركدركه اولوقت اردوى همايون رجالتدن بولنوب مؤخرأ وزير اولان مشهور حقى باشا مرحومدر وينه واصف افندينك بوه قامده كندو تحييرينه كوره التى آى ظرفنده بومأموريتى ختام بوله رق درسعادته عودتنده برسنه كامله بلامنصب آستانه سعادته اقامت ايتمكله ديون كثيره به مستغرق اولوب مؤخرأ اناطولى محاسبه سى منصبيله مسرور قلنمش ايسه ده

* بليت *

طالعك اولمز ايسه برج سعادته قوى * سنوى منصب ايله بسليه مزين سن اوى مفهوى ايله سر بچيب اندیشه وتفكر ايكن برايكى ماهدن صكره خدمت وقايعه مأموريتله قدر واعتبارى تنويه ومتعاقباً عطيه ملوكانه ايله فى الجملة ترفيه بيورلمشدر . بزينه صده كله م . شمنى صحرا سنده برمدت اقامتله بومقوله مصالحك تسويه سندن

صکره مشتاً ایچون ادر نهیه کیدلمک تصور و تصمیم اولنمش ایسهده مرخص افندیلر طرفدن هنوز مواد مصالحه مکلمه سنه شروع اولندیغی خبری بیه وارد اولدیغندن احتیاطه رعایه اردوی همایونک سرحده قریب بولنمش لازمه دن اولمسیه شمینک مشتاً اتخاذا اولنمشی ترجیح اولنهرق اوتوز برکون شمنی صحرا سنده اقامت اولدیقدن صکره اشبو ایکیوز التی سنه سی صفرینک یکر می ایکنجی و تشرین اولک طقوزنجی پنجشنبه کونی آلائی ایله شمنی قصبه سنه دخول و ربیع الاولک اوتنجی بازار ایرتمی کونی لوای شریف نبوی صندوقه سنه وضع ایله یاش مکلمه سنک نتیجه سنه انتظار اولنمشدر .

ایشته بو اوآنده مشهور کانی افندی ایله اجله رجال دولت علیه دن بیک حسن افندی وفات ایلمش اولدیقلرندن ترجمه حاللری بو مقامده بیان اولتور .

* کانی افندیگ ترجمه حالی *

عن اصل منشأ ارباب هنر اولان توقاد قصبه سندن اولوب سن و سالی هنوز بالغ نصاب شباب اولمزدن اقدم عربی و فارسی و ترکی اشعاری و منشآت و آثاری مقبول ادبای زمان اولدیغندن غیری طریقت علیه مولویه به انتسابی اولغله توقاد شیخی خدمتده سکه بوش برنوجوان ایکن شیخ الوزرا حکیم اوغلی علی پاشا مرحوم طریزوندن اوچنجی دفعه صدارت عظامیه مدعو آکلور ایکن توقاده اوغرادقده قصیده و تاریخ صونوب علی پاشا دخی قدرینی عارف اولغله اذن شیخ ایله دائره لرینه آلوب آستانه کتور مشلر ایدی . لکن جولان طبعاری اقتضاسی اوزره بروا دیده ثابتقدم و بر صورتله همدم اولمیوب آفته مزاج و لاابالی مشرب اولمسیه طریق خواجکان همایونه ادخال اولنمش ایکن او مقوله قیودات صوریه کندویه پابند تعلق اوله میوب کاه دیوان قلمنده اوآنکدار اولور و کاه دیوان کتابلریله طشره لرده کشت و کذار ایدر ایدی اوائل حالنده می و محبوبه مائل و اوآخرنده طریقت علیه بر کتیه صلاح حاله نائل اولدیغی حالده بروجه سابق بو خالده قیودات دنیویه دن بالکلیه دامنکش عزلت و اشبو (۱۲۰۶) سنه سی ربیع الآخری حلونده عازم جوار غفران و رحمت اولمشدر هوایی طریزنده هزلیاتی کورن یاران و غرائب سرگذشتی ایشیدن اخوان ساده دلان مرحومک نه عیارده اولدیغین فهم و ادراک ایدمه میوب (خراباتی کورنلر هر بری بر حالتن سویلر) فحوا سنجه هر کس حقتده بیایدیکی قدر سویلر ایدی حالبوکه مرحومک آینه طبی صاف و سینئه بی کینه سی کدورات قید ناموسدن پاک و شفاف اولنمین بعض هزارلر اطرافن آلوب کانی افندی شو قافیه ده بر بیت و یا بر مصراع بولدم قافیه تنک نصل تخمیس و تضمین ایتمی دیهرک تهییج طبع ایتملرله هزله دائر بعض اشعار سویلده کلرندن هزلیاتی سائر آثارندن چوقدر لکن عربی و فارسی

و ترکیبی نظیر نعت شریفی و واردات اولیاء اللہہ نیچہ نظائر و تخمیساری و نیچہ اشعار پاکیزہ لری وارد کرکہ اربابی عندندہ مقبولدر و منشآتیی اشعارینہ غالبدر دیو ادیب تاریخندہ محرردر .

مرحومک و فاته شعرای عصرک سر امدانندن مشهور و هبی افدینک سوبدیکی تاریخدر .

کیندی کوهر ایدی کویا اومعارف کافی

* حسن افدینک ترجمه حالی *

پسکی حسنی افندی بر قاج دفعه دفتردار و وزیر کتخدالغیله نامدار اولوب ممدوح الاطوار و سخا و کرمله شهر تشعار و بر قاج دفعه مضایقه مالیه دن طولانی ارکان دولت دوچار عجز و حیرت اولدقلری حالده بعض اسهام ایجاد ایتک کبی اختراعات و تصرفات ایله اداره امور دفتری به موفق اولدیغندن امور مالیه ده مهارتی مسلم صغار و کبار ایدی انجق غایت حدید المزاج بر ذات اولدیغندن کندوسنی سوندر اولدینی کبی قدح و ذمنی التزام ایدن بر خیلی کینسه لر دخی بولندیغنه مبنی قدح و مدحی حقدنه مور خلرک کلاملری اختلاف اوزره بولنمشدر (۱۲۰۱) تاریخندہ اوچنجی دفعه دفتردار ایکن عزلیله یرینه احمد نظیف افندی دفتردار اولدقدہ اقدجه تقاعدیه و صدقه شاهانه اولق اوزره بعض ضعفایه توجیه اولنمش اولان معاشلر محضا خسار میریدر دیو بوبهانه ایله حسن افدینک دفتردارلغنده وقوعبولان توجیهاتک برقطعه دفتربنی ترتیب و رفرعربنی تلخیص ایله خط هایون کشیده ایتدیروب شونک بونک یاننده دخی کندوسنی قدح و ذم ایتکده اولدیغنی حسن افندی استماع ایدیجک اول عصرده نظیف افندی بی کمنسه لساننه آلمغه جسارت ایده مز ایکن صاحب ترجمه مألوف اولدینی طور لا ابالیانه اوزره هان قیویه ورود و کتخدای صدر عالی خیری افدینک او طه سنه صعود برله رئیس الکتاب بکر پاشا زاده عطاء الله بک افندی دخی حاضر اولدینی حالده نظیف افندی حقدنه دهان شکایتی باز و بی باکانه طعن و شتومه آغاز ایدرک بو اوغلان نیچہ بر بزم پشیمزه دوشوب محضا اجرای نفسانیت ایچون بزلی اتهام غرضیله مدت دفتربزده وقوعبولان توجیهات معقوله مزنی اضاعت میریدر دیو رفع و بوبله شان سلطنته محل حرکته تصدی برله وسیله انکسار و بد دعا اولدینی یتشمیوبده حقمزده زبان طعن و تشنیعی دراز ایدرک اولیه جق کلمات فضیحیه اجترایدرمش زمان دفتربزده بقدر توجیهات وقوعبولدی ایسه جمله سنک حسن وقیحی یک یک معلومز اولوب دولته خیاتمیدر یوخسه بر موجب صداقت جمله لوازم شان سلطنت اولان توجیهات جزئیله ایله

طرف سلطنته دعاآلدير مق و عرض دولتی صیانت ایتمک ایله تحصیل عبودیتیدر نیک و بد بزلر
 جوانی ویرمکده عاجز دکلز او ان ظهور مزدن بو آنه کلنجه المزدن کلدیکی قدر
 خلوص طوبیت واستقامت ایله بو دین و دولته ایلدیکمز خدمت ایله مباهی و مفتخر
 و معاذالله تعالی بروجهله خیانت و سوء حرکتمز وقوعبولدیغی عامه عالمیانه روشن
 و باهر ایکن آنک کبی آغزنده شیر مادری فوقان بر چوجق بو یله ایکده برده
 اجرای غرض فاسدی ایله علیه مزه دوشمک نه دیمکدر فیما بعد بزدن التی چکسون
 عایم الله بالنفس رکاب هایونه صاریلوب سولیلمدک سوز قوم و کندوسنی عالمیره
 رسوا و بد نام ایلمر دیو آتش محض اولدوقده چونکه نظیف افندی اول عصرک
 اک مقبل و متفذلرندن مقرب و منظور پادشاهی اولمسیله علیه مزه سوز سولیلمکده
 محاطره و ملحوظ اولدیغی مللوحسن افندی دخی رجال دولتک مقبول و متحیزلرندن
 واجب الرعايه برذات اولدیغندن کتخدایک ایله رئیس افندی موقع مشکده بولنوب
 عظیم تلاش ایدرک حاشا سزک کبی ذات عالی قدری بویه اولیه جق حالات غیر
 صحیحه ایله تکدیر و اتهام قیدینه دوشه لر سز جمله مزک پدر مغنویسیسکر بو دکل
 الابرآلای اعادی و حسادک سوزلر یدر دیو کوچ حال ایله آتش تهور و غضبنی
 تسکین ایده بیلمشار و نهایت خوش ایمدی مانع دکل ینه کندوسی بیلور بزلارم
 اولانی بیان ایتدک متنبه اولدی نه کوزل والا بن ینه ایشمی بیلورم دیهرک قالقوب
 خانه سنه کیتمش و بعده برآی ظرفنده توقیعی و چند ماه مرورنده کتخدای صدر
 عالی اولمشیدی مؤخرآ اردوی هایونده دخی مهم و معتنا مأموریت و منصبلرده
 استخدام اوله نرق جزائری حسن پاشانک صدارتنده ینه کتخدای صدر عالی
 اولوب انجق حسن پاشانک در سعادتجه غرض و نفسانیته محمول اولان بعض حالاتی
 حسن افدینک اخطار یله ظهوره کلپور دیو باراده سنیه کتخدالقدن عزل
 اولمشیدی آندن صکره دخی بعض خدمات مهمده بولنوب اردوی هایوندن
 در سعادت و ورودندن بر قاچ کون مرورنده نامزاج اوله نرق اشبو اکیوز التی
 سنه سی ربیع الآخری خلالتده طی دفتر زنده کانی ایلمشدر . بزینه صده کلمه

* یاش قصبه سنده مجلس مکالمه عقدی *

دولت علیه مدت مدیده پروسیالویه روسیه اوزرینه اعلان حرب ایتدیرمک
 خصوصنه سی ایدوب حتی احمد عزمی افندی دخی بو مطالعه اوزرینه سفارتاه
 برلینه کوندرلمشیدی حالبوکه فرانسه اختلالی اوزرینه دول اوروپا کندی ینلرنده کی
 خصومتی ترک ایله بوسیل فتهیه سد راه اولوق اوزره یکدیگرله اتفاق و اعتضاد
 سوداسنه دوشهرک نصل اولور ایسه اولسون عثمانلو محاربه سی غائله سنک بر طرف

اولسی املنده بولندقلرندن واستاتوقو قاعده سی اوزره مصالحه عقدی دول متوسطه طرفندن هر نقدر قترینه به تکلیف اولندیسه ده عدم قبولده اصرار ایلمش اولدیغندن پروسیا قرالی محتاج اولدیغی اعانهٔ بحریه نك انکلتره لو طرفندن اعطا اولندیغی بهانه ایدرك عوق و تأخیر وانکلتره لو دخی قرق قطعه سفینه نك ایامی حلولنده بحر بالطقه اخراج اولمق اوزره تهیئه اولندیغی افاده و نهایتکار در سعادتده اسپانیا و سیجلیاتین ایلیجیلری صلحه حسن سعی صورتیه نهر طورله حدود اولمق صورتی مثللو بعض مواد عرض و درمیان و پروسیا وانکلتره ایلیجیلری دخی دولترینك ذکر اولسان دولتره موافقته مجبور اولدقلری عذریه محاربه نك صحبتی بیله ترك ایله انکلتره لو و پروسیا متحد الرأی اوله رق امر صلح ایچون پترسبورغه مخصوص ایلیجی ارسال ایلدکلرینی بیان ایتدکلری ائشاده اردی هایون دخی مشتادن صحرایه بعد الخروج ماچین طرفنه توجه ایتدکده بالاده بیان اولندیغی وجهله اردوی هایونده تفرقه و پریشانی ظهور ایدوب بعده تکرار تنظیم احوال ایله ماچینه وارد اولمش ایسه ده اردوی هایونك ضعفی بیدار اولدیغی حالده متعدد دول ایلیجیلری و خصوصیه متفق اولان پروسیا ایلیجیسی متخالف المضمون اساسلر عرض ایله مصالحه الحاح و پترسبورغه کیدن انکلتره ایلیجیسی خود بخود براساس وضع ایدوب شویله که : طورله حدود اولمق و درت آی متارکه اولنوب بو مدت ظرفنده دولت علیه مصالحه ایتمز ایسه مصلحتی طبیعتنه ترك ایله مداخله دن کف ید ایتمک صورتی مسقولویه اعانه ایلمک تلمیحیله مزوج اوله رق بر قطعه اساس مصالحه صورتی وارد اولوب حالبوکه ایکییوز درت سنه سی مشتاسنه روسیه طرفندن متعدد نامه رسلر کیشیکن بر مقتضای اتفاق پروسیانك توسطنی دولت علیه التزام ایتمسی و روسیه لونك بر دولت توسطنی قبول ایتماسی مانع صلح و صلاح اولمشیکن پروسیا لونك اولکی متاتی قالمیوب توسطدن کنندی رضاسیله کف ید ایدرك سائر متوسطین ایله برابر صلحک لزومنی بیان و اخطار و روسیه لو اول و آخر طورله دن قطع حدود و خصوصنده اصرار ایتدیکندن سلطان سلیم دخی روسیه طرفنده برائر مظفریت کورلمدکجه صاحبی تجویز ایتیموب اردوی هایون ایسه حال تزلزل و تذبذبده بولندیغندن سرادر اکرم یوسف پاشانك زیاده تلاش و اضطرابه دوچار اولمشیدی زیرا بوسفری کشاد ایده جک اولدیغی ائشاده سفردن احتراز ایتمک اوزره کندوسنه نصیحت ایدن ذواتی اولوقت تکدیر ایلمش ایدوکندن قریبی آملق ایچون آچمش اولدیغی بویله برسفری بونجه زیان و خسار و وقوعندن صکره برچوق یرلر دخی ترکه بر طرف ایتمکه مجبوریتی بادیء محجوبیتی اولمشیدی . بناءً علی ذلك صلح ایله دفع غائنه

ایتمک واجبه دن اولدیغه دائراردوی هایونده یاییلان مضطهیی رکاب هایونه تقدیم
 ایتدیکی ائشاده بوتمللو موادنازکده سوزی مقبول وموثوق اولان صدرروم ایلی
 تاتارجق عبدالله افندی به دخی صلحک وجوبنه دائر برقطعه مکتوب یازمشیدی .
 شوراسی جای عبرت وانتباهدرکه بدایت سفرده عبدالله افندی اردوی هایون
 قاضیسی بولنوب یوسف پاشا اوزمان آنک وجودینی استئقال ایله نفی ایتدیرمشیکن
 بوکره آنک معاونت لسانیه سنه محتاج اولمش وفی الواقع عبد الله افدینک دخی
 استانبولجه صورت صلحیه به رغبت اولتمق خصوصده خلیجه همتمی وقوعبولمشدر .
 چونکه طورله نهری حدود اولمق اساسی اوزره مصالحه سلطان سلیم خان
 حضر تترینک هیچ مرضیسی دکل ایدی نه چاره که عساکرک نظامسزلغدن ناشی
 برمنوال سابق طرف اسلامیانده برآ و بجزاً انهزام ومغلوبیت صورتلری رونما
 اوله کلدیکندن درسعادتده منعقد اولان مجالس مشورتده دخی صلحک وجویی
 تصدیق اولنغله بوبابده سردارا کره رخصت سنیه اعطایورلمسی اوزرینه واصف
 افندی قلاصه واروب جنرال ربینن ایله بالمذا کره عقدمتارکه ووضع اساس ایتمشیدی .
 بناء علی ذلك نمچه مصالحه سی رابطه بولدقندن صکره روسیه لونک ساموی洛夫 نام لیوتنام
 جنرالی باش مرخص وانجه دونماسنک قوماندانی دیباس نام جنرالی ایکنجی مرخص
 وبغدان قوماندانی سرچو اوچنجی مرخص تعیین اولمش ایدوکندن زشتویده کی
 دولت علیه مرخص ومأمورلری روسیه مصالحه سی مکمله سنه دخی مأمور اوله رق
 اشبو ایییوز اتی سنه سی اوائلنده قلاصه لدی الورود روسیه لو طرفندن کمال الحاح
 و ابرام ایله مرخص افدیلره ایکیشر یوز اللیشر و کتبه به دیوان ترجمانه اللیشر قرق
 غروش بدل تعینات ترتیب اولندقندن بشقه بعض اسرای اسلامیه علی الخصوص
 ماجین معرکه سنده مجروح اسیر اولان تپه دلنی علی پاشا یکنی محمد پاشا پرنس پوتیمکین
 طرفندن اکراما اطلاق اولنوب بالمقابله سردارا کر مک اشارتی موجبنجه درسعادتده
 دخی مسقواسیرلرینک سرکرده لری تفریق اوله رق ترسانه زنداندن یدی قله به
 نقل اولنغله طرفین بربرینه یاقلاشمغه باشلادیغی صرده پوتیمکین ترک دسیسه خانه
 دنیا ایدوب کیتمشدر . پوتیمکین ایسه مکمله ناظری وایمپراطوریه نیک اصل مرخصی
 اولوب مکمله به مأمور اولنلر آنک رخصتنامه سیله مرخص اولدقنلرندن آنک وفاتیه
 مصلت مکمله دوچارعقدۀ تأخیر اولوب یکر می بش کون صکره روسیه نیک قنچلیری
 یعنی خارجه ناظری اولان (قونت بوز بورودقو) مکمله ناظری اوله رق یاشه ورود
 ایتمکله مرخصلر اوراده بالاجتماع مکمله به مباشرت اولنمشدر .
 بوجه مشروح طرفین بربرینه یاقلاشه رق مصلحت کسب سهولت ایلمش ایکن اول

ائناده قطار كسسته مهار آسا اردوى هايوندن بوشانوب وقتسز واذنمز مملكتلىرى
 جانبنه رجعت ايدن اشخاص بى حمت نيچون عودت ايتديكز ديو مؤاخذه اولنورلر
 خوفله لسانلرينه كلان هذيانى سويلمكده قصور ايتيوب شويله كه : سردار اكرمك
 بالضروره عقد ايلمش اولديغى متاركه بى بهانه ايدرك صالح وصلاحه رابطه ويرلدى
 و دشمن دين ايمانه كلوب حدى بيلدى و اطرافنى شويله محاصره ايتدك بويله تضييق
 ايلدك اكر استيمان ايتماش اوله ايدى بر نفرى قالميوب جمله سنى قليجدن كچورر ايدك
 لكن سردار اكرم قريمى وازاغى و سائر يرلرى استرداد ايدوب امان ويردى
 و اردوده دلالدر ندا ايدوب بالجمله عساكره اذن ويرملرله ولايتلر مزه عودت
 ايلمش در ديدكلىنى سبكمغزان استانبول كر چك نيتيه استماع ايدوب بر آلاى
 غيرتسزلك سلامت نفسلىرى ايچون ارتكاب كذب و دروغ ايتمش اولدقلىرى ادراك
 ايدمه مدكلر ندى بر آلاى سقيم الذهن و بى غيرت و بعض اصناف مقوله سندن اولوب
 قهوه خانه لرده چكه دلاللى ايدن بىعارلر اينانوب برينه بيك قاتهرق صالحه رابطه
 ويرلمش ديو بر برلرينه اعلان و اشاعه ايله درلو اراجيف سويلر اولديلر و اوجاق
 اختيارلر ندى كار آزموده و كارزار ديدمه كچين نيجه احمقلىر دى كورديكز مى سوزه
 كلنجه او جاقولوى بكنمزلر و اعتبار ايتمزلر ايدى حتى ميرى عسكريله ايش كوريلور
 ظن ايدوب اناطوليدن دره بكارلىنى استصحاب و اوجاقولويه ترجيح ايدر اولمشلر
 ايدى كورسونلرينه او جاقولونه هنرلر كوستردى ايسته مسقو جنرالى بوغازينه مقرمه
 طاقوب و متريسلرلك او كنده يوزبى يرلره سورهرلك بولداشلك قليجى التندن كچوب
 سردار اكرمه اول وجهله بولوشدى ديولاف و كذاف صاووروب اكر سامعيندن
 برى مخالفت ايدرك طوغرى سنى تفهيم ايديم ديسه معاذالله تعالى بو آدم مرتد
 ايتمش كورك اعتماد ايتيور ديو ولوله به آغاز ايلديلر فسبحان الله تعالى وقايح
 سابقه دن قطع نظر ايدمه ماچين وقعسى هنوز وقوعه بوله رق اردوى هايون
 تزلزل حالنده بولمسيه بر منوال سابق ضرورى صلحه ميل ورغبت اولمش
 و اردوى هايون اركاننك چكه لرىنى بچاق آچماز اولمش ايكن درسعادته بولنان
 بر طاقم عمل مانده يكيچرى اختيارلرينك و اصلا بر ايشه يارامز كروه بطلينك
 بويله بر اردو خلقنك شهادتلىرله يلان اولديغى ثابت اوله جق اراجيف احداثيه
 خاقه ولوله ويرملرى محير عقول بر كيفيت اولديغى حالده بوندى صكره عسكره
 نظام و رابطه ويرمك شويله طورسون بو حال اوزره يكيچر يلرك اداره سى مشكل
 اولوب پادشاه نوجاه حضر تلىر ايسه اساس سندنمه مذكور اولديغى اوزره
 قنارجيه عهدنامه سنك شروطى ابقا اولدقدن بشقه طورله دن قطع حدود اولمسنه

هنوز راضی دکل ایکن خلقک بومقوله حوادثی اوزرینسه بتون بتون بو وجهله مصالحه دن ابا ایدرک نهر طورله دن سنور قطعی کلامی اخراج اولنغه محتاجدر و بوبابده روسیه لو طرفدن اصرار اوله جق اولور ایسه ختام متارکه بهدک تدارکات قویه به تشبث برله اول بهارده ینسه برآ و بجرأ جنک لازم کلور دیو طرف سردار اکرمی به مؤکد خط هایون کوندرلد کدنصره بوضورتلری آستانه علیه ده دخی جمله به تفهیم و بیان و اول بهار خجسته آتارده مجدداً عسکر اخراجی ترتیبانه و قیله مباشرت اولنسی اعم اولدیغنی اشاعه و اعلان اقتضا ایتمکین اراده سنیه موجنبجه (۲۰۶) سنه سی صفراخیرینک اون طقوزنجی بازار ایرتسی کونی باب آصفیده عرض او طه سنده شیخ الاسلام افندی و قپودان پاشا و صدور کرام و بالجملة رجل دولت علیه و او جاق اغاری و هربر او جاعک اختیار و کار آزموده لری و هنوز اردوی هایوندن کلان جبار زاده سلیمان بک و قره عثمان زاده لر حاضر اولدق لری حالده مجلس مشورت عقد اولتوب خصوصات مذکوره به دائر اقدبجه آلمش اولان ورقه بی رکاب هایونده رئیس الکتاب و کیلی بولسان راشد افندی جمله مواجهه سنده قرائته طوائف عسکرینه نک عدم ثباتلری و ضابطلرینه اطاعت و انقیاد ایتمیوب و قسز عودت ایتمک لری و ماچین و قعه سی اوزرینسه ناچار اون سکنز آی متارکه به قرار ویرلدیکی و مصالحه به رابطه ویریلور ایسه طورله نهرندن سنور قطع اولنسی روسیه لونک مطلوبی اولدیغندن اردوی هایونده اتفاق آرا ایله بالضروره تجویز اولدیغنی و لکن پادشاه عالمناه حضر تلیرنک طورله نهرندن سنور قطعنه رخصت هایونلری اولمیوب سردار اکرم طرفه تحریر بیورملریله اکر روسیه لو دخی اصرار ایدر ایسه اول بهارده سفر هایون مقرر اولمغین مجدداً عسکر ترتیبه ضرورت مس ایده جکی یکان یکان حضاره تفهیم و بیان اولنق اوزره ایکن ناکاه قره قولاغ خاصه یدیه طرف پادشاهیدن بر قطعه خط هایون کلمکله راشد افندی به قرائت ایتمیریلوب مضموننده بالاده ذکر اولنان خصوصلر درج و تسطیر اولدق دنفصره طورله دن سنور قطعی خصوصنه رضای هایونلری اولدیغندن بهر حال ینه محاربه به قرار ویرلدیکی صورتده مجدداً عسکر سوقی لازم کلمکله برآ و بجرأ جمله سنک و قیله رابطه و نظاملری ویریه رک آماده و حاضر اولملری امر و تحریر و یکیکچری و سپاه و سلاحدار و سائر او جاقلو قوللر اسلافده نیجه غزالده بولتوب بوقدر قلاع و بقاع آنلرک سعی و غیر تریله فتح اولنمش ایدوکی تذکیر ایله بوسفرلرده وقوع بولان رخاوت و فتورلرینه و بلا جنک و جدال عودت و فرارلرینه سبب ندر و اول بهارده ینه عسکر سوقنده و قسز فرار ایتملرینه نصل تدبیر اقتضا ایدر دیو

سؤال واستجواب بیورلمش اولمسیله قاتمقام پاشا وشیخ الاسلام افندی پادشاهمز
 جواب ایستر نه دیرسکز دیو او جاقلر اغلرینه وسائر ضابطان واختیارلرینه خطاب
 ایستکرنده عموماً دوام عمر و دولت پادشاهی دعواتی بعدالادا او جاقلر اغواتی جمله مز
 امر وفرمان پادشاهی به مطیع ومنقاز و عسکر اخراجی خصوصه هر بریمز سعی
 وغیرته قصور ایتمورز دیوب اقتضایدن اجوبه به مباشرت صدندنه ایکن بالاده بیان
 اولنان حقدان برقاج پیر نابالغ بر برینی تصدیق ایدرک جوابه آغاز ایدوب بهی جانم ایسته
 اردودن کلان مسلمانلر لله الحمد یکچری قوللری متریس متریسه شویله جنک ایستیلر
 وبویله جان وباش فدا ایلدیلر ماچینده وغیری محله بوزلمش وفرار ایتمش کیم واردر
 سویلسونلر امانه فائده حتی کتم ایستدکن صکره بویله اولور نه دیلم و بریسی دخی
 به جانم او قدر دو کشدک که حتی بنم بارودم قلمدی وشوقدر دشمن قیرلدی وبعده
 اعدایی محصور ایلدک دیوب بومقوله نیجه اصلی فصلی یوق مقالات سخیفه ایراد اولندقدده
 سائر استماع ایدن او جاقلو طاقی دخی سکوت ایله آنلری تصدیق کونه معامله اظهار
 ایتمریله روم ایلی قاضیعسکری تاتارجق عبدالله افندی ورئیس الکتاب رکاب هایون
 راشد افندی ووالده کتخداسی یوسف اغا مقابله ایدرک غالباً اغلرک وقوعاندن
 خبرلری یوق بویله اولمز تفهیم اولنسون دیدکدنصکره راشد افندی مناسب ایسه
 اردوی هایوندن کلان محضر ایله صدر اعظمک تخریراتی قرائت اولنسون دیدکده
 جمله سی مناسب کورمکین تخریرات مذکوره درمیان اولنهرق ابتدا بالاده مذکور
 اولان محضرکه عموماً وزرا ومیرمیران ورجال دولت علیه وبالجمله او جاق اغلری
 وقول کتخداسی وضا بطلرینک اهضا ومهر لرلیله مضی ومختموم ایدی جمله مواجه سنده
 قرائته مضمونی یکان یکان حضاره افاده وتفهیم اولنیجق جمله سنک نطقی طوتیلوب بر
 زمان متفکر ومتحیر قالدقلرندنصکره ینه ایچلرندن بعض سوز بیلور وخبر اکلار
 طورناجی و او طه بکچیلری عقللرین باشلرینه دوشوروب افندم بر ایشدر اولمش
 وکیتمش حق تعالی پادشاهمزک وجود هایونن خطادن محفوظ ایلیه نه چاره ایدلم
 واردوده اولان حالتی بزبوترفدن نه وجهله منع ودفع ایلیلم فی الحقیقه عسکریمزده
 اطاعت وانقیاد قلمدی لکن بوندن بویله چفتجی ورعایا مقوله سندن یکچیری
 یازلسون اهتام ایدلم دیهرک حقیقت حالی اعتراف ایلدکرنده تکرار سؤال پادشاهی به
 نه جواب ویره جکسز دیو او جاقلویه وقیودان پاشایه ودفتر دار افندی به وامنای
 سائر به خطاب وایسته پادشاهمزک مراد هایونلری معلوم اولدی فی الحقیقه طورله دن
 سنور قطعک طونه دن قطعدن فرقی ندر مسقولو بوخصوصه اصرار ایدوب اول
 بهارده سفر محقق اولیجق کلی تدارکه محتاجدر نه دیرسکز دیو استجواب اولنغله

جمله سی امر پادشاهکدر بزلر قوللری یز وسعمزده اولان غیرت وصدافتی صرف ایدرز قالدیکه اولدقجه صورت نظام وراباطه عسکریه نوجهله اقتضا ایدر ونیه محتاجدر واسباب لازمه سی ندر او جاقلو قوللری برآره یه کلوب بینمزده مذاکره واستشار ایله نتیجه آرا وتدابیرمنه ایسه پایه سریر اعلایه عرض واعلام ایدلم دیو سکبان باشی وسائر اوجاق اغالری جواب ویروب کذک امور ترسانیه ومصالح مهمات میریه به دائر اولان خصوصلر ایچون دخی قبودان دریا حسین پاشا وامنای سائره بووجهله جوابه ابنتدار ایتملریله مجلسه ختام ویرلمشدر .

بوصورتده ینه اعاده حرب طرفی غالب کورینوب حتی اول بهارده ادرنه صحراننده موجود بولمق اوزره اناطولیدن عساکر کثیره اخراجنه مأموریتی مشعر جبار زاده سلیمان بک وقره عثمان زاده لردن حاجی عمر اغا وبرادری حاجی محمد اغا باب آصفیه جبلله حضور قائم مقامیده هر برینه سمور کورکلر الباس اولتمشدر .

حالبوکه پروسیا وانکلتره کبی روسیه طرفنه اظهار عداوت ایدوبده دولت علیه ایله متفقاً حرکتلری مأمول اولان اوروپا دولتسلری دخی بروقتدنبرو تبدیل اصول ایدرک بروجه بالا دولت علیه به هان مصالحه ایتمک اوزره نصیحت ایده کلدکلرندن واردوی هایونک حالی ایسه کوندن کونه فبالشدیغندن دولت علیه به کوره صلحه رضادن غیری چاره قالماش اولدیغی جهته یاش مکمله سنک نتیجه سنه منتظر اولمق لازم کلشدر .

* یاش مجلسنک صورت مذاکره وقراری *

برنجی وایکنجی مجلسلرائشای مکمله ده تکلفات رسمیه نک رضای طرفین ایله برطرف اولمسی ورخصتنامه لک قرائتی خصوصلرینه مصروف اولوب ربیع الاولک یکریمی دردنجی کونی دفعه ثالثه اولمق اوزره عقد مجلس مکمله اولندقده صورت عهدنامه اولمق اوزره روسیه لولر اون ایکی ماده یی شامل برورقه اعطا ایدوب شامل اولدیغی مواد دروننده نهر قویانک اوتنه سنده ساکن اولان ملل واقوامک سربست اولملری وغرب اوجاقلری قورصالنلری طرفندن روسیه سفاینه تعرض اولندقده نتیجه لویه قیاساً واقع اولان ضرر وخسارک طرف دولت علیه دن تضمین اولتمسی منبدرج اولدقدن بشقه ماده مخصوصه اوله رق یکریمی درت بیسک کیسه تضمین آنچه سی مطالبه سنی حاوی برکاغد دخی ویرمش اولدقلرندن وبوماده لر ایسه اقدجه متارکه عقدنده وضع اولتان اساسدن خارج اولغله مرخص اقدیلر بونلرک مکمله سنه بیله کیریشه میوب مواد سائره نک مذاکره سنه مباشرت ایتمک ایستدکلرندن بونک اوزرینه بعض مناقشات جریان ایللمشدر .

ربیع الآخر یکرمی یدنجی پخشنبه کونی دفعهٔ رابعه اولمق اوزره مرخصلر مکالمه قوناغنده لدی الاجتماع برمنوال سابق روسیه لولر طرفدن اعطا اولنان عهدنامه صورتک برنجی وایکنجی ماده لری درمیان اولنوب برنجی ماده سی دفع خصوصته دائر اوله زرق الفاظ اوزرینه بعض مباحثات جریان ایتدکن صکره قرار ویرلمشدر . ایکنجی ماده معاهدات و سندات سالفه نک ابقاسنه دائر اوله زرق قریمک تصدیق سندی قریم وطمان وقوبانی دولت علیه روسیه یه الحاق ضمیمه منعقد اولان سند دیو مذکور اولوب مرخص اقدیلر ایسه روسیه یه الحاق اولنان قریمدر طمان دخی داخلدر ونهر قوبان حدود اتحاد اولمشدر . قالدیکه بزده اکا قریم سندی دیرلر عهدنامه ده دخی بویه جه ذکر اولنسون دیملریله بونک اوزرینه برخیلی مباحثلر جریان ایدرک نهایت قریم وطمان الحاقنی ونهر قوبانک حدود اولدیغنی مین سند دیو ذکر اولمق اوزره قرار ویرلمشدر .

بوندن صکره کراراً مکالمه او طه سنده بالاجتماع مباحثات و مناقشات کثیره ایله مواد سائره دخی تصحیح و تسقیح اولنوب سالف الذکر مواد ثلثه یعنی تضمین مصارف حربیه وقوبان و غرب او جاقلری ماده لری خارج از اساس اولمغله بونلره قرار ویریه میهرک سررشتهٔ مکالمه کراراً منقطع اوله درجه لرینه کشیدی . بناءً علیه مواد ثلثه مذکوره سردار اکرم ایله بوز بورودقو بیننده مخبره یه تعلیق اوله زرق بوز بورودقو طرفدن قولونل باروج سردار اکرمه کوندرلمشیدی اردوی هایونده دخی مواد مذکوره یه دائر برخیلی مباحثات وقوعبولوب نهایت غرب او جاقلری ماده سنده بعض تعییراتک اصلاحیه برابر مباحثات وقوبان طرفنده روسیه حدودینک عبارات قویه ایله تأمیننه موافقت اولنه جنی و تضمین ماده سی سردار اکرمک دخی وسعدن خارج ایدوکی جوابیه قولونل باروج یاشه کلدیکنده بوجوابه بوز بورودقو طرفدن اظهار رضا و موافقت اولنمیب خصوصیه تضمین مصارف ماده سنده کما فی السابق اصرار وبوکا موافقت اولنمدیغنی صورتده اعادهٔ حرب لازم کله جکی روسیه لولر طرفدن اظهار وحتى بوماده ایچون تکرار باروجک سردار اکرم طرفه کوندریه جکی تدکار اولنوب مرخص اقدیلره دخی بیانی یأس کشیدی .

جمادی الاولینک اون ایکنجی کونی اون اوچنجی دفعه اولمق اوزره مکالمه او طه سنده لدی الاجتماع غرب او جاقلری ماده سنه رابطه ویرلکد صکره قوبان ماده سی درمیان اولندقده روسیه مرخصلری بوماده یی تضمین مصارف ماده سنه ربط ایله مذاکره ایتمک ایستدکارندن بونک اوزرینه بعض مرتبه مناقشه اولندقدن صکره نهایت قوبان ماده سنه نقل کلام اولندقده چونکه روسیه مرخصلری اول امرده قوبان خالقنک

سر بیستی ادعا و بعد آن دن فراغتله قوبان نهرینک برو طرفده متمکن طوائفدن
 قارشویه مرور ایله خسارت واقع اولدوقده بر مقدار روسیه عساکری برو طرفه
 عبور ایله ایراث خسار ایدنلری تأدیب و عودت ایتملری صورتته تنزل ایدوب
 بوکا دخی برو طرفدن موافقت اولمندیغی جهتله طوائف مرقومه نك طرف دولت
 علیه دن تأدیبی و واقع اولان خسارک تضمینی صورتی نهایت تعدیل اولمق اوزره
 ایراد اولندیغدن ناچار برو طرفدن دخی موافقت صورتی ایما اولمغین روسیه ایکنجی
 مرخصی جنرال ریباں روسیه ترجمانی یا قولوف ایله برابر دیگر او طه ده نظارت ایله قاعد
 اولان بوز بورودقونک یانه کیدوب کلدیکنده ماده مرقومه قبول اولندیمی دیو سوال ایله
 جواب صریح مطالبه ایدوب برو طرفدن دخی مقبولدر دینلدیکی عقینده بوز بورودقو
 مکالمه او طه سنه ورود و بشاشته کلامه آغاز ایدرک ایمراطوریچه مصالحه ماده لرنده
 حدودینک تأمیننی مراد ایدوب طرف دولت علیه دن دخی موجب تأمین اوله حق
 حالاته مساعدده بیورلمش اولمقدن ناشی ایمراطوریچه جنابلری تضمین مصارف ماده سنندن
 کلیاً کجی و مصلحت خیریه بتدی تبریک ایدرم دیو اظهار انبساط ایجک مرخص
 افندیلر کشاکش داعیه تضمین ایله سر رشته مکالمه نك قیرلمسی اندیشه سننده ایکن
 هیولای مصالحه نك بو وجهله صورت پذیر نظام و ختام اولدیغنی کوردکاری کبی همان
 آنلر دخی تشکر سیاقده اظهار سرور و انبساط ایدوب بو وجهله مجلسه ختام ویرلمش
 و فرداسی ینه مکالمه او طه سننده بالاجتماع بو مجلس دخی عهدنامه نك مقدمه و خاتمه سی
 قراسته صرف اولنوب جمادی الاولینک اون بشنجی بازار ایرتسی کونی اون بشنجی
 دفعه اولمق اوزره مکالمه او طه سننده بالاجتماع سنندلر مبادله اولندیغی عقینده
 روسیه لو طرفدن طویلر انداختیله اظهار سرور و مصافقات ایدلمشدر .

برمنوال سابق روسیه لو طرفدن ذکر اولنان موادلئه تکلیف اولنوب قوبان ماده سی
 تأمین طریقله سر بیستدن قور تیله حق بر صورته افراغ اولمق امکانی تقدیرنده دخی
 تضمین آنچه سنندن روسیه لونک فارغ اولیه جنی و محاربه یه قدرت اولما مق حسبیه
 اشبو تضمینه بر صورت ویرلمکدن غیری چاره بولنیه جنی اردوی هایون طرفدن
 رکاب هایونه عرض وانها اولندوقده غرب او جاقلری نمچه معاهده سننه تطبیقاً
 اجراسی ایجاب مصلحتدن کوریلوب اما دیگر ایکی ماده نك و خصوصیه تضمین
 مصارف ماده سننک قبولی دولت علیه یه پک کران گلش ایدی . زیرا سفر لرتقر بیله
 خزینه ده درکار اولان مضایقه نك دفعی ایراد جدید تدارکنه موقوف اولدیغدن
 (۲۰۵) سنه سی خلالنده امتعه کمر کجیسی بولنان سلانیکلی حسن آغا اسهام کمرک
 حقدنه شهور قریه نك شهور رومیه یه تحویلی تقدیرنده سنه ده اون برکون تفاوت
 ایدرک قسط ایوم حسبیه بدل التزام کمر کدن اون برکون ایچون اوتوز بش

بيك غروش فضله ايجاب ایده جكنی عرض وانها ایتمین اولوجهله شهور قمریه رومیه یه تحویل بیور لمشدر . بوندن بشقه بو آوانده خرك هر قیه سنه ایکشر پاره و عرقك هر قیه سنه دردر پاره زجریه نامیله كرك وضع اولنوب بوسنه لك امانه اداره ایتدیر لمسی بالتسیب مومی الیه حسن اغا زجریه تحصیلداری نصب اولنوب مؤخرأ بعض طرفلردن رسم مذکور استكشار ایله بث شكوايه ابتدار اولدیغندن تصفیفه قرار ویرلمش ایکن بو وسیله ایله حسن اغا فقرای رعیتی اضرار ایدیور دیوینه اشتكا اولمغین اغای مومی الیه عزل اولندقدن صکره رسم مذکور دن ینه شكایتلر وقوعه مبنی هر قضایه بروجه مقطوع برر مقدار شی ربط ایله تخفیف اولمشدر حالبوکه مسکراته كرك وضعی (اول قاروره کسرت فی الاسلام) اولیوب (۹۹۴) تاریخنده سلطان مراد ثالث عصرنده دخی احداث اولمش بر کیفیتدکه ایران سفرلری تقریبیله میرییه مضایقه عارض اوله رق اداره مصارف ضرور یده عسرت بیدار اولدیغندن دفتردار وقت بولنان او یس پاشا ایراد جدید تدارکنه محتاج اولوب بالاخره خمر و عرقه اون بش آچه رسم وضع ایتدکه نوعا میرییه وسعت کلوب بودخی وفا ایتدیکندن جزیه اورا قه قرق بشر آچه ضم ایله دفع ضرورت مالیه قلمش ایدی . اشته مسکراته كرك وضعی مسبق بالامثال ایکن نیک و بد هر نه اولور ایسه اولسون یکدن احداث اولنان شیلره خاق اعتراض ایده کلدیکندن بوکره برمنوال سابق زجریه احداثده دخی بین الناس پک چوق قیل وقال تکیون ایلمشدر . لکن كرك مضایقه حالیه نك دفعی و كرك بوندن صکره اجراسی لازمه خالدن اولان نظامات جدیده نك اجراسی چون بعض حور مناسبه ایله ایراد جدید تدارکی ضروری الزوم اولدینی حالده شمدی بوتضمن آچه سی میدانه چیققدقه بیك بلا ایله تدارکی متصور اولان مبالغ روسیه لویه ویرلمك لازم کلهرك دولتک نظامات لازمه سنه دائرینه برشی پایله مامق لازم کله جکی خاطر ده سی والحاله هذه اردوی هایونك پریشانلغنه نظراً محاربه یه دخی اقتدار اولما مق ملاحظه سی سلطان سلیم خان حضر تلیینه پک زیاده تأثیر ایدوب حتی بوکا دائر یازدینی خط هایونده دولتک مصارفی ونظام حالی ایچون آچه تدارکی مشکل ایکن بوتضمن نره دن ویریه بیلور دولتک نظامی براغوب بوتضمنه آچه تدارکیله اوغرائمالییدر مسقوده قوت بزده ضعف طاری اولمسنه باعثدر باق شو سفر دولتک باشنه ندر کتوردی فائده ایده لم دیو آچدیلمر شمدی بو قدر ملک الدن کیتدی دولت وممالک بو قدر خسارته گرفتار اولدی والحاصل شو او یغونسزلقلر اولکیدن یوزقات زیاده اولدی همان حق تعالی حضر تلی بن قولونه مرحمت ایدوب شو دشمندن انتقام آلمسنی میسر ایله دیو بیورمش ایدی .

جمادی الاولیٰ غره سنده بو ماده ایچون قائم مقام پاشا و قپودان پاشا و صدور کرام و رجال دولت مجلس شیخ الاسلامیده بالاجتماع عقد انجمن مشورت ایستدکارنده دخی اشبو تضمین آچه سی اوزرینه پک چوق بختلر جریان ایدوب نهایت اعاده حرب اولندن ایسه اهون شریخی اختیار قیلندن اوله رق تضمین آچه سنک اعطاسی شقی ترجیح اولوب آنجق کچکی سفرده اعطا اولنان اون بیک کیسه تضمین آچه سی واردات دولتی اسهام ایدوب ویردیلمر بو تقریبله ایرادی مضمحل اتمک درجه سنه کتوردیلر بو اسهام ایجاددی پک زیاده مضر اولدی شمدی مطلوب اولان مقدارک تقلیل و تعدیلندن بشقه تقاسیط معتدله ایله تادیبه سنک چاره سنه باقلمسی واجبدر دیو بعض حضار طرفندن لدی ایراد بعضیلر دخی مسقولو بو تضمین آچه سی تعجیل اتمک کر کدر پک اوزون اوزادی یه تقاسیطه راضی اولماز ظن اولنور . هر فصله مسقولونک پک طوره جنی وقت تقاسیطک تکمیلنه دکر تقاسیطلر تمام اولنجیه دک لوازم سفریه سنی تنظیم ایله طاقوب طاقتدیروب دولت علیه اوزرینه کله جکنده شبهه یوقدر دیوب دیگر لری دخی بونی تصدیق و بو مصالحه اوچ بش سنه جک نفسلممزه وقت تحصیلندن عبارتدر کلامیله تأیید ایدرک مادامکه بو اوچ بش سنه نک ظرفنده دولت علیه اعمار مملکت و استراحت رعیت و تنظیم عسکر و تنیم لوازم سفر و تحصیل قوت اسبابنک استحصاله و مظالمدن عاری اوله رق توسیع خزینه یه کیجه و کوندوز اقدام ایلیمه معاذالله ثم معاذالله نتیجه کار فنا ایدوکی و نفسلنه جک وقت دیدیکمز اناطولی یقه سنه هجرت و انتقالز وقتی اوله جنی کونش کی آشکاردر دیملریله بونک اوزرینه بر خیلی مباحثه لر دخی جریان ایستدکنصکره برر برر حضاردن بو تضمین ماده سنده نه دیرسکز دیو جواب صریح ایستدکارنده صورت اعتداله تقاسیط معینه ایله تضمینک قبولی مستصوبدر دیدکارندنصکره ایشته مقتضای وقت و حالدر دینله رک بو تضمین ماده سی قبول اولندی لکن بوندنصکره طاور انلیبوب و نظام ملک شمدی یه دک اولدینی کی سوز ایله کجوب و مراعات خاطر و غرض و نفسانیت ایله امور دولت لایقی اوزره التزام اولنیبوب طور و حر کتمز بو یله جه قالور ایسه بو تضمین ماده سی و ضروری اختیار اولنان بو مصالحه کر یه معاذالله دولتک الدن کیمسنه سبب قوی اوله جنی کونش کی ظاهر ایدوکی و صکره ایش ایشدن کچه جکی شوکتلو افندمزه افاده واجبدر دول اوروپا دولت علیه نی حالت نزعه بر خسته یه تشبیه ایدیورلر ایلچیلری علناً بو یله سویلیور بز آلان درجه مزای بیلمیورز بونی بو یله جه بیلوب غرض و نفسانیت و خاطره رعایت داعیه لرینی ترک ایله نظام دولت نه مقوله تدابیر و اسبابه متوقف ایسه کیجه و کوندوز چالیشوب چبالامق فرضدر شوکتلو افندمزه

دخی بویه جه افاده اولنسون شرط صداقت حقیقت حالی بیلدیرمکدر
دیملریله بوقرار اوزره مجلسدن قالمشدر .

اول ائنده انکاتره سفارتی ترجمانی باب عالی به کله رک روسیه لو تضمین
آچیه سی ایستیورمش بزم مسقولو ایله رابطه ویردیکنز اساسده تضمین
آچیه سی یوقدر اکر دولت علیه بواساس اوزره صلحه راضی اولماز ایسه فیما
بعده بز مداخله ایتمیز دیو اکر چه مسقولو به سوز ویرمشیدک لکن دولت
علیه اساسی قبول ایتمدی بوصولته مسقولونک خارج از اساس شی طایب انکاتره لوی
مسقولودن سؤاله مجبور ایدر دیو غایت محرمانه اوله رق دیوان ترجمانه سویلمش
وبعده انکاتره وپروسیا ترجمانلری باب عالی به جلب ایله روسیه لونک بویه خارج از
اساس تضمین آچیه سی طلبنده اولدیغی افاده اولندقدده ایلچیلری طرفدن دولترینه
یازیه جنی وعد اولنش ایسه ده دول متوسطه به خبر کیدوب گلمی پک چوق وقته
محتاج اولدیغندن سفارتلرک بووعدلری دخی صدره شفا ویرمدیکندن وکلای دولت
بو بایده پک زیاده متحیر و مضطرب اولدقلری حالد برمنوال سابق بوز بورودقونک
تضمین ماده سندن کچمیسی پک زیاده موجب انبساط اولمشیدی .

روسیه لو ایله متارکه اولدیغی کبی بغداد ویوه ده لغنه فنارلو بکلرندن برینک اتخابی
تذکر اولمغه باشلامشیدی ایجاب حاله نظراً بکلک در سعادتده رکاب هایون ترجمانی
صاری بکراده ایله اردوی هایونده دیوان و مکالمه ترجمانی اولان قسطنطین بکراده
علکساندری بکه منحصر کبی اولوب صاری بکراده امکدار و رضاجوی و صداقتشعار
اولمسیله ارکان سلطنت سنیه دن پک چونغی آنک طرفه مائل اولدیغی کبی علکساندری
دخی جریزه لو و معلوماتلی و کار کذار اولوب بو جهته اکا مرجح کورندیکندن
بشقه زشتوی مکالمه سنده ترجمان بولنوب بو کره یاشده دخی مکالمه ترجمانی اولدیغندن
بوصورتله مظهر مکافات اولمسی شان عالی اقتضاسنددر دیو بعض ارکان دولت دخی
آنک طرفه مائل اولوب صدر اعظم دخی بو فکرده ایدی . لکن مملکتین بکلرینک
نصبده زیاده جه آچیه الیه کلر یکنندن برینی تخصیص ایتمک سسوء ظنی دعوت ایدوب
رشوت ماده سی ایسه سلطان سلیمک منفوری اولدیغندن صدر اعظم علکساندری
بکی تصریح ایده میوب فقط رکاب هایونه یازمش اولدیغی برقطعه تقریرینک خلاصه
مضموننده متارکه نک عقدی حسیه بغداد مملکتته ویوه ده نصب اولنق اوزره
احباب درایتدن ظمین و مجرب الاطوار و صداقتی مسلم و کرک شو آراقده و کرک
بوندرنصرکه تعمیر قلاع لوازماتی تدارکنده و مواد سائرده کندوسندن خدمت
مأمول و بغدادک بویاران و رعایاسندن اوان سفردده روسیه طرفه مائل اولانلر

ایه دولت علیه به صداقت ایدنلری تمیزه مقتدر برینک تعیین اولنمسنی اشعار
 و اوصاف مذکوردهن مرادی قسطنطین بکه تلمیح اولق مغناسنی قائم مقام پاشا
 استعمار ایلمش ایسه ده اودخی تخصیص بالذکر ایتمکه اجتسار ایده میهرک هان تقریر
 مذکوری سلطان سلیمه عرض ایله برینک ترجیحنی اراده سنیه به تعلق ایتمشیدی
 وقت و حالجه و موقعجه بغدادنک درکار اولان نزاکت و اهمیتنه منی بو خصوصی
 سلطان سلیم خان حضر تلی دخی بالذات اوزرینه آلمق ایستیمه رک ایکسندن
 برینک ترجیحنی قائم مقام پاشانک رأینه احاله و قائم مقام پاشا ایسه احتیاطکار
 بر ذات اولغله بویه مسؤلیتی آغر بر مادهنی یوکنمکه اصلا جسارتی اولمدیغندن
 اودخی بو بایده بلا تقیید اراده سنیه استحصاله مکرراً مراجعت ایدوب بو جهته
 مکرراً یازیلان تقریر لر و بالالرینه کشیده بیوریلان خط هایونلر زیرده (۱۳)
 اشارتیه تحریر اولنور .

ذکر اولتان تقاریر سامیه و خطوط هایون مطالعه سنندن معلوم اوله جنی و جهه
 نهایت سالف الذکر قسطنطین بکرزاده علیکساندری بکک و یوه ده لغنی ترجیح اولغله
 بر منوال سابق مرخصلر ینلرنده سنندلرک مبادله اولندیغنی خبری اردوی هایونه
 واصل اولدیغنی کبی علیکساندری بکک بغداد و یوه ده لغنی اجرا واردوی هایونده
 ترجمان و کیلی بولنان کوچوک قوندائی یوغاکی به دیوان هایون ترجمانلی توجیه
 اولغله کیفیت سردار اکرم طرفندن مرخص افندیلره تحریر اولغله علیکساندری
 بک سمور قلیاق و بول یکلو سمور کورک کیه رک و یوه ده لره مخصوص هیئت
 ایله مرخص افندیلرک قوناقلرینه و بعده ینه هیئت مخصوصه سیله بوزبور و دقویه
 کیدوب مأموریتی اعلان و اشاعه ایلمشدر .

مؤخر آکرک در سعادتدن و کرک پترسبورغدن تصدیق نامه لر کله رک جمادی الآخره نک
 اون یدنجی کونی مرخصلر بر معتاد مکالمه او طه سننده بالاجتماع تصدیق نامه لر مبادله
 اولندیغنی عقبنده طوب شنکری ایله اعلان مسرت صالح و صفوت اولمشدر .
 صورت عهدنامه ذیلده (۱۴) اشارتیه تحریر و علاوه اولنور . بوجه مشروح
 تصدیق نامه لرک مبادله سنندن صکره مرخص افندیلر قوناقلرینه عودت ایلدکارنده
 کندولرینه و معیت کاتبلرینه و کتخدا و مهرداد و سایر خدمه لرینه روسیه طرفندن
 هدیه لر کیشدر . مرخص اول افندی به کلان هدایا تخمیناً بش قیراطاق بر الماس
 یوزک و بر قوطی و بر طلوم سمور و بر صورق سمور دانه سی و بر طلوم قاقوم
 و مرخص ثانی بک افندی به کلان کدک تخمیناً بش قیراطاق بر الماس یوزک و بر
 ساعت و بر طلوم سمور و بر صورق سمور دانه سی و بر طلوم قاقوم و مرخص

ثالث افندی به بر ساعت و بر قوطی و بر طول و سمور و بر صورت سمور دانه سی و بر
 طول قاقوم و کاتب افندیله خرده الماس ایله ایشلمش بر کل یوزک و بر صورت
 سمور ایله مصرف اتباع نامیله بر مقدار آلتون و دیکر لرینک کیمنه بر کل
 یوزک و کیمنه قوطی و کیمنه ساعت هدیه لرندن عبارت ایدی روسیه مأمور لری
 ایچون در سعادتده دخی مقدمه هدایا ترتیب اولنوب شوپله که: بوز بور و دقویه
 بر عدد آغیر پرلانتیه یوزک و پرلانتیه ایله مزین اوله رق مع کوستک بر عدد ساعت
 وینه پرلانتیه ایله مرصع اوله رق مینا کاری بر قطعه آغیر آلتون قوطی و روسیه
 مرخصلرینه بر بردن متفاوت اوله رق اوچ عدد آغیر پرلانتیه یوزک و تر جانلرینه
 و سر کاتبلرینه و سائر اقتضایدلره توزیع ایچون او توز بیک غروش تصدیقنامه
 هایون ایله برابر کوندرلمش ایدو کندن در عقب مرخص افندیلر طرفندن دخی
 بوز بور و دقویه و روسیه ایکنجی و اوچنجی مرخصلرینه بر اسب طونادیلوب
 هدایای سائر ایله برابر وقایع کاتبی اولان سید محمد سعید غالب افندی واسطیله
 کوندرلمش و مقدمات جلب اولان هند و حلب و استانبول امته سی و انواع شالردن
 ترتیب اولان بر بوغچه ایله و رود ایدن آقهدن اقتضاسنه کوره درت بیک
 بشیوز و اوچیمیک بشیوز و ایکشیر بیک بشر یوز و ایکشیر بیک و بیکر غروش
 عطیه دخی مکالمه کاتبلرینه و بوز بور و دقونک کاتبلرینه و تر جانلره و مهماندار لک
 سر کرده سی اولان بولقونیکه ویرلمشدر .

بوز بور و دقویه کوندریلان یوزک کیمتی او توز بش بیک و ساعت و قوطینک اونر
 بیک غروشکه جمعا الی بش بیک غروش ایدی و باش مرخصه اولان یوزکک
 بهامی او توز بیک و ایکنجی مرخصه اولان یوزکک یکر می بیک و اوچنجی مرخصه
 اولان یوزکک اون بش بیک غروش ایدی .

روسیه باش مرخصی سامو یاقوف دولتی طرفندن در سعادت ایلیجیسی تعیین اولنمغه اقدیمجه
 پترسبورغه جلب اولنمش اولدیغندن تصدیقنامه نک حین مبادله سنده یا شده بولمدیغنه
 مبنی اکا اهدا اولان یوزک مرخص اول افندی طرفندن تحریر اولان بر قطعه مکتوب
 ایله کندویه ارسال اولنمق اوزره مرخص ثانی اولان جنرال ریباسه تسلیم اولنمشدر .
 بوندنصکره طرفیندن اسر انک ردینه مبادرت اولنوب چونکه مقدمات اوزی محافظتی
 ایکن اسیر اوله رق بعده حلول اجل موعود یله روسیه دیارنده وفات ایدن وزیر
 دلیر حامد حسین پاشانک حیاتنده یکر می بش بیک غروشی کندوسنه و بش بیک
 غروشی اوزی دفتر داری ایکن اسیر اولان ابراهیم افندی به و بش بیک غروشی
 سائر افراد اسرایه اولمق اوزره انکلتزه ایلیجیسی معرفتیه او توز بش بیک غروش

پترسبورغه پولیچه ایدلمش ایسه ده اول ائنده حسین پاشا سودا زده اولمغه مقبوض
سندی ویره مدیکندن مبلغ مرقوم تقسیم اولنه مامش و بو کره ختام مصاحتدن اقدجه
اسرای اسلامییه ایصال و توزیع اولمق اوزره طرف صدراعظمیدن اون بش بیک
غروش دخی احسان و مرخص افندیلر طرفه ارسال اولمش ایدو کندن ذکر اولنان
پولیچه مکتوبی پترسبورغدن جلب اولنوب بو اون بش بیکه علاوه ایله الی بیک
غروشه بالابلاغ روسیه مالکننده بولنان وزرا و میر میران و امرا و رؤسا و سائر
افراد اسرایه مناسبی وجهه تقسیم اولمق اوزره دفتری مومی الیه ابراهیم افندی یه
کوندلمشیدی و کرک ابراهیم افندی و کرک قید اسرده بولنان وزیر زینحلی حسن
پاشا و آخر وزرا و میر میران و رؤسای سائر دن بعضیلرینک مأموریتلری و باجمله
اسرای اسلامییه نک آردلرینی آمدجه کندولرینک حرکت ایتاملری بالتنسب اولوجه
کندولرینه تحریرات سامیه ارسال اولمشیدی بوندن بشقه اسرانک حین اخراج
و نقللرنده اولدجه لوازماتلرینک رؤیتی ضمنتده طرف دولت علیه دن دخی مؤخرأ
الی بیک غروش احسان بیورمغه اسرانک ممالک محروسه دن ورود ایده جکلری
محللره طرف طرف توزیع و ارسال اولمشدر .

بو مصالحه ده روسیه لومعهاهدات سابقه یی بقا و تأکید ایتدکن بشقه غرب او جاقلرینی
وقوبان نهرینک برو طرفنده کی طوائف طرفندن تعدی و قوعنده طرف دولت علیه دن
تضمین ضرر اولمسنی و تفلیس ایالتنه ایصال خسار اولنماسنی دخی معاهده یه درج
و نهر طورله دن حدود قطعیه اوزی و لواحقنی کندی مملکتلرینه الحاق ایلدی .
برمنوال سابق تفلیسه ایصال خسار اولنماسنی عهد نامه یه درج اولمش ایسه ده ارکلی
خان دائماً ایشنی ایکی طرفلی قوللانوب روسیه حمایه سنه استناد ایله برابر دولت علیه
طرفی دخی بتون بتون الدن براقیوب خصوصیه بوائنده روایت اولندیغنه کوره
روسیه لولرک برقاچ سنه نظر فنده قبارطای ایچندن کورجستانه آچمش اولدقلری
یوللرزلله و قوعیسه منهدم اولمش ایدو کندن روسیه عساکری شمدیکی حالد
سربستجه کورجستانه توارد ایده میوب طاعستان امراسی ایسه خفی و جلی دولت
علیه نک بر اشارتیه تفلیسه ایراث خسار ایده جکلری درکار اولدیغندن ارکلی خان
دولت علیه یه دخی اظهار خلوصدن خالی اولیوب عقیب مصالحه ده فیما بعد مسقولو
ایله قطع رشتة مناسب ایدرک خلوص بال ایله دولت علیه یه عبودیتده قصور
ایتمه جکندن بحاله کجا کان طرف دولت علیه دن مظهر عنایت و حمایت بیورلمق نیازینه
دائر مقام صدارته برقطعه عریضه یازوب بر معتبر آدمیه در سعادت کوندمشدر .
بدایت سفرده روسیه لونک بخارا طرفندن دخی اشغالی اراده سیله روسیه اوزرینه

چنگه تشویق ضمننده بخارا خانی سید غازی محمد خانه نامه هایون و اعتماد الدوله سنه
مکتوب صدر عالی یازیلوب وان طرفندن ایران طریقله کیتمک اوزره (۲۰۱)
سنه سی خالانده علمدار سید محمد اغا نام تاتار غیر تشعار نامه رس تعیین ویانه بر دیگر
تاتار ایله قولاغوزلق ایتمک اوزره بر نفر اوزبک کسنه ترفیق و ارسال اولمشیدی
رفیقلری جسارت ایده میوب اثنای راهده عودت ایتمشکن سید محمد اغا غیرت و ایران
طریقله صوب مقصوده عزیمت ایتمشیدی (۲۰۳) سنه سی خالانده بخارا خانی
طرفندن دخی محمد بدیع بک نام کسنه سفارته در سعاته کلوب بخارا خاننک بر قطعه
نامه سنی تقدیم ایتمشدر کرک نامه مرقومده و کرک بدیع بک باب عالی یه ویرمش
اولدییی تقریرنده روسیه دیارینه هجوم اولنمق اوزره همجدود بولنان قرغز
تاتار لرینه و قزاق خانلرینه بخارا خانی طرفندن او امر کوندرلش ایدوکی و طوائف
مرقومه اگر چه بخارا خانه تابع ایسه لرده کندولرینه مضر عد ایلدکلی موادده
دخی امرینه امتثال ایتمیوب مثلاً بودفعه واقع اولان امرینه امتثال ایله مملکت اعدایه
هجوم و اقتحام و ماللرین اغتنام ایتمک لرنده بعد المصلحه کندولرینه آلدیکنز اموال
و اسرانی رد ایدیکر بویله مقاله اولندی دینسه اطاعت ایتمه جکلری بیانیله مصلحه
وقوعنده بخارا اهالیسنک دخی صلحه ادخال بیورلمسی و فقط واقع اولان خسارک
یرینه کتورلمسی خصوصنده روسیه طرفندن اولنه حق تکلیفه قطعاً ملامشات اولنماسی
رجاسی مندرج بولنمشدر انحق استرداد اسرا شرطی اولمق سزین بخارانک صلحه
ادخالنه روسیه لونک موافقت ایتمک احتمالی اولدیغندن بومصلحه ده بخارایه دائر
برشی دینه مامشدر ایضاح ماده ضمننده بخارا خاننک سالف الذکر نامه سیله بدیع
بک تقریری ذیلده (۱۵) اشارتیه تحریر اولنور .

مومی ایله علمدار محمد اغا دخی کابل و کشمیر الکاالین طولاشه رق (۲۰۵) سنه سی
ذی القعدة سنک یکر می بشنجی کونی بر قطعه تیمور شاه نامه سیله در علیه به عودت ایدوب
سرکشتی سلفده کی سید علی حالنه شبیه اولغله قلمه آلمش اولان تقریرینک بر صورتی
ذیلده (۱۶) اشارتیه تسطیر قلنور . بزینه صدده کله لم .

برموال سابق تصدیق نامه لمبادلده اولندقدنصکره مرخص افندیلر جمادی الآخره نک
یکرمی دردنجی کونی یاش قصبه سندن حرکت ایله اردی هایونه عزیمت ایدوب انحق
مصلحت مصلحه نک ختاسی حسیهله ارتق اردوی هایونک شمنیده اقامتنه لزوم
قالمش ایدوکندن سردار اکرم دخی جمادی الآخره نک یکرمی یدنجی و شباطک
طقوزنجی بازار ایرتسی کونی اردوی همایون ایله شمنیدن حرکت وادرنه یه
عودت ایلش اولسیله مرخص افندیلر رجبک اون برنجی کونی ادرنه شهرنده
اردوی هایونه مواصلت ایتمشدر .

* اردوی هایونک شمنیدن ادر نهیه عودتده بعض سلاطین *

* تاآار ایله طاغلی اشقیاسنک ترتیب جزالری *

دلی اورمان طرفده ظهور ایدن حیدود سر کرده لردن ییلق و مچک نام شقاوت پیشه لر خیلی جمعیت پیدا ایدرک اطراف وانحایه ایصال خساره جسارت ایلدکرندن اقدمجه سبکان باشی و ساستره والیسی و طونه دو تنمسی باشوغنی احمد پاشا قول قول تعیین اولنه رق بر خلیسنی اعدام ایله رؤس مقطوعه لری اردوی هایونه و آندن در سعادت کوندرلمش و بر منوال سابق اردوی هایونک ادر نه جاننه عودتده یکن محمد پاشا و عثمان پاشا شمنیده ترک اولنه رق طونه یالسنده بولمان اشراز و اشقیانک دفع و تادیب لری خصوصی کندولرینه امر و سپارش بیورلمش ایدی اردوی هایونک شمنیه و رودنده دخی چونکه تتابع اسفار ایله روم ایلینک احوالی مختل اوله رق طرف طرف ظهور ایدن حیدود و خرسز لردن اهالی دوچار خسار و بعض محللری دخی سلاطین جنکیزیه نك نچه تسلط و تغلب رینه کرتار اولغین نظامنه تشبث اولنمسی سردار اگر مه وارد اولان خطوط هایونده مندرج اولدیغندن روم ایلیده واقع بعض قضبات و بلدانک سوز صاحب لری ادر نهیه جلب و احضار و بلده لرینک صورت نظام لری کندولرندن استفسار اولنه رق کیفیت تذکر و استشاره اولندقده طاغلی اشقیاسنک قهر و تدیبر لرینه و برمدن تبرو عبادالله اوزرینه مستولی اولان سلاطین جنکیزیه نك طرد و تادیب لری تشبث اولنمق اوزره قرار و یریله رک اجرائی ایجابنه ابتدار اولنمشدر . شویله که : قریم سلطان لردن یر کوکی وقعه سنده یارارانی ظاهر اولوب خدمت سابقه سنه بناء بعض اوضاع کستا خانسی عفو اولنه کشیکن نهایت کثرت مظالم و تعدیاتندن ناشی بوزجه آطهیه نفی اولندقده منفاسنه کیتمکن امتناع ایله اظهار عصیان ایدن جنکیز محمد کرای سلطانی شمنی حوالیسی اهالیسنی ایر کچی قوللانوب فوق العاده رنجیده ایلدیکندن بشقه فقرانک کدیمین و عرق جبین ایله وجوده کتوردکلری محصولاتی دلی اورمان حیدود لرینه و سیاست دولت علیه دن فرار ایدوبده کندوسنه التجا ایدن قطاع طریق مقوله لرینه یدر مکن خالی اولماسیله هر تقدیر کندوسنه نصیح و پند اولندی ایسه دخی اصفا ایتمدیکندن شمنی محافظی وزیر سید یکن محمد پاشا و اول حوالی اعیان لری کلیتو عسکر ایله اوزرینه تعیین اولنغین اول طرفدن فرار و قرق کلیسا جوارنده ساکن سلامت کرای سلطانک یاننده برمدت اختفا ایتمکد نصرکه چونکه اقدمجه بر تقریبه طرنوی اعیان عثمان افدینک قرینی آلمش بولندیغندن قرق کلیسادن دخی فرار ایله طرنوی به

كلهرك بر كيجه عثمان افنديك خانه سنده بيتوتت ايدوب انجق هر طرفدن اوزرينه
عسکر تعيين اولمش ايدو كندن اورادندخي فرار ايلمش اولمسيه سلامتكر اى
سلطان اقدمجه اخفا ايلمش اولديغندن آطه لردن برينه نقي اولمش وعثمان اغا دخى
بووسيله ايله اعدام اولنوب فى الاصل اصحاب ثروت ويساردن اولمسيه ضبط اموالنه
مأمور اولنلر جانب ميرى به جزئى شى عرض ايله كندولرى مالك دفينه اولمشدر .

روم ايلیده بولنان سائر تانار سلطانلرينك حالى دخى بومنوال اوزره اوله رق فقرايه
ايلدكلرى مظالم وتعدياتدن بشقه طاغلى اشقياسى وسائر قانلى وقاتل وحيدود
مقوله لرى كندولرينه التجا ايدرك اخذ وغصب ايدو كلكلرى اموال واشياني
سلطانلر ايله مناصفة بينلرنده تقسيم ايلدكلرندن آنلرك دخى برر برر دفع
مضر تارينه تشبث اولمشدر .

و چونكه ادرنه ايله سيروز وسلانك آره سنده كى غايت صرب وبرخلى عصات
واشقا ايله لبالب اوله رق مرقوملر يرلرنده راحت طور ميوب اطراف واكنافه
صارقديلق ايدو ككشلردر ايشته بونلرك دخى تاديبالرينه برمنوال سابق قرار
ويرلمكله بواننده اشبو طاغلى اشقياسى اوزرينه كلى عسکر تعيين اولنوب بر ايكى
محلده تصديق وطوب وخبره ايله جمعيتلرى تفريق ايدلمش واعيان مقوله لردن
واشقياسى مرقومه نك عونهنندن محبوساً الده بولنان ادريس و خليل اغالر ادرنده
صلب ايله سائر عبرت كوسترلمشدر .

بوخلالده نورى پاشا وصارى عبدالله پاشا وخيرالدين پاشا ومقداد وجوره زاده احمد
پاشالر دخى قتل وموره واليسى اسماعيل پاشانك وزارتى رفع اولمش ايدو كندن
بروجه آتى تفصيلاتنه ابتدار اولنور .

* نورى پاشانك اعدامى *

عينتاب اعينانى بطلال اغا زاده نورى محمد اغا (۱۹۶) تاريخنده برتقريله ميرلوا
و (۹۹) ده ميرميران اولوب عينتاب مقاطعه سى بروج مالكانه عهده سنده ايدى
عينتاب يكيچيريلريه منازعه دن خالى اولديغندن عينتاب اهاليسى كليس متصرفى
دالطبان زاده محمد على پاشادن استعانه وعينتابه دعوت ايتلميله او دخى (۲۰۳)
سنه سى خالنده كيتلو اتراك ايله على الغفله عينتابه كليچك نورى پاشا فرار
ودالطبان زاده عينتابه دخول ايلمش ايسده انك تعديسى نورى پاشادن ازيد
اوله رق (رحم الله النبش الاول) ديديرمش اولديغندن اهالى اتفاق ايدرك دالطبان
اوغلنى قتل ايله شردن خلاص اولمشلر ايدى . ليكن بومناسبتله نورى پاشا تكرار
فرجه بوله رق اجناس محتافه يي باشنه جمع وعينتابى محاصره وحلب طريقي قطع

واطراف و اکنافده نهب اموال و قتل نفوسه ابدالار ایتمکله غازی عزت پاشا زاده درویش عبدالله بك قوجیلر کتخدانی پایه سیله اعدام و ازاله سنه مأمور اولوب عساکر و فیره ایله اوزرینه حرکت ایتمشیدی لکن اولوقت مصر دن معزولاً اناطولی سورخیلیکیله اردوی هایونه مأمور اولان ککی عبدی پاشا اولحوالیدن مرور ایدر ایکن نوری پاشا کندوسنه دخالت ایدوب اودخی رای بیوردیسنی ویرمش و عفوینی در سعادته یازدقده کندوسیله برابر سفره کیمتک شرطیه عفو امری کوندرلمش ایدی عبدی پاشا دیار بکرده وفات ایدیمک نوری پاشا فرصتی غنیمت بیلوب همان عینتاب اوزرینه هجوم وزمره سادات ایله بالاتفاق یکچریلره مستولی اولهرق خانهلرینی احراق و ماللرینی یغما ایلمش اولمسلیله بونک اوزرینه طرف دولت علیه دن مؤاخذه اولنه جغنی جزم ایتمکین عینتاب قلعه سنی تعمیر و ترمیم و مهمات لازمه سن تنظیم قیدینه دوشمش ایدوکندن ایکییوز سنه سی اواخرنده حلب والیسی دیورکلی کوسه مصطفی پاشا اوزرینه مأمور اولوب اول خللالده ایسه حلب ایچنده فتنه و فساد ظهوریله اهالی پاشا قپوسنه هجوم ایتمکین طرفیندن برخیلی جنک اولندقدن صکره نهایت مصطفی پاشا حلب ایچنده طوره میوب خارج شهره خروج و اقامت ایلدیکی اوانده اشبو نوری پاشا غائبه سنک دفعی مأموریتی کندوسنه کیش اولسلیله همان عینتاب اوزرینه حرکت ویش آی قدر عینتابی محاصره ایتدکن صکره قلعه نک ذخیره سی قالیوب ایچرویه دخول میسر اولهرق نوری پاشا اخذو اعدام اولتمشدر .

ادیب افندی دیرکه بومقوله خائنلرک مقدمه اطوار نامهورلرندن درجه افساد و شقاوتلری بیلنلرک بونلرک و قتیله علاجی کوریلوب کرک وزرای عظام و کرک رجال دولت علیه بونلری تصحب ایله عبادالله تسلیط ایتمک کرک زیراملاک اسلامیه دره بکی نامنده تکون ایدن مخدولار وزرای عظام و کبار دولت و قرنای سلطنتک زیر حامی حمایتنه التجا ایله فرجه یاب ماعت اولوب رفته رفته هربری برر داهیة عظام اولورلر .

* عبدالله پاشا و خیرالدین پاشا و مقداد پاشانک اعدام اولندقلری *

اولکی جلدلرده بیان اولندیغی وجهله مرحوم جانیکلی حاجی علی پاشا اصحاب یسار و اقتداردن اولهرق ارضروم طرفنده کسب تحیز و تمکن ایتمش اولوب وفاتنده اولغلاری بطل پاشا و مقداد پاشا ایله کتخداسی صاری عبدالله پاشا آنک یرینه منظور دولت اولمشلر ایدی خصوصیه عبدالله پاشا لدی الاقتضا مواد جسیمه دهه استخدام اولتوق مطالعه سیله عهده سنه ارضروم و طربزون ایالتلری بروجه الحاق توجیه بیورلمش

اولدینی حالدہ بطلال پاشا روسیہ فرار ایدیجک اناپہ سرعسکرلکی عبدالله پاشا
 عہدہ سنہ حالہ ایلہ بران اقدام اناپہ یشمسی فرمان و بطلال پاشانک اوغلی خیرالدین
 بک جانب میریہ تیموز کیسہ آچقہ و یرمک اوزرہ پدیرینک مخالفاتی کندوسنہ ترک
 اولدقدن بشقہ عہدہ سنہ میرمیرانلق توجہیلہ جانیک حوالیسی ینہ بروجہ مالکانہ
 کندویہ احسان بیورلشیدی عبدالله پاشا ایسہ ایفای ماموریتہ استعجال ایتیمہرک
 بعض اعذار ایلہ ایاق سوریمکدہ اولدینی ائنادہ اناپہنک استیلاسی خبری وارد
 اولیجق اعدامنہ ارادہ سنیہ تعلق ایدوب عبدالله پاشا دخی ارتق بونک اوزر ینہ
 آثار غضب شہر یاریدن خلاص بولہ میہ جغنی تفکر ایدرک طربزون قلعه سنہ دخول
 ایلہ تحصن ایتشیدی لیکن طربزون ایالتی ینہ اولحوالی رجاندن قوغوزادہ سلیمان
 پاشایہ توجیہ و عبدالله پاشانک اعدامی کندوسنہ بامر عالی حوالہ وتیبہ اولتمش
 ایدوکندن سلیمان پاشا کندو عہدہ سنہ طربزونک توجیہ اولدینغنی تصریح ایلہ
 طوعا و کرہا قلعه دن اخراج اولنہ جغنی عبدالله پاشایہ تلمیح ایلدیکنہ بناء
 عبدالله پاشا ناچار منصبی اولان ارضرومہ کتمک اوزرہ طربزوندن خروج
 ایتدکدہ سلیمان پاشا طرفندن درمین قلتمش اولان عسکر سد راہ اولہرق عبدالله
 پاشانک ایشی بتورملریلہ کرک کندوسنک و کرک هوادارلرندن و طربزونک اسکی
 سرکشلرندن فالجی اوغلی ابراہیم اغا نام کسنہنک سرمقظوعلری درسعادتہ
 ارسال اولتمشدر .

جانیک وقرہ حصار شرقی حوالیسی اوتہ دنبروعلی پاشاخاندانک یدتغلب و تساطلرندہ
 اولہرق اہالیسی کندولرینک اسیرلری حکمنده ایدی آنجق مومی ایلہ خیرالدین
 پاشانک قوہ عسکر یہ سی اول حوالی اہالیسی بویلہ تحت تحکمہ طومتغہ
 وافی اولدینغدن اہالی بالاتفاق پاشای مومی ایلہ اوزر ینہ هجوم و اقتحام و او دخی
 مدافعہ یہ قیام برلہ دائرہ سی خلقدن و متعلقانندن بک چوغنی مقتول و کندوسی
 دخی برطرفدہ محصور قلمش ایدوکی خبری درسعادتہ واصل اولدقدہ سینوب
 محافظی سلیمان فیضی پاشانک خیرالدین پاشای اہالی یدندن تخلیص ایلہ مقام امارتہ
 اقعاد ایتسی بامر عالی کندویہ اشعار اولتمش ایدوکنی اہالی مرقومہ استماع ایدیجک
 سوز آ کلیانلرندن برقاچ کشی درسعادتہ کلہرک خیرالدین پاشانک مظالم و تعدیاتندن
 بٹ شکوی و بوخاندانندن دولت علیہ یہ خیر کبز دولت علیہنک ادنی بر بندہ سی
 جانیک طرفتہ کلورسہ اہالی انقیاد ایدرک کاملاً مال میری بی ادا ایدہ جکر نندن بشقہ
 خیرالدین پاشانک تعہد ایتدیکی اتی یوز کیسہ پی دخی طیب خاطرلہ اعطا ایدرلر .
 لیکن بوخاندانندن کسنہنی ایستمز لر دیو تأیید مدعا ایتلریلہ درکاہ عالی قپوجی

باشیلرندن سابقاً قهریس محصلی اولوب رعایا پرورلک ایله معروف اولان حاجی عثمان اغا عهدده سنه خاصه سلحشورلنی و میراخورثانی پایه سیله جانبک محصلنی و قره حصار شرقی و یوه دهلنی توجیه اولنوب بعده خیرالدین پاشا دخی اولطر فده اعدام ایله سر مقطوعی در سعادت ارسال قلمش و متعاقباً فلهده مرفوع الوزاره مقیم اولان عمیسی سالف الذکر مقداد پاشا دخی اوراده اعدام اولمغین خیرالدین پاشانک سر مقطوعندن چند روز صکره مقداد پاشانک دخی باشی در سعادت کله رک باب هایونه وضع اولمشدر .

بوصورتله علی پاشا خاندانی بیانی منقرض اولوب فقط خیرالدین پاشانک کوچک برادری طیاربک قلمش ایدی که مؤخرآ رتبه وزارته بکام اولان مشهور طیار پاشادر خیرالدین پاشا راغب تلخیص ایدوب کوزل اشعاری واردر بوغزل دخی آنکدر .

درد دله جوینده داروی شفایز * دفع غمه نوشنده صهبای صفایز
بر لحظه تپی اولمیوز آلام کدردن * کور حکمتی پر کیسه دینار غنایز
صهبا ایله آهر ایوب اوراق درونی * لوح دلی شوینده چرکاب ریایز
نه طاق فلک قدریمزه پایه بستدر * بز کابرا عن کابر عرق وزرایز
ترکیمز اولمغله مکارمله مرکب * معجون زرز علت افلاسه دوایز
شایان اوله ماز بز مزمه زمرة خوبان * بز راغب عرفان و محب علمایز
خیرالدین پاشانک بوغزلی برادری مشار ایله طیار پاشا تخمیس ایشدر مراد اولنورسه دیوانه مراجعت اولنه .

* جوړه زاده نك اعدامی *

جوړه زاده احمد پاشا کوتاهیه ایالتده واقع چقالی عشیرتندن برفرقه ضابطی ایکن سفر سابقده قپوچی باشی اوله رق کسب حیثیت ایدوب بعده اناتولی والیر ایله وقت بوقت مجادله و معارضه به جبارتندن ناشی قتلی اراده اولمش ایکن بر تقریبه اول ورطه دن تخلیص کر یسان ایدرک بوسفر وقوعنده میر میرانلق ایله اسکداره لدی الورود آلاینی تماشا ایدنلر وزارت اهل اولدیغنی تسلیم و تعریف ایدوب کیندوسی دخی اطوار لوندانه صاحبی بر مرد ظریف اوله رق ضرب نطقیه بعض کیمسه لری جلب و تسخیر ایله رتبه وزارتی تحصیل ایش ایدی . سفر لرده بحکمة الله تعالی بر خدمته موفق اوله مدقن بشقه مأمور اولدینی محللری تاخت و تاراج و فقرا و رعایای ازعاج ایلدیکی مسموع پادشاهی اولمغله او دخی بوخلالده اعدام اولمشدر .

ادیب افتدی دیرکه سخاری و جبالده سرسری کشت و کداره مألوف اولان یورک مقوله سنک انجامکاری بو یله اوله جنی ظاهر و بیدار ایکن دفعه و بلا موجب انتهای

مراتب عثمانیه اولان رتبه وزارت آکاشایان کورن کارفرمایان دولت علیه یوم جزاده مسئول و معاتب اوله جقلمی بی اشتباهدر زیرا بودفعه وقوعبولان سفر هایون مناسبیله کانه تقویة بازوی اقتدار اولور داعیه سیله نیجه فر و مایه لر رتبه والای وزارت حاز او ملر یله قدر و شان وزرای عظامی بر باد ایدوب و هیچ بریسندن بر خدمت نافعہ دخی صدور ایتیموب هر بری ظلم و ستمله عالمی خراب ایتمکدن غیرى عمله یازامدقلمی مشهود انام اولمشدر .

* اسماعیل پاشانک رفع وزارتى *

جزائری حسن پاشا کتخداسی ایکن عهده سنه رتبه وزارت توجیهیله مصر والیسی وبعده مورہ والیسی اولان اسماعیل پاشانک مورہ اهلایسنه کثرت ظلم و تعدیسی مسموع پادشاهی اولغین وزارتى رفعله اینه بولیده قلعہ بند قنوب اموال و اشیا سنک ضبطنه دخی مامور مخصوص کوندرلمش و خزینہ یه اولان ایکی بیک یوز قرق کیسه دینی ادا ایلر ایسه عفو و اطلاق اولنه جفی طرفه اشعار بیورلمش ایدی انجق کندوسنک تونس طرفنده علاقه کایه سی اولمسیله موجود و مدخری اولان اموالک برانخی تونسہ ارسال و برانخی دخی عن اصل اخذ و اعطاسی اولان افرنج تجارینسه تودیع و تسلیم ایلمش اولدیغنه مبنی ملحوظ اولان اموال کثیره دن برشی بولنه مدیغندن محبسده ابقا اولمشیدی هرصل ایسه برارالق اولطرفدن طوسقانه یه فرار ایدوب برمدت مرورنده نمچه ایمراطوری طرفندن عفو یله ابقای وزارتى التماس اولندقدہ قریب العهده عقد مصالحه ایدن بر ایمراطورک خاطرینه رعایت لازمه روابط صلاح و مسالمت اولدیغی مثللو وساطت اجنبیه ایله رتبه و مأموریت و یرمک دخی استقلال عالی سلطنت سنیه یه منافی ایدو کندن توسط بین الامرین طریقته کیدیلهرک اسماعیل پاشانک اعدامندن فراغت برله ممالک دولت علیه دن بر محلدہ مرفوع الوزاره اوله رق اقامت ایلمسنه رخصت و یریلوب کیفیت نمچه دولتی طرفندن کندوسنہ بیان اولمش ایسه ده ینه اعتماد ایده میوب اول حوالیده قرار ایله منتظر انجامکار اولمشدر .

* بعض وقایع استانبول *

تابع اسفار ایله طشره لر بر منوال سابق ظهور ایدن حیادید و اشقیادن خسار دیده اولدیغی کبی درسعادتنده دخی اسمعراک غلاسی حسبیله خلق مضطرب اولوب حتی اوائل سفرده حنطه نك هر کیل استانبولسی سکسان یاره یه ایکن ذخیره نك قاتی حسبیله مؤخرأ اوج غروشه نرخ و یریلوب ینه بولنماز اولدیغندن نهایت هرکس ذخیره سنی کتوروب آستانه سعادتده دیدیگی کیسه یه دیدیگی بها ایله

صانسون کیمسه مانع اولمز دیو طشره لره اوامر علیه نشر اولنمشیدی ایشته بو صورتله استانبول اهالیسی دخی ایام حریدن حصه دار کدر واضطراب اولمش ایدی بوندن بشقه غوائل سفریه حسیلله در سعادتک امور ضابطه سنه و متوار دینک صفات واحوانه دقت و تقید اولنه مدیغندن درلو مزور لر و طولاندر یجر و نیجه ساعی بالفساد اولان اشخاص ظهور یله سکنه دار السلطنته ایراث خسار و مضر تدن خالی اولمز لردی از جمله غرابدن اوله رق تحت القلعه جوارنده ساکن و متأهل مغربی حاجی محمد نام شخص قلاشک تحت القلعه ده مکلف و معنون سکناسی و خیلی غلمان و جواریسی و ذیقیمت البسه و اشیاسی اولدینی حالده دائمًا اوراد و اذکاره مداومتله مشهور و فقرا و غریبا به حددن افزون اکرام و انعام ایله مذکور اولدقدن بشقه احیانا اوچر بشر التونلق سبیکه لری ریخته قلب احتیال و بر طاق ساده دلانی اغفال ایدردی بومقوله ساعی بالفساد اولان شیاطین انسک و قتیله تر بیهری لازمه ذمت حکومت ایکن مرقوم حقنده بالعکس هر کس حسن ظنله خطا ایلمش اولدینی صکره دن میدانه چیقمشدره شویله که : مغربیء مرقوم معتبران صرافاندن والده خاندنه ساکن ایکی نفر ارمنی صرافلره بر تقریب ایله فریب ایله مقارن اوله رق کیمیا کرک فنده مهارت تامه سی اولمق اوزره تمام اعتقاد و اعتماد ایتدیرد کدنصکره بر قاچ سنه ظرفنده بالتدریج لطائف الحیل حکیمانه ایله ایکسنی دخی افلاسه چقاروب کندی ماللری اوله رق اوچ بش یوز کیسه لری تلف اولدقدن بشقه اوچ یوز کیسه یه قریب شونک بونک مالی دخی باتیروب اشبو (۲۰۶) سنه سی خلاننده ایکسنی بردن اعلان افلاس ایتدکلی ائساده مغربیء مرقوم دخی فرار ایتمکین اصحاب حقوقک استدعاسیله مرقوم لر حبس ایله لدی الاستنطاق آله جقلولره خطاباً بی پروا جوابه آغاز ایدرک به جانم حقکزی مطالبه ده بوتهالکه سبب ندر قریب العهدده افدمز کلسه کر کدر مالکزی گذشته سیله آلورسکز دیدکلر ندن بشقه بعضاً کندولریله مخفیجه صحبت ایدنلره مغربیء مرقومک بالدفعات قزغانلر و کبیر ظرفلر ایله مملو مسکوک و سبیکه اوله رق نیجه یوز بیک کیسه لک آلتون کوسترمش اولدینغی و دهانیجه نیجه خارق عاده وقوعات ناشیده سنی بیان ایله برابر هیچ اویله ذاتک بزم آنچه مزه نه احتیاجی اوله بیلور و بو دفعه غیبو بی دخی مجرد فلان محله مدفون اولان خزائن یشمارک مفتاحنی کشف و حصوله دائر لازمکلان عزائم حقنده دیار مغربده فلان نام عزیزدن مأذونیت تحصیل ایچوندر دیملریله قلاش مرقوم حقنده بو ارمنیلرک بو درجه لرده اعتقادلری و اول ملحد بی انصافک دخی بو مرتبه ده ملغتی محیر ارباب عقول اولمشدر .

وینه بو خلالده و قوعیافته اولان غرائب حادثاتندر که سنه مرقومه ربیع الآخرینک
 یکر منجی جمعه کونی سلطان سلیم خان حضر تلی ایاصوفیه کبیره سلاملق ایدوب
 محفل هایونه صعود و نشیمنگاه ملوکانه لرنده قعود بیوردقلرنده صدر محراب جامعه
 موجود اولان جماعت ایچنده بر نفر مجهول الاصل مغربی اولوب ستلر ادا اولنورکن
 همان اول مجذوب بی ادب جیندن بر تیمور مسکت کله سی چقاروب ترکیه بیلمدیکندن
 کندی لسانی اوزره کاآنه اشتکا و نظم صورتنده بعض هذیانلر ایدرک کله بی قفس
 هایونه طوغری آتدقن صکره بر دیکرینی دخی آتمق صدنده ایکن ضابطلر طوتوب
 جامعدن اخراج ایدر ایتمز ترتیب جزاسی امری دخی طرف شاهانهدن واصل اولمغین
 همان سرای میدانده بوینی اوریلوب کله ایله وجود عالمسود هایونه کزند و خسار
 قیدنده ایکن کله سی غلطیده میدان مجازات اولمشدر .

فی الاصل استانبولده صولرک قلتدن ناشی اکثر ناس توطنه رغبت ایتمز ایکن سلطان
 سلیمان خان حضر تلی قرق چشمه صوینی اجرا ایتدکدنصرکه خالقک استانبوله مهاجه
 و مزاحه سین کور یجک تجمع ایده جک نفوس کثیره نک لوازم ضروریه لرینی تدارک
 دولته بر بار کران اوله جغنی در پیش ایدرک ماء مزبوری استانبوله اجرا بیوردقلرینه
 نوعاً ندامت اظهار ایلدکلری بعض توار یخنده مذکور در حالبوکه اولوقته نبرو استانبوله
 کلی خلق تجمع ایدوب خصوصیه صکره لری طشره لرده مظالم و تعدیات حددن زیاده
 و استانبولده قولایقله کچمک قبولری کشاده اولمغین هر طرفدن اهالی در سعادت توارد
 و توطنه رغبت ایدرک رعایادن نیجه لری زراعتی ترک ایله فوج فوج در سعادت توارد
 ایتدکلرندن اراضی خالی قاهره ق طشره لر خراب اولدینی مثللو در سعادت دخی
 جمعیت بشریه تکثر ایدرک و کلای دولت علیه نک اوقاتی در سعادت سکنه سنک ذخائر
 و لوازماتی تدارک داعیه سنه محصور اولمغین امور مهمه نک تعطیلنه بادی اولدقن بشقه
 بونجه ناسک اجتماعی نیجه مفاسد و مکارهک و قوعنه بادی و حریق و سرقت مثللو
 خساراته مؤدی اولوب انجق اوتهدنبرو اوج سنه ده بر کره اسواق و دکانین و امکانه
 مساکین تفتیش اولنهرق بومدت طرفنده وارد اولان اشخاص مملکتلرینه اعاده اولنور
 و اولاد و عیاللریله در سعادت نقل خانه ایدنلری منع ایچون مسالک و معا برده بولنان حکام
 و ضابطانه اوامر علیه ارسال اولنهرق تقایل نفوس ایله فی الجمله تحصیل رفاه و آسایش
 قانور ایکن برمدت نبرو بو عادتک متروکیتی آستانه سعادتک ازدجامنه و بوجهته انواع
 مفاسدک ظهورینه سبب اولمقده ایدوکنه مبنی فیما بعد بو اصولینه مرعی الاجرا اولوق
 اوزره سنه مرقومه خلالده نقل خانه ایدنلرک ممنوعیتی ضمننده اطرافه مجددآ اوامر
 علیه ارسال و در سعادتده طرف طرف مأمورلر تعیینیه خانه و دکانلر و بیکار اوطلری

یوقلانہرق اصحاب صنعت و حرفت اولنلر کفیلہ ربط ایہ ثبت دفتر و کفیلی اولمیانلر و لزومندن زیاده بولنان بعض جمال و قیاقچی و دکان شا کر دلرینک کفیللری دخی اولسه او مقوله زائد اولنلرک کفیللرینہ اعتبار اولنمیوب جملہ سی مملکتلرینہ ارسال اولندیغی مثلاً و طرف شیخ الاسلامیدن استانبولک درون و بیروننده واقع بالجمله مدرسہ لره و تکیہ لره آدملر تعیین اولنوب آنلرک سکنہ سی دخی یکدیگرہ کفیل اولہرق قید دفتر و مجهول الاحوال اولنلر کذلک طرد و تبعید قلمش و بعدہ الی آیدہ بر کرہ بو وجهلہ استانبولک تفتیش اولنسی نظامہ ربط اولنمشدر .

سنہ مرقومہ صفر نندہ بار و تخانہ دائرہ سی داخلندہ و باروت مخزنلرینہ قریب محلہ حریق ظہور ایدوب انجق قورقولان درجہ لردہ خسار و وقوعہ کلمکسزین باصدیر لمشیدی بونک اوزرینہ فیما بعد بار و تخانہ داخلندہ اخشاب ابنہ بولنمیوب کافہ سی کارگیر اولہرق یادیلمسی نظام اتخاذ قلمشدر .

غلطہ مولویخانہ سی دخی خرابہ یوز طوتدیغندن تکیہ مرقومہ دہ پوست نشین ارشاد اولان شیخ غالب افندی انشاد ایلدیکی قصیدہ طنانہ سی برقطعه عریضہ سنہ لفاً باب عالی یہ تقدیم ایدوب مقام آصفیدن دخی رکاب ہمایونہ عرض اولنمغہ فی الحال بناسی ارادہ بیورلمغین آز وقت ظرفندہ رسیدہ حسن ختام اولدقدن فضلہ عن اصل تکیہ دہ ماء لذید اولیوب بو کرہ رئیس الکتاب محمد راشد افندی محل بعیددن اجرا ایلدیکی آب نابی سلطان سلیم خان حضرینہ اهدا برلہ

* قطعه *

اهدیت للملک الملوک و اما * اهدی لہ ماخذت من نعمائہ

کالجرحی مطرہ السحاب و مالہ * من عایہ لانہ من مائہ

مضوتی زبان آور حسن مقال ایلمشدر .

شیخ غالبک تکیہ بناسنہ انشاد ایلدیکی تاریخدر .

لفظا و معنی دیدی تاریخنی شیخ غالب عبد داعی قدیم

یادی بودرکاهی پاک و ہم جدید بیک اکیئوزالتیدہ سلطان سلیم

شادروان ایچون سویلیدیکی تاریخدر .

دیدم تاریخنی بو شیوہ ابدال ابہ غالب * بوآ پاک زیبایی ایچن عطشانہ عشق اولسون تکیہ دہ اولان محفل ہمایون تاریخنی .

مسلم شهنشین پادشاهی

سلطان احمد مدرسہ سندہ ساکن طلبہ علومدن عینتابی عینی افندیکن تکیہ یہ انشاد ایلدیکی تاریخدر

كلوب كوش ايله نیدن و مبدم اسرار تاریخی * نفسله دوندی عدن آباده یا هو مولویخانه رجب شریفک اون التیجی کونی قپودان دریا کریدلی حسین پاشا عزل ايله مسقط رأسی اولان خانیه محافظه سنه تعیین اولوب یرینه عهد جوانیدنبرو پرورده نظر اکسیر اثر جهانبانی اوله رق جلوس هایوندن صکره باش چوقدار اولان حسین اغارتبه والای وزارتله قپودان دریا اولدی . ایشته کوچک حسین پاشادبو معروف اولان ذات بودر مقدا پروسیا قرالی جنکه تشویق ایچون سفارتله برلینه کوندرلش اولان احمد عزمی افندی بو اوانده عودت ايله شعبانک یدنجی کونی در سعاده مواصلتنده کشت و کذار ایلدیکی بلاد واقطاری و کوردیکی عجائب آثاری درج و تسطیر و دولتجه اجرایی لازم کلان موادی اخطار و تذکیر ضمننده برقطعه سفارتنامه تنظیم و سلطان سلیمه تقدیم ایتشدرکه صورتی زیرده (۱۷) اشارتیه تحریر اولنورایکی کون صکره اردوی هایون دخی در سعاده واصل اوله رق نظام دولت مطالعانه ابتدار اولمشدر .

* اردوی هایونک در سعاده عودتی *

برموال سابق روم ایلی احوالک تنظیمی ضمننده برمدت سردارا کرم ادرنده اقامت ایدوب بعده صادر اولان اراده سنیه اوزره رجب شریف او اخرنده اردوی هایون ادرنده حرکت ایدرک شعبانک طقوزنجی و مارتک یکریمی برنجی بازار کونی کوچک حکمجه ايله ایخیرلی میاننده واقع اوزون کوپری صحر اسنده نصب خیام و فر داسی ایخیرلی صحر اسنده نصب اولنان چاردر لرده تنفس و آرام اولدقدن صکره الای و الایله حرکت اولنهرق داود پاشا ايله ایخیرلی آر سنده سلطان سلیم خان حضر تبری سنجاغ شریف نبوی بی کمال تعظیم و اجمال ايله استقبال ایدوب بعده لوای شریفی پیشوا ایدرک داود پاشا سراینه تشریف و سردارا کرمی مخاطبات ملوکانه و تشریفات شاهانه لریله تلطیف ایتد کدن صکره سوار سمند اقبال و دولت اوله رق سرای هایونلرینه عودت بیوردقلرخی تعقیباً سردار اکرم دخی الای ايله سرای هایونله کلوب یدای بیو لوای شریفی دست سعادت پیوست خلافتیناهی به بعد التسلیم باب آصفی به ورودنده دیوان یرنده عموم خلعتلری الباس اولمشدر .

غوائل سفریه بوضورتله برطرف اوله رق فیابعد اصلاحات لازمه و نظامات جدیدیه به تشبث اولتق مصمم اولدیغندن اول امرده البسه نظامنه صورت و یرلشدر چونکه برخیلی وقتد نبرو عدم اهتمام ايله امور دولت مختل اولدینی مثلثوزی و قیافت خصوصاً لرده دخی ناسک و وضع و شریفی یکدیگر نندن فرق و تمیز اولنهمیه جق درجه به کلهرک و زرای عظامه مخصوص اولان ذیقمت شمور نافه سی و طونلق و رضایی شالاری و الماس یوزک و خنجر و بچاق و مرصع ساعتلری خدمه و اصناف مقوله لری استعمال و الماسلو

خنچری اولیان خدمه پی افندیلری استئقال ایدر اولدقلرندن هر کس قدرتی یتیمز ذکر اولنان البسه و تزیناته هوس ایتمکله عامه ناس افلاس درجه سنه واروب بوصولت ایسه برنیجه کیمسه لک طریق ارتکاب و ارتشابه صامسنه بادی و بو طریقیله هندستان و فرنگستانه خزان کایه کیدرک ممالک دولت علیه ده نقودک قلمته مؤدی اولدینی اجلدن فیما بعد خدمه دولت علیه و ارباب مناصب دیوانیه نیک ارکان کورک کینلرندن ماعدا کتبه و خدمه و اهل سوق و اصنافدن هر کیم اولور ایسه اولسون سمور و واقم و وشاق و شال قوشاق و هندی لباس و انواع چیچکلی قماش استعمال ایتماک و علمای فحاح حضراتدن استانبول پایه سنه و خواجکان دیوان هایوندن مناصب سته اربابنه یعنی ریاست کتاب و دفتر دارلق و نشانچلیق و شق ثانی و ثالث دفتر دارانی و دفتراماتی مناصب جلیله سی اصحابنه کلاجه قوجی باشلردن ماعداسی ایچی صندالی بنش و جبه تلبس و کرانجه مجور ساعت و الماس یوزک و خنچر استعمال ایلمامک و نسا طائفه سی فیما بعد انکلیز و انقره شالیسندن فراجه کسیدیرمامک و الحاصل هر کس حدندن آشوری اسرافاتدن اجتناب ایلمک باینده صادر اولان اراده سنیه موجبنجه تنیهات اکیده اجرا اولمش و هر سنه رمضان شریفده اندرون هایونه تقدیم اولنان عیدیه و هدایا و علمای اعلامه و کتبه افلامه صدر اعظم و کتبخدا بک و دفتر دار افندی و رئیس افندی طرفلرندن ویریه کلان ساعت و بوغچهلر مصارف کثیره نی موجب اوله رق ایراد طبیعی ایله قیادینه میوب نیجه کیمسه لری طریق ارتکابه سوق و الحالیده کلدیکندن جمله سی الفا و فقط بعض مناصب جسمه دن رکابیه و صدر اعظم طرفنه ویریلان جوآز قدیمه ایقا و ایالات و الویه و مناوبه مناصبک جائزه لری دخی تحملمارینه کوره تنزیل قلمه شد .

بوخلالده جزائر بکلر بکیسی طرفندن وهران نام قلعه نیک مفتاحی در سعاده کش اولسلیله تفصیل حاله ابتدار اولور شویله که : اقدجه جزائر بکلر بکیسی محمد پاشانک و فاتنده جزائر دایلیغنی احراز ایتمش اولان حسن بک ایالت جزائر حکومتسک منشورینی تحصیل ایچون عتبه علیه ملوکانه یه و سائره عظیم هدایا ترتیب و جزائرده یالی و کیخرجی تعبیر ایتدکلری ترسانه امینلری اولان سیدی علی قیودان ایله تقدیم ایتمکین خلال ربیع الاولده در سعاده وارد اولدقده حسن پاشا عهدسنه جزائر بکلر بکیلیکی براتی احسان بیورلمش و معتادلری اوزره دولت علیه دن مطلوب ایلدکاری طوب و جبه خانه و مهمات سائره دن بشقه چند قطعه سفائن کبیره دخی کوندرلمش ایدی سلطان محمود اول عصرنده اسپانیالورک استیلا ایتمش اولدقلری وهران قلعه سی جزائر لور ایله اسپانیالونک و قوعبولان مصالحه سننده شرطه داخل اولیوب معلق

و مستثنا اولدیغنه مبنی بود دفعه علی الغضله جزائر غزاتی قلعه مزبوره بی محاصره و تسخیر
ایتلریله مفتاحی حسن پاشا طرفدن بو ائتاده در سعادتہ تقدیم اولندیغندن عهده سنه
رتبه وزارت احسان بیورلمشدر .


واصف افندی دیرکه وهران تلمسان مملکتده اون یدی درجه طول او توییدی درجه
عرضده واقع بر شهر در شهرک بر قطعه سی صحرا ده و بر قطعه سی دامن جبلده اولوب بالای
کھسارده متین قلعه سی وارد در عوام ناس و رهان تسمیه ایدوب اطلس کبیرده اوران
ضبط اولنمشدر . تلمسان ایله مابینی یکشبه راه اولوب کوچک لیمانی قلعه قیوسنه قریب
و مرسی الکبیر اطلاق اولنان لیمانک قلعه یه ایکی میل قدر بعدی واردر جمله آفریقہ
لیمانلرینک ممدوحی اولوب هر روز کاردن مصون و تجار ایله اکیویز طقسان سنه سنده
قبائل بر بریه آره سنده فتنه و شورش حدوثیله شعوب بر بریه دن بی مسفن مفارقت
و وهران صحرا سنده اقامت ایتشلر ایدی . فتنه دن امین اولدقلر یچون اندلسیلر
طرفدن بالالتاس وهران قلعه سی بنا اولنمغه بر مدت ذکر اولنان قبیله درون
قلعه ده تحصین اولنوب ملاحظه لری اوزره خلافت رنده اولان قوم بونلری باصوب
قلعه بی تخریب ایتدیکندن تکرار بنا اولنوب قلعه ده تمکن ایتشلر ایدی . اها لیبی
جسیم الخلقه و تنومند و تند و تیز اولوب عمالقه بقایا سندن ظن اولنور بر قوم نخوت
انکیز اوله رق بو حال ایله اکثری مؤمن و موحد و عربی اللسان آدملردر عبد فقیر
اسپانیا مملکتده سفارتاه واردیغمده اها لیه وهران برشلونه و مادریده کلور لر ایدی
اهل اسلام دن ایکن اسپانیالیوه تبعیتلری تقبیح اولندقدہ ظلم و تعدی و تکلیفات
شاقه یه تصدی سببیه اسپانیا یه تابع اولدق دیر لر ایدی .

ایشته ظلم و جورک نتیجه سی نیه منجر اولدینی ظاهر اولدی .

عهد بعید دن بروکاه اهل اسلا وکاه نصارا وهرانه مالک اولوب قرق الی سنده نبرو
اسپانیا تصرفنده ایکن بوکره بر منوال سابق جزائر لولرک تسخیر یله علاوه ممالک
محروسه قلندی بساتین و اشجاری و حدائق و اثماری وافر اولوب خارج شهرده
جاری ماء لذیذ لری دخی واردر بال ویاغ و غنم شهر مذکورده غایت رخیمصدر
واصفک کلامی بوراده ختام بولدی .

وینه بو خالاده انتهای حدود مصر یه ده واقع سناری طوائفدن فور نام مالکی
المذهب بر طائفه نک حاکی اولان مولا عبدالرحمانک رکاب هایونه بر قطعه نیاز نامه سی
(ان الهدایا علی مقدار مهدیها) مفاد نجه درت نفر طواشی و بر طور به تم رهندی
هدایایی ایله ایکی نفر ایلچیلری کلوب نامه سی ترجمه ایتدیرلده کده محروسه مصرده
اسیر لردن رسم آلتماق ایچون مصر والیسنه امر عالی استدعا سندن عبارت اولمسیله

حاکم مشار الیهه برقطعه داودی زره واطرافی خرده الماس ایله مصنوع برقطعه لعل خاتم و برقبضه مطلا سیف و سلانیک کاری برعدد سجاده و بش عدد عشاق سجاده سی و صوفه قبلو برقاچم کورک احسان اولنوب جوابنامه سیله برابر هدایای مرقومه سفیران موسی الیهمایه تسلیم و حاکم مشار الیهک استدعاسی وجهله مصر والیسنه خطاباً برقطعه امر عالی اصدار بیوریله رقی سفیرلری اعاده ایدلمشدر .



فَدَّ لِكَّه

بالاده مشروح اولان سفرك بادیء كشادی انكلتره و پروسیا دولتری ایدی . شویله كه : روسیه دولتك كرك بجر بالطقده و كرك قره دكزده تزید دونما ایتكده اولمی بتون دكزلیرى بنمسه مش اولان انكلتره دولته بادیء تشویش خاطر وامریقا مسئله سندن طولایى ظهور ایتمش سفر بخریده روسیه امپراطور بیچه سی قترینه بعض دول بجریه ایله اتفاق بیطرفی عقد ایلمسندن انكلتره وكلاسی منفعل و متأثر ایكن قترینه نك نمچه جاساری ژوزف ایله اتفاق واتحادی المان حكمدارلرینك انسلاب امنتلرینه بادی اولغین روسیه و نمچه دولترینك كافة تدابیر و حرکتلرینه معارض قوی و بادیء احترازلری اولان پروسیا قرالی مشهور فره دریق دخی حین حاجتده یكدیكره معاونت ایلمك اوزره بالجمله المان حكمدارلرینی اتفاهه دعوت ایلدكده جمله دن اول بالارث هانوره حكمداری اولمق حسیله المان حكمدارانندن معدود اولان انكلتره قرالی اجابت وبعده سائری دخی برر برر موافقت ایدرك روسیه و نمچه قارشو برلینده برعه دنامه اتفاق امضا اولدیغندن بو کیفیت قترینه بادیء انفعال و بوندن طولایى كرك انكلتره لویه و كرك فره دریقه منكسره البال اولوب حتی انكلتره و روسیه دولتری بینده منعقد اولان معاهده تجارتنك مدتی ختامه قریب و تجدیدی طرفین حقدنه مهم اولغله بونك ایچون انكلتره دن پترسبورغه مخصوصاً بر مأمور كوندرلمشیکن قترینه مجرد شو انفعاله منی بو خصوصی امهال و تأخیر و مقدماله مقاسمه سنده پروسیا حصه سنه اصابت ایدن قطعه نك داخنده اولوب بجر بالطق ساحلنده واقع دانسقه اسکله سنك ضبط و تصرفی ایچون فره دریق ایتدیكى دسیسه و تدبیر قالمشیکن قترینه مجرد غیظ و حسدندن ناشی دانسقه اهالیسنی تحریك ایله اللرندن الدینی استدعای و سیله ایدرك اهالیء مرقومه بی حمایه ایده جكنی فره دریقه انها و تحریر ایلمش اولدیغندن كرك انكلتره لو ایله و كرك فره دریق ایله قترینه بینده برودت و عداوت ثابت و مستقر و متعاقباً فره دریق فوت

اولمش ایسه ده طو تدینی اصول دولتنده باقی ومستمیر اولمش ومؤخرآ قترینه نك فرانسه لو ایله عقد معاهده تجارت ایلمسندن انكتره لونك كین وعداوتی برقات دها ترقی بولمش ایدی .

بو حالدده قترینه ایله ژوزفك متفقاً ممالك خاقانیه یه سوء قصدلرینی دخی انكتره لو سیاق حالدن استدلال ایله اسباب مخالفت ومقاومتی تدارك قیدینه دوشوب اول امرده پروسیا دولتنی تشویشه دوشوره رك تداركات احتیاطیه یه مجبور ایتدكدنصكره ایکیسی بردن انواع مواعد ایله بر طرفدن دولت علیه یی وبر طرفدن اسوج قرالی جنكه تحريك وتشویق ایتدكدرنده صدراعظم بولنان یوسف پاشا دخی بومقوله دسائس پولتیقیه دن ییخبر اولدینی حالده تسخیر قریم سوداسنه دوشمكله روسیه یه اعلان حرب اولنوب اسوج قرالی دخی روسیه نك دولت علیه سفریله مشغولیتنی فرصت اتخاذا ایدرك اخذ ناره داعیه سنه دوشوب اولدخی بر طرفدن روسیه اوزرینه صوت و هجوم ایلمش ایسه ده ایمپراطور ژوزف دخی قترینه ایله اتفاقه منبی دولت علیه علیه قیام ایدوب بویه وقت فرصته لهولر وطنلرینك سلامتیچون جمله دن زیاده فداکارانه چالیشوب چباله ملری لازمه دن ایکن وقتیه طاورانوبده برحسن حرکت ایلمدكدرندن وانكتره لو ایله پروسیالونك كرك دولت علیه یه وكرك اسوج قرالنه بول بول طوغرایوب طاتلی طاتلی عرض و ابراز ایلدكاری وعدلر دخی مواعید عرقوبیه کی بی ثمر اولدیغندن دولت علیه اسوج قرالندن بشقه سننده معاونت كوره میوب اسوجلویه نسبتله دخی روسیه نك متفق اولان نمچه نك قوتی دها زیاده اولمغین طرفین متحارینك قوتلری متفاوت اولدیغنه نظراً ایمپراطور ژوزف بومحاربه چوق سورمیوب برسنه طرفنده فیصل بولور و كندوسی دخی روم ایلی قطعه سنندن تصمیم ایتمش اولدینی یرلك ضبطنه دسترس اولور اعتقادنده ایکن جمله اولاده اردوی هایون فتوحات جمله یه مظهر ونمچه لو دوچار انواع خسار و ضرر اولوب انجق رسیه لو باشلیجه قوتی نمچه نك معاوتیه بسارابیا وبغدان طرفلرینه سوق ایدرك یاش قصبه سنی وخوتین قلعه سنی استیلا ایتدكدرندنصكره نمچه لو بوسنه طرفندن دخی بعض قلاع وبقاعی و روسیه لو اوزی قلعه سنی استیلا ایتمش ایدی .

اول حالده بعض دول اوروپا دولت علیه یی صلحه ترغیب ایتكده بولمشلر ایسه ده اسوج قرالی شایدكه دولت علیه بفته عقد مصالحه ایلرایسه كندوسی میدانده یالکیز قالور خوفندن ناشی وكلائی دولت علیه یی حربك دوامی صورتنه تشویق وتشجیع ایده كدیكنه و پروسیالو دخی کویا که لهولری روسیه نك نچه تسلطندن خلاص

ایتمک بهانه سیله آووجنه آلدینی کبی دولت علیه نك زمام حرب وصلحنی دخی الیه
 آلهرق بوایکی دولتی مقتضای پولتیقه سنه کوره اعمال ایده بیلمک اقتدارینی استحصال
 ایدوبده نسیج دستکاه دسیسه کاری اولان اشبو کاله بدرنک نفوذ واققداری صکره
 قترینه به آغر بهارله صانه رق لهستانک حین مقاسمه سنده دکر لیجه بر حصه آلمق
 افکار خدعه کاری سنه مبنی هر نه وقت دولت علیه دشمنلریله عقد مصالحه ایده جک
 اولور ایسه پروسیا دولتی توسط ایتمک شرطیله تجاویزی و تدافعی دولت علیه ایله
 بر اتفاق معاهده سی تنظیمی تکلیف ایلدیکنه بناءً دولت علیه متردد و متحیر قالدینی
 ائنده عبدالحمید خان حضر تتری وفات ایدرک سلطان سلیم خان حضر تتری جلوس
 ایتمکله مصالحه شقنک تقرری ملحوظ ایکن پادشاه نوجاه دخی روسیه طرفنده
 بر کره اولسون جنکجویان زمانه نك آغز لرینی قباده بیله جک صورتده بر مظفریت
 قرانوبده صورت غالبیتده مصالحه به دسترس اولمق مطالعه سیله روسیه مصالحه سنی تجویز
 ایده مدیکندن حربک دوامنی التزام ایدرک اولاسوج وبعده پروسیا دولتلریله
 معاهده اتفاق سندلرینی امضا ایدوب حالبوکه آچه نك فقدانی وعسا کر و ذخائرک
 نقصانی حسیله طرف طرف عسا کر اسلامیده هزیمت لر رونمود واردوی هایونک
 حرکته مجالی مفقود اولهرق نیجه بقاع وقلاع استیلا به دوچار بلکه روم ایل قطعه سی
 مهالك و مخاطر اته کرتار اولمشیدی .

اول خالاده ایسه فرانسه اختلالی علو کبر اولغله شراره سی اطرافه سرایت ایتمدن
 بو آتشی با صدر مق اوزره دول اوروپا بینسلرنده کی اغراضی دفع ایدرک بر لکده
 حرکته نیت ایتملریله هر نصل اولور ایسه اولسون شرق سفری غائله سنک بر طرف
 ایدلمسی افکاری میدانه چیه رق اوروپا پولتیقه سی بتون بتون دکشمکله پروسیا
 قرالی مجرد نمجه بی صلحه اجبار ایچون حدوده عسا کر کلیه سوق ایتدیگی ائنده
 ایمپراطور ژوزف فوت اولوب خلفی دخی دولتنک محتاج ارام اولدیغنی دشمن
 طبعیسی اولان پروسیالو ایله ولوکه موقت اولسون فرانسه علیه نه متحد اولمق
 لازم کلدیکنی جزم وهان امور داخله سنی بالاصلاح دول سائره ایله بر لکده فرانسه
 طرفه متوجه اولمق مسلکنه عزم ایدرک دولت علیه ایله متارکه ایتمکین روسیه لو
 قوه الظهر استنادی اولان نمجه اتفاقدن دفعه محروم اولهرق بار سفر بسبتون کندی
 اوزرنده قالب اگر چه اول امرده اسوج قرالی بعض مرتبه مظهر ظفر و غلبه اولنش
 ایکن متعاقباً بعض غوائل داخلیه به اوغرامغله شروط معاهده اتفاقه رعایه دولت علیه به
 خبر بیله ویرمکسزین بقته روسیه لو ایله عقد مصالحه ایلدیکندن دولت علیه دخی
 میدان کارزارده نك وتنها قالمش واردوی هایونه زیاده سیله ضعف و پریشانلق کلمش

ایسه ده روسیه لونك دخی مضایقه مالیه سی درکار اولدینی خالدہ بومحاربه ده کلی عساکری تلف اوله رق عسکر جه ده نقصانی اولدیغندن بشقه پروسیالودن مشهود اولان امارات تعرض فیما بعد یالکز کندی حقنه مصر وف اوله جنی و پروسیالو بروجه مشروح له دولتی کندی طرفه جلب ایدرک خیر خواهلر یوزندن له درونه عساکر کلیه ادخال برله بوقدر وقتدبرو حسمر تکشی اولوبده قترینه نك مخالفتنه مبنی دسترس اوله مدینی دانسقه وطورون اسکله لری ضبطه فرصتیاب اولدینی وانکلتره دولتی دخی تجهیز دونما ایاه بحر بالطق جانندن روسیه اوزرینه حرکتہ آماده اولدیغ حالاً وطوراً کوستر مکده ایدوکی جهتله قترینه بوقدر غلبت متوالیه نك نتیجه سنده آنچه وعسکر اتلافندن بشقه برشی حاصل ایدہ میہ جکی ن درک وتیقن وبوسفر مناسبیله لهستان پروسیالونك نفوذی آلتنه کیرمش اولسنه نظر آفبا بعد بویله محال بعیده ده اشغال عسکر ایدہ جک اولور ایسه مقدا حین مقاسمه ده آلدینی له قطعہ سی الندن چیقه بیلیمک احتمالی فکر عمیق ایله مطالعه و تفتن ایتدیکنه مبنی مصالحیه مجبوریتی درکار ایدی .

انجق دولت علیه پروسیا اتفاقیله مر بوط وعقد مصالحه ایدہ بیلیمسی عهداً پروسیالونی توسطه منوط بولندیغندن بشقه بوسفر دن غرض اصلی روسیه دن اخذ انتقام داعیه سی ایکن اولطرفه ملت اسلامیه جه تشفیء صدر ایدہ جک صورتده بروقه قرانیله میوب سلطان سلیم خان حضر تری دخی متفق اولان پروسیالونك روسیه یه اعلان حرب ایتمسی امل وآرزوسندن هنوز مایوس وفارغ اولدینی جهتله پروسیا قرالی جنکه تشویق ایله مشغول بولوب قترینه ایسه بر دولتک توسطتی قبول ایتدیکندن بشقه کمال کبر ونخوتندن ناشی صلحه میل ورغبنتی اظهار وانبادن دامنکش استعنا اولمغله وار قوتی بازویه کتوره رک سفره دوام واقدام وروسیه عساکری باباطاغنه قدر تخطی واقتمام ایدوب بعده سردار اکرم یوسف پاشا اردوسی پریشان اولدینی ائاده انابه قلعہ سی دخی دوچار استیلا اولمغله وسلطان سلیمک بحسب الاتفاق روسیه علیه نه اعلان حرب ایتدیرمکه چالشدینی پروسیالو بز شرف توسطدن کچرز ومجرد دولت علیه نك حصول مصلحتی ایچون منفر دأ مصالحه سنه موافقت ایدرز دیمکه وسائر روسیه علیه نه بولنان دولتله دخی دولت علیه یی همان صلحه تشویق و ابرام ایتکه باشلامر یله دولت علیه دخی عقد مصالحیه مجبوریت حالده بولنمشیدی .

قالدیکه انکلتره لونك قترینه یه عداوتنک باشلوجه بر سبی فرانسه لو ایله عقد ایلمش اولدینی معاهده تجارت ماده سی اولوب بوا یسه اختلال مناسبیله بالطبع فسخ واخلال اولنق لازم کلدیکندن بشقه قسترا نام مورخک روایتنه کوره روسیه طرفندن اوزبک و کشمیر یولیه هند اوزرینه عسکر کوندر یله رک اولطرفه انکلتره لونك خزینہ سی

متابه سنده اولان يرلر كفاي السابق خاقان مغول حكمنه ادخال ايتديرملك ملاحظه سي قترينه نك خاطر كذارى اولوب حتى اولحوالى به سياحت ايله كسب وقوف ايتمش برقاچ نفر فرانسه لو اول ائنده روسيه ده بولنمغله ارسال اولنه جق عساكره قلاوز اولمق اوزره مأمور اوله جق قيريني بر مدتنبرو پوتمكنه حلول ايتمش اولان انكلتره مأمورلرندن (اتوب) نام كمنه بر تقريب ايله استراق ايتمكن بو كيفيت انكلتره دولته باديء تلاش اوله رق بوجهته دخي قترينه نك جلب و تأليف انكلتره بولتيقه سنجه لازمه دن عد اولنديغنه مبنى قترينه ني تطيبا انكلتره لو مصاحمت مصالحه ده كندوسنه عرض خدمت فكرينه دوشوب متفق خاصى اولان پروسيالو وفلمنك دولتريه به بعد الحابره پترسبورغ جانبه مخصوصه ارسال سفير و دولت عليه ايله روسيه لو بيننده منعقد اوله جق مصالحه نك تسهيله سعى ايده جكنى تقرير ايلد كده قترينه دخي مصالحه ماده سنى دايمارقه دولته حواله ايتمكله دوات مرقومه قترينه نك بوبايده اولان مطلوبى انكلتره و پروسيا وفلمنك دولتريه كشف و بيان وينلرنده مذاكرات و افره كذاران ايدوب نهايت طورله دن قطع حدود اولنمق اساسنه قرار و يرلد كدن صكره دول ثلثه مرقومه بوصولي دولت عليه به افاده و قبول ايتديكي صورتده فيما بعد كف يد ايده جكلرينى تعهد ايتمش اولدق لرندن هان اول اساس اوزره دولت عليه به قطعى و جههه مصالحه يي تكليف و ابرام ايتلر يله ناچار دولت عليه دخي اولوجهه مصالحه به موافقت ايدر ك هان ياش قصبه سنده عهدنامه لر امضا اولمشدر .

فرانسه اختلالى بروجه مشروح روسيه عليهنده بولنان اوروپا دولتريه نك بولتيقه لر يي تغيير و تبديل ايدوب حتى اسوج دولتي بيله دوست قديمى اولان فرانسه لو عليهنه سائلر ي ايله برابر سفر آچق لازم كمشدر . و دولت عليه يي انواع و عدو عييد ايله چنكه تشويق ايدن انكلتره و پروسيا دولتري صكره دن الحاح و اجبار ايله دول متحاربه يي صلحه دعوت ايلمشدر . بناء على ذلك روسيه عليهنه ملحوظ اولان بر حركت اتفائيه نك و وقوعه مانع اولدينى كبي قترينه نك ممالك دولت عليه حقتده اولان سيلاب حرص و طمعنى دخي مجراسندن تحويل ايله انجام سفرده دولت عليه جهه محتمل و ملحوظ اولان خسارى دافع اولمشدر .

بو سفرده دولت عليه نك ضايعاتى غير از تقود اوچ يوز اوتوز بيك نفوس والتى قطعه قپاق و درت قطعه فرقتين و برقاچ اوفق تكنه لر و اسوج دولتنك ضايعاتى التيسى اسير و بر اولقدر قضا زده اوله رق اون ايكي قطعه قپاق و اوچ فرقتين و قرق عدد اوفق تكنه لر و روسيه دولتنك دولت عليه و اسوج سفر لرنده مقدار

ضایعاتی ایکی یوز بیک نفوس و بحر بالطقده بری اسیر و اوچ قطعه سی قضا زده اوله رق درت قطعه قباق و آلتی قطعه کبیر فرقتین و سکسان پاره اوفق تکنه لر و قره دکزده قضا زده اولان ایکی قطعه فرقتین و فورته دن بوغازه کیروب اسیر اولان بر قطعه قباق که جمعاً بش قطعه قباق و سکز قطعه فرقتین و مار الذکر اوفق تکنه لر و نمچه دولتک یالکیز عسکری نفراتی اوله رق یوز اوتوز بیک نفر در دیو قترینه تار یخنده محرردر . دولت علیه نک عسکرجه کلی ضایعاتی اولوب آنجق اکثری سواری اولدقلرندن اسیر اولنلر آزدرد اما ضایعاتک مقداری صحته قریب اوله جق و جهله تخمین و تقریب اولنه ماز زیرا دولت علیه اردولری اولوقت دول اروپا اردولری کبی مرتب و منتظم اولمیوب هر سرکرده زیاده تعیینات آلمق ایچون معیتنده کی عسکرک مقدارینی اوچ قات اولمق اوزره خبر ویرمک عادت اولدیغندن حتی اوزره مقدار عساکری دولت علیه بیه بلمز و اکثری اوروپالولرک یوز بیک دیو تخمین و تحریر ایتدکلی دولت علیه اردولری الی بیکه بالغ اولماز ایدی . نفوس اهالیجه اولان ضایعات بحثنه کلنجه روم ایلی جانبنده دوچار استیلا اولان قلعه لرک خلقی کیسی ویره ایله ترک دیار و کیسی نائل رتبه شهادت اولنجیه دک بذل اقتدار ایلمش اولملریله ایچلرندن خیلی تلفات و قوعه ککش ایسه ده اسیر دوشنلر آزدرد فقط اناپه دن اون بوقدر بیک خلقک بر خیلیسی شهید اولدقن صکره بقیه سی دخی کاملاً روسیه لو یدینه اسیر دوشمشدر . اما نمچه لونک کرک اسیر و تلف اوله رق اهالیجه وقوعه کلان ضایعاتی حد و احصادن خار جدر .

جای عبرت و انتباهدر که دولت علیه سفرینی فرصت اتخاذا ایدرک بغته نقض عهد ایله جنکه تشمیر ساق و صلح و سفرده برابر اولمق اوزره دولت علیه ایله عقد معاهده اتفاق ایدن اسوجلو بونجه زیان و خسار اوزرینه عهد شکنک ایدرک دولت علیه خبر ویرمکسزین روسیه لو ایله عقد مصالحه ایلدیکی کبی روسیه ایله بالاتفاق دولت علیه نک انقاضدن حصه آلمق خلیای خامیله دولت علیه علیه قیام ایدن نمچه لو دخی کلی خساره کرقتار اولدقن صکره روسیه یی ترک ایدرک دولت علیه ایله متارکویه مجبور اولمشدر . الحاصل بوسفرده دول متحاربته نک ضایعاتدن بشقه حاصلاتی اولمامشدر . فقط قترینه اول امرده اظهار خواهش و رغبت ایتیه رک سفره مباشرت ایدوب نتیجه سنده دخی برمنوال سابق لهستان وقوعاتندن و کندویه عارض اولان ضعفندن ناشی مصالحه خصوصنده رونما اولان مجبوریتی دامن استغنا ایله ستر و اخفا و فرانسسه علیه ایده جکی اتفاقی دول اوروپایه نازلجه صاته رق و دولت علیه به بغداد و بساریا و اناپه نک ردینی بر نوع جود و قنوت صورتنده

کوستروب بلکه بونکله عرض منت ایدرک اوزی ایالتی ممالکنه ضم و الحاق خصوصنده دول مرقومه بی ارضا و دولت علیه دخی بوقدر خسار و ضرر اوزرینه حاصل ایلیکی سرمایه تيقظ و انتباه ایله اکتفا و عقب مصالحه ده نظام جدید مذاکرته ابتدار ایلمشدر .

* یوسف پاشانک عزلیله ملک محمد پاشانک صدارتی و دیگر بعض وقایع *
 صدر اعظم قوجه یوسف پاشا روسیه لو ایله عقد مصالحه ایدرک لوای شریف ایله در سعادته کلوب مقامه او تورمش ایسه ده عصر عبدالحمید خانیده نافذ الکلم و خصوصا بو سفرك ظهورینه سببینه متهم اولنلر و بلکه اردوی همایونک عودتندن صکره ارکاندن بولنلر بیه مستقل اولوب یوسف پاشا ایسه بویه نتیجه سی مشتکور اولمیان بر سفری فی الاصل کندوسی آچمش ایدوکندن خدمتی مقبول اولدیغنی تفرس و احساس و خوف مؤاخذه ایله تعطیل حواس ایدرک کاه مقام صدارت عظامدن تباعد و کاه رفع دغدغه وزارتله تقاعد داعیه سنده بولندیغنی سلطان سلیمک معلومی اولدقده چونکه بو ائنده نظام دولته دائر طاقم طاقم لایحه لر تنظیم اولمقده اولوب مواد مذکوره نك لزوم و فائده سی ارباب عقل و انصاف عندلرنده مسلماندن ایسه ده بومقوله یکیدن یابیلان شیلره بیلور بیلمز نیجه کیمسه لر و خصوصیه افکار عتیقه احتجابندن اولنلر اعتراضدن خالی اولمیه جقلری جهته بوموادک وضع اساسنده بویه قدما ی ارکان دولت علیه دن اولان ذواتک دخی رأی و موافقتی بولمق اوزره یوسف پاشانک بر مدتجک دها آوودلمسی موافق حال و مصلحت کورلدیکندن کندوسنه طرف شاهانه دن مضی ماضی معامله سی اظهار و فیابعد رضای پادشاهی به توفیق حرکت و همان دین و دولته خالصانه خدمت ایلمسی کندویه امر و اخطار بیورلمقده اولوب انحق سلطان سلیم خان حضر تلی پدری مرحوم سلطان مصطفانک منظوری اولان ذواته نظر و اعتبار ایتمکله شمدی بوطاق میدان آلمش و آنلر ایسه دور حمید خانیده گوشه مذلتده قالمش اولدقلرندن اول دورده نوش سیلافه نفوذ و اعزاز ایدنلره یاور و همراز اولمیه جقلری ملاحظه سیله یوسف پاشا کسب قوت و مقامنده لرشمک سوداسیله کندویه مخالف عد ایلیکی بعض ذواتک دفعی و قوجندیغنی مقام و موقعلره امنیت ایده جکی کیمسه لرک نصبی و الحاصل دور سابقده مألوف اولدیغنی و جهله مقام صدارته استقلال تام کسبی افکارینه دوشه رک اتفاق آرا ایله تنظیم و تمشیتی درجه و جویده کورینان مصالح جسمیه نك اجرا سنده صورت مساحه و استغنا کوسترمسی مشرب سلیم شاهانه بی متغیر ایلدیکندن اشبو (۲۰۶) سنه سی رمضانک اون ایکنجی کونی عزل ایله یرینه سلطان مصطفانک امکدارانندن

بولنوب و قرق الی سنده نبرو توغ و علمه سرفراز و اعتدال و استقامت ایله ممتاز اولوب اولکی سفرده استانبولده قائم مقام ایکن حسن اطوار و مشواری ایله عصرک مقبل و متفذلرینی خشنود ایتمش اولان و حالا قندیه محافظی بولنان شیخ الوزرا ملک محمد پاشا صدر اعظم نصب اولنهرق در سعادت و رودینه دک مصالح دولتی رؤیت ایتمک اوزره رکاب هایون قوجیلر کتخداسی بولنان از نیقی علی بک عهد سینه رتبه وزارت توجیهیله قائم مقام اولمشدر .

اشبو علی پاشا مرحوم خیرالدین پاشا نسلندن اولوب مسقط رأسی اولان از نیقده متمکن ایکن خلیل حمید پاشا طشره لردن بعض قابلیتلو کیمسه لری در سعادت جلب و استخدای ایله آدم یتشدر مک املنه دوشدیکی جهته بونک دخی درایتی تحقیق و از نیقندن در سعادت جلب ایله باشباقی قولی نصب ایتمشیدی خلیل حمید پاشانک اعدامنده کافه تداییری تقییح و یتشدریدیکی ذاتلر طرد و تبعید اولندی صرده بو دخی باشباقی قوللغندن عزل اولنغله مملکتته واروب بر مدت اقامتدن صکره مکافات الهیه مظهر اولهرق تکرار در سعادت بالورود میراخور ثانی و کتخدای بوایین اولوب بوکره بر منوال سابق یوسف پاشانک عزلنده قائم مقام اولمشدر .

یوسف پاشا عهد سینه دخی انابه جانی سر عسکر لکی عنوانی انضمامیله طربزون ایالتی بالتوجیه چونکه انابه قلعه سی مجدداً بنا وانشا و صغوجق و صخوم حوالیسینک احوالی تنظیم و تسویه اولنق لازم کلدیکندن عمله ولوازمات سائر بش اون کون طرفنده تدارک و تهیئه اولنجه دک بکه توزه اقامت ایدوب بعده صوب مأموریتته کوندرلش و سفر ائناسنده آق دکرز دونماسی باشبوغی ایکن اثبات لیاقت ایدن میرمیراندن مورده وی کوسه مصطفی پاشا عهد سینه تأییداً انقره سنجانغی و سابقلری مثللو طومبصار خاصی بدلی اولان یکریمی بش بیک غروش احسانیه انابه محافظی و سابقاً اردوی هایونده نزل امینی اولان مصطفی اغا انابه قلعه سی بنا امینی و سابقاً آرپه امینی اولان ممش افندی کلغراد قلعه سنی تعمیر ایتمک اوزره قلعه مرقومه بنا امینی تعیین بیورلمشدر .

شوالک اوچنجی کونی بر معتاد وقوع بولان توجیهاتده دخی اردوی هایونده وقعه نویس بولتمش اولان انوری افندی به اناطولی محاسبه سی و در سعادتده وقعه نویس و کیلی بولنان ادیب افندی به تشریفات منصبی توجیه اولمشدر .

بعده ماه مرقومک یدنجی بازار ایرتسی کونی جنتمکان عبدالحمید خان حضر تلیرنک کریمه محترم لری اسما سلطان علیة الشان حضر تلیری اون بش بیک غروش مهر مؤجل تسمیه سیله اقدجه قبودان دریا نصب اولنان کوچک حسین پاشایه عقد نکاح

اولنوب انای سفرده آق دکزده ظهور ایدن روم اشقیاسنک تأدیبلری ضمنده دونمای هایون ایله قپودان پاشا بو ائنده آق دکزه چیقدیغندن سور سلطانی دونمانک عودتنه تعلیق ایلمشدر .

اردوی هایونک شمنیدن ادرنهیه حرکتنده طونه سواحلنده بولنان دره بکلرینک وسائر سرکشانک ازالهسیله ممالکک آنلردن تطهیری خصوصی مأمورینه امر و سپارش اولنمشیدی ایشته بو صورته اقدجه حقنده فرمان قضا جریان صدور ایدوب ترتیب جزا اولنان ترسنکلی اوغلی عمر اغانک قرنداشی اسماعیل اغانک ترتیب جزاسی حقنده دخی فرمان صادر اولمغه مرقوم فرار ایلدیکندن هر قنقی قضایه داخل اولور ایسه در حال جزاسی ترتیب اولنمسی امر و مرقومی تصحب یاخود اخذنده اغماض ایدنار اولور ایسه آنک حقنده اجرا اولنان معامله آنلرک حقنده دخی اجرا اولنه جفنی مشعر لازمه کلانلره او امر علیه یازلمشیدی .

بوخلالده مرقوم اسماعیل اغا زشتوی و پلونه ولوغه و طرنوی طرفرنده کشت و کذار ایله اطلاق امری اصدار ایتدیردم دیو اراجیف اشاعه سنه ابتدار ایلدیکی استخبار اولمغه بهر حال اخذ ایله ترتیب جزاسی خصوصنده اغماض اولنمسی ایچون زشتوی و پلونه ولوغه و طرنوی و هزارغراد قاضیرینه و ویوده و اعیانلرینه اواسط شوال تاریخیه او امر علیه یازلمشدر .

ماه مرقومک اون یدنجی پنجشنبه کونی صدر جدید ملک محمد پاشانک اسکداره واصل اوله جفنی تحقق ایتدکده ساحه حیدر پاشا و قواق سراینک درون و برونی خیمه و سایبانلر ایله ترین اولنوب یوم مزبورده علی السحر شیخ الاسلام افندی وقائم مقام پاشا و صدرین محترمین و تقیب الاشراف و استانبول قاضیسی و باجمله رجال دولت و ارکان سلطنت و او جاقدر ضابطانی ساحه حیدر پاشاده بولنه رق رسم قدیم تشریفات اوزره ابراهیم اغا چایری نام محلدن ایلروده صدر اعظمک استقباله چقیبه رق آلی ایله حیدر پاشاده مهیا اولان سایه بانه کتور یلوب اجراء رسم تبریک و تمنیت اولندقدن صکره صدر مشارالیه طرف هایوندن میراخور اغا و ساطیته کشیده اولنان اسب مزینه سوار و شیخ الاسلام ایله همغان اوله رق قواق شراینده واقع محمد پاشا قصری پیشکاهنده نصب اولنان اوبه آحنی به نزول و رسم ضیافت ایفا اولنوب بعده وقت مختار حلولنده صندال ایله یالی کوشکنه مرور و حضور هایونه دخول و مهر هایونی اخذ ایله باب عالی به کلوب مقامه قعود ایلمشدر .

قائم مقام بولنان علی پاشانک بو صورته مأموریتی ختامه قرین و قائم مقاملانی مدتده سیر و سلوکی سزاوار تحسین و آفرین اولدیغندن عهده سنه اناطولی ایالتی توجیه و عجم

اوغلی وحسن چاوش نام شقیلرک اعدام وازاله لری کندویه امر وتنبیه بیورلمشدر .
 اوائل ذی القعدة طشره وزراسندن بعضیلرینک عزل ونصبی صرہ سنده دخی
 صدر اسبق حسن باشا مقدا صدر جدیدک کتخدالح خدمتده بولنش ایدوکندن
 حقوقه رعایة وزارتتی ابقا ایله عهدہ سنه سلستره ایالتی توجیه ایتمش وینه اول
 کونلرده اردوی هایون ایله آستانه به وارد اولان عربزاده احمد اغا یکچجری
 اغالغندن عزل ایله یرینه سبکان باشی سعید اغا تعیین قلمشدر .

واصف افندی دیرکه احمد اغا عاقل ومدبر وهر حالک انجانی متفکر برشخص بهادر
 اولوب بقاسنده دولت عاییه خدمت نافعہ ظهوری ملحوظ ایکن اردولی اولوق
 تقریبیه وجودی استتقال اولندی .

فقیر دیرمکه اولوقت سلطان سلیمک باشلوجه املی تنظیم عسکر ماده سی اولوب
 بو ایلی دخی اردوده بولنش و بونجه هزیمتلر کوروب منتظم عسکرک محسناتی
 معاینه ایلمش ذواته کوردیرمک موافق مصاحت ایدی انجق هر حال وزمانده شخص
 التزامی تمامیه مصاحت کورمک یولنه سلوکه مانع اوله کمشدر .

یکچجری او جاننگ سکر دم اوسته لری میانه لرنده اشجی بولنانلرک التی آیده ایکسی
 ارسال لویه ایله چراغ اولوب سرمایه ایتک اوزره بعض محلا ره بوغاچه وکاهی
 توزیعیه بر مقدار آچه طوبلامق معتاد ایسه ده کیدرک اصناف واسباب سوقة دخی
 کاهی طاغیدلمغه باشلانهرق او جاغه رذالتی موجب برحالت اولدیغندن و بو خلاله
 تنظیم احوال عسکریه مصاحتی در دست مطالعه اوله رق ممکن مرتبه عسکری طاقنک
 تطیب واستمالت لری ملتزم بولندیغندن ناموس عسکری بی محافظه ایچون بو عادت
 الغا اولنوب فقط کاهی توزیعی وقتنده طرف هایونه ودارالسعاده اغاسنه و سلحدار
 شهر یاری به و صدر اعظم و کتخدابک و دفتر دار افندی و رئیس افندی و چاوشباشی
 و اوجاق رجالتنه برر تابه کاهی تقدیم ایله طرف شاهانه دن بیک بشیوز غروش
 و سائر لری طرفدن دخی برر مقدار شی ویرلمسی نظام اتخاذ اوله رق فیما بعد
 دستور العمل طو تلمسی فرمان اولمغله بوندن یکچجری طاقمی غایت منبسط
 و محظوظ اولمشدر .

سفر مناسبتیه ذخائرک فیثاتی پک زیاده ترقی بولوب بعد المصالحه بالتدریج تنزله یوز
 طومش ایسه ده خالقک امید وار اولدیغی کبی اسعارک دفعه قبل السفر اولدیغی
 راده به تنزل ایتسی ممکن اوله میوب قالدیکه سفر اثناسنده قطع اولنان جدید سکه
 بیانی شده بر مغشوش اولدیغندن ینه غروش حسابیه اسعارک حالت اولاسنه عودتی
 قابل اوله میه جفی درکار ایکن امکلرک فیثاتی استتیلان درجه یه تنزیل اوله مامسی

استانبول قاضیسی بولنان درویش افندی زاده خلیل افدینک اگمکچی
اصنافی تصاحبنه حمل اولمغله ذی القعدہ نك اون دردنجی کونی خلیل افندی عزل
وکیولی یه نفی ایله یرینه محمود چاوش زاده شمس الدین افندی استانبول
قاضیسی نصب اولمشدر .

برکون صکره قبودان پاشا طرفدن آلمان اخبار سائره موجب ممنونیت کثیره
اولمغله بروجه آتی تفصیل حاله ابتدار اولنور .

* آق دکز اشقیاسنک تأدیبی *

یوزسکمان ایکی سنه سی سفرنده مورده وسائر آق دکز رعایاسنک مسقولو طرفنه
تمایل ایتملی حسسیله بعده لاجل التأدیب حقلرنده طرف دولت علیه دن ارائه
روی شدت اولمش اولسنی روسیه ایمپرا طوریحجه سی قترینه وسیله ایدرک بو سفرك
اوانل ظهورنده بیاننامه لر نشریله آق دکز رعایاسنی عصیانہ تحریک و تحریص
ایچون روم طائفه سندن مقدما روسیه خد متنده بولنان سوتیر نام کسنه بی ارناودلق
طرفنه ارسال و تیزالین اولطرفده بولنان قوجه باشیلر ایله بالندا کره برفته
قوپارسنی تنبیه ایتمش اولدیغندن شخص مرقوم دخی یانیه سنجانی داخلمده صولی
نام طاغده متمکن رعایای اضلال برله برفته احداث ایدوب اول اوانده ایسه ایکی
دولتله سفر تحقق ایتدکن بشقه اشقودره متصرفی محمود پاشا دخی حل عصیانده
بولندیغندن اشقیای مرقومه اوزرینه قوه کافیه سوق اولنه میوب یانیه والیسی
طرفدن کوندریلان برمقدار عسکر دخی منهزم اولسیله صولی اشقیاسنک سیل
فته وفسادلری مزداد اوله رق بوجمیت شقاوته داخل ووادئ عصیانہ سلوکه مائل
بولنان رعایا ینلرندہ تدارک اولنان آچه ایله تریسته اسکله سنده اون ایکی قطعه کمی
طونانوب هم جنسلرندن قره چقان نام قبودانک ید اداره سنه تسلیم وروسیه
باندره سیله کشت وکذار ایدرک بعض سواحل و جزائر بحر سفیده ایراث خسار
عظیم ایلدکاری جهته قره دکره مرتب اولان سفن هایونک برفرقه سی آق دکره
ارسال اولمش و دولت علیه نك قوه بحریه سی ایکی یه بولمک لازم کیش و جلد رابعده
بیان اولدنی و جهله اشقیای مرقومه نك بعضیری طوتیلوب مجازات اولمش
ایسه ده دولت علیه نك باشلوجه قوه بحریه سی قره دکرده بولندیغندن اشقیای
مرقومه نك استیصالی قابل اوله میوب مشاهیر سردکانندن لامبرو نام شق مورده
طرفلرینه تعرض و تخطی ایدرک مانیه ولوادیه سمترلنده دخی خیلی خسارتلر
وقوعه کلشیدی و مقدما قترینه بو اشقیای آچه و مهمات ایله اقدار ایتک اوزره سجلیا
اطه سنه وسائر حوالئ بحر سفیده متعدد مأمورلر کوندرمش ایسه ده ذکر اولنان

مأمور لر کندولرینه تودیع اولنان مبالغی بو خصوصه صرف ایتموب روسیه
 وکلاسندن کندولرینک حامیلری اولان کیمسه لر ایله بالاشترک اکل وبلغ ایتملرینه
 روسیه اعانه سنه منتظر اولان گروه اشقیبا بو صورتدن منفعل اوله رق ایچلردن
 اوج کسنه نی لاجل الاشترکا پترسبورغه ارسال ایدوب اورایه وصوللرنده مقدما
 مبالغ مرقومه نك اکلنه مشترک اولان روسیه وکلاسی برمدت ذکر اولنان مبعوثلرک
 قترینه ایله ملاقاتلرینی منع ایتمشله ایسه ده نهایت قترینه نك علاقه کرده سی اولان
 شخص واسطه سیله یانته واروب بر قطعه عرفخاللرینی یدا بید تقدیم ایتمشلردر
 عرفحال مرقومه بزم همشهر لریمز مقدما طرفکنزدن ارسال اولنان بیاننامه لره
 اعتباراً حمل سلاحه ابتدار و مال و جانلرینی دریغ ایتمه جکلرینی بیان ایچون بالوکاله
 بزنی بو طرفه تسیاریتدیلر وصولزده وکلا کزه تقدیم ایلدی کمز تقریرک جوابی
 یوقدر وقت پسانده عوق و تأخیر اولمی همشهر لریمز حقلرنده مصائب عظیمه نی
 موجب برحالت اولدیغندن مجرد جواب مطلوبی تحصیل ایچون افاده حاله مجبور
 اولدق بوندن قطع نظر مقدما قومزده خذله کر وهندن معدود ایکن بر طاقم لاف
 و دروغ ایله نزد ایمر اطوری کزه حلوله دسترس اولمش و طرفکنزدن مدیر امور من
 اولق اوزره تعیین اولمش ابصارو نام کسنه سزی و وکلا کزی تغلیظه حسارت
 ایدوب آلدینی کلیتلو آچهدن طرفزده بر آچه و بر حبه ویردیکی یوقدر وقره چنانک
 دونماسی و سائر تکته لر کندو مالز ایله تجهیز اولنوب حتی بزدن بری ترک دار
 و دیار و بدندن اوله رق اون ایکی بیک آتون صرف ایله ایکی قطعه سفینه
 طونان دیغندن ولایتده قلان والده سی وقرنداشی قتل و اعدام اولندی بزم
 مرامز آچه دکل انجق تدارک ایده مدیکمز باروت وکله در بو وجهله طرفزده معاونت
 اولدینی حاله همتکز ایله قدیمی سربسیتمز تحصیل واحفاد یونانده اولان آتیه
 و مورده اهالیسی قید رعیتدن تخلیص اولنه جنی درکار اولغله تقدیم ایتمش اولدیغمز
 تقریره امرار نظر دقت واسکی قرال لریمزک نسلی قالدیغندن حفید کز قسطنطینک
 اوزریمزه قرال نصبنه همت ایلمکزی رجا ایلرز دیو محرر اولغین قترینه ذکر
 اولنان مبعوثلری معامله دلنوازانه ایله تلطف ایتدکدن صکره حفید لرینک یانلرینه
 کوندروب حین ملاقاتلرنده حفید کبیر اولان الکساندرینک النی اوپنک
 ایتدکلرنده قبول ایتموب بونک النی اوپنک دیو قرنداشی قسطنطینی کوستر مکله
 آنر دخی بزم قرال مز دیو قسطنطینک النی تقبیل ایله کویا که اجرای رسم بیعت
 ولسان رومی اوزره افاده مأموریت ایتدکلرنده قسطنطین دخی آنره لسان رومی
 اوزره وارک هر شی استدی ککز کی اولور دیو جواب ویرمشدر .

و مرقوم مبعوثك بروجه سابق روسيه وكلاسنه تقديم ايتمش اولدقلىرى تقريرلىرى ترتيب سفرى متضمن اولوب شويلاه كه: روسيه دن لازم كلان طوپ و مهندسلر تداركيله قره چقان دونماسى تكميل وقلعه محاصره سنه الويره جك قدر قوت تحصيل اولندقدنصكره مركز مشورتلى اولان صولى طاغنده ترتيب جمعيت وسائر روم ايلي رعاياسيله بالخبره اول امرده ايكي قول اوله رق آتته وليواديا طرفلرينه حرکت ايتك وقره چقانك دونماسى اغرييوز پيشكاهنده اولدينى حاليه مرسوملك اثنای حرکتلارنده موره واغرييوز رعاياسيله برلشمك وجمهسى بردن سالنيك قضاسنه دخولارنده زمعلرنجه اول حوالينك اهايليندن كسب قوت ايتك وكويا بو طريق اوزره ادرنه صحراسنه كلنجيه دك جمعيتلى اوچوز بيك نفره بالغ اوله جنى جهته اولطر فده مستو عسكرينه ملحق اوله رق محروسه قسطنطينه اوزرينه كلك وقره دكرده اولان مسقو دونماسى بوغازدن ظهور ايله امدادلرينه قيام ايتك ترتيباتى و تدابير حريبه سائر بيان اولمغله تقرير مذکور قزيرنه نك مزاجنه موافق كلمكن مارالذكر اوچ نفر مبعوثلره عطيله اعطا ايله تلطيف نصكره كندولرينى اول ائنده بغدادان جانبنده بولنان پوتمكنه كوندروب اولجانبه وصولارنده پوتمكن مرقوملره اقتضا ايدن تعليماتى بالا عطا امورلرينه نظارت و محتاج اوله جقلىرى لوازماتى ايصاله مسارعت ايتك اوزره اول وقت جنرال رتبه سنده بولنوب مؤخرآ استانبولده برمدت سفارتله مقيم اولان طماره نام كيمسه يي يانلرينه تريفقاً صولى طرفه كوندرمىدى .

انجق بوماده بيك ايكييوز درت سنه سى اواخرنده واقع اولوب اول ائنده ايسه نمچه دولتى روسيه دن منفك اوله رق پروسيا دولتيه عقد معاهده وعقبنده دولت عليه ايله دخى عقد مصالحه ايتك اوزره متاركه ايلمش اولديغنه بناء وپروسيا وانكلتره دولتلى طرفدن رونما اولان تداركات وتهديداته نظرآ روسيه دولتك ارتق اول خصوصه صرف ذهن ايدده جك وقتى اولمديغندن صولى اشقياسنه وعد ايلمش اولدينى مبالغه اقدمجه جزئى مقدارينى ويرمش اولوب اكثرينى ويرمديكندن بشقه فيابعد طرفزدن خبر ظهور ايتدكجه حرکت اقتضا ايتز ديو شمديلك مصلحتك ترك وتأخيرى لازم كلش ايدوكنى اشعار ايلمشدر .

بعدمصالحه اشقياي مرقومه نك دفع ورفع غائله لرى موسمى اولمغين برمنوال سابق قبودان جديد كوچوك حسين باشا خلال شوالده سمت عزيمتى اخفا ايدرك دونماى هاپون ايله آق دكزه خروج وهمان اشقياي مرقومه اوزرينه حرکت وچامليجه طرفلارنده قره چقانك كيلرينه تصادف برله جنكه مباشرت ايتديكنده قره چقان مقاومت ايدمه جكنى جزم ايله باشدن قره ايدرك چامليجه طاغرينه فرار ايتمكن

در عقب قره یه عسکر اخراج اولنه رق اشقیانک کیمسی قتل و کیمسی اخذ واسیر
ایدلمش و بعده مانیه طرفه عزیمت اولتوب اولطرقده دخی لامبرونک معیتده کی
سقیه لردن بعضیسی احراق و سائر ی ضبط اولتوب قره یه عسکر اخراجیه بر آ دخی
بعض محاربات و قوعنده اشقیانک کیمسی اسیر و باقیسی اطرافه پریشان اولمشدر .
برمنوال سابق چاملیجه طرفه قره یه عسکر اخراج اولندقدده قره چانک طوتدینی
و بو محاربه ده لامبرونک فرار ایتدیکی و اصف تاریخنده مندرج ایسه ده قترینه تاریخنده
نهایه الامر مصالحه نك ختامی میسر و ذکر اولنان قره چان کیمیلری دونمای هایون
طرفدن اخذ ایله مجازات لایقه لرینه مظهر اولدقدن صکره مسفور قره چانه روسیه
دولتی صاحب چیقمیوب فی الاصل اضلالنه سبب اولمش ایکن ازباندید کر وهندندر
دیو جف القلم جواب و یردیکی و حتی کندو همشهر یلردن بعضیسنک اعاقی اولسه
شخص مرسوم تجهیز سفائن ماده سنده ایدندیکی دیون ایچون دوچار اولدینی
محبوسیتدن خلاصی بیله ممکن اولمه جعی آشکاردر دیو محرر اولدیغنه نظراً محاربه
مرفومه ده قره چان فرار ایلمش دیمک اولور .

هر نه حال ایسه ذکر اولنان اخبار ساره ذی القعدده نك اون التتجی کونی در سعاده
واصل اولدقدده سلطان سلیم خان حضر تلیری کنندی تربیتکرده سی اولان قبودان
جدیدک بو وجهله موفقیتدن پک زیاده محظوظ اولمشدر .

مقدمه کتایده بیان اولدینی اوزره خیلی مدتدنبرو امور بحریه یه اهتمام اولدینی
جهتله دولت علیه نك قوه بحریه سی تنزل و آق دکزده نفوذی تدنی ایلمش اولدینی
حالده برقاچ سنه دنبرو دونمای هایون قره دکز محاربه لر یله مشغول اولدیغندن
آق دکز مصلحتی متروک و مهممل و احوال سواحل و جزائر مختل اوله رق بالکلیه
امنیت منسلب اولدیغندن اوروبا دولتلیری دولت علیه یه طعن ایدوب امر اداره
و محافظه ده فقدان اقتداردن بحشه میت متحرک تسمیه ایتمه درجه لرینه کلش
اولدقلمری حالده الحمد لله آق دکزک امنیتی اعاده اولنه رق شان سلطنت سنیه یه
اسکی حال و درجه سنه عودت ایلدی دیو و اصف تاریخنده محرردر .

* وقایع مصریه *

جلد نالته بیان اولدینی وجهله مرحوم غازی حسن پاشا مصره واردقدده ابراهیم
و مراد بکار ایله آنلره منتسب اولان امرای مصریه صعید جانبسه فرار ایدوب
آنلره معارض اولان اسماعیل و جداوی حسن بکار دخی اول ائشاده خارجه ده
بولنمغه حسن پاشا طرفدن امارت ایله دفتر دارلق توجیه اولنان علی بک مصره

کسب نفوذ ایشم ایدی مؤخر آ اسماعیل بك ايله جداوی حسن بك دخی مصره کلد بئر
 واسماعیل بك مومی الیها ابراهیم و مراد بککرك افندیسی اولان ابوالذهبك رفیق
 و تانیسی اوله رق امرای مصریه ایچنده جمله دن زیاده متحیز اولدیغندن شیخ البلد
 نصب اولنوب کافه امور مصریه آنک یدینه تسلیم اولنمش ایدی .

آنحق جداوی حسن بك دخی قدماى امرادن اوله رق امرای مصریه نك بر چوغی
 اكا منتسب و آنک کوله سی اولمغین و دفتر دار علی بك دخی غازی حسن پاشانك
 میدانه کتورمش اولدینی ذواتدن بولمغین آنلر دخی نفوذده اسماعیل بکه مشارک
 اوله رق مناصب مصریه نك برخیلیسی حسن بککک ممالیکی یدنده ایدی . مع مافیه
 معارضلری اولان ابراهیم و مراد بککرك خوفندن ناشی جمله سی اسماعیل بکه سرفرو
 و آنکله اتحاد ایدرک مصرک محافظه سنه دامن درمیان اولمشلر ایدی و ابراهیم
 و مراد بککک سعید ایچنده اوتوروب جانب مصره کلاملری حسن پاشا وقتده
 قرار گیر اولمش ای دیسه ده کندولرندن بر وجهله امنیت جائز اولدیغندن
 اسماعیل بك طاغدن نیله قدر متریس حفر ایدرک و جیزه طرفلرینه استحکام
 ویره رک خصمانک تعدیسه اولدقچه کندوسنه امنیت کلوب بو آرده بر چوق مملوکلر
 اشترایله دبده و دارائی تکثیر و امرای مصریه نك برنده کورلماش مثلی نامسبق
 برعالی قوناق انشاسنه مبادرت برله هنوز اکل ایشم و تمام فراغ بال ايله جهانک
 صفاسنی سورمک و کسنه نك اثر وفا کورمدیکی ام دنیانک و فاسنی کورمک امیدینه
 دوشمش و حالبوکه : (ترقب زوالا متی قیل تم) مصداقجه وقت زوالی کلوب ایرشمش
 اولمسیله (۱۲۰۵) سنه سی خلاننده مصرده وقوعبولان و با تقریبیله نیجه خانلر
 آشیانه بوم و غراب اولدینی ائنده مشارالیه اسماعیل بك دخی سنه مرقومه شعباننده
 طاعوندن خسته اولوب يتاغه دوشدکده جمله امراسنی حضورینه جلب ايله کندو
 چراغی اولان امرایچنده جمله سنک مقدم و ممتازی اولان عثمان بکه خطاباً سن
 بسندن صکره قاله جق امرانک بیوکسین کوز یکی آج بن مصره اویله استحکام
 ویردیمکه بر قاری مالک اولسه اعداسی اکا ظفر بوله ماز دیوب ایکی کون صکره
 وفات ایتدیکنده جداوی حسن بك ايله دفتر دار علی بك شیخ البلدک نزاعنه
 دوشوب بعده سالف الذکر عثمان بککک شیخ البلد اولسنه جمله سنک اتفاقله قرار
 ویریله رک نزاع بر طرف اولمش ایسه ده عثمان بك بو خطب جسیمک اهلی و بو ایشک
 رجلی اولدیغندن حکومت مصری افندیسنک و کندوسنک اعداسنه تسلیم ایشمدر .
 شویله که : برمنسوال سابق اسماعیل بك و اکا منسوب اولان نیجه امرای توابع
 و خدمه لری ايله وفات ایتلرندن مصرده وقوعه کلان پریشانلقی ابراهیم و مراد بککک

فرصت اتخاذ ایله کندولرینه نظام و یروب مصره هجوم ایده جککری خبر آله رقی هر کسی حیرت استیلا ایتمکله امور مهمه رؤیتی پیمانده قلوب بو ائساده ایسه اخراجی وقتی ککش اولان امیرالحاج مصلحتی تأخیر قبول ایدر مواددن اولدیغی حالده بونک ایچون مرتب اولان بیک بشیوز کیسه مصریه آچه نک سکنز یوز کیسه سی عصات مرقومه نک عهده لرنده اولان مقاطعات مالسدن اولمق حسیله مبلغ مرقومک بای حال وقیله تدارک و تکمیلی ایجاب مصلحتدن اولدیغنه منی قریب العهده اسماعیل پاشانک یرینه مصر والیسی اولان عزت محمد پاشا اول امرده یوز کیسه سنی کندی خزینه سندن ادا و تسلیم ایتمکله سائره دخی غیرت کله رک ماعداسنی شیخ البلد وقت اولان عثمان بک و سائر امرای موجوده اعطا و اکمال ایدرک سنه مرقومه شوال مکرمنک یکرمی طقوزنجی کونی محفل شریفی اخراج ایتمشدر .

لکن متعاقبا ابراهیم بک و مراد بک عساکر کثیره ایله مصره اون التی ساعت مسافه سی اولان زاویه المطلوب نام محله ورود ایلد کلرنده عزت پاشایه و شیخ البلد عثمان بکه و سائر لرینه بشقه بشقه تخریرات کوندروب مضمون لرنده قاعده مصریون اوزره ابتدای امرده اظهار ملائمت برله مقدما اخوانمزله مضی ماضی دینلرک بارشوق ایستدک مرحوم اسماعیل بک استنکاف ایندی و الحاله هذه عیال و او طائمه اشتیاقمز مزداد اولدی . وزمان اغترابمز اوزادی آرتق صالح طریقله مصره واروب حضور و راحت اوزره اقامته عزیمت ایلدک و جنحه سابقه مزدن نائب و مستغفر اولدیغمزه منی جمله ایله باریشوب برکسنه یه ضرریمز اولماق اوزره مصره دخول ایده لم دیملر یله در حال ترتیب دیوان اولنه رقی تخریرات مرقومه جمله مواجهه سنده قرائت اولندقده مرقوملرک عهد و میثاق لرینه اعتماد جائز اولدیغی و مصره دخول لری لازم کلور ایسه حرکات سابقه لرینه جسارت ایده جککری حصار دیوان درمیان ایلدکارینه منی بالاتفاق جواب اوله رقی کندولرینه برقطعه مکتوب یازمشدر .

شویله که : طرفزه ارسال ایلدیککنز عریضه کنز و اصل اولوب مفهومی معلومنز اولمشدر . لکن توبه و انابتک اعظم شروطی اصحاب حقوقک حق لری ادا و محکمکرده اقامت ایلدکدر و بعض اتباعکنز بلاد او قافده اقامت ایدوب اموال و غلال او قافی اکل ایلدیلر مصرده اولان امره صره حرمنی کندو بدنلرندن و یروب کوندر دیلر سزلر بوقدر زماندرکه مطالب حرمنی کوندر مدیکنز و حقوق فقرای و یرمدیکنز الان اهل مدینه نک مطلوب لری ایچون طرفزه و امرایه و سادات علمایه و سائر و جوه مصریه یه عرض و محضر لری کلمشدر . بو حال ایله جر مکنز عفو ی نیجه رجاولنه بیلور اگر مراد کنز راحت ایدوب رضای پادشاهی تحصیل ایسه پادشاه عالمانه حضر تلرینک دخی

مراد هایونلری راحت فقرا و آسایش اهالیء حرمیندر مال میری بی و بش سنه لك
 غلالی و سنین سائره بقایالرینی و یررسکنز و کذلك مصرده کی امرادخی مطالب
 حرمینی ایستلر بونلری ادادنصکره صلحه طالب اولمکنز اقتضا ایدر سزی مصردن
 چیقاران پادشاهدر مصرده کی امرا دکلدز آنارک حرکتی امر پادشاهی ایله در
 مجرد مرامکنز مصالحه ایسه بومذکوراتک جمله سنی ادا و محللر یکنزه رجعت ایدوب
 بعده اعتماد ایده جک بر سند کوندر یرسکنز بندخی پادشاه عالمنه حضر تارندن رجا
 ایدرم صکره امرای مصریه ایله بار یشورسکنز زیرا بز بو طرفه کلد کدن صکره بزه
 و وجود بلدهیه خطاباً خط شریف وارد اولمشدر خلافته حرکت ایده میورز
 مملکت پادشاهک و اهالیسی پادشاه قولیدر مضموننده کندولرینه جوابنامه کوندرلش
 ایسهده امرای مرقومه بومقوله کلمات ایله فسح عزیمت ایتیموب عسا کر کنیه ایله
 اون بش قدر بال یمز و یکر می بشدن زیاده سرعت طوپلری و نهر آدخی مکمل
 مهمات و عسا کر ایله مشحون اون قطعه قرلنقج سفینه لری مثللو دونملری اولغله
 قوه موجودلری نی اوج قول ایدرک بر قولنی متوفی اسماعیل بکک طوره نام محله
 انشایتمش اولدینی قلعه اوزرینه و برقولنی چیزه طرفنه و برقولنی جبل جوش
 حداسنه سوق ایده جکلری جاسوسلر و ساطیله استخبار اولنوب برو طرفده ایسه
 علت وبا و شدت قحط و غلا حسیله اسبابک فقدانه نظراً مقاومت مشکل اوله جفی
 درکار ایسه ده در سعادت طرفندن کلان اراده سنیه موجبجه عزت پاشا مدافعهیه
 مجبور اولغین همان ذکر اولنان جوانب ثلثیه متانت و استحکام و یرلد کدنصکره
 سائر تدابیر حریبه ایچون امرا و او جاقولوی جمعه ترتیب دیوان ایتدکده عصات
 مرقومهیه مدافعه ایچون امرانک مصردن طشره چقمقلمری و پاشا دخی بر مقدار
 عسکر ایله کتخداسنی قلعه محافظه سنه براغوب کندوسی هرسمته اعانه ایچون
 هر طرفه جوار اولان قصر العین نام محله چیقوب انده اقامت ایتسی تنسیب اولندیغنه
 مبنی بو ترتیبات ایله اوغراشیلور ایکن امرای مرقومه اولدقلری محلدن حرکت و مصره
 اوج ساعت بعدی اولان طور نام محله ورود و قلعه مذکوریه هجوم ایلدکاری خبری
 آلدقده در حال قرار سابق و جهله شیخ البلد عثمان بك و امرای سائره مقابله لرینه شتاب
 و عزت پاشا دخی کتخداسنی قلعه محافظه سنه ترك ایله طوراً قلعه سی پیشکاهنده بر مناسب
 محله نزول ایلدکاری کون گروه مخالفین دخی ایکی ساعت محله کله ترك نصب خیام ایدوب
 او چنچی کون طرف غربیدن کلیتلو عربان سواریلری و ایچ اوغلانلری ایله جیره قلعه سنه
 و برو طرفدن شیخ البلد اردوسنه هجوم ایتدکارنده برو طرفدن دخی طوپلر ایله
 مدافعه اولنه رق اعاده اولملر ایله اون یدی کون بومنوال اوزره محاربه متمد اولوب

برو طرفدن برأ و نهرأ مصره داخل اوله ميه جقاريني جزم ايتدكر نده التي يديوز
 قدر دوه لره اوج كونلك ذخيره وصولريني تحميل ايله قديمي يول اولميان وصولدن
 و اودوندن خالی اولان جبل جوشدن آشوبده مصره بر ساعت قاله عزب قپوسی نام
 محله كله جككريني جاسوسلر خبر و يرملريله در عقب سنه مرقومه ذی القعدة سنك
 يكر منجی كونی عموماً عساكر و مهمات و طولر استصحاب اوله رق سير سريع ايله
 آنلردن اول عزب قپوسنه مواصلت اولنوب متعاقباً زمرة مخالفين دخی كمال محنت
 و مشقتله طاعدن اينه رك محل مرقومه كللريله آرتق بوكون برجسيم محاربه اولنوب
 مقدر نه ايسه ظهوره كلور دینلوردی امرای مصریه ايسه يكدیكره چندان امنیت
 ایده ميوب و خصوصاً جداوی حسن بك ايله دفتر دار علی بك بر بردن اشتباه اوزره
 اولوب لكن شيخ البلد عثمان بكك دونكلك ایده جكي كيمسهنك خاطرینه كلزدی
 زیرا زمرة مخالفينك خصم كیبری اولان مرحوم اسماعیل بكك ممالكندن اولدینی
 حالده آنك یرینه كچمشیدی حالبوكه بر منوال سابق زمرة مخالفين كمال مشقت و حال
 بی تابی ايله طاعدن اشاعه ايندكر نده همان اوزر لرینه هجوم اولنمق اوزره امرای
 مصریه بینلرنده مشورت ايتدكر نده عثمان بك مانع اوله رق عساكری كیرویه
 چككمكه زمرة مخالفين يورغو نلقلرینی كچوره جك قدر وقت قز انوب متعاقباً برو طرفده
 بولنان امرادن برقچی اوته طرفه كچمكه فوج فوج عساكر برو طرفدن اوته
 طرفه فرار و دخالت ایتمه كباشدینی ائنده شيخ البلد عثمان بكك برادری غزاوی
 مصطفی كاشف ایچ اوغلانلریله اول طرفه كچوب ابراهیم بك ايله ملاقات برله برادری
 عثمان بك حقدنه عهد و میثاق المغه عثمان بكك دخی كیتیمی ایچون ابراهیم بك
 طرفدن كندوسنه تحریرات كلكین وقت غروبده عثمان بك دخی كندویه تابع
 اولان امرای ايله واروب ابراهیم بك ايله وبعده مراد بك ايله ملاقات ایلدیكي تحقق
 ایديچك جداوی حسن بك ايله دفتر دار علی بك نه بیاجقارینی شاشیروب نهایت
 آنلر دخی كندولرینه تابع اولان امرای ايله برابر دشمنلرینك مقدماتمكن
 اولدقلى صعيدجانبنه فرار ایتلریله مصر قاهره حقدنه (هی لمن غلب) فقره سنك
 معناسی ظاهر اوله رق ابراهیم بك و مراد بك طاقی بلا مزاحم مصره دخول و مراد
 بك بر منوال سابق اسماعیل بكك یاپدیرمش اولدینی مكلف قوناعه نزول ایتمش
 اولسیله اسماعیل بك عزت نفسی ایچون بونجه تكلفات اختیار یله یامش اولدینی
 قوناعی كویا كه خصم جانی اولان مراد بكه تهیه ایلمش اولدی . و اول كیجه عزت
 پاشا قپوسی خلیقه عزب قپوسنده كیجه له مش اولدیغندن فر داسی ابراهیم بك
 و مراد بك مصره داخل اولدقلى كبی پاشا قلعه یه بیورسون محروسه كمال كان

منصبر بدر دیو خبر کوندر ملریله عزت پاشاقلعه یه دخول و مقامنه جلوس ایله واقع حالی در سعادتہ عرض وانها ایله کده چونکه مخالفینک تأدیب و تربیه لری متعسر و خطه مصر یه دن اخرا جلری متعذر اولمقدن ناشی جرایم سابقه لری عفو اولمق نیازی کویا مصر والیسی طرفدن مقدا عرض اولنمش اولسپله آنک التماسه مبنی عفو اولنمش اولدقلری زمینده فیما بعد دولت علیه کمال استقامتله خدمت ایلوب ارسالیه و غلال حرمین و سائر مطلوبات معینه دولتی سال بسال تنظیم و ارسال ایتملری و خلاف رضا حر کته جسارت اولنور ایسه مقدا وجوده کلان اقدام و همت کماکان اجرا اولنه جغنی ضمننده یازیلان اوامر علیه عتیق تاریخلر وضعه کوتوران تاتارلره انای راهده بعض اسبابدن ناشی وقتیه کله مدک دیو مناسب عذر لر بیان ایتملری تعایم اولمشدر .

مرقوملرک مصر نیتیه حر کتلی و مدافعه یه قدرت اولیوب خواه ناخواه مصره دخول ایده جکلری مقدا عزت پاشا طرفدن بالتحریر سیئات سابقه لری طرف دولت علیه دن عفو اولندیغی تقدیرده ناموس دولت محافظه اولنه رق بر رابطه قویه یه ارتباطلری ممکن اوله بیلور دیو حسن تدبیر اولنمشیدی لکن بعض وکلا بوقضیه بی مشار الیهک جرنفعیچون بر مقدمه خفیه اولمق دسیسه سنه حل ایله قطعاً تجویز ایتمیوب زمره مخالفینا کر مصره متوجه اولورلرایسه طرد و تبعید اولنملری قطعاً کندوسنه امر و اشعار اولنمشیدی بو کره بر منوال مشروح جبراً و قهراً مصره دخول ایتمکلرنده سوء ظنه ابتلا ایله وقت و حاله مناسب اولان تدبیرک اجرا و انفاذینه مانع اولنلر محجوب اولمشدر . بوندن صکره عزت پاشا و ابراهیم و مراد بکلر طرفلرندن بشقه بشقه رکاب هایونه هدایا ترتیب و تقدیم اولنوب اشبو (۲۰۶) سنه سی ذی الحججه سی خلائنده در سعادتہ واصل اولمشدر .

* بختکرای خانک نفی اولندیغی و وقایع سائرہ *

بالاده اشعار اولندیغی وجهه بوائنده عسکری نظاماتی و سرحداتک اسباب تقویه و استحکاماتی در دست مطالعه اولدیغدن روم ایلیده چقتلکنده مقیم اولوب فن تاریخده مهارتی مسلم انام و قوت ناطقه وجودت حافظه سی حسابیه مجلس مصاحبتی مطالعه کتبدن مستغنی اولمق فضیلتیه مشهور و بنام اولان قوبان خانی بختکرای خانک دخی بو باده رأی آلنق اوزره اشبو اتی سنه سی ذی القعدة سنده در سعادتہ جلبله بیک بفعجه سنده عقد مجلس اولنه رق صدر جدید ملک محمد پاشا ایله همزانوی انجمن مصاحبت اولدقلرنده امور سمریه یه و قوبان و قبارطی و اناپه طرفلرینک احوالنه دائر بعض مذاکرات و وقوعه کشدر . انجق مقدا بختکرای خانک بعض

اطوار ناچجاسی مسموع پادشاهی اولوب حتی صدراسبق حسن پاشانك صدراتنده بر مجلس مشورته قریم ماده سی در میان اولندقدہ جف القلم سز سائر یرلرک نظامه سعی ایدک قریمی نیلر سکرز آنک دعواسی سزه دوشمز دیویردیکی جهته و حالبوکه بوسفرک کشادیه دولت علیه نك بونجه زیان و خساره اوغرامسی و طرف اعدادن صلحه رغبت اولندجه سلطان سلیم خان حضر تترینک دوام حربی التزام ایتمی هپ قریمک استخلاصی مقصدینه مبنی اولمسیله بختکرای خانک بوسوزی اغبراز طبع ملوکانه بیه بادی اوله رق دها اول وقت عزلی تصور قلنمش فقط دفعه عزلی تقدیرنده قوبان طرفنده کی قالدینی واسطه سیله برفته چی قارمق احتمالی کبی بعض محاذیر مطالعه اولنگله وقت مرهونه تعلیق اولنمش ایدی . بوکره ملک پاشا ایله واقع اولان مذاکره لیدیخی سلطان سلیمه عرض اولندقدہ بختکرایک رأی و تدبیری اعظام اموردن ونجه محال اولان تکالیفی حاوی مواددن اولمسیله بر قاتدها اغبرار طبع هایونه بادی اولوب سفر بر طرف اولدیغنه نظراً ارتق قوبان خانی عنوانیه چفتلکنده اقامتی دخی مناسب کورلیدیکنه وفنون و صنایعک ترقیسی حسیله اصول حرب بشقه شکله و معاملات دولیه قالب آخره کیردیکندن اقبینچی عسکردن اولکی کبی فائده کوریه میه ریک شمدی مصاحت عسا کر معامله تدارکندن عبارت اولوب بو جهته تاتار طائفه سنک ناز و استغناسی چکمکه چندان حاجت کورلیدیکی حالده بوندن اقدام بیان ایتدی کمز و جهله سلاطین جنکیزیه نك روم ایلی جانبنده فقرايه ظلم و تعدیلری حددن زیاده و چفتلکلری خر سز لره مقر اولوب ولایه و حکام دخی دفع شمرلندن عاجز قالدینی جهته بر طرفه نفی و اجلالری مقرر بولندیغنه مبنی هان ذی الحجه نك دردنجی کونی بختکرای خان کیرید جزیره سنه نفی اولمشدر . بعده منقاسی مدلاو جزیره سنه و آندن ساقزه و آندن شورایه بورایه تحویل اولته رق نهایت دفعه ثانیه اولمق اوزره مدلاو جزیره سنده اقامت اوزره ایکن ایکیوز اون بش سنه سی رمضانده وفات ایلمشدر . اوائل حالنده بختی یاور اولوب پک مقبل و مقبول اوله رق عمر سورمشیکن او اخر عمری بویه ا کدار ایله کذار ایلمش اولدیغندن (بز بختی مساعد دیو مشهور ایدک اول) مصر اعی ماصدق حالی اولمشدر . قریمده حکومت ایدن سلاطین جنکیزیه نك قریمده حکومتلری شاهینکرای خاندۀ نهایت بولدینی مثللو سلسله خانیلری دخی بختکرای خان ایله منقطع اولمشدر . بزینۀ صدده کله لم

* وقایع چلدر *

سین عیدده دنبرو چلدر والیسی بولان سلیمان پاشانك ارکلی خان ایله اولان عداوت

و جدالریخی روسیله بهانه ایدرک عزلی ادعا ایدوب بوصورت ایسه شان واستقلال سلطنت سنییه منافی اولدیغندن اولوجهله عزله موافقت اولنه میوب روسیه سفرینک اسباب عدیده سندن بری دخی بوماده اولمسلیله برابر اردوی هایون درسعادتدن هنوز حقیقمدن اعلان حرب اولندیغنه بعض طرفلردن بیاغی ندامت الویردیکی وسبب اولانلر نشانه طعن وتشنیع اولدینی ائنده بوسلیمان پاشانک مظالم وتعدیاتی ورسوم عبودیتته منافی حرکاتی دخی موضوع بحث ایدیه رک عزلی تصور اولنوب انحق حرب اوستی اولطرفدن قالدرلسی تجویز اولنه مامش ایدی (۱۲۰۵) سنه سی جمادی الآخره سنک اوائلنده مشار الیه فوت اولدقده چونکه چلدر ایالتی لازم الاعتناسر حداث اسلامیه دن اولدیغندن بونک ایچون درسعادتده بر مجلس مخصوص عقد اولنوب کیفیت درمیان اولنه رق اول حوالی احوالنه واقف اولنلردن لدی السؤال الیوم اخسخته ده خاندان زاده لردن متوفای مشار الیه سلیمان پاشانک اوغلی قوجی باشی شریف محمد بک وحاجی پاشا حفیدی چلدر والیسی اسبق حسن پاشا زاده میر میراندن اسحق پاشا و خاصه سلحشور لردن محمد ثابت بک ومصطفی بک ایله پوسقه بکی صادق بک اولوب اشبو صادق بک ایله حسن پاشانک کوچک اوغلی مومی الیه مصطفی بکک اوله میه جقلری جهته والیک شریف بک واسحق پاشا وثابت بک بینلرنده قاله رق بونلردن برینک ترجیحی لازمکله چکی وشریف بک اون سکر یکر می یاشلرنده اولدینی حالده پدری اختیار آدم ایدوکنندن بر قاق سنه دنبرو چلدر ایالتی اداره ایتکده بولنمش ایدوکی واسحق پاشا احق بر آدم اولوب برادری ثابت بک عاقل ورشید اولدینی حالده بوخلالده درسعادتده کمش اولدینی افاده اولنمش ووفات ایدن وزرانک اموالی اولوقتک حکمنجه میرییه ضبط اولنحق عادت اولوب حالبوکه ایالت شریف بکه توجیه اولندقدده پدرینک اموالی میدانه چیقارمیه جنی ماحوظ بولنمش اولمغین سلیمان پاشانک اموالی میدانه چیقارمق شرطیله ایالتک ثابت بکه توجیهی شقی ترجیح اولنمش ایسه ده کتخدای رکاب طرفندن ثابت بک جلب ایله استانبوله نیچون کمش اولدینی سؤال اولندقدده سلیمان پاشانک وقوع وفاتی حسیده ایالت چلدرک بیوک برادری اسحق پاشایه توجیهی استرحامی ایچون کلدیکنی لدی الافاده سنک بیوک قر نداشتک سکوتی بر آدم اعمش افندیلر من سنی اراده ایدرلر ایسه نه دیرسین دیوکتخدا بک استمزاج ایتسنه جواباً ثابت بک اوجاغمزک عادتته اویماز هم بن آنک ایچون کشیکن صکره کندم ایچون کمش اولورم بر نوع حیله کارلق اولور اهالی بیننده اعتبارم قالمز بیوک برادریه احسان بیوریلور ایسه هر وجهله خدمتده قصور اولنیه جغه بن تمهد

ایدرم دیمکله چلدیر ایاتی مومی الیه اسحق پاشایه بارتبه والای وزارت توجیه اولنه رق برادری ثابت بکه دخی قوجی باشلیق احسان بیورلمشیدی انجق سلیمان پاشا مرحوم اوتنه دنبرو داغستان خانلریله یکدل ویکجهت اوله رق کندوسنه عسکر اقتضا ایتدکجه داغستاندن لژی عسکری جلب ایدردی ولزکیلر ایله کر جیلر بیننده مبانیت تامه اولدیغندن سلیمان پاشانک عساکری اکثریا کر جی دیارینه آقین ایتمکدن خالی اولماملریله برمنوال سابق سلیمان پاشا ایله ارکلی خان بیننده مبانیت مستقر ایدی لکن بو وسیله ایله آره ده کر جی کویلرینه تعرض اولمق حسیده چلدیر اهلایسی دخی بو طوردن خشنود ایدیلر روسیه لو ایسه بو کره ارکلی خانک مالکنه تعرض اولنماسنی معاهده یه درج ایتدیرمش اولدیغندن بشقه لزیکلر سلیمان پاشا خاندانه منسوب و اوغلی شریف بک ایله کرم الفت اولدقلرندن اسحق پاشا آلره امنیت ایده میوب شریف بکی استرقاب ولزکیلری استتقال ایله ارکلی خان طرفندن خرستیان سکبانی کتوردوب آنلری استخدام و شریف بک طرفنی تکدیردن خالی اولمزدی چلدیر اهلایسی ایسه بویله خرستیان عسکری استخدامندن طولانی اسحق پاشایه دلکیر و شریف بک طرفه مائل و منجذب اولوب اسحق پاشا دخی بوراسنی احساس ایدیک اهلاییه به عنف و قهر ایله معامله ایدرک کر جی سکبانلرینه رخصت ویرمکله آنلر دخی انواع مظالم و تعدیاته تصدی ایدر اولمشلر ایدی نهایت شریف بک دخی چلدیره قریب ساکن اولدینی محله وافر لژی عسکری جلب ایله کندوسنی محافظه صورتنده جمعیت پیدا ایدوب بو صورتله امرار وقت اولنور ایکن اهلای بلده اسحق پاشایه خیر خواهلق یوزنده کورینه رک شریف بکک حقندن کلنمک ایچون اوزرینه عسکر تعیین اولنسنی اخطار ایتدکلر نده اودخی اخسرخنک اهل اسلامنی نفیر عام طریقله جمع و کتخداسی معیتله شریف بک اوزرینه ارسال و کر جی سکبانلرینی دخی قوه احتیاطیه اولمق اوزره کیرودن سوق و تحریک ایدوب کر جیلره ده ازیاده امنیتی ایسه برقات ده اهلاینک عرق غضب و حمتلرینی تحریک ایتمکین شریف بکک عسکرینه ملاقی اولدقلری آنده جمله دن اول اسحق پاشا کتخداسنک دائره سی خلقی و بعده اخسرخنک اهل اسلام عسکری شریف بک طرفه کچوب و رالردن کلان کر جی سکبانلری اوزرینه هجوم و اقتحام ویرخیلینی افنا و اعدام ایتلریله شریف بک اخسرخیه دخول و اهالی دخی کندوسنه تبعیت ایتدکده اسحق پاشا فرار آرده اناه لدی الورود اهلایسی قبول ایتدکلر ندن مملکتی و چفتلکی اولان اولتونام محله واروب اورانک خلقی دخی قبول ایتاملریله ناچار برقاچ نفر اتباعیه اضرومه کله رک سید احمد پاشایه التجا ایلدیکی درعلیه یه عرض اولندقده ابتدای

امرده شریف بکک بوطور متغلبانه سی چرکین کورینه رک اسحق پاشانک مقامنه اعاده سی تصور اولتمش ایسه ده پیدر پی اخسخه وقارس طرفلرندن توارد ایدن اعلام ومحضر لرده اسحق پاشانک سوء حرکتی وشریف بکدن اهلینک خشنود اولدقلری بیان وانها وچدر ایالتک شریف بکه توجیهی رجا واستدعا اولنه کدیکندن وبوخلالده دولت علیه نظامات جدیده تاسیسیله مشغول اوله رق بومقوله غوائلک اندفاعی خصوصنده همان سمت سهولت کوزده دلمک لازم کدیکندن اشبواتی سنه سی وواخرنده چدر ایالتی رتبه وزارتله شریف بک عهده سنه توجیه واسحق پاشانک ارضرومه قریب حسن قلعه نام قصبه ده مرفوع الوزاره اوله رق اقامتی امروتیه بیورلمشدر .

* کاغد خانه قصرینک تعمیرینک *

بوئانده نظام دولته وعساکر معلمه ترتینه دائر وکلا ومتحیزان مأمورین سائر طرفلرندن لایحه لر تنظیم وتقدیم اولتمش وسلطان سلیم خان حضر تلی اصلاحات ملکیه وصکریه صره سنده عساکر معلمه تنظیم ایتمک نیت قلعیه سنده بولتمش ایدی . حتی کاغد خانه چاپرینک عساکر معلمه یه تعلیم میدانی اتخاذ اولتمشی تصمیم اولتمغه بوئانده کاغد خانه قصر هایوننک تعمیرینه باشلامشدر .

* ترسانه نظامی *

سالف الذکر لایحه لرده موضوع بحث اولان مسائلدن بری ترسانه اموری اولوب سلطان سلیم خان حضرت تلیرینک دونما حقنده اولان همتی ایسه بک زیاده ایدی . بناءً علیه اردوی هایونک عودتدنصکره سلطان مشارالیه حضر تلی بالجمله قوانین ونظاماتک تجدید واصلاحی ایاه مشغول اولدینی حالده ترسانه امورینه دخی کمال اهمیت ایاه اعتنا ایدرک اول باول سقائن حربیه بی صغروکبرینه کوره تفریق وتعداد وقبودانلردن اهلیت واستحقاقی نمایان اولنلری درجه استعدادلرینه کوره شایان اولدقلری قالیون یاخود فرقین ویا کوچک شهبته مقوله سی تکنه لره سواری نصب وآچیقده قلان قبودانلری دخی آنلره ملازم قید ایتدیردوب وازقدیم معین اولان سالیانه لرینه دخی ترقی احسان بیوروب شویانه که : قبودانه هایونک اوچ بیک اوچ یوز او توز اوچ غروش قرق آچمه سالیانه قدیمی یدی بیک بش یوزغروشه وپترونه هایونک ایکی بیک اوچ یوزتمش بش غروش سالیانه قدیمی آلی بیک غروشه ولیمان رئیسنگ ایکی بیک غروش سالیانه قدیمی آلی بیک غروشه وریاله هایونک بیک سکر یوزتمش بش غروش سالیانه قدیمی بش بیک غروشه و اوچ انبارلو قبودانک بش یوزغروش سالیانه قدیمی بیک بش یوزغروشه وقبودانه هایون قبودانک سکر یوزاو توز اوچ غروش سالیانه قدیمی ایکی بیک درت یوزاو توز اوچ غروشه ابلاغ

و سفر بر اولان سقاآن همایونک سواری قپودانلرینک علی العموم بیکر غروش سالیانه
 قدیملری اولمغله ایچلرندن الی بش والی اوچ ارشون قالیونلره راکب اولنلرک سالیانه سی
 ایکی بیک سکر یوز غروشه والی بر و قرق یدی و قرق بش ارشون قالیونلره راکب
 اولنلرک سالیانه سی ایکی بیک اوچ یوز الی غروشه والی بر و قرق یدی ارشون
 فرقتینه راکب اولنلرک سالیانه سی بیک سکر یوز الی غروشه و قرق اوچ ذراعدن
 اوتوز ذراع دک فرقتین وشهتیه وسائر یه راکب اولنلرک سالیانه لری بیک آتی یوز
 غروشه ابلاغ وسائر ملازم قپودانلرک دخی بووجهله سالیانه لرینه ضم ایله دائره
 معیشتلری توسیع بیورلمش و یونلرک عزل و نصبه و آله جقلری مهمانک نظامنه
 دائر برقطعه قانوننامه دخی تنظیم اولمشدر . شویله که : دونمای همایون قپودانه سی
 و پترونه سی و ریاله سی و لیمان رئیس لرینک محلول و قوعی و یاخود جنحه لری ظهوری
 ایله عزل و نصب لری تقدیرنده فی الاصل اولدینی مثلوقپودن پاشا بولنان ذاتک باب
 عالییه تقریر یله قپودانلردن قنده ماهر وشجاعت و صداقت ایله اهلیتی ظاهر احق
 و اصاحی هرکیم ایسه اول نصب و تعیین اولنق وسائر دونمای همایون سفینه لرندن
 قالیون و فرقتین وشهتیه وسائر قپودان ارکابنه شایان اولان سفن حر بیه یه سنجاق
 قپودانلری و لیمان رئیس مشورت و اتفاق لریله وجه مناسی اوزره سواری قپودانلردن
 برری تخصیص و ملازم قپودانلردن برری دخی اقتضا ایدن سفینه لره انتخاب وانها
 وینه قپودان پاشانک باب عالیدن استیدانی ایله نصب و تعیین قلمق و سواری اوله حق
 قپودانلرک آنجق استحقاق و لیاقتنه و فن دریا ده کمال و مهارته باقیلوب زنه ار اطراف
 رجاسیله خاطره رعایت اولنماق و هیچ برندن جائزه و عبودیت آلمیه جغندن بشقه
 قپودانلره طرف دولتن بالغاً مابلغ کرامیه ترتیب و اعطا اولنه حق اولمغله قپودانلر
 دخی سواری اولدق لری سفینه نک قصاب و قهوه مثللو خدمت لرینی سابقلرده بلمز ایده
 فروخت اولندیغی کبی صاتموب سفینه نک رئیس و یلکنجی و طوبجی باشیسی کبی
 کدکلورلردن استحقاقی ظاهر اولنلرینه آچه سز اوله رق ترتیب و تخصیص ایلملری
 لازم کلوب خلافنده حرکت ایدنلر تادیب اولنق و جنحه لری ظهور اتمدکجه بریسی
 عزل اولنماق و سفر و حضرده بریسی سفینه سنک نظارتدن آیرلماق و هر سفینه نک
 مهماتی ترسانه امینی و لیمان رئیس معرفت لریله سواری قپودانلره تسلیم و لیمان دفترینه
 قید اولندقدن صکره برصورتی دخی قپودان دریا بولنان ذاته و برعینی دفترار وقته
 بعدالارائه باش محاسبه یه ویرملک و سفینه نک غومانه و آلات و سائر ادواتنک فناپذیر اولمقدن
 محافظه سی و سفینه نک امر تظہیری قپودانلرک وظائف مأموریتلرندن اولق و سواری
 قپودانلردن وظیفه سنی ایفاده قصور ایدنلر اولور ایسه سفینه سندن اخراج ایله درجه

جنحه سنه كوره تأديب و يرينه سنجاق قپودانلرينك اتفناق واختيارلري وقپودان پاشانك رأى و اراده لري ايله ملازم قپودانلردن برى نصب اولمق و محلول و قوعنده دخى بو وجهه تنظيم قلمق و بومقوله جنجهيه جسارت ايدنلري سنجاق قپودانلري اخبار ايتمز لرايسه صاحب جنحه اولان قپودان ايله بيله مظهر جزا اولمق و بر جنحه ايله سنجاق قپودانلردن برينك عزلى لازم كلكده يرينه اقتضا ايدنى كذلك نظام مذكور اوزره قپودان پاشا اختيار ايلمك و اصحاب جنجه نك تأديبى خصوصه اغماض اولنورسه قپودان پاشا معاتب اولمق و منحل اولان ملازم قپودانلق قپودانه هايون باش يرينه توجيه اولنوب بعده پترويه باش يرينى قپودانه يه ورياله باش يرينى پترويه على وجه التسلسل نقل ايايوب سائر كميلرك باش يرينلردن بر مستعدى جمه قپودانان و رؤسا معرفت لرياله اتخاب ورياله يه باش يرين و يرلك و خالى قالان باش يرينك كدوكنه ايكنجى يرين و آنك يرينه يلكننجيلردن كذلك جمه معرفت لري يرى ايصال و آنك يرينه دخى اوچنجى يرين و طوپوچى باشى و سائر كلكولردن كيم مناسب ايسه بعد الامتحان استحقاق و لياقتى نمايان اولدقده تعيين و تخصيص و بوجه محرر امتحان اولنه جقلمر دخى درجه استحقاقده مساوى اولور لرا ايسه احد همانك قپودان زاده و يا خود آبا و اجدادى ترسانه خدامى اولمى اسباب ترجيحدن عد اولمق و على الدوام بوسلسله و نظامه رعايت قلنه رق قپودانلق مرقوم ترسانه عامرديه خدمتى سبقت ايتماش فن درياده مهارتى اولميان اجابدن آدم لره رجا ايله و يرلمامك و اجابدن اولوب فن درياده مهارتى نمايان و درجه استحقاقى ظاهر و عيان اولنلره دخى قپودانلق و يرلمكده شروط مذكور هيه مخالفدر دينلميوب اهليت و استحقاقى جهتيه قپودانلق و يرلمك و سوارى قپودانلردن قواعد ترسانه يي بيلور و مجدداً سفينه تجهيزينه مقتدر مجرب و مستقيم اوقور يازار برينى ليان يرينى اولوب بالجمه مصارف ترسانه آنك انها و افاده سيه اولمق خصوص لري و ذخائر و مهمات و لوازم سائر نك صورت ترتيب و توزيع و تسليميله كيفيت محافظه لري مفصل و مشروح اوله رق قانوننامه مذكوره درج و تحرير و بوندن صكره ترسانه نك جزئى و كللى مواد سائر نظاميه سنك تنظيمى مصمم پادشاهى اولدينى دخى خاتمه سنده ياد و تذكير اولتمش و شرائط مذكوره فيما بعد دستور العمل طوتملق اوزره اشبو التى سنه سى ذى القعدة سنك يكرمى برى تاريخيه لازم كلان محللره علم و خبر لري و يرلمشدر بوندن صكره دخى سلطان سليم خان حضر تلى ترسانه امورينه اهتمام و اعتقادن خالى اوليوب زيرده بيان اولنه جنجى و وجهه تنظيم عساكر جديده صره سنده طوپخانه و خبره خانه كى قوه بحريه دولت عليه يي مجدداً احيا ايله مدت قليه نظر فنده قوتلو و كليتلو دونما تدارك ايلمشدر .

* تجدید قانون تیمار وزعامت *

سلطان عبدالحمید خان حضرت ترینسک اوائل سلطنتلرنده خلیجه صرف افکار اولنه رق زعامت و تیمارلر ایچون برقطعه قانوننامه قلمه آلتوب دستورالعمل طوتملسی ایچون اراده سنیه اصدار بیورلمش ایسه ده چه فائده که اجراسنه اقدام واهتام اولمندیغندن زعامت و تیمار احوالی اولکیدن زیاده مختل و مشوش اولمشیدی .

حتی کچن سفر اثناسنده اسماعیل قلعه سنک محافظه سنه مأمور اولان اناطولی ایالتی زعما و ارباب تیماری کیمی آلائی بکیسی اطماع و جزئی بهانه ایله اذن آلوب ولایتی جانبنه کیدرک و کیمی فرار ایدرک قلعه مستحفظدن خالی قالدقده محافظی طرفندن فریاد اولندیجه اناطولی ایالتی کچی برجسیم ایالت کندو معینته مأمور ایکن بویله فریاد ایلمک و هم صرفدر دینلمک مثللو معامله اولتمقده ایکن قلعه نیک استیلاسی وقوعنده درون قلعه ده موجود عساکرک اکثری شهید و بقیه سی اسیر اولدیغی سلطان سلیمه عرض اولندقده شهدا و اسیرانک مقداری معلوم اولتی ایچون وقت مصالحیه قدر اناطولی اقلامندن تیمار وزعامت آلتسون دیو امر ایدوب بعدالمصالحه اصحاب تیمارک جمله سی حیاتده و مملکتلرنده استراحتده اولدقلمر نمایان اولیجق اوزرلرنده اولان تیمارلرک ضبطنه قرار ویرلدی و قانون زعامت و تیمارک احیاسی تصمیم بیورلدی .

واکرچه عساکر معلمه ترتیبی اهم واقدم ایسه ده دولت علیه نیک مصرفی ایرادینه غالب اولدیغندن یکیدن هر نه پایله جق اولسه مصارفه قارشولق واردات بولمق لازم کله جکی جهتنه ابتدا برخیلی واردات جدیده تدارکنه چاره آرانلمقده اولدیغنه وزعما و ارباب تیمارک نظامی مصرفه محتاج اولمدیغندن بشقه برمنوال سابق دور حمید خانیده قانونلری وقت و حاله موافق اوله جق صورتنده ترتیب اولمش ایدوکنه مبنی آکا توفیقاً بوکره برقانوننامه قلمه نندی .

شویله که : سفر هایوننده ناموجود قید اولمش نقدر زعامت و تیمار واریسه قانوننامه جدید شروطنه تطبیقاً جمله سی رفع اولنه رق سنجاغنده بولتمق شرطیله سائر اصحاب استحقاقه ویرلمسی فرمان قلندی .

وزعما و ارباب تیمارک دائماً مقتدر و منتظم و مجتمع بولملمری ایچون آلائی بکیلیک ارباب استحقاقه مربوط وزعامت و تیمار توجیهاتی آلائی بکیلرک عرضلرینه منحصر و منوط وزعما و ارباب تیمار بالنفس سنجاغنده ساکن و آلائی بکیسی بیرانعی التده موجود بولتمق ایله مشروط اوله رق فی الاصل بوحوالات ثلثه قانون و نظاملرینک باشلو اساسلری اولوب انجق دوام نظام و انتظاملریله سنوی حاصلاتی بشیوز

غر وشدن دون اولان تيمارلرک قصريد و محلول و ناموجوددن الحاق ايله بشر بوز
 غروشه ابلاغ اولتملری ماترم و بودخی یوقلامه اصولک اجراسيله اشکنجی زعامت
 و تيمارلرک حاصلاتی بيلنمکه موقوف اولديغدن اساس رابع اولمق اوزره یوقلمه
 اصولی دخی وضع اولتهرق اشبو قانوننامه جدید بودرت اساس اوزره مبتنی اولغله
 سلطان عبدالحمیدخان حضر تلرینک زماننده یاپیلان سالف الذکر قانوننامه موادی جامعی
 اولدقدن بشقه ایالت عسکری بروالی معینه مأمور اولدقده طرف دولتن کندولرینه
 بافرمان عالی اذن کلدکجه والی بیوردیسیله وسائر وجهله عودت ایتملری و ایدرلر ايسه
 آلائی بکلیری و چری باشلیری سیاست و بویله عودت بهانهسیله کندولرندن رشوت آلان
 والیرک دخی تادیبلرینه مسارعت اولنسی و اوتدنبرو اوله کلدیکی وجهله عساکر مرقومه نک
 متریس قازمق ولدی الاقتضا متریسه کیرمک و طایبه یامق و سبت اورمک و وطور اراق طاشیمق
 و خندق تطهیر ایتمک و وطوپ نقلی خدمتده بولنمق و بونلر امثالی خدمتلی دخی ایفا
 ایتملری و هر سنجاقده موجود و نا موجودلرک یوقلامسی ایچون اوچ سنهنده بر
 یوقلامه جی تعیینیه تحقیقات لازمه اجراسی و آخر سنجاقده ساکن اولنلرک زعامت
 و تيمارلری رفعله سنجاق ملا زملرینه عرض اولنسی ولدی الاقتضا سرعسکر معینه
 ایالتو تعیین اولدقده فیما بعد توجیهاتلری سرعسکرلره حواله اولنامسی و سنهنده
 بر کره دفتر خاقانی یوقلانهرق صبی قید اولتمش اوللردن اون بش یاشنه بالغ
 اولنلرک جبهلولری رفعله اشکنجی قید اولتملری و سنجاغنده ساکن اوله میانلره
 قانون جدید تارینخندن اعتباراً برسنه مهل و یریلهرک بومدت ظرفنده زعامت
 و تيمارینی سنجاغنده ساکن و سفره مقتدر اولنلره قصريد ایتملرینه مساعدده
 اولنوب سنهسی ختامنده قصريد ایتمکی و سنجاغنده ساکن اولمدیغی تحقیق اولندقده
 تارک حکمنده اولغله سنجاغی آلائی بکلیسی نظامی وجهله مستحقنه عرض ایلمسی
 کبی بعض مواد زائده دخی ضم و علاوه قلمش و سپدره کیروب کتم و اخفا
 ايله ما کل اولان زعامت و تيمارلرک مستحقلره توجیهی قانون عتیق اقتضاسندن اولغین
 اولوجهله ظاهره بالاخراج مستحقلره توجیهاتنک اجراسی تقریر و تأکید اولنوب
 انجق و قیله زعامت و تيمارلرک برازی دخی اندرون خدمه سنه چراغلق اولمق اوزره
 و یرلمش اولدیغنه و بونلرک شمعی العاسی خدمه مرقومه نک مضایقه حالی موجب
 اوله جغه بناء فیما بعد ایالت عسکری اعتبار اولنان اشکنجیلرک زعامت و تيمارلری
 بونلره توجیه اولنماق اوزره یتمش عدد زعامت و تيمار انتخاب و افراز ايله اشبو اتمکلرک
 کرک اندرون هایون و کرک زلفلیان و تبرداران او جاقلرندن چراغله شایسته اولنلره
 باخط هایون توجیه اولتملری و مقدمات دیوان هایون و دفتر خانه خاقانی کتبه سنه مخصص

اولان كدك و ملازمتلرندن بعضى خارجدن بعض خدمه وسائر لرى عهده سنه كچمش اولديغندن بونلر دخى رفع اولنه رق قلملرينه اعطاسى خصوصلرى كدك قانوننامه جديده درج اولندي بوقانوننامه نك علم و خبر لرى سنه جديده وائلنده قلملره قيد اولمشدر .

* رؤس امتحانلى و تبديل مشيخت *

ذى القعدة نك اون اوچنجى كوفى رؤس امتحانلى ترتيب اولنوب تلخيصده واقع (والبلاغه فى الكلام مطابقته لمقتضى الحال) عباره سندن درس كوستريله رك رؤس تدريسه متهى اولان ملازمينك امتحانلى بالاجرا (عند الامتحان يكرم الرجل اويهان) قاعده سنجه كيمى رؤس تدريس ايله قرير العين و كيمى ملزم جواب (الياس احدى الراحتين) اولمشدر .

درجه عاليه ده جوابه موفق اولنلر كليبوللى احمد افندى و قدسى افندى و مشهور مصنف افندى و خروپوتى سيد حسن افندى و ارزنجانى مفتى زاده سيد محمد افندى و چهارشنبه وى سعيد افندى و مشاهير فضالان اخسخوى اوزون على افندى و مشهور بيوك دلى امين افندى و فيض الله افندى زاده سيد عبدالله افندى نام ذوات كرامدر . قديمى افندى منيب افدينك ماذونلرندن اولوب مؤخرآ درس و كيلي اولمشدر . ارزنجانى مفتى زاده نك استعاره عصامى اوزرينه حاشيه سى و تاليفات سآرهمسى واردر . سعيد افندى ايكيوز سنه سى امتحاننده مدرس اولان مشهور چهارشنبه لى محمد افدينك برادريدر .

عبدالله افندى مؤخرآ قيودان دريا اولوب علمدار پاشا وقعه سنده قتل اولنان رامز پاشادر .

بونلر هپ فضالاي عصر دن اولوب مجاس امتحان حكمنجه زاده لرى ترتيب مشروح اوزره در . الحق دلى امين افندى ايله مصنف افندى مدت مديده تدريس علومه نصب نفس اهتمام ايدرك سآرندن زياده شهرت بولمشدر .

على الخصوص امين افدينك صيتى مانند مثل سآر حالاً السنه انامده دائر اولوب اول عصره يتشمش اولان اسآده كرامدن ادراك ايلديكمز ذاتلر آنى جمله معاصر لرينه ترجيح ايدرلر ايدى .

لكن بونلر ك شان و شهرت لرى اياقلى كتبخانه كچي بقية الساف اولان فحول علمانك انقراضندن صكره اولوب يوقسه اسلافك كچي بك على و دائره معلومات و مزيتلرى غايت واسع ايدى .

امتحانده مایوس اولنلرک انکسار قلوبی عقیب امتحانده تبدل مشیخت کبی برادره یه بادی اولمق اعتقادی بین الناس شایع اولدینی حالده بوکره دخی بالتصادف مذکور امتحانندن برهفته صکره یعنی ذی القعدة نك یکریمی ایکنجی کونی شیخ الاسلام محمد مکی افدینک عزلی ظهور ایدرک یرینه شیخ الاسلام اسبق دری زاده عارف افدینک نانی شیخ الاسلام اولسی ظنون عامه یی تأیید ایلمشدر .

صکره لری بعض مشایخ اسلام بیله بوخصوصده دوچار تردد و اوهام اولغله او یله بر مصلحت خیرهده بموقوله افکار شامت کاری حدوثنه تاسف اولنور .

زیرا وقتیه طریق علمیه نك قوانین و نظاماتی پك مکمل و اصلا نقض و استنابول ایتمز صورتده دستور العمل ایکن قوانین سائره کبی بونلر دخی مختل اوله رق رتبه تدریسک عز و شرفنی محافظه ایده بیله جک یالکز بر امتحان اصولی باقی قالب ایشته بو اصولک دوامی طلبه علومدن نیجه ذواتک دقائق علمیه تحصیلسه بذل وجود ایلملرینی و مدارسده علما و فضالان بعض ذواتک یتشمسینی منتج اولوردی .

فی الواقع کسر قلب ماده سندن زیاده سیله احتراز بوملت فضائل منقبتک شعار حسنات آئارندن اولوب واقعا بلا موجب کوکل قیرمق انسانیت و انصافه یاقشماز سیئاتدن اولدینی و انخاندن در و بناء علیه اولبایده غایت دقت و اعتنا اولنمسی هر کسه واجباتند ندر شوقدرکه هر شیده (خیر الامور اوسطها) قاعده سنه رعایت ایله افراط و تفریط یولنه کیدلامک لازم اولدینی مثالو بوخصوصده دخی اعتدال دن تباعد اولنماق لازم کلور . مؤثر و ممنوع اولان انکسار قلبک تحقیق بر آدمک کیمسه یه مضرتی اولمان و حق درکار اولان برایشده غدرا حقندن محروم اولمیدر .

یوخسه عامه یه مضر و ذاتاً حقسز اولان ماده لرده عدم مساعده ایله دکدر بر یایر قاج شخصی ممنون ایتمک ایچون ملک و ملته عائد بر اصولی بوزمق افراط درجه سی اولغله بوکا عقلا میل ایتمز . و او یله بر فعل مفرطدن حاصل اوله جق مضرت عمومیه نك مسئولیتنه نفسنی القا ایلمز و دولت آدملرینه کوره غدر ایله قلب انجتمکدن حذر ایتمک نسل لازم ایسه قلب قیرمیم و کافه اصحاب حاجاتی حقلی حقسز ممنون ایده یم سودای خامیله فساد اصول دولتدن و اتلاف اموال خزائنن مجانبت ایلمک دخی اودرجه لازمدر . اشبو دستور سلامت نشور اربانه معلوم و طریق علمیه که اصحابی عباد اللهک جان و مال و عرضنک لدی الاقتضا نزع و حمایه سی حکمنه و ابسته اولان امر عظیم قضا مسئولیتنی حامل و ملت اسلامییه دیانجه و حسن اخلاق و تربیتجه سربنی اولمق شرف و مزیتنه ناائلدر لر آنلرک نااهل اولسی دولتجه و مذکجه و ملتجه نه مرتبه فساد و مهالکی موجب اوله جنی و مراتب جلیله علمیه نك اهانه تفویضی کبی بر امر مهم

ایچون اثبات اهلیت ایده مامش اولان بعض کسانک انکسار وانفعالندن برشی حاصل اولیه جنی و او منلولرک رؤسندن محرومیتله منکسر اولملرنده شرعاً و حکمةً اصلاً اندیشه و ترده ایجاب ایتیه جکی و میزله اجرای غرض و محاببت ایدرله ایسه و بالی آنلرک بوینته اولوب بونک مشایخ اسلام حضراتنه طوقنور بریری اولدینی امرغیر موهوم ایکن هر کس حقنه راضی اولیوب بویله بحق محروم قیلانلرک اکثری لغرض حقنده غدر اولندیغندن بجه بعض قضایای اتفاییه بویله بوکا عزو و اسناد ایده کملشدر .

مکی افندی عالم فاضل و عاقل و کامل بر ذات ایدی فقط پک اختیار اولمش و مقام مشیخته متفرع اولان امور مهمه بعض متعینان زمان النده قلمش ایدی .

بوآناده ایسه تجدید اصول و فروع و ترتیب قوانین و نظامات ایله یکیدن یکی یه پک چوق شیلر یایلمق و خصوصیه احوال عسکریه اصلاح قیلنمق ایجاب حال و مصلندن کوریلرک بروجه بالا ارکان دولت و مأمورین سائر طرفلرندن لایحله قلمه آلمش ایدو کندن و کلايه ظهیر و یاور اولمق اوزره نفوذینی اجرایه مقتدر بر ذاتک مقام مشیخته بولمنسی لازمه حالدن ایدی .

واصف افندی تکمیل برینه نظراً مکی افندی عزیلی ایسته بوسیلرندن یعنی برمنوال سابق غایت اختیار و رکوب و نزوله عذیم الاقتدار اولدیغندن و حسن مدافعه یه قدرتی اولیوب عنان اموری شونک بونک الیه کچمش اولسندن ناشیدر .

لکن سلیمان فائق افندی مجموعهنده کندو خطیله محرر اولدیغنه کوره مکی افندی بویله عزیله روم ایلی پایه لولرندن مجلس مشورته داخل و مصالح خفیة دولته محرم اولان تاتار جق عبدالله افندی سبب اولمش اولوب حتی بعد العزل زیارت ضمنده برکون یالیسنه واردقده مکی افندی اثنای مصاحبتده یالیسی ابنه سنک اسکیلیکنندن بجه مناسب کتوروب کیجه لری سیوری سینکندن و خصوصیه تاتار جقندن هیچ راحتیم یوقدر دیهرک حقنده واقع اولان اهانتی تلمیح ایلمش دیوتحریر اولمشدر .

فقط عبدالله افندی بعض اخلاقندن استماع اولدیغنه کوره نیچون شیخ الاسلام اولیورسین دیو کندوسندن سؤال اولندقده بن دولته خدمت ایلمک املنده ایم شیخ الاسلام اولسه امزمت ظرفنده عزل ایله ایشدن معطل قالورم دیمش اولدینی مرویدر . واکر مکی افندی عزیله عارف افندی مشیخته سعی ایتمش ایسه کندو علیه حركت ایله خطا ایتمش دیمک اولور .

زیرا مکی افندی هر وجهله کندوسنه مدارا وهر خصوصده آنک رأینه مراجعت ایده کدیکنندن آنک مشیخته معنوی شیخ الاسلامق ایدردی عارف افندی ایسه آنک نفوذ و اقبالی چکه میوب حتی عاقبه الامر آنی نفی ایتدیر مشیدی .

و بوجه بالا نظام دولته دائر لایحه قلمه آنلرک برنجیسی و تجدید اصول یولنده‌اک
ایلرو سکر دنلرک بریسی عبدالله افندی اولوب حالبوکه آنک طریق علمیه‌جه
تصور ایلدیکی موادی عارف افندی تصدیق ایتزدی . زیرا اویله قیود و شروط
قوانین و نظامات ایله مقید اولمق عارف افندی‌نک موافق مزاج سماحت امتزاجی
دکل ایدی .

زیرا عارف افندی خاندان علمدن و شرف حسب و نسب ایله حائز دستمایه فیض
اولان علمای رسمیه‌نک اک مقتدر و متفذلرندن اولدیغی حالده جود و سماحت
ایله موصوف و خاقه حد و اندازه سزلطف و عنایت ایلمکه مألوف اوله‌رق اصحاب
حاجاتدن کمنه‌یه رد ایله جواب و یرمک ایستمیوب هر طالبک اسعاف مسؤانی
التزام ایلردی .

حتی اولکی مشیختنده بعض توجیهانده استحقاقدن اعراض اولندی دیو خرده
بینان زمان دخل و اعتراض ایتمشلر ایدی . عارف افندی ایسه بودفعه دخی
او یولی التزام ایتشدر .

فقط بو اثناده اول باول نظامات عسکریه‌نک تمشیتی اهم اولدیغندن و کلاویه مظاهرت
ایلمک اوزرد اویله اطرافی چوق مقتدر و متفذلر ذاتک منصب فتواده بولنمسی ملتزم ایدی .
بناءً علی ذلک عارف افندی مشیختنده مستقل و طریق علمیه‌جه ایستدیکی کبی
اجرای نفوذه مقتدر اولمشیدی .

حتی عقب مشیختنده سابقاً مکّه مکرمه قاضیسی اسحاق افندی زاده احمد مختار
افندی بحسب الطریق استانبول قاضیسی اولمق و قاضیلق آخره تحویل اولندیغی
تقدیرجه پایه ایله تسلیت بولمق امیدنده ایکن تخلف مطلبین ایله مکدر و مغمووم
اوله‌رق ذاتاً و زماناً قابلیت و قدمندن بحشله طوغریدن طوغری‌یه رکاب هایونه
عرضحال تقدیم ایتسی منافی رسم ادب عداولتمغله در حال بروسه‌یه نفی ایدلمشدر .
الحاصل درمی زاده عارف افندی‌نک ایام مشیختنده عبدالله افندی‌نک طریق علمیه‌جه
آرزو ایلدیکی اصلاحاتک اجرایی قابل دکل ایدی .
بومبحثک تفصیلاتی و سالف الذکر لایحه‌لرک مندرجاتی زیور صحائف جلد آتی قیلنور .

(۱)

* پروسیا اتفاقنامه‌سی *

(شرط اول) طونه نهرینک برو طرفه دشمنلر تجاوز ایدر ایسه مراعاتی لازم
اولان موازنه‌یه خلل ترتب ایده جکندن پروسیا دولتی وعد و تعهد ایدرکه :
اشبو (۱۲۰۴) سنه‌سی اول بهارنده مجموع قوتیه‌نمچه و مسقو اوزرینه اعلان

حربه مباشرت ایلیه . شویله که : دولت علییه دشمنلریله شانلوقوی و محکم صلح
ایتدیرمدجه و دولت علییه کرک برآ و کرک قره دکز طرفدن استانبول شهری
ایچون بحرآ امنیت تامه کلدنجه محاربه بی ترک ایلیمیه بومقابله ده دولت علییه دخی درعهده
و وعد ایدرکه صلح ائناسنده نمچه دولتی تصرفده غالیچیا ایالتی ایله مقدهما له تقسیمنده
نمچه لولنک ضبط ایلدیکی ممالکی له جمهورینه نمچه لول طرفدن رد ایتدیرمکه سعی ایلیه
و دولت علییه نیک روسیا دولتی قوی دوستی و منفی اولمقدن ناشی نمچه و مسقولینک
پروسیالو ایله اولان مصلحتلرینه و ضرورت ملکیه سنه دائر اولان نزاعلرینه له لولنک
مصالح ملکیه لرینه خالی کلبه رک و پروسیا دولته فائده لول اوله رق کرکی کبی نظام و یریه .
(شرط ثانی) دولتین بیننده آستانه سعادتده (۱۱۷۰) تاریخنده منعقد اولان شرائط
کرکی کبی اجرا اولنق ایچون اشبو جدید اتفاق سندینه الحاق اولنه و پروسیا تجاری
سفینه لری بحر سفیدده سر بسیتیت اوزره سائر دوست احب اولان دولتلر مثلو کندو
بیراق و پاتنته لر یله کشت و کذار ایدوب جزائر تونس و طرابلس او جاقلری طرفدن
ذکر اولنان پروسیا تجار سفینه لری و جهان من الوجوه رنجیده ایتدیرلیه و ذکر اولنان
او جاقلر مقتضای سر بسیتلری اوزره پروسیا دولتیله بینلرنده رضای جانبین ایله
بشقه جه عقد معاهده ایلملری ایچون اشبو سند عقدند نصکره سالف الذکر او جاقلره
اخبار و تنبیه اولنه .

(شرط ثالث) دولت علییه ان شاء الله غالب و مظفر اولوب دشمنلر یدینه کچن قلعه
و ممالکتلری و علی الخصوص قریم جزیره سنی ضبط ایتدکجه دشمنلریله مصالحه
تجویز ایتماک نیتنده اولمغله دولت علییه آنلرله مصالحه اولدکجه پروسیا دولتی محاربه بی
ترک ایتیمیه بومقابله ده نمچه و مسقو ایله بردن یا خود منفرداً پروسیا و اسوج وله
مصالحه بی داخل اولدکجه دولت علییه مصالحه بی تجویز ایلیمیه و اگر بعدالمصالحه مرور
وقته پروسیا و اسوج دولتلریله له جمهورندن بریسی یا خود اوچی اوزرینه مسقو
ویا خود نمچه سفر ایدر ایسه دولت علییه اول سفری کندی اوزرینه واقع اولمش
عد ایلوب در حال بو اوچ دولته وار قوتیه اعانه ایلیه کذلک دولت علییه و اسوج
دولتی ایله له جمهورندن بریسی یا خود اوچی اوزرینه مسقو و یا خود نمچه مرور
وقته سفر ایدر ایسه پروسیا دولتی اول سفری کندی اوزرینه واقع اولمش عد
ایدوب در حال بو اوچ دولته وار قوتیه اعانه ایلیه و مادامکه نمچه و مسقو دولتلری له
جمهوری ایله اولان نزاعلری دولت علییه ایله پروسیا دولتنک انضمام همتلریله قطع
و تنظیم ایلیمیه و مسقو دولتی پروسیا دولتیله له جمهورینک امورینه دائر نزاعلرینه
نظام و یرمیه دولت علییه و پروسیا دولتی مسقو و نمچه ایله مصالحه اولمیلر و دشمنلرندن

آدیغی ممالکی رد ایتمه لر و اول ایکی دولته ایده جکاری مصالحه انکلتره و ندرلانده توسطاریله اولسنی وعد ایدر لر و بو ایکی دولتلر دخی صلحی تأخیر ایتمه لر و دولت علیه ایله پروسیا دولتی هر نه وقت دولتین مذکور تینک توسطاریله عقد صاحب ایدر لر ایسه اسوج دولتیله له جمهوری دخی صلحه ادخال ایله لر علی الخصوص پروسیا دولتی محارب دولتلرک همجوار ی اولمق حسیله طرف دولت علیه دن وعد اولنور که له لولرک و پروسیا لولرک امنیتینه و ضرورت ملکیه لرینه دأر اولان خصوصله نظام ویریه و پروسیا دولتی طرفدن دخی وعد اولنور که دولت علیه نك امنیته و ضرورت ملکیه سنه دأر اولان خصوصله نظام ویریه .

(شرط رابع) وجه مشروح اوزره صلح تمام اولدقدنصرکه پروسیا دولتی تعهد ایدر که عقد اولنه جق صلحه دولت علیه یدنده قالان ممالکی محافظه یه پروسیا قرالی ضامن و متکفل اولوب اشبو ضمان و کفالته انکلتره و ندرلانده واسوج وله دولتلرین دخی ادخاله پروسیا قرالی سعی و اهتام ایله و اولزمان پادشاه آل عثمان حضر تریله پروسیا قرالی بینلرنده اتفاق تدافعی عقد اولنوب انئی صلحه ایکی دولتک یعنی دولت علیه و پروسیا دولتک متصرف اولدق لری مملکتلرک امنیت و راحتی ایچون احدها آخرک مملکتلری محافظه سنه ضامن و متکفل اولمق خصوصی اولسنده درج اولنه و بناء علیه دولت علیه و پروسیا دولتی وعد ایدر لر که مستقو و نمچه دولتلری اشبو ایکی دولتک اوزرینه سفر ایتمک مراد ایدر لر ایسه عقد اولنه جق اتفاق شروطنه اعتباراً یا مجموع قوتلریله و یا خود شرط ایده جکاری بر مقدار عسکر له دولت علیه و پروسیا دولتی یکدیگره اعانه ایله لر و اگر اتفاق تدافعی عقد اولنمز دن اقدام شم دیکی مقاوله یه رغما دولت علیه ایله پروسیا دولتی اوزر لرینه دولدن بری سفر ایدر ایسه اول وقت متفق اولان دولتین بر لرینه مجموع قوتلریله اعانه ایله لر مادامکه دولت علیه ایله پروسیا دولتک شانلرینه لایق و مصلحت ملکیه لرینه وجوه ایله فائده لو و موافق صلح اولمدجه محاربه یی ترک ایتمه لر ممالک محروسه ده فرانسه لو و انکلتره دولتلری حقتنده جاری اولان معاملات و مساعدات پروسیا لو حقتنده جاری اوله .

(شرط خامس) اشبو معاهده نك تصدیق نامه لری بش آیده و ممکن اولور ایسه ده اوجه آستانه سعادتده مبادله اولنه .

(۲)

* استقلالی حاوی خط هایون *

سنکه وزیر اعظم وکیل مطلق صداقت علم شریف حسن پاشا سین .
سنی سلام سلامت التزام داورانه مه تلطف و اکرام ایلدکدنصرکه معلوم صداقت

ملزومك اولسونكه سلفك صدر سابق جزائرلى حسن پاشا حلول اجل مسمايله عازم دار بقا اولوب مقام صدارت عليه صادق و عاقل و فطانت و درايى مهام سلطنتى شامل احباب غيرت و حمتدن بر وزير كياست سميرك مهر هايون ملوكانهم ايله مقام صدارته نصبي و امر عظيم سردار اكر مينك دوش اهليتنه تفويضى لازم و سن وزراى عظام بينلرنده اوصاف مذكوره نك ما صدق اولديغكه بناء سنى انتخاب و قريحه صيحه ملوكانه مدن مهر هايون صدارت ايله تلتيف اولمكله كمال استقلالكى اعلان ايجون سراسره دوخته بر ثوب سمور و اسياق فاتحه الاكتاف شاهانه مدن بر قبضه مرصع شمشير عدو تدمير سلطانى احسان ملوكانهم اولوب ايصال و تبليغه مأمور سلحدار اغا قوم ايله ارسال اولمغله شريفات مكارم غايت خسر و انه مى خطوات تعظيم و ابجال ايله استقبال و خلعت فاخره شاهانه مى زيور دوش صداقت و شمشير برق نظير داورانه مى بندميان حمت و جمله ايله تاديه دعای دوام عمر و دولت ايلدكدنصكره جزئى و كللى كافه مهام سلطنت و خطوط جسميه سهسالارى و سفريه يه صرف مقدرت و سرحدلرك نظام و تقويه لرينه و عسكر و ذخيره و لوازم سائر و الحاصل مجموع اسباب سفريه نك بر يسنده نقصان اولنيه رق جمله سنى تاديه و اكاله و عون و عنایت خير الناصر ين ايله بوسنه مباركه ده هر طرفدن دشمنلرك قهر و تنكيلارى لازمه سنى استكمال و دولت عليه ايله متفق اولان اسوج و پروسيا دولتلرى دشمنلره محاربه يه اقدامه اولملى ايله بر و طرفدن دخى قوت و اقدام صرفيه دولت عليه مك غالبيتى موجب خدماته موفق اولمغله و لهلودخى بزم غالبيت مزه منتظر اولملى ايله آر القدن افلاق و بغدادنن اعدايى قالد رمغه و اسماعيل و ودين و آر القده اولان يرلى و نيش و بوسنه جانبلرينك لوازم تقويه لرى تكميله هر طرفدن دشمنلره هجومه غيرت ايديه سين دينمك صاحبي بيوكدر كوره يم سنى بنم دعام سنكله بيله در . سنى و سكا اطاعت و دينه حرمت ايدنلرى جناب حقه امانت ايلدم (ومن الله التوفيق)

(۳)

* جزارك دار السعاده اغاسيله سلحدار اغايه كوندرمىش اولديغى شقه *
 شام شريفك و قدس شريفك و حجاج مسلمينك احواللى دولت عليه نك معلوملرى اولوبده شام و ايلسى عزل و سائر نى امير الحاج ايتمك مرادلرى اولور ايسه درت يوز كيسه آچه شوكتلو ولى نعمت اقدمزك مطبخ عاليه رينه و يوز بيك غروش اقتضا ايدن محللره و ير ملك شرطيله شام شريف و صيدا الحاقيله مقبولدر . يوق اكر معلوم عاليلى اولمازده كلكان ابقا اولنور ايسه امر و فرمان اقدمكدر . قرآن حقيچون و رسول اللهك پاك روحى حقيچون مراسم منصب دكلدر انجق فقير

فقرا شوکتلو افندیمه انکسار ایده یورلر ایشیده یورم صبر و تحلم قلمدی جانمه
 ناق ایتدی آکابناء بوشقه بی یازدم . فی ۷ ذ سنه ۱۲۰۴ مهر
 احمد

(۴)

* زشتو یده پروسیا مرخصی بولنان لوکزینک ۱۷۹۰ سنه میلادیه سی *
 * کانوز اولنک سکزننجی کونی تاریخیله مورخاً دولت علیه مرخصلرینه *
 * اعطا ایلدیکی تقریرک ترجمه سیدر *

دولت علیه ابد مدت مرخصلری عطوفتلو افندیلر حضراتی طرفدن درمیان
 اولنوب بوداعیلرینک دقت و مطالعه سنه حواله وزبده ملاحظاتی مطالبه ایلدکری
 مواد ثلثه آتیه درکه ذکر و تفصیل اولنور . اولکی ماده او جقلو طرفندن ضبط
 و تسخیر اولنان نمچه سفینه لرینی رد و تضمین ایکنجی ماده افلاق و بغداد مالکنه
 نمچه قونسولسولرینک اقعاد و تعیینی او چنجی ماده قره دکزده نمچه سفائنک مرور
 و عبورلری خصوصاً سیدر بوداعیلرینک ستر وانکاره محالی یوقدرکه بیک یدیوز
 سکیمان درت سنه سی شباطنک یکر می کونی تاریخیله صراحة یاخود ضمناً
 مسطور شروط ثلثه مذکوره بی ناطق دولت علیه ایله بیج دواتی بیننده عقد و تنظیم
 اولنان معاهده نک سیاق و معانی اوروپاده منتشر اولوب دولت علیه ابد مدتک
 دوستلری سامعه سی قرع ایلدیکنده هر ماده ده مشهود و مجربلری اولان دقت
 و انتباه و بصیرت و کلای دواتی بوبابده مشاهده ایدمه مدکرلرندن متحیر قالمشلر در .
 خصوصاً معاهده مذکوره هنکام مصالحه ده مذاکره و تنظیم اولنمی حسینیه خوف
 و خشیت یاخود توافق جبری صورتلری رونما دکدر پروسیا دواتی هر تقدیر
 آستانده مقیم ایاجیلری دولت علیه نک تزايد فروشوکتی ضمننده غیرت و رغبتلرینی
 وقتاً بوقت اظهار و ابرازدن خلی دکل ایسه دخی مکان فردوس آشیان مرحوم
 و مغفورله سلطان عبدالحمید خان حضر تلری ایله متوفی روما ایمراطوری بیننده
 عقد اولنان معاهده جدیده تجارتیه دائر استشاره دکل رسماً دخی انها و افاده سنه
 مبادرت اولمدیغنه بناء قطعاً وقوف و آکاهی یوغیدی بعده نائره جنک وجدال
 دولت علیه ایله روسیه و نمچه دولتلری بیننده مشتعل اولوب نمچه و روسیه
 دولتلرینک اجتماع قوتلری حسینیه اوروپاده واقع ممالک دولت علیه نک بره قدرینی
 ضبط و استیلا ایلدکری اجلدن حشمتلو پروسیا قرالی کندو مصارفی وقوت
 عسکریه سیله نمچه دولتی ضبط و استیلا ایلدیکی بالجمله ممالکی دولت علیه ره رد و تسام

(ملاحظه سی)

ملاحظه سنی صندوقه خیالنده بعد التخیل فعله دخی کتور مشدر بیک یدیوز
 طقسان سنه سی کانون ناینک او توزنجی کونی تاریخیه دولت علیه ایله پروسیادولتی بینده
 آستانه علیه ده عقد اولنان اتفاق عهدنامه سنده شروط ثلثه تجارتیه دایر بردر لو
 صحبت گذران ایتمکله اتفاق مذکورده مسطور شرایطک نتایجی مثابه سنده اولوب
 بو ائنده تمشینه مأمور اولدیغمز ماده مصالحهیه اساس وضع اولنه جق ریشناشده
 عقد اولنان معاهدهیه داخل اوله مزدی بو صورتده پروسیا دولتک دولت علیهیه
 لندن کلور جمیع خدماتی اجراده خواهش ورغتی کلاسه ایسه دخی معاهده مذکورده
 تجارتک الغاسنی شروط مصالحهیه ادخالی ادعا ایلدیکی صورتده طریق سداد
 واستقامتدن انحرافی لازم کلدیکندن ماعدا بوداعیلری عطفولو مرخص افندیلر
 حضر اته اخطاری استصواب ایدرمکه معاهده مذکورده کمال تحری ایله بعد التذقیق
 مصالح ملکیه دولت علیهیه من وجه الغاسنی مضر اوله بیلدیکنی ملاحظه ایدرم بیک
 یدیوز قرق درت سنه سی شباطک یکرسی درنجی کونی تاریخیه صدر اعظم حمید
 خلیل پاشانک ویردیکی سنک مقدمه سنده بو وجهله بسط مقال اولنورکه دولت
 علیه ابد مدت عقد ایلدیکی جمیع معاهده لرنده مذکور شرایطک صفوت کامله ایله
 اجرا سنه مبادرت ودوست وهمجواری اولان نمچه دولتته دائماً ابراز آثار صفوت
 وموالات کاملهیه کسب اعتبار عادت قدیمه سی اولغین اشبو سند ایله شروط آینه نک
 سرمو وقایه ومرعاتنه رابطه وقرار ویروب فیما بعد نمچه دولتی حقننده اجرا
 اولنه جق معامله نک اساسی مثابه سنده عد و اعتبار وبلغراد عهدنامه سنده مندرج
 شروط مثللو دستور العمل واستوار اوله بو تقدیرجه مرخص افندیلر حضراتی
 سند مذکورک الغاسنه اصرار وقیام ایدرلر ایسه جمیع ملل بیننده وعلی الخصوص
 دولت علیهیه ده مرعی ومعتبر طوتیلان عهدوده رعایتدن مباحثت ایده جکلرندن
 ماعدا دولت علیهیه منافع کثیره سی درکار وهر وجهله الفاوانفساخنی موجب حالاتدن
 حذر ومجانبت درجه وجوبه ایدوکی آشکار اولان بلغراد عهدنامه سنده مسطور
 شرایطک اضعاغه مباشرت ایش اولورلر الی الان ایراد اولنان مقالات ایله مارکزده
 لوکرنی داعیلری اثبات ایتدیکنی مأمول ایدرکه معظم وموقر متفق حقنه پروسیاقرالی
 اجرایه مجبور دکدر واضافانه تأمل ایتدیکی صورتده نفعاً للدوله فدایه اجبار
 ایلدیکی بونجه اراضی وسیعه نصکره یدی سنه مقدم بالتراضی عقد اولنان تجارت
 معاهده سنک الغاسنی نمچه دولتته تکلیف واجبار ایدمز وماده مذکورده نک حصولی
 فرض اولنسه بیله دولت علیهیه بو مثللو تکلیف ایله نمچه دولتته دائماً مادام مصالح
 ملکیه سنه مضر عد ایلدیکی بلغراد عهدنامه سنه یاشمغه برمرشته اعطا ایلمک

مضرت ظاهره سنی اختیار ایش اولوب قالدیکه دولت علیه مرخصلری عطفوتلو
 افندیلر حضراتک مجبور اولدقلری درایت وروپته نظر آ تأمل وملاحظه ایتمک
 کر کدرلر که ندامت الغای عهدده وسویه اولدینی صورتده دول بیننده بر درلو
 امنیت قالمز دولت علیه مرخصلری طرفندن تجارت معاهده سی الغاسنه تشبث
 اولندیغی صورتده بو ائنده عقد اولنه حق واوروپاده کائن ممالک عثمانیه نك باعث
 تقویت واستحکامی اوله حق معاهده یه نمچه دولتی طرفندن وقیبه باب اعتراضک
 قتیحه جواز ویریلور مع مافیله بوداعیلری قرالمک متفق معظمنه نافع یاخود مرغوب
 اولان جمیع مواده مسارعتی وبالجمله وسائلی اهل ایتمک غیرتی ابراز ضمنده
 مواد ثلثه مذکوریه دائر ملاحظاتی تحریره اهتمام ایدرم اولکی ماده هر تقدیر
 دولت علیه به بارعظیم وحمل ثقیل کبی کورینور ایسه ده آستانه علیه ده نمچه ایلیچیسینک
 او جاقدر طرفندن ضبط اولنه حق سفاینک ثمنی تحقیق ایله اثبات مدعا یه کمال صعوبتی
 درکار وابطال دعاوی غیر ثابتده سهولت بیدار اولدیغنه بناءً ضبط اولنه حق سفاین
 مذکورنه نك تضمینی نادراً واقع اوله جنی آشکار اولدیغندن بشقه دولت علیه بلغراد
 واطه کبیر وخوتین قاعه لرینی وبوسنه بقاعنی ضبط وتصرف ایتدکده اقتضا ایدن
 متانت واستحکامی ووروب و دین ونیش قاعه لرنده محض نلر ترتیب وقره دکز لیمانلرنده
 مکمل کیلر تهیسه وتجهیز ایلدیکی حالده تکالیف بارده ایله تصدیق واز عاجدن طبیعتیله
 احتراز اولنه جنی بالتجربه مشاهده ایده بیولورلر اولوجهه منفعت وثمره سی نمایان
 اولان پروسیا ائقافتندن دخی استفاده اولنه رق اوقات ماضیه نك آثارینی کلیاً محو والغایه کسب
 اقتدار وسطوت ایده جکی باهردر قالدیکه افلاق وبغدان ممالکنده نصب وتعیین
 اولنان روسیه ونمچه قونسولسری ماده سنده هر تقدیر ترتیب ایدن مضرات آشکار
 ایسه دخی من وجه تصحیح وتعذیلر ممکندر مسفور قونسولسریک علی الدوام
 دولتلی طرفنه اعیان ومعتبران مملکتی جاب وتخصیص ودولت علیه ایله سفر
 وقوعنده اکثریا میدان رزم وجدال اولان ممالک مذکورده عسکر لرینه استحصال
 سهولت واستکساب انواع اعانتیه بذل همت ایلدکاری بی اشتباهدر اسفار ماضیه نك
 وقایعنده سرعسکران دولت نیجه امثال ایله تأیید مقال ایده بیولورلر بوندن اقدام نمچه
 دولتی طرفندن بکرشه نصب اولنان اجتهه بو ائنده افلاق وبغدانه دائر تألیف ایلدیکی
 کتابنده بویارلر طرفندن مارشال رومانجوفه تقدیم اولنان ورقی ذکر ایدر که مملکتین
 مذکورترین سکنه سنک روسیه دولته اولان درجه رغبتلری معلوم دولتلی بیورلمق
 ضمنده اشبو تقریریه ضم وعلاوه اولندی مع هذا بوداعیلری کتم ایده تمکه رغبت
 مذکور یالکتر قونسولسریک تحریکارینه مبنی اولیوب دولت علیه نك نصب وتعیین

ایله یکی بکلردن بعضیسنک اداره منوره لری سببیه رعایانک تفرق و وحشتلری نشأت ایلمشلردر کیمی هم محدود اولان دول مذ کوره نك مواعید و عطایا سندن جلب اولنوب کندو حرکاتیه افلاق و بغداد دیارلرینی اضلال ایتمشدر کیمی ویرکو و تکالیف غیر مسبوکه و اطوار غدارانه ایله دول سائریه رغبتنی تمی اینتدیر مشدر افلاق و بغدادن قونسولسولرک رفعنده صعوبت درکاردر زیراً بر ماده یه جواز ویرمامک بعدالجواز رفع و الغاسندن و جوهله اسهل ایدوکی ظاهر و رفع اولنسه بیه محاذیر مذ کوزه کلیاً مندفع اوله من و محاذیر مذ کوره نك اندفاعنه فیابعد دولت علیه نك دقت و بصیرتی لازم و لابدر بیک یدیوز سکسان درت سنه سنده شرفصدور ایدن خط شریف شوکت ردیفک تجددیدی ممالک مذ کوره سکته سنک تسلیته بادی اولوب شکایتلرینه یر قائلز و بکلر طرفندن خلافه وضع و حرکت نمایان اولور ایسه دولت علیه یه رفع رقعۀ اشکایه رخصت اهم مهامندر لکن بالتجربه معلوم اولدیکه رخصت ویرلسه دخی منغه بکلر طرفندن و سائل کثیره درکاردر انجق افلاق و بغدادنه روسیه و نمچه دولتلرینه اعطا اولنان امتیازاتیه پروسیا قونسولسولرک نصب و تعیینی دولت علیه یه و جوهله نافع برعلاج اولور ایدی دولت علیه ایله پروسیا دولتی بیننده فیابعد مؤبد و آلان مؤسس و مؤکد مصالح حقیقیه جانبین ایله مشید اولان روابط قویۀ اتفاق و اتحاد سببیه پروسیا قونسولوسی نمچه و روسیه حرکاتنه صادق مدقق و متیقظ برناظر و بکلرک حرکات و معاملات مخصوصه لرینه شاهد اوله بیلور ایدی دقایق مذ کوره دولت علیه متفق صادق اولان پروسیا قرالی ممالکی بیننده عقد اولنسی ممکن اولان روابط تجارتن حصولدیر اوله حق منفعت جانبته ملحق اولدینی صورتده افلاق و بغدادنه بر پروسیا قونسولوسی نصبندن ترتب ایده جک منافع متعدده یی دولت علیه بعدالمطالعہ پروسیا دولتی طرفندن کتغ نام دردمندک یرینه برغیری قونسولوس تعیینی دولت علیه طرفندن ادعا اولنه بیلور مذ کورک فطاتی و ابسلاتی و یوده نك حرکات و روابط خفیه سنی تدقیق و تقییشه مباشرتی حقوق بشر و ملله مغایر هلاکنی مؤدی اولمشدر قره دکزده سیرسفاین ماده سی دولت علیه نك مسقودولتیه مصالحه سنه عائد و راجعدر اشبو تقریر صحت سمیرله بوداعیلرینک قرالک تنبیهاتنه درجه متابعت و رغبت و صفوته و در دست اولان ماده مصالحه ائناسنده مرخص افندیلرک منتظر اوله بیلدکاری صورته بر دلیل اوله بیلور اشبو تقریر یریمک بعض دقایق علاوه سیله ختامی مناسب کوردم رأی خالصانه اوزره مرخص افندیلر حضراتی طرفندن تجارت معاهده سنک ماده سی ابتدای امرده در میان اولنماسی مناسب اولور ذکر و اخطارندن وجودینه اقرار حاصل اولور اقرار معاهده نك وقایه سنی ایجاب ایدر

نمجه مرخصی طرفدن تصدیقی مطالبه‌سنه انتظار انسب کورینور اولوقنده در عقب مطالبه‌سنه مامشات ایتمامک ایچون مرخص افندیلر حضراتی طرفدن دلائل سرد اولنه‌رق معاهده مذکوره‌نک بعض شرایطی اجرا‌سنده رونما اولان محاذیرده اصرار مناسب اولور و نمجه دولتی طرفدن افلاقده نصب اولنان رانجریق نام اجتنه‌نک سچلیاتین دولتنده طبع ایلیکی و مملکت افلاقده بلاشک و شبهه نشر ایلیکی کتایده مسطور مقدمات عصیان و سرکشلکدن بختله و او جاقلر طرفدن ضبط و استیلا اولنان سفاینک ثمنی تقدیرده درکار اولان صعوبتدن بدأ ايله شاید که اسباب مذکورده تاسیس اولنه‌حق براهین و دلائل ايله ذکر اولنان شرطینده بعض تعدیلات تحصیل میسر اوله لکن وجهان الوجوه فراموش اولنسی جائز دکلر که اشبو مواد ثلثه مذاکره‌سی بالطبع ماده مصالحه‌دن خارج اولوب پروسیا دولتی قوت و تداییریه دولت علیه استحصالی ایدوب نائل تسامیت اولدینی منافع جسمیه‌نک بر وجهله عوق و تأخیری و یا خود بومثالو مواد مذاکره‌سی ايله درجه عدمه ایصالیری قطعاً تجویز اولنیه اشبو تقریر اخطار سمیریه زبده ملاحظاتی و تعلیمات مخصوصه‌مک مفهوم حقیقت نموتی افاده ايله دوستانه مرخص افندیلر حضراتنه کشف راز ایلمک خصوصی وظیفه معامله خلاصانه عد ایلمشدر .

(۵)

* سالف الذکر لوکزینیک مرخص افندیلره اعطا ایتدیکی برقطه *

* لایحه سنک ترجمه سیدر *

عقد اولنه‌حق مصالحه‌یه پروسیا قرالی طرفدن درج و الحاقی ربط اولنان ضمان و کفالتک صورت و احاطه‌سنه دائر ملاحظات زشتوی قصبه سنده عقد روابط عهد ایدو جنک دولتینک ایکیسی دخی بیک یدیوز طقسان سنه‌سی شهر تموزک یکر می یدیسنده امضا و پروسیا دولتک متفقیری اولان دول بحریه‌نک مرخصلری واسطه سبله ضمان و کفالت ضمیمه تأیید و ابقا اولنان ریشنباش معاهداتی مصالحه مستقبه‌نک اساسی عد و اعتبار اولحق لازم کلدیکنی عقل سلیم متضاسنجه اقراره مجبور اولورلر ریشنباشده اعطا اولنان پروسیانک جواب آمیز سانحه‌سی ریشنباش مکالماتی مضبوطه سنده مقید و محرر اولان نمجه سانحه سنک نوجهله قبول اولدینغی محیط و شاملدر و سالف الذکر پروسیا سانحه‌سی بلااستنا و تبدیل قبول اولنوب مجار و چه قرالی طرفدن تصدیق و تأیید اولنغین اشبو ورق مذکورده مصالحه آتیه‌نک شروط صریحی مندرج و مشمول ایدوکی بدیهی الثبوتدر بو صورتده سانحه مذکورده مطالبه ایلسک مدعا ثابت اولور و معنای حقیقه‌سنه وصول شهر تموزک اون بشنده قونته هر جبرغ طرفدن نمجه

(مرخصلرینه)

مرخصلرینه اعطا اولنان تقریری تذکیر اقتضا ایدر تقریر مذکور ریشنباش
 مذاکراتی ایچون محاربه ایکی دولتک مالکنی قبل السفر اولان هیئت ارجاع ایلمک
 خصوصنه حصر ایدوب بو وجهله بسط مقال ایدرکه پروسیا قرالی غیری وجهله
 حرکت النده اولدیغنی ملاحظه برله فی الاصل انکلتره دولتیله بالاتفاق تحریر
 ایلدیکی مکتوبنده مذکور اساس قطعی ماده سنه یعنی دول محاربه نك ممالک جانینی
 اشبو محاربه دن اول اولان هیئته تکمیلأ ارجاع خصوصنه قرار ایدر ایمدی پروسیا
 قرالک ادعاسی ممالک دأردر مجار قرالی دخی مارتک و نیسانک یکر می یدیسنده تحریر
 ایلدیکی مکتوبنده و خصوصاً مایسک یکر می بشنده یازدیغنی مکتوبنده علاوه ایلدیکی
 ملاحظاتنده اساس صحبتی ممالک محول ایدوکی فقره آتیه دن مبرهندر کرک دولت علیه
 جانبدن کرک جانب آخردن وجهاً من الوجوه توسیع ممالک داعیه سنده دکلم و مصالحه نك
 تنظیمی اساس اولک قبولنه منوط ایسه اساس مذکور کمال دقتله قبول ایدوب خصائص
 مخصوصه درونیه دخی اساس مذکورک مقتضاسنه موافق اولغین اساس مذکور
 اوزره تأسیس بنیان مذاکراته قطعاً تعلل و مخالفت اتمم دیو تحریر ایلمشدر مضمون
 مذکور دن ظاهره چیتمشدرکه مجار قرالی توسیع ممالک داعیه لرینی انکار دن
 استاتوقو یعنی هیئت سابقه نی مکلمه ده اساس قبولندن بحث ایدوب تعبیر مذکور
 دخی انجق حکمدارین میاننده صحبتی گذران ایدن ممالک جانینه مصروف اوله بیلدیکی
 آشکار اولوب براهین مذکوره به بنباء قونته ده هر جبرغ قرالی اسمنده اوله رق
 اعلان و نیچه مرخصلرینه بو وجهله بیان ایدر حشمتلو پروسیا قرالی طلب و استدعا
 ایدرکه مجار و چه قرالی دولت علیه عثمانیه ایله نظام و یریله جک مصالحه مطلقه سنک
 اساسی اوله رق قبل السفر اولدیغنی وجه اوزره هیئت سابقه خصوصنی کاملاً قبولنه
 رضاداده اوله و ماده مذکوره نی بر معاهده اساس علامه یا خود بالتراضی استصواب
 اولنه جق وجه آخر ایله تأیید و اساس مذکور اوزره اول باول و بلا تأخیر بر متارکه
 و بعده علی العجله بر مصالحه قطعیه و دولت علیه دن ضبط و استیلا ایلدیکی ممالکن
 مسقولوبه بریسی ترک ایتیموب جمله سنی دولت ابد مدت رد و تسلیم ایده جکنی تأکید
 و تعهد رغبت ایلیه سالف الذکر هیئت سابقه کامله دولت علیه دن نیچه عسکرینک
 ضبط و استیلا ایلدیکی ممالکنک رد و تسلیمندن غیری معنایه محمول اوله بیلور می
 فلا جرم شک و شبهه دن عاری و بری اولورکه قبل السفر اولان هیئت سابقه
 کامله نك ارجاعنه پروسیا قرالی مراد ایتمشدر و بوندن غیری معنایه محتمل دکلدر
 یعنی اشبو محاربه ابتدا سندن بو ضبط اولنان جمیع قلاع و شهرور و اراضی نی رد
 و تسلیم و نیچه و کلاسی طرفندن دخی هیئت سابقه مطلقه یا خود کامله تعبیرینه بوندن

غیری معنا ویرلیوب انحق پروسیانک معناسنه مطابق ایدوکنه شهر تموزک اون
 بشنده پروسیالو طرفندن ویریلان تقریره نمچه مرخصلرینک شهر تموزک یکرمی
 یدیسنده جواب اولوق اوزره ویردکاری سانحه صراحة دلالت ایدوب بو وجهه
 اتیان مقال اولنورکه حشمتلو مجار وچه قرالی دولت علیه ایله متارکه و قبل السفر
 اولدینی وجه اوزره هیئت سابقه بی اساس وضع ایدرک تجدید مصالحیه رضا داده
 اولوب مامول ایدرکه دولت علیه دخی ضبط اولنان بونجه اراضی واسعه نکر دینه
 نظر برله دولت علیه طرفندن دخی عقد اولنه حق مکلمات اثناسنده حدودک
 امنیته لایه و مقتضی بعض تعدیلات مصالحانه مساعدیه ایله بو وجهه دولتینک
 امن و آسایشی مستوجب مادهیه راضی اولوب هیئت سابقه مطلقه اساسی که قبول
 اولمشدر رد و تسلیم اراضی وسیعه تعبیریه ایضاح اولندی بومادهیه بدل دولت علیه دن
 مطلوب اولان انحق نمچه حدودینک امنیت و آسایشی موجب بعض تعدیلات
 مطالبه سیله اکتفا ایدرلر سانحه مذکورنک قصوری خوتین قلعه سنک امانت
 طریقیه قالمسینه دائر و مسقولو ماده سنده نمچه لونک بیطرفانی تعهدینه متدائر
 پروسیا قرالی تموزک یکرمی یدیسنده ویردیکی سانحه سنده بو وجهه بسط مقال
 اولنور . پروسیا قرالنک مطلوبی شو وجهه درکه : دولت علیه راضی اولدینی صورتده
 برآن اقدام عقد متارکه وبعده قبل السفر اولدینی وجه اوزره هیئت سابقه بی اساس
 وضع ایدرک مصالحیه رابطه و نظام و یروب بوضورته مجار وچه قرالی عقد
 مصالحه اولدینی عتمینده دولت علیه دن استیلا ایلدیکی جمیع اراضی بی رد و تسلیم
 ایله هیئت سابقه مطلقه تعیراتی دولت علیه دن ضبط و استیلا ایلدیکی اراضی بی رد و تسلیم
 ایله صراحة معناسی تبیین و تصریح اولمشدر حدودک امنیته مقتضی تعدیلات
 مصالحانه یه دائراملر نندن بحث ایدرک بو وجهه بسط مقال و افاده حال اولنورکه تعدیلات
 مذکورده دولت علیه نکر اراده سنه منوط اولدینی ذکر ایتدکن صکره پروسیا قرالنه
 موازن بدانی ویرمک شرطیه بعض استکسابات تعبیریه تعدیلات مذکورنک نوع و جنسی
 تعیین ایدرلر اشبو سانحه نکر شرط ثالثه طرفین سانحه لرنده مذکور هیئت سابقه نکر
 ضمان و کفالتیه لیاقت و استحقاقی پروسیا قرالی کندویه حصر ایدوب جمعیت آتیه ده
 دخی توسط و سالف الذکر اساس اوزرینه بنا اولنه حق مصالحه قطعیه ده دخی ضمانتی
 عقد و شرط ایدر مجار قرالی دخی سانحه مذکوریه بی قبول و تصدیق ایلدیکنندن
 ماعدا شامل اولدینی جمیع شروطک کاملاً اجرا و تکمیلنی ربط تعهد ایلمشدر
 دلائل مذکورده دن استدلال اولنان بودرکه پروسیا مرخصی طرفندن اعطا اولنان
 و مجار وچه قرالی طرفندن قبول و دول بحریه نکر ضمان و کفالتیه تأیید اولنان سانحه نمچه

دولتیه دولت علیه بنده تنظیم اولنه جق مصالحه نك سند مستند و معتبری اولمشدر اساس مذکورك نتیجه خیریه سی اوله رق دولتلو صدر اعظم و بدر افخم حضر تریله پرنجده قبورغ بیننده بیک یدیوز طقسان سنه سی ایلولك اون یدیسنده پروسیا مرخصی قونته لوزی معرفتیه پروسیا قرانك توسطیله عقد اولنان متارکه سندی معدود اوله بیلور اشبو متارکه سندینك فقره اولاسنی قرانته نمچه وکلاسك و خصوصاً انشا و ترتیب ایلیان هر پرت نام مرخصك دول محاربه بیننده اساس وضع اولنان استاتوقو تعیرینه و یردکاری معاصراحة ظاهره چیقار بیک یدیوز طقسان سنه سی شهر تموزك یدیسنده مکتلو محار و چه قرالی و مکتلو پروسیا قرالی مرخصری بیننده ریشناشده عقد و امضا اولنان معاهده یه بناء محار قرالی دولت علیه ایله بر متارکه مطلقه و بعده اشبو محاربه نك ابتدا سند نبرو ضبط و استیلا اولنان بالجمله اراضی دولتی رد و تسایم ایلمك شرطیه بر مصالحه قطعیه عقد و تمهیدنی تعهد ایلیوب والی آخره اشبو مقدمه دن قضیه ثابت اولدی عقداولنه جق عهد نامه شروطنك نوعنی و زشتویده معاهد اولان جانبینه پروسیا قرالی طرفندن وعد اولنان ضمان و کفالتك حدودینی مین اولوب هیئت سابقه یه نمچه و پروسیا طرفندن و یریلان معانك حقیقتی معرف اولان دلائل سابقه تامل و مطالعه اولندوقده دولتین مذکور تین عقد اولنمش بولنان شروططن خارج مواده پروسیا قرانك ضمانتی صرف ایلمکه بروجهله استحقاقلری اولدینی بدیدار در زیر ا ضمان و کفالت مذکوره انجق ریشناش معاهده سنده مذکور اولان شروط ثلثه یه راجع اولوب اولاشبو محاربه ده ضبط و استیلا اولنان ممالك و اراضینك رد و تسلیمیه حدود قدیمه دولت علیه یی تجدید ثانیاً خوتین قلعه سنك قضا و انحاسیه دولت علیه نك مسقولو ایله مصالحه سنه د کین معزز و بیطرف قلمسی ثالثاً اشبو محاربه نك امتدادنده نمچه دولتنك مسقولو حقنه بیطرفلق شقی اختیار ایلمسی بوتقدیرجه اشبو شروط ثلثه دن و شروط مذکوره نك اجرایی خصوصندن خارج هر قننی ماده در میان اولور ایسه پروسیا قرالی طرفندن نمچه دولته و دولت علیه یه وعد و تعهد اولنان ضمان و کفالته داخل اوله مدینی آشکاردر .

(۶)

* زشتویده مکالمه مجلسنك یوم کشاندنده انکلتیره مرخصنك قرائت *

* ایلدیکی مقدمه سنك ترجمه سی *

معاهد اولان دولتین محترمینك مرخصری ساززیده ریشناش نام محله تیناً اساسلری وضع و ترتیب اولنمش مصالحه خیریه نك تکمیلی بابنده جانبینك اولو حکمدارلری

طرفین اشبوجعیتہ رسماً دعوت اولان دولتلی میزای اجرای توسطہ مأمور متوسط ایلیچیلر بوروز فیروزده شروع اولان مکالمات ایچون بو محبکیزی توکیل ایله خاصه تبریک ایدر لر اشبو مصلحت خیریہ نیک تکمیلی باینده دولتلی میزدن انتخاب اولنماز باعث شرف و مباهاتمز ایدوکنی حس و ادراک ایدر رز اولو دولتلی بکنزک نیات خیریہ لری مقتضاسنجہ سداد کامله ونیت حقیقیه موالات ایله تشریف ایلدی بکنز یقیناً مجزومدر . بز دندخی مقابله بالئله مترقب اولغہ استحقاق درکار اولغین بو محبکیز تحقیقه مباشرت ایدر مکہ طرفر دندخی وظیفه مأموریت محترمه مز اوزره کمال دقتله طرفداریدن مجانبت برله جمیع حرکاتمز حقانیتہ مطابق اوله جنی عندکیزده محقق اوله همان بر مصالحه خیریہ همحدود اولان ایکی دولتک مصافاتی اساطین قویہ و نامتغیره اوزره تجدید و تأکید ایله .

(۷)

* نچہ مرخصنک مقدمه سنک ترجمه سی *

ایمپراطور اقدام اریکه موروثه سنه جلوسی عقینده طبعی دوست عد ایلدیکی دولت عثمانیه ایله تجدید صلح و صلاحه خواهشکر اولوب بو مصلحت جسمیه بی بلا تأخیر تفکر و بیج شهرینه قبل الورود دخی ریشنباشده ویریلان نظامه مطابق قرار داده اولان مطالعاتی تدکر ایلمشدر . جاتینک دوستلری اولان اوچ درت دولتک عقد اولنه جق مصالحیه متوسط و زمین و کفیل اولمشدر دولت علیه دخی مطالعاتی مطابق ایدوکنی تحقیق ایدوب زشتویده بر مصالحه جمعیتی ترتیب اولغین قوالیر کبت واسطه سیله طرفینه عرض کلمات مصلحه حکیمانہ ایلیان متوسط مرخصلره و کرک عطوفتلو دولت علیه مرخصلرینه جاسار مشارالیهک طرفندن بو محبلرینی تکریم ایلدیکی رخصتنامه ایمپراطوریه سنک تطبیق اولمش سنداتی دفع و تسلیمه حاضر و آماده اولوب کمال ممنونیت و شکرانیت و تجلیل و تفخیم مخصوصه مه و جوهاله کسب صلاحیت ایلیان بر دولتک معیتنده بو مثالو خیرلو بر مأموریتله ارسال و ترخیص اولنما کمال مرتبه سرورمی مؤدی اولمشدر .

(۸)

* دولت علیه مرخصنک مقدمه سی *

توفیق و عنایت باری ایله عقد و تمهید اولنه جق مصالحه خیر انجام ریشنباشده واقع اولوب متارکه سندنده مسطور اولان اساس موجبنجہ حشمتلو مکتلو پروسیاقرالی جنابلرینک ضمان و کفالت و توسطی و انکلتزه دولتی و فلامنک جمهورینک ضمان

(و کفالتلریله)

و کفالت لریه حشمتلو مکتلو نمچه ایمراطوری جنابی مصالحیه خواهشکر اولدیغی
 پروسیا قرالی مشارالیه دولت علیه به تحریر ایتمکله حالا دیهیم افروز خلافت وشاهی
 و پیرایه تخت عالیبخت پادشاهی شوکتلو کرامتلو مهابتلو عظمتلو ولی نعمتمز پادشاه
 ستاره سپاه وشهر یار عظمت دستگاہ افدیمز حضر تلی و وجه مشروح اوزره مصالحیه
 قبوله میل و مساعدہ بیورملریه اشبو نیازمند درکاه الهی اعظم مراتب مولویتدن
 اولان مکء مکر مه پایه سیاه سابقا حلب قاضیسی سماحتلو فضیلتلو ابراهیم عصمت بک
 افندی حضر تلی و سابقا مکتوبی صدر عالی و حالا روزنامهچہ اول سعادتلو محمد
 دری افندی حضر تلیه معاً رخصت کامله ایله تعیین بیور مشلدر متوسط اولان دول
 مشار الیهمک درایتلو رویتلو ایلچیلری جنابلری دوستلریمز توسطیله شانلو اوله رق
 مصالحه عقیدینه رخصت کامله مز مقتضاسنجه اشبو محل مکالمه جمع اولنغله حق نعالی
 حضر تلی خیرلو وقتده و خیرلو زمانده خیرلوسیله عقد روابط و صفوت اولنسی
 میسر ایلیه آمین .

(ی)

* بیک ایکویز بش سنه سی خالانده دولت علیه ایله روسیه *

* مصالحه سنه دأر دانیمارقه لونک پروسیایه ویردیکی برقطه *

* تقریرک ترجمه سیدر *

دانیمارقه دولتی کندی التزاماتی ایفا ایدوب دانیمارقه قرانک غرضدن عاری خاطر
 خواهی اوزره مصالحه عامه نك اعاده سنه اصاح اولان دلائله مبنی متفق اولان
 دولت لک بودفعه ظهوره کلان مقاصدنی پترسپورغ شهرینه تحریر ایلمشدر . اول
 ائنده یالکز مبحث عنه اولان اساسی ترویج ایتمکن زیاده رخصتمز اولیوب
 بوحر کتمز دخی رد ایله واقع اولان اجوبه قطعیه ابواب مباحثه نك مسدود اولسنه
 سبب اولدیغی ظن اولنان بروقته مصادف اولسیله اول آراق یالکز اوقدر جق
 حرکت اولنه بیلمشدر . مع مافیله مسقو چاریجه سی شمدی به قدر سلوک ایتدیکی
 مسلک خواهشی ایله منسلک اوله رق افاده مرام صورتی اختیار ایدوب متفق اولان
 دولت لک حرکت کنسه باعث اولان حالاتی کرکی کبی تفکر و ملاحظه ایلدیکنه مبنی
 علی الاطلاق ایستاتوقو ترتیبندن استسکافنه سبب اولان حالاته دأر بلا تکلیف عرض
 مرام خصوصه دول متفق طرفندن احاله کوش قبول اولنه جغنی امید ایدر اقدمجه
 مسقو و کلاسی طرفندن ایراد اولنان دلائلک بودفعه ذکر ی زائد اولوب دلائل
 مذکورہ بغیر حق واقع اولان محاربه دن نشئت ایدن ضایعاتک بدلی طب اولنمق

خصوصی مسقو چاریجه سنک اصل استحقاقانیدن اولدیغنه مبنی اولدقدن بشقه بوآر القده ضبط اولسان اراضیدن یالکیز مصالحه نك دوام واستقرارینه استحکام ویره جک و حقیقت حاله نظر آ مسقولونک قطعاً توسعنه سبب اولمیه جق محالی آیقومق مرادنده ایدوکنه دائر چاریجه مشارالیه نك واقع اولان اعلان و بیانندن ظهوره کلان انصافه مبتنیدر مسقو چاریجه سی بعض دلائلی علی التفصیل طرفه زده افاده خصوصنده تردد ایتماکله متفق اولان دولتلرک دلائلی آکا افاده و ترویج خصوصنده کالیله غیرت ایلدی کمز کبی بوکره آنک طرفه زده واقع اولان مذکور دلائلی دخی صرف صداقت و قوت کلام ایله افاده و وظیفه ذمتمزدر مسقولو احوال و خیمه دهه بولندیغنی و بغیر حق هدنی اولدیغنی دشمنی دفع ایچون کمال مرتبه اقدام و اهتیماته مجبور اولدیغنی اقرار ایدوب انحق دشمنلرک بر یسندن خوف و احتراز ایتدیگی و دوست دائمی اتخاذ ایلدیگی دولتره فرط ارتباطی آثارینی دلائل وانحه ایله بالدفعات اظهار و حققرنده شانلو مصالحه لرک تسهیلنه کرات ایله ایتسدار ایتشیمکن بودفعه او مثللو دوستلرک منافسه یه مجبور اولملری کمال تأسفنه باعث برحالت ایدوکی و نقض عهد ایدن دولت حقنه لاجل التادیب اجراسی اقتضا ایدن بر اساسک صورت حقانیتدن اوله رق عزم سفر اولنان دولت علیه نه ترویجی ادعاسی حقانیت لوازمه بغایت مغایر اولدیغندن بشقه یالکیز او طرفک فائده سنه مبنی اولمق حسیله محضاً طرفه لیکه دلیل کافی اولدیغنی و بودفعه علی الاطلاق ایستاتوقو ترتیبی ترویج قیدنده اولان دولتلرک بر یسی اصلاً بر تاریخده ترتیب مذکور کی کندو حقنه قبول ایتش او لمدیغنی و علی الاطلاق ایستاتوقو ترتیبی دستور العمل طو تلمق اقتضایدی توسیع ممالکترینه دائر استناد ایلدیگری معاهده لر لغو اولمق لازم کاور ایدوکی و ترتیب مذکور وقت مسالمله ده اتفاق عامه ایله جمیع دولک حقنه قبول اولمقدقه ظلم و بیداد عد اولمق اقتضایده جکی و بر دولت کندی اوزرینه عزم سفر ایدن دولتمدن بدل مضرت طلب ایتماک خصوصه مجبور اولمق طبیعت کارک قواعدینه منافی برحالت ایدوکی و حرکات غدارانه یه مربوط اولان مخاطر لرک تقایله محارباتک و قوعبوملامسیچون اقتضا ایدن حالاتک استحصالی لازمه دن ایکن حالت مذکور ه یعنی نقض عهد ایدن دولتمدن بدل مضرت طلب اولتماق حالتی کستاخانگ و حقانیتسز لیکک توفیرینه باعث اولور بر ماده ایدوکی مضمونلرینی دخی مسقو چاریجه سی تصدیق ایدر بوندن بشقه چاریجه مشارالیه الفاظ و افکار و تخیلات موهومه دن بحث ایتمک نیتنده اولیوب انحق بالتمام نیجه نیجه ممالکی ردایلمک و مجرد حدودینک امنیتنی تحدید جدید ایله تحصیل ایچون یالکیز برقلعه و غیر منبت بر مقدار اراضی آیقومق ترتیبندن زیاده حقه مبنی

اوله جق بشقه بر ایستاتوقو اولمدینی وفی الحقیقه غالب اوله کلان دولتلردن اشبو
 انصاف بایمک دلائل واضحه قطعیه سندن زیاده ادله واضحه ابراز ایتش دیکر بر دولت
 بولمدینی ملاحظه سنی دوستقلرینه خواهشکر اولدینی دولتلرک موازنه عدل
 وانصافسه احاله ایدر مسقو چاریچه سی کذلک ذکر ی آتی بعض ملاحظات مهمه ده
 اصرار برله حرکتلردن خوف واحتراز لازم کلان حرص وطمع ایله موصوف
 حکمدارلرک زمره سنه التحاقی قبول ایتدیکنی ویالکر امنیتی جهتیه کندو حقنه
 فائده لو وکرک مسقولو اراضیسنگ وکرک ممالک اسلامیهنک وسعتنه نظراً نقطه غیر
 محسوسه مثابه سنده اولان بر طرفی آیقومق ادعا سنده اولدینی و آل عثمان دولتی
 مضمحل ایتک قیدنده اولمدینی واشبو دولته تقریباً هر محلی رد ایله صیانت ومحافظه سنه
 قادر اولدقلری محملری رد و تسایم ایتک اوزره اولدینی وبوو جهله علی الاطلاق
 ایستاتوقو رینه علی طریق الحصر ایستاتوقو اساسی وضع اولمق سببیه دول متفقه کندو
 شانلرینه نقیصه ایراث اولمش اولمق ملاحظه سنه ذاهب اولمیه جقلری مأمول اولدینی
 وبالاده مذکور ایکی ترتیبدن علی طریق الحصر ترتیبی اول باول انکلتره دواتی طرفدن
 ذکر و ایراد اولمدینی مسقو چاریچه سنک خاطر نشانی اولدینی ومسقولو کرکی کبی
 موفق اولدینی اشبو محاربه نك فوآئینی فدا ایتک حالتی محضا کندی انصافدن نشئت
 ایلدیکی بابنده عالمی الزام ایچون اسباب لازمه به مالک اولمدیغه بناءً شانه نقیصه ترتب
 ایده جک دولت محضا مسقو دولتیدر زیرا ذکر اولدینی اوزره مسقو چاریچه سنک
 تحصیل ایلدیکی فوآئیدن کچمسی محضا اجنبی دولتلرک میانه به حلولیه واقع اولان
 تحویفاتدن ناشی بالضروره سرفرو دیمک اولدینی حالتیه عزو و حمل اوله جنی آشکار
 ایدو کئی دخی مسقو دواتی ایراد ایدر دولت مذکوره متفق اولان دولتلرک دوستاغنه
 کمال کر میت ایله آرزومند اوله فرق سالف الذکر دول متفقه اوروپایی اداره سوداسنه
 دوشمیوب یالکر مصالح ذات الین قیدنده اولدقلری صورتی تیقن ایلدیکی حالده
 دوستقلرینه خلوص اوزره طالب اولمقدن خالی دکلدردن و ذکر اولتان مسقو دولتی
 کرک بومادیه و کرک محاربه به ختام وقوی بر مصالحه نی تشید برله تحصیل امنیتدن
 بشقه بر خواخشی اولمدینی خصوصه دائر کرکی کبی افاده مرام ایدر مسقو
 چاریچه سی متفق اولان دولتلرک مصالحه اعاده سنه دائر حسن همتلرین رد ایدوبده
 کندو رعایانسنگ دمی بهاسیله مصالحه به دسترس اولمق خصوصه محتاج اولسی مسقو
 دولته بغایت مضر اولدینی معلومدر انجق چاریچه مشارالیه رعایایی حقنده لازم
 کلان بعض وظائفی اجرا ایتک مقتضیاتدن اولوب شویله که : دهلری بلا ثمره سفک
 اولمدینی وشانلو بر مصالحه ضمنتده اولمدی ایسه باری ناموسنه موافق وجهله

صلحك اعاده سيچون دملری سفك اولنمش اولديغی كندولره اثبات اولنق
 اقتضا ايدر بو تقدیرجه اول باول عزم سفر ايدوب اثنای محاربهده مغلوب
 و مردود اولان طرف فائدهك جمله سنه نائل اولديغی حاده مصالحهك اعاده سی
 ناموسه موافق اولمیه جنك ملاحظه سی دول متفقهك غرضدن خالی رأیلرینه
 احاله اولنور بوندنصکره ظهوری محتمل اولان هر برحالت ظهورنده دولت
 علیهك انصافی مسقو دولتك انصافنه معادل اولق ضمنده دول متفقهك کفالتنده
 مواقع و مسافات اراضی جهتیه نقدر مشکلات درکار اولديغی و اشبو مصالحتك
 حصولیچون اقتضا ایدن اسبابك نه رتبه صعب التدارك بولنديغی مسقو دولته رعنا
 معلوم و آشکاردر الحاصل مسقو چاریجه سی کندوسندن مطلوب اولديغی اوزره
 منصفه اولديغی مثللو دوست اتخاذا ایلدیکی دولتلك دخی انصافه استعدادلری
 کندوسنك مجزومی اولوب یالکیز ظهوره کلهجک انصافك مرتبه سنجه کشف
 مافی الضمیر ایتك وقوت و مکتبتدن قطعاً احتراز ایتماک قرار داده سیدر .

* خصوص سالف الذکره دائر دایمارقه لونك دیگر بر قطعه *

* تقریرینك ترجمه سیدر *

مسقو لینك بسط اولنان دلائل و اسبابنه ذکر ی آتی ملاحظاتی علاوه ایلمم
 اوزره قرالم طرفندن مأمور اولشمدر قرال مشارالیه مصافاتلریله اقتضار ایلدیکی
 دولتله طرفندن اشبو ذکر اولنه حق ملاحظاتك میزان کفایت ایله وزن
 اولنه جفته بغایت امید واردر علی الاطلاق استاتوقو اساسنك مسقو چاریجه سی
 طرفندن قبول اولنمسنه قرالم کمال کرمیت ایله خواهشکر ایدی انجق بودفعه
 چاریجه مشارالیهانك ردی مصالحه مصاحبت خیریه سنه مانع قطعی اولماق ماده سنه
 آرزومنددر امر مصالحهك ترویجی بابنده اقتضا ایدن خواهشك درکار اولسی
 ملاحظه سی جمیع ملاحظاتك ارجح و اعظمیدر . تصمیات قطعییه وقتی حلول
 ایلدیکنه بناءً بودفعه یا مقارنت و یا خود الی الابد مفارقت لازم کلهجکی بدیداردر
 طرفندن ایراد اولنان ادلهك وزن اولنسی دایمارقه لویه عائد اولمیوب تنسیب
 و یا خود تقییح اولنملری حالتی ایسه دولت مذکورنك قطعاً امورینه عائد
 احوالندن دکدر قرال مشارالیه یالکیز مزاج مصالحك بجراننه باعث اولان اسبابی
 ملاحظه برله بر طرفندن مصالحه عامهك اعاده سنه خواهشکر اولان دولتلك
 خواهشی و بر جانبندن دخی مسقو چاریجه سی کندی استقلالنه خلال کتورمامک
 و شانندن اعز اولان رعایاسنك اعتماد و محبتندن محروم قالمق ایچون چاریجه

مشارالیهانک احترازی غرضدن عاری وجه اوزره پسند واستحسان ایدر ضدیت
 اوزره اولان دولتین بیننده اعاده الف وانسیت ضمننده دولتین مشارالیهامان
 بری ویاخود دیکری طرفندن ابتدای حرکتک ظهوری طلب ویا ایراد اولنق
 خصوصی غیر مشمر ونابحل اولدینی مشارالیه قرالم عندنده رعنا معلوم و آشکار
 اولوب اشبو مادهی مشارالیه جنابلری التزام برله طرفینک حق اوزره نزاکت
 شانی لوازمه کرکی کبی رعایت و ذره مقداری ایراث تقیصه ووخیمه دن بجانب
 ایدرک طرفینک رأی بر وفق مرام حصوله کلتجیه قدر سینده مضافده مخزون
 و مکتوم اولدینی قرالم مشارالیه اعز اولان ناموسی حرمتنه تعهدایدر دول متفقہ نیک
 میانیه حلوالری نتیج مهمه یی منتج اولدینی آشکار اولوب حالت مذکورہ سببندن
 اولانمچه امپراطورینک صلحی ثانیاً روم ایلیده اولان ممالک اسلامیہ نیک تخلیصی ثالثاً
 مسقولونک غالبیتنه مبنی مسقو چارچہ سنک ادعالری حصر و قصر اولنسی خصوصاتی
 حصوله کلدیکی و بوتقدیرجه دولت علیه نیک هر درلو مصالحتی مجرد مدد رس اولان
 دول مذکورہ یوزندن حاصل اولغله دولت علیه اشبو دولترله الی الابد متتدار
 اولق اقتضا ایلدیکی و بوندن زیاده سنی مطالبه و دول مذکورہ یالکیز دولت علیه ایله
 عقد روابط اچون مسقو چارچہ سیله جمیع رابطلرین فسخ و جملہ سنی فدا ایلملرینی
 ادعا ایتک خصوصنه دولت علیه نیک استحقاقی اولدینی ظاهر در بوندن بشقه اوزی
 قلعه سی بالاستحکام دولت علیه تصرفنده ایکن مسقولویہ مضرتی دولت علیه یه
 فائده سندن افزون اولدینی کذلک امر باهر در شمدی یه قدر ظهوره کلان جمیع
 حرکات و اوضاعک اساسی اوروپانک اشبو اطرافنده موازنه نیک استقراری و فیابعد
 دخی استحکامی حاصل اولق و جهیله اعاده مصالحه مصالحته مبنی اولوب بنابرین
 قوتلرینه ضعف و فتور کش اولان دولترک مصالحه سی عقینده تکرار حربک
 اعاده سنی تسهیل ایدن اسبابک طرفیندن دفع و رفعی مابه المرام اولان موازنه
 محافظه سی مقتضاسندن اولدیغه بناءً ممکن ایسه بوندنصکره تجاوزی ترتیبانه مدار
 اولغله صلاحیتی اولیه حق وجه اوزره مجدداً حدود وضع اولنق لازمه خالدندر .
 بنابرین دانیمارقه قرالی علی طریق الحصر استاتوقو اساسنک بو دفعه دول متفقہ
 طرفیندن قبول اولنسی ایراد ایتک خصوصات ممکنه دن اولدینی ملاحظه ایدر .
 زیرا اوزی استحکاماتی بو دفعه کلیت اوزره هدم اولنهرق استحکامات مذکورہ
 بلکه فیابعد اصلاً بروقده بنا ایتدیرلیوب و بلکه اولطرفده اصلاً بر محده طوائف
 عسکریه دخی اسکان ایتدیرلمامک و بلکه محل مذکورک جملہ سی بالتام غیر مسکون
 و بره قالمق شروطنی ایله طورله نهرینه وارنجه اوزی و اراضی سی مسقولو تصرفنده

قالورایسه اول حالده مستو چارچه سنك ذكر اولان على طریق الحصر استاتوقو
 اساسه میل ورغبتی احتمالی مقدم ظاهر اولمشدر . طبیعت کاره نظر اصاحك مذاکره سنه
 وامر وسط وضعنه مدار اوله جق ممکنات ترتیب مذکور دن عبارت اولوب بوندن
 ماعدا مجدداً دوستلغك اعاده سی تقدیرنده محاربه یه متعاق اولیه رق ودول متفقه
 عندنده مرغوب اوله رق بالجمله دولترك بیننده وضع اولنه جق اساس مودت حرمتنه سائر
 ممکناتك دخی استحصالی ماحوظدر . ممکناتك جمله سی اشبو مصالحته خواهشکر
 اولان دولترك دست اختیارنده در . ممکن الحصول اولان خصوصاتی احد طرفینه
 ایراد وترویج ایتمك اوزره دانیارقه قرالنه شمدی یه قدر کمسنه طرفندن رخصت
 ویرلیوب انجق كرك دول متفقه وكرك مستو دواتی ایچون بر آن اقدم اعاده سی
 لازم اولان مصالحه مصالحته اقتضا ایدن غیرت وکر میت ایله خصوص مزبور قرالی
 مشارالیهه احاله اولنورایسه مشارالیه جنابلری اشبو مصالحتی ایراد وترویجه حاضر در .
 بالاده مذکور عبارتده درکار اولان کر میت وقتك اهمیتندن نشئت ایدوب مشارالیه
 دانیارقه قرالنگ دوست ومتفقلری اولان دولتر مصالحه عامه نك اعاده سی شانسی
 آخر هر درلو شانه ترجیح ودولت علیه یه صالحی تصدیق وتأمین وکندی ترتیلرینه
 دائر هر درلو شبهه یی رفع برله نمون اوله جق مستولینك دوستانه شانلو وجه
 اوزره مجدداً کسب استحقاق ایلملری خصوصتی قرال مشارالیه التماس ایدر . دانیارقه
 قرالنگ اول وجه اوزره بسط کلام ایلمسی قرال مشارالیهك مراجعت ایلدیکی
 دولتر مراد ایلدکلری صورتی اختیار خصوصنده مجبوریتلرنی ایجاب ایده جك
 اصلا برسند و معاهده درکار اولدیغنددر . ذکر اولنان دولترك بالجمله اتفاقلری
 تدافعی اولوب مابه المقصدلری دخی استراحت عامه نك اعاده سنه مبنی استراحت
 مذکور یه رعایت اولندجقه بالجمله اوروپا دولی استحسان ایده جکلری آشکاردر .
 دانیارقه قرالی دخی همدست معاونت اولقدن بشقه بر مرامی اولیوب جمیع مصالحك
 احسنی اولان امر مصالحه نك مستحق اولدینی غیرت وکر میت ایله معاوننده قصور
 ایتمك وظیفه ذمت مخالفیتدر .

(۱۱)

* بوقووینه قطعه سنك نمچه لویه ترك اولندینی مین ویریلان *

* سند صدر اعظمیدر *

باسمه سبحانه وتعالی

حالا رومه ایمراطوری وایمراطوریجه سی جناب حشمتآبلرینك آستانه سعادتده

مقیم ایلچیری رتبلو بارونده طغوت در علیه مههور تقریر عرض ایدوب مفهومنده لهقرالی وجهورندن استرداد برله الحاله هذه اوستریا خاندانك مالك اولدیغی غالچیا ولودومیریا ایلترینه اردل جانبندن سهولت طریق ایله بغداد اراضیسندن مرور و عبورک احتیاجی واردل ولایتلری کنارلرنده ایکی دولتک ممالکی سنورلرینک بعض محلدرده تعیین و تمینی ضمننده دولتی طرفندن بعض تقدیمات دوستانه مه مأمور اولدیغی آنها و دولت علیه ایله دولت ایمپراطور یه نك کمال صفوت و وفاق و نهایت خلوص و اتفاقنه مبنی و محبت قدیمه نك توثیق و تأکیدنه مبتنی ایرادات مرسومه نك مکالمه و تنظیمی باینده رخصت کامله سی اولدیغی ایلچیء مومی ایله بیان ایتمکله جانب دولت علیه دن دخی سابقا استانبول قاضیسی فضیلتلو احمد افندی و حالا رئیس الکتاب سعادتلو اسماعیل رائف بك افندی مواد مذکوره نك نظام و تمشیتنه مرخص تعیین و ایلچیء مومی ایله ایله بالدفعات عقد ایلدکاری مجالس مکالمه ده دولت ایمپراطور یه نك صورت تقدیمات دوستانه لری در میان اولتوب حقوق همجواری و صفوت و موالات دیرینه مه مراعاة تراضیء طرفین و توافق جانبین ایله درت ماده به قرار و برلشدرکه بعینها ذکر و بیان اولنور .

ماده اولی لهقرالی وجهورندن استخلاص برله بودفعه دولت ایمپراطور یه نك تحت تصرفلرنده اولان غالچیا ولودومیریا ولایتلرینه اردل مملکتک بلا فاصله اتصالی و سهولت ایله مرور و عبورچون ایجاب ایدن ضرورت و احتیاجلرینه دائر روما ایمپراطوری و ایمپراطورچمه سی جناب حشمتما بلزینک تقدیمات دوستانه لری مه مراعات ایله شك و شبهه دن عاری لوزم محبت دوستی و حسن همجواری بی اظهار و اجرا ضمننده بر طرفن نهر طورله و بوفچیا و مجار واردل کنارلریله و بر طرفن دخی وجه آنی بیان اوزره کشف و تصریح اولنه جق حدود ایله اراضی بی دولت علیه دولت ایمپراطوریه به فراغت و تسلیم ایدر . شویله که : حدود مرسومه نك حاوی اولدیغی اراضیء مرقومه بعد ازین علی الدوام ملکیت تامه اوزره دولت ایمپراطور یه نك تحت تصرفنده قاله و بناء علی هذا دولتین مالکنی تفریق و تمیز قطعی ایله تحدید ضمننده فیما بعد اعتبار اولنه جق حدود فاصله بی تعیین و تخصیص ایچون کرک دولت علیه و کرک دولت ایمپراطوریه طرفلرندن محدلر نصب و تسییر اولنه و مارالذکر طرفین محدلری اردل کنارندن خوتین اراضیسنه وارنجه جانب ایمپراطوریه دن ایلچیء مومی ایله واسطیله عرض و تقدیم و دولت علیه جانبندن دخی قبول اولنان خر یطه بی معمول بها طوملری قرار داده اولوب خر یطه مرقومه نك ایکی مصحح صورتی ترتیب اولتوب بر صورتی دولت علیه نك محدلرینه بر صورتی

دخی دولت ایمپراطور یه نك محمدلرینه ویر یله . شویله که : تحدیده قیام ایلدکر ندہ اردل کنار ندہ واقع تر نہ ایمپوچتیا نام صودن شروع اولنوب قاندرمی واستولبقانی وقبوقو دورولوی وصو چاوه وسیرت وچرنویج نام قر یه لری متعاقباً احاطه برله پروت نهر ینک اوتہ سندہ چرنویج اراضیسندن داخل حدود ایمپراطوریه اوله جق چرناوقه پیشکاغندن خوتین اراضیسنه وارنجہ خریطه مذکورہ مطابقت ایله و اشارت اولنان حوالی تیجاوز ایتمامک اوزره فیما بعد ایراد شکوک و شبہات ایله محتمل اولان منازعات متجددہ دن اجتناب ضمنندہ تفریق سنورہ مستعد اولان محللری اختیار والیق واسب اولان وجہله حدود مقررہ نی کرکی کبی تعیین و تمیز ایدلر و خوتین اراضیسنک چرنویج قضاسنه منتهی اولدینی محلدن اوتہ طرفی که طورله یه وارنجہ تحدید اوله جق اراضیدر بو خصوص ایچون طرفینک رضاسیله بوجہ اوزره قرار ویرلمشدر . محل مرقومدن طورله نهرینه وارنجہ خوتین اراضیسندن خارج اولق اوزره ویوم دولت ایمپراطوریه مأمورلرینک وضع ایلدکری حدودہ قیاس ایله دولت علیہ محمدلری حدود معینہ کوسترمک شرطیله خوتین قلعه سنہ مختص اولان اراضی کا کان دولت علیہ تصرفندہ قالسنہ دولت ایمپراطوریه محمدلری طرفندن معارضه و مداخله اولنیمه .

مادہ ثانیہ دولت علیہ نك دولت ایمپراطوریه فرغت و تسامیم ایلدیکی سالف البیان محدود و معین اراضی درونلر ندہ دولت ایمپراطوریه جانبندن قلعه انشا اولنیمه .
 مادہ ثالثہ افلاق و بغداد حدودلری اولان اردل مملکتلرینک انتہالر ندہ واقع بعض محللری افلاق و بغداد اہالیلرینک علی التدریج وقوعبولان تعدیلری حسیبہ تجاوز اولنوب براقچ سنہ دنبرو و قارتال نشانلریله تکرار اردلہ الحاق اولمش اراضی خصوصیچون بعد ازیں وقوعی محتمل اولان وجوه معارضه و منازعہ نك اندفاعی سیاقندہ دولت ایمپراطوریه طرفندن مطلوب اولدینی وجہ اوزره رضای جانبین ایله شویله نظام ویرلمشدر کہ ایلچی موسی ایله طرفندن تقدیم اولنان خریطه ده محرر و مرسوم و جانب ایمپراطوریه دن وضع اولنان قارتال نشانلریله تحدید اولنوب الان بولندقلری وجہ اوزره علی الدوام حدود مذکورہ رعایت و خلاف نظام مذکور تجاوز و تعدیدن مجانبت ایلملری بانسندہ افلاق و بغداد ویوہ دلرینہ طرف دولت علیہ دن اقتضا ایدن اوامر مؤکده اصدار اوله .

مادہ رابعہ نهر طونہ نك ساحل یسارندہ واقع آطه قلعه سنک قاروشو سندہ کائن عتیق ایرشود قصبہ سی جانبندن طرفین ملکلرینہ اختلاطی دولت ایمپراطوریه نك کرک لازاراته و کرک نظاملرینہ وجوه سائرہ دن خلل ویرمکدن خالی اولمدیغندن

ناشی قصبه مرقومه دن واکا متصل دل مثللو اراضیدن دولت علیه نك كفيد ايلمسی خصوصی کرچه دولت ایمراطوریه طرفدن تقدیم اولمش ایدی الحاله هذه بعدازین حقوق همجواریه و ممالک ایمراطوریه نك نظام وآسایشنه مغایر باجمله حرکات ناسزادن کمال دقت و تخری ایله اجتناب ایلملری ضمننده عتیق ایرشوه اهالیسنک ضبط و ربطلری دولت علیه تعهد ایتمکله ایکی دولتک حوالی مزبورده واقع حدودی الان بولندقلری منوال اوزره قالمسینه قرار ویرلمشدر .

خاتمه مواد اربعه مذکورہ نك بوجوه عقد و تمهیدی ایکی دواتک بیننده مقرر اولان وفور مخادنت و فرط مصافات و موالاتک استحکام و توثیق و دولتین ممالکنک حدود و سنورلرینه دأر حقوق همجواری و موالاته منافی نزاع وجدالک ارتفاعی ایله سرچشمه و داد و محبت قدیمه نك عروض تعیردن وقایه سی اراده سینه مبتنی اولوب فیابعد دواتینک اراضی و حدودلرنده باعث منازعه حالت قالمغله بالاده مذکور درت ماده نك تفصیل اولندیغی وجه اوزره صدق و خلوص ایله مراعات و قایه سی چون بزرگه دولت علیه دائمی القرار و سلطنت سنیه سرمدی الاستمرارک وزیر اعظم و وکیل مطلقه شهریار کشور کشا خسرو عدالت فرما قوت بازوی خلافت و جوهر شمشیر شوکت و صلابت شهنشاه انجم سپاه تاجدار فلک قدر و جواز درگاه مستند الملوك و السلاطین ناشر الویة العدل فی اقطار الارضین حامی ملة الیضا ماحی ظلمة البغضا سلطان البرین و خاقان البحرین خادم الحرمین الشریفین شوکتلو قدرتلو عظمتلو مهابتلو عدالتلو ولی النعمت پادشاهم اقدم حضر تلبینک طرف هایون جلالتمقر و نلرندن رخصت کلامه مز حسینیه اشبو تمسکی خاتم مز ایله تمهیر و توسیم ایلمشدر که رومه ایمراطوریه و ایمراطوریه سی مشار الیه مانک مستشارلرندن مرخصی واورته ایلیچسی مومی ایله بارونده طغونک دواتی طرفندن رخصتنامه سنه بناء معتاد اوزره تمضی و مهور و لسان افرنجی ایله محرر تمسکی ایله مبادله اولنه تحریراً فی یوم السابع من شهر ربیع الاول لسنة تسع وثمانین ومائة والف .

(۱۲)

* زشتوی قصبه سنده منعقد اولان تمچه مصالحه نامه سی *

حضرت خدای متعال جل شانہ عن الشیبه والمثالك میامن تأییدات ازلیه و توفیقات لمزیله سیله حضرت سلطان تحت نشین لولاک اولان مقدر اولاد بنی آدم مقصود آفرینش خالق عالم خاتم جمله رسل و انبیا پیشوای زمره اصفیا محرم حرم لی مع الله محمد رسول الله صلی الله علیه و سلمک معجزات کثیره البرکاتی مرافقتی و چهاریار کزین رضوان الله علیهم اجمعین و جمیع اولیای هدایت قرین و اتقیای کرام

سعادترهينك ارواح مقدسه لرى موافقتى ايله (محل طغرا) بنكه اشرف البلدان
والاماكن واسعد الامصار والمداين قبله عباد عالم ومحراب توجهات بنى آدم اولان
مكه مكرمه ومدينه منوره وحرم مسجد اقصى وقدس شريف مبارك خادم وحاكى
ورشك افكن قلوب سلاطين جهان اولان بلاد ثلثه معظمه كه استانبول وادرنه
وبروسه در آنلرك وشام جنت مشام ومصر نادره العصر بيهمتا وكليا عرستان
وافريقه يه وبرقه وقيروان وحلب وعراقين عرب وعجم ولحسا وديلم وقره وموصل
وشهرزور وديار بكر وذوالقدرية وولايت ارض روم وسيواس واطنه وقرمان ووان
ومغرب وحبس وطونس وطرابلس وقبريس وردوس وكريد وموره وآق دكز
وقره دكز وجزائر وسوا حليله ديار اناطولى وممالك روم ايلي وخصوصا بغداد
دار السلام وجميعا كردستان وروم وترك وتاتارستان وچراكسه وقبارطيان
وكرجستان ودشت قبچاق وایلات تاناره دائر اولحو اليرده واقع بالجمه صغناق
واظر افنده كائن اويماقان ومضافاتيله عموماً بوسنه وقلعه بلغراد دار الجهاد وصرپ
حكومتى وآنده كى قلاع وحصون وبلاد ارناودلق وبالتمام افلاق وبغدان وحواليسنده
واقع معاقل وثغور وتعريف وتوصيفدن مستغنى بقاع وامصارك پادشاه معدن تنهاى
وشهنشاه نصرت دستكاهى اولان السلطان ابن السلطان والحقان ابن الحقان السلطان سليم
خان ابن السلطان غازى مصطفى خان ابن السلطان الغازى احمد شاهم كه منشور سعادتنشور
سلطنتم توقيع رفيع سلطان البرين ايله موقع ومزين ومثال بيمثال خلاقتم عنوان عظمت
نشان خاقان البحرين ايله مطرز ومعنودر لاجرم برموجب كلام درى النظام وبالشكر
تدوم النعم تعظيم لامرالله وشفقة على خلق الله مضمونه رعايت وجود بهبود عالمسود
شاهانه مه موافق واحرا وهمت والاهممت شهر يارانمه لايق واولى اولمشدر .
بناء عليه دولت عليهم ايله نمچه دولتى بيننده برممدتدنبرو حسب القدر تكون ايدن شقاق
كافى السابق مبدل حسن وفاق اولمق خصوصنه طرفيندن اظهار خواهش ورغبت
اولنوب حقوق همجواریه رعايه وقديمى دوستى ومودته حرمة جانينيك اشبو
خير نيت واراده صفوتلى مفاخر امراء العظام العيسويه مراجع كبراء الفخام
المسيحيه مصاحوا مصالح جاهير الطائفة النصرانية صاحبوا اذبال الحشمة والوقار صاحبوا
دلائل المجد والاعتبار حشمتلو مکتلو انكلتره قرالى دوستتمز كيوركى ثالث
وحشمتلو مکتلو پروسيا قرالى دوستتمز فريدريقوس غويلميوس ومزتلوندر لاند
استانى جزالارى دوستتمز ختم الله عواقبهم بالخير والرشاد والههم سيلل الصواب
والسداد جنابلرينك توسط قويلريله دخى قرين سهولت اولوب ممالك محروسه
شاهانه مدن ساحل نهر طوندهه واقع زشتوى قصبه سنده عقد وجمع اولنان مجالس

مكالماته طرف سلطنت سنيه مدن مذاكره مواد مصالحه ايجون بالفعل رئيس الكتاب
اولان افتخار الامراء والاكبر مستجمع المعالي والمفاخر المختص بمزيد عناية الملك القادر
السيد عبدالله برى دام علوه مرخص اول ومواليه فخان من حال ااردوى هايونم قاضي
اقضى قضاة المسلمين اولى ولا الموحدين معدن الفضل واليقين رافع اعلام الشريعة والدين
وارث علوم الانبياء والمرساين المختص بمزيد عناية الملك المعين مولانا مير السيد ابراهيم عصمت
زيدت فضائله مرخص ثانى وحالا روزناهجه اول افتخار الاماجد والاكارم جامع
الحامد والمكارم المختص بمزيد عناية الملك الدائم السيد محمد درى دام مجده مرخص
ثالث نصب اولنوب كذلك افتخار الامراء العظام العيسويه مختار كبراء الفخام المسيحيه
مصالح جماهير الطائفة النصرانيه صاحب اذيان الحشمة والوقار صاحب دلائل
المجد والاعتبار حالا روما ايمپراطورى ومجار وچه قرالى وسائر نيجه محلكرك
حكمدارى اولان حشمتلو مكتلو دوستمز ليو پولدوس ثانى ختم الله عواقبه بالخير
والرشاد والهيم اليه سبيل الصواب والسداد جنابلرى طرفدن قدوة امراء الملة
المسيحيه دولتك مستشارى اولان پترو فليمو بارون ده هر پرت رانكال وكذلك
دولتك حالا شامبلانى حستين قونته ليكنك وتونس نام سنيور يانك سنيورى قونته
فراجسقوا استرهازى ده شالانتا ختمت عواقبهما بالخير مرخص نصب وتعيين اولنوب
متوسط دول ثلثة محترمنك مرخص ايلچيلرى يعنى مفاخر امراء الملة المسيحيه
انكلكره قرالى مشار اليهك مشورت مخصوصه سنك مستشارى وبالنبو نام عسكرى
طريق معتبرينك قواليرنى عساكرينك ليوتنان جنرالى وحشمتلو نمچه ايمپراطورى
جنابلرينك دولتنده فوق العاده اورته مرخص ايلچيسى وجميعة مصالحه ده حالا
مرخص قوالير روبرت مهره كيت وپروسيا قرالى مشار اليهك حاليا شامبلانى
وله قرالى وجمهورنده فوق العاده مرخص اورته ايلچيسى واغاييلان طريقك
قواليرى وجميعة مصالحه ده حالا مرخص ماركز برومده لوكزى وندرلانده
استانى جنراللى مشار اليهك اوقه مروزه وتن نام محلكرك سنيورى وكديره
ايالى كبرامى اعضاسندن وندرلانده استانى جنراللى جمعيتده سالف الذكر ايالتك
وكيلى وحشمتلو نمچه ايمپراطورى دولتنده فوق العاده اورته ايلچيسى جميعة
مصالحه ده مرخصى بارون وتيرده هفتن ختمت عواقبهما بالخير معرفت توسط وحلول
حسن سعيلى به رخصتاهلر يكديكره ارائه وبالدفعات دوستانه عقد مجلس اولندقدن
صكره عهد نامه قطعية مصالحه اون درت ماده و بر خاتمه اوزرينه بالتراضى ترتيب
وتنظيم وهجرت نبويه على صاحبها افضل التحية بك بيك ايكي يوز بش سنه سى
ذى الحجة الشريفة سنك اوچنجى كوني تاريخى وطرفين مرخصلرينك تعهد وامضا

و مهر لری و متوسطون مومی الیهمک مهر و امضا برله تصدیق لری ایله تمسکر مبادله اولونوب تمسک مزبور دستور اکرم مشیر افخم نظام العالم ناظم مناظم الامم مدبر امور الجمهور بالفکر الثاقب متمم مهام الانام بالرأی الصائب مهمد بنیان الدولة والاقبال مشید ارکان السعادة والاجلال مکمل ناموس السلطنة العظمی مرتب مراتب الاخلافة الکبری المحفوف بصنوف عواطف الملك الاعلی حالا وزیر اعظم و سردار اکرم و وکیل مطلق اولان یوسف پاشا ادام الله تعالی اجلاله و ضاعف بالتأید اقتداره و اقباله طرفندن رکاب قرتاب هایونمه عرض اولندوقده جمله سی قرین قبول عنایت شمول ملوکانه م اولغاه لفظاً بلفظ بروجه آتی بیان اولتور .

دولت علیه و نمچه دولتی الی سنه متادی میانلرنده تینماً منعقد اولان شیرازه صلح و صلاح و دوستی و حسن همجوارینک تجدید و باقاسنه مساوات اوزره خواهشکر و راغب اولوب اشبونیت خیره لری حشمتلو انکلتره قرالی ایله حشمتلو پروسیا قرالی و منزلتو فلمنک استانی جنرالرینک توسط قوبلریله دخی تسهیل اولنوب زشتوی قصبه سنده عقد و جمع اولنان انجمن مصالحده مرخصلق خدمت جلیله سیچون شوکتلو کرامتو عظمتو مهابتو قدرتو جهاندار قوی نجت و خسرو غلام و شهریار عالیبخت فلک احتشام ولی نعمتمز افندیز بزلی نصب و تعیین بیوروب کذلک حشمتلو مکتلتو روما ایمپراطوری جنابلی پترو فیلیپو بارون ده هرپرت و انکال نام حالیا دولتنک مستشارینی و قونته فر اجسقو استرهازی ده غالاتا نام دولتنک حالا شامبلاتی و قور حستین قونته لکنک و تونس نام سنوریانک سیئورینی مرخص نصب و تعیین ایدوب متوسط دول ثلثة محترمه نک مرخص ایلیچیلری یعنی حشمتلو پروسیا قرالی جنابلرینک مارکز روم ده لوکزینی نام حالا شامبلاتی وله قرالی و جمهورنده فوق العاده اورته مرخص ایلیچیمی و اغلبلان طریقنک قوالیری و جمعیت مصالحه ده حالا مرخصی و حشمتلو انکلتره قرالی جنابلرینک قوالیر دو برت مورای کیت نام مشورت مخصوصه سنک مستشاری و بالنبو نام عسکر طریق معتبرینک قوالیری و کساکرینک لیوتنان جنرالی و حشمتلو نمچه ایمپراطوری جنابلرینک دولتنده فوق العاده مرخص اورته ایلیچیمی و جمعیت مصالحه ده حالا مرخص و منزلتو فلمنک استانی جنرالرینک بارون و تیرده هفتن نام اوقه مزوزنه و ش نام محللرک سینوری و کلدره ایالتنک کبراسی اعضاسندن و فلمنک استانی جنرالرینی جمعیتده سالف الذکر ایالتک و کیلی و حشمتلو نمچه ایمپراطوری دولتنده فوق العاده اورته ایلیچیمی و جمعیت مصالحه ده حالا مرخصی معرفت توسط و حسن سعیلری حولیله رخصتنامه لریمز یکدیگره ارئه و بالدفعات دوستانه عقد مجاس اولندوقدن صکره

اشبوه عهد نامه قطعیه مصالحه ده ترتیب اولان مواد و شروط آتیه به بالتراضی نظام و رابطه ویرلمشدر .

اولکی ماده فیما بعد ایکی دولت بیننده و تبعه و رعایالری میاننده برآ و بحراً مؤبد و عمومی بر صلاح و مصالح و صمیمی صفوت و محبت و وفاق و مضافات کامله مرعی و معتبر اوله . شویله که : محاربه اثناسنده کرک ایکی دولت بیننده و کرک طرف آخرک طرف فکیری اولمش جانبین رعایا و تبعه سی طرفندن وقوعبولان اوضاع خصمانه و اطوار جبریّه و جرائم سائره لری علی العموم فیما بعد نسیا منسیا فراموش اولنوب غیر واقع اعتبار اولنه و بتخصیص قره طاغ و بوسنه و صرب و افلاق و بغداد اهالیسندن دولت علیه یه خلافاً نمچه دولته تبعیت ایتمش اولنلر هر قنغی رتبه دن ایسه لر جرائم سابقه لری منسی اعتبار اولنوب عفو و کندی دولترینه خلافاً دولت ایمراطوریه یه متابعت ایلیانلر یوما من الایام تعرض و تأدیب ورنجیده اولنیوب یوردلرینه عودت و املاک و امتیازات سائره لرینه مظهر اولوب کالاول و وطنلرنده امین و مرفه البال اقامتلری جائز اوله .

ایکنجی ماده معاهد اولان ایکی اولودولنلر بیک ایکیموز ایکی سنه سی جمادی الاولاسنک ایکیسنده واقع اعلان حربدن مقدم جاری اولان استاتوقو استرتقی اشبوه مصالحه نك اساس مشترکی اولمق اوزره طرفیندن اقرار و قبول ایدرلر . بناءً علیه بیک یوزالی ایکی سنه سی جمادی الاخرینک او اخرنده واقع بلغراد عهدنامه سنده و سنه مذکوره شعبانک او چنده عقد اولان معاهده یی والی اوچ سنه سی ذی الحجه سنک اون دردنده بلغراد عهد نامه سی تفسیر و ایضاح ایلیان معاهده یی و بیک یوز التمش تاریخی ربیع الاولینک اون برنده عقد اولنوب بلغراد مصالحه سی تأیید ایلیان سندی و کذلک یوزسکسان طقوز سنه سی ربیع الاولینک طقوزنده عقد اولنوب بیقونیه قضاسنک فراغنی ناطق اولان معاهده یی وینه قطعاً مذکوره نك تجدیدینه دأربیک یوزطقسان سنه سی جمادی الاولاسنده عقد اولان سندی بعینهما معنای مطلقه و مال صحیح و کامللری اوزره بر وجهله خلافتنه حرکت اولنیوب و کسنه یه ایتدرمیه رك تجدید وابقا ایلیوب عهد و سندات و معاهدات مذکوره اشبوماده ده لفظاً بلفظ درج و تسطیر اولتمش کی مؤبداً قوی و معتبر اولوب دستور العمل طوتیه .

اوچنجی ماده بوندن بشقه دولت علیه ابد پیوند غرب او جاقلری قورصالنلرندن و سائر دولت علیه رعایاسندن دولت ایمراطوریه لیانلرندن خروج ایدن نمچه تجاری سفینه لرینک تأمیننی و آنلر طرفندن دوچار اوله بیلدکلری بالجمله خسارلرک تضمیننی متضمن اولوب بیک یوزطقسان یدی سنه سی رمضانک طقوزنده

تعهدی حاوی ویریلان سندی و جمیع اراضی و بحار و انهار دولت علیه ده نتیجه
 ایمراطوری رعایانک سر بست اوزره تجارت و تسیر سفاین ایلملرینی حاوی بیك
 یوزطقسان سکر سنه سی ربیع الآخرینک ایکسینده اعطا اولان سندی و افلاق
 و بغداد مملکتلرنده اردل چوبانلرینک و قیون سوریلرینک مرور و عبور و اقامت لرینه
 دائر بیك ایکیوز بر سنه سی اواسط شهر صفر اخیرده ویریلان فرمان عالی شانی
 و حدودک حسن نظام و آسایش و رعایانک منفعت و امنیت مصالحتی و نتیجه دولتک
 تجارت و سیر سفاینلری ضمنده بیك ایکیوز ایکی سنه سی جمادی الاولینک ایکنجی
 کوننه دکین جاری اولوب طرفیندن دولتجه مقبول اولان نظام و سندات و اوامر
 منیفه سائره بی بعینها معنای مطلقه و مال صحیح و کاملاری اوزره بر وجهله خلافه
 حرکت اولغیوب کسنه یه دخی ایتمدر میهرک تحدید و ابقا ایلیوب اشبوسندات و احکام
 دولتجه مقبول سالف الذکر نظاملر لفظاً بلفظ درج و تسطیر و ذکر و تصریح اولغوش
 کبی مؤبداً قوی و معتبر اولوب دستور العمل طویله .

دردنجی ماده دولت ایمراطوریه بیك ایکیوز ایکی سنه سی جمادی الاولینک
 ایکسینده جاری استاتوقو استرقت اساس مقبوله طرفیندن دخی هر شیئی تطبیق
 و دولت علیه نک معامله دوستی و حقانیتنه کاملاً مقابله و توافق ضمنده تعهد
 ایدرکه : اشبو سفرده ایمراطور مشار الیهک عسکر یه استیلا اولسان جمیع ممالک
 و اراضی و قلاع و شهرلر و پلنقه لری هر قفنی اسم و شهرت مشهور ایسه لر باجمله
 افلاق ممالکی و نتیجه عسکرینک ضبطنده اولان بغداد قضالری داخل اوله رق کاملاً
 و بلا تقسیم دولت علیه به تحلیه و ترک ورد و تسلیم و سالف الذکر بیك ایکیوز ایکی سنه سی
 جمادی الاولانک ایکینی تاریخده ایکی دولتی تفریق ایلیان حدود قدیمه بی بعینها
 ابقا ایله و استیلا اولسان دولت علیه نک قلاع و بقاع و پلنقه لری حین استیلاده
 درونلرنده موجود دولت علیه نک ارتلر با یعنی طوب و امثالی آلات حربیه سفریه لر یه
 بولندقلری حال اوزره رد و تسلیم ایلمکی تعهد ایدر .

بشنجی ماده خوتین قلعه سی و آحاد ناس بیننده رعایا تعبیر یه مشهور اولان
 قضاسنی قلاع سائرده بالتراضی قبول اولنان شروط اوزره دولت علیه ایله روسیه
 دولتی بیننده مصالحه عقد اولنوب دولت مذکور طرفیندن ضبط اولنان اراضینک
 تحلیه سیچون وضع و تعیین اولنه جق مدت صریح طرفنده دولت علیه به تحلیه و ترک
 ورد تسلیم اولنه اولوقته دک قلعه مذکور قضاسیله معاً نتیجه دولتک یدنده بیطرف
 اوله رق امانه محفوظ اولوب فیما بعد اشبو محاربه یه مداخله ایتمیه رک نتیجه دولتی
 دولت علیه علیه وجهاً من الوجود ظاهراً و یا خود بالواسطه بر درلو حرکت ایله
 روسیه دولته امداد و اعانت ایلمیه .

التنجی ماده تصدیقنامه لرك مبادله سی عقبنده طرفیندن تخلیه لره واستیلا دیده اولان جمله محللرك تسلیم وتسلم لرینه وآتی البیان اولان مدت لره ایکی دولتک حدود قدیمه لری ابقاسنه جانیندن مباشرت اولنه وایکی طرفک مباشر لری باغراد عهدنامه سنک اون اوچنجی ماده سیله اولیکدوکی اوزره انتخاب وتعیین اولنوب بعضیسی افلاق مملکتی وبغدانک بش قضای تخلیه سی مصلحتنه تصدیقنامه لرك مبادله سی کونندن حساب برله اوتوز کون طرفنده تکمیل اتمک اوزره مأمور اوله لر سائر مباشر لر دخی بیک ایکیوز ایکی جمادی الاولینک ایکیسندن مقدم جانینک متصرف اولدقلری اراضینک استاتوقواسترتق قاعده سی اوزره بوسنه وصرپ ممالکنک وانحاسیه ایرشوه عتیقک حدودینی ابقا ضمننده نهر اوننه نک یوقارو طرفنه توجه ایلیه لر اوننه طرفنه مأمور اوله جق مباشر لره تصدیقنامه لر مبادله سی کونندن بدأ ایله ایکی ماه مدت تخصیص اولنور زیرا مدت مذکوره قلاعک استحکامات جدیده سی هدم وحین استیلاده بولندقلری هیئته ارجاع وکدک قلعه لر وپلنقه لر دروننده موجود جمیع اترلریا یعنی طوپ وامثالی آلات سفریه ومهمات حربیه وذخائر نقل وجلبلری ضمننده مدت مذکوره نک لزومی درکاردر .

یدنجی ماده اشبوسفرهنکامنده عسکری وغیر عسکری ضبط اولنان جمیع اسرای دولت علیه بلا استثنا دولت ایمراطوریه طرفندن سیدلری تخلیه وروسجق وودین وبوسنه حوالیسنده دولت علیه مباشر لرینه تسلیم اولنوب مقابله سنده انحق زندان لره وبوسنه سرکرده لرندن بعضیسنده بولنان دولت ایمراطوریه نک رعایا وسلتان لری تسلیم اولنوب ایادی افرادده ممالک دولت علیه ده مقدار کثیره باقی اولمغله دولت علیه بوبابده سفردن مقدم جاری اولان استاتوقواسترتق قاعده سنه موافقت وآنارمکدره محاربه نی محو وازاله ضمننده مجاناً یعنی بلاجهاء وبلا بدل تصدیقنامه لر مبادله سندن صکره ایکی ماه طرفنده جمیع عیبید واسیر لری هر قننی سن وجنس ورتبه دن وهر کیمده وقننی محله بولنور لر ایسه رد وتسلیم ایلمکی تعهد ایدر . شویله که : فیما بعد طرفین رعایاسندن فرد واحد جانب آخرک ممالکنده قید اسرده قالیه وانحق ممالک دولت علیه ده قواعد مرعیه اوزره رضاء دین اسلامی قبول ایدنلر وممالک نمچه ده تنصر ایدنلردن ماعدا طرفین ممالکنده فرد واحد قید اسرده قالیه .

سکزنجی ماده اشبو سفردن مقدم یاخود سفر ائناسنده جانب آخرک اراضیسندن چکلمش ورعیتی قبول ایدوب رضاء اقامت ایدن رعایای جانین طبیعی دولت طرفندن بر وقته اعاده اولنملری ادعا اولنوب تبعیت ایلدکلری دولتک رعایای سائره سی کبی عد اولنوب من بعد حقلرنده اولو جمله عمل اولنه کدک شول

کسنه لکه ایکی دواتده مالک املاک اولئر کسنه طرفندن مخالفت اولتمسزین حالیرینه جیبان کوردکاری وجه اوزره مسکنلرینی دولتینک برنده دیلککری طرفده اختیار ایلمکه مآذون اوله لر لکن جانب آخرک مالکنده مالک اولدقلری املاکی فروخت ایدرک انجق بردولته اختیار تبعیت ایتکه مجبور اوله لر .

طقوزنجی ماده معاهد اولان دولتر مصالحه نك ثمره ی اولان تجارتنی برآن اقدم ایقا و سالف الذکر ایکنجی و اوچنجی ماده ده مذکور شر وطک اجر اسیله استاتوقو استرقت اعاده سنک فآده سنی اسباب عمران ممالکنن معدود و تجار زمره سنه دخی تمید و بیدریغ ایتک ملاحظه سیله نظام و رابطه و یر مشلدر که مدت محاربه ده طرفین رعایا سنه یعنی دولت علیه ده بولنان ایمر اطور جنابلرینک رعایا سنه و نمچه دولتنده بولنان دولت علیه رعایا سنه بر درلو ضرری ایجاب ایتماک ایچون طرفین رعایا سنک اعلان حرب وقتنده پسمانده قلان مصالح متروکه لرینی و قبل السفر جاری اولان حقوق و دعاویء شرعیة سابقه لرینی ادعا و مال و اشیا لرینی استرداد و آله جقلری اولان کسنه لری شرعه دعوت و بلغراد عهدنامه سنک اون یدنجی و بوزور فچه تجار تنامه سنک اون سکزنجی ماده لرینه خلافاً اعلان حرب وقتنده اداسنه مخالفت ایله لازمکلان ضرر و خسار سائر لرینی مطالبه و جمیع مواد سالفه الیابنده محاکم شرعیه و ولات و ضابطان جانبیه لدی المراجعه سریعاً حقانیت کامله اوزره احقاق حق اولنوب مدت محاربه جهتیله وقت مرور ایلدی دیو مدعی علیه طرفندن علت اولمق اوزره ایراد اولمسنه رخصت و یرلیه .

اوننجی ماده ایکی دولت حدودنده مأمور اولان ولات و قوماندانلره مطاقاً نظام و انتظامک ابقاسنی و حدودده آسایش و حسن همجواری و طرفین مأمورلری معرفتیله ایقا اولتان سنورلرک و جهاً من الوجوه تبدیل و تغییر اولنوب و قایه اولنلرینی و نهب و غارت و سائر کونه تجاوزلرک منعی و دولتن بیننده جاری اولان عهدده منبی قواعد و نظام سابق اوزره حرکت اولنه رق ضرر و خسار و قوعنده اقتضایدنلردن تضمین و تحصیل اولمسنی ناطق و کندولری مسؤل اوله جقلرینی شامل اکید و شدید اوامر شریفه ایله تنبیه و تأکید و متنبه اولمایانلرک تهمت و جرملرینه کوره تأدیبلرینه اهتمام و مبادرت اولنه .

اون برنجی ماده کذلک ایکی دولتک حکام و ضابطاننه جداً تنبیه و توصیه اولنه که تجارت و مصحتلرینه منبی طرفیندن حدودی مرور ایدنلری حمایت و صیانت ایله لر و ممالک دروننده سیاحت و نهر آایاب و ذهابلری جائز اوله و حقلرنده مراسم مهمان نوازی اجر اسندن بشقه ایکنجی و اوچنجی ماده ایله تصدیق اولمش عهد

وسندات و موافقت مقتضای اوزره کرک نفسلری و کرک کتوردکلری کندی تجارت ماللری ایچون رسومات معینه دن ماعدا نسنه طلب ایتمیوب و کسنه طرفدن طلب ای تدرلیوب حمایت و صیانت اولنه لر .

اون ایکنجی ماده دولت علیه ممالکنده حضرت عیسی دینده اولان لاتین راهبلی و تابع اولان کسنه لر اجرای آیین و کلیسالرینک تعمیر و ترمیمه و قدس شریف و سایر زیارتگاهلرینه و ارووب کملرینه و حمایت و صیانتلرینه دائر استاتوقو استرقت قاعده سنه بناء کرک بلغراد عهدنامه سنک طقوزنجی ماده سیله مذهب مذکوره مساعده اولتان امتیازاتی و کرک بعده شرفصدور ایدن او امر منیفه و سندات سائره شهنشاھی تجدید و ایفا اولنه لر .

اون اوچنجی ماده کرک اشبو مصالحه مبارکه نك و سیله خیریه سیله و کرک شوکتلو کراملو مهابتلو عظمتلو پادشاه کیتی ستان و عالمنه و شهر یار تاج بخش ستاره سپاه ولی نعمتمز افندیز حضر تارینک تحت عالیبخت موروثلرینه جلوس میمنت مانوس هایونلری و حشمتلو مکتلو روما ایمراطوری جنابلرینک حسب الوراثة عارج اریکه حکمداری اولدیغنی اخبار و سیله سیله جانیندن اورته ایلچیلر ارسال اولنه و مومی الیهم ایلچیلر حقنده دولتینده جاری و معتاد اولان رسوم و تشریفات و اکرام اجرا اولنه و استاتوقو استرقت اوزره حقوق ملله عائد اولان جمیع امتیازات حقارنده جاری اولوب مرعی اولان عهد و شروط منطوقنجه رتبه لرینه عائد اولان مساعدات سائره ایله کامیاب اوله لر و عتبه علیه دن نمچه ایمراطوری جنابلرینک اورته ایلچیلی خلقلری حقنده دخی رتبه لرینک تفاوتنه نظر اولنه رق تبعه و خدمه و متعلقلری و خانه لری حقنده دخی کذلک جاری اوله لر و دولت ایمراطوریه دن ایاب و ذهاب ایدن قوریرلردن قبل السفر صویلانلرک دولت علیه اموال مغصوبه لرینک ضرر تحصیلنی ایجاب ایده جک جمیع اسباب و وسائلی مسامحه و انعامض اتمیه جکندن ماعدا فیابعد قوریرلرینک آماناً و سالملاً ایاب و ذهابلری کارکر تأثیر اوله جق و جهله اقتضا ایدن نظامی اجرا الیه .

اون دردنجی ماده اشبو عهدنامه نك بعینها مطابق ایکی صورت اصلیه لری بریسی ترکی لساننده ترتیب اولنوب طرفزدن امضا و بریسی سهولت ایچون استصحاب اولتان فرانسز لسانی اوزره نمچه ایمراطوری جنابلرینک مرخصلردن بعد الامضا ربتلو متوسط مرخص ایلچیلر معرفتیه بعد المبادله معاهد اولان جانین دولتلرینه ارسال اولنه بنابرین امضا کونندن بدأ ایله قرق کون طرفنده و اولجه ممکن ایسه طرفیندن امضا اولمش تصدیقنامه لری دولتین بیننده سرمداً و مؤبدأ دستور العمل

و تجدید وابقا اولتمش جمع عهود و موثیق و سنداتك مطابق صور تلیله معاینه مومی الیهم متوسط ایلیچیلر معرفتیله جانبین مرخصلری بیننده مبادله اولته لر .
 خاتمه بو ذکر اولنان اون درت ماده بی شامل عهدنامه و تصدیقنامه لرك وقت مرقومده مومی الیهم متوسط ایلیچیلر معرفتیله مبادله و تسلیمی خصوصلری شرط و ربط اولندیغی اوزره ان شاء الله الملك العلام حسن اهتمام طرفین و صدق و خلوص جانبین ایله پذیرای ختام اولمق ایچون یدیمزده اولان رخصتنامه هایون موجبجه اشبو تمسك ترقیم و املا و مهر و امضالریمز ایله مختوم و ممضی قلوب متوسطین مومی الیهم معرفتیله مرخصین مرقومین یدلرینه تسلیم و اعطا اولندی دیو تمسك مذکورده مسطور اولمغین .

ایمدی اشبو مواد مصافات و شرائط موالات مادامکه روما ایمپراطوری مشار الیه و اخلافی طرفلرندن مرعی و معتبر و ضوابط و روابطی تطرق خلدن حمایت و صیانت اولنه رق مستحکم و مقرر اوله طرف هایونمدن دخی ذات معالیمات شاهانه و جناب خلافت مآب ملوکانه مه شایان و سزاورا ولدیغی وجهله تعهد اولنورکه شروط و قیود مصافاته طرف زاهر الشرف شاهانه مدن و اخلاف سعادت اتصافز دن و وکلا عالیمقام و میرمیران و امرا و ضابطان و عموماً عساکر نصرت ارتسائمز دن و باجمله عبودیتمز ایله شرفیاب اولان طوائف خدامز طرفلرندن رعایت اولنوب برفرد خلافتیه وضع و حرکت ایلمیه تحریر آ فی الیوم الثاني عشر من شهر ذی الحجة الشریفة لسنة خمس و مأتین و الف

* معاهدة مخصوصه سندینك صورتی *

الحمد لله الذي اقام منار الدين القويم باعلاء كلمته ورفع اعلام الشريعة بنسبته فوزه ونصرته والصلاة والسلام على سيدنا محمد الذي جعل الصلح سيد الاحكام وعلى آله واهل بيته هم ليوث غابات النجدة والبسالة وغبوث سماء المجد والحماسة
 اما بعد باعث تحریر كتاب صحت نصاب و موجب تسطیر صحیفه حقیقت اتسباب اولدرکه دولت عثمانیه و دولت ایمپراطوریه مصالحه معقوده نك او ان میامن اقتراننده و داد و مصافاتلرین بربرلرینه براهین وانحه ایله اثبات و بیان و تحت تصرف و حکومتلرنده اولان حدود و اسعه لرنده آتیده رابطه موالات کامله بی محل اوله بیلیور جمیع اسبابی شمیدین منع و دفع و بیک ایکیوز بش سنه سی ذی الحجة الشریفة نك اوچنده زشتوی قصبه سنده امضا اولتمش مصالحه قطعیه عهدنامه شرطنده تجویز ایلدکری انحق تبدیلات آتی البیان جانبینك فآده سی ضمننده تأیید و تشید ایلمک اراده سیله بزه دولت علیه مرخصلری یز نمچه دولتی طرفندن پترو فلیو بارونده

هربرت رانکال نام حالیا دولتک مستشاری وقونته فراچسکو استرهای ده غالیئا نام دولتک حالاشامیلانی وقورجستین قونته لکنک وتونس نام سینوریانک سینوری اولان مرخصری ایله شروط آتیه به بالتراضی رابطه ویرمشدر .

اولکی ماده دولت علیه نك متصرفی اولدیغی اراضی ایالت طمشواره ونهر اونه نك صول یقه سنده واقع قضالره دائر دولت ایمراطوریه نك مطالبه منبی قبل السفر مفتوح بر مذاکره بولمقدن ناشی معاهد اولان ایکی اولو دولت لر حوالی مذکوره ده حدود قدیمه نك نقصان ومحدورلرین مطالعه وتراضی طرفین وتوافق جانبین ایله فیما بعد تغییر وتبديل اولنیه جق وجه اوزره ایفا وتیم اراده سنده اولوب اشبو معاهده نك ماده ثانیه وثالثه سنده مصرح قطعی رابطه به قرار ویرمشدر . شویله که : ذکر اولنان رابطه ایله مذاکره سابقه مذکوره به متفرع اولان جمیع مواد مطلوبه بی مؤسس وقطعی فصل وحسم ایلمکه رضاداده اولمشدر .

ایکنجی ماده بناء علیه دولت عالیة عثمانیه رضاداده اولورکه ایرشوه عتیقک قصبه سی واراضی سی جرنه صوبنه وارنجه دولت ایمراطوریه نك تصرف وحکومتنده قاله بو وجهه که اول طرفه جرنه صوبی فیما بعد مؤبدأ نمچه دولتسک حدودینی فاصل اوله لکن شوشرط صریح ایله که دولت ایمراطوریه ایرشوه قصبه سنه واشبو ماده نك منطوقتجه دولت علیه طرفندن ترک وفراعت اولنان اراضینک بر محانه ابدأ استحکام ویرمی جائز اولیه وبلغراد عهدنامه سنک بشنجی ماده سنده مصرح اولان حدود ایله محدود آله قاعه سی قارشوسنده واقع اووه صغیره علی الدوام وعلی کل حال ایکی دولت بیننده بیطرف قاله یعنی حکومت ومالیکیی دولتین مذکور تینک برینه عائد اولیه بوضورته معاهد اولان ایکی دولت لر تعهد ایدرلرکه اووه مذکوری مطلقا بریه ترک ایدوب بنا احداث واثامت واجرای زراعتسه کمسنه به اذن ورخصت ویرمیلر .

اوچنجی ماده قالدیکه اونه نك صول یقه سنده واقع قضالره دائر معاهد اولان ایکی اولو دولت لر بالتراضی رابطه ویرمشدر که دولتسک حدودی فیما بعد مؤبدأ وجه آتی البیان اوزره تنظیم اولنلر اشبوشرطه مربوط اولان خریده ده سرخ ایله ترسیم اولندیغی وجه اوزره جانینک حدودینی تفریق ایده جک خط جدید اولحوالیده خریطه مذکوره ده اشارت اولمش محلدن غالباً نهرینک ساحل یمنندن شروع ایلیه وچیتنی قضاسیله معاً دولت ایمراطوریه نك تصرفنده ترک ایتمک اوزره اولطر فده اولان برکوچک ایرمغک طوغرولغنه مد اوله وخریطه ده صاری رنک ایله بیان اولنان استورلیک یاخود استورلیج نام دولت علیه قاعه سی انخاسندن

چکيله بو وجهله که قلعه مذکوره وطوب مسافه سيله تصريح اولنه جق انجاسی دولت عليه نك تصرفده قاله و آندن خط مذکوره طوغری يولدن قورانه اوزرينه واريه و نهر مزبورک آقديسنه خلافا درزنيق قضاسيله معاً دولت ايمراطوريه نك تصرفده قالمق اوزره کيديله بعده خط مذکور از موليا ناج طاغدن ونيکور نام محلدن تحديد اولنه و آندن اول طرفده واقع يوکسک طاغدن کچيريله که جبل مذکورک اتکنده خريطه ده صاری رنک ايله اشارت اولنان طرناز نام محل موجود در و صاری ايله اشارت اولنان و قعدن يوقارو بر ساعت مسافه ده نهر اونه ساحلنه و ارنجه چکيله و آندن خط مذکور نهر اونه نك صول يقه سنی چيقه رق غرب طرفنده واقع منبعه نك سرخ ايله اشارت اولنان خط اوزره و اریلوب يوکسک طاغارک حداسيله اک طوغری يولدن حدود ثلثه حاليه منتهی اوله . شويله که : اهل اسلام استرینجه سی دولت عليه نك تصرفده ترک اولنه دولت ايمراطوريه تعهد ايدر که بر درلو بهانه و علت ايله و جها من الوجوه اشبو ماده ايله دولت عليه طرفدن ترک اولنان قضانک بالجمله مسافه سننده بلا استثناء بر درلو استحکاماتی تعمیر ايمیه و مجدداً بنا و انشا ايلمیه .

دردنجی ماده دولت ايمراطوريه دخی کرک ايرشوه عتيقك قصبه و اراضیسی و کرک يوقاریکی اونه یه دائر اشبو معاهده مخصوصه نك شرط ثاني و ثالثه ده رابطه پذیر اولدیغی وجه اوزره حدودك قطعاً نظامنده دولت عليه نك ابراز ایلدیکی معامله دوستانه سنه کندو طرفندن دخی مقابله و دولتین بيشده تیناً عقد اولنان مصالحه یی بر قانده یی تمهید و تأکید ضمننده صریحاً و تواتراً بیان ایدر که اشبو حدود نظامتی قطعی اولمق اوزره اعتبار و اقرار ایدر و وضع اولنان حدود مذکوره دن زیاده مستقبله بر درلو ادعاسی قالمدیغی معترف و متعهد اولور .

بشنجی ماده دولت ايمراطوريه سابق البیان اولان حدود تنظیمی ایچون رضا و ممنونیتی اظهار ضمننده تعهد ایدر که دولت عليه دن استیلا ایلدیکی جمع قلعه لری و پلنقه و قستلاری الآن بولندقلری حال اوزره تعمیر و انشا اولنان استحکامات جدیده نك بریسی هدم ایتیمه رک رد و تسلیم ایلیه و بوتقدیرجه عهدنامه قطعیه نك التنجی ماده سنک نهایتنده مذکور هدم ایلیمک قید و شرطندن کف یدایدر . التنجی ماده کذلک استیلا دیده اولان جمع اراضینک بر آن اول قبضه تصرف و ملکیتنه ادخاللری ضمننده دولت عليه نك اظهار ایلدیکی خواهش و رغبتنه دولت ايمراطوريه موافقت ایدر که عهدنامه نك التنجی ماده سننده تخلیه لر ایچون وضع اولنان مدت لرك قصر و تقریبی رضاء قبول و اجابت ایدر . دولت عليه ايله رابطه ویررکه

ذکر اولنان مدت لر عهدنامه نك امضای كوندن حساب اولنوب تصدیقنامه لر ك
مبادله سی كوندن حساب اولنیه یعنی بالجمله افلاق مملكتك و بغدادن قطعه سی بش
قضاسنك تخایه ترك و تسلیمی ضمنده بو كونکی كوندن اوتوز كون مدتی حساب اولنه
واستیلا اولنان سائر بالجمله اراضی ایچون بو كونکی كوندن التمش كون مدتی حساب
اولنه بوندن بشقه جانبین تعهد ایدر لر كه مصالحه عهدنامه سی تصدیقنامه لرینك
مبادله سی عهدنامه قطعه نك اون دردنجی شرطنده مذکور قرق كون بدلنده
نهایه النهایه اون بش كون ظرفده مبادله مذكوره ی اجرا ایدر لر .

یدنجی ماده اشبو معاهده مخصوصه نك تصدیقنامه لر ی بشقه جه بسط اولنه .
لكن مصالحه عهدنامه سنك تصدیقنامه لر ی مبادله اولنه حق كونده مبادله اولنه لر .
خاتمه بو ذكر اولنان یدی ماده ی شامل معاهده مخصوصه و تصدیقنامه لر ك وقت
مرقومده مبادله و تسلیمی خصوصی شرط وربط اولدینی اوزره ان شاء الله
الملك الامام حسن اهتام طرفین و صدق و خلوص جانبین ایله پذیرای ختام اولق
ایچون یدیمزده اولان رخصتنامه هایون موجبجه اشبو سند ترقیم و املا و مهر
وامضالریز ایله مختوم و محضی قلوب مرخصین مومی الیها یدلرینه تسلیم واعطا اولدی .

(۱۳)

* روسیه متار كه سی اوزرینه بغدادن بکی انتخابنه دائر قائم مقام پاشا *

* طرفندن سلطان سلیمه عرض و تقدیم قلنان تقریرك صورتی *

صدر اعظم لرینك تحریراتندن بر ماده ده اعاده مصالحه ضمنده متار كه نك عقدی
حسیله بغدادن مملكتنه و یوده نصب اولنق ایچون مجرب الاطوار اصحاب درایتدن
برینك اردوی هایونده بولنسی لایذ اولمغله اقتضا ایدنر ایله مذاكره و كیم مناسب
ایسه ارسال اولنسی و تعیین اولنه حق و یوده بر مقتضای وقت و حال صدیقی مسلم
و كندودن شو آر القده و بوندن صكره تعمیرات قلاع مالزمه سی و مواد سائرده
خدمت مأمول اولدیغندن غیر ی مملكت بغدادن رعایا و بویاراندن روسیه لو ایله
اتفاق و دولت علیه خیانت ایدنر ایله دولت علیه یه صداقت ایدنری تمیز ایدر
ار بایدن فطین اولسی لازمه دن اولدینی مسطور اولدیغندن حضور عالی رینه عرض
اولندقده واقعا بغدادن رنده برایشه یرار مجرب الاطوار عاقل و صادق و یوده
نصبی لازمدر حقیقت بغدادن رعایا سی و بویارلری شمدی مسقو کیدر آنلری
اداره ورعیت حكمنه ادخال ایتمكه مقتدر کیم واردر بو طرفده اولان دیوان ترجمانی
كوشك و وسوسه لی آدمدر و قته كوره الویره بیلور می مناسبی عرض اولنه دیو
خط هایون شو كتمقرون شرفیافته صدور اولمغله معلوم بندكانه م اولمشدر .

صدر اعظماری تحریراتندہ مذاکراتہ مباشرت اولنسون دیو یازلمش لکن خصوص مزبور مذاکرہ سی جائز مواد دن اولماملہ اعمال فکر اولندقدہ رکاب ہایونہ ترجمان اولان صاری بکزادہ اوتوز سنہ مقدم باباسی بغدادن بکی ایکن معیتندہ برابر بولنوب بعدہ اشبو سفر دن بر قایچ سنہ مقدم ترجمان اولان میخال ویوہ دہ افلاق ویوہ دہ سی نصب اولندقدہ مرسوم باش قبوکتخداسی وبعادہ برمدت مرورندہ دیوان ترجمانی نصب اولنوب سفر وقوعنہ دک اصالتلہ دیوان ترجمانی خدمتندہ مستخدم وسفر وقوعندہ مصارف سفریہیہ اقتدار ی اولمدیغندن وکاتی رجا ایتکلہ اولوقندنبور رکاب ترجمانیدر . صادق واهل عرض ورضاجوی وامکدار قوللریدر لکن وقتہ کورہ صدر اعظملرینک یازدینی وجہلہ ادارہیہ مقتدر اولہ بیلورمی اولہ مزمی مجهول ایدوکی وحالا زشتویدہ دیوان ترجمانی اولان قسطنطین بکزادہ قوللری صادق ومستقیم وعافل وصاحب مطالعہ وجر بزولو برقوللریدر . صدر اعظملرینک یازدینی وخط ہایونلرندن مستفاد اولدینی وجہلہ ادارہیہ مقتدر اولہ بیلور ظن اولنور . غالباً صدر اعظملرینک اوصاف مذکورہیہ یازمقدن مرادی بو اولوق کرک رکاب ترجماننک سنی الی نبی متجاوز وزشتویدہ اولان ترجمان مرسومک سنی اوتوزی متجاوز اولمغلہ سنلری تفاسی دخی بو وجہلہ ایدوکی ایکسنک دخی حاللری بویلہ جہ اولوب لکن قنغیسی موفق اولور قنغیسی اولہ مز ییلنہ مدیکی اگر امکدار لغنہ حرمة رکاب ترجمانی ترجیح اولنور ایسہ نہ کوزل امکدار وقتی دکلدن اشکدار وقتیدر دیو زشتویدہ اولان ترجمان ترجیح بیوریلور ایسہ رکاب ترجمانی بوقدر امکیلہ مایوس اولماق ایچون کندویہ سابقندہ اولدینی کبی بر بکلک پایہ سی ویریلوب براتیلہ افلاق وبغدانک ویوہ دہ فائضلرندن سنوی اوتوز بیک غروش معاش تعیین اولنسی مقتضای مروءت ایدوکی معلوم شاهانلری بیورلدقدہ ہر نوجہلہ ارادہ بیوریلور ایسہ فرمان .

* تقریر مذکور بالاسنہ کشیدہ بیوریلان خط ہایونک صورتی *

سیحان اللہ امکدار ملاحظہ ایدہ جک و قتمیدر نظام مملکتہ ودین ودولتہ قنغیسی الویرر بکا آنی بیلدرہ سکنز بغدادن مسقویلہ همحدود اولہ جق صداقت ایدر ایش بیلور آدم لازمدر .

* دفعہ تقریر قائم مقامی صورتی *

بغدان ویوہ دہ لغی اتخاچون صدر اعظملری تحریراتی خلاصہ سی بالاسنہ شرفیافتہ صدور اولان خط ہایونلرینہ جواب اولہ رق کرک رکاب ہایون ترجمانی وکرک

زشتویده اولان دیوان هایون ترجمانی قوللرینک حال و کیفیتلرینی متضمن تقدیم خاکپای ملوکانه لری قلنان تقریر چا کری بالاسنه سبحان الله امکدار ملاحظه ایده جک و قتمیدر نظام مملکتکته و دین و دولته قغیسی الوریر بکا آنی بیلدیره سکنز بغداد مسقو ایله هم محدود اوله جق صداقت ایدر ایش بیلور آدم لازمدر دیو خط هایونلری صادر اولغله معلوم بندکانه م اولمشدر . قوللری عقل قاصر چا کرانه م محیط اولدینی درجه ایکسینک دخی حاللرینی خاکپای ملوکانه لرینه عرض ایتدم بکلک بو ایکی یه منحصر کیدر کچن سنه بغداد و یوه ده سی سابق علیکساندری بی افلاقه حین اقتضاده نصب ایچون اردویه کوندرلمش ایدی الوریرمدیکندن یرینه میخال بک و یوه ده تعیین اولنوب مرسوم علیکساندری درعلیه یه اعاده اولندی شمیدیکی حالدیه بو ایکدن غیری یوقدر ایکیسی دخی صادق و مستقیم و درجه صداقتلری مساوی ورکاب ترجمانی مسن و زشتویده اولان ترجمان بوکا نسبتله حدیث السن اولوب لکن حاللری مطالعه اولندیغنه کوره زشتویده اولان ترجمان جرزه لو واحاطه لو ورکاب هایونده اولان ترجمان سکونتلو و گوشه جک آدم اولغله ایکسندن قغیسی الوریر قغیسی الوریر من مجهول مطلق اولوب اداره خصوصی توفیق حقه باز بسته برحالت اولدیغندن چا کرلری حکم ایده مدیکم و حاللری وجه محرر اوزره اولغله حاللرینه نظراً برینک چراغلی امر و اراده شاهانه لرینه منوط ایدوکی معلوم هایونلری بیورلدقده هر نوجهله اراده علیه لری بیوریلور ایسه فرمان .

* تقریر مذکور بالاسنه کشیده بیوریلان خط هایون صورتی *

تقریردن منضم اولان زشتویده کی ترجمان بکلکه مناسب اولغله رأیکز اوزره بغداد و یوه ده سی نصب اولنه و مقدمکی تحریریکز اوزره بوراده کی ترجمانه تلطیف اولنه .

* تقریر قائم مقامی *

بغداد و یوه ده لغی ایچون سؤال هایونلرینه جواب اوله رق رکاب ترجمانی و زشتویده اولان دیوان ترجمانی قوللرینه یعنی بو ایکی یه منحصر ایدوکی ورکاب ترجمانی مسن و امکدار و زشتویده اولان ترجمان حدیث السن و اشکدار و ایکیسی دخی صداقتکار اولدیغنی و چا کرلری شو اولسون دیه میوب ایکدن برینک انتخابی رأی رزین شاهانه لرینه منوط ایدوکی مین عرض ایلدیکم تقریر چا کری بالاسنه تقریردن منضم اولان زشتویده کی ترجمان بکلکه مناسب اولغله رأیکز اوزره بغداد و یوه ده سی نصب اولنه مقدمکی تحریریکز اوزره بوراده کی ترجمانه تلطیف اولنه دیو خط هایونلری شرفیافتة صدور اولغله معلوم بندکانه م اولمشدر رأیکز اوزره

تعمیری چاکر لرنی خاجانه کرفقار ایندی بو بککک ماده سی امور سائره به قیاس اولیوب امور معظمه دن و مجرد امر و اراده حضرت جهاندار یلرینه منوط اولان مواددن اولق ملابسه سیله چاکر لری شو مناسبدر دیو حکم ایده مم قولکوزک بیان ایده حکم انجق حال و کیفیاتلریدر قنغیسی اراده بیوریلور ایسه صراحة خط هایونلرینه موقوف ایدوکی قرین علم عالم آرای شاهانه لری بیورلقدقه فرمان

* تقریر مذکور بالاسنه کشیده اولان خط هایون *

سبحان الله بهی آدم بودرجه وسوسه جنون علامتی بن بر ترجمان کافرینک حالی و مناسبی سن عرض ایلویوب رأی ایلمدکندن صکره استخاره ایله می بیله یم آنلرک حاللرنی بتون کون قبوده اولق مناسبته سن بیلورسین دفعاتله اولان تقریرلرک مضموننده زشتویده کی مرجح اولدینی آشکار اولغله ترجیحکنزه بناء زشتویده کی ترجمانی ویوه ده نصب ایلدم بردخی صورمه .

(۱۴)

* روسیه لو ایله یاش قصبه سنده عقد اولنان مصالحه نامه نک صورتی *

حضرت خداوند ممالک بخشا و جناب تنسیقفرمای امور کافه اوری تقدست ذاته عن وصمة الاضداد والاشتباه عن کل ذوالنهاک اراده باهره صمدانیه و غایت ظاهره سبحانیه سی وسید اصفیا و سپهسالار کتاب انیا حبیب خدا و شفیع یوم جزا اولو پیغمبریمز محمد المصطفی علیه و علی آله و صحبه ازکی التحایا حضرت تلیرنک دست یاری معجزات حمة البرکاتی و احجاب کرین و خلفاء راشدین رضوان الله تعالی علیهم اجمعین . و حله اولیای هدایت قرین و اصفیای تقدس رهینک مرافقت ارواح طیبه جنت مأویلریله (محل طغرا) بنکه اشرف البلدان والا ما کن و ابرک المداین و المساکن قبله جمه عالم و محراب توجه عامه ائم اولان مکه مکرمه و مدینه منوره و قدس شریف مبارکک خادم و حاکمی و حسمرة الملوک اولان بلده ثلثه معظمه که استانبول و ادرنه و بروسه در آنلرک و شام جنت مشام و مصر نادره العصر بی همتا و کلیاً عربستان و افریقیه و برقه و قیروان و حلب شهبأ و عراق عرب و بصره و لحسا و دیلم و رقه و موصل و شهر زور و دیار بکر و ذوالقدریه و ولایت ارضروم و سیواس و ادرنه و قرمان و وان و مغرب و حبش و طونس و طرابلس شام و قبریس و ردوس و کرید و مورده و آقدکز و قره دکز و جزائر و سواحلی و دیار انا طولی و ممالک روم ایلی و خصوصاً بغداد دار السلام و جمیعاً کردستان و روم و ترک و تاتارستان و چراکسه و قبار طای و دشت قیچاق و ایالات تاتاره دائر اولحو ایلرده

واقع عموماً صغناق وبالجملة طوائف تاتارك خليفه اعظم وشهر يار وسعادت دثار
ومعظمى كذلك اطرافه واقع جمله اويماقان ومضافتيه عموماً بوسنه وقاعة بلغراد
دار الجهاد وصرپ حكومتى وآنده اولان قلاع وحصون وبلاد ارناولدق وبالتمام
افلاق وبغدان واطرافلرنده واقع قلاع وحصون وتعريف وتوصيفدن مستغنى
نيجه بقاع وبلدانك پادشاه معدلت شيم وشهنشاه شوكت علمى السلطان ابن السلطان
والخاقان ابن الخاقان السلطان سليم خان ابن السلطان مصطفى خان ابن السلطان احمد
خانم عنوان منشور سعادت نشور سلطنتم توقيع رفيع سلطان البريه ايله مزين وپرزبور
ويرليغ بليغ خلاقم نقش نكار عظمت اظهار خاقان البحرين ايله معنون دارايش
كستردر لا جرم بر مبتغاي كلام در النظام السلطان ظل الله فى ارضه ذات ايهت
نصاب خسروانه مه عطيه بهيه الهيه اولان تشریف شريف خلافت موهوبه وجامه
لطيف سلطنت مرغوبه نك وبالشكر تدوم نعم كلها مقتضاسنجه ايفاي تشكرينه قيام
ايله تعظيم لامرالله وشفقت على خلق الله لوازمى اجرا قصواى مقاصد شاهانه
وچونكه استحصال آسايش رعيه واستكثار مؤثر انصاف وعدالت لازمه ذمت همت
تاجدارانه وراتبه عهدۀ عطوفت خسروانه اولمشدر بناءً على ذلك دولت عليه
ابدى الاستمرار و سلطنت سنيه سرمدى الاستقرار مزله مفتخرة الملكات العظيمات العيسويه
مختارة الكيرات الفخيمات المسيحيه مصلحه مصالح جماهير الطائفة النصرانية ساحبة اذيال
الحشمة والوقار وصاحبة دلائل المجد والاعتبار روسيه ولايتلرينك وتاماً روس واکاتب
نيجه الكارلك فرمانفرما وپادشاه و ايمپراطور يچه عظامسى حشمتلو رتبتلو دوستمز
قزیه ثانيه ختم الله عواقبها بخير والرشاد والههم اليها طريق الصواب والسداد بيننده بوندن
اقدم مؤيداً معهود اولان رابطه مصاحه ومصافات بعض عوارضه بناءً قبول انحلال
وانفصام ايدوب اولوجهله ظهور اختلال ووقوع جنك وجدال بر مدتد نبرو سفك
دمايه بادي وانسلا ب امن عباد الله مستلزم ومؤدى اولدينى اشبو شورش وغوغانك
اندفاع وسكوتى وعباد وبلادك آرامش واستراحتى ضمننده اشبو حرب و قتالك دفع
وازاله سيله مجدداً صلح وصلاحك عقد وربطى كرك جانب نصفت مناقب
خسروانه مزدن وكرك روسيه پادشاه و ايمپراطور يچه عظامى مشار اليها طرفندن
مراد اولثوب مابين الدولتين تايبد و تايبس صلح وصفوت و تاكيد وتشديد سلم
و مودت اولثوبى ضمننده دولت مشار اليها مرخصلر يله عقد مجلس مكاله ايدوب
مذاكره وتنظيم مواد مسالمة ومصافات ايلمك ايجون طرف باهر الشرف پادشاهانه مدن
رخصت كامله ايله مرخص اول تخصيص قلنان بالفعل رئيس الكتاب اقتضار الامراء
والاكابر مستجمع جميع المعالى والمفاخر المختص بمزيد غناية الملك القادر السيد عبدالله

برى دام علوه ومرخص ثانی نصب اولنان حالا دارالسعادة السلطنة السنيهم قضايى
 يابه سيه اردوى هايونم قاضيى اولان اقضى قضاة المسلمين اولان ولاة الموحدين
 معدن الفضل واليقين رافع اعلام الشريعة والدين وارث علوم الانبياء والمرسلين
 المختص بمزيد عناية الملك المعين مولانا ميرالسيد ابراهيم عصمت زيدت فضائه ومرخص
 ثالث تعيين قلنان حالا روزنامه اول افتخار الاماجد والاكارم جامع المحامد والمكارم
 المختص بمزيد عناية الملك الدائم السيد محمد درى دام مجده نك بشقه بشقه يدلينه
 خطوط هايون شهنشاهانه مله معنون رخصت نامه هايونم اعطا اولنغله مشاراليها
 طرفندن كذلك مرخص اولان بالفعل شامبلانى ومشورت قنچلاريه سنك مديرى
 وطريق كثيره نك قواليرى قدوة امراء الملة المسيحية عمدة كبراء الطائفة النصرانية
 الكساندرده سامويلوف مايور جنرال وايجه دوننانك قوماندانى وطريق كثيره نك
 قواليرى قدوة امراء الملة المسيحية بوزف ده دريباس ودولت مستشارى وقواليرى
 قدوة امراء الملة المسيحية سرجيوده لاش قروف ختمت عواقبهم بالخير هجرت نبويه
 على صاحبها افضل التحية نك بيك ايكيوز التى سنه سى جمادى الاول سنك اون بشنچى
 كوننده واقع ميلاد عيسى عليه السلامك بيك يديوز طقسان بر سنه سى كانون اولنك
 يكرمى سكرنجى كوننده محل مكمله اولان ياش قصبه سنده سالف الذكر طرفين
 مرخصلى بربرليه ملاقات وكندولره ويريلان رخصت كامله مقتضايى اوزره
 مواد مصالحى بالدفعات مذاكره ايليوب تراضى طرفين ايله اوچ ماده اوزرينه
 عقد وربط وتأسيس وتنظيم ايتمليله ذكر آتى اون اوچ ماددى حاوى تمهيد ومبادله
 ايلدكرى عهدنامه تمسكلى دستور اكرم مشير افخم نظام العالم ناظم مناظم الامم
 مدير امور الجمهور بالفكر الثاقب متمم مهام الانام بالرأى الصائب مهمد بنين الدولة
 والاقبال مشيد اركان السعادة والاجلال مكمل ناموس السلطنة العظمى مرتب مراتب
 الخلافة الكبرى المحفوف بصنوف عواطف الملك الاعلى بالفعل وزير اعظم ووكيل
 مطلق وسردار اكرم يوسف باشا ادام الله تعالى اجلاله وضاعف بالتأييد اقتداره
 واقباله دخى وكالت مطلقه ورخصت كامله لرى مقتضايى وروسه دولتك منتشر
 خاص ومكمله ناظرى اولان افتخار امراء الملة المسيحية عمدة كبراء الطائفة العيسويه
 قونته ده بزبور وتقو ختم الله عواقبه بالخيرك دولتى طرفندن رخصت تامه وكامله
 لازمه سى اوزره قبول وتمسكده مسطور موادى تصديق برله معتبر ومعمول به
 مهر ليله محتوم وتصديق نامه لرى طرفين مرخصلى مبادله ايتمليله طرفينك
 تمسك لنده مسطور ومسرود اولان مواد مصالحه ومسالمه يى صدر اعظم وسردار
 اكرم مشاراليه دأب دين سلطنت وقاعدة مستديم دولت عليهم اوزره دركاه فلك

بارگاه پادشاهانه مزه عرض و تلخیص ایتمکله رفاهیت اهالی و رعیت و راحت برایی ملک و ملت ایچون مواد مرقومه اوزره عقد و تمهید اولنان صلح و صلاح مستوجب الفلاح طرف هایوننمزدن دخی قبول و معتبر طوتیلوب خط هایون شوکت مقرر و نمز ایله موشح طغرای غرای جهان آرامز ایله مشرف عهدنامه هایون سعادت مشحونمز شرفیافته صدور اولسی لازم کلمکین لفظاً بلفظ مواد صلح و صلاح مقبول هایونمز اولوب یرلورینده رعایت و صیانت اولنسی ایچون ذکر اولنان ماده لر در که عینی ایله اشبو عهد نامه هایوننده ذکر و بیان و شرح و عیان قلنور .

اولکی ماده ایکی دلت بینده سبقت ایدن هر درلو معادات و مخاصمات شمیدین دفع و رفع اولنوب کرک شهنشاه عظمت نشان آل عثمان و کرک بالجمله روسیه لولرک پادشاه و امپراطور یجه عظمایه سی و آنلرک ورثه تخت و اخلاف لری بیننده ورعایا و براباری میانه لرنده جمیع اوضاع خصمانه و معادات علی الدوام ترک اولنوب نسی مؤید ایله منسی و متروک قاله و بوندن بویه برآ و بحرأ مصالحه مؤیده جاری اولوب تغیردن عاری و بری و متین و استوار و روابط مصافاتی ایفا برله الحاله هذه منعقد اولان مصالحه عهد نامه سی شروطنک کمال صفوت و دقت و اهتمام ایله مرعی طو تلمسنه سعی و اقدام اولنه بو و وجهه جانین بربرلینک حقنه بر درلو حرکت خصمانه و اسباب دشمنانه سرأ و علانیه مبادرت ایتمه لر و تجدید اولنان اشبو موالات و مصافات مقتضاسنجه معاهد اولان ایکی دولت لر بلا استثناء جانین رعایا سندن هر قغی لری ایکی طرفه جرم و قباحته متهم ایسه لر تهمت لری طرفیندن نسیاً منسیا علی الاطلاق عفو اولنوب چکدری و زندان لده محبوس اولنلری آزاد و اطلاق برله منفی و مکک ایتدیریلان کسانه و طنلرینه عودته اذن و رخصت و یریلوب مقدمات اولدقلری پایه و اموال لری بعد الصالح کندولره رد و ارجاع اولنوب آخر لر طرفیندن مزبور لره بر درلو ضرر و زیان و تعرض و تجویز اولنوب و مرسومیندن هر بریسی همشهریلری مثللو مملکتنده جاری اولان قوانین و قواعدک زیر حمایه سنده تحمی اوله رق کینه لر .

ایکنجی ماده تاریخ هجرینک بیک یوز سکسان سکن سنه سی جمادی الاولینسک اون دردنجی کوننده یعنی بیک یدیوز یتش درت سنه رومیه سی تموزینک اوننده عقد اولنان مصالحه عهدنامه سی وینه تاریخ هجرینک بیک یوز طقسان اوچ سنه سی جمادی الاخرینک یکر منجی کوننده یعنی بیک یدیوز یتش طقوز سنه رومیه سی مارتسک اوننده عقد اولنان معاهده مقرر و تاریخ هجرینک بیک یوز طقسان یدی سنه سی رجبک یکر می برنده یعنی بیک یدیوز سکسان اوچ سنه رومیه سی حزیرانسک

اوننده عقد اولنان تجارت معاهده سی و تاریخ هجری نیک بیک یوز طقسان سکر سنه سی صفر نیک اون بشنده یعنی بیک یدیوز سکسان اوچ رومیه سی کانون اولک یکر می سکر نده عقد اولنان روسیه دولته قریم و طمان الحاقی و قوبان نهر نیک حدود اولدیغی مبین سند اشبو عهد نامه و سندات سابقه ایله تبدیل و ترک اولمش ماده لر دن ماعدا باقی قالان بالمله شروط ایله اشبو عهد نامه مقتضاسیجه تأکید و تصدیق اولور لر و ذکر اولنان معاهدات و سندات بلا خلل مرعی و معتبر طوتیلوب حسن رعایتله کاملاً اجرا و ایفاسنه دولتین معاهدتین تعهد ایدر لر .

اوچنجی ماده اساسک شرط نایسنده الی الابد نهر طور له ایکی دولتک سنوری اوله بووجهله که بوندن صکره بالتام روسیه دولتک حدودی نهر مزبوره دکن امتداد اولنه دیو مسطور اولدیغنه بناءً دولتین متعهدتین بینلرنده بالاتفاق اشبو ماده یه قرار ویرلدیکه دولت علیه ایله روسیه ممالکی ییسنده علی الدوام نهر طور له حدود اولوب شو یله که : نهر مزبورک صول طرفنده اولان بالمله اراضی الی الابد کاملاً و بلا مانعه روسیه دولتک زیر حکومتده باقی قاله و نهر مزبورک صاغ قولنده اولان بالمله اراضی دخی روسیه طرفندن رد اولنوب الی الابد کاملاً و بلا مانعه دولت علیه نیک تحت حکومتده باقی قاله .

دردنجی ماده ایمدی دولتین حدودینه دائر قرار داده اولان نظام و انتظامه بناءً اساسک شرط رابعی موجبجه ایکی دولتک سائر جمله سنور لری اشبو محاربه یه کلنجه نوجهله ایسه لرینه اولوجهله اولوب روسیه دولتی عسکر لرندن اشبو محاربه ده استیلا اولنان بالمله یر لر و دروننده اولان قلعه لری روسیه دولتی الحاله هده بولند ققری وجه اوزره دولت علیه یه رد ایدر . بناءً علی ذلک روسیه امپراطور یچه سی طرفندن ضبط و استیلا اولنان بو جاق مملکتی و بندر و آفکرمان و کلی و اسماعیل قلعه لر یله جمیع قصبات و محلات و قرالری و سائر هر نه دروننده موجود ایسه دولت علیه یه رد ایدر و بغدادن مملکتی جمیع شهر و اماکن و مساکن و سائر هر نه دروننده موجود و مندرج ایسه رد و تسلیم ایدر و دولت علیه دخی ممالک مرقوم یه مواد آتیه الذکر اوزره قبول ایدوب علناً و کاملاً رعایت ایده چکنی تعهد ایدر . اولاً بالاده مذکور ایکنجی ماده ایله تجدید اولنان تاریخ هجری نیک بیک یوز سکسان سکر سنه سی جمادی الاول سنک اون دردنجی کوننده یعنی بیک یدیوز یتمش درت سنه رومیه سی تموز نیک اوننده منعقد عهد نامه ده وینه تاریخ هجری نیک بیک یوز طقسان اوچ سنه سی جمادی الاخر نیک یکر منجی کوننده یعنی بیک یدیوز یتمش طقوز سنه رومیه سی مارتنک اوننده نظام بولان تفتیح نامه ده وینه تاریخ هجری نیک بیک

یوز طقسان سکر سنه سی صفرینک اون بشنجی کونده یعنی بیک یدیوز سکسان
 اوچ سنه رومیه سی داخنده وزیر اعظم طرفندن دولت عثمانیه جانبندن اوله رق
 ویریلان هر نه که بغداد و افلاق مملکتلرینک منفعتنه دایر محرر و مندرج ایسه بلا
 خلل مرعی و معتبر طوتیلوب کمال دقله ایفا و اجرا اولنه ثانیاً عتیق محاسبه لراچون
 هر نه کونه ایسه کرک نقود آچیه و کرک سائر طریق ایله برنسنه بغداد مملکتندن
 طلب اولنیه ثالثاً اشبو محاربه نك جمله مدتیچون بردرلو تکلیف و یاخود آخر ویرکو
 طلب اولنیموب محاربه امتدانه یازده اولدققری مضرات و تخریبات متعدده لرینسه
 نظراً بوندنصرکه دخی ایکی سنه مهلت برله ذکر اولنان بغداد مملکتتی هر درلو
 ویرکو و تکلیفندن معاف برله اشبو مهلت معافیت مذکور مبادله تصدیقنامه تاریخندن
 عد اولنه رابعاً ترک وطن ایدوب آخر محللره وارمق رغبتده اولان خاندانلر
 بالجمله ایشالریله نقل ایتمکه سر بسیت اوزره مأذون اوله لر و اشبو خاندانلر املاکنی
 دولت علیه رعایاسندن اولان اقر بالرینه و دیلدکلری ینه دولت علیه رعایاسندن
 کسه لره اعطا و قاعده مملکت اوزره ینه مرسوملره فروخت ایلوب و کندو
 مصالحنک تنظیمی ایچون وقت کافیلری اولمق ایچون سر بسیت اوزره و ظنلرندن
 نقل ایلملرینه اون درت آی مدت امهال اولنوب اشبو مدت مهلت تصدیقنامه
 مبارکه نك مبادله سی تاریخندن معدود و محسوب اولنه .

بشنجی ماده دولتین متعهدتینک میانه لرنده صفوت و موالاته دلالت اولمق
 ایچونکه الحاله هده بینلرنده صلح و صلاحک و حسن اتفاقک تجدیدیه قناعت
 اولنیموب زمان مستقبل ایچون دخی مصالحه نك رابطه قویه ایله ربطن و هر درلو
 اسباب مباحه و برودته مؤدی اولور حالاتک دفعنه سعی مالا کلام ایله طالب
 اولدققری جهتلرندن دولت علیه تعهد ایدرکه مقدا صادر اولان فرمان عالیشانک
 بودفعه تجدیدیه تفلیس خاننک ید حکومتنده اولان مملکتته و سکنه سنه اخسیخه
 والیسی و ضابطان سر حد و سائر لری من بعد سراً و علانیه بردرلو بهانه ایله یحضور
 و تعدی ایتمک و قطعاً حسن اتفاق و همجواریه مغایر طرفلرندن خلل کتور لمامک
 باینده مذکور اخسیخه والیسی و سر حد ضابطاننه و سائر اشد تنبیه و تا کید ایله
 فرمانلر اصدار و تسیار اولنه .

التنجی ماده بیک یدیوز سکسان اوچ سنه سی کانون اولک یکر می سکرنجی
 کونده بالجمله دولت روسیه قریم و طمان الحاقنه دایر و اولحوالیده دولتین متعهدتین
 بیننده نهر قوبان حدود تعیین اولندیغنی مبین منعقد اولان سندی سائر عهد و ایله معا
 اشبو معاهده نك ایکنجی ماده سیله تمهید و تا کید ایلد کد نصرکه دولت عثمانیه وقت

مستقبل ایچون دولتین فحیمتین میانه لرنده صلح و صلاح و رفاهیت و حسن اتفاقه خلل کتوره بیلور جمله و سائلی تبعید ایلمک مراد و مقصود نده اولدیغنی اظهار و بیان ایچون علناً وعد و تعهد ایدرکه نهر قو بانک صول یقه سنده حدود داخنده متمکن طوائف بالجمله دولت روسیه نك حدود و سنورلرینه تجاوز ایتماسنه و روسیه ایمراطوریه رعایالرینه و انلرک اماکن و مساکنلرینه و اراضیلرینه دخی بر درلو تعدی و غصب و خسار ظهوره کتور لمامسنه و خفی و جلی بر درلو بهانه ایله روسیه آدملرینی قید اسره کر فتار ایلماملری ایچون ضبط برله منع و تحذیر ضمنده کندو اقتدارینی و جمله و سائلی بذل و اعمال ایدوب اولباده طرف دولت علیه دن خلافنده اولان علی ای حال اشد اوزره تأدیب و کوشمال اولنه جقلرینی مشعر لازم کلان کسنه لرله اشد و جمله فرمانلر اعطا و ذکر اولنان تنیهاش اشبو مصالحه خیریه بعدالان نقاد تصدیق نامه لری دخی مبادله اولندقدنصکره اولحوالیرده اعلان و بیان اولنه و اکر اقوام مذکوره اشبو عهد نامه ده قرار ویرلدیکی صورتدن ناشی کندولره اشد اوزره بالاده ذکر اولنان تنیهاش لرینه دخی نظر ایتمیوب آنلردن برکسنه بالجمله دولت روسیه نك حدود لرینه تجاوزی ارتکاب و غصب و خسارت و اضرار و تخریبات ترتب ایدوب یاخود حیواناتی و سائر نسنه ی غصب ایله آلوب کتور دکلری و یاخود روسیه آدملرینی قید اسره کر فتار ایلدکلری سببیه شکایتلری تقدیم اولندیغنی صورتده در عقب و بلا تأخیر غارت و یاخود غصب اولنان نسنه استرداد برله تراضی اولنه و باخصوص اخذ اولنان روسیه آدملری بر درلو بهانه ایله ادخال اولمقسزین بلا تأخیر و من غیر تردد تفتیش و تحقیق برله سیللمی تخلیه و آزاد و ترتب ایدن خسارات تضمین برله جرم و قباحتله متهم اولان کسنه لرک دخی عبره لساأرین حدود داخنده روسیه سرحد ضابطی طرفندن نصب اولنه جق مأمورلرک مواجهه سنده تأدیبلری اجرا و ایفا اولنه و اکر من غیر مأمول شکایتلری تقدیم اولندیغنی تاریخدن التی ای طرفنده دخی تضمین اولندیغنی صورتده دولت علیه تعهد ایدرکه روسیه ایمراطوریه ایلچیسینی طرفندن تحریر انها اولندقدنصکره برآی طرفنده بالجمله مرتب اولان ضرر و خسارلری کندو خزینه سندن تضمین ایدوب و همجواریتده اولان حدودلرک امنیت و رفاهیتنه خلل کتور دکلری ایچون بالاده مذکور وضع و تنظیم اولنان تأدیبلری دخی بای حال و وجوه ایله متهملری اوزرنده فعلاً و من تأخیر اجرا و ایفا اولنه .

یدنجی ماده تجارت ماده سی طرفین حسن اتفاقک جبل متین و رهین اصلیبی اولدیغنی جهته دولت عثمانیه روسیه دولتیله بووجهله مصافات و موالاتی تجرید قیلوب صفوتی اظهار ایچون و دولتین رعایالری بینده تجارتی بلا ممانعه آماناً و سالملاً

اجرا و ظرفین منفعتك وجه اهون اوزره متزائد اولمسنه طالب اولديغه بناءً و دولت روسيه ايله منعقد اولان تجارت معاهده سنده جزائر و تونس و طرابلس عرب او جاقلرينه دائر التمش برنجي ماده سنی اشبو ماده ايله دستور العمل اعتبار ايدر . روسيه رعایالرندن جزائر و تونس و طرابلس غرب او جاقلری قورصانلرینه مصادف اولوب بونلردن سبی واسترقاق اولنور ايسه و یا خود ذکر اولنان قورصانلر روسيه تجارینك سفینه سنی و یا خود مالی الورلر ايسه دولت عليه ذکر اولنان او جاقلرک اوزرنده اولان اقتدارینی اعمال ايله بو وجهه اسیر اولمش روسيه رعایالرینی تخلیص و اخذ اولمش سفینه لرینی و اموال و اشیای مغصوبه لرینی احجابنه استرداد و لازم کلان ضرر و خسار لرینی تحصیل استیره و دولت عليه طرفندن ویریلان فرمانلر جزائر و تونس و طرابلس غرب او جاقلری طرفندن اجرا اولمديغی خبری و رودنده بعد التتحقیق اولوقت روسيه ایلچیسى و یا خود مصلحتکذارى طرفندن در عليه يه انها اولندقدنه اول تاریخندن ایکی آی اعتبار ايله یا خود ممکن اولور ايسه دخی مقدم خزینة هایوندن تضمین و تراضی خصوصنه دولت عليه تعهد ايدر .

سکزنجی ماده کرك انات و کرك ذکر جنسنندن اولان بالجمله اسرای محاربه و سائر اسیرلر هر نه پایه ورتبه دن ايسه لر ایکی دولتک اراضیلرنده بولندجه روسيه دولتسنده اراداتلر ايله تنصر ایدن مسلمین و دولت عليه ده ینه حسن اراداتلر ايله دین محمدی بی قبول ایدن خرسیتانلردن ماعدا بالجمله اشبو عهدنامه مبارکه نك تصدیق نامه لری مبادلده سندن صکره در عقب و اصلا بر درلو بهانه ايله طرفیندن بلا عوض و بغير ثمن آزاد و استرداد و تسلیم اولنه کذالك گرفتار بند استرقاق اولان بالجمله خرسیتانلر لهلو و بغانلو و افلاقلو و مورده لو و اهالی جزائر و کرجیلر و سائر بالجمله و بلا استثنا و بلا ثمن و بغير عوض آزاد اولنلر کذالك اشبو مصالحه مبارکه نك انعقاد نصکره بر تقریب ايله گرفتار بند استرقاق اولان روسيه رعایالری دولت عليه ده بولندجه رد و تسلیم اولنلر و کذالك دولت عليه نك رعایالری حقمه بعینه معامله متشابهه اوزره حرکت ایتمکه روسيه دولتی تعهد ايدر .

طقوزنجی ماده اگر چه حالاً مصالحه خیریه نك مصلحتی نظام بوله جفی تقریبيله آلات حربیه تاخیر اولنوب اعمال دشمنانه صدور بولیه جفی هر نه قدر مجزوم ايسه دخی لکن اشبو معاهده بی بعد الامضا روسيه دولتک بوماده ده دائر باش مرخص قلنان بالفعل مستشار خاصی طرفندن در عقب روسيه دولتی عساکرینک و دونمالمیرینک اوزرنده سر کرده سنه اخبار ایدوب کذالك ایکی اولو دولتلر میاننده صلح و صلاح و مصافات و موالات قرار بولدیغی دولت عليه نك صدر اعظمی حضر تلی طرفندن دخی دونمالمیر و میانة عساکر عثمانیانه افاده و بیان اولنه .

اوننجی ماده دولتین بیننده مصالحه با که نک و صفوت و موالاتک زیاده تقویه سی
 ضمننده ایکی طرفندن بالاتفاق تعیین اولته جق و قدده جانیندن علناً فوق العاده
 بیوک ایلیچیلر بعث و تسیر و ایکی ایلیچیلر رأس حدودده معامله متشابهه ایله استقبال
 اولنوب دولت علیه و روسیه دولتی عندلرنده زیاده معتبر اولان اوروپا دولتلری
 ایلیچیلری حقدده اجرا اولنان رسم معتاد مومی الیهما حقلرنده دخی مرعی قلوب
 ودالات صفوت جانین اولمق اوزره ایلیچیان وساطتیه شان دولترینه لایق
 هدایا ارسال اولنه .

اون برنجی ماده ایکی اولو دولتر بیننده اشبو شروط معاهده ربط و تنظیم
 اولنوب طرفیندن تصدیقنامه لری دخی مبادله اولندقدن صکره روسیه ایمپراطوریه
 عسکرلری و ایچیه دونمائی دولت علیه مملکتلرندن خروج مباشرت ایلیه لر و عساکر
 و دونمانک بومقوله خروجلرنده دخی وقت وزمانک حالته تطبیق ایتمک لازم کسکله
 بناء علیه دولتین متعهدتین بالاتفاق اشبوکله جک بیک یدییوز طقسان ایکی سنه
 روسیه سی مایسنک اون بشنجی کونی نتیجه ونهایت وعده اولمق اوزره بالذا کره
 قرار ویرملریه تعیین اولنان وقت موعودده روسیه عسکرلری نهر طورلنک
 صول یقه سنه تماماً و کاملاً مرور و ایچیه دونمائی نهر طورله بوغازلرندن تماماً شوره
 خروج ایلیه لر و روسیه لو طرفندن استیلا اولنوب اشبو مصالحه عهدنامه سی موجب
 دولت علیه رد اولته جق قلاع و مملکتلرده مادامکه روسیه ایمپراطوریه عسکرلری
 بولنه اشبو مملکتلرک حکومت و نظامی روسیه لونک ضبطنده بولندیقی اوزره قالب
 روسیه عسکرینک کلیاً خروجلری وقتنه دکن دولت علیه جانندن ممالک مذکورنک
 حکومته مداخله اولمیه و بومملکتلرده بولنان روسیه عسکرینک اقتطاف ماکولات
 و تدارک لوازم سائرده سنه الان عمل اولندیقی اوزره کذلک تماماً خروجلری
 کوننه دکن عمل اولنه .

اون ایکنجی ماده جانین مرخصلری اشبو معاهده نی امضایلد کدن صکره
 شهنشاه عظمت نشان آل عثمان حضر تلرینک صدر اعظملری طرفندن و بالجمله
 روسیه لولرک پادشاه و ایمپراطور یحیه عظامسی جنابلرینک دخی باش مرخص و بالفعل
 مستشار خاصی طرفندن اشبو منعقد اولان مصالحه مبارکه نک تمهید ایده جک طرفین
 سندلری ینه مرخصلرک یدیه یاش قصبه سنده ایکی هفتهده و قابل اولور ایسه
 مدت اقلده مبادله اولنه .

اون اوچنجی ماده حالا منعقد اولان اشبو مصالحه مبارکه مؤبدنک
 شرائطنی کرک عظمتلو شهنشاه آل عثمان حضر تلی و کرک ایمپراطور یحیه عظم

جنابری طرفلرندن کندو امضالریبه علناً تصدیقنامه لریبه تصدیق و تأیید ایلیوب
ذکر اولان تصدیقنامه لری دخی اشبو معاهده مبارکه نظام پذیر اولان محله عقدی
تاریخندن بش هفته ده و قابل ایسه دخی مقدم طرفین مرخصلری و ساطیله مبادله
ایتمک لازم کملکه اشبو معاهده بی جانین مرخصلری کندی امضالریبه امضا
و مهر لریبه تمهیر ایلیوب بیلرندده مبادله ایتمشدر .

خاتمه بو ذکر اولنان اون اوچ ماده بی شامل عهدنامه و تصدیقنامه لری وقت مرقومده
مبادله و تسلیمی خصوصلری شرط و ربط اولندیغی اوزره ان شاء الله الملك العلام
حسن اهتم جانین و صدق و خلوص طرفین ایله پذیرای ختام اولمق ایچون یدیمزده
اولان رخصتنامه هایون موجبجه اشبو تمسکی ترقیم و املا و مهر و امضالریبه ایله
مختوم و ممضی قیلوب روسیه دولتی مرخصلری یدلرینه تسلیم و اعطا اولندی دیو
ذکر اولنان تمسکده محرر و مسطور اولغله ایتمدی اشبو مواد مصافات و شرائط
موالات مادامکه روسیه امپراطور یچه سی مشار ایله و اخلاقی طرفلرندن مرعی
و معتبر و ضوابط و روابطی تطرق خللدن حمایت و صیانت اولنه رقی مستحکم و مقرر اوله
طرف هایونمدن دخی ذات معالیمات شاهانه و جناب شوکتآب ملوکانه سزاوار
و شایان اولدیغی وجهله تعهد اولنورکه شروط و قیود مصافات طرف ظاهر الشرف
شاهانه مدن و اخلاف سعادت اتصافزدن و وکلای عالی مقام و وزرای عظام و میر میران
کرام و امرا و ضابطان و عموماً عساکر نصرت ارتسامزدن و فی الجمله عبودیتیز ایله
کامیاب اولان طوائف و خدامتیز طرفلرندن رعایت اولنوب برفرد خلافتیه وضع حرکت
ایلمیه تحریر آتی الیوم الخامس و العشرین من جمادی الاولی لسنه ست و مأتین و الف .

(۱۵)

* بخارا حاکی محمد معصوم خان طرفندن ایلیچیبسی محمد بدیع *

* و ساطیله عبه علیای جهاندار یه وارد اولان نامه سنک *

* خلاصه وجهله ترجمه سیدر فی غره ل سنه ۲۰۳ *

بعد الالقب بوندن اقدم کوندریلان نامه هایون ایکی یوز ایکی سنه سنده وصول
و پدرم وفات ایتمکله کمال حزن ایله متأثر و غایتله پریشان خاطر ایکن غریب نوازلق
بیوریلوب نامه هایون شهریاری وارد اولغله بزلره قوت قلب اولوب جمعیت
خاطر مزه بادی اولمش ایدی آنک کبی بودفده دخی برقطعه نامه شاهانه لری احسان
بیوریلوب دروننده روسیه طائفه سنک نقض عهد ایلدکلری بیان و بو دیارده
اولان علما و اصیحا و کافه اهل اسلام منصوریت دین مین ایچون دعایه اشتغال و اهتم

ایلملری فرمان بیورلمش فرمان ملوکانه بی استماع ایتدکلری کبی دعوات خیریه یه قیام ایلمشدر و ماوراء النهرده اولان طوائف خصوصاً ماوراء النهر ایله روسیه بیننده دشت کیرده ساکن اولان جماعت قزاقیه و قرغزیه و غیریلرک کفره مسفوره ایله محاربه یه اشتغال ایلملری باینده صادر اولان فرمان عالی رینه امتثالاً مقاتله دشمنه متوجه اولملریچون اولطر فلرده اولان خانان ورؤسا و قبائل ایلاته متعدد ایلیچیلر و امرلر کوندردم بلکه جمله یه فرض اولان محاربه کفار به بالنفس کیندم کیدوب رضاء لله جانمی فدا ایدرم اما نه ایشلم جمیع آرزو میسر اولمق دنیاده اولیوب آخرته مخصوصدر مسموع شریفلری اولمشدرکه درت اطرافزده اهل کفر اولان اوزبکیه طائفه سی اولوب و کندولر یله بینمز خوش اولیوب خصوصاً اوچ درت قبیله که بیوجه شرعی مخالفت ایدرلر آنلرک فتنه لرینی تسکین ایتمک غائله سی جهاد ایله مشغول اولمغه فرصت ویرمامشدر . بودخی عتبه علییه عرض اولنورکه طائفه مرقومه ده انتظام و رابطه اولمدیغندن احتمالدر که دشمن ایله محاربه و مقاتله و ایشالرینی اخذ و غارت ایچون امر مزه اطاعت ایدرلر . لکن اگر کمنه یه دخل ایتمک و کمنه نك مالنی آلمق و یا خود طوئدیغکری ویرک دیسم قبول ایتمزله نه چاره قزاقیه و اوزبکیه اختلالی اشبو عرض ایتدیکم وجه اوزره در اگر عون حقه اوزبکیه نك مخالفتی موافقته مبدل اولوب بزه اطاعت ایدرلرایسه خدمت شاهانه لرینه جانمی فدا ایدرم بودخی عرض اولنورکه نامه هایونلری و رودینه دک بودیارک اهالی و تجارینک و طائفه قزاقیه نك اکثر بیع و شرا و معاملات ساره لری روسیه لولر ایله اولوب بودفعه طرف دولت علیه دن کفره مسفوره ایله مقاتله یه مأمور اولملری یله بربرلرینه کلوب کیتملری منقطع و طریق معامله بالکلیه مسدود اولور اگر دولت علیه کفره مرسومه ایله صلحه رغبت بیوریرایسه دولت علیه لریله صلح اولوب بو طرفلره تعرض و خسار ایتامک ایچون بودیارک اهالیسنی دخی صلحه ادخال بیوره لر . زیرا قریب و بعید جماعه اهل اسلام سایه دولت علیه ده راحت و آسایش امید ایدرلر باقی بدیع بکک تقریر شفاهینسه حواله ایله کلامه ختام ویرلمشدر .

* سالف الذکر محمد بدیع بکک قلمه آلتان تقریری ۲۹ ل ۲۰۳ *

بوداعیلری بخارادن چیقهلیدی ماه قدر وقت کچدی مسقو مالکی مسدود اولوب عجم ایله دخی خیلی و قندنبرو خصوصت درکار اولدیغندن طوغری بولردن کله میوب طولاشه رق و انواع محنت چکدرک کلام بن چیقمازدن بش اون کون مقدم نامه هایون کلیجک بخارا خانی نفوس کثیره دن عبارت اولوب تحت اطاعتنده و مسقو ایله

همحدود اولان قرغز تاتارلرینه مخصوص کاغد و قزاق خانلرینه سفیرلر کوندروب خلیفه المسلمین اولان آل عثمان پادشاهی حضر تلرینک مسقولو ایله سفری وار ایش کفار ایله محاربه و جهاد کافه اهل اسلام اوزرینه فرض اولمشدر . ایچکرده هر تقد مسقو تجاری وار ایسه جمله سنی طرد و دفع و فیما بعد مسقولونک هر بار احتیاجلرینه مبنی اشترایه مجبور اولدینی بار کیر و قیون و بیانی و سائر امتعه بیع اتمیه سکنز و معامله تجارتی کلیاً قطع ایده سکنز و مسقو مملکتلرینی تاراج ایله اخذ انتقام ایلیه سکنز دیو مرقوملری جنکه تشویق ایلدی . قرغز و قزاق طائفه سنی بی نهایت اولوب جمله سنی اهل اسلام و حنفی المذهب اولملریه بلاد کفار آقین ایدوب بو طرفدن ممالک اعدایی تخریب اتمک اوزره درلر بونلرک اکر چه خان مشارالیه تبعیتلری درکاردر . انجق کندولره مضر و اجراسی غیر ممکن اولان ماده ده خانه اطاعت ایتزلر . مثلاً بودفعه واقع اولان امرینه امتثال ایله مملکت اعدایه هجوم و ماللرین اغتنام ایدرلر بعدالمصالحه آلدیغکز اموال و اسرانی رد ایدیکز بویله قول اولندی و مصالحه بونک اوزرینه در دینسه مفید اولیوب آدقلرندن برشی ویرمزلر . بو وجهه روسیه ایله دولت علیه مصالحه ایتدکده واقع اولان خساری برینه کتوره ک خصوصنی مسقولو تکلیف ایده چکی ظاهردر . مسقولونک بوتکلیفنه طرف دولت علیه دن قطعاً نمانشات اولنمالمیدر زیرا اجراسی ممکن دکدر خان مشارالیه بی اقتضا ایدن خصوصاتی شفاهاً افاده ایچون کوندردی و مصالحه و قوعنده بخارا خانی دخی برابر اولسی شرط قلمسینی مخصوص رجا ایلدی و مصالحه قدر بوراده اقامته مأمورم حالا اولطرفلر نه حالده در بیامم مخابره لازم کیمکله برمناسب طریقندن کاغد کوندرملک و اقتضا ایدن خصوصاتی بخارا خانه افاده اتمک اوزره کارآشنا برسفیر بخارا جانبیه کوندرملک لازمکلور قالدیکه طرف سلطنت سنیه دن بویله برسفیر ارساله اراده علیه تعاقق ایلدیکی صورتده بو طرفدن سفیر مومی الیه طوغری بغداده واروب اولطرفدن تجار هیئتیه عجم ایچیدن بخارا حدودینه دخول و آندن یکرمی نهایت یکرمی بش کون طرفنده خان مشارالیه ک حکومتی اولان دشت کبیره وصول میسر اولور قالدیکه بو طرفدن کیدنلره اعجاب تعرض اتمز آنلرک تعرضلری بخارا طرفندن کلانلره در خان مشارالیه ارسال تخریرات ایله بو طرفک حالی بیلدیرمک و اولطرفک حالی بیانمک ایچون بر طریق مخابره لازم کلوب بوا یسه بغداد طریقله اوله مز بنم ظنمه کوره بو طرفدن اناپه یه آندن طاغستانه و آندن تیمور قپویه و آندن دخی ازدرخان جانندن بخارایه تخریرات ارسالی و بخارادن دخی بو طریقله کاغد استجلابی ممکن اولوق کبر کدر .

* صورت تقریر نامه رس بخارا *

و قتا که رفیقلم جسارت ایدمیوب قولاغوز ایله تجار هیئتده متوکلاً علی الله تعالی وان اوزرندن عزیمت اولندی اذربایجان انتهایسندده میانه نام قزلباش مملکتته اون بشنچی قوناقده وارلدی تجار اولدیغمز بیلنوب تجسسده افراطه باشلادیلر بی اختیار نامه رس اولدیغمز بیلدیردک بیلرندده مشورت ایدوب سیلمزی کشاد ایتدیلر بخارایه دک فیابعد تمناعت ایدمدیلر میانه دن قالقوب اصفهانه تابع قیلان تو نام محله و آندن ایکی منزل سرجم نام محله و آندن اوچ منزل زنکان و یدنجی منزل سلطان حصاری و ایکی منزل لنگر دوز و اوچ منزل یرلوه و آندن یکریمی درت منزل کشان نام اصفهانه تابع شهر عظیمه وارلدی ذکر اولتان یرلک اکثری خرابه ایدی کشانده اون سکیز کون اقامت و بعده هند و افغان شاهی تیمور شاه الکاسنه کیردک چول حکمک اقتضا ایتمکه آتلیمز دوه لره تبدیل اولندی والی برکون چولدن کیدیلوب یزد نام شهره وارلدی یدی کون اقامت اولنوب تکرار الی کون دخی ریکستاندن کیدلدی نهایت هرات نام شهر عظیمه وارلدی شیعی ایله سنی مخلوط ایدی آثار و ابنیه سی چوق محل ایدی و تیمور شاهک اوغلی حکومت ایدردی یکریمی درت کون اقامت اولندی . دوه لری نه اسبه تحویل قلندی اون بشنچی منزله تاورمه چی قصبه سنه سکیزنجی منزله یاوسه یه و اون دردنجیده قوجه یایه وارلدیکه تیمور شاهک وزیر ی هبه الله خان حکم ایدردی یدی کون اقامت اولنوب وینه یدی کون چول کچیلوب نهر سیحون کنارنده کر کو نام شهره وارلدی و خیر اولدق که بخارا خانی ایله تیمور شاهک عظیم خصومتلری و ارایش کر کو خانی توقته بای بز ی دعوت و اکرام ایدوب روافض ایچندن سلامته کلدیکمز ده تعجب ایتدی و رودمزی التي منزل ایلرو بخارایه خبر کوندر دیلر یدی کون اقامتدن صکره قالقوب بخارایه ایکی ساعت جهان آباد نام محله نزول اولندی . آنده شیخ العالم دیرلر بر معتبر زیارتگاهلری واردر بو اثناده وافر نزل و نعمت و قارشو جیلر و طاقم کلدی اکرام ایلدیلر اثنای ضیافتده خیر اولدق که بخارا شاهی سید محمد غازی خان وزیر ی اوله جق شاهمرادک حبسنده ایش عصیان ایدوب حبس ایلمش پادشاه نسل جنکیز ایدی . شاهمراد منغظ تعبیر اولنور نسلدن ایدی . یعنی شاه اوله مزدی جنکیز نسلندن قیز آلوب بر اولادی اولغله غازی خانی بر بهانه ایله قتل ایدوب کندو اوغلی شاه ایتک استردی و عالم بو خصوصه مکدر اولوب لکن کمال استیلامی اولغله اظهار خوف ایدوب دائماً لسان حال ایله شاهمرادک اضمحلالنی تمی ایدرلردی

والحاصل جهان آبادده ایشك اغاسی و طوپچی باشیسی و دیوان بکی بزم سبب
 قدومیزی سؤال ایلدیلر نامه و مکتوبمز اولدیغنی و مصلحت نه ایدوکنی خبر و یردک
 هدیه و جفا کتوردیکیزی دیدیلر بزدخی بوقدر مسافه دن جامیزی کوچ ایله
 کتوردک مصلحت دینه ایچون کیشزدر پادشاه اسلامه لایق خدمته قصور ایتمزلر
 ایسه دولت علیه نك متعین قوللری واردر بریله جفا و هدیه احسان بیوررلر دیدک
 جوابیزی شاهمراده افاده ایتملر و دیوان بکنه مسافر اولدق بزم دولت علیه آدمی
 اولدیغیزی آستانه علیه کیش کمنهلر بولوب تصحیح ایلملر بعده علماسی
 و نقیب الاشرافی کلوب بزی سرای شاهی به کتوردیلر او چنجی قپودن کیروب
 کندوسی اولدیغنی عرض او طه سنه وارلدقده نامه هایونی باشم برابری قالدیروب
 سلام و یروب دخول ایتم جمه سی سلام آلدی شاهمراد استقبال ایدوب المدن نامه یی
 آلق دیله دکده اوچ دفعه تقییل ایدوب صوندم اول دخی تقییل ایدوب منشیء
 دیوانه و یردی اول دخی آلوب پوشیده لی ایسکمله به وضع ایتمدی بعده قعود اولندی
 در علیه دن چیقدیغمز تاریخی سؤال ایتمدی بزدخی برسنه و آنده اقامت و سکیز آی
 یولده امرار وقت ایتمک دیدک مسقولو ایله اولان جنکی سؤال ایتمدی مسقولو
 نقض عهد ایتمدیکنی خبر و یردم و مسقولو ایله آلیش و یرشلی اولوب بوزشمق
 ایستمدکلرینی اثنای راهده خبر آلمش ایدم آکا کوره جوابلر ایلدم بعده قوناغمه
 کدک آراقده ضیافت و اکراملر ایدرلردی روشلری درویشانه و علماسی چوق
 و صافهاد کمنهلر ایددی و پادشاه عالمپناه حضر تلرینه دعای خیر ایدرلردی . برکون دیوان
 ایدوب بزی کتورتدی و نامه هایونک جوانی اوله رق بزلر برآلای درویشان دعا جیلرز
 مسقولو کبی خصم قوی ایله طوب و جبه خانه سر مقاومت اولنه مز اولاو اغامه جفا و خانلق
 و یریلوب و خزینه و مهمات احسان اولنوب و مسقولو حدودنده اولان سر قاعه سی نام
 خرابه قاعه مز تعمیره محتاجدر بووجهله همت اولنورسه عسکریمز بی حد و پایاندر دیوب
 بومقوله اعذار و اهیه ایراد ایتمدی بزدخی وسع مرتبه جوابلر و یروب دولت علیه نك
 مرادی جهاد و غزاده اولدقلمزینی اخباردر . اگر ممکن ایسه غیرت اسلامیه یی
 صرف ایدوب بو طرفدن دخی دشمن دین اوزرینه هجوم ایدر سکیز و عهده کوزه
 فرض اولمشدر دیدک جمله سی بردن متفق الکلمه اگرچه اولهدر لیکن بزم اصل
 دشمنز اعجاب و روافضدر آنلر اوزرینه سفریمز مقرر اولمشدر دیوب سن دخی
 فاتحه خوان اول دیدیلر یعنی قاعده لر نجه استیذان ایتمیلر بزدخی پادشاهک دشمنی
 شمدی مسقولو در عجمه بزم غوغامز بوقدر دیدک دفع مجلس ایدوب چند روز
 مرورنده اون بیکدن زیاده عسکرله شاهمراد قالقوب مورنام محلی اوروب تامشده دک

چاپول ایتدیله قتی وافر اسیر و غنائم کتوردیلر مکر مور دیدکری مملکت افغان
 شاهی تیمور شاهی ایش متالم اولوب بونله ایلچسی کلوب عظیم عتاب واقع
 اولیجق خوفلرندن جواب یازوب بزکدومز ایتدک پادشاه اسلام آل عثمان
 امریله اوردق مخصوص ایلچسی کلدی بخارا حجاجنه عجم ایچندن یول آچق مراد
 بیورمشلر دیو خلاف. تحریر ایشلر بز صکره دن واقف اولدق بوخبر تیمور شاهه
 واردقده عظیم متأثر اولوب مور و مشهد طرفلرینه محافظلر کوندروب کندوسی
 دخی بخارا قصدیله عسکر جمعنه باشلامش بوخبرلر شاهراده واصل اولدقده
 زیاده سیله خوفه دوشوب و پشیمان اولوب بز ی طلب ایتدیلر واردقده ایشته قرقز
 و قزاق قبائلنه نامه لر حاضر در مسقولو اوزرینه تسلیط اولنورلر لکن سن فیما بعد
 عجم ایچندن کیده مزسین و طاغستان طرفی دخی مسقوسبی ایله مسدوددر بهر حال
 بو طرفن کابل شهرینه تیمور شاهه واروب آندن قندهاره و آندن بحر فارسدن
 مسکته و بصره یه طولاشمغه محتاجسین دیدیلر مراملری بز ی استشفاع ایچون
 تیمور شاهه کوندرمک ایدی بز دخی بنم هند دیارنده نه مصلحتم وار هنوز نامه
 یوقدر الی بوش بر پادشاهه کیتمک نیجه ممکندر دیدکده جمله سی بردن هجوم ایدوب
 قطعی بویله اولمغه محتاجدر دیوب تیمور شاهدن خوف ایلدکرینی و جنحه سابقه لرینی
 بیان ایدوب سن بزم مرخصمز اول آلدیغمز مالی و اسیرلری رد ایله نوجهله ایدر سهک
 راضی بز دیدیلر و ایکی ایلچی دولت علیه یه و ایکی ایلچی تیمور شاهه تجهیز ایدوب آماده
 ایلدیلر بز دخی بالضروره رضا و یردک و بخارا دن قالقوب اون ایکی کونده بخارایه تابع
 بلخه وارلدی اوچ کون ضیافت ایتدیلر آندن ایکی ماه یول کیدیلوب کابله
 وارلدی که پای تحت تیمور شاهدر و بونک الکاسی معمور و نصفی سنی و نصفی
 خرابی دیدکری طائفه در که حاشا حضرت علی یه الوهیت اثبات ایدرلر مهماندار
 قارشو کلوب قوندوروب اوچ کون ضیافت اولندی بز دخی شاه مرادک ابرامیله
 نوجهله کلدی کمزی و بخارایه نه مصلحتله کیتدی کمزی خبر و یردک پادشاه عالم افندیمزه
 قبله عالم اطلاق ایدرلردی وزیر تعجب ایدوب قبله عالم افندیمزک بخارا خلقی
 کبی بر آلا ی درویشانه نه احتیاجی اولدی که او مقوله تکلیف ایده دیدی بز دخی
 مرادلری افاده خالد دیدک مجرد عجم رعایاسنی اورمغه دائر در علیه دن حرف
 یازلمدیغنی بیلدیردک و نامه کز بخاراده کیمه ایدی دیدی غازی خانه ایدی دیدک
 یاشاه مرادک اسمی سز لرده یاد اولنورمی دیدی کسسه بیامز دیدک آندن محظوظ
 اولوب شاه محبوسه زیاده تأسف ایتدیلر ایرتسی یه یالکز تیمور شاه حضرت تلیسنگ
 حضور یه کتوردیلر قیام و قعودی و هر بر اطواری پادشاهانه ایدی وزیر هر نه

سؤال ایتدی ایسه اولدخی سؤال ایتدی جواب ویردک قبله عالم افندمزک بز دعا جیسی بز دیوب پادشاهمزی یاد ایتدکجه تعظیم بیورر لر ایدی و خدمتله یله افتخار ایدردک نه اولیدی بر مناسبتله خدمت ایدوب دوستلق ایتمش اولیدق دیدیلر و بخارادن استمداد اولدنیغه تأسفله ایدوب آنلر بر آلائی بی سر و پا طائفه در دیدیلر سنی یتشدن زیاده اوزون بویلو شهلا باقشلو متبسم وقور پادشاه ایدی صغیر و صغیره دن غیرى کندوسیله اینر وینر قرقدن زیاده اوغلاری اولوب اوغلنک بری قندهارده افغان تخنکاهنده و بری هر اتده و کندوسی کابلده هند الکاسنک بر قطعه سنه حکم ایدردی که اوچ شاهاق یری ضبط ایتمش ایدی وقتی چوق تعلیمو عسکری اولوب شب و روز امور مهمه لری عسکره تعایم جنک ایتمک ایدی و تعلیملری فرنک تعلیمی کبی اولوب بر نردن اون نفره تاپوز بیک و ایکیموز بیک نفره وارنجبه ضابطانی اولوب ایکیموز بیک عسکره برلک تعبیر ایدر لر دی و ذکرا اولنان تعلیمی ضبط ایدملى بالجمله دشمنلرینه غلبه ایدوب هند و عجمی قبضه تصرفه آلمش ایدی کندوسی سنی و حنفی المذهب ایدی و کندوسی و اوغلاری و وزیر اعظمی نور محمد خان نظام و تعلیم عسکره صرف اوقات ایدوب نوبنو آلات محاربه ایجاد و سرعت طولیرینی و جبهه خانه نقل ایدمه جک آلائی اسهل و جهله استعمال ایدر لر دی و مهندسله و ارباب کاله رغبت ایدوب میریدن تعیین ویرر لر دی تیمور شاه بالذات سؤال ایدوب دولت علیه نك جمع رسوماتی و الکاسنی و عاداتی و رسم سلطنتی بیلدیکم قدر خیر ویردم حتی یاتمده جزیه اوراقی بولمغله کوسترد کده عظیم پسندیده ایدوب و آلوب تبرکاً حفظ ایلدیلر و مقدارینی سؤال ایلدیلر تخمیناً یوز دوه یوکی اوراق صرف اولمق کر کدر دیدم بعده ینه عظیم دیوان ایدوب درت ایلچی ایله بزى معاً طلب ایتمش وارد قدده ینه اکثر سؤال و جوابی بزمله اولوب محبوس اولان سید غازی خانه تأسف ایدوب شاهمراده اظهار غیظ و ان شاء الله تعالی بن اکا پادشاه حبس ایتمک نیچه در کوستره میم دیدکدن صکره نامه لیرینی قرائت ایتدیلر کندی ایلچیلریله بزم آستانه یه کوندر لمامز خصوصندن عبارت اولوب محمک اورلدنیغه دائر کلام درج اولتماش اظهار چین چین جیین ایدوب بن شاهمرادک ایلچیلرینه در بندجی دکلم قبله عالم پادشاه اسلام افندمزک چاپارینه هر طرف یولدر جمله مملکتلر آنکدر لکن سزه یول یوقدر دیوب امر ایتدی ایلچیلرک در دینی بردن حبس ایتدیلر بش ماه محبوسده قالدیلر بزّه مستوفی تعیینات ویر یلوردی بعده بزّه نامه هایون ویروب قندهاره اوغلی هایون شاهه کوندردی کندوسی قتی چوق لشکر ایله بخارا اوزرینه قالدی و ایلچیلری ایلرو اخبار ایچون بخاریه ارسال ایتدی او توز

بش کونده بز دخی قندهاره کلدک برماه مکک ایتدر دیلر تیمورشاهک ایالت قوندوزی آلدینی خبری کلوب چند روز مرورنده بلخه واروب بخارا عسکری دخی قارشو کلدکه بوزوب شاهمرادی طوتوب قتل ایتیموب ینه سید غازی محمد خانی اجلاس وشاه مرادی وزیر ایدوب اوغللرینی و بخارا علماسندن بعضیسنی رهن آلوب ومملکتلرینی واسراستی اترداد ایلدیکی مزده لری کلدی اوچ کون کیجیه سیله شملک ایتدیلر بعده بزه آدمئر قوشیلوب بحر فاسه کلوب سفینه لر ایله اون بشنجی کون یمن حدودنده مسکت اسکله سنه چیققدق مطره نام بلده اوکنده بر عظیم فورتنه اولغله الی قدر سفائن کبیره غرق اولدینی مشاهده اولندی اکثری انکلیز وسائر فرنک کملیری ایدی قتی چوق مال تلف اولدی واول سواحله دکز پادشاهنک زیاده قوتی اولوب وفرانسه لو ایله متفقاً انکلیز لو ایله عظیم محاربه اوزره لردر بعده مسکتدن بصره یه کلوب آندن بغدادده و آندن دولت علیه یه کلک مقدر اولدی .

(۱۷)

* عزمی افندیئک سفارتنامه سی *

الحمد لله الذی اید بنیان الدین والدولة بحسن تدبیر رجال وجعلهم امناء علی تسویه امور الفقراء بالرأفة والشفقة فی کل حال والصلاة والتحیة علی خیر البریة محمد المبعوث لتتمیم مکارم الاخلاق ومحاسن الخصال وعلی آله واصحابه المتکلمین باحسن الاقوال المتصفین بخیر الاعمال .

اما بعد تقریر کترین بندکان دیوان سامی احمد عزمی اولدرکه دولت علیه ابدی القرار ایله پروسیا دولتی بینده منعقد اولان حسن اتفاقک تأیدی ضمننده پروسیا جانبیه بر سفیر ار سالی مقتضی اولمقدن ناشی بوچا کرکیمنه بین الاتراب اتخاب اولنوب اولبایده شرفیافته صدور اولان نامه هایون ایله جانب مذکوره مأمور قلندیقعه بناء بیک ایکیوز بش سنه سی ربیع الاولینک دردنجی پنجشنبه کونی آستانه سعادتدن حرکت و صوب مقصوده عزیمت اولندی .

آستانه دن حرکتتمزک دردنجی کونی ادرنه یه واصل اولوب بعض لوازم راهیه تکمیلچیون ادرنه ده برکون اقامت وقرار وفرداسی راه راستمز اولان و دین جانبیه سوق سمند عزیمته ابتدار اولنوب ادرنه دن طی مراحل و قطع منازل ایدرک ماه مزبورک یکریمی یدنجی کونی و دینه درت ساعت بعدی اولان اچار نام قصبه یه کلنوب ایرتسی کون و دینه کیرلمسی مقصم ایدوکی و دین محافظی بولنان سعادتلو علی پاشا حضر تلیینه اشعار اولغغین و دینه یاقاشدیغمزده قرق الی مقداری اندرون

اغالیله مشارالیهك خزینه داری وودین سرعسکری سعادتولو محمد پاشا حضر تلیرینک دیوان کاتبی استقبال وودین قلعه سی دروننده آماده ایلدکری قوناغه ایصال ایلدیلر .
 ودینه ورودیمزک فرداسی درعلیه ده مقیم روسیه ایلیجیسی طرفندن معیتمزه تعیین اولنان برنفر روسیالو ایله ترجمانز قارشو قلفاته کوندریلوب نمچه مملکتی درونندن روسیا جانبه مرور اراده سنده اولدیغمز نمچهلو طرفندن اون نفر آدم ایله قلفاتده مقیم مجار قپوداننه اشعار اولغمنین ودینه وصولز کونی سرعسکر مشار الیه طرفندن قپودان مر سسومه خبر ویرلمش اولق حسیبله قارشویه کوندریلان آدملیمز قلفاته وارمزدن مقدم بش قضا تعیر اولنور قره افلاق باش شهری اولان قره یویه وارنجه اجرتیه اقتضا ایدن عربیه وبار کیرلری تهینه واعداد ایدوب قنبی کون اراده ایدرلر ایسه قارشویه مرور ایلسونلر خبریله مرسلان مر قومانی ودینه اعاده ایتمکله ماه ربیع الآخر ک غره سی اولان چهارشنبه کونی آچقلر ایله آغر لقلریمزی امرار و بر قاق ساعتدن صکره کندومز دخی و دین محافلرینه مخصوص بش اوتور اقلی چته قایغیله قارشویه کذار ایلدک قلفاتدن قره یویه وارنجه اثنای راهده اولان قریه لرک اکثری خراب و غیر مسکون اولق ملبسه سیله ایکنجی منزل اولان جروی نام قریه یه اون ساعتده کیدمک اوزره قرار ویرلمشکن مخصوص منزل بار کیرلری اولیوب عربیه لر ایچون اطراف کویلدن جمع ایلدکری لاغر و آربه یمامش بار کیرلر قوشدقلرندن اخشامه قدر قوناق یرینه اولاشامیوب اول کون دخی زیاده جه قاریاغوب و نصف نهاردن صکره برشدید روزکار ظهور ایلدیکندن عربیه جیلریمز طومق درجه سنه رسیده اولغله بر ساعت اول منزل یرینه اولاشمق ایچون معیتمزه تعیین اولنان سواریلردن بری ایلویه کوندریلوب بش اون دنج بار کیر ار سالی التماس اولغله سالف الذکر جروی قریه سی محافظه سنه مأمور مجار قپودانی طقوز نفر عربیه جی ایله اون سکز نفر بار کیر اولاشدیروب بو وجهله کیجه ساعت اوچده قوناق یرینه وارلدی قریه مذکوره دن قره یویه اون ساعت مسافه اولوب لکن یولار زیاده یالقانلو وچامورلو اولدیغندن غیری بالاده محرر اولدیغی وجهله بار کیرلر بی طاقت اولق حسیبله قره یویه برکونده وارلیسه جفی محقق اولمقدن ناشی قره یویه بش ساعت بعدی اولان بر خرابجه قریه ده برکیجه بیتوت اولنوب ایرتسی کون اخشام وقتی قره یویه دخول و حاضرلدقبری قوناغه وصول میسر اولدی .

بروسیا یه وصولز بهر حال نمچه مملکتی درونندن گذاره محتاج ایدوکنی بچده مقیم روسیا ایلیجیسی تفضن ایدوب مقدمه باتقریر روما امپراطورندن رخصتنامه

طب ایتمش اولدیغنه مبنی انشای راهده کندومزه واتباع و آغراقلمزه و فایده جک مقداری آچه مز ایله عربه و بارکیر و یروب آماناً و سالملاً بزى پروسیا حدودینه ایصال ایلمک اوزره ایمپراطور مومی الیهدن لازم کانلره تنیهنامه لر صادر اولمش اولغله بوندن اقدم درعلیه دن برلینه کیدوب قلفاته مرور مز کونی عودت ایدن قوریر ایله ذکر اولنان تنیهنامه لردن برینک صورتی ایلیچی مومی الیهک مکتوبنه ملفوفاً طرفزه واصل اولمشیدی قره یوه یه وصولمزده قره یوه ده اولان نمچه جنرال جانبندن برمایور [۱] کلوب اجرای مراسم خوش آمدیدن صکره نمچه مملکتندن مرور کیز رخصتی متضمن آستانه سعادتدن برسندکیز وارمیدر دیو سؤال ایتمکدن ناشی درعلیه دن سندیمز اولیوب لکن بالاده بسط اولندیغی اوزره ایمپراطور طرفدن تنیهنامه لر صادر و برینک صورتی طرفزه وارد اولمش اولدیغی افاده و صورت مذکوره ارائه اولندقده اذکنز اولور ایسه جنرال دوستکیزه کتوره یم دیهرک صورتی آلوب جنرال مرسومه کتوردی بروجه محرر تنیهنامه لر صادر اولدیغی خبری هنوز جنرال مرقومه واصل اولدیغندن نه کونه حرکت ایده جکنده متردد ایکن برقاچ ساعتدن صکره بکرشدن تنیهنامه نک مضمونی متکفل کاغد کلکله در حال برتذکره تحریر و کندویه کوندردیکمز صورته معاً طرفزه تسیر ایدوب تذکره سنک مآئنده قره یوه ده بش اون کون لازارت بکلمک لازم کلدیکی مندرج اولدیغندن کلدیکمز کوندن سکیز کونه قدر مخالطه ناسدن انقطاع ایله قوناغمزده مکث واقامت ایلمامز صورتلرینه قرار ویرلمش ایکن لازارته کیردیکمز کونک بشنجی کونی ینه جنرال مرسومدن بر آدم کلوب حال و خاطریمزی سؤال ایلدکن صکره استانبولده خسته لک اولدیغنه بناء زیاده قرنته بکلمک اقتضا ایتمدیکنی حاوی تکرار بکرشدن کاغذکلدیکن و قنغی کون حرکت ایتمک مراد اولنور ایسه بارکیرلر و عربه لر حاضر اولدیغین اخبار عقینده جنرال مرقوم دخی خانه مزه کلوب سزه کوره قرنته بکلمک اقتضا ایتمز ایدی لکن شمدی سزه قرنته ایتمیرمدیکمز حالده بین الاهالی قیل و قالی موجب اولور دیهرک بسط مقدمه اعتبار ایلدی .

افلاق حدودی ایرشود ده منتهی اولمق ملابسسه سیله ایرشودیه دک اقتضا ایدن عربه تهیسه سی و انشای راهده بولغیه جق پرنج و سائر بعض مالز مه تدار کیچون قره یوه ده برکون دخی اقامت اولنوب فرداسی ایرشود جانبنه عزیمت اولغله بزى آماناً ایرشودیه ایصال ایچون برقپودان ایله بش التی نفر آتلو تعیین اولندی .

[۱] مایور بیکباشی دیمکدر .

آطه قلعه سی ایشوهدنك حذاسنده اولوب فی الاصل منزللری قلعه مرقومه دروننده ایکن بعض غلله مبنی ایشوهدیه نقل اولمش اولمق حسیبله قلعه مرقومه یه تقرب ایلدیکمزده محافظه سنه مأمور جنرال طرفندن برمایور کلوب حال و خاطر سؤالند نصکره منزل بار کیرلری ایشوهدیه اولدیغن و بزى طمشواره ایصال ایچون بر قبودان تعیین اولندیغن اخبار ایتمکله طوغری ایشوهدیه واریلوب برکیجه بیتوتت و ایرتسی کون قبودان مرسوم دلالتیه مهاده بوغازندن طمشوار طرفنه عزیمت اولنوب بش کونده طمشوار قلعه سنه وارلدى قلعه مرقومه محافظی اولان جنرال اسپانیا اهالیسندن غریب دوست برآدم اولمقدن ناشی طمشواره واصل اولدیغمز ساعت مخصوص آدم ارسالیله استفسار خاطر ایلدکدن صکره قوناغنه دعوت ایدوب اتمام مراسم مهمانوازی و دلسازی ایلدی .

طمشواردن بودیمه وارنجه خلال راهده اولان منزللرک بعضیسنده بیتوتت ایده جک محل اولمدیغی جهتدن جنرال مرسوم ایله لدی الملاقات بودیمه کتتمک صورتلری مذاکره و کونده سکزر ساعت کیدلدیکی حالده کیجه یاتمغه حساب قوناق بولنه جغن و سکزر ساعتدن زیاده کیدلدیکی صورتده شتا تقریبه یوللرده زحمت چکله جکن افاده و بروجه مشروح کونده سکزر ساعتدن اون کونده بودیمه کیدلمک خصوصه قرار ویرلمکله جنرال مرسوم طرفندن تعیین اولنان اوخیال رفاقتیه بودیم سمته توجیه وجهه عزیمت اولنوب طمشواردن حرکت مزک اوچنچی کونی قترده واریلوب دردنچی کونی طمشوار ایالتیه بودیم ایالتی فاصل تیسه صوی بوط تعبیر اولنور قایق ایله گذار و سکدین نام قلعه یه خط رحال قرار اولندی .

قلعه مرقومه طوغاه دن مصنوع و طوپ و جبه خانه دن عاری اعتباردن ساقط مختصرجه برقله اولوب ایچنده محافظ نامنده برمایور ایله ایکیسوز مقداری علیل و عمل مانده سلطاط اولدیغی مشهود اولمشدر سابقاً نمچه ایمپراطوری اولان یوسفوس مجارلونک قدیمی سر بیستلرینی رفع و الغا و بعضی مآلوف اولمدقلری تکالیف تحمیلله دلکیر ایتمش اولدیغندن الحاله هذه نمچه ایمپراطوری اولان برادری لؤبولدوس مجارلوی تطیب ضمنده قدیمی سر بیستلرینی ابقا و دردنچی اوغنی کندولره بلاطین یعنی ضابط نصیبه تألیف و تلطیف ایتمکله سکدینه وصولمز کونی ایمپراطور موسی الیهدن نائل اولدقلری لطف و التفاتک تشکری معرضنده اهالیدن اوچوز مقداری سواری ترتیب ایله درون و بیرون شهرده تفنک شنلکی ایتمک و سورنا و ساز چالدرمق مثللو آهنگ ایتلریله بزى مجمعلری اولان محله قارشو برقوناغه کتوروب آلایرینی سیر ایتدیردکدن صکره فی الاصل مجارلونک دولت علیه طرفنه میل و محبتلری اولدیغندن

بزه ا کرام قصدیه عظیم برضیافت ترتیب ایدوب بزى دعوت ایتملریله بعض اعداز بسطیله کتتمک حلتلرینه هر نقدر جد وسی اولندی ایسه ده کار کر اولیوب بالجه رؤسا و سر کردلری هنطولریله قوناغمزله کلوب بز قدیمی و صمیمی دولت علیه نك صادق دوستلری واشبو و قوعبولان نیجه محاربه سنده دولت علیه اوزرینه حرکتمز ضروری و قسری اولوب اول و آخر دولت ابد مدتک دوستانغدن انفکاکمز متصور دکدر کلاملری و سائر بوکا دائر محبتلر ایرادیه دعوتلرینه اجابت ایتمازى علی الاتصال براییکی ساعت نیاز ایلدکلرندن مندفع اولیه جقلری تیقنیه (دارهم مادمت فی دارهم) قاعده سه رعایت ایدوب کندو مطبخمزدن برقاچ درلو طعام تدارکیله ضیافتخانه لرینه و اریلوب برقاچ ساعت اکلندکدن صکره خانه مزه عودت و فر داسی علی الصباح یولمزه عزیمت ایلدک .

سکدینه دن حرکتمز کونی لازم کلان عربله و بار کیرلری سحری قوناغمزله ایصال ایلدکلرندن ماعدا و جسوه بلده نك جمله سی یا تمزه کلوب بروجه محرر دعوتلرینه اجتمزدن ممنونیت اظهار ایدرک خارج شهره قدر چیقوب اجرای مراسم تشییع ایلدیلر سکدین قضا سنک بار کیرلری توانا و قوتلو اولدیغندن اول کون درت منزخانه قطعیله اوخشام کچکمک نام قصبه و وارلدی .

قصبه مرقومه اهالیسی مجار طائفه سندن اولدقلرینه بناء اهالی مرسومه دخی سکدین اهالیسی مثللو استقبالی و اظهار بشاشت و اهتزاز ایدرک قوناغمزله ایصال ایلدکلر صکره وجوه بلده دن بعض سوز اکلارلری یا تمزده قالوب اثنای صحبتده اسفار سابقه دادروی هایون بوحوالییه کلدکده قصبه مز اهالیسی جمله دن اول دولت علیه یه سرعت متابعت ایله مظهر نوازش و ا کرام اولوب حتی قنچلریه مزده یعنی محکمه لرنده اول وقت سردار اعظم بولنان بوسنوی سلیمان پاشا مرحومک اهالی مرقومه یی محافظه ضمننده سلاطین چنکیزیه دن اولحوالییه مأمور سعادتکرای ساطانه خطاباً یازوب کوندردیکی مکتوب محفوظ اولغله مملکتمزى تماشا ایچون قاده جنبان اولورسکنر قنچلاریه یه دخی واروب سزه مکتوب مذ کوری ارانه ایدرز دیهرک هنطوه ارکاب و شهرک باغ و بغچه لرینی کز دیردکدن صکره قنچلاریه یه کتوروب تهیه و اعداد ایلدکلری شکرله و فوا کهی تناولدن صکره قرمزى اطلس کیسه ایچنده محفوظ سردار مشارالیهک مکتوبیله زیاده جزیه مطالبه سیله فقرای رعیه نك رنجیده ورهیده اولنماسینی آمر سنه سبع و تسعین والف تاریخیه مورخ و بلغراد صحر اسنده محرر بودیم محافظنه خطاباً برقطعه امرعالی ابراز و ایشته بونلر دولت علیه نك یادکاریدر دیهرک اظهار افتخار و اهتزاز ایلدکلری کورلشدنر .

قصبه مرقومه ده دخی بر کجه بیتوت اولندقدنصکره اورکین وشورقشار نام
 قصبه لردن کذار اولنه رق اوچ کونده بودیم شهرینه وارلدی .
 شهر مذکور طونه نك یمین و بسارنده واقع پشته و او فن نام ایکی شهر دن
 مرکب وسیع الارجا بوغاز ایچی یالیری کبی طونه اوزرینه تمتد بر شهر
 معظم اولوب ایچنده لطیف ایلیجه لری وار شهر مذکور دخیولزده بتون
 مجارستانک حکمداری وسفر لرائسانده نمچه لونک فردمارشالی اولان پرنج قوبورغ
 نام جنرال طرفدن قولوران نامنده قولونل کلوب جنرال دوستکز سلام ایندی و بزی
 خدمتکزه تعیین ایلدی وسزکله کورشمک ایچون بودیمده برکون اقامتکزی رجا
 ایدر دیمکله ناچار بودیمده برکون مکث واقامته قرار ویرمکله ایرتسی کون جنرال
 مرسومدن مخصوص دعوتی و هنطو کلوب جنرال دوستکز سزه منتظر در دهرک
 قوناغنه کتوردی سرایه واروب یوقارو چیقدیغمزده بزی دیوانخانه قیوسندن
 استقبال و رجال و نسوان ایله حافل کندویه مخصوص او طیه کتوروب طاتلو
 و قهوه و شکرله تقدیمه اظهار مودت و اقبال ایلدی بیک یوز تیش تاریخلری
 ائسانده مجار قرالیجه سی اولان ماریه تره زه بوندن مقدمه نمچه ایمراطوری ایکن
 هالک اولان یوسفوس نام اوغله مجار قرالغنی قصرید و بودیمده اقعاد ایتمک
 امنیه سیله تاریخ مذکورده سرای مزبورک بناسنه مباشرت ایدوب پروسیالو سفری
 تقریبی و بعض عوارض حلولیله امنیه مذکوریه صورت ویرمدیکندن سرای
 مذکور علی حاله قالغله بویه ناتمام قالمسی روا کورلیوب سفر انقضاسندن صکره
 تکمیل و ترصین و بودیم حکمدار لرینه مقرر و مأوی تعیین اولدی .
 بوجه محرر بودیمده ایکی کون آرام و استراحتدن صکره قران و طرنو قصبه لردن
 مرور ایدرک هولیج نام قصبه وارلدی .

قصبه مرقومه مجارستان ایله مر او یه ایالتی بیننده برکوزلجه قصبه و ایمراطور خاصی
 اولوب اطرافی قرال باغچه و سرایلریله آراسته اولدیغندن ماعدا هولیج دن درت
 ساعت بعدی اولان کودین قصبه سنه وارنجه اطراف و اکنافی صولر اوزرنده
 منقش کوریلر و مسطح یولار و مفرح قوریلر ایله محفوف بر جای جان فزا اولغله
 سنه ده برایکی کره روما ایمراطوری بولنان تفرج طریقله هولیجه کلوب صید و شکار
 ایلدکری اهایسندن مروی و ذکر اولنان یوللرک تعمیر ایچون آمد و شد ایدن لردن
 بار کیرباشنه اوچ پاره آلق معتاد اولغله بز دن دخی یوز یکر می پاره آلدق لری مرئیدر .
 سالف الذکر کودین قصبه سی مور او یه ایالتک رأس حدودنده واقع اولق
 ملاسه سیله بر طاقم کمر کجیلرک یوکلر دن کمرک آله کللریله بز دن دخی کمرک مطالبه

ورد ایله جواب ویردیکم زده کمرک المدقچه سزی ایلویه صالیور میورز قالدیکه بیوک کمرکیلیز برین شهرنده اولغله اولطر فده اقتضاسنه کوره نظام ویرملک ایچون بالجه صندوقلیکری تمهیره رضاداده اولورسکنز صالیوریریز دیملریله یولمزدن قالمق ایچون مطبخ طاقتدن ماعدا اشیامیزی وهدیه هایون صندیغنی مهرلدوب او حال ایله برین شهرینه وارلدی .

شهر مذکورک ایچلی طیشلی ایکی قلعه سی و متعدد واروشلری اولوب دروننده بتون مورایه ایالتنک حکمداری اولان بوتنه نام جنرال متوطن اولمقدن ناشی وصولمزدن برکون اول اوستاریه تعیر اولنور خان مثللو برخانه تخلیه واعدادایتش اولغله ذکر اولنان خانیه نزول وایرتسی کون حرکت ایتک اوزره ایکن بیوک کمرکیلیری خانه مزه کلوب ملبوساتمزدن ماعدا یامزده هر نه وار ایسه جمله سندن علی الخصوص حامل اولدیغمز هدیه هایوندن کمرک آلق خایمای خامیله صندوقلری میزی یوقلمق خصوصنی تکلیف ایتلریله ایلیچیلردن کمرک مطالبه سی قاعده دن اولمدیغنی ودر علیه وارد اولان هر برنجه ایلیچیسینی یاننده کلی اشیایا بر ایکی بازارکان موجود ایکن دولت علیه کمرکیلیری طرفلردن قطعاً التفات اولنموب ایلیچی یه تسلیم اولندیغنی مسبق و معهود ایکن سزک اشبو حرکتکز غایه الغایه غریب وبارددر دیندکده ایمپراطوریمز کچمه دخی شیلرینه باقوب کمرک آلق قاعده مزدندر البته بالجه اشیاکزی آچوب تخمین ایتکده محتاجز کلاملرین اعاده و تکرار کمرک آلق خصوصنده بغایت عناد و اصرار ایتلریله سهولتله بر چاره سنه باقلمق ایچون شهر مذکورده برکون اقامت و اول کون اخشامه دکین نیجه قیل وقال گذارند نصکره بچده مقیم روسیا ایلیچیسندن برلینه کیدوب یینه بچ طرفنه عائد بر قوریر تصادف ایتکدن ناشی ایشته روسیا قوریری بچه کیدیور اگر کاکان دعوا کزده اصرار ایدر ایسه کز بن بر قاج کون بو طرفده اقامت و کیفیتی ایمپراطور جنابلرینه تحریر ایدرم دیدیکمده ایمپراطوره یازدیغنی صورتده شاید معاتب اولورلر ملاحظه سیله خشوتی ملایمته تبدیل ایدوب ایمپراطور سزدن کمرک ایسترسه بعده ویرمک اوزره یدیمزه برکاغد ویرسه کز کمرک مطالبه سندن کف ید ایده رز دیملریله ضروری اولوجهه لارینه برکاغد ویروب تخلیص کریبان وایرتسی کون مورایه ننگ باش سرحدی اولان اولنج نام قلعه سمتنه سوق سمند تحت روان ایتک اوزره ایکن اوستاریه جی چیقکه کلوب اول دخی یوز سکسان اوچ غروش خان کراسی مطالبه سنده اولغله بو قدر آچه ایستمنک سبب و حکمتی سؤال اولندقدده سز کزدن برکون مقدم اوستاریه مزه کیمسه قونمسون دیو جنرالز طرفندن تبیه اولندیغندن غیری فلان

کون جمعیتز اولوب یتیش سکسان غروش قزانه جق ایکن سزک سبیکزه اول
 آچه دن محروم اولدیغمزدن مبلغ مزبوری سزدن تضمین اقتضایدر دیه رک یوز
 سکسان اوچ غروش مطالبه سنده اصرار ونهایتنده اعیانلری ابراملریله یوز غروش
 آلوب بزدن کف ید اصرار ایلدیلر بو وجهله کمرکچی و اوستاریه جی غائله لری
 بر طرف و مستریح البال اولدق دیر ایکن بالاده مذکور قران قصبه سندن بزى منزل
 یولندن اخراج ایدوب کویدن کویه کتورمسی خصوصی بودیم جنرالی طرفندن
 معیتزه تعیین اولنان اوفچیا له تا کید و مقدم بار کیر تدارکی ایچون هر بر قضا یه کاغدلر
 تحریر اولندیغنه بناء منوال مشروح اوزره سالف الذکر هولیج قصبه سنه کند کده
 اهالیسیله انهای محبتده منزل یولندن کتمکده دخی زیاده سهولت اولدیغنی اوفچیا له
 مرسومه افاده وینه منزل یولنه سوق ایلدکلر نندن کویدن کویه اوله رق ترتیب
 ایلدکاری یولی براغوب منزل یولیه سالف الذکر برین شهرینه کند کده بعض کوی
 صاحب لری کلوب کویله مزده سزک ایچون بار کیر اولان بار کیر لک اجرتی ایسترز
 کلام بیالیله آنلر دخی حاضرلش ایدک سز آخر یولدن کد کز سزک ایچون اعداد
 اولنان بار کیر لک اجرتی ایسترز کلام بی مالیله آنلر دخی بر قاچ ساعت تصدیع و نیجه
 قیل و قاله نصکره بز یول بیلمز مسافر ز قننی یولدن سوق ایدر لر ایسه او یولدن
 کیده رز بار کیر لری کیم اصهار لدی ایسه اجرتی آندن مطالبه ایدک جوان و یروب
 یولمزه عزیمت ایلدک .

بریندن حر کتمزک اوچنجی کونی وقت ظهر ده ذکر اولنان اولمچ قلعه سنه
 ورود مزه بناء آنده بیتوت ایتیموب ایلرو منزله کچمک لازم کلمکه اولمچدن
 حر کتمزده آنلر دخی حاضر لدقلری قوناقک کراسی مطالبه سیله منزلی یه بار کیر
 و یردیر میوب اوچ درت ساعت یولمزدن تعویق ایلدیلر .

اولمچدن ایشار نیرک و هوف و تشن نام قصبه لردن مرور برله پروسیا حدودینه بر منزلخانه
 بعدی اولوب نمچه سلزیاسنک باش شهری اولان تروپلر نام شهره وصولمزه
 پروسیا لودن قونسلیر نامنده بر آدم قارشو کلوب مهماندار کز لوپشیخ نام قصبه ده
 سزه منتظر در دیو خبر و یرمکله فرداسی شهر مذکور دن حرک وینه نمچه
 قصبه لردن یکنندورق نام قصبه یه کدی کمزده قصبه مرقومه دن لوپشیخ ایکی ساعت
 مسافه اولوب اخشامه قدر وارلیه جنی تحقیق اولتمقدن ناشی یکنندور قده دخی
 بر کیجه قالوب ایرتسی کونکه ماه جمادی الاولانک اون سکرنجی کونیدر پروسیا
 سلزیه سی قراسندن طور میج نام قریه یه تقریب ایلدیکمزه مهماندار تعیین اولنان
 مایور ریدر بش نفر اوفچیا له و یکر می او توز سواری ایله استقبال و قهوه آتی

ایچون قریه مذکورده دد اعداد استدر یکی خانه یه ایصال ایدوب قهوه آلتی تاولندن صکره
قرال جنابلری سلام ایتدی دولتین بیننده درکار ودمبدم مهد واستوار اولان
حسن اتقاقی تأیید ضمننده اولان مأموریتکزدن وعلی الخصوص سزکله قدیمی
معارفه سی اولمق ملابسہ سبیلہ سزک ایلیچیاک ایله تعیین بیورلدیغکز دن غایه الغایه
محتوظ اولوب برلینه وصولکنزه منتظر در دیرک حاضر لدینی سکز بار کیرلی هنطوه
بندیروب سالف الذکر لؤ پشیخ قصبہ سنه کتوردی .

ورود مزدن اظهار سرور ضمننده قصبه مرقومه کیریله چک قپو ایله نزول اولنه چق
قواناگ قپوسی واطرافی یشیل چام آغاچلریله تزین اولنمش اولدیغندن بشقه قصبه
قپوسی بالاسنه مسافه جهتیله بعدی اولان دولت عثمانیه ایله بیننده درکار اولان
مودندن ناشی قریت حاصل اولدی تعیری قالین قامله یازلدینی کورلمشدر .

اعداد ایلیکری قوناغه نزلمزده بتون سلیزه سواری عسکرینک باش جنرال اولان
زالو نام جنرال سائر وجوه بلده ایله زیارت مزه کلوب مأموریت مزدن اظهار سرور
وشادمانی ایلیدر .

لؤ پشیخده برکیجه آرام واستراحتدن صکره حرکت وایکی مرحله ده نائس نام
قلعه یه کاندی قلعه مرقومه نمچه حدودینه قریب اولان سرحدلردن غایت متین
واروشی کوزل برقلعه اولوب آنده دخی اوچ جنرال موجود اولغله مرسوملر
دخی قوناغ مزه کلوب مراسم خوش آمدی نی ایفا ایلیدر نائس دن دخی قطع مراحل ایدرک
اوچ کونده سلیزه نک باش شهری اولان برسلاو نام قلعه یه وصول میسر اولدی .

قلعه مرقومه اودور نام نهر کیرک کنارنده واقع اولوب خندقلری متعدد وصولریله
ملو بر حصن حصین و بوجه تخمین آتمش یش بیک اهالیدن عبارت اولدیغندن
غیری له حدودینه قریبتی تقریبیله بازرکانی چوق واهالیسی معمور و ذکر اولنان اودر
صوبیله اطرافدن قایقلا آمد وشد ایتمک حسبیله هر درلور نعم و فوا که ایله معمور در .

حسب الاقتضا برسلاوده برقاچ کون مکث واستراحتدن صکره برسلاودن دخی
حرکت برله نایمارق وپارخو ویچ وراودین قصبه لرند ببتوت اولنهرق سلیزه نک
قظلی مثابه سنده اولان غلوغوغ نام قلعه یه وارلدی .

قلعه مرقومه له حدودینه درت ساعت قریب اولغله متانت و رصانته اعتنا اولنمش
برقلعه مستانا ایدوکی مشهود اولمشدر .

غلوغوغسندن نایز الخ وقرین یرک وقروسن قصبه لرندن کذار ایدرک فرانکفورت
نام شهره کاندی .

شهر مذکور سالف الذکر اودر نهری کنارنده اولمق ملابسہ سبیلہ اطرافدن برآ

و نهر آب بحر بالطقن باز رکانلر کلی امتعه کتوروب سنه ده ایکی اوچ دفعه پناری قورملغله وافر آیش ویریش ایلدکلرندن اهالیسی ثروت و غنایا مشهور بر شهر زیبا و معمور در . شهر مذکورده ایکی کون اقامت و آرامدن صکره آندن دخی حرکت و براینه اوچ ساعت بعدی اولان کپنک نام قصبهیه وصولزده برلینده اقامت ایده جکمز قوناق هنوز آماده اولدیغندن قصبه مرقومه ده برقاچ کون بعدالاقامه ماه جمادی الآخره نک اون اوچنجی کونی برلینه کیرمک صورتنه قرار ویرلدی .

اوتوز سنه دن برو طرف سلطنت سنیه دن برلینه ایلیچی کلدیکندن اهالیسی برلینه وصولزه صبر ایده میوب قیش و قاره باقیه رق رجال و نسوان هنطو بار کیرلره سوار و کلوب سیر و تماشا وینه برلینه عودت ایدرلر ایدی بو حال ایله چند روز کپنکده قراردن صکره ماه مزبور و یوم مذکورده حرکت و برلینه بر ساعت قریب دو ملیج نام چفتلکه واردلده سابقاً در علیه ده ایلیچی اولان موسی و یچ یدی سکز هنطو و قرالک ایچ اوغلانلری و بر مقدار سوارای عسکر ایله استقبال و طاتلو و قهوه دنصکر قراله مخصوص اولوب دولت علیه به احتراماً بزی کتوردیکی التی بار کیرلی هنطوه و اتباع ولوا حقمزی دخی دیگر هنطولره ازکاب و آلائی ایله برلین شهرینسک اورته سندن کذار ایتدیرده رک اعداد ایلدکلری قوناغه ایصال ایلدی .

کپنکدن برلینه وارنجه یوللرک ایکی طرفی سیرجیلر ایله مالا مال اولدیغندن بشقه درون شهرده کدرکاهمز اولان زوقاقلرده و خانهلر پنجره لرندده بدرجه ده زحام وار ایدیکه برقاچ کره خلقت زحامنندن سوار اولدیغمز عربه بار کیرلری یول بوله میوب دور دقلری منظور اولشدر .

برلینه وصولزک اوچنجی کونی باش و کیسل و بشنجی کونی قرال ایله کوریشیلوب نامه هایون و مکتوب حضرت قائمقامی تسلیم اولتمق حالتلرینه قرار ویرلد کدنصکره رسماً باش وکیل ایله ملاقاتدن برکون اول ایکنجی باش وکیل مخفیجه قوناغنه دعوت ایدوب طاتلو قهوه رسمی اجرا سندن صکره ماه مورتمزی سؤال ایتمکدن ناشی مأموریمز دولت علیه ابدی الدوام ایله پروسیا دولتی بیننده منعقد اولان حسن اتفاقک شرائطی رعایتده طرف سلطنت سنیه دن قصور اولمیه جنی افاده سیله قرال جنابلرینی تضمین و بر مقتضای شرائط اتفاق دولت علیه ایله محارب دولتلر ایله محاربه به اغرا و ترغیبدن عبارت اولدیغنی اشعار ایله عودت ایلدک .

بروجه محرر یوم مذکورده رسماً باش وکیل ایله ملاقی اولوب مکتوب حضرت قائمقامی تسلیم اولتمقن ناشی قوشاق وقتی باش وکیل کندیوه مخصوص هنطوی و اتباعمز ایچون برقاچ هنطو ایله دعوتیحایی کلوب باش وکیل سزه منتظر در دیدرک

هنطوه ارکاب و باش و کیلک قوناغنه ایصال ایتمکله قوناغه وصولزده قونسلیر نامنده ایکی معتبر آدملری نردبان باشندن استقبال ایدوب باش و کیلک اولدینی اوطنه یه کتوردیلر باش و کیل ایاغ اوزرنده بولمغله یانسه واروب حالا آستانه سعادت قائمقامی دولتلو سعادتلو مصطفی پاشا افندیمز حضر تلرینک سزرغبتلو رتبلو پروسیا دولتی باش و کیلی دوستلرینه اولان مودت و محبتی تأکید ضمننده کوندر دکلری مکتوب عالیدر دهرک مکتوب حضرت قائمقامی بی یدا بید تسلیم ایلدیکمزده اول دخی دولت علیه نیک پروسیا قرالنه مخصوص اولان مودتی تأسیس ضمننده نامه هایونله ایلیچی کوندرملری قرال مشارالیه بین الدول موجب فخر و مباهات اولدیغین ایراد ایلدکدن صکره اعداد ایلدکلری ایکی عدد اسکمه لره قارشو بقارشو اوتوروب یوله متعلق و یتیمش التی سنه سننده کندوسیه اولان معارفه قدیمه نیک تجددندن و ایلیچیلک ایله بزم مأموریتزدن محظوظ اولدیغنه دائر بر مقصدار صحبتدنصکره کلدیکمز اسلوب اوزره قوناغمزده عودت ایلدک .

باش و کیل مومی الیه ایله کورشدیکمزک فرداسی ایکنجی باش و کیل هرج برک بریافت ترتیب ایدوب خانه سنه دعوت ایتمکله دعوتیه اجابت برله قوناغنه واردیغمزده دیوانخانه دن استقبال و کندو اوطنه سنه ایصال برله دوستلغه متعلق بعض صحبت ایرادیه ایفای لوازم انس و الفت ایلدکدن صکره سائر مدعو اولان صنایید قومیه معاتیه و اعداد ایلدیکی سفره یه کتوروب بعض اطعمه اطعام ایله تکمیل مراسم نوازش و اکرام ایلدی .

ایرتسی کون رسماً نامه هایونی تسلیم ایچون قرال سراینه دعوت ضمننده سالف الذکر موسی و بیچ و قراله مخصوص التی بارکیلی ایکی هنطو ایله برقرال سلحشوری و چند نفر قرال چوقدارلری و قرق الی نفر سلطاط ایله برقپودان کلوب نامه هایونه تعظیماً دیوان کاتجزی و هدیه هایونی حامل کتبخدامزی ذکر اولنان هنطولرک برینه و بزلی دخی برترجمانز ایله دیکرینه ارکاب و نامه هایون هنطوینی ایلروده و بز دخی و راسنده کیده رک قرال سراینه کتوردکلر ننده مهماندار مز اولان مایور بریدر ایله برنفر مایور سرای قپوسندن او کومزه دوشوب آنر دخی قرالک اولدینی اوطنه یه متصل بر دیوانخانه یه کتوردیلر چاریک ساعت مقداری آرامدن صکره تشریفاتی نامنده بر آدم کلوب قرالک اولدینی اوطنه نیک قپوسنی کشاد و بزلی بر قاق نفر خواص اتباعمز و ترجمانز ایله ایچرویه ادخال ایلدی قرال اوطنه نیک نهایتنده تخمیناً نیم ذراع مرتفع عجم قالیچه سیله مفروش مربع الشكل برصفه اوزرینه موضوع اسکمه سی پیشکاهنده قائم اولغله ذکر اولنان صفت نیک اوکنه واروب حالا آل عثمان

پادشاهی شوکتلو مهابتلو قدرتلو شهنشاه دارا دربان و پادشاه اسکندرشان سلطان سلیم خان افدمنز حضر تلینک سز حشمتلو منزلتلو پروسیا قرالی جنابلرینه نامۀ هایون و هدیۀ ملاطفتمقر و ناریدر دیه رک نامۀ هایونی کاتجز و هدیۀ ملاطفتمقر و نی کتخدامن الندن آوب تلیم و متعاقباً تقدیم ایلدیکمزده سندالیهسندن برقاچ خطوه ایلر ویه کلوب استقبال صورتی اظهار وبعده باش وکیله اشارت برله الیزدن اخذ واعداد ایلدکاری مرتفع اسکمله اوزرینه وضع ایلدکدن صکره ینه باش وکیله اشارت ایدوب اولدخی قرال طرفندن اولهرق شوکتلو امراتلو پادشاه جمجاه افدمنز حضر تلینک کندویه درکار اولان صفوت و دوستقلرنده متانت و ثباتلرندن منتدار اولدیغین و مخصوص ایلچی ایله هدیۀ هایون کوندرملری قرال مشار ایلهه قتی چوق بها ایدر مودت و محبتله دلیل واضح اولمغله کندوسی دخی اشبو دوستلغک الندن کلدیکی درجه محافظه و محارسه سنه صرف مقدور ایله جکن واشبودعواسنده صادق القول اولدیغی مقدم وقوعبولان حرکتندن منفهم اولدیغین و بزم مأموریتزدن انبساط حاصل ایلدیکن بیان ایله مجلسه ختام ویرمکله ینه کلدیکمز طاقم ایله قوناغمره عودت ایلدک .

دول سائرہ دن برلینه ورود ایدن ایلچیلره قرال طرفندن مخصوص ضیافت اولمق عادت دکل ایکن دولت علیهیه احتراماً اول کون قرال جانبندن قوناغمره برعالی ضیافت ترتیب و انس و الفت ایتمک ایچون صناید قوملرندن چند نفری دعوت اولمش اولمغله قرال سراینندن عودتمزده مرقوملر ایله معاً طعام ایدوب بعده هرکس خانهسنه کیتدی ایرتسی کون رسماً اولیهرق قرالک ولی عهدی اولان بیوک اوغلی و سائر اوغللری قوناقلرینه دعوت ایدوب قوناقلرینه واردیغمره لاله لری استقبال برله قرال زادهلر اوطله لرینه کتوردکده ایاق اوزرنده بولتلیریله بز دخی قائماً برمقدار صحبت ایلدکدن صکره ینه قوناغمره عودت ایلدک .

حسب المأموریه برلینده اون برآی مقداری اقامتمز مقتضی اولمق ملابسہ سیله مدت اقامتمزده بزى اکلندیرمک ایچون موسم شتاده درون شهرده وقرال سراینده بالوزتعیر اولنور جمعیتلرینه و اوپره قومدیہ دیدکاری خیالخانه لرینه و موسم صیفده درون و بیرون شهرده اولان بانچه لرینه دعوت ایدوب اولوجهله امرار اوقات واحیان ایلدکدن صکره عودته مآذون اولدیغمرز خبری اردوی همایونده اولان قولونل کچ طرفندن باش وکیللرینه وارد اولمقدن ناشی بیک ایکیوز اتی سنه سی ماه جمادی الاولاسنک غره سنده رسماً بزى قرال سراینده دعوت ایدوب جو ابنامه لرین اعطا ایتملریله یول لوازمی تدارکی ایچون اون بش کون دخی اقامت ایدوب ماه

مذکورک اون التیمی کونی برلیندن فک رابطه اقامت و اوان حرکت مز شدت شتایه تصادف ایتمک ملاسه سیله حسب الطریق صاقسونیا مملکتی درونندن بوهمیایه و بوهمیادن بچه وارلمق آسان اولدیغی تحقیق اولدیغنه بناءً صاقسونیا اوزرندن بح جانبنه سوق مطیة عزیمت اولنوب برلیندن التی کونده صاقسونیا هر سکنتک مقر حکومتی اولان درزنه نام شهره وارلدی .

شهر مذکورالیه نام نهر کیرک ایکی طرفنده واقع باغ و باغچسی و تجارتی چوق برشهر معمور و وسط شهر دن جریان ایدن سالف الذکر الیه نهری اوزرنده مُتد اون بش اون التی کمرلی اطرافی تیمور پاره قاقلی طاش کوپری اوروپاده ندرته مشهوردر . درزنه ده برکون اقامت و ایلرو منزخانه لره بارکیر تدارکی ایچون خبر کوندرمک اراده سیله اوستاریه تعبیر اولنور برخانه یه نزول ایلدیکمزده هر سک مقر بلرندن قونته مارقولینی نام بر آدم کلوب هر سک طرفندن ایضای مراسم خوش آمیدنصکره درزنه ده برقاچ کون اقامت ایتمز رجاسنده اولدیغن افاده ایتمکله رجاسنه مبنی ایکی کون دخی مکث و اقامت صورتلرینه قرار ویرلمکین فرداسی ینه هر سک طرفندن مخصوص دعوتیمی کلوب بعد المغرب سراینده ترتیب ایلدیکی جمعیه دعوت ایتمکله وقت مذکورده کوندردیکی هنطوه سوار و سراینه واردیغمزده کندوسی و برادرلری دیوانخانه قیوسندن استقبال ایدوب ایاغ اوزرنده بر مقدار صحبتدنصکره جمعیت اولان بیوک دیوانخانه یه کتوروب اظهار نوازش و التفات ایلدی .

اوروپانک غریب عادتندر که دول سائر ددن خاطر ی مرعی بر آدم شهرلرینه ورود ایلدکده نمخلده اقامت ایده جکدر و بیهوده مدت اقامتده نمقدار آنچه خرج ایده جکدر کیمسه در خاطر و ملاحظه ایتموب همان لطف ایتسون شهر مزده برقاچ کون قالسون و شهر مز ی و لازم التماسا اولان یرلری کورسون دیه رک یولندن ایقبوبوغ غایت اگر امر ی بر لرینه ایتدکاری ضیافتلرینه و یا خود عارفانه ایله ترتیب ایلدکاری جمعیه کتوروب مسافره اکرام ایلدک دیو افتخار ایدرلر .

درزنه ده و نیمچنک بیوک شهرلرنده بز ی محافظه ایچون تعیین ایلدکاری قبودان و اوفچیل و سلطاطلر اقامت ایتمک ایچون کرالیه ساکن اولدیغمز خانه نک اوطلرندن برقاچنی تخایه و قبودان و سلطاطلری ایوا ایدوب وقت حرکت مزده ذکر اولنان اوطلرک کراسنی و قبودان و اوفچیلک یدکاری طعامک بهاسنی بزه و یردردکاری اغرب غراشدندر .

بو آنه د کین طرف دولت علیه دن صاقسونیا یه کیمسه وارمدیغی جهندن بز ی کورمک ایچون رجال و نسوانی اولدیغمز محله بردن هجوم ایدوب غایه الغایه ثقلت و یرملریله هر سک

طرفدن محافظه مزه تعیین اولنان قپودان آمدوشد ایدنلری منابو به طریقیله یا نمزده کتور مکه قرار ویرمشیکن قپودانی دگیه رک زور بازو ایله قپوده اولان سلطاطلری دفع و دلخواه لری اوزره یا نمزده کلوب کیدر لر ایدی .

بو حال ایله درزنده اوچ کون بعد الاقامه حرکت و نهمچه تابع بوهمیا ایالتک باش طهری اولان پراغه نام قلعه یه کلندی .

قلعه مذکورده مولداوه نهری اوزرنده واقع بر حصن حصین و باغ و بغچه سی چوق بر نهر لطیف اولدیغندن غیرى نهر مذکور اوزرینه ممدود طاش کوپرینک نظیری اوروپاده پک نادر در یتیم بر تاریخی خلالنده پروسیالونک نهمچه لو ایله واقع اولان محاربه سنده پروسیالو ساقسونیا ایالتی پایمال و سالف الذکر درزنه شهرینک اکثری احراق ایدرک پراغه یه کلوب محاصره ایتیمش اولمغله پروسیالو طرفدن آتیلان طوب کلهری بعض خانه دیوار لر نده الی الان طور دینی رأی العین مشاهده اولتمشدر . پراغه ده لاجل الاستراحه بر کون اقامت تصمیم اولتمشیکن منزخانه یه ورود مزده بش اون دقیقه ده منزخانه قارشوسنده واقع بیوک میدان مالامال رجال و نسوان و قالدینی صورتده استراحت دکل کلی ثقات چکیله جکی نمایان اولمقدن ناشی منزلینک او طه سنده برایکی ساعت توقف و کیمسه آگاه اولدین منزل بار کیر لر نی تدارک ایتدیروب پراغه دن درت ساعت ایلروده واقع بو قویج نام قصبه یه کلوب بر کیجه بیتوت و آرتسی کون سالف الذکر بوهمیا ایالتی درونندن کذار ایدرک اون ایکی کونده روما ایمپراطورینک مقری اولان بیج قلعه سنه کلندی .

خداوندکار سابق جنتمکان سلطان عبدالحمید خان حضر تلرینک جلوسلرنده سفارت ایله کیدن قبا قولاق یکی سایمان بکدن صکره طرف سلطنت سنیه دن بجه ایلچی کیتمدیکندن غیرى بودفعه نهمچه دولته مأمور راتب ابو بکر افندی دخی هنوز بجه اصل اولمغله بیج شهری دروننده قرار ایتک لازم کلسه کثرت زحامدن راحت اولیه جنی تیقله درون شهره کیرمیوب شهر دن ایکی ساعت بعدی اولان شویخت نام قصبه کچوب بر ایکی کون مکث و قرار و ضروریات راهدن اولان بعض لوازمی تکمیلد انصکره آندن دخی حرکت ایدوب بودیم و طمشوار قلعه لر ندن و صعب المرور اولان سیبیین طاغلر ندن واردل بوغازندن مرور و عبور ایدرک اردل مملکتک بیوجک شهر لر ندن اولوب افلاق حدودینه درت ساعت بعدی اولان هرمنشاد نام دیگر سیبیین نام شهره کلنوب بر کون بعد الاقامت افلاق حدودینه دخول ترله اوچ درت کونده بکر شه و بکر شدن اوچ کونده طونه ساحلنه کلنوب طونه نی آچقتر ایله بعد العبور طوتره قن و هزارغرا دوشمنی و قرین آباد و قرق کایسا و بورغازو چورلو

وسلوری قصبہ لرندن کذار ایدرک ماہ شعبان المعظمک یدنجی جمعہ کوئی سلامتہ آستانہ سعادت آشیانہ وصول وبعناية الله تعالى ومنه خانہ مزہ نزول میسر اولمشدر .

* تذیل *

کشت وکذار بلاد وامصار ایدن اولی الابصارک کزدکاری برلر دہ امرار انظار دقت برلہ مطاع اولدقلمری احوال وآناری ضبط و حفظ ایلملری فوائد سفردن معدود اولہ کلکین بناءً علیہ بوچا کر کمنہ دخی مأمور اولدیغ پروسیا دولتی حرکتہ دائر رأی العین مشاهدہ وسماعاً تحصیل وقوف ایتدیکم موادی قلمہ آلوب ارباب مطالعہ یادکار براقق داعیہ سی خاطر دن کذار ایتشیکن اوروپاہ سیر وسفر ایدن اسلاف کرام رحمہم الله الملك العلام خلال سفر لرندہ کوردکاری احوالی برر جریدہ یہ ثبت ایلہ اخلاف رینہ یادکار براقدقلمری و بوجہ تدن اولطر فلرک کیفیتانہ دائر پوشیدہ و خفی برشی قالمدینی تیقلہ بوداعیہ دن صرف نظر اولنسی منویء ضمیر فقیر اولشیدی لکن ازمان واحیان تجدد ایتدجک ہر دولتک اطوار وعاداتی دخی نوبنو متجدد اولدینی ظاہر و بوضورتہ بعض موادک ایرادی اصحاب اتباعہ عندندہ برر فائدہ زائدہ دن خالی اولدینی بدیہی و باہر اولغلہ قصہ دن حصہ آلمق ملاحظہ سی خاطر فاتری تہیج برلہ الحالہ ہذہ پروسیا دولتک طور وعادت ونظام ملکیرینہ دائر کسب اطلاع اولنان حالات دن بعضیسنک اشبو جریدہ یہ تذیل قلمسنہ ابتدار اولندی ومن الله التوفیق

* احوال نظام بلدہ و اہالی مناصب *

اوروپادہ اولان دول نصارادن کلوب پروسیانک کرسیء مملکتی اولان برلیندہ اقامت ایدن ایلیچیلر و ساططیر یلہ تقدیم اولنان تقریرلرک مفہوملرینی و مملکتاری اعمالندن امور ملکیرینہ دائر اولان کاغذلرک ماللرینی خلاصہ ایدوب قرالہ عرض ایلدکن صکرہ جو اہنامہ لر یازمق و سائر معظمت امور دولتی بالاستشارہ تنظیم ایتک ایچون ایک باش وکیللری و معیتلرندہ برطاقم کاتباری اولدیغدن بشقہ امور مالیہ و تجارت و کارخانہ و کمرک و ضربخانہ یی تادیہ و مہمات سفریہ و سرحدات و قلاعده اولان عسکری نفراتنک علوفہ و ملبوسات و لوازم سائرہ لرینی تسویہ ایتک و ذخیرہ و حطب و سائر مہمات شہردن اولان حوایجی جمع وادخار ایلہ اہالی بلدہ یہ زحمت چکدیر مامک ایچون منستر نامندہ صداقتہ واستقامتہ موصوف و صغر سنلرندن برو دولت ایچندہ تربیہ اولوب عہدہ لرینہ احالہ قلنان خدمتک حسن و قبحنی فرق و تمیزہ مقتدر ایشلرندہ مستقل اون ایک نفر آدملری

و آنرا کدخی معیتارنده قدر وافی کاتبلری اولوب سنوی هر کسک حال و شان
 و منصبه کوره خزینه دن معاشی اولغله کسنه دن رشوت و عبودیت نامی ووجه
 آخردایله بر آچه آله مازلر و امور مالیه مأمور اولنلرک هر بری سنه سی ختامنده
 کندویه مفوض اولان خدمتک محاسبه و دخل و خرجنی ذکر اولسان کاتبلر
 معرفتلیریه رؤیت و بلا واسطه قراله عرض ایدوب احدها آخرک ایشنه وجها
 من الوجوه دخل و تعرض ایتمیوب و مادامکه سالف الذکر منستلردن دولتری نظامنه
 مغل بر جنحه و تقصیر ظهور ایتمیه عزل ایتمدکارندن غیری حسب الاقتضای برنی عزل
 ایتمه لر دخی یته بروقت لازم اولور . ملاحظه سیله رتبه سندن اسقاط ایتمیه رک خدمتده
 اولدینی حینده قرال طرفندن کندویه معین اولان راتبه ایله خانه سنده اقامته مأذون
 و ریشنه مادوننده اولان ارباب استعداددن برنی استخدام ایدوب مقتضی اولمدجه
 لزومسزیره رجائی تنکثیر ایله معاشلری امرنده دولتری دغدغه یه اوغرا تمزلر .
 و لباس و خدمه خصوصنده اقتضای قاعده سنه رعایت ایله کرک قرال لری و کرک رجالی
 اوتهدنبرو مألوف اولدقلری لباسی کیوب سائر سکان بلده دخی حال و شاننه کوره
 لباس اکتسابنه مأذون اولوب فاخر لباسلر و اعلا کورکلر کیمکله حدینی تجاوزه
 ارباب سفاهته رخصت و یرمدکارندن بشقه باش و کیلارینک خارج و داخلده غایت
 مافی الباب اون بش نفر خدمه لری و سائر وجوه بلده دن اولنسلرک دخی حاللرینه
 کوره اوچر بشر ایلقلی و یلقلی آدملری اولوب بی لزوم زیاده آدم قوللانمزلر حتی
 انکلیزده لاجل الاحشام زیاده خدمتکار استخدامنه خواهشکر اولان کسنه رتبه سنه
 متحمل اولدینی خدمتکاردن زیاده قاچ نفر استخدام مراد ایدرلر ایسه حفظاً للنظام
 سنوی نفر باشنه جانب میری یه شوقدر غروش و یرمدجه مأذون اولدینی بعض ارباب
 و قوفدن مریدر خدمه مقوله سی دخی آلدقلری ایلقلری ایله مصارف یومیه لرینی
 اداره و بلقلریله قباحه چوقه دن لباس کسیدروب کیرلر کورک و سائر طبیعتلری
 استدیکی شیلری کیمکه رخصت و یرمدیکندن مخدوملردن آلدقلری آچه مصرف
 و لباسلرینه کفایت ایتمکله خدمت ایله طشره مملکتلره کیدوب رعایا و برایی تجریم
 و تعریم ایتمک و عمال و حکامی تعجیز ایتمک مثلله حالتلری مفقود اولدیغندن غیری
 دولت خدمه سندن ایش ایله مأمور اولنلره ایاب و ذهابلرنده مأکول و مرکوبلرینه
 و فایده جک درجه خزینه دن بر مقدارشی و یرملک عادتلردن اولغله مأمور اولنلر
 دخی بر ایکی نهایت اوچ آدمله کیدوب ایشنی کورد کدنصکره خدمت مباشریه
 ووجه آخر ایله فقرادن بر آچه و بر حبه آلمغه زهره لری یوقدر .
 سکان بلده لری رجال و کتاب و عسکری و تجار و ارباب حرفندن عبارت و هر کسک

زی و قیافتندن رتبه و درجه سی و نه صنعتده اولدینی معلوم اولمغله چوقاق باشی بوش
 و بیکارلری اولیوب اولسه دخی او مقوله لری انشا و ایجاد ایلدکاری کارخانه لرده
 خفیفجه یومیه ایله استخدام ایدوب اطعام واکسا ایده جک کیمسه سی اولمیان فقیر
 و علیل و عمل مانده و بر وجهله تعییشه عدیم الاقتدار اولنلر ایچون مخصوص یرلری
 اولمغله آنلر دخی ذکر اولنان یرلره اسکان وایوا و اطعام واکسا ایدوب بو وجهله
 درون شهرده سرسری و جرار و دانجی مقوله سی پک نادر در .

پروسیا مملکتی بلاد بارده شمالیه دن اولوب پنبه و حریر مقوله سی اشیا نابت اولدیغندن
 بلاد حاره دن جلبه محتاج اولدقلری پنبه و حریر و قهوه و شکر دن ماعدا کندو
 مملکتلرنده تدارکی ممکن اولان شیرلی بلاد اجانیدن کتور مکه حاجت مس ایتمیوب
 آقچه لری درون مملکتده قالمق ایچون برلینده و اطراف واکنفاغه چوقه و بز
 و کخا و اطلس و قتیفه و دیبا و صندال و فغفور و سائر بو مقوله امتهه و اشیا کارخانه لری
 ایجاد و آقچه قوتیله آخر محالردن اوسته لر جلب ایله حوایج مملکتدن اولان اشیا
 نسج و اعمال ایله خارجدن بر شی کتور تمیوب کلسه دخی علناً کتور نلردن یوزده
 اوتوز کمرک اخذ و سرا کتور نلرک مالی اله کیرر ایسه جانب میریدن ضبط اولنمق
 نظام بلده لرندن اولمغله طشره دن درون مملکتده اقل قلیل شی کلدیگندن بشقه
 مملکتلرنده بولنمیان شیرلی تکلف ایله نوبنو تدارک سی و اقدام ایدوب حتی
 منستر هرج برک سی و غیرتیله بر قاج سنه ظرفده قتی وافر توت آغا جلری پیدا
 و طبیعت مملکتدن خارج اولان حریردن سنوی کارخانه لرینه یتشه جک مقدار ینک
 ربعی صوبه لر ایله یتشدر دکاری کورلمشدر .

ابن خلدون مقدمه سننده محرر و مسطور اولدینی اوزره بشرک سنی سن نمو و سن
 و قوف و سن انحطاطه منقسم اولدینی کبی دولت لرک مدتی دخی او چ قسمه منقسم
 و سن بی آدمه تشبیه اولنه کلکین هر بر دولتک او اخر حالنده اهالیسی احتشام
 و ترفهه میل ایله قوت عصبیه سنه فتور عارض و اوروپا دولت لرنک اکثری الحاله
 هذه حد هر مه رسیده اولدیغندن ماعدا زمانه نك دخی قوا سنه ضعف طاری و اهالیسنک
 طبیعت لری بدویتدن حضریته مبدل اولوب هر کس ترین و راحتیه میل ایلدیگندن
 اوائل و قتلر کبی جنک و جدال ایله توسیع مملکت امرنده هر دولتک همتی قاصر
 اولمغله غلط طبیعت ایله بر دولت بر دولته غلبه ایله بر مقدار یرینی آله دخی چوق
 کچمدن آلدینی یرلری کیرویه رد ایله حالت اولی سنه رجوع ایدوب انلاف خزان
 و اتعاب عسا کر و رعایادن غیر یالینه بر شی کیرمدیکی بالتجربه معلوم اولان کیفیادن
 اولمغله بوعلته مبنی اوروپاده اولان دول نصارا حر بی ایجاب ایده جک برعات

ظهور ایتدیجه مجرد توسیع مملکت ضمننده بر بریه جنک و حربیه ابتدار ایتیموب تجارت و سائر وجهله ممکن اولان منافع و فوائد ملیکله رینی تکثیر ایله مملکتلرینی معمور و آبادان ایتمه صرف وسع و مکنت ایدوب لکن بو جهتله ینه عساکر مرتبه لرینه و جبهه خانه لرینه و طوبوخانه و قلعه لری محافظه سینه خلل کله جنک ایش ایشلمیوب لارنده اولان ممالکی حفظ و حراثت ایچون دائماً و مستمرأ عسکرلری حاضر و آماده اولوب هر کون تعلیم جنک ایتمکن خالی دکلدردر .

* احوال منزلخانه *

بالاده محرر اولدینی اوزره کمنه طرفندن رعایایه جور و تعدی و قوعه کلدیکندن کرک نیمچه و کرک پروسیا رعایایه آسوده حال اولوب هر ساعت باشنده معمور اوچر بشر قریه لری اولغله یولجی زحمت چکمامک و منزل بار کیرلری تلف اولماق ایچون هر درت ساعتده بر منزلخانه و امور مهمه ایله آمد و شد ایدن اولاقلر ایچون هر بر منزلخانه ده اون آتی و بعضاً یکریمی درت بار کیر و مخصوص منزل عربه لری اولدیغندن ماعدا منزلخانه لری یقین و یوللاری پالمش و دوز کون اولمق حسینه بر اولاغی بر ساعتده دیگر منزلخانه یه ایصال برله فی الحال بار کیر عودت ایتمکله بار کیر خصوصنده قطعاً اولاقلر زحمت چکمیوب زیاده بار کیر بسلیمکه دخی حاجت بو قدر .

احیاناً کلیتو آغراق ایله بر ایلیچی یا خود بر بازرکان ظهور ایدوب منزل ایله کیتمک مراد ایدر ایسه منزلخانه لره بر ایکی کون اول اولدینی یردن قننی کون حرکت و کونده قاچ منزلخانه قطع ایله جکن اخبار برله منزلخانه ده موجود بار کیردن ماعدا هر منزله قاچ رأس بار کیر اقتضایدرسه کویلرده یراز و توانا کویلو بار کیرلری اولغله منزلجی و کوی اختیارلری معرفتلیله کویلودن تدارک و عربه لره قوشوب کوندر لر .

بر منزلخانه دن بر منزلخانه یه و ارنجه بر رأس بار کیرک اجرتی بر غروش و سور بیجی اجرتی کذلک بر غروش اولمقدن ناشی منزلخانه یه وارلدینی ساعت هر کسک قاچ بار کیری وار ایسه منزلجی معرفتیه تماماً اجرتی آلوب عودت ایدر لر سور بیجی اجرتی فقط منزلخانه سور یجیلرینه مخصوص اولوب کویلوره جزئی بخشش و یریلوب منزلخانه لری دخی قراللری طرفندن آیلقلی برر معتمد منزلجی یه مفوض اولوب سنه باشنده منزلخانه اجرتی و منزلجی آیلقی و بار کیرلرک علیق و علفی بهاسی و سائر مصارف لازمه مجتمع اولان آنچه دن افزاز اولندقدن صکره فضله سی قرال خزینه سنه عائد اولوب جانب میریدن و اهالی قضاء طرفلرندن منزلجی یه بر آنچه و بر حبه و یرلمز .

* احوال خزینه *

قرال سابق فیلسوف و عاقل و مدبر بر آدم اولمغه نظام ملکیه به دائر تالیف ایتدیکی وصیت نامه سنده بر مملکت خزینه سی اولازرع و حرثی تکثیر ایده جک اسباب و حالاتی استحصال ایتک ثانیاً اهل حرفتی ترویج ایله درون مملکتده ایشسز آدم بولنماق ثالثاً مملکتده موجود اولیوب آخر بردن جله حاجت مس ایدن امتعه واشیایی هر دولت کندو مملکتنده بشدرمکه جدوسی ایتک رابعاً تجارک میزانه رابطه و یروب طشره دن مملکت ایچنه کیرن امتعه آز اولوب چیقان چوق اولمغه مملکتک آچه سی درون مملکتده قالمق خامساً رعایادن برینک اوکوزی هالک و ذخیره سی برآفته اوغره سه اوکوز و تخماق ذخیره و یروب ایشسز قویماق و یاخود ساکن اولدینی کویده کندویه وافی ترلا اولدینی صورتده آخر بر معمور یره قالدیروب اسکان وزرع و حرثه جیبان بر خالی یر بولندقده اورمانلقیرینی قیردیروب ترلا تدارک ایله زراع و حرثی بر شئیئه محتاج ایتماک . سادساً درون مملکتده حاصل اولان ذخیره یی رعایانک الدن جبراً آلیوب کندولری شهر لره کتوروب وقت و حالک ایجاب ایتدیکی وجه اوزره رضاسیله دیلدیکی آدمه صا تیر مق سابعاً مملکت دروننده حرفت صاحبی و بر طریقه علاقه سی اولیوب الی ایانغی اولان شحات و دینلجی مقولرینی انشا اولنان کارخانه لره ایوا واسکان ایله ایش ایشلتدیروب اولوجهه تعیش ایتدیرمک ثامناً بر ماده نک دولتجه نظامنه تشبث اولدینی حالده اساسیله تنظیم ایدوب رجا و شفاعتله نظام مذکوره خلل و یره جک حالاته تصدی اولنماغله اونظام علی الدام مرعی و دستور العمل طو تلمق خصوصاری مملکتی معمور ایتکه غیرت ایدن دولته لازم و لابد ایدوکی و بویله اولدینی حالده مملکت معمور و آبادان اولوب کیمسه دخی آچه سز قالمیوب تعیشه مقتدر اولمغله خرسزلق ایتیموب مملکت آسوده حال و ذخیره و متسع چوغالوب بازرکانلق اموری رایج اولمغله مملکتک آچه سی کون بکون ترقی بولمقده اوله جنی و بویله اولدینی صورتده نظام ملکه خلل کلوب هر کس کندو هوا و هوسنی اجرا قصدیله درلو درلو فساداته سعی ایله اهل عرض مقوله سی بی راحت اوله جغندن غیری باشی بوش چوغالوب رعایا اوزرینه مسلط اولمغه رعایا بی طاقت و زبون و مملکت خراب و غیر مسکون اوله جنی و بردولتک هر نقدر کلی خزینه سی موجود اولسه دخی عوارض دهر به ظهور یله افنا اولوب اودولت زحمت چکه جکی ورعایا و بریایسی مظالم و تعدیادن حمایت و صیانت ایله مرفه الحال اولدقده خزینه مقامنه قائم اولمغله دولت مذکوره

هیچ بروقتده زحمت چکمیہ چکی محرر وقرال سابق مرقوم قراللق اسکملہ سنہ
 قعود ایلدکده دولتنک سنوی ایرادی یکر می بشیک کیسه ایکن بودقیقه لره رعایت ایله
 التمش بیك کیسه به ابلاغ ایلدیکی ذکر اولنان وصیتنامه ده مسطور در .
 الحاله هذه پروسیادولتنک ایرادی سکسان بیك کیسه آچه به متقارب اولغله مبلغ
 مذکورک بروجه تخمین قرق بشیک کیسه سی عسکری علوفه سیله طوبخانه وجبخانه
 وسائر مهمات سفریه وقلاع وحصون تعمیرینه ویکرمی اوچ بیك کیسه سی قرال
 دائره سی مصارفیه منسترلر وسائر امور دولته مأمور اولنلرک دعیتلرینه وبعض محللره
 تعیین ایلدکلری مصارفه وکوپری ویولار تعمیری وبقضاءالله تعالی آتش ظهوریه
 محترق اولان کویلرک خانهلری انشاسنه وسائر مهمه لرینه صرف اولندقدن صکره
 فضله کورینان اون ایکی بیك کیسه سی دخی سفر ظهورنده خرج اولنوب رعایایه
 بار اولماق ایچون قرال خزینه سنده محفوظ اولدینی وقرال سابق یتیم بر تاریخنده
 برقاچ دولته یدی سنه متوالیا جنک ایتیم ایکن موجود ومدخری اولان آچه سی
 توکتوب خصماسی مفاس اولدی دیمامک ایچون ختام سفرده برلندن بش التی ساعت
 بعدی اولوب پروسیا قراللرینک موسم صیفده تفرجکاهلری اولان پوتسپم نام
 شهر خارجنده برعالی سرای واولوجهله بر مقدار موجود مدخر آچه قالدیغی دول
 سائر به افشا ایتدیکی بعض ارباب وقوفدن تصحیح اولمشدر العهده علی الراوی .

* احوال رعایا *

پروسیا مملکتی دروننده واقع قرانک برمقداری قرال خاصی برمقداری تیمار
 وزعامت و مالکانه مثللو واهالیسنک ملکی اولغله خاص اولان کویلرک کیتلوجه
 اولان اهالیسی او باشنه ویرکو وعشر وعوارض سائر نامیله جانب میری به سنوی
 قرق غروش وترا و حیواناتی قلیل اولوب قرق غروش ویرمکه عدیم الاقترار
 اولنلر حال وتحملنه کوره کیمی یکر میشر وکیمی اونر غروش ویردکن صکره
 رعایانک هربری یا هفته ده اوچ کون ساکن اولدینی قریده واقع اراضی میریه به
 خدمت ایدوب ویا خود سنوی جانب میری به قرق غروش دخی ویروب تیمار
 ومالکانه اولان کویلر اهالیسی دخی کذلک جانب میری به قرق غروش ویردکن
 صکره قریه متصرفلرینه دخی هفته ده اوچ کون خدمت ایدوب اشبو ویرکونی
 ویردکن صکره وجها من الوجوه افراد آفریده طرفندن رعایان بر آچه وبرجه
 مطالبه سیله تعدی اولنمدیغندن صفای خاطر ایله اولقادر آچه به سنه بسنه لازم کلنلره
 تسلیم ایله آسوده ومرغه البال اوله رق زراعت وحرثلریله مشغول اولورلر .

شهر وقصبات درونلرندۀ متوطن اولان اهلینک صغار و کبارندن ظاهرده ویرکو نامیلہ برشی آلتیوب قالدیکه حوایج شهردن جزویات مقوله سنه وارنجہ اهلینک ما کولاتنه دائر شهر قپوسندن ایچرو هر نه کیرر ایسه باچ نامیلہ خیلجه آچقه آلتدیغندن بشقه فقرايه لزومی اولمیوب طشره ممالکنندن کلان زیتون وزیتون یاغی ولیون وشراب و تحف مقوله سی اصحاب ثروت و یسارک استعمال ایده کلدکاری اشیدان آغر کمرك آنوب زیاده جه بها ایله فروخت اولندیغندن شهر وقصبات سکائی دخی بو وجهله خفیججه ویرکویه داخل اولوب ویرکو ویرمکدن وارسته اولمز لر .

سفر وقوعنده دخی رعایادن سفریه و سفره متعلق ویرکو نامیلہ برشی مطالبه ایتمیوب فقط ذخیره وبارکیر مبیاعه سی اقتضا ایدر ایسه جانب میری یه کلی خسارت ورعایایه بار اولمیه جق و جهله معتدل بها ایله رعایادن اشترا ایدوب بوجهتله دخی رعایایه ثقلت ویرمز لر .

* احوال ذخائر میریہ *

همجوار اولان دولتر ایله جنک وجدال اقتضا ایلدکه موجود ومدخر بولمق ایچون آسوده وقتلرده رایحیلہ بولنان یرلرده ذخیره مبیاعه واوچ سنه ایکمیوز بیک عسکره وفا ایده جک مقداری حدودلره قریب محللرده انشا ایلدکاری انبارلره وضع وادخار ایدوب برطرفدن سفر آچیلور ملاحظه سی برطرف اولدقده ممالکنندن برنده ویاخود همجوار اولان دولترک بریسنده جذب و حطلق اولمق لازم کلسه اولوقتک رایحی نه کونه ایسه رایج مذکور اوزره مدخر اولان ذخیره نك بر مقداری لازم اوللره بیع ایدوب بوللق اولدینی سنه ینه رایج اولدینی منوال اوزره تکرار اشترا و انبارلره وضعله هم رعایا زحمت چکمز هم انبارلرده موجود ذخائر تازه لنوب جانب میری یه دخی اولدقجه فائده زائده حاصل اولور .

* احوال عساکر *

پروسیا دولتنک ایکمیوز یکر می بیکدن متجاوز مرتب ولدی الاقتضا اولدینی یردن مأمور اولدینی محله اوچ کونده حرکته مقتدر نصقندن زیاده سی یرلو وقصوری ییلنجی و یوز اوتوز بیک مقداری پیاده و التمش بیکی سواری واون ایکی بیکی طویجی عسکری اولوب آسوده وقتلرده یرلردن اولان عسکری اوچ بلوک ایدوب هر بلوکنه سنه ده طقوز آی رینه و یوردینه واروب زراعت و حراثت

ایتمک و صنعتی و ارایسه صنعتی ایشلمک ایچون اذن و یرمک عادتلرندن اولمق
حسیله ذکر اولنان مدتده مستحق اولدقلری علوفلری و یرلیوب نصفی قرال
خزینهنه سنه و نصف آخری قرالک معلومی اولهرق قولونل و مایور و قپودان
و اوفچیلارله قالور طقوز آی تمامنده ذکر اولنان بلوک رجنیدینه عودت ایدوب
اوبر بلوکی کیدر عساگر مذکورده قلاع و شهرلرده ساکن اولغله برلین شهرنده
اولنلرک کونده برر رجنیدی نوبته صباح وقتی جنرال و سائر ضابطانیله معا صیفاً
و شتاءً تعلیم میداننه چیقوب ایکی اوچ ساعت تعلیم جنک ایتدکنصکره بلوک بلوک
قوللقلره و بعض لازم الحافظه اولان یرلره کوندریلوب نوبتهده اولنلر یرلینه
عودت ایلدکلرنده کندولره مخصوص عسکر لباسنی اخراج و اسکیجه لباسلریله
حاملق و سائر اللرندن کلان ایشی ایشلیوب رجنیدینک تعلیم نوبتی کلدیکی ساعت
ینه عسکری لباسنی کیوب و رجنیدیله تعلیم میداننه کیدوب تعلم جنک ایدرلر .
عساگر مذکورده نفراتنک یومیه درت پاره علوفه و یارمیشر و قیه نان و جنک
وقتنده هفتده اوچ کون لحم بقر تعییناتی و سنهده شابقه و چوراب و کوملکنه
و ارنجه ایکی طاقم مابوساتی اولغله موسم صیف حالونده قرالک مقرر حکومتی
اطرافنده هر نقدر عسکری طائفهسی و ارایسه چادرلر ایله خارج برلینه کلوب
جملهسی تکمیل اولدقده یازلق لباسلری اعطا و فلان کون روی یعنی یوقلمه اولهجنی
جملهیه اعلان برله داخل شهرده اولنلر دخی اوچ کون طشره چیقوب اطرافدن
کلنلره ملحق و یوقلمهیه مخصوص صحراده جنکده طورر کبی هر رجنیدک طوپلری
اوکنده اولهرق صف باغلیوب بر مقدار طوپ و تفنک تعلیمی ایتدکنصکره جملهسی
رجند رجنید قرالک اوکندن کچوب حال و شانلرینه کوره سرکرده لری نوازشه
مظهر اولورلر عجایبندرکه ذکر اولنان صحراده عسکری و سیرجی اولهرق یوز
بیکدن زیاده خلق جمع اولمش ایکن سرکرده لرک عسکر تحریکنه دائر اولان
صدالرندن غیری برصد ایشیدلیوب جملهسی صامت و ساکت دوررلر آخر ایالتلرده
اولنلری دخی یاقرال بالنفس اول ایالته کیدوب یوقلار یاخود اولخوالیده اولان
جنرالار یوقلایوب آنلرک دخی صیفیه لباسلرینی و یررلر ذکر اولنان یوقلمهده
علیل و جنکه عدیم الاقداری و ارایسه عاتنی بیان ایدرک قراله عرضحال ایدوب
افادهسی نفس الامرده مطابق ایسه تقاعد یومیهسی اعطاسیله عسکری زمهره سندن
اخراج و یرینه ملازملردن برینی ادخال ایدرلر بو یوقلمهده بشقه کوز فصانده
دخی برلینده و برلینه یکریمی اوتوز ساعت مسافه اولان محالدرده ساکن بالجمله
پیاده و سواری عساگر قرالک تفرجکاهی اولان پوستتام نام شهره جمع اولدقندن

سکره موجود عسکری ایکی بلوک ایدوب بر بلوکنه قرال بالنفس و دیگر بلوکنه معتبر جنرالرندن بری سرعسکر اولوب شهر مذکورک خارچنده واقع تخرای وسیع الارجاده خصمسیله جنک ایدرکی طوب و تفنک جنکی ایدرلر .

جنک خصوصی اوروپاده بیایغجه بر صنعت اولغله صنعت مذکورده هر قنی قرالک عسکری ماهرایسه قرال مذکور اکثر احيانده خصمسنه غالب اولدینی والحاله هذه پروسیا عسکرینک جنک صنعتده جمله دن زیاده مهارتلی درکار ایدوکی بین الدول مسلم اولمقدن ناشی ذکر اولنان جنک تعلیمنده فلمنک وانکلتره وفرانچہ وایتالیه وشود وفاقسونیه ودانیارقندن مایور وقودان وافیچالار کلوب صورت جنکی تماشا ومعرفت تعلم وتحصیل ایدرلر .

قلاع وثغور محافظلرینه مأمور عسکری طائفه سی محافظه سنه مأمور اولدینی قاعدهده راحتہ آیشوب علاقه پیدا ایتمک ایچون بریده طور میوب آراتق اولدقلمری محافظه دن دیگر محافظه یه نقل وتحویل ایله دائم عسکری طائفه سنی تخریکدن خالی اولدقلمرینه بنسآ علوفه وقتی هر قنی سنجاقدہ بولتورلر ایسه اول سنجاغک محصولندن علوفه لری ویریلوب بعده عمالک حسابنه محسوب اولور .

انسانای جنکده واجلیله مرد اولان سلطاطلرک رینه آخر سلطاط تدارکی لابد اولدینی جهندن لدی الاقتضا عسکر تخریری ایچون هر چمنده بر سنجاق تخصیص وتقصان اولان عسکری لواء مز بوردن تکمیل ایتمک خصوصی تنصیص ایتملریله هر سنه عسکری ناقص اولان رچمندک اوفیچالاری کندو رچمندلرینه مخصوص لوايه چیقوب رعایادن اوج نفر اولادی اولنلرک برینی الھرق قاچ نفر اقتضا ایدر ایسه اولو جهله رعایادن تخریر وملازمین زمره سنه بعد الاحلاق ملازملرندن فن حربی تعلم ایتمش اولمقدارینی آلب رچمندک نقصاتی تکمیل ایدرلر .

* احوال مهمات وجبه خانه *

پروسیا مملکتی دروننده واقع قلاع وپلنقه لرده اولان طوب ومهمات جبه خانه دن بشقه بر لینه ارستان تعبیر اولنور ایکی طبقه لی برجه خانلری اولوب طبقه اولاسنده طوب وهاون وخمبزه وبونلره دائر مهمات طوپخانه وایکنجی طبقه سنده تفنک وقلیچ وپشتو وسائر آلات جبه خانه موجود وجمه سی سپالر اوزرنده کویا بوکون استادلر لرنندن چیقمش پاک ومصیقل استف اولمش اولغله عسکریدن برینک تفنک وقلیچ وپشتوی شکست اولسه موجود جبه خانه دن اعطا وقاچ قطعه

ویریلور ایسه در حال تکمیل ویرینه وضع برله دائماً اوچ درت اردویه و فایده جک
مقداری مهماتلری موجود و حاضر طور دیغندن غیری طوب عربه لرینه و بار کیر لرینه
اقتضا ایدن قوشوم و مناوله و مهمات سائر طوپخانه بشقه بشقه انبارلرده محفوظ و هر
انبار بر رجنده مخصوص اولغله بر محله قرق الی طوب ارسالی مقتضی اولسه هر رجندک
نفراتی انبار لرینی بیلوب در حال لوازم لرینی انبار مذکور دن اخراج و طوپ لرینی
تجهیز ایدوب بار کیر لری دخی توانا ویرار اوله رق آخور لرده موجود اولمقدن ناشی
بر کونده عربه لرینی قوشوب مأمور اولدقلری محله قالمغه لیاقتلری وارد ر .
و بوقوله میری اسلحه نشانلی و علامتلی و معلوم اولوب عسکریدن بریسی فروخت
و یابدیل ایتمک سودا سنده اولسه دخی کیمسه لندن آله مدیغندن ماعدا ضابطانی کرک
عسکر لرینی و کرک اوزر لرنده موجود اسلحه بی کل یوم یوقلایوب بریسنک سلاحی
نقسان و یا خود نامصیقل اولسه تأدیب ایتملریله سلاحی صاتمق شوپله طور سون
کیرلی پاسلی طومتق بر نرفرک حدی دکدر .

بالاده سرد و بیان اولنان مقدمات دن نتیجه مرادم دولت علیه ابدی القرار منشاء ظلم
و بادی خرابیء ممالک اولان تزیین و احتشام ایله ارتشا ماده سنک منع کلی ایله منعی
و یو وجهله خزینه مقامنه قائم و ودیسه رب العباد اولان فقرای رعیتک استحصال
اسباب رفاه و راحتی امرینه مبادرت و هر طریق تقیح و رجالتی بالانتخاب
موجود اولان مناصبه حصر ایله هر کسک حال و شان و رتبه سنه کوره معاشی تعیین
ایدوب مادامکه رجالک برندن نظام ملکه خلل تطرق ایده جک بر جنحه و تقصیر
ظهور ایتیه بی هنکام منصبندن عزل اولتماسی دقیقه سنه رعایت و طریقه دخولی
سررشته ظلم و تعدی اتخاذ ایدن بر آلی ناهلک رجا و شفاعتله مراتب عالییه ادراج
اولتماسی حالانته دقت و اعالییه تقلیده اجتناسار ایدن سفهای ادانی مقوله لرینک
تأدیبی و روح دولت منزله سنده اولان عسکری طائفه سنک خصوصاً طویجی و امور
بحره واقف و آشنا قالیونجی نفراتک معلم و منقح اوله رق صیفاً و شتاء آماده ایتدی رلمسی
اسبابی استحصالنه همت بیوردیفی صورتده متفقلرینک قوت و غیرتی و مخالف لرینک
کسر و هزیمتی تزیاید بولوب عون حقله جمیع زمانده دشمن لرینه غالب اوله جنی
کالشمس فی وسط النهار بیدار و آشکار اولغله همان جناب مسهل الصعاب و کلا
و عمال دولتی امور خیریه یه مظهریته زمانلرنده فقرا و ضعفا یه رفاه حال احسان
ایلیه آمین آمین بحرمة نبیه الامین .

* اشبو جلد خامسك برنجی طبعنده بعض ذوات كرامك سويلمش *
 * اولدقلری تاريخلر تبرکاً بروجه آتی بورايه دنخی درج اولمشدر *

﴿ تقويمخانه عامره مصححي لطفی افندينيك بولدینی تاريخدر ﴾

سزاتر کيب اولسه لطفی جوهر ايله تاريخی * او قوتتميل قلندی جلد پنجمده نه اعلادر

۱۲۷۸

﴿ خیری افندينيك زاده طبع دلکشالری اولان تاريخ رعنادر ﴾

جناب جودته ایش خدا طبع جواد احسان * اصول فن تاريخده يول آچدی کندي کندي يه
 مورخلکده يوق مثلی سخنور لکده اقرانی * مرجعدر هنرور لکده و صاف حچندی يه
 بشنجی نسخہ سی آثارنيك باق اشته طبع اولدی * صفا ويردی ينه طبع ودل دانش پسندی يه
 توارخ آشنا اکلار ييلور قدر و کالاتن * او قوندجه ايدر تحسین اوذات ارچندی يه
 يازوب معمله اعلان ایلدی تاريخی خیری * باصدی جلد خامس قيل دعا جودت افندی يه

﴿ انتهى الجلد الخامس ﴾



در سعادت

(مطبعة عثمانیه)

۱۳۰۹



رَشْتَوِيكَ مُنْعَقِدًا وَلَا نَجْلِسُ مِكَامَهُ
رَبِيعُ الْآخِرِ ٢٣ ٢٠٥ هـ



71

۵- فهرست جلد سادس -۵-

	صفحہ
وقایع سنہ ۱۲۰۷	۴
نظام دولته دائر لایچہلر تنظیم و تقدیم اولندیغی	
احباب لواج	۸
لایچہلرک خلاصہ لری و بعض ملاحظات	۱۰
شرائط انتظام عسکر	۱۱
سکہ احوالی	۲۱
عبدالله ملا لایچہسی و بعض مطالعات	۴۳
فذلکہ	۵۲
تنظیم قوانین و نظامات و دیگر بعض اجراءات . خبرہ جی و لغمچی	۵۳
قانوننامہ لرینک تنظیمی	
معدن امینی یوسف اغانک وزارتی و بندر و خوتین و اسماعیل قلعه لرینک	۵۴
تعمیری ایچون بنا امینلری نصب اولندیغی	
بندر و خوتین تیمار و زعامتلرینک تأیید نظاملری	۵۵
دونمای هایونک عودتی و اسمہ سلطانک سوری و ضابطان بحریہ حقنہ	۵۶
قانون جدید	
محلولات مقاطعاتہ دائر نظام	۵۷
ایالت مورہ حقنہ نظام . نظام امانت صرہ	۵۹
ایراد جدید دفتر دارلغی و تعلیمی عسکر نظارتی احداث اولندیغی .	۶۰
واردات جدید	
طوبجی و عربہ جی قانوننامہ لرینک تنظیمی و بعض تحقیقات . توزیع	۶۳
ویرکو نظامی	
وضع قانون وزارت	۶۵
سکہ حقنہ و یریلان قرار	۶۷
سفائن تجاریہ نک تکثیری مطالعہسی	۶۹
نظام جدید عسکرینک ترتیب و تنظیمی	۷۰
بعض امور خیریه	۷۳
وقایع شتی	۷۴


صخيفه	
۷۸	اجرا اولان عزل و نصبر ائسانده مملکتين بکاري نك بجایشاری
۷۹	وقایع خارجیه
۸۰	لهستانك ایکنجی مقاسمه سی
۸۶	المانیا ایمپراتورینك تتوجی . راسخ پاشانك پترسبورغه عزیزیتی
۸۹	آگاه افندینك لوندره ایلچیسسی اولدیغی . وقایع سنه ۱۲۰۸ . راسخ پاشانك در سعاده و روسیه ایلچیسنك پترسبورغه عودتلیری
۹۰	توجیهات و عطیه والتفات
۹۶	وقایع متنوعه
۹۷	وفات حمیدی زاده و اطلاق کیچه جی زاده . تجدید کسوه روضه مطهره و ایکی قطعه الماس اشتر اولدیغی
۱۰۰	اشقودره و قوعاتی و بعض وقایع اناطولی و طاعلی اشقیاسنك احوالی
۱۰۶	وقایع عربستان و احوال جبل لبنان
۱۱۶	احوال مدینه منوره و حلب و وقعه تیمور
۱۲۰	وهابیلرک ظهور مقدمات فساداتی
۱۲۴	بعض مواد نظامیه
۱۲۵	اموال ایتم حقنده نظام
۱۲۶	بار و تخانه لر نظامی و دیگر بعض اجراآت
۱۲۸	سفر ا تعییناتنك تعدیلی و اجنبی ترجمانه لر حقنده اصول
۱۳۰	بعض وفيات
۱۳۱	وفات فیضی پاشا و نعمان بك و خواجه ابراهیم افندی
۱۳۲	وقایع سنه ۱۲۰۹ . احوال دونما
۱۳۳	اجمال احوال
۱۳۵	بعض ذواتك نفیلری
۱۳۷	راشد افندینك عزلی و دری افندینك ریاستی و دیگر بعض وقایع و نظام جدید عسکرینك معاینه سی و قره دکز بوغازینك استحکامی و لغمجیلر قشله سی جامعنك ختامی و منفیلرک اطلاق
۱۳۹	ملك پاشا یرینه عزت پاشانك صدارتی و بعض توجیهات
۱۴۱	انوری افندینك وفاتی و نوری بکك وقعه نویسلکی و موسی پاشانك طرابلس شام و الیسی اولدیغی و دیگر عزل و نصب
۱۴۳	ترسانه جه بعض اجراآت


	صخيفه
وقايح متنوعه	١٤٥
مهرشاه سلطان عمارتنك ختامى وشيطان امين افنديك مولوتى و غاطله	١٤٥
قله سنك تعميرى و اعلان حريق ايچون كوسى و ضى	
عجم او غلنك اعدامى و مصطفى پاشانك وزارتى و قره محمود پاشانك عفى	١٤٦
علو پاشانك حر كات نابجاسى و وقايح سائر	١٤٧
بعض جوامع حوليلارنده حوضلر انشاسى	١٤٩
امور ماليه	١٥٠
بعض وفيات	١٥٧
اخبار خارجيه و فرانسه اختلالنك كيفيت ظهوريله بعض متفرعاتى	١٥٨
درى افنديك وفاتى و فردوس افنديك رياستى	١٩٣
فرانسه جمهوريتنك تصديق و راتب افنديك رياستى	١٩٤
وقايح سنه ١٢١٠	١٩٦
بوناپارتنك قوماندانلىقى	١٩٨
قطع حدود اوستريا	١٩٩
فرانسه ايلچيسنك ديوان هايونه دخولى و بعض حوادث هندستان . دولت	٢٠٠
عليه نك فرانسه جمهوريله اتفاقى	
حوادث قافقاس و ايران	٢٠٣
دوبروونيك و ير كوسنك ورودى و غرب او جاقارينه دائر بعض حوادث	٢٠٨
احوال عربستان	٢١٠
عظم زاده نك اميرالحاج اولدينى . احوال عيتاب وايچ ايل و وقايح روم ايلي	٢١١
بعض انشآت خيرييه و ميريه . ازادلى بار و تخانه سنك انشاسى و ترسانه ده	٢١٧
حوض كبير انشاسنه باشلاندينى	
قره دكز بوغازى قلعه لر ينك نظامى	٢٢٠
وقعه نويسللك نظامى . وقايح شتى	٢٢١
وفيات اعيان	٢٢٣
خيرالله افنديك كيفيت وفاتى	٢٢٤
سلطان زاده نك وفاتى كيفيتى	٢٢٦
وقايح سنه ١٢١١ . عزل و نصب . عبدالله ملا ايله اياقلى كتيبخانه نك	٢٢٧
صدارتلىرى	


	صخيفه
چلدر واناڤه محافظلرينك تبديللري	۲۲۸
راتب افندينك عزلى وراسخ افندينك رياستى و ابراهيم اغانك وزارتى	۲۳۰
وقوعات متنوعه	۲۳۲
اوج كمينك بردن بجره نزولى	۲۳۴
بعض نظامات و اصلاحات	۲۳۵
وقايح روم ايلي . قره محمود پاشانك مقتولاً و فاتى	۲۳۸
روم ايلي واليسى حقى پاشانك عزلى و اشقيانك طرنوى يي اوردقلىرى	۲۴۴
ايراننامه رسلرينك و رودى و پوناپارته نك ايتالياده مظفرتى	۲۵۰
وقايح سنه ۱۲۱۲ . فتحعلى شاهك جلوسى	۲۵۲
بعض احوال بحريه و ساحليه	۲۵۳
عزير افندينك پروسيا قراليه ملاقاتى و سفرانك صنوف و درجاتى	۲۵۴
پارس ايلچيسندن تحريات كلديكى و راشد افندينك رياستى	۲۶۱
عزت پاشانك استلالى و سووارى طوبخچيلرينك ترتيبى	۲۶۲
وفيات	۲۶۵
مفتى زاده نك و مكى افندينك ترجمه حاللارى	۲۶۶
عبدالله برى افندينك ترجمه حالى	۲۶۷
راشد افندينك ترجمه حالى	۲۶۹
شيخ الاسلام اسبق ابراهيم بكك ترجمه حالى	۲۷۱
بعض توجهات . امور ماليه	۲۷۲
قره طاعه دائر حوادث	۲۷۴
اخبار خارجيه	۲۷۷
احوال پولتيقه نك تغيرى	۲۷۹
فرانسه نك احوال داخليه سى	۲۸۶
پوناپارته نك طولونده دو نمتا تجهيز اتمسى و مالطه يي استيلايله قوالير طريقيقى	۲۹۰
الغايلمسى	
روم ايلي وقايحى	۲۹۱
پاسان زاده نك فرمانلى اولدينى و قبودان پاشانك سرعسكرلكى	۲۹۵
پاسان زاده نك تجاوزاتى و افلاق ويوده سنك تبديلى	۲۹۷
ترسنكللى اوغانك پاسان زاده عسكرينه غلبه سى . علو پاشانك افلاق	۳۰۰
محافظه سنه ماموريتى	

	صخيفه
اشقيانك بلغرادده منهنزم اولدقلرى وترسنكلي اوغانك زشتوى يي استخلاصى	۳۰۱
صوفيه ولوچه قوللرى برلشهرك ودين اوزرينه حركت ايلدكلرى	
وقايع سنه ۱۲۱۳ . ودينده وقوعبولان محاربهر	۳۰۸
سرعسكر اردوسنك انهنزى	۳۱۱
علو پاشانك اعدامى	۳۱۲
روم ايلينك اغتشاش احوالى	۳۱۳
استطراد . وفيات	۳۱۴
يسارى وعزيز افنديلر ايله مصطفى پاشانك وغالب افندينك وفاتلرى	۳۱۵
عفت بك ايله نورى بكك وفاتلرى وواصفك وقعه نويسلكى	۳۱۶
وقايع متنوعه . ينه اوچ كمينك بردن بجره تنزىلى	۳۱۷
مصره دائر مكله	۳۱۹
يونانبارتهنك اسكندريه يي استيلاسى وبعض دول اوروپا ايله اتفاق مذاكره سى	۳۲۳
يونانبارتهنك مصرى استيلا ايلديكى	۳۲۳
حجاج مصرك احوالى وصالحيه محاربهرسى	۳۲۹
فرانسه دونمسانك ابو خورده احراق اولنديغى	۳۴۱
يونانبارتهنك اطوار ومشوارى	۳۴۳
دولت عليهنك مصره دائر تشبثاتى	۳۵۰
وهايبلره دائر بعض حوادث	۳۵۳
ضيا پاشانك صدارتى وعاشر افندينك مشيختى	۳۵۵
فرانسه جمهورينه اعلان حرب اولنديغى . ذيل	۳۵۶
خبره جى ولغمجى قانوننامه لرى	۳۵۸
طوبجى وعربه جى قانوننامه لرى	۳۵۹
وزارت قانوننامه سى	۳۶۳
لوند چقتلكى قانوننامه سى	۳۶۶
عزت پاشانك صدارتته دائر خط هايون	۳۷۱
تصحيح سند ايچون فرمان على	۳۷۲
عاطف افندينك تقريرى	۳۷۳
لوندره سفيرينك انهناسى	۳۷۷
دوبروونيكلى طرفدن عريضة . مواجب حقنده خط هايون	۳۸۵
صدر اعظمى تلطف ايچون خط هايون	۳۸۶

	صفحه
جزائر یونانیہ اہالیسی حقنندہ اتحاد اولنان اصول	۳۸۷
حرمین خزینہ سنک موازنہ دفتری	۳۸۸
جانب ایرانہ جوابنامہ آصفی	۳۹۰
پارس ایلیچینک انہاسی	۳۹۲
صدر اعظمک استقلالنی حاوی خط ہمایون . موازنہ پولتیقہیہ دائر رئیس افندینک تقریری	۳۹۴
پاسبان اوغلی حقنندہ ویریلان فتاوا۱ شریفہ	۴۰۱
یوناپارتنک اہالی مصرہ اعلاننامہ سی	۴۰۲
یوناپارتنک مصر والیسنہ مکتوبی و اہالیسنہ اماننامہ سی	۴۰۵
بحر سفید بوغازندہ یوقلامہ اصولنک اجراسی	۴۰۶
فرانسہ یہ اعلان حربی متضمن بیاننامہ	۴۰۸








اثر خامه احمد جودت

بِسْمِ اللَّهِ الرَّحْمَنِ الرَّحِيمِ



شکر و سپاس نامعدود . و محامد متوالیه الورد . پیرایه بخش دیباجه روزگار .
و شیرازه بند جریده لیل و نهار . اولان واجب الوجود تزهد ذاته عن الوالد
و المولود . حضر تلرینه احق و احراذر . و صلات صلات و سلام . سیر عبرت
اثری هادی انام . و حادی اسلام . اولان خاتم رسل کرام . جنابنه و نجوم
اهتدا اولان آل و اصحابنه شایان اهدادر .

بعد ذا قلم پریشان رقم (احمد جودت) پر تقصیر بو طرز اوزره صحائف طراز حکایه
و تقریر اولور که در دست جمع و تألیف اولان تاریخ عاجزینک بشنجی جلدی هنوز
اتمام و تبیض اولندیغی او انده جلوس میامن نمونی نمونه سلامت دولت ابد قرین
و عصر محاسنحصر هایونی مجمع آثار بهین و مغبوط اعصار پیشین اولان ظل ظلیل
اله . و پادشاه معدلتپناه . سلطان مراحم پیشه . و خاقان حقایق اندیشه . السلطان
(عبد العزیز) خان . ادام الله دولته ماتعاقب الملوان . ولی نعمت بی امتنان افندیمز
حضر تلرینک نام نامی آناری روی درهم و دیناری مطرز . و السنه خطبای بلاغت
شعاری معزز . ایدوب علم تاریخ بر فائده سی دخی و قایع ماضیه و احوال امم منقضیه بی
بالموازنه اعصارک یکدیگره نسبتله فضل و رجحانی بیلمک مسئله سی اولدیغندن
و تاریخ عاجزینک هر جلدی جلوس هایوندنبرو مشاهد دیده اعتبار اولان همم
جلیله و آثار جلیله ملوکانه لرینک شکر بی بیلدیره جکندن اشبو جلد سادسک دخی
مع الافتخار تبیضنه ابتدار اولمشدر .



ترتیب جدید

جدیدترین


(از)

نایب محمد



معارف نظارت جلیله سنک رخصتنامه سیله

(ایکجی طبیی)



درسعادت
(مطبعه عثمانیه)

۱۳۰۹

جلد سادس

(از)

تاریخ مختصر

بِسْمِ اللَّهِ الرَّحْمَنِ الرَّحِيمِ

بقیہ وقایع سنہ ۱۲۰۷ ۹۳-۱۲۹۲

* نظام دولته دار لایحہ لر یا بلدیغی *

بروقدنبرو واقع اولان سفر لرده عسا کر اسلامیه تک متوالیاً ظهوره کلان پریشانلی
ارکان دولته بادی تلاش و اندیشه اوله رق عسا کر معلمه و منظمه ترتیب الیمک
آرزوسی پیدا اولمش ایسه ده اجر اسنه حال وزمان مساعد اولمامش ایدی .

وا کر چه سلطمان (عبد الحمید) خان حضرت تلرینک زمان سلطنتلرنده سرعت
طوپجیلری تکثیر و مستقل بر اوجاق اولمق اوزره ترتیب اولندیسه ده اصل طوپجی
اوجاغنه الحاق اولتوب اصلده اولان فسادک فرعه سرایتدن ناشی آزوقت ظرفنده
سرعتجیار دخی اسکی طوپجیلرک حالی کسب ایندی .

وبرآراق خلیل حمید پاشا نامستحق لک ترقیلرینی قطعله یکمچری اوجاغنک اصلاحی
قیدینه دوشمکله بلایه اوغرایوب سفر آخرته کیندی .

عسا کرک احوالی بویله مختل ایکن روسیه ونمچه سفر لری آچلدی . آواثل سفرده
یکمچریلر وبعده سواری بلوکاری عصیان ایلدی تیمارلو ایالات عسا کری دخی

(کرکی)

کرکی کی ایشہ یارامدی . عسا کر اعدا ایسہ معلم و منتظم اولدیغندن عظیم هز یمتدر و تأسف اولنه جق حالتدر ظهور ایدی .

ینه دور عبدالحمید خانیده مکتب بحریه کشاد ایله فنون بحریه تعلیمنه همت اولندیسه ده کرکی کی فعله چیقوبده دولت علیه ترسانه سنده فنون و صنایع بحریه هنوز درجه کاله گلدن بوجه بالا روسیه سفری ظهور ایدی .

روسیه دولتی ایسه آز وقت ظرفده خیلی مکمل و منتظم دونما تدارک ایلمش اولدیغندن دولت علیه دونمائی روسیه نک قره دکر دونماسنه نسبتله دها زیاده ایکن نائل ظفر و غلبه اوله مدی .

وایکی یوز بش سنه سی اواخرنده دونمائی هایون شکسته بسته قره دکر بوغازینه چکیلوب روسیه دونماسنک دخی امنه بورننده لکر انداز اولدینی استماع اولندقده استانبول اهالیسنه پک زیاده مورث و حشت و دهشت اولسیله هله متارکه خبری خاقه بادیء تسلیمت اولدی .

شوحاله نظر آ روسیه لو بودفعه اسوج محاربه سیله مشغول وانکلتره لی طرفدن اندیشه ناک اولمیوبده بحر بالطق دونمائی دخی آق دکره کش اولسه ایدی سواحل و جزائر دولت علیه نه درجه دوچار خسار اوله جق ایدوکی سفر سابقده کی احواله قیاس ایله معلوم اولور .

حالبوکه دولت علیه نک ایجاب موقعیسنه نظر آ یالکر قوه بریه کافی اولمیوب هر حالده مکمل و منتظم دونمایه محتاج اولدینی مسلماتندر .

الحاصل اسفار سابقه ده ظهوره کلان هز یمتدر ارکان دولته بادیء تیقظ و انتباه و علی الخصوص سفر اخیرده هر کس عسا کر نظامیه ایجادندن بشقه چاره اولدیغنه واقف و آگاه اولمش ایدی .

حتی قوجه یوسف پاشا ثانیاً صدر اعظم اولوبده یکچیری اغاسی و سائر اوجاق ضابطائی ایله کیفیت سفری درمیان ایتدکده جمله سی (بز بودفعه یوزیکرمی بیکنن زیاده اوجاقلی عسکری ایکن سکزیک موسقوعسکری طونهی کچدی و اوزریمزه کلوب اظهار صلابت ایدی دشمنک بویله نظامیه عسکرینه بزم عسکریمز حیلله حربیه جدیده نی بیلمینجه مقابل اوله میوب بوحل ایله قیامته قدر نصرت کوریه مز) دیهرک جف القلم جواب ویرمشلر ایدی .

بووجهله هر طرفدن عسا کر نظامیه ترتیبی الزم کوریلوردی . لکن دولت علیه نک احوال ملکیه سی دخی محتل اولوب بر بوزق هیئت ایسه بر هیئت منتظمه نی اداره ایدمه چکندن تنظیم عسکرله برابر امور ملکیه نک تنظیمی دخی لازمه حال و مصلحتدن ایدی .

چونکه امور دولت ساعت چرخلری کبی یکدیگره متصل و مربوط و بوطولابک حسن انتظام اوزره دونمسی جمله سنک تحت نظام و رابطه ده بولمسنه منوط اولدیغندن دولت علیه هر دأره سنجه اصلاحات اساسیه به محتاج ایدی .

اثنای سفرده سلطان سلیم خان حضرتلری جلوس ایدوب دولت علیه سنک بویه هر جهته اصلاح احواله محتاج اولدیغنی بالمشاهده تجدید اصول و فروع نیت و علی الخصوص عسا کر نظامیه ایجادینه قطعاً عزیمت بیورمش ایدی .

لکن بردولتک بویه کلیاً تبدیل و تجدید نظاماتی مجدداً بردولت تشکیکندن کوچ اولدیغنه بناء هر نه پایلمق لازم کلورسه اتفاق آرا ایله پایلمسنی التزام و خواص عالما و اعیان کبریاک نظام دولته دأر بر لایحه قلمه آللرینی امر و اراده ایتمش ایدی . حتی اردوی هایون هنوز سلسلترده ایکن سردار اکرم قوجه یوسف پاشایه ارسال بیورلمش اولان خط هایوننده نظام دولته دأر هر کسک مطالعاتی قلمه آنوب بعده جمله سی بردن اتفاق عقول سلیمه ایله تمیز و تحقیق و قوانین جدیده وضعیله فیما بعد دستور العمل طوتمسی مراد هایون اولدیغنی و شمیدین شروع اولنق لازمه دن ایدوکی و بو باده حد و وظیفه آرانه حق و کسنه تخطئه اولنه حق اولیوب هر کس دین و دولته نافع عد ایلدیکی مطالعاتی قلمه آلوب بعده ماده لر اجمال و اختصار اوزره بالتحریر هر قغیسی پسندیده بیوریلور ایسه جمیع متفرعاتی و لازم اولان شروط و قیودی علی وجه التفصیل تکرار قلمه آلمق لازم کله جکی تنبیهاتی مندرج ایدی . بناء علی ذلک و کلا و کبرا دها اولوقت تجدید معالم سلطنت و تأیید منازم ملک و ملت باینده اعمال عوامل افکار و اشغال مشاعل آرای اصابت شعار ایدرک هر بری بر لایحه تقدیم و یوسف پاشا دخی بر قطعه لایحه تنظیم ایتمش ایدی .

متعاقباً یوسف پاشا عزل اولمغله بو لایحه لر ملک پاشانک ایام صدارتنده خلاصه و تدقیق اولمشدر . مقصد اصلی عسا کر معلمه تربیتی ایدی . حالبوکه دولت علیه سنک موظف عسکری اولان او جاقلر خلقی انقیاد و اطاعتده اولمدقلری جهته قابل تعلیم اولمدقلرندن بشقه علوفه لرینک اکثری عسکر لکه یاراماز اشخاص النده بولدیغنه مبنی ایچلرندن مقدار کفایه عسا کر معلمه تدارکی ناقابل و جمله سنک علوفه لری بردن رفعله اربابنه توجیه اولنه حق اولسه کر چه مرام حصوله کلورسه ده کیمنک اسامه سی پدرندن قالمش و کیمی ایراد اولمق اوزره آنچه سیله صاتون آلمش اولمدقلری حالده بو قدر خالقک بردن مایوسیتی ناروا و بلکه قطع ارزاق دیمک اولمسیله محاذیر عدیده به وسیله اوله جنی هویدا اولدیغندن بو صورتک اجرایی دخی مشکل اولدیغنه و او جاقلرک کاملاً ابقاسیله یکیدن عسا کر معلمه تربینه دخی خزیننه دولت متحمل

اولدینی جهته بوشقک اجراسی یکیدن برچوق واردات تدارکنه موقوف بولدیغنه مبنی بوبابده ذهنلرمتحیر قالمش ایدی .

قالدیکه اولوقت اوروپاده شیوعبولان فنون حربیه کتابلری هنوز لسان ترکیه ترجمه اولنماش اولدیغندن تعلیم وتنظیم عسکر مسئله سنک استانبولجه نظریاتی بيله معلوم دکل ایدی .

برمنوال سابق باراده سنیه نظام دولته دائر لایحه تقدیم ایدن ذواتک دخی بمضیمی محاربه ده بولنماش وبولنانلر دخی عساگر معلمه نک یالکر قارشودن حرکاتی مشاهده ایدرک نصل ترتیب ونه وجهله تعلیم اولنور وضابطه ونظاملری ندر بورالره دائر اصلا تحصیل وقوف اتمامش ایدیلر .

انسان ایسه بیلمدیکی شیئی دائماً بیلدیکی شیلره قیاس ایله تصور ایده کلدیکنه مبنی کیمیمی موجود اوجاقلرک ممکن مرتبه اصلاحنه حصر افکار و کیمیمی نظام جدید ديه ینه اسکی بیلدیکی صنوف عسکریه جنسندن برنوع عسکر ترتیبی اخطار ایلدیکی جهته مذکور لایحه لرده بوجحه دائر بسط اولنان مطالعاتک کیمیمی اصابت صوابدن محروم ومهجور و کیمیمی صدد ومقصددن دور اوله رق آرا وافکار اولقدر تشمت واختلاف ایتمشیدی که بوقدر آرای متخالفه نک جهت وحدتی بولمق اصل قضیه مطلوبه نک اجراسندن دهامشکل اولمش ایدی .

بعض مورخینک افادسنه نظر آ سلطان سایمک وکلای دولت وقرنای سلطنتلرین لایحه تقدیمه مأذون بیورملری هم لایحه لرنده دین ودولته نافع تدابیر وقوعنده اجراسنه اقدام وهمده بووسيله ایله جمله سنک ماهیتی سنجیده ترازوی تجربه ایدوبده ایلروده هر برینی لیاقت ودرایتلرینه کوره استخدام بیورمق مقصدینه مبنی اولوب (وشاورهم فی الامر) وقفنجه بووجهله تقدیم لایحه اراده سی دخی امر مستحسن ایسه ده حریم سلطنت سنیه به تقرب ایدنلر بوماده بی ترویج بازار مفسدتلرینه ذریعه قویه اتحاد ایله کیدرک تقدیم اولنان لایهلری ملعبه صبیانه دوندیروب هرکسک درجه استعدادی لایحه سندن معلوم ورتبه ادراکی زاده طبعندن مجزوم اولورایمیش شایعه سنی افواه ناسه القا ومخالف مزاج هایون اوله رق ظهور ایدن بعض تدابیر ومطالعات حقنده سلطان سایی مجبور قهقهه استهزا ایلنلرندن ناشی اتابکان سلطنت سنیه دن اولان ابنای زمان واصحاب فکر واذعان قضیه به لدی الاطلاع آنلر دخی مداهنه وریشخند وادیسنده مطیه ران وکروه مقر بینک موافق مشربلری اولان چیقماز یوللره پویان اولملریله نظام جدید بحثده لایحه تقدیمندن مقصد اصلی اتحاد اولنان اتحاد آرا قضیه سی عکسنه منقلب وبعده زیرده بیان ایده جکمز وجهله ترتیب اولنان نظام جدید عسکریه

یکچریلر بیننده مبانیت و منافسه و قوعنی موجب اولمشدر و بلکه تسلسل و قوعاته
امعان نظر اولدنی حالدہ بومقدمات پک چوق کیمسه لک سلطان سلیمدن روگردان
اولسنی انتاج ایدرک پک چوق سنه لرسکره رونمای دهشت اولان وقعه سلیمیه نیک
اسبانندن برازی دخی بونلردر دینله بیلور .

بومقوله مواد جسمیه نیک کرکی کبی فعله چیقمه سی سلطان محمود ثانی حضر تیری
کبی بر پادشاه قاهرک همت قویه و عزیمت غالبه سنه منوط اولوب فقط اجراسی
مصمم اولان ماده یه دائر و قوفی اولنلر ایله مشاوره ایلمک لازم کلور یوخسه بوقدر
خالقندن کندولرینه کوره صرف مجهول اولان مواد حقنده لایحه ایستمک بیهوده
ایدی و چونکه ایستلمش بالضروره بیکنه اولدقلری خصوصده او یله مشوش
ومغشوش رایلیریان ایستکلر یچون بحق معذور ایکن آنلری تحقیر واستهزا ایلمک
ذاتاً لایق اولدیغندن بشقه عواقب وخیمه یی انتاج ایده بیله چکنی ملاحظه ایتمک
کرک ایدی و اگر لایحه ایستمکدن مرام مجرد یاییله حق نظاماتده جمله سنک رأی
منضم اولوق داعیه سی ایسه بر مجلس عمومیده نظام جدیدک لزوم اجراسنی آنلره
تصدیق ایتمک کافی ایدی .

* اصحاب لوایح *

لایحه تنظیم و تقدیم ایدن ذاتلر اول عصرک مشهور آدملری اولوب اسم و شهر تیری
بروجه آتی بیان اولنور .

قوجه یوسف پاشا . شهرتی تفصیلدن مغنیدر . ایکنجی دفعه صدارتنده لایحه سی
تنظیم ایدوب هنوز لایحه لر خلاصه اولمندن کندوسی عزل اولمشدر .

روم ایلی صدارتی پایهلور لردن تاتارجق عبدالله افندی اول عصرک افخم علمه و فضلا سندن
اولوب مجلس مکالمه یه مامور ایدی . لایحه سی بین الانام متداول و مشهوردر .
ومنشیانه قلمه آلمش بر کوزل اثردر .

ینه صدور عظامدن مشهور ولی افندی زاده امین افندی که سلطان سلیمه غایت مخلص
متخصص ایدی اول عصرک الک زکیئلردن ایدی . اول عصره یتشمش اولنلردن
ایشیدلدیکنه کوره طریق علمیه حاصلاتندن فضله عقارات و سائره دن سنوی واردات
ذاتیه سی یکر می بش بیگ یالدر آلتوننه بالغ اولور ایش . دائماً خوش صحبت و مجلس
آرام صاحب ایله اکنور ایش . طالقو قلیله واقع اولان غرائب احوالی حالا السنه
انامده مثل سائر کبی دائر و شایعدر .

وینه صدر عظامدن صالح زاده افندی و عاشر افندی و موالیء فیخامدن خیرالله افندی
دخی اول عصرک مشاهیر کبارندن ایدیلر .

دفتردار شریف افندی که مؤخرآ وزیر اولان مشهور شریف پاشادر مفصل و مشروح بر لایحه قلمه آلمشدر که تانارجق عبدالله افندیکنک لایحه سی کی بونک دخی اصلی منظور و مطالعه کدار فقیر اولمشدر .

چاوشباشی راشد افندی که مقدما اردوی هایونده رئیس الکتاب ایکن رکاب هایون ریاستیه در سعادتہ جلب اولنهرق نزد پادشاهیده بک زیاده مقبل و مقبول اولمشیدی . اردوی هایونک در سعادتہ عودتده بالا صاله مناصب دیوانیه به متصرف اولنر مقام لرینه اوتورمق لازم کیلکه رکاب هایونده بولنان و کیلیری بالطبع منفصل اولمق لازم کلوب الحق رئیس و کیلی بولنان مومی الیه راشد افندی کمال عقل و درایت ایله بنام و اصول قلمیه و مصالح خارجه ده مهارتی مسلم انام اولهرق رکاب هایون ریاستی او اننده رضای هایونه توفیق حرکت ایلمش اولدیغندن بوشده قلمسی تجویز اولنمدیغنه مبنی چاوش باشی کنج عثمان اغا عزل اولنوب مومی الیه راشد افندی چاوشباشی یلقه باب عالیده قالهرق رئیس الکتاب عبدالله بری افندی به رقیب اولدی .

عبدالله بری افندی اصحاب درایت و رویتدن و صحیحاً علما و فضالادن بر ذات تمدوح الصفات اولدیغنی حالدہ زشتوی و یاش مکمله لرنده مرخص اول اولوب خدمتی مقبول اولمشیدی . لکن بوجه بالا راشد افندی اکا رقیب اوله رق قطع شطرنج اقبالده اکا غلبه ایتمکله اشبویدی سنه سی محرمنک اون طقوزنجی کونی بری افندی عزل ایله راشد افندی رئیس الکتاب اولمشدر .

حقق بک که مؤخرآ وزیر اولان مشهور حقق پاشادر . اجلهء رجال دولت علیه دن بر ذات جلیل الصفات ایدی .

ترسانه امینی عثمان افندی که مورده لی عثمان افندی دیومعروفدر . اجلهء رجال دولتدن عالم و فاضل بر ذات نادر الامائل ایدی مکرراً دفتردار اولوب امور مالیسه ده ابراز لیاقت و مهارت ایلمشدر .

کتخدای صدر عالی چلبی مصطفی رشید افندی که کوسه کهیا دینمکله معروفدر . اجلهء رجالدن ایشنی بیلور ایش اری بر آدم ایدی .

محاسبه اول الحاج ابراهیم افندی که کیزلی ستمه دیومعروف ایدی . منصبی کوچوک اعتباری بیوک ایدی .

محرمنک یکریمی التنجی کونی کوسه کهیایی کیزلی ستمه طوتدی یعنی کتخدالقدن عزل ایله اشبو کیزلی ستمه ابراهیم افندی باش محاسبه دن صدارت عظمی کتخدالغنه صعود ایتدی .

رکاب هایون کتخدالغندن منفصل راسخ مصطفی افندی زیزده بیان اولنه جنی وجهه بیوک ایلیچیلک ایله روسیه دیارینه کیدوب گمشدر .

مورخ مشهور انوری افندی و قدمای رجالدن لاله لی مصطفی افندی و علی رائق افندی و مایینچی مصطفی عفت بك و بلككجی صنعی افندی و تذکره اول فردوسی افندی هپ اول عصرک مشاهیر رجالدن ایدیلر .

مشار و موسی الیهدن هر بری برر لایحه تقدیم ایتمشیدی اکثرینک عیناً صورتلرینه دسترس اوله مدق ایسه ده خلاصه مواد مندرجه لری زیرده تحریر اولته جق خلاصه ده مندجدر .

* لایحه لرك خلاصه لری و بعض ملاحظات *

سالف الذکر لایحه لر سلطان سایم خان حضر تلرینه لدی العرض یکان یکان مطالعه کذار شهریار یلری اوله رق دستور العمل واصل معول اولمق اوزره ینه اتفاق آرا ایه لوایح مرقومه نك جمله سندن بر نسخه تلخیص اولنمسی اراده بیور ملریله بولایحه لردن ابتدا تنظیم عسکره و ثانیاً یومیه ماده سنه یعنی عسا كرك علوفه سنه وبعده طوبجی وخبیره جی و سائر اوجاقلرك اصلاحاتنه دائر اولان فقره لر خلاصه و جهله درج اوله رق اشبو یدی سنه سی اوائلنده بر رساله ترتیب اولمشدر . اوزمان رجال و کبار دولتك بو خصوص لرده درجه و قوف و معلوماتی بیلمنك ایچون مذکور خلاصه رساله سنده مندرج اولان آرا و تدابیر بو مقامده خلاصه و جهله ایراد اولنمق مناسب کور لمشدر .

* تنظیم عسکر ماده سی *

صدر سابق یوسف پاشانك ترتیب و تنظیم عسکر حقیقده لایحه خاطر ی اوجاقلونك قوانین قدیمه سی آرایوب و مناسب محالره بشقه بشقه طوبخانه وخبیره خانه لر ایجاد واحداث اولنوب اناطولی و روم ایلی جانلردن اوائلده اولدیغی کبی کنج اوشاقلردن اول امرده بو اوجاقلرك سمتنه اوغراماش اون اون ایکی بیک نفرات جدیده تدارك برله آز وقت ظرفنده فن طوب وخبیره تعلیم و تحصیل و سائر اوجاقلره دخی نفرات جدیده تدارکله هر محله علی الدوام فنون حربیه تعلیم ایتدیریله رك حین اقتضاده سفره لزومی اولان عسکرک ثلثی مقداری بو و جهله معلم و رابطه لو بولنمسی و بوندن بشقه طشره لرك خانه و نفوس ذکوری تعداد ایه بر خانه ده ایکی ویا اوچ نفر اولنلرك برر نفری اسم و شهرتیه و الیلر معیتلرنده تفنکجی نامیله عسکر اولمق اوزره قید و تحریر و کافه سی جمیع تکالیفدن معاف و مسلم اولمق شرطیه اون نفره بر اونا باشی و اون نفر اونا باشی به بر یوزباشی و بوسایق اوزره اوچ یوزباشی و بشیوز و بیکیباشیلر ترتیب و تخصیص و هفتده ایکی کون تعلیم و اوچ آیده بر کره

بالتفتیش ایچلرندن وفات ایتیش واریسه یرینه آخری قید اولنهرق والیلرک یاخود
 کتخدالرینک برمحله مأموریتلری اقتضا ایتدکده بیکباشیلرینه خبر وارد اولدینی
 کبی در حال حاضر و آماده اوله بیله جک بر قابله افراغ و اوچ آیده بر کره تبدیل
 اولمق شرطیله هرایکیوز نفری دائرة وززاده مقام خدمتده بولنوب مدت مرقومه
 ختامنده آنلر محللرینه عودت برله دیگر اکیوز نفری کلوب و رودلری کونندن
 اعتباراً مذکور اکیوز نفرک کل یوم تعییناتی و ماه بماء علوفه لری اعطا اولنسی
 و طشره لرده یکچیریلک ادعاسنده اولنلرک بو ادعان نکول ایله حوزة رعیته
 دخوللری ایچون یکچیریلک ادعاسنده اولنلر علی العموم آستانه یه کلوب قشله لرنده
 اقامت ایلملری امر اولنلرکده او مقوله لرک اکثری چفت و چبوغنی ترک
 ایتیه جکلری درکار ووزرا معیتده اولمقندن فرار ورعیتی دخی عدم اختیار ایله
 قشله لرنده ساکن اولمق اوزره آستانه یه ورود ایدری اولور ایسه ده جزئیات
 مقوله سی کله جکی امر آشکار اولدیغندن کرک بو وجهله طشره لردن کلنلر و کرک
 آستانه ده مقیم یکچیریلر بیهوده آرام ایله اضاعة ایام ایتیموب ترتیب قدیم اولان عجمی
 غلامانی او حاجی کبی بر ترتیب مستحسنه ربط ایله آنلر دخی هفته ده ایکی کون کاغد
 خانه وباروتخانه جوارلرنده تعلیم اولنلری و دلیل طائفه سنک سفرلرده یارارلقلری
 مشاهده اولنلریندن بشقه حین اقتضاده برمحله تعیین اولنسه لر بخشش آلمینجه
 کیتمز آغازه سیله تکلیف مالایطاق ایدرک وزرای تضییق بو مقوله بهانه لر ایله
 بر وزیرک دائرة سنندن ایرلدقلرنده قریه لرده کشت و کذار و ابنای سیله ایصال
 خسار ایده کلدکلرندن لوند او جاغنک مرفوعیتی کبی بونلر دخی رفع اولنهرق
 فیما بعد دائرة وززاده حرب و ضربه قادر اندرون اغالری و سواری و پیاده
 اولمق اوزره بالاده مسطور تفنکجی نفراتندن بشقه آخر جنس عسکر استخدام
 اولنماسی خصوصلریدر .

عساکر معامله پیدا ایتک بختده برنجی مسئله نفرات لازمه نک تدارکی خصوصی
 اولوب بو بایده یوسف پاشانک خلاصه تدبیری برمنوال مشروح اوائلده اولدینی
 کبی روم ایلی وانا طولی جانبلرندن کنج اوشاقلر دوشیرلمسی صورتیدر انجق
 فی الاصل عجمی اوغلانلرینک بر مقدار ی اسرا چوجقلری اولوب برازی دخی
 اهل ذمت رعایا اولادی اولهرق بر نوع ویرکوکبی طوبلانوردی . وتبعه دن
 برینک کوچوک چوجوغنی جبراً بوینندن آیرویده بر دخی ابوینی کوره میه جک
 بر سلکه ادخال ایلمک اگر چه قاعده عدل و حکمته موافق کورنمز ایسه ده یکی
 فتح اولنمش ممالکک ایچندن حکومتک قوت آلمسی اعصار سابقه نک ایجاب احوالنه

کوره لازمه افکار ملحداری اولدیقتن ناچار بواصوله تشبث اولنمشیدی . مؤخرآ
بواصول ترك اولندی آنک اوزرینه یوز الی سنه کچدکن صکره یکیدن احیاسی
ایجاب وقت وحاله موافق دکل ایدی . دولت النده اولان اسرادن بشقه ایادی
ناسده اولان اسیرلرک دخی بلا بدل رد اولملری ایچون بالاده بیان اولندیغی
اوزره زشتویده متوسط مرخصلرک نه درجه لرده اظهار شدت ایلدکلرینه ومبحث
مدنیتده اوروپانک معلوم اولان مسلك ومشوارینه نظراً اسرادن عسکر تدارکی
قپوسی دخی قپانمشیدی . بو حاله کوره بیك اکیوز تارینخندن صکره اوائلده
اولدیغی کبی خرستیان چوجقلرندن بو وجهله عسکر تدارکی وقت وحالجه بمکن
دکل ایدی . واکر اهل اسلام چوجقلرندن دوشیرمه تدارکی مراد ایسه بونلر
نه وجهله دوشیرملک لازم کلور اصل مسئله بوراسیدر .

ایالاتده برمنوال مشروح تفنکیجی ترتیبه کلنجه بونلر برنوع بلدی عسکر دیمک
اولهرق ممالکک محافظه سنه وائتای سفرده اصل اردویه برقوه معاونه اولمق
اوزره استخدماه الویروب اما لدی الاقتضا بریره کلوبده برصحیح وحقیق
اردو تشکیل ایله اوروپانک منتظم اردولرینه قارشو باشلو باشلرینه برایش
کورملری مأمول اولنه ماز . چونکه اردو حرکات وسکنانده یک آهنگ برچوق
انسانک بریره بریکوب جسم واحد صورته کیرمسندن عبارت اولمسيله اجراسی
اویله متناسب ومتمیز ویکدیگره اولوجهله مرتبط اولمیدرکه سرعسکر بولنان ذات
بوجسمک هرعضوی ایستدیکی آنده ایستدیکی کبی قوللانوبده مراد ایلدیکی
مانورهی اجرایه قادر اوله . حالبوکه بروجه مشروح والیر معتلرنده اویله مستئنا
تعلیم وتربیه اولنان طابورلر بالطبع برر اصول ومسلك دیگر اتخاذا ایش
اوله جقلرندن جسم واحد منزله سنده براردو تشکیل ایده بیلیمک امر بعیددر اولسه
اولسه مهارتلو تفنکیجی اولورلر .

برمنوال سابق یکچریلک ادعاسنده اولنلر استانبوله کلوبده قشله لرنده ساکن
اولسون دینلیدیکی تقدیرده کلنلر جزئیات مقوله سی اوله جنی درکار وطشره
احوالنک اصلاحی ایچون بومقوله لرك حوزه رعیته ادخالری لازمه حالدن ایدوکی
بیداردر . انحق جای ملاحظه بوراسیدرکه اولوجهله امر اولندیغی تقدیرده
کلینلر ایش کوچ صاحبی اولان اهل عرض طاقی اولهرق مجرد یکچریلک
افکارندن کچمیوبده کله جک اولنلر دخی هپ اله اووجه صیغمز ونظام قبول ایتز
فسده کروهی دیمک اولوب اولوقت ایسه مصلحت استانبوله بومقوله مائل فساد
وشرشوره معتاد اولملری تقلیل ایله بروفق دلخواه عساکر منتظمه تدارکنه اقتدار
حاصل ایلیمکن عبارت ایدی .

دليل طائفه سنك فقرايه مظالم دن غيری برایشه یارامدقلری بیانیله لوند مثللو کلیاً
 الغالی مقدمه مظفریت و توفیق اوله جفی حتی بکک لایحه سنده دخی مسطوردر .
 دليل طائفه سی باشلرینه اوزون قالدیقلر کیوب وزرا دائره لرنده استخدام اولنور
 برجنس سواری اولوب ایکیوز قرق اوچ سنه سی سفرینه قدر باقی ایدیلر بونلر
 اگرچه اوروپا اصولی اوزره معلم دکل ایدیلر انجق مرور زمان ایله براوجاق
 شکله کیره رک تجر به وادمان ایله قونوب کوچه ده وحرکات حربیه ده بینلرنده
 برنوع مشق وملکه وایچلرنده کندولرینه مخصوص بر اصول ضابطه پیدا اولمش
 ایدوکندن اوجاق غیرتنده و سرکرده لرینه اطاعت صدنده اولوب بتون بتون
 باشی بوزوق عسکر دخی دکلر ایدی . فقط اولوقتلر بزم سرعسکر لریمز سواری
 قوللانیله جق موقعلری لایقیله بیامدکلرندن دشمنک آلات ناریه ایله ملو اولان
 طابورلری اوزرینه بموقوله سواری بی سوق ایدلر وآنلر دخی کیدرلر ایدی .
 حالبوکه بویه آتش فشان طابورلر اوزرینه ضعیف سواری سوق ایتمک بخت ایثی
 بر حرکت اولوب شاذ و نادر اوله رق مظفر اولدینی وارایسه ده اکثریا طوب و تفنگ
 آتشنه طیانه میوب عودته مجبور اولوق امر طبعیدر . ایشته دلیل طائفه سنک جنکده
 ایشه یارامیور دیدکلری بودر . یوخسه بونلر سواری عسکرک قوللانیله جفی
 مواقعده وظیفه لرینی بک کوزل ایفا ایدر غایت قوللانیشلی بر طائفه اولدقلری
 اسفار اخیرده آنلرک محارباتی مشاهده ایدوب دقایق فنون حربیه ده دخی تمامیه
 وقوفی اولان بعض ذوات کرآمدن مسموع فقیر اولمشدر . فقط طائفه مرقومه نک
 علوفه لری و تیمار مثللو برکونه دیرلکلری ووزا دائره لرنده برلقمه امک بوله رق
 کچنمکدن غیری مدار تعیشلری اولدیغندن فی الواقع فقرايه ظلم و تعدیلری بک
 زیاده ایدی . بو حالده اگر سالف الذکر تفنگچی عساکرینه خرج اولنه جق اولان
 مبالغت برمقداری بونلره تخصیص ایله قید ضرورتدن تخلیص اولمش اولسیدیلر
 ده خیرلو اولوردی . زیرا اولوقت هنوز دولت علیه ده فنون حربیه مکتبی
 آچمامش وملت اسلامیه ایچنده فن حربیه دائر اوروپاده منتشر اولان معلومات
 جدیده یالمامش اولدیغندن دلیل طائفه سندن ده منتظم بر سواری هیئت تشکیل
 اولمشی خیلی وقت و نقده موقوف ایدی قالدیکه عثمانلو سواریمی اول و آخر
 جنک کرده ایشه یارایوب انجق اوائلده اصل قوت سواری عسکرندن عبارت ایکن
 اصول حرب بتون بتون بشقه حاله کیره رک پیاده اردونک اصل بدنی و صنوف
 سائر اعضای سائرهمی مثابه سنده بولندیغندن و دولت علیه اردولرینک قصوری
 طویحی و پیاده جه اولدیغندن اول امرده بونلرک اصلاحته سی ایله سواری ترتیبی

ایکینجی درجه یه برا غلمق لازم کلوردی . ودایل او جاغنی احوالیه یکیدن برنوع سواری اختراعنه چالشمقدن ایسه بونلری تعلیم وانتظام تحتیه قومق دها قولای ایدی . بونلر یکیکچری او جاغنی کبی دولتی استیلا ایدرجه سنه بر عصیت کسب ایلمش بر هیئت اولمدیفندن جزئی همت دولت ایله ضابطه آلتیه آلنملری قابل ایدی . سابقا صدر روم ایلی تاتار جق عبدالله ملا افندینک رأی ومطالعہ سی ابتدا عفو وتزیل جائزه ایله بر عاقل ومدبر وکار آزموده یکیکچری اغاسی وقول کتخداسی وبش اون قدر دخی معتبر اوجاق اغاری انتخاب وتدارک اولنهرق آنلرک واسطه سیله دولت علیه بعد الیوم یکیکچری او جاغنه سلطان سلیمان زماننده اولدینی کبی اعتبار وقانون قدیمه رعایت بیوروب یکیکچری زمره سنی سائر زمره لردن ممتاز بیوره جقدر دیو یکیکچریلری جلبه ابتدار واصولله سلطان سلیمان قانونیدر دیه رک کندولرینی ترتیب وتعلیم خصوصه طالب وآتش فشاللق فنی تحصیل واجرایه راغب ایتدکدن صکره دول نصارانک فنون حربیه یه دائر مؤلفات جدیده لری بالترجمه ترتیب وتعلیم وآتشباللق کیفیاتی بر خوشجه طوائف عسکریه یه افاده وتفہیم ایله طائفه بکتاشیہ دن شمیلیک بھر او طه دن قرقر الیشر ودها زیاده جه شاب وتوانا غیر متاهل قول اوغلی قول اولمق اوزره اورطه لرینک اختیار وضابطلری تکفل ایلمک شرطیه نفرات مخصوصه تحریر وترتیب اولنوب ترغیباً وتشویقاً تعینات یومیه لری ایفا وماه بماه علوفه لری اعطا وسرکرده لرینه زیاده التفات نمایشی اجرا ایله شوق وخواہش لری متزاید قلمسی وبو وجہاھ ترتیب وتدارک اولنان نفرات موجوده اسم ورسم وقیافتلریه دفتر مخصوصه قید اولندقدن صکره هر صنفه مترجم فن جدید محاربه اوزره تفنک اندازلق وجہاھ دن اهم وبلکہ تدارک واعمال درجه وجوبده اولان سرعت طوپلریه آتشباللق وهر اورطه یه نفراتنه کوره ایکی اوچ سرعت طوپلری تخصیص اولنوب نفرات جدیده دن هر برطوبه اون نفری سرعتی نامیله تعیین وطوپحیلقده مهارت کسب ایلملرینه اقدام اولنمی وبوتعلیمات وترتیبات ایچون بعض مهتدی افرنج طائفه لری ویاخود مقدمه سلطان مصطفی خان حضر تلری زماننده فرانسہ ضابطانندن طوت نام افرنج سرعت طوپلرینی اصاغه وتعلیم ایلدیکی کبی انگلیز وفرانسز وسائر دول نصارانن اطماع ایله جایی ممکن اولان صنایع حربیه معلملری تدارک اولنهرق فرقه فرقه انواع آتشبازی تعلیم وترتیب کلی اہتمام والحاصل ابتدا اوجاقولوی خواہشکر ایدرک قشله لردہ ومحال سائرده ده بوکونه تعلیم وترتیب خصوصه اقدام قلمسی وقفط جمیع نفراتک آستانه ده اجتماعی نامناسب فہم اولنمغہ علی العجلہ

بر ایکی سنه ظرفنده تعلم و تفنن ایدن نفرات سر کرده لریله برر معمور قضایه ارسال
 و اول قضاده یولداشلق ادعا سننده اولوب نفر اولمغه شایسته اولان شبانه سر کرده
 نفرات باشبوغ و معلم اوله رق فنون تفنن اندازی و طوپ و خنجره ایله صنعت آتشیازی
 تعلیمنه مباشرت ایدوب معافیت ایله دخی ترغیب و تعلیم لرینه دقت ایدلمسی و بو عساکر
 مرتبه نك مصارفی زوائد اوقاف و سائر اتلافاتدن ترتیب و بر مقدار تعیینات دخی
 قضا لردن تخصیص بیور یله رق بش التی نهایت یدی سکر سنه ظرفنده الی بیکدن
 متجاوز عساکر معلمه تدارك بیورلمسی و اشبو تعلیم و تعلم مصاحتی یکینجری او جانغه
 مخصوص اولیوب جبه جی و طوپنجی و عربیه جی و سائر او جاقلره دخی تعلیم
 ایتدیر یله رك از جمله ترسانه ده دخی معلم و ذو فنون بحری طوپنجیلر و قالونجیلر
 و نفرات سائر یتشدیرلمسی خصوصاً یتدیر .

تدابیر مذکور ه نك خلاصه سی لطائف الحیل حکیمانه ایله او جاقلرك اصلاحی دیمك
 اوله رق نظریاتی قاعده حکمته موافق کورینور ایسه ده فعله چیقمسی غایت مشکل
 و بلکه ناقابل مواددن ظن اولنور زیرا یکینچر اغاسندن تا کوچك ضابطانه قدر
 هپ دولت و ملت نه دیمك اولدیغنی بیلوب دولت او غورنده هر شیئی فدا ایدر
 و روز و شب عسکرك بر حسن حاله کیرمسی دوشنور آدملر اولدقلرندن بشقه سائر
 امانا و مستوفیان اموال دخی بوصفاتی جامع اولدقلری حالده بو حال و هیئتک نیجه
 سنه لرتمد و دائم اولسنه منوط اولوب حالبوکه خلفای راشدیندن صکره بویله
 بر هیئت مأمورینک تشکل ایتدیکی معلوم دکدر قالدیکه اوروپاده اصول فن حرب
 تجدد ایتدیجه دولت علیه دخی وقت بوقت آز چوق اصول عسکریه سنی تبدیل
 و تجدید ایدرك او جاقلو بو مقوله تجدداته آشدیرلمش اولیدیلر بو کره دخی ملاتزم
 اولان اصوله ادخاللری قابل اولور ایدی لکن بونجه سنه لردنبرو حاللری اوزره
 قاله رق بالتدریج تأسس و تقرر ایتش اولان نظامسزلق علت مزمنه حکمنه کیروب
 علاج ایله تصحیح و اصلاح اولنه بیله جک درجه لری کچمش اولدیغندن بونلرك کلیاً
 رفلرندن غیری چاره مفقود ایدوکنه خلیل حمید پاشانک بویولده بلایه او غرامسی
 و بوندن آز مدتصکره محلنده بیان ایده جکمز و جهله یکینچر یلر امر تعلیمه ارضا
 واقعا اوله رق اجرا سنه مباشرت ایتشلر ایکن مدت قلیله ظرفنده بو امر مهمدن
 فراغت برله اظهار روی سرکشی ایتلری و نتیجه سلطان محمود خان ثانی حضر تارینک
 عصر نده دخی اشکنجی نامیله ایچلرندن براز نفرات تفریقندن طولای بویله حرکت
 باغیانه اظهار ایتدکلرندن نهایت کلیاً رفع و الغا اولدقلری کبی وقوعات و مشهودات
 دخی دلالت ایلر .

عبدالله افندی ارباب زعامت و تیمارک ترتیب و تنظیمی حقیقده دخی مرحوم و مغفورله
 سلطان عبدالحمید خان حضر تفرینک زمانلرنده مؤخر و یریلان نظام ارباب وقوف
 عندنده مستحسن اولوب لکن شروطنه رعایت اولمیه رق محتل اولمغله بعد المذاکره
 و المشاوره اولوجهله نظام و یرلمکی لازم کلور یاخود غیر کی کونه ترتیب و نظامی
 اقتضایدر همان اجراسنه مباشرت اولنمنی اخطار اتمشیدی . لکن جلد خامسده
 بیان اولندیفی اوزره بکن سنه اوآخرنده نظام مذکور تأیید و تجدید اولنه رق
 برقانوننامه قامه آتمش ایدو کندن تیمار و زعامت بحی خلاصه رساله سنه درج اولنمامشدر .
 چاوشبانی راشد افندیک نفرات تدارکی حقیقده رأیی یوسف پاشانک رأیی کبی
 اوله رق شو یله که : فیما بعد اناطولی و روم ایلی جانبلرندن کنج اوشاقلر
 دوشیر یلوب آستانه یه جلب ایله کوفه جیلک و مناولق و سائر اصناف اعدادینه دخول و آخر
 کاره اشتغال اتملری منع اولنلق تدبیری عریض اتمشدر لکن بونلرک نه وجهله
 جلب و جمع اولنه جقلرینی ایضاح اتمیوب حالبوکه اصل جای بحث و مطالعه بوراسیدر
 و بوعساکرک تنظیمی خصوصنده دیرکه لاجل الامتیاز هیئت و لباسلری نسق واحد
 اوزرینه ترتیب و اوزرلرینه ضابطان و معلملر تعیین و ما کولات و ملبوساتلری
 جانب میریدن اعطایله علی اندوام صنایع حربیه تعلیم ایتدیر یلوب بونلر اگرچه
 بشقه نوع اختراع عسکر ایسه لرده یکچیری اولمیه رق ترتیب اولنسه میانیه اختلاف
 کیروب فساده مؤدی اولنق محذوریته بناءً بونلر دخی یکچیری یه ملحق اولسه
 باس یوق ظن اولنور انجق دقت اولنمایدرکه سرعتجیلرک طویچی اوجاغنه الحاق
 اولندقلری کبی کندولرینک محویتلرینی موجب اولمیه ایشته بونلر بووجهله
 بر طرفدن جلب و بر طرفدن تعلیم اولنه رق رفته رفته یکریمی اوتوز بیکه ابلاغ
 اولنمایدر . ایشته بونلر مقدار مذکوره ابلاغ اولندقلری حالد سفر هایون وقوعنده
 تحت ضابطه ده بولنمش اولوب برابر استصحاب اولندقلری صورتده سائر طشره دن
 کتوریلان نفرات بونلره علاوه اولندقدده آنلر دخی بونلرک ضابطه و نظاملرینی
 کوره رک مخالفت ایده میوب جمله سنک جنکده ثباتلرینی موجب اولور .
 ایشته راشد افندیک تنظیم عسکر امرنده تدبیری بوندن عبارتدر . وعساکر
 جدیدنک یکچیریلردن آرو اوله رق ترتیبلری تقدیرنده ملاحظه ایتدیکی محذور
 فی الواقع وارددر . یکچیریلره الحاق اولندقلری تقدیرده دخی اصلده اولان
 فسادک فرعه سرائی محذوری اولوب قریب العهد بونلرک دخی سرعتجیلر کبی
 مضمحل اولملری امور طبیعیه دن اولمغله بونلرک علاجی تدبیر اولنلق لازم کلوردی
 یوقسه بونلرک یکچیریلره الحاق سرعتجیلرک طویچیلره الحاق کبی اولسون دیمک
 جواب شافی و تدبیر کافی دکلدیر .

برده اولوقت اول امرده دولت عالیہ یکر می اوتوز بیک منتظم معلم عسکر تدارکی فریضه دن ایدوکنه شبهه یوقدر . لکن بونک فائده سی سائر طوائف عسکر یہ دخی بوقوت ایله ضابطه تحتہ آله رق دولت علیہ هر طرفه او امرینی انفاذ ایله احوال ملکیہ سنی اصلاح وعسا کر منتظمه سنی مقدار کفایہ یه ابلاغ ایدہ بیلیمک مقصدینہ بر مقدمه اولمق خصوصیدر . یوقسه یالکیز بومقدار معلم عسکر برایشه یرامد قلمری مجرب اولان سائر طوائف عسکر یه نک علاوه سیله اوروپا اصولی اوزره معلم ومنتظم اولان اردولره مقابله قابل دکل ایدی .

چونکہ اردو دینلان هیئت برچوق آدمک جسم واحد حکمنه کیروب یکدل ویک آنهک اوله رق حرکتدن عبارت اولدیغنه وبرجسم هر تقدیر تام وکامل الاعضا وصحیح وسلم اولور ایسه آندن صادر اولان اعمال وافعال اولقدر تام وکامل اولمق امر طبعی ایدوکنه بناءً بر اردو کالج وتمامیتجه تقدیر اعلی اولور ایسه آندن ظهور ایدن آثار وحرکات دخی اولقدر اعلی واقوی اولور بر اردونک کجالی دخی شروط سبعیه متوققدر .

شرط اول عسکر کنج ودنخ وصالم وصال اولقدر . زیرا مریض وعلیل الجسم اولان کیمسه لر متاعب سفر یه تاب اور اوله میوب وقتلری خسته خانه لرده گذار ایدرک حین حاجتده ایسه یازامنلر عسا کرک بوشرطه موافق اوله رق دوشیرملری وبعده صحت وعافیتلرینک حسن محافظه لری فنون طبیه وجراحیه نک رواج وانتشارینه متوققدر .

شرط ثانی کرک نفرات وکرک ضابطان تعلیمات حربیه وخدمات عسکر یه ده ماهر اولمقدر .

شرط ثالث اردو ارکانی اولان ذوات کرام کافه معلومات عسکر یه وفنون حربیه واقف اولمقدر .

شرط رابع اردو سر عسکر ی عظیم و مستقیم و عتف و لطفده غرض وعوضدن عاری و افراط وتفريطدن بری وسریع الحرکه و کثیر الجولان وتیز فهم وسدید النظر وتدارکلو ودور اندیش ومتین القلب وشجیع ودقایق حربیه نی عارف وعسکرک شوق وغیرتی تهییج ایدہ جک سوزلر بیلور والحاصل جامع جمیع فضائل برذات کامل بولمقدر . وشمعی بوشرطلرک حصولی دخی علوم ومعارفک کرکی کبی شیوع وانتشار یله مکاتب حربیه وسائرہ تأسیسه منوطدر .

شرط خامس آلات وادوات حربیه نک جودت وکمال جهتلریله عیب وقصور دن مبرا وممکن ایسه دشمنک ادوات حربیه سندن دها اعلی اولمسیدر . بودخی معارف وصنایعک ترقیسیله حصوله کلور .

شرط سانس روح الجیش دینلان قوه منویه در که عسا کر یکدیگردن ایریاه میوب بلکه ثبات وصولتده یکدیگره مسابقت ایدر جه سه کمال شوق وغیرت ایله حرکت ایتسیدر .

ایشته اردویی جسم واحد حکمنه قویان بو کیفیت اولوب اساسی ضبط وربط ماده سیدر . زیرا ضابطه سی اولیان جمعیت عسکریه جسم بیجان کبی اولوب آثار مطلوبه بی وجوده کتوره مز عسکرده بویله ضابطه حصولی دخی مجازات و مکافات قاعده لرینگ صریحی الاجرا اولسنه منوطدر . زیرا عسکر ی تحت ضبط و اطاعتده طوتان خوف مجازات اولدینی کبی بلا تردد مهالك و مخاطراته القا ایتدیرن دخی مکافات ماده سیدر . واسباب ماده و علمیهده متساوی اولان ایکی اردونک قعیسنده شوق وغیرت زیاده ایسه آنک غلبه سی امر طیبعیدر . بناءً علی ذلك بعض محققین دیمشدر که عسکرده کوز پکلکی بعد علم الحرب اسباب غلبه نك انک اعلا سیدر . وعسا کر اسلامیهده بواسابك اقواسی افکار دینهدر . حتی مونته قوقولی دولت علیه سردار اکر مارینک فضل وهنر واستعدادلرین تزید و تجدید ایدن برسب دخی امر دیانتدر . زیرا عثمانلونک اعتقادلرنجه جنککرده فوت اولنلر شهید اولور و هر فرد ایچون اجل مقدر و وقت و ساعتی مجزوم و مقرر ونه یوزدن کیده جکی الننده محرر اولوب تحویل قدر و قضا مستحیدر دیو تحریر ایلمشدر . وقوماندان اولان ذات عسکرک کانون شوق وغیرتی علولندیره جک سوزلر بیامک شرط قلمبشدر که متأخرین حربین بوکا بلاغت عسکریه تسمیه ایدرک برفن مستقل صورته قومیشدر . الحاصل عسکر ی جنکه حرصالندیره جق اسباب نه ایسه استحصالی لازمه دندر و بو قوه منویه عسکرک انک کسکین سلاحیدر . و بونک اساسی برمنوال سابق مجازات و مکافات قضیه لری اولوب انجق بوباید افراط و تفریطدن حذر اولنهرق قاعده عدل و نصف اوزره حرکت و قانون و نظامه رعایت اولنق لازمدر .

شرط سابع برمنوال سابق اصل اردو بالاده مذکور شروط ایله ماده و علما و معنی مکمل اولدقدن صکره عسا کر ردیفه و بوکا نمائل بعض مملکتلرده بولسان عسا کر بلدیله کبی قوه احتیاطیه نك دخی معلم و منتظم بولسیدر . زیرا دولت بکلیتها براردو منزله سنده و عسا کر موظفه اول اردونک خط اولی و عسا کر ردیفه کبی قوه احتیاطیه ایکنجی و اوچنچی خطرلی مئابه سنده اولمغله خط اول صیقاقدنه خطین اخیرینه مراجعت ایده کلدیکی کبی عسا کر موظفه نك دخی وقت مضایقهده مرجع و ملتجاسی اولان قوه احتیاطیه معلم و منتظم اولمز ایسه اولیله وقت مضایقهده عسا کر موظفه یار و یاور اوله مز بودخی لدی الحاجه ماتی عسا کر

منتظمه اوله رق برصورت دهشتماده میدانه دوکه بیلیمک ایچون لازمکلان نظاماتک خللدن وقایه سیاه حاصل اولور .

بوشراط سبعه بی جامع اولان قوه عسکریه شک یوقدرکه واصل درجه کمال اوله رق هریرده ایش کورر دیو کووه نیله بیلور انجق شرائط مذکورنه نک دوام و ثباتی ایکی قاعده نک مرعی الاجرا اولسنه منوطدر . بری اصحاب علوم و معارف و صنایع حقنده مکافات قبولی مفتوح اوله رق قطع مراتب و نیل مناصب باینده دخی اهلیت و کار گذارلق مدار اصلی اتخاذ اولمقدر زیرا علم وهنرک شیوع وانتشاری انجق اهل واربابنه التفات ایله حصول پذیر اولور دیگر قانون ونظامه رعایتله خدمت عسکریه ده بولنانلر روش خود سرانه دن منصرف و ممنوع اولمقدر . زیرا حرکات عندیهنک دائمًا خطایی صوابنه غالب اولوب صوابنده دخی خیر وبرکت اولمز . چونکه عقول وادراکات بشریه متفاوت اولوب برینک روش و کردارینی حق و ناحق دیگر ی رد وانکار ایده کلدیکی جهته بر امرک مأموری دکشدبکه وضع و اصولی دکیشه رک نهایت اول امرک بتون بتون تغیر و اختلالی مقرر در . قالدیکه بویه مبیانت افکار واطوار وقوعی ازدویی جسم واحد حکمنده طومتق ایچون الزم اولان اتحاد ویکجهتی قضیه سنه ذاتا مغایر و مناقضدر . ایشه شو ایکی قاعده برضابطه قویه بی انتاج ایدرکه اکا یالکنز قوه عسکریه محتساج اولمیوب بالجمله امور دولت بوضابطه تحتنده بولتمق لازم کلور . زیرا بویه ضابطه ونظام تحتنده بولنمان دولت اویله برمنتظم قوه عسکریه بی اداره ایده مز . بونکله بیه سرعسکر بولنان ذات مستقل بالرأی اوله رق بر طرفدن امورینه مداخله ایتدیرللمک وعزم ووزمده مطلق العنان اولمق دخی شروط لازمهدندر .

موتنه قوقولی دولت علیه سردار لرینک شوق وخواهش ایله تیزرو وتیز دست اولمدرینه برسبب دخی استقلاللری برحد ایله محدود اولمیوب فاعل مختار اولملری خصوصی ایدوکی ادعا وتذکیر ودولت عثمانیه نک قانونلری قطعی ودستور العملدر و حکومت عثمانیه حکمت افلاطون اوزره مؤسس اوله رق امورنده مستقل اولوب امور حربیه کمال استقلال ایله بر سردار ذیشانک رأی وتدبیر وحکم واراده سنه تقویض اولمغین ایشه بو استقلال حسیله میانده بالجمله قیل وقال و اختلاف و اختلال منقطع وقرار داده اولان امورده تردد وتذبذب بر طرف و منافع اولور واسرار دولت مکسوم قالور دیو تخریر ایلمشدر .

وبرده هرشی قوه مالیهیه موقوف اولوب خصوصیه بویه منتظم اردولرک تشکیل واداره سی مضار ف کلیهیه منوطوقوه مالیه حصولی دخی حسن اداره مملکته مر بوطدر وبواداره ملکیه خصوصی عندالتأخرین دخل وخر جدن بحث ایدر بر فن مستقل

اولشدرکه غایتی معموریت بلادایله کثرت ایراد مصاحتی اولوب اگ مهم ومفید اولان قاعدۀ اساسیه سی دولتک مصارفی سرمایه تجار حکمنده طویلهرق مادی ومعنوی نفعی اوله جق یرده صرف وبدلدن قاجتنامق وفائده سزیره صرفدن بغایت احتراز اولمق ماده سیدر بوندن بشقه موازنۀ دولیه بی کوزتمک دخی فریضۀ ذمت دولتدره شویله که : جوار دولتک احوال داخلیه وروابط خارجیه لرینی بیلوبده آنلرله میزان معاملاتنی اگا کوره قوللامق و برنده وقوعبولان تبدلاته نظراً لازمکلان تدابیر وتدارکاتک اجراسنه وقتیه اهتم اولنوبده اول تبدلاتدن محتمل الظهور اولان حوادثک اوکی آلمق و بر دولتله محاربه اولنه جق اولدینی تقدیرده احوالی کنه و حقیقیته بیلنوبده اگا کوره طاورنامق اهم والزمدر بورالری نفیش وتحقیق برله اقتضالری تمیز وتدقیق ایلمک دخی قوۀ علمیه یه منوط اولغله بو خصوصاته متعلق خدمتدره بولنان ذواتک ارباب درایت ومعلوماندن اولسی لازمکلور . ایشته سلطان سلیمک ارادینی نظام دولت شو خصوصاتک اجراسندن عبارت وآرزو ایلدیکی عساکر منتظمه بالاده بیان اولدینی وجهله مکمل اردولر تنظیمندن کایتدر بناء علی ذلک اولوقت یکریمی اوتوز بیگ معلم وفرمانبر عسکر تدارکی ایلروده اولیه منتظم اردولر تدارکنه مقدمه اوله بیلوب یوخسه راشد افدینک دیدیکی کبی بونلره سائر طوائف عسکریه نک انضمامله مطلوب حاصل اولمش اولیه جنی ثابت اولور .

وینه راشد افندی بو عساکر جدیدنک مقدار علوفه لری حقیقده دیرکه فی الاصل یکچیری اسامه سی یدی سکز آچقه دن عبارت اولوب انجق اولوقتک اسعارینه نظراً اول مقدار ایله تعیش قابل ایش مثلاً بومقدار یومیه تعیین اولدینی زمانده لحم غنمک قیه سی بش آچقه یه ونان عزیزک ایکی یوز درهمی برآچقه یه وروغن زیتک قیه سی بش آلتی آچقه یه وسائر اسعار دخی بوکا مقیس ایش بو صورتده شمدی بونلره تعیین اولنه جق یومیه اسعارک بوتفاوتنه تطبیق ایله اوچ قات زیاده ترتیب اولملدر تاکه آخرکاره مجبور اولیه لر .

راشد افدینک برمنوال سابق تحریر ایلدیکی یدی سکز آچقه یومیه ازمئه اخیره ده ایدی یوخسه فی الاصل یکچیری علوفه سی یومیه اوچ آچقه وسپاهیلرک یومیه سی سکز آچقه اولوب صکره لری یکچیریلرک ترقیدن بشقه اولهرق اصل یومیه لری یدی سکز آچقه اولهرق اون بش آچقه یه قدر ترقی دخی جائز ایدی . آنجق عصر بعصر سکه احوالی تفاوت فاحش ایله متبدل ومتغیر اولدیغندن یومیه لرک بومرتبه تفاوتی برامر اعتباری ولفظی اولوب حقیقی ضم دکل ایدی . زیر آچقه کوچک بیاض سکه دیمک اولهرق یکچیری یومیه سی اوچ آچقه اولدینی وقتلرده اوچ آچقه بردرهم کومش وزننده اولوب آلتش آچقه قزل غروش وفلوری تعبیر ایتدکلری بریالذالتوننه

معادل ایدی . سلطان سلیم اولک او اخیرینه قدر حال بومنوال اوزره جاری اولوب آندن صکره سلطان محمد ثالث زمانه قدر مقداری تنزل ایدرک بر آلتون یوزیکرمی آچهیه قدر چیقمش ایدی یعنی یوزیکرمی آچهیکرمی درهم کومش وزننده اولوری . بعده اختلال داخلی زمانلرنده اوچ آچهیه رایج اولمق اوزره پاره نامنه سکه و قرق پاره اعتبارنده غروش کسلمکه باشلا یوب کومش دخی غایت معشوش اولدیغندن فلوری ایکی یوز آچه اعتبارینی تجاویز ایتیش ایدی مؤخر آره صره سکه نك اصلاحنه سعی اولدیسه ده ینه بیک یوز اوتوز اوچ تاریخنده یاللز آلتونی اوچ یوز یتیش بش و مجار آلتونی اوچ یوز آلتیش آچهیه وسکسان طقوز تاریخنده یاللز آلتونی اوچ غروش یوز بش و مجار آلتونی اوچ غروش الی آچهیه چیقدی وسکسان ایکی تاریخنده بش فراق برغروش ایکن وسکسان طقوز تاریخنده اوچ فراق برغروش اولدی . و ایکی یوز تاریخنده صکره یاللز آلتونی بش بچوق غروشه چیقوب چونکه یاللز آلتونی یکرمی اوچ بچوق عیارنده و مجار آلتونی یکرمی اوچ و بر بغدادی عیارنده اولدیغندن بونسبت اوزره مجار آلتونی دخی بش غروش اون پارهیه قدر رایج اولمغه باشلادی .

و بعض محرراتدن استنباط اولدیغنه کورده بیک تاریخنده لحم غنمک برقیه سی اوچ آچهیه ونان عزیزک درت قیه سی اوچ آچهیه ایکن (۱۱۶۸) سنه سنده لحم غنمک قیه سی اون سکز آچهیه ونان عزیزک قیه سی درت آچهیه و روغن زیتک قیه سی اون بش آچهیه و (۱۱۸۶) سنه سنده لحم غنمک قیه سی سکز پارهیه ونان عزیزک قیه سی ایکی پارهیه و روغن زیتک قیه سی اون پارهیه چیقوب و سائر ارازا و اوشانک فیئائی دخی تقریباً بومنوال اوزره ترقی ایدوب آندن صکره اسعار کوندن کونه ترقی ایتمکده بولمشدر . سلطان مصطفی خان ثالث دورنده ضربخانه اماتی طرفندن حرم هایونه تقدیم اولنان آلتونلرک قبضی مشعر و مهر هایون ایله مهور برخیلی مقبوض علم و خبر لری منظور فقیر اولمشدر . بولنلرده جدید زر محبوب یوز اون پارهیه و جدید قندقلی آلتونی اوچ غروش اوتوز بش پارهیه حساب اولمش ایدوکی کورلمشدر .

بعده سکه احوالی تغیر ایتدی و ایکی یوز ایکی سنه سنده یاللز آلتونی بش غروش اون پارهیه و مجار و قندقلی آلتونی بشر غروشه و استانبولی محبوب اوچ بچوق غروشه و ریال یوز پارهیه رایج اولمق اوزره نظام ویرلدی .

چونکه اوزمان مضایقه مالیه برکال اولوب کرک استقراض ایله کرک صورت اخری ایله بر چاره دخی بولنه مدیغندن بر درجه دهاسکه نك عیاری تغیر و تنزیل و ایادی ناسده بولنان اوانی زر و سیمک استعمالی منع و بدل معلوم مقابلنده ضربخانهیه دفع ایله ایکیلک قطع اولنلر قه ضربخانهجه بر نوع واردات جدیده تحصیل ایله ضرورت مالیه نك آچدیغی یاره لره موقت اوله رق مرهم اورلش ایدی .

مذکور ایکیلکار ایسه عصر مزده کی آتلیق و بشلک کبی مغشوش اولدرق اصل مالیتنه نظراً بش عددی تقریباً بریالدر آلتونسه معادل اولمسیله بوحسابجه یالدر آلتونی بیایغی اون غروش ایتمک لازم کلدیکندن ایکیلکارک بیایغی نصفه قریب قیمتلی سکه اعتباری اولهرق ممالک اجنیده رایج اولماسیله اجنبی تجاری بونلری خالص العیار سکه یه تبدیل ایتمک مجبور اولمغین بالطبع یالدر وسائر آلتونلرک فیثائی ترقی ایدرک نظامی درجه سنده طوتلمق قابل اولمیوب بوجهتله اسعار دخی ترقی ایتمک لازم کلشدر .

سکه بچشده تانارجق عبدالله افندی دیرکه ملوک ماضیه عثمانیه زمانلرنده سکهء سلطانیه خالص العیار ایکن مصر قاهرده اولان دارالضربه امرای مصریه نیک بعضا تسلط و دست درازقلری سببیه و بعضا دخی ولات مصرک تهاون و تقصیراتلری حسیبیه مصر قهرده مسکوک اولان آلتون و کومشک عیاری ناقص اولوب مؤخرأ بو کیفیت دارالسلطنته دخی سرایت ایدرک اقدمجه بیان ایستدیکمز وجهله معادن هایون امناسنک سوء اداره لری اثری اولمق اوزره معادن کلان آلتون و کموش قلمندن و اسباب سائر دن ناشی معاملات ضربخانه یی تعطیلدن صیانت و تکثیر واردات دولت زعم فسدیه عصر بعصر سکهء سلطانیه نیک وزن و عیاری تنقیص و تنزیل اولنه کیش و اوائل سفرده یالدر آلتونی بش بچق غروشه رایج اولغه باشلامش ایدی . حالبوکه : سکهء سلطانیه نیک وزن و عیاری نقدر تناقص ایدر ایسه مالکانه مقاطعات وسائر واردات دولت دخی اولقدر تناقص ایتمک لازم کلدیکندن کیتدیجه میری خزینه سی مضایقه یه دوشمشدر . چونکه انظار اجنیده ده مجرد وزن و عیاره اعتبار اولندیغندن امتعه افرنجیه و هندیه نیک فیثائی سکهء عثمانیه نیک وزن و عیارینه تطبیق ایله پک زیاده ترقی ایدوب ممالک دولت علیه ده ایسه امتعه مذکورهنک استعمالی کثرت اوزره اولدیغندن آنلرک عیاری سائر اشیانک دخی غلای بهاسنی موجب اولمشدر . تنزیل و تغییر سکه صورت ظاهرده هر نقدر منفعت عد اولنور ایسه ده حقیقتده عین مضرت و محض خسارت اولوب دراهم مضروبیه نقدر نحاس ضم اولنور ایسه و مضروب اولان نقودک وزنی هر نقدر نقصان اولور ایسه اولقدر ایراد دولته نقصان ترتب ایده جکی نظر عمیق ایله ملاحظه و دقت اولندوقده بالبداهه نمایان اوله جق اموردن اولدیغنی بیان و عیار و وزن سکهء عثمانیه یه تطبیق ایله اشیانک بهاسنی غالی اولدیغنی درمیان ایستدکن صکره دیرکه کبرک مقدا و کبرک بو دفعه حسب الضروره تنزیل اولنسان وزن و عیار سکه خصوصنک ممکن اولدیغنی مرتبه ده نظام قدیمه ارجاعی اقدم واجبات

نظام دولت علیه دن اولغله کومشخانه و معادن سائر اهتمام تام ایله کالاول تسویه و تنظیم و اسلوب مطبوع و مستحسن اوزره نقود مسکوکه غل و غشیدن تصفیه و دراهمک و زرنک مقداری هیچ اولمز ایسه باری سلطان محمود خان حضر تلمری زمانده مسکوک اولدینی درجه لره ابلاغ بیسورلدینی صورتده زمان یسیرده ضرورت اموال میریه مندفع و ممالک دولت علیه دن غلا غائله سی مرتفع اولوق بی اشتباه اولوب بالجمله دول نصارا امور دنیویده متبصر اولوب باخصوص کسب اموال و تحصیل منافع خصوصارنده دقیقه فوت ایتیمه جکاری معلوم عالم ایکن سکه لرینی غل و غشیدن حفظ و صیانت کمال دقت و اهتماملری بومعنایه شاهد اولوب نقص عیار سکه مال و مانکه ادنی مرتبه نافع اولوق خصوصی ماحوظلری اولسه اول خصوصه اقدام تاملری واقع اولور ایدی .

عبدالله افندینک تقریر مشروحو اوزره دول نصارانک تصحیح و تصفیه سکه امر اهمه اهتماملری زیاده اولدینی کبی سکه نک تصحیح و اصلاح عیاری اسلاف ملوک ستوده سلوک اسلامیه نک دخی عادات عدالت شعاریدر زیراعامه نک معاملاتی تقدین ایله اولدیغندن آنلرک نقص و فساددن حفظ و صیاتی سلطان المسلمینک وظیفه ذمیدر بناء علی ذلک خلفای اسلامیه دن ابتدا نقوده سکه ضرب ایدن عبدالملک عیار سکه نک نظارتی کندوسی التزام و اخلاقی دخی اولوجهله سکه امرینه بالذات تقید و اهتمام ایدوب دولت عباسیه ده دخی هارون رشید زمانه قدر عیار سکه خصوصه بالذات خلفا نظارت ایدرلر ایکن توسع دولت و تعزز سلطنت و تکثیر مشاغل خلافت حسبیله هارون رشید بو وظیفه مهمه نی وزیر جعفر برمکیه تفویض ایتمیدی .

الحاصل عبدالله افندینک برمنوال سابق مطالعاتی قاعده حکمه مطابق و سائر عقلای ارکان سلطنتک رأی دخی اکا موافقدر .

دفتردار شریف افندی اصل لایحه سنده دشمنه غلبه سفره و سفر دخی عسکر و مهمات و ذخیره یه و بونلر دخی خزینه یه توقف ایتدیکی معلومدر . منافع بلاد عراق و عربستان اجانب یدنده قالمغه مصر و بغداد خزینه لرینک نظامی تکثیر خزینه باینده جمله دن اقدام و انفع ایسه دخی فتح قریم بونلره تقدیم اولنمق شمیدیکی حالک مقضاسی اولغله قریم فتحی میسر اولنجیه دک جمع خزینه یه آخر درلو همت اولنمق اقتضا ایدر دیو بسط مقدمه ایدرک جمع اموال خصوصنده دخی چونکه فی الاصل مقاطعاتک مالکانه ویرلمسنی استصواب ایلملری هر کس مالکانه سی کندی بیغ و باغچه سی کبی اعمار ایتمکه چالیشوب رعایاسنه تخم ویرمک و بوجهتله ممالک اسلامیه

کوندن کونه معمور اولمق ملاحظه سینه مینی ایکن عموماً مزاج عسکرده اولان
 فساد بوماده یه دخی ایریشوب بش زیاده ویرن ماترمک ظلمنه اعانت اولتمق صغیر
 و کبیره طبیعت ثانیه مقامنده اولغله همان منافع میریه دولتک یدینه کیرمدیکی قالیور
 بناء علی ذلک مقاطعات میریه و حرمین واسه همامک محلولاتی فروخت اولنمیوب
 ضربخانه عامردن اداره و اندرون و بیرون رجالدن مستحق عطوفت اولنلره
 بالذات جانب حضرت ظل الهمیدن عنایت و احسان مراد اولندقدده و یریله جک
 مالکانه نک سنوی فائضی نه مقدار اولدینی بیسانه رک الی سنه لک معجله ایله
 و حسب الاقتضا معجله سنی امهال و تأجیل ایله عنایت بیورلمق فرد واحده غدر
 شائبه سی اولتمسزین توفیر خزینه یه و سیله قویه ملاحظه اولندینی و ممالک محروسه ده
 مشروطه و غیر مشروطه اوقاف مجدداً تحریر اولنوب ناظر و متولی و کاتب و سایر
 خدامک خفی و جلی معاش و منافعلری ظاهره اخراج اولندقدن سکره ذی الید
 بولنلرک برآچه لری قطع اولنمیوب فقط معاش و منافی کثیر اولنلرک محلولاتی
 وقوعنده حد لایقه تنزیل و قصوری وقف مانده اولتمق و دعا کوی مثللو خدمتسز
 و یا خدمتی متروک قالمش جهات محلول اولدقدده نصفی وقف مانده و نصفی امام
 و مؤذن و قیم مثللو خدمه یه ترقی توجیه اولنوب ائمه و خطبانک و وظائفی اوچر
 یوز التیشر آچه و سایر خدمتارک یوز یکرمیشر آچه یه دک ضم اولتمق و محلول
 مسافت و باخصوص کارکیر عقارات اجار تین ایله و یریلوب اجاره واحده ایله و یرلمک
 و الحاصل جمیع اوقافک زوائدی میدانه چیقاریلوب و بشقه جه حفظ ایتدیریلوب
 و میریدن وضع ید اولنمیوب وقتاً من الاوقات بیت المال مسالمنه ضعف کلر کده
 استقراضاً امور جهادیه یه صرف اولنوب بعده میری یه وسعت کلر کده یرینه وضع
 اولتمق و بین الناس کدک دیو بیع و شرا اولنان شیلر ایچون شمدی هر و قفدن مجاناً سند
 و یریلوب و دقتر وقفه قید اولنوب بعده بلا ولد محلول اولدقدده طرف و قفدن ضبط
 و فروخت اولتمق اوزره رابطه و یریلور ایسه ممالک اسلامیه ده واقع جمیع آثار خیریه
 معمور و آبادان اوله جغندن بشقه زوائد اوقاف نامیله سنه ده قتی کلی مال حاصل اولوب
 بشقه جه حفظ اولتمق تقریبیله دولت علیه یه دخی قوت اوله جغنی و دولت علیه نک
 واردات و مصارفی علی وجه الصحه میدانه چیقاریلوب ضم و تنزیل واقع اولدیغنده
 دخی دولت علیه نک ایرادی شو مقدار ایکن فلان و فلان ماده لردن شو مقدار زیاده
 اولدی و مصارف معینه سی بومقدار ایکن فلان و فلان ماده لردن بومقدار نقصان
 بولدی دیو بر خلاصه پوصله سی پایله رق حضور همایونه عرض اولتمق تقریبیله دولت
 علیه نک مصارف معینه سندن قتی بیلزوم شیلر و اوجاققلر و بیهوده مصرفلر میدانه

چيقوب تزييل قبول ايده جكني و بونظامدن صكره نيجه نيجه منافع خفيه ظهوره
 كه جكني و ترسانه نك برمكمل دونما طاقمي فضله ويدك اوله رق آماده بولمق
 و بونلره دائر اسرافات وار ايسه قطع اولمق خصوصلرني عرض و افاده و معادنك
 اعمالني اخطار و توصيه ايلمشدر كديكلرك آثار مضره سي عصر مزده هر كسك
 مشاهد و معلومي اولديغندن تفصيله حاجت يوقدر بويله يولسز برشيئي ايراد حكمنه
 قوه قدن ايسه رफी اولي ایدی .

بعده شريف افندی نظامات عسكریه به عطف كلام ايلمشدر . تنظيم عسکر بختده
 خلاصه تدیری يوسف پاشانك تفكيجی ترتیبه قریب اولوب شویله كه : او جاقلونك
 قابل اصلاح اولمیه جقلرینی جزم ايلمش اولديغندن آنلك تحت نظامه ادخاللری
 داعیه سندن صرف نظر ایدرك دشمنك اسباب غلبه سندن بری دخی عساكر
 اسلامیه نك قیش كونده محاربه ايله مألوف اولمالری خصوصیدر و تعلیمو عسکر
 تعلیمسز عسکره غالب اولمق دخی بدیهیاتدن اولغله او جاقلر عسکرینی تحت رابطه
 قویمق ممكن دكل ايسه ده باری مشتا عسکریمز تعلیمو بولسون دیو صورت تنظیمی
 بووجهه بیان ایدركه وزرای عظام و میر میران كرام منصبلرنده مستقر اولوب
 وجهاً من الوجوه عزل اولمیه معاذالله ترتیب جزاسنی موجب جرم غایبی ظهور
 ایلر ايسه اولدینی محله قیدی كوریلوب بر خالانله و اتباعنه میریدن تعرض اولنیوب
 یرینه نصب اولنه جق هر كیم ايسه اكا احسان بیوریله كه خلف اولان آدم بر قوریلو
 طولابك ایچنه کیروب چویرمكه باشلیه وانك دخی قراندینی اوزرینه منضم اوله رق
 كوندن كونه دائره سنه وسعت و حالنه قوت كلوب سفر و حضرده ایشه یاریه بویله
 اولیجق هر بر وزیر و پاشا حال و مقدار نیجه پیاده و سواری عسکر تعلیم ایتدیروب
 صیفا و شتاء چادرلرده و زمناكارده طوتوب ما كولات و ملبوساتلرینه و حرکات
 و سکناتلرینه دول افرنیجه ده اولدینی كبی رابطه و یروب حاضر و آماده اوله لر
 شویله كه : عساكر مذکور به بریره كلكده قرق بیكمی اولور دها زیاده یا نقصانمی
 اولور نسق واحد اوزره اویله جه اعمال اولمنك طریق یولنه و سفر ظهورنده نقل
 ذخائر و احوالاری ایچون لازم اوله جق حیوانات و مراکبی شمیدین نهج مرغوب
 اوزره بر رابطه به بند ایده لر وقت سفرده بزه شولازم ایدی دیموب هان فرمان
 واردینی كبی یاز و قیش دیموب قالقوب رأس حدوده ورود ايله بر ایچی اوچ سنه
 ودها زیاده قشلاسلر تكلف اولمیه دیدكدن صكره عساكر مرقومه نك صورت
 اعمالی حقدنه دخی بونلر صرف فضله وزانئ طوتیلوب یعنی بونلر قیش عسکریدر
 دینه لرك قانون قدیم اوزره او جاقلر عسکریه اردو دوزیلوب اشبو مشتا عسکری

ورادن کلوب جنگ تقرب ایلدکده سکنز اون ساعت کیروده اردو قوروب حاضر و آماده طوره وهر بیک نفرینه طویچی و مهماتی ایله برطوب و یریه عساگر اسلام منصوراً و مظفراً ایلرویه کیتدکجه بونلر دخی ایلرویه واره تاشول وقته دك که عسکر اسلام عودت ایلدکده بونلر اول محلده طوروب تاموسم صیف کلنجیه دك آنده اقامت و برخطوه ایلر و کیتیموب مجرد اوزرلرینه دشمن کاور ایسه مدافعه و مقاومت و معاذالله عساگر اسلامیه منہزم اولور ایسه بونلر اولدقلری محلده طوروب دشمنک تخطیسنه مخالفت ایله لر دیو تدیر ایلمشدر .

سفر دیمک آچه دیمک اولدیغندن شریف اقدینک بوخصوصه اعتناسنده هیچ بر دیه جک یوقدر لکن آچه سفرك موقوف علیهی اولوب مظفريتک علت موجبه سی شرائطی بالاده بیان اولنان نظام و ضابطه در حالبوکه بالاده اشعار اولدینفی اوزره مجرد بویله وایلر معیتلرنده ترتیب اولنه جق بلدی عسکرله مقصده واصل اولمق قابل اولیه جغندن بشقه او جاقدر عسکر یله دوزیلان اردو امثال سابقه سی وجهله در حال بوزیلوب کیروده کی معلم عساگرک اوزرینه دوشدکلرنده انلره دخی مورث دهشت اوله رق بالاده شرط سادسده لزوم اکمالی اثبات اولنان حرص و خواهش لرینی اخلال و دشمن عسکرینک جسامتلمسنی موجب اوله رق قوه معنویه لرینی اکمال ایتش اوله جنی درکاردر اشته بووجهله بر جسیم اردونک بر پارچه سنه غلبه ایدن بر قوه عسکر یه کندوسنه معادل اولان فرقه باقیه یه دخی مظفر اوله کیشدر بناء علی ذلک ابتدا بر اردونک اک قوتلو فرقه سی ایلرویه سوق اولنه رق هم سائر فرقه لره جسامت بخش اولمق و همده دشمنک کوزینی ییلدیرمق لازمکلور .

شریف اقدینی عساگر مذکورده ک صورت تنظیم و اعمالی بیان و مبايعات اصولنک رفیعه ذخیره نظامی در میان ایتدکدنصکره دیرکه بو اسلوب اوزره رفع مظالم و جمع ذخیره و دونمای هایونک اکلنه همت بیورلدقدنصکره مسقوه سفر آچلمق ایچون الشمس بش بیک کیسه آچه جمع اولتوب ابتدا کی سنه اوتوز بیک کیسه وایکنجی سنه یکر می بیک و اوچنجی سنه اون بش بیک کیسه اردوی هایون خزینه سنه وضع اولتوب اشبو اوچ سنه ظرفنده بر طرفدن جمع خزینه یه اهتام برله قاچ سنه سفر اولورسه اون بش بیک کیسه آچه ایرشدرمه نك چاره سنه باقلمو زیرا سفرده اسراف و اتلاف درجه سنده آچه صرف ایتک ایشه یارایه جغنی جزم و تحقیق ایتدم و زرایه خر جلق نامیله بش بیک غروش یرینه الی بیک و میرمیرانه بش یوز یرینه بش بیک غروش ویرلملو و نزل امینلکی ایچون فریاد و فغان ایدنلرینی فلان محلده نزل امینی ایدک دیو رجا و نیاز ایتلوکه ایش کورلسون سفرده تصرف و امساک مضر

اولدیغنی کرکی کبی فهم ایتدم و بو کره سفر آچیلدقدنصکره مرام حصوله کلکسزین قیامتق محال اولدیغنی هرکس جز ما بیلوب کرید آطه سی سفری کبی ایش تمدهکجه فراغت اولنسون زیر ا عسکر فی الجمله بدویته آشدقجه ایشه یازامغه باشلا یور اولکی سفرده عسکرک حضر یلکی زیاده اولق تقریبیله هر مقابله ده منهزم اولوب دشمن قامچی صوینه کلوب اقلیم قریم الدن کتدی بوسفرده درت مقابله واقع اولوب برنده دولت علیه غالب برنده مغلوب وایکسندنه مساوی اولدی و دشمن طونه ک برو طرفنده تقرر ایدمدی واشبو ایکی سفرك برینه خیرلو دینامز انجق بر برینه نسبت اولنسه سفر اول بوندن اشر ایدی بونک سری حضرت و بدویت ماده سیدر و او جاقلره اولا صادق و متدین درایت صاحبی بر راغا انتخاب و بلا جائزه نصب و استخدام اینه الی ماشاء الله عزل اولنماق اوزره رابطه ویرلد کدنصکره اشکنجی نفراتی صیفاً وشتاء موجود بولنوب بر فردی نقصان اولمامسنگ طریق سهولتی و محمولات بلا کتم خزینه مانده اولق و سرحدات مواجبه رابطه ویرلک خصوصلری انکله مذاکره اولنهرق تنظیم اولنه بو نظام آچیله جق سفرده کلیاً رابطه کیر اولمز ایسه دخی نصفی مرتبه رابطه بولوب کوندن کونه بولنه کیرر .

شریف افندینک مرام دیدیکی قریمک استخلاصی مسئله سی اولوب حالبوکه دولت علیه نک قوانین و نظامات ملکیه و مالیه و عسکریه سی کاملاً اختلاله وارمشیکن چند سال طرفنده نظامات لازمه یی ا کمال وقوه کافیه استحصال برله همان قریمک فتحنه ظفر یاب اولق ناقابل و قالدیکه اصل مرام دولتک نظام و ضابطه سی اوله رق بونک درجه ا کالنه کوره اقتطاف ثمره سی دخی امر طبیعی اولوب یوخسه بو مقصد اصلی بر طرفه براغیلوبده مجرد قریمک فتحی ایچون نظام دوشونمک موافق مصلحت دکل و هنوز تنظیمی متصور اولان عسا کرک مصارفه قارشولق تدارکننده انواع مشکلات رونما یکن بر ماده مخصوصه ایچون دولتک بویه ضعف و قوتور او اننده اویله بیلارجه متاعب سفریه یه تحمل مشکل ایدی قریب العهدده وقوعبولان سالف الذکر ایکی سفرده دخی صلحه رغبت مجرد مقتضای مجبوریت اولوب یوخسه ایکیسندنه دخی دولت علیه صوک درجه یه قدر دیامشیدی وایکنجی سفر مجرد قریمک استخلاصی مقصدینه مبنی ایدی کرید سفری سنه لرنده دولت علیه نک حال واقعداری بشقه صورتده و دول اوروپا ایه موازنه سی بشقه نسبتده اولوب بوسنه لری او سنه لره قیاس قابل اوله مز .

رئیس المکتاب عبدالله بری افندی دولت علیه یه تیز الدن یکر می بیک پیاده و بش بیک سواری تدارکی واجبده دن اولدیغنی درمیان ایتد کدنصکره طریق جاب

و تعلیمی بوجوهه بیان ایتشدرکه : عسکر کنج یعنی اون یاشندن یکر می بش یاشنه دکین و سفرده بولنامش و بلکه شهر و قصبه به اوغراماش قری اهلایسندن اولمیدر و استانبوله بعید بر محله قشله یاللمایدن ابتدا نفرات مرقومه قریه لردن مباشر لر ایله جلب و جمع اولنور تعیش اینمکدن عاجز نیجه کسه لر واردر که بر اکمک تدار کیچون کیجه و کوندوز خدمت ایدرنیجه لر دخی واردر که اولادینی بسله به میوب بر اکمک ویره جک آدم آرار استانبولده واسکدارده دخی بو مقوله قتی چوق بولنور علی الخصوص طشره لرده بیکس ایتم چوقدر بو مقوله دلی قانلو نفرات استجاب اولنوب اول امرده سنت اولما مشلری سنت و تعلیم مسائل دینه اولندقدنصکره پروسیادن الی و یاخود یوز اوفچیل جلب ایله تعلیم ایتدیریلور بو صورتله ایکی اوج سنه ظرفنده یکر می بیک پیاده و بشیک سواری معلم عسکر تدارک اولنق مأمولدر و بو مقدار عسکرله ممالک محروسه نك هر نه محلنده بر امر اولور ایسه در حال اجرایی سهولت کسب ایدر نفرات مرقومه نك ترتیبی عینیه دشمنلریمزک ترتیبی کبی اولمی صورت آخرده عسیر اولق کر کدر زیرا طائفه افرنج بر قاق یوز سنه دنبرو قتی چوق تجرب به ایله بو صورتی انتخاب ایتشدر تعلیم خصوصی دخی بهر حال پروسیادن و سائر دولت لردن استاد اوفچیل لر جلینه متوققدر انجق اول امرده تعلیم اولنه جق نفراتک صورت تدارکی مذاکره ایله محذور دن سالم اوله جق و جهله رابطه بولغه محتاجدر زیرا خاطره کلان صورت لده محذور لری متعاقباً تبادر ایده کلدیکندن محذور عد ایتدی کمز نفسنده محذور میدر یوخسه و هممیدر و طریق سهولت دیدیکمز واقع حالیدر یوخسه فقط بر ملاحظه میدر مذاکره ایله ظاهره چیتار یوقسه یالکز بر ایکی آدمک مطالعه لری بویه بر امر جسیمده مفید اولماق کرک . عساکر مرقومه نك صورت تعلیم و تربیه لری وصیفاً و شتاء سفر و حضرده قرار و حرکت لری و الحاصل کافه معاملاتنی بشقه بر قانوننامه اولق اوزره قلمه آلتق اقتضا ایدر . و تعیینات و علوفه لری مقدار کفایه ده اولملودر تا که ضابطانی سر قته محتاج اولیه و پیاده نفراته او توز و سواری به الی آنچه یومیه کفایت ایدر ظن اولنور . و هر یوز نفره اون الی ضابط اقتضا ایدر کلیتو معلم طویجی نفراتی دخی لازم اولوب انجق آنلر دخی عسکر دن معدود اولمغه بشقه یازلمدی . بری افندینک بر منوال سابق تدارک نفرات حقنده رأی یوسف پاشا ایله راشد افندینک رأینه قریب اولوب انجق نفرات مرقومه نك کوکلی اوله رق طو پلانلرینی تصریح ایتدکنصکره بو صورته قوت قلبی اولدیغندن قرارینی مذاکره به تعلیق ایلمشدر . و فی الواقع یکر می بشیک قدر کوکلی چوجق بولق قابل اولماق

گر کدر و برده انسان یکر می یاشنی تجاوز ایتدیکه عسکر لکه یارامدیغندن اون اون بریاشنده نفر یازمق موافق مصاحت دکل ایدی واکر چه اوائلده دوشیرمه لک انسانی ده اشاغی اولور ایدی لکن اولوقت حال ومقصد بشقه ایدی زیر آنر مدت میدده تربیه ایله ترك اولدقدنصکره سالك عسکری یه ادخال اولنور لر ایدی اما قرون اخیره ده بویه مدت میدده مکتبده چوجق اوقودر کبی نفرات عسکر یه یتشدیر مکله مشغولیته وقت وحال متحمل اوله ماز .

کتخدای صدر عالی مصطفی رشید افندینک مطالعه سی دخی عبدالله بری افندینک رأینه قریبدر . شویله که : دولت عثمانیه کندو عصیتیه نیجه غزالر ایدوب بعده کندویه وسعت کلد کده عصیت مقامنه قائم اوجاقلری ترتیب وکیتدیکه تکثیر ایله مدت قلیله ظرفنده بردولتک نائل اوله مدینتی فتوحات جلیله یه نائل اولدینی وسلطان اورخان حضر تلرینک زمان سلطنتلرنده اناطولیدن وظیفه ایله برمقدار پیاده درتی عسکر تحریر اولنوب اعمال واداره لری بر وجهله ممکن اولدیغندن ارباب شورا ومظنه کرام اتفایقه دوشیرمه اوغلاننه قرار ویریلوب نیجه بیک طفل نوجوان جمع ودین اسلام تلقین وجنک اری عسا کر تدارک واستخدام ایله جهاد وغزایه رونق ویرلمشیکن یوزالی سنه دنبرو بواصول ترك اولنش ایدوکی وشمدی دولت علیه یه قوت جدیده تدارک ایتک فریضه دن بولدینی وکیتدیکه تکثیر ایتک اوزره اون بش بیک پیاده عسکر ترتیب اولتمق لازم کلدیکی مقدماتی بسط وتمهید ایتد کدنصکره تنظیم عسا کر خصوصنده دیرکه ابتدای امرده برعموم استشاره سنده تنظیم بلاد ایچون برمقدار عسکره محتاج اولندیغندن بشقه بزم عسکریمز قاسمه قدر طور میوب عودت ایلدکلر نندن دشمن دخی اورتالغی خالی بولوب دیلدیکی محله هجوم ایده یور دیو عسکریمزک عودتنده طوره جق موظف سکیان کبی برمقدار عسکره احتیاج اولدینی بیان برله جمله حضار تسایم ایلد کدنصکره اون بش بیک یاخودیکر می بیک سکیان نامیله عسکر ترتیب وتعلیمنه مباشرت اولنور وبوترتیب اولنه جق عسکر ارباب فساد ایله ملاقات ایتامش اون بش یاشنده صیدان مقوله سنندن جمع وشهر وقرادن بعد بر محله قشلاق انشاسیله آنده تربیه وتعلیم ایتدیر یلور بوماده بزاز کچه حاصل اولورا کر موجود اولان عسکر دن تربیه اولنوبده تیز حاصل اولسی اراده اولنور ایسه موجود اولان عسا کرک دائره اطاعته ادخالی بروجهله تصور اولنه میوب بناء علیه بر متبصر آدم اورویاه کور ندر یلره عسکری خصوصنک دقایق امورینه واقف اولغه محتاجدر فرضی آنر قرادن عسکر یازمق مراد ایلدکلر ننده هر قریه نك سهمنه اصابت ایدنی طب ایدوب قریه اهالیسی دخی کندولرینک ضبطنه قادر اوله مدقلری

کیمسه لری ویرلر آنلر دخی ساتات اولدوقده بر رابطه تحتنه داخل اوله یورلرکه کندو نفسنه اطاعتدن غیری یول بوله میورلر بواطاعت نه وجهه اوله یور تحقیقه محتاجدر علی کلالقدیرین کرک صیاندن کرک توانادن جدید عسکر ترتیب و طوب و خبره انداختی و تفنک اندازلق و متریس تعیبه سی و طایه انشایی و سایر صنایع حربیه تعلیم اولدوقده هر دولتک قوتی ممالک ایله اولدیغندن اول امرده بوعسکرک قوتیه روم ایلی ممالکی مجدداً فتح و تنظیم اولوب فقرای مسامین ظلمه و اشقیایدندن تخلیص برله امر ونهی کاهو حقه ممالک و ولایتلرده جاری اولدوقده اهالی و رعایایه قوت کلوب ایراد جدید طبیعتیه حاصل اولدوقده اول ایراد ایله ینه عسکر تجریرینه مباشرت اولتور تنظیم بلاد میسر اولدوقده امور مهمه نك رؤیتی سهولت کسب ایدر و بو ترتیب اولته جق عساکر جدیده نك اعمالنه در تیوز مقدرای رؤسانک لزومی اولغله اولمقدار کسنه عقل سلیم احجابندن اوله رق انتخاب و قوانین عسکریه و امور حربیه و تنظیمات ملکیه تعلیم اوله رق هر بری استعدادی اولدیغی خدمتده استخدام اولوب حال و شانلرینه کوره مقدار کفایه و وظیفه تعیین اولنلق اقتضا ایدر بو مقدار رؤسا اون بش یکر می بیگ عسکرله و افرجه ممالکی نظام حاله ادخال ایله ایراد جدید حاصل اولدوقجه رؤسا و عسکر ی تکثیر ایتمک اقتضا ایدر حاصل کلام دفع مظالم و رفع اسرافات و اهالی بی دائرة اطاعته ادخال و تنفیذ او امر احکام ضمننده مطیع و منقاد اوله رق بر مقدار عسکر ترتیبینه محتاج اولوب بوصولنده ذکر ی مرور ایدن مطیع و معلم عسکر جمله نظامدن اهم و اقدم کورینور .

بو کوسه کتبخدا ممالک محروسه بی یکیدن فتح الیمک تصورنده بولنش حالبوکه دولت بو قوه مغویه و رابطه فکریه ایله عموم ملتی نظام و ضابطه تحتنه الملق لازمدر بو خسه بتون ایالاته عاصی نظریه باقیابوده یکیدن بر بر فتح و تنظیمی فعله کز خولیلر قیلمنددر . محاسبه اول الحاج ابراهیم افندیگ تنظیم عسکر بحثنده تدیری دخی یوسف پاشانک تفنکچی ترتیبی کبی اولوب بونکله برابر اول امرده او جاقونک تلطیف اولنسی و برصادق و مستقیم یکچیری اغایی انتخاب و نصب ایله بالتدریج او جایی اصلاح ایتمک اوزره منصننده مستمر اولسی خصوصلری دخی علاوه کلام ایلمشدر .

ترسانه امینی عثمان افندیگ لایحه سنده یکچیری طائفه سنه طشره لرده اعتبار اولنلق و عن اصل ممنوع اولان تکالیف کندولرندن آلتماق و او جاقبرینک قانون و قاعده قدیمه لرینه رعایت قانمق خصوصلری مذکوردر .

مورخ انوری افندیگ لایحه سنده دخی او جاق نظامی وقت آسایشده رجانندن مطلوب اولنلق لدی الحاجه مقدار کفایه عسکر موجود اوله رق حین مدافعه ده اظهار ثباتی موجبدر دیو مسطوردر .

سابقاً رکاب هایون کتخداسی راسخ افندینک خلاصه افکاری اعدانک اعداد ایلدیک آلات وادوات حربیه تدارک و پیاده و سواری عساکری تحت ضابطه یه ادخال اولندقدنصکره فنون حربیه دن دول افرنجیه نک ترتیب و تدوین ایلدکری کتابلری ترجمه و افرنجیدن فنون حربیه ده ماهر استادلر جلب ایله بزم عساکریمزه صنایع حربیه تعلیم و وقت حضرده عسکری بدویت حالاتی کسب ایچون مجدداً ترتیب اولنه جق عساکر سنه ده بردفعه برقلعه دن برقلعه یه نقل اولنق و کرک آستانه ده و کرک سر حدانده ووزرا و میر میرانلر یانلرنده مرتب و معلم عساکر دایماً موجود بولنق و او جاقلرک قوانین و نظاماتی اصحاب درایت ضابطانی معرفتلیله اصلاح قلمق تصور اتیدر .

صدور عظامدن صالح زاده افندینک خلاصه تصوراتی دخی یکچیری اورطه لرینک محلولاتیه ایادی ارتکابده اولان ضایعاتندن اول امرده تحمیلی مقداری نفرات جدیده تحریر وبعده محمولات و قوعبولدجه عددلری تکثیر اولنمی و سائر او جاقلرده دخی بواصولک اجراسی التزام اولنوب لکن طوبخانه او جانغه ترتیبی اراده بیوریلان نفرات جدیده نک هفته ده ایکی کون تعلیم طوپ اندازی ایتلری ورسیده درجه مهارت اولنلرینک ترقی و عطا یا ایله ممتاز قلمسی و بوجمله ترتیب اولنه جق عساکرک بر قضاده بش سنه دن زیاده اقامتلیینه رخصت ویرلیوب بالناوبه آستانه ده قشلاق سکانه مبادله اولنه رق بویه تبدیل مکان ایله غرض اصلی اولان ادمان سفری فائده سنک استحصالی مطالعاتندن عبارتدر .

لزوم تعلیمک طوپچیلره قصری قصوردر .

ینه صدور عظامدن ولی افندی زاده نک تصوری دخی ضابطان ایله نفرات تحت رابطه یه ادخال اولندقدن صکره وقت حضرده امکانی مرتبه استعمال اساجه و ترتیب صفوف خصوصلری تعلیم اولنوب حین اقتضاده معلم بولملری خصوصندن عبارتدر .
رجل دولتن علی رائق افندی دخی دولت علیه نک سفر و حضرده معتدبه عسکری اولان او جاقلره سنین و فیره دنبرو طبیعت ثانیه اولمش اولان فسادک مدت قلیله ده اصلاحی محال اولمغه تدریجی تدابیر نافعیه محتاج اولدیغنی اخطار ایلمشدر .

ماینجی مصطفی عفت بک افکاری نفرات جدیده نک تدارکی خصوصنده عبدالله ملا افندینک رأینه و صورت ترتیب و وضعنده راشد افندینک رأینه و طشره لر حقدنه یوسف پاشانک تفنکچی ترتیبه شیهه اولوب شویله که : نیمچه و روسیه نک بش الی یوز بیک معلم و مرتب عسکرلری اولمغه دولت علیه دخی هیچ اولمز ایسه عسکرینی یوز بیکه ابلاغ ایتمک لازمه دندر فقط دولت علیه نک وارداتنک ثلثانی

آنه‌جق عساکر مرتبه‌یه کافی اوله‌جنی موهوم اولمغه اعمال افکاره محتاجدر طائفه
 افرنج لوازم حربیه واسلحه سفریه‌لرنده مصارفدن قاچیه‌رق عسکرینک تعینات
 و ملبوسات و سائر لوازمات‌لرنده کمال دقت ایله اختصار ایدرلر دیدکدنصکره عساکرک
 صورت تدارک و تنظیمی دخی بووجهله بیان ایدرکه او جاقلونک آمیزش و مخاطله‌سی
 درکار اوله‌رق طوبلساجی و سرعتیجی مثللو کندولرندن جزؤ اولوق صورتیه
 هراوجاقدن واورته‌لردن جسته جسته یوزر وایکیشر یوزر کنج طلب و بدایتنده
 قشله‌لرنده اقامت و محلولاته دقت وورفته رفته برفرده غدر اولمیه‌رق جبر نقصان
 طریقیه بونلر افتقاد وآنرا ایجاد اولتمقدن غیری اداره ممکن اولمیوب سفر و حضرده
 اضداد مانعه‌الجمع خاطره‌سی برطرفدر وزرای عظام و میر میران کرام دخی
 منصب‌لرنده مستقر اولوب بغداد و مصر و شام و اسکندریه و شم‌دیکی حالد یانیه‌مستنا
 اوله‌رق سائرلرینک منصب‌لرینه کوره برقاچر یوز و بیکر و جبار زاده و قره عثمان
 زاده‌لره و افلاق و بغداد و یوده لرینه حاللرنجه مناسب مقدراری عسکر احاله اولنوب
 مجموعی کسب تفنن و اون و اون‌بش بیکه ابلاغندن صکره ینه یکچیری و سائر او جاقلو
 نامیه بردن ممکن اولمز ایسه متعاقباً آستانه‌یه ادخال او جاقلر قشله‌لرینه اسکان
 اولتمق خاطره‌کلور دیو تحریر ایشدر .

لاله‌لی مصطفی افندی‌نک تنظیم عسکر خصوصه دائر اولان کلامی یکچیری نفرات‌نک
 وضع قدیمی اوزره ییاده اوله‌رق اغالی معرقتیه ترتیبی وورفته رفته نظام حاللرینه
 دقت اولنمی خصوص‌لرندن عبارتدر .

بکلکچی دیوان همایون صنعی افندی دخی عساکر اسلامیه‌نک نوروزدنصکره کلوب
 قاسمدن اول کیتدکاری و دشمن ایسه وسط صیفده اجرا ایده مدیکی ملغتلری بهار
 اولئنده وایام شستا تقر بنده اجرا ایلدیکی ظاهر اولدیغندن بحشله دولت علیه‌نک
 عسکری ایکی صنفه منقسم و برصنفی صیف عسکری و دیگرکی قیش عسکری اوله‌رق
 هر صنف التیشر آی بکلکم و مشتتا عسکری عموماً روم ایلی و سلستره ایالتلرینک
 ایالت‌لولری او جاقلو یکچیری سردار و سردنکچدی بیراقلری اولوب صیف
 عساکری دخی اناطولیده کائن ایالتلر خلقی او جاقلو یکچیری سردار و سردنکچدی
 بیراقلری اولوق و سائر او جاقلر دخی بونلره قیاساً ترتیب اولتمق او جاقلرده پیدا
 اولان فسادات بالتدریج فسخ ایله قانون قدیم‌لری حالت اولاسنه ارجاع اولتمق
 خصوص‌لرینی تنسیب ایشدر .

ایشته بونلر هپ اراده یرینی بولسون دیون مجهول اوزرینه ایراد اولتمش ابحاث
 و خواطر دیمک اوله‌رق اصحابی معذور کورلدیکندن هر برینک بشقه بشقه تفصیل
 محاکماتیه اظناب مقاله حاجت کورلمز .

حقى بك دخى طشه لرده والير معيتلر نده يوسف پاشانك تفنكجى ترتيبه قريه
 بر نوع عسكر ترتيبى رآى ايدوب شويله كه : وزرا متصرف اولدقلى منصبلرينك
 نمارينه كوره قبولرينى ترتيب و دائماً تعليم و تعلم ايله امرار وقت ايتمك و عساكر
 مرتبه نك ما كولات و ملبوساتلرى اياالتن بلاولده محلول اولان تيماروزعات فائضندن
 و برمقدارى قريه لردن و برمقدارى منصب نماسندن اداره و برمقدارى جانب ميريدن
 اعطا اولمق و اول ترتيبك طوپ و مهمانى نفراتيله معا واليسى عندنده مهيا اولمق
 خصوصلرينى تدبير ايتدكدن بشقه ينه ترتيب عساكر بختنده ديركه حين اقتضاده محالاً
 ترتيب و صوب مأمورلرينه تسير اولنه جق عساكر ك و رودينه دكين طونه نك قارشو
 طرفلرى عسكردن خالى قالغله اناطولیده شجاعت ايله معروف اولان بعض
 عشائر ك و دوبرجه طرفلر نده اسكانيله اول سمترلده برمقدار عسكر بولمق مصلحته
 اوفق ظن اولنور و باشسز و بوغسز روم ايلیده پريشان اولمش تانار طائفه سنك
 اوزرلرينه بر باش تعيينيله برمحلده اسكانلرى رفته رفته تكثيرى موجب ولدى الاقتضا
 ايشه ياراملرينى مستوجب اولمق خاطره كلور و دلى اورمان و حواليلر نده اولان
 اشقيا و سلاطين كلياً منع اولدقندن صكره قرى اهايلر ندين سوز صاحبلى كفالتيه
 عسكر ترتيب و مصارف لازمه لرى افلاق و بغداد مملكتلر ندين و داخل اولديغى
 ايالتك محلول زعامت و تيمار ندين تنظيم و تعليم ايتمك و بونره سلاستره واليسى نظارت
 ايلمك اوزره ترتيب اولنديغى صورته لى الاقتضا سلاستره واليسى ترتيب كرده سى
 اولان عساكر و قپوسى خاقى و طوبرجه و بوجاقده اسكان اولنه جق عشائر و طوپ
 و مهمانى استصحاب ايله محالاً قالقوب بغدانه عزيمت برله محافظه مملكته قيام ايتمك
 ماده سى حصولبولور .

تيماروزعات محلولاتندن برمنوال سابق حقى بك تصور ايتديكى وجهله والير
 معيتنده ترتيب اولنه جق عساكر ك اسحاب تيماروزعامتدن دهازياده ايشه يارايه جقلىرى
 عقل قبول ايتمز اناطوليدن بعض عشائر ك روم ايلي يه نقلى منافع كثيره ني موجب
 اوله جغنده شبهه يوقدر . لكن صحيحاً عسكر لكه يارايه جق برعشيرتك نقلى دخى ينه
 برقوتلور دويه توقف ايدر قالديكه عشائر و قبائل عسكرى برمنتظم اردو معيتنده
 خفيف سوارى ايشلرينه يارار يوقسه مملكت محافظه سنه قادر اوله مز بو عصر لرده
 تانار عسكرى ايشه ياراسيدى كندو يوردلرى اولان قريمى محافظه ايدو بيلور لردى .

* يومية ماده سى *

يومية عساكر بختنه كلنجه بونده دخى رآيلر اختلاف اوزره اولوب عبدالله ملا
 افدينك بالاده تنظيم عساكر بختنده ايراد اولنان مطالعاتنده مندرج اولديغى اوزره

ترتیب اوله جق عساكرك مصارفنه قارشولوق بولوق حقننده آنك رأی اوزره
 اسرافاتك منعی و مصارف غیر لازمه نك تخفیف ورفعی و برده آنفا ذکر اولندیغی اوزره
 حتی بلك دیدیگی کبی بر مقدار تعیینات دخی قضالردن ترتیب اولنمی خصوصی لریدر .
 راشد افندی یومیه نظامی حقننده دیر که سوز اسافله دوشمامك ایچون حکیمانہ تثبت
 لازم کلمکله اولا اوجاق اسکیلرندن نفوذ و اعتباری درکار و دولتك رضا جویلغنده
 اقدام و صداتی بیدار اولان مجرب الاطواری بالاتخاب جوائز و عوائد و هدیه
 نامیله برآچه و بر حبه آئمه روق یکیچری اغاسی نصب و آنك معرفتیه رفته رفته کذلک
 بلا جائزه صدقاتکاراندن اوجاق اغاری اتخاب و تعیین و وصای لازمہ تلقین
 اولندقدن صکره بر از مدت مرورنده شوکتلو افدمز حکیمانہ اندرون هایونی
 تحری و یکیچری او جاغندن اسامی به متصرف اولنلری تحقیق و احجابی ارضا برله
 بدلرندن اخذ و بردستماه وضع و بررکاب کونی یا خود صدر اعظم لمصحة واردینی کون
 بونلر اندرونده ایش یکیچری اسامیسی اندرون اغارنده طورمنك نه مناسبتی وار
 بونلری او جاغه ویر خزینه مانده اولمیوب نفر اسامیسی اولسون دیو صدر اعظمه
 تسلیم ایدوب اودخی دفعه او جاغه کوندر میوب یکیچری اغاسی یانه کلد کده ائشای
 صحبتده کچن کون حضور هایونه رخسوده اولمشیدم شوکتلو افدمز شو اسامیلری
 ویردی اشکنجی نفر اسامیسی اولسون و ویریلان جنك احجابی توانا یکتلردن اولسون
 دیو امر بیوردی دیو یکیچری اغاسنه شویله جه تسلیم ایتدکنصکره صدر اعظم
 دخی کندو دائره سنی تحری ایدرک یکیچری اسامیسی اولنلری تحقیق و احجابی
 ارضا برله سندلرینی اخذ و بر هفته صکره یکیچری اغاسی کلد کده اغا حاضر تلری
 کچنلر ده شوکتلو افدمز دائره هایونده اولان اوجاق اسامیلرینی اشکنجی نفر
 اسامیسی تنظیم اولنمق اوزره ویردی لر بزده سزه تسلیم ایتدک سزک دائره کزده
 دخی وارد دیو بزلی اخطار لازم ایدی نیچون ایتدیکنز بنم صکره دن
 خاطریمه کلدی شوکتلو افدمز ویرد کده بزنیچون ویرمیلم صکره سؤال ایدر ایسه
 نه جواب ویرم هله تحری و تحصیل ایتدک آل بونلری دخی اشکنجی نفر اسامیسی
 تنظیم ایله دیو تنبیه و تسلیم بیورر لر بعده کتخدا بک و رئیس افندی و دفتر دار
 افندی و بونلر امثالی رجال دولت علیه دخی صکره دن استماع ایش اوله روق دائره لر
 اسامیلرینی جمع ایله بوموال اوزره تسلیم اولنور . و بوقضیه یالکز شیخ الاسلام
 افندی یا شراب اولنوب آنلر دخی تبعیت ایله قریحه لرندن اوله روق بویله جه ایتدکلر نده
 صدور کرام استماعه طبیعتیه بواثره اقتفا ایدر لر رفته رفته علما و رجالک مادونلری
 دخی بوضورتی اجرا به مجبور اولور لر بر مدت مرورنده یکیچری اغاسندن اسامیلرک

اشکنجی نفراتی تنظیمی کیفیتی نیجه اولدینی وقاچ نفره بالغ اولدینی سؤال اولنور
 و شاید شوکتلو افندمنز سؤال ایدر بونفرات بشقه اولسه و بلکه بر صحرایه ایستور
 ایسه جمله سی موجود بولوب دیار آخرده اولسه خوش اولور اغا حضر تلی بوکا
 برکوزلجه نظام ویرسه کز هم اوجاق احیاسنه وهم شوکتلو افندمنزک تحصیل
 رضاسنه موفق اولمش اولور سز دینلور و بو صورت آزوقته اولیوب برسنه قدر
 وقته محتاج و اولوقته قدر او جاغه اعتبار اوله یور پادشاهمز اسامه خزینه مانده ایتیموب
 نفره ویره یور شایعه سی آحاد و نفرات لسانلرینه دوشوب بوندن صکره قبولی اسامه سی
 اراندقده اوجاق قوقونوسلری سوزی ایاغه دوشورمک وقته و حوادث چیقارمق
 اسبابندن محروم اولور لر بوتقدیرجه اغا ایله شویلیشیلوب ایشته اندرون و بیرون
 و علمدان اولان اسامیلردن برآچقه سی خزینه مانده اولنیموب اشکنجی نفر اسامیسی
 تنظیم اولندی و اوجاغک یوزی کولدی بونلردن معادا قبولی اوله رق نه مقدار
 اسامی وار ایسه یه بونلر کی نفرات تنظیمی ایچون تقدیم ایده سز دیو اول وقت
 فرمان یازلقدقه شمانت اولمز محظوظ اوله رق تقدیم دفتر ایدر لر . طویچی اسامیلری
 بوتکلفاته محتاج اولیوب یکچیری اوجاغنه صورت مرقومه هضم ایتدیرلر کدن
 صکره بونلر بیاغیجه یوقلانور و اثبات وجود ایتیانلرک اسامیلری ضبط ایله یرلرینه
 اهل و اربابی قونیلور .

دفتردار شریف افدینک بوبابده لایح خاطر ی بالاده تنظیم عسکر بچشنده ذکر
 اولدینی اوزره اوجاقرده بلا جائزه بر اهلیتلو اغانصب اوله رق آنک معرفتیه
 تسوییه مصلحت اولمنسی خصوصیدر .

رئیس الکتاب عبدالله بری افدینک و محاسبه اول الحاج ابراهیم افدینک رأیلری
 دخی کدک اوجاقرده معتمد کسنه لر استخدام اوله رق محلولانک کتم اولنماسی
 وقاعده قدیمه لرینه رعایت اولمنسی خصوصاری کندولرندن مطلوب اولمق صورتیدر .
 انوری افدینک مطالعه سی دخی بوسیاقده اولوب بونکله بیله یکچیری اغانی
 سرحدلر دن کلان اغالره و یریلوب چور باجیلقدن و محضر اغالغندن سرحد کزمدن
 طور ناجی و صامسونجی اوله رق آزوقته اغا اولماق و چوقلق تقاعد و یرلمه رک
 بالتدریج اشکنجی اسامیسی تزید اولمق خصوصلرینی دخی علاوه مقال ایلمشدر .
 انجق صدور کر آمدن عاشر افدی یکچیری اغانی اوجاقدن اولیوب کافی السابق
 ذات شاهانه نک خیر خواه اغالردن نصب ایله ضابطانده اولان یومیه نک رفته رفته
 ترقین اولمنسی تدبیر ایتشدر .

کتخدای صدر عالی مصطفی رشید افدی دخی محلول اسامی کتم اولنماق اوزره

هرقدر تدبیر اولسه مفید اولیه جغنه بناء سنوی بش بیک آنچه محلول ویرلمک اوزره
مقطوعاً او جاقلره بر رابطه ویرلمک طبیعت مصالحته موافق ایدو کنه ذاهب اولمشدر .

شریف افدینک یولو قولی نامیه سرحداته بولنان عساکر موظفه نک یومیه سی
حقدنه مطالعه سی دخی فیما بعد محلول اولان یولو قولی یومیه سنک نصفی خزینه مانده
ونصفی روسیه مقابله سنده اولان سرحدلرک اغا وضابطان و نفراتنه علی الترتیب ترقی
توجیه اولنهرق اغالرک یومیه لری ایکیشر یوز قرقر وضابطانک یوز سکسانر
ونفرانک یوز بیکر میشر آنچه یه ابلاغی جائز اولمق و سفر اولدقده بونلردن اولان
خزینه مانده لر نه مقداره بالغ اولور ایسه حساب اولنوب دشمن قارشوسنده اولان
سرحدلره یوز بیکر میشر آنچه یومیه ایله اول مقدار نقرات یازلمق صورتلریدر .

بو خصوصده الحاج ابراهیم افندی دخی سرحدات مواجی تقدماً کوندر یلوب معتمد
آدملر معرفتلیله بالتوزیع اوجاق فساداتنک رفعیله بالتدریج تنقیح اولنسنی تدبیر
ایدوب حق بکک مطالعه سی دخی بومرکزده در .

موالی عظامدن خیرالله افدینک یومیه بحشده رأی محمولاتنک علی العموم خزینه مانده
ایدلمسی و اوجاق اغالری مستقیم و صداقتکار اولوب بو خصوص ایچون عبودیت
وبلکه جائزه لری دخی فی الجمله عفو بیوریلهرق محمولات خصوصنده اهتاملری ظاهر
اولدقده عزل اولناملری وقانون قدیم اوزره ویریه جنک علوفه لردن ماعدا تقاعدلر
وچراغقلر ممکن مرتبه ویرلماسی خصوصلریدر .

صالح زاده افدینک بوباده خلاصه ملاحظاتی دخل و صرف خصوصنه دقت و اقدام
و محمولاتنک کتم اولنماسنه نصب نفس اهتام قنمق و علوفه لرک میان ناسده ایراد
وعقار مثللو آلتوب صائلمسی بامر عالی منع اولنمق و اوجاق اغالرنک هنکام نصبنده
جائزه معینه سنندن ماعدا مصارف زانده سی تخفیف ایدلمک مسئله لریدر . ماینجی
مصطفی عفت بک دخی محمولاته دقت و بونلر ایله رفته رفته بالتائی بر فرده غدر
اولیه رق عساکر جدیده مصارفنک تنظیم اولنسنی رأی ایتمشدر .

تذکره اول فردوسی افدینک رأی جبه جی و طوبجی و عربه جی اوجاقلرنک
موجودی و محمولاتی کتم اولنمق یوما فیوما تنزل ایتدیرلمسی و پیاده اوجاقلرنک
دخی تقاعدلرینه زیاده اهتام قنمسی خصوصلردن عبارتدر .

راسخ افدینک بوباده تصوراتی رفته رفته اسامی مقابله دشمنده ثبات ایده جنک
نفراته ویریلوب ماعدا سنندن سفره اشمش اوجاق اختیارلردن بشقه هر کیمک یدنده
ایراد ایدینلمش اسامی وار ایسه اوجاقلوسنک رأی و معرفتیه نزع اولنوب حاصل
اولان مزوعات ایله مجدداً یکیکچری نقراتی ترتیب و تحریر و هر اورطیه نقرات

مرتبہ تخصیص اولمق وصیق صیق هر اورطه نك نفرات مرتبه سی یوقلامق وصاحب
اسامی اولان نفراتك متصرف اولدقلری اسامیسی مهورلری دایما کندو یدنده
بولمق ورهن اولمامق وهر اورطه نك نقدر نفراتی وار ایسه جمله سنی شهرتیه
قول کتخداسی بیلک واسامیسز یولداشلیری دخی قاعدۀ او جاقلری اوزره
بر رابطه قویه تحتنه کیرمک و او جاق ضابطلری صادق اولدقلری حالده قید
ضرورتن وارسته اوله رق ارتکابه مجبور اولماق و بونلردن برآچه و برجه
جائزه و عوائد التامق وقید حیات ایله خدمتلرنده اولوب عزللری مجرد خیانت
ویپی زمینده اولمق و برآچه محلول کتم ایدرلر ایسه عزل و تأدیب اولمق شروط
توجیه واستخدا ملرندن اولمق و محلولاتدن اسم و شهرتلیله جدید نفرات تحریر
اولمق وهفته ده نه مقدار محلول یومیه اولور و نه مقدار توجیه اولنور و قاچ نفر
فوت اولور و قاچ نفر تصحیح قلنور ایسه جمله سی معلوم پادشاهی اولمق اوزره
پوصه سی هر جمعه کونی سلامقده یکینچری اغاسی طرفندن رکاب هایونه تقدیم
قانمق خصوصاً تیدر .

حق بکک بوباده مطالعه سی جبه جی و طوپچی و عربه جی او جاقلرینک محلولاتی
بولوب نفراته تخصیص اولمق و نفرات مرقومه شتاده کارخانه لرنده و یازین
صحرالده تعالیم ایتدیرمک خصوصاً لرندن عبارتدر .

* طوپچی بحثی *

طوپچی بختنده دخی لایحه صاحب لرینک رأیلری بویه متشتت و متخالف اوله رق
بوباده یوسف پاشا طشره لرك بعض محللرنده احداث اولنان سرعت طوپلری
برایشه یارامیوب بوجهته خسار میریدن گیری برنسنه نی مفید اولدیغندن بخته ذکر
اولنان سرعت طوپلری و سرعتجی او جاقلری رفع ایله آنلره بدل دولت علیه نك
ترتیب کرده سی اولوب معتمد و صداقتلری مشهود اولان وزیریه ایکشر طوپ و برر
خبره ترتیب اولنورق و خبره تعالیم ایتدیرم لرنی تنسیب و عبدالله ملا افندی بالعکس
سرعتجیلرک بالاده بیان اولندیغی اوزره ابقا و احیاسنی تنسیب ایلمشدر . راشد
افندی دخی سرعتجیلرک ابقاسی رأیی التزام و سرعتجی او جانی عهد قریبده اختراع
اولنمش اولدیغندن اعاده نظاملری قابل اولدیغنی علاوه کلام اتمشدر و بوباده
عبدالله ملا ایله راشد افندی نك رأیلری موافق مصلحت ایدی زیرا عسا کر معلمه
ترتیب اولندیغنی حالده سرعت طوپ بیاغنک اکلی دخی آنک متفرعاتندندر قالدیکه
طوپ بیاق و خبره جیاق فن حربك الك دقیق مسائلی حاوی اولمسیله بریده طوپلیجه

اوله رق مهم متوالیه دولته تحصیلنه اقدام اولنور ایسه اکمال اولنه بیلوب یوخسه اوله برر ایکیشر والیر معینلرنده تعلیم ایله بوفنلرک وجوده کتورلمسی قابل اولماز .
 سرعتجیلر حقننده شریف افندی دخی یوسف پاشانک رأینه ذاهب اوله رق سرعتجی نفراتنک فائده سی مشاهده اولنماغله ومحدث اولملریله کلیاً رفع اولنه دیوب انجق قدیم طوبجی اوجاغنک اصلاحی حقننده رأی مخصوصی واردر شویله که :
 عربه جی اوجاغی طوبجی اوجاغنه الحاق اولنورق کل یوم سعد آبادده طوب تعلیم ایندیریلوب اثبات لیاقت اینلره اوجاق محلولاتندن وکفایت ایتدیکی حالده یکیدن مکافات اولنمسی وصغیر وکبیر ایکی یوز پاره طوبک کبیرینه یوزر وصغیرینه الیشر نفر طوبجی علی الدوام موجود بولنوب نفر طوبه منسوب اولمسی یعنی قالیونلره اسم تسمیه اولندیغی کی طوبلره دخی برر اسم تسمیه وطوبلرک اوزرینه تحریر اولنه رق فلان طوب کلسون دیندیکی کی بالجه طوبجیلری معاً کک طبیعت ثانیه اولمسی وبرمحلده برطوب قاله جق اولور ایسه بالجه نفراتی طرد ایله یومیه لری خزینه مانده ایدلمسی وبولر فیما بعد بر اوجاغه وبر دائره قبول ایدلمیه رک خلق بیننده رسوا قلملری خصوصاتی تدبیر ایلمشدر . بولک وطابورلری برر تعبیر ایله تمیز ایتک اصولی خاطره کلدیکندن بویله طوبلره اسم وضع ایتکه حاجت کورمشدر . لکن برطوبه نهایت یکرمی نفر کافی ایکن یوز قدر آدمه لزوم کورمسی نه مطالعهیه مبنیدر بیلیم .

حاجی ابراهیم افندی استاد طوبجی نفراتنک تکثیری لازمه دن اولدیغندن بحثله مجددآ اراده بیورلدیغی مقدار طوبجی تحریر وعلی الدوام تعلیم اولنوب فقط میری به کثرت مصارفی موجب اولماق ایچون طوبجی اوجاغنده بعض تصرفات حکیمانانه ایله چاره سی بولنق اوزره بالذا کره نظامنه باقلمسنی و عثمان افندی نااهلدن طوبجی یومیه لری آلنه رق ایشه یارار یکتلره ویریلوب هر بار طوب تعلیمیه کسب مهارت ایلملرینه سعی ایدلمسنی بیان ایتمشدر .

فردوسی افندی نک مطالعه سی هر کس ایله اختلاط ایتامش ویوزی کوزی آچلماش کساندن اوله رق بعض قری وبلاددن مهمات وطوب وعربه خدمتلرنده قصور ایتماک اوزره یارار کفیلر یله مقدار کفایه جبه جی وطوبجی وعربه جی نفراتی ترتیب اولنوب آخر کسب وکاره محتاج اولیه جقلری صورتده تعینات وکسوه وسائر مالزومه لری جانب میریدن اعطا اولنق خصوصلریدر عساکرک ایفای وظیفهده قصور ایتاملرینه متکفل اوله جق انجق حسن ضابطه ونظام اولوب بوباده شونک بونک کفالتی مشر ومؤثر اوله میه جنی بیاندن مستغیدر .

راستخ افندی فی الاصل طویچیلر کاتبی اولوب بعده ایکی سنه دخی سرعتجی ناظری
 بولندی جهته بو باده اصحاب معلومه دن معدود اولدیغنه مبنی بومبختنده تطویل
 کلام ایدوب خلاصه افاداتی بودرکه دوات عایه نک کثرت اوزره طویچی نفراتنه
 اشد احتیاجی درکار و بونلرک فن طوب اندازیده کسب مهارت و کمال ایلملری اهم
 و الزم ایدوکی بدیدار اولدیغندن بونلرک ضابطانی تحت رابطه یه قونیه رق واجنبی
 و او جاقولوسنده یمککک نامبله اولان کایتلو اسامی نزع اولنه رق زیاده یومیه ایله مجدداً
 نفرات تحریر و ترتیب اولمغه محتاجدر زیرا بو او جاغک مقدمه اسامیسنگ دوت
 بلو کده ایکی بلوکی یمککک نامبله ضابطان او جاغده و بر بلوکی قبولی تعبیر ایلدکاری
 چوققدار و ایچ اغاسی و سائر اجنبی یدلرنده و بر بلوکنک نصفی عملمانده و اختیارانده
 و فقط نصفی طویچی دیدکاری نفراتده در حتی سرعتجی نفراتنک دخی عدم نظامنه
 باعث اولان حالتدن بریده بودرکه طویچی او جاغنک خدمتلی چوققدر از جمله
 قولقلرنده نفر اولدیغندن حین اقضاده کارخانه ده یا خود طویچخانه میداننده بر محله
 طوب نقلی لازم کلد کده عتیق طویچی نفراتی اولماغله مجموع خدمتلینه سرعتجی
 نفراتی سورر لر و سرعتجی قشله لرینه مرتب اولان نان و گوشت تعییناتی ضابطانی
 اکل ایدوب نفراتی آچ کزدیر لر اگر چه بو سرعتجی نفراتنک یومیه لری اون بشر
 یکر میشر آنچه اولوب لکن مقابله سنده دخی بو تعداد اولتان محن درکار اولمغه
 هوسکاری بولنیور و طویچی او جاغنه ربط اولندیغندن ناشی سرعتجیدن فوت
 اولملرک یا خود فرار ایتملرک لرینه او جاقولوسی معرفتیه بولنان کمنسه لری ناظر
 اولان کیمسه اگر چه تحریر ایدر اما هوسکاری بولندیغندن او جاقولوسنگ تدارک
 ایله تحریر ایتدیر دکاری نفراتنک اکثر یسی سارق و بر محله صیغمز و بر طرفده قبول
 اولتماز قبطنی و نه ایدوکی بیانمز اشخاص مقوله سی اولمغه بر محل تدارک و یا خود
 برشی سرعت ایدنجیه دک قرار و بعده فرار ایتملریله بونلرک بو صورتله دوامی و تعلم
 و تکثری ممکن اوله ماز بو فقیرک وقت مأمور یتمه طویچی و یکیکچری اوله رق اوچ
 بیگ نفره قریب سرعتجی اسامیسی وار ایدی و طشره لرده دخی بعض محللارده
 مرتب رلو سرعتجیسی مقید ایدی استماع اولندیغنه کوره اشبو سفرده بر یار اراق
 ایده مدکار ندن بو قدر مصارف و زحمت و اهتام هوایه منقلب اولدی نفرات مرقومه نک
 نظاملرینه دائر خاطره کلان بودرکه بونلرک عددی نصفی مقداری و یومیه لری ایکی
 قات اولسه و هر یوز نفری بر اورطه اعتباریله هر اورطه یه بر ضابط تعیین و جمله سنه
 براغانصب اولوب انحق ضابط تعیینی ویول وارکان اجتراسی طویچی او جاغنه ملحق
 اوله رق سائر خصوصلری کرک نفراتنک تدارک و اعمالی و سرعت تعلیمی و کرک

مواجهه‌ی اینک اعطایی هب سرعت اغاسی و سرعت ناظری معرفت‌لیه رؤیت و هر اورطه‌یه اونر طوطی تخصیص ایله اوزر لینه اول اورطه‌نک علامتی ضرب و مهور لینه دخی کذلک اول اورطه‌نک علامتی تحریر اولسه و محاربه‌یه کوندردلک‌کننده فوز و نصرت ظهورنده فقط اول محله بولنان طوطی نفراتنه زیاده ترقی یعنی اون اون بش آخه‌یه قدر ترقی ویرلمک و بووجهله نصرته بولنانلرک یومیه‌لی یوز یکرمی آخه‌یه دکن رسیده اولمق و بونفراتدن بریسی آخر دیرلکده اولماق مشروط قلنسه بوزمه تحت رابطه‌یه کیرمک و هوسکاری چوق بولمق صورتی ممکن اوله بیلور ظن اولنور .

خیرالله افندینک لایحه‌سنده دخی مرحوم خلیل حمیدپاشانک ایجادیلدیکی سرعتجیان اوچاغنک تنظیم و تکمیل و طوطی اوچاغنک دخی خدمتی کران اولغله یومیه‌لرینک خدمت‌لرینه کوره ترتیبی و یکچری اورطه‌لرینک هر بلوکنه ایکیشر یا خود اوچر عددلوازمیه سرعت طوطی‌لر تسلیم و هر برطوپه اونر نفر سرعتجی اول اورطه‌دن تعیین برله مقابله دشمنده اول اورطه‌نک ضابطانی سرعت طوطی‌لرینی اعماله معاونت ایلمک خصوصی مذکور و ولی افندی زاده‌نک لایحه‌سنده مقابله دشمن ایچون اسلحه و آلات غریبه اختراعیله طوطی‌لر و سرعتجیلر پیدرپی تعلیم و تعلم ایتدیرلمسی و صالح زاده افندینک لایحه‌سنده دخی بالاده ذکر و ایراد اولندیغی اوزره طوطیخانه اوچاغنه ترتیب اولنه‌جق نفرات جدیده‌نک هفتده ایکی کون تعلیم ایله کسب مهارت ایدنلرینه ترقی و عطایا ایله تشویق اولنسی مسطوردر .

* سواری اوچاقلری *

سپاه و سلحدار و بلوکات اربعه حقنده دخی رایلر مختلف اوله‌رق راشد افندی بوخصوصده دیرکه بونلرک نظامنده صعوبت اولمیوب قبل پادشاهیدن بو اوچاقلر سائر عسکریدن خالی برحمله تعیین اولنوب واستانبولده و طشره لرده اولان نفراتکزی درت آیه قدر محل مرقومه جمع ایدک یوقلانده جقدر دیو فرمان یازیلوب اول امرده یوقلامه محله قریب بردائرله وزیر بروسیله آخری ایله تعیین واقامه ایتدیرلکدن صکره متدین و عقیف و مدقق رجالدن بری یوقلمه‌جی تعیین اولنوب و معیثه صادق کاتبلر تعیینیه برر برر یوقلانوب ناموجودلرینک اسمیلری ضبط و سریان ایدن فسادک دفعی اسبابی بالملاحظه استحصال اوله‌رق و چاوشلر خونہ‌سی تقلیل قلنه‌رق مجدداً برآز نفرات ترتیب و آخرزی و کاره کیرر ایسه اسمه‌سی رفع و کندوسی و ضابطانی تادیب قلنه‌جقلری شرط قانور بونده دخی اغالردن جائزه و اغالر دخی

کتبخدالردن عوائد و علی مراتبهم چاوشان و کتابدن برشی آلامق لازمدرکاره ارتکاب
اربابنه تأدیب مشر اوله .

عبدالله ملا افندی بو خصوصه راشد افندی به مخالف اوله رق دیرکه بوسواری
او جاقلری حقنده عجله بیورلیوب یکچری او جاعی ترتیب ایله منقادیکچری تدارک
اولندقدنصره سپاه و سلحدار ضابطانی نامنه اولان خونهک تحریک فتنه به قدر تلی
قالیوب اولوقت تنظیم اولنمق سهل اولور .

حاجی ابراهیم افندی دخی سواری او جاقلرینک بالتدریج اصلاحنه ذاهب اولوب
شویله که : اولابو او جاقلره برصادق و مستقیم سپاه و سلحدار اغانسی و فن کتابتده ماهر
وصاحب درایت برکمنه سپاه و سلحدار کاتبی نصب ایله برقاچ سنه مستمر اوله رق
او جاق نظامی کندولردن مطلوب اولنوب انلر دخی ارباب و قوف ایله بالذا کره
صورت نظام حاللری عرض ایلمک و بو او جاقلرده چاوشان و ضابطان و کتبه نامنه
اولان کمنه لک فی الاصل عدد معینلری هر نه ایسه اول رتبه به تزیل اولنوب زیاده
اولماق و توجیهاتلرنده اقتضایدن تصرف قاعده سنه رعایت اولنمق صورتلریله تدریجی
مطلوب اولان نظامه ادخاللری تصور اولندیغنی بیان ایلمشدر .

انوری افندی دخی بو او جاقلرک تدریجه نظاملری ممکن اولدیغنی بیان ایدوب
شویله که : اغالری بلاجنجه تبدیل اولنماق و فیما بعد طور به صاحبلرندن وفات ایدنلرک
طور به لری ضبط ایله ایچنده اولان اسامیلردن صاحبک اسمنه مطابق اولمیلرندن
اون آقده بروباخود ایکی آقده خزینه مانده اوله رق اصل اسمنه تصحیح و مجدداً
سندی یدینه اعطا اولنمق و بلا صاحب قانلری دخی خزینه مانده ایدمک طریقله
بالتدریج بش اون سنه ظرفنده اصلا انکسار آلمیه رق و بلکه دعا آلنهرق نظام قدیمه
کیرمکه باشلایوب کیدرک اولکی قوتن بوله جغنی تقریر و دفعه نظام عسیر و بلکه
بددعای موجود دیو تحریر ایلمشدر .

فردوسی افندی بوبابده رأی بو او جاقلرک موجودی بیلنوب کتم و قوعبو لامق ایچون
نفراتنک اسم و شهرتلی و ولایتلی و ساکن اولدقلری شهر و محله لری بیلنمک و یکچری
او جاعنک اورته دفترلری مثللو اورطه کاتبلری دفترلینه شهرتلی تسطیر و بر
شهرت دفتر سواری مقابله سنه ویریلوب حفظ اولنمق و بر تقاعد اسامی برقاچ
سنه ظرفنده اوچ بش کمنه به کچدیکی مسموع اولمغله بو خصوص دخی بر نظامه
مربوط قلمق خصوصلرندن عبارتدر .

* خبره جی و لغمچی *

خبره جی و لغمچی او جاقلری حقنده یوسف پاشانک رأی بودرکه خبره جی و لغمچی

نامیله زعامت و تیماره متصرف اولان نفرات امتحان اولنهرق استحقاقلری تین ایدنلرک تیمار وزعامتلی اوزرلرنده ابقا بوفندن غافل اولنلرک تیمار وزعامتلی رفته مجدداً اختراع اولسه جق خبره جی ولغمجی به ویریه جک علوفه لره مقابل جانب میریدن ضبط اولنق و بوجه مشروح اصحاب استحقاق اوزرلرنده ابقا اولنان تیمار وزعامتلی محلول اولدقجه اولاده یاخود آخره توجیه اولنموب کذلک جانب میریدن ضبط ایله علوفه لری ویرلکدن صکره فضله سی قالورایسه سائر مصارف حربیه ایچون آروجه حفظ قلنق خصوصلری تدریر ایلمشدر .

بو خصوصده عبدالله ملا دیرکه خبره جی ولغمجی او جاقلری متروک و منسی قالب مع هذا بوقدر کیتلو زعامت و تیمار لره خبره جی ولغمجی نامیله روم ایلیده وناطولیده برآلای اشخاص بیهوده متصرف اولوب ایام محاربه ده خبره جی ولغمجی و مترس آلیجی بولنامغله خبره جی ولغمجی باشیلره مؤکد امر بیوریلوب هر نه محله زعیم و تیمار لو وسائر خبره جی ولغمجی و ارایسه قیودات موجبجه جمله سی کتوردیلوب قاضی کوی یاخود سائر مناسب محلارده تعام ایستدیرلک و کلیانلر زعامت و تیمار لری خاصه چالینوب ایراد ایسه مجدداً نفرات تحریر اولنق کبی تدایره تشبث اولنق لازمدر .

شریف افندی دخی خبره جی ولغمجی او جاقلری طوبجی او جاغنه الحاق اولوب سعد آبادده تعلیم ایستدیرلره ک فننده ابراز مهارت ایدنلره طقسان طقوز آچقه ویریلوب زعامت و تیمار لری محلول اولدقجه خواص هایونه ضبط اولنه و یوز پاره خبره نک اللشر نفر دن بشیک خبره جیسی اوله و فننده ماهر اغمجی بشیوز نفر اولسه کفایت اتمکله زیاده رخست ویرلیه دیدکدن صکره برمنوال سابق طوبلره برر اسم تسمیه سی تنسیب ایستدیکی کبی عینله خبره لره دخی بو وجهله برر اسم تسمیه اولنسنی عرض و اخطار ایلمشدر .

برناتو نام فرانسز دخی امور حربیه ده دائر تقدیم ایلدیکی لایحه سنده دولت علیه طرفندن خدمات حربیه ده تعیین اولنمش اولان فرانجه اوفچیللرینک اهتمام و غیرتلی بر وفق دلخواه بر نتیجه خیریه یی منتج اولماسی حدود دولت علیه یی اعدانک قصد و خیانتدن صیانت ضمنده اهم اولان تدایر خیریه و قواعد کلیه نک اجراننده اهمال و مسامحه اولندیغندن و ترتیب اولان تدارکات و تدایر حربیه نک بعضیسنده اهتمام و بعضیسنده اهمال تام اولنمغله بر برلینه عدم مطابقندن و خصوصات سائرده لایقی اوزره اهتمام اولندیغندن نشئت ایلدیکی و بعد ازین امور حربیه ده بو گونه مسامحه دن لازم کلان مضرات متنوعه یی دفع اتمک خصوصه دولت علیه نک

اراده‌سی تعلق ایدرسه بو خصوصك تمشیتنه مأمور اوله‌جق ذاتر مرقوم ایله بيله
 گاه و بیگاه طوپیچی و خبره‌جی کارخانه‌لرینی و مهندس‌خانه‌ینی و سرعت‌جیلر تعلیم‌کاه‌لرینی
 دقله تفتیش و تفحص ایتدکن نصکره رونما اولان بعض مخاذیرك رفع و تصحیح‌نده
 واستحسان اولنان اعمالك تعجیل و تنقیح‌نده ذکر اولنان مأمورلرک مرخص
 اولملری اهم و مهامدن ایدوکنی و مکمل اسلحه ترتیب و عساکر تعلیم و سرعت
 طوپلری و طوپ‌نجیلری توفیر و قلاع و بقاع و حدود و نفورک احوالی اوروپا قواعدی
 اوزره تنظیم اولتمق و ضابطان و سرعسکران دخی فن محاربه‌ده کسب تفتن ایتمک
 لازمه‌ حالدن بولندیغنی و کندوسنک فرانسه دولتی طرفندن بو حوالی‌یه مأموریتی
 حدود دولت علیه‌نك استحکامی ضمننده تداییر لایقه‌ینی افاده و عساکر اسلامی‌نك
 اعدایه مقابله ضمننده محتاج اولدقلری بعض قوانین و قواعدی ارائه ایتمک
 و یکدیچریلرک مألوف اولدقلری تفنکرک رفعیله اوروپاده مستعمل اولان تفنکرک
 استعمالنه آلدیرمق مقصدینه مبنی اولدیغندن ایکی سنه دنبرو کمال دقت و بصیرت ایله
 صرف افکار ایدرک حدود و نفورک استحکامنه دائر بر رساله تألیف ایتمک اوزره
 اولدیغنی و شش‌خانه‌لرک منزل بعیده اصابتی مشاهده ایلمش اولدیغندن متریس آلتنده
 محاربه‌ده فائده‌سی مسلم اولسیله جمیع عساکر تفنکرکینک تغییرینی مناسب کوره‌مدیکینی
 بیان ایدوب بونکله سالف‌الذکر خلاصه رساله‌سی ختام بولمشدر .

بالاده اشعار اولندیغنی و جهله موضوع بحث اولان ماده‌نك اصلندن خبر و آگاه
 اولیان ذواتك آرای مختلفه‌سی طویلامقدن فائده مأمول دکل ایسه‌ده چونکه هر بر
 عمل و حرکتیه شروعدن مقدم مشورت ممدوحدر و مشورتده تتبع و تأنی ایتمک
 و عملده چست و چالاک و تیز دست و تیز کار اولمق شروط لازمه‌دندر و هر امرده
 قبل‌الشروع تأمل و تأنی و بعد‌الشروع تمشیتنه کرمیت اوزره مسارعت ایت افراط
 اوزره موسوس برایش کورمز قلیل الملاحظه تیز یا کیلور دیمشله بناءً علی ذلك
 سلطان سلیم خان حضرت‌تلی نظامات جدیدیه قرار و یرمک خصوصنده اختیار
 تأنی و امهال و قرار کیر اولدقدن نصکره زیرده بیان اولنه‌جینی و جهله اجرا آتی
 تعجیل بیورمشدر .

* عبدالله افندی لایحه‌سی و بعض ملاحظات *

سالف‌الذکر لایحه‌لرک اک مشهوری تاتارجق عبدالله افدینک لایحه‌سیدر کیفیت
 ترتیبی و خلاصه‌ مندرجاتی بوجه زیر بیان ایدلم .
 لایحه‌ مذ کوره طقوز بند ایله بر خاتمه‌ینی حاوی رساله قلقلو بر لایحه‌ مفصله‌در .

بند اولی عساکرک احوالیله ترتیب و نظاهلرینه دائر اولوب خلاصه مندرجاتی بالاده ذکر اولمشیدی .

بند ثانسی طریق عامیه نك احوالیله تصحیح و اصلاحنه دائر اولوب بو طریقك نه حاله كلكش اولدیغنه دائر اولان افاداتی مقدمه كتابك بشنجه فصلنده اجمالاً ذكر اولمشدر .

تصحیح و اصلاحنه مقدمه اولق اوزره بیان ایتدیکی تدا بیرك خلاصه سی دخی بودر كه اولاساسی دخول تدریس و قضا اولان ملازمتلر بعد ازین بذل و فروخت اولغیوب قانون قدیم اوزره ویرلمسی و اعطاسی لازم كلان ملازمتلر دخی مجرد بالاستحقاق استعدادی نمایان اولنلره ویرلمسی و اكبر موالیلك علم و معارفه سعی و كوششی ظاهر و كسب معارف و كماله استعدادی رفتار و كفتارندن متبیین و باهر اولان اولاد و احفادلرندن ماعدایه قانون قدیم اوزره قطعاً مساعدده و انماض اولمق سزین بوجه دقت و امعان حقیقی امتحان اولمدقجه و هر حالده عرض و استیذان ایله اراده سینه صادر اولمدقجه خارج مدرسه سی رؤسی اعطا اولنماسی و اولاد موالیلك دانش و عرفاندن عاری و بی بهره اولنلرینه خارج مدرسه سی بدلی اولق اوزره معیشت احسان اولنلر ق عداد مدرسینك تقلیلنه سعی اولنوب یوزالی و نهایت یوز سگسان مقدارینه دك تنزیل برله بقعه و وظیفه سی اولیان هوایی مدرسهلر سلسله لر وقوعنده دفتر مدرسیندن ترقین و وظیفه سی اقل قلیل اولان مدرسهلر دخی طریقندن اخراج ایله درسیه و دارالحدیث اولق اوزره فقرادن تدریس ایله مشغول اولان ذواته توجیه اولنسی و عهد قریبده مخرج اعتبار اولنلر ق كثرت موالییه سبب اولان ایوب و اسكدار قضالریك یا مناصب دوریه اربابنه و یا خود بوجه ارپهلق قضا عساکر و كبار موالییه توجیه اولنلر ق ارپهلق اربابی اولان موالییه زیاده جه ارپهلق ویریلوب آنلر دخی عاداتلری تنزیل ایله ارباب دانش و معارفدن متدین و متشرع و عقیف نأبلر استخدام ایلملری و طریق تدریسه نسبتله طریق قضا نك اختلالی صدمه تبه افزون اولدیغندن همان مهما امکن نظامنه تشبث اولنلر ق بعد ایوم ماتجی اولیان خدمه و اتباع و اصناف و تجار و سائر ارادل و اسافله دخول مناصبی توجیهی ممنوع اولوب قاضی عسکرلر توجیه دیوانلر نده كتب فقه و فرائضدن دقت نامه ایله علناً امتحان ایدر ك استحقاقی نمایان اولمدقجه برفردك طریق قضایه ادخال اولنماسی و قضا موجودیندن اجرای حكومت شرعییه قدرتلی اولنلر بالنفس منصبلری ضبط ایدوب مقتدر اولیانلر دخی قاضی عسکرلر ك نظارت و معرفتلیله قضا نك متشرع و مستقیم كمنه لری انابه ایتملری و عهد قریبده احداث اولنان

هوا منصبیرینک اعطاسی ممنوع قلنمی خصوصاتی دستور العمل و مرعی الاجرا اوله رق بش اون سنه ظرفنده طریق علمیه ناهلدن تطهیر اولوب بر طرفدن دخی الاقدم فالاقدم قاعده سنه بعضاً رعایت ایدلمیه رك مجرد ارباب طریق تحصیل علوم و معارفه ترغیب ایچون همان شرف علم ودانشه اعتباراً ارباب فضل و كلك سائر ترجیح و امثالندن جهلایه تقدیم اولنلمری مطالعاتی عرض ایتمشدر .

مطالعات مشروحه اگر چه طریق علمیه نك تصحیح و اصلاحی حقنده تدبیر کافی دكلدر انحق عبدالله افندی بونلری مقدمه تصحیح اولق اوزره عرض ایتمشیدی . و اول ائنده آندن ایلروسنك اجراسنه وقت و حالك مساعد اولمدینی دخی سیاق افاده سندن اكلاشیلور .

واقعا یوقارولرده بیان اولندینی اوزره طریق علمیه نك اصلاحی فرائض حالیه دن ایدی . لکن بونجه ییللردن برو بالتدریج تگون و تحدث ایله علت مزمنه حكمنه كیرمش اولان عارضه فسادك دفعه ازاله سنه اصحاب طریقك عصبيت و تعصبلی مانع ایدی .

بوسبیدن ناشی بو طریقك قولایلقله آرز وقت ظرفنده حالت اصلیه سنه ارجاعی قابل اولمیه جنی حمیدی زاده افندیك بو یابده شدت و سرعتی كندوسنك موجب انقلاب دولتی اولمش اولمسیله ثابت اولمشیدی .

بناءً علی ذلك طریق عامیه نك تدریج ایله اصلاحی یولنه كیدلك صوابدید ارکان دولت اولوب عبدالله افندی دخی او یولده تدابیر موقته عرض ایلمشدر . مع مافیله بوتدابیر موقته تمامیه اجرا اولنسه کلی فائده حاصل اوله جنی دركار ایدی . لکن بودرجه سنك اجراسنده دخی اول وقتك حكمنه جنه صعوبت و مشكلات وار ایدی .

زیرا جلد خامسك او اخرنده اشعار اولندینی اوزره شیخ الاسلام اولان درری زاده عارف افندی اولكی مشیختنده اولدینی كبی بودفعه کی مشیختنده دخی عامه علمادن نیجه لرینی نیل مطلبه دلشاد و خصوصاً اطراف و متعلقاتی مراتب عالیله بر مراد ایلیوب حق سكوت اولق اوزره طلبه علمی دخی بر تقریبله خشنود ایلمکی التزام ایدرك از قدیم بازید دانشمنداندن هر التي آیده ایکیسی اخراج ایله زمره ملازمینه ادراج اولنق معتاد ایکن هر اوج آیده اخراجلرین اعتیاد و عبدالله افندیك تدابیر معروضه سندن بری موالی و مدرسینك تقلیلی خصوصی ایکن عارف افندی بالعكس اولوجهله مدرساك امتحاننه مترقب اولان ملازمینك تكثیرینی موجب بر اصول ایجاد ایلمشدر .

فقط اوزمان یکیدن یکیه برچوق شیلر میدانه قونلمق اوزره بولندیغندن مقام مشیخته بولنان ذاتک نافذالکلم و تهدیدی ایقاعه مقتدر اولسی ملتزم بولمغله عارف افدینک کندو طریقته اولان معاملاتده مسامحه اولنق لازمه خالدن کورلمش و طریقک بالتدریج اصلاحنه قرار ویرلمش ایدی .

بناءً علی ذلک اشبو یدی سنهسی خاللنده بروجه آتی بعض قوانین و نظاماتک اعلانی صر مسنده عارف افدینک تقریری اوزره طریق قضا حقنده اصدار بیوریلان فرمان عالینک خلاصه احکامی فیابعد آرپهلق وسائر مناصب اصحابی حکومت شرعییه اهل نایب تعیین ایلملری ایچون کندولرینه اکیداً تنبیه اولنق و سالف الذکر مناصب اصحابی نایبدرن قضالک تحملمندن زیاده شهریه و خرج باب آمامق و شیخ الاسلام وقت اولنلره اوچر و مشیخت معزوللریله صدور عظامه ایکیشر واستانبول معزوللرینه برر منصب اولنق اوزره حکومته مقتدر امکدارلری ایچون رجا و شفاعت ایلدکلری خالده اعطا اولنوب بونلردن ماعدا رجا و شفاعت ایله برفرده منصب ویرلمامک و بلا امتحان ملازمت اعطا اولنمامق و کمنهیه رتبه سنک فوقنده منصبه و هوایه قید ایله قطع مراتب ایتدیرلیوب هرکس مقتضای طریق اوزره اوچ آیده بر واقع اولان دیوان قاضیسکریده الاقدم فالاقدم قاعده سنجه رتبه لرینک ایصال ایلدیکی منصب ایله بکام اولنق ماده لرندن عبارتدر .

بوایسه رعایت خاطر دائره سنده دائر اولدیغی خالده طریق قضاده رایکان اولان سوء استعمالاتی بدرجه تخفیف ایچون بعض تنبیهاتدن عبارت اولمغله اصلاحات صحیحه صر مسنه قید اوله حق نظاماتدن دکلدور .

عبدالله افندی لایحه سنک بند ثالثی نظام معاملات و سبب مضایقه میریه و تصحیح سکه حقنده اولوب بو بایده اولان مطالعاتنک خلاصهسی بالاده مرور ایلدی .

بند رابعی دار الخلافه دن حرکت و نهضت هایونک فوائد و منافی حقنده درکه آلتش سنه دن متجاوز پادشاهلرک علی الدوام در سعادتده مکث و آرام بیوردقلرینه و اوتوز سنه قدر علی التوالی سفر ترک اولندیغنه بناءً هرکس حضرتیه میل ایله احتشاماته دوشوب بوجهتله وقوعه کلان مظالم و تعدیاتدن ناشی طشره اهالیسی پای تخته هجوم ایتمکله درون استانبولده نفوسک تکثیریه درلو فناقلر تکون ایدوب حالبوکه جبراً خلقک حضرتیدن منعی دخی قابل اولدیغندن بو محاذیرک دفعی حکیمانه تدبیر اقتضا ایتمکله کما فی السابق ذات شاهانه نک گاه ادرنه وکاه بروسه جانلرینه نقل مکان بیورملرینی رأی و اخطار ایلمشدر .

لکن دولت و سلطنت تشکیل ایدن ملتبرک طور بدویتدن طور حضرتیه نقل ایتسی

امر طبیعی اولمغه بوسن و طورده ایکن ظهور ایدن علتله ینه قاعده حضرت اوزره علاج اولمق لازم کلور . مثلاً استانبولده کثرت نفوس ایله تگون ایدن تعفناک دفعنه و کثرت اوزره حریرلرک عدم وقوعنه واسع بولار آچلمق و کارگیر بنالریالمق و تنظیفات بلدییه دقت و تدبیر طبییه رعایت اولمق کبی لوازم مدنیتله چاره بولمق لازم کلور یوخسه حکیمانه صورتله طور بدویته عودت ایتمک چاره سنی دوشونمک وقت و حاله موافق وقاعده حکیمته مطابق رأی و تدبیر دکل ایتمش ظن اولسور .

زیرا طور حضرت مادی و معنوی انواع محاسنی مستیع اولمسلیله برابر ابدان بشریه نک ضعف و نزا کشته و انواع علل و امراضک حدوشنه باعث و بوجهته نوع بشر حقیقه ماده بعض کونه مضرتی مورث اولدیغی کبی معنی دخی انسانده فطری اولان اخلاق حسنه یی افساد ایله بین الناس درلودسائس و تزویرات و وقوعنی موجب اولوب انجق مضرته مادیه سنه طبابت ایله تدبیر اولدیغی مثللو مضرته معنویه سنه دخی تعلیم و تربیه و نظامات ملکیه و سیاست بلدییه ایله تدبیر اولنه رق نصل که حضرت یلر بدویلر کبی طبییسز اوله مازلر ایسه کذلک طور حضرت یته اولان بر قومی خیمه نشینلر کبی باشی بوش و آزاده اوله رق اداره قابل اوله ماز .

بند خامسی ثغور اسلامیه نک استحکامنه دائر اوله رق ممالک دولت علیه نک الک زیاده استحکامه محتاج اولان طرفلری روسیه حدودی اولدیغی بیان ایتمکدن صکره بندر قلعه سنک تشدید و احکامی امرنده قطعاً تهاون و تکاسل اولنماسی و اسماعیل قلعه سنک کذلک احکامی و ممکن ایسه بر مقدار تصغیری و آفکرمان قلعه سنک هان اوزی قلعه سنه بدل اوله بیله جک صورتده استحکامی و خوتین قلعه سنک اصل وضعی موقعده اولیوب باخصوص ایزدنجه طرفدن طوپ آلدیغی جهتله مستعد استیلا برقلعه اولدیغنه و لکن منتهای سرحد اولمق حسبیله اولطر فده برقلعه نک لزومی دخی درکار بولندیغنه منی بوماده نک مخصوص ارباب و قوف ایله مشاوره سی و انابه و صوغوجق قلعه لرینک تقویه و استحکامی ایله برابر ابازه و چرا کسه طوائفک جلب و استمالترینه اقدام و تعلیم و تربیه لرینه اهتمام اولنمسی فریضه حالدن ایدو کبی در میان ایتمشدر .

بند سادس نظام ترسانه و انشای سفن سلطانییه دائر اولوب بومبجده عبد الله افندی قوه بحریه نک اکمالی فرض عین مثابه سنده اولدیغی بیان ایلمکدن صکره ترسانه نک بیهوده مصارف و اسرافاتی تنزیل و تخفیف و چکدیری پاشاقلری رفع و آنره مخصوص اولان مبالغ و فیره امور ترسانه یه تخصیص و دریا قلمنده اولان زعامت و تیمار لر محلول اولدجقه ترسانه یه خاص باغلامق اوزره شمیدین نظامه ربط ایله و سائر و جوهله واردات ترسانه نک تکثیرینه و انشای سفاننده ماهرانکلیز و فرانسه مرانغوزلری جلب

و اجر تلرنده زیاده جه سماحت او انسه رق اورو با اصولی اوزره سفینه لر انشاسنه
 و مهماتک اعلی اولسنه اقدام و دول نصارانک حرروب بریه و بحر یه دایر مؤلفات
 جدیده لری و صنایع هندسیه لری تدارک و بروجه استعمال ترجمه ایتدیرلد کد صکره
 قبودانان و سائر ضابطان ترسانیه و بالجمله نفرات بحر یه صنایع مزبوریه تعلیم ایچون انکلیز
 و فرانسز استادان فن بحر یلری کذلک اطماع و استمالت ایله جلب اولنه رق طو بمحلیق
 صنعتیه خریطه فنک کلیله تعلیمنه اهتمام اولنق و آظه لر رعایاسندن ملاحظده مهارتی
 اولنر استخدام قلمق خصوصارینی دخی موقع رأی و تدبیرده تحریر ایلمشدر .
 دقتدار شریف افندی لایحه سنده دیرکه قریم دشمن یدنده ایکن جمله دن زیاده بزه
 لازم اوله جق دونما اولمغله و قتیله کرسته کس دیر یلوب و یونیلوب و جمیع اجزاسی تهینه
 اولنوب مجدداً انبار لر انشاسیمه انبارده بر قالیونک کرسته و مسبار ولوازم سائری مهیا
 بولنه شویله که : بر قالیون یالمنق مراد اولدقده بر آیده حصوله کله اشته بویله جه یوز
 قلیونک کرسته سی دایما موجود طور و ب قلیون یاپلدقجه ینه یرینه کس یلوب وضع اولنه
 بونظام تمامیه حصوله کلک اون بش یکر می سنه یه توقف ایتمکله بش التی سنه دنفکره
 آچلمسی ملحوظ اولان سفره چوققق فائده سی اولمغله انکلاتره و دول سائره دن
 قلیون مباحه سنه شمیدین رابطه و یر یلوب ایکیشر او چرهان بر طرفدن مباحه اولنه
 و فیما بعد قلیون اداره ایده جک قالیونجی بشقه و جنک ایده جک عسکر بشقه ترتیب
 اولنوب جنکجی عسکره کمی قوللانق و قالیونجی یه دخی جنک ایتک تکلیف اولنوب
 هر کسک خدمتی بشقه اوله و علوفه سنک تکثیر یله و آخر درلو اعتبار لر ایله قالیونجی
 بر صورته کیر میلدیر که قالیونجی یازلمغه رجا و شفاعتله ناس طالب اوله و هر قالیونک طاقم
 تعبیر ایتدک لری نفراتی هر مقدار ایسه بلا نقصان تکمیل بولنوب بر نفری ناقص اولور
 ایسه قبودان تادیب اولنسون و بودونما ماده سی جمیع ماده لر دن اعظم و الزم اولمغله
 ارباب یله کرة بعد اخری مذاکره و مشاوره اولنوب جزئی و کلی جمیع امور نظامیه سی
 قلمه آئوب و قوانین نافعه جدیده بغلنوب فیما بعد دستور العمل طو تیه قالیون
 کرسته سی ولوازم سائره سی و دولت علیه نک سائر مهمات و ذخائر ی . عاداتا خلقت
 رضاسیمه و رایجی ایله مباحه اولنوب و استخدام اولنان عمله یه عادت اوزره اجرت
 و یر یلوب شویله که : استانبولده و سائر محله خاق مالی دولت علیه یه صامغله غیر یلره
 صامق مساوی و عمله دخی سائره ایشلمکله دولت علیه یه خدمت ایتک بر اولوب
 اخذ و عطاده قطعاً تکلف قالمق دن صکره تکالیف دولت جمیع ممالک بر دن توزیع و تقسیم
 و باشارک سفر یه و حضر یه سی دخی بوکا قالیوب او یله جه تحصیل اولنق دولت علیه یه
 و فقر ایه خیر محض اولمغله اشبوماده نافع نک صورت پذیر اولسنه بالاتفاق همت بیور یله .

اول وقتل كرك امور ترسانه ایچون و كرك سائر مصالح دولت ایچون جاری اولان انگریه اصولی اهلینك بیتاب و ممالکك خراب اولمسنه بادی بر کیفیت اولدیغندن شریف افندینك بیان ایلدیكى اوزره بواصول كریهه نك الغاسیبه امنیت مال ماده سنك تأسیسی هر شسیدن اهم و انفع ایدو كنده شبهه یوقدر . لکن اول عصرده اجراسی قابل اوله میوب بوماده خیره قریب العهدده موقع اجرایه قونیلان و امنیت جان و عرض و مال ماده لرندن عبارت اولان تنظیمات خیره نك بر رکنی اولمشدر . بند سابعی تكثیر و توفیر ایراد دولت و تقلیل مصارف زائده حقتده بعض ملحوظاتی عرض و اخطار دن عبارتدر .

بند ثانی احوال و وزرای عظام و میر میران کرام حقتده اولوب بویابده عبدالله افندی دیرکه وزرای عظام ایادیء قویه سلطنت مثابه سننده اولدیغندن قدر و شانلری ترفیع اولوب اکر چه مدت طویله بر منصبده اقامتلی تقدیر نده بعض ملاحظات درکار اولدیغندن تبدیل مکان ایتدیر ملک اصولی دولت علیه دن اولمش ایسه ده درت بش سنه قدر منصب لر نده ابقا و نقل و تحویل مأموریت لر نده دخی وقع و اعتبار لر نك محافظه سنه دقت و اعتنا اولندیغنه بناءً وزرای عظام و میر میران کرام دخی منصب لر دن انتفاع ایله ثروت و یسار صاحبی اوله رق خدم و حشم و بغال و جمال تدارك ایدوب و سفر و حضرده کندولری ایچون جان و باش فدا ایده جك کلیتو اعوان و انصار ایدینوب بوجهته منصب لری اهلینسی ظلم و تعدیدن صیانت و اطراف و اکنافده بولنان دره بکلرینی و سائر اهل فسادی تأدیب و طرق و مسالکی قطع طریقندن تطهیر و تامین ایده کلدکر ندن کافه ممالک و مسالک پر امن و امان اولدیغنی مثللو سفره مأمور اولدقلر نده دخی بلا تکلف خزینه لر یله واسب و قطار و ایشه ررار اعوان و انصار لری ایله و الحاصل مکمل قپولری خلقیله بالنفس حر کته شتاب و منصب لر نده چند سال اقامت و استقلال لری حسیله نفوذ کلام و اجرای سیاست و احکام ایدرک جمله نی دائره اطاعته ادخال ایلمش بولندقلر ندن حوزه تصرف لر نده اولان ایالات و الویه نك باجمله نامدار و صاحب یسار اعیان و اغواتنی و عموماً عسکری طائفه سنی بلا تکلف یرلر ندن اخراج و استصحاب ایدرلر و اثنای راهده رعایای پایمال ایتدیر میه رك محل مأموریت لر یله کیدر لر ایدی ایشته کتب تواریخده فلان وزیر فلان قلعه بی الدی و فلان وزیر فلان محله دشمنه شو وجهله غلبه ایتدی دیو ثبت جریده و وقایع قنسان و وزرای عظام بویله دائره لری مکمل و کندولری احتیاج دن بری اولان نام و شان صاحبی وزیر لر ایدی صکره لری رعایتی واجب اولان دقایق ملکیه دن ذهول ایله لیاقت و استحقاقه باقلمقسزین نا اهلر ره امانت کبرای و زرات احسان اولمغه باشلایوب بو مثللو مجرب

الاطوار اولیان ذوات ایسه هر تقدیر دارات و بدبده ایله کیتسه لرا کثرتیا واردقلری منصبلرنده ضبط و ربطه قادر اوله مدقلری جهته نظام بلادی افساد و شان و ناموس و زراتی بر باد ایده کلدکلرندن اعین ناسده وقع و اعتبارلری قالمیوب ارباب لیاقت و استحقاقدن اولان وزرای عظام دخی بر منصبه نائل اولنجیه دکن جائزه معتاده دن فضله تحمللرندن خارج مصارفه دوچار و دیون کثیریه گرفتار اولدقلری حالده واردقلری مناصبه دخی بر قاچ آی آرام ایدر ایتمز ناکاه مأموریتی مسافه بعیده ده واقع بر منصبه تحویل اولنغله اکثری پریشان حال اوله رق دوران و ایاب و ذهابلرنده بالضروره واردقلری قصبات و قرایی تخریب و تالان ایدرک کچینور و ایکی سنه بر منصبه اقامت ایدنر اولور ایسه آنلر دخی فرصتی غنیمت بیهلرک تخریب بلاد و سلب اموال عباد طریقله تأدیة دیونه چالیشور و بویله کندو اداره و تعیشی اسبابنک استحصاله حصر افکار ایدن وزرا بالطبع اعیان و دره بکلری نامنه اولان اشقیایه مدارا ایله معامله ایدرلر و اتباعلرینی قایر مق ایچون و سائل جزئیة ایله اللرینسه برر بیورلدی و یره رک مباشرلکله قصبات و قرایه کوندروب آنلر دخی واردقلری یرلرده اهالی بی صویارلر ایدی و وزرادن برنده کایتلو مال حس اولنسه در حال بر ادنی بهانه ایله مصادره سنه قالمیشیلوردی .

بناء علی ذلک رجال دولتدن هی قنغینسه اقصای مراتب بشریه اولان رتبه وزارت توجیه اولنغجه اولسه استکف ایله عفوی چاره سنی آرار و چونکه اولوقلر معزولین وزرا دخی استانبولده اوتوردلیوب رتبه وزارتله چیقانلرک استانبولده اقامتی صدر اعظم یاخود قائم مقام و یا قپودان اولغنه متوقف بولندیغندن رتبه وزارتی حقلرنده نقی کبی بر تقمت عد ایدرلر ایدی .

وفي الاصل وزرای عظام قپوکتخدالری اجله دن و احجاب ناموس و حیثیتدن ذاتلر ایکن بر آرز و قندنبرو قپوکتخدالقلری رجا و شفاعت و خاطره رعایت ایله بعض مجهول الاحوال اشخاصه احاله اولنوب آنلر دخی خدمتلرنده اولدقلری وزرانک رؤیت امورنده صرف ایلدکلری مبالغی ایکی قات اوله رق دفترلرینه تخریر ایلدکلرندن بشقه مراجحه ضمیمه وزرانک مناصبی حاصلاتندن زیاده مطلوب ابراز یله دفتر تقدیم ایدوب وزرا ایسه بتون منصبلری حاصلاتی و یرسه لر ایقای دین ممکن اوله میه جفغندن ضروری نملو بر منصب ظهورینه تعلیق ایله قپوکتخدالرینی اسکات ایتدکلری جهته آنلر دخی قپوقپو طولاشه رق کلی جائزه و عبودیت عرض ایله بر وزیرک عهده سنده اولان منصبی بیوقت آلوب آخره و یرمک اوزره بعض طرفلری تشویق و اغرا ایتمک ایله صیق صیق وزرا منصبلرنک تبدلنه باعث اولورلردی .

حال و ضبط و ربط خصوصاً در مجال اولوب بوندن بشقه مالکانه اولان و حرمینه اوقاف قلنان مملکتله و ایلار اصلاً مداخله ایده مزلردی بو جهته طرف طرف بغات و اشقیما مقوله سی بر طاقم اغالر و بکلر پیدا اوله رق ممالکده انواع فسادات تکون و تحدث ایلدیکندن بشقه سفر و قوعنده عسکر سورجیملکنه مقتدر وزیر بولمزایدی حالبوکه عددرلی زیاده لشهرک موجودلرینه ایالت منصبلری یتشم دیکندن فی الاصل میرمیران ایله اداره اولتسان سنجاقلرک بر خلیسی وزیرایه توجیه اولنوب بو جهته میرمیراندن نیجه لری بوشده قاله رق ضرورت و مضایقه چکمه کده ایدیلر بعض طرفلرده دخی بالعکس و ایلار زیاده جه قوتلشوب یرلشهرک بیاغی استقلال صورتی کسب ایدوب علی الخصوص بصره و بغداد و موصل و شهر زور یعنی کردستان ایالتلری فی الاصل بشقه بشقه وزیرلره توجیه اولنور و ماردین مقاطعه سی طوغریدن طوغریه یه استانبولدن ضبط و اداره قلنور ایکن حسن پاشا زاده احمد پاشا مدت مدیده بغداد و ایلیکنده مستمر اولمق حسینله بصره و شهر زور ایالتلری دخی الحاقا عهده سنه توجیه و ماردین و یوده دهنی دخی اکا حواله و بعده و فاتنده دخی ایالات مرقومه آنک کوله لرینه تفویض اولنوب اهل و مساحه ایله بو خصوصک نظامنه باقلمدیغندن ذکر اولتان اوچ ایالت و بلکه همان موصل بیله اقطار مصریه مثللو کوله منلر یئنده قاله رق بویه بر خطه وسیعه کویا که آنلره موروث و مشروط کبی ممالک سائر دن مفرز و مستتبا حکمنه کیرمش ایدی . بو مقوله مستتبا ایالتلرک نظامی بالتدریج حاصل اوله بیلوب انحق عموم و زرانک ذوالاقتدار بولمنسی و مظالم و تعدیاتک ارتفای ایچون بر نظام اتخادی لازمه حالنددر .

عبدالله افندی لایحه سنک بندتاسی تنظیم جزیه و دفع و رفع مظالم حقه ده اولوب بو خصوصلره دائر اولان اجراءات محللرنده بیان اولنه جقدر .

خاتمه لایحه سنده دخی اول باول بری و بحری عساکر معلمه تدارکی اهم و الزم اولمسینه همان مصارفه باقلمیوب دول نصارانک فن حربه دائر اولان مؤلفات جدیدلری تدارک و ترجمه ایندی ریله رک و فنون حربیه ده ماهر افرنج معلم و مهندسلری جلب اوله رق تعلیم عسکره مباشرت و طوب و سائر ادوات حربیه یی آنلرک رأیی اوزره تسویه و اعماله دقت اولمنسی و چونکه عسکری طائفه سی بر مقدار بدویته مألوف و جنک و حرب احواله ممکن مرتبه کسب اطلاع ایله مستعد تعلیم اولدقلرندن بشقه اعدانک غالبیتی مجرد عسکرلری معلم و مرتب و طوب و جبه خانهلری و سفان حربیه لری فنون حربیه و هندسیه یه موافق اولسندن نشئت ایلدیکی کرک او جقلونک و کرک سائر ناسک مشهودلری اولغله بو خصوصه بر فردک طعن و تشنیع ایتمکه

زهره سی اولیوب عامه انام استصواب واستحسان ایلیه جکی ظاهر واکر برمدت
مرور ایله عسکری طائفه سی ینه حضریتی اعتیاد ایدر و مغلوبیت حالتاری ذهنلردن
چیقار ایسه تعایم عسکر خصوصی متعسر اوله جغندن اولکی سفر عقینده اولدیغی
کچی غافلانه حرکت اولغیوب دقیقه فوت ایدلیه رک همان بوماده نك اجراسنه مباشرت
قلنمی خصوصی مندرج ومشر و حدر .

* فذلکه *

برمنوال سابق نظام دولت حقنده ارکان سلطنت سینه ورجال دولت علیه نك تقدیم
ایتمش اولدقاری لایحه لرده هربری تنظیم عسکر حقنده لوایح خاطر لرین عرض
ویسان ایتدکن بشقه بونك ایچون عقد اولنان مجالس مشورتده دخی عرض
وعمیق مباحثات ومذاکرات ایله مصلحتک زیر وبالاسنی تدقیق وتاتارجق عبدالله
افندی کچی علمای اعلام ومتحیزان رجال دولت ابدی الدوام مقابله بالمثل قاعده سنجه
اصول جدیده اوزره عساکر معلمه واسباب وادوات لازمه حربیه تدارکنک لزوم
واهمیتنی (واعدوا لهم ما استطعتم من قوة) مضمون منیفیله تأیید وتوثیق وشیح
الاسلام سامی مقام دخی بونی تصدیق ایتمش ایدی .

واکر چه بعضیلر اطوار خمسّه دول اعتبار یاه دولت علیه نك طور شیخوخت
وانحطاطی اولوب اعضا وجوارحی علل وامراض کونا کون ایله مختل وزبون اولدیغندن

* یت *

کهنه ساعت کبیر جسم ضعیف پیران * اکا داروی مدارا ایله قوت کلز
مؤداسنجه اولباده رای وتدبیر کار کر تأثیر اولماز ملاحظه سنه مبنی بادی خطر
ومؤدی وهن وضرر اولوق احتمالی ایراد ایله فیما بعد باب مخصوصه نك انسدادی
ودروازه مسالنه نك کشایش اوزره دوام وامتدادی خصوصه عزم والغای غائیه
خصومت ورزم اولنه رق اول مقوله عسکر ناساز استعمالندن بی نیاز اولوق انسب
وسمت معقوله اقرب اولدیغی سرد ویسان ایتمش ایسه ده امور طبیعه واحوال
ضروریه دن اولان سیل حرور ومخاصات بشریه نك اوکنه بویله صلح دائمی خلیاسیله
سد چکمک خیال محال ایدوکی اصحاب دانش وینش عندلرنده بدیهیاتدن بولدیغنه
مبنی عقلای رجال وکبارک کیمیسی بوقضیه بی رأسا وکیسی مقدمنی وکیمیسی تالیسنی
جرح واستهجان وروسیه لونک استرلیج طاقنی افنا ایله مجدداً عساکر معلمه تدارک
ایلدیکنی معرض دلیده اتیان ایتملر یاه بوقول معقول پسندیده اصحاب عقول ومعلم
عسکر ترتیب اولغیسی جمله نرندده امضا پذیر قبول اولمشدر .

* تنظیم قوانین و نظامات و دیگر بعض اجراءات *

بالاده اشعار اولدینبی اوزره سلطان سلیم خان حضر تلی تجدید اصول و فروع
حفظده اولان افکارینی موقع اجرایه قومیه دن پک چوق تأمل و تأنی ایدوب
بر وجه بالا لایحه لر قامه آلدیرمش و عریض و عمیق مذاکره و مشاوره ایتدیرمش
ویایله جق شیر قرار کیر اولدقندن صکره اجراء آتی تسریع بیورمشدر .

حتی تا تارجق عبد الله افندینک اخطاری و جهله کچن سنه او اخرنده تیار وزعامت
قانوننامه سنی تنظیم و اشبویدی سنه سی او ائلنده قامده قید ایتدیرمشیدی .
ولایحه لک خلاصه اولدینبی ائنده خبره جی و لغمچی او جاقلری ایچون بشقه بشقه
قانوننامه تنظیم ایله بو خلالده موقع اجرایه قونمشدر که حاوی اولدقلمری مواد
قانونیه خلاصه و جهله ذیلده (۱) رقیله قید اولنور .

ولغمجیلرک بر طاقنه لغ بغلامق و بر طاقنه فنون هندسیه و صنایع معماریه تعلیم
اولنق اوزره ایکی صنفه تقسیم اولنمشدر .

و خبره جیلر ایچون انشاسی لازم کلان قشله نک یاننده بو ایکی صنف ایچون دخی بر
قشله بناسی تصمیم اولنمش ایدو کندن خاصکویده اوچ باب قشله انشاسنه مباشرت اولنمشدر .
لایحه لرده موضوع بحث اولان مواد دن بریده اعمال معادن مسئله سی ایدی .
وفی الواقع ممالک دولت علیه ده انواع معادن کثرت اوزره اولوب ایام سفاله ده جاری
اولان اصول ایجابجه معدنلره مربوط اولان قرا اهلایسنه انگریه اولنق اوزره
اودون و کمور کتور دیلهرک بعض معدنلر ایشلتدیریلور ایدی صکره لری معدن
امینلری رعایای مرقومه نک ویره کلدکلری اودون و کموردن بر خیلینک بدللرینی
اخذ ایدرک و معاندنه جوهر قلمدی استخراج اولنان ذهب و فضه خرچنه وفا
ایتمز دیهرک همان عادت یرینی بولسون دیو بر قاچ فرون اعمال و اقل قلیل آلتون
و کموش ارسال و مجرد کندو جر منفعتلری داعیه سنه حصر افکار و اعمال ایلدکلرندن
بشقه متسلملر و و بوده لر کبی انواع مظالم و تعدیاته تصدی ایتملریله بعض معدنلر دخی
رعایاسنک اشتکاسی اوزره ناچار قیادتیرلش ایدی بو جهتله معاندن کلان ذهب و فضه نک
قلتندن ناشی ضرر یخانه ده دخی امور جاریه یه سکتکه کلسون دیو سکتکه نک وزن و عیاری
وقت بوقت تنقیص اولنقده و بویاسه معاملاتق اخلال ایتمکده بولنمش اولدیغندن
برمنوال سابق نظام دولته دائر تنظیم و تقدیم اولنان لایحه لک بعضیسنده معاندنک
اعمالی خصوصی توصیه و اخطار اولنمش و از جمله دفتر دار شریف افندینک لایحه سنده
فقرا یه ضرر اولماق شرطیسه معدنلرک اعمالی نه و جهله میسر اولور ایسه اولیجه
عمل اولنلودر مسموعم اولدیغنه کوره ارغنی و کبان و کشخانه معدنلری امناسی

معدن حفزینہ سعی ایتیمور لر پاشا لر و و یودہ لر مثللو رعای معادنن انتفاع ایدوب اولو جہلہ ادارۂ امور ایدر لر ایش بونک دفعی و معدنک اعمالی شکل تدبیر ایاہ اولور سہ ہمان ہمت بیور لملودر و بعضیلر اراضی دولت علیہدہ اولان معادن بردولتک اراضیسندہ بولماز اما دولت علیہ رغبت و ہمت ایتیمور اکر دولت کندو طبر اغندہ اولان آتون و کمشی چیقاروب خزینہ جمع ایتسہ جمع دولتسہ غالب اولور دیر لر حال بویاہ اولدینی تقدیردہ معادنہ بچون ہمت اولنسون و فقراہہ ظلم اولیور دیو برکتلو و بوزقیر معدنری بچون قبانسون ہم فقراہہ ظلم اولسون و ہم معدنرا ایشسون ہمتہ برشی حائل اولہماز قولایی بولماز شی اولماز دیرم دیومسطور بولنمشدر .

واکر چہ فلاسفۂ اوروپا حکمت طبعیہ نک سائر فنون و انواعی ایلر ولتدککری مثللو معدنیات فنی دخی پک زیادہ ایلر ولتمش اولدقنندن بودخی بریبوک فن اولوب معادننی یولیہ ایشلدہ رک انقریہ بہ حاجت قالمقسرین حاصلات کلیہ آلق بوقنک نظریات و عملیاتندہ ماہر ذواتک وجودینہ منوط و بویاہ مہرۂ فنک یتشدیرلسی دخی وقتہ محتاج ایدی . لکن مع مافیہ معدن امانتیرینہ صحیح امان و مستقیم ذاتر انتخاب و تعیین اولوب کندولرینہ مدار معاش اولق اوزرہ معدنلر رعایاسی حقدہ تعدی بہ محتاج اولیہ جق مرتبہ واردات معینہ دخی کوسترلدیکی حلدہ معدنلردن خلیجہ فائدہ حصولہ کتور یاہ بیلہ چکی در کار کورلدیکنہ بناء بواہر مهمہ صرف مساعی اولتہ جفتہ نشانہ اولق اوزرہ معدن امینی یوسف اغایہ معادن امانتی ککان عہدہ سندہ قالمق شرطیہ صفرک بکرمی برندہ بارتبہ والای وزارت دیار بکر ایالتی احسان بیورلمشدر . مؤخرأ صدر اعظم اولان یوسف پاشا بودر .

تاتارجق عبداللہ افدینک لایحہ سندہ سرحدلرک استحکامنہ دائر اولان مطالعاتی سائر ارکان سلطنت سینہ نک افکارینہ دخی موافق اولمغلہ اقدمجہ اناہہ و صوغوجق طرفلرینک استحصال اسباب استحکاماتنہ مباشرت اولتمش و سائر لرینک استحکاماتی دخی مصمم بولتمش اولدیفنہ و اولوقنلر سایۂ دولتدہ کسب ثروت و غنا ایدنلرک جمع وادخار ایلدیککی آچہلر اکثریا بویاہ مصالح مهمہ بہ صرف ایتدیرلک عادت اولدیفنی حالہ برمدتدبرو یکیکچری اوچاغسندہ کتخدایری کابی اولہرق اوچاق رجالہ متمحض بولنان عثمان افندی بیت المالدن جمع والتقاط ایلدیککی نقود وافرہ بی بوایشہ صرف ایتک اوزرہ ربیع الاولک التنجی کونی عہدہ سنہ خواجہ لک رتبہ سیلہ بندر قلعہ سی امانتی توجیہ اولنمشدر . انجق براییکی آی صکرہ کمرکچی حسن اغانک عہدۂ التزامندہ اولان کمرک ایلہ امانۂ ادارہ سنہ مامور اولدیفنی جزیہ مقاطعہ سندن طولایی محاسبہ سی دفتر امینی حتی بک معرفتیلہ رؤیت اولہرق ذمتندہ متحقق اولان اموال

جانب میری به تسلیم ایتدیرلد کد نصکره بندر قلعه سی بنا امانتہ مأمور قلمغله عثمان
 افدینک مأموریتی خوتین قلعه سی بنا امانتہ نقل و تحویل بیورلمش و متعاقباً اسماعیل
 قلعه سی بنا امانتی دخی درکاه عالی قپوچی باشیلرندن و اسحاب ثروت و یساردن نعمان
 بک عهده سنه احاله اولنهرق یدینه نو طرح رسملر و معیتنه ماهر منهدسلر ویرلمشدر .
 بندر و خوتین سنجاقلرنده اولان تیمار وزعامتله حین تحریرنده بوسنه و سمندره تیمار
 وزعامتاری کبی حسن رابطه به بند اولنمبوب آلی بکیلرینک عرضلرینه اعتداتوجه
 و ابقالری جریان ایتمکله متصرفاری کیملردر و شروط سرحد اوزره جمله سی
 سنجاقلری داخندده موجودلر میدر یوخسه اسملری موجود و جسملری مفقود
 اولوب آلی بکی و سائرلرینه ماکی اولمشدر . نامعلوم و بونلر ایسه سواربی
 عساگردن اولوب سائر سنجاقلر تیمارلورلی کبی سنجاقلرندن خارج محله مأمور
 اوله کلدکلرندن دائماً لورلی داخندده قرار ایدوب لدی الاقتضا سرحد محافظلی
 معیتله آلی بکیلری پیراغی التنده خدمت ایلمک وظیفه ذمتلری ایدوکی امر مجزوم
 ایکن حاللرنده نظام و رابطه اولماق حسبیه سفرلرده ایشه یارامدقلرندن ناشی بهر حال
 یوقلانوب ناموجودلری تحقیق قلمق و توجیهلری ماده سی آلی بکیلرندن محافظنه
 و محافظ دخی عرض آنچه سی نامیله برنسنه مطالبه و اخذ ایتمکسزین آلی بکیسی
 عرضی موجبجه بعدالتحری در سعادتنه عرض و توجیه اولنمق و زعیم و سپاهیلردن
 یرو نقراتی و سائر سرحدنشین عسکری مقوله لرینک علوفه و اسامیلرینه میل و رغبت
 ایدنلر اولور ایسه و علوفه لو اولان نقراتدن دخی بریمی بر تقریب زعامت و تیمار
 آلور ایسه در حال اسکی دیرلکی او جاق ملازمی و مستحق اولنلره شروط و قانونلری
 اوزره عرض و توجیه قلمق و بعدالایوم لوائین مزبورین زعامت و تیمارلری توجیهنده
 سمندره شرطی موجبجه صیف و شتاده علی الدوام سنجانغی آلتنده اقامت شرطی
 براتلرینه درج ایدلمک و بندر و خوتین محافظلری کندو اتباعلرینی قایر مق فکر یله
 سنجاق ملازملرینه غدیری ارتکاب ایدرک خدمه مقوله سنه نانپاره توجیهنی قلمه
 کتورمکدن اجتناب ایلمک شرطی بیک یوز طقسان برسنه سی رجبنده ویریلان
 نظامده مندرج اولوب نظام مذکور نفس الامرده نظامات مرغوبه و مقبولدن اولمق
 حسبیه بوکره دخی لفظاً بلفظ مرعی اولمق اوزره تأیید و توثیق اولنهرق
 اشبویدی سنه سی ربیع الاولنک اون بشی تاریخیه خوتینه و بندره بشقه بشقه امرلر
 تسطیر و تسییر اولنمشدر .

بشنجی جلده اشعار اولن دینی اوزره سلطان سلیم خان حضر تلرینک ترسانه امورینه
 اهتام تامی اولدیغندن دوغما امورینی کندی تربیت کرده سی و منظور و مقبولی

اولان قپودان دریا کوچک حسین پاشا معرفتیه صورت خصوصیه ده رؤیت و تنظیم
ایتمکه اولوب کچن سنه اول باول ترسانه به نظام ویرمش ایدی . ایشته بونک ایچون
دوتما مصلحتی سالف الذکر خلاصه رساله لرینه درج اولنماشدر .

بویازین مشارالیه حسین پاشا آق دکز ازباندیلرینی اوروب قهر و تنکیل
ایتمکدن صکره اشبو ایدی سنه سی صفرینک اون ایکنجی کونی دونمای
هایون ایله آق دکز اشقیاسندن اخذ ایش اولدیغی صغیر و کبیر اون بش قطعه
قورصان سفینه لرینک جوادره لرینه محاربه لرده طوتیلان بعض اشقیایی صلب ایدوب
بو هیئته دونمای هایونی بالی کوشکی پیشکاهندن امرار و عادت جاریه اورزه بالی کوشکنه
چیقوب خاکپای شاهانه به رومال اوله رق حائر شرف و افتخار اولمش و کندوسنه
ثوب سمور آکسا و معیتده بولنان عساکر بحر به یه عطایای و فیره اعطا بیورلمشدر .

دولت علیه قوه بحر به سنده درکار اولان تنزلات حسیه خیلی وقتدنبرو مظفریت
بحر به آثاری کورلمدیکندن قپودان پاشانک بو کره او یله علائم مظفریتله استانبول
لیمانه کیرمسی اهالیسنه خیلجه موجب نشاط و قپودان پاشا بنده مخصوص پادشاهی
اولمق حسیه سلطان سلیمه دخی ایکی قات موجب فخر و انبساط اولمشدر .

جلد خامسده بیان اولدیغی وجهله مقدا اما سلطان علیه الشان حضر تلی قپودان
دریا حسین پاشایه عقد نکاح اولنوب سوری دونمای هایونک عودته تأخیر اولمش
ایدو کندن برمنوال سابق دونمای هایون ایله قپودان پاشا در سعادت کلد کده اسباب
سورک تهیئنه ابتدار اولنهرق جمادی الاولانک بشنجی کونی جهاز آلابی و فرداسی
عروس آلابی ترتیب ایله سلطان مشارالیهها دیوان یولنده واقع اولوب مقدا
کندوسنه تملیک اولنان سرایه ایصال اولمش و فرداسی جمعه کونی سلطان سلیم خان
حضر تلی بر معتاد سرای مشار الیهائی تشریف برله اخشامه قدر اوراده اقامت
و بعده سرای هایونلرینه عودت بیورمشدر .

ایشته بو ائنده سلطان سلیم خان حضر تلی بعض قالیه نلری احضار و محاربه بحر به
تعلیمی ایتدیره رک یکدیگره و قوعبولان حملات بحر به و حرکات حر به لرینه احاله انظار
ایتمک و ایچلر نده بولنان عساکره عطیه لر و برمک ایله عساکر بحر به حقنده توجهلرین اظهار
بیوردقلر ندن بشقه ضابطان بحر به حقنده بو کره تنظیم اولنوب ایدی سنه سی جمادی الآخره
غردسی تاریخیله باش محاسبه به قید اولنان قانون جدید اقتضاسنجه عدلری اوچ
بیکه بالغ اولان ضابطان بحر به نک ایچندن باش رئیس و یلکنجی و ایکنجی و اوچنجی
رئیس لر و کمی اغاسی و طوچی باشی مثللو یعنی او توزر آچه دن زیاده یومیه سنه ثلث
او توزر آچه لوسنه و دخی اشاغیسنه نصف مواجب ضم و علاوه بیورلمش و بالاده بیان

ایتدی کمز و جهاه سنه سابقه ده تنظیم اولنان بحریه قانونامه سنده قپودانلق منحل اولدقده مطلقا قپودانه هایون باش رئیسنه توجیه اولتمق و بوترتیب اوزره بطرونه باش رئیسى بطرونه و قره وله رئیس لرندن بر مستعدی ریاله هایونه باش رئیس اولمق شرطی مندرج بولتمش ایسه ده باش رئیسلك فن خدمتی اولوب سائر قلیونلرده ده متفنن و ماهر باش رئیس بولتمق اغلب احتمال ایکن محلول اوله جق قپودانلغك بهر حال قپودانه هایون باش رئیسنه ویرلمسی رحمان واستحقاقی ظاهر اولان آخر مستحقینک قفورینه باعث اولدیغی اجلدن شرط مذکور بو کره الغا اولته رق فیما بعد قپودانلق محلول اولدقده دونمای هایون باش رئیس لرندن هر قغیسی احق والیق ایسه سنجاق قپودانلری معرفتلیله لدی الامتحان اکا توجیه و بوضورت منحل اولان باش رئیسلك کدوکی دخی ینه اول سفینه نك یلکنجیسی و ایکنجی و اوچنجی رئیس لرندن احق والیق قغیسی ایسه مومی الهم معرفتلیله بالانتخاب اکا باش رئیسلك ویریلوب دکل ایسه لر سنجاق کمیلرینک و سائر سفائنک ایکنجی و اوچنجی رئیس لرندن احق والیق اولانه ویرلمک شرطی قانون اتخاذا اولتمشدر .

و ترسانه پیشکاهنده دردست انشا اولان آثار نصرت نام قالیون دخی بو ائنده تمام اولدیغندن شعبان معظمک یدنجی کونی سلطان سلیم خان حضر تلیری ترسانه عامریه کلوب تحت سفینه سنه تشریف برله قالیون مرقوم دریاه ایندی رلدکن صکره میراخور کوشکنه تشریف ایدوب فرانسه بکزاده سنک اسماعیل قلعه سی رسمنده فن هندسه اوزره مجدداً ترتیب ایلمش اولدیغی طابیه نی تماشایور دیغی عقینده عساکر معلمه تعلیمه ابتدار ایدرک ترتیب جدید اوزره صنایع حر بیه نی اجرا ایدوب جمله سی قرین استحسان شهر یاری اوله رق بکزاده مرقومه قائم کورک الباس و عطایای و فیره اعطا و بوضره ده اسماعیل قلعه سی بنا امینی نعمان بکه دخی سمور کورک اکسا اولتمشدر .

سالفاً و آنفا بیان اولدیغی وجهاه ترسانه عامره و خبره جی و لغمچی و اجاقلری مصارفی تزیاید ایدوب سائر اجاقلر حقتده دردست اولان نظاماتک اجراسی دخی برخیلی مصارف زائده یه محتاج اولدیغندن بشقه زیرده بیان اولته جنی و جهاه بو اوانده تعلیملو پیاده عسکر ترتینه دخی شروع اولتمش اولوب بومقوله نظامات جدیده نك اجراسی ایسه بالاده اشعار اولدیغی و جهاه کلی واردات جدیده تدارکنه موقوف اولدیغندن و اگر چه مصارف مرقومه یه بعض مرتبه قارشولوق اولمق اوزره ضر بنجانه دن بعض مقاطعاتک محلولاتی صائلمیوب التزام و جهاه اداره اولتمق نظام اتخاذا اولدیغی مثللو سائر مقاطعات محلولاتی دخی بو وجهله جانب میریدن ضبط

واداره اولندیغی صورتده میری به خیایجه ایراد تدارک اولنمش اوله جنی دزکار
 ایسهده اولوقتر اکثر رجال دولتک ایرادی مقاطعات فائضدن عبارت اولمسیله
 بو تقدیرجه رجال دوات الهجق ایراد بوله میوب دائرة معیشتاری تضایق ایتمش
 اوله جغدن بالمله محمولاتک ضبطی تجویز اولنه میوب انجق اون کیسه دن زیاده فائضلو
 مقاطعاتک محمولاتی خزینه یه ضبط اولنمق اوزره قرار ویرلمش و بو تقدیرجه
 رجال دولت ایکی پارچه مقاطعاتدن اله جقلمی فائضی اوچ درت پارچه
 مقاطعه دن اله بیله جککلرندن آنلر ایچون ایراد تدارک ایتمک قیوسی دخی بتون بتون
 سد اولنما مشدر تفصیل حال بونوال اوزره درکه اقدمجه باب عالیده عقد اولنان مجلس
 مشورته الحاله هذه ترسانه عامره و خبره جی ولغمجی و اجقلمی قشلا و نفراتلری
 مصر فلری و قالیونلر انشاسی و عساکر ترتیبی و مهمات سفریه تهیه سی و بونلر امثالی
 مصارف نوبنو ظهور ایتمکه اولوب دولت علیه نکی ایسه فی الاصل ایرادی مصارفه
 وافی اولدیغندن اشبو مصارف مهمه بهر حال برنوع ایراد تدارک کنه موقوفدر مصارفک
 بری دونمای هایون کدکولرینک زیاده علوفه لریدر هله اول مصرفه ضرب بخانه
 عامره دن ضبط اولنان مقاطعاتک حرمین اولنلرینک ماعداسی باخط هایون تخصیص
 اولنوب وفا ایتمز ایسه دخی مدار اولدی دیلم لکن مصارف سائره بوندن مقدمه
 اختراع اولنان رسوم زجریه و پنبه حاصلاتی بروجهله وافی اولمیه جنی و نظاملری
 ملحوظ اولان مواد و ترتیب عساکر عون حقله میسر اولدقده بهر حال اولکی
 ایراددن بشقه سنوی اون بش یکر می بیک کیسه و بلکه دهها زیاده ایراد تدارک کنه
 بودول محتاج ایدوکی جای اشتباه دکدر نظاملردن برینه که شروع اولنه اول امرده
 مصارفه معادل ایرادی ملاحظه اولنلودر دینلمکه بوبابده جریان ایدن مذاکره اتک
 نتیجه سنده فیابعد میری و حرمین مقاطعاتندن محمول اولنلرک فائضلری اون کیسه دن زیاده
 اولنلری صالمیوب میریدن ضبط و التزام صورتیه اداره اولندیغی حالده برقاچ
 سنه یه دکین محمولاتدن وافر ایراد تراکم ایدر ایراد دولت زید و عمر و عهده لرینه
 تفویض اولنمقدن ایسه برکدیر یلوب مصارف مذکوره یه تخصیص اولنمق اولادر
 فقط بومحمولاتک معجلاتی میرینک مصارف روز مره مدار اولدیغندن بونلر
 ایچون برمناسب معجله تقدیر و زجریه دن خزینه یه اول مقدار آچه تحصیل اولنور
 و برسنه ظرفده ضبط اولنان مقاطعاتدن تمقدار فائض حاصل اولور ایسه زجریه دن
 خزینه یه تخصیص اولنان آچه اول مقدار نقصان و یریلور بویله بویله ایراد تراید
 ایتدکجه زجریه دن و یریه جک آچه نکی مقداری تناقص ایدرک بش التی سنه یه دک

بر سنده خزینه حاصل اوله جق معجله قدر مقاطعه فائض نندن ایراد حاصل اولور
اولوقت زجریه دن بر آچه ویرمک لازم کیوب زجریه حاصلاتی دخی بشقچه
ایراد قالور بویه بر صورتی قرار ویرمکجه مصارف مذکورہ نک اداره سی بر وجهله
قابل اوله ماز رجال دولت نه یاسون دینلور ایسه فائضی اون کیسه دن نقصان اولان
مقاطعاتدن محلول اولنلری معجله ایله آسونلر کافیدر ولوکافی اولمامش اقدم واهم
اولان دولتک ایرادی مصارفه وافی اولمقدر رجال وخدمه نک ایرادلری کثرتی
دولته فائده ویرمز جمله یه لازم اولان دولتدر دولت دخی نظامه محتاج و نظام
مصارفه و مصارف ایراده موقوفدر دیو اشبویدی سنه سی جمادی الآخره سندن
اعتباراً اون کیسه دن زیاده فائضو مقاطعه محمولاتنک ضبط اولنسی و آندن دون
فائضو اولنلرینک دخی سکر سنه لکنندن نقصانه صالمامسی اتفاق آرا ایله قرار کیر
اوله رق بونک اوزرینه صادر اولان فرمان عالی موجبجه فیما بعد کرک میری و کرک
حرمین مقاطعاتندن محلول اولنلرک فائضی نه مقدار ایدوکی ملت ملردن و صرافلردن
وسائر اهل و قوفندن تحقیق و تصحیح اولندقدن صکره اکر تمام اون کیسه یا خود
آندن دخی دون ایسه سکر سنه لکنندن نقصان اولماق اوزره طالبنه صالماق و اکر
اون کیسه دن زیاده ایسه کسنه یه صالمامیوب جانب میریدن ضبط و ضربخانه دن الزام
ایله اداره قلنمق اوزره مالکانه قید اولنمق و اشبو نظام تاریخی اولان ایکیوزیدی
سنه سی جمادی الآخره سندن سنه آتیه جمادی الآخره سنه قدر بو و جهله ضبط
اوله جق مقاطعات محمولاتی ایچون بش سنه لک فائضی اعتباریله معجله تقدیر اولنوب
معجله مرقومه زجریه آچه سندن خزینه عامریه تسلیم ایدیلرک فائضلری زجریه
دفترینه ایراد قید ایدمک و برسنه ظرفنده ضبط اولنان مقاطعاتک بش سنه لک
اعتباریله معجله سی هر نه مقداره بالغ اولور ایسه سنین آتیه ایچون مقیاس اولوب
و هر سنه زجریه دن اول مقدار آچه خزینه یه تسلیم اولنوب کیدرک ضبط اولنان
مقاطعه لرک فائضی زجریه دن برسنه لک معجله مقابلی اولمق اوزره مخصوص اولان
اولان آچه قدر اولدنده اصل زجریه مالی تمامیه ایراد جدید اوله رق قاله جغندن
بشقه فائضک مقداری زجریه دن مخصوص اولان مذکور آچه نک مقداری تیجاوز
ایتدکه زیاده سی دخی بشقه جه ایراد اوله رق ظهور ایده جک مصارف جدیدیه
صرف اولنمق ایچون ضربخانه عامره ده حفظ قلنمق اوزره نظام ویرلمشدر .
اشبویدی سنه سی جمادی الآخره سی اوائلنده مورہ ایالتک امر اداره سی حقدنده دخی
مستقلاً بر نظامه تنظیم اولنمشدر . شویله که : مورده نک جزیه اوراقی از قدیم مورہ
محصلی بولنان و ایلرک عهده سنه قید اولنه ککله آنلرک معرفتاریله جبایت و تحصیل اولنوب

بوصورتده ایسه پك چوق مظلّم و تعدیات و قوعه كلدیكنه منی والیره معاش اولمق اوزره هر ورقه برر غروش ضم اولنه رق آخر و جهله تعدی اولنماق شرطیه نظامه ربط اولنمشیکن مئمر اولیوب والیرینه جزیه اموالنه وافرشی ضم ایله اول امرده بوضعی تحصیل ایدوب واصل جزیه اموالندن اولان آچھی جزیه بقایاسی دیو کوستروب بوقایا سلفدن خلفه دور ایله متزاید اولمقده و طرف دولتدن کیدن مباشرلرک خدمت مباشریه لری اوچ درت قات اولمق اوزره مصارف مملکت نامیله اهالیدن تحصیل اولمق کبی درلو مظلّم و تعدیات و قوعبولمقده اولدیغندن بیک ایکویوز بر سنه سنه موره قضا لرینک جمیع جزیه لری اهالیسنک استدعا سیله مقاطعانه ربط اولنوب والیرینک جزیه معاشنه و ظلمیه لرینه بدل اولمق اوزره دائره لرینی اداره ایچون طقسان بیک ایکویوز درت غروش حضریه ترتیب و تخصیص قلمش ایسه ده اندن صکره موره والیرندن جائزه و بونجه بها و عبودیت اوله رق کلی آچّه اخذ اولنه کلدیکنندن آنلر دخی مقدار مذکور حضریه به قناعت ایتیموب ولایت مصارفی دفترینه دیلدکلری قدر آچّه ضمیمه جبراً و کرهأ رعایادن تحصیله ابتدار و عقله کلدک مظلّم و تعدیات اختراعنه اجتسار ایدوب بر طرفدن دخی و یوه ده لر و سائر مأمورلر انواع ظلم و تعدی به تصدی ایتدکلرینه منی موره نك بر حسن ضابطه تحتنه قونلمسی لازم کلوب انحق بوکا بر وجه مطلوب نظام و یرمک ایالت مرقومه نك مجدداً تحریرینه موقوف اولدیغی جهتله تحریر جدید و قوعونه دك ایکویوز بر سنه سنه و یریلان نظام مذکور مرعی الاجرا اولمق اوزره بوکره دخی توثیق و تأیید و والیسرک و سائرلرک عوائدی تعیین و تحدید و فضله برشی آلتامسی تنبیه و تأکید اولندی .

صره امانته دخی بوخلالده نظام و یرلمشدر . شوبله که : قلاع و سائر ابنیه میریه انشاسی امانتلی کبی صره امانتی دخی هر سنه متمولان رجالدن برینه حاله اولنه کلوب نیجه لری ایسه صرف مالدن ابا و اظهار عجز ایله تمارض وادیسنده کندوسنی عفو ایتدرمک ایچون اطرافه دوشمکله و بویله تبرک اولنه جق بر منصبی هرکس کندو حقتنده برنوع ادبار عد ایللمسی ناروا اولغله صره امانتک معین قدیمندن فضله سنوی الی بیک غروش تخصیص اولنه رق مناصب سائره کبی هرکسک طالب و راغب اوله جنی بر منصب مفید اولمشدر .

بووانده ترتیب و اجرا اولنان نظامات جدیده دن بری دخی ایراد جدید خزینه سی نظامیدر . شوبله که : هر حالده احتیاطه رعایت جمله یه فریضه ذمت ایکن یوز سکسان ایکی تاریخندنبرو واقع اولان سفرلرده اسباب سفریه نك تدارکی امرنده اهتمام اولنمدیغندن آچّه فقدانی و مهمات و ذخائرک نقصانی قضیه لری شکل

فنالقاری انتاج ایله دیک معلوم و بوند نصکره دخی تکاسل و مسامحه اولنه جق اولور ایسه حال نیه منجر اوله جغنی امر مجزوم اولمقدن ناشی فیما بعد اسباب حضور و آسایشه میل و التفات ایله اضاعه اوقات اولنق جائز اولمیه جغنی و حالبوکه عسا کرک اصلاح احوالی و امور سفریه نک اکللی اولوقنک حکمنجه واردات قدیمه دن بشقه سنوی لاقل یکر می بیک کیسه آچه واردات جدیدیه و سفر ایچون شو یله چه حاضر و موجود بولنق اوزره یوز اللی بیک کیسه و بلکه دها زیاده نقد آچه یه محتاج کورلدیکی جهته یوقاروده بیان ایتدی کمز و جهله رسوم زجریه مثلوه مجدداً اختراع اولنمش اولان بعض واردات جدیده دن بشقه اون کیسه آچه دن زیاده فائضو اولان مقاطعات محلوله نک اشو یدی سنه سی جامدی الاخره سندن اعتباراً میری یه ضبطی نظام اتخاذا اولنهرق بو نظامک محافظه سنه رجال دولتدن برینک ایراد جدید دفتر داری نصیله مأمورینی و بروجه مشروح ترتیب اولنمش و اولنمقده بولنمش اولان واردات جدیده ایام حضرنک دخل و خرجه قارشیدیر لمیه رق بشقه چه حفظ اولنمشی قرار کیر اولوب بالاده اجمالاً اشعار اولندیغنی و زیرده تفصیل اولنه جغنی و جهله در دست تنظیم اولان تعلیمو عسکر نظارتی دخی اعظم رجال دولت علیه دن برینک عهده سنه تفویض اولنق لازم کلدیکنه مبنی اشبو نظارت منصبه ایراد جدید دفتر دارلغیاه فی الاصل امور مالیه نک بر شقی ایکن برمدتدن برو عمل ماندکان رجالدن برینه توجیه اولنه کلان شق ثانی دفتر دارلغی دخی الحاق اولنهرق و فیما بعد ناظر اولنلرک باعث نفوذ و اعتباری اولنق ایچون یدک کتورملری و کوزه قابلو اوست کورکی ایله دیوان هایونه کلوب قبه التده صدر اعظم حضورنده فی الاصل امور استیفانک بر شقی اداره ایدن ایکنجی دفتر دارلرک قعود ایلدکاری مقامده یعنی باش دفتر دارک الت طرفنده اوتورملری و کندوسنه خطاب اولنمقده تعلیمو عسکر ناظری افندی دیو یازیلوب توجیهات دفترنده دخی شق ثانیلک و ایراد جدید دفتر دارلغی انضمامیه تعلیمو عسکر نظارتی دیو قید اولنمشی نظام اتخاذا قنهرق نظارت مذکوره رجب شریفک اون اوچنجی کونی سابقاً کتخدای صدر عالی اولان مصطفی رشید افندینک عهده سنه تفویض و بو مأموریت ایچون کندوسنه سنوی اللی بیک غروش معاش تخصیص و معینه مستوفی معاشلر ایله کاتبلر و مخصوص وزنه دار تعیین و قیو آره سننده بر ایراد جدید خزینه سی تشکیل ایله قبل النظام ضربخانه ده ضبط اولان کرک ترسانه مصارفه مربوط و کرک غیری مجموع مقاطعات و دریا زعامت و تیمارلری ایله جانب میریدن اداره اولنمقده اولان رسوم پنبه و سائر

مقاطعاتك ايكيور سكر سنه سندن واسهام محولاتنك اشبو نظام تاريخندن اعتباراً مجموعى وكذلك نظام جديد اقتضاسنجه فائضى اون كيسه دن زياده اولمغه ضبط اولنه جق ميرى و حرمين مقاطعاتى واسهامى و خبره جى تيارلرى بجملنها ايراد جديده ربط و زجرىه حاصلاتنك حين احدائسندن اعتبار ايله مجموعى سرمايه اوله رق ناظر مومى اليه ينده حفظ اولوب برمنوال سابق نظام جديد اقتضاسنجه ضبط اولنه جق اون كيسه دن زياده فائضو مقاطعات محلوله نك بش سنه ك واسهام محلوله نك اوچ سنه ك حسابيله معجله لرى ميرى خزينه سنه و قصر يد اولنه جق اسهامك بشر سنه ك حسابيله معجله لرى فارغ لرينه زجرىه حاصلاتندن تسليم اولنسى شرط قلمش و بهر سنه اشبو ايراد جديدك مقدارى معلوم هايون اولدقدنصر كره غير از مصارف فضله سنك قيو آره سى خزينه سندن ضرر بخانه عامر ده بشقه جه آماده ايتديريلان كار كير خزينه يه نقلى واشبو نظام تاريخنه كلنجه دولتك باجله مصارفى ميرى خزينه سنه عائد اولان اموال دن اداره اولنه كلوب انجق الحاله هذمه مقتضاي نظامت جديده يه نظراً خبره جى و لغمى و طوبى جى او جاقلرينك مصارف سابقه سنه تزايد كلديكندن بشقه معلم عسكر دخى اختراع و قاليونجى نقراتى و ضابطانى ضابطه اخرايه ادخال اولمغه كرك بو وجهه تزايد ايدن مصارف سابقه نك و كرك قانون جديد اقتضاسندن اوله رق بوندنصر كره اختراع اولنه جق مصارف لوازم سفر يه نك جمله سنك اداره سنه ميرى خزينه سنك عدم تخملى تحقق ايتد كده ماده سى و مقدارى و محل صرفى تصريحيه باخط هايون اشبو ايراد جديد دن اعانه اولنسى ايراد جديد قانوننامه سنده تصريح اولمشدر .

بوندن اقدام بيان ايتديكمز وجهه ايالات عساكرينك نظام حاللى ضمنده تنظيم اولنان تيار و زعامت قانوننامه سنده حاصلات سنويه سى بشيوز غروشدن ناقص اولان زعما و ارباب تياره قصر يد و محلول و ناموجود دن الحاق ايله سنويلرى بشر يوز غروشه ابلاغ اولنسى مندرج اولديغندن اشكنجى زعامت و تيارلرينك حاصلاتى معلوم و دفتر خاقاننده مقيد اولوبده الحاقى عرض اولندقدنه قيوده مراجعت ايله توجه اولنقى اوزره ايتلو عساكر ك يوقلامه لرينه مأمور اولنره هرر زعامت و تيارك حاصلاتى سنجاقلوسى معرفتيله تحرى و تصحيح اولنه رق دفتر لرى ارسال اولنسى تنبيه اولنمش ايدى بعض يوقلامه جيلر طرفدن وارد اولان دفتر لرى مجرد سنجاقلونك اخبار لرى اوزرينه يازلش اوله رق صحيح اولديغى ارباب و قوفك اخبار لريله ثابت اولديغندن قيباعد حصاددن مقدم بلاول فوئندن محلول اولان زعامت و تيارك مقدار حاصلاتى بيسانمك و عرض اولنان ملازمه

بر ديه چك قلمهق ايجون ابتداكى سنهسى ايراد جديد خزينهسى طرفندن اداره
وسنه آتیه مارتندن ضبط ایتمك شرطیه توجیه و براتی اعطا اولمسی نظام
اتخاذ قلمشدر .

بو خالده مجدداً تنظیم اولنوب خلاصه موادی زیرده (۲) رقیله ايراد اولنان
طوبجی قانوننامه سنده طوبخانه اوچاغنه برتوغ احسان بیورلمسی و رجال دولتدن
برینک ناظر اولمسی درج و تصریح اولمش و طوبخانه نظارتی دخی مصطفی رشید
افندی یه علاوه مأموریت قلمش اولدیغندن رجبک اون یدنجی کونی ناظر
مومی الیه و طوبجی باشی و کاتبی و کتخداسی باب آصفی یه احضار ایله توغ ظفر
فروغی صدر اعظم طوبجی باشی یه و سالف الذکر جدید طوبجی قانوننامه سنی
رئیس افندی طوبجیلر کاتبه بالاعطا دعا اولدوقدن صکره باغچه قپوسنه بالورود
ناظر افندی یدی چفته یه و طوبجی باشی بش چفته یه سوار اوله رق طوبخانه یه
کذار ایتمشدر .

مذکور قانوننامه ده مندرج اولدینی و جهله اول امرده یکریمی بش اورطه اولق
اوزره ایکویوز الی طوب و هر طوبه اونر طوبجی و سرعت طوبلرینه بونلردن
بشقه اونر نفر دخی تفنک انداز و بیوک و کوچک ضابطلر و ایجاب ایدن مأمورین
و خدمه ترتیب و جمله سنه مستوفی معاش و تعیینات تخصیص بیورلمشدر .

بعده طوب عربجهی اوچاغی دخی تحت رابطه و نظامه ادخال اولنهرق انلر ايجون
دخی طوبجی قانوننامه سنی طرزنده بشقه جه برقطعه قانوننامه تنظیم اولمش و چونکه
عربجهیلر طوبجیلرک یماعی مثابه سنده اولدوقلرندن طوبجی ناظری اولان ذاتک
عربجهی اوچاغنه دخی نظارت ایلمسی قانوننامه مذکورده مندرج بولمش
اولدیغنه مبنی عربجهیلر نظارتی دخی بالطبع مصطفی رشید افندی یه مستزاد
منظومه مأموریت اولمش کرک طوبجی و کرک عربجهی اوچاقلری نظام جدیده ربط
والحاق بیورلمشدر .

و خلال شعبان شریفده طوبخانه اطرافنده واقع دکاکین و مساکن اصحابندن اشترا
اولنوب طوبجی و عربجهی اوچاقلری ايجون قشله لر بنا اولتمق اوزره وضع اساس ایدلمشدر .
بعده طوبخانه عامریه بش نفر جراح تعیین و جراح اوله ماهیه یکریمی غروش و ثانی یه
اون سکنر بچق و ثلثه اون یدی و رابعه اون بش بچق و خامسه اون درت غروش
معاش ایله جراح اوله یومیه اوچ قیه نان و بر بچق قیه لحم و دیکر لرینه ایکیشر قیه نان
و بر قیه لحم تخصیص اولمش و بعده طوب اصاعه سنه مخصوص اولان نفرات دخی
تحت نظامه ادخال و بعد ازین دوکیجی نفراتی ضابطلریله برابر قرق طقوز نفر اولق
اوزره نظام اتخاذ و جمله سنه مستوفی معاش و یومیه لر تخصیص قلمشدر .

اسلافك آلات جنكى سيف و نیزه و منجنیقندن عبارت ایکن طوب و تفنك ایجاد اولندقده اهل اسلام دخی بو مقوله آلات حربك تدارکنه و بحرأ مقاومت ایچون اعدانك کیمیلری کبی عظیم کیمیلر انشاسنه اقدام ایلدیلر نته کیم سالار کتیبه انبیا علیه من التحایا ازکاها افدمز حضر تلمری دخی طائف غزاسنده کفارہ مخصوص اولان دبابه نام آلت حصارك احضار و استعمالی امر ایتمشلایدی دولت علیه ده دخی فاتح عصرنده بیوک محاصره طوبلری و یاوز سلطان سلیم خان حضر تلمرینک زماننده کثرت اوزره اردو طوبلری یا ییلوب کیتدکجه طوبیحلیق فی ایرو له مشیکن نظامات سائره نک اختلالی زمانلرنده بالاده بیان اولدینی اوزره طوبیخانه اموری دخی مختل و مشوش اولوب طوب ایسه آلات حربیه نک اعظم و الزمی اوله رق اور و پالولر فنون و صنایع سائره کبی طوبیحلیقی دخی پک زیاده ایرو لتدیلهر حالبوکه (واعده و الهم ما استعتم من قوة) مؤداسیجه ملت اسلامیه اعدایه غلبه ایچون مقتدر اولدینی قوتی تدارك و احضاره مأموردر و بو آیت کریمه نک نزولنده سرور انبیا علیه افضل التحایا افدمز حضر تلمری (الا ان القوة الرمی) یعنی قوت انجق رمیدر دیو بیوروب رمی دخی آتمق معناسنه اولغله قوه حربیه آتمقدن عبارتدر دیمك اوله رق امتنی اول عصرده اقوای دار و کیر اولان کان و تیرك استعمالنه ترغیب بیور مشدر . بعده طوب و تفنك ایجاد اولغله تیر و کان پسمانده کوشه اهل و نسیان اولمش ایسه ده رمی مطلق اوله رق ذکر اولندیقندن حدیث شریفك حکمی طوب و تفنك دخی شامل اولور و عصر سعادتده رمی انجق تیر و نیزه حقنده جازی ایکن السهم و الریح دیو تصریح بیورلیوبده اطلاقه عدول اولمنسك نکتة دقیقه سی بعده طوب و تفنك ظهوریله رمی ماده سنك آثاره منحصر اوله جنی معلوم نبوی اولغله الی یوم القیام رمی ماده سنك عام و ما صدق اوله جنی آلات ایله مجاهده ایلمك باینده امر و فرمان بیورلمش اولمق دقیقه سی ایدوکنی عاصم افندی تاریخنده بالمناصبه بر لایحه محاسن فایحه اولمق اوزره ذکر و بیان ایلمشدر .

الحاصل بر زیاده اتان جنکی قازانه جنی مجزوم و الحاله هذه آلات رامیه نک اقواسی طوب اولدینی معلوم ایکن بر مدت نبر و طوبیحلیق فتنه اهتمام اولنماز اولدیغندن سلطان سلیم خان حضر تلمری تحته جلوسلرندن مقدم انواع آلات ناریه ایجاد یله فن و صنعت آتشبازینك استکمالنه قطعاً نیت ایدوب حتی اولوقت تألیف ایتمش اولدینی رساله بی نظیر شرفساز نظر فقیر اولدی دیو کتبخدا سعید افندی تاریخنده تصریح ایتمشدر .

بناءً علی ذلك سلطان سلیم جالس دیهیم خلافت و سیم اولدینی کبی بری و بحری اسباب حربیه نک استکمالنه مسارعت ایدرك بر منوال سابق ترسانه و خنجره خانه کبی

طوپخانه ایچون دخی قوانین جدیده وضع و تاسیسنه مبادرت و حقیقت حاله بو او جافلرک احیاسنه همت ایدوب بو باده وقوعه کلان اقدامات جلیله لری یار و اغیار نظر نده شایان پسند و تحسین اولمشدر .

بو ائناده بعض نظامات ملکیه یه دخی همت اولمشدر . شویله که : عبدالله ملا فندینک لایحه سنده بیان اولدنی و وجهه دولت علیه نك ابتدای ظهور معدلت نشور نده اهل ذمت رعایان جزیه شرعیه لرندن ماعدا بر نسنه آلمدیغندن آنلر دخی مرفه الحال و مسترح البال اوله رق حراثت و زراعت ایدوب محصول لرینک عشرینی بعدالاعطاء اصلا مضایقه چکمکسزین جزیه لرینی دخی ادا ایده کلدکری جهته همدین و هممذهبلری اولان دول سائره رعایای آنلرک حاله غبطه ایدرک دولت علیه تبعیتنی آرزو ایدرلر ایدی صکره لری بعض عوارض و اسبابه بناء کرک احباب مالکانه و تیمار و کرک جزیه داران و مبایعه جیان طرف لرندن و کرک اعیان و دره بکبری و قضات و نواب جانب لرندن اهل ذمت رعایا حقیقده جور و ظلمه ابدار و اهل اسلام رعایا دخی تکالیف عنیفه ایله اضرار اولنغین سکسان ایکی سنه سی سفر نده آقد کزده واقع جزیره لرک اکثر رعایای اوزرینه تحمل لرندن زیاده تکالیف طرح و توزیع اولدیغنه بناء دولت علیه تبعیتدن روگردان اوله رق روسیه لویه میل و تبعیت و افلاق و بغداد رعایای و یوه ده لرینک تعدیاته عدم تحمل لرندن ناشی کدک روسیه دولته عرض متابعت و روم ایلینک اهل ذمت رعایاسندن پک چونغی روسیه طرفه فرار و التجایه مبادرت و اهل اسلام رعایای دخی قزان تاتار لری کبی مسقوله سنوی اوچ درت التون ویره رک املاک لری یدلرنده قالمق اوزره انقیاده رغبت ایلدکری اول تاریخده تحقیق اولنان حالات ریده دن اولوب بعده اشبو سفرده دخی روم ایلی و اناطولیده متوطن بالمله رعایا و بر ایا سفره مأمور اولان عساکرک مرور و عبور لرنده جور و اذالردن بیزار اولدقلرندن بشقه ایام حریده تجهیز عسکر و ترتیب لوازم سفر ضمننده بالضروره قضالره انواع تکالیف طرح و تحمیل اولنق لازم کله رک غائله سفر حسیله طشره اهالیسی کوزه دیله مدیکندن روم ایلیده و اناطولیده و یوه ده و اعیان نامیله مملکتلره مستولی اولان ظلمه بو تکالیفک بر قاچ قاتی کندولری ایچون دفتر توزیع اذخال ایدوب حکام و نواب دخی بو مقوله ظلمه ایله بالاتحاد خرج امضا و دفتر آچقه سی دیو بر خیل شی اخذ ایلدکری جهته اهالی به طرح و توزیع اولنان آچقه قضا مصارفک اضعاغی مضاعفی اولدیغندن رعایا به ضعف طاری اوله رق تکالیف شرعیه بی ادادن عاجز قالدقلرینه و سفر بر طرف اولدقن صکره دخی او مقوله ظلمه مألوف اولدقاری مظالم و تعدیادن و از کچمکدرینه مبنی قصبات

وقری اهلایسی بر آجینه جق حاله ککش اولمربله طشر دلرک اصلاح احوالی اهم امور دن اولوب قالدیکه فتح خاقانیدن برو وقت وقت قضبات وقری و بونجه اراضی و وسیعه محرر لر تعیینیه تحریر اولنهرق دفتری دفتر خانه عامر ده محفوظ ایسه ده الکره کی تحریر دنبرو خیلی زمانلر کچمش و مرور اعصار و تبدل اطوار حسبیه یکیدن یکی به واردات تکثر ایدرک نیجه منافع زائده و ایرادات جدیده ظهور ایتمش اولدینی حالده بومقوله زوائد فوائدی اعیان ودره بکلری اخذ و اخفا ایدوبده دولت علیه ضرورت چکمک ناروا اولدیغندن دول سائرده ده دخی عادت اولدینی اوزره مجدداً کافه بلدان و امصار و نواحی و عامه قری و اراضی تحریر ایله احوال ملکه کرکی کبی کسب اطلاع اولنسی هم تکثیر واردات بادی و همده رفع مظالم مدار کلی اوله جفی عبدالله ملانک لایحه سنده محرر در انحق تحریر جدید ماده سی بر شغل جسیم و امر عظیم اولوب وقت ایسه تنک اولدیغندن رفع مظالم حقتده بر چاره سریع الحصول بولنق لازمکلمکله فیابعد هراتی آیده بر کره قضا دفتر لری استانبوله کتوردیلوب مأمور لر حضورنده تدقیق و سخته مقرون اولان مصارف اثبات و موضوعات حکامدن اولان اموال زائده حط و تنزیل ایله تعدیل اولنسی سلطان سلیم خان حضر تلی قطعاً اراده ایدوب بناء علیه بواشاده طشر لره اصدار و تسلیار اولنان او امر علیه بوندنبویه هر قضانک توزیعاتی سنه ده ایکی دفعه به تخصیص اولنهرق التی آیدن التی آیه بر دفعه توزیع اولنوب آر القده بشقه جه دفتر ترتیب اولنمسی واسم و محلی معلوم اولمان مصارف بروجهله قضالره توزیع اولنوب التی آی ظرفنده هر نه مصارف اولور ایسه اسم و محلی معلوم اوله رق توزیع برله دفتری در سعاده ارسال اولنسی اراده قطعیه شاهانه اقتضاسندن اولدینی بیانیله بوندن صکره هر قضانک سالیانه دفتر لری بعدالتوزیع قضالر محاکمندن برر صورتی اخراج ایله در سعاده جلب ایتدیریلوب دفتر لرک برنده فاحش ماده بولندینی کبی اول دفتری امضا ایدن حاکمندن توزیع ایدن اعیان و ایش ار لرندن زجر آلهم تحصیل ایله اصحابنه رد ایتدیر لکدن بشقه اومقوله حکامک طریقر لری حک و کندی لری نفی ابد ایله تأدیب و سائر ظلمه نك دخی جزالری ترتیب قاتنه جفی درج و تصریح اولنمش و سالف الذکر دفتر لرک تصحیح و تنقیحی ایچون و اصف تاریخنده تحریر اولدینی و جهله اناطولی دفتر لری دفتر دار سابق محمد شریف افندی به وروم ایلی دفتر لری یکیشهر لی مصطفی بکه احاله قلمشدر انحق نوری بک تاریخنده تحریر اولندیغنه کوره مورده ایالتنک توزیع دفتر لری بشقه جه افراز اولنهرق ترسانه امینی اولان مورده لی عثمان افندی نک نظارتنه ویرلمشدر .

تاتارجق عبدالله افدينك اخطارى وجهله بوضرده شروط وزارتى حاوى برقطعه قانوننامه تنظيم ايله وزرا منصببارى يكرمى اوچه وقپو كتخدالقرلك عددى التى به حصر ووزرا طرفندن مباشر كوندرلك رخصتى ظلم وتعدى وقوعندن سالم اوله بيله جك صور متينه به قصر اولمشدر قانوننامه مذكورك حاوى اولديغى مواد قانونيه خلاصه وجهله زيرده (٣) رقبيله ايراد اولنور .

بروجه بالا لايحه لر خلاصه اولنديغى صرده بيان اولنديغى اوزره دور عبدالحميد خانيده قطع اولنان مغشوش ايكلكلر معاملاتك اغتياشاسنه واسعارك غلاسنه سبب اولمقدن ناشى بونلرك رقبيله سكه نك اصلاح وتصفيه سى لازمكلوب سلطان سليمك جلوسنده انتظار اولنان اصلاحاتدن برى دخى بوماده ايدى .

فقط هنگام سفرده بونك اجراسى ناقابل اولديغندن ناچار بمرمدت ده ايكيلك قطعنه دوام اولنش ايدى .

بعدامصالحه نظامات جديده تاسيسنه صرف نقود افكار اولنديغى صرده سكه نظامى دخى موضوع بحث ومذاكره اولمغه باشلادى .

تاتارجق عبدالله افدى دخى بوجه بالا لايحه سنده تصحيح وتصفيه سكه خصوصتك وجوب وفائده سنى ادله كافيه ايله اثبات ايلدى .

هپ عقلاى وكلا ايكلكلر قالدريلوبده سكه نك غشى كلياً ازاله اولنورق خالص العيار سكه كسامسى خصوصتى سلطان سايمه جلوس هايونلرندن برو عرض واخطار ايده كلدكلرندن بوخصوصه ميل هايونلرى رونما اولمش ايدى .

انحق تصحيح سكه اولنديغى تقديرجه ضربخانه معاملاتنه بعض مرتبه مضايقه عارض اولمق واهمه سنه وبلكه مغشوش سكه معاملاتندن ضربخانه مأمورلرينه دائماً كشاده اولان بروسعتلو ارتكاب قوسنك قياتمى لازم كله جكي ملاحظه سنه بناءً ضربخانه مأمورلرى بومصلحت خيريه نك اجراسنى استمدكلرندن وبواوانده ضربخانه امينى بولتسان يوسف اغا صاحب نفوذ واقبال ومقربان سلطنت ايله آميزش واختلاطى بركال اولديغندن ايكيلك قطعنده دولت عليه به كلى منافع واردر وبلكه يوزلك قطع اولنور ايسه ده زياده فائده حاصل اولور وبوندن غيرى صورته امور سفرينك اداره سى قابل اولماز ديو مقربان شهر يارى ي اغفال وبوجهله افكار صحيحه العيار شاهانه ي دخى اخلال ايمكله برقاچ دفعه بوخصوص ايچون شيخ الاسلام قوناغنده عقد مجلس مشورت اولنورق نهايت ايكلكلرك ابقاسنه ومجدداً يوزلك قطعنه قرار ويرلمش وممالك محروسه ده متداول اولان مسكوكاته باقر قارشديريله رق مغشوش سكه ضرب اولمق كى برياكلش يوله كيدلمش ودولته منفعت يولنده برعظيم مضرت قوسى اچيق براغلمشدر .

واصف افندی تاریخ‌نمده جلوس هایون وقوعنده رفع بدعت عنوانیه علم افزاز
 شهرت اولان ذوات قاصرة العقول ایکیک آچه سنی رفع وسکدن بالکلیه غشی دفع
 ضرر لرینی حقه شیهه تعیرات موهه ایله سامعه هایونه القا ایلدیلر دیو سکدنک
 تصحیحی رأی وتدیر ایدن خیر خواهان دولتی تزییف ویوسف اغانک بوامر
 خیره مانع اولدیغنی حسن موفقیت سیاقنده ایراد وتعریف ایتدکن صکره ممالک
 محروسه ده متداول اولان مسکوکاتی بعض خونیه قطع وقص ایله وزتی تزییل وقدر
 وعیارینی تذلیل ایدوب معاملات ناس فاسد اولمشیدی ذکر اولنان نقود زایفه نک قیم
 مفروضه سی ادا اولته رق جمع والتقاطنه اقدام اولنوب تصرفات دارالضرب ایله بوماده دن
 دخی حاصل اولان نقود جیب غیبیدن ظهور ایتمش مال کی صورتیاب وجود واداره
 امور سفره کفایت مرتبه سنه وصولی معلوم ارباب شهود اولدی ایسه دخی ادخاره
 مدار اوله جق مرتبه لره واصل اولدیغندن دول سائر نک سیم وزرینی بر نوع تصرف ایله
 جلب واعمالده کلی فائده ترتب ایده چکنی تعقل ایدرک بوماده نی دخی صنایع عقلیه
 ایله فعله اخراج یعنی رایج وقت حسابیه دول سائر دن استجلاب اولنان سیم وزره
 سک ضرب ایدوب بسبب الامتراج حاصل اولان تفاوت عین ماده نک نصفی درجه سنه
 متقارب اولوب فلهدا دول نصارا من جهة النقد مبتلای تضایق وانزاعج ونقود
 وافر لرینی خزینه هایونه ادراج ایلدی دیویوسف اغانک مدح وثنا سنده اطرا ایلمشدر .
 تحقیقات سابقه مزه نظراً یوسف اغانک مسلکی باطل اولدیغنی ارتق بحث ونظر
 قبول ایدر مواد دن دکدر هله واصفک دول سائر مسکوکاتنه باقر خلط ایدرک
 مغشوش سک قطعندن آنره مضرت ودولت علیه منفعت حاصل اولدی دیمسی
 موجب فحک واستهزا اولان سوزلردندر زیرا اجنبیلرک نظر اعتباری سکدنک
 وزن وعیارینه مقصور اولدیغندن آنر صاندقلری متاعک بهاسنی اللرینه کیره چک
 آچه نک مالیت حقیقه سنه کوره تعیین ایده کلد کلرندن بو باده معامله لرینی دائماً
 موشکافانه اجرا ومغشوش سک آسه لر دخی آنی خالص العیار سکیه تبدیلرنده
 متضرر اولمیه جق صورتده اخذ واعطا ایدوب وبومقوله امور صرافیه ده اصلا
 حساب لرینی شاشیر میوب مملکت لرینه یا نقود خالصه ویا خود کتورد کلری متاع لرینه
 مقابل اشیای سائر کتور لر بو جهته مسکوکات مغشوشه نک آنره ضرری
 اولیوب بلکه آلتونک فیثاتی اوینادجه آندن دخی تمتع ایدر لر وسکدنک مغشوشیتی
 حسیه اوزرنده کی قیمت اعتباریه سی بمقدار ایسه دولت علیه اولقدر آچه داخل
 مملکتدن استقراض ایلمش دیمک اولمسیله بونک ضرری مجرد ممالک محروسه

اهالیسنه وعلی الخصوص موظف اولنره راجع وآچه وغروش حسابیله تحصیل اولنان وارداتدن وقوعه کلان تنزلات دخی میری خزینه سنه عائد اولور .
 دول سائر دن نفودك جلب وجعی مادهسی ایسه مجرد موازنه تجارتك ثمره سیدر .
 شویله که : بر دولتك خارجه صاندیغی محصولات خارجدن آلدیغی محصولاتدن زیاده ایسه اول زیاده مقداری خارجدن نقد کیرمك لازم کلدیکندن بالطبع اول دولتك نفودی تزیاد وعکسی تقدیرنده تناقص ایده جکی امر جلیدر .
 واصف کبی امور مهمه دولته استخدام اولنش بر ذاتك بورالره وقوفی اولماق مستبعد اولدیغی مثللو بو وجهله بطلانی بدیهی اولان مقدمه غیر معقولهی یوسف اغانك مبحث مدح وستایشنه توطئه ایچون قضایای مسلمه ومقبوله قالبه افراغ ومورخین حقیقده مذموم اولان مدهانسه بی بو درجه لره ابلاغ ایلمسی دخی استغراب اولنور حالاتندر .

بالاده بیان ایتدیکمز وجهله بر مملکتده نفودك تزیاد وتناقصی میزان تجارتیه کوره اولوب بر مدتنبرو ایسه ممالک دولت علیه نك تجارتی اجنبیلر انه حکمکله بو اوانده وکلای دولتی مستغرق بحر افکار ایدن مواددن بری دخی ممالک محروسه تجارتك ینه دولت علیه تبعه سی یدینه کیرمسی ضمننده بر صورت حسنه مطالعه سی ایدی .
 تجارتك ال بیوک مجراسی دریا اولدیغندن بو مقصدك حصولی تجار سفاینك تکثیرینه موقوف اولمسیله اکا بر چاره بولمق خصوصی موضوع بحث ومذاکره ایدی .
 قالدیکه بو ائنده بر منوال سابق دولت علیه نك مطمح نظری اولان مواددن بری دخی ترسانه نظامی اولوب حالبوکه بر ملتک ملت بحریه اولمسی تجارت بحریه سنك ترقی بولمسی ایله مشروط ودولتک قوه بحریه سنك دوام وبقایسی دخی اکا منوطدر .
 زیرا عساکر بحریه قولایلقله یتشم دیکندن دولتک تبعه سی ایچنده دریایه مألوف وسفینه استعمالنی بیلور کسنه لر کثرت اوزره اولدیغی حالده لدی الایجاب نفرات بحریه سنك اکمال نقصانی مشکل اولور . اما تجار سفاینی کثرت اوزره اولدیغی تقدیرجه لدی الاقتضا ایستدیکی قدر نفرات بحریه تدارکیله نقصانی اکمال وبلکه ایام سفرده ایجابنه کوره تجار سفائی دخی استعمال ایده بیلور .

وقتیله دولت علیه نك قوه بحریه سی بالجمله دول اوروپانک قوه بحریه لرینه تفوق ایتشیکن صکره لر ی بوقوتک پایدار اوله مامسی دخی بودقیقه دن ناشیدر .

واکر چه مجرای تجارتك توسعیله سفان تجاریه نك تکثیری مقصدینه شاهراه وصول سر بستیه تجارت قاعده سی اولدیغی مسلم ار باب عقول اولمسیله یقین وقتلره دك جاری اولان ید واحد اصولی اولوقت الغا اولنوب دولت علیه تجاریه نك کمرکجه دخی بعض

امتیازات و یرلمش اولسه میزان تجارتك دولت علیه تجاری یدینه نقلی قابل ایدی
انجق اول زمان دولت علیه استانبولده ارزاقك او جوز فیئات ایله صاتلمسنى متكفل
ووكلاى دولت دائماً استانبول اهاالیسنك ما كولات و مشروبانى تهیته و تدارك ایله
مشغلا و لمغین هر كس محمولاتنى فیئات طبیعیه سیله ایستدیكنه صاتسون دیه رك
سربستیء تجارت قبوسنى كشاد ایسه استانبول خلقك عظیم كفتكو ایده جككرى
دركار اولمسیله فتنه و فساد تحدث ایده بیلمك ملاحظه سنه منى بو طریق صحیحه
كیدیه مدیكندن سفائن تجاریه نك تكثیریه تجارتك توسعه مدار اولمق اوزره
رجل دولتك عظماسى و خدمه سلطنت اغناسى برر سفینه اشترا واحوال سفینه
آشنا برر كمسنه ایله عقد شركت ایتملى ایچون اراده سنیه اصدار اولمغله مأمور
اولان ذوات بو ائشاده اولوجهه برر سفینه اشترا و تدارك ایتمكده بولمشردر
(هیهایهات لماتوعدون) كله لم تعلیمی عسکر بختنه .

* نظام جدید عسکرینك کیفیت ترتیبی *

صدر سابق قوجه یوسف پاشا صنایع حربیه اوروپایه واقف برقاچ معلم تدارك ایدرك
اردوی هایون ایله برابر در سعاده كتورمش و مجالس مشورتنده تعلیمی پیاده
عسکرى ترتیب اولمق اوزره قرار و یرلمش ایدی .

بوماده ایسه سلطان سلیم خان حضر تلیرنك اقصای املی و لمغله همان لوند چقلكنده
برمقدار نفرات جدیده تداركیله تعلیمه مباشرت و رفته رفته تعلیمی عسكرك
تكثیرینه مبادرت اولندی و برمنوال سابق تعلیمی عسکر نظارتی عنوانیه بر نظارت
احداث اولنه رق مصطفی رشید افندی عهد سنه توجیه قیلندی .

عساكر مرقومه نك مقداری برقاچ یوزه بالغ اولدقده سلطان سلیم حضر تلی
تعلیملرین تماشا ایله استعمال اسلحه ده سرعتملرین و (كانهم بنیان مرصوص)
مؤداسنه موافق اوله رق جسم واحد كبی تناسب حر كترلرین استحسان بیوردی .
واول ائشاده نظام جدید عسكری یازمق اوزره او جاقلودن نفرات ایستللكده
یکچیریلر یان چیزمكله سلطان سلیم خان حضر تلی دخی عساكر جدیده نك
مستقل بر اوجاق اولمق اوزره ترتیبی فرمان بیوردی .

لكن وكلاى دولت عقد انجمن مشورت ایلدكلرنده دولت علیه بویه برطاق معلم
عسکر تداركی فریضه حالدن اولدیغنده شبهه یوقدر فقط سلطنت سنیه نك قوانین
قدیمه سندن خارج اولمامق اوزره قدیم اوجاق اولان بوستانیان خاصه او جاغنه
الحاق ایله بوستانی تفككجیسی اوجاغی اولمق اوزره شمديك اون ایكى بیك اوله رق

ترتیب و بونک دخی اول امرده بر اورطه سی نمونه اوله رق لوند چفتلکنده تنظیم اولماید دیو بالانفاق ویریلان قرار اوزرینه صادر اولان اراده سینه موجنبجه ایلروده ایرادی بولندجه تکثیر اولنق اوزره اول امرده لوند چفتلکنده مع ضابطان بیک التیوز ایکی نفردن عبارت اون ایکی بلوک اوله رق بر اورطه ترتینه مباشرت و بو اورطه بر بیکباشی وصاغ قول وصول قول اغالری و آنلرک ایکی ملازم اغالری و هر بلوکه برر یوزباشی و ضابطان سائر تعیین ولوند چفتلکی کتخداسی ولی اغا قوجی باشیاق رتبه رفیعہ سیله اوجاق اغاسی نصب و نفراته سونکولو تفکر اعطاسیله کر میت اوزره تعلیمه مبادرت اولنمش و اشبو تعلیمو عسکر ایچون بو اووانده برقطعه قانوننامه قلمه النوب چونکه عساکر مرقومه نک ابتدا کی اورطه سی بروجه مشروح لوند چفتلکنده کشاد و تنظیم اولندیغندن قانوننامه مذکور دخی لوند چفتلکی قانوننامه سی دیومذکور و معروف اولمشدرکه خلاصه و جهله صورتی زیرده (۴) رقمیله ایراد اولنور .

مجلس مشورتده برمنوال سابق عساکر معلمه ترتینه قرار ویرلمش اولوب المنجق یکیچریلر مرض اکلہ کبی ممالک عثمانیه شامل و مستولی و شهر و قصبه لدره لکه ثابت کبی متمکن اولدقلرندن او جاقلرینک اطفاسی محال و آنلرک وجودلری حینده عسکر دیگر ترتیب اولنه بیلمسی بعید الاحتمالدر زیرا البتہ عسکر جدیدی استرقاب و استقال ایده جککاری درکار و او جاقلری حقنده اولان فرط غیرت و عصیتلری مقتضاسنجه بی پروا نشر شراره شر و شور ایده جککاری کالنار علی علم المنار آشکاردر و روسیه لونک استریلیج عسکری دار الحکومه سنه منحصر بر شرمه قلیله اولغله بونلری آنلره قیاس قیاس مع الفارقدر بناء علی ذلک رأی صواب بودرکه دولت علیه امور محتله سی اثر اخلافه توفیق و تنسیق و ترسانه و سائر او جاقلرک اصول و نظامات مندرسه سی تعمیر و ترمیم ایدوب یکیچریلرک سرکرده لری تدایر حکیمانه ایله اله آله رق ایچلرندن لزومی قدر پیاده و سواری تدارکیله تعلیم خصوصی دخی آنلره سپارش اولنه قبول ایدرلر ایسه نه اعلی ایتدکلری تقدیرجه بدایت امرده حجت اولمش اولور مقدماتی تمهید اولنمش ورأی مذکور معقول و مستحسن کورنمش اولدیغندن ذکر اولنسان لوند چفتلکی او جاغنک اون ایکی بیکه ابلاغی قرار کیر ضمیر اهل تدبیر اولدقدنصرکه جنتمکان سلطان سلیمان خان حضرت تلرینک وضع و نظاملری اوزره یکیچری زمره سی اکمل من الاول مظهر اعتبار و توجهات شاهانه اوله جنی سوزلری اسماع و اشاعه اولنهرق برمنوال سلف بهر سنه روز حضرتدن روز قالم حلوله دک طوب قبو خارچنده سکر دم محلنده و سعد آبادده تعلیمه سی

ومداومت ایلملری وباش کاتب والی نفر یازیچی وتفنگچی باشی و او طه باشی وسقار وقره قوللقجیلرک تعلیمده موجود بولملری نظام اتحاد اولنهرق هر دفعهده دردر اورطه تعلیم ایتمک اوزره الی درت بلوکک چورباجیسی سرتعلیمچی نامیله اوزرلرینه سرکرده نصب وتعیین اولمش وادوات تعلیم اولان باروت وقورشونلری دخی جانب میریدن اعطا اولتمق اوزره قرار ویریلرک اولوجهله کیفیت جمیع ممالک محروسه یه نشر واعلان قنمش ایدی .

بوصورتله یکیکریلر چند ماه مقدم تعلیمه مداومت برله معلم عسکر شکنه کیرمکه باشلامشله ایسهده چونکه مدت مدیده عطالت وکسالت کندولرینه طبیعت ثانیه اولوب نه وقت اولسه قزانلری چیقاروب قته احداییه دولته عصیان ایده بیلمک اقتداری دخی کندولرنده موجود وبوجهله ضبط وربط ماده سنک ایکی شرطندن بریسی اولان خوف مجازات خصوصی مقفود اولمسیله ایچلرنده روح الجیش دینلان قوه معنویه حصولی ناقابل اولدیغندن بشقه لوند چفتلکی ماده سی کندولرینه داغ درون اولوب شو یله که : وکلای دولتک نظام جدید عساکری حقهده توجه واستحسان وتوفیر وتوقیرلرینه سعی فراوانلری کندولرینه باعث استرقاب ومن بعد بیع اسامی ممنوع اولسی خارچدن اسامی ایله علوفه آلنله وداخلدن طیارات ایله عفت کارانه عوانده نائل اولنله مورث اندیشه واضطراب اولمقدنناشی تعلیم ماده سی خارچ ازقدیمدر دیو حقیقت حالدن یخبر اولان نفراتی اضلال وافساد ایتملریله یکیکریلر چند ماه امر اهم تعلیمه سعی ایتمکدن صکره کرک درسعادته اولنلر وکرک سائر ممالک محروسهده بولانلر حمله تعلیمدن فراغت ایله کافی السابق اختیار بطالت ایلدکلرینه مبنی نهایت وکلای دولت دخی اتفاق آرا ایله نظام جدید عسکرینک تکثیرینه مباشرت واسکدار وراسنده دخی قشله بناسنه نیت ولوند چفتلکی قانوننامه سنده مندرج اولدیغی وجهله طشره لرده معلم عسکر تدارکی خصوصه قویاً عزیمت ایدرک رفته رفته عساکر مرقومه نک نقصانلری تکمیل وارالق اراق لازمکلان مواد قانونیه دخی قانوننامه مذکوره تدبیل اولتمقده بولمشدر .

یکیکریلر ایسه شایدکه نظام جدید عسکری ایشه یارار ایسه یکیکری او جانچی اعتباردن دوشر خوفیه نظام جدیده قید اولنان نفراتی (بوتعلیم کاور ایشیدر) دیو تفسیر ایتملریله یازیلانلرک چونخی دخی برطرفدن طاغلمقده ایدی .

بناءً علی ذلك یکی عسکرک تلطیفی لازم کلوب بوایسه یکیکری یه طوقدیغندن انلرک حقهده دخی علوفه لرینی تزئید ایلمک کی معامله لطفیه اجراسی لازمه حالدن ایدی . بومثللو اصلاحات جدیده نک اکملی ایسه ذاتا پک چوق آچله ره موقوف اولدیغی

حالده بونکله برابر برده اسکی مصارف عسکریه بی اداره اتمک مشکل برایش اولوب مضایقه مالیه ایسه برکال اولدیغندن واردات جدیده بولمق افکاری هرشیدن زیاده وکلای دولتی اتعاب ایدیوردی .

حالبوکه مجرای واردات دولت اولان ایالات والویه نك احوالی اوزمان يك مختل و مشوش ایدی .

شویله که : غرب او جاقلری ممتاز و مستتبنا بر حالده و خطه مصریه امر ایدنده و برالشام قطعه سی جزارک زبردست تغلبنده اولوب بر مدت نبرو مصره تقلیداً بغدادده دخی بر طاقم کوله مندر ظهور ایشیدی دیار نجدده ظهور ایله جزیره العربک هر طرفه نشر کزند و شور ایدن و هابیلر دخی یوماً فیوماً سواد جمعیتلرین تکثیر ایلمکده ایدی . ممالک دولت علیه نك دیگر طرفلریدخی بر طاقم دره بکلرینک زیر دست تحکمنده اولوب علی الخصوص اشقودره متصرفی قره محمود پاشا فرمانلی اوله رق سنه سابقهده اوزرینه حرکت ایدن روم ایلی والیسی منزهماً عودت ایلمش اولدیغندن اوزرینه مجدداً براردو ترتیب ایدلمکده و کذلک سنه سابقهده عجم اوغلی نام شقی اوزرینه مأمور اولان اناتولی والیسی علی پاشا مرقومک حقدن کله میهرک مأیوساً عودت ایلمش ایدو کندن بونک دخی بر چاره سی دوشونلمکده اولدیغنی حالده روم ایلی یقه سنده قیرچهلی و طاغلو اشقیاسی تعبیر اولنور بر طاقم حیادید و اشقیبا جمعیتلری پیدا اوله رق روم ایلی بی تخریب اتمکده ایدیلر .

* بعض امور خیریه *

سلطان سلیم خان حضر تلری بو اوانده کیجه کوندوز نظامات مالکیه و عسکریه ایله مشغول بولندیغنی حالده بر طرفدن دخی امور خیریه و مواد متبرکه نك اجرا سندن خالی اولمزدی . بناءً علیه قونیهده غنوده پستر غفران اولان حضرت مولانانک وجوارنده مدفون اولان کبار طریقت مولویه نك پوشیده و استار تر بهلری فرسوده اولوب سلطان سلیمک ایسه طریق مولوی به محبتی اولدیغندن ذکر اولنان مر اقد متبرکه نك پوشیده لری تجدید و عتیقلری خزینه هایونده حفظ اولمق اوزره امر هایونلری صادر اولمغین حضرت مولانک تر به سی ایچون اطلس اوزرینه زرین تار ایله آیات و اسما نسج و نقش اولنمش بر پوشیده کر انبها و باشی اوزرینه اور تلمک ایچون بر کسوه و بر قوپرده سی وجوارنده مدفون اولان عزیز لرك تر بهلری ایچون انواع اطلسدن پوشیده لر اعمال ایله قونیه به ارسال اولنمش و بونلرک کافه سنک مصارفی اون بیک غروشه قدر بالغ اوله رق خداوندکار اسبق سلطان مصطفی خان حضر تلرینک وقف شریفلرندن تسویه قانمشدر .

ینه بو ائنده یتیمش بش بیک غروش صرف اولنه رق سرای هایونده کی خرقة شریفه
 صندوقه سنک پوشیده سی و او طه سنک داخل و خار جنده کی پرده لر تجدید اولمشدر .
 خرقة شریفه مذ کوره طرف رسالتنا هیدن کعب رضی الله عنه حضرت تری ینه بانت
 سعادلح قصیده سی ایچون جائزه اولمق اوزره احسان بیورلمش اولان برده شریفه
 اولوب آنک ایچون قصیده مذ کوره به دخی قصیده برده دینلمشدر چونکه کعب بن
 زهیرک برادری بحیر بن زهیر شرف اسلام ایله مشرف اولدقده برادری کعب
 کندوسنی تعیب و برقاچ بیت انشادیه محجو و توبیخ ایلمش اولدغی مسموع سیدالانبیاء
 علیه افضل التحایا اولیجق کعبک دمی هدردر دیو بیورمش اولدقنندن بحیر شفقت
 اخوت حسبیلله کعبی خبردار ایلدکده کعبک حالی پریشان اوله رق فرار و اختفا
 ایتشیدی برمدت صکره کمره ضلالت اولنلردن هرکیم طریق حقه سلوکه خواهشکر
 اولور ایسه جرمی عفو اولنوب ایام جاهلیتده کی سیئاتندن اعراض اولنه جنی طرف
 نبویدن اسحاب کرامه تبلیغ بیورلدقده بحیر فی الحال برادری کعبه خبر کوندرمکله
 کعب همان حضور نبوی به کله رک مذ کور بانت سعادلح قصیده سنی بالبداهه حضور
 سعادت نشور محمدیده انشاد ایدوب قصیده مذ کوره بی استماع ائناسنده ذات حضرت
 رسالتناهی کمال انبساط ایله تمایل و اهتزاز بیورمش اولدقنندن بشقه اوزر لرنده
 اولان برده سعادتق دوش کعبه الباس ایله شعرا به جائزه اعطاسنی سنت بیور دقلری
 مرویدر بعد زمان حضرت معاویه کلی مبلغ عرض ایدرک مذ کور خرقة شریفه بی
 اشتراقصندن بولمش ایسه ده حضرت کعب راضی اولمدیغندن و قاتنده آغر بها ایله
 اوغلندن اشترا ایدوب اعیاد و مواسم معینه ده تبرکا اکتساب و اخلاقی دخی اکا اقتدا
 ایدرمش تداول ایادی ایله برآراق مقرر خلافت عباسیه اولان مصره و بعده دولت
 علیه به انتقال ایلمشدر بز مانحن فیه مزه کله لم .

تعمیر و نقشنه و تزئین و فرشنه اراده سنیه متعلق بیوریلان دیوان هایون محلی دخی
 بوسنه تعمیر و کوزل کتابه لر اعمال ایله تزئین و تفریش اولمشدر .

* اثر ملوکانه به غلطه مولویخانه سی شیخی غالب افندینک سویلدیکی تاریخدر *
 فیوض سر الهام ایله غالب کلدی بر تاریخ * سلیم خان یادی هم طاق فلک بو جای دیوانی

* وقایع شتی *

اندرون هایونده سابقاً قهوه جی باشی اولان حسام الدین اغا برمدت نفوذ کلام ایله
 مشهور و بنام و بوجهته افتاده السنه خواص و عوام اولمسله (الشهره آفة) مؤداسنجه
 بوندن چند ماه مقدم موقتا چاقرجی باشیقله اندرون هایوندن اخراج اولمشیدی

انجق ذاتاً رشد و رویتبه معروف و بنام و خدمات سلطنت سینه‌دهه استخدامیه لیاقتی دخی مسلم نام اولدینی حالده استانبولده طور دقجه خلاف‌فکرانی اولنارک اذهانی راحت ایدمه‌یه جکندن صورت اکرآمده مرکز اقبال و محط رحال آمال اولان استانبولدن اخراج اولنسی التزام اولنغله اشبویدی سنه سی محرمنک اون ایکنجی کونی عهدده سنه رتبه وزارت توجیه اولتمق اوزره باب عالی‌یه جلب اولندوقده کندوسنک تاب آورچله سخت وزارت اوله‌یه جغنی مدار اعتذار اتخاذا ایدرک صرف و تحویلی استعدا ایلمش ایدمه‌ده اراده قاطعه‌نک تغییری قابل اوله‌یه جنی و بوظهورات الهیه حقدده محض عنایت ایدوکی طرف صدارتدن بیان اولنهرق عهدده سنه بارتبه وزارت بوسنه ایالتی توجیه ایلله خلعتی انکسا اولنمشدر .

محرمنک یکریمی التبعی کونی که بالاده اشعار اولدینی اوزره کوسه کتخدانک عزلیله کیزلی ستمه ابراهیم افندینک کتخدای صدر عالی اولدینی کوندر . ساعت نهاری ایکده ایکن اودون قیوسی داخلنده واقع حلواجی دکانندن آتش ظهور و اطرافه سرایت برله اون سکنر ساعت تمتد اوله‌رق اقا قیوسی قربنده واقع دوکمیجر و تحت القلعه‌نک ایکی طرفی و مرجان چارشومی و طراحیلر و اوزون چارشو محترق اولوب فرداسی یکیکچری اغاسی سعید اغا عزل ایلله یرینه قول کتخداسی مصطفی اغا نصب اولنمشدر . چونکه و اصف تاریخنده تحریر اولدینغه کوره سعید اغا یکیکچری او جاغنک حمیدی زاده‌سی اولوب اوجاق رجائتک اکثری کندوسندن ناخشنود بولدینی حالده زماننده علی‌التعاقب حریق‌لر و قوعی شامت قدمنه حمل اولدینی جهنله ارتقا قیاسی اویه میوب برمنوال سابق هان حریق مذکورک فرداسی عزل اولندوقدن صکره دیمتوقه‌یه نفی و اجلا قانمشدر .

برقاچ آی صکره ابراهیم افندینک مبتلا اولدینی سوء مزاج برمدت خانه‌سنده استراحت ایلله علاج و مداوانه محتاج اولغله شعبانک یکریمی اوچنجی کونی تدبیر وجود ایلله مشغول اولمق اوزره منفصل اوله‌رق یرینه بین‌الناس صلاح و تقوا و غوامض اموره اطلاع اوفی ایلله مشهور اولان دفتر امینی حقی بک افندی کتخدای صدر عالی اولوب انجق برقاچ کون صکره دفتردار محمد شریف افندی عزل اولنهرق ابراهیم افندی جاه دفتری ایلله تصحیح مزاج ایلمشدر .

قره‌حصاری احمدپاشادن ارکان دولت دلگیر اولدق‌لری حالده اجرای جزاسی وقت آخره تأخیر اولنهرق عقیب مصالحه‌ده و دین محافظی نصب اولنوب انجق و دینه و ارنجیه‌دک فقرا یه‌بک زیاده ظلم و تعدی و و دینه وصولنده دخی بعض کسه‌لری تجریم و مصادره ایلله سرحدلوی تغییره تصدی ایلدیکندن عزل ایلله عهدده سنه کوستندل

سنجایی توجیه اولمش ایسه ده کوستندیله وصولی ائساننده ستمدیده لری در سعادت
بث و شکوی ایتلمه اسمی جریده و زرادن ترقین اولنه رق روم ایلی طرفنده بر محل
اختیار ایله اوراده اقامت ایلمسی فرمان اولمشیدی .

بکخان سلطان کتخداسی احمد افندی دخی و اصف تاریخنده محرر اولدیغنه کوره
سلطان مشار الیهانک مقاطعاتی رعایاسنه تعدی و او زورینه لازم اولمیان اموره مداخله
تصدی ایلدیکندن دائره مشار الیهان طرد و تبعیدی مصمم پادشاهی اولدیفی حالد
برمنوال سابق راشد افدینک ریاستی حسیله چاوشباشلیق منحل اولیجق صورت
اکرامده احمد افندی چاوشباشلیقه دائره مشار الیهان تبعید اولدقدنصرکه اون
اویچ کون مرورنده بتون بتون جوار سلطنتدن تبعید اولتمق ضمننده ایکی توغ ایله
بروجه مشروح منحل اولان کوستندل سنجانغه مأمور قلندقدنه چونکه فی الاصل
نهاب وهاب اولدیغندن حرص و ارتکاب ایله جمع واکتساب ایلدیکی بونجه اموالدن
انده برشی قلامش ایدوکنندن اصحاب دیونک ازعاج ایده جکی مجزومی اولدیغنه
مبنی کیجه لین شهر شوق افزای آمال و مقام شوق و طرب اقبال اولان استانبولدن
حرکت برله ضرب نهفته اصول رحلت ایلمشدر .

احمد پاشانک انجام حاله کانجه برمنوال سابق روم ایلیده بر اقامتگاه اختیار ایلمسی
امری کندوسنه واصل اولدقدنه فرمانه اطاعت ایتمه رک باشنده کی حشرات ایله
صوفیه یه بالورود کیدرسه مسقط رأسی اولان قره حصاره کیده جکی تصریح
ودماغنده فساد اولدیغنی تلمیح ایتمه که و حالبوکه مملکتی جانبنه کتسمی محذوردن
سالم اولماغه کندوسنی تأمین ایچون برادری عمر بک با تخریرات سامیه صوفیه یه
کوندریلوب بوضورتله کندوسنه فی الجمله امنیت کیش ایسه ده فی الاصل نامزاج
ایدوکنندن بر طرفدن دخی بو وجهله هجوم ایدن غموم و افکار ایله چند روز
ظرفنده ترک هستی مستعار ایتشدر متعظم و متکبر و دنی الطبع و متهور و محق و بلاهت
ایله موصوف و جور و ظلم ایله مألوف اولدیغندن وفاتی رعایانک موجب آسایش
و راحتی اولدی سنی یتشه بالغ اولدیغنی احوالنه و قوفی اولنلردن منقولدر دیو و اوصاف
تاریخنده مذکوردر (العهده علی الراوی)

درگاه عالی قپوچی باشیلرندن سابقا سلحدار اغاسی اولان مجورلی سلیمان اغا ایله سه
قضانندن کتخدا مصطفی افندی مضبوط اللسان اولیوب خارج از وظیفه تفوهات
جرات ایلدکارندن و بو اوانده ایسه دولتک اصلاح احوال متشتمه سی ضمننده مجدداً
نظامات وضعنه صرف افکار اولنوب یکیدن اجرا اولنسان مواد حقدنه دخی ناس
بیلور بیامز اعتراض ایده کلدکارندن بو مقوله لرک تهدیدی اقتضا ایتمه که ایکیسی

دخی بر طرفه نفی اولنه رق بوش بوغازلقه نشر اراجیفه معتاد اولنلره برصورت تهیدیده کوسترلمشدر .

انجق اولوقت بومقوله تأدیبات قانون اوزره محاکمه اولنوبده بحق لاحق اوله حق حکم اوزرینه مبتنی اولدیغندن بعض اعیان دولت دخی بویله شبهه لی و قتلری فرصت اتخاذایدرک اجرای اغراضه وسیله ایده کلکله یکچیری اغاسی بوآراق مغبر اولدیغی بعض کیمسه لری نفی ایتدیر مکده ایدی .

شیخ الاسلام جدید دری زاده عارف افندی دخی بومسلیکه سالک اولوب حتی مشیختندن برقاچ آی مرورنده خصم جانی بیلدیکی شیخ الاسلام اسبق حمیدی زاده مصطفی افندی بی حجه کیتمک وبعده مغنیساده اقامت ایتک اوزره درسعادتدن طرد ونفی ایتدیردی فقط حمیدی زاده دخی مشیختنده عارف افندی بی حجه کیتمک وبعده منفاسنده اقامت ایتک اوزره نفی ایتدیرمش اولدیغندن (من حفر لایحه قلیبا اوقعه الله فیه قریبا) مؤداسنجه حمیدی زاده افندی عارف افندی حقنده سوق ایلمش اولدیغی خیرک مجازاتی عینله کندی حقنده دخی رونما اولمش اولدی .

بروسه وکیلیولیده منفی بولنان سابقا اردو قاضیسی کیچه جی زاده صالح افندی وسابقاً استانبول قاضیسی جودت خلیل افندی ومکه پایه لولرندن ملاجق زاده احمد مختار افندی خلال ربیع الاولده عفو واطلاق ایله درسعاده کتورلمشدر . سابقاً از میر قاضیسی کوستندیللی طاهر افندی دخی حمیدی زاده وحقنده مفتش بولنه رق آنک منسوب اتندن معدود اولدیغی حالده عن اصل برشخص الوف اولوب اکابر دولت ایله کر میت اوزره الف و اختلاطن خالی اولماسیله حمیدی زاده نك اطلاقه سعی اوزره در دیو حقنده اشتباه اولدیغندن حمیدی زاده نك مشیختنده طاهر افندی دخی بعض مکارهده الی وشونک بونک نفی وتغریبی خصوصنده مدخلی وار ایش دیو ربیع الاخرک یکر منجی کونی قسطمونی یه نفی واجلا قلمشدر .

چونکه شیخ الاسلام افندی نك اقصای املی حمیدی زاده نك حقندن کملک قضیه سی اولدیغندن سائر علمانک کیمی تخویف وکیمی جلب وتالیف ایلمک مقتضای حالدن بولدیغنه نظراً کیچه جی زاده کبی جرزه لو وجرى اللسان برذاتک هر نقدر حمیدی زاده منسوب اتندن ایسه ده بو او انده جلب واسماتی بوقاعده یه موافق بولمشدر . حمیدی زاده کبی ذروه اقباله چیقمش اولان ذواتک منسوب اتی دائماً مزلقه خطر ادبارده بولمغله بومللو عواقب مختلفه بی درپیش ایدرک اکا کوره ایغنی دنک آلمق وعارضی اقباله آلدنیموب هر حالده تنک طورا تمق لازمدر . خصوصیه اعتبار اضایسی تحیز ذاتی سندن بالاتر اولنلر بوقاعده یه پک زیاده رعایت ایتلیدر . زیرا

کیچه بی زاده کبی ذاتاً دولته اثبات وجود ایش اولنلر نه وقت اولسه کیچه بی صودن
چیقار و کندوسنی قورتارر اما مجرد اقبال اضافیسنه اغتراراً حدندن افزون
ایشلره ال اوزادانلر صکره قولایلقه یاقه سنی پنجه سختکیر زمانه دن قورتاره ماز .
فرائض حالیه دن اولان اصلاحاتک اکملی ضمنده وکلای دولت بالاتحاد ایشه
صارلمق و حیه ذمت ایکن بویله اغراض شخصیه ایله اوغراشمیری عظیم تأسف
ایده جک بر کیفیت ایدی .

اناطولی و روم ایلی طرفلرنده سالک مسلک سرکشی و عصیان اولان دره بکلرینک
مظالم و تعدیاتندن رعایانک حمایه سی بو اوانده در دست تنظیم اولان قوانین و نظامات
جدیده اقتضاسندن اولسلیله اقدجه عشاق و یوده ده سی اولان عجم اوغلتک اعدام
وازاله سنه اناطولی و ایسی علی پاشانک مأمور اولدیغنی شقی مرقوم استماع ایتدکده
در حال فرار ایلمش اولدیغندن مجموع اموال و اشیای جانب میری به ضبط اولمش
ایدوکی بو اناده علی پاشا طرفندن وارد اولان تخریرانده مندرج بولمش و بوندن
اقدام جزای سزالی اجرا اولتمق باینده فرمان عالی اصدار بیورلمش اولان سلویلی
حسن اغاجق و روسجق فرار یلرندن ترسنکلی اوغلی اسماعیل اغا بو اناده شمعی به
ورود ایله حسن اغاجق چالق اوغلی عثمان اغانک و اسماعیل اغا سلتاد اوغلی محمد
اغانک یانلرنده محمی و مخفی اولدقلمری استخبار قلمغله مر قوملرک بهر حال ترتیب
جزالینی سندن استرم دیو شمعی اعیانی چاوش زاده اسماعیل اغایه خطاً با و اخر
ربیع الآخر تاریخیه مورخاً بر قطعه فرمان عالی اصدار اولنوب متعاقباً ترسنکلی
اوغلی اسماعیل اغانک جمع ایلدیکی حشرات ایله روسجغه هجیومنده اهالیسی مقابله
و جمعیتی پریشان ایلمش اولدقلمری استخبار اولتمغله در حال بونک ترتیب جزاسنی
سندن استرم دیو اوائل جمادی الاولی تاریخیه مورخاً هزار غراد اعیانی حاجی عمر
اوغلی عمر اغایه خطاباً دیگر بر قطعه فرمان عالی اصدار اولمشدر .

وینه بو اناده بر خیلی وقتدنبرو منتشاسنجاغنه مسلط اوله رق اوامر دولت علیه
امتالدرن روگردان اولان حسن چاوش اوغلی حاجی بکر و اوغلی عمر اوزرلرینه
اناطولی و ایسی علی پاشا حرکت برله ایکسینی دخی طوتوب در سعاده ارسال
ایتمکله و رودلرنده اعدام و ازاله لر یله شر و مضر تلری دفع قلمش و اشقودره
متصرفی قره محمود پاشانک ترتیب جزاسی چون یینه فرمان عالی صادر اولتمغله بو خالده
اشقودره اوزرینه فوج فوج عساکر ترتیب اولتمقدده بولمشدر .

بو خالده مملکتین و یوده ده لرینک دخی بجایش صورتیه مأموریتلری اجرا قلمشدر .
شویله که : افلاق و یوده ده سی میخال بک بغداد و یوده ده لغنه و بغداد و یوده ده سی

الكساندرى بك افلاق ويوده لغنه تعيين اولنوب كويا كه ميخال بك ايام حربه پازده خسار اولان افلاق ايلتى بر وفق دخواه تنظيم ايلمش اولديغندن وبغدان ايلتى ايسه افلاقدن زياده پازده خسار اولمش ايدوكندن آنى دخى افلاق نظامنه قويمق ايجون بغدانه مأموريتى لازم كلوب الكساندر بك دخى ايكى دولته مصالحهده مكله ترجمانى بولهرق خدمتى مقابلى بلككه نائل اولمش ايدوكنه نظر آ بوشده قالمسى لايق شان دولت اولماسى جهته آكا دخى افلاق ويوده لغنى مناسب كورلمش حوادثى بين الناس اشاعه اولمش ايسهده بوتبدلك سبب خفيسى واصف تاريخنده بيان اولنديغنه كوره قبل المصالحه روسيه طرفندن مملكت بغدانه نصب اولنان متره پوليدك حين مصالحهده ابقاسنى روسيه لولر دوستانه رجا ايتلر يه اولوقت نماشات اولمق لازم كلوب انجق روسيه طرفدارى اولان متره پوليدك مملكت پادشاهيده بقاسى محاذيرى مستلزم اوله بجنندن لطائف الحيل حكيمانه ايله اهالى يى متره پوليددن تبريد ايدرك دولت عليه طرفدارى اولان متره پوليدلردن برينك انتخاب ونصبتى اهالى يه استدعا ايتدير مك خصوصى الكساندرى بكه تعليم وتوصيه اولنوب اودخى يوليه مصاحته مباشرت ومنتفذان مملكتى جلب وترغب ايدرك متره پوليدك عزلى اهالى يه التزام ايتيرده رك قاعده مملكت اوزره مرقوم متره پوليد عزل ايله يرينه دولت عليه صداقتكارانندن برى متره پوليد نصب اولمشيدى .

بوماده هر نقدر قاعده مملكتنه تطبيق ايله نظام بولمش ايسهده روسيه لولر حقيقت حاله كسب اطلاع ايدوبده ديكر بهانه ايله الكساندرى بكك عزلى داعيه سنه دوشهر ك مياننده قيل وقال وقوعى ملحوظ اولمغله بو محذور ملحوظك قبل الوقوع او كى كسدير ملك اوزره برمنوال سابق ويوده لرك ماهوريتلرى مبادله قلمشدر مع مافيه مملكتين بلكر ينك عزل ونصبنده آله كلان عواند رسميه وغير رسميه بو ائنده اسما سلطانك سورندن طولايى بعض متفذان عصر ك واقع اولان مصارفه مدار اولمشدر . اول ائنده ارسالخانه قوربنده واقع بردكانده مقيم اولوب دول اورويادن برينك حمايه سنده بولنان خرستيانلرك برى برفاحشه نك خانه سنده باصمغله ايكيسى بردن بارمق قپوده صلب ايله اجراى سياست اولمشدر .

* وقايع خارجيه *

بو اوانده لهستانك مقاسمه سى حوادثى شيوع بولهرق مقدماتى تبريك جلوس هايون ضمننده برقطعه نامه ايله درسعادهت كيش اولان پوتوسكى نام له ايلچيسنك ارتق اقامته لزوم قالمغله اعاده سى لازم كلوب سفير مومى ايله قومنك كيارندن اولديغنى حالده بونجه بيللق دولتنك كرفتار پنجه مقاسمه اولمسندنناشى كندوسنك حال

مأیوسیتده عودتته تأسف اولتمق لازم کلورکن اوضاع نابجا و اطوار نخوت نماسی حسینیه وکلای دولت کندوسندن دلکیر اولدقلرینه مبنی عودتته بیانی شماتت کونه اظهار محظوظیت اولنوب و حضور هایونه تقدیم اولتمق اوزره عرض ایلدیکی اویزه و بلور مقوله سی بر قاق پارچه هدایاسی خلاف رسم دولتدر دیو قبول اولنمیوب همان صفرك اون بشنجی کونی ترتیب اولنان دیوان عالیده بر معتاد باب السعاده پیشکاهنده خلعتی اکسا و حضور هایونده مقدما کتوردیکی نامه نك جواننامه سی اعطا اولدقندن صکره لوازم راهی تهیئه و مهماندار تعیین ایله کلدیکی سمته اعاده قلمش ایدی .
 بوئانده ایسه روسیه عساکری طرف لهستانی استیلا ایدوب کتمکده و لهلولر ایچنه اختلاف دوشوب طاقم تفرق و نشئت ایتمکده اولدقلرندن سفیر مومی ایله بویله بروقت فترتده طوغریدن طوغری به وطنه عودت ایتمکده جسارت ایده میوب اثنای راهده احوال و ائقالنی ترک ایدرک برایکی آدمیله نمچه طرفه فرار و اشیاسنی و رادن آدلری نقل و ایصاله ابتدار ایتمکین بوصولته فرارینه هر کس بر احتمال ویره رک تشحید فکر و خیال ایتمش ایدی .

لهستانک دوچار ورطه مقاسمه اولمی اگرچه دول مجاوره نك اثر مداخلات و افساد اتیدر انحق آنرک اللرینه بوسررشته مداخله یی ویرن یکدیگره طبان طبانه ضد اولان ایکی اصولک یعنی هم قرالیت و همده جمهوریت اداره لرینک برلکده جریانیدر که عادتاً حکومت جمهورییه ده اولدینی کبی ملت مجلسی اولوب قراللق منحل اولدقده مجلس مذکور معرفتیه قرال انتخاب اولنوردی مجلس اعضاسی ایسه هر بری قرالغه طالب اولدقلرندن بونک تحصیلی ایچون اطرافه دوشوب بومناسبتله لهستان امورینه دول سائره و علی الخصوص روسیه لو مداخله یه یول بولمش بومداخله لر نهایت لهستانک مقاسمه سنه سبب اولمشدر .

بیك یوز یتمش یدی سنه سی خلاننده له قرالی غایت اختیار اولدینی حالده شدتلو خسته اوله رق افاقندن قطع امید اولمغله روسیه امپراطوریچه سی قترینه طرف طرف لهستانه عسکر ادخال ایله قرال جدید نصبی خصوصنده مداخله قیدنده اولدینی ایما ایتمکله قراللق طلبکارانی کندوسسنه مراجعت ایتمکجه هر برینه برر صورت دلفریب ارئه و دول مجاوره یی برر وسیله ایله کندو مرامنه جلب و بند ایدرک مقدمات مصلحتی بر وفق مطالب تهیید و توطئه ایدوب لهلودن وسائره دن ظهور ایدن طالبلری برر بهانه ایله دفع و توهم و کندوسنک اسکی سوکیلورلندن وله بکتراده لری دربدرلرندن پونیا طوسکی نام شخصک قرالغنی تصمیم ایلدیکی ائانده له قرالی دخی فوت اولمغله پایتخت لهستان اولان وارشاو شهرنده قرال

جدید انتخابی ایچون مجلس عموم عقدی تقرر ایتمکین پونیا طوسکینک انتخابی مطلوب قطعی ایدوکنی او لطر فده مقیم ایلیجیسی معرفتیله اعلان ایلدکده مرقومک بومقامه اهلیت واستحقاقی اولدیغندن له ایچنده عظیم قیل وقال ظهور ایتمش ایسه ده قترینه بوبابده اصرار ایدرک هر جانبدن لهستان حدودینه طوغری عسکر سوقه ابتدار وحفظ نظام بهانه سیله وارشاو شهرینه دخی برطاقم عسکر ادخال ایتمکین یوز یتش سکر سنه سنده خواه ونا خواه انتخاب صورتیله پونیا طوسکی نی قرال نصب ایتدیرمش ایدی .

قترینه نك بوندن غرض اصلیبی لهستان حقنده رکیز ضمیری اولان فسادک اجراسنی تسهیل داعیه سی ایدوکندن چند ماه مرورنده روسیه حدودینک تسویه سی ضمننده له اراضیسندن برقطعه جسمه نك فراغنی وروسیه دولتیله له دولتی بیننده تحفظی وتجاوزی برقطعه اتفاقمه عقدینی وروم مذهبنده بولنان لهلولر حققرنده قاتولیکر مثللو معامله اولمسنی تکلیف ایلمشدر . تکالیف مذکورده وعلی الخصوص مذهب متعلق اولان نکلیف اخیر لهلولره غایت کران کلمکله پونیا طوسکی بیله بونک ترویججه جسارت ایده میهرک رد ایله جواب ویرمشدر .

چونکه له دولتی قاتولیک مذهبنده اولدیغندن وروم پروتستان مذهبلرنده بولنان له اهالیسی ملت مجلسارینه داخل اولق و مناصب دولته استخدام اولمق مثللو نیجه نیجه امتیازاتدن محروم ایدیلر حتی بو مذهبلرده بولنانلر اومقوله امتیازاتدن حصه دار اولق ایچون دول اجنبیه به مراجعت ایدرلر ایسه متهم عد اولنهرق شایان تعزیر وتکدیر اولق شرطنی متضمن برقطعه نظامنامه دخی ترتیب اولمش ایدی . قترینه اشبو اختلاف مذهب مسئله سنی ترویج اغراضنه وسیله اتخاذ ایدرک پروتستان مذهبنده بولنان لهلولری هم مذهبلی اولان انکلتره واسوج دولتلرندن وروم مذهبنده بولنانلری اتحاد مذهب حسینیه کندوسندن استشفاع ایتمک اوزره تحریک ایله هم له ماتنی ایچنه نفاق وشقاق القاهمده مذهب نزاعی بهانه سیله اغراض مضمره سنی دول سائر دن کتم و اخفا ایتمش اولدی بناءً علی ذلک یوز سکسان تاریخنده وارشاو ده منعقد اولان ملت مجلسنه پروتستان مذهبنده بولنان دول اجنبیه ایله روسیه دولتی طرفلرندن هم مذهبلی حقنده شفاعت مجربنی متضمن بشقه بشقه ادعایر تبلیغ اولندقدله لهلولر بیننده عظیم عربده لر ظهوریله عدم قبولده اصرار ایتمش ایسه ده روسیه عساکری وارشاو شهرینه قدر تخطی ایدرک صورت معروضه جبراً و کرهاً قبول واجرا ایتدیرمش اولمسیله قاتولیک مذهبنده او میان لهلولرک امید لرندن زیاده امتیازاته دفعه نائل اولمزلرندن

قاتولیکر فوق الغایه متأثر و منفعل اوله رق سلطنت سینه دن استمداد ایتدکری ائنده فرانسه دولتی دخی اورویانک جانب شهایلسنده روسیه لونک توسیع دائرۀ ملک ایله کسب نفوذ نام ایلمسی کندو پولتیقه سنه پک مضر کوردیکی جهته قترینه بی بر مدت سفر ایله اشغال ایچون دولت علیه بی روسیه علیه نه اعلان حرب ایتمک اوزره تشویق ایتمکده اولدیغندن طرف دولت علیه دن له قرالنه برقطعه نامه تحریر و روسیه لونک مطلوبی اولان له اراضیسنک فراغندن نمالک عثمانیه حقنه ملحوظ اولان مخاطره نک اندفاعی صورتیه دولت علیه تأمین اولنجیه دکن خصوص مرقومک تأخیری مطلوب ایدوکی درج و تسطیر اولندقده له قرالک قترینه دن خوف و احترازی زیاده اولمغه یازدیغی جوابده بوکا دائر روسیه لو طرفندن بر درلو تکلیف ظهور ایتمش دکدر دیو ماده بی کلیاً انکار ایتمکله دولت علیه مطمئن اوله رق سفر مطالعه سنی بر طرف ایتمش ایدی .

چونکه قترینه نک اولوقت هنوز تدارکات سفریه سی مهیا اولدیغندن وقت قرانمق ایچون اول آراق توسیع حدود ماده سنی تأخیر ایتمکله برابر ایقاع فته دن و غصب اراضی یه دائر اولان نیتک ترویجیه آلت اتخاذ ایلدیکی مذهب نزاعنی اعظامدن خالیه اولمزدی بوجهته لهلو قاتولیکرک بیچاق کیمکرینه طیانوب هم مذهبری اولان فرانسه دولتی دخی کندلرینی تحریک ایده کلدیکنه و نمچه دولتی مجرد نتیجه مصلحتده جر منافع غرضیه اول ائنده روسیه لو حقنده معامله سنی ایکی طرفلو قوللانوب اودخی بر طرفدن لهلو قاتولیکری تشجیعدن خالی اولدیغنه بناء لهلولردن برکروه بارنام قلعه بی مقر اتخاذ و خلیجه جمعیت پیدا ایدرک بی محابا روسیه لویه مقاومت ایتمک اوزره اعلان خصومت ایتملیله یکدن برطاق روسیه عساکری لهستانه ادخال اولمسیله بار شهرنده بولنان جمعیت مرقومه تکرار دولت علیه دن طلب مدد و مرحت ایدوب اول ائنده روسیه عساکرندن بعضیلری دخی حدود دولت علیه تحطی ایتمش بولندقردن سکسان ایکی سنه سنده روسیه اوزرینه اعلان حرب اولمش ایدی .

آنجق اول وقته قدر قترینه تدارکات سفریه سنی بالغاً مابلق اکمال ایلمش اولمسیله پیدرپی وقوعولان جنک کرده غالب کلکین سکسان التی سنه سنده روسیه و نمچه و روسیا دولتری یینلرنده لهستانک بر قطعه سی مقاسمه اولمش و ابتدا بونک اعلان رسمیی لهلولرک دوست و خیر خواه بیلدکری نمچه دولتی طرفندن اجرا قلمشدر . بونک اوزرینه له دولتک دائرۀ ممالکی تضایق ایتدکن بشقه اداره ملکهلری حقنده روسیه لو معرفتیه وضع اولنان اصول دائماً مملکتی ضعف و اختلالده

طوتو بحق بر اساس اوزرینه مبتنی اولدیغندن اصول اداره لری پک فنا حالده ایدی . مع مافیہ عسا کر موظفه و اصول طرح و یرکو و سائرہ ایچون نظامات جدیدہ وضعنک لزومی درکار اولمسیله جمله خواطر بومرکزده دائر ایدی . و پونیا طوسکی بومقوله مصالح ملکیکه نك اجر اسنده قترینه دن رخصت استحصائلنه محتساج اولدیغندن آندن استمزاج ایندکده اودخی رخصت و یروب حتی استقلال حکومتنه دائر تأمینات بیلہ اعطا ایلمش و دول سائرہ طرفدن دخی اول مآلده تأمینات نامہ لر کلوب حتی نمچه امپراطوری ایکنجی ژوزف بو خصوصه دائر اولان نامه سنده لهستاندن برفدانک بیلہ اخذ و اتلافی تجویز ائیمه جکنی تصریح ایلمش ایدی .

الحق اون بو قدر سنه ظرفنده نظام دولته دائر لهستانده شایان اعتنا برشی پایله مدی . مؤخرأً بالاده بیان اولندیغی اوزره روسیه و نمچه دولتلری بر لکنده اوله رق دولت علیه سفریله مشغول اولدقلری اوانده پروسیا دولتی روسیه و نمچه دولترینک لهستانده جاری اولان نفوذ لری قیرمق ایچون له دولتنک نظامات داخلیه و امور خارجه سنه تقویت و رواج و یردرمکه سعی و همت ایده جکنی تعهد و بو وجهه استقلال و سر بسیتنه تکفل ایندیکنده لهلولر دخی هان افاتۀ فرصت اولتمسزین بو خصوصک بر معاهدۀ رسمیه یه ربط اولتمسنی مراد ایشلر ایسه ده اول بول لهستانک نظامات اساسیۀ حکومتی تأسس و تقرر ایلمدکجه معاهدۀ مذکورہ نك مناسب اولیه جنی بهانه سیله پروسیالو طرفدن تعلل اولتمشدر . مع مافیہ بو کونه مواعید ایله پروسیالو لهستانده کسب نفوذ ایدوب حتی له عسا کرینک مقداری یوز بیکه ابلاغ اولتمق مناسب اوله جغنه دائر پروسیا ایلیچینسک واقع اولان افاده سی مجلس مات طرفدن قبول اوله رق روسیه طرفدار لری هر تقدیر بونک منعه چالشمشلر ایسه ده مقتدر اوله مامشدر ایدی . و بر منوال سابق پروسیالو طرفدن لزوم تأسیسی اخطار اولنان نظامات هم امور عسکریه یه و همده امور مالیه یه شامل اولوب روسیه لولر بونک تأخیر اجرا سیچون دخی بر طرفدن لهلولر ایچنده نظامات جدیدہ علیه نده بولنانلرک بر قانده اذهانی بوزمق و دیگر طرفدن روم مذهبنده بولنانلری خفیۀ تحریک ایله ایاقلاندرمق کبی افسادتدن و بو نظامات جدیدہ احوال سابقۀ مؤسسہ نی مختل و بر کشته ایدر دیو اعتراض سیاقده افاد اتدن خالی اولمامشدر ایسه ده ینه متمر و مؤثر اولوب نهایت الامر قائمه آنان نظامات جدیدۀ ملکیکه ملتجه قبول اولتمش . و بو صورتله له دولتی کندوسنی براز طولایوب دولت عالیله بر معاهده تنظیم ایتک ایچون دخی درس عبادته سالف الذکر پونیا طوسکی کوندرمش ایدی . لکن پروسیالونک بو حرکتی بتون مواضعه و پولیتیکه مانوره لری و حیله و دسیسه طولابری دیمک اولوب بوندن غرضی

لهستانك حین مقاسمه سنده كندوسی آچقده براغلاماق داعیه سی ایدی و چونکه آنك معاوتیه لهلولك طاورانه بیه جكری معلوم اولوب قترینهك مراسی ایسه لهستانك حال شورش واختلالده قالمسی صورتی اولدیغدن اعز امورى اولان له مسئله سنده روسیالویه احتیاج حالده بولنق لازم كله چكی دركار ایدی .

بناءً علی ذلك لهلولك ایستكاری معاهده نك امضاسی روسیالو بروجه مشروح لیت ولعل ایله تأخیر ایله كدن بشقه در سعادته له ایلیچسینك دولت علیه ایله تنظیمنه چالش دینی معاهده نك انعقادینه دخی مانع اولمشیدی . روسیه ایمپراطور یچه سی دولت علیه ایله عقد مصالحه ایتمدیكى كبی له اوزرینه جانب شمالدن اوتوزیهك قدر عسکر ادخال ایدوب بروطرفدن دخی حدود اسلامیه دن عودت ایدن روسیه عساکری لهستانه كیرمكه باشلامریله لهلولر یكیدن مملكتلرینك مقاسمه اولنه جغنی اكلا یوب مجلس ملت وارشاو شهرنده مقیم سفرادن بوكا دائر تأمینات طلب ایله كده روسیه ایلیچسی بوكا دائر تعلیماتم یوقدر واوستریا ایلیچسی برشیدن آگاه وخیر دكلم و روسیایلیچسی لهستانده وقوعبولان کیفیاته علاقه م یوقدر جوابلریله تعلل علیل ایدوب قترینه ایسه روسیا دولتیه بالخباره لهستانك برر قطعه سنی ضبط ایتمك اوزره بینلرنده قرار ویرمشار ایدی .

لهلولر وطن عزیزلرینی محافظه ایچون دامن غیرتی درمیان وجهله سی بواغورده حشر اولنجیهك جنك ایتمك اوزره بینلرنده عهد و پیمان ایدرك برقاچ دفعه روسیه عساکری منهزم و پریشان ایتمشر ایسه ده متفق وفادار وحامی خلوصكار عد ایلدكاری روسیا قرالی دخی بردن بره روسیه لویه توفیق حرکت ایدرك اقدمجه لهلولك استقلال حكومتی محافظه ایچون تدارك ایده یورم دیدیكى عساکری لهستانه ادخال ولهلولر علیه نه اعمال ایتمكدن بشقه روسیه و روسیا دولتلری بینلرنده ویردكاری قرار موجبنه هر بری حصه سنه آلیقویه جنی مملكتلری تصریح ایدرك اشویدی سنه سی اواسطنده برر قطعه بیاننامه ایله نتیجه افكارلرینی اعلان ایتملریله ییحاره لهلولر پشت بدیوار حیرت و ناچار مقاسمه ثانییه سرفرو برده مطاوعت اولمشلردر . مع هذا ایچلرندن بعض اححاب غیرت وطنلرینی ایادی اغیاردن تخلیص ایچون ثبات و اصرار ایتمك اوزره بینلرنده مجدداً عهد و پیمان و اوزرلرینه ایچلرندن قوچوسقو نام کیمسه نی بالاستقلال سرعسکر اولمق اوزره انتخاب و تعیین ایدوب اولدخی فی الحقیقه مدبر و غیور بر مرد جسور اولغله ایکی سنه قدر روسیه لویله شدید جنكدر ایلمشدر .

روسیه لونك بوحرکت غاصبانه سی قدخ و تعیب اولنور حالاتدن ایسه ده آکا نسبتله

پروسیانک حرکات حمله کارانه سی دها زیاده معیوب و ملوم ایدی زیر روسیه لو هیچ اولمز ایسه سبب استیلاستی عهدود سابقه یه اسناد ایدرک مقدا لهستان ایچون کندو معرفتیه یایلمش اولان نظامات مؤخرأ برمنوال سابق پروسیانک اخطار و اصراری اوزرینه یایلان نظامات جدیده ایله اخلال اولندی دیو موضوع بحث اوله بیله جک بعض بهانه لر درمیان ایدر ایدی اما پروسیالو وعد و عهدینی منکر و فعلی قولنه بتون بتون مغایر اولغله شان و فانشان حکمرانی برزمانده بودر جه لرده اخلال و عهد و پیمان واجب الحرمه بووقته دک بو قدر یاعمال قلندی نی بو قدر .

اصول ضابطه و نظامات اساسیه سی بویه بتون بتون خلل پذیر اولمش اولان بردولتک یکیدن اصلاح و احیاسی اکرچه مشکل برشیدر لکن له حکومتک انقراضنه پونیا طوسکی کبی دون همت و دنی الطبع و بی ثبات برشخصک مقام حکمداریده بولمنسی دخی کلی سبیت ویرمشدر زیرا دولت علیه سفری روسیه دولته کرک مالجه کرک عسکرجه کلی ضعف و نقصان ایراث ایدوب بوانساده ایسه فرانسه اختلالندن طولانی اوروپاچه درکار اولان خلجان افکاره نظرأ قترینه بین الدول جاری اولان نفوذی پایدار اولمق ایچون امور داخلیه سنه قوت ویرمکه محتاج ایدو کندن اوکنده اولدقجه برسد ممانعت کورسه لهستانک امر مقاسمه سنی وقت آخره تعلیق ایده جکی بی اشتباه ایدی و بوکره لهستان اوزرینه سوق ایلدیکی عسکر یوز بیک قدر اولوب لهستان ایسه بویه بروقت خطرده بونک برقاچ قاتی عسکر تدارکنه مقتدر ایکن پونیا طوسکی دائماً شخصنه عائد اولان خصوصاتی ترویج داعیه سنده بولنور و مع هذه لهستانک محافظه حقوقه حصر ووقف نفس ایلمش کبی کورینور برشخص بی حمیت اولدیغندن بو مسئله نک ظهورنده لایق اولدیغنی حالده نائل اولدیغنی له حکومتک دست تطاول اغیاردن محافظه سنه حصر افکار ایده جک یرده روسیه طرفدارلرینی یاننده توقیف و نظامات جدیده علیهنده بولنالردن بعضیلرینی وکلا ساکنه ادخال اتمسیله عسکری تکثیر خصوصنده واساچه و مهمات لازمه تدارکنده پک زیاده قصور اولمنشیدی .

ایشته پونیا طوسکینک بووجهه و قوعه کلان تقصیر و مسامحه سی له دولتک اضمه حالانی تعجیل و قترینه نک اغراضی تسهیل ایلمشدر .

مقدما دولت علیه لهستانک تخلیصی ایچون سکسان ایکی سنه سی سفرینی اختیار ایلمش ایکن بو اوانده برمنوال سابق کندی مصالح ملکیه سی دخی کلی اصلاحاته محتاج اولدیغندن بوکره لهلولره اعانه شویله طورسون بو حالرینه اظهار تأسف اتمکه بیله وقت و حال مساعد اولدیغنه مبنی لهستان حوادثی در سعاده منعکس اولدقجه آندن عبرت آلهرق نظامات لازمه نک اجرا سنه برقاندها کر میتله یاشمق لازم گلش ایدی .

طوسقانه دوقه‌لنگك نىچه ايمپراطورنده قرار قيدىغنه وايمپراطورلق رسم تتوجى
دخى بوخلالده اجرا اولمش ايدوكنه دائر طرف ايمپراطوريدن درعليه يه ايكي
قطعه نامه كلكله درسعادتده مقيم نىچه ايلچيسى هنوز دولتى طرفدن كمش صورتده
اجراى رسم داعيه سنده اولديغنه و برمقتضاي وقت و حال مطلوبنه مساعده اولمق
لازمه دن كورلديكنه منى معيته مهماندار تعيين و روزمره مصارفى جانب ميريدن
ترتيب اوله رق جمادى الآخره نك يكرمى سكرنجى كوتى ايلچى مرقوم باب عاليه
كلوب مذكور ايكي قطعه نامه يي صدراعظمه تساييم ايلدكده برمعتاد كندوسنه و معيتمده
ايكي نفر ترجمانلره و بگزاده لره و سائرديه كوركلر و خلعتلر الباس اولمشدر .

بعدالمصالحه تعيين اوله جق و قنده طرفيندن فوق العاده بيوك ايلچيلر كوندرك
ياش قصبه سنده منعقد اولان روسيه معاهده سنده مندرج اولمغه ركاب هايون
كتخذالغندن مفصل مصطفى راسخ افدى عهده سنده روم ايلي بكار بكيلىك پايه سى
بالتوجه پترسبورغ بيوك ايلچيسى نصب و تعيين و جمادى الآخره نك اون بشننجى
كونى اغا باغچه سنده ركاب ترتيب اوله رق صدراعظم و شيخ الاسلام حاضر اولدقلىرى
حالده راسخ پاشا حضور هايونه دخول ايله دوشنه ثوب سمور اكسا و يدينه نامه
هايون اعطا و لازم كلان و صايى سنيه كندوسنه تلقين و تفهيم و روسيه طرفه
كوندريله جك هدايى ملوكانه تسليم اولدقندن صكره ماه مرقومك اون يدنجى
كونى كه اول ايام خمسين ايدى آلاى و الا ايله استانبولدن چيقمشيدى . حدوده
مواصلمتده روسيه ايلچيسىله طورله نهرينك و سطنده امر مبادله لرى اجرا اولمشدر .
شويلاه كه : امر مبادله يه طرف دولت عليه دن بندر محافظى وزير حسين پاشا و روسيه
طرفدن جنرال پاسق مامور اولمش و روسيه دولتى طرفدن درسعادت ايلچيسى
نصب و تعيين اولنان جنرال قفوزوف ايچون اقكرمان محافظى مير ميراندن اسماعيل
پاشا مهماندار تعيين بيورلمش ايدى درسعادتده مقيم روسيه مصلحتكدارى قداستوفك
و يرمش اولديغى تقريرده امر مبادله نك طومبصاره قريب محله اجرا سى تحرير
اولنوب طومبصاره قريب تعيرى بندره شامل اولمق فرضيه بندرده لوازمات
تداركنه ابدار برله محل مبادله اولمق اوزره برعدد سال و اوزرينه قولمق
ايچون صنداليه لر تدارك اولنوب حالبوكه بندردن طومبصاره وارنجه اون ايكي
ساعت مسافه اوله رق روسيه لولرك طومبصاره قريب تعيرلرندن مقصودلرى
طومبصاره يازم ساعت مسافه سى اولان و قارشوسنده بولنان قره اولن قريه سى
اولديغى و بندرك قارشو طرفده اولان روسيه ممالكى بربه و خالى عن الاهالى
ايدوكنى بيان و مبادله نك قريه مرقومه ده اجرا اولمخنى درميان ايتدكلرنده

برو طرفدن دخی طومبصار طرفی خراب و عاری عن الاعمار بولتمش وهرشی بندرده حاضرتمش اولسیله طومبصار طرفنده مبادله اجرا اولندی حالد اورایه لوازماتک نقلنده شاید برکونه نقصان وقوعیه روسیه ایلیچسینک ایفای لوازم احترامیه سنده تصور اولنور وادیلرینی التزام ایله مناقشه قیام اولتمش ایسه ده بمقوله جزئیات ایله اشتغال اولنماسی ایچون در سعادتدن حسین پاشایه تحریرات کلکله طومبصارده مبادله اجراسنه قرار ویریلرک بروجه محرر تهیسه اولنان مبادله صالی بندردن طومبصاره نقل اولنمشیکن جنرال پاسق طرفندن امر مبادله نک کیفیت اجراسنه دائر وارد اولان تحریراتده روسیه لو طرفندن انشا اولنوب نهر طورله وسطنده لنگرانداز اولان صالده مبادله اجراسی یازلمش وبوصورتده ایسه دولت علیه صالی چند روز مقدم محل مبادله یه کشیکن میدانده قالمق لازم کلوب بودخی موجب نقیصه شان بر کیفیت دیمک اوله جنی جهتله بادیء بحث و منازعه اوله رق طرفیندن خیلی قیل وقال ایراد اولندقدن صکره روسیه لولر طرفندن چونکه دولت علیه صالی اقدیجه محل مبادله یه کلدیکندن کندولرینک صالی هنوز ختام بولمامش ایدوکنندن دولت علیه صالنده مبادله اجرا اولنمق اوزره نماشاته مجبور اولملریله و اجرای مراسمه دائر بونک کبی دهانجه مناقشات ظهور ایلمش ایسه ده نهایت جمله سی بویه توافق طرفین ایله فصل و دفع اولنمغه حسین پاشا و ایلیچی پاشا طومبصاره کلوب و مبادله صالی نهر طورله وسطنده لنگرانداز اولوب ذی القعدة نک التنجی و حزررانک بشنجی جمعه ایرتسی کونی طرفیندن برر طوب آتیلررق حاضر اولدقیرینی یکدیگره اعلان ایله برآنده قایقیره رکوبلرنده طرفیندن طویلر آتیلررق و برو طرفدن مهترخانه و اوتنه طرفدن موسیقه لرچالنه رق آن واحده صاله حقیقه قلدنده قارشو قارشو وضع اولنان صندالیه لردن باش صندالیه لره یکدیگره مقابل اوله رق مبادلر و صاغ طرفلرنده آرقه یه مائل اوله رق موضوع اولان ایسکمله لره مهماندار اوللر و متصل صندالیه لره ایلیچیلر و آرقه لرینه متماثل موضوع اولان ایسکمله لره مهماندار تانیلر وهکذا طرفینک معتبر معیت مأمورلری بربرینه مقابل او طوروب تر جانلر واسطه سیله رسوم مودته دائر مصاحبتن صکره ایکی طرفدن مبادلر قیام و روسیه مبادللی ایلیچسینی یداً بید حسین پاشایه و او دخی دولت علیه ایلیچسینی بو وجهله اکا تسلیم ایتدکلری حینده اشارت قالدیره رق طرفیندن یکر میشر پاره طوب آتیلوب بعده صالدن خروج و قایقیره رکوب ایله دولت علیه ایلیچسینی اوتنه طرفه و روسیه ایلیچسینی برو طرفه امرار و مهماندارلر ایله صوب مقصودلرینه تسیار اولنشلردر . دولت علیه لدی الاقتضا دول سائره زردینه بو وجهله ایلیچی ارسال ایده کلش ایسه ده

بر دولت نزدنده دائمی صورته اقامه سی بودورلره قدر عادت اولماش ایدی .
 اوروپا دولتلری ایسه هم تجارلرینک مصالح واقعه لرینی رؤیت وتسویه ایتمک وهمده
 هر مصحلتی وقتیه تفرس ایدوبده میزان پولتیقه لرینی اکا کوره قولانمق ایچون دول
 سائره نزدنده دائمی صورته بر ایلچی بولندیرلر و هر صنف تبعه لرینی برر کار
 وصنعت ایله اشتغال واحجاب فقر وفاقه نی برر ایشده اعمال ایدرک احاد ناسی معطل
 بر اقبوب بو جهتله ممالکتلرنده سئله بولندینی مثلاو کبار زاده لری دخی کوچک
 ایکن مکتبلره کیروب فنون ریاضیه وجغرافیه تحصیل ایله هیچ بلده لرندن چیقماش
 ایکن قارش قارش کره ارضی مساحه ایده جک مرتبه یه کادکریته قناعت ایتیه رک
 (لیس الخبر کالعیان) دیو عیسانا وقوف تحصیل ایتمک ایچون بلاد بعیده یه سیر وسفر
 زحمتی اختیار ایدوب بولردن بعضیلرینی دخی دول سائره نزدنده بولان سفیرلرینک
 معیترنده استخدام ایله تربیه لرینه اهتمام ایدرلر ایدی بو صورته سفارت اصولنک
 فوائد ععیده سی درکار ایکن دولت علیه اوتهدنبرو کندوسنی دول اوروپادن بیکانه
 طوته رق اوروپا احواله احاله انظار دقت ایتدیکندن دول سائره نزدنده علی الدوام
 ایلچی اقامه سنه لزوم کورلماش ایدی اوروپانک ترقیات جدیده سی ودولت علیه نک
 وقت وحال اقتضاسنجه دول اوروپا ایله پیدا اولان روابط ععیده سی دول اوروپا
 قاعده سنجه سفارت اصولنک لزوم وضع وتأسیسنی اثبات ایدوب خصوصیه بو اوانده
 رابطه دولیه یی بتون بتون بشقه بر حاله قویان فرانسه اختلالی ظهور ایله بالجه
 دول اوروپایی تدارکات احتیاطیه یه مجبور ایتدیکندن دولت علیه نک دخی دول
 فحیمه اوروپا نزدنده برر اقامت ایلچیسینی بولندیرمسی درجه وجوده کورلمکله
 دول مرقومه نزدینه برر ایلچی کوندریلوب واوچ سنه مدت تکمیلنده آنلر جلب
 واعاده ویرلرینه بشقه لری ارسال ایله منوال مشروح اوزره هم امور سفارت اداره
 ایتدیرمک وهمده بو طریقه احوال دوله واقف بعض ذاتلر یتشدیرمک اوزره
 نظامات سائره صره سنده سفارت اصولنه دخی حسن رابطه ونظام ویرمک خصوصنی
 سلطان سلیم ثالث حضر تلی تصمیم ایتمش ایدی انجق بو کیفیت دولت علیه ده محدث
 برشی اولدیغندن اول امرده کندوسنه حرمت واختصاصی سائرندن زیاده اولان
 فرانسه دولتیله بالماذا کره قرار ویرلدیکی حالده دول سائره نک دخی قبولده تردد
 واعتذار ایدمه جکلری تذکر اولنوب بو خلالده ایسه فرانسه ده وقوعه کلان
 شورش واختلال وعدم رابطه حال تقریبیه اورایه ایلچی کوندرلسه ایوم فرانسزلره
 محارب اولان دول اوروپانک انکسار واغبرارینی موجب اوله جفندن خصوص
 مذکور ابتدا قرون ماضیه دنبرو اهل اسلام ایله سلم وصالح اوزره بولنوب دولت

ایله دخی قطعا محاربه سی وقوعبولیان انککتره دولتک درسعادتده مقیم ایلیجیسی
ایله بالذا کره قرارلشدیر یله رق سابقا قالیونلر کاتبی یوسف آگاه افندی اشبویدی
سنه سی اواخرنده لوندره ایلیجیسی و مکتوبی صدر عالی خلفاسندن رائف محمود
افندی سرکاتبی و اوروبالولرک کشی زاده لرنندن سفارتلری معیتلرینه مأمورایدده کلدکلری
اتاشه لره مقابل درویش اغا نامنده بری دخی معیت مأموری و ایکی نفر ترجمان
وخرستیان تبعه دولت علیه دن بری پنه معیت مأموری تعیین ویوسف آگاه
افندی به اون بش بیک غروش خر جراه و سنوی الی بیک غروش معاش و محمود
افندی به درت بیک غروش خر جراه و سنوی اون بیک غروش معاش و درویش
اغایه ایکی بیک غروش خر جراه و سنوی سکنز بیک غروش معاش و ایکنجی
ترجمانه ایکی بیک بشیوز غروش خر جراه و سنوی الی بیک غروش معاش و اهل
ذمتدن اولان معیت مأمورینه بیک بشیوز غروش خر جراه و سنوی ایکی بیک
بشیوز غروش معاش اعطای و تخصیص بیورلمشدر .

* وقایع سنه ۱۲۰۸ *

آگاه افندی برأ عزیمت ایلمش اولدیغندن مرتب اولان هدایای ملوکانه ایچون
اشبو سکنز سنه سی او اولنده برقطعه سفینه استیجار و بحر آنککتره به تسیار اولنمشدر .
روسیه فوق العاده بیوک ایلیجیسی سالف الذکر قطوزوف اوائل ربیع الاولده
درسعادتده واصل و ربیع الآخرک سکنزنجی صالی کونی ترتیب اولنسان دیوانده
حضور هایونه داخل اولمشدر .

بعده درسعادتده اقامت ایلمک اوزره وارد اولان روسیه اورطه ایلیجیسی ماه شعبان
معظمک ایکیسنده دیوان هایونه دخول ایله نامه سی تقدیم ایلیجی جهته قطوزوفک
اقامته لزوم قالدیغندن شعبانک طقوزنجی کونی حضور هایونه مشول ایله وداع
ایدرک مملکتی حابنه عودت ایلمشدر .

و اتنای راهده محافظه ایچون میرمیراندن برینک مهماندار تعیین اولنسی داب دیرین
اولوب خارجدن برینک تعینده ایسه کلفت درکار اولدیغنه مبنی درگاه عالی
قبوچی باشیلرندن محمد اغا اتمام خدمت عقینده رفع اولنلق اوزره موقت رتبه
میرهیرانی ایله بو خدمته تعیین بیورلمشدر .

پترسبورغ فوق العاده بیوک ایلیجیسی راسخ پاشا دخی اول اثناده اکمال مأموریت
ایله عودت ایلمشیدی .

کچن یدی سنه سی ذی القعدة سنک التنجی کونی راسخ پاشا ایله قطوزوفک طورله
نهری وسطنده دولت علیه صالی اوزرنده مبادله لری اجرا اولدیفی کبی بوکره

عودتارنده دخی اوراده مبادلہ لری مصمم اولوب بوکره روسیه صائنده مبادلہ اجرایی روسیه لو طرفندن ایراد اولمش ایسه ده بعض مباحثات جریانندن صکره ینه دولت علیه صائنده اجرای مبادلہ اولمشق اوزره بالاتفاق قرار ویریلوب اشبو سکر سنه سی ذی القعدہ سنک ینه التنجی کونی کافی السابق دولت علیه صالی اوزرنده طوبلر آتیه رق آن واحده سفیرین مشار الیہما مذکور صالحه وارد اولمشلر وبوکره مبادللر برلکده بولنموب یالکز مهماندارلر ایله ایلچیلر ورود وملاقات ووداع ایشلر در .

راسخ پاشا بروجه بالا در سعادتہ عودت ایلد کد نصرکده طریق سابقه رجوع وپاشاق عنوانی ترک ایله دفتر امینی اولمشدر .

* بعض توجیہات و عطیہ والتفات *

یوقاروده بیان ایتدی کمزوجهله مقدمجه شروط وزارتق حاوی تنظیم اولنان نظامنامه ده طشره وزراسی مناصبی یکر می اوچه حصر اولنوب فقط انابه محافظنی مستثنا طو تلمش اولدیغنه وحالا انابه محافظی بولنان مصطفی پاشانک مقدا آق دکزده سبقت ایدن خدمتی انظار عوام و خواصده موجب زاید شهرت وشانی و بودفعه کی مأموریتنده ظهوره کلان سلوک و حرکتی دخی موافق طبع سلیم سلطانی ایدوکنه مبنی اوائل ماه محرم الحرامده عهدہ سنه رتبہ والای وزارت احسان بیورلمشدر .

وقعه نویس واصف افندینک جلوس سلیم خانیند بدأ ایله ایکیوز بش سنه سنه قدر تألیف ایتدیکی برقطعه تاریخی بوخلالده سلطان سلیم خان حضر تلرینه عرض اولندقدہ (واصف افندینک مقدمه تاریخندن غایت حظ ایتدم دخی اشاغیسنی علاوه ایتمک ایچون تاریخی ارسال ایلدم بویله جه اشاغی طوغری یازسون و کندویه شمیدیک بش بیک غروش ضربخانه دن آلوب عطیه ویره سین) دیو صدر اعظمه خطاباً خط هایون صادر اولمشدر اولوقتک بش بیک غروشی عصر مزده کی صاغ آقچه حسابیله تقریباً الی بیک غروش دیمک اولور .

خلال محرمده مخدوم شیخ الاسلامی اولان غلطه قاضیسی عبد الله افندی ایله امام اول شهر یاری به مکہ پایه لری احسان بیورلش ایدی متعاقباً مکہ مکرمه قاضیسی کذبوی زاده امین افندی اتمام مدت ایله مدینه منوره به عودتده (یلان دنیادان ال چکدی کذبوی زاده کر چکدن) خواسنجه تارک منصب فنا اولدیغی خبری در سعادتہ واصل اولمغین سابقاً بروسه قاضیسی عثمان افندی مکہ مکرمه قاضیسی نصب اولمش و اعتبار توجیہی غره محرم اولمش جهتیله مخدوم شیخ الاسلامی ایله امام اول سلطانی به تقدیم قلمشدر .

سنه ماضیه خالانده مدینه منوره قاضی عبد الباقی افندی ایله شیخ الحرم نبوی
اغانک دخی عازم داربقا اولدقلری خبری سنه جدیده اوائلنده درسعاده واصل
اولغله سابقاً دار السعاده اغاسی اولان ادریس اغا شیخ الحرم نصب اولنوب فرمانی
کندویه کوندرلمشدر .

اسماعیل رائف پاشا زاده عصمت بک افندی یدی سنه سی ذی القعده سنک اون بشنده
استانبول قاضی نصب اولمشیدی انجق بوائلنده اسواقده بیع اولنان نان عزیزا کل
اولنیه جق مرتبه به کملکه اکله صالح نان طبخ اولمنسی سلطان سلیم خان حضر تلری
اراده ایدوب حتی برایی دفعه نمونه طایبله تصحیح ماده قصدنده اولدقلرنده قاضی
افندی بعض ملاحظه به منی نمونه عرض ایده میوب بوخلالده شهریار مشار ایله
حضر تلری کاغذخانه به تشر یفلرنده اکمکچیلرک الآن اخذ ایتدکاری حیواناتک
نمونه سی طو تلمسنی فرمان بیوروب بعدالطبخ حاصل اولان نان عزیزده رونما اولان
تفاوتی قاضی افندی تکاسل ورخاوتنه حمل ایله عزل ونقینی اراده بیورملریله
بروسه به نفی اولنهرق یرینه سابقاً استانبول قاضی اسعار خصوصنده اهتمامی موجب
ومسلم اولان عزیزاده محمد عارف افندی صفرک یرکمی بشنچی کونی استانبول
قاضی نصب اولندی دیو واصل افندی تحریر ایتدکن صکره بو وجهله تذیل
مقال ایتشدرکه مجربان احوال روزکار اولنلردن بری دیرکه قاضی ماضی عریق
الطرفین و شریف الاصلین علم وکلدن بهره یاب وبنده زاده شهریار والاجناب اولمقدن
ناشی بوآنه دک حقنده لازمه حرمت اجرا بیوریلوب آزوقت ایچنده رتبه عظیمه به
نائل و بلا معجله تحصیل ایرادایله سر منزل مرامه واصل اولمشیدی بو نعمت جلیله نک
قدرینی بیلوب ناس ایله حسن امتزاج وصفات ذمیه دن اولان انا لاغیر دعواسنی
دروندن اخراج لازم ایکن دولتی هضم ایده میوب کبر ونخوتی رسیده درجه
نهایت و وضع باردی دلشکن اصحاب نجوت و حرفت اولدینی مربی عالم اولان پادشاه
ستوده صفاته منکشف وحقنده جایگیر استقرار اولان حسن توجهلری منصرف
اولوب عزل ونفی ایله تأدیب و بو وسیله ایله ارباب نخوت ورعونت ترهیب اولندی
دیو تحریر ایلمشدر .

انجق اکملرک ایله یمیه جک مرتبه به کلمسی بو یوزدن برطاق متفذانک یا خود اطراف
ومتعلقانک تمتعاتی و بو وسیله ایله اصنافک دخی بالطبع وقوعه کلان فساداتی کبی
اولوقنک احوال واصلنده درکار اولان فناقلردن ناشی اولمسیله قاضی افندیلرک
عزلیله ایش تیمیوب اصلاحات کایه به محتاج ایدی . برمنوال سابق باراده سنیه قاضی
افندی دن نمونه مطلوب اولمش ایکن عرض ایده مامسی دخی بو معنای مفیددر . بناء

على ذلك اوج ماه صكره صدر اعظم ايله شيخ الاسلامك برركاب كوفى شفاها سلطان سلیمان عصمت بكك عفو واطلاقی نیاز ایتمر یله و سلطان سلیم خان حضرت تری دخی پدرینك خواص بندكانی حقنده دائماً لطف و عاطفتلرین مبدول ایدوب رائف اسماعیل پاشا ایسه سلطان مصطفانك پك زیاده توجهنه مظهر اولان ذواتدن بولنمسیله هان عصمت بكك اطلاقه مساعده اولنه رق در سعاده كتورلمشدر .

نوری بك تاریخنده دیركه فی الاصل اطرافدن در سعاده ذخیره جلبی تجاره مخصوص ایکن یوما فیوماً تكثر نفوس حسینله تجارك وقتیه جلب ایلدكری ذخائر هنكام شتا مرورینه قدر وفا یتیموب اكثریا قیش كونلرنده ذخیره ده قلت و اول جهتن عباد اللهده اضطراب و ضجرت دركار اولدیغندن قرق الی سنه مقدم وکلای دولت بو خصوصی بالملاحظه جانب میریدن ترسانه عامره ده متعدد ذخیره انبارلری انشا و بهر سنه سواحل بحر سفیددن سلانیک و غلوس و سائر مناسب اولان محلله و ذخیره جلبی جسابان اولان یرلره بشقه بشقه مبیاعه جیلر تعیین و اسرا و بغدادیاك هر کیلهسی التیشر آچیه و آر په نك کیلهسی اوتوزر آچیه اولمق اوزره میری فیسیله هنكام شتا انقضاسنه قدر آستانه سعاده کفایت ایده جك مقدرای اصحاب حرث و زراعتدن ذخیره اشترای و جملهسی کلوب سالف الذکر انبارلره تشحین و املا و قیش موسملرنده لدی الاقتضا جانب میریدن بهاسیله خبازانه توزیع و اعطا اولمق اوزره تنظیم ایتمشله بو خصوص فی الحقیقه قیش كونلرنده ذخیره دن قلمت چكمامكه اكر چه باعث اولوب انحق بهر سنه بو بهانه ايله طرف طرف مبیاعه جیلرك و اعیان و ضابطانك فقرای رعیته ایتمكری ظلم و تعدیلری دائره تعبیر و تقریر دن خارج بر کفیت اولمغه صبح و مسا آه و این فقرا پیوسته ناطق آسمان و خرمن نظام حال رعایا آتش ظلم بی پایان ايله سوزان و ویران اولمده ایدی .

نوری بكك بیان ایتمدیکی وجهله مبیاعه اصولنك طشره لر حقنده موجب خسار اولدیغی دركار اولوب انحق بونكله بیله استانبولده قیشین بتون بتون ذخیره صقندیسی چكلمز دخی دكل ایدی . هله وکلای دولت استانبوله ذخیره جلبنده پادر كل حیرت و علی الخصوص كتخدای صدر عالی بولسان ذاتلر و اصف افدینك تحریر ایتمدیکی وجهله بو خصوصه حصر وقت ایدرك مبتلای تعب و ضجرت اولملریله سائر امور دولته نظارت ایتمكه وقت فراغت بوله مازلردی تاتار جق عبدالله افدینك نظام دولته دائر اولان لایحه سنده بیان ایلدیکی اوزره استانبولده نفوس كثیره مجتمع اولمغه بو قدر خاتمه حوم و شجوم و لوازمات سائره یتشدرمك متمسر اولدیغندن وكلا و امنای دولت نظام ملك و ساطنته دائر دقایقی دوشونمكه وقت فراغت

بوله میوب احتساب اغامی کبی استانبول اهلینک حواج ضروریلرینی دوشونمکه مجبور و قلملرده یازیلان اوامرک اکثری بومادهیه محصور اولدی و کافه ناسه کافی نان عزیز تدارکی ضمنده میری انبارلری یاسیله رق جانب میریدن ذخیره مبیاعه سنه مجبورت کلدی .

حالبوکه جانب میریدن مبیاعه جیلره هرکیل خنطه ایچون یکر میشر پاره ویریلوب رعایا فقراسی ایسه هرکیله سنی اوچ درت قات بهاسیله اشترایه مجبور اولدقلرندن بشقه نیچلری مسافه بعیده دن نقل ایتملریله یالکیز اجرت نقلیه سی جانب میریدن ویریلان بهانک اضعاغ مضاعفه رسیده اولور و مبیاعه جیلر دخی طمع و خیانتلری تقریبیله جانب میریدن بر معتاد کندولرینه ویریلان اون کیلده برکیله یه قناعت ایتمیوب کندو مصنوعلری اولان باشلو کیلر ایله اولچهرک و اون کیله یی آلتی یدی کیله کتوره رک زیاده سنک آچقه سنی رعایادن اخذ ایله ظلم و اذیت ایلدکارندن بشقه رعایادن آلدقلری صاف و جید خنطیه صمان و آریه و قرمق قارشیدیرمق کبی کونا کون حیللردن صکره سفائنه تحمیل ایله آستانه یه کوندرلر و رؤسای سفان خونیه سی دخی انشای راهده حموله لرینک بر مقدارینی بیع و بر مقدار صمان دخی آنلر خلط ایلدکلرندن ماعدا انتفاخ ایله زیاده کلک ایچون اوزرینه صو دوکوب کرکی کبی افساد ایتملریله و بومقوله مخلوط و رطوبتلو ذخائر میری انبارلرینه وضع اولنوب مدت قلیله ظرفنده سمیت مرتبه لری تعفن ایتمدیکی حالده خبازلره تقسیم اولنه کیمکله طبخ اولندقده اکل ایدن بیچاره لرده نیجه امراضک حدوتی موجب و حیوان بیله ییه میه جک درجه لرده تعفن ایتمش اولنلری بحره القا اولنوب تلف و خسار میری بی مستوجب اولور ایدی . و چونکه اتمکچی ارناودلر ذخائر آچقه سندن جمع ایلدکلری اموالی مملکتلرینه ارسال ایله اظهار افلاس ایلدکلرندن برمنوال مشروح مبیاعه جیلرک بیك بلا ایله استانبوله کتوردکلری ذخائر دن اتمکچیلره ویریلانلرک آچقه لری دخی اکثریا چوریوب تحصیل اولنه مازدی و یکدیگره کفیل اولمق اوزره کفالت متسلسله یه ربط ایتمدیلمک کبی صورتلره چاره سنه باقیلور ایدیسده آنلر دخی ینه برر صورتله اجرای فساد و ماعتدن کیرو طور مازلردی ذخیره تجاری دخی کثیرا ما بوبلیه یه گرفتار اوله رق زوال سرمایه ایله متضرر و بوجه تله جلب ذخائر متعسر و بلا موجب آستانه ده ظهور قحط و غلا ایله عبادالله متحیر اوله کلدیکی دخی و اصف تاریخنده مندر جدر .

بناء علی ذلک کتخدای صدر عالی الحاج محمد حق بک التی آیدنبرو جلب ارزاق ضمنده اطراف ایله مناقشه ایلدیکنه بناء امتراجسزاق ایله لسانه کلش اولدیغندن بشقه

خلاف رضای عالی بعض حرکاتی خارجدن سمع هایونه القا اولمغین ربیع الاولک
 سکنزنجی کونی انفصال ایله یرینه درگاه عالی قوجی باشیلرندن الحاج ابو بکر اغا
 کتخدای صدر عالی نصب اولنهرق مقام تجربه واختباره نقل وایصال اولنمشدر .
 غرابدندرکه حتی بك بر ایکی آی مقدم بکر اغایی بقایای مجهوله ضمننده رقهیه
 مأمور ایدوب اودخی سفر تقریبیه دوچار ضرر وخسار اولمش اولمسيله حرکتیه
 مجالی اولدیغنی مقام اعتذارده ایراد ایلدکده حتی بك غضبه کلهرك البته کیدرسک
 کتمدیکک حالده قضیه معلومدر دیو اخافه وانذار وبکر اغانک بعض طرفلره
 دوشوب طلبکار شفاعت اولدیغنی لدی الاستخبار خربه جیلر ایله اسکداره امرارنده
 اصرار وبوندن صکره دخی مخالفت ایدرایسه نفی اولنهجغنی اشعار ایتمش ایدی
 نه حال ایسه حاله واقف اولان بعض مروتمندان زمانه مومی الیهی تخلیص وخدمت
 مرقومیهی آخره تخصیص ایدوب کمسنهک خاطرینه کلز ایکن .

* یت *
 * یت *

﴿ مراد ایدنجه مسبب بر آدمک کارین * ید تشبثی جستجو ایدر اسباب ﴾
 مؤداسنجه کندوسنی مظهر اشد عتاب ایدن ذاته خلف اولدی دیو واصف
 تارینخنده محرردر .
 انحق کتخدالقی تبدیلیه ذخیره مصاحتی یولنه کیرمک لازم کلیوب بوایسه عامهک
 حوایج ضروریه سندن اولدیغنه منی مستقلاً بوایسه باقمق اوزره درسعادته مجدداً
 بر نظارت احداثه قرار ویرلمشدر .

شویله که : مبیاعه ماده سندن طولایی طشره اهالیسنک حالی خراب وعلی الخصوص
 ایام حربده اولان اردولر ترتیباً تندنشائی ممالک محروسه آشیانه بوم وغراب
 اوله کلدیکندن هر نصل اولورایسه اولسون بونک دفعی فرض مثابه سنده اولمش ایدی .
 شریف افندی دخی سالف الذکر لایحه سنده اشبو مبیاعه ماده سنک الغاسی درجه
 وجوبده اولدیغنی تصریح ایدوب شویله که : سفرو حضرده مبیاعات ومرتبات کلیاً
 فقرا اوزرندن قالدیریلوب جمله سنی دولت علیه کندو آچه سیله تدارک ایله
 بر سنده سفرک رایحیه ذخیره سی بشبیک کیسه یه وعربه ودوه وبارکیر شویله
 صاتون آماج کذلک بش بیک کیسه یه دوزیلوب اون بیک کیسه ایله مطلوب
 حاصل اولورایکن بونلر ایچون رعایادن قرق الی بیک کیسه چقایور رعایانک مالی
 خزینه ده موجود ومدخر اولان آچه دن اعلا درکه خزینه ده طوران آچه نک نما
 وتجارتی اولماز رعایانک آچه سی بوش طور میوب دائماً نما و ترایدده در آنک ایچون

رعایانك مانى خزائن سلطانيه مانندن زياده محافظه ايتمك لازمدر فرضا سفر
 ايجون يكرمى بيك كيسه تدارك اولنه جق ايسه اوتوز بيك اولنسون اون بيك كيسه
 ايله الى بيك كيسه قزانلمش اولوب ممالك خراب اولماز و قرق سنه سفر اولسه
 رعایانك بر يمورطه سنه وضعيد اولنماق قابلدن رعایا سفر وار ايمش ديو بر بردن
 ايشيدوب مال وعيال وجانلرينه ذره قدر ضرر ايريشمديكي صورتده حسب الاقتضا
 نه يوزدن معاونت ايدو جكاريني بيلمزلر قالدিকে ايام حضرده استانبول ايجون اولان
 مبايعات جزئيات مقولهسى اولمغه ترسانه عامره انبارلرنده التي آيلق ذخيره جمع
 اولندقدن صكره كلياً رفع وعفو اولنهرق بعض سواحل بحر سفيد وسياهدن تجار
 طائفهسى رايحيه كندولرى كتوروب ترسانه انبارلرينه وضع ايتمك اوزره سنه ده
 اوچر آيلق ذخيره ترتيب اولنوب هر سنه اولمقدار ذخيره انبارلره وضع اولندجه
 اسكيسندن اولقدر ذخيره خبازلره توزيع ايله سنه ده بر كره دور اولنمش و على الدوام
 استانبولده التي آيلق ذخيره بولنمش اولور و طونه سواحلنده متعدد انبارلر انشا
 و ذخيره نك بهاسى رخيص اولدجه مبايعه و وضع ايله بر سفرلك ذخيره جمع و موسم
 صيفده ثلثي مقدارى استانبوله جلب اولندجه رينه تدارك و وضع اولنمق طريقه
 اوچ سنه ده بر دور اولوب هم سفر ذخيرهسى يرنده طورر و همده استانبولك
 كيلارى كبي اولور ديو تحرير ايتمشدر .

سلطان سليم خان حضر تلى مبايعه اصولنك درجه مضرتى كركى كبي اذعان ايدرك
 جلوسندن صكره كلياً الغاسنى فرمان بيورمش و در سعادتده ذخيره و اشياى سائره نك
 بولنمى مقصدينه سربستى تجارتدن اسلم بر شاهراه عدالت اولميه جنى مسلماتدن
 بولنمش ايسه ده قرق الى سنه دنبرو مبايعه طريقه استانبوله ذخيره جلبنه آلمش
 اولديغدن استانبولك ادارهسى بتون بتون تجارك كتوره جكي ذخيره يه براغلمش
 اولسه ايام شتاده ذخيره جزئى ندرت كديكي تقديرده مبايعه اصولنك رفع
 اولنديغنه عزو و اسناد و وكلاى دولتك تكاسلنه حمل ايله عظيم كفتكولر پيدا
 اوله جنى ملاحظه سنه مبنى ينه طرف دولتدن استانبول ايجون لزومى قدر ذخيره
 جلب و ادخارينه لزوم كورنديكندن ذخيره ايجون بش بيك غروش تخصيص
 اولنوب بونكله بهر سنه در سعادت ايجون و قتيله فقرادن رايحي اوزره لزومى
 مقدارى ذخيره جلب و ادخار اولنمق و بوآقچه يه مصارف سائره ايجون وضع يد
 اولنوب سنه بسنه نشو و نما بولمق و استانبوله مقتضى اولان اوتوز آلى يوك قدر
 ذخيره نك كافهسى جانب ميريدن بلبايعه خبازانه توزيع اولنسه تجار مأبوس
 اوله جغدن تجارك قدر تلى يتديكي مرتبهسى ينه آنلره كتورديلوب معاداسنك

جانب میریدن مباحه سی تنسب اولمغین فرضا اوتوز التي يوك ذخيره نك يكرمی يوك مقصداری طرف دولت علیه دن جلب وتدارك اوله رق ماعداسی تجار معرفتیه كتوردلك و چونكه بوترتیب استابولك اداره سنه مخصوص اوله رق سفر ذخیره سی ینه میری فیئایه ایجاب ایدن محللردن جمع اولنه جغندن ایام سفرده دخی اشبو ذخیره سرمایه سنه نقص و خلل كتورلماك اوزره متحیزان رجال دولت علیه دن برینك نظارتی و ناظر اوله جق ذاتلك موجب نفوذ و حیثیتی اولمق اوزره رتبه و اعتباری جهتیله نشانجیلقدن برتر ایکن اقتضای وقت و حال ایله اعتباردن ساقط اوله رق برمدتدنبرو عمل مانده رجال دولتدن برینه قید حیات ایله توجیه اولنه كلان شق ثالثك منصبك دخی ذخیره نظارتنه الحاقی خصوصاً برینه قرار و یریله رك ربیع الاول غایتنه باش محاسبه جی راتب ابوبكر افندی ذخیره ناظری نصب اولنوب شق ثالث دفتردارلنی دخی الحاقاً عهده سنه توجیه و كندوسنه شهریه بیك بشیوز غروش معاش تخصیص و معیتنه مأمورلر و كاتبلر تعیین و ذخائر ك طشره لردن جلب و ادخاریله اتمكجیلره توزیعی و ذماتنك تحصیلی و سرمایه نك نقص و تدنیدن محافظه سی و تجارك حمایه و صیاتی خصوصاً تنه دائریدینه مفصل تعلیمنامه اعطایو رلمشدره .

* وقایع متنوعه *

خلال ربیع الاولده قپودان پاشا آقدكزدن عودت ایسدیكی كبی طرفه و یرلمش اولان استقلال تام حسیله لیان رئیس محمد قپودانی و دیركجی برنفر ذمی نی قتل ایسدكدنصكره و وقوع حالی باب عالییه تحریر ایدوب مقام صدارتدن دخی حضور هایونه عرض کیفیت اولمشدر . بونك سببی و اصف تاریخنده بووجهله محرردر كه : ترسانه عامره یه و یریلان نظام جدید موجبنه محمد قپودانك دائره معیشتی توسیع و بین الاقران رتبه سی ترفیع اولمشیكن طریق ارتكابه صاپوب خیانته جسارت ایتمكله لیان رئیسلی معرفتیه ترتیب اولنان ادوات سفاننده قصور كوریلوب شویله كه : دنوئای هایون بوسنه آقدكزه حر كتنده و یردیكی آلات تلاطم دریانك ادناسنه تحمل ایده میه رك سفینه لردن برایكسی قضا زده اوله جق مرتبه یه كلكدن بشقه ایكی سنه دنبرو بودرمدنه انشا اولتمقده اولان سفینه ختام بولمغه دریایه تنزیل ضمننده قپودان پاشا بالنفس بودرمدنه واروب محمد قپودانك و یرمش اولدینی آلات ایله كینك ایندیرلمسنده خیلی عسرت چكلكدیكنی بالمشاهده غضبناك اوله رق هان آستانه یه كلكدیكنده بر منوال سابق ابتدا محمد قپودانك جزاسنی ترتیب ایدوب بعده باب عالییه بیان حال ایلمشدر .

شیخ الاسلام اسبق حمیدی زاده افندیك حج شریفدن منقاسی اولان مغنیسیایه

عودتند ربيع الآخر يكرمی برنجی كونی وفات ایلمش اولدیغی خبر آنهرق
اعداسی مستریج البال اولمشدر .

متوفای مشار الیه فحول علمادن مصرده وفات ایدن حمیدی محمد افندیك صابندن
بیك یوز قرق درت تاریخنده تولد وسن تمیزه وصولنده رشد وزكاوتی حسبله
زمان قلیلده علوم عالییه بی تکمیل ایله نه صورتده قطع مراتب ایلبدیکی وطریق
علمیه نك اصلاحنه نصل مسارعت ایتمدیکی و صکره نوجهله اقبالندن دوشدیکی
جلد رابعده مفصلاً مسطور اولغله تکراره حاجت کورلمز .

بروسهده منفی بولنان کیچهجی زاده صالح افندی اقدیجی عفو واطلاق ایله درسعاده
کتورلمشیدی . (من صمت نجا) قاعده سنه رعایت کندوسنجه موجب سلامت ایکن
عادت مألوفه سی اوزرینه هر برده اطلاق لسان ایله ایادی اعداسنه سر رشته اجرای
عداوت ویرمش اولدیغندن طرز آخر ایله تأدیب ضمننده طغرات سابقه سی الفا
و پاداشی اولنلر ایله رسوم عادیه اجرا ایتمک اراده لری سمعنه القا اولنمغن بالضروره
بواننده تمارض صورتی اختیار و خانه سنده استقرار ایله تجرع کؤس اقدار ایتمکده
اولوب انجق بررکاب کونی صدر اعظم ایله شیخ الاسلام افندی مومی الیهک حقنده
شفقتی مستلزم بعض مقاله لر سرد و تحقیق رتبه تمیناتیه شفاعت ایلبکرانده
رجالی مقرون مساعد سنیه اولهرق ذلت انحطاطدن تخلیص اولندی دیو
واصف تاریخنده مسطوردر .

سفائنه الویرن اشجارک مکلیک خلیجنه قریبتی اولمق حسبله بعضاً محل مذکورده
سفینه انشا اولنه کلدیکندن ترسانه ده کی کوزلرکی برقاچ کوز انشا و مأمورین ایچون
داخلیه لی و خارجه لی قوناق بنا اولنمق اوزره اراده سنیه صادر اولدیغندن جمادی الآخره
غایتدن جانیک محصلی عثمان اغا بنا امینی نصب اولنمشدر .

خلال رجب شریفده دخی ترسانه ده در دست انشا اولان ظفر هایون نام قالیون
دریایه ایندرلمشدر . روضه مطهره نك کسوه شریفه سی مجدداً اعمال اولنهرق
بوواننده مدینه منوره یه ارسال اولندیغندن بشقه مقدا الشمس التی ذراع دوز کوز
اطلس اوزرینه سورّه فتح و طغرای هایون نسجیله برقطعه میان بند و سیاه اطلس
اوزرینه (هذا قبر نینا رسول الله صلی الله علیه وسلم) نسج اولنمش برلوحه شریفه ایله
دیگر اوج لوحه شریفه که بریسنک اوزرینه (هذا قبر سیدنا ابو بکر الصدیق
رضی الله عنه) و ایکنجیسنک اوزرینه (هذا قبر سیدنا عمر الفاروق رضی الله عنه)
واوچنجیسنک اوزرینه (هذا قبر سیدتنا فاطمة الزهرا رضی الله عنها) عبارده لری
زرین تار ایله سیاه اطلس اوزرینه نسج اولنوب مرقد شریفه لینه تعلیق اولنمق

ایچون کوندرلمشیدی و بونلردن بشقه حضرت عثمان رضی الله عنہم خطیله اولان مصحف شریفک محفوظ اولدینی محله اویزه اولنق اوزره بر عدد قپو پرده سی وبقیعه مدفون اولان احساب کزینک مراقده منوره لرینه پوشیده قلنق ایچون درتیور الی ذراع چوقه و فراشان روضه مطهره یه الباس اولنق اوزره سکسان قدر اطلسلی چوقه فراجہ ارسال اولنهرق بوآئنده جمله سی محله بالوصول یلرینه وضع اولنمشدر و روضه مطهره داخنده بعض محللرک تعمیر لازم کلش و مواجهه شریفده منصوب اعمده دن الی ایکی قطعه سنک مرور زمان ایله کاشیلری فرسوده و بعض محللری برکنده اولمش ایدوکی خاقان مرحومه عرض و افاده اولنغله ترصین و تعمیرلری اراده خالانده وفات ایتمکین سلطان سلیم خان جلوسنده نیت مذکورده نی تأکید برله اول بقعه مبارکه تک تعمیرینی اراده بیوروب بر ایکی سنه ظرفنده مذکور اعمده مقداری مرمر دیرکلر اعمال و مجراً ارسال اولنمش اولمسلیله بوآئنده ینبوعه و آندن مدینه منوره یه وصول بولهرق یرلو یرینه وضع اولندقلرندن بشقه روضه مطهره داخنده و قبر شریف حوالیسندہ محتاج تعمیر اولان مواضعک تعمیر و ترمیمه دخی مبادرت اولنمش و باب السلامدن مواجهه شریفه یه وارنجه طرفینده واقع اعمده دن اون یدی قطعسنک کاشیلری فرسوده اولغله آنلرک دخی زرحل و صیغ ایله تعمیرلری اراده سنیه اقتضاسندن بولنمشدر .

بووانده ذات شاهانه ایچون ایکی قطعه الماس آنمش اولدیغندن تفصیل حاله مبادرت اولنور شویله که : نادر شاه هندی استیلا ایلد کده پک چوق ذی قیمت اشیا به دسترس اولوب بونلرک اک مشهورلری کوه نور و دریای نور نامده ایکی قطعه الماسدرکه نادر بونلری باز و بند ایشیدی اشته جهانک اک مشهور الماسلری بونلردر دریای نور حالا ایران خزینه سنده در اما کوه نور نادرک قتلی وقعه سنده احمد خان افغانک الله کچوب و خان مرقوم کابل حکومته نائل اولغله تا بزم زمانمزه قدر آنک اخلافی یدنده بولنوب نهایت بوالماسک شهرتی قویب العهده شاه زمانک قضازده اولسنه بادی اولهرق سیخلرک الله کچمشیدی مؤخرأ انکلزین اردوسی سیخلرک حکومتی زیر وزیر ایدرک لاجوری تسخیر ایندکده مذکور الماس انکلتره یه کوندریلهرک کمال اهتمام ایله ایشلدیلوب حتی بوندن چند سنه مقدم لوندره ده کشاد اولنان اکسپوزسیونه دخی قولمشیدی و اصفک روایتته کوره نادر شاهک هنددن کتورمش اولدیقی الماسلردن بری دخی التمش قیراطه قریب و نورالین اسمیله مسمی مخروطی الشكل برقطعه الماس اولوب آنیدخی خنجرینک اوچنه تعیبه ایشیدی . وفاتنده خزینه دار بولنان جوهر اغانک الله قالوب و بعد الوفات ایادی متفذان ایرانده توارث و تداول ایدرک ایرانه

تابع اکراد ولایتده قوجان نام محله متمکن امام و یردی خان یدنده قرار قیلوب
 اودخی متغلبه دن بری جبراً آلور اندیشه سیله فروخته نیت ایلدیکی در سعادته
 متمکن تجار دن بری استخبار ووالده کتخداسی و ضربخانه امینی یوسف اغایه اخبار
 و بویله بر نادره نادر یه نک ایران الکاسندن چیقارلمسنه خانان ایرانک ثمانعت قیدنده
 اوله جقلمری درکار اولدیغندن اشتراسنه رغبت اولندیغنی حالده مصاحبتک کیزلو
 طوتمسنی افاده و اشعار ایلمش و سلطان سلیم طرفندن دخی اشترایه رغبت بیورلمش
 اولمسلیله سرأ جلب و اشتراسنه تشبث اولنهرق تاجر مرقوم واسطه سیله جوهر
 مذکور در سعادته جلب و اونوب کورلدکده پسندیده طبع سلیم پادشاهی اولمش
 و یوسف اغا واسطه سیله اهل خبره یه لدی الارائه بیک بشیوز کیسه آچه بها تقدیر
 اولمش ایکن بازارغه طویشیلوب بش آی قدر میانه ده و قوعبولان مجادله نک نتیجه سنده
 ثمنی التیوز کیسه آچه یه قطع و صاحبنه دفع اولمش اولوب جوهر مذکور اکر چه
 حد ذاتنده صاف و شفاف ایسه ده وقت وزمانه نظرأ ارباب دولت و احباب طبیعتک
 استعمال ایلدکمری جواهره قیاساً طرز جدید اوزره ایشلدلدیکی صورته قدری
 دها عالی و قیمتی زیاده اوله جغندن ناشی بو صنعتده ماهر برقاچ استادک اوروبادن
 جلبی خصوصده اراده سنیه صادر اولدیغنه مبنی رئیس افندی صنایع جوهر یه ایله
 مشهور اولان فلمنک و سائر دول ایچیلریله بالمخبره دولتلیرینه تحریر ایتمیش
 ایسه ده هر برر صورته عذر و بهانه ایدرک جلبک طریقتی سد ایتمیش ایدی
 فرانسه نک اختلالی حسیلله دول اوروپانک فرانسه اوزرینه هجوم ایتمکمری ائنده
 فرانسه لودن ایکی نفر استاد استبدکده بلاتردد ارسال ایتمریله در سعادته ورودلرنده
 ضربخانه ده کندولرینه تعیین مقام اولنهرق ایشه قیام و حجر مرقوم پرلانتیه اولهرق
 ایشیلوب اتمام ایتمیش حین اعمالنده اکر چه یکر می قیراط قدر نقصان بولمش ایسه ده
 حسن اندام و صفوت و انجلای تام کسبیلله بهاسی سابقدن بالاتر اولمشدر اشتراسنه
 توسط ایدن تجاره اون بش بیک غروش ویرلمش اوادینی مثللو ایشلیان فرانسرله
 دخی اون بش بیک غروش اعطا اولتوب ایکی بیک غروش دخی بعض لوازماتلرینه
 صرف اولمشدر بوندن بشقه بوالمسک جلبنه واسطه اولان تاجر مرقوم دیار ایراندن
 برخام المساس اشترا و فلمنکه ارسال ایله اعمال ایتمیروب بودخی یکر می قیراط اولهرق
 صفوت و جلاده سالف الذکر الماسه مشاکل بر جوهر اولدیغندن یه یوسف اغا
 معرفتیه ذات شاهانه ایچون ایکیوز الی کیسه یه قریب آچه یه آلمشدر .
 برمدت نبر و کرک روم ایلیده و کرک اناتولی و عربستان طرفلرنده محاربات داخلیه
 اسکک اولدیغندن بروجه آتی تفصیلاتنه ابته دار اولنور .

* اشقودره وقوعاتی واناطولینک بعض وقایعی وطاقلی *

* اشقیاسنک احوالی *

بو اوانده دولت علیه اشقودره بی حصر و تضییق ایله مقید اولدینی حالدہ برطر فدن
دخی روم ایلینک نیجه قری وقصباتی یغما و تخریب ایتمکده اولان طاغلی اشقیاسنک
دفع مضر تلیله مشغول ایدی شویله که : فی الاصل ترسانه رجالتدن ایکن ایام سفرده
طونه باشبوغنی اولمق تقریبیله شمنی به عودتنده نائل رتبه و زرات اولان حاجی
زاده احمد پاشا مقدما چرمن سنجانجی متصرفی نصب و تعیین اولنه رق اشقیای مرقومه
اوزرینه مأمور قلمش ایکن اول اوانده بلغراد مطردلرینک قلعه به دخول ایتمک
صدندده اولدقاری استخبار اولندقدده بلغرادک محافظه نظام و آسایشی ضمننده احمد
پاشانک مأموریتی بلغراد محافظه سنه نقل اولندقدده بلغراد مفسدلرینی تأدیب ایدرک
دفع شورش مملکت ایله احمد پاشا منظور دولت اولمش ایسه ده ظلم و تعدی به میال
برذات اولدیغندن حرص وطمعی بلاسیله یدی سنه سی او اخرنده بلغراددن عزل
اولنه رق متصرفلق وجهله الحاقاً منصبی اولان ترحاله جانبه کوندر یلوب بلغراد
محافظانی دخی مقدما بلغرادک تفراتی مجرداً ترتیب و مملکت مصارفه نظارت و فقرا
حمایت عنوانیله اول طرفه مأمور اولان فله اعیانی مصطفی اغایه بارتبه میر میرانی توجیه
و چند روز صکره رتبه و زراتله قدری ترفیع و تنویه اولمش و قریباً حامی زادنه ک
وفاتی خبری اشبو ایکی یوز سکن سنه سی جمادی الاولاسی اوائلنده در سعاده واصل
اولغین ترحاله سنجانجی مشار الیه مصطفی پاشا عهده سنه الحاقاً احاله بیورلمشدر
حامی زاده دن صکره اشقیای مرقومه اوزرینه زینحنلی حسن پاشا مأمور اولمش
ایسه ده موفق اوله مدیغندن منصبی اولان سلستره به اعزازی تنسیب اولوب انجق
ادرنه حوالیسنده دخی اینر بنر روزیرک وجودی لازمه دن بولندینی حالدہ ودین
محافظلی وزیر علی پاشا ایله سرحدلو بینلرنده مابینت وقوعولمش و سرحدلو کندوسنه
غالب اولمش ایدوکنه مبنی فیما بعد و دینده ابقاسی بر فائده بی مفید اولیه جغندن
بوخلالده و دیندن عزل ایله عهده سنه چرمن سنجانجی توجیه و طاغلی اشقیاسنک
قهر و تدمیری طرفه اشعار و تنبیه اولمشدر . انجق بو عصرده کی وزرانک اسلاف
وزرا کی قپولری منتظم و مکمل اولدیغندن و اشقیای کروهی هر نه طرفه متوجه
اولسهر علاقه و املاک اصحابی اولان اهل عرض طاقی مال و منال لرینک اتلافی
خوفیله مدارابه مجبور اولوب ارباب هوا ایسه بالطبع اشقیای طرفه مائل اولدیغندن
جمعیتلری کیتدکجه متکثر و مدافع لری متعسر اولندده بولمش اولسیله بعض لطائف

الحیل حکیمانه ایله تفریق جمعیتلری تصور اولنه رق طرف دولتدن کوندریلان تعلیمات خفیه موجبنجه ادرنه بوستانجی باشیسی رؤسای اشقیا ایله برقاچ دفعه مخبره و سیئات سابقه لرندن استعفا و خانه لرنده اقامت ایتمک اوزره استدعا ایدرلر ایسه عفو اولنه جقارینی طرفلرینه افاده ایلدکده آنارک دخی هربری یغما کر لکله صاحب سرمایه اولدقلرندن برر طرفه چکیلوبوده استراحت ایتمک هوالرینه موافق دوشمکله اظهار ممنونیت ایدرک محضر کونه تقدیم ایتدکبری نیاز نامه لری عفو و صفح شهنشاهی به مقرون و بوسبیله فقرا و ضعفا فرصتیاب راحت و سکون اولدی دینلورکن باشلرنده کی جمعیت حشرات متفرق اولیوب خاصکوی و فلبه طرفلرنده استقرار وینه قری و قصبائی یغما به ابتدار ایتدکبری اخباری توارد و تعاقب ایتمکله بووضع غریبدن غیرتکشان دولت دمبسته حیرت اولمغله چرمن متصرفی سالف الذکر علی پاشانک عسا کر اطراف ایله سواد جمعیتی تکثیر و مال و مهمات ایله ساق غیرتی تشمیر اولنه رق قوه کافیه ایله اشقیای مرقومه نک تادیلری خصوصه قرار ویرلمشدر . بزکله لم اوشقودره و قوعاته .

اوشقودره متصرفی قره محمود پاشانک برقاچ دفعه از الهسی اراده اولنش ایکن اله کیرمیوب جلوس سلیم خانیده (داروا سفهانکم) مدلولنجه شایدکه لطف و مدارا ایله اصلاح و استخدامی قابل اولور دیو جرایم سابقه سندن انعام و مجازات مرتبه سندن اعراض اولندیغندن غیرتی وزارت توجیهله قدری ترفیع و تعهدی اوزره سفره تعیین ایله اناطولی ایالتی متصرفی اولدینی اشفقودره سنجاغنه الحاقاً بالتوجیه ایالت مرقومه دن برسنده حاصل اوله جق التی یوز کیسه آنچه بوجه پیشین طرفه ارسال اولنش و عسا کر کلیه ایله محلدن حرکت وودین سحر اسنه نصب خیام اقامت ایلدکده اگر چه نمجه لویه برکوز داغی اولدیسده قریباً مصالحه و قوعیله حرباً برایشه یارامسی مقدر اولماش و بعدالمصالحه اردوسنه مرتب اولان لوازماتک طاشی به بیلدیکی مقدارینی استصحاب ایله اشفقودره به شتاب ایتمش ایدی . انجق بوسفرده برخیلی اموال وادواته مالک و بوجهته اولکیدن زیاده طریق سرکشی به سالک اولمسیله مؤخر آکندو هواسنه مخالف اولان بک و پاشالری امرینه رام ایتمک سوداسیله اوشقودره دن ایلبصانه قدر سوق سمند اقتحام و اول حوالیده کندوسنه بدخواه ظن ایلدیکی کمنسه لرك کیمسنی اعدام و کیمسنی دوچار انهمزام ایتدکده طرف دولتدن نصیحت آمیز تحریرات کوندرلمکله اگر چه اصغای پند و نصیحت ایله عودت ایلمش ایسه ده دعوا سنده مصر و ضبط ممالک داعیه سی دماغنده مستقر اوله رق دائماً فرصت کوزدر و امورنده متبصر کینور بر شخص اولدیغندن

کندوسنه طرف دولت علیه دن امنیت اولنه مدیغی و (اصطیاد قلوب الاشرار لایمکن
 الایمساعده الاوزار) مفهومیجه یاننده کی ارادل اشخاصی جاب ایچون ملاهی
 و مناهی به بالمساعده هتک ناموس شریعت و تخفیف شان دولت ایدرک خیلی و قدنبرو
 مقاطعات و سائر ایرادات دولته مستولی وزیر حکمنده اولان مملکتده اجرایی
 حکومت قابل اولدیغندن اول حوالی حکام شرعشرفدن خالی اولوب آنک
 بومقوله اطوار استقلال کارینه ایسه غیرت ملوکانه متحمل اوله مدیغی حالده برادری
 اولان ابراهیم پاشا دخی کندوسندن روگردان اوله رق اوشقودرده دن فرار و برادر
 زاده سی اولان محمد پاشایی در سعادت تسیار ایدرک محمود پاشانک سوء نیت و مفسدتی
 تبیین ایله ظن اولیای اموری واصل مرتبه یقین ایتمکین محمود پاشانک وزارت
 رفع ایله اوشقودره سنجانجی برادری سالف الذکر ابراهیم پاشایه توجیه و اوزرینه
 روم ایلی و الیسی ابوبکر پاشا مامور و تعیین قلمغله ابوبکر پاشا ایالتی و عسکری و محمود پاشا
 خلافتده بولنان اول حوالی پاشانری و بکری ایله اوشقودره اوزرینه حرکت و اوخری
 طرفلرینه القای هیئت ایلدکده محمود پاشا دخی لش قلعه سی محاذاتنه کلش ایدی. آنجق ابوبکر
 پاشانک لش قلعه سی طرفنه حرکت کتندنه ثبات ایده میهرک اوشقودره قلعه سنه تحصن
 ایتمکین ابوبکر پاشا قلعه سی حصر و احاطه ایلدکده اوشقودره خاقی عسکرک
 و ادواتک و فرته باقهرق اطاعت و انقیاد صورتن اظهار و ابراهیم پاشایی متصرفله
 قبول و محاصره و مشاجره دده یکجهت اولمق اوزره تعهد ایتمش ایسه ده کندولرینه
 بروجهله امنیت جائز اولدیغندن جمله سی تحلیف و مردم زاده لرندن یکرمی نفری
 رهن اوله رق آتوب اولونیده توقیف اولدقدن صکره طوب و خبره ایله قلعه نک
 تصدیقنه مبادرت اوله رق و محمود پاشا دخی دامن قلعیه قریب اولان متریسره
 قورشون دانه لرینی یاغدر مقدمه و اراتق اراتق قلعه دن اطلاق عسکر ایله هجوم ایتمکده
 بولنه رق بو حال اوزره کونلر مرور ایله موسم شتا حلولنده دخی محاصره یه دوام
 اولمق اوزره قرار ویریلوب حتی اوشقودره ایچنده مشتاتخاذ اولمق اوزره یدی
 یوز قدر خانه دخی تحلیف اولمش ایدی. آنجق اوشقودره قریبنده واردونک خط رجعی
 اوزرنده واقع اولان لش قلعه سنک حسن محافظه سی لازمه دن بولمش و اول حوالی
 متحیرانندن اولوب محمود پاشانک خصم جانی اولان طوبدان اوغلی طرفندن قلعه
 مذکورده نک محافظه سی تعهد اولمش ایکن اوشقودره اهالیسی طوبدان اوغلی ایله
 محتاحمه اوزره اولدقلرندن کلید مملکتلری مشابه سنده اولان لش قلعه سنک دشمنلرینه
 تسلیمی کندولرینه کران کله جکنه و اهالی مرقومه نک تالیقلری التزام اولدیغنه
 مبنی آنلرک معرض شتاق و نفاقده عرض ایلدکلری مغلطلرینه الدانیله رق قلعه

مرقومه نك محافظه سی مؤلفه القلوبدن اولان برطاق اراذل واوغاده سپارش اولمغه
 بو خصوصه قاعده حزم واحتياطه رعایت اولمديغندن بشقه اشقودره اهاليس نك
 قلعه خلیقه اختلاطی منع اولتمق لازمه دن ایکن چونکه اشقودره قلعه سنك مناعت
 موقعه سنه و دروننده مدت مدیده محصورینی اداره یه کافی ما کولات ومشروباتی
 موجود اولسنه نظراً تسخیری برامر مشکل اولدینی حالد محاصره یه مباشرت
 اولنش اولسیله بو حال اوزره ترك و فراغت اولنسه ابوبکر پاشا حقه انه انواع قیل
 وقال تکونی درکار اولدیندن شایدکه حصر وتضیق ایله برایش کور یلور دیو
 ابوبکر پاشا محاصره یه مداومت واشقودره اهاليس نك تمامیه امنیت ایدرک قشلاغه
 کیرلده فواصل بعد ایله تعیین ایلدکری قوناقلره عساکری تقسیم ایله انجام حال
 مطالعه اولنماش و اهالی مرقومه واسطه سیله درون قلعه ده بولنانلرک جلب واستمالی
 امیدینه دوشیله رک قلعه نك کوچک قیوسندن اهالی مرقومه نك دخول و خروجلرینه
 مناعت قلناهش ایدی حلبوکه برآی قدر جنک اولدینی ائنده محمود پاشا اشقودره
 اهاليس نك مقاوله و اتفاق و ایلو کلنلرینی اطماع ایله عهد وميثاق ایتدکن صکره
 برکیجه صباحه قریب قلعه دن خروج ایله طویلرک وضع اولدینی محله هجوم و اقتحام
 و برطرفدن دخی مقابله و مقاتله یه آغاز اولدینی حینده اشقودره اهاليس نك
 قالقوب دولت عسکرینک یکدیگره معاونت ایده مامسی ایچون طرق وشواری
 سد و بند و تقض و ابطال پیمان و سوکند ایدرک رهنلرینی فدا و اولاد و احفادلرین
 مهلکه یه القا و برقتیلدن تفکرین افراغ و اخلا ایله شقاوت و محاصره یه قیام
 ایتدکرنده عساکر دولت متحیر و هرفرقه کندو دائره سی محافظه یه منحصر
 اولوب کیدرک خصم طرفی غالب کدکله ابوبکر پاشا بونجه ادوات و مهماتی ناچار
 خصمه اهدا صورتنده ترکه مجبور اولوب و کندو طرفنده بولنان میرمیرانلر ایله
 برابر مجرد سلامت نفس داعیه سیله محاربه ایدرک لش قلعه سی پیشکانه و وصولرنده
 اشقودره طاغرنده مقیم اولان اشرار ایله محمود پاشانک مقاوله سابقه سی اولدیندن
 آنلر دخی بقیه عساکری نهب و غارت ایدرک محاربه یه مباشرت ایتلر ایله لش قلعه سنده
 دخی تحصن و استقرار قابل اوله مدیغه منی ابوبکر پاشا ابراهیم پاشا و محمد پاشا ایله
 برابر ایلبصانه ورود ایتدکده وقوع حل در دولته تحریر و تفصیل احوالی شفاه
 ایضاح ایچون جنکک بدینندن نهایتنه قدر برلکده بولنان دیوان کاتبی دخی ارسال
 و تسیر ایتدکن صکره ایلبصان و اوخری طرفلرنده متفرق اولان عسکری باشنه
 جمع و تلافی مافات صورتنده مقر حکومتی اولان مناستر قصبه سنه کاهرک اطرافه
 حواله سمع ایلمش و در دولت ایله بالخابره سنه آتیته ده روم ایلی و اناتولی طرفدن

عسا کر کلیه جلب و تدارك اوله رق قوه كافیة ایله حرکت اولنق اوزرد شمذیلک مجرد محمود پاشانك اشقودرهدن چیقوبده اطرافه صارق دلیق ایتماسی ایچون لازم کلان تداییره تشبث ایتمشدر .

بالاده اشعار ایتمدی کمز و جهله طاغلی اشقیاسنك اوزرینه دخی چرمن متصرفی علی پاشا مأمور اوله رق عسا کر و مهمات ایله کندوسنه تقویت ویرلمش اولوب اشقای مرقومه دن برطاقی ایسه روم ایلی ایالتی داخلنه یاللمش و برمدت استراحت ایله ینه برو طرفه کلهرک دیگر رفیقاریله برلشمك فکر نده بولنمش اولدق لری ابوبکر پاشا خبر آلدقده آ کسزین باصدیروب اکثرین اعدام ایله سر مقطوع لرین در سعادتیه ارسال ایلمش اولدیغندن خلال رمضان شریفده اشقای مرقومه نك سر مقطوع لری در سعادتیه واصل و ابوبکر پاشا حقنده استانبولجه بوسنهك بو قدر جك برمزیت حاصل اولمش ایدی انجق اوخلالده روم ایلی ایالتك کر سیمی اولان مناسترده قحظ و غلا ظهور ایتمکدن ناشی ضعیفای مملکت صورت استرحامده جمعیت ایدرک محکمه یه شتاب ایدوب و شکوالری غوغایه و استعدعالری بشقه معنایه منجر اولوب کیدرک محکمه یی طاشلامغه قناعت ایتمه رک فرداسی پاشا قپوسنه دخی هجوم ایله طاشلامغه جسارت ایتمک لرنده بعض تداییر ایله حدت و سورت لری تسکین و بوجعیتیه سبب قانچمان چری باشیسی امین اغا اولدیغی ظن و تخمین اولنوب مومی ایله ایسه طاغلی اشقیاسی اوزرینه مأمور و اوقاتی ترتیب لوازم مهمه یه محصور اولمغه مقدمات فته دن بی خبر و ایام قحظ و غلا ده بو مقوله جمعیتلر و قوعی امر مقرر ایکن حقنده ابوبکر پاشانك درکار اولان غیظ سابقه بوماده دخی علاوه اوله رق ازاله سنی اضار و علناً اعدامنده محذور کلی ملحوظ اولدیغندن حیلله ایله اخذینی خلاصه افکار و بعض خصوص مذاکره سی ایچون کندوسنی احضار ایدرک حقنده اسناد اولنان جرایمی تعداد و بالنفس اوزرینه سل خنجر بیداد ایلدیکی حینده مقدمات درکمین ایلدیکی آدم لر ظهور ایله خنجر او شوروب مومی الیهی نعمت حیاتدن دور ایتمشدر سر مقطوعی مخصوص تانار ایله در سعادتیه اسرا و اشقودرهل یه معین و مذکور فته یه باعث مستقل اولدیغی انها اولنمش اولوب انجق حقنده فرمان عالی صادر اولمش اولدیغندن سر مقطوعی سیاستکده اشرار اولان سرای میداننه وضع اولنمیوب کتم اولنمشدر و ذاتنده بر مرد نامور و مهادیه جنکنده بالانشین مجلس ارباب ظفر و ماچین و قعه سنك دفعه ثانیه سنده ایکی بیک قدر دال فس و آل نیتلو عسکر ایله اردویه ایریشوب اظهار کروفر ایله موجب تقویت قلوب اهل سفر اولمش و جوددی دولته لازم برذات ستوده صفات اولدیغندن قاتلی انظار انا مده معیوب و مقذوح اولمشدر .

در سعادته قائم مقام ایکن اردوی هایونک عودتنده اناتولی والیسی نصب اولنش
 اولان ایزنیق علی پاشا حسن چاوش ایله عشاق ویوه ده سی اولان عجم اوغلی نام
 شقاوت پیشه نك اوزر لرینه مأمور اولوب مقدا حسن چاوش غائله سنی بر طرف
 ایلدیکی اثنا ده عجم اوغلی دخی قاچوروب بعض اموال و اشیا سنی ضبط ایلمش
 اولدیغنی در سعادته اشعار ایتمش ایدی . بوقیشین اودخی روم ایلی والیسنك
 هزیمته مشابه برهزیمت کور مشدر . شویله که : ابتدا برادری عثمان بکی قپوسی
 خلقیله مرقومک اوزرینه سوق و ارسال ایتدکده منهزماً عودت ایتسیله علی پاشا
 در حال اطرافدن عسا کر کافیه جلب و تدارک ایدرک بالنفس کوتاهیله دن خروج
 ایله عجم اوغلی اوزرینه حرکت و متحصن اولدیغنی بناز نام محلی حصر و تضییقه
 مبادرت ایدوب انجق بنازک اطرافی خندق و صو ایله محاط اوله رق بر مدت
 محاصره یه محتاج اولدیغنی حالده معیتده کی عسکر بی همت شدت شتایی علت ایدرک
 کلدکری ستمه عودت ایتلریله علی پاشا عسکر قلیل ایله میدانده قالوب مبادا خصم
 قوی واقع حاله کسب اطلاع و برکونه ملغنت ایقاع ایلیه دیو هان اودخی عودت
 ایلمش اولدیغنی در سعادته انها ایلدکده اول بهارده تدارک تام ایله شقی مرقومک
 حقندن کلکه قیام ایلمسی کندوسنه اشعار اولنش ایدیسه ده بووقوعات حسییه
 کندوسنك اول حوالیده اسکی صیت و شهرته خلل ککش اولدیغندن اشبو سکز
 سنه سی جمادی الاولاسی آخرنده قرمان والیسی عظم زاده عبدالله پاشا ایله بجایش
 مأموریتلری اجرا قلمشدر انجق علی پاشانك کوتاهیله دن حرکتی خلالنده وفات
 ایلدیکی اوائل رمضان شریفده لدی الاستخبار قرمان ایالتی طاغلی اشقیاسی اوزرینه
 مأمور اولان چرمن متصرفی علی پاشا عهده سنه بروجه الحاق توجیه اولمشدر .
 متوفای مشار ایله خیر الدین پاشا نسلندن اولسیله عریق الاصل و طیب النسل عاقل
 ومدبر و عواقب اموری متفکر بر وزیر اولوب انجق دائره سی خلقته مغلوب
 و غرض و نفسانیت شائبه سی ایله مدخول و معیوب ایدوکی و اصف تاریخنده محرردر .
 طاغلی اشقیاسنك احوالنه کلنجه چرمن متصرفی سالف الذکر علی پاشا لوازم و مهماتن
 اکل ایتدکدن صکره قرار کاهی اولان نیشدن حرکت و سیر سریع ایله بازار جق
 قرا سنندن دره نام قریه ده متحصن اولان اشقا اوزرینه القای دهشت ایدوب بر
 ایکی ساعت مقدم اشقا خبردار و بادیه پیمای فرار اولملریله تعقیب اولنه رق کیمسی
 کشته شمشیر و کیمسی اسیر اولوب بقیه السیوفی چربان قضا سننده واقع قهلی
 قریه سنه و آندن دیمتوقه قضایی ملحق اتندن صوفیلر قریه سنه ورود ایله اوراده
 استقرار ایتدکدرنده ینه اوزر لرینه و اریلوب دیگر قریه ده کائن هوادار لرندن

بر گروه مکروه امداد لرینه کلکله خیلی جنک اوله رق نهایت عسا کر دولت غالب
 لکلکن اشقیای مر قومه کوملجنه قریه لرندن کیرلی قریه سنده نفس آلوب علی پاشا
 اورایه دخی ایلغار و قریه مر قومه یی محاصره به ایتدار ایله درت کون طرفیندن
 جنکه مداومت اولندقدن صکره گروه اشقیایا مایوس اوله رق خارجه اوغرایوب
 فرار ایتدکری ائنده دخی بر خیللیسی اتلاف اولنوب بقیه سی معرکه به اوتوز
 ساعت بمدی اولان کوملجنه قراسندن یصی قریه سنده قرار ایتلریله علی پاشا اورایه
 دخی سوق لشکر جرار ایتمکله اشقیایا بعض کار کیر اینیه ایجنه تحصن ایدرک محاربه به
 اغاز ایتلریله بونده دخی بر خیللیسی اعدام اولندقدن صکره بقیه سی فرار ایله پریشان
 اولمشلردر بوندن بشقه بر گروه اشقیایا دخی خاصکوی جبالنده واقع یوغوردجی
 قریه سنده بنا ایتدکری قلعه ده تحصن ایتش اولملریله علی پاشا علی الغله او زرلرینه
 ایلغار و حصر و تضییقه ایتدار ایله سکز کون قدر میانده جنک تمتد اولوب بالاخره
 اشقیایا راکب اولدقلری حیوانلرینک قولقلرینی قطع و مجروحلرین احراق و لیلیا
 قلعه دن خروج ایله جنک ایدرک جویای جای سلامت اولدقلری ائنده بریجه سی
 مقتول اوله رق بقیه لری نوره قوب قضا سنده واقع بر قریه به وضع قدم ایتدکری
 کبی علی پاشا آرقه لرندن یتشمکله اورادن دخی دسپوت یایلاسنه صعود ایله محافظه
 وجود ایدوب دسپوت یایلاسی غایت صرپ بریر ایسه ده قطع عرق اشقیایا ملتزم
 اولدیغندن محل مر قومک متاعنه باقلمیوب بتون بتون استیصاللری اسبابنک
 استحصالنه چالیشلمقده اولدینی علی پاشا طرفندن انها اولندقدن هر نصل اولور ایسه
 اولسون بالکلیه رفع غائله اشقیایا اولنق اراده سنی شامل اشبوسکر سنی سی او اخرنده
 علی پاشایه امر عالی کوندر لمشدر .

برمنوال مشروح روم ایلی و اناطولی طرفلرنده اشقیایا محاربه لرلیه اشتغال اولدینی
 کبی برخیلی وقتدنبرو عربستان حوالیسی دخی بر شر و شور ایدو کندن بروجه
 آتی تفصیلاتنه ایتدار اولور .

* وقایع عربستان *

جزار احمد پاشا بر الشامده نیجه متفد خاندانلری امحا ایدرک لرلینی متسلم ایله اداره
 ایلدیکندن جبل لبنان خاندانلرینی دخی بتور و بده جبل مذکورده بو وجهله
 بالاستقلال تصرف ایلمک آرزو سنده اولوب انجق اول حوالیده امرای شهابیه نک
 زیاده نفوذ و اقتدارلری اولدیغندن یکدیگری علیه نه دوشوره رک آنرک بینلرنده کی
 اختلافات و منازعاتدن استفاده ایتمک جزارک اصول مرعیه سندن ایدی و امرای
 شهابیه دن بعضیلری اره صره شام والیرینه استناد و استظهار ایده کلدکارندن جزار

پاشا جبل دروزی هر طرف دن احاطه ایتک اوزره کندوسی شام والیسی اولوبده
 صیدا منصبی دخی امنیت ایلدیکی آدملرندن برینه توجیه ایتدیرمک اسبابی تحریردن
 خالی اولمزدی و کندوسنک اگ معتمدی مصر دن برابر کتورمش اولدیغی کولهسی
 سلیم پاشا اولوب انجق یوز طقسان طقوز تاریخنده کندوسی امیر الحاج اولدیغنده
 سلیم پاشا مطعونا وفات ایلمش ایدوکندن دیگر مملوکی کوچک سلیمی آنک برینه
 کتخدا ایدوب عهده سنه میر میرانلق ایله صیدا منصبی و متعاقبا دیگر مملوکی سلیمان
 اغا عهده سنه دخی کذلک میر میرانلق ایله طرابلس شام منصبی توجیه ایتدیرمشیدی
 و جلد نالده بیان اولندیغی وجهله حاکم جبل دروز بولنان امیر یوسفک دایسی
 امیر اسماعیل برارالق امیر یوسف علیه قیام و جزاره برخیلی آچه لر وعد
 ایدرک آنک اعانه سیله حکومت جبلی ضبط ایتمشیکن چوق کچمکسزین امیر
 یوسف دخی جزاره دخالت ایدرک کلی آچه و عدیله جزارک میل و معاونتی
 تحصیل ایدوب تکرار جبل حکومتی ضبط ایله مقر امارت اولان دیر القمره
 ورودنده امیر اسماعیلی حبس ایتمکله امیر اسماعیل محبوساً وفات ایتدکنفصره
 آنک برادری و بلاد حاصیا حاکمی اولان امیر بشیری دخی بعض تأمینات
 ایله اغفال ایدرک مؤخرأ دیر القمره جلب ایله قتل و برادری سید احمدک
 کوزلرینی کور ایلمش و بصورتله دایلیرینک حقتدن کلمکله زعمجه دفع رقبه
 ایلدیکندن و ایکیوز ایکی تاریخنده اوزون ابراهیم پاشا شام والیسی نصب اولمغله
 جزارک حکومتی صیدا ایالتنه منحصر قالدیغندن امیر یوسف ارتق جزار دخی
 کندوسنه برشی بیاض اعتقادینه دوشوب جزاره معتاد اولان و یرکویی و یرمز
 اولمش ایدی حالبوکه ایکیوز اوچ سنه سی خلانده حاصیا حاکمی اولان امیر علی
 شهاب بن امیر اسماعیل جزارک یانه کیدوب اودخی امیر یوسف علیه سوق عسکر
 ایتک اوزره تمام بویله برسررشته ارامقده اولدیغندن امیر علی به پک زیاده رعایت
 و احترام ایلدیکنی امیر یوسف لدی الاستماع جزاره عصیان و مخالفت ایلدیکنه نادم اولمشیدی
 جزارایسه همان امیر یوسف حقتده رکیزضیرینی اجرا به مباشرت ایدرک کتخداسی
 اولان سالف الذکر کوچک سلیم پاشا ایله سلیمان پاشایی و خواجه ابراهیم قالوشی
 عساکر کثیره ایله امیر یوسف اوزرینه سوق و ارسال ایلمشدر انجق اول خلانده
 جزارک کوله لری ایله جاریه لری اره سنده بعض کونه خیانت ظهور ایتمکله غضبناک
 اوله رق اوتوز نفر بوشناق قواسلر ایله خزینه به کیدوب اناخدار اغاسنی قید و بند
 و سرایدارلری قتل و خزینه غلمانی زندانه القا ایتدکده سائر کوله لری دخی
 جمله سنک حقتده جزارک نیتی فنا اولدیغنی کوردکاری کبی همان جمله سی یتش نفره

بالغ اولدقاری حالده بالاتحاد سلاحتوب و جزار آنلرك اوزرلرینه دخی قواسان ايله هجوم ایلمش ایسه ده مدافعه ایتملریله جزار بونلری برکونه حیله و دسیسه ايله اله کتورمک استدیکی ائنده خزینه داری که سلیم پاشانک برادریدر محبوس اولان کولهلری دخی زنداندن اخراج برله خزینه به کتوروب خزینه دخی برج کیرده اولسیله طوپلری چورهرک تحصنه قرار ویرملریله اهالیء بلده پک زیاده خوف و خشیتته دوچار اولدقلرندن دفع فتنه ضمننده مفتیء بلده کولهلرك عفونی رجا ایدوب جزار اگرچه قبول ایتماش ایسه ده آنلری قولایقله اله کچوره میه جکئی دخی جزم ایلدیکندن مملکتدن چیقوب کیتملری امر ایدوب آنلر دخی همان آتلیینه سوار اولهرق طوغری سلیم پاشا یاننه کیتدکلرنده جزار پاشا کیرویه قالان کوچک کولهلرك کیمسنگ بورتی و کیمسنگ قولاقلرینی قطع ايله مصره نفی ایتمشدر .

برو طرفده فراری اولان مملوکلر سلیم پاشانک یاننه واردقلرنده عفولرینی رجا ضمننده سلیم پاشا جزاره برعرسحال یازوب رجاسی مقرون مساعد اولدیغندن میانده برقاچ دفعه وقوعبولان مخابره مؤدیء مشاجره اولهرق سلیمان پاشا دخی بوخصوصده سلیم پاشا ايله متحد اولدیغندن عسکر سرکرده سنی و خواجه ابراهیم ابوقالوشی دخی کندو رایلرینه جلب ایدوب همان اردو ايله عکبه بالورود جزاری قتل ايله یرینه سلیمان پاشایی کچورمک اوزره بیئلرنده قرار ویردکنضکره سلیم پاشا امیر یوسف ايله بالمکاتبه مصالحه ایتمکین جزارک امیر یوسف اوزرینه سوق ایلدیکی قوهء عسکریه کندو علیهنه منقلب اولمش اولدی بعده سلیم پاشا یروت متسلمنه وعساکر مغاربه سرکرده سنه اشعار کیفیت ايله اتفاهه دعوت وعساکر صیداده بالاجتماع آندن مدینهء صور اوزرینه حرکت و آنی عنوة ضبط ایتدکنضکره عکبه طرفته عطف عنان عزیمت ایدوب چونکه جزارک ایشه یاران مجموع عساکری سلیم پاشا النده اولدیغندن بشقه او حوالیده بولنان ماترمین وارباب مقاطعات و مشایخ اطراف بلاد آنک یاننه تجمع ایدرک ذخائر و مهمات لازمه یی یتشدیرمه اصلاحجویز قصورایتمدکلرندن وعکهایچنده چولاق عثمان نام سرکرده نك زیر اداره سنده برمقدار ارناودلردن بشقه عسکر اولدیغندن جزارک امارات انقلاب دولتی وعلامات مرور نوبتی هرکسک نظرنده بیانی شبهه قالماق درجه سنده کسب قوت ایدرک هرکس بونجه آثار شدت و تعدیاتی کوردکلری دور جزارک انقضاسنه مد نظر ممنونیتله منتظر اولمشلر ایدی .

جزار دخی روش حاله نظراً مایوس اولهرق کندو اوغورینه جان ویره جک کندو همشهریلری اولان برمقدار بوشناق قواسلر و برجارده اولدقجه ایشه یارایه بیله جک

براز ارناود عسکر لری ایله برمدتجک عکه قلعه سنده تحصن ایده بیلور ایسه ده نهایت سلیم پاشانک قوتنه تاب آور اوله میه جغنی جزم ایله لدی الاقتضاهمان بنوب فراریتمک اوزره لیانده کیلر تهنیه ایلمش وشبخون صورتیه سلیم پاشا اردوسنه قارشو بر کره آت اوینادوب بغته بر اوزنکی پارلاده رق آنک خواب غفلت مغرورانه سندن استفاده ایده بیلیمک احتمالندن غیرى نطع شطرنج خیالده بر منصوبه امل وخویلیسی قالمش ایدی وبو امید اوزرینه عکه ده موجود اولان دیوارچی وعمله طاقتی جمع وبرچوق اموال واشیا احسان ایندکدن بشقه بعده عطایای وافره ویرمک مواعیدیه اطماع وجلب ایله سلاخلندیره رق آنردن ویاننده موجود اولان قواسان وسأتره دن بر اردو ترتیب ایدوب سلیم پاشا ایسه عکه ده عسکرک قلتی بیلوب کندو قوتنه مغرور اوله رق بتون بتون احتیاطی الدن بر اقمش اولدیغندن جزارک بروجه مشروح مرتب اولان جدید اردوسی علی الغفله سلیم پاشا اردوسنی بصدقه پک فنا صورتیه منہزم اوله رق سلیم پاشا شامه فرار و آندن استانبول طرفه ورود ایله روسیه سفرینه مأمور اولوب جلد رابعده ذکر اولندیغنی وجهله اسماعیلده شهید اولمشدر . سلیمان پاشا دخی ابوقالوش ایله برابر دیرالمره فرار ایلمشدر .

بووقعه دن صکره جزارک هرکسدن امنیتی منسلب اوله رق جهانی کندوسنه دشمن بیلوب قارشوسنه ارتق کمنه چیقهرمز اولمش وفقیر وغنی ووضیع وشریف دیمیوب عکه وصیدا اهاالیسندن قباحتی قباحتمسز نیجه کیمسه لری وحتی بعض قضات ومقتیلری سلیم پاشا طرفدارغلیله اتهام واعدام واصناف ورعیادن نیجه لرینی مصادره وحبس واشکنجه ایله تلخکام ایتمکله ناس اولکییدن زیاده جزار نامندن هراسان ولرزان اولمشدر ایدی .

ایشته بوآئنده فرانسه قونسولوسیه بینلرنده وقوعبولان برودت وینونته منی عکه وصیدا قونسولوسلریله بورالرده نقدر فرانسه تجاری وارایسه چیقوب جمله سنک کیتملرینی امر وتنییه ایله خانه ودکانلرینی قپاتمش وقونسولوسلری یافه یه چکیله رک دولت علیه یه عرض شکوی ایتملریله اعاده وقبول اولغلری ضمننده استانبولدن مباشر مخصوص ایله امر عالی کوندرلده کده جزار کندوسنک طارغئلنی آنلرک شخصلرینه عائد اولمغه یرلرینه بشقه لری تعیین اولنور ایسه قبول ایده جکنی در دولته عرض واشعار وتکرار کندوسنه استانبولدن تحریرات کیتمش ایسه ده اولکی سوزنده اصرار ایتمسلیله قونسولوسلر فیما بعد یرلرینه عودت ایده ممشلردر .

بعده جزار امیر یوسف اوزرینه عسا کر کلیه ترتیب ایدرک بر فرقه سنی طوغری جبل دروز اوزرینه وبر فرقه سنی صیدا وجباع طرفه وبر فرقه سنی علی بن الامیر

اسماعیل معیتله وادی تم طرفه سوق وارسال ایلدیکنه مقابله امیر یوسف دخی اول منوال اوزره عساکرینی اوج طاقم ایدرک مقابلهیه متبه اولدیغندن ابتدا بقاعده تلاقه فریقین وقوعنده چونکه سلیمان پاشا برمقدار درزی عساکریه مقدحجه بقاعه کش ایدوکندن آنک ثمره جرأت وجسارتی اولمق اوزره جزارک عساکری مغلوب اوله رق سلیمان پاشا وادی تمه قدر کلوب امیر علی دخی عکبه عودته مجبور اولمش ایسه ده جزار طرفندن ایکی بیک قدر جدید سواری ایله کندویه امداد اولندیغندن تکرار وادی تمه کلوب درزی عساکرینی بقاعه رجعته مجبور ایلدیکنه مقابله امیر یوسف دخی سلیم پاشا معیتده بولنش اولان اکیوز قدر هواره آتوسنی تعیین وارسال ایتمکله دفعه ثانیه اولمق اوزره بقاعده واقع اولان برشدتلو محاربه ده درزیلر بتون بتون منهزم اولدقلرندن سلیمان پاشا ایله برابر دیرالقمره رجعتلرندن صکره جزارک عساکری هر طرفی احاطه ایتملریه طرف طرف پک هائل وشدید محاربه لر وقوعه کله رک امیر یوسف ارتق جزار ایله باشه چیقهمیه جغنی درک ایتمکین کبار ومشایخ بلادینی جمع ایله بو آتش حربی اظفاضمننده عمزاده لرندن برینک امارته اتخابنی عرض وتکلیف ایلدیکنده بنوشه ابدن امیر بشیر بن امیر قاسم بن امیر عمرو بن امیر حیدری اتخاب ایتملر ایدی .

اشیوامیر بشیر اولوقت حدیث السن بولنش ایسه ده عاقل ومدبر اولمسیله والده سی امیر یوسفک سابق اولوب حسن سلوک وسیرتیه عامه اهالی نی خوشنود ایدرک مدت مدیده جبل دروز حکومتی ایتمکدنصکره کندو اختیاریه حکومتدن استغفایلیان مشهور امیر منصورک قزی بولتمسیله قومی ارسنده معزز ومحترم بذات ایدی .

بروجه مشروح امیر بشیر امارته اتخاب اولندقده امیر یوسف کندوسنی جلب واحضار ایله مشایخ مملکتک عرضی موجبجه جزاردن جبل دروز حکومتی استحصال ایتمک اوزره عکبه کیتمنی تنیه ایدوب اودخی عکبه واردیغنده جزار کندوسنی اعزاز واحترام ایله قبول وخلعتنی اکسا ایله التزام شرطنامه سی کندویه تسلیم واعطا ایتمش وفقط امیر یوسفی باجمله بلاد دروزدن طرد ایلمسنی شرط قلمش وبو شرطک اجرا سیچون معینه عساکر وافیله ترفیق ایلمش ایدوکندن امیر بشیر دیرالقمره ورودنده باجمله اکابر ومشایخ بلاد کلوب کندوسنه عرض انقیاد ایلمش وامیر یوسف هواره عسکرینک خرجنی یعنی معیناتی قطعله عمزاده لرندن وکبار مملکتدن بعضیلرینی بالاستصحاب بلادجیله چکلمسیله هواره عسکری دخی سلیمان پاشا ایله برابر طرابلسه و آندن حلبه کیتمش ومعلم ابراهیم ابو قالوش دخی وادی راید حکامی اولان اولاد موسی الحنا مشایخنه التجا و آنرک یاننده اختفا

ایلمش اولسنه نظر آبادیء جنک و جدال اوله جق بر حال قالمش ایسه ده امیر یوسفی
 بلاد جیلدن طرد ایلمک اوزره عساکرله اول طرفه حرکت ایتسی ایچون امیر بشیره
 جزارک طرفدن امر کلکین ناچار بلاد جیل اوزرینه حرکت کتده اول امرده جزارک
 عسکری مغلوب اولمش ایسه ده امیر بشیرک مهاجمات متوالیه مکرره سیله امیر یوسف
 طرفی نهایت الامر بتون بتون منهزم اولدیغندن امیر یوسف جرد جمیله و آندن
 بقاعه و بعده شامه نقل ورحلته مجبور اوله رق شامه وصولنده اوزون ابراهیم پاشا
 ایله یینلرنده معارفه قدیمه اولدیغندن کندوسنه زیاده احترام ایدوب انحق حج موسمی
 اولغله جانب حجازه کیتمک اوزره اولدیغندن کندوسنه شام قریه لرنده محل اقامت
 تخصیص ایتد کدنضکره اکیبوز درت سنه سی حبی ایچون جانب حجازه کیدوب بعده
 شامه عودتنده بلاد جیل حکومتی امیر یوسفه توجیه ایتمکله اودخی معیتنده موجود
 اولنلرایله برابر محل مأموریتنه عودت ایلمشدر لکن کیفیت جزارک مسموعی اولیجق
 در حال بیروت طرفه بر مقدار عسکر تسیر و امیر یوسفی بلاد جیلدن طرد ایتمک
 اوزره عسکرله اول طرفه حرکت ایلمسنی امیر بشیره تحریر ایدوب بو وجهله عسکر
 کوندرلدیکنی امیر یوسف لدی الاستماع شامه فرار و آندن جانب حورانه حرکت
 برله اوراده استقرار ایلمشدر .

اشته شو و قوعات انسانده جزار امارت حاج ایله شام ایالتی استحصال قیدینه دوشوب
 بو استدعاسی جبل دروزی هر طرفدن احاطه ایتمک بو طریقله اول حوالیده توسیع
 دائره حکومت ایدرک ایستدیکنی اجرا ایده بیلیمک مقصدینه مبنی ایدوکی ثابت اولور .
 فقط استانبولجه جزارک اقطار شامیده اوله فوق العاده کسب قوت ایتسی دخی بکده
 ایستلمیه جکنی بیلدیکندن اصل مرامنی اخفا ایدرک مرامی محضاً دولتته بر خدمت
 ایلمکدن عبارت اولق صورتنده کورینوب وقت و حال ایجابجه بر منوال مشروح
 قوی الاقدار بروزیرک امیرالحاج نصب اولنسی و بروقتدن برو طریق عصیان و شقاوته
 سالک اولان میلوو عشیرتی اسکان باشیسی تیمورک اوزرینه مأمور اولق اوزره ابراهیم
 پاشانک دخی رقه ایالتنده بولنسی موافق مصلحت کورلمکله اول اوانده امارت حاج
 ایله شام ایالتک جزار عهده سنه و رقه ایالتک اوزون ابراهیم پاشانک عهده سنه
 توجیهی قرار کیر اولمش ایدی .

امیر یوسفک حالته کلنجه بر منوال مشروح حورانه ورودنده التماس عفو و امان
 ضمتنده جزاره بر عرضحال یازوب امر ایلر ایسه حضورینه کله جکنی دخی اشعار
 ایتمکله جزار دخی ایمان غلیظه ایله کندوسنی تأمین و عکدیه کلسنی اشعار ایلمش
 وفی الواقع امیر یوسف عکدیه کد کده اعزاز و احترام ایله قبول ایتمکله بش آی

قدر معزز و محترم اوله رق یاننده قالمشدر و بو ائنه جزارینه امیر یوسفی مقام حکومتنه اعاده ایتمکی وعد ایدوب انحق برسنه ظرفنده مقسطا ایکی بیک کیسه آچه اعطاسنی شرط ایدرک بو مبلغ ایچون رهن مقامنده عکده قالمق اوزره کتخداسی شیخ غندور خورینک عکبه جلب واحضار اولمسنی امیر یوسفه تکلیف ایلمش واشبو غندور خوری امیر یوسفک پدری مقامنده اوله رق مدیر جمیع اموری اولمسیله کیفیت کندوسنه اشعار اولندقدده در حال عکبه کیش ایدی . ایشته اول ائنه جزاره امارت حاجک توجیه اولدینی خبری وارد اولمغه پک زیاده ممنون اوله رق همان متمم ارساله شامک ضبط وربطنه مبادرت ایتمسیله برابر برمنوال سابق وادیء راویده فرار ایدن معلم ابو قالوشی طو توب کندوسنه کوندرمک اوزره اولاد موسی الحنایه امر کوندروب چونکه شام ایالتی جزاره توجیه اولتمق ملبسه سیله کافه اطراف وانحاً آنک قبضه تصرفه کچمش اولدیغندن آنردخی جزاردن خوف ایله ناچار ابو قالوشک باشنی کسوب جزاره کوندرمشلر ایدی لکن حکام جبل دروزه هرکیم التجا یلر ایسه هروجهله صحابت اوله رق هرکونه غدردن امین اولمق جبلک عادات و اصول مستمره سندن اولمغین بو صورتله خاندان موسی الحنا حکام جبل دروز نظر لر نده خیانت ایله لکه دار قالمشدر بوندن صکره شام ایالتی داخنده بولسان مشایخ برر برر عکبه کله رک حضور جزارده بر معتاد خلعتلرینی کیوب بر لرینه عودت ایلمشدر .

فقط جبل نابلده واقع حنین متسلمی اولان شیخ یوسف جزار یوسف جزاره وارمقدن خوفله هدایاسنی ارسال ایدرک شام والیرندن معتاد اولان خلعتنک ارسال اولمسنی استدعا ایتدیکنده جزار بوکا راضی اولیوب بالذات کلمنی امر ایدوب او دخی بوکا مطاوعت ایده مدیکندن اوزرینه جزار طرفندن عسکر سوق اولندقدده او دخی سانور قلعه سنده متحصن اولمغه قلعه نک حصر و تضیقنه مبادرت اولدینی ائنه جزار دروز حکومتی جزار طرفندن امیر یوسفه احاله اولدینی امیر بشیر لدی الاستماع همان عکبه کله رک امیر یوسفک ویره جکی ایکی بیک کیسه یه بشیوز کیسه دهها ضمله ایکی بیک بشیوز کیسه لک برسند تحریر ایله جزاره اعطا ایتمکین او دخی بوضمه طیانه میوب تکرار امیر بشیری حکومتنده ابقا و امیر یوسف ایله کتخداسی شیخ غندوری محبسه القا ایتمش و امیر بشیر دیر القمره عودت و مبلغ مرقومی اهالی یه بالتوزیع تحصیلنه مباشرت ایلمش و چونکه سانور قلعه سنک مدت محاصره سی خیلی وقت متمد اولدیغندن جزار بالذات اردوسیه مقابل قلعه یه واروب کیجه و کوندوز طوپ و خنبره ایله دوکمه باشلامش ایسه ده برمنوال سابق امیر بشیرک جزاره مدیون اولدینی مبلغ جبل

اهالیسنک حال تحملارندن زیاده کیکله جبل دروز اهلایسی کافه امیر بشیر عالیهنه قیام ایلدکری خبری جزاره واصل اولدقده پر آتش تهور و غضب اوله رق اهالی جبلک بوقیام و حرکتلرینه سبب امیر یوسف ایله کتخداسی اولمق ظنیه ایکسینی دخی قتل ایلمشدر حالبوکه آنرک اعداملریله اهالیء جبلک طغیانلرینه اصلا سکونت کلموب مبلغ مطلوبی ویرمک اوزره اصرار ایلدکرینه و امیر بشیر دخی جزاردن عسکر ایستدیکنه مبنی جزار طرفسندن کوندریلان بر مقدار ارنالود عسکری دخی مغلوب و منهزم اولدیغندن و جزار ایسه بالذات محاصره سیله تقید ایلدیکی سانور قلعه سنک فتحندن بیاغی یأس مرتبه سنه کلدیکندن ناچار معیتده کی عسا کرک برخیلمسینی افراز ایله جبل دروز اوزرینه سوق ایلدوب اهالیء جبل ایسه عامه اتحاد و امیر یوسفک برادری امیر حیدر ایله برادر زاده سی امیر قعدانه عرض انقیاد و ایکسینی برلکده اوله رق حکومته انتخاب ایلمش اولدقارندن امیرین مومی الیهما ایله عسا کر جزار بپننده درت آی قدر و قوعبولان محاربات عدیده ده طرفیندن پک چوق تلفات و قوعندن صکره میدان غلبه جبل اهالیسنده قالمش و ایکسینوز بش سنه سنک حج موسمی گلش اولمسلیله جزار کرک جبل دروزده مظفریتدن و کرک سانور قلعه سنک ضبطندن محروم اوله رق رجعته مجبور اولمغه ناچار عکبه کلوب بالجمله عسا کرینی اعاده و امیر بشیر ایله برادری امیر حسن اهالیء جبلدن معیتلرنده بولسانلر ایله برلکده صیدایه کلوب آنده اقامت ایتملری اوزرینه امیر حیدر ایله امیر قعدان دیر القمره عودت ایتمش و جزار دخی شامه و آندن جانب حجازه کیتمشدر انجق بوصورت ایله شامه ورودنده نیجه کیمسه لرک قانه کیرمشیدی .

محال مبارکه ده بحکمة الله تعالی جزار پاشا اصلاح حال و تبدیل اخلاق ایدرک نمکور اولدینی منکراتدن فراغت و بش وقت نمازه مداومت ایلدیکی شامه عودتنده معلوم اولیجق هر کس ممنون و متشکر اولملریله

* بیت *

الناس فی غفلة عما یراد بهم * کانهم غم فی بیت جزار

سرینه مظهر اولمشلر ایدی زیرا شامه دخولندن صکره چوق کچمکمزین سنه طبیعت اولاسنه عودت ایله اولکیدن زیاده غدار و خونخوار اوله رق کرک دائره سی خلقتدن و کرک اهالیدن نیجه لرلی بلا سبب اعدام و نیجه کیمسه لرلی حبس و تضییق ایله مبتلای آلام ایلمش و آندن عکبه ورودنده دخی خیال و خاطره کلز مظالم و تعدیاته

تصدی ایش ایدی مع مافیه فطین و متجسس و متبصر و اداره امور و ولایتده ماهر بر ذات اوله رق تبدیل زی و هیئتله ایاتی داخاندنه پک چوق یرلری و بلکه بعضا درزی طاغنی طولاشوب کندو حقهده خلقک نه سویلدیکنی تحقیق ایلم و صکره کندولرینه سویلر ایدی بوجهته خلقک اکثر سرارینه مطلع اوله کلدیکندن کیمی سحرار و کیمی خدامه مالک ایش دیو ناس آنک علیهنه سوز سویلمکه اجتسار ایده مز اولمشلر ایدی .

جبل دروز و قوعاننه کانجه برمنوال سابق جزارک مجدن عودتسندده امیر بشیر کندوسنی فخرای مز یربده استقبال ایلدیکننده بهر حال جبل دروزی ضبط ایله آتی مقامنه اقعاد ایده جکنی وعد و تبشیر و اهالیء جبله تهدید سیاقده اکید و شدید برقطعه بیسورلدی تحریر ایتدکن صکره همان جبل دروزی ضبط ایشک اوزره امیر بشیر ایله برلکده حرکت ایتلمر بچون عساکرینه امر و یرمش ای دوکنندن آنلر دخی اول امرده حاصییا طرفه هجوم ایشملر ایدی لکن برو طرفده امیر حیدر ایله امیر قعدان دخی فداکارانه مدافعه ایتلمر ایله ایکیوز التی سنه سی خلالتده جبل دروزده طرف بطرف آتش محاربه مشتعل و مشدد و هنگام هنگامه کار زار تمتد اولوب طرفیندن انفار کثیره ضایع اوله رق عساکر جزار نیجه قر یلری احراق و افسا و چوق یرلری غارت و یغما ایشملر ایسه ده طرفین گاه غالب و گاه مغلوب اوله رق نتیجه ظفر بر طرفده قرار کیر اوله مامش و چونکه امیر بشیر طرفده مشایخ خاندان جنبلاطدن و امرای ابی الاعدن بعضیلری بولمغله آنلرک و ساطتیاه جبل اهالیسندن بعضیلرینک برو طرفه جلبنه سعی اولمشیکن یننه مفید اولمیوب حتی شیخ قاسم جنبلاط امیر بشیر طرفداری اولدیغی حالده اوغلی شیخ بشیر پدرینه مخالفتله درزی عساکرینک اوکنه دوشه رک فداکارانه جنسکاورلکلر ابراز ایلمش ایدی جزارک بونجه تلفاتی و عساکرجه بوقدر ضایعاتی اختیار ایلمسی ایسه بلاد بشاره و صفد کبی جبل دروزی دخی بتون بتون قبضه تصرفه آلوده بیاغی متسلم ایله اداره اولنه بیله جک برحاله کتورمک مقصدینه مبنی اولدیغی حالده جبل مذکورک مسالک و معابری صعاب المرور و اهالیسی حرب و ضربه مألوف اولدقلرندن متحداً حرکت ایتدکاری صورتده تسخیری مشکل اوله رق امراسنی یکدیگری علیهنه دوشه رک اولور ایله قوللاقمقدن بشقه تدبیر مستحسن اولدیغنی جزم ایدرک نیت سابقه سندن ناچار فراغت برله عساکرینی اعاده ایدوب امیر بشیره دخی عودت ایتسیچون خبر کوندر دکده چونکه اودخی مدت مدیده محاربات متوالیه ایله یورغون اولدیغندن همان برادری امیر حسن ایله برابر صیدایه عودت ایتدکلرندن

سکره ایکسی دخی اصلا طیشارو چیقمامق اوزره صیداده اقامتیرنی امر ایلمش
 وبویله بلا ظفر عساکرخی اعادهیه مجبوریتندن بک زیاده دلکیر اولمش ایدی . انجق
 اهالیء جبل دخی علی الدوام مجتمع اوله رق طورده میه جقلرندن متادیا جزاره عصیان
 اوزره قالمیه جقلری جهتله وبوقدر فداکارانه حرکتلری دخی مجرد حال
 تحمللرندن زیاده ویرکو طرح وتوزیع اولندیغندن ناشی اولمسیله جرایم سابقه لرینک
 عفوی والتی سنه ظرفده مقسطا کندوسنه درت بیک کیسه ویرملری شرطیله امیر
 حیدر ایله امیر قعدانک اوزرلرینه حاکم نصب اولنمسی استعداسیله جزاره برقطعه
 عمرنحال تقدیم ایدوب حجج موسمی دخی تقرب ایلمش اولدیغندن ناچار جزار
 دخی بو استدعالرینه مساعدده ایدرک امیرین مومی الیهمایه خلعتلریله شرطنامه التزای
 ارسال اتمش ومتعاقبأشامه وآنندن جانب حجازه کیتمشدر . عودتنده امیرین مومی الیهما
 طرفندن تبریک قدوم ضمنتده یوز بیک غروش تقسیم وارسال اولمغله جزار پاشا
 منبسط ومنشرح اوله رق حکومتلرنده ابقا وارسال خلع خوشنودی ورضا ایلمش ایدی .
 اشبو ایکی یوز سکر سنه سنده مومی الیهما اهالیء جبل کندولرینک طاعتندن خروج
 ایله امیر بشیر طرفنه میل ایتمه باشلادقلرخی کوردکلرندن وجزارک دخی امیر
 بشیره محبتنی بیلکلرندن برقوت جدیده تدارک برله امیر بشیرک قوتی قیرمق اوزره
 جبل حکومتی امیر یوسفک اوغللرینه ترک ایدوب انجق آنلر حدیث السن اولدقلری
 جهتله کندولری آنلره وصی مقامنده بولنمق وجزاره اوچ سنه ظرفده مقسطا ایکی
 بیک کیسه آچه ویرمک خصوصنی بعض مشایخ ایله بالذاکره قرارلشدیره رق
 اولوجله جزاردن استدعا ایدوب اودخی قبول ایدرک حکومت جبل امیر یوسف
 اوغللرینک نامنه احاله اولنمش وامیر حیدر ایله امیر قعدان آنلره وصی مقامنده
 اوله رق ینسه امر حکومت آنلرک ید اداره لرنده قلمش ایسه ده چوق چکمکسزین
 تعدیات واقعه لرندن طولای بعض اهالی کندولرندن روگردان اولوب خصوصیه
 مقدا کسب استقلال ایلملرینه بادی اولان محاربات سابقه ده اک زیاده ابراز حمیت
 وجلادت ایلمش اولان سالف الذکر شیخ بشیر جنبلاط ایله ینیلرنده برودت
 ومیانیت حادث اولدیغندن جبلدن تحذ ایلان اختلال واختلاف آرا اوزرینه جزار
 دخی همان بر مقدار عسکرله امیر بشیری کوندر کده مقدا اک بیوک خصمی بولنان
 سالف الذکر شیخ بشیر بعض اکابر شوف ایله کندوسنی یولده استقبال ایتمله امیر
 بشیر هنوز دیر القمره واصل اولدن امیر یوسفک اوغللری بلاد جیبه فرار وامیر
 بشیر حکومتده استقرار ایلمش ایکن آره سی چوق چکمکسزین جزار طرفسندن
 عزل ایله ینه امیر یوسف اوغللری حکومته اعاده اولنمشدر .
 بوصورتله جزار ینه جبل حکومتته استدیکی طرفنی نصب ایتمه مقتدر اوله رق

امارت حاج منصبی دخی عهده سنده اولمغه بالجمه اقتدار شامیه ده نفوذی جاری اولمشدر . و مقدم و مؤخر تعدیات واقعه سندن طولانی در دولت اشتکال و وقوعبولش ایسهده وقت و حاله کوره امارت حاجی ادارهیه مقتدر بر دیگری بولنه مدیغندن ایکی یوز اون تاریخنه قدر امارت حاجده ایقا اولمشدر . چونکه بالاده کدار شبدیز خامه فقیر اولدینی اوزره غازی حسن پاشانک قوت دولت ایله مصره اقعاد و اقامه ایلدیکی امرا طرفی مغلوب اولهرق ابراهیم و مراد بککر طاقی جبراً مصره دخول ایتدکار ندن خطه مصریه ینه متغلبه انده قالمش دیمک اولوب و آنلر ایسه کرک میری خزینه سنی و کرک حرمین مرتبانی بالتمام تسویه و تسایمده در لو اهانلر ایده کلوب حتی کچن یدی سنه سی حجاز ترتیبانده انواع تقصیر ایتدکار ندن و مصره امیر الحاجی تعیین ایتدکاری عثمان بک مدینه منوره فقراسنک و عربانک صرهلرینی ویر مدیکندن اونه دنبرو مصره حجاجنی برر عقبهیه کرتار ایده کدکاری مثللو سنه مرقومهده دخی معابر شعیب نام محله عربان قافله حاجی اوروب یغما ایتدکارینه مبنی اشبو سکر سنه سی اوائلنده تویخی متضمن امر عالی کوندرلمشدر . انجق امرای مرقومه اولکی کبی بر قوه کافیه ایله تأدیه محتاج اولوب حقلرنده مجرد تویخ و سرزنش کار کیر دکل ایدی .

مدینه منوره ده دخی عن اصل اوچ نفر اوجاق کتخدالری اولوب جنجهلری ظهورنده عزل و نصباری شیخ الحرماره مفوض ایسهده ایکسی متفقاً برینک سوء حالنه شهادت ایتدکجه عزلی جائز اولدینی خالد مرقوم کتخدالردن بریسی دیگر یله منافسه اوزره اولهرق شیخ الحرمه سعایت ایدوب آنک دخی فی الاصل شخص مرقومه انفعالی اولدیغندن در حال عزلیله برینه برینی نصب ایلدکده معزول کتخدا یدنده ودیعه اولان سنجانی تسلیمدن ابا و بین العرب معروف اولان عادت اوزره قلعهیه التجا و قلعه نفراتی قضیهیه لدی الاطلاع مغایر شرط اولدیغندن بوتوجیهک الغاسیله سابق کتخدانک ابقاسنی شیخ الحرمدن رجا ایدوب شیخ الحرم ایسه رجا لرینه عدم اجابت ایله اظهار رعونت ایتمکله میانهده واقع اولان مقدمات محاوره منتج مشاجره اولدینی صروده نائب الحرم اولان بشیر اغا شیخ الحرمک برینه کچمک خویلیاسیله ناره فتنه یی اشغال و بویله بر وقعهده ثبات و ممانت ایتمک لازمدر دیه رک شیخ الحرم ساده دلی اغفال ایتمکن ماده تشنج ایدرک کچن ایکیوز یدی سنه سی خلاننده اغایان حرم ایله یرولو نفراتی میانهلرنده بر قاج آی محاربه ممتد و شریف مکه طرفندن اصلاح ذات البینه سعی اولمش ایسهده طرفین مناقشهده اصرار ایتمکله اعاده آسایش قبوسی بتون بتون منسد اولوب نهایت جزار پاشا

مدینه منوره به ورودنده شیخ الحرمی عزل ایله یرینسه بر دیکرینی توکیل ویرلو
نفراتندن تأدیی لازم کلنلری تأدیب ایتدکدن صکره نائب الحرمی استصحاب ایله
جانب مکیه متوجه اولوب انجق بر قاچ ساعت مدینه منوره دن انفصالده
نائب الحرم مک هلاک و تلف اولدینی بعده استخبار اولمش و جزار پاشا مک مکرمه دن
عودتسنده شیخ الحرم معزولک عودتسنه رخصت و یروب اودخی جانب مصره
کیتمکه مدینه منوره ده اسباب اختلال مندفع اولمشدر .

خال جمال عربستان اولان حلب الشهباده دخی بر قاچ سنه دنبرو فته و اختلال
حدوثیله یکچیرلیک ادعاسنده اولنلر صنوف سائره به غلبه ایدرک وجوه مملکتی
کندو مراملرینه رام و او مناسبتله منافع مملکتی بینلرنده اقسام ایدوب بو جهته
نفوذ والی زائل و اجرایی احکام شرعیه مشکل اوله رق حکام ناتوان و فقرا تالان
و اسافل ایسه کامران اولمش ایدی سفر غائله سی بر طرف اولغله مملکتک اصلاح
احوالی زمانی کلدیکندن سلیمان فیضی پاشا بالاتخاب حلب ایالتی عهده سنه توجیه
و اصلاح و تنظیم امور ولایت کندوسنه امر و تنبیه اولمش اولمسیله حلبه وصولنده
نظام مملکته تشبث ایدرک بر صورت حسنیه ربط و بر کونه اختلال تکون ایتدیرلدیکی
تقدیرجه اهالی طرفدن آغر نذرلر اداسنی شرط ایلمش ایسه ده چند روز مرورنده
اشقیای حلب فسخ تعهد برله وجوه مملکتدن غوری زاده محمد افندی اوزرینه
بلا سبب هجوم و ضربات و شتوم ایله وجودینی مانند موم ایتدکرندن بشقه خار جدن
توارد ایدن ارزاقه کماکان مدید و خود بخود داد و سستد ایلدکلری فیضی پاشانک
معلومی و اجرایی سیاستده عجز ایسه کندوسنک مجزومی اولمسیله همان تبدیل هوا
صورتنده شهرک باغچه لرینه چیقوب اشقیانک تنکیلی و نذرک تحصیل ضمننده بامر
قطعی او جاقدن متحیز بر مباشر ایله قیوجی باشیلردن مشواری معلوم بر شجیع ذاتک
حلبه کونده رلمسی در دولته اشعار و انها ایتمکه قیوجی باشیلردن اوزون عبدالله
پاشا زاده صادق بک و او جاق طور ناجیلردن بری حلبه کوندر یلوب اورایه وصوللرنده
والینی شهره دعوت و اهالی ایله میانهلرینه القای حسن الفت ایلدکلری خبری اشبو
سکیز سنه سی او اسطنده در دولته وصول بولمشدر و مقدمه میلو تیمورک جمعیتی
پریشان ایدلمش ایسه ده هنوز کندوسی اله کچمدیکندن رقه حوالیسنک احوال
آیه سی دخی شبهه تحتنده ایدی قالدیکه بو ائنده نجد الکاسنده ظهور ایله اطرافه
نشر شراره شر و شور ایتمکه اولان و هابیلر بتون بتون ذهنلری تخدیش ایتمکه
ایدی . الحاصل عربستانک هر طرفنده بر صورتاه شورش و اختلال درکار اولدیغندن
جزارک امارت حاجده ابقامی ایجاب حال و مصلحتدن بولمشدر .

تیمور وقعه سنک تفصیلی بومنونال اوزره درکه تیمور میللو عشیرتک اسکان باشیسی
 اولدینی حالدہ برمدتنبرو خیلی قوت و قدرته مالک و بوجہتله طریق بنی و خلافہ
 سالک اولہرق ذمتدہ تراکم ایدن مال میرینک اداسنہ مخالفت ورقہ و دیار بکر ایالتلرندہ
 واقع قصبات و قرایی ضبط ایله حاصلاتی نفسنہ تخصیص و کیف مایشاء تصرف برلہ ارباب
 وظائف و تیماری مدار معاشرندن محروم ایلدیکندن بشقہ قوۃ مالیه و عسکر یہ سی
 حسبیہ ولات و امرای اطرافی زیر دست تغلبنہ آلدیغندن دیار بکر ورقہ و الیلرینک
 احکامی کرسی حکومتلردن خارجه تجاوز ایتمز اولوب بوسیلہ اول حوالینی آنک
 دست تطاول و تعدیسنندن تخلیص ایلمک مترتب دولت اولمش ایسہدہ دولت
 عایہ سفر ایله مشغول بولنوب جزئی قوت ایله دخی تیمورک اطفای شرارۃ شرومضرتی
 قابل اولدیغندن تسعیم ایله ازالہ سی چارہ سنہ باقق اوزره دیار بکر و یوہ دە سی
 شیخزادہ ابراہیم بکہ اکیبوز درت سنہ سی اوائلندہ خفیا امر عالی اصدار اولنوب
 انجق بومقوله تدابیر ایله ازالہ وجودی ممکن اولدیغندن سنہ مرقومہ خلانلدہ
 اوزرینہ بغداد والیسی سلیمان پاشانک قوۃ کافیه ایله حرکتی ارادہ بیوردلقدہ تیمور
 قونار کوچر و اوزرینہ اردو سوق اولندقدہ برطرفه فرار و غیوبت وارد و چکلد کدہ
 ینہ عودت ایدر مقولہدن اولمیلہ الہ کیرمی مشکل اولدیغندن بشقہ بوندن اقدم
 نجد اقامیندہ سرزدۃ ظهور اولان و ہابیلر بوخلالہدہ لسا طرفہ تعدی ایتدکلرندن
 بعصرہ طرفہ سرایت فسادلری ملحوظ اولمغین کندوسنک بغداد دن انفکاک
 و تبعادی چندان مناسب اولمہ جغنی سلیمان پاشا مقام اعتذاردہ تحریر و اشعار
 ایشیددی تیمورک شرارۃ فسادی ایسہ معادن ہایون قضالرینہ دخی ساری اولہرق
 کون بکون شعلہ کیر ترقی اولدیغندن قبوجی باشیلردن ترنج زادہ سلیمان بک عہدہ سنہ
 رتبۃ وزارتلہ رقبہ ایاتی توجیہ اولنہرق بغداد والیسی سلیمان پاشا ایله بانخبارہ تیمورک
 الہ کتورلمسی خصوصی کندوسنہ سپارش اولمشیددی لکن شقی مرقوم اوزرینہ
 کلیتلو عسکر سوق اولندقجہ دفع غائلہ سی قابل اولمہ جغنی تعین ایتمکلہ اکیبوز بش
 سنہ سی خلانلدہ بغداد والیسی سلیمان پاشا بالنفس تیمورک اوزرینہ حرکت ایتک اوزره
 مأمور اولوب باایلت رقبہ اوزون ابراہیم پاشا و حلب والیسی بولتان کوسہ مصطفی پاشا
 و ملاطیہ متصرفی رشوان زادہ عمر پاشا اول حوالیدہ کائن ارباب حرب و ضرب
 مشار ایہ معیتتہ تعیین قانمغاہ سلیمان پاشا بالنفس عسا کر کلیہ ایله بغداد دن حرکت
 ایدرک رقبہ طرفلرینہ وصول بولدیغنی تیمورک معلومی اولیجق مقاومت ایدہ میہ جگنی
 جزم ایله مأمور اتخاذا ایلدیکی بولک نام محلہ دخول و استقرار و هوادارلری کافۃ فرار
 ایتمکین تیمورک نیجہ اموال و اشیاسی و میللو عشیرتک بونجہ اموال و حیواناتی
 تاراجکر دۃ عسا کر بغداد اولمشدر و میللو عشیرتک بوآنہ قدر بویلہ پامال خیول خسار

اولدینغی یوقدر دیو مرویدر بعده تیمورک اوزرینه وارلدقده الی التمش آدمیله حلب طرفه فرار ایتمکین کندوسنک برادری و خصم جانی اولان ابراهیم بک سلیمان پاشا طرفدن اسکان باشی نصب و تعیین اولنوب اوزون ابراهیم پاشا معیتیه تیمورک تعقیبنه ارسال اولندقدن صکره سلیمان پاشا رقه دن حرکت برله ماردین حوالیسنه لدی الورود تیمورک همپا و معیتی اولنسلری تادیب و ترهیب ایله ابراهیم بک طرفنه جلب و اماله و تیمورک عوننه سندن اولان نیجه اشقیایی و تیمورک قیرنداشلرندن سعدون بک ایله عمزاده سی محمود بکی اعدام و ازاله ایدوب اگر چه تیمورک اخذ و اعدامی سلطان سلیمک قطعاً مطلوبی اوله رق تیموری طوتمدجه سلیمان پاشانک بغداده عودت ایتماسی ایچون کندوسنه متعدد امر لر کوندرلمش ایسه ده چونکه و هابیلرک بغداد مضافاتندن بعض محللره تعرض ایلدکلری و برو طرفله تخطی ایله امام علی قصبه سنده مدخر اولان تحف و نوادری اخذ و استلاب قیدنده بولندقلری استماع اولنغین ارتق سلیمان پاشا برو طرفلرده طوره میوب هان برمنوال سابق ماردین طرفنده بعض متهمینک اجرای جزالزندن صکره ایکی یوز الی سنه سی خلالنده بغداده عودت ایله کرک قصبه امام علی و کرک سائر ایجاب ایدن محللره استحکام و یرمکه قیام ایتمشیدی انجق تیمورک طوتیه مامسی سلطان سلیم خان حضر تلیرنه داغ درون اوله رق بوندن طولانی بو مصلحته مأمور اولنلر حتلرنده طبع هایونلری مغبر اولوب بو اغبراردن ک زیاده اوزون ابراهیم پاشا حصه دار اولمشیدی .

چونکه ابراهیم پاشا فی الاصل قارص سکانندن اولوب اوائل حالنده لوند طائفه سنه التحاق و بعده طائفه مرقومه رفع اولندقدنه دلیللر زمره سنه التصاق و کیدرک عظم زاده لره انتساب و دلیل پاشایق عنوانی اکتساب ایتمش و مؤخر آستانه سعاده و رودنده احوال حجازیه و واقفدر دیو یوز طقسان طقوز تاریخنده غازی حسن پاشا قائم مقام ایکن عهده سنه رتبه میرمیرانی ایله جرده باشبوغانغی توجیه اولنوب انجق صدر اعظم شاهین علی پاشا در سعاده و رودنده جرده باشبوغانغک بویه مجهول الاصل بر شخصه و یرلمسی مناسب دکلدردیو عزل ایله قره حصار سنجانغیله سینوب محافظه سنه تعیین ایدوب بعده بر اراق قارص محافظی و ایکی یوز بر تاریخنده جرده باشبوغانغی و ایکی یوز ایکیده امیرالحاج اولمش ایدی اول و آخر بولندینغی مجلسلرده تیمورک شقاوت و طغیان بچی آچلدقجه تیمور دیدکلری قطاع طریق مقوله سی بر آدمدر آنک حقندن کلک بر ایشمیدر بر آلائی کیمسه لر تیمورک ازاله غنی بر جسم ایش ظنیه اعظام ایدرلر دیو مفاخره و مباحات سیاقنده تیموری تخفیف ایده کیشیکن بر منوال سابق تیمورک اوزرینه مأمور قلندقدنه کندوسی هر کسیدن زیاده اعظام ماده ایدرک

برقوی دشمندر تداركات قويه به محتاجدرديو برچوق خام تكليف ايراد و بك چوق شيلر مطالبه ايدوب حالبوكه تيورك اوزرينه اصل مأمور اولان بغداد واليسى سليمان پاشا اولهرق ابراهيم پاشانك مأموريتي بغداد واليسنك حر كتنده تيمور رقه طرفلرينه دوشر ايسه اودخى بو طرفدن تضيقه اله كيرمسنه اقدام و غيرت و بغداد واليسنه معيت ايتمكدن عبارت اولديغي حالده بوندن طولايي دولته عرض امتنان ايله بر طاقم مطالب و تكاليف درميان ايلمس اولمسي موجب اغبرار دولت اولديغندن بشقه بغداد واليسى رقه طرفه لى الورود آنك ايله دخى حسن امتراج ايدمه يرك دائره سى خلقيه غوغا و نزاعدن خالى اولميوب تيورك تعقيبده دخى اخذ و كرفته موفق اوله مديقندن رقدن عزل ايله آدنه واليسى اولديغنده مظالم و تعديانندن اهالى اشتكا ايتمكين اورادن دخى عزل ايله عهده سته نيكده و يقصره سنجاقلرى توجيه ايله اضمار كين اولندقدن صكره نيكده اهاليسى دخى تعديانندن اشتكا ضممنده در دولته رفع رقه استرحام ايتمليه ترتيب جزاسى نيتي تاكد ايدوب انحق باشنده مجتمع اولان بر خيلى حشراتى تفريق اراده سييه ابتدائى امرده روم ايلي جانبسه مرور ايلمسي طرفه اشعار و نهائى اعدامى فرمانى دخى يكي ايل و يوهده سته تسيار اولندقده معينده كى كشتيار قضيه به كسب و قوف ايله طرفه العينده اطرافه پريشان و كندوسى دخى مستشعر بولنهرق نه طرفه حر كت ايدم جكنده متردد و حيران اولديغي حالده ايكي يوز يدى سنه سى خلاننده ايچ دائره سى خلقيه سرسرى كشت و كذار ايدرك سيواس قربنده واقع كوبرى باشى نام محله و رودنده مأمورين دولت على السحر كندوسنى باصوب كاريني اتمام ايتمشلردر . نائل توغ و علم اوله ليدنبرو دولتك جزئى و كللى بر ايشنه يراميوب وارديني مملكته لدرده ظلم ايله عباد الهى گرفتار نيجه اضطراب و قصبات و قرابى خراب ايتمش و نهايه الامر مجازاتى كوروب كيتمش اولديغي واصف تاريخنده محرردر .

تيورك حالته كلنجه برمنوال سابق فرار ايتدكدن صكره بردها اولكي جمعيتنى تدارك ايله بر رده استقرار ايدم يوب نيجه زمانلر طرف طرف كشت و كذار ايدرك نهايت ايكي يوز طقوز تاريخنده بغداده دخول ايله سليمان پاشايه دخيل دوشوب اودخى طرف دولت عليه دن عفونى نياز ايتمكله مظهر عفو و امان پادشاهى اولمشدر . و هابيلر صكره دن دولته بر بيوك غائنه اولدقلىرندن بو مقامده بروجه آتى اجمال حاللرينه اشارت اولنور .

* و هابيلر ك ظهور مقدمات فساداتى *

واصف تاريخنده بيان اولنديغنه كوره نهايت شرقى مجازده واقع نجد طرفلرينه

مستولی اولوب درعیه نام محله بر قاج سنه دنیرو کسب اشتهار ایدن عبدالوهاب نام
 شخص مجهول الاحوال زعمنده بدعت ظن ایلدیکی اعمالی ابطال داعیه لرله بادیه
 عربانندن باشنه جم غفیر جمع ایله مدینه منوره و مکه مکرمه و طائف طرفلرینه تخطی
 و تعدی ایتمک نیتنده اولدیغی اطوارندن استدلال ایله حوالی مرقومه نك لزوم
 محافظه سی شریف مکه و جزار پاشا طرفلرندن عرض وانها اولنغین اقتضا ایدن
 تدابیر و تشببات نه ایسه برآن اقدام تحریر اولتمق اوزره مقام صدارتدن جزار پاشایه
 مخصوص قائمه یازلمش ایسه ده جوابنه انتظاراً امرار وقت اولنمق سزین کیفیت برکرده
 مجلس مشورته تذکر اولتمق مناسب کورلمکله ارباب شوری کتخدا بک او طه سنده
 تجمع ایدرک مصاحبت درمیان اولنوب انجق صدره شفا ویره جک برتدیر دلپذیره
 مظفر اوله مدقفلرندن بشقه ماده نك وجه شرعیسی دخی معلوم اولمق لازم کلدیکندن
 شیخ الاسلام قوناغنده استشاره اولنمسی تصویب ایتملرله اشبو سکر سنه سی
 ربیع الاولی اوائلنده صدر اعظم و صدور عظام و سائر ارباب مشورت شیخ الاسلام
 قوناغنده اجتماع ایله عقد مجلاس مشورت اولنه رق جانب حجازدن کلان تحریراتک
 خلاصه سی قرائت اولندوقده صدور عظامک بعضیسی مولویت ایله حرمین شریفینده
 بولنمش اولدقفلرندن عرض وجوه معلومات و مرقومک احواله و قوف ادعاسیله
 حقه شیبه کوریلان مقدمات موهه سی اثبات صدندنده بولنوب بعضیلری دخی
 مرقوم حنبلی المذهب اوله رق فروعات مسائل فقهیه یی مذهبه تطبیق و ظواهر
 نصوصه اعتباراً اعتقادلرینی تأویل ایله فرضاً عوام ناس جلب دنیا ایچون دلائل
 شریفه قرائتنه مداومت و کلام قدیم تالوتنی ترک ایله ارتکاب معصیت ایلدکلرینی
 و ضریح حضرت نبویه اولان قبه شریفیه یی و سائر شعائر اسلامیه دن معدود اولان
 مناره لری بدعت سیئه منزله سنه تنزیل ایله بولنلری و کعبه مکرمه نك بعض محملرینی
 هدم ایتمک و قاشیق ایله یمک صدر اولده وقوع بولمیوب اطعمه یی ال ایله یمک لازم
 کلدیکنی و فروع اشرف مدینه اصول زیدیه دن اولوب اطوار و رفتارلری خلاف
 شرع مطهر و اعتقاد و عمللری مغایر نص و اثر اولدیغنی تحقیق ایدرک امر بالمعروف
 و نهی عن المنکر دعواسنده اولوب بونیت و دعوی ایله ظاهرده اراثة طریق توفیق
 ایدن شخصه موجبات شرعیه و عرفیه دن نه لازم کله چکی محل تأمل و تدقیق قدر دیدکده
 صدورک بعضیسی امر بالمعروف و نهی عن المنکر خلیفه مسلمین حضرت تارینک و طیفه لری
 اولوب بادیه نشینان عربانندن بومقوله داعیه لرله ظهور ایدنلرک مرادلری بنی و فساد
 و اتعاب عباد اولدیغندن غیری اصحاب فیل کبی مکه مکرمه یی تخریب فکرنده اولان
 شخصی خارجی و باغی نیتیه تأدیب مشر و عدو دیو قطعی و جهاله مرقومک لزوم

تأدینی بیان و تقریر و حضارک بعضیسی دخی مرقومک بو وادی یه سلوکنی شریف
 مکه ایله و قوعبولان مجادله یه حمل ایدرک غرض اخری اولماق احتمالی اشراب
 و بغداد و حلب طرفلرندن تصحیح ماده اولتمسی رأی و تدبیر ایدوب و احتمالات عقلیه یه
 غایت اولدیغندن مجلس اوزایوب انجماکار جده والیسی اولمش اولان صدر سابق
 قوجه یوسف پاشا مدینه منوره محافظی اولوب مصره وصولنده ارسالیه مالندن
 کافه اموری تنظیم و عساکر و لوازمی ترتیب و تمیم ایله برآن اقدام جده یه عزیمت
 ایله اول حوالینک محافظه سنه بذل مقدرت ایلسون و بغداد طرفدن مرقومک دفع
 غائهمسی من کل الوجوه ممکن اوله جغندن بغداد والیسی دخی ابتدا مزبوروی الزامه
 قادر بعض کمنه لراسالیله جانب حجازه جموع اشرار اعراب ایله اطاله دست تعدی
 قصدنده اولدیغک شیوع بولدی بوخیال خام شریف مکه ایله برنوع منافسه یه می
 میندر یوخسه بلا اصل عوام ناس میانده تکون ایتمش حوادث قیلندتمیدر اکر
 شریف ایله سوء معاشرتدن ناشی میانده شقاق تحدث ایتمش ایسه اصلاح ذات
 البین و دفع برودت طرفین حیزامکانده در واکر غرض شق عصای مسالمین
 و مخالفت امیر المؤمنین ایسه الوف صنوف عساکره طرف پادشاهیدن تأدیبه مأمورز
 مقدمه طرفزه حقیقت حالی افاده ایده سین دیواستخبار ماده ایدوب خبرورودینه
 منتظر اولقمزین تدارکاته مباشرت ایله حاضر و آماده اولسون غائهمک قوتی تبیین
 ایلدیکی صورتده بالنفس کندوسی عساکر بغداد ایله حرکت و ماده ده سهولت
 حس ایلدیکی تقدیرده کتخداسنی تعیین ایتسون دیومجلسه ختام ویرمش و اولوجهله
 بغداد والیسنه خطاباً بالاسی خط هایون ایله موشح امر عالی کوندرمش ایدی .
 بغداد والیسنک بوکا جواباً وارد اولان تحریراتنده و هایلرک دماغلرینه فساد صعود
 ایدوب کندوسنک تیمور اوزرینه حرکتنده بغداد مضافتندن بعض محالره تجاوز
 برله ترتیب عسکره مبادرت ایلدکله یه مبنی احتیاطه رعایه کرکک نجف طرفلرینه
 و کرکک سائر طرفلره استحکام ویرمش اولدیغی و بغداددن بصره یکریمی بشقوناق
 مسافه اولوب بصره دن درعیه یه قدر دخی اوتدن وصولدن خالی چوللر اولمسیله
 او مقوله خصم قوینک اوزرینه لاحاله عسکر کشیف ایله توجه و حرکت لازم
 کلهرک کثرت دواب و مواشی یه ضرورت مس ایدجکی درکار و صواولماق حسسیله
 بلا مصلحه او قدر نفوس مضمحل اوله جنی آشکار اولوب انحق لحسایه قریب مواضعده
 متمکن اولان بنی خالد ایله میانه لرنده برمدتدبرو جنک و جدال و قوعبوله رق
 عشیرت مذکورهی بر حال ایتدکدن اکره نوبت کندولرینه کله جکینی اهالی حسا
 استدلال ایلدکلرندن بنی خالدی جلب و اماله و چونکه و هایلرک آلات قاعه کیری یه مالک

اولدقلرندن اليوم خندق و شرانپو ايله ترصين اولسان لُسايله دخول ايلدكاري
 حالده على كل حال كسب امنيت ايتمش اوله جقلريني افاده ايله تلاش واضطر ابلريني
 ازاله ايدوب آنلر دخى سلامت نفس ومال ضمننده لُسا اهايلسيه بالاتحاد لُسايله
 دخول ايله مستعد بيكار اولدقلريني وهايللر استخبار ايدرك جمعيت عظيمه ايله
 اوزرلرينه حركت ايلمشلر ايسه ده كندولرنده اسباب قلعه كيري اولدقلرندن
 خائبا وخاسرا عودت ايدوب انجق اراق اراق هجوم واقتمادن خالى اولدقلري
 وبوحال ايله اشتغال اوزره اولان طائفه جهت اخرايه عطف نگاه ايله سوق سپاه
 ايتماك و وارد خاطر ايسه ده بغي و طغيانلري ظاهر وجهت عسكريه جه قوت و مكنتلري
 متواتر اولسيه كيد و مضر تلرندن بروجله امنيت جائز اولدقيني و شمدليك نصيح
 و پندى متضمن تحريات كوندردلديكي محرر بولمئشدر.

* تذييل *

وهابى مذهبىك مؤسسى محمد بن عبدالوهاب اوله رق مبدأ ظهورى سلطان عبدالحميد
 دورنده اولوب جانب حرميندن اولوقت خيلى فرياد اولمش و عبدالحميد خان
 حضر تلري بوشراة فسادك ايلروده علونئسى ملاحظه سيه خيليجه تلاش ايلمش
 ايسه ده وكلاى دولت بوماده نك نزاكت و اهميتنى تقدير ايدمىوب شام واليسندن
 كمش اولان تحريات دخى مرقومك بغي و خروجه مدار اولان عصيت احبابندن
 اوليوب مجرد مباحثه عمليه داعيه سنده اوله رق بعض طلبيه درس ويرر مقوله دن
 اولدقيني بيان ايله موجب اطمينان اولغين بوماده جه چندان اهميت و يرمامشيدى
 مرقوم ابن عبدالوهاب ايسه اكر چه عصيت احبابندن دكل ايدى لىكن درعيه
 شيخي كبي بعض احباب عصيتى كندو مذهب باطنه تابع و برچوق عربانى باشنه
 مجتمع قيلمشيدى . شويله كه : مرقومك احداث ايلديكي مذهبده مسلوک و معلوم
 اولان برچوق عقايد فاسده نك اساسى اوچ مسئله اولوب اولكيسى بودر كه وهايللر
 عمل ايمانن جزدر ديوب مثلا بروقت نمازى و برسنه زكاتى تنكاسلا ترك ايدن
 كمنه كافر اوله رق دمى هدر ومالى حلالدر ديو اعتقاد ايدرلر ايكنجيسى بودر كه
 ارواح انبيا و اوليادن استعانه ايتك كبي استمداد واستشفاع وجهله جناب حقدن
 غيرى به دعا ايلمك شر كدر ديرلر اوچنچى مسئله ترهلر بنا و اوزرلرينه قبلر انشا
 ايله ايجلرنده قنديل ياقق و آنره صدقه و نذرلر عرض ايتك مغاير ديانت اسلاميه
 ايدوكى دعواسندن عبارتدر بو عقايد فاسده ني اثبات ايچون ابن عبدالوهابك و بعض
 اتباعك صكره دن بعض تاليفاتى ميدانه چيقمش وانلري جرح ورد ايچون دخى
 مستقلا رساله لر ياپيامش اولسيه ان شاء الله محلنده بونلره دائر بعض تفصيلات يازيلور

الحاصل وها بیلر کرک زیدیه مذهبنده بولسان شرفایه و کرک اهل سنت و جماعتدن اولان عامه اهل اسلامه کافر و مشرک نظریه باقریه بونجه مسلمینک دملری هدر و ماللری کندولرینه حلال اولمق اعتقادنده بولوب نیغما کران عربانک مشربینه دخی بو عقاید باطله تمام ملایم و موافق کلیکله مذهب مذکور جزیره العربده کمال سرعت ایله منتشر اولمقده بولنش ودها دور حمید خانیده شریف مکه طرفندن فریاد نامه لر ارسالیله عرض حال اولنش ایکن اولوقدنبرو کرکی کبی تحقیق ماده اولمیو بده حالاً مجلس مشورتده وها بیلر مقدهما در سعادته تعصب یوزنده ظهور ایدن قاضی زاده لیلره قیاس اولنهرق خارجیء مرقومک بو حال و حرکتی شرفای مکه زیدیه مذهبنده اولدقلرندن ناشی آنره عداوتی ایچونمیدر یوخسه بشقه معنایه می مبیدر کبی احتمالات عقایه ایراد اولنسی جای استغرابدر . بزینه صدده ده کلم .

* بعض مواد نظامیه *

بو اوانده تأکید و توثیق اولنان مواد خیریه دن بری اموال ایتمک محافظه سی ماده سیدر چونکه ملت اسلامیه ده بوماده بر امر مهم و معتنا اولدیغندن اوته دنبرو بو خصوصه اهتمام و اعتنا اولنه کلوب حتی و اصف تاریخنده محرر اولدیغی اوزره عمر الفاروق رضی الله عنه حضرت تلرینک ایام خلافتده بر شخص اکل مال یتیم ایتمکله یتیم حد بلوغ ورشده رسیده اولدقده دیوان حضرت عمری یه عرض شکوی ایتمکین در حال خصمی احضار ایله کیفیتی لدی الاستفسار انکارده اصرار ایله الفاظ قسمی ذهنته استحضار ایلدیکی محسوس و شاهد اولدیغندن یتیم مذکور ماده دن مایوس اولمشیکن حضرت عمر بالمکاشفه حقیقت حالی بیلوب هان (الذین یا کلون اموال الیتامی ظلماً انما یا کلون فی بطونهم نارا) آیت کریمه سی اقتضا سنجه بر شمع نفروخته کتوردوب اول شخصک بطنه یا قلاشدر لدقده فی الحال مشعل اولیجق انکاره مجالی قالمیوب ادای حقه مسارعت ایلدیکی مرویدر دولت علیه ده دخی بوماده یه اعتنا اولنوب حتی قانونی سلطان سلیمان خان حضرت تلرینک زماننده صدر اعظم لطفی پاشا اموال ایتمک خزینه سلطانی یه ادخالی جائز کورم دیکندن اراده سنیه تحصیل ایله باب هایونده محفوظه الجوانب بر مستقل خزینه بنا ایتدیروب وفات ایدنلرک وارث حاضر لری اولدیغی حالد کافه مخلفاتی اول خزینه یه وضع و تمهیر اولنهرق یدی سنیه دک وارث صحیحی ظهور ایله اثبات وراثت ایلر ایسه یدینه تسلیم ومدت مذکوره ظرفنده ظهور ایتمدیکی یاخود ایدوبده اثبات وراثت ایده مدیکی تقدیرجه امور جهاده صرف اولنسی قوانین دولته الحاق ایتدیرمکله بر زمان بوقاعده یه رعایت اولنمشیدی . مؤخرأ بعض عوارض حسیده مستوفیان

اموال بو نظامی اخلال وسی میری دیو اموال ایتمی خزینیه اد خال ایتملریله
 پدر ومداری حیاتنده پرورده ناز و امتیاز اولان نیجه اطفالک اموال موروثه لرینک
 اکثری غارتکران مستوفیان اموال انه کچمکله خزینیه دولته عائد اولان جزئی
 مقدارینک دخی بحکمته الله تعالی خیری اولمیوب خزائنک خرابیتنه باعث وبرادنی
 آجیق قپانور دینلورکن بیوک رخنه لر حادث اولدینی بالتجربه معلوم اولدی دیو
 بعض توارینخده مصر حدر بعض بی انصافلری دخی بعض متمولانک وفاتنده
 تحصیل وصایت وانواع خدعه و دیسیسه ایله مخالفاتی اکل ایدرک ایتمه غدر
 و خیانت ایده کلوب بناء علیه سلطان مصطفی خان حضر تلی اموال ایتمی صیانت
 قصدیه نفود موجوده لرین خزینیه هایونه آلوب مقابلنده سهل الحصول مقاطعاتدن
 رواج وقته نظر ایله مقاطعه احسان و سنه بسنه اخذ فائض ایله او مقوله لری وارسته
 فاقه وخسران ایتمشیدی اوغلی سلطان سلیم خان حضر تلی دخی تحته جلوس
 بیوردقلمنده بر منوال سابق اصول و احوال دولتی اصلاح و تنظیمه تشبث
 بیوردینی صروده مقدمجه اموال ایتمک بر منوال سابق ضبطی منع ایدرک فیما بعد
 احجاب ترکه نیک میری وناس ایله معاملاتق اولدینی تقدیرجه حقانیت اوزره حسابی
 رؤیت اولنوب دین میری استیفا وسائر نک حقوقی بعد الثبوت اعطا برله باقی هر نه
 ایسه بین الورثه علی مافرض الله تقسیم و ایچلرینده ایتم و ارایسه سن رشده بالغ اولنجه یه دک
 حفظ و اداره ماللری ایچون متحیزان رجالدن متدین بر ذاتک وصی نصب و تعیین
 اولنسنی اراده ایلمشیدی بو ائنده اراده سابقه بی تجدید و بغیر حق اموال ایتمه
 تعرض اولنماق ایچون تنیه اکید بیورمشدر .

سلطان سلیمک بو ائنده موفق اولدینی آثار خیریه دن بری دخی باروتخانه لر
 نظامیدر . شویله : بالاده اشعار اولندیغی وجهه فی الاصل محاربه سیف و سنان
 و تیر و کمان ایله اوله کلور ایکن علی راویه یدیوز سنه هجریه سنده المانیاده بادغران
 دو قه لغنده کائن فریبورغ شهرنده برکشیش و علی راویه دهامقدم برانکلیر کشیش
 بارودی ایجاد ایتمشدر و بعضیلرک روایتنه کوره باروت فی الاصل چینده ایجاد
 اولنمش اولوب بعده اعمالنی عربلر چینلورلدن اخذ و تحصیل ایله فرنگلره
 او کرتمشدر هر نه حال ایسه باروتک اعمال واستعمالی شایع اولدقندنصکره
 محاربه نک موقوف علیهی طوب و تفنک امثالی آلات ناریه اولوب بونلرک لایقیله
 ایسه یارامسی ایسه بارودک اعلی اولسنه منوط اولدیغندن دولت علیه ده وقتیه
 بوکازیاذه سیله اعتنا اولنه رق استانبولده و کلیبولده و سلانیکده موجود اوچ عدد
 باروتخانه لر یولیه اداره اولنمقده ایکن مواد سائر ده اولان نظاه سزلق بونلرک

حقیقه دخی جاری اوله رق چونکه مرقوم باروتخانه لر مناوبه مناصبتدن اولدیغندن هر سنه بونلرک نظارتلری بی وایه کان رجالدن برذاته احاله اولنوب آنلر دخی ویردکاری مبالغی چیقاردقدنصکره مدار انتعاش اوله جق قدر آچه قزانه بیلمکدن بشقه برشی دوشونمدکارندن سعید افندی تاریخنده بیان اولدییغی وجهله بارونک جیادت وردائنه باقه میوب مجرد باروتخانه لریک ترتیب سنویسی نقدر ایسه اولقدر مغشوش بارونک تسلیمی ایله تکمیل خدمت و بعضیلری بونی دخی بجره میوب کندولرینی گرفتار مؤاخذه و نکبت ایتمک طریق قرق الی سنه دنبرو دولت علیه ده بروادی، مسلوک و اعلاسی شویله طورسون شنک طوپنه الویرر باروت اعمال دولت علیه ده متروک اولدیغندن سکسان ایکی و یوز ایکی سفرلرنده بوندن طولانی چکیلان زحمت وبالضروه دول سائره دن اضعاف مضاعف بهالر ایله باروت اشتراسنده کوریلان خسار و مضرت معلوم و مذکور سفرلرنده وقوعه کلان وقایع متألنهک بر سبب قویسی دخی بوماده ایدوکی امر مجزوم اولمقدن ناشی سلطان سلیم ثالث حضر تلی دیار اسلامیه ده دخی فلمنک وانکلتره باروتی پرداختنده اعلی باروت اعمال اولتمسنی اراده بیورمش اولدقلرندن ایکیوز الی سنه سی خالانده خصوص مذکور مجلس مشورنده موضوع موقع بحث و مذاکره اولوب سالف الذکر اوچ قلم باروتخانه لر نظارتلری برلشدیریله رک متحیزان رجال دولت علیه دن برینه احاله اولتمق و آنک معرفتیه بومصاححت مهمه به بر حسن صورت ویرلمک اوزره قرار ویرلمش و مذکور باروتخانه لر نظارتی توقیعی بولنان علی رائق افندی به توجیه بیورلمش ایدی انجق طبق خاطر خواه عالی اوزره ایشی ایلرولده مدیکندن اشبو سکنر سنه سی رمضان شریفنده نظارت مذکوره دفتردار سابق محمد شریف افندی به تفویض اولتمش و اودخی بوخصوصده بذل ماحصل قدرت و طوغریسی کوزل همت ایدرک ایکی سنه ظرفنده فلمنک وانکلتره باروتلری کبی اعلی باروت اعمالنه موفق اولمشدر . شویله که : اولاً اعتباردن سقوط ایله کلبه ویرانه دوشمش و بیایغی برچفتلک خرابه سی شکله کیرمش اولان استانبول باروتخانه سی تعمیر و ترمیم و دروننده برجامع شریف و عالی قصرلر و سائر ابنیه لازمه انشاسیله تزیین و توسیع اولدقدنصکره آلات و ادواتی اکمال و ماهر استادلر جلب و تدارک اولنه رق قدیمی موجود یکریمی عدد چرخلر ایله سنوی بک بشیوز قنطار مغشوش باروت حاصل ایدیه بیلور ایکن ینه هر چرخنی ایکشر قاطر اداره ایتمک اوزره یابیلان مصنع ونو ایجاد بش عدد چرخدن مقدار مذکورک ایکی اوچ قاتی اوله رق اعلی باروت استحصاله و فلمنک وانکلتر باروتلرنده مشهود اولان جلای دهنت نما کبی جلا

ویرمکی دولت علیه بارو تخانه لرنده بیلمز لر ایکن انک ایچون دخی تبارک اولسان استاد معرفتیه مخصوص بر چرخ یاییلوب فلمنک وانکلیر بارو تلی قوتنده وانلرک هیئت وجلاسنده اعلا باروت اعمالنه باشلامشدر .

ینه بو ائنده قره دکز بوغازنده واقع قلعه لرنک تعمیر و ترمیمی و ایجاب ایدن موقعلره مجدداً طابیه لر انشاسیله اسباب محافظه نک تسمی خصوصاً سلطان سلیم خان حضر تلی اراده ایتمکله بونلرک مصارفنه نظارت ایتمک اوزره توقیعی فیض الله افسدی مأمور اولمشدر .

سواحل مصر یه دن آستانیه ذخیره و اشیای سائره نقلی مستأمن طائفه سنه منحصر و فواید تجارتک اجانبه اختصاصی ظاهر اولمقدن ناشی بر منوال سابق یدی سنه خالانده جمع فائدتین ضمننده تکثیر سفائن ایچون اغنیای رجال دولتک بعض قبودانان ایله اشتراکی اصولدن اتخاذ اولنوب بوضورتله خیالیجه تجارت سفینه لری پیدا اولمسیله دولت علیه تجارینه بر نوع امتیاز اولمق و بو طریقله تجارت لری رواج بولمق ایچون ایشبو سکر سنه سی خالانده دخی دولت علیه لیمانلرندن ابتدا اهل اسلام و بعده اهل ذمت اولان رعایا سفینه لری و آندن سکره مستأمن طائفه سی علی الترتیب حموله آلمق اوزره نظام و یریلوب بونظام و ترتیبه رعایت اولمق اوزره مصر و الیسنه دخی بو اوانده امر عالی اصدار و ارسال اولمشدر .

تبعه دولت علیه دن تجارت بحریه یه سلوک ایدنلرک بلاقید و لاشرط براغمل لری محاذیر ملکیه یی مستلزم اولمقدن ناشی او مقوله تجارک سندات و کفلایه ربط ایله تحت رابطه یه ادخال لری لازمه دن اوله رق کیفیت قبودان دریا کوچک حسین پاشایه حواله اولغنین ارباب و قوف و تجربه ایله بالندا کره فیما بعد تبعه دولت علیه دن اولان تجار ممنوع اولمان اشیای سواحل اسلامیه دن روسیه ممالکنه و اورالردن ذخیره و اشیای سائره اخذ ایله استانبوله و سائر بلاد اسلامیه یه نقل ایتمک و سفینه لری آلدق لری طائفه لرنک مقدار و شخصلری مبین مقیم اولدق لری آله لرنک قوجه باشیلری یدنده محفوظ اولان کبیر آله مهر یله مهور کفالت کاغدی اخذ ایتمک و آستانیه کلد کده تکرار کفیل لری آلوب یدلرنده اولان مهور کاغدلر دیوانخانه ده حفظ و کمرکه علم و خبری اعطا اولندقدن سکره لاجل التجاره آقد کزدن قره دکزه و قره دکزدن آق دکزه آمدوشد لری ایچون رخصت و بردفعه یدلرینه امر شریف و هر دفعه سنه دیوانخانه دن کمرکه علم و خبر و یرمک و لیمان نظری معرفتیه ایاب و ذهاب لرنده یوقلانوب طائفه ده نقصان مشاهده اولندقدن اعتماد کاهجک درجه لرنده تدقیق و تصحیح ماده اوله رق شبهه تحتنده قالان سفینه رئیسک وجوده مفقوده دک حبسیله

ظهور ایتدیکي حالده سرمایہ وسفینہ میری به ضبط و کفیلر نذرہ ربط اولمق شروطی تنظیم وبومآلدہ قبودان پاشا طرفدن باعالی به برقطعه تقریر تقدیم اولمغین بعض اضافات لازمه ایله برقطعه نظامنامه قلمه انہرق دستورالعمل طو تلمسیچون ارادہ سنیه اصدار بیورلمشدر .

رعایاہ تکلیف مالایطاق قیلندن اولمہرق بولنه بیلان واردات جدیدہ ایراد جدید خزینہ سنہ ربط اولمقده اولمسیلہ بوکرہ دخی رسم بیانی مقاطعہ سی احداث اولنہرق ممالک محروسہده موجود هر رأس غنمدن سنہده بررپارہ رسم آلوب اشبو سکز سنہ سی مارتندن اعتباراً ایراد جدید دفتر داری طرفدن عماله تفویض والزام اولمشدر .

بوواندہ اجرا اولنان مواد نافعہدن بری دخی درسعادتہ مقیم اولان دول اجنبیہ سفرا سنک رفع تعیناتیدرکہ بوندن خزینہ به عائد اولان منافع کلیه طرف دولت علیہدن برمنوال سابق دول سائرہ نزدیکہ کوندربله جک اقامت ایلچیلریمک مصارفہ مدار اولمشدر . شویاہ کہ: نزد دولت علیہده اقامت ایتمکہ کلان ایلچیلرہ رأس حدوددن تادرسعادتہ کلنجہ وعودتندہ حدودہ کیدنجہ تعینات ویرلمک معتاد اولوب انجق دول سائرہ یکدیگرہ ایلچی کوندردکلرنده بو عادت جاری اولمدیفی جہتہ طرف دولت علیہدن بونک اجراسی برنوع التفات قیلندن ودولت علیہ به منحصر اکرامات زائدہدن ایکن کیدرک ایلچیلر بومادہ بی حقوق ثابتہ حکمنہ قویہرق نقصان ویرلسہ یاخود امہال ایدلسہ انواع تصدیعات ایله مأمورلری تعجیز ایدرلر ایدی حتی بوندن اقدام اختلال دریا حسیلہ فلمنک ایلچیلی بجرأ کیدہ میوب برأ عزیزتہ آمادہ اولدیفی افادہ ویول تعیناتی مطالبہ ایلدیکندہ امثالی اولمدیفی جوابتہ لدی الابدار برأ توارد ایدہ کلان سائر سفرانی مقیس طوتہرق طلبدہ اصرار ویبانی تعند اظهار ایدوب مخالفت صورتی ایسہ شیمہ کریمہ دولت علیہ به لایق کورلمدیکندن اگرچہ تعینات ویرلمشیدی لکن دول سائرہده جاری اولیمان بویله برمادہ نک عادت حکمنہ کیروبدہ حقوق ثابتہ تحتہ ادخال اولمغسی بین الدول دولت علیہ نک غفلتہ حمل اولنہ جفی جہتہ سلطان سلیمک کوجنہ کلہرک بعض تدابیر حکیمانہ ایله کایاً رفع والغاسنی تصمیم ایدوب بناءً علی ذلک بوندن اقدام طرف دولت علیہدن سفارتلہ انکلترہ به کوندربیلان یوسف اکاہ افندی به انکلترہ لو تعیین تکلیف ایتدیکي حالده قبول ایتمہ سی خصوصی حین عزیزمتندہ تلقین وتنیہ اولمشیدی بوکرہ آستانہده مقیم انکلیز ایلچیلی رئیس افندی به ترجمانی ارسال ایله بحر اوقیانوسدہ وآقدکزده اختلال اولمقدن ناشی کندوسنہ خلف اولمق اوزرہ ورود ایدہ جک انکلیز

ایلچیسى برأ كلك اوزره اولديغندن امثاله تطبيقا اكا دخى يولارده تعيينات
 و يرلسنى اخطار ايلدكده رئيس افسدى طرفدن قيوداته لى المراجعة انكليز
 ايلچيسى عن اصل آستانه بجرأ توارد ايدكلكارندن تعيينات بره قيدي بولمديغنى
 بيان ايتمسيله انكليز ترجمانى بوندن اقدام برأ عازم اولان فلانك ايلچيسنه تعيينات
 و يرلديكنى تصريح و بويله مسبوق بالثل اولان برمعامله دن ايلچيرينك حرمانى
 موجب رنج خاطر اوله جغنى تلميح ايدجك رئيس افسدى دخى فيما بعد اقامت
 ايلچيرينه موازنه قاعده سى اوزرينه تعيينات و يرليه جكنى و فلانك ايلچيسنك
 تعيينات طلبنده وقوع بولان وضع ناهموارى و اصرار صورتنده كستاخانه
 اطواري بو عادتك الغاسنى اقتضا ايلديكنى اشراب ايتدكده نكده فى الاصل
 آستانه ده مقيم اولان ايلچير تبريك صدارتده و يراملرده تنهيه كلكارنده
 باب على به قماش و چوقه هديه لرى تقديم ايدرلر ايكن متوفى عزت پاشانك صدارت
 اولاسنده ايلچير استيزان تبريك ايلدكارنده چونكه اول وقت صدارت و قائم مقاملىق
 تبدلاتى تعاقب ايلمش اولديغندن ايلچير هديه ككتور مسونلر عفو ايدرز ديوب
 بو معامله دوستانه دن ايلچير منفعل اوله رق هديه بز مجبورامى و يرر ايدك عفو
 ايدرز نه ديمكدر فيما بعد و يرميز ديوان ايتميريله اولوقدن بووقته كلنجه ذكر اولنان
 رسمى ترك ايتمش اولملىر تعيينات ماده سنه مثال اوله جغنى و دولتلك برنده عادت
 اولميان قاعده ديكرنده ترك اولمق قاعده موازنه به توافق ايدك جكنى مسلم اولديغندن
 بشقه الحاله هذد دولتمزك انكلتره ده اولان ايلچيسنه تعيين و يرلمديكى دليل اخذينه
 كافيدير قالديكه بوندن مقصود منفعت تحصيلى اولميوب مجرد دولت عليه به صورت
 مجبوريتدن وارسته ايتكدر رفع اولنان تعيينات مقابلى ايلچيره التفات ايتك شان
 دولت عليه اقتضاسنددر ديوان ترجمانى اعاده ايتمش و ترجمان مرقوم ايلچيسنه واروب
 افاده حل ايلدكده عهد و شرطجه دعوايه صلاحيتى اولمديغندن ناچار سكوت ايدوب
 فقط عموماً ايلچيره تعيينات و يرليه جك ايسه بحث عبثدر شوقدر و اركه بوماده
 تكاسلمه حمل ايله ملوم اوله جغم دركاردر مقاليله تكرر ترجمانى ارسال ايدوب
 كلكيكنده قطع تعيينات ماده سى دولترينه مخصوص اولميوب على العموم اولديغندن
 لوم و تكاسل داعيه سى بر طرفدر جوابيله ينه اعاده واسكات اولمىنى اوزرينه ارتق
 عواقب مصالحه ده و وقوعات سائره ايجابنده كله جك رسم ايلچيرى مستئنا اوله رق
 وجه عادى اوزره اقامت ايجون كله جك باجمه سفر ايه اياپ و ذهابلرنده تعيينات
 و يرلمامك اصول و نظام اخذ اولنوب باش محاسبه به دخى قيد اولمشدر .
 در سعادتده سفر معتلرنده براتلو ترجمانلر اولديغنى كجى طشره لرده قونسلوسلرى

یانلرنده دخی براتلو ترجمانلر بولنوب بولنر تکالیفدن معاف و هر مخصوصده سر بست اولدقلرندن تجارندن بعض ممولجه رعایا دخی امور تجارتده سر بست و نائل معافیت اولمق اوزره برر دسیسه ایله ترجمان شکنه کیروب حتی حلبده الی قونسلوس یاننده الی نفر براتلو ترجمان بولنمق اصول و نظامی اقتضاسندن ایکن بو ائنده بیک بشیوز نفر سمور قلیاقلی ترجمان پیدا اولمشیدی کیفیت محصل و کمرچی طرفندن حلب والیسی سلیمان فیضی پاشایه افاده اولدقدقه چونکه وزیر مشاور ایله باب عالیده پرورده اوله رق ریاست و کتبخدالقی مسندلرنده بولنوب احوال دوله واقف و قوانین دواتی عارف اولدیغندن در حال باب عالی به تخریر ایله دیوان هایون قلمندن ترجمانلرک دفترینی جلب ایله کسبی افندی بی یوقلمه جی تعیین ایدوب ترجمانلق ادعا سنده بولنلر دیوان حلب الشهبایه احضار اولدقدقه الی نفر صحیح براتلو ترجمانلردن ماعداسی هب برر نوع دسیسه ایله حلبده تاجر اولدقلری تعیین ایتمشدر . شویله که : بعضیلرینک ترجمانلق براتی دیو ابراز ایتدکلری یول حکمی اولوب اباعن جد رعایای دولت علیه دن اولدقلری حالده بشر اونر سنه لک جزیه کاغدلری اولمدیغی ظاهر اولمسیله جزیه کاغدلری اعطا و فیما بعد ایضی لوازم رعیت ایتلری تنبیه قلمش و قصورلرینک دخی براتلرنده موزه جزیره سنده و اغریبوز یا خودمدللو جزیره سنده و عکای و قدس کبی بعض محللارده مقیم قونسلوس معینده موجود بولنمق اوزره دیو محرر اولوب مرقوملر ایسه محل مأموریتلرینی کورمک بیله میسر اولمدیغی تبیین ایتمکله اوچ کونه قدر جانب مأموریتلرینه کیتلری ایچون بیورلدی تخریر و مباشر تعیینیه تأکید اونوب بو حالده مرقوملرک تجارتلرینه کلی ضرر ایراث ایده جکی ظاهر اولمسیله سلیمان فیضی پاشایه بش بیک و حاج قاضیسی و محصل و کمرچی ایله تعیین اولنان مباشره بش بیک و ندیک آلتونی و یرمک اوزره عفورلرینی رجا ایتمشلر ایسه ده قبول اولنوب ارسالاری خصوصنه همت ایله بیت المال مسالمنه خدمت اولنمش ایدوکی کسبی افندیکن تاریخچه سنده مندر جدر .

* بعض و فیات *

سلیمان فیضی پاشا مشهور کمرچی اسحق اغا دامادی احمد افندیکن عتقاسندن اولوب کرجی الاصل اولدیغی و کرجیلرده اکثریا شجاعت ایله معروف ذاتلر چیقوب علوم و معارف اصحابی چندان ظهور ایتدیکی حالده مشار ایله ایام شبایده علوم و معارف سعی و اقدام و مکتوبی قائمه دوام ایدرک فنون شتایه و فن انشایه صاحب و قوف و جودت خط ایله معروف اولغین باش خلیفه و مکتوبچی اولدقدنصکره مکرراً کتبخداور رئیس و دفتردار و ریاست ثانیه سنده وزارتله روم ایلی والیسی و نیجه سر عسکری اولدیغنده

پوزور و فچه‌نی تخلیصده اقدام و همتی حسبیله ادارهٔ امور عسکر یه جه دخی وایه دار
اشتهار اولمش ایدی مقادطرز قدیم و مشكل و جسم و منصف و معتدل و علوم و معارف
ایله مشغول بر ذات اولوب انجق رأینده استبداد و عناد ایله معروف ایدی دیو و اوصاف
تاریخنده محرردر هر نه ایسه عزمنده ثبات اخیابندن بر ذات اولسیله بر منوال سابق
باش بیك آلتونه باقیوب حلبده ترجمانلر مسئله‌سنه کوزل صورت ویرمش و بو کره‌سنی
یمشه قریب اولدینی خالد رمضانك اوچنده وفات ایتمش اولسیله بوماده رساله
اوصافه ذیل و خاتمه اولمشدر .

بو ائنده اسماعیل قلعه‌سنك ختام انشاسنه انتظار اولتور ایکن او احر ذی القعدة ده
بنا امینی نعمان بكك و فاتى خبری وارد اولغین قلعه‌نك اتمامی ضمننده سابقاً جبه جیلر
کاتبی مصطفی افندی یه بنا امانتی ایچون الباس خلعت اولتمق اوزره باب عالی یه احضار
اولندقدنه اعذار واهییه سرد ایدوب هر تقدرازاله و همنه سنی ایله رتبه‌سی ترفیع و کافهٔ
مطلوبانه مساعده اولنه جفی افاده اولتمش ایسه ده نصیحت قبول ایتدیکی سلطان سلیمه
عرض اولندقدنه بندکان دولتدن اولوبده بومقوله خدمتدن استنکاف ایتمی محل ادب
و عبودیت اولدیغنه مبنی ماغوسه یه نفی اولتمش و سابقاً سپاه کاتبی راشد افندی ازاله اثر
ادباره وسیله اولمق ملاحظه سیله بو مأموریتیه طالب اولغین باش محاسبه پایه سیله
عهده‌سنه اسماعیل قلعه‌سی بنا امانتی احاله قلمشدر .

متوفای مومی ایله نعمان بك التزامات و مقاطعاتدن و سائر کونه تجارتدن کلی تمتع
ایدرك ممولان عصردن ایدی . انجق دولت علیه‌نك هیچ بر خدمتدن یوز
چویرمیوب و اصلا امتان صورتی کوسترمیوب هر نه خدمت تکلیف اولنسه
رضاجویانه اجرا و ایفاسنه بذل مقدر ایدر بر ذات غیور ایدی . فقط مدینهٔ
منوره‌نك تعمیرنده حرم اغالریله بوز و شهرق نجد یولیه بغداده و آندن استانبوله
ککش اولدیغندن انابه یه نفی اولتمش وینه بعض مروتمندان عصرك شفاعتیه یقه‌سنی
دست ذلت و حقارتدن قورتارمش ایدی .

اتفاقات غریبه‌دندرکه اول عصرده ایام صیفده اسکدارده ساکن اوچ نعمان بك
وار ایدی بری چاوشباشلیقدن معزولاً ادرنده و دیکری سلحشورلنی ترك ایله
غلطه شیخی اولوب بعد العزل اسکدارده خانه‌سنی تکیه ایدرك بر قاچ سنه اجرای
آیین ایلدکدن صکره اوراده فوت اولوب بری دخی اسماعیلده وفات ایدن اشبو
سلانیکلی نعمان بکدر اول زمان بعض طرفا .

* بیت *

اسکدارده وارد اوچ نعمان اوی * دنیوی و اخروی و مولوی

دیوب اخروی ایله سالانکی نعمان بکی قصد ایتشدر که کویاریه تحصیل امور اخروی به ساعی اولدینی اظهار ایدردی بونلرک وفاتلرندن صکره ظرفادن بریسی دخی .

* بیت *

اسکدارده قالدی نعمان اوی * دنیوی نه اخروی نه مولوی

دیمش ایدی دیو فائق افدینک کندو خطیله اولان مجموعه سنده کورلمشدر .
اناطولی پایه لولرندن داغستانی ابراهیم افندی واستانبول پایه لولرندن مشهور مفتی زاده السید محمد افندی سنین متطاوله دنبرو نشر علوم شتی ایله مشغول اولوب الیوم ایکسی دخی پیر فانی و آره لقلری اداره لرینه غیر کافی اولمغله ذی الحجه او اخرنده ایکسینه دخی بشر بیک غروش عطیه سنیه احسان بیورلمش و متعاقباً قیصریه آرپهلنی منحل اولدقده داغستانی افدینک عمری آخر اوله رق ایلروده منصب ضبط ایدوبده حاصلات آله بیلمسی کندوسنک قوای بدنیه سندن دهاضیف اولدیغندن ممکن مرتبه ضرورت و مضایقه دن وارسته اولمسیچون قیصریه آرپهلنی عهده سنه توجیه اولنوب حالبوکه انسانک عمری قدر اوزون اولسه قلبنده ریشه امل دخی اوقدر اوزایوب صوگ نفسه قدر وادیء طول املده پویان و

* بیت *

علی المرء ان یسعی بما فیہ نفعه * ولیس علیه ان یساعده الدهر

مؤداسنجه حصولی آمانتک چاره سنی جویان اوله کلدیکنه وحب جاه وریاست نوع بشره عرض لازم قیلندن اولدیغنه منی داغستانی افندی به آرپهلنق امری واصل اولدینی کبی فرداسی تشکر ضمننده باب فتواپنهاییه واروب صدارت اناطولی بحسب الطریق حق صریحمز اوله رق تصرفنه بش ماه مدت قالمشیکن آرپهلنق تبدیلی عبت دکلیدر دیو صدارتک تحصیلنه بر مقدمه تمهید ایلمش و صدارت اناطولینک آخره صرف و تحویلی لازم کلوب مشارایه ایسه تخلف مطلب ایله منکمر اوله جنی بو طور وحرکتندن اکلاشامش اونسایله تطیب خاطر ایچون غره محرمده روم ایلی پایه سی احسانیه خرم و آرپهلنق اضافه سیله مکرم قلمشدر .

(وقایع سنه ۱۲۰۹)

موسم بهار خجسته آثار حلول ایتمکله قبودان پاشا بر معتاد دونمای هایون ایله آقدکرزه عزیمت ایتک اوزره خلال ذی القعدة ده ترسانه دن حرکت ایتشیدی مؤخرأ بعض ملاحظیه منی بشکطاش پیشکاهنده مکث و توفیق اقتضا ایدوب فقط آقدکرزه

محافظة سی ضمننده بر مقدار سفائن کوندر لمشیدی بوضورتله موسم حرکت دخی گذاران ایتمکله اشبو طقوز سنه سی محرمنک غره سنه بر قاچ قطعه سفینه دها دونمادن افراز ایله آق دکزه آسیر وبقیه سیله قپودان پاشانک عزیمتی تأخیر اولمش واشبو سفن باقیهده بولنان نفرات صنایع بحریه مشق و تعلمندن محروم و معطل قالماق ایچون فنون حریره یه دائر اختراع اولنان اوضاع جدیده و اشارات مفیده نک بلافاصله مشق و تعلیمنه اهتمام اولنمقده بولمشدر .

بوندن صکره دخی سلطان سلیم خان حضر تتری لیل ونهار فنون بریه و بحریه نک ترقیبی اسبابی استحصال و دولتک محتاج اولدینی قوانین و نظاماتک تقصاتی اکمال ایله مشغول اولمشدر .

* اجمال احوال *

بالاده بیان اولدینی اوزره کچن سنه سلطان سلیم خان حضر تتری نیجه قوانین و نظامات جدیده وضع ایتمکله صره ده بحریه و خمیره جی و طوبجی ولوند چفتک کینده در دست تعلیم اولان نظام جدید عسکری ایچون بشقه بشقه قانوننامه لر تنظیم و موقع اجرا یه وضع ایله عساکر جدیده نی تکثیر ایتمکده بولمش ایدی .

حالبوکه اسکی او جاقدر دخی باقی اولدیغندن دولت علیه نک مصارف عسکریه سی ایکی قات اوله رق مضایقه مالیه سی برکال و ایالات والویه مختل الاحوال ایدوکی جهته غوائل داخلیه سی متراید اولدینی حالد زیزده بیان اولنه جنی و جهله فرانسه اختلالی اوروپا بولتیقه سی تغییر و دولت علیه نک امورینه دخی پک زیاده تأثیر ایتمکله باب عالیده امور اجنبیه مشغولیتی فوق العاده آرتمشیدی .

سلطان سلیم خان حضر تتری ایسه اصلا فتور کتور میوب بونجه مشکلات داخلیه و خارجییه یه کوکس کره رک علی الدوام اوروپا اصول جدیده سنه توفیقاً قوه بریه و بحریه سنک اکماله و اوروپاده اختراع اولنان فنون و صنایعک جلب و استحصالنه اقدام و دولت علیه سی عصرک آچمش اولدینی مسلك جدید مدینه کونورمکه سی و اهتمام ایتمکده ایدی .

حالبوکه یکی اصولی اسکی عقوله اویدرمق مشکل اولدیغندن احوال و اصولک بویه تبدیل و تجدیدی زماننده ایش کوره جک مأمور بولمق دشوار اولمغه وقت و حاله کوره ایشه یارایه جق آدم یتشدرمک برنجی مسئله ایدی .

بناء علی ذلک سلطان سلیم حضر تتری فرانسه دن واسو جدن مهندس لر جلبه فرانسه ترسانه سننده مستعمل اولان شکل و اندازه اوزره کیلمر انشاسنه و بارون طوت معرفتیه تأسیس اولمش اولان مکتب بحریه نک یکدن تنظیمیه فنون بحریه ده

وانشاآئده ماہر ضابطلر يتشدرمك اوزره ايكیوز قدر شاكر دانك تعليم وتربيه سنه تشبث بيورمشیدی .

وبیوك طوپلرك استعمالنده دركار اولان صعوبتدن ناشی خفیف ومطبوع طوپلر اصاغه سنه دوام واصول جدیده اوزره قشلهلر انشاایله تفنك انداز وطوبجی وخبره جی بلوكرینك اوروپا اصولی اوزره تعلیمنه اقدام ایدوب طوپخانه نك دو كخانه سنی فرانسه ضابطانك نظارتنه وخبره جیلری انكلیز مصطفی نامنده برانكلیز مهندسك قومانده سنه ویرمشیدی .

يكیچریلر بر وجه بالا عساكر جدیده یی استرقاب ایتمكله فساده مائل ایدیلر . بویله تجددات واخترعات عصر لرنده ایسه عوام ناس بلکه خواص تعصب استیناس درلو تعریضات و بیلور بیلمز اعتراضات ایله زباندرازلق ایتمك امور طیبیعه دندر . احوال مشروحه یه نظراً سلطان سلیمك تشبث ایلدیکی اصلاحات جدیده نك نقدر خطرلی وصعوبتلی ایشلر اولدینی بیاندن مستغنی در .

بویله مشكل ومخاطره لی تشبثانده سلطان سلیمك كو كندیکی ذواتدن بریسی وبله برنجیسی كندی چراغ مخصوصی اولان قپودان دریا حسین پاشا ایدی كه حد ذاتنده مستعد وجسور برذات اولوب قپودان دریا اولدینی كبی آز وقت ظرفنده يك چوق لیاقت ودرایت اظهار واثبات ایلمشدر .

والده كتخداسی یوسف اغا واندرودن هایون رجانندن سرکاتبی احمد افندی وماینجی احمد بك كبی بعض ذوات متنفذه دخی وار ایدی انجق اوزر لرنده برقوی وآغر باصقی اولمدیغندن یكدیگریله اوغراشدققرینه مبنی ال برلیكله ایشه تشبث اولنه میوردی .

چونكه مرابع نشین مقام صدارت عظمای اولان شیخ الوزرا ملك محمد پاشا لین الجانب واطراف ایله كشا كشدن متجانب اولدقدن بشقه غایت اختیار وفق ورتق اموره عدیم الاقدار اولوب سلطان سلیم البال حضر تلی دخی حلیم وسلم برپادشاه فرشته خصال اولدیغندن هر طرفی تلطف وتالیف یولنده قوللامق ایستردی .

باب عالیجه ایش رئیس الكتاب ومرجع شیخ وشاب اولان راشد افندی یدنده اولوب انجق اول عصرك حكمنجه مكالمه مجلسلرنده صدور عظامدن بری بولتمق اصول مرعیه دن اولدینی جهته مجالس مكالمه یه مأمور بولنان سابقاروم ایلی قاضی سكری تانارجق عبدالله ملا افندی دخی اول دورده خلیجه نافذالكلام ایدی .

الحاصل دولت علیه بر طوردن طور آخره كچمك اوزره اولوب بویله نازك وقتلرده نشر اراجیفه مائل اولنلردن بعضیلری تأدیب ایله سائره عبرت كوسترملك لازمه

اموردن کورلديكى خالدہ متفندان عصر دن بعضيرى دخى بويہ بهانهلر ايله مغبر اولدقلى ذواتى حقلى حقسز اتهام ايله اخذ ناره قيام ايلردى .
بر وجه آتى تاتارجق عبدالله افندى ايله ديكر بعض ذواتك نفي اولنملرى دخى بوندن ناشى ايدى .

* بعض ذواتك نفي اولندقلىرى *

تاتارجق عبدالله افندى فضائل ذاتيه ومكتسبه اصحابندن اولوب انجق نماشاتمز وجرى اللسان برذات اولمق ملاسه سيله بعض خصما قرانمش اولديغندن وكندوسنه شيخ الاسلام وقت اولان درى زاده عارف افنديك غيظ قديمى اولديغندن بشقه والده كتخداسى يوسف اغا كجى بعض ذوات متشخصه ايله اراسى بوزوق اولديغى خالدہ راشد افندى ايله بينلرنده بوانئاده فوق العاده مباينت وعداوت پيدا اولمشيدى .
عاصم تاريخينده بونك سببى بيان سيقبده عبدالله ملا افندى افلاق وبعدان ويوه ده لرينه دائر بر ماده صمننده دولت عليه ضرر ملاحظه سنه مبنى جمهوره مخالفت ايدوب لكن راشد افندى طرفى غالب اولغا عبدالله ملا افنديك رايى الغا ايله كندو رايلىرى امضا ايتشار وبومسئله ده ايكي بيك كيسه آقچه آلتوب بوندن صدراعظم ايله شيخ الاسلامه دخى اليشمر بيك غروش حصه چيقار مشلر عبدالله ملا ايسه تنك مشرب و متصلب وزبردست بر آدم اولغا ابتدا شيخ الاسلامه وبعده صدر اعظمه واروب بوسن وساللدنصكره سزه ويزه دولت عليه مضر مادهنى تروج ير اشورى ديهرك سرزنش وعتاب ايلدكدنصكره على ملا الناس راشد افندى به بالمواجهه خيانت وخبائنه متعلق اوصافدن برشى ترك ايلميوب الك صكره سيف قهر ربانيه عن قريب جزا كى بولورسين ديمش ديو بر فقره مندرج اولوب آنجق عاصم افنديك بومثللو احوال شخصيه ده دائر يازديغى فقره لر خار جدن بين الناس دوران ايدن روايات ومسموعاتدن عبارت اولمسيه چندان شايان وثوق واعتماد اوله ماز .
بو خصوصه دائر واصف افنديك كندو خطيله منظور فقير اولان مسوداتنده بيانه كوره راشد افنديك محرم اسرازى وهر خصوصه قفادارى اولان ديوان هايون ترجمانى علكساندرى بكدن بعض اسرار دولتك منتشر اولديغى افواه انامده دائر اوله رق كيفيت راشد افنديك سمعنه واصل اولدقه ترجمان بكه اعتماد تامى اولديغندن وعبدالله ملا دن مستشعر بولنديغندن افشاي اسرار نقيصه سنى عبدالله ملايه عزو واسناد وبو وجهله سمع هايونه القا ايله اجراى فساد ايتمشدر .
سلطان سليم حضر تلى دخى افشاي اسرار اولنمسون ديو بر قطعه خط هايون

اصدار ولا علی التبعین بر تنبیه ایله اکتفا ایدرک حلم و مروترین اظهار بیور مشدر
 عبدالله ملا ایسه صدور خط هایون راشد افدینک غمز و سعایتدن نشئت ایلدیکنی
 تحقیق ایله متألم و بر بادره ظهورندن لیل و نهار متوهم اولوب بوملا یسه ایله
 یکدیگردن احتراز و مع هذا صورت نفاقده اوله رق ینسه میانلرنده اجرای رسم
 ناز و نیاز ایتمکده ایکن او ائساده بیکده واقع مکمله مجلسنده ایلیجی کلزدن مقدم
 عبدالله افندی ظاهرده ترجمان دیوانه و باطنده بالا نشین صدر ایوانه وجه مناسب
 بوله رق خطاب و نهایت مظهر اشد عقاب اولور سین دیو عتاب ایلدیکندن راشد
 افندی متأثر و بو کنایه لر کندوسسته عائد اولدیغنی حس ایله غایت متکدر و ایلیجی
 کلوب کیدنجیه قدر خلال مکمله ده دخی مشار ایله حرف واحد تکلم ایتمیوب
 مبهوت والی آخر المجلس مهر زن لب سکوت اولدیغندن راشد افندی و سوسه یه
 ذهاب ایله متفکر اوله رق مساوی؛ مشار الیهی بین المدح والذم مسامع اولیای امور
 دولته ایصال و طرف طرف حقنده تشدید غیظ ایده جک اسبابی استحصال
 ایتمکده اولدیغنی عبدالله ملا افندی بالتحقیق او دخی بر محله تذکره یازوب راشد
 افندی ایله دیوان ترجمانک احوال و اطوارندن بحثله لزوم اندفاعلرینی بیان ایتمشدر
 عبدالله افدینک خصماسی وافر و راشد افدینک حیات و احبابی متکثر اولدیغندن
 غلبه راشد افندی طرفنده رونما اولغه باشلامشیدی .

ایشته ذکر اولنان مسودات و اصفده کیفیت بو وجهله مسطور اولوب انجق و اصف
 افندی ذاتا راشد افدینک نظر توجهندن ساقط اولدیغنی حالد سرکارده بولنان
 رجال دولت ایله مغایرتی درکار اولان حلب و ایسی سلیمان فیضی باشایه خلوصی
 مین و والده کتخداسی یوسف اغا و راشد افندی کبی متفندان عصرک قبایح
 و مساویسنی متضمن بر قطعه مکتوب یازوب جلد خامسده بیان اولدیغنی اوزره
 اکیویوزسنه سنده فیضی پاشانک و فاتی و قوعنده بو مکتوب مفتی بولنان قدسی زاده نک
 الیه کچدیکی کبی عرض خلوص یولنده یوسف اغا یه ارسال و او دخی سائر لرده اراءه
 ایتمکله و اصف افندی حقنده اولیای امور دولت مغیر الخاطر و عبدالله ملا افندی یه
 متردد اولسی حسینیه راشد افدینک کندو حقنده اولان کین و عداوتی بر قاندها
 متوافر اولمشیدی شو حالد ایکن قضارا بر کون عبدالله ملا یی واران زوار یاللسنده
 بوله میوب اسکدارده شمس الدین افدینک ضیافته کتمش اولدیغنی بالتحقیق اکیسنه
 بردن عرض خلوص ایچون بر بر اسکداره کیدوب شمس الدین افدینک دخی
 خلیجه زواری کلکله ایکی فرقه بریره کلوب مصاحبت ایتمشدر و بعد الطعام خانه لرینه
 کیتمشدر عبدالله ملانک اعداسی ایسه بو جمعیتی دولت علیهنده بعض خصوصات

سویلشمک ایچون مرتب بر اجتماع مخصوص اولوق اوزره کوچک صوده واقع رکاب هایونده افاده و بعض عزویات ایله انفعال شاهانه بی زیاده ایتملیله اوائل محرم الحرامده عبدالله ملا افندی آریه لنی اولان کوزلحصاره نفی اولسدینی کبی استانبول پایه لولرندن کیچه جی زاده صالح افندی سوزنی اسرکه مز ولسانته صبر ایده مز برذات اولوب حقهده شیخ الاسلام افدینک غیظ قدیمی دخی اولدیغندن و سابقا باش محاسبه جی اولان شهر امینی سید محمد افدینک ابنیه به متعلق دادوستدن طولایی بعض اطوار و حرکاتی مشرب اولیای امور دولته مخالف بولندیغندن برر ایکیشر کون فاصله ایله صالح افندی کلیبولی به و محمد افندی بوزجه آطیه و واصف افندی مدلو جزیره سنه نفی واجلا اولمشلردر .

* راشد افدینک عزلی ودری افدینک ریاستی و دیگر بعض وقایع *

راشد افندی خیلی سنه لردنبر وکاه بالوکاله وکاه بالاصاله مقام ریاستده بولنه رق سلطان سلیمک نظر توجهنه مظهر اولوق حسینیه باب عالیجه مرجع انام و بوکره بوجه مشروح عبدالله ملا طرفنه غلبه ایدرک هرجهته نافذ الکلام اولمش ایسهده باب عالیجه نفوذی بووجهه کندوسنه حصر ایلمش اولمسلیله حال وزمان ایجابجه درکار اولان صعوبت و مشکلاتدن ناشی مصالحه رونما اولان سکتته و تراخیدن طولایی اطرافدن آتیلان تعریض و اعتراض طاشلری ک زیاده اکا طوقوندیغندن هرشیدن قوجنور وهر سوزدن آتور اولمشیدی .

و برمنوال محرر بوآوانده اصلاحات جدیدیه اعتنا اولتمقده و بونک ایچون طرف طرف واردات جدیده آراتمقده اولدیغندن مقام صدارتده احتجاب اقتدار و کفایتدن برذاتک بولمنسی مرتبه و جویده کورنمکله ارتق ملک محمد پاشانک صدارتده طوره میه جغنی اکلا یوب ایکی سنه دن زیاده مصر والیلکننده ابراز حسن خدمت ایش اولان عزت محمد پاشایی صدارته سوق ایلمکه باشلامشیدی .

ساطان سلیم دخی ملک پاشانک رخاوقی و اختیار نفی حسینیه زمام دولتک بعض منفذان انه کچدیکنی و بوجهته ایشلرک محور لایقده دوران ایتدیکنی کوره رک آتک عزلیله عزت پاشانک صدارتتی تصمیم ایدوب بناء علیه دیار رومه جلبله در سعادتته تقریب ضمتنده اقدیجه عزت پاشا عهده سنه اناطولی ایالتی توجیه بیورمش ایدو کندن مصر دن حرکتله مرکز مأموریت جدیده سی اولان کوتاهیسه به طوغری کلکده ایدی .

حالبوکه عزت پاشا متعظم بر ذات اوله رق ملک پاشا کبی صقالتی شونک بونک الیه

ویرر آدم اولدیغنه نظر آ راشد افندی ایله حسن امتزاجلری مأمول دکل ایدی .
لکن اورارره وقت قالمیوب محرمک یکریمی اوچنجی کونی راشد افندی بقتہ عزل
ایله یرینه سابق دفتر امینی محمد دری افندی رئیس الکتاب اولمشدر .

راشد افدینک کیفیت عزله دائر واصف افدینک خط دستی اوله رق کوریلان
مسوداتنده مومی الیهک نفی ماده سنده الی وبوشیوؤ ناکه ظهور امرنده کلی مدخلی
اولدیغندن غیری بر قاچ سنه دنبرو کوکب تابدار اقبالی مستعلی واصلت و وکالت
جهتله ایله مسند ریاسته مستولی اولوب جنس نقد ایله کیسه ادخاری مملو و جواهر
تحف کر انبها ایله صندوقه اقتداری تابکلو اولوب (ان الانسان لیطغی ان رأه استغنی)
حکمنجه طغیان و کثرت حواشی و غلمان ایله تکمیل اسباب تعزز و سامان ایدوب
انحصار مسند ایله اظهار ناز و دلال و استعفا و امتنان صورتنده ابراز اندوه و ملال
ایلدیکی معلوم شهر یاری اولدقده نعم دولت ابد مدت ایله دلیر اولان خدمتگذاران
سلطنت جوانبندن ناز و استعفا ظهوری نفوس سلیمه اصحابی اولان سلاطین شوکت
قرینه کران کله جکی مسلم الثبوت اولدیغندن راشد افدینک بو اوضاع بارده سی دخی
طبع سلیم همایونه مغایر کله رک فی الحال عزل اولندی دیو مندر جدر .

هرنه حال ایسه راشد افندی خصمانه غلبه ایله اکل نفوذ ایلمش اولدیغی حالد
کندوسی دخی عزل اولنوب انجق قدم و حیثیت و درایت و لیاقت اصحابندن بر ذات
اولدیغنه بناء معزول اولدیغی حالد بروجه آتی لوند چفتلکننده ترتیب اولسان
ضیافتده وکلا ایله برلکده بولمشدر .

لوند چفتلکننده مشق و تعلیم صنایع حربیه ایله مشغول اولان نظام جدید عسکرینه
شوق و غیرت و یرلمک و همده وقت و حال ایجابجه فرض عین و عین دین اولان
صنایع حربیه جدیدیه دائر همم جلیله پادشاهینک آثار فعلیه سی رجل و کبار دولته
کوسترلمک اوزره ایراد جدید دقترداری و مهمات جهادیه نظری اولان مصطفی
رشید افندی طرفندن صفرك اون ایکنجی کونی ضیافت ترتیب اولنه رق صدر اعظم
و شیخ الاسلام و باب عالی رجالی و دقتدار عثمان افندی و والده کتخداسی یوسف
اغا و رئیس الکتاب سابق راشد افندی لوند چفتلکنه واروب وقت عصره قدر
بعضاً تعلیم عسکر و بعضاً اوراده واقع تفنکخانه ده اعمال اولسان ادوات حربیه
تماشاسی ایله امرار وقت و جمله ضابطان و نفراته و اصحاب صنایعه بذل عطایا قلنمش
و چند روز مرورنده منصوب و معزول قاضی عسکر لر و بر قاچ کون مرورنده
استانبول پایه لوری طاقم طاقم دعوت ایله ترتیب ضیافت اولنمش و چونکه نظام
جدید عسکری بستانیان خاصه نفراتی اوجاغنه ملحق اولدیغندن بر کون دخی

بوستانچی باشی ایله بوستانیان خاصه نقراتی دعوت اولتوب اشبو عسا کر معلمه ایچون ترتیب اولنان تعلیمنامه هامیون دخی اول کون او قونمشدر .

وبرقاچ سنه دنبرو تکثیر دونما ضمننده ترسانه عامرهدن بشقه سواحل بحر سیاه وسفیدک مناسب محللرنده پیدرپی سفینه لر انشاسنه مباشرت اولنهرق بو محلردن بری دخی کمر ادرمید اولوب انجق بوراسی یالکز فرقتین انشاسنه متحمل اولهرق بیوک قالیون انشاسنه الویرمدیکندن بشقه هواسی وخیم اولق حسیله مأمورین وعملیه مورث تعب ومشقت اولدیغندن وآق دکر بوغازنده واقع قلعه سلطانیه پیشکاهی هم قالیون انشاسنه متحمل وهمده بالسهوله کراسته جایی قابل ایدوکندن کمر ادرمید یرینه بوراسنک ترسانه اتخادی دها مناسب اولهجنی بعض اصحاب وقوف طرفدن خبر ویرلمش اولدیغنه مبنی کشف ومعاینه سی ضمننده قپودان پاشا بعض معمارانی استصحاب ایدرک ایکی قطعه قر نغیج کمیسیله اون کون ظرفنده بالذات کیدوب کیش وبوجهته سالف الذکر لوند چفتلکی ضیافتده بولنهماش اولدیغندن عودتنده آنک ایچون دخی مستقلاً برکون ضیافت ترتیب اولنمشدر .

قره دکر بوغازی خارجنده بعض مواقعک استحکامی ایجاب وقت وحالدر کورلمکله بو اثناده قره برونده مجدداً برقلعه واینه آطهده مجدداً بر پلنغه انشاسنه وکلیوس قلعه سنک تعمیرینه مبادرت قلندی .

کچن سنه لوند چفتلکننده بنا اولنان نظام جدید قشله سی دروننده والده سلطان برجامع شریف واتصالنده برچشمه ومقابلنده برمکتب بنا ایتدیکی مثللو خاصکویده لغمجیلر قشله سی دروننده دخی انشاسنه همت بیوردقلری جامع شریف بو آوانده ختام بولمش اولدیغندن سلطان سلیم خان ربیع الاولک ایلک جمعه نمازینی اوراده ادا ایدوب اول کون مذکور قشله نک ناظری ایکن ایکی آی مقدم برمنوال مشروح راشد افدینک سعایتی اوزرینه عبدالله منلا وصالخ افدیلرله برابر نفی اولنان سیدمحمد افدینک عفو واطلاقی والده سلطان طرفدن رجا وشفاعت اولنمغله وراشد افندی معزول اولوب تبدل صدارت دخی در دست بولنمغله هان محمد افندی عفو واطلاق اولندی وآنک اطلاقی دیکرلرینه براءت استهلال اولهرق هان برقاچ آی ظرفنده عبدالله ملا وصالخ وواصف افدیلر دخی عفو ایله جملةً در سعادت کیشلردر .

* ملک پاشا یرینه عزت پاشانک صدارتی وبعض توجیهاث *

بالاده بیان اولدیغی اوزره ملک محمد پاشانک عزلیله مصردن اناطولی والیلکی ایله کوناهییه طوغری کلکده اولان عزت محمد پاشای تاینک صدارتی مصمم اولمغله خفياً خط هامیون ایله کوندریلان خاصکی کندوسنی کدوس قصبه سی قریبنده بولوب

خط هایونی ویرد کده تبديل هيئت ايدرك اورادن بر قاج نفر خواص اتباعيله الفار ايدوب اشبو ايکيوز طقوز سبنه سي ربيع الاولنک يکرمي بشنجي بازار کيجه سي اسکداره واصل وعلی السحر طوپقپودن سرای هایونه داخل اولمشدر . بو ائنده ايسه مهمات جهادي به کمال مرتبه اهتمام و اعتنا اولنه رق جابجا وکلای دولت او منلو مهماته بالذات نظارت و مأمور لره عطایا اعطاسيله ترغيب و تشويقه مبادرت ایده کلدکلرندن اول کون دخی بار و تخانه لر ناظری محمد شریف افندی طرفدن خارج سورده واقع بار و تخانه ده صدر اعظم ایله بعض کبرای دولته ضیافت ترتیب اولمش ایدو کی جهته ملک محمد پاشا تبدیلاً قایغه بنوب بار و تخانه به کیتمک اوزره طوپ قپو پیشکاهندن کچر ایکن در حال سرای هایوندن قایق کوندر بلوب بالقخانه به یناشدیر یله رق مهر هایون استرداد اولدینی ائنده شیخ الاسلام افندی دخی سرای هایونه کلش بولنغین آنکله برابر عزت پاشا حضور هایونه جلب ایله کندوسنه مهر هایون بالاعطا باب عالی به کوندر لمشدر .

صدارتنه شاعر مشهور فاضل بك (مهر امانت ایردی ملکنده حمده) مصراعی تاریخ نام اوله رق نظم ایلش و صناعت تاریخ یولنده پیشوای شعرا اولان سروری افندی هر مصراعی برر تاریخ نام اوله رق (رب عزت ایدوب اعزاز ایله مهری احسان * کلدی دولته وزیر اولدی محمد پاشا) بیتنی و خلیل نوری بك (جوهرین بنده بو تاریخی دیدم ای نوری * قاله عزتله صدارتده محمد پاشا) تاریخی سویلمشدر . غرائب اتفاقیاتندنر که دور حمید خنیده صدر اعظم اولان عزت محمد پاشا بولی اهلایسندن اولوب بالطه جیلقدن یازیحی خلیفه سی و یازیحی و صکره ضربخانه و شهر امینی و بعده وزیر و صدر اعظم اولدینی کبی بو کره صدارتله کلان عزت محمد پاشا دخی عینیه بولیلی اولوب بالطه جیلقدن یازیحی خلیفه سی و یازیحی و ضربخانه و شهر امینی و وزیر و صدر اعظم اولمش و ایکیسی دخی بك خلیفه دیو معروف ایمش .

صدار تعظمان منفصل اولان ذواتک در سعادتده اقامتی اول عصرک حکمنجه خلاف عادت ايسه ده ملک محمد پاشا ذاتاً ملک کبی ملایم و هر کس احتمال کید و مضرتی اندیشه سندن سالم اولدیغندن بشقه قرق سنه دن زیاده رتبه وزارت ایله مملکت بمملکت کزوب خدمت دولته پیر اولمش ایدو کندن (مصرع) بیلی یتش قویلی آزاد ایدر مولاسی عادتدر * مألنجه بعد ازین طشره لرده طولاشدیر لمسی رواداشته طبع سلیم جهاندار ی اولدیغندن فوق العاده اوله رق اورته کویده واقع ساحلخانه سنده اقامته اذن ورخصت ویرلمشدر .

وزرای عظامک مقام وکالت مطلقه به کلدکلرنده قرق عدد ملازمت اعطاسی معتاد

اولوب انحق بو ملازمتلر اکثریا شفاعت ورجا ايله ویريله کلدیکندن نااهلاره دوشر ایکن بوکره عزت پاشا نامحل ملازمت اعطاسنی تجویز ایتیموب ملازمتلری علمای کرآمدن برقاچ میز تعیین ايله طلبه علومدن لدی الامتحان استحقاقلری نمایان اولنلره توزیع و بووجهله ملازمت آلانلره اون بشر غروش عطیه احسان ایتدیکندن بو صورتله ظاهر اولان اهل پرورلکی اماره موقیت اولمق اوزره السنه انامده دأر اولمشدر .

اول وقتک اون بش غروشی بو عصرده یوزالی غروش راده لرنده اولدینی اخطار اولنور .

ملك محمد پاشا زاده صالح بك پدريتك ابتدای صدارتدنبرو سر بو این شهر یاری بولنوب بوکره پدريتك عزلیله آنک دخی انفصالی لازم کلهرك یرینه میراخور ثانی زهدی بك نصب اولنوب ربیع الاولک یکریمی سکزنجی کونی صدر جدیده خطاباً اصدار بیوریلان خط هایون انکله باب عالی به ارسال بیوریله رق رجال دولت و اوجاق اغالری حاضر اولدقلری حالده قرائت اولنمشدر . صورتی ذیلده (۵) رقمه ایراد اولنور .

اناطولی محاسبه جیسی و وقایع نویس اولان الحاج سعده الله انوری افندی بو ائنده وفات ایتمکله ربیع الآخرک اون اوچنجی کونی اناطولی محاسبه جیلکی اسبق برر باشی علی افندی به و وقایع نویسک مالیه تذکره جیسی خایل نوری بکه توجیه اولنمشدر .

متوفای مومی ایله انوری افندی طرزونی الاصل اولدینی حالده در سعادتده تحصیل علوم و معارف ایدرك خواجهك رتبه سنی احراز و سفر و حضرده برقاچ دفعه وقعه نویسک و تذکره جیلک و تشریفاتجیلک کبی منصبلر ايله کسب امتیاز ایدوب حسن سیرت و سلوک ايله معروف و عفت و صلاح حال ايله موصوف تالیف کلامه قادر و علوم عربیده و لسان فارسیده ماهر برذات بمدوح الصفات اوله رق سنی التمشه یتیم اولدینی حالده بوکره اجل موعودینه طی طومار حیات بی ثبات و جریده زندگانسین تسلیم دست هادم اللذات ایلنمشدر .

طرابلس شام والیسی حسین پاشانک وفاتی خبری ورود ایتمکله یرینه برینک نصی لازم کلوب انحق طرابلس شام ایالتنک برقاچ سنه دنبرو انتظامی خلل پذیر و مقاطعاتی اموالنک اکثری دوچار عقده تأخیر اولدیغندن اصلاح و تنظیم احوالی لازمکلمکله درکاه عالی قوچی باشیلرندن اولوب مقدا تحصیل اموال میریه ایچون اورایه مأموریتی حسبیله اول حوالی احواله کسب اطلاع ایتیم اولان یکشهرلی موسی

بکه تنظیم امور ایالتہ مدار اولہ جق بعض مساعدات مخصوصہ ایلہ بارتبہ وزارت
 طرابلس شام ایالتی وجرده باشوغلنی غرہ ربیع الآخرہ توجیہ اولنگلہ درسعدتہ
 برآی قدر اقامتہ اسباب وزارتق تنظیم ایستدکن صکرہ محل مأموریتہ عزیمت ایلمشدر .
 کتخدای صدر عالی الحاج ابو بکر اغا وزرا ایلہ مدت مدیدہ طشرہ لردہ کشت
 وکذار ایلہ اولدنجہ احوال عالمہ کسب وقوف ایلمش اولدیغندن بشقہ خلیل حمید
 پاشانک صدارتندہ خزینہ دارلنی خدمتندہ بولمق ملباسہ سیملہ باب عالی ایشلرینہ
 دخی کسب معلومات ایلمش اولسنہ مینی بوندن اقدام کتخدای صدر عالی نصب
 اولمش ایسده زمانک کسب ایلدیکی نزاکت اوزرینہ رجال دولتک دانشمندانندن
 ودقایق امور دولتہ و مزاج حال ووقته وقوف تام اصحابندن برینک بو مقامده
 بولمسنہ لزوم کورملکله جمادی الاولینک اون درنجی کونی ابو بکر اغا عزل ایلہ
 رینہ روزنامچہ اول اولان رئیس الکتاب اسبق عبدالله بری افندی کتخدانصب
 اولنگلہ روزنامچہ اول منصبی باش محاسبہ جی محمد شریف افندی یه وباش محاسبہ جیلک
 مکتوبی صدر عالی احمد عزمی افندی یه و مکتوبجیلق سر خلیفہ ابراهیم افندی یه
 و سر خلیفہ لک خلفدان غالب افندی یه و آنک اوزرنده اولان تاریخجیلک منصبی دخی
 ایکنجی خلیفہ لک اعتباریلہ ینہ خلفدان مصطفی رفیق افندی یه توجیہ بیورلدی .
 بوکرہ مکتوبجی اولان موسی الیہ ابراهیم افندی بعدہ ابراهیم کتخدا دیو معروف
 اولان ابراهیم نسیم افدیدر . و غالب افندی مؤخرأ صدر اعظم اولان غالب
 پاشادر . مصطفی رفیق افندی علمدار مصطفی پاشانک درسعاتہ ورودندہ کتخدای
 صدر عالی اولان مشهور رفیق افندی اولوب ریاست کتاب منصبندہ دخی غالب
 افندی ایلہ یکدیکرہ خلف و سلف اولمشدر .

تاریخجیلک منصبی اولوقت باب عالی خلفاسی متحیزانہ توجیہ اولنور مناصبدن
 بری ایدی کہ مالیه خزینہ سندن یازیلان فرمان و براتلر ابتدا متعلق اولدینی قلمده
 تسوید اولدقدن صکرہ عصر مزده اوامر مالیه اوطہسی مقامندہ بولنسان مالیه
 تذکرہ جیسی قلمندہ تیبض اولنوب فقط آخرندہ ایزوجہ ثبت و تحریری معناد
 اولان عربی العبارة تاریخی تاریخجیلک منصبندہ متصرف اولان افندی طرفندن وضع
 اولنوردی .

رقہ والیسی مصطفی پاشا رقبہ ایالتنک اموال میریسی تأدیہده اظهار رخاوت ایدرک
 ذمتندہ کلی مال میری تراکم ایلدیکنندن عزلی مصمم اولدینی خالد بغداد والیسی
 سلیمان پاشا طرفندن بواثناده بعض مواد مخصوصہ ضمتندہ درسعدتہ وارد اولان
 اندرون چوققدار اغاسی سلیمان اغا ارباب درایتدن واول حوالی احوالنه وقوفلی

ذواتدن اولوق حسیبله رجبك اون دردنجی کونی عهدہ سنہ روم ایلی بکرا بکیلمکی
بایه سیله رقه ایالتی احسان و سلفی مصطفی پاشانک ولایتی اولان دیوریکده اقامت
ایله دیون میریہ سنک تأدیہ سنہ مسارعت ایلمسی فرمان بیورلمشدر .

بغدان ویوده سی میخال بک انحراف مزاجدن بخله در سعادتده واقع ساحلخانه سنده
اقامت ایلمک اوزره استعفا ایش اولدیغدن استدعاسنه مساعده بیوریلهرق خلال
شوالده عزل ایله یرینه دیوان هایون ترجمانی یناکی زاده علسکاندری بک نصب
اولنوب حالا افلاق ویوده سنک قرنداشی و سابقا دیوان ترجمانی اولان قسطنطین
بکزاده یورغاکی بک ترجمان دیوان هایون اولمشدر .

* ترسانهجه بعض اجراءت *

قالیونجیلر وسائر نفرات بحریه که قروده اقامتلی ائنده درلو ادبسر لکله اجتسار
ایله استانبوله بلا اولورلردی قبودان دریا کوچوک حسین پاشانک همتیه تحت انضباطه
آلنوب اکثر اوقاتده دخی برالشام و آطهر دکزلرنده کز مک اوزره کوندریلورلر
واو صورده سیر وتعلم ایله فنون بحریهده ترقیلرینه کوره حسین پاشانک عطایاسیله
مکافات کوررلر ایدی .

اوتهدنبرو ترسانه عامردهده و محال سائرده یاپیلان قالیونلر قروده ایکن تماماً
انشا و بعده بجره القا اولنه کتمکله حین نزوللرنده قیچ طرفنک آغرانی باشه
محمول اولدیغدن بهر حال قروده یاپیلان هیئت مجموعهلرندن یدی سکر قانه مقداری
چوکامک امر محال ایدی . اقدبجه ترسانه عامردهده الی طقوز ذراع برقطعه قالیون انشاسنه
مأمور اولان فرانسه لو مهندس برون بک بوبابده برقاعده حسنه اتخاذایدوب شویله که :
قالیونلر قروده تماماً انشا اولنمیوب طوب لومبارلرندن یوقار و بعض محللری ناقص اولهرق
دریایه تنزیل و بعده ناقص اولان یرلری تکمیل ایندیرلیدیکی دورتده خفتی حسیبله
حین نزولنده اولمقدار چوکمیوب نهایت ایکی اوج قانه مقداری چوکر ایسه دخی
دکترده کمال اولنه جق یرلری آکا کوره یاپیلوب قروده کی هیئتندن اصلا تنزل ایتیه جکن
بیان و در دست انشا اولان قالیونک اولوجهله ایندیرلمسی استبدان ایتمکله شعبانک
طقوزنجی جمعه ایرتسی کونی استخراج اولنان وقت مختارده تنزیلی تصمیم اولنوب
اگرچه اخشامی غره رمضان بالرؤیه اثبات اولنمش ایسهده امور سفریه یه سلطان سلیم
خان حضر تلینک فوق العاده اعتناسی اولدیغدن وقت آخره توقیف ایتمیوب همان
یوم مرقومده علی السحر ترسانه عامردهنی تشریف ایله تهیته اولنان قالیون هایونه
قعودایتدیکنده مذکور قالیون جدیدک تنزیلنه مباشرت اولنمش و فی الو واقع مهندس

مومی اليهك بيان ايلديكي كبي بروجہ سهولت درياہ نزولی مشاهده اولنغله آندن
صكره قرق سنه قدر بواصول مرعى الاجرا اولمشدر . فقط محذور مزبورك اصل
سببي كميلرك باش طرفى قيج طرفه نسبتله دها كراسته لو اولدينى حالده باش طرفى
صويه چابق قانوب درحال يوقارو ميل ايله بردن بره قيج طرفك دكزه نزولى
دعوت ايلمسى خصوصى اولدينى حالده مؤخرأ كميلر قيجدن اينديرلمكه باشلايوب
صنايكت ترقيسى حسييله استحكام ايچون باغلانان بند وقوشاقرله دخى زياده اهتمام
ايله قوت ويرلديكندن شمى كميلر كاملاً قروده انشا اولندقدن صكره اينديرلمكه
اولدينى حالده اصلا برطرفى چوكمديكى مشهودمزددر .

الحالة هذه مستعمل اولان ذراع معماری يكرمى درت پارمغه تقسيم اولندينى كبي
از قديم ترسانه عامروده مستعمل اولان ذراع دخى يكرمى درت قانه به تقسيم اولنوردى
فقط قانه پارمقدن براز بيوجكدر زيرا يكرمى درت پارمقدن عبارت اولان برذراع
معمارى تمش بش سانتيمترويه وبرمترو اوتوز يدى فرانسه پوسنه مساوى اولوب
يكرمى درت قانه دن عبارت اولان براسكى ترسانه ذراعى ايسه اوتوز فرانسه پوسنه
مساوى اولمسيه براسكى ترسانه ذراعى يكرمى يدى پارمق ديمك اوله رق ذراع
معماريدن اوچ پارمق اوزون اولدينى ثابت اولور .

بهرسنه دونماي هايون موسم بهارده آق دكزه چيقوب كوزين ترسانه به عودت
ايلمك دأب ديرين دولت عليه اولوب اولوقت ايسه عساكر بحريه به بويه سفر بر
اولدقلىرنده طبخ طعام ايتديرلميه رك التى ايلق ارز ومرجنك وروغن زيت ويريله
كلديكندن متأهل اولنلر تعيينلرين خانه لرينه براغوب وبيكار اولنلرك دخى اكثرى
طبخ طعام ايچون الحجاب ايدن ياغ وسائر ايدمه ديكندن تعيينلرين فروخت
ايدوب قورى پكمامد ايله كچينه رك نجهسى بوسيدن ناشى خسته نتوب تلف اولور
وذى قدرت اولنلر دخى التى ايلق قومانيه لرينى يانلرينه آلورلر وكوشه وبوجاقده
مالطيز اوجاقلرنده طعام پيشورلر ايدى . بر كيمده بويه اوتوز قرق يرده آتش
ياقمده عظيم محذور اولديغدن بشقه كورته وطوب انبارلرى هپ صو واريلارى
وقومانيا صندوقلرى و تحملات سائر ايله مملو اولديغنه مبنى لى الحاحه بونلرك
تخليه سيله طوب آتمق برايكى ساعته توقف ايلديكندن اصلاحات سائر صرسته
بوكا دخى بر رابطه ويرلمك واجبات اموردن اولوب انجق اول امرده طبخ طعام
ماده سنه برقرار ويرلمك لازم كلديكى جهته عساكر بحريه نك تعيينلرى يدلرينه
ويرميبوب اويلاه سفر بر اولدقلىرنده اخشام طعامى اولمق اوزره جمعه وبازار ايرتسى
كيجهلرى بلاو وسائر اخشاملرده شوربا طبخ وتوزيع ايتديرلمك وقوشلق طعامى

اوله‌رق زیتون صالته‌سی ویرلمک خصوصتک نظام اتخا‌ذی تصور اولتمش ایسه‌ده بوصولت ابتدا نمونه اوله‌رق براییکیمیده اجرا اولوب ومصارفک مقرداری بیلنوبده اکاکوره تعمیم اجرایی بالتنسب کچن بیلک ایکیوز سکر سنه‌سنده سفر بر اولان یدی‌یوز نفر طاقلی بحر ظفر نام قالیون‌ایله بیکی انشا اولتمش اولان‌های ظفر نام فرقی‌نده اطرافی تیمور محفظه‌لو برر مستحکم اوجاق یابدیرله‌رق صورت مشروحه بونلرده تجربه اولتمشیدی . اشبو طقوز سنه‌سنده آق دکره چیق‌ه‌جق سفالندن درونلرینه وجه مشروح اوزره اوجاق یابدیرلمش اولان درت قطعه سفینه‌ایله بوندن بویله اوجاق‌لری تنظیم اولته‌جق اولان سفینه‌لر حقیقه‌دخی بواصولک تعمیم اجرایی نظام اتخا‌ذ اوله‌رق خلال ذی‌القعدة قاملره قید اولمشدر . وینه ذی‌القعدة‌نک اون التنجی و مایسک یکریمی دردنجی پخشنه کونی قپودان دریا حسین پاشا دونمای هایون ایله بر معتاد یالی کوشکی پیشکاهندن آلا‌ی ایله کذار ورجال ترسانه ایله حضور هایونه دخول ایدوب اکتساب خلعت رسمی بالاجرا چند روز بشکطاش پیشکاهنده توقفدن صکره آق دکره بادبانکشای عزیمت اولمشدر .

* وقایع متنوعه *

جوار حضرت ابی ایوب الانصاری رضی‌الله عنه الباریده والده پادشاهی مهرشاه سلطان حضرتلرینک انشاسنه صرف تقود اهتم ایلدیکی عمارت اواسط رجب شریفده ختام بولغله بنا امینی اولوب بوندن اقدم قدس پایه‌سی احسانیه رتبه‌سی دوریدن مخرج مولویته دور و ترفیع اولتمش اولان سابقاً آمد قاضیسی خفاف زاده محمد امین افندی‌یه غلطه قضاسی توجیه بیورلمشدر .

امین افندی اذیکادن و اسحاب معلوماندن برذات اولوب والده کتخداسی یوسف اغایه انتساب ایله‌ذکر اولنان عمارتک بنا اماتی وسیله‌سیله دوریدن غلطه مولویتنی تحصیل ایتمش وبعده یولیه قاضی‌عسکر اولمشدر .

انجق طریق اسحابی چکه‌میوب لسانلریله کونا کون اذبت ایدرک شیطان امین دیو تلقیب ایتشار ایدی . شیطان اقدیسنده یالی آلمسی دخی غرائب اتفاقیاتدن اولوق اوزره فائق افندی مجموعه‌سنده محرردر .

کچن بیلک ایکی‌یوز سکر سنه‌سنده غلطه‌ده واقع اولان حریق‌ده غلطه قاهسنگ کلاهی دخی محترق اولوب حالبوکه قاهه مذ کوردهده محترق اولان اوطلرده جمعه کیجه‌سندن ماعدا کیجه‌لرده نوبت چالتمق وحریق ظهورنده ضرب طبل ایله خالق‌ه‌اعلان اولتمق معتاد اولدیغندن درحانشا و تعمیمینه مباشرت اولوب فی‌الاصل طاش دیوار

اوزرینه موضوع یالکز برکلاه ایله ایکی اوپه دن عبارت ایکن بالای قلهده دائراً
 مدار ایکی بچق ذراع مقداری حریرقزده اولان طاش دیوار هدم و تجدید و کارگیر
 کمرلر ایله تشیید واصل قله نك دورندن ایکی ذراع مقداری طشره مشرف جوانب
 اربعه سنه درت عدد جاملی کوشك و دروننه اوچ اوپه بنا و اطرافنه بر صفة
 و دیوانخانه انشا ایله اولکیدن اعلا اوله رق بو ائنده ختام بولمش و حریق ظهورنده
 طبل صداسی واصل اولمیان محال بعیده یه اعلان کیفیت اولنه ییلمک ایچون کرك قله
 مذکور یه و کرك سرای هایون قر بنده واقع نو بجانه ایچنه بر کوس وضعی
 امر اولمشدر .

سابقا عشاق و یوه ده سی اولان عجم اوغلی احمدک عصیان و شقاوتنه مبنی مقدا قهر
 و استیصالی ایچون فرمان سلطانی صادر اولمش ایسه ده لدی الاقتضا تحصن ایتمک
 اوزره اول حوالیده بر صرپ محله بر قله انشا و ایچنه قدر کفایه ذخیره املا ایلمش
 اولدیغندن اوزرینه وارلدیجه یا بر ستمه فرار ایلر یا خود مذکور قله ده تحصن
 ایدوب مدت مدیده محاصره دن محاصرینه دخی ضروری فتور کله رک بر ایش
 کورلمکمزین عودت اولنور ایدی .

حتی سنه ماضیه ده اناطولی والیسی متوفی از نیقی علی پاشا بش اون بیک آدم
 وخیلی طوپ و جبه خانه ایله بالنفس مر قومک اوزرینه حرکت ایتمشکن موفق
 اوله میوب مایوساً عودت ایلمشیدی . بناءً علیه مصلحتک طریق سهولتی
 دوشونیلرک کیفیت اول حوالیده صاحب نفوذ و اقتدار اولان قره عثمان اوغلارینه
 احاله اولمغله آنلر دخی شقی مر قومک اوزرینه وارد قلدننده عادتق اوزره قله سنه
 تحصن ایتمش و فقط محاصرینک ثبات ایده جکلرینی جزم و تیقن ایتمکین عونه سیله
 برابر قله دن چیقوب سما و قضاسی طرفه کیتمش ایسه ده شایخانه ایله سما و قضاسی بیننده
 واقع کویه زنام قریه یه ورودنده سما و جوهندن نصوح زاده نصوح اغا خبر آلهرق
 کندوسنی اخذ و اعدام ایله باشنی قره عثمان اوغلارینه و آنلر دخی در سعادت ارسال
 ایتمکین سر مقطوعی رجبک یکر می طقوزنجی کونی باب هایون پیشکاهنه وضعه
 تشهیر اولمشدر .

روم ایلی والیسی ابوبکر پاشا اشقودره متصرفی قره محمود پاشا اوزرینه مأمور
 اولوب انجق سنه ماضیه ده بر ایش کور یه مدیکندن اول حوالی احواله و قوفلی
 برینک مأموریتی تصویب و بو امر مهمه سلانیک و جوهندن اولوب کمرک امینی
 بولنان سید مصطفی بک تنسیب اولنوب انجق کمرک اماتی موصل وزارت اولان
 مناصب سامیه دولتن اولدیغنه مبنی اول امرده مناصب دیوانیه دن بر منصب ایله

قدر و اعتباری بین الناس ترفیع و تنویه و بعده عهده سنه رتبه والای وزارت توجیه اولنق صورتی مناسب کورلمکله ربیع الآخرک اوچنجی کونی چاوش باشی کننج عثمان اغا عزل ایله یرینه اشبو مصطفی بک نصب اولمش و ماه مرقومک او اخرنده عهده سنه رتبه وزارتله روم ایلی ایالتی بالتوجیه ابو بکر پاشا خوتین محافظلغنه و خوتندن منفصل اولان فرهاد پاشا سلستره و الیلکنه تعیین اولنوب چاوشباشلیق دخی باشباقیقولی اولان عمر پاشا زاده عبدالله بکه احسان بیورلمشیدی . محمود پاشا ایسه حرکات سابقه سندن اظهار ندامله بوبابده اسپانیا قرالی توسیط ایتمکله اسپانیا قرالی دخی در سعادتده مقیم مصلحتکننداری واسطه سیله محمود پاشانک عفوی خصوصنه توسیط و شفاعت ایلمش اولدیغندن بونک ایچون شعبانک اوننجی کونی شیخ الاسلام قونانغنده عقد اولنان مجلس مخصوصک قراری موجبجه فیما بعد اشقودره سنجانغندن خارج محلالره قطعاً تجاوز ایتمک و خلاف رضا برکونه حال و حرکتده بولنماق شرطیله شعبانک اون طقوزنجی کونی عفو ایله وزارتی ابقا اولمشدر . و بوجمله اشقودره مسئله سی بتمش اولدیغندن مصطفی پاشا دخی غائله سزجه روم ایلی ایالتیله کامران قالمشدر .

برقاج سنه دنبرو ادرنه و فلبه طرفلرنده نشر شراره شر و شور ایدن طاغلی اشقیاسنک قهر و استیصاللرینه مأمور اولان (علو) علی پاشا بین اوزرار کوب و نزوله مقتدر و شجاعت ایله مشتهر اولوب آچه و مهماتجه دخی هر مسئولنه مساعده بیوریلهرق واقعا اشقیایی خلیجه تضییق ایلمش ایسه ده بتون بتون احما و ازاله لرینه ظفریاب اوله میوب اشقیای دخی وقت قرانق اوزره صورتا استیمان و فیما بعد شقاوتدن فراغت ایله هر نه طرفه کیدرسه برابر کیتیمک اوزره عهد و پیمان ایتدک لرینه الدانهرق برقاج کره باب عالی یه انها ایلدیکنندن هر تقدیر دولتجه بوکا وجود ویرلماش ایسه ده اصرارینه مبنی التماسنه مساعده اولنق لازم کلدیکنه و چونکه علی پاشا بومصاحت ایچون کندوسنه ارسال بیوریلان خزائن و سائره دن تمتع داعیه سنه دوشه رک بوما موریتی و سیله جلب مال و منفعت ایلدیکنندن معینته مأمور اولان عسکر و اغالر نظرنده شیشه نفوذی شکست و قدر و اعتباری پست اولمغله آرتق بومأرتیده بقا سندن دخی برفائده حاصل اوله میه جغه مبنی اشقیای مرقومه یی بالاستصحاب اناطولی یه حکمک اوزره خلال جمادی الاولاده عهده سنه اناطولی ایالتی توجیه بیورلمشیدی . فقط اشقیانک تعهد لرنده پایدار اولیه جقلری درکار اولدیغندن آنک اوزرنده بولنان چرمن سنجانغی ادرنه ده مرفوع الوزاره اقامت اوزره بولنان السید الحاج عبدی پاشایه ابقای وزارتیه توجیه و اشقیای مرقومه نک

اوزرلرینه وارمیوب انجماکاره انتظار ایله آماده بولمسی کندوسنه اشعار وتنبیه ایدلمشیدی . علی پاشانک اناطولی والیسی اولدینی اول حوالیده شیوع بولدیگی کبی اشقیانک سرکرده وایشه یازایانلری معیتدن روگردان وکماکان سالک مسلك عصیان اوللریله علی پاشا بیهوده افاتة فرصت ایلمش اولدیغنی اکلاویوب یالکز دأره سی خلقی واشقیادان براز عجزه ودربدرلر ایله کلیبولی یه طوغری عزیمت ایلدیگی معلوم اولیجق بعد ازین اناطولی یقه سنه یکمیوب کلیبولیده توقف ایلمسی کندوسنه امر واشعار اولمش ایسه ده امره امثال ایتیمه رک اناطولی یقه سنه عبور ایله منصبی جانبیه حرکت ایلمش اولدیغندن لاجل التادیب وزارتق رفع وبروسه جزیه مالندن سنوی التی بیك غروش معاش تعیین واوزرنده اولان اناطولی ایالتی اقدمجه صدارت کتخذالغندن منفصل اولان حاجی ابو بکر اغایه رتبه وزارت ایله توجیه اولندقدن صکره علی پاشایه کندوسی بالیکسریده اقامت ایتمک ودأره سی خلقتک بر مقدرانی بالیکسری متصرفی معیتنه وباقیسی اناطولی والیسنک یانه کوندرمک اوزره تحریرات اکیده یازلمسیله برابر شایدکه خوف مجازات ایله قیوسی خلقتی طاغتمیوبده بر طرفه کیتمک داعیه سنه دوشر ایسه بو حالده اجرای جزاسنه اقدام اولمسی ایچون قره عثمان اوغلرینه وسائر اول حوالی اغالرینه متعدد امرلر اصدار وارسال قلنمشیدی . فی الواقع علی پاشا رفع وزارت وبالیکسریده اقامت خبرینی آلدینیگی کبی کندوسنه خشیت طاری وخوف جان ایله تدبیردن عاری اوله رق قیوسی خلقتی تفریقه جسارت ایده میوب اول حوالیده سرسری کزرکن قره عثمان اوغلی حاجی عمر اغا اوغرینه تصادف ایتدیکنده مقتضای مأموریتی ایجابجه اوزرینه حرکت ایلمش ایسه ده معیتده کی آدملری قلیل اولدیغندن جزئی محاربه بدن صکره عودته مجبور اولوب انحق بووقعه علی پاشایه بتون بتون موجب توحش اولمش ودولتجه دخی علناً عاصی نظریه باقلمق لازم کمش ایسه ده عقیب محاربه ده صدر اعظم وشمیخ الاسلام وسائر لازم کلنلر طرفلرینه فریادنامه لراسالیله بو حرکتی برطور باغیانه اولیوب مجرد وقایة عرض ونفس ایچون ضروری وقوعه کیش بر کیفیت اولدیغنی وفیابعد مأمور اوله جنی خدمات دولت علیمه ده بذل جان ایده جکئی عرض وانها وحرکات سابقه سنک عفو وابقای وزارتیه بو حقارتدن تخلیصنی رجا ایلمش ومتعاقباً خانی ابوبکر پاشانک شفاعتنامه سی دخی کمش اولدیغنه بناء ابقای وزارتیه عهده سنه قرمان ایالتی احسان بیورلمشدر .

برمدت نبرو آدنه ایالتی سلستره والیسی فرهاد پاشانک الحاقاً عهده سنده اولدیغندن اکرچه طرفدن مسلم نسبیله اداره اولمقده اولوب انحق ایالت مرقومه نک والیدن

خلوی اطرافده اولان ارادل واشقیانک فرجه یاب و فقرای رعیتک دوچار اضطراب اولمیرینه بادی اولمغله ایالت مرقومه خلال شعبانده ایچایل متصرفی میرمیران یوسف پاشایه الحاقاً توجیه و ایچایل سنجاغنه طرفدن متسلم نصب ایله کندوسی آدنه یه عزتت ایدرک تسلط اشقیان اطرافه متفرق اولان رعایا و برایایی جلب و توطین ایلمسی کندویه با امر عالی تأکید و تنبیه اولنمشیدی . بونک اوزرینه هان برمدت نبرو آدنه جانبنده طور باغیانه ایله سرکشانه حرکت ایدرک حکومه قارشوکلان قارحی ایله طور اوغلتک و قارجینک کتخداسی حسن افندیگ اسلوب حکیماننه ایله برایکی آی ظرفنده جزای محلتجه بالاجرا بر بر سر مقطوعلری در سعادت توارد ایلمشدر .

بوسنه امرای مصر یه دن الفی محمد بک آدملری قری اها ایسنه زیاده ظلم ایتدکارندن شیخ شرقاوی یه مراجعت و اشتکای ایتدکارنده اودخی ابراهیم و مراد بکاره لدی المراجعه برندن جواب مساعد آله مدیغندن جامع ازهره کیدوب و علمانی باشنه جمع ایدوب عامه دنخی باشلرینه اجتماع ایتمکله مصرده اختلال رونما اولمغله ابراهیم بک بومظالمک وقوعنه کندوسنک رضاسی اولمدیغنی افاده سیله آنره خبر کوندرمش و والی پاشا ابراهیم بکک خانه سنه کیدوب امرایی و کبار علمانی جلب و جمع ایله فیابعد مظالم محدثه نک رفعی و صره حرمتک کماکان ارسالی و معیناتک اعطاسی اوزرینه طرفینی بارشدیروب برآی قدر بومنوال اوزره کیتمش ایسه ده آندن صکره مع زیاده حال سابق عودت و ظلم و تعدی دوام ایلمشدر .

شهزاده جامعی واعظی حمزه افندی بر قاق سنه دبرور رمضان شریف کونلری ایاصوفیه کبیرده خارج از آداب تصویر مسئله ایدوب سامعینی کولدی ردرک مجلس و عظمی ملعبه صبیانه دوندر مکله و بو کیفیت شان شریعت غرایه شین ویرر حالاتدن اولمغله کچن سنه رمضانده کندوسنه تنبیهات لازمه اجرا اولنمش ایکن متنصح اولیوب بورمضان شریف کونلرنده اولکیدن زیاده مغایر رضا اطوار و کفتاره اجترایلدیکنه مبنی لاجل التادیب اوائل شوالده وطن اصلیمی اولان آدنه جانبنه طرد اولندی .

بووانده موقع اجرا یه قونیلان موادخیر یه دن برسی دنخی بودرکه استانبولده حریق و قوغنده صویک بعض محارده قاتی حسینیه طولمه لرك لایقیله اعمالی ممکن اوله مدیغندن اطفاسنده عمرت چکلمکده اولسبیه بایزید و سلیمانیه و عثمانیه و لاله لی جامعلریله باغچه قوسنده واقع والده جامعی حولیلرنده دائماً صو ایله مملو طور مق اوزر برر حوض النشابورلمش ایدی و ذی الحجه نک یکرمنجی چهارشنبه کیجه سی ساعت ایکیده ایکن بالقی بازارینک طیشاروسنده واقع حصیر اسکله سنده ظهور ایدن حریقده بو حوضلر خیلی ایشه یارایوب صوجابنده سهولت کورلمشیدی نه چاره که استانبولک

اینه سی پک زیاده مستعد احتراق اولدیغندن اعانه روزکار ایله حریق مشد و طولمه لر ایله اوکی آله میوب اون بر ساعت تمت اوله رق بالق بازاری و طاشجیلر و بالمو مجیلر و کراسته جیلر و زیتون یاغجیلر و نعلبورلر و قوطیجیلر و قطار جیلر و سبتجیلر و پرنج مخزنلری و اخی چلبی جامعی طرفلری محترق اولوب براوجی تکفور طاغی اسکله سنه و براوجی اوزون چارشودن پرتو پاشا خانه منتهی اولمشدر .

* امور مالیه *

فی الاصل ملت اسلامیه ده یالکز تاریخ قمری مرعی ایکن خلفای عباسیه دن طایع لله عصر نده تسویه مصالح دولت ایچون قباچه بر حساب تقریبی اوله رق هر اوتوز برسنه قمریه اوتوز سنه شمسیه اعتبار ایله سنه شمسیه حسابی وضع اولنمشیدی . بعده دولت علیه ده دخی بوقاعده جاری اولمشدر . لکن سنه لر قمری و شهوری شمسی اولدیغندن هر اوتوز اوج سنه ده برسنه آتانه رق تصحیح اولنه کلمشدر . حتی بیک سکسان التی سنه هجریه سنه ده ابتدای مارت ذی الحجه نك یکر می بشنبی کونی واقع اوله رق سکسان یدی سنه سی ایچنده مارت واقع اولدیغنی حالده اولجه مارت اولان میری خدمتلری سکسان یدی سنه سی مارتنه محسوباً توجیه و سندلری اولوجهله تنظیم ایلمش و صکره دن تداخل سنه سی اولدیغنه کسب اطلاع اوله رق اول سندلرک سکسان سکر سنه سی محرمنده واقع مارت اولمق اوزره تصحیحلری فرمان بیورلمش ایدی . بوکا دائر صادر اولان فرمان عالی خزینه جلیله ده مقیددر صورتی زیرده (۶) رقمه ایراد اولنور .

و فی الاصل واردات دولت علیه نك بعضی قمری و بعضی شمسی اعتبار ایله آله کلدیکی حالده مصارفی اکا کوره مرتب اولدیغندن حساب خزینه فاسد اولوب از جمله سرحدلرده کی او جاقلق مواجی سنه قمریه حسابیه مرتب اولدیغنی حالده آنلر بو مواجی زمان ضبطی مارت اولان مقاطعات اصحابندن مطالبیه مجبور و اصحاب مقاطعات ایسه تداخل سنه سنه مارتک فقدانی حسیدله ادا دن امتناعه معذور اولدقارندن بالا آخره خزینه ره رجوع ایتمکله تصحیح حساب ایچون سلطان محمود خان اول حضر تلرینک عصر نده ثانیاً دفتر دار اولان الحاج عاطف مصطفی افندی طرفندن تقدیم ایلمش اولان تقریر ایضاح ماده یه مدار اوله جغندن صورتی ذیلده (۷) رقمه ایراد اولنور .

عاطف افندی بو بایده بوجه بالا بر اساس وضع ایدوب بعده (۱۲۰۵) سنه سنه ده کمر کچی اولان حسن اغا اصحاب کمرک حقنده شهور قمریه یی شهور شمسیه تحویل ایتمش ایسه ده مالکانه لر حقنده بو قاریشقلق باقی قالمش ایدی .

بوکره دفتردار بولنان مورلی عثمان افندی بودقیقه به کسب اطلاع ایدرک تدابیر لازمیه ابتدار ایلمشدر .

شویله که : اوتهدنبرو اقلام خزینه ده مقید اولان مقاطعات میره نك ماللری فی الاصل غروش اعتبار اولنمش ایسه ده بهر غروشنه ایکشر آچه واکر ثمن دیو وضع وقید اولنمش ایسه بهر بیک آچه سنه اون دردر آچه تفاوت حسنه نامیله ضم اولنه کلوب دفتردار عثمان افندی ایسه بوانساده درکار اولان مضایقه مالیه به مبنی واردات خزینه نك تزییدی ضمنتده مخارج و مواردینی تفتیش و تحقیق ایتمکده اولمسلیله اشبو تفاوت حسنه نامیله ضم اولنه کلان مبالغک سبب وضع و کیفیت نظامی تدقیقه ابتدار ایتمشیدی . خصوص مذکور ایسه کتبه و خلفای خزینه دن لدی السؤال سنه قریه نك ابتداسی محرم واتهاسی ذی الحجه اوله رق اصحاب تقویم نجوم حسابجه هر آی یکر می طقوز کون اون ایکی ساعت قرق درت دقیقه درکه جبر نقصان طریقله عامه نك اعتقادی اوزره بر آی یکر می طقوزه و بر آی اوتوزه کلور واول حساب اوزره بر سنه قریه اوچیوز الی درت کون سکز ساعت قرق سکز دقیقه اولور . بر سنه شمسیه دخی اوچیوز التمش بش کون بش ساعت قرق طقوز دقیقه (بر سنه شمسیه اوچیوز التمش بش کون بش ساعت قرق سکز دقیقه قرق بر ثانیه اولوب خزینه جه ثانیه اعتبارندن صرف نظرله قرق طقوز دقیقه اعتبار اولمشدر) اولدیغندن بر سنه قریه ایله بر سنه شمسیه بیننده اون کون ویکر می بر ساعت بر دقیقه تفاوت بولمغله محرمی مقاطعاتی ضبط ایدنلرک عدد ایاملرنده تساوی بولنمیوب فرضاً بر محرمی مقاطعه ایله بر مارتی مقاطعه نك ماللری یوز غروش اولسه محرمی مقاطعه صاحبی تقریباً اوچیوز الی درت کونده بر کره یوز غروش و مارتی مقاطعه صاحبی اوچیوز التمش بش کونده بر کره کذلک یوز غروش ویرمک ایجاب ایده جکی و مصارف میره نك اکثری سنه قریه اعتباریله رؤیت و اعتبار اولندیغندن هر اوتوز اوچ سنه ده بر کره بو مصارفک بر سنه لک قارشولنی مفقود اولق لازمکله جکی جهتله سنه شمسیه اعتباریله ضبط اولنان مقاطعاتک اموال مقیده لرینه تفاوت حسنه نامیله اونبر کونلک قدر مال ضم اولنه کیشدر دیو جواب ویره کلدکلرینه و حالبوکه بر غروش یوز یکر می آچه اولمسلیله اونبر کونلک تفاوته مقابل ضمی لازم کلان مالک مقداری یوزده اوچ بیجق آچه دن زیاده اولمغین مالی غروش اوله رق مقید اولان مقاطعاته ضم اولنان غروشده ایکی آچه نك ایکی قاتنه قریب اولدیغندن بشقه غروشده ایکی آچه بیکده اون التیدن زیاده اولمسلیله مالی ثمن دیو مقید اولان مقاطعات اوزرینه

ضم اولنان بيكده اون درت آچه اشبو غرو شده ايكي آچه دن دخى دون اولوب
مالى غروش اوله رق مقيد اولان مقاطعات ايله مالى ثمن ديو مقيد اولان مقاطعات
اوزرينه تفاوت حسنه ديو ضم اولنان مبالغك نسبتلىرى دخى يكديكره موافق
دوشمديكنه بناءً تفاوت حسن دينه جك يرده غلط لفظى اوله رق تفاوت حسنه
دينلمش اولديغى كچي بونك حسابنده دخى خزينه جه برياكلشاق اولديغى تعين
ايلمشدر . انجق بوياكلشاق حين وضع و ترتيبنده مى وقوعبولمشدر يوخسه وقت
بوقت سكه احوالنده وآچه و غروش اعتبارنده بك چوق تفاوت وقوعه كديكي
حالده هر سنه بو تفاوت حسنه ضمي مسئله سنك اكا توفيق اولنمامسندتمى نشأت
ايلمشدر بوراسى معلوم اوله مديغندن دفتر دار عثمان افندى بالجمه دفاتر عتيقه
وجديده ني تتبع واستقرا ايتدير مش ايسه ده بونك اصل وضع و تعيينه دائر بر قيده
ظفرياب اوله مامشدر . آكر چه بيك الى تاريخنده اسدى غروش یتمش آچه يه
راج اولديغى معلوم اولوب یتمش آچه حسابيله غرو شه ايكي آچه تفاوت حسنه
ضم اولنديغى حالده سنه شمسيه ايله سنه قريه بيننده كى اون كون يكر مى بر ساعت
بر دقيقه لى تفاوت موافق بولتمش ايسه ده مالى ثمن اوله رق مقيد اولان مقاطعات ده
جارى اولان بيكده اون درت آچه حسابنه توافق ايتديكندن بروجه صحت تحقيق
ماده قابل اوله ميوب هان مقاطعات ميريه دن مارتى اولنلرك مال ميريسى غروش ايسه
غرو شده ايكي آچه و ثمن ايسه بيكده اون درت آچه ضم اولنلق خزينه نك قاعده
قديمه سيدر ديمكدن غيرى محاسبينك بر جوابنرى قالماش و بوياكلش حساب ايله
ميرينك بهر سنه كللى ضرر و خسار كورديكى تين ايلمشدر . مقاطعات حرمين
ايله اسهام مقاطعاتنك تحقيقاتنه لى الابتدار حرمين مقاطعاتى مارتى اولوب حرمين
شريفين خزينه سنك اكثر مصارفى ايسه محرمى يعنى شهور عربيه حسابيله
ويريلور ايكن تفاوت ناميله بونلرك اموالنه برشى ضم اولنديغى كچي اسهام مقاطعاتى
دخى بويله ضم سز قالمش اولديغى ميدانه چيقمشدر . حالبوكه حرمين اوقافنه تابع
اولان عمارتلك اداره مى و خدمه سنك مرتب اولان وظائفنك وقت و زمانيله
اداسى خصوصلرنده وجوامع و خيرات سائر نك تعميراتنده مأمورلىرى دوچار
عجز واضطراب اولمشدر ايدى . و مقاطعات اسهامه هر سنه برر ايكيشر ودها
زياده سهم ضم اولنه كلور ايكن مؤخرأ ايراد جديد خزينه سنه ضبط ايله فيما بعد
بونلره سهم ضم اولنمامسى نظامه ربط اولتمش ايدى . عثمان افندى بورالزنى
تدقيق و حساب صحيح اوزره اون بركونك تفاوت بدلى مال ضم اولنديغى حالده
يالكلر مقاطعات ميريه دن بهر سنه يوزييك غروشندن زياده نفع ميرى حاصل

اوله جغنی و حین تنظیملرنده تفاوتی مسکوت عنه قلان حرمین مقاطعاتندن بوقاعده اوزره قرق بیک غروشدن زیاده جه واسهام مقاطعاتندن دخی التمش بیک غروشدن زیاده تفاوت حصوله کله رک او چنک مجموعندن تقریباً سنه ده درتیوز کیسه دن متجاوز فائده کوریه جگنی تحقیق ایتمسی اوزرینه بو بایده تنظیم ایلمش اولدینی بر قطعه تقریرنده خصوصات مشروحنی بسط و تمهید ایلدکن صکره فیابعد شهور رومیه اوزره ضبط اولنان میری و حرمین واسهام مقاطعاتنک اصل مال و بدل التزاملرینه اونبر کونلکی تحت اوزره حساب و ایکوز طقوز سنه سندن اعتبار ایله ضم و بهر سنه امانا و ماترملرندن تحصیل و استیفا اولنق خصوصنک نظام اتخاذاولتمسی تحریر واکرچه ایراد جدید خزینه سندن ضبط اولنان مقاطعاته فیابعد مال ضم اولنماق فرمان بیورلمش ایسه ده مصارف میریهنک اکثری یعنی یکریمی بیک کیسه آچقدن زیاده می شهور عربینه دن اعتبار ایله وریه کلوب حالبوکه اوتوز ایکی سنه شمسیه اوتوز اوج سنه قریه دیمک اولدیغندن بو بایده اغماض عین اولنور ایسه اولقدر مدت ظرفده بر سنه ک و ارداد ضایع اولق لازمکه جگنه و تفاوت ماده می سائر ضمایم محدثه قیلندن اولیوب میرینک حق صریحی اولدینی حالده فی الاصل نقصان حساب اولنمش اولسییه بو نظام تصحیح غاط دیمک اولدیغندن و ایراد جدید خزینه سندن مضبوط اولان مقاطعاتنک اشبو فضاه تفاوتی حین التزاملرنده ضم ایله ملتزمیری طرفندن تحصیل اولنه جنی جهته خزینه جدیدیه دخی کسر و نقصان ترتب ایتمه جگنه و بوندر استننا اولدینی تقدیرجه سائر دخی سرایتله اخلاص نظام مخذوری درکار بولدیغنه مبنی ایراد جدید خزینه سندن مضبوط اولان مقاطعات حقنده دخی بو نظامک اجرایی لازم کله جگنی درج و تذکیر ایلمش ایدی . تقریر مذکور مجلس مشورته قرائت اولندقه تصدیق و تصویب اولنوب اجراسنه اراده سنیه دخی تعلق ایتمکله اشبو ایکی یوز طقوز سنه سندن اعتباریه نظام اتخاذاولتمشدر .

بو نظام اقتضاسنجه قیود اقلامدن تحقیق اولدیغنه کوره مقاطعات میریه ایله اسهام مقاطعاتنک ضایمندن سنوی میری خزینه سنه اوچیوز سکسان درت کیسه یوز اللی یدی غروش و مقاطعات حرمین ضایمندن حرمین خزینه سنه سکسان بر کیسه بر غروش حاصل اولوب اولوقتک رایج و حسابنه کوره مبالغ مرقومه ایله خیلی ایش کوریلور ایدی بو وجهله عثمان افندی میری خزینه سنه بویله بر وقت مضایقه ده خلیجه سعی و خدمت ایلمش اولدینی مثللو بر منوال مشروح حرمین خزینه سندن اداره اولنان خیرات و مبراتک امر اداره سنده عظیم مشقتلر چکادیکی

زمانده مذکور اوقاف شریفه حقه دخی فائده لو برایشه موفق اولمشیدی بونجه سنه لردنبرو اولقدر واردات مشروعه نك ضایع اولوب کیتیمی حساب دقت اولمامقدن نشأت ایلمش اولسیله هر مأموریتده اهل وار بانك استخدای دولت ندرجه فائده لو اولدیغی بوندن دخی واضح و متین اولوب آنجق سلطان سلیمك مطمح نظری نظام جدید عسکرینی و مهمات حربیه یی تکثیر و بوکا مخصوص اولان وارداتی توفیر خصوصی اولوب جلد خامسده بیان اولدیغی وجهله واردات مذکوره دخی آروجه بر نظارت تحتنده اوله رق ایراد جدید خزینه سنه مربوط اولدیغندن مالیه ایشی ایکی چتال اولمش ایدی و عصرک اقبال و توجهی مأموریتی ایراد جدیده متعلق اولنلرده اوله رق متفذان عصر هپ بو طاقندن و بو طرفده ایدی و چونکه ایراد جدید خزینه سندن مضبوط اولان مقاطعاتک مقید اولان مال میریلری ایراد جدید خزینه سی طرفدن سنه بسنه میری خزینه سنه و یریلهرک فضله واردات هر نه اولورسه ایراد جدید خزینه سنه عائد اولق اوزره نظام ویرلمش اولدیغندن ایراد جدید دفتر دارینه قالسده بو مقاطعاتک ضمایم جدیده سی ایراد جدید خزینه سنه قالمق ایستردی عثمان افندینک مضایقه میریهی در میان ایدرک و ضمایم مذکوره میری خزینه سنک حق صریحی اولدیغی بیان ایلمسنه قارشو کلنه میهرک نظام جدید خزینه سندن مضبوط اولان مقاطعاتک ضمایم جدیده سی دخی بر منوال سابق میری خزینه سنه براغلمش ایسه ده بو کیفیت مزاج عصره چندان موافق دوشامش ایدوکی درکاردر اشته بو مثللو سبیلردن طولای عثمان افندی کرچه صادق و مستقیم برذاتدر و امر استیفایه بذل جهد ایدوب مهم امورک عهده سندن کلیمور لکن هرشیدن اقدام اولان مهمات سفریه و متفرعانه صرف ذهن ایتیمور بونلره سعی و تقید ایدر بر دفتر دار لازمدر یولوسوز لر سولینمکه و ایستلدیکی کبی قوللانیله بیله جک لین الجانب بر دفتر دار آرانمغه باشلامش ایدی .

او اوانده عثمان افندی اموال عطیه و موقوفه دخی نظام ویرمشیدی . شویله که :

قول مواجی و قالینجی علوفه بی و ترسانه صریفاتی کبی مصارف مقررده نك ترتیبات معینه لری اولوب بعضیسی تأخیره دوچار اولدنده دخی خزینه نك معجلات و ظهوراتندن علاوه واکمال اولتور و سنه آخرنده امنانک آچیق قلان مطلوباتی بعض ظهوراتدن و بقایای میریه دن تأدیه و اداره اولتور ایدی اما رمضان شریفلرده بعض خدمه دولت و کتبه اقلام و او جاقلو و سائره موقوف نامیله توزیع اولنان ایکی یوز الی کیسه آچمه دن زیاده عطیه لر ایله چونکه مناصب دولت علیه برسنه لک اوله رق توجیه اولنه کلدیکندن عید فطر عقینده اجرا اولنان سنه توجیهاتنده

ویریه کلان یوز یکر می کیسه دن زیاده عطایانک مجموعی اوچوز یتش کیسه آچه دن
 زیاده اولدینی و برمعین قارشولغی اولدینی حالده قسطنین مواجبک توزیعی هنگامه
 یعنی خزینه نك كثرت مصارفی ایامنه تصادف ایتمکدن ناشی ضروری تأخیری اقتضا
 و عطیه آله جق برقاچ یوز آدمک و باخصوص تذکره جی و مکتوبی افندیلر و بعض
 اقلام کتبه سی مثللو امر تعیشلری سنه ده بر کره و یریلان اشبو مال موقوفه
 موقوف اولانلرک وضع و شریفی اضطراب و مضایقه یه مبتلا ایلر ایدی و چونکه
 فائضی اون کیسه آچه دن زیاده اولان مقاطعات میریه ایراد جدید خزینه سی
 طرفدن ضبط اولنهرق بش سنه لك اعتباریله معجله سی میری خزینه سنه و یرمك
 نظام جدید شروطندن اولمغله ایکی یوز یدی سنه سی جمادی الاولاسنك یکر می
 طقوزنجی کونندن ایکی یوز سکز سنه سی جمادی الاولاسی غایتنه کلنجه بو وجهه
 ضبط اولنان مقاطعاتك فائضی طقسان درت بیک درتیوز یکر می درت بچق غروشه
 بالغ اولوب بش سنه لك حسابیله معجله سی اولان درتیوز یتش ایکی بیک یوز
 یکر می بو قدر غروشك آیلغه تقسیم ایله شهریه سنه اصابت ایدن اوتوز طقوز
 بیک اوچ یوز قرق اوچ غروش بو قدر پاره نك ماه بمه ایراد جدید خزینه سندن
 خزینه عامریه و یرلمسی اصول اتخاذ اولنمش اولدیغندن بعد ازمین بونك درت آیلغی
 اشبو ایکی یوز طقوز سنه سی رجیندن بدأ ایله ایراد جدید خزینه سنه توقیف
 اولنهرق اشبو عطایایه قارشولق طوتلمق اوزره بشقه محله صرف اولنماسی
 خصوصنك نظام اتخاذ اولنمش عثمان افندی بر قطعه تقریر ایله باب عالی یه انها
 ایتمکله لدی العرض اجراسنه اراده سنیه دخی صادر اولمشدر . عثمان افندی
 بوضورتله دخی برچوق ذواتك عندنده ممدوحیت قز اتمشدر .

شعبانك اون سکزنجی صالی کونی دیوان هایون ترتیب ایله صنوف عسکریه نك ایکی
 قسط مواجی چیقوب ماه مرقومك یکر می ایکنجی کونی دور واقع اولمغله بر معتاد
 طرف پادشاهیدن صدر اعظمه دور تشریفات ایله سلحدار اغا کلش و تشریفات معتاده
 ایله اعاده ایدلمشدر . چونکه اول وقت مواجب عسکریه درت قسطه تقسیم ایله بر
 قسطی محرمد و دیگر قسطی جمادی الاولیده و ایکی قسطی دخی شعبانده چیقوب
 وقبه آلتده دیوان هایونده حضور صدر اعظمیده تعداد او جاقله تسلیم ایله هر او جاغك
 مواجی کندو دائره لرنده اصحاب اسامی یه توزیع و اعطا اولنوب فقط سپاه و سلحدارانك
 علوفه لرینی باب عالیده صدر اعظم سرکی فرشیله اعطا ایده کلدیکندن ختامنده دور
 محاسبه اولنوب اول کون طرف شاهانه دن خط هایون ایله صدر اعظم تلطیف
 اولنور ایدی . زیرا خصوص مذکور دولت علیه ده امور معظمه دن اولوب علی الخصوص

بویله خزینہ نك وقت مضایقه - نده مواجبك تدارك واعطای خلیلی مهم بر مسئله ایدی .
 اشبو طقوز سنه سی محر منده چیقان بر قسط مواجبك مقداری ایکی بیک سکنز یوز
 سکسان بوقدر کیسه وجمادی الاولانك تقسیطی ایکی بیک سکنز یوز کیسه کسور
 بوقدر بیک آچه واشبو شعبانده ویریلان ایکی تقسیطك مقداری بش بیک آتی یوز
 طقسان آتی کیسه آتی بیک قرق ایکی آچه اولوب بر سنه لك مواجبك مقداری اون
 بر بیک اوچ یوز سکسان ایکی کیسه بوقدر آچه اولوب آنجق بو کیسه تعبیر لرندن
 مراد هر بری بشیوز غروشدن عبارت اولان کیسه رومیدر . دیوانده او جاقلره
 حین تقسیمنده کیسه دیوانی اعتباریله ویریلوردی . بر کیسه دیوانی درت یوز اون
 آتی غروش سکسان آچه در . بر سنه لك مواجب عسکر یه نك یكونی اولان اون بر
 بیک اوچ یوز بوقدر کیسه رومینك غیر از کسور یدی بیک اوچ یوز یکر می سکنز
 کیسه دیوانیسی یکچیر بلره و بیک اوچ یوز آلتمش آتی کیسه دیوانیسی جبه جیلره
 و بیک یوز یکر می درت کیسه دیوانیسی طوبخیلره و ایکی یوز سکسان ایکی کیسه
 دیوانیسی عر به جیلره و ایکی بیک اوچ یوز بوقدر کیسه دیوانیسی سپاه و سلحداران
 و باقیسی سائر او جاقلره توزیع اولتمش ایدی . آنجق بونلرك اکثری تداخلده اولوب
 بر منوال سابق اشبو طقوز سنه سی محر منده مواجب چیقدیغنه عموماً متقاعدینه ایکی
 یوز بش سنه سی مصر یعنی محرم و صفر و ربیع الاول مواجبی و اشکنجیلره سنه مرقومه
 رجب یعنی ربیع الآخر و جمادی الاولی و جمادی الآخر مواجبی و فقط طوبجی
 و عربی اشکنجیلرینه مستحق اولدقلری ایکی یوز سکنز لذذ یعنی شوال و ذی القعدة
 و ذی الحجه مواجبی اعطا قلمش ایدی . دیگر قسطلر دخی بوقیاس اوزره ایدی .
 الحاصل سنه ده اوچ دفعه بومواجبك تدارك واعطاسنده عسرت و مشقت چکیلوب
 سائر مصارف روزمره نك تسویه سنده میری خزینه سی دوچار انواع مشکلات اولمقده
 ایدی . بناء علی ذلك دفتر دار عثمان افندی وظیفه ماء ووریتی ایفا ایدیه بیلمك و كرك
 نزد دولتده و كرك انظار انامده مسؤلیتدن تخلص كر بیان ایتمك ایچون خزینه نك
 حقی اولان خصوصلرده آچه سكد بر مزدی . آنجق دولت علیه اشبو عتیق او جاقلرك
 مواجبی اعطا یتمكده اولدیغی حالده بر طرفدن دخی عساكر معلمه ترتیبی اینه و ادوات
 و مهمات حربیه نك اسول جدیده اوزره تهیئه و اكلیله مشغول اولدیغندن بوكا
 قارشولق ترتیب ایلدیکی ایراد جدید خزینه سنه واردات جدیده تدارك نه اعتنا اولتمق
 لازم كلكله جزوی و کلی هر نه طرفدن یکی واردات خاطره كلسه هان ایراد جدید
 خزینه سنه قید و الحاق اولتمق ماترم بولندیغنه و عثمان افندی ایسه وظیفه مخصوصه سی
 اولان مصالح میرینه نك حسن اداره سنه حصر افكار ایدرك بونابده متنفذان عصری

کندی علیهنده بولندردیغنه مبنی مهمات سفریه عمتسا ایتیمور دیو شعبانک
یکرمی یننجی کونی عزل ایله برینه مالکانه خلیفه سی اولان شرتجی زاده دامادی
محمد امین افندی دفتردار اولمشدر . محمد امین افندی واقعا آنلرک استدیکی صورتده
قوللانیلور برذات ایدی . لیکن امور مالیه نك بارکران مشکلاتی آلتنده ازیله رك
نهایت استغفایه مجبور اولدینی محلمده بیان اولنه جقدر .

شوالک دردنجی کونی بر معتاد سنه باشی توجیهاتی واقع اولوب خدمه باب عالی ایله
مناصب دیوانیه احبابنک اکثری ایقا اولدینی کبی ایالات والویه منصبلرینک دخی
اکثری بالابقا فقط بعض ولات و متصرفینک تبدیلی صره سنده مورده ایالتی بندر
محافظی حسن پاشایه و سلستره ایالتی چرمن سنجاغنه الحاقاً طاعنلواشقیاسی اوزرینه
مامور اولان چرمن سنجاغی متصرفی حاجی عبدی پاشایه توجیه اولنوب انجق
مورده حوالینک نزا کتته مبنی حسن پاشا طرفدن نصب و تعیین اولنه جق متسلمک
مستقیم و اولحوالی احوالنه واقف اولسی لازمه حالدن اولسلیه یکچیری کتابتدن
منفصل مورده لی تجلی افندی مورده ایالتنه متسلم نصب اولنه رق حضور صدر عالیده
خلعتی کیدرلمش و دفتردار سابق مورده لی عثمان افندینک بالاده مذکور ترتیبی
اوزره مال موقوف قارشولانی محفوظ و موجود اولدیغندن خواجکان و کتبه
اقلامک عطیه معتاده لره دخی اعطا بیورلمشدر .

* بعض وقیات *

بروسه لی اسماعیل حتی خلفاسندن چورلیده ساکن اولان پرتوی افندینک خلفاسندن
وتکیه شیخلرینک دانشمنداندن اسکدارده هدای آستانه سی شیخی محمد درویش
افندی عرق النساء علتته مبتلا و برقاچ آی بونکله مضطرب اوله رق نهایت ایرتی
خرقه حیاتدن قطع رسته امید ایتکله هدای آستانه سی مشیختی اوچنجی مخدومی
شهاب الدین افندی یه ترک و اوزرنده بولسان بعض وظائفی بین الحادیم توزیع
ووصایاسنی ایفایتدکن بش اون کون صکره سنی یتمش سکره بالغ اولدینی حلاله
شعبانک اون التنجی بازار کیکجه سی عازم زاویه عقبا اولمشدر .

خلال رمضان شریفده دخی اناطولی صدارتی پایهلولردن سلا نیکی پیری مصطفی
پاشانک اوغلی و پیری زاده عثمان ملا افندینک دامادی اولان محمد سعید بک نیت
صیام ابدی ایله امساک و سفره حیاتی نعم ناکوار دنیادن پیر و پاک ایلمشدر .

بوسنه وجوه حجاجدن سابق ولاحق مکه مکرمه قاضیلری اولان درزی حسین
اغا زاده محمود افندی و شیخ الاسلام اسبق محمد ملازاده محمد شریف افندی ایله
اجله رجالدن سید فیض الله افندی وفات ایلمشدر .

فیض الله افندی . مہری دلال باشیسی مصطفیٰ اغانک اوغلی اولوب بیک یوز الی سکرزده باش محاسبه قلمنه مأمور و طقسان التیده ذمت خلیفه سنی و برسنه صکره دفتردار و طقسان سکرزده حاجی مصطفیٰ افندیکن و فائنده یرینه رئیس الکتاب اولمشیدی . واکر چه کندوسنک معلوماتی امور حسابیه و اصول اقلام خزینہ یه منحصر اوله رق ریاسته اهلیتی اولمدیغی درکار و اولوقت خیری افندی و فیضی پاشا کبی معزولار و راشد افندی کبی بکلکچی و عبدالله بری افندی کبی مکتوبچی و سائرلر و ارایکن فیض الله افندیکن ریاسته کتورلمسندہ هیچ بر معنی یوق ایسه ده خلیل حمید پاشا براهیتلو رئیسک استخدامی کندویه مضر کوردرک جاهل و فن کتابتده راجل برنی رئیس ایدوبده امور ریاستی کندو اداره ایتمک و او صرده مشهور نظیف افندی دخی دفتردار قلعه قایلرلش اولمق خصوصلرینی کندو حقتده فائده لو مطالعه و اجتهاد و بو خولیا یه مبنی فیض الله افندی یی مقام ریاسته اقعاد ایتمشیدی حالبوکه بو آنه قدر دفتردار قپوسندن نشأت ایدوب باب عالی اقلامی فنونیه الفتی اولمانلره ریاست توجیبهی مسبوق بالمثل دکل ایدی . خلیل حمید پاشانک زوال اقبالدن صکره فیض الله افندی دخی آنک طرفدارلنی تمهتیه استانکوی جزیره سنه نفی اولنوب و بعد الاطلاق اردوی هایونده چاوشباشی اولوب راشد افندیکن در سعادتہ عودتندہ فیض الله افندی مقدماریاست ایتمشیدی یه ینہ ایدر دینلهرک رئیس نصب اولمش ایسه ده او امری رسید ایتمکن غیری برایشه یارامدیغی کوریلهرک قرق کون صکره عزل اولمشدر . بعده ینہ دفتردار و کتخدا اولوب ایکی یوز بشده کتخذالقدن عزل ایله قبریسه نفی وایکی یوز التیده اطلاق ایله بعض مأموریتلرده استخدام اولتمقده ایکن بوسنه بالاستیدان حج شریفه عزیمت ایدوب بعدالحج جوار مکہ مکرمه ده شیخ محمود نام محلمده فوت اولمشدر . ترجمه حالی تحریر صدندہ فائق افندی دیرکه متوفای مزبور صورتا اخلاق حمیده و اوصاف پسندیده ایله مشهور و معنی نفاق سیرت وردی خصلت اولدقلری زبازد جمهور و یالکیز فن حسابدن خبردار اولدیغی معلوم اهل شعوردر تجاوزالله عن سیناته العهده علی الراوی .

* بعض اخبار خارجیہ *

بوندن اقدم سفارتله انکلترده کوندرلش اولان پناه افندی زاده یوسف آگاه افندی لوندرده لدی الوصول مظهر حسن قبول اوله رق انکلتره قرالیله کیفیت ملاقاته و نامه هایون ایله هداای سنیهنک صورت تسلیمه دائر بو ائنده باب عالی به تحریراتی کلشدر .

مومی الیه اول اورویا یه کوندریلان اقامت ایلچیمی اولدیغندن برنجی عریضه می

اولان تحریرات مذکورہ نیک تاریخمزمہ درجی مناسب کورلمکله ذیلده (۸)
رقمیه قید اولنور .

بو ائناده ظهوره کلان فرانسه بیوک اختلالنک هر طرفه سر پندیسی طوقه رق
اوروپا بردور جدیده داخل اولوق اوزره اولوب بو احوالک دولت علیه دخی چوق
تأثیراتی اولدیغندن بوکا دائر بروجه آتی براز معلومات ویرلمک مناسب کورلمشدر .

* فرانسه اختلالنک کیفیت ظهوریله بعض وقوعات متفرعه سی *

جلد اولده بیان اولدنی اوزره فؤدالیتہ عصرنده اوروپا اهالیسی اوچ صنف
اوزره اولوب برنجیسی اصلزادکان وایکنجیسی پاپاس طاقی اوله رق بو ایکی
صنف انواع امتیازات و مساعداته مظهر اولدقنری حالده صنف ثالث یعنی آحاد
ناس طاقنک کیسی اسیر وکیسی اسیر کبی خوار وحقیر اوله رق اصلزادکان
نظرنده بیانی انساندن عد اولنمز لر ایدی .

محاربات صلیبیه مناسبتیه فرنکلر ممالک شرقیه یه کلوبده ملت اسلامه ده کی حریت
و سربستی کوردکلری کبی کوزلری آچیله رق انسانده احوال طبیعه دن اولان
حریت سوداسی جمله سنک افکارینی صارمش اولدیغندن ارتق بونلر اولکی حالده
قوللانیله میوب رفته رفته کندولرینه بعض مساعدات اعطاسنه مجبوریت کش ایدی .
انکلیزلرک مزاجلرنده درکار اولان وقار و تمکین حسیلله انکلترده بر طرفدن
اهالی درجه درجه مظهر مساعدات اولدنی کبی حکومتک دخی حرکاتی بعض
شرائط ایله مقید اوله رق حکومت مشروطه تأسس ایلمش و افکار مذهبیجه
خلق سربست براغیلوب بناء علیه اوراده پرستان مذهبی شایع اولمشدر .

المانیاده دخی ایجاب حال وزمانه کوره ایکی صنف ممتازک امتیازاتی حقنده تعدیلات
لازمه اجرا اولنه کلشدر . انجق ایمپراطورلر ایتالیا ده کی نفوذلرینی محافظه ایچون
بر طرفن اصلزادکانه زیاده مساعده ایله حسن معامله وبر طرفدن دخی پاپالره معامله
بالجامله ایتکه مجبور اولدقنرندن المانیای اصلزادکانی زیاده قوت بولوب رفته رفته بر
حکمدار مستقل اولمشدر . و المانیاهالیسی دخی بالتدریج مظهر مساعدات اولوب
فقط بوصرده المانیانک جهت شالیه سنده پروستان مذهبی غلبه ایتشدر و اولطرفده
بولنان براندو بورغ مارکیسی سائرندن زیاده قوت بوله رق پروسیا قرالی عنوانیه
ایمپراطورلره معارض اولمشدر .

فرانسه یه کلنجه فؤاد الیتہ عصرلرنده شایع اولان مظالم و تعدیاتدن فرانسزلرک
جانلری یانوب مؤخرأ فرانسه قرالری بو اصولک العاسنه ظفریاب اولمشلر ایسه ده

املاك و اراضينك اكثرى ايكي صنف ممتازك يعنى اصلزادكان ايله پاپاس و بسقپوسلرك يندنه قالهرق صنف ثالث يعنى آحاد ناس صنفى آنلرك خدمتكارى حكمنده ذليل و حقير اولدقلى حالده باركران تكاليف دولت هپ آنلرك اوزرنده ايدى بوكا مقابل دولت طرفدن برمعاملهء تسامتكارى كوره جك برده دولتك اصول ادارهسى و اموال ميريهنك صورتحصيليهسى بك يولسز اولهرق حكومت مأمورلرندن كوردكلرى غدر و حقارتدن فضله ملتزمردن دخى ظلم و تعدى كورلردى .

فرانسه قراللى دخى حكومت مطلقه لرى خلدن وقايه ضمننده اهالىنى هر درلو سر بستىء افكار پولتقيه و مذهبيه دن محروم طوته كلدكلرندن اهالى آرتق حكومتدن اشتكا اتمكه باشلامشلك ايدى . و فؤاداليمه اصولنك الغاسى ايچون قرالار اصلزادكانى تزيل ايله آحاد ناسى بر درجه ترفيع ايدوب صكرده دن ماتك قوتى درك ايدرك اصلزادكان ايله پاپاس صنفلىنى اله آلمغه باشلاديلر ايسه ده اولكى بيوك اصلزادكان قالمبوب موجود اولنلرك دخى قوت و كفايتلرى اولمديغندن حال و حر كتلى حكومت قراليه حقدنه اهالينك تفرندن بشقه بر شئى منتيج اولمامشدر . و فرانسه ايالاتنك بعضيسنده رومه قانونى و بعضيسنده عادت و تعامل جارى اولدنى جهتمه فصل دعاويده كوريلان صعوبتلردن بشقه بيوك و چوك حكام مسندلى آچه ايله آنوب صائيلور بر طريق اولمسيله اكثرثيا اجراى عدل و حقانيت اولنه مازدى .

بر بيوك فناللى دخى بو ايدى كه : قرال و حكومت طرفندن مقبول اوليان كيمسه لر و يا خود مقر بين قرالينك سومديكى ذاتلر عليهنه امر نامه لر اصدار اولنور . و بونلرده كيمك اسمى مندرج ايسه بلااستنطاق پارس شهرنده باستيل ناميله معروف اولان قاعه ماندى حبسخانه يه القا قلدور ايدى .

بو امر نامه لك سوء استعمالى بر درجه يه وارميشدى كه اسم محلى آچيق اولهرق اصدار ايديلور و ياره ايله صائيلور ايدى حتى بر فاحشه قارى سر بستجه اجراى خشيات ايچون بويه آچيق امر نامه الهرق قوجه سنك اسمنى درج ايله حبس ايندرميشدى . حالبوكه آحاد ناس اولكى كبي جاهل متحمل اولمبوب دولتك سوء ادارهسى حقدنه افكار و مطالعه لرى علنا سويلمكه و بلهكه اصلزادلك و پاپاسلق ايله برابر قراللى استهزا ايلمكه باشلامشيدى . و شهرلر اهالىسى خيليجه تربيه و معلومات كسب ايدرك معاملات عاديه ده اصلزادكان ايله بر مساوات حاله كيش اولدقلى حالده معاملات رسميه ده مساوات اولمبوب هله اصلزادكاندن اولمديجه كيمسهنك اردولرده ضابط صفتيه بولنه مامسى كبي اصلزادكانه اعطا اولنان امتيازلى صنف ثالثدن اولان

شهریله پک زیاده تأثیر ایدرک معاملات رسمیده مساوات تحصیل ایلمک املنه دوشمش ایدیلر .

واکر چه سرستیء افکاره دائر تألیف اولمش اولان کتابلر یساغ ایدیه رک چوغی احراق اولمش ایسه ده خاق زیاده مطالعه لینه حریص اوله رق برر تقریبه بولوب او قورلردی زیرا لویی قاتورز زماندنبرو اهالی ایجه معلومات کسب ایدرک خیلی کیمسه لر تحصیل علوم و معارف ایله احوال علمی او کر تمکه وسوء اداره نه دیمک اولدیغی اکلامغه باشلامشیدی . وشهر یار آرتق صنفین ممتازینک وضع وطورینی چکه مز اولمشیدی . وعلوم و معارف و صنایع و تجارتک ترقی وتوسعی حسبیه فرانسه نك ثروتی طبقه علیایه واصل اولدیغی حالده دولتک روز افزون اولان مضایقه مایه سی بر غریب کیفیت اولوب امتیازات و معافیاتک الغاسندن بشقه بوکا بر چاره دخی یوغیدی . وپاپاسلر بز دولته دعا ایدیورز . واصلزادکان دخی بز لر دولت ایچون میدان حریده قان دوکه یورز دیو امتیازات و معافیاتک ابقاسنی ادعا ایدرلر و صنف ثالث طرفدن پاپاسلره دولته دعا ایتمک ویرکو اعطاسنه مانع دکلدر دینلور واصلزادکانه دخی عجا سائر خلقک محار بهلرده دوکیلان قانلری صومیدر دیو سؤال ایدیلور ایدی .

شو حالاته نظر آرتق اسکی عادات و اصولک تجدیدیه فرانسه ایچون بریکی چغر آچلمنک زمانی ککش دیمک اولوب وکلا ایچنده بوکا مقتدر بعض ذوات دخی موجود اوله رق خیلی تدابیر اورته یه قونلمش ایسه ده اون التتجی لویی متردد و متلون اولوب اکثریا وکلاسنی یاری یولده براقدیغندن بونجه تدابیر حسنه و تشبثات مستحسنة هب ثمره سز قالمشدر حالبوکه بویله شدتلو بوره زماننده حکمدار اولان ذات مقامنده ثبات ایله جسورانه و جانسپارانه دومنی آله المازایسه اقتی غالب کله رک وروزکار قولاغوز اوله رق سفینه دولتک تهلکه یه اوغرامسی ملحوظ قویدر .

فرانسه نك بو حال اختلالنه احجاب خیرت و فطانت نظر تأسف ایله باقوب اصل سببی فرانسه نك سیاق و سباق وقایع تاریخیه سنده بوله رق شوکا بوکا چندان عزو و اسناد ایلمز لردی آحاد ناس ایسه مشهود اولان فسالقلرک اسباب صحیحه سنی آرامیوب بین الناس عادت اولدیغی اوزره منحصرأ بعض ذواتی نشانه نفرین و لغت و جمله دن اول هر فغانی قرالیچه یه حمل ایله هر یرده آنی موضوع بحث فصل و مذمت ایدرلردی . و فی الواقع قرالیچه دخی نزد قرالیده پک نفوذلی اولدیغی حالده ذوق و صفا و احتشام ایچون چوق پاره صرف ایلر و سودکلرینه ایستدیکی قدر عطیه و یرر ایدی . بناء علی ذلك هر کسک لساننده قرال و قرالیچه نك فصل و مذمتی سویلنوردی .

مع مافیہ بعض اراذل ناسدن بشقہ کمسنہ اختلال افکارندہ اولمدیغندن فرانسه قرالی
غیور وجسور بردات اولوبده همان اصلزادکان ایله پاپاس کروهنسک امتیازات
ومعافیاتی الغایتش وحسن اداره وتصرف یولنی طومتش اولسیدی فرانسه نك
احوالنی سکنته سزجه اصلاح ایده بیلوردی لکن لوی اجرا آنده کوشک
طاوراندیغندن اصلاحاته دائر برشی پایه مدی .

جلد اولده بیان اولندیغنی اوزره فرانسه مالیه ناظری بولنان تورغو ایجه اصلاحات
یولنی طومتش ایکن تصادف ایله دیکی مشکلاتدن طولانی استغفایه مجبور اولمشیدی
آنک یرینه مالیه ناظری نصب اولنان نکر ایسه صرافلقدن کله بر آدم اوله رق
استقراض معاملاتی ترویج ایله بر مدت دولتی طولاندریحیاق ایله اداره یه قیام
ایتمشیدی . بونکله برابر مصارف دولتده اداره وتصرف یولنی طوتوب رساله
قالقو بر موازنه دفتری تنظیم وتدابیر بر کزیده سنی رقم ایله ارانه وویرکو وتکالیف
سائر نك مساوات اوزره استیفاسی کی بعض ملاحظات مهمه علاوه ایله نشر
ایتمشیدی بورساله آحاد ناس عندنده پک مقبول اولمش ایسه ده اصلزادکان ایله
پاپاسلر طرفندن قبول اولندیغنی جهته اصحاب نفوذدن خیلی دشمنلر قز انوب نهایت
استغفایه مجبور اوله رق مشکلات مالیه یه باشلوجه بر چاره بولمقسزین منفصل اولمشدر .
اول ائنده ایسه امریقا مسئله سندن طولانی واقع اولان محاربه لرده فرانسه نك
مضایقه مالیه سی دوبالا اولدقدن بشقہ فرانسر لرك افکاری بتون بتون سربسیت
سوداسنه صارمش ایدی .

ایشته بویله فرانسه نك برغانه ملی وقتنده نكر انفصالی وقوعبولوب یرینه مالیه
ناظری نصب اولنان (قالون) خفیف الشعور وجهل جسور بر شخص اوله رق
هرشیئی قولای کورددی . وغایت مسرف وذوق وصفایه مائل اولدیغنی جهته
هرضیافت وجنبشلرده حاضر بولنه رق قرال وقرالیچه وپرنس لرك زائد ویهوده
مصرفلری ایچون دائمًا پاره تدارک ومامورینک معاشلرینی وقییه اعطا ایتمدیکندن
جمله سنک عندنده مقبول اولمشیدی . قالون ایسه شارلاتان و برنوع طولاندریحی
اولوب حل افلاسه دوشمک اوزره اولان بعض تجبارک یابدیغنی کی خزیننه نك
مضایقه سنی کتم واخفا ایچون قرال ضیافتلرنده فوق العاده احتشام ارانه سیله خاتی
الدامق یولنی طوته رق ذرت سنه مدت ماموریتنده انواع استقراضات ایله دیون دولته
شو قدر یوز ملیونلر علاوه ایتمشیدی . نهایت ایش کندیغنی کونستروب حقیقت حالی
اخفا ارتق قابل اولماغله بیک ایکیوز بر سنه هجریه سنده عجماله دردینه بر چاره بولمق
ایچون بر معتبران ملت مجلسی تشکیل ایتمدی ررك اصلزادکان وپاپاس صنفلری مستنا

اولمآق اوزره بر عمومی ویرکو طرحی تکلیف ایتدکده مجلس اعضای کندو امتیازلرینه طوقه جنی جهته بونی قبول ایتدکدرندن قالون دخی استعفا و محاسبه و محاکمه دن خوفله انکلتربه فرار ایلمشدر .

اگر تورغونک تدابیری تمامیه موقع اجرایه قونلمش اولسیدی فرانسه نك حالی کدرسزجه برحسن صورت کسب ایده بیلوردی . اما نکرک استقراض او یونلری و صرف اصول دفتری ایله امور دولتک اصلاحی قابل اولدیغی کبی قالونک شارلاتانغیایه دخی مشکلات کزدابلری آچلمقدن بشقه بر نتیجه حاصل اولمیه جنی درکار ایدی لکن آنک طولاندریخیغنه آلدانیلوب خزینه آچغنی کوزلجه قیادی دیو مدح و ثنا اولنورکن بویله ایشک ایچ یوزی میدانه چیقوبده تدابیری هپ لاف و کذافدن عبارت اولدیغی معلوم اولیجق امریقاده سر بسیت افکارینه دوکیش اولان اصلزادگان دخی آحاد ناس صنفیه برابر بو حالدن تشکی ایلمکه و بونک چاره سنی جستجو ایدرک کیمی انکلتزه اصول اداره سنی تحسین و کیمی امریقاده احداث اولنان جمهوریت اصولانی ترجیح ایله هر کس افکارینی سر بسیت اوزره سویلمکه باشلامشیدی . بونکله برابر بعض دور اندیشان عصر دن بشقه کمنه کله جک بلاینی دوشنمیوب هر کس ذوق و صفایه دوام ایلردی . قراله وقرالیچه و پرنسدر دخی هر شیدن بی خبر اوله رق موده و ملعبه و انواع احتشام و اسرافات ایله مشغول ایدیلر .

فرانسه ایسه حال اختلالده و دولتک مضایقه مالیه سی درجه کالده اولوب بر عمومی ویرکو طرحه دخی اصلزادگان ایله پاپاسلر مانع اولدیغندن تمغالو کاغد دن رسومات و اراضیدن برنوع ویرکو اخذینه قرار ویرلمش ایسه ده بوکا دخی پارس پارلامنتوسی طرفدن مخالفت کوسترلمش و خالق دخی ارتق هر خصوصه قییل و قال ایدر اولدقنندن پارلامنتویه زیاده طرفدارلق ایدرک و کلاینی علنی تحقیر ایلمکه باشلدقنندن ایکی آی صکره بو قرارک اجرا سندن واز کچلمشدر . حکومتک بویله کیروله مسی ایسه خلقی بتون بتون شمارتمشدر و ارتق بشقه چاره بولنه میوب پارلامنتو مجلسی اعضاسندن بعضیلری جلب اولنهرق مجلس عمومینک جمع و تشکیلی و عدیله درتیوز قرق ملیون فرانقلق بر استقراض عقدینه ارضا اولتمشدر ایسه ده پارلامنتو مجلسی اعضاسندن بعضیلری وعلی الخصوص خاندان قرالینک دیگر شعبه سندن مشهور لویی فلیک پدری اولان اورلیان دوقه سی فلیب قرال دخی مجلسده حاضر اولدیغی حالده غایت سرت سوزلرایله پروتستو ایتدکدرندن قرال کوچنوب پارلامنتونک تقلیل نفوذی حقنده بر نظام وضع ایتسی اوزرینه اعضای دلکیر اوله رق بیک اکیوزو ایکی سنه هجریه سنده نشر ایتدکبری بیاننامه ده شرائط اساسیه دولتدن بحثله قرالک یالکنز

مجلس عمومی معرفتیه ویرکو و تکالیف سائرہ وضعہ حق اولوب حکامک عزانه حق اولدیغنی و پارلامنتولرک قوانین دولته مغایر اولان نظاماتی قید ایتمامکه حق اولدیغنی اعلان ایتمشدر .

اهالی دخی قرالک وظائفی و کندولرینسک حقوقنی اوکرنوب و شروط دولت نصل شی ایمش دیو تجسسسه قالدیشوب بعض محلمرده نابجا حرکتلر ظهوره کیش وارادل ناس زقافله قرال وقرالیچه علیهنه باغرشمغه باشلامش ایدی .

خزینهدده ایسه برآقچه اولدیغندن هرکس دولتک اعلان افلاس ایتمسنه منتظر اولدیغنی حالده (نکر) تکرار مالیه نظارتنه کتورلمشدر .

نکر اهالی عندنده مقبول اولوب قرال طرفندن دخی مجلس عمومینک جمع و تشکیلی وعد اولمش اولدیغندن ممنون ایدی .

حالبوکه بویله برقاریشق و قتده یوز سنه دنبرو تشکل ایتماش برعموم مجلسنک لسانه آلمشی پک بیوک خطا ایکن پارلامنتو اعضاسی ظاهراً خالقک حقوقنی حمایه و حقیقه کندو امتیازلرینی وقایه ایچون حکومته مخالفتله قرالک نفوذینی کسر ایتمک اوزره بونی درمیان ایدوب قرال دخی براسقراض ایچون اجراسنی وعد ایتمش و (نکر) ده اقرارینه باصوب همان مجلس عمومی اعضاسنک اجتماعی حقنده لازم کلان تدابیره تشبث ایلمش ایدی .

اولوقت پارلامنتولر اعضاسنک اکثری اصلزادکان ایله پایاس طاقتندن و بعض امتیازلو اصنافک منتخب مبعوثلرندن عبارت اولدیغنی حالده پارس پارلامنتوسنی اعضاسی اویله بر بیوک خطا ایدوب صکره دن خالقک پک متحرک اولدیغنی کورینجک خوف ایتمکه باشلامشدر ایسه ده ارتق بوسوزی کیرو الملق قابل اوله مدیغندن باری مجلس عمومینک اجتماعنده صنف ثالثک غلبه ایده مامسی چارده سنی دوشونهرک یوز سنه مقدم تجمع ایدن مجلس عمومی اعضاسنک اجتماع و مذاکره لری هیئت واحده اوزره دکل ایتمش بوکره دخی اوچ صنفک آرو آرو مذاکره ایتمسنه و برصنف دیگر ایکی صنفک قرارینی بکنمز ایسه ابطال ایده بیلمسنه قرار ویرلمدیکجه مجلس عمومی اعضاسنک جمعنه دائر اولان اوامر قرالیهینی قید ایده میه جکلرینی بیان ایلمشدر .

حالبوکه ایشک بو پرسه یه کلمسسه سبب کندولری اولدیغنی حالده صکره دن بویله مخالفت قیدینه دوشدکلرندن دفعه آنلر دخی انظار عمومیه دن دوشوب خالقک هدف طعن و تشنیعی اوله رق همان هریرده حقوق اهالی ایله امتیازات و معافیات مسئله لری کرکی کبی موضوع بحث اولمغه باشلامشدر .

اوریلان دوقه سیله خیلی کنج اصلزادکان و کتبه و غزته مؤلفلری و حتی مالیه ناظری

نکر دخی صنف ثالث طرفداری اولدوقلرندن اوکی آئنه میوب هریره اهلینک شکایاتندن بشقه سوز ایشیدلنز اولدی .

ایکی صنف ممتازدن مجلس عمومیده نقدر اعضا بولنه جق ایسه صنف ثالث مبعوثاننک عددی دخی او قدر اولوق و جمله سی برهیت اوله رق فرداً فرداً رأی ویرلک صورتی اهالی طرفندن طلب اولنوردی .

و مجلس عمومی نک صورت ترتیب و تشکیلی حقنده هر طرفدن بحثلر ایراد اولنله رق در حال برطاقم رساله لر ظهور ایتمش و بریسنده سؤال و جواب طرزنده « صنف ثالث شمندی یه قدر نه ایدی هیچ برشی دکل ایدی نه اولمیدر هرشی اولمیدر » دیو مندرج اولان مسئله میدانله چیقیدینی کی افکار عمومی یه تعریف اولنماز مرتبه تأثیر ایلمش ایدی .

صنف ثالث مبعوثانینک عددجه دیگر ایکی صنف ممتاز مبعوثانینه مساوی اولمسی ایچون نکر قرالک اراده سنی تحصیل ایلمش ایسه ده مجلس نصل ترکیب ایده جک و نوجهله مذاکره ایلله جک بوراسنه هنوز برقرار ویریه مامشیدی .

حالبوکه مسئله یالکیز خزینه آچغنی قیامقندن عبارت اولمیوب باشلوجه ماده ویرکو و تکالیف سائره نک صورت توزیمی مسئله سی اولدیغندن صنفین ممتازین ایلله صنف ثالثدن ترکیب ایده جک مجلسک اجتماعنده لازم کلان ترتیبات و تدابیرک اولجه بالمطالعہ قرارلشدیرلمسی فرائض حالدن ایکن نکر کندو نفوذ و اعتبارینه کوه نهرک بومثللو مسئله لر یقرددی ایلله تسویه ایدیویرمک زعمنده بولندیغندن بویله بر اساسلو ماده یه اهمیت ویرمیه رک اقدینک اوکنه دوشوب کیدر وکله جک سیلی سمت مطلوبه چویرمک اوزره وقتیلله جدولر آچق لازم کلور ایکن یالکیز جدوللو دفترلر ایلله ایش برظن ایدر ایدی .

یوخسه نکر ایجاب حالی پولتیقه کوزیله کوروبده اهالی بی بویولده ممنون ایتمش اولمیدی بلکه اختلالی منع ایده بیلوردی . فقط نکرک نظری امور ملکیه نک او قدر دقایقنه اولاشمیدینی کی جسارتی دخی مطلوب اولان درجه ده اولمیوب سرای طاقندن و شونندن بوندن احتراز ایدرک یومیه ظهور ایدن مشکلاته قارشو یارم و موقت تدابیر ایلله اکتفا ایلردی و صکره دن بر معتبران مات مجاسی تشکیل ایتدیرمش ایسه ده بومجلس دخی لاف ایلله امرار وقت ایدرک پارلمنتونک رأیی تأییددن بشقه برقرار ویره مدیکندن اعضاسندن بولنان پرنس و سآری حقنده خالقک برمرتبه ده اکین و نفرتی تزیاید ایلمشدر .

الحاصل مجلس عمومی نک صورت ترتیب و مذاکره سی اول باول دوشونیلله جک

بر باشلو مسئله ايکن معلق وقرار سز قالوب فرانسه اها ليسی ايسه هر یرده مبعوثانک
 اتخانه اشتغال ايدرک جمله نك امیدی بوجلسده ایدی .

واولوقت فرانسه دولتک شرائط اساسیه سی کاغد اوزرنده اولیوب مجرد عادت
 و تعامل اوزره کیدلدیکندن هر کس دولت حتمده بر شرتنامه تنظیمنه دائر افکارینی
 درمیان ایدوب بوضوئته غریب مطالعه لر میدانه چیقش ايسه ده اکثر اهالی
 ومؤلفینک پرکار افکاری امتیازاتک الغاسیله صنف نالك اوزرنده اولان بارکران
 تکالیفک تخفیفی دائره سنده دائر ایدی . وقرال ذاتاً حلیم وسلم و ملائم اولوب
 وکلادخی اکثر موادده افکار عمومییه تابع اولدق لردن اهالی هرايشک بولنه کیره جی
 امید قویسنده ایدیلر .

بناعلیه مبعوثانک امر انتخابی اصول اوزره اجرا اولنه رق هر یرده اوله کلدیکی
 وجهه لایحه لر تنظیمیه اهالی طرفندن مبعوثلرینه تعلیمات اولوق اوزره رخصتنامه لر
 ویریلور و بونلرک بعضیسی پک غریب شیر ايسه ده اکثریسی حاله مناسب اوله رق
 سر بسیت اوزره تنظیم ایدیلور ایدی .

صنفین ممتازین دخی هر شینک قولایلقله چاره سی بولنور امیدنده و فرانسه دولتی
 حکومت مشروطه شکلنه کیره بیه انکلتیره یه قیاسا کندولری ایچون پارلمنتوده
 آیروجه بر دائره اولور اعتقادنده بولنه رق مجلس عمومینسک اجتماعندن هیچ
 تلاش ایتمور لر ایدی .

سرای طاقی ايسه مادامکه ایکی امتیازلو صنف ایله صنف نالك بیننده مبانیت واردر
 بیلرنده انواع اختلافات ظهور یاه بر نتیجه حاصل اوله میوب قرالک نفوذ و حکومتی
 دها زیاده قوت بولور املنده ایدیلر .

حالبوکه انکلتیره ده فی الواقع اصلزاد کانک اعتباری حالا باقیدر . لکن اوراده
 اوتهدنبرو خلقک خشنودلنی اسبابی ارانوب بالاده بیان اولندیغی اوزره ایجاب
 وقت و حاله کوره اصول ورسوم مرعیه تعدیل اولنه کمش و اهالی افکار پولتیقیه
 و مذهبییه جه سر بسیت اوزره طوتلمش اولدیغندن موازنه صحیحه اوزره بر معتدل
 سر بسیت اصولی حصوله کیشدر .

اما فرانسه اها ليسی فؤادلیته بلاسندن قور تادق لری کبی حکومتک پنجه غدر و تعدیانه
 دوشوب سکره بردن بره باشی بوش براغیله رق افراط تفریطی دعوت ایدر
 قاعده سنجه بر اوجدن تا اوته کی اوجه سکرتمش اولدق لری حالده بر طاقم مؤلفینک
 نشریاتی اوزرینه بر دینسزک یولی آچیله رق هرايش چیغرنندن چیقمش اولمسیله
 فرانسه نك انکلتیره یه قیاس ایدجک حالی و فرانسه قرالغک استناد ایدجک بر محلی

قلامش اولدینی حالد امریقا محاربه سی دخی اختلاک ظهوری تعجیل اتمش ایدی .
 واهل عرض اهالی عصیان و اختلال داعیه سنده اولسه لر بیله ارادل اشخاص ایله
 برابر چوق اصحاب اغراض دخی بوسوداده اوله رق اسباب اختلالیه نك استکمالته
 چالیشیورلر ایدی .

علی الخصوص خاندان قرالینک بور بون و اورلیان شعبه لری بیننده از قدیم رقابت
 و عداوت درکار اولدینی حالد سالف الذکر اورلیان دوقه سی فلیب قراله بر حال
 اولورسه ولی عهد صبی اولدیغندن وکیل دولت و بلکه قرال اوله بیله جکندن
 اختلال تقدیر ایرولسه کندوسی دها ایلروده بولمغه مهیا ایدی .

واگرچه اولوقت فرانسه نك هر طرفنده بشقه بشقه کیل ووزنی اولمق و بعض ایالات
 آره لرنده کمرك بولمق و پروتستانلر قاتولیکلر کبی کافه حقوقه مظهر اوله مامق
 و یهودیلرک هیچ حقوقی اولمامق کبی حالاته نظراً فرانسه نك برهیئت اتحادیه
 کیرمی مأمول اولنیموب بورالری بعض کسانه بادیء تسلیت ایدی . لکن زمان
 پک زیاده ایلرولمش و هر کسده مدینت داعیه سی زیاده لشمش اولدیغندن بومثللو
 عوارضک دفعیه برهیئت منتظمه یه کیرمک و سوء استعمالاتی دفع ایتمک اوزره
 هر طرفده اتحاد و منافع مادیه و معنویه جه اجتماعه میل تام حاصل اولمش ایدی .
 امتیازلو صنفلرک منافع مخصوصه لرینه تبعیتی جهته پارلامنتونک حکومه مخالفتی
 و قرالک کوشکلکی بومیل و آرزویه قوت و یروب فعله کلمی ایچون بشقه یول دخی
 اولدیغندن خاق همان زور بالقی یولنه صاپه رق بشقه وادیده اغراض شخصییه
 پیدا اولمش ایدی .

حاصل کلام فرانسه ده آتش اختلال بویه پک زیاده مستعد اشتعال اولدینی حالد
 مبعوثانک امر اتحابی ختام بولوب اولوقت قرال پارس جوارنده واقع ورسای
 شهرنده کی سراینده مقیم اولدیغندن آنلر دخی شهر مذکورده تجمع ایتشیلردر .
 فقط ایکی صنف متمازک مبعوثانی اوچر یوز اولدینی حالد صنف ثالث مبعوثاننک
 التی یوز اولمسندن طولانی بعض ایالاتک اصلزادکانی کوجسه رک مبعوث انتخاب
 ایتدکلرندن اصلزادکان صنفک مبعوثانی اوتوز قدر اکسک ایدی . پاپاس صنفک
 مبعوثانی ایچنده الی قدر پستپوس اولوب بولردن بریسی دخی مشهور طالیران
 ایدی . اصلزادکان صنفک مبعوثانی ایچنده دخی اورلیان دوقه سی و امریقا
 محاربه سنده کواکلی فرانسه عسکرینه باشوغ اولان لاقایت کبی مشهور آدملر
 وار ایدی . صنف ثالث مبعوثانی ایچنده کذلک امتیازلو صنفلردن اوله رق مشهور
 ذاتلر اولوب از جمله پارس اهالیسی طرفندن روسیز نام مشهور پاپاس انتخاب

اولدینگی کبی اصلزاده کاندن و اصحاب معارف و جریده دن اولان قونت میرا بو صنف
ثالثی تصحب ایتمدیکی جهته کند و صنفی بینده اعتباری اولدیغندن برادری اصلزادگان
مبعوثانندن ایکن کندوسی صنف ثالث مبعوثانندن اوله رق مارسلیا اهالیسی طرفدن
انتخاب اولمش ایدی . و هر صنفک مبعوثانی هب مستعد و معتبر آدم لر ایدی .

دولت علیه ده ابتدا نظام جدیدی ایجاد ایدن سلطان سلیم ثالث حضرت تلمری بو ائنه
جالس تحت عثمانی اولدیغندن روسیه و نمچه سفر لرینه دوام ایله برابر بو کونلر
استانبولده دخی اصلاحات جدیده لاقردیلری دوران ایتکه باشلامش ایدی .

بروجه مشروح فرانسه مبعوثانی و رسای شهرنده بالاجتماع چند روز صکره یعنی
بیگ ایکیوز اوج سنه سنه مصادف اولان بیگ سبکز یوزسکسان طقوز سنه سی مایس
فرانکیسنگک بشنجی کونی فرانسه مجلس عمومی منقده اوله رق قرال طرفدن
برکوزل نطق ایراد اولندقدن صکره مالیه ناظری نکر دخی امور مالیه یه دائر
برتقریر قرائت ایدوب اکا مربوط اولان بر موازنه دفترینه نظر آ فرانسه دولتنگ
ایراد سنوسی درت یوز یتمش آتی میلیون فرانقدن عبارت اولوب بوندن دیون
دولتک گذشته سی و اسهام فائضی ایچون سنوی ایکیوز اوتوز یدی میلیون فرانق
اعطا اولمغله هر سنه خزینه ک آچینی الی آتی میلیون فرانغه بالغ اولدینی میدانه
چیقمشدر . نکرک تقریری قرائت اولندقدن صکره یاشاسون قرال دیو هر طرفدن
القشدر اولمغله قرال آرتق کوزل امیدلر ایله مجلسدن چیقمش ایدی . حالبوکه
فرانسه اختلالیه برمبدأ تعیین اولنه جق اولورسه اول کوندن اعتبار و حساب اولنق
لازم کلور . زیرا غزته طبی ایچون رخصت آلمق لازم کلور کن اول اخشام
میرابو بریکی غزته نک برنجی نسخه سنی چیقارمغله نکرک اخطاری اوزرینه منع
اولدینگی کبی میرابو کندوسنگک منتخبری اولان مارسلیا اهالیسنه خطاب یوللو
مکتوب صورتده سرت بر پروتستو نشر ایله دق باب جدال ایتمکده پارس
اهالیسنگک اکثری کندو طرفداری اولدیغندن هان غزته سنک منعی حقنده اولان
امر کیرو آله رق غزته نشر ایتک اوزره هر کسه رخصت ویرلمکله در عقب
برطام نشریات ظهور ایله غزته لر بی ادبانه بر یول آلمشدر .

و برهنوال سابق مجلس عمومی کشاد اولدینگی کونک فرداسی صنف ثالث مبعوثانی
مجلس او طه سنده تجمع ایدرک رخصت نامه لرک معاینه سی ایچون مخصوص او طه لرنده
تجمع ایتمش اولان صنفین تمنازین مبعوثاننه منتظر اولوب آنرا یسه بو تقدیرجه
جمله سی برهیئت اولق و صنف بصنف مذاکره اصولندن چیقیلوبده ایش آرتق
فردا فردا رأی ویرلمک شکلنه منجر اوله جفتی درک ایتلر یله رخصت نامه لرک هر

صنفده آيرو آيرو معاينه سنه قرار و ير مشلر ایدی صنف ثالث دخی کندور آینده اصرار ایتمسینه در حال نفاق و شقاق تخمی نشو و نمایه باشلا یوب بر قاچ کون بویله کشا کشله مرور ایدرک برایش کور یله مدیکندن میرابو کبی بعض مبعوثانک نطق و خطاب تریله آحادناسک اذهانی تحریک اولمغه باشلامش اولسی اوزرینه و کلابراختلال ظهورندن خوف ایدرک پارس ایله ورسای شهرلری جوارینه خیلی عسکر جمع اولدینگی و امکنک بهاسی کوندن کونه ترقیه باشلادینگی جهته پارس اهالیسی ایاقده ایدی و پارسده جمهوریت افکارینه مائل اولئر محل بمحل اجتماع ایله انواع مباحثاته اجتسار ایدرلردی بونک اوزرینه آرتق صنف ثالث مبعوثانی صبر ایدمه میوب جزیران فرنگیسینک اون یدنجی کونی رخصتنامه لر معاينه اولنمق اوزره صوک دفعه اوله رق صنفین ممتازین مبعوثانی دعوت ایتملریله پاپاسلردن بعضیلری برر برر کلس ایسه ده اصلزادگان مبعوثلردن کمسنه گلدیکندن صنف ثالث مبعوثانی همان صره سیله رخصتنامه لری معاينه ایتمکدنصکره جمعیتمز فرانسه اهالیسنک یوزده طقسان التیسینک و کیلی اولمغله حاضر بولمیانلر حضاره مانع اوله ماز آرتق ایشمزه باقم دیمشله و بوجلسی جمعیت ملیه اسمیله تسمیه ایتمشلردر اشته اول کون اختلال باشلامش دیمک اوله رق جمعیت ملیه دفعه نفوذ و اقتدارینی کوسترمک اوزره بعض تشبثانه دائر بر اعلاننامه نشر ایلمشدر .

جمعیت ملیه نیک تشبث ایتمدیکی تدابیردن آحادناس صنفی نمون اولوب دیگر صنفلر حیرتده قاله رق فرداسی پاپاس صنفده بر مباحثه واقع اولوب کچوک پاپاسلرک خیللیسی جمعیت ملیه ایله اتفاق ایتمک آرزوسنی اظهار ایتمشله ایسه ده پسقوسلردن بعضیلری بوکامانع اوله رق سرای طرفته مراجعت ایتمشلردر اولوقت سرایده دخی قرایلیچنک ریاستی تحتنده بعض پرسنلرایله آنلره متعلق اولنلردن مرکب بر مجلس خفی اولوب یک چوق ایشلری استدلکاری قابله افراغ ایدرلردی اشته بوجلسک اخطاری اوزرینه قرال بالذات جمعیت ملیه یه کیدوب غایت سرت و تهدید آمیز اوله رق ایراد ایلمدیکی لظقنده اوچ صنف بینده ظهوره کلان اختلافدن شکایت و اوچ صنفک بشقه بشقه مذاکره ایتمسنی امر ایله عودت ایتمش و صنفین ممتازین مبعوثانی دخی آرقه سندن چیقوب کیتمش اولدقلمری حالده صنف ثالث مبعوثانی بو وضع و طوردن مزعج اوله رق مجلس او طه سنده قالب اولوب قرالک او امرینه مغایر بر چوق شیلره قرار ویرملریله همان علائم اختلال رونما اولمش و اول کوندن اعتباراً قرالک نفوذینه خلل کلمشدر سرای طاقتی بو حالی کوروب اورکمکه باشلادقلمری کبی خیلی اصلزدگان ایله اورلیان دوقه سی و چند پسقوسلرک جمعیت ملیه ایله برلشملریله قرال

دخی بشقه چاره بوله میوب نکرک اخطاری اوزرینه اوچ صنفک برلکده اجتماع
 ومذاکره سی حقنده امر ویرمکه مجبور اولمشدر اولوقته قدر عناد ایدن پاپاسلر
 درحال اصلزادکان خیل مجادله دنضکره ترش روی اوله رق جمعیت ملیه یه کیتمشلر
 ایسه ده مباحثاته لدی الشروع اصلزادکان مبعوثلری مصاحتک رنکی دکشدی
 منتخبلر یزدن مجدداً رخصتنامه آلمدقجه بر شینه قرار ویره میز دیو ایشی تصعب
 ایلماری اوزرینه برمدت دخی بوجادله ایله اوغراشلمشدر خلق ایسه آن بان
 زیاده حدت وحرکت ایتلمایله ورسای شهرینه المان واسوجلو اوله رق فرانسه
 خدمتده بولنان بر مقدار عسکر جاب اولنوب بونلرک ضابطانی دخی جمعیت مایه
 حقنده طور لاابالیانه ایله اظهار عداوت ایلدکارندن خلق وسوسه ایدرک ده
 زیاده متحرک اولدقلری خالد اصل فرانسه لو اولان عسکری غیرت وطن
 داعیه سنه دوشورمکه چالیشورلر وایشلرینی بجرمشلرایدی حتی عساکر خاصه دن
 بعضیلری آحادناسه طرفدارلق صورتی کوسترشم اولدقلرندن اون برنفری پارسده
 حبس اولندقدده برطاق اراذل ناس اجتماع ایدرک حبسخانه یی باصوب جبراً آنلری آلمشلر
 وبوحرکات عصیانیه اوزرینه بالطبع اکت آزبولنور اولدیغندن اراذل طاقی بر مرتبه ده
 زیاده حدت وحرکت کیشلر در بونک اوزرینه جمعیت مایه ارتق بیهوده وقت کچورمامک
 اوزره اصلزادکان رخصتنامه لرینک تجدیدی لازم کیه چکنه اکثریت آرا ایله قرار
 ویردکنضکره عسکرک تجمعندن اشتکا ایله چکللمسینی قرال دن مجلسجه استدعا
 ایتدکده بو عسکر امنیت عمومیه یی محافظه ایچون جمع اولمشدر جمعیت ملیه استرسه
 دیگر محله نقل ایتسون جوانی آلمش ونکر عزل ایله درحال فرانسه دن چیقمسی
 امر اولندیغندن اودخی کیمسه یه خبر ویرمکسزین ایکی اوچ ساعت ظرفده ورسای
 شهرندن چیقوب دیگر وکلادن بعضیلری دخی عزل ایله یرلرینه خلق منفوری
 اولان آدملر تعیین اولمش اولدیغنه نظراً مرام جمعیت مایه نک الغاسی اولدیغنی
 اکلاشلمشدر . سرایک بویله بر مجنونانه تدبیری اوزرینه تموزک اون ایکنجی بازار
 کونی پارس اهالیسی ایاقلانوب اراذل طاقی زقاقله دوشهرک قرالی سراپی پیشکاهنده
 قره غول بکلان عسکره طاش آتغه باشلادقلرندن میرالای بونلری دفع ایچون
 عسکری ایلرو یوروتدیکی ائنده سیرجیلر دن بریمی تلف اولمغله آرتق بتون خلق
 سلاحلانه رق چارشولره هجوم ایله بولدقلری اسلحه یی آلوب وعسکرک اوزرینه
 هجومه مهیا اولوب ارتق پارسده ضبط وربط قالدیغندن پارس مبعوثاننک منتخبلری
 اولان معتبران بلده نک طویلاتمی استدعا اولمغله بونلرک اکثریمی درحال
 شهر امانتده اجتماع ایله ایشک بوشکله کیرمش اولسینی بکنمکلرندن اول امرده

قرق‌الی بیک قدر عسا کر ملیه ترتینه قرار و یروب جمعیت ملیه نك رخصتی استحصا
ایتمک اوزره و رسایه تحریات کوندر مشلدر . فرداسی جمعیت ملیه بعض خصوصاته
قرار و یروب پارسده دخی عسا کر ملیه ترتینه اشتغال اولندی اثناده عسا کر
خاصدن بر خیلسی بیوک ضابطانی ترک ایدرک طویلرله برابر شهر امانته کیدوب
احجاب اختلال ایله برلشمشدر و اصل ایشه یاریان کچوک ضابطلرک اکثری آنلر
ایله برابر اولوب هپ اصلزادکاندن عبارت اولان بیوک ضابطلر ایشه تنبل و تن
پرور اولدقلری جهته ایشه یارامیه جقلری معلوم اولدیغندن قرالک قوه عسکر به سنه
کلی ضعف کلمشدر . اول کونک کیجهسی ورسایده سرای قرالده بر بیوک بالو
ترتیب اولمش ایدوکنه نظراً سرای طاقی هنوز حقیقت حالدن خیر دکل ایش
حالبوکه فرداسی صالی کونی پارسده خاق طویلانوب و متقاعدین قشله سنه هجوم ایله
اوتوز بیک سلاح و یکر می قطعه طوب آلوب پارسده اوتهدنبرو دولتجه محبس
اتخاذ اولنان باستیل قلعه سنه هجوم ایدرک آنی ضبط و تسخیر ایله هدمنه مباشرت
ایدلمش و اول کون پارس شهر امینی ایله دیگر بعض ذواتک باشلری کسپلرک
زقافلرده کزدرلمش ایدی .

پارسک بووقوعاتی کیجه یاریسی ورسایده قرالک سمعنه واصل اولدقده ارتق
اختلالک فعله کلدیکی سرانجه معلوم اولیجق فرداسی قرال من غیر رسم جمعیت
ملیه کیدرک ملایم سوزلر ایله دولتک خلاصنه سعی ایتمک اوزره مبعوثانی تشویق
و پارسده و ورسایده بولنان عسا کرک تبعیدینی امر ایلمش اولدیغندن قرالک حسن
نیاتی اهالی به بیلدرمک اوزره جمعیت ملیه سکسان قدر اعضاسنی یالافراز پارسه
ارسال ایشدر . و قرال عسا کر ملیه نك ترتینه دخی مساعده ایلمش اولدیغندن
اهالینک استدعاسی اوزرینه بالاده ذکر ی سبقت ایدن لافایت بو عسکرک قوماندانلغنه
و مبعوثاندن مشهور بای شهر امانته تعیین اولمشلدر .
ایشته فرانسه ده (غاردناسبونال) دیو مرتب اولان عسا کر ملیه نك ابتدای ظهوری
بووجهله اولمشدر .

واوته دنبرو فرانسه قراللی بیاض رنگ اتخا ایدوب پارس شهری بیراقلرینسک
رنکی دخی قرمزی ایله مائی ایکن ملت ایله حکومت بیننده اتحاد حصولنه علامت
اولق اوزره لافایت بو اوچ رنکی جمعه ملت عسکرینه اوچ رنگلی باندره
یادیرمشیدی . خالا فرانسه باندره لرنده بو اوچ رنگ آندن قالمشدر .

و قرال پارس اهالیسی حقنده کین طوتماش اولدیغنی کوسترمک اوزره جمعیت
مایه اعضاسندن یوز نفری بالاستصحاب عسکر سزجه پارسه عزیمت ایدوب سابقه سنه

بروجه مشروح عسا کر مایه نك اتخاذ ایلدیکی اوچ رنگلی برعلامت تعلیق ایلمش اولدیغندن اهالی قرالی بو حوالده کوریحک اظهار ممنونیت ایلمشدر. اول کون پارسه قرال همان هر شیئه خواه و ناخواه راضی اوله رق اوخاشام و رسایه عودت ایلمشدر . قرالک پارسه عزیزتی اثناسنده بر برادر یله اصلزادکاندن بعضیلری فرانسه دن فرار ایتمشدر ایدی . ایشته فرانسه اصلزادکاننک فرار و مهاجر تلیری اولوقت باشلامش و آندنصکره متوالیاً خلیسی فرار ایلمشدر .

باشتیل قلعه سی اوچ درت کون ظرفنده کاملاً هدم اوله رق طاشلاری صایلوب بیوک اناختاری دخی لافایت واسطه سیله امریقا جمهوریتنک تشکیلنده شهرت بولان واشنگطونه اهدا وارسال اولمشدر .

والحاصل فرانسه بر جمهورشکلنه کیروب دولتک مرکز نفوذی جمعیت ملیه اوله رق آرتق هر طرفدن اورایه مراجعت اولنوردی . بیچاره قرال ایسه هر درلو نفوذ و اقتداردن محروم قاهره هر شیئه راضی اولمسایله آرتق خلقک دخی راحت طورمسی لازمه انسانیتدن ایکن بر کره ایش چیترغندن چیقمش وضابطه حکومته سکتک کیش اولدیغندن بو قدر یوز بولمش حلقی حد اعتدالده طوتمق قابل اوله میوب بناء علیه بو ائنده اتمکده کوریلان بهالوق مالیه ناظر یله دامادینه عزو اوله رق ایکسی دخی ارادل ناس طرفندن طوتیلوب صلب اولملری یله بویه بلا محاکمه و حشیانه آدم اعدامندن طولانی بایی و لافایت منفعل اوله رق ایکسی دخی استعفا ایتمشدر ایسه ده هر طرفدن اولنان رجا اوزرینه نه مأموریتلرینه دوام ایلمشدر .

و مقدا اولنان طلب و امر اوزرینه نکر بو ائنده عودت ایدرک اهالی طرفندن ممنونیت کامله ایله قبول اولمش ایسه ده پارس اهالیسنک و حشیانه حرکتنه باقوب تأسف و بکا ایلدیکی کبی جمعیت ملیه دخی ارادلک لزوم تسکینی حس ایتمش ایسه ده بو کادار مذاکره یه شروع اولدقده کیمی بو مثللو جنایاتک منع و قوعی لازمه دن اولدیغنی بیان و کیمی سر بسیت مخالفلرینک تهدیدلری دخی ایجاب حالدن اولدیغنی در میان ایتدکلری صره ده اعضادن مشهور (رو بسیر) ارادلک بو مثللو و حشیانه حرکتی تحسین ایتمکله بو حرکات و حشیانه جمعیت ملیه طرفندن نه منع ایدلش ونه ده بکنامش یالکز قوانینه اطاعت اولنق تشویقیله اکتفا اولمش اولسی اوزرینه ارادل ارتق بتون بتون یوزه چتیه رق هر شیئه جسارت ایدر اولمشدر . فقط فقط و غلا غائله سی میدانده اولدیغندن بر منتظم اداره بلدیه تشکیل اولنوب بو اداره ارباب عصیان و اختلاله میدان ویرمیدیکی کبی لافایت دخی اهل عرض طاقندن یکرمی اوتوز بیک معاشسز والی بیک معاشلو عسا کر مایه ترتیب ایتمکله پارس شهری

برمدت حال سکونت اوزره قالمش ایسه ده پارس محلاتنده ارباب اختلال طرفندن قلوب تعییر اولنور جمعیتلر عقد و تشکیل ایله امور پولتیقیه پک شدت اوزره مذاکره ایدیلور و پارسده ظهوره کلان وقوعات اختلالیه فرانسه نك سائر طرفلرینه سرایت ایله اکثر محللرده حرکات عصیانیه ظهوره کله رک بعض اصلزادگانك چفتك قه لری و مناسرتلرک بعضیلری یغما و هدم و احراق و بعض محللرده ویرکو اعطاسنه مخالفت اولتمق کبی فالقلمر وقوعه کلمکده اولدینی ایشیدیلور ایدی . بو جهته اهل عرض طاقی غایت خوف اوزره اولدیغندن هر یرده عساکر ملیه ترتیب اولنوردی . و پارسده حرکات و وحشیانه یه مائل اولنلر اراذل ناس اولوب اهل عرض طاقی برعدالت و حقانیت حصولی آرزو ایدرلردی . مع مافیه عموم اهالینك اختلاله میلی وار ایدی زیرا فرانسه نك سربستی انکلترده اولدینی کبی تدریجی وجوده کلبوب فرانسزلر بر منوال سابق بر طاقم انقلابات دفعیه ایله بوراده یه کلبش اولدفلرندن ارتق افکار اختلالیه نك اوکئی آلمق مشکل اولمشیدی . و فرانسه اختلالنك اسباب صحیحه سی بالاده بیان اولدینی اوزره اسکی وقتلردنبرو مسلسل و متصل ظهوره کلان مبادی و مقدمات اولوب انجق مضایقه مالیه و قحط و غلا کبی عوارضخی ظهورینه وسیله اولمشدر .

بناء علی ذلک تدا بیر مشروحه ایله پارسک حال سکونتده بولدینی ائنده آتش اختلال علولنمکده ایدی . شویله که : جمعیت ملیه دولتک شرائط اساسیه سنی مذاکره یه کیرشدکده ابتدا حقوق انسان نه اولدینی مسئله سی میدانه چیقوب و بونکله مشغول اولدینی ائنده ایالاتک تسکین اختلالی مذاکره سنه لدی الابتدار اکا دخی بر قرار قطعی و یریه میوب مباحثاتک کسب امتداد ایلمسنه مبنی سنه مرقومه اغستوس فرنیکنسک در دنجی کونی مذاکره اخشامدن صکره یه قاله رق مجلسه کلان جوشش افکار اوزرینه اصلزادگاندن بری قالقوب استراحت عمومیه ایچون امتیازات و معافیاتک الغاسنی تکلیف ایدیحک بردن بره قلوب حضاره رقت کله رک اصلزادگان و بسقپوس و پاپاسلر برر برر قالقوب بر بردن کوزل نظرلر ایراد و هر درلو سوء استعمالنک و وقوعنی اقرار ایله امتیازات و معافیاتک الغاسنه بالاتفاق قرار و برلمشدر .

اشته فرانسه نك بیک بوقدر سنه لک اصول و رسومی اول کیجه دفعه تغییر ایله بر طریق جدید آچلمشدر . فرداسی بوماده لر قلمه آله جق اولدقده اصلزادگان و بسقپوس و پاپاسلردن بعضیلری (کلام اللیل یجموه النهار) طریقنه سنه سلوک ایدرک کیجه کر میت افکار ایله فدا اولنان امتیازاتک بعضیلردن رجوع ایتمک ایسته مشلر

ایسه ده ارتق او یله اتفاق آرا ایله قرار کیر اولان موادک کیرو آلمسی قابل اوله مدیغندن بو طور و حرکت لری خالقک تفری بی جلب و دعوتدن بشقه برشیئی منتج اولوب شو قدر که خلقی بر دین تشکر دن خلاص ایلمشدر . بناءً علیه مواد مذکور ه بش اون کون ظرفنده قلمه آلنه رق ارتق استراحت عمومی نک دوامی مأمول ایدلمکده اولوب یالکنز خزینه نک مضایقه سی بجئی قالمشیدی .

اراذل ناس ایسه سر بسیت ویرکو ویرمامک دیمک اولمسی زعمنده اولدقاری جهته وارداته سکتهد کلدیکندن در حال اغنیا طرفندن اعانه اولمغه باشلایوب حتی قاریلر مجوهر لری ویردکلری مثللو قرال وقرالیچه آلتون وکومش سفره طاقلری ضر بخانه یه کوندر مشلر ایدی . لکن بویه شیلر ایله فرانسه ده اولان مضایقه عظیمه نک دفعی قابل اوله میه جغندن بر استقراض ایچون جمعیت ملیه طرفندن نکره رخصت ویرلمشدر .

قالدیکه بالاده مذکور وقوعات اوزرینه هر شی آلت اوست اوله رق درزی وقوندوره جی و بربر چراق لریله خدمتکار لره وارنجه طاقم طاقم جمعیتار ترتیب ایله امور حکومته قارشمغه باشلادقلرندن جمعیت ملیه نک ترتیبیله مشغول اولدینی شرائط اساسیه دولتک ارتق فعله کلسی الزم اولوب حالبوکه جمعیت ملیه حکومت طرفندن کندوسنه بر شی اخطار اولمندیجی جهته دومنسز کمی کبی اورسه پوچه کیتمکده اوله رق شرطنامه نک مقدمه سی اولان حقوق انسان بجحیله خیل مهم و قتلری ضایع ایتمشدر .

نه حال ایسه بو بختلر ختام بوله رق شرائط اساسیه دولتک ترتیبه لدی الابتدار بر دائمی مجلس قوانین تشکیلنه قرار ویرلدکن صکره بو مجلس بر دائره دن عبارت می اولملی یوخسه انکلتره پارلمنتوسی کبی ایکی دائره می تقسیم اولنملی بجئی چیقوب بونک اوزرینه خیلی مجادلات وقوع بوله رق بر دائره دن عبارت اولمسنده مخاطره ملحوظ اولدینی خیلی مبعوثان طرفندن ایراد اولنمش ایسه ده پارسده افکار عامه افراط اوزره سر بسیته میل ایتمش اولدیغندن اکثریت آرا ایله بر دائره اولمق اوزره قرار ویرلمکله عصرک دور اندیشانی اختلالک بر یاکلش یوله صابه جغنی اکلایوب تأسف ایتمشلر ایدی .

دیگر مواد اساسیه دخی ینه بر چوق مباحثات و مجادلات ایله قرار کیر اوله رق لایحه سی بالنظیم بیک ایکی یوز درت سنه هجریه سی اوائلنده قراله تقدیم اولندوقده چونکه خفیف روزکاره تابع بر ذات اوله رق بر آدم آسه مقرینک بر سوزیله در حال اوچ آدم کیرو چکیلور اولدیغندن بو کره دخی او بولده مواد معروضه نک

بعضیسنه اعتراض ایله قبولده تردد ایتمکله حقدنه خلقک امنیتی تکرار منسلب اوله رق هر یرده قرال وقرالیچه علانا ذم و قدح اولنوردی . حالبوکه اولکی سنه چوق محالرده طولو یاغوب قیش دخی شدت او اولدیغندن طبیعی برخط و غلا پیدا اولوب اورلیان دوقه سی کبی بعض غرضکاران ایسه پارسه بغدادی کلامک ایچون اطرافده کی ذخاثری آلدیروب بشقه طرفله ارسال و فروخت ایتدیر لر دی .

غریبدرکه قرال طرفدارانی دخی پارس خلقی ضعیف دوشوبده حکومته سرفرو ایتسون دیو پارسه ذخیره کلامسنه چالیشور لر دی . وسرای طاقی تک طور میوب عاداتا خلقی عصیانه دعوت ایدرجه سنه ناجا حرکتلرده بولنور لر دی .

بوخلالده ایسه کویا قرال برقلعهیه قاجیریه جقمش دیو تواتر بولوب بودخی اذهان ناسی تحریک ایدردی . ورسای شهری اهالیسی دخی پارس ارادلی کلوبده ورسای بامسون دیو خوف واندیشه اوزره بولندقلرندن ورسایه برآلای عسکر جلب اولندقدنه پارسده کی اهل عصیان طاقمی بونی بشقه معنایه حمل ایله تکرار بروقه اختلالیه چیقارمغه حاضر لئوب فقط عسا کر ملیه دن خوف ایلدکاری جهته قاریلری ایلویه سورمک ترتیبی قومشرایدی . بناء علیه تشرین اولک بشنجی کونی صاحبین سیل کبی بردن بره برطاقم قاریلر پارس زقاقلرنده رونما اوله رق واکمک استرز دیو فریاد ایدرک شهر امانتی باصدقلرنده عسا کر ملیه مانعت ایده جک اولمشرا ایسه ده قاریلر طاش آتوب عسکر ایسه آنلرک اوزرینه اعمال سلاح ایده مدیکنندن چاره سز کیرو چکیلوبده قاریلرک کیره جکی ائنده اطرافده بولنان برچوق سرخوش ارادل دخی دخول ایدرک شهر امانتی دائره سنده کی اسلحه ایله ایکی طوبی آلوبیدی سکز بیگ قاری ایله برخیلی ارادل اوکلرنده طاول چانه رق ورسایه عزیمت ایتمشرایدی . بوسره ده برخیلی ارادل دخی سلاحلنه رق زقاقله دوشدکاری حالده شهر امانتی پیشکاهنده مجتمع اولان عسا کر ملیه دخی آنرله برلشمش ایدی . اداره بلدییه مجامسی نهایت اخشام اوستی لافایتک یکر می بیک عسکر ویکرمی طوب ایله ورسایه عزیمته امر ویرمشدر . ایشته بویله برغلبه لکله ورسایه کیدیلوب ارادل طاقمی سرانی باصه رق عسا کر خاصه دن بعضیلرینی اعدام ایتدکن صکره قرال وقرالیچهی برصورت تحقیریه ایله پارسه کتوروب تویلری سراینده اقامه ایلمشدر . جمعیت ملیه دخی بونک اوزرینه پارسه نقل اولمشدر . فقط اعضاسندن بعضیسی مسند قرالینک بودرجه ترذیلندن نفرت وبعضیلری دخی پارسه کیتمکن خوف و مجانبت ایدرک برره بانه ایله مملکتلرینه صاوشوب کیتمشرایدی . وهر ایش جمعیت ملیه ده بتوب قرالک التده برشی قلاماش ایسه ده جمعیت مایه قرالی

بتون بتون اعتباردن دوشورمك استميوب قراله هر وجهه رعایت ايدرك بيك
یدی یوز طقسان سنه میلادیه سی اوائلنده پارسده براز آثار استراحت کورملکله
جمعیت مایه نظامانه باشایوب پارلامنتولر الغایله مجدداً محاکم و مجالس ترتیب و اصول
محاکمه و مرافعه تبدیل اولندیغی صره ده زوری اصولی یعنی اهالی طرفندن اون
ایکی کشتی انتخاب اولنه رق بر جنسایته مهم اولان شخص حقنده جانیمیدر دکلیدر
دیو ابتدا بونلر طرفندن اولنه جق حکم وجدانی اوزرینه حاکم طرفندن ترتیب جزا
اولنق نظامی وضع اولنمشدر .

وبوصره ده بسقموس و پاپاسلر توظیف اولنه رق بالجمله کلیسا و مناسترلره مربوط
اولان املاک جانب میری به ضبط اولنمشدر . غریبدرکه بوفکری ابتدا اورطیه
قویان بسقموس زمره سندن مشهور طایران ایدی .

املاک مذکوره دیون دولته قارشولق انخاز اولنه رق قیمتیه تأمین اولنق اوزره
قوائم نقدیه چیقاریلوب تداول ایتدیرلمشدر . فرانسه نك وقوعات عجیبه سندن بریده
بودرکه بوقائم لر ابتدا درتیوز ملیون فرانقلق اوله رق چیقاریلوب صکره لری ضم
وترزید ایله قرق بش میلیاره قدر تداول ایتدیرلمش ایدی . اولوقت ایسه دنیاده
اوقدر تقود یوق ایدی .

بویله هر شینك تغییر اولنیشنه نظراً قاتولك مذهبنك دخی ابطال اولنه جنی حوادثی
شیوعبولغله مبعوثاندن برکشیتس فرانسه دولتنك مذهبی قاتولك مذهبی اولدیغنه دائر
بر نظام یاپلمسنی تکلیف ایدوب جمهور طاقمی ایسه بومثللو علائق دینیه و تقیدات
مذهبیهدن غایت روگردان اولدق لری جهته اوزون اوزادی به مباحثه به کیریشلمیوب
همان بوده برنوع تعصب دیمك اوله رق سر بسیته خلل کتوره جکی محذوری درمیان
اولنوب اگرچه قاتولك مذهبی الغا اولندی دینلماش ایسه ده معنی ملغا حکمنه
قولنمشدر . و پاپاسلر کبی بسقموسلرک دخی پایا طرفندن تصدیقه محتاج اولمقسزین
اهالی طرفندن انتخابی حقنده بر نظام یاپلمشدر . قرال ایچه متعصب اولدیغندن
بومثللو نظاماتی قبول ایده میوب تردد و توقف ایتمکله ارادل طاقمی سرایه هجوم ایله
جبراً تصدیق ایتدیرمشلردر .

وبرده جمعیت ملیه ده بالجمله فرانسزلرک مساواته قرار ویریلهرک دوقه وقونته کبی
اصلزادگان القاب و عنوانلری کاملاً الغا اولندیغی صره ده قراله دخی حکومتک
مأمور اولی عنوانی ویرلمش اولمسيله قرال بوندن دخی پک مکدر ایدی . و برده
اورویا اصلزادگان هپ اباعن جد موروث اولان مالکانه لری اسملرینه اضافه یاد
اولنه کلدیکندن بونلر بردن الغا اولنوبده هر بری بزیر نام و عنوان جدید انخاز

ایتدیکی کبی چونکه اسکی اسم و محاصلری یساغ ایدلمش و یکیلرینی دخی کیمی بلله مامش و کیمی اونو تمش و کیمی هنوز او کر تمامش اولدیغندن محاورات و مخاطبانده بر عجیب قاریشفاق و مشکلات پیدا اولمش . و بری اصلزادکاندن برینی آرایه جق اولسه بوله میه جق بر حاله کلدیکندن فرانسه نك برنجی صنف ممتازی اولان اصلزادکانك مسالری موجود ایکن اسم و عنوانری هنوز معروف و مشهور اولدیغنی جهتله مقفود حکمنه کیرمش ایدی . بوکا انکلز اصلزادکانی دخی طاریلوب انکلتره پارلمنتوسنده سرت سوزلرسو یلدکیرندن فرانسزلردخی بوندناشی حدتلمش ایدی . و پارسده بر منوال مشروح بر طاقم قلوبلر اولوب بونلر افکارجه یکدیگره مبین اوله رق بعضیلری بر معتدل سربسیت آرزوسنده و بعضیلری بتون بتون جمهوریت افکارنده اولملریله و جمعیت ملیه اعضاسنك بر طاقمی بر قلوبه و بر طاقمی دیگر قلوبه محسوب و مداوم بولملریله جمعیت ملیه ده دخی افکارجه اختلاف وار ایدی . و بو قلوبلرک برنجی درجه ده شهرتلیسی یاقوبن قلوبی دیو معروف اولوب فرانسه نك هر طرفنده بوکا مر بوط قلوبلر تشکیل اولدیغندن یاقوبنلرک قوتی کیتدکجه تر قیده ایدی . و بونلر هپ جمهوریت افکارنده ایدیلر و جمعیت ملیه اعضاسندن مشهور روبسیر بونلرک رئیس ایدی . و شو حالده وکلا دخی افکار جدیده یه کرکی کبی طرفدارلق کوسترمه دکاری جهتله انفصالی لازم کلدیکندن ابتدا نکر استعفا ایدرک باشلوجه اسبابندن بریسی دخی کندوسی اولدیغنی حالده او کنی آله مدینی اختلالی اوزاقدن تماشا ایتک اوزره اسویچر ده کیتمشدر . و برسنه مقدم عزلنده افکار سربستی طرفداری بولدیغنی جهتله خالق پک چوق کدرلنوب کورلتی ایتش ایکن بوکره افکار عمومیه یه توفیق حرکت ایده مدیکی جهتله اسویچر ده کیدر ایکن خالق طرفندن حقارت کورمش ایدی . آزوقت طرفنده افکار سربستینک نه درجه ایلرولمش اولدیغنی بوندن اکلا شیلور .

فرانسه اختلالی حکمداران اوروپانک و علی الخصوص فرانسه قرالیچه سنک برادری اولان روما ایمراطوری یعنی اوستریا حکمداری لئوپولدونک دقت نظرینی جلب ایتمکدنناشی بر محاربه ظهور ایده بیله جکی ملاحظه سنه مبنی فرانسه اصلزادکانندن چونغی المانی طرفه فر ایدرک دول اجنبیه یی جنکه تشویق ایله مشغول اولمشلرایدی . بیک ایکیموز بش سنه هجریه سنده قرال وقرالیچه دخی چوققلریله برابر تبدیل نام و قیافت ایدرک فرار ایتمشلر ایسه ده یوله طوتیه رق محقرأ پارسه کتورلمشلردر فقط بو صرده قرالک پارسده کی برادرلری قاچوب قور تلمشدر .

اوستریا و روسیه دولتلرینک دولت علیه ایله محاربه لری هنوز باقی ایکن فرانسه

اختلالك اطرافه سرایتندن خوف اولنغله بونا نرّه اختلالك اطفاسی اهم کوریلهرک بالاده بیان اولدینی اوزره دیگر دول اوروپانک ابرامی اوزرینه دولت علیه ایله ابتدا اوستریا دولتی زشتویده ومؤخرأ روسیه دولتی یاش قصبه سنده عقد مصالحه ایتمشلر وفرانسه قرانک بومثللو حقارتلره اوغرامسی باجمله حکمدارانک شان ووقارینه طوقمغله آتی بوحالندن تخلیص ایچون باجمله دولک امدادینی استدعا سیاقنده اوستریا وپروسیا دولتلری برقطعه بیاننامه نشر ایلمشله ایدی .

حالبوکه جمعیت ملیه نك ترتیب ایتکده اولدینی شرائط اساسیه بوانتاده تمام اوله رق فرانسه دولتک شرطنامه سی کوز حبس سنده بولنان قباله خواد وناخواه امضا ایتدیرلمش اولوب حتی بیک ایکیموز بش سنه هجریه سی اواخرنده برصورتی دولت عایه یه دخی کوندرلمش ایدی .

بوجهتله جمعیت ملیه نك ایشی قالمیوب یدی یوز قرق بش اعضادن مرکب برمجاس قوانین تشکیل اولنمش وفرانسزلر ایتدکلرندن زیاده سر بسیته نائل اوله رق ارتق بونک محافظه سی چارده سنه حصر نظر ایتلری ایجاب مصلحت بولنمش ایکن نه چاره که برکزه سوز ایاغه دوشمش وایش اراذل النده قالمش اولدیغندن و مجلس قوانین اعضاسنک اکثری جمهوریت افکارنده بولندقلرندن فرانسه ده افکار ایکی به منقسم اوله رق بری قرالینک ابقاسیله حکومت مشروطه نك دوامی آرزو سنده بولنان معتدل طاقی اولوب دیگر قسمی روبسیر ایله افکار وحشیانه ده اکا معادل اولنلرک ریاستی تحتنده بولنان یاقوبینلر ایله آنلره پیرو اولان دیگر قلوبلرک طاقی ایدی که بونلر فرانسه دولتک جمهورینه قلب و تحویلی داعیه سنده اولوب اسافل و اراذل طاقی هپ بوافکارده ایدیلر .

اوستریا ایله پروسیانک مذکور اعلانلرندن طولایی فرانسزلر بر مرتبه دهامنفعل و متحرک اولمشلر و مجلس قوانینک وظیفه سی جمعیت ملیه نك تأسیس ایتدیکی شرائط اوزرینه قوانین و نظامات متفرعه نك تنظیمندن عبارت اولدینی خالده خارج از اساس بعض خصوصاتی تکلیف ایتدکده قرال طرفندن رد اولنمش اوزرینه فرانسزلر قرال وقرالیچه حقدده دول اجنبیه ایله اتفاق ایتمشله دیو شبهه ده دوشمشله ایدی .

ایمپراطور لیثوبولدو ذاتا صلحه مائل اولدقندن بشقه همشیره سی اولان فرانسه قرالیچه سنک حال خطر وتهلکه ده اولدیغنی ادراک ایله دائماً معتدلانه حرکت ایتکده اولدینی خالده بوسنه وفات ایدرک خلفی اولان اوغلی فرانسوه فرانسه ده اسکی حکومت اصولی اعاده امانده بولنغله بیک یدی یوز طقسان برسنه میلادیه سی اغستوس فرنکیسنده یکدیگره عدو اکبر اولان اوستریا وپروسیا دولتلری بیننده فرانسه علیه نه عقد اتفاق اولنمشیدی .

فرانسه اھالیسنک اکثر فرقه لری دخی مخاطره اجنبیهی دفع ایچون برلشهرک افکار معتدله ده بولسانلری وطن دشمنلری عدایتمک باشلا یوب وکلا دخی بوفر قه دن معدود اولدقلری جهتله ترک مأموریته مجبور اولملریله برلرینه تعیین اولنان وکلای جدیده بیک ایکیوز اتی سنه هجریه سنده اوستریا دولتک محاربه حقنده اولان افکارینی یوقلا دقلرنده جواب واضح آله مدقلرن دن فرانسه قرالتک اراده مجبوریه سیله اوستریا به اعلان حرب اولمشدر .

فقط قرال وقرالیچه نك دول اجنبیه ایله اتفاقلری خصوصنده اھالینک شبه سی تأکد وکوندن کونه جمهوریت افکاری تزیاد ایدرک قرالتک خلعی ضمننده براتفاق خفی ترتیب اولغله تکرار پارسده براختلال ظهوره کلوب ارادل ناس سرایه هجوم ایتدکلرنده قرال وقرالیچه اولجه مجالس قوانینه کیدوب التجا ایتش بولملریله قورتیلوب فقط قرالتک اسویچرلو اولان عساکر خاصه سی صورت وحشیه ده اعدام اولدقلرن دن بشقه خیلی آدملر دخی تلف اولمشدر وقرال وقرالیچه مجالس قوانینده اولدقلری حالد ارادل ناس مجلسه دخول ایتش اولدقلرن دن مجلس اعضاسی فرانسه عظیم تھلکده اولوب بودخی قرالتک طورندن نشئت ایتمکله ارتق بوماده ملتک رأینہ حواله اولنق لازم کلور دیو تکرار ملت مجلسنک تشکیانه واولوقته قدر قرالتک موقتاً مأموریتندن عفوینہ قرار ویرلش وفاملیا سیله برابر برمناسترده حبس ایدلمشدر .

بیک سنه یه قریب حکومت وفرانسه نك ترقیمسنه غیورانه سعی وھمت ایتش اولان برخاندا نك بویله حقارته اوغرامسی اھل عرض طاقتہ زیاده سیله تأثیر ایتدیکی کبی دیگر اوروپا خلقی دخی اختلالک مبادیسنده فرانسرلرک حرکاتی چرکین کورمامشلر ایکن اختلالک بویله بریا کلش یوله صاپدیغی خبر آلدقلرنده ارتق جمله سی فرانسه اھالیسن دن نفرت ایلمشدر .

واوستریا دولتی اعلان حربده آغر طاورانوب بروقتدنبرو ویانه ایله پارس بینده قلم ایلہ غوغا اولنقده اولدیغی حالدہ بونک اوزرینہ پروسیا دولتی عسکرینی یوروتدیکی کبی فرانسه یه کیرمک اوزره اوستریا اردوسنہ دخی امر ویرلش وساردنیا دولتی دخی اتفاقه ادخال ایدلمشدر . بناء علی ذلک فرانسه مجلس قوانینی برطرفدن قوانین جمهوریهی نشر ایتمکده اولدیغی حالدہ برطرفدن دخی عسکر یاز بیلوردی .

وبوصره ده فرانسه دن درت بیک پاپاس نفی اولدیغی کبی قرالیت اصولنه میل ایلہ متهم اولنلر دخی طرف طرف طوتیلوب محبس ومناسترلرده حبس اولنوردی .

دول متفقہ عساکرینک حدودی تجاوز ایتدکاری خبری آلدینی کبی جمهور طاقتی زیادہ حدتلوب بیک ایکیموز یدی سنہمی اوائلندہ بو محبوسینک اعدامہ ابتدار اولنہرق همان بو وجهہ التي بیک قدر آدم اتلاف ایدلمشدر .

بعض ایالاتده دخی بو یوزدن آدم اولدرمک اصولی اجرا اولنہرق نیجه اهل عرض و بیکناه آدملا انواع صور وحشیانہ ایله اعدام اولنوب اکثر محللرده آثار قدیمہ و علامات قرالیہ دخی احما قلمشدر .

فسبحان الله نه غریبدرکه فرانسزلر اختلال چیقارمقدن مراملری استقلال و حریت و مساوات و سربسیت استحصالی ایکن آنک یرینه اهل عرض اوزرینه اراذاک حکومت مطلقہمی و صوچسز آدم قتل ایتمک کبی جنایاتک اجراسی قاعده اولمشیدی .

بو اثنادہ دول متفقہ عساکری پارسه طوغری کلک اوزره اولدیغندن فرانسز عساکری قارشولوب و المی نام محلده محاربہ به طوتشمشدر ایدی . فرانسه عسکرینک اکثری نورسیده دلی قانولر اولمسلیله دول متفقہ عساکری بویله بر طاقم

چولوق چوجقدن عبارت اولان فرانسه اردوسنی کورینجک استهزایه باشلاوب ایشته برنجی خطالری بو اولدی که دشمنی بویله کوچک کوروب حرکات حربیه چندان اہتمام و اعتنا ایتمدیلر . و هوالر فنا اولوب یوللر بوزولدینی جهتله ما کولات

ولوازمات سائرہ لایقیلہ تدارک اوانہ میوب اردولرنده خستہک ظهور ایلدی . بوندن بشقہ اوستریا و پروسیا قوماندانلری ینلرینه شقاق و نفاق دوشوب پروسیا اردوسی همان عودت ایدیوریدیکی کبی اوستریا اردوسی دخی چکلمش اولدیغندن

فرانسزلر بلحیقا طرفدہ کی اوستریا عساکری اوزرینه هجوم ایدرک آنلری دخی قاپیروب او طرفی ضبط ایتدکلرندن بشقہ رین نہری طرفدہ المانیانک بر خیلی یرلرینی تسخیر ایلمشلدر .

والمی محاربہسی تاریخجه پک مهم وقوعاتدن عد اولنور زیرا اگر بونده دول متفقہ اردولری غالب کلوبده همان پارس اوزرینه یوریمش اولسیدیلر فرانسه اختلالی باصدیرلمش اوله جنی جهتله شمدی دنیانک حال و شکلی بشقہ درلو اولوق لازم کلور

ایدی . لکن امربالعکس اولوب فرانسزلرک غیرتی بو غالبیتله تزیاید ایتدیکی کبی حکمدار مستقل صفتندہ بولنان وارہ لرنده نفاق اکسک اولیان المانیا امراسنک تحت حکومتلرنده کی اهالی فرانسزلرک سربسیتہ دائر اولان نثریاتنه آلدانوب بو دخی

فرانسزلرک اولطر فحہ قوتحاتنه مدار سهولت اولمشیدی .

بو خلالده اتحاب اولنان یکی فرانسه مبعوثلری پارسه کلہرک مجلس قوانینک حکمی قالدیغندن ملت مجلسی تکرار کشاد اولمشدر . بو مجلس یدی یوز قرق طقوز

اعضادن مرکب اولوب اکثری پک وحشی آدملر اولدولری حالده حین مذاکرده بر طاقم اراذل دخی کلوب سیرجیلره مخصوص محللرده یاغره ایدرلر ایدی قوه قانونیه بویه برهیئتک النده اولدینی حالده قوه اجراییه دخی هپ وحشی آدملردن عبارت اولان شهر اماتی دائره سنده ایدی .

ایشته حال بومنوال اوزره جاری ایکن مذکور ملت مجلسی بیک ایکیوز یدی سنه هجریه سنه مصادف اولان بیک یدی یوز طقسان ایکی سنه میلادیسی ایلول فرنیکیسنک یکریمی ایکنجی کونی لدی الاجتماع قرالیتک الغاسنه قرار ویرمکله فرانسهده جمهوریت اصولی اعلان اولنش و بالجمله سندات و اوراق رسمیهده فرانسه جمهوریتک برنجی سنهسی اولمق اوزره تاریخ وضعنه قرار ویرلش و جمله مأمورینک تبدیلی صره سنده فرانسه نیک محاکم مختلفه سنده مستخدم اولان مأمورلرک علم قوانین بیلماری شرط ایکن بو اصول دخی الغایله اهالی هرکیمی ایسترایسه حاکم نصب اولنسنه اکثریت آرایله قرار ویریلهرک فرانسه محکمه لری دخی ارتق برطاقم وحشی و نادان شخصلرک انه کچمش اولمسی اولدجقه اعتداله مائل اوللرک خوف و اندیشه سنی موجب اولمشدر .

و مبعوثان بیننده ظهوره کلان اختلاف و مباحثیدن ناشی امور جمهوری اصلاح و تنظیم ایله مشغول اوله جق یرده بیهوده بحث و مجادله لرله امرار وقت ایلدکری حالده فرانسه امور داخلیه سنک تنظیمنه قانع اولمیوب سر بسیت افکارنده بولنان ممالک سآره اهالیسنه اعانه ایتمک اوزره برقانون وضع ایتمیلر . و مجلسک اصل وظیفه سی قرالک دعواسنه باقق مسئله سی اولدیغندن بوکا دائر برحقوق مباحثلر جریان ایدوب نهایت اورلیان دوقه سیله اکا مقدم و تالی اولان شیرلرک افکار و حشیانه و غرضکارانلری غالب کاهرک قرالک اعدامنه قرار ویرمکله بیک یدی یوز طقسان اوچ سنه میلادیسی اوئلنده قرال میدان سیاسته کتوریلهرک علناً اعدام اولمشدر .

بونک اوزرینه فرانسه خارچنده بولنان فرانمز مهاجرلری قرالک محبوس بولنان اوغلنه اون یدنجی لویی نامیله بیعت ایدوب قرالک قرداشنی دخی وصی نصب ایتملردر .

بوندن صکره مجلس ملت اعضاسی یکدیگری علیه دوشهرک فرانسهده اولمدق فتالقر قلاماش و متعاقباً ظهوره کلان محاربات داخلیه و خارجه ایله فرانسه ملتی انواع مصائبه مبتلا اولمشدر .

مقدما فرانسه قرالی طرفدن امریقالولره اعانه اولنش اولمسندن طولانی انکلتره دولتی فرانسه نیک احوال اختلالیه سنه نظر انتقام ایله باقوب اوستریا ایله پروسیا بیننده بوجه بالا منعقد اولان اتفاقه داخل اولماش ایکن فرانمز لر بلجیقایی ضبط

ایتدکاری کبی انکلتره بولتیقه سنه مربوط اولان فلانک جمهوریه تهلکویه یاقلاشمش و بوجه مشروح فرانسه مجلس ملتدن سر بسیته مائل اولان جمیع ملله امداد واعانه وعد اولنوب انکلتره ده و علی الخصوص ایرلانده آطه سنده برطاق جمعیت اختلالیه لر تشکیل اولنهرق حتی بو جمعیتلردن بریسنک طرفدن فرانسه نك ملت مجلسنه لاجل التبریک مخصوص آدملر کوندرلمش اولدیغندن فرانسه قرالنک اعدامی اوزرینه آرتق انکلتره دولتی دخی طورینی دکشیدمک لازم کلشدر . بونکله برابر شو وقت فرصته فرانسه نك قوه بحریه سی قیرمق و امر بقاده متصرف اولدینی ممالکی آلق دخی انکلیزلرک آمال مخصوصه سندن ایدی . بناء علی ذلک بتون دنیایی فرانسه علیه قالدرمغه سی ایدوب فرانسه زوربالرینک حرکات وحشیه سی ایسه هر ملتک نظر نده پک چرکین کورندیکندن انکلتره خارجه ناظری مشهور پیت همان بر قاج آی طرفنده برچوق دولتر ایله فرانسه علیه عقد معاهدۀ اتفاق ایلمش و دولت علیه واسوج ودانیمارقه دولتر ایله اسویجره و ونیدیک و جنویز جمهورلرندن ماعدا دول اوروپا هب اتقاقه داخل اولمش ایدی .

حتی فس شاهی بیه فرانسلر خیانه قرالیرینی قتل ایدوب الله تعالانک و حکمدارانک دشمنلری اولدقنلردن و سلطان سلیم حضرتلرینک فرانسه زوربالری طرفدن ایلیچی قبول ایتماش اولسندن بخله کندوسی دخی اوروپا حکمدارانسه اعانه ایده جکفی اعلان ایتمش ایدی . فقط بو وعدی سوزده قالب فعالاً بر حرکت ایتماشدر . دولت علیه ایسه بوبابده هر جهته بی طرف طوروب حتی دولت علیه صلورنده سواحله اوچ میل مسافه نك داخلنده دول محاربین سفینه لرینک یکدیگره تعرض ایلماملرینه دائر جمیع سواحله امرلر کوندردیکی کبی در سعادتده مقیم دول محاربه ایلیچیلرینه دخی تقاریر رسمیه اعطا ایلمشدر . و فرانسلر جمهوریت علامتی اولمق اوزره باشلرینه یاخود کوسلرینه (قوقارده) تعیر اولنور بر علامت وضع ایدر اولمشلر ایدی که مدور برچوقه پارچه سی اولوب اوزرنده بربری ایچنده و هربری بررنکده اولمق اوزره اوچ دائره وار ایدی . فرانسه خارجنده بولان فرانسلرلردن دخی جمهوریت افکارینی تصدیق ایدنلر بو علامتی اتخا ایدر اولدیلر ایسه ده ممالک سائرۀ اوروپاده بو کیفیت ممنوع ایدی . اما دولت علیه ده بویه شیلره اهمیت ویرلمدیکندن کرک استانبولده و کرک سائر ممالک محروسه ده بولنان فرانسلر عینله فرانسه ده اولدینی کبی علامات جمهوریتک اعلاننده سر بسست ایدیلر . و بوجه مشروح فرانسه ده اعلان جمهوریت اولدینی کبی در سعادتده مقیم فرانسه ایلیچسی شوازلو بالطبع معزول اولدینی حالده بک اوغلنده کی فرانسه

سفارتخانه سنده مقیم ایکن در سعادتده بویه قوقارده لولر تکثر ایدرک برکون جمعیت ایله واروب شوازولی قرالیت طرفداریدر دیو سفارتخانه دن اخراج ایله فی الاصل فرانسه سفارتی باش ترجمانی اولدیغی خالد بر مدتنبرو متقاعد اولان اختیار فونطونی وکالۀ آنک یرینه اقعاد ایتملیله شوازول اشیا سنی روسیه سفارتخانه سنه نقل ایدوب کندوسنجه آرتق فرانسه یه عودت دخی قابل اولدیغی سندن متعاقباً روسیه دیارینه کیتمشدر . ودر سعادتده کی قوقارده لو فرانسرلر بعضاً بازار کونلرنده سفارتخانه ده ترتیب ضیافت ایله اعلان مراسم جمهوریت ایتملیله نمجه وانکلتره وسائر دول محاربه ایلیچیلری آرالق آرالق ترجمانلری باب عالی یه کوندروب فرانسرلر قارشو غلطده شویله ادبمزک و بویله بدناماق ایدوب حتی باشلرینه قوقارده وضعنه قناعت ایتمیرک فرانسه سفارتخانه سنده سر بسیت علامتی اولهرق بر صریق نصب و اطرافنه تجمع ایله کونا کون مسخره قلمر ایدیورلر . بونلرک منع و تادیبی دولت علیه نک وظیفۀ ذمتیدر وادیلرنده فریاد ایتدکجه دولت علیه فرانسه ماده سنده بیطرفدر و دولت علیه ده بو مقوله علامتلر معتبر اولماغله کرک قرال طرفداری و کرک جمهور طرفگیری ممالک محروسه ده بولسان بالمله فرانسه لولری دولت علیه فرانسماتی بیلور وجهه سنک تجارته دائر اولان امور و خصوصنه مساعده ایدر جوابیله کچشدیریلوردی .

حتی برکون اوستریا باش ترجمانی رئیس الکتاب راشد افندینک یانسه کلوب « شو فرانسرلرک الله لایقنی ویرسون بزلی دردی ایتدیلر امان اقدام باری شونلرک باشلرندن قوغارده لرینی نزع ایتدیریکز » دیو استدعا ایتدکده راشد افندی « بهی دوستم بز سزه کرات ایله افاده ایتدک که دولت علیه اسلام دولتیدر بزده اومقوله علامتلره اعتبار اولمنز دوست دولتلرک تجارینی بز مسافر بیلورز باشلرینه نه ایستلرسه کیرلر و ایستدکبری علامتی طاقارلر باشلرینه اوزوم کوفه سی کیسه لر نیچون کیدیکز دیمک دولت علیه نک وظیفه سی دکدر کندوکزی بیهوده یوریورسکرز » دیو جواب ویرمشدر . و فرانسه لو سالف الذکر فونطونی وکالتدن عزل ایله یرینه فرانسه تجارانی معتبرانندن ایکی کشتی بی وکالته اقعاد ایتمکله بر مدت بونلرک عرض وانهارلیله فرانسه تجاری اموری بر موجب عهدنامه هایون رؤیت اولنقده ایکن بیک ایکوز یدی سنه سی او اخرنده وندیگ وبوسنه طریقیله فرانسه جمهوری طرفندن (دو قورش) نامنده بر ایلچی در سعادتده اقامته مأمور اورطه ایلچی اولدیغی باب عالی یه تقریر تقدیمیه اخبار ایتدکده فرانسه جمهوریتی هنوز هیچ بر حکمدار طرفندن تصدیق اولنماش اولدیغی خالد ابتدا دولت

علیه طرفدن تصدیقیه ایلیچیسینک قبولی مناسب کوریه مدیکندن دوقور شه خفیا روی التفات کوستریه لرك غلطه ده بیاغی بر خانه استیجار و دروننده اقعاد ایله بعض ماده دأر آراق آراق مخفیا مخبره یه ابتدار اولنوب بر طرفدن کندوسی تقریر لر تقدیمه فرانسه جمهوریتنک تصدیقی و کندو ایلیچیلکنک قبولی استعداد الحاح ایتدکجه اسلوب حکیماننه ایله امرار وقت اولنور ایدی .
الحاصل دولت علیه عواقب اموره انتظار ایله بوبابده کاملاً بیطرفاق مسلکئی اتخاذ ایتش ایدی .

و فرانسه علیهنه عقد اولان اتفاق روحی مثابه سنده اولان انکتره دولتک حربه قیامندن بروجه مشروح بعض اغراض پولتیقه سی اولدینی کبی دیگر دول اوروپانک اتفاقبری دخی ظاهر آقرا لیتک شانی محافظه ایچون و حقیقت حالده بر منفعت مخصوصه ضمیمه ایدی . از جمله اوستریا دولتک اصل مقصدی پایزباسی یعنی بلجیقا ولایتک استخلاصی خصوصی اولدینی کبی پروسیا دخی بوقارغشه لقمه توسیع ممالک ایتک املنده ایدی . روسیه امپراطورینجه سی قترینه جمله دن اول فرانسزلر حقمده اظهار عداوت ایدوب حتی اسوج قرانسه آچه و عسکر و عدیه فرانسه علیهنه تشویق و حرکتئی تعجیل ایتش و اودخی تهیئه اسباب سفریه یه ابتدار ایلمش ایکن کندوسی اصلزادکندن بعضیبری اعدام ایلمش اولدیغندن اسوج دولتی آند نصکره فرانسه سفرنده بیطرف قالمشدر . و بعده قترینه انکتره دولتیله فرانسه علیهنه اتفاق ایلمش ایسه ده امداد ایلماش . و فرانسه علیهنه طارغلق اظهارندن بشقه فعلاً بر حرکت ایلمامشدر . زیرا قترینه نك غرض خفیی بو ایدی که اعزاموری اولان له مسئله سنه ایستدیکی کبی صورت ویرمک ایچون دول اوروپانک علی الخصوص اوستریا دولتک بر صورتله مشغولیتی ایستردی و کاملاً امین اولمق اوزره اوستریا ایله فرانسه نك آره سی بوزوق اولمق قترینه یه کوره پک مهم بر ماده ایدی . و بوبابده پروسیا دولتی واسطه ایتش ایدی . پروسیانک دخی الة مهم ایشی لهستان مصالحتی اولوب فرانسه محاربه سنه مداخله سندن غرض اصلیبی بوضورتله اوستریا دولتی اشغال ایتمکن عبارت ایدی . و مقدمات ریشنباشده دولت علیهنه دأر واقع اولان مکمله ده اوستریا دولتی دولت علیه دن آلمش اولدینی یرلردن کف ید ایدرک اکا مقابل پروسیا دخی اوستریانک بلجیقایی تلخیص و تصرفه راضی اولمسيله متعاقباً اوستریا لو سوق عسکر ایدرک بلجیقا اختلالنی باصدیروب انجق اوستریانک اوله اوزاق بر محله مشغول بولنسی قترینه نك تمام آرادینی صورت اولدینی کبی بالاده بیان اولن دینی اوزره پروسیا لو

اوستریا دولتی تشویق ضمننده آندن اول فرانسه اوزرینه حرکت ایتمشیکن باشلوجه
 محاربه بلچیقاده اوله جنی جهته حرک بارکرانی اوستریا اوزرنده قاله جغنی اولجه
 مطالعه و حساب ایدرک سالف الذکر والمی محاربه سنده برکونه مغلوبیت کورمکسزین
 خسته لکی بهانه ایدرک فرانسه حدودندن چکیلیویرمش اولسی اوزرینه اوستریا لورک
 بلچیقا محاربه سنه طوئلمسی و بلچیقانک فرانسزلر لته کچمسی دخی قترینه نک مرانیه
 موافق کیشدر . یوخسه پروسیانک اوستریا اتفاقدن نیتی خلوصه مقرون اولسیدی
 ابتدای امرده فرانسه جمهورینی تأدیب ایده بیلورلر ایدی . لکن فرانسه غائبه سنک
 اویله جه بر طرف ایدیلیویرمسی قترینه نک ایشنه چندان توافق ایتزدی .
 و بوندن صکره پروسیانک داخل اتفاق اولمقدن باشلوجه بر مقصدی دخی قترینه نک
 مراحمی اوزره اوستریا دولتی فرانسه محاربه سنده دوام ایتدیرمک صورتی اولوب
 خصوصاً که بیک ایکمیوزیدی سنه هجریه می اواسطنده روسیه و پروسیا دولتری
 بالاتفاق لهستانک ایکنجی مقاسمه سنی اجرا ایتمش اولدقاری حالده لهلولردن
 بعضیلری محافظه وطن ایچون غیورانه محاربه یه قیام ایتدکلرندن ایکسیمی دخی لهستانک
 کارینی اتمام ایتمک اوزره اولطرفده مشغول بولدقورینه مبنی دیگر دول اوروپانک
 جانب شماله عطف نگاه ایده میه جک صورتده مشغول بولتلاری کرک
 قترینه نک و کرک پروسیا قراننک منافع پولتیقیه لری اقتضاسندن ایدی . بعض
 مورخینک نقلنه کوره بیک یدی یوز طقسان اوچ سنه میلادیه می اواخرنده قترینه
 بالفعل فرانسه محاربه سنه قارشمق اوزره انکلتراه یه ایکی شرط تکلیف ایتمش و بونک
 بریسی روسیه نک لهستانده ضبط ایتدیکی ممالکک تصرفی تأمین قانمق . و ایکنجیسی
 دولت علیه علیه روسیه ایله انکلتراه بینده عقداتفاق اولتمق ماده لرندن عبارت اولوب
 شرط ثانی انکلتراه لو طرفندن قبول اولندیغی جهته جریانیدن مکمله منقطع اولمشدر .
 الحاصل اکثر دول اورویا انکلتراه دولتیله فرانسه علیه اتفاق ایدوب فرانسه
 زوربارلی ایسه برشیئ قید ایتیه رک فرانسه قراننک اعدامی اوزرینه پارسده مقیم
 انکلیز ایلچیمی لوندره یه جلب اولندیغی کبی ابتدا فرانسه جمهورینی طرفندن
 انکلتراه یه و آنک پولتیقیه سنه مربوط اولان فلمنکه بردن اعلان حرب اولتمشیدی .
 و دول متفقه محاربه یه حاضر لاندقاری ائنده فرانسه ده دخی اوچوز بیک عسکر یازیلدق
 مصارف سفریه ایچون حسابسز قوائم نقدیه کسالمکده ایدی . حالبوکه فرانسه نک
 بعض ایالاتده دخی جمهور علیه عصیان وقوعیله محاربه داخلیه ظهوره کیشیدی .
 و بلچیفاهالیسی اوراده بولتان فرانسزلرک تعدیاتندن خلاص ایچون ایاقلانمغه مستعد

اولد قمر خالد بلچیقاده کی فرانسه قوماندانی دو موریه اصول جمهوریتی الغایابه اورلیان دو قه سنی یا خود اوغلی لوی فیلیپ که اولوقت بلچیقا اردو سنده جنرال صقیلبه بولنه یوردی آتی قرالغه بالا انتخاب بر حکومت مشروطه تاسیس ایلمک افکارنده اولدیغندن اوستریا قوماندانی ایله کیزلوجه مخبره ایدرک امور حربیه لایقابه اهتمام ایتیمور ایدی . بناءً علی ذلک بیک اکیوزیدی سنه هجریه سی موسم بهارنده بلچیقاده فرانسه اردوسی فلمنک اوزرینه یوریمشیکن اوستریالولرک جنکه مبادرت ایتیمی اوزرینه فرانسه عساکری مغلوبا کیرو چکیله رک اوستریالولر بلچیقانی ضبط ایدیورمشیدی . بونک اوزرینه دو موریه پارسه ایستند کده کیتیموب لوی فیلیپ ایله برابر اوستریا اردوسنه فرار ایتلمه لوی فیلیپ پدری اولان اورلیان دو قه سی دخی پارسده حبس وتوقیف اولمشدر .

دول متفقه اردولری طرف طرف فرانسه یه هجوم ایدوب فرانسولر بوسنه اسپانیا وایتالیاس طرفلرنده برایش کورده مدکری کبی رین نهری طرفنده دخی مغلوب اوله رق سنه سابقه ده ضبط ایتمش اولدقیری المانیا مملکتلرینی پروسیالو استرداد ایله اوستریالو دخی فرانسه دن برازیرلر آلمش ولئون اهالیسی قرالیمه مائل اولدقیری جهته ایقلا نه رق جمهور مأمورلرینی اعدام ایدوب مارسلیالولر دخی آنلرله برابر اولدیغندن جمهور طرفندن عسکر سوقیه مارسلیا شهری ضبط اولنه رق اهالیسی حقتده وحشیانه معاملهلر اولتیمی اوزرینه طولون شهری اهالیسی بحر سفیده بولنان انکلیر واسپانیا دو نملرینی دعوت ایله قاعه وترسانه یی واوراده بولنان فرانسه دو نملرینی قرال مقتولک اوغلی اولوب محبسه بولنان اون یدنجی لوی نامنه اوله رق انکلیرلر تسلیم ایتلمه یه بودخی فرانسه جمهورینه عظیم کدری موجب اولمشیدی . بالاده بیان اولنان احوال دن اکلا شامش اولدیغی اوزره اشوب بیک اکیوز سکز سنه هجریه سی اوئلنده فرانسه دولتی بریوک مخاطره ده بولنمشیکن مجلس ملت اعضایی فرقه فرقه اوله رق یکدیگری نی اسافل ناس نظرنده اتهام ایله اعدام قیدنده اولوب ایچلرندن بعضلریدخی اراده استناد ایله زیاده نفوز کسب ایدرک پارسده بعض مبعوثان دن مرکب اولمق و حکمی قابل استیناف اولماق اوزره بر محکمه اختلالیه و جمهورک مح فظه چون اولنان تشبثاتک اجرایی ضمننده قوه مطاقه بی حامل اولمق اوزره طقوز اعضادن مرکب بر سلامت عمومی جمعیتی وامور ضابطه نک رفیق چون یکرمی درت اعضادن مرکب بر امنیت عامه جمعیتی تشکیل اولتمش اولدیغی خالد پارسده تکرار بر اختلال چیقاریله رق یاقوبن فرقه سی بتون بتون غلبه ایدوب آرتق اولدقه اعتداله مائل ظن اولنانلر وطن دشمنی عد اوله رق مبعوثان دن دخی خلی آدلر

حبس و توقیف اولغله سوز آرتق بتون بتون اك وحشی آدملره قالمش . و بونلرك رئيسی رويسپير اولوب محکمه اختلالیه و جمعیت سلامت عمومیه آنک نفوذی آتنده حرکت ایلدیکندن قوه قانونیه و اجرائیهی اله آهرق هرايستديکني یايمغه مقتدر اولغله هان هر کسه موجب خشیت و دهشت اوله جق و جهله انواع اجراءات و حشیه به ابتدار ایلمشیدی .

برمنوال سابق هر طرفه جمهور عسکری مغلوب اولدیغندن بتون فرانسزلرك عسکر یازلمسغه قرار ویرلمش و هان لیئون شهری حصر و تضییق ایله ضبط اولنه رق اهالیسی حقنده غایت و حشیه له معامله لر اجرا اولندیغنی کبی سائر ایالاتده دخی جزئی افترالر ایله پک چوق آدملر اعدام و غیرت جمهورییه سی مشکوک اولنلرك حبس و توقیفنه قیام ایدلمش ایدی .

ایشته بوسره ده محبوسه قرالیچه بالمحا که اعدام اولنمشدر . فقط اولوقت فرانسه ده محاکمه برقاعده معقوله و صحیحه اوزرینه جاری اولیوب هان یاقوبن فرقه سنک عندنه اعدامی مطلوب اولنلرك اتهامنه وسیله اتخاذا اولنه بیله جک صورته سطحی و صوری راستنطاق اوزرینه ترتیب اولنان حکم قره قوشیدن عبارت اوله رق بعضیلری استنطاق بیله اولتماز ایدی . بویولده قرالیچه نك اتهامنده ایراد اولنان مواددن بری مقدما دولت علیه محاربه سی ایچون برادری اولان اوستریا ایمپراطورینه کویا فرانسه خزینه سندن ایکیوز میلیون فرالق ویرمش اولسی ماده سی ایتمش . و برقاچ آی صکره مقتول قرالک همشیره سی او یولده براتهام و استنطاق ایله و متعلقات قرالیدن ذکور و اناث یکریمی درت معتبر کیمسه لر دخی بلا استنطاق حمله اعدام اولنوب محبسده یالکیز قرالک یدی سکز یاشنده اولان اوغلی لویی قالوب او دخی درلو حقارتلر کوره رک ایکی سنه صکره محبسده فوت اولمشدر .

و مقدجه مجلس مات اعضاسندن توقیف ایدلمش اولان یکریمی بو قدر ذات دخی دفعه اعدام اولندیغنی کبی محبوس بولنان اورلیان دو قه سیدخی بوسره ده اعدام قانمشدر . یاقوبنلر حکومتی ایادی تنفذ و تعلیلرینه آله رق بو وجهله طرف بطرف قتل نفوس و سائر کونه معاملات و حشیه نه دوام ایله برابر خالق عقل و اخلاقی دخی اولدرمه که قیام ایدرک بیوک مکتبلری قیادقلری کبی هپ جمعیت علمیه لر الغا اولنمش واسکی فرانسه دن برائر قالماق اوزره قرالیت و دیانت و اصلته دائر بالمله اصول و رسوم قدیمه نك الغاسی صرده دین عیسوی نك دخی رفع و الغاسیه سر بسیت و مساواتدن بشقه برعبادت اجرا اولتماسنه قرار ویرلمش . و فقط دین عیسوی رینه بر دین عقلی وضع اولنوب پارس کایسارلرندن پاپاسلر طرفه و اخراج و پارس باش کلیسائی عبادت

جدیدیه تخصیص ایله پاپاسلر و دیاقوسلر رینه تیار و او یونجیلری و موزیقه جیلری کچوب کلیسانک محرابنده یوکسک صندالیه اوزرنده برکنج و کوزل قاری یارم چپلاق اوله رق اقعاد و اله عقل اتخاذ ایله حاضر اولان جماعت طرفدن کندو سنه سجده و عبادت ایدلمشدر . و بو آیین جدیدک اجرا سندن چند روز مرورنده جمله عرب کوله لرك حریقی اعلان اولمشدر . فرانسه نك سائر شهر لرندن بشقه برچوق قر به لر نده دخی اشبو عبادت جدیده تأسیس اوله رق برچوق کنج و کوزل قیزلر اله مقامنده طور مغه مجبور اولمشدر .

بروجه مشروح عیسویتک الغابی حسیلله تاریخ عیسوی و ایلر و کونلر دخی تبدیل ایله جمهوریتک تاریخ تأسیسی اولان بیک یدی یوز طقسان ایکی سنه سی ایلولنک یوم اعتدال لیل و نهار اولان یکر می ایکنجی کونی تاریخ جدیدک ابتداسی اولمق اوزره سنه هر بریسی اوتوزر کوندن عبارت اوله رق اون ایکی آیه تقسیم ایله باقی بش کون سنه نك صوگ آینه الحاق و هر آی اوچه تقسیم ایله هر اونجی کون بازار کونی اعتبار ایدلمش و بو یولده بریکی روز نامه یاللمشدر .

طقسان اوچ سنه میلادیه سی او اخر نده بو مثللو عجائب شیلر اختراع اولدینی صرده کرک پارسه و کرک ایالاته حبس و توقیف و قتل و اعدام ایشلرینه دخی دوام اوله رق مجلسلر محبوسینی آله مدیغندن مناسرت و کلیسا و مکب و سرای کبی اینیه جسیمه هپ مجلس اتخاذ اولوب محبوسلر بر طرفدن اعدام اولندجه برلرینه دیکر لرلی قونیلوردی . بو صورتله پک چوق معتبر و اهل عرض آدملر بغیر حق اتلاف ایدلمشدر . و الحاصل بتون فرانسه بردهشت ایچنه دوشه رک اجرا اولمقدق و حشیلک کور قالمشدر . بو حالده مجلس و قومیسسیون و جمعیتلر اعضاسی ینه ایکی فرقه اوله رق یکدیگر یینک اتلافه سعی ایدردی . بو وجهله فرانسه نك حالی داخلافنا اولدینی کبی بر منوال سابق دول متفقه اردولری هر طرفدن فرانسه بی احاطه ایدرک هر ایستدکاری بی پایه بیله جک درجه بیه کلدکار ندن هان پارس اوزرینه حرکت ایتملری ایچون بر مانع صحیح قالمش کیدی . انجق دول متفقه دن هر بری کندو منافع و فتوحات مخصوصه سنه حصر نظر ایتدیکی جهته یینلرنده حسد و عدم امنیت ظهور ندن ناشی اوستریا ایله انکلز قوماندانلری یواش طورانه رق بالاتفاق پارس اوزرینه حرکت ایدمه دکاری کبی رین نه ری طرفده بولتان اوستریا و پروسیا قوماندانلری یینلرنده شقاق و نفاق اولوب کوچک جنرالردخی لایقیله ایفای وظیفه ایتدکار ندن هیچ بریده جسورانه حرکت ایدلمدیکی جهته اوستریا ایله پروسیانک غالبیتلری دخی نمره سز قالمشدر . یوخسه جنراللر لایقیله طاورائمش اولسیدیلر جمهوری تأدیپ بلکه احما ایدمه بیلور لردی .

زیرا فرانسز لرك پك چوغى مأمورین جمهوریه دن بیزار ایذی لکن پروسیا قیرالی قترینه ایله بالاتفاق لهستانك امر مقاسمه سنی اتمام ایلمك املنده اولمسیله اصل منفعتی اوجهته آرادیندن فرانسه محاربه سته چندان اعتنا ایتمیوب دیگر دولتلر دخی برر صورتله کندو منافع مخصوصه لرینه خدمت ایدرك یكدیکره لایقیله امداد ایتمک لرندن غالب ومغلوب معلوم اولمق سزین موسم شتاده هر بری فرانسه حدودندن کیرو چکلمش لر در . ایشته فرانسه جمهوری دول متفقه نك بویه قصور لرندن استفاده ایدرك کندو سنی طوپلایوب بر عظیم تهلمکه خارجه دن قورتلدینی کی جمهوریت قارشو کلان بعض ایالات خلقی مغلوب اولوب لیئون شهری دخی ضبط اولدقدنصکره طولون اوزرینه جمهور طرفندن عسکر سوق اولوب اولوقت یکر می اوچ یاشنده اولدینی حالده طوپچی یوزباشیسی بولان ناپلیون بوناپارته نك غیرت وحسن تدبیری ایله اولنان حرکته مقاومت اولنهمیه جنی معلوم اوله رق انکلیرلر فرار ایتمکله طولون دخی ضبط ایله اهالیسی حقنده تعریف اولنماز صورتده وحشیانه معامله تادیبه اجرا اولنمشدر . وبواننده جمهوریت افکارینه مخالف اولان یاخود بویولده اتمام اولنان کساندن هر طرفده یومیه پك چوق آدملر قتل اولنوردی .

ایشته فرانسه ده سربسیت قزاقمق سوداسیله اختلال چیقارانلر ایسی بو درجه یه کتوره رك نهایت سوز ایغه دوشوب برطاقم ارادل سوز صاحب اوله رق اسافلک عالییه تغلب وتحکمی قاعده اولمغاله اختلاله سبب اولنلرک دخی چوغی خارجه سوریه رك روبسپیر آرتق فرانسه ده بر حکمدار مطلق مرتبه سینه واصل اولمش وآنک زمان نفوذ واقبالی فرانسه نك بر دور دهشتی دیمک اولوب شوقدر که هر درلو وحشیلمکه مائل اولمسیله بر ابر دینسز لکی سومدیکندن بقای نفوذینه آلت ایدندیکی اسافل واراذلک آرزوسنه تبعاً دیانت عیسوییه یی الغا ایله عبادت عقل آیینی تأسیس ایلمش ایسه ده اشبو آیین جدیدک چندماه اجرا سندنصکره روبسپیر آنی دخی الغا ایله بیک ایکویوز سکز سنه سی اواخرنده برالله وارد و انسانک روحی باقیدر دیو ملت مجاسنه برقانون یابد رمشدر .

بروجه بالا عبادت عقل آییننک الغاسیله روبسپیر پك چوق آدملرک توجه ومجتبی جلب ایلمش ایسه ده ارادل طاقنک عننده نفوذینه برآز خلل کلشیدی . روبسپیر ایسه نفوذ واقباله کووه نه رك کندو علیمنده ظن ایلدیکی اشخاصی جمهور علیه نه فساد ایدورمش دیو اتمام وهان محکمه اختلالیه ده حکم واعدام ایتدیر مکله مشغول اولدیندن هر کسی خشیت ودهشت استیلا ایدوب بوضورتله خلا فکیرانی قوت بوله رق اشبو بیک ایکویوز طقوز سنه سی اوانلده کندوسی و طرفداری اولان

برخیی متغلبه اتهام و اعدام ایله سائرلره ایتدکارینی بولدیلر . و بونکله فرانسه نك دور دهشتی نهایت بوله رق محبس لرده موقوف بولنان بیکارجه آدم لرك سبیل تخلیه اولنمشدر . و اگر چه بونك اوزرینه یاقوبنلر تکرار اختلال چیقار مشلر ایسه ده مغلوب اوله رق نهایت جمعاری اولان یاقوبن مناستری سد و بند و بر مدت صکره حکومت معرفتیه هدم و تخریب اولندیغی کبی محکمه اختلالیه دخی الغا و سلامت عمومیه جمعیتی اعضاسندن اولان غدارلر حبس و توقیف و الحاصل اجرا آت و وحشیانه مائل اولان جمهوریت مفرطه اربابی هر طرفه تربیه و تدمیر اولنه رق جمهوریت معتدله افکاری غلبه ایلمشدر . و اگر چه بونك اوزرینه بر طرفدن دخی فرانسه ده قرالیت طرفدارلری میدان آلمغه باشلا یوب بوجهتله فرانسه ده افکار عمومیه اوچ قسمه منقسم اولمش ایسه ده محاس ملتده اکثریت آرا جمهوریت معتدله طرفنده بولمشدر . اختلال چیقار مق برسلیك او کئی آچق کیدر بر کره آچلیدیغی کبی طبیعی حیزی کسامد کجه طورماز و آچانلر سد و بندینه قادر اوله ماز . و یالکنز قارشو کلنلری کور میوب اکا یول ویرنلری دخی برابر غرق و تلف ایدر . بناء علی ذلک فرانسه اختلالنه سبب اولنلر هپ بوجهله برر برر تلف اولمش و هر بری ایتدکارینك عینیه جزاسنی بولمشدر .

فرانسه ده بو وجهله داخلآ آسایش اولدقجه اعاده اولمغه باشلادیغی کبی خارجآ دخی دول متفقه جنرالاری بیننده اتفاق اولدیغندن لایقوله یکدیگره اعانه ایتدکاری جهته فرانسلر بوسنه دول متفقه عساکرینه غلبه ایتدکجه باشلا یوب علی الخصوص بلجیقا طرفنده اوستریالویه کرکی کبی غالب کلشلر ایدی .

بالاده بیان اولندیغی اوزره پروسیالونك فرانسه محاربه سندن غرض خفیسى اوستریالولری مشکلاته دوشور و بده قترینه ایله بالاتفاق لهستانك امر مقاسمه سنی اتمام ایلمکدن عبارت اولمسیله دول متفقهدن بالاتفاق فرانسه ایله مصالحیه وسیله آرامقده ایکن انکلتراه ایله فلمنکدن اعانه آچمسی آله رق موسم بهارده بو ایکی دولت ایله مجدداً عقد معاهده و اتفاق ایلمش ایسه ده هیچ غیرت ایتیوب بروقت صکره عهدینی دخی تقض ایله اشبو طقوز سنه سی اوائلنده فرانسه جمهورى ایله خفیا مکالمه یه مباشرت ایدرک همان کوز موسمنده یعنی خلال ربیع الاولده رین نهرینك صاغ یقه سنه چکلمش و بناءً علیه بوسنه اوستریالو طرفنده دخی مغلوبیت صورتی نمایان اولمش ایدی . سفر اخیرده اوستریالونك بغته قترینه ایله بالاتحاد دولت علیه یه اعلان حرب ایلمش اولسی هنوز خاطر لر دن چیقماش اولدیغندن عثمانولر دخی اوستریالونك مغلوبیتی بالطبع کوش ممنونیت استماع ایدر لر ایدی .

فقط دولت عايه فرانسه جمهوريتك تصديقتده اوك اياق اولمقدن احتراز ايدرايدى. بناءً على ذلك بوجه بالا اورته اياچيلك ايله در سعادتہ كمش اولان دو قورش ايله آره صره خفياً مكلله اولنمقدہ اولديغى حالدہ سفارتك قبولنى استدعا ايتدكجه برر صورتله كچشدير يلوردى. و بو ائنادہ دولت عليه اور و پادہ بره صالحه استعدادينى اكلادينى كجى اور و پامورينه مدار مداخله اولمق اوزره فرانسه يه عرض توسط ايلمشدر.

دوقورشك مأموريتى ايسه دولت عليه يه فرانسه جمهوريتنى تصديق ايتديرمكن عبارت اولمسيله ورو بسپيرك اعدامى اوزرينه فرانسه نك احوالى پك زياده تبدل ايلمش اولمسي و حالاً برقرارده طور ميوب نتيجه سى كر كى كجى معلوم اولماسى حسبيله اشبو عرض توسط اوزرينه دوقورشك باب عاليه و ير مش اولديغى تقريرنده مصالحه فرانسه نك دشمنلرينه خيرلو و فائده لو اولديغنه مبنى « مصالحه تكليفى دشمنلرى حمايه در يولو » سوزلر مندرج اولديغندن لاجل المكلله اشبو بيك ايكيوز طقوز سنه سى جمادى الآخره سنك يدنجى صالى كيجه سى دو قورش بر مهندس قيا فتندہ رئيس الكتياپ سيد محمد درى افندي نك خانه سنه كلهر ك مخفيجه مكلله يه مبادرت اولنمقدہ درى افندى طرفندن « دولت عليه نك فرانسه جمهورينه و بالجملة فرانسه ملتنه دركار اولان ميل وركونى مسلم اولديغى » مقدمه سيله سوزه كيريشه رك « كچنلرده مصالحه حوادثى مسموع اولديغنه مبنى خيرلو مصالحتله خيرلو دوستلرك توسطى مستلزم فوائد اوله جفتدن مصالحه مذاكره سنده دولت عليه نك بر مأمورى بولنديغى حالدہ بعد المصالحه مطلوب اولان ايشلر بروفق مرام تنظيم و اتمام قنور مطالعه سيله جانب دولت عليه دن كندوسنه توسط خصوصى اشعار اولنمشيدى يوخسه فرانسه يي صاحبه برنوع اجبار يا خود آخري جمهور اوزرينه ترجيح معنا سنه اولمق احتمالى اولمديغى دركاردر « دينلمكله دو قورش دخى فرانسه جمهوريتك دولت عليه يه و على العموم ملت اسلاميه يه صفوت و خلوصدن بختله اون سكتز آيد نبرو باب عاليدن بر جواب شافى اله مديغنى معرض شك ايتدو دره ميان ايلمسى اوزرينه درى افندى اتفاق خصوصنك تأخيرينه سبب ترتيب اتمرك نقصانى ايدى الحاله هذه تكميل لوازمه اهتمام دركار اولغله وقت مقدرينه دك بوش طور مقدن ايسه ديمين بيان ايتديكم و جهله مصالحه حوادثى مسموع اولمسيله مصالحته مقدمه اولمق اوزره عرض توسط اولنمشيدى قالديكه دو قورش دوستمز بر قاچ دفعه در شروطك مذاكره سنه شروع اولنسون ديور شروط ديديكى نه مقوله مواددر من غير رسم كوره لم ديمسى اوزرينه دو قورش دخى جمهورك طالب اولديغى اتفاق دولت عليه يه خيرلو اولان مواد ايجوندر دولت عليه كندوسنه نافع شرائط نه ايسه

ملاحظه و افاده ایتمودر مثلا روسیه قینارجه معاهده سنی تصحیح ایترمک کبی دولت علیه نک تزیید فر و اقبالی موجب اوله جق مواد هر نه ایسه اکا کوره عقد اتفاق اولمق اوزره جمهور بی مأمور ایتری هر صورتیه دولت علیه ایعانه اولنه بیلور و مقابلنده جمهور برشی استمز فقط تجارته دائر بعض خصوصاته طرف دولت علیه دن مساعده بیورلسه کفایت ایدر دیش اولسنه جواباً دری افندی ایکی دولت بیننده عقد و اتفاق اولنه جق اولدینی حالده طلب قنی طرفدن وقوع بولورسه شروط اتفاق اول طرفدن تقدیم اولتور بین الدول قاعده بولنده در بنجده شروطی کوره یم دیدیکم صورت رسمیه ده دکدر فقط کندوسی تعجیل ایتریکندن کوریم دیمشدم دیجک دو قورش بن بونی کرات ایله راشد افندی به افاده ایتمشیدم بکا بر جواب ویرلمدی اگر شروطی کوریم دینلمش اولسیدی جمهوره یازار کتوردرد ایدم قالدیکه بن فرانسه دن چیقدیغ وقت جمهورک نیتی دیمین بیان ایتریکم وجهله اولوب بعده بعض تبدلات واقع اولدی و پولتیقه دکشیدی شمیدی جمهورک اراده سی نه وجهله در و پولتیقه لری نه صورتده در بیله م لکن یازار جوابی جلب ایدرم دیدکدن صکره له ماده سنی آچوب له لونک خصاسی طرفدن اضطرابی درکار اولغاه طرف دولت علیه دن استصحابی صورتیه بر نوع اعانت ضمننده اشبوکله جک بهارده لهلویه مساط اولان دولتوره بولهلورلر حقتده ایتریککنز ظلم و تعدی ندر وادیلرنده بحریرا طرف دولت علیه دن صورلسه اوله مازمی دیو ایراد ایلدیکی سؤاله جواباً دری افندی له لونک حالتدن برصحیح خبریمز یوقدر باقه لم اولوقته قدر نه صورت کسب ایدرینه مذاکره ایلرز کلامیله مجلس مکالمه به ختام ویرمشدر.

دولت علیه مقدا فرانسه نک تشویقیله له ماده سندن طولایی آچمش اولدینی روسیه سفیرینک نتیجه سنده قینارجه معاهده سی حمل ثقلینی یوکلنمش و سفر اخیرده حاصل ایتریکی اقتباد و بصیرت اوزره اوروپانک میزان پولتیقه سنی پیش نظرده آله رق اکا کوره کندو منافع پولتیقه سنی موازنه ایتمکده بولنمش اولدینی حالده شمیدی دو قورشک سوزیه خود بخود له مسئله سنه مداخله ایده میه جکی درکار ایدی فقط بودرلو مکالمات ایله دری افندی فرانسه جمهوریتنک تصدیق بحثده برازدها وقت قرانمشدر.

چند روز مرورنده یعنی جمادی الآخره نک اون اوچنجی کونی دری افندی قپویه کیتمک ایچون اسبنه سوار اولمق اوزره ایکن زردبانده خجاة وفات ایتمکله یرینه تذکره اول فردوسی افندی رئیس الکتاب اولوب آنک یرینه دخی کوچک

تذکره جی عارف افندی کچمکله دیوان هایون کیسه داری بولنان و مقدمات زشتوی مکالمه سنده مکالمه کاتبی اولی اولان عونى افندی کوچک تذکره جی اولمشدر .
 دری افندی در سعادتده اکری قپو قربنده نقاش باشی مصطفی اغا نام کسه نك اوغلی اولوب التمش بش و التمش التی تاریخلر نده دیوان هایون قلمنه مداومت و سکسان ایکی سفر نده قلم مذکور ایله روم ایلی به عزیمت ایدرک سفر مذکورده مکالمه کاتبی و بعده کیسه دار و تذکره جی و مکتوبجی اولوب سفر اخیرده مرخص ثالثک ایله زشتوی مکالمه سنده مأمور بیورلمشیدی امور دیوانیهده متفان و مستقیم الاطوار بر ذات ادیب اولوب راشد افندی نك عزیمتده رئیس الکتاب اوله رق درت بچق آی ریاستده نصکره سنی التمشه قریب اولدینی حالدہ ترک منصب حیات بی بقا ایدوب کیتمشدر .

بالاده بیان اولدینی اوزره پروسایلو عهدنده طور میوب فرانسه ایله خفیاً مخبره به شروع ایله رین نهرینک صاغ یقه سنه چکلمسی دول متفقهی مشکلاته دوچار ایدوب بوجهته کچن یازین اوستریالولر مغلوب اوله رق رفته رفته رین نهرینی مرور ایله المانیاطرفه چکلمکه مجبور اولدقلرندن فرانسزلر بلجیقایی ضبط ایتشلر ایدی .
 وقیشین منجمد اولان نهر و کوللرک اوزرندن مرور ایدرک فلمنک مملکتی دخی تسخیر ایتلریله فلمنک استات هولدری انکلتره جانبه فرار ایتش ایدی .
 اشبو بیک ایکیوز طقوز سنه سنده واقع مارت رومینک یکر می دردنده پروسیا دولتی فرانسه ایله عقد مصالحه ایدرک رین نهری فرانسه نك حدود طبیعی سی اولق اوزره تعیین و تصدیق اولندی . پروسایلونک بو حرکی دول متفقهی بتون بتون شاشردی متعاقباً فلمنکلولر دخی نیسانک یکر می اکیسنده فلمنک مستقل برجهور اولق اوزره فرانسه جهو ریه عقد اتفاق ایدرک بوندن صکره آرتق فرانسزلر ایله برابر انکلیزلر علیهنه محاربه ایتکه مجبور اولدقلرندن اوتهدنبرو انکلیزلر ایله فلمنکلولر بیننده درکار اولان و داد و اتحاد مبدل شقاق و افتراق اولوب بوجهته فلمنکلولرک اکثر سفائی و متصرف اولدقلری امید بورنی و آسیا ایله امریقاده کی مملکتلرینک اکثری انکلتره لویدینه کچد کدن بشقه بیچاره فلمنکلولر متفق جدیدلری اولان فرانسزلر دن دخی هر و جهسه رنج و آزار کورر لردی و فلمنک جمهوری سوزده مستقل ایسهده حقیقت حالدہ فرانسزلرک امر و قومانداسی تحتده بولنوردی . و فرانسزلر بجرأ مغلوب اولملریله آنلرک دخی آسیا و امریقاده متصرف اولدقلری ممالکک اکثری انکلیزلر ضبط ایتشلر در . اما برأ فرانسه عساکری اکثریا غالب کلهرک فرانسه جمهوری بولندینی مخاطره دن قوررتیلوب

جمهوریتی تأیید ایده جگ برطاق تشبثات داخلیه ایله مشغول اولمش و بونك اوزرینه آرتق هر طرفه افكار جمهوریه واختلالیه ایلمولمکه باشلامشدر .

واگرچه بو آوانده قرالیت طرفدارلری وعلی الخصوص ممالک اجنبیه فرار ایتمش اولان فرانسه اصلزادکان طاقی انکلیزلرک تشویقاتیله غیرته کاهرک اون بیک قدر عسکر جمع و یوز قطعه سفائنه ارکاب ایدرک فرانسه طرفه کچوب حاضر بولنان برقاچ بیک قرالیت طرفدارلری ایله برلشه رک محاربهیه شروع ایتمشلر ایسهده انکلتره دولتی طرفدن ارسالی موعود اولان اون بیک امداد عسکری ورود ایتدیکندن اشبو طفقوز سنه سی اواخرنده کلیاً مغلوب اوله رق جمهور الیه اسیر اولان اصلزادکان وپاپاس وسائر دن سکر یوز قدر کسان قورشونه دیزلیدلر .

انکلتره دولتک باش وکیلی بولنان مشهور پیت بووقعه یی انکلتره پارلمنتوسنه نقل و بیان صدندده « انکلیزلرک قانی دوکلدی » دیمسی اوزرینه اعضادن بریسی « انکلیزلرک ناموسی دوکلدی » دیو اعتراض ایلمشدر .

و ایکی اوچ آی صکره تکرار اون بیک فرانسه مهاجرلری ایله درت بیک انکلیز عسکری فرانسه طرفه کچمش ایسهده ینه برشینه موفق اوله میوب درعقب عودت ایتمشدر .

پروسیالونک فرانسه جمهوریه مصالحه سی خبری درسعادتیه اصل اولدقده مادامکه بویه قرالیت اولان بر دولت طرفدن فرانسه جمهوریتی تصدیق اولنمشدر . ارتق طرف دولت علیه دن دخی تصدیقنده برأس کورلیوب همان نازکانه اجراسنه شروع ایله بالاده احوالی بیان اولنان دو قورشک احوال و اتقانی فرانسه سفارتخانه سنه نقل ایله استراحت ایتسی ایچون رئیس الکتاب فردوسی افندی طرفدن کندوسنه خبر کوندرلمش ایدی .

حالبوکه روبسپیرک اعدامی اوزرینه فرانسه نك احوالی تغیر ایدرک جمهور طرفدن ورتباق درسعادت اورته ایلچیسی تعیین اولنمش ایدوکنندن بو ائنده وندیگ وبوسنه طریقیله درسعادتیه ورود ایدیجک طوغریجه بک اوغنده کائن فرانسه سفارتخانه سنه اقعاد اولدقندن صکره سفارتی رسماً قبول ایله فرانسه جمهوریتی طرف دولت علیه دن دخی تصدیق بیورلمشدر . فقط معتاد اولان هدایایی صکره دن کله جگ اولوب نامه سنی تسایم ایچون دیوان هایونه دخولی ایسه اولوقنک اصولتجه هدایانک ورودینه موقوف اولدیغندن بعده هدایاسنک ورودنده دیوان هایونه کلک اوزره یالکز باب عالییه کلهرک صدر اعظم ایله ملاقات ایلمشدر .

برمنوال مشروح فرانسه اختلالی حسیدیه اوروپانک اصول پولتیقه سی متغیر

ودولت عليه نك اوروپا ايله روابطى متكثر اولديغى حالده بو ائناده ايران شاهى
اغا محمد خانك آذربايجان طرفه عزيمتى استماع اولمغله زيرده بيان اولنديغى اوزره
شرق طرفنك حالى دخى بخت ومذاكره نى موجب بر مسئله اولوب الحاصل دولت
عليه ده امور اجنبيه ايشلرى كوندن كونه تكثير ايمكه باشلامش ايدى .

دولت عليه ده ايسه بشقه جه برخارجيه نظارتى اوليوب امور اجنبيه رئيس الكتاب
بولنان ذاتر طرفدن رؤيت اولنوردى . واكرچه بو ايشلرى حقيقت حالده
استانبولك فنارلو دينلان روم اصلز دكانندن ترجمان ديوان هايون بولنانلر اداره
ايلردى لکن مرجع رسميسى رئيس افندى اولديغنه بناء رياست كتاب منصبى
زياده سيله نزاكت واهميت كسب ايدرك مقام رياسته بولنان ذاتك انشاي كلامه
قادر وبخت مذاكره وجدل ومكالمه فتنه وقوف ايله خصمنى اسكاتنه مقتدر اولمى
لازمه اموردن اولديغى حالده بو ائناده رئيس بولنان فردوسى افندى كرچه
امكدار ومستقيم الاطوار وامور ديوانيه وقوفى دركار ايسه ده فى الاصل رؤس
قلمندن چيغمه اولوب قلم مذكورك معلوم اولان حالى جهنله اوائل حالنده يالكنز
فن انشاي اولسون تحصيل ايدمه ديكندن مسند رياسته متفرع اولان موادى
بالذات اداره ايدمه يهرك ايل ايله ايش كورمكه محتاج اولمغله اداره مصلح رياسته
موفق اوله ميديغندن بو خطب جسيمك اداره سنده عجزى رونما اولمى سيله ذى القعدة نك
يدنجى بازار ايرتسى كوفى عزل ايله يرينه شق ثالث دفتر دارلغيله حبوبات نظارتنه
مأمور بولنان ابوبكر راتب افندى رئيس الكتاب اولوب آنك يرينه دخى دفتر دار
اسبق ابراهيم افندى نصب وتعيين ايله كندوسنه سلفندن زياده نفوذ واستقلال
ويرلمش و ذخيره نظارتنك نظاماتى بدرجه دها توسيع بيورلمشدر .

راتب افندى فن انشاده نى نظير والسنة ثلثه ده شاعر معارف سمير اولمق حسابيله
خليل حميد پاشا آمدجيلكننده آنى آمدى او طه سنه مأمور ايتديرمش وكندوسى
تذكره حى اولديغنده راتب افندى دخى آمدجى اولوب مدت مديده بو مأمور بتمده
بولنمشيدى . ايكيوز ايكي سفرنده اردوى هايون ايله اعزام اولنوب سلطان
سليمك جلوسنده بعض مقرينك واسطه سيله خاقان مشاراليله كسب تعلق
و خصوصيت ايلمش اولديغنه مبنى باخط هايون آستانه يه جلب اولنوب راشد افدينك
عزليه يرينه آنك ركاب هايون رياسته مأموريتى حقه نده خط هايون اصدار
بيورلمغله باب عاليدن كندويه دعوتجى كوندردلده كه « بو كون قر عقربده در
خلعت اكسانى فردايه تعليق بيورسونلر » ديو قائم مقام پاشايه خبر كوندركمكه
اجراسى ايرته يه قالب اول كون ايسه راشد افندى وسائر عليه نده اولنلر اتفاق

ایدرك اولوقت مقرب پادشاهی بولنان ناشد ابراهیم بك و برادری عبدالرحمن بك و ساطتلریله سلطان سایمه نه دیندایسه دینلوب ریاستی صرف و تحویل و بر قاچ کون صکره تدکیره جیلک و کالته تبدیل ایتدکیرینه قناعت اولنمیوب بر قاچ آی صکره بعض جناحه اسنادیله بوزجه آطهیه نفی ایتدیرلمشدر ایدی .

راتب افندی اهل هنر و معارف و احوال عالم و اطوار ائمه واقف بر ذات اولوب انحق بو مقوله احکام نجومیهیه اعتقاد ایتک استانبول خالقنه طبیعت ثانیه اولدیغندن صحیحاً اعتقاد ایتمانلر دخی بوبابده تردد و تحاشی حالنده بولندقلریته مبنی او دخی عن اعتقاد یاخود عامه نك افکارینه اتباعاً هر نصل ایسه برج عقربك احکامندن احتراز ایله ایشنی فردایه براقسی زهر ادبار ایله تلخکام اولسنه بادی اولمشدر .

و بر مدت بوزجه آطه ده اقامتد نصکره حالنه مرحلهً اطلاق ایله اردوی هایونه کوندرلمش و نمچه مصالحه می ختام بولدقده اورطه ایلیچیلک عنوانیه نامه مخصوص ایصالنه مأمور اولهق کیدوب کلد کدن صکره استانبوله و رودنده باش محاربه منصبی و متعاقباً ذخیره نظارتی ایله تلطیف بیورلمشیدی . دری افدینک و فردوسی افدینک نصبرنده سلطان سلیمک مرادی راتب افدینک ریاستی ایکن علیهنده بولنان مقبل و متنفذ ذواتک منع و تحویلیله آنلرک نصب اولنمش اولدقلری مرویدر .

بودفعه فردوسی افدینک اهلیتسرلکی تین ایتدکده راتب افندی ریاسته کتوریله رک ریاست اهلی و مراد هایون محلی بولمش ایسه ده خصمسی دخی اول کوندن اعتباراً شطرنج اقبالده آنی بر آچمازه دوشورمک اوزره بر منصوبه غریبه بولمق فکیرینه دوشمشدر .

(وقایع ۱۲۱۰)

بالاده بیان اولندیغی اوزره پروسیالو فرانسه جمهوریه عقد مصالحه ایتدن صکره قترینه ایله برلکده لهستانک مقاسمهً اخیره سنه تشبث ایدوب انحق اول ائشاده (نمچه) اوستریا دولتی حدود اوزرینه بر مقدار عسکر سوق ایتمش اولدیغندن اکا دخی بر حصه چیقاریله رق دول ثلثه یعنی روسیه و پروسیا و اوستریا دولتلری اشبو اون سنه سی اوائلنده لهستانک بقیه ممالکنی بیلرنده تقسیم ایتدیله . و پروسیا قرالنک اویناقانی و قترینه نك فته کارانی میدانه چیقدی و پروسیالونک اولوجهله وقوعه کلان عهد شکنکی اوزرینه دول متفقنه نك اتحادی خللی پذیر اوله رق متعاقباً اسپانیا و طوسقانه حکمدارلری دخی فرانسه جمهوریه عقد مصالحه ایتمشدر ایدی .

بونک اوزرینه فرانسه جمهوری کسب قوت ایدرک ارتق هر مات فرانسه دن خوف ایدر اولدی . و اوستریا دولتی رین نهرینک صول یقه سنده کی المانیا مملکتلرینی استرداددن

ارتق قطع امید ایلیسه ده هیچ اولمز ایسه المانیانک سائر ممالکی محافظه ایده بیلیمک ایچون
 یالکتر چه محاربیه به دوام ایله کاه غالب و کاه مغلوب اوله رق نهایت اشبواون سنه سی او اسطنده
 فرانسه ایله بر متار که عقد ایلدی و بو متار که الی آی قدر یعنی مایس او اخیزینه دک تمتد
 اولدی . و اگر چه انکلتره دولتی بالاده بیسان اولندیغی اوزره بحر آ غالب و مظفر
 اوله رق قوه بحر یه سنک شهرت و شانی دوبالا اولمش ایدی . انجق عظیم مصارفه دوچار
 اولدیغی دخی درکار ایدی . حتی اول او انده لوندره سفیری یوسف آگاه افندیگ
 باب عالی یه وارد اولان تخریر اتنده انکلتره دولتتک کرک امر بقا و هندستانده و کرک
 بحر سفید و بحر محیطده مستخدم اولان دونمالری در تیوز سکسان قطعه سفائنه بالغ
 اولوب بونلر دن یوز یکرمی ایکی قطعه سی کبیر قالیون و اون سکر قطعه سی الیشر پاره
 طوبلی وسط قالیون و یوز یتمش الی قطعه سی فرقتین و یوز التمش درت قطعه سی قروت
 و شالوپه و سائر صغیر جنک سفینه لری ای دوکی تخریر اولنسیله برابر انکلتره نك بائنه
 کاغدلری یوزی یتشه ایکن بر اراق الی بشه قدر تنزل ایلدیکی و محاربیه تمتد اولورسه
 دهاز یاده تنزل ایده جکی مندرج بولمشدر .

الحاصل دول متفقه نك قصور لرندن و علی الخصوص قترینه نك خدعه لرخی ترویج یولنده
 روسیا قر نك شان دوله یا قشیمیه جق صورتده و قوعه کلان حرکاتندن فرانسه
 جمهوری استفاده ایله هم قرالیت طرفدارانسه و همده و حشیتیه مائل اولان
 و جمهوریت مفرطه افکارنده بولسان فرقه لره غلبه ایدرک جمهوریت معتدله
 شرطنامه سی تنظیم ایلدی .

بو شرطنامه جدیده حکمنجه قوه اجرائیه بش اعضادن عبارت بر مجلسه حواله
 اوله رق و کلای جمهور و مأمورین سائره بی انتخاب و تعیین ایتک و قوه بریه و بحر یه یه
 امر و یرمک اشبو مدیران حسه نك و وظائفندن اولدیغی جهتله بونلره پک بیوک نفوذ
 و اقتدار و یرلمش ایدی . انجق هر سنه بوبشدن بری اخراج ایله یرینه مبعوثان ملت
 طرفندن دیکرینک انتخابی مشروط اولدیغندن مبعوثان ملتده دخی پک چوق نفوذ
 و اقتدار قالمش ایدی . قوه قانونیه ایسه ایکی مجلسه حواله اوله رق بریسی بشیوز
 مبعوثانندن عبارت اولوب بشیوز لر مجلسی و دیکری ایکی یوز الی اعضادن مرکب
 اوله رق مجلس قدما تسمیه اولمش و هر بر قانون و نظام بشیوز لر مجلسنده تنظیم اوله رق
 مجلس قدما طرفندن تصدیق اولمده جقه مرعی الاجرا اولماسی شرط قلمش ایدی .
 و اگر چه بو شرطنامه جدیدک اجراسی حقنده بین الناس ظهور ایدن قیل و قال
 اوزرینه اشبو بیک ایکی یوز اون سنه هجر یه سنده واقع تشرین اول فرکتینک اون بشنده
 تکرار یار سده بر بیوک اختلال ظهور ایله مجلس ملت اوزرینه او توز بیک قدر اهالی

هجوم ایلمش ایسه ده حکومت عسکرینک ایکنجی قوماندانی اولان ناپولیون بوناپارته نك غیرتیه عصات طاقمی مغلوب اولمشدر .

و بوسوقاق محاربه سی مظفریتنه مکافاة فر داسی ناپولیون بوناپارته بتون فرانسه عساکرینک باش جنرالی نصب اولمشدر . و اوچ سنه دن زیاده متمد اولان ملت مجاسنک ارتق ایشی ختام بولمغه شهر مرقوم و اوخرنده طاغیلوب بروجه محرر تشکیل اولنان حکومت جدیده تشرین ثانیء فر نکی اوائلنده ایشه باشلامشیدی .

جمهوریت مفرطه افکارنده بولنانلر بو حکومت جدیده علیهنه سی ایدوب حتی بونلرک بر طاقمی بالجمله فرانسه ده واقع املاکک علی السویه اهالی بیننده قرداش پانی اوله رق تقسیمنی علناً تکلیف ایدرک بوافکار غیربهنک فعله کتورلمسی ایجون بابوف نام شخصک تحت ریاستنده اوله رق بوندن بش التی آی صکره بر جمعیت خفیه ترتیب اولمشدر .

بویله تقسیم املاک اصولی اسافل ناسک افکارینه موافق کلهرک بر چوق طرفکیلری بولنق امر طبیعی ایسه ده مدیران جمهور کیفیتی تحقیق ایله بابوفی حبس و نهایت قتل ایتمشدر . و فرانسه ده اکثریت آرا بر جمهوریت معتدله طرفده بواندیغندن اشبو حکومت جدیده تأسس و تقرر ایتمشدر .

مع مافیه مدیران جمهور بر طرفدن او مثللو وحشیانکه مائل اولان جمهوریت مفرطه طرفکیلرینک و بر طرفدن دخی قرالیت طرفدارانک فسادات و تحریکاتیه مشغول بولمشدر .

بناءً علی ذلك فرانسه نك احوال داخلیه سی قاریشلقدن قورتیه مامشدر فقط امور خارجیه سی آز وقت ظرفنده کسب انتظام و ترقی ایلمشدر .

شویله که : مدیران خمسه نك رئیس باراس نام ذات اوله رق روبسپیرک اعدامندن صکره فرانسه نك امر اداره سی حقیقت حالده آنک اتده ایدی و مدیرانک استقرار حکومتی بروجه مشروح ناپلیون بوناپارته نك اثر همت و غیرتی اولدقدن بشقه کندوسنک باراسه تردد تامی و ار ایدی و کندوسنده مشاهده ایلدیکی استعداد و لیاقت ایجابجه شان و شهرت قزاق اوزره مستقلا براردونک قوماندانلغی املنده اولوب بوکا دخی مدیران طرفندن پک سهولته موافقت اوله رق عهده سنه ایتالیا اردوسی قوماندانلغی احاله اولمشیدی . و بویازین المانیا طرفنده کی فرانسه اردولری مظفر اوله مدیلر ایسه ده ناپلیون بوناپارته شهر مارتده نیس شهرینه واصل اولدقده الی بیکه قریب اولان اردوسی هر شیدن محروم کوروب یغما کرک و عدیه عسکری تشویق ایدرک همان اوستریا و ساردونیا اردولری اوزرینه هجوم ایله هر طرفده غلبیه مظهر اولدی و بو مظفریتلرک نتیجه سنده ساردونیا دولتی (ساوه) و (نیس)

شهر لربنی فرانسه ترك و فراغت ايدرك عقد مصالحه مجبور اولدني كى از وقت
ظرفنده ديكر ايتاليا حكومتلى دخی مصالحه ايدرك فرانسه جمهوريه ميدان
مخاربه ده اوستريالو يالكز قالمشدر .

بوسنه حدودينك قطع و تعينده نمچه لولر طرفندن خارج از عهد و شرط اوج
ماده ادعائنده اصرار اولنديغندن اوج سنه دنبرو اشبو قطع حدود نزاعى منقطع
اوله ماه شيدى . مواد ثلثه دن برى اهلينك اخبار و ارانه ايلدكارى از موليا
ناج طاعى تعبير اولنان محلدن خارج اوله رق بر محلك از موليا ناج طاعى بوراسى
اعتبار اولنميدر ديو واقع اولان ادعالى و ديكرى مبدأ نقطه سى استدكارى یردن
يعنى كندولرينه زياده اراضى تركنى موجب اوله جق و جهله ايلردن اعتبار
اولنق تكليفى اولوب اوچنچيسى دخی مساحه و ميل ماده لرى ايدى كه خريطه
معمول بهاده معين اولان اراضى بعدالتحديد مساحه اولندقدده خريطه نك مقياسنه
كوره نمچه طرفنه ترك اولنان اراضى يكرمى درت ميلدن نقدر نقصان ظهور
ايدرايسه يرينه سائر محلدن تعويضاً اول قدر اراضى ترك اولنمى خصوصى ايدى .
بو مواد ثلثه ده نمچه لولر اصرار ايدرك بو بهانه ايله عهداً و شرطاً طرف دولت
عايه ردى لازم كلان دويجه و غرادشقه و نوى قلعه لربنى تسليم اتمامشدر ايدى .
الحاصل اوستريالولرك بويله شيلرده مجرب و معلوم اولان اطوار از عاجكاريلرى
ايچنجه اشبو حدود منازعه سى محلنجه قطع اولنه ميوب نهايت در سعادتده نمچه
ايلچيسى ايله بالدفعات مذاكره و مباحثه اولنوب سفارتجه دخی بويايده خيلى صعوبتلر
ابراز اولنمش ايسه ده فرانسه اختلالندن ناشى نمچه لونك غائله سى زياده اولديغندن
مجبوراً بوادعالردن واز كچرك تراضى طرفين ايله و بريلان قرار موجبنجه حدود
مامورلرينه يازيلوب بو اووانده حدودنامه تنظيم و مذكور قاعده لربالجمه مهماتيله
دولت عليه ردى و تسليم اولنمشدر . لکن اوستريالولر دولت عليه بويله اوليه جق
شيلره از عاج ايدجك كرينه بويله برغار غشلق و قتده طرفلرينه جلب ايله مخاربه
سابقه نك مستلزم اولدني برودت و بينونتك رفع وازاله سنه چالشمش اولسيديلر
كندو بولتيقه لرينه ده موافق اولوردى .

بالاده بيان اولدني اوزره فرانسه جمهورى طرفندن در سعادت اورته ايلچيسى
تعين وارسال اولنمش اولان ورتباق رسما باب اعلى كه كش ايسه ده ديوان هميونه
دخولى هداياسنك و رودينه تعايق اولنمشيدى . بو كره هدايانك برأ كله جكنى
استخبار ايدوب بو ايسه و قته محتاج اولديغندن ديوانه دخولى هداياسنك و رودينه
قدر تاخير اولنماسنى استدعا ايمكله سابقلرده بعض سفر ايه اولدني و جهله بلاهديه

دیوان هایونه کلمسئه مساعده بیور بهرق شوالک اون سکنزنجی صالی کونی دیوان عالی ترتیب اولوب سفیر مومی الیه حضور هایونه دخول ایله مظهر تلطیف اولمشیدی .

ممالک هندستاندن سورات بلده سنه قریب باروج شهرینک حاکمی حنفی المذهب و مغولی النسب معزز خان نام ذات اول حوالی بی استیلا ایدن انکلیزلر ایله مدت مدیده محاربه ایدوب نهایت الامر مغلوب اولهرق برمدت کوشه انزوا و عزلتده اقامت و بعده رحلت ایتدکن صکره اوغللری احمد خان و برادرلری ضبط و استیلا اولنان املاک موروثه لرینی استیخلاص ایچون اقارب و اعوان و انصاری جمعه جنکه تصدی ایشمار ایهده نتیجه پذیر اوله میه جغنی اکلا یوب بالا خره ایشارینه برصورت و یرمک اوزره احمد خان ممالک دولت علیه دن گذار ایله فرانسه یه و اورادن انکلتره یه کیدوب مصالحتی تسویه ایتدکن صکره فرانسه یه کلایکنده حقنده فرانسه جمهوری طرفدن پک زیاده رعایت اولمش ایدوکنه مبنی بوکره فرانسه دن در سعادت عودتنده طوغری فرانسه سفارتخانه سنه نزول ایلمش اولدیغندن فرانسه ایلیچسی فرانسلرک اهل اسلام حقنده اولان رعایت لرینی ابراز و اثبات ایچون بوکره بروجه مشروح دیوان هایونه دخولنده آنی دخی برابر کتورمش اولدیغندن و بویه دولت دوشکونی برخان زاده نک دیار غربتده بیکس قالب کز مسی سلطان سلیم کبی رحیم برپادشاهک رقت قلبی موجب اوله جغنی بدیهی بولندیغندن حقنده پک زیاده التفات و احترام و بش بیک غروش عطیه سنیه ایله اکرام بیور مشدر .

فرانسه ایلیچسی مومی الیه ورتباق ابتدای مأموریتدنبرو دولت علیه ایله فرانسه جمهوری بیننده براتفاق عقد اولمشنی تکلیف ایدوب سلطان سلیم خان دخی روسیه و اوستریا طرفلرندن امین اوله مدینی جهته موازنه اورویایه داخل اولمق اوزره بعض دول اورویا ایله اتفاق ایلیم آرزوسنده ایدی انجق ورتباق تکلیف اتفاق تجاوزی دائره سنده اولوب همان دولت علیه یی حربه سوق ایتک دیمک اولدیغندن اکا موافقت اولنه مدیغه مبنی رئیس افندی ایله ورتباق بیننده پک چوق مباحثه و مذاکره لر جریان ایدرک نتیجه سنده دولت علیه جاری اولان اورویا محاربه سنده بی طرفلک مسالکتی اختیار ایش اولدیغندن بو محاربه نک ختامنه قدر کاکان بی طرف قلمق و فرانسه جمهوری معارضی اولان دولتر ایله عموما مصالحه عقد ایلدیکی تاریخندن معتبر اولمق اوزره فرانسه نک اولوجهله مصالحه عمومیة انعقادنده یدنده اولان و دولت علیه نک الیوم زیر حکمنده بولنان ممالکک محافظه می ضمنتده طرفین یکدیگرک ممالکنه ضامن و کفیل اولمق و آخر دولت طرفدن برینه تعرض وقوعنده

طرف آخر دن هر وجهه اعانه وامداد و پياده و سواری او تونز بيك عسکر يا خود
بونك مقابلی اون ايكي قباق قالدیرر و اون قطعه فرقتين اوله رق تقدیر اولنان سفان
اوچ و نهايت درت آی ظرفنده مطلوب اولان موقعه ایصال اولتمق و فقط بو اتفاق
اوروپايه منحصر اولوب دولت عايمه نك آسيا و يا افریقا و فرانسه لونك كذاك
اوروپا خارجنده محاربه سی ظهورنده ايكي طرف دخی قید اعانه دن و ارسسته اولمق
و عموما اوروپانك امن و آسایشندن عبارت اولان اشبو مصلحت خیریه یه رغبت
ایدن سائر دولتله دخی طرفیندن بو اتفاقه دعوت قلمق و بو معاهده نك تصدیق نامه لری
اوچ آی ظرفنده مبادله ایدلمك شرائطك درجیه اون بش ماده یی حاوی برقطه
اتفاقنامه تدافعی تنظیم اولنوب انجق سلطان سلیم خان حضر تلی بو کیفیتك بیلور
آدملر ایله مذاکره اولتمسی امر ایلمش اولمسیله اشبو اون سنه سی ذی القعدة سنك
اون ایکنجی پنجشنبه کونی باب عالیده حضور صدراعظمیده عقد اولنان مجلس خفیده
کتخدایك و رئیس افندی و دفتر دار افندی و شق ثانی مصطفی رشید افندی
و توقیعی عبدالله بری افندی و دفتر امینی فردوسی افندی و ترسانه امینی راشد افندی
و سابقا ترسانه امینی عثمان افندی حاضر اولدقلری حالد شرائط مذکوره یکان یکان
نظر تدقیقندن کچوریلهرك قبول و تصویب اولندقله نصکره فتوای شریفه سنك استحصالی
بجسته کنگجه صدراعظم جمله یه خطابا سزلردن بوسرك خارجه تجاوز ایتمه چکنه بن
کفیل اوله بیلورم لکن بوبنده فتوای شریفه مراجعت اولنه جق شیخ الاسلام
افندی یه افاده اولنسه فتوی ویره بیلورمی بوخسه قاضی عسکر لره دخی افاده اولتمقی
اقتضا ایدر مقدا اسوج و پروسیا اتفاقلری نصل اولدی شمدی ینه اولوجه می
اولمق لازمدر بوراسی دخی ملاحظه اولنلودر دیدکده مقدا اسوج و پروسیا
اتفاقلرینك عقدی محاربه اثناسنده ایدی اولوقت خانه شیخ اسلامیده عمومی
بر مشورت اولوب ماده قرار بولدقده ماده نك استصواب اولندیغنی مشعر بر شقه
تحریر اولنوب مجلس مشورتنده حاضر بولنان صدور ورجل امضا و تمهیر ایتملریله
اول شقه فتوا مقامنه قائم اولمشیدی قالدیکه شمدی محاربه اثناسی اولیوب ماده نك
دخی کتم و اخفاسی ملتزم اولغله خانه شیخ اسلامیده صدور ایله مشاوره ماده نك
انتشارینه سبب اولورمی اولمازمی بیله میز لکن شیخ الاسلام افندی و صدور عظام
آخر مسئله مذاکره سی ایچون حضور همایونده جمع اولسه لر اوآرالقده بوماده
دخی سولیشیلوب بو خصوصك کتمی بالذات طرف شاهانه دن کندولره تنبیه و تأکید
بیورلسه ظنمزه کوره آخره افشا ایده مزله بوضورتنده تصدیق نامه لرك مبادله سنه
قدر ماده مکتوم قالور دیندا کده واقعا بر کوزل ملاحظه در عجبا قغنی ماده یی وسیله

ایتسک دیو فکر و مطالعه اولتهرق نهایت خارجی عبدالوهاب ماده سیچون مدینه منوره دن تحریرات کلدی اشته بوماده مذاکره اولنور بعده فرانسه اتفاقی ماده سی سویلشیلوب برشقه تحریر ایله قتموی مقامنده حضاره امضا ایتدیریلور دیو قرار ویریلرک باتقریر حضور هایونه لدی العرض سلطان سلیم خان طرفندن تقریر مذکورک بالاسنه بویلهک ایله بوماده بی تعقل ایلر بلور آدملر ایله سویلشاسون دیمش ایدم اشته آنلر مناسب کور مشلر صدور دیدکلری آدملرک ایله جکی شیلر دکلر بومقدما اولان اسوج اتقاقنه قیاس اولنه ماز زیرا بونک شم دیلرده کتمی واجبدر و شرعا جوازی دکل چوقدن وجوبی عالمک بیلدیکی شیدر بونلرک بری اقتضا ایتمز متوکلا علی الله بویکجه تمهیر اولنوب مبادله اولنسون دیو خط هایون کشیده بیورلمش اولدیغندن هان ذی القعدته نک اون یدنجی کونی رئیس افندی ایله ورتباق بینلرنده مذکور اتقاقنامه تدافعی ایله انکلتره دولتی مستئنا اولمق یعنی فرانسه جمهوری ایله انکلتره دولتی بیننده سفر وقوعی لازم کلور ایسه بواتفاقنامه ده مشروط اولان اعاقی فرانسه جمهوری دولت علیه طرفندن ادعا و مطالبه ایلمامک اوزره مقاوله اولدیغنی مبین بشقه جه بره مقاوله خفیه سندی دخی برابر امضا اولنمشدر .

انجق بواتقاده ورتباق عزل ایله یرینه فرانسه جمهوری طرفندن بیوک ایلچیلک رتبه سیله اوبر دو بایه نام ذاتک نصیله در سعاده ارسال اولنمق اوزره اولدیغنی استخبار اولنمغه آنک ورو دینه انتظار اوزره بولنلمشدر . بونک اوزرینه هان دانیمارقه واسوج کبی بعض دول اوروپانک دخی بواتقاده اداخالنه چالیشامشدر . لکن مذکور اتقاقنامه احکامنک اجرا سنه حال وزمان مساعد اوله مامشدر .

مقدما انکلتره دولتنک روسیه و اوستریا دولتلری ایله فرانسه علیه نه عقد ایلدکلری معاهده اتقاده آسیا دولتلری استئنا اولنوب ممالک دولت علیه نک اکثری آسیا و افریقا قطعه لرنده بولدیغنه نظراً بواتفاقنک کندوسنه طوقفور جهتی اولماق لازم کلش بوجهنله انکلتره ایلچیسینی دخی دولت علیه مستئنادر دیو خبر ویرمش ایسه ده اوروپانک الک مهم نقطه سی واک کوزل اراضیسینی دولت علیه یدنده بولدیغنی جهته اشتباه اولدیغندن لوندره ایلچیسینی آگاه افندی یه یازیلوب انکلتره باش وکیلندن استیضاح ماده ایلمسی اشعار اولنمغین لدی الاستفسار دولت علیه مسقو و نمچه دولتلرینه اعلان حرب ایدر ایسه انکلتره دولتی شروط اتفاق مقتضاسنجه اعانه ایدر جکی جوابنی آلمش اولدیغندن انکلتره دولتی دولت علیه بی فدا ایتمش دیو و کلای دولت علیه متأثر اولمشلر ایکن دولت علیه ینه انکلتره دولتی فدا ایدر میوب برمنوال مشروح فرانسه ایلچیسینه یاپیلان اتفاق معاهده سنده برسند مخصوص ایله صراحة

استثنا ایدلمش و ترکارک مجبول اولدیغی ثبات و وفا کارلغک درجه سی کوسترلمشدر . شوقدر که دولت علیه نیک بوتأثرندن فرانسزلر مستفید اولدی . شوویه که : دولت علیه بر مرتبه دهافرانسه لوطرفه میل ایدوب حتی فرانسه طرفه زیاده مساعده و نوازش کوستردیکندن ناشی دول متفقہ طرفندن آره صره شکایتلر وقوعه کلورایدی .

* حوادث قافقاس و ایران *

ایران شاهی اغا محمد خان مقدماروسیه لوطرفه حقدہ بعض معاملات تحقیریه کوسترمش اولدیغندن قترینه کندوسنه دلکیر اولوب انجق اولوقت قریمک استیلاسیله مشغوله بولندیغندن اغماض عین ایله اضمار کین ایدرک ممالک ایرانده درلو فسادلر احدائییه اغا محمد خان علیه خلیجه سی ایلمش ایسه ده برشی پایه میوب اغا محمد خان ایسه فارس و عراق و سائر طرفنرده کی رقباسنه هپ غلبه ایتدکن صکره آذربایجان طرفه حرکت و قره باغک ضبطنه مبادرت ایتدکن صکره گرجستان اوزرینه کیدوب و تفلیسی اوروب غارت و بقده کنجه اوزرینه حرکت ایدوب شکی و شروران مملکتلرینی تحت اتقیاده کتورمشیدی . بووجهله طرف طرف مظهر غلبه و ظفر اوله رق ممالک ایرانده کندوسنه معارض کمنه قالمیوب روسیه لویه اعلان حرب ایچون برهانه آرامقده اولدیغندن روسیه طرفه اظهار خصومتدن خالی اولدیغی حالده بو اوانده داغستان خانلرندن بعضیلرینک ایران طرفه التحاق ایله هم جوار اولان ایالات حکمرینی روسیه علیه تحریک و اغرایه مستعد اولدقلری تین ایتیمی اوزرینه قترینه حدودینی تأمین بهانه سیله اغا محمد خاندن اخذ انتقام و بحر حزر سواحیلنده واقع بعض ممالک ایرانیه بی ضبط و اغتنام ضمنده اشبوان سنه سی خلاننده سوق ایلدیکی عسکر داغستان ایچنه دخول ایله در بندقلعه سی حصر و تضییق ایدرک پترو زماندنبرو محافظ بولنان یوز یکر می یا شنده برپیر کهنسال قاعه بی روسیه جنرالنه تسلیم ایلمشدر .

بو خبر اغا محمد خان واصل اولیجق عساکر و افیه ایله اولطرفه حرکت و قلعه دن لاجل المقابله خروج ایدن روسیه عساکری منهز ماقاعه یه رجعته اجبار ایله مظهر غلبه و نصرت اولقسدن ناشی امداده یتشمک ایچون قوبان جانبنده بولنان روسیه عساکری عجم طرفه کتمکه مأمور اولمشیدی .

بو اوانده ایران ایله روسیه بینده ظهوره کلان وقوعاتک خلاصه سی ایشته بوندن عبارت ایدی . انجق کچن طقوز سنه سی او اخرنده روان و قره باغ خانلرینک در سعادت زینل و عبدالله چلبی نام آدملریله وارد اولان تحریراتلرنده بو ائانده اغا محمد خانک آذربایجان غزیمتی شایع اولغله لدی الاقضا حدود خاقانیه ده بولنان وزرا

و میر میرانلر طرفدن کندولرینه عساکر ایله امداد و اول حوالی اها لیسینک ممالک
 محروسه یه فرار و التجاری تقدیرنده قبول و استصحاب اولمق و سلطان عبدالحمید
 خان حضر تلرینک زماننده سفر ائنا سنده روان خاننه اناطولی بکر بکیلیکی پایه سی
 احسان بیورلمش ایدو کندن براتنک تجدید اولنسی خصوصلری نیاز اولنغله کیفیت
 خواص و کلا ییننده لدی المذا کرده اغا محمد خانک بو اوانده تفریری مناسب اولیه جنی
 مثللو ملتجیلرک قبول اولنماسی دخی شان دولته یاقشمیه جغندن بو بایده اقتضای
 حاله کوره حکیمانه حرکت اولمق اوزره ویریلان قرار موجبجه اول حوالی عشر
 و رعایا سندن برو طرفلره فرار و التجا ایدنلر اولدینفی تقدیرجه اول امرده
 عدم قبول معامله سی کوسترلیوب فقط کلد کدن صکره عودت فیکرنده اولنلرک
 دخی منع اولنماسی حدود مأمورلرینه تحریر اولنوب روان و قوره باغ خانلرینه
 دخی دولت علیه نک ایرانیان ایله اولان معاهده سی شاد و خانانه مخصوص
 اولیوب باجمله ایل و اهالیء ایرانه شامل اولدیندن آنلر طرفدن خلاف عهد
 بر حرکت صادر اولدقجه دولت علیه بر وقتده ایرانلوره ایصال خسار اولنسنه
 رخصت داده و خطه ایراند پانهاده اولیه جنی و شرائط صلحه کللیه رعایت اولنه جنی
 جهتلرله باجمله ایرانلرک بو تقریب ایله حمایه لری ماتر مدر و علی الخصوص خانان
 مشار الیهما کی دولت علیه یه اظهار صداقت ایدنلرک استدعاری قرین قبول
 و مساعدده بیوریلوب اولبایده حدود مأمورلرینه تعلیمات لازمه اعطا اولنمشدر
 مآئنده مقام صدارتدن برر قطعه جواننامه یا زلمش و روان خاننک پایه براتی تجدید
 ایله آدمنه ویرلمش و ایکینسی دخی اعاده ایدلمشیدی . مؤخرأ ارضروم و الیسی
 ضیا یوسف پاشا در سعادتیه تحریرات ارسال ایله اغا محمد خان روان قلعه سی تسخیر
 ایدکدن صکره تفلیسه هجوم ایدرک خانلرینی احراق و اها لیسینی سبی و استرقاق
 ایدوب اون بش کون صکره تفلیسه سکر طقوز ساعت بعدی اولان صنق کوبری
 نام محله عودت ایلمش اولدینفی حوادمه نظرأ اغا محمد خانک آذربایجان طرفلرنده
 بر مشغولیتی قلماش دیمک اولسینه طرف دولت علیه دن دخی مراسم احتیاطه
 رعایت الزم کوریلوب فقط بو حوادث قال و قلمه کتورلرینه رک مجرد بعض اشقیبا
 و کوچه طائفه لرینک نظامی وسیله آخاندیه معیتی مأمورلرینه لدی الاقتضا خبر
 و رودنده حرکت ایتمک اوزره مهیا بولنملری ایچون تحریرات کوندرمش اولدینفی
 انها و بو بایده تعلیمات استدعا ایلمش اولدینغه مبنی خلال ربیع الآ خرده شیخ
 الاسلام قوناغنده مجلس عقیده خصوص مذکور در میان اولندقدده ارضروم و الیسنه
 سرعسکرلک عنوانی ویریلرک اسباب احتیاطیه رعایت اولنسی تذکر اولنمش

ایسه ده شمده اغا محمد خانك برو طرف علمهنده برکونه حرکتی مشهود دکل ایکن بو وجهله تمیثاته تشبث اولنمی آتی شبههیه دوشوره دک تو حشنی موجب اوله بیله جکی مطالعه سنه مبنی سرعسکرلک عنوانندن صرف نظر اولنه رق یالکیز ایران طرفه احاله نظر دقت ولو ازم تیقظ وانتباهه رعایت ایلمک اوزره ارضروم والیسنه جواب یازلمش و سرحدات محافظلرینه دخی آنک رأی واراده سی اوزره حرکت ایلملری ضمنده تحریرات کوندرلمشیدی بعده ماه شعبانک خلاننده ضیا پاشادن وارد اولان تحریراتده اغا محمد خانك برو طرفه کچن ایران رعایاسنی مطالبهده اصرار ایلدیکی وارکلی خانك التماسی اوزرینه بر خیلی روسیه عساکری ورود ایله و رلرندن دخی کلیتلو عسکرکله جک اولدیغنی و دولت علیه نك رخصت و موافقتی ایله تیمور قپو طرفندن کچه رک اغا محمد خانك اوزرینه کیدیورز دیو بیدلرنده تقوه ایلدکلرینی تجسس احوال ضمنده تفلیس طرفه کوندریلان جاسوسک خبر ویرمش اولدیغنی و بوبابده احتیاطه رعایت لازمه دن ایدوکی جهته شو حاله نظراً اغا محمد خانیمی استیجاب ایتمک انبدر یوخسه روسیه طرفینمی تصحیح مستصوبدر وجه مناسبک سرعاً اشعار بیورلمسی و اغا محمد خانك اول بهارده روان طرفه کله جکی و حدود خاقانیهیه تجاوز و تحطی داعیه سنده اوله جنی ظواهر احوال دن استدلال اولنوب موسم بهار دخی تقرب ایلدیکندن شاید که برغانه تمدت ایدر مطالعه سیله سیواس و مرعش زعما و ارباب تیمارینک نوروزده ارضروم صحراسنده بولملری ایچون کندولرینه ارضرومدن یازلمش اولمغین تا کیدی حاوی درسعادتدن دخی امر عالی کوندرلمسی مندرج بولمش و ابابه محافظی سید مصطفی پاشا طرفندن وارد اولان تحریراتده چرکستانک بر طرفی داغستانه متصل اولدیغندن لاجل الاحتیاط داغستانلو چوکنای حاکمی عم خانك جلبنه کندو طرفندن اعتنا اولنق حسیه عم خان و چوکنای قاضیسی و محمد بک نام ذات طرفندن اغا محمد خان حوادشه دائر انایهیه وارد اولان عربی العبارة مکتوبلرک درسعاده کوندرلدیکی و داغستان و حوالیسندن توارد ایدنلرک تقریرلرینه کوره بعض اهالیء داغستان ایله قبارطایه سمت اولان قومق و چچن و میصان خاقی بیراق کشادیه اغا محمد خانه تابع اولوب بعضیلری دخی انجامکاره مترقب اولدقلری و اغا محمد خان بوقیشین روسیه یدنده اولان قزلق قلعه سنه عزیمت فکرنده بولندیغنی و بو کیفیته مبنی نهر قوبانک اونه طرفنده اولان روسیه عسکری پیدرپی قزلق قلعه سی سمتنه سوق اولنمقده ایدوکی و روسیه لو قبارطای اهلیندن اوچ بیک قدر سواری ایستدکده قبارطه لولر امتناع ایله حاضر اولورز هر قنغنی طرف مغلوب اولور ایسه اول طرفی یغما ایلرز دیو جواب ویرمش

اولدقلىرى و اغا محمد خان قزلى طرفه كلورسه قبارطه لر اكا تابع اوله جغندن قوبانك برويقه سنده حدود داخنده اولوب روسيه سنورينه ايصال خسارندن منع اولتمقده اولان چرا كسه خلقى دخى قوبان نهري نى كچوب روسيه لويه ايصال خسار ايده جكلىرى بينلرنده اولان صحبتلرندن اكلاشيلوب اول خالده اناپه دن رأس حدودده واقع حاجيلر قاعه سنه قدر يوز يكرمى ساعت مسافه سى اولان حدودك محافظه سى قابل اوله ميه جغندن بو باده نوجهله حركت اولتمق لازم كلورسه اول بهاردن مقدم اشعار اولتمق لازمه دن اولدينى تحرير اولتمش اولمسيله كبراي اركان دولت ميانلرنده لى المذا كره بو باده روسيه لويه طرفدارلق ايتك عينيله وصول و حصول قضا و بلايى تسريع و انطولينك مفاتيح و مقاليدنى دشمن الله تسلیم و توديع ديمك اوله جنى و انختادن واركلى خان روسيه نك حمايه و اعانه سيه قوت بوله جق اولور ايسه يكيدن اولطرفده بردشمن قوى يتشمش و بلكه موقفاً روسيه لو اولطرفه دعوت ايدلمش اوله جنى مسلماندن اوله رق روسيه طرفنى تصحب قطعاً جائز اوله ميه جنى مثلو اغا محمد خانى تصحب دخى روسيه يه سر رشته قيل و قال و باديء جواب و سؤال اولوب دولت عليه ايسه هنوز غوائل حربه دن تخايص كرى بيان ايله تنظيم امور داخيله سنه باشلامش بولمسيله نى طرفلنى التزام ايلمك ايجاب وقت و حالدن كورلديكنه مبنى ضيا پاشايه بورالرى ايضاح ايله كمال بيطرفى اصولنه رعایت اولتمشى و برو طرفه كچمش اولان ايران رعایاسى اغا محمد خان طرفندن تأمین ايتديريلوب بعده رد و اعاده لرى مقرر ايدو كندن اولوجهله پيدربرى اعاد لرى اسبابنك استحصال قلمشى و روسيه لونك اغا محمد خان اوزرينه حر كته دولت عليه نك رخصت و موافقتى حوادثى روسيه ضابطاننك خدعه و دسيسه لرى اولوب بوموجب استدعا سيواس و مرعش عسكرى نك حر كترلينى درسعادتن تاكيد ايسه بو اراجينى تصديق و تأييد ديمك اوله جغندن بوندن صرف نظر اولتمغه ينه ارضروم طرفندن بعض وسائل مناسبه بهانه سيه استعجال ايدلمشى و صايباننك درجيه تعليمات كوندرلمشدر . اناپه متصرفنك تحريراته كلنججه حاجيلر قاعه سنه قدر يوز ساعتدن زياده طولنده اولان و اهالىسى كافة قبائل و عشاردن عبارت بولنان حدودك اناپه متصرفى طرفندن محافظه سى قابل اوله ميه جنى دركار ايسه ده مصالحه اخيره ده قبائل مرقومه طرفندن روسيه لويه واقع اولان ضررك تضمينى شرط قلمش ايدو كندن هر نوجهله اولورسه اولسون محافظه اسبابنى استحصاله چالشمقندن غيرى چاره اوله ميه جغه مبنى شرط مذكورك درجيه قبائل مرقومه نك كماكان ضبط و ربطلر بيه و خلاف عهد و شرط

حالات وقوعه گمانسنه و بونکله برابر طوائف مرقومه نك جلب و استمالترینه غیرت اولنق و کیفیت لسان مناسب ایله قبائل مذکور نك امرا و اوزدن و سپاهی و سائر سوز صاحبترینه تفهیم قانعق و صایاسی دخی با تخریرات انابه متصرفه اشعار ایدلمشدر . دولت علیه اولوقت روسیه طرفندن تحاشی و احتراز ایتدیکی کبی نادر شاهک اطوار و حرکات معلومه سنی در خاطر ایدرک ایران طرفندن دخی قوجونوردی حالبوکه نادر شاهدن صکره اختلالات متوالیه حسینله ایرانک هر طرفی خراب و اها لیسنگ اکثری تلف و نایاب اوله رق ایرانک اسکی قوتی و اولکی معموریتی قالمیوب اغا محمد خانک اداره سی ایسه عشیرت طورنده و بدویت طرفنده بولنسه رق اعمار مملکت و تقویه حکومت یولنده اولدیغنه و اولسه ییله نادر شاه زماننده کی درجه قوت و قدرتی کسب ایده بیلمسی پک چوق زمانلره موقوف بولندیغنه مبنی اولوقت دولت ایرانیه نك بادیء احتراز و اندیشه اوله جق حال و اقتداری یوغدی . لکن اولوقت وکلای دولت علیه دخی دول سائر نك احوال حاضره سنی لایقیله بیلمدکر نندن یالکمز معلومات تاریخیدن استخراج احکام ایدرلردی . و چونکه دولت علیه چندسال مقدم شداند محاربه دن خلاص بوله رق اصلاحات داخلیه ایله مشغول بولنوب فرانسه اختلالی اوزرینه اورویانک قاریشقلنی ایسه هر آن بادیء اندیشه و ملاحظه اوله رق و هر تقدیر بی طرف ایسه ده تدارکات احتیاطیه دن خالی اولدیغنی جهتله بویله بر نازک و قدغه برده ایران غانه سنک حدودی کند و سنجه بادیء ملاحظه اولوردی . اغا محمد خان ایسه بتون بتون احوال عالمدن بی خبر اولوب حتی اولوقت تالیف اولنمش بعض رسائنده محرر اولدیغنی اوزره اشبو اون و اونبر سنه لرینه کلنجه هنوز فرانسه اختلالندن و آنک سببیه اورویاده تحدت ایدن قاریشقلقندن خبردار اوله مامشیدی . شو حالده درون ایرانده سرزده ظهور اولان امرایه غلبه ایله مغرور اوله رق روسیه لویه دخی غلبه ایدوبده ممالک قافقاسی ضبطله اثره هانه طوغری حرکت ایتک خولبارینه ذهاب ایله روسیه سفرینی کشاد ایدوب حالبوکه روسیه لو در بند قلعه سنی ضبط ایتدکد نصکره طاقم طاقم اردولر ترتیب ایله ممالک ایرانه طوغری حرکت و هجوم ایتدکر ننده اغا محمد خان کندو خطاسنی اکلابوب اویله بر مهیب دشمنی کندو علیه نه حرکت ایتدیرمش اولدیغنه نادم اوله رق و مخاطر دهه بولندیغنی درک ایدرک زیرده بیان اوله جقنی و جهله روسیه علیه نه دولت علیه دن استمداد ایچون استانبوله مأمورلر کوندرمشدر . فقط دلت علیه نك بروجه سابق هنوز خلاص اولدیغنی محاربه آخیره نی اوزی قلعه سنی فدا ایتک و چرکستان حدودنده عشائر و قبائل طرفندن روسیه لویه ایراث اولنان خسارک تضمینی کبی اجراسی فوق الغایه مشکل اولان بر آغز شرطی یوکلنمک ایله

قامش اولدیغدن روسیه لویاه مخصوصه دن مجتنب اولسیله انا محمد خانک بو مراجعتی
ثمره سز قالمشدر

* دوبره ونیک ویرکوسنک ورودی *

دوبره ونیک جمهوری اوچ سنه ده بر کره ایلیچیری واسطیه جزیه معتاده لرین
تقدیم ایده کلوب بو کره دخی وقتی حلول ایلیکنه مبنی غره ربیع الاول اولان
صالی کونی دیوان عالی ترتیب اولنه رق جمهور مذکورک ایلیچیری عقبه شهریاری به
رومال عبودیت و جزیه لرینی تقدیم عقبه احرار تشریفات معتاده ایله حائر
دستایه مفاخرت اولدیلر عثمانلو اردولرینک ابتدا روم ایلیده آثار مظفرتی عالمه
لوله انداز اولدیغی زمان دولت علیه دن الك اول حمایه فرمانی آن اشبود دوبره ونیک
جمهوری اولوب آندن صکره سلاطین عدل آیین عثمانیان طرفندن بونک احکامه
تمامیه رعایت و بونجه سنه لردنبرو برأ و بحرأ دوبره ونیلولر حمایت بیوریلوب آنلر
دخی بونک شکرینی بیله رک اوچ سنه ده بر کره ویرکوی معینلرین وقتی حلول
ایتدیگی کبی باعریضه مبعوث مخصوصلری واسطه سیله ادا ایده کمشاردر بوکا دائر
تحریر و تقدیم ایده کلدکاری عریضه لرینک بر قطعه صورتی ذیلده (۹) رقمیه
ایراد اولنور .

و بر اراق فاسلور طرفندن دوبره ونیک سفینه لرینه تعرض اولنغله دوبره ونیک
تجار سفینه لرینک تعرضدن وارسته اولسی ایچون فاس حاکمی مولی سلیمان بن
محمد کچن ایکینوز طقوز سنه سنده نامه هایون کوندلرش ایدو کندن اشبو اون
سنه سی خلاننده وارد اولان جواب نامه سنده فیابعد دوبره ونیک تجارینک آمنأ
وسالماً آمد و شدلری اسبابنک استحسانه اهتمام و دقت ایده چکنی حاکم مشار الیه
ذکر و تعهد ایلمشدر .

* غرب اوجاقلرینه دائر بعض حوادث *

تونس بکار بیکسی میرمیران حمود باشا طرفندن بو ائنده مهر داری یوسف خواجه
یدیله طرف پادشاهی به ووالده سلطان و صدر اعظمه هدایا کشیدی کرک تونس
و کرک جزائر اوجاقلری اوتنه دنبرو جهاد و غزایله مشغول اولدقلرندن اقدار لرینه
طرف دولتدن همت بیوریه کلسیله بو کره دخی تونس اوجاغنه ایکی قطعه سفینه
و ایکی بیک قنطار باروت و طوپ و مهمات سائره احسان و ارسال بیورلمشدر که
جموعنک بهاسی اولوقنک آنچه سی حسابیه یدی یوز یتیش سکر کیسه دن زیاده
تخمین اولنمشدر

و غرب او جاقلری اوچ سنهده بر کره ابقا اولنه کلوب اولکی سنه اوچی دخی ابقا اولمش ایدوکنه بناءً بوسنه نك توجیهاتنده ابقا اولمشی لازم کلو رکن یوسف خواجه ایله رفقاسی شمیدین حمود پاشانك ابقاسی نیاز ایتملر یله همان ابقاسی امری اصدار و ارسال بیورلمشدر .

بوندن اقدم طرابلس غرب بکلی بکیسی علی پاشا ایله او جاقلوسی بیننده اختلاف ظهور ایتدیکی ائنده جزا رده یالی و کیلخر جلغندن اخراج اولنان سیدی علی بوفرصتی غنیمت بیلهرک تدارک ایلدیکی عسکر و سفینه ایله طرابلسه عزیمت و او جاقلودن بعضیلرینی جلب و طرابلس او جاعنی ضبط ایله ایالتک کندوسنه توجیهی در سعادتدن استبدعا ایلمش اولدیغنه مبنی اولوقت طرابلس غرب ایالتی عهدده سنه توجیه اولمشیدی انجق مؤخرأً او جاقلویه زیاده ظلم و تعدی یه تصدی ایلدیکندن او جاقلو معزول موچی ایله علی پاشانك اوغلی یوسف بکی تشویق ایدوب اودخی تونس او جاعندن استمداد ایله کلوب سیدی علی پاشای طرف ایله طرابلس او جاعنی ضبط ایلمش اولدیغندن ایالتک یوسف بکه توجیه بیورلمستی تونسولور رجا ایلدکلرندن بونیازلرینه دخی مساعده بیور یله رقی ایالت مرقومه بارتبه میر میرانی یوسف بک عهدده سنه توجیه اولمشدر .

مالطه قوالرلری بر طریقت رهبانیه اوله رقی دائماً سفائن اسلامیه یه تعرض ایتدکلری کی آنلره مقابل اشبو غرب او جاقلری دخی نصاری کیملرینه مسلط اوله رقی آق دکرده قورصالقله کچنورلردی بوجهتله اکثریا رأسا دول اورویا ایله عقد مهاده و متارکه ایدرلردی .

و بونلردن اورویا خلقی بک چوق ضرر و خسار کوردکلری کی دولت علیه تجار و حجاجی دخی مالطه قورصاللردن وقت بوقت عظیم خسار کورمشلدر . بو اوانده ایسه اوروپانك اختلالی حسبیله آق دکرده امنیتسزک زیاده اولدیغی حالده بعض دول و امک سفینهلری مالطه ترسانه سنده تجهیز اولنه رقی پورتکیز و ساردنیا کی دولت علیه ایله دوستقلری اولمان دول بیراغیله سواحل دولت علیه کشت و کذار ایله سفائن تجاره ایصال خسار ایتدکلر بولمشلدر .

صدر اسبق مرحوم راغب پاشا زماننده مالطیز و پورتکیز و ساردنیا مصالحه لری مذاکره اولمشیکن فعله کلامش و اندن صکره دخی برقاچ کره مالطیز مصالحه سی صدرلری درمیان اولمش ایسه ده وجود بولمامش ایدی . فقط مؤخرأً اسپانیا دولتیله منعقد اولان مصالحه نامه ده مالطیز طاقه سی طرفدن اهل اسلام تجار سفینه لرینه واقع اولان ضرر و خسارک منع و دفعنه اسپانیانك صرف هم کمله ایلمسی درج اولمش ایدوکنه مبنی بو ائنده مالطیز مصالحه سنه برصورت ویرلمک تخطر اولنوب

انجق ماطله قوالیرلکی بوجه محرر رهسان طریق اولدیغندن قورصالنگلک مؤبد
صورتیه ترکی تجویز ایده میه جکاری مثللو مصالحه مؤبده باب جهادی سد دیمکدر
دیو ارکان دولت علیه نك دخی اکثریا بونی ایستمدکاری جهتله مصالحه مؤبده عقدینه
طرفیندن خواهش اولدیغندن اون بش سنه لک بر متارکه تنظیمی و فقط غرب
اوجاقلرینک بومتارکه دن مستثنا طو تلمسی بین الوکلا مناسب کوریه رک بوکا توسط
ایلمک اوزره اسپانیا دولته اشعار اولتمسی خصوصی اشبو اون سنه سی خالانده
در سعادتده مقیم اسپانیا ایله جیسنه تکلیف اولتمشدر .

* احوال عربستان *

امرای مصریه نك ظلم و تعدیلری اشبو ایکیوز اون سنه سی ایچنده دوام ایدرک انارک
مظالمندن بشقه بوسنه مصرک شایان تحریر و قوعاتی اولدیغنی تاریخ جبر تیده مندر جدر
بوسنه امیر الحاج شام والیسی جزار پاشا بولنوب شام شریف اهالیسی ذاتا آنک مظالم
و تعدیاندن اشنگا ایتمکده اولدقلری خالد قافلهء حجاج ایله مکة مکر مه دن عودتده
اون درت کون مدینه منوره ده اقامت اولنه کلورکن بوسنه مدینه منوره یه دخول
اولندیغنک ایرتسی کونی اکثر حجاج جمعه نمازنده ایکن ناکاه حرکت وشام طرفه
عودت ایتمکله حجاج مساهمیندن بعضیسی مدینه منوره ده و بعضیسی قافلهء حجده بولنه رق
دوچار اضطراب اولمش ایدی .

جزارک بویه و قسز حر کتنک سببی عبد الشکور افندی تاریخنده بوسنیاق اوزره
محرردرکه جده والیسی اولان صدر اسبق قوجه یوسف پاشا مدینه منوره محافظه سنه
مأمور بولمغله ایکی یوز سکنز سنه سی حج شریفی بعد الادا کتخداسنی جده ده ابقا
ایدرک کندوسی قافلهء حاج ایله مدینه منوره یه گلش و ایکی یوز طقوز سنه سی خالانده
بروقدنبرو مدینه منوره ده تنفذ ایدن سرکشانی تادیب ایله بلده نك ضبط ور بطنی
اله آلمش ایدی .

جزار پاشا قافلهء حاج ایله مکة مکر مه دن عودت ایله مدینه منوره یه ورودنده یوسف
پاشا بعض لطائف الخیل حکیمانه ایله جزارک اخذ و اوله سی اسبابنه تشبث ایدرک ایلرو
کلان آدملرینی هپ جلب و اماله ایلمش اولدیغندن جزار کیفیته تظن و تفرس ایتدیکی
کبی همان اورادن فرار صورتیه قالقوب حجاجک اکثرینی ترک ایلدی . ایشته تاریخ
مذکورده کیفیت بوموال اوزره محرردر .

یوسف پاشانک بوکا دائر طرف دولتدن بر مأموریتی اولوب اولدیغنه دائر اوراق
رسمیه ده برشی کورمده لکن جزار اولوقتک متعابه طاقندن اولمغله یوسف پاشانک

بویله بر مأمویت خفیه سی اولسه بیه اجرای مرامه موفق اولیدی طرف دولتدن کندوسنه تحسیندن بشقه برشی دینامیه چکی مسلماتدن ایدی .

جزار پاشا شامه وصولنده دخی ایراد جدید خزینه سی طرفدن اداره اولنان غزه سنجاغی مقاطعه سی متسلمی سید علی اغای بلا امر عالی قتل و اعدام ایلدی . و بونک اوزرینه آرتق عزلی لازم کلوب آنحق امارت حاج مصلحتی اولوقت امور مهمه دولتدن اولغله ینه اسحاب اقتداردن برینه حاله سی لازمه حالدن اوله رق مجلس مشورتده لدی المطالعه اوتهدنبر و اول حوالیده عظم زاده لرك نفوذ و اعتباری اولدیغنه بناء حلب و الیسی عظم زاده محمد پاشانک اوغلی عبد الله پاشانک بالا انتخاب عهدده سنه امارت حاج ایله شام شریف ایالتی توجیه بیورلدی .

جزار پاشا دخی اصل کندو منصبی اولان صیدا ایالتی بالذات اداره ایتمک اوزره عکده کلوب امیر بشیر ایله برادرینه صورت محبت ابراز ایدرک ایکسینی دخی حبسدن اطلاق ایله جبل لبنان حکومتی آنلره حاله و کندولر یله برابر شیخ بشیر جنبلاطه دخی اکسای خلعت ایتمکله بونلر جبله چیمقدقلرنده باجمه مشایخ و وجوه اهالی کمال ممنونیتله انقیاد ایتدکلرندن سابقاً امیر جبل اولان امیر یوسف اوغلاری اتباع و عونلریله بلاد جبیله کیدوب عبد الله پاشا ایله طرابلس شام متصرفی خلیل پاشایه التجا و آنلر دخی عسکر ارسالیله اعانه و برو طرفدن جزار دخی امیر بشیره عسکر ارسالیله امداد ایدوب وقوعه کلان محارباتده عسکر جزار غالب کله رک شام عسکرینی بلاد جبیلدن طرف ایتدولریله امیر یوسف اوغلاری شامه فرار و امیر بشیر امارت جبیلده قرار قیامشدر .

* احوال عینتاب و ایچ ایل *

اوتهدنبر و حلب و عینتاب خاقی امیر و یکیچری عنوانیه ایکی یه منقسم اوله رق ایکی فرقه دائمی یکدیگریله حرب وجدالدن خالی قالماسدی . و یکیچری طرفلوری اولنلر یکیچری نشانلریله کندولرینی علامته دکاری کبی سادات یعنی امیر طرفلوری دخی باشلرینه یشیل صارمق کبی زی و قیافته کندولرینی آنلردن تفریق ایدرلردی امیر دیدکاری یاوز سلطان سلیمک فتحندن مقدم موجود اولان متعینان و متشخصان ایله آنلره پیرو اولنلر دیمک اولوب مرعش طرفنده دخی بویولده ایکی فرقه متضاده موجود ایدی . فقط اوراده اسکیدن قلمه طاقه امیر یرینه ذوالقدریه لی و بعد الفتح تعین ایتمش اولنلره بایزیدلی دینلرک بوا یکی فرقه دخی یکدیگریله حرب وجدال ایده کلوردی اشبو اون سنه سی خالانده عینتابده امیر لرك طغیان حسبیه یکیچری طاقتندن بر قاق یوزی تلف اولدیغندن مرعش بکار بکیمی

ذوالقدر زاده عمر پاشا نظام مملکت مأمور اولوب عینتابه کیدرکن اثنای راهده اشقای عشائردن بعضیلری اوزرینه تفنک آتوب اعدام ایتمکه مرعش سنجانی سابقا بکشهری متصرفی اولان مرفوع الوزاره درویش حسن پاشایه وزارتی ابقاسیله توجیه بیورلدی .

ایچ ایل سنجاغنده واقع سافککه قضایی متشخصلردن کولکهلی اوغلی دلی عثمان و برادرلری مصطفی و ماری نام عصاتک استیصالرینه مأمور اولان ایچ ایل متصرفی سید علی پاشا آنلرک اوزرینه واردقده لدی المقاتله اشقیای مرقومه منهزم و جمعیتلری متفرق اولدقدن بشقه مرقوم عثمان و برادری مصطفی ایله اون درت نفر عونلری اعدام ایله رؤس مقطوعه لری در سعادت کوندرملکه اشبو اون سنه سی اوائلنده باب عالی پیشکاهنه وضع ایله تشهیر اولمش ایدی .

مرقوم ماری دخی اوچ نفر عونله سیله قبرس جزیره سنده اخذ و اعدام اولمشلردر . یینه بو ائساده انامور بکاری اولان عبدالرحمن و صنع الله بکارک جزالری ترتیب ایله اول حوالی تطهیر قلمشدر .

* وقایع روم ایلی *

بر وقتدن برو یکی بازار و کولفجه قضالرنده کسب تعین و تحیز ایدن سلحدار عثمان خاصکی زیر دستنده بولنان قضالرا هالیسنه ایتدیکی ظلم و تعدی یه قناعت ایتیموب شمعی و هزار غراد و جوارنده اولان سائر قضالره دخی اطالاه دست تعدی ودلی اورمان اشقیاسندن اولان عونله سیله اظهار اطوار باغیانیه تصدی ایلدیکندن اطرافنده واقع قضال اعیانلری بافرمان عالی مأمور اوله رق اوزرینه واردقلرنده مدافعه قیدنده اولمش ایسه ده مقاومت ایده میه جکی اکلایوب کندوسنی عفو ایتدیرمک اوزره در سعادت فرار ایلمش اولدیفی لدی الاستخبار بوستانچی باشی معرفتیه طوتدیریلوب محرمک النجی پخشنبه کیجه سی اعدام اولمش ایدی . اشتب قضایی اعیانی ناظر اوغلی کور انا دخی قضای مذکور اهاالیسنه ظلم و تعدی ایتمکه اولدیغندن روم ایلی والیسی سید مصطفی پاشا طرفندن تلطیف و استمالت وادیسند اله کتوریه لره استانبوله کوندرمش ایدوکنندن او دخی فرداسی پخشنبه کونی یالی کوشکنده اعدام ایلمش وینه یوم مرقومده دفترخانه کتبه سندن اعلامجلیق خدمتنده مستخدم اولوب ایاتلو تیمارلری حقتنده مؤسس اولان قانون جدیده مغایر حرکتی تحقیق اولسان عذاری افندی دفترخانه پیشکاهنده و سرقت تهمتیه طوتیلان ایکی نفر یهودینک بری پارمق قبوده و دیگری بالی بازارنده اعدام ایله سائره عبرت کوسترلمشدر .

اقدحجه الحاقا عهده سنه سلستره ايالتی توجیه اولنان چرمن متصرفی حاجی عبدی پاشا
 طاغلی اشقیاسی اوزرینه مأمور اوله رق ادرنه طرفنده اقامت ایله ایفای مأموریته
 بذل مقدرت ایدوب بو ائنده ایسه اشقیاسی سرکرده لرندن حاجی مناو ایله رفقاسی
 سائره سی خیلیدن خیلی قوت کسب ایتشلر ایدی . حتی حاجی مناو پلونه قضاسنی
 قبضه تصرفه آله رق لوجیهی دخی ضبط ایله توسیع اقتدار داعیه سنه دوشوب
 فی الواقع لوجیهی آلمش اولسه جوارده بولنان دیکر قضالر اهالیسی دخی بالطبع
 کندویه سرفرو ایده جکندن آز وقتده بالقسان بوینده بیوک قوت قرانه بیله جکی
 درکار ایدی . لکن لوجیه لیرا ایله برقرار غشلق وقتده اومقوله لری مملکتته اوغرا تمامق
 اوزره بیلنرند عهده و پیمان ایلمش اولدقلرندن حاجی مناو معیتده کی اشقیایله
 برابر پلونه قضاسی اهالیسنی دخی نفیر عام صورتیله لوجیه اوزرینه سوق ایدرک
 قصبه نی طوپ ایله دو مککه باشلادیغندن لوجیه لیر طیشارو هجوم ایله حاجی مناوی
 فنا حالد بوزوب پلونه یه قدر تعقیب ایلمش ایدی .

مع مافیله بومثللو سرکر دکان اشقیایه اول حوالی اعیانلرینک اعانه خفیه سی اولدیغندن
 اولطرفنده ازاله واستیصاللری قابل اوله میه جغنی عبدی پاشا درک ایدرک حاجی مناو
 ایله رفقاسی اولان سائر سرکر دکان اشقیایه رای و یروب هر برینه بیکباشلیق
 خاقتلری اکسا وایکی دفعه ده بخشش اوله رق نقداً قرق درت کیسه آچه اعطا
 ایله کرکی کی اطمئنان حاصل ایتدیردکن سکره جمله سی بالاستصحاب منصبی اولان
 ساسترده طوغری عزیمت ایدوب چونکه بوشقیلرک دلی اورمان اعیانلر یله دخی
 استیناس واختلاطلری اولدیغندن همان هزارغراد و شمنی اعیانلری و سائر مناسب
 اغالر معرفتلیله نفیر عام ترتیب اولنه رق یکی بازار قضاسنه نزول اولندقدده قاضی
 بیجان قرینه نی دخی اشقیای مرقومه یه قوناق ویرلمش ایدو کندن ترتیب اولنان نفیر
 عام عسکری ایرتمی کون علی السحر قریه مزبورده هجوم ایدرک اشقیادن بش
 التیوز مقدار یله بعض سرکر دکانی اعدام اولمش ایسه ده حاجی مناو فرار و بش قدر
 اشقیایله واروب کوملجنه ده استقرار ایدی و بوضورتله بالقانک بو یوزنده طاغلو
 اشقیاسنک سورتنه ضعف ککش ایسه ده عبدی پاشا ساستر ده اقامت ایلمسی حسیدله ادرنه
 جهتی خالی قالدیغندن اشقیای اولطرفه طوپلانونب شقاوتلرینی او یوزده اجرایه باشلادیلر .
 بر منوال سابق طاغلو اشقیاسی دولته بیوک غائله اولدیغنی حالد بو ائنده و دین
 و بلغراد طرفلری دخی اختلالده ایدی . شویله که : بوندن اقدم بعض شقاوتنه
 منی فرمانلو اولان بور یجه لی کوسه مصطفی نام شقی ایله با اراده سنیه بلغراددن
 طرد و تبعید اولنان یماقلردن بعضیلری ینه بلغراده دخول ایله سرحد مذکور

قبضه تصرفلرینه آلمق اوزره و دین یماقلری ایچنده کسب تحیز و تعین ایلمش اولان (پازواند) پاسبان اوغلندن استمداد و اودخی غیرت جاهلیه سی اقتضاسنجه و دین و آطه قلعه لرندن طوپ و جبخانه اعطا و یا نلرینه نفرات ترفیق ایله امداد ایتمکینه مبنی اشقیای مرقومه بلغراده طوغری حرکت ایملکارینی بلغراد محافظی الحاج مصطفی پاشا خبر آلدیغی کبی مقابله به تشبث ایلمش ایسه ده اشقیاطاقی بر تقریبه بلغراد قاعه سنده یکچیری اغاسی اولان اسبق قول کتخداسی چلبی مصطفی اغا و بلغراد محافظه منه مأمور درت اورطه ضابطانیه خفياً مخبره و اتحاد ایدرک آنلرک معاونتلیله بغته قاعه نك واروشنه دخول ایدیور دکارندن محافظ پاشاهان یاننده بولنان بر مقدار دأر هسی خاتی ویرلو نفراتی ایله ایچ قلعه به قنابوب اشقیانک ایسه آرقه دن امداد لری منقطع اولدیغی جهتله جمعیت لری تکثر ایتمکده بولنش و کیفیت نیش و افلاق و سائر حوالیدن در سعادتله آنها اولنش ایدو کیندن در عقب اول جوارده بولنان متصرف و متسلم و اعیانلردن بشقه روم ایلی و ایسی سید مصطفی پاشا دخی روم ایلی ایالتنده کائن منسوب و معزول بالمله میرمیران و ایالت عسکری و سائر ارباب حرب و ضرب ایله بلغراده عزیمت ایملک اوزره مأمور قلمش ایسه لرده بولنر هنوز بلغراده وارمدهن بلغراد محافظی اشقیانک حقمندن کش اولدیغی خبر آلمشدر . شویله که : محافظ پاشا یاننده کی عسکر ایله قلعه دن خروج و کمال شدت و سرعت ایله محاصرین اوزرینه دیرانه هجوم ایدیجک اشقیانک منهزم و اکثری تلف و مجروح اولوب بقیه سی و دین جانبته فرار ایلمش و اشقیانک اتفاق خفیسسی اولان سالف الذکر چلبی اغانک جزای سزاسی اجرا اولنش و بونک اوزرینه کندوسینه شریک جنایت اولان سائف الذکر درت اورطه سینوبه نفی ایله لرلرینه قله و قسطل موره و منکشه و خانیه قلعه لرندن درت اورطه ترتیب بیورلش اولدیغنه نظراً بلغراد غائله سی اکر چه بر طرف اولمشیدی .

انجق و دینه فرار ایتمش اولان اشقیانک پاسبان اوغلنک اغانه سیله بلغراده هجوم ایتمک اوزره تجمع و تشدد و بر مقدار اشقیانک دخی و دینک قارشوسنده واقع قلفاته عبور ایله مملکت افلاکه تسلط ایتمکده اولدقلری خبر لری افلاق و یوده ده سی و سائر لری طرفلرندن توار دایتمکدن ناشی پاسبان اوغلنک تأدیجی لازم کلدیکندن بروجه مشروح بلغراد اوزرینه ترتیب اولنان عسا کرک طوغری و دین اوزرینه سوق اولنمی امر اولندیغی کبی و دین محافظی پکمزجی محمد پاشانک سرحدلو بیننده نفوذی قالمش ایدو کیندن اشبو اون سنه سی اوائلنده عزلیله یرینه کشانده مرفوع الوزاره اقامت اوزره بولنان کرجی عثمان پاشا وزارتی ابقاسیله نصب و تعین بیورلش ایدو کیندن

آنک دخی سر یعاً نیکبولییه وارو بده اول حوالی عسکرینی جمعه بشقه جه براردو
 ترتیب ایله ودینه طوغری حرکتی فرمان بیورلمشیدی بوسورتله ودین محاصره
 و برقاچ دفعه مقاتله اولمش ایسه ده ایام شتاتک تقریبی حسینیه ایشتک بتورلمسی سنه
 آتیه یه موقوف اولدیغی روم ایلی والیسی طرفدن انها اولندیغنه مبنی روم ایلی
 والیسنک صوفیه ده وودین محافظی عثمان پاشانک لوم قصبه سنده و تپه دلتلی علی پاشا
 یکنی محمد پاشانک غورغشفچه قصبه سنده و سائر لرینک دخی ینه اول جوارده ودینی
 محاصره شکننده مشتانشین اولملری امر واراده اولنمشیکن سابقاً و دین محافظی
 و حالقره حصار صاحب سنجانغی متصرفی اولوب الحاله هده و دینه بولنان بکمزجی
 محمد پاشانک تخریاتی وودین قاضینک اعلامی و عموماً وودینونک متعدد محضر لری
 و پاسبان اوغلتک برقطعه عرضالی وارد اولوب فیابعد پاسبان اوغلی بلغراد
 مطر و دلرینه سرراً و علناً معاونت و تصحب و جوار قضالره تسلط ایتیموب هر حالده
 و دین محافظ لرینک امر و رایته انقیاد و متابعت ایلمک و یماقارک اسامیلردن بو کره
 الی یدی بیک آچه خزینه ماده ایدیلوب بوند نصکره دخی محمولاته دقت و سنین
 گذشته مواجی میرییه ترک و تبرع اولتمق وودین جزیه سیله او جاقاق اولان
 مقاطعاتک اموال میریه سی ایکیوز کیسه راده لرنده اولوب انجق زیاده تحمیلی
 اولدیغندن پاسبان اوغلتک عهد سنه الزام ایله بشیموز کیسه یه ابلاغ ایلمک و افلاق
 نظامنه دائر صادر اولان اوامر علیه احکامنه رعایت اولنهرق افلاقدن سرحد
 ایچون وارد اوله کلان اجناس ذخائر دن زیاده مطالبه سیله خلاف نظام حرکتدن
 و صور سائره ایله افلاق اهلینه ایصال خسار و مضر تدن اجتناب قلمق شرائطنک
 کاملاً اجرا سنه بالجمله سرحدلو کفیل وضامن اولمق اوزره پاسبان اوغلتک عفو
 بیورلمسی نیاز ورجاسی درج و تسطیر اولتمش ایدوکنه مبنی شرائط مشروحه
 ایله پاسبان اوغلی عفو اولنوب انجق و دین محافظی عثمان پاشا ایله پاسبان اوغلتک
 میانه لرنده برقاچ دفعه محاربه و وقوعه کلش اولدیغنه مبنی حسن امتزاج لری قابل
 اوله میه جفی جهته رجبک یکر می ایکنجی کونی و دین سنجانغی سلسلته و الیسی
 عبدی پاشایه و سلسلته ایاتی عثمان پاشایه توجه بیورلمشدر .

مصلحتک بوسورتله تسویه سی پاسبان اوغلتک و دینه ده زیاده کوکوشمسی
 و ایلر وده اوزرینه سوق عسکر اولنه جق اولدیغی تقدیر جه سرحدلو کفیل وضامن
 بولندقلردن جمله سنک آنکله اتحاده مجبور اولملرینی موجب برکیفیت اوله رقیکه
 تحسین ایله اجرا اولتمش برصورت دکل ایدیه ده نه چاره که بو اوانده اوروپا
 دولت لری اختلاف و اختلالده وزیرده بیان اولدیغی و جهله ایران طرفی دخی جلب

دقت و سلب امنیت ایده جک بر حواله اولمسیله دولت علیه نك خارجاً اندیشه سی
اولدینی کبی داخلأ دخی طاغلی اشقیاسی غائله سی اولدیغندن پاسبان اوغلی غائله سی
اول صورتیه تسویه اولنهرق هان سائر طرفلرده اولان اشرا و اشقیانك رفع
وازاله لرینه ابتدار ایدلمشیدی .

طاغلو اشقیاسی اوزرینه گاه وزرادن بری و گاه ادرنه بوستانجی باشیلری مأمور
اوله کیشلر ایسه ده مأمور لرك طمع وار تکاب لرندن ناشی مصلحته فساد قاریشه رق
اشقیای مرقومه نك رفع وازاله لری قابل اوله میوب و برآراق سر کرده لرینه رأی
وامان و یریلرک هر بری کندو حالده اولمق شرطیه برر محلامه اسکان اولمشلر
ایکن بودخی مفید اولمیوب بو اوانده ینه طغیان و غلیان ایتملریله در علیه دن پرورده
دولت بر وزیرک مأمور یتنه لزوم قوی کور نمکین جمادی الاخره نك اون طقوزنجی کونی
کتخدای اسبق حتی محمد بک افندی به رتبه وزارت ایله روم ایلی ایالتی بالتوجه اوزرنده
بولنان تیمار وزعامت نظارتی دفتر امینی مصطفی راسخ افندی به احاله اولنمشیدی و سابق
روم ایلی والیسی سید مصطفی پاشا عهده سنه دخی اغریوز سنجانجی توجه اولنمشیکن
متعاقباً عزل ایله ساقزده اقامته مأمور ایدلمشدر حتی پاشایه استقلال تام و یریلرک معینته
برر معلم طویجی و عربی اورتیله و نفراتیله برابر ایکی خبره جی خلیفه سی تعیین
ایدلمش و چونکه کندوسی ادرنه ده اقامته اطراف و اکنافه مدبصر بصیرت ایده جک
اولمسیله اقتضاسنه کوره اعمال ایتمک اوزره معینته قوجه ایلی متصرفی میرمیران حسن پاشا
بیگ نفر تفنک انداز پیاده ایله و خاصکویده اقامت و تدمیر اشقیایه غیرت ایتمک اوزره
چرمن متصرفی میرمیران پلاسلی محمد پاشا بش بیگ سکیان نفراتیله و روم ایلی جانبنده
بولنان قارصلی علی اغا نام دلیل باشی فلیبه ده اقامت ایتمک اوزره بشیوز نفریله و کدلاک
کوملجنه ده و دیمتوقه ده اقامت ایتمک اوزره بشر یوز نفر ایله برر دلیل باشی مأمور
اولدقدن بشقه جبار زاده و قره عثمان اوغللری طرفلرندن دخی برخیلی سواری
و علوفه و بخشش و تعیینلری خزینسه دولتدن و یرلمک اوزره کلی موظفه ترتیب
بیورلمش و بعض مناسب قضالرده اقامت ایله اعیانلرک احوالی تحقیق و تحری ایتمک
و قضالری محافظه ایلمک اوزره در سعادتدن متعدد خاصکیلر کوندرلمش ایدی .

بو صورتیه مأمور اولان خاصکیلردن مصطفی خاصکی بالاده بیان اولندیغی اوزره
طونه یالیمسندن فرار ایله کوملجنه ده جایگیر شقاوت اولان حاجی مناو اوزرینه
واروب لدی المحاربه سر کردکان اشقیادن چند نفری اتلاف اولنوب حاجی مناو
مجر و حافرار ایلمش ایسه ده متحصن اولدیغی برقریه ده متأثراً فوت اولمغله دیگر
اشقیانك رؤس مقطوعه لر یله برابر آنک دخی سر مقطوعی در سعادتیه کوندرلمشدر .

خاصکوی اعیانی حاجی امین اغانک طاغلو اشقیاسی ایله اتحاد واختلاطی اولدیغندن
 آنی دخی بوئانده پیلاسلی محمد پاشا اعدام ایلمشیدی وینه بوئانده ارناودپاشالرینک
 درسعادتده جاسوسی اولوب نشر اراجیف ایله درلو فسادات ایقاعنه اجتسار
 ایده کلان بالطه جی علی نام شخص ایله پاشا اغانک دیملکه معروف اولوب دفتر توزیعه
 معتاددن زیاده شی ادخال ایدن سکود اعیانی ابراهیم اغان دخی اعدام اولغمشلدر .
 حقی پاشا دائره سنی تنظیم ولوازم سفریه سنی تمیم ایتدکن صکره شعبانک اون
 اوچنجی کونی آلائی ایله استانبولدن چیقهرق ادرنه جانبه عزیمت ایتمکه اول
 کون سلطان سلیم خان حضر تلی دخی تبدیلاً داود پاشا سرانی تشریف ایله
 اورادن آلائی تماشا عقینده حقی پاشایی حضور هایونلرینه احضار ووصایای لازمه یی
 شفاها افاده وتودیغ وبرمقدار عطیه سنیه وبراعلا خنجر احسانیه اجرای رسم
 تشییع بیور دیلر .

حقی پاشا ادرنه یه واردیغی کبی طرف طرف اشقیانک ترتیب جزالرینه تشمیر ساق
 ایدرک همان طاغلی اشقیاسنه معاونتلی تحقیق ایدن دیمتوقه واشتب وادرنه وکوماجنه
 وصماقو وایمانلریله سائر معین اشقیا اولنلرله بشیوز قدر طاغلو اشقیاسنک رؤس
 مقطوعه لرینی درسعادتده کوندرمشدر . وبومقوله مقتول اعیانلرک اموال وایشیالرینک
 جانب میری یه ضطبی ایچون طرف طرف مباشر لر کوندرمشدر .
 یانیه سنجانغی متصرفی تپه دلیلی علی پاشا اوغلی ولی بکی حقی پاشانک استقبالنه
 کوندرمش و او دخی آنی معیتده استخدام ایتک اوزره توقیف ایلمش اولمسلیله
 هم کندوسنی تشویق وترغیب وهمده پدرینی تلطیف وتلطیب ایچون عهده سنه
 رتبه میرمیرانی احسان بیورلمشدر .

* بعض النشآت خیریه ومیریه *

مقدحجه والده سلطان طرفندن مجدداً انشاسنه مباشرت اولنان قاسم پاشا مولویخانیه سی
 ختام بوله رق ربیع الاولک التتجی بازار کونی کشاد اولمش وماه مرقومک طقوزنجی
 وایلولک اون ایکنجی کونی حلول موسم مناسبتیه قپودان پاشا دوئتمای هایون ایله
 آق دکزدن عودت وبرمعتاد آلائی والا ایله وبرقورصان اقطارمه سیلیله پیشگاه
 نظر هایوندن کچوب ترسانه یه وضع لنگر اقامت ایلمشدر . چونکه سلطان سلیم خان
 محب مولوی اولوب (الناس علی دین ملوکهم) مفادنجبه خلق دخی کیمی صمیمی
 وکیمی تقلیداً بو طریقده سلوک ایله اکثر رجال وکبار دائره لرنده برنفر اولسون
 مولوی بولتوز وهرزویه وارلسه مولوی سکه سی کوریلور وانجمنلرده آوازه

نای و رباب ایشیدیلور ایدی . یکچر بلر طریقت بکتاشیهیه منسوب اولوب بو اووانده ایسه نظام جدیده رغبت اولنه رق رفته رفته یکچر بک افکاری قالدیر لمق ملتزم اولدیغنه مبنی طریقت بکتاشیهیه بدل طررق علیه دن برینک اعتبار بولمسی اولوقتک حکمنجه امور طبیعیه دن اولدیغی حالده نظام جدید افکارینه طریقت مولویه موافق دوشه رنك زیاده پارلامش ایدی . و سلطان سلیم اوائل جلوسنده حضرت مولانا قدس سره الاعلی ایله جوارنده مدفون اولان اعزّه کرامک پوشیده لرنی تجدید ایتدیروب یکی پوشیده لر قونیهیه ارسال ایله صندوقه لره وضع اولدیغی کونلرده نمنجه مصالحه سی عقد اولمش و بعده غلطه مولویخانه سنک ختاسی قبودان پاشانک دونمای هایون ایله آق دکر دن عدد نذر مولوی اوزره اون سکر قطعه صغیر و کبیر قورصان اقطارمه سیله کدیکی ایامه تصادف ایلمش اولمسی مولویانک افکاری نی تأیید ایلمش ایدی . بوسنه دخی قائم پاشا مولویخانه سنک کشادینی قبودان پاشانک برقطعه قورصان اقطارمه سیله کلسی تعقیب ایدیجک اولیکلر کبی بودخی کرامات مولوبه دن عد اولنه رق اول سیاق اوزره نوری بک تار یخنده ثبت صحیفه بیان قلمشدر .

فقط اون بش سنه مقدم پالمش قرقیدی ذراع طولنده عنایت حق نام قراوله که بوسنه دونمانک آق دکره اخراجنده ریاله سنجانجی چکلمش ایدی . مأموراً اسکندریه مصره کیدوب بعد اداء الخدمه عودت ایدرک روز قاسم کیجه سی سیسام بوغازندن کچر کن ظهور ایدن فورتنه ایله ساعت بشده قرديه دوشوب اگرچه طوپلری وایچنده کی مهماتی اخراج اولمش ایسه ده یکر می نفر قالیونجی ایله دروننده بولنان تجار متاعی تلف اولدیغی متعاقباً خبر آنه رق موجب اسف اولمشدر . بوسنه سلطان سلیم صحیفهیه نقل ایده میه رنك طوپ قپو سراینده اقامتی اختیار ایدوب انجق اوائل صفرده نیم نقل ایله بشکطاشه عزیمت بیور مشلر ایدی . برآی قدر اوراده اقامت ایله تنزه بیوردقدن صکره ربیع الاولک اوننجی کونی ینه طوپ قپو سراینه نقل بیوروب اون ایکنجی جمعه ایرتسی کونی دأب دیرین دولت علیه اوزره سلطان احمد جامع شریفنده مولد نبوی قرائت ایتدیلمشدر .

دولت علیه نك امور خارجهیه سی رئیس افندی نك نظارتنده اولدیغی کبی امور داخلیه نك مرجعی دخی اول وقت کتبخدا بک اولوب بالاده بیان اولنان احوال دن اکلاشدیغنه کوره امور خارجهیه کسب نزاکت ایلدیکی کبی امور داخلیه دخی خیلمدن خیلی چوغالمش و همده اعمیت کسب ایلمش اولدیغی حالده کتخدای صدر عالی بولنان عبدالله بری افندی اکثر اوقانده انحراف مزاجی حسبیله تداوییه

اشتغال ایدرک بعض مرتبه فتور حالنده کورلسیمه برابر رقلمسی طرفندن ارتکاب وارتشا ایله اتهام اولنوب سلطان سلیمک ایسه رشوت مادهسی پک منفوری اولدیغندن همان جمادی الاولی نك یکر می سکرنجی کونی عزل ایله رینه باروتخانه لر نظارتنده سعی مشکور اولان شریف افندی بالتعین آنک اوزرنده اولان روزناهچه اول منصبی دخی رئیس الکتاب سابق فردوسی محمد افندی به توجیه اولنوب شریف افندی معرفتیه مجدداً انشاسنه مباشرت اولنه رق ختامه قریب اولان ازادلو باروتخانه سنک ختامه ومفرعاتی اولان مواد مهمه نك اتمامه دکین باروتخانه لر نظارتنک کمسنه به توجیه اولنومسی اراده سنیه اقتضاسندن بولندیغنه مبنی نظارت مذکور شریف افندی عهده سننده ایقا اولمشدر .

چونکه جلد خامسده بیان اولدینی وجهله استانبول وکلیولی وسلانیک باروتخانه لری برلشدریه رک برنظارت تحتنه قونیلوب شریف افندی عهده سنه احاله اولنه لیدنبرو باروتخیلق صنعتی ایجه حسن صورت بوله رق کوزل باروتلر اعمال اولنقمده بولنمش ایسه ده بونلرک چرخلری حیوان ایله اداره اولنه کلوب حالبوکه حیوانانک بعضیسی قوی وبعضیسی ضعیف وحرکتلری گاه آغر وگاه سریع اولمقدنناشی بردوزی به دوکلیوب بوجهته چیقان باروتلر برصنف ودرجه ده اوله مدیغندن وماء جاری ایله اداره اولنان چرخلرک طوقماقلمری متساوی الضرب اولوب بوندن بشقه حیوانات مصرفندن وارسته اولدینی وعمله نك همان نصفی مقدارینی تقابیل قابل اوله جنی جهتلرله مصارف اعمالیه دخی قلیل اوله جغه مبنی استانبول جوارنده صو چارخلری یاللمسی شریف افندی به امر اولنمغه لدی التحریر چکمجه صغیر قریبنده واقع ازادلو نام قریبه ده دکرمن چویرر باشلو برصو بولنمغین قریه مذکورده مجدداً برعالی باروتخانه وبریوک حوض انشاسنه مباشرت اولنوب بوئشاده شریف افندی برمنوال سابق کتخدا اولمش ایسه ده باروتخانه لر نظارتی ینه عهده سننده ایقا اولنمغه آز وقت ظرفنده اکیل استدرمش وتبعه دولت علیه دن وارمنی ماتندن عراقک نام مرد صاحب لیاقت دخی اشبو یکی باروتخانه ده مصنع چرخلر وسهل الاداره دولابلر وسائر اسباب تسهیله ایجاد ایلمش وچند ماه ظرفنده اشبو یکی باروتخانه ده باروت اعمالنه باشلامشدر . بوندنصکره کلیولی وسلانیک باروتخانه لرینه ارتق احتیاج قالممغه آنلرک تربیاتی دخی استانبول باروتخانه لرینه نقل وتحویل اولمشدر .

فی الاصل ترسانه عامرده اولان داراغاچنده قالیونلر برر برر نوبته قلافتانوب دفعه ایکی قالیون قلافتانمغه متحمل اولدیغندن مقدا جزارلی حسن پشانک قیودانلغنده برعد داراغاچی ده انشا اولمشیدی . انجق بونلرک ایکسی دخی

اخشاب اولدیغندن سکنز اون سنهده بر کره کلی مصارف ایله تعمیر یا تجدیده محتاج اولسیله بودفعه کلیاً هدم اولنوب مجدداً کار کیر اوله رق بر برینه متصل اوج عدد دار اغاجی و کاغذخانه بوغازنده شالوپه تکنه لری و ضعی ایچون مجدداً کوزلر انشا اولمش و ترسانهده بر حوض کبیر انشاسنه مباشرت قانمشدر .

* قره دکز بوغازی قلعه لرینک نظامی *

بروقدنبرو تعمیر و تجدیدینه اهتمام اولنان قره دکز بوغازی قلعه لرینک بر نظام مستحسن تحتہ ادخالی لازم کلمکله بغداد جق و روانجق و روم ایلی فناری و اناطولی فناری و غریجه و بیوک لیان و پویراز لیانی قلعه لرینک نفرات موجوده سنه بشیوز نفر علاوه سیله مع ضابطان مجموعی بیکه ابلاغ و هر طقوز نفره بر اونباشی تعیین اوله رق بونلرک ضابطان و قایقچی و مرمتجیلرندن بشقه یوز التمش سکنز نفری بغداد جق قلعه سنهده و یوز التمش نفری روانجق قلعه سنهده و یوز قرق دردی روم ایلی فناری قلعه سنهده و یوز ایکسی غریجهده والی طقوزی بیوک لیانده و یوز التمش ایکسی پویراز لیانده اقامت و کافه سی لایقیه طوبیحیلنی تحصیل ایتدکن بشقه لوند چفتلکننده کی عساکر معامله کی تفنک اندازلق فنی دخی مشق و تعلمه غیرت ایتملری و اشبو قلاع سبعة بوغاز ناظری نامیله براغا نصب اولدقدن بشقه قبودان پاشانک و کندوسی در سعادتده بولمندیغی وقت و کیلی اولان ترسانه امینک اون بش کونده بر کره کیدوب معاینه و نظارت ایلمسی نظامه ربط اولمش و بوغاز ناظری اغایه سنوی ایکی بیک بشیوز غروش و یومیه یکر می چفت نان و درت قیه روغن ساده و بش قیه لحم و اوج کیل شعر و قلعه دزدار لرینه سنوی التیشر یوز غروش و قلعه کتخذالرینه و طوچچی باشیلرینه التیشر و نفراته الی التیشر آچه یومیه تخصیص و کیجه وقتی کمیلرک بوغازدن منع مرور لری حقیقده مفصل و مشروح بر قطعه تعلیمات تنظیم قانمشدر .

استانبول طرفنده بولنان قلاع اربعه یعنی روم ایلی قواغی و اناطولی قواغی و یوشع طابیه سی و تالی دالیان طابیه سی محافظه لرنده اوتهدنبرو بوستانجی نفراتی بولدیغندن تعلیم لرینه و ضبط و ربط لرینه بوستانجی باشی باقق اوزره حالت اصلیه لرنده ابقا اولنوب فقط انتظام و رابطه لرینه و مواجبلرینک توزیعنه نظارت ایلمک و اسامی توجیهی ایچون واقع اولان عرض لرینی بوستانجی باشی ایله برابر مهرلک اوزره رجال دولتن بری ناظر و مستعدان کتبه دن بری بیک غروش معاش ایله کاتب نصب و تعیین اولنق و بونلرک نفراتی دخی لوند چفتلکننده کی معلم عساکر کی اصول جدیده اوزره تعلیم قانمق خصوصلری نظامه ربط اولمش و اشبو قلاع اربعه نک اوسته لری سالف الذکر قلاع سبعة نک دزدار لری مقامنده اولدیغندن بونلره دخی

سنوی التیشر یوز غروش معاش مخصوص اولنوب فقط یوشع طابیه سنک اوسته سی
 اصحاب تیماردن بولمسیه اکا معاش تخصیصنه حاجت قلامش بوقعه لک هر برینه
 یومیه مع نان بها سکسان التیشر آچه ایله برر کتخدا وبرر طوبچی باشی ویتمش
 التیشر آچه ایله برر معلم بلو کباشی و التمش التیشر آچه ایله برر جبهه جی باشی والی التیشر
 آچه ایله اوچر نفر جبخانه جی وایکشر نفر مهتر والی آچه ایله برر کاتب وقلاع
 مذکور دن روم ایلی قواغنه التمش التیشر آچه ایله یکر می درت طوپ اوسته سی
 والی التیشر آچه ایله یتمش ایکی نفر طوبچی و سکسان آتی آچه ایله برر خبره جی
 کتخدا سی و التیشر آچه ایله سکز خبره جی خلیفه سی والی التیشر آچه ایله یکر می
 درت نفر خبره جی و اناطولی قواغنه دخی ینه بووجهه یکر می بش طوپ اوسته سی
 ویتمش بش طوبچی و برر خبره جی باشی و معینه برر کتخدا و اون نفر خبره جی خلیفه سی
 و او توز نفر خبره جی و یوشع طابیه سنه او توز برر نفر طوپ اوسته سی و طقسان
 اوچ نفر طوبچی و برر خبره جی باشی و معینه برر کتخدا و اون خبره جی خلیفه سی
 و او توز خبره جی و تلی طابیه یکر می اوچ طوپ اوسته سیه آلمش طقوز طوبچی
 ترتیب قلمشدر .

* وقعه نویسلک نظامی *

اوت دن برو دولت عالیده سحت اوزره ضبط وقایع اولنق خصوصه اعتنا اولد بغندن
 وقعه نویسلک مأمور تی هر وقت خدمه دولتدن مجرب و کتوم ذاتلره توجیه اولنه کلسیه
 وقعه نویسلردن وکلای دولت برشی کتم ایتیموب آنلر دخی وقوعاتی اولدنی کبی
 سحت اوزره ضبط و تحریر ایده کلمشار ایکن صکره لری بو خصوصه اولکی کبی اهمیت
 ویرلمز اولد بغندن وقعه نویسلر دخی بعض مجموعه لر یازان اصحاب مراق کبی نه بولور لر
 و نه ایشیدر لر ایسه جمع و تحریر ایدر اولملریله زمان سلیم خانیده هر شی تحت نظامه
 ادخال اولمقده اولدنی کبی ضبط وقایع مصلحتک دخی وضع قدیمه ارجاع بیورلمسی
 وقعه نویس بولان نوری بک باقریر استدعا و اخطار ایتمکله فیما بعد جریده وقایعه
 ثبت و تحریره شایان اولان موادی مکتوبچی و بکلکچی و آمدجی افسدیلر رئیس
 افندیدن بالاستیدان وقعه نویس افندی به اخبار و او دخی آنلردن استفسار ایله وقایع
 دولت علیه سحتی اوزره ضبط و تحریره ابتدار ایتک و تحویل ورؤس و تشریفات
 قلملرندن دخی توجیهات و تشریفات دئر موادک وقایع نویس طرفنه علم و خبر لری
 ویرلمک اوزره امر و فرمان بیورلمشدر .

* وقایع شتی *

باب عالیده آلا ی باش چاوشی اولان محمد چاوشک بر ولدی طوغدنی کبی خلاف

عاده ایکی اوچ یا شنده کی صیان مثلو تکلم ایدوب یعنی بابا وانا دیمک وصو ویمک ایستمک کی شیرلی افاده ایدوب فقط کندویه برشی سؤال اولنسه جواب ویرمدیکی والیوم یا شی اوچ ماهه بالغ اولوب حالا بو حال اوزره ایدوکی تحقیق اولمغله حالت مذکوره کمال قدرت باری یه دال اولان غرائب وقایعدن اولدیغندن کشیده سلک سطور اولندی (وما ذلک علی الله بعزیر) دیو نوری بک تاریخنده اشبو اون سنه سی وقوعاتی صره سنده غریبه اولمق اوزره ثبت جریده وقایع قلنمشدر والعهده علی الراوی . شوالک اون سکنرنجی کونی ساعت اوچده ایکن لاذقیه ده برزلزله عظیمه وقوعیاه قصبه نک نصفی وایسکله سنده واقع دخان کارخانه سی و مرقب و قدموس قلعه لر یاه جوانی مقاطعه سی قریه لر ی و جبهه قصبه سنک اکثر بیوتی و اوراده مدفون اولان ابراهیم ادیم قدس سره الاتم جامعنک منارده سی منهدم ونفوس کثیره تلف ومنعدم اولدیغی خبری در سعاده بالورود موجب اکدار نامعدود اولمشدر .

شعبانک یکریمی برنجی عالی کونی قسطن مواجبی چیقوب باجمله متقاعدینک ایکیوز اتی (شن) ایله (لذذ) و اشکنجیلرک ایکیوز یدی سنه سی (لذذ) ایله (مصر) و طوپنجی و عربیه جیلرک ایکیوز اون سنه سی (رجج) ایله (رشن) مواجبی قبه آلتده توزیع اولدقدنصکره صدر اعظم باب عالیده بر معتاد سرکی فرشیله سپاه و ساجدارانک مواجبی توزیع واعطا ایدوب ماه مرقومک یکریمی اوچنجی پنجشنبه کونی سرکی ختام بوله رق دور واقع اولمغله بر معتاد وارد اولان خط همایونده بغات و اشقیانک امر تادیب و تربیه لر ی مندرج بولمشدر بر صورتی زیرده (ی) اشارتیه ایراد اولنور .

بروجه بالا اخراج مواجب اوزرینه بر معتاد صدر اعظم مظهر التفات اوئش ایسه ده مواجب آچقه سنی تدارک ایچون دفتر دار افدینک نلر چکدیکنی الله بیلور چونکه دولت عامه نک عتیق او جاقلری باقی اولدیغی حالده نظام جدید عسکری دخی ایجاد اولمغله صنوف عسکریه سی ایکی یه منقسم اولدیغی کی امور مالیه سی دخی ایکی یه منقسم اولمشیدی و مخصصات عتیقه میری خزینه سندن و نظام جدیدک واکا متفرع اولان لوازمات حریه نک مصارفی ایراد جدید خزینه سندن اعطا و تسویه اولنوردی عصرک نظر توجهی ایسه ایراد جدید خزینه سنه معطوف وارکان سلطنتک افکاری دائمًا ایراد جدید خزینه سنه واردات جدید بولوب الحاق ایتمک جهته مصروف اولمغله میری خزینه سنک ایراد و مصرفی موازن کتورمک یوکی منحصر آدفتر دار عصر اولان ذاتک اوزرنده قالدیغندن دفتر دار بولنانلر عظیم عسرت و مشقت چکر دی بر سنه دنبرو دفتر دار بولان محمد امین افندی ایسه ضعف پیری ایله اشبو حمل ثقیل استیفانی تمهیلدن بیزار اولدیغنه مبنی بلدفعات استعفا ایتمکدن ناشی اوائل رمضانده عزل ایله

رینه دفتر دار اسبق ابراهیم افندی بالتعین آنک اوزرنده بولان شق ثالث دفتر دار ایلویه
حبوبات نظارتی دخی سابقا باش محاسبه جی احمد عزمی افندی به توجیه قیامدی .

ذی القعدہ نك در دنجی و مایس رومینك برنجی کونی سلطان سلیم خان حضر تلی
بشکطاش ساحاسرای هایوننه نقل بیورمشیدی .

مایسک یکر می ایکنجی بچشنبه کونی قیودان پاشا بر معتاد پالی کوشکی پیشکاهنده
دو نهای هایون ایله آلائی کوستروب آقدکزه عزیمت ایلدی .

بودورده دولتک افکاری نظام جدیدک ایلر ولدلسی خصونه منصرف اولدیغندن
نظام جدید عسکرینی تلطیف و تشویق ضمننده بعضا بالذات سلطان سلیم و بعضاً صدر
اعظم و شیخ الاسلام ایله سائر ارکان دولت لوند چفتلکنه تشریف بیوره کلر ایله
ذی القعدہ نك یکر می طقوزنجی کونی ایراد جدید دفتر داری مصطفی رشید افندی
طرفدن محل مرقومده ضیافت ترتیب اولتوب صدر اعظم عزت پاشا و شیخ الاسلام
دری زاده افندی و خواص ارکان دولتدن بعضیلری عزیمت ایله وقت عصره دک
تعلیم عسکر تماشایی و رسوم طعام اجراسی و اقتضا ایدنره خلعتلر و بخشش
اعطاسی ایله امرار وقت اولتمغله سلطان سلیم خان همان اول کون عزت پاشایی
تلطیف ضمننده برقطه خط هایون ایله برقبضه خنجر مجوهر کوندر مشدر خط
هایونک صورتی ذیلده (۱۱) رقمیله تحریر اولنور .

ذی الحججه او اخرنده ادرنده اغاج پازاری نام محلدن حریق ظهور ایله قاعه قپوسنه
کنجه جوارنده واقع دکانلر و اوچ شرفه لی چارشوسی و جوارنده کائن طاش خان
وصراف خانی و قوطیجیلر و مجدلر چارشولری و علی پاشا خانی و یکی خان و قپان
دقیق و سراجخانه چارشوسی و جوارنده کی خانلر و بزاز ستانک جوانب اربعه بنده کی
چارشو و محملرک بر چونغی محترق اولمشدر .

* وفيات *

صدور عظامدن و مشاهیر علمای کرامدن داغستانی ابراهیم افندی که یوزالتمش ایکی
تاریخنده بالامتحان مدرس اولوب مخرج مولویته نائل اولنجیه دکین بلا انفصال
فاتح جامع شریفنده نشر علومه بذل مجهود ایدرک یوایله حاج و شام و مکده مکره
قازیسی اولدقندن صکره عات پیری وضعف بصر مثللو عوارضه مبتلا اولمق
حسیله کوشه کیزین انزوا اولدیغندن ایکیوز طقوز سنه سی محرمنده اناطولی
قاضی عسکرلکی بحسب الطریق کندویه توجه اتمشکن عمر خلوصی افندی به بالتوجیه
آکادخی روم ایلی صدارتی پایه سی ویرلشیدی . اشبواون سنه سی جمادی الآخره سنک
سکرنجی کونی تکمیل درس حیات و تعطیل مباحث نفی و اثبات ایلمشدر .

مشایخ خلوتیه دن اولوب جدیدنه منسوب امی سنان زاویه سنک پوست نشینی اولان حسن افندی بو ائشاده فوت اولوب امی سنان نسلی بونده منقطع اولمغین زاویه مذکورہ مشایخ خلوتیه دن مصطفی افندی به توجیه قلمشدر .

ایاصوفیه کبیر شیخی محمد سعید افندی دخی کذلک اوائل رمضانده وفات ایتمکله وایاصوفیه شیخانجی جوامع سلاطین کر سیلرینک منتهای مرتبه سی اولمغله سلسله واقع اوله رق مبدادن منتهایه قدر هپ طریق شیخلری ترفیع راده ایدرک والده سلطانک خاصکویده بنا کردلری اولان جامع شریف شیخانجی بوندن مقدم ذیل مشایخ سلاطین اعتبار اولنمش ایدوکندن آنک کر سیمی منحل اولمغله بعض جوامعده وعظ ایله مشغول اولان عبدالقادر افندی عهدہ سنه توجیه بیورلمشدر . رمضانک بکر میسنده سلطان مصطفی عصرینک رجالنسدن یوسف افندینک اوغلی اولان آرپه امینی شفیق افندی ویکرمی یدیسنده دخی صدارت روم ایلی پایه لولرندن ابراهیم بک وفات ایتمشدر .

متوفای مشارالیه ابراهیم بک دور محمود خانیده صدر اعظم اولان اعرج عثمان پاشا دامادی صاری محمد پاشانک اوغلی اولوب بیگ یوز قرق بر تاریخنده تولد والتمش طقوزده طریق تدریسه دخول وبعده شیخالاسلام اسبق مرحوم عثمان ملانک دامادلی شرفنه نیل ایله طی مراحل طریق ایدرک ایکی یوز طقوزده روم ایلی پایه سنه واصل اولمشیدی اشبو اون سنه سی رمضانده علت نزول اصابتله راحل طریق عقبا اولمشدر . ساده دل ویا لکیز تلبس و تعمیمده زی اسلافه تقییده مائل اولوب بعض امیانه کلمات و تعبیراتی مشهوردر دیو نوری بک تاریخنده محرردر . لیساه قدرک ایرتسی کونی لاجل المعایده صدور عظامک اولاب باب فتوایه وبعده باب عالی به کیتلمری اولوقت معتاد اولدیغندن صدوردن خیرالله افندی دخی بوسنه بر معتاد رمضان شریفک بیکرمی یدنجی کونی بغچه قیوسی قربنده واقع خانه سندن حرکت و طرف شیخالاسلامی به عزیمت اوزره اقدمجه قونیه والیسی طرفسندن هدیه کیش اولان آتی حاضر لاتدیروب بنه جک اولدوقده آت شرکشلک ایدرک بنک طاشنه یناشامش ایسه ده افندی اصرار ایدرک نه حال ایسه راکب اولوب کیدرکن کوچک بازار قربنده اکمکچی قصر اغنه تصادف ایتسمیله آت آنک اوزرینه صیچرادقده افندی دیزکننی طارتدینی کبی آت شاخالنوب یاننده اون اون بش چوقدار موجود ایکن ضبطی ممکن اولیوب آرقه سی اوستنه دوشدیکندن اکبرک اوک قاشی باتوب افندی مشارالیهی فنا حالدہ مجروح ایتمکین اول حالدہ خانه سنه کتوریلوب اول جرح جانکداز ایله سلخ رمضانده عازم شفا خانه بقا اولمشدر .

متوفای مشارالیه اسبق حکیم باشی متوفی اسعد افندینک دائره سنده پرورده اوله رق بیک یوز یتیمش اوچده طریق تدریسه داخل و سلطان مصطفی عصر نده مدت مدیده جراح باشلیق و بعده دور حمید خانیده حکیم باشلیق خدمت لر نده مستخدم و ایکی یوزده استانبول پایه سیله مکرم اولوب بعده بر مدت کلیبولیده و بر مدت طائفده منفیاً اقامت ایتدکن صکره ایکی یوز اوچده طائفدن اطلاق ایله ایکی یوز التیسه اناطولی و طقوزده روم ایلی قاضی عسکر لککریله نمنون اولمشیدی . یتیمش اوچ یاشنده ایکن بر وجه مشروح وفات ایتشدر . علم طبده مهارتی اولوب براز مائل عجب و پندار و زیاده طمعکار ایدی دیو نوری بک تاریخنده محرردر . العهده علی الراوی . اتفاقات غریبه دندرکه بشکطاشلی دانش محمد بک پدری اولان صفیه سلطان زاده اسماعیل بک بیک یوز الی بر سنه سی ذی القعدة سنک اوننجی چهارشنبه کونی ساعت اونده دنیاه کلش و اشبو ایکی یوز اون سنه سی ذی القعدة سنک اوننجی چهارشنبه کونی ساعت اونده وفات ایلمشدر .

عصر محمود خان ثانی رجالدن مشهور نامق افندی مجموعه سنده بعض مواد کاذبه نیک بیانی صره سنده « سلطانرک ارکک اولادی یاشادلاماز » دیو بین الناس مشهور اولان بر اعتقادک بطلاتنی اثبات سیاقده اشبو صفیه سلطان زاده بی دخی ایراد ایدوب دیرکه « معلوم دقیقه داندیرکه بر کلامی اول امرده مطالعه سیدیه به تطبیق ایلدکن صکره اعتماد و بعده محانده اقتضاسنه کوره ذکر و ایراد ایلمک لازم ایکن عوام ناسدن بر آلا ی خر لایفهم آستانه ده نیجه بی اصل و اساس حکایه لر نشر ایله خلق دخی صحته جزم ایدوب بو بایده عوام معفو ایسه ده احوال عالمه صاحب وقوف کچن ذوات دخی حکایات کاذبه مذکورنه وقوع و صحته اعتقاد ایدرک شمده حقیقت ماده بی افاده ایتمک لازم کلسه ایناندریق ممکن اوله مامق درجه لرینه وارمشدر . حکایات مذکورنه بری بودرکه مولویخانه قوسی خارچنده مدفون اولان کبار مشایخ سنبلیه دن شیخ مرکز مصلح الدین افندی حضر تلیری پادشاه عصرک کریمه سنی تزوجه طالب اولوب پادشاه دخی حسن مدافعه به وسیله اولمق ایچون قرق قطار آلتون طلب ایتمکله کیفیت شیخ مشار الیهک معلومی اولدقده ایوم مرکز افندی صومعه سی دیو زیارت اولنان صولی مغاره بی حفر ایله طوپراغنی قرق قطار قاطره یوکلدوب سرای هایونه کوندرمش و یوکله سرایده باقلدقده جمله سی آلتون اولمق اوزره بولتمش اولغله آندن صکره پادشاه عصر بوکرامتی مشاهده ایله کریمه سنی عقد و تزویج ایتشدر . انتهى

امیر سلطان بوروسه ده سلطان اورخانک کریمه سنی تزویج ایلدیکی تاریخ کتاب لر نده مصرح

اولوب لکن بوماده کرک کتب تواریخنده و کرک احوال اولیای رومی متکفل اولان شقایق و لمعات مثللو کتبه مسطور دکدر کرامت اولیا انکار اولماز مرکز افندی حضر تلی زماننده اهل الهدن شیخ کامل اولوب بو کرامت کندولرندن مستبعد اولماغله انجق واقع اولسه امیر سلطان مادهسی یازلدینی کبی بودخی تحریر اولنور ایدی بوماده نك کلیاً اصلی یوقدر . مواد کاذبه دن بری دخی اولدرکه شاهان عصرک کریمه لری وزیریه تزویج اولنهرق ارکک اولادی یاشاتیموب اعدام اولنور دیرلر قننی سلطانک ارکک اولادی اولوبده اولدیردیلر دیو سویلینه سؤال اولنسه ایشته سلطان مصطفی خان ثالث کریمه کیره سی شاه سلطانک مصطفی پاشادن متولد عالیه سلطان نامنده نشر اولنان ولدی ارکک واسمی علی ایدی سلطان حمید شرکت سلطنت خوفدن اعدام ایلدی « دیرلر حالبوکه بونک قطعاً اصلی اولمیوب سلطان مشارالها وضع حمل ایلدکده یاننده بولنان جواری بی کوروب سؤال ایلدیکمده ولد مذکورک قز اولوب آتی ماه قدر معمر اولدیغنی خبر ویردیلر بواعتقاد خلق بیننده شودرجه یه وارشددرکه حقیقت حالی افاده ایتسک کمنه ملزم اولمیوب اعتماد ایلمز و بوندن بویله سلطانلردن برولد ذکور تولد ایلسه عادت وقانون بودر دیو پادشاه عصره عقول قاصره اسحانی اول معصومی اهلاک ایتدیرلر . بوماده نك حقیقتی بودرکه اوائلده شرکت سلطنت خوفیه کرچه پادشاه عصر بولنانلر برادر و برادر زاده لرندن بعض شهزاده کافی بیکنه اعدام ایتدیرمشلردر . لکن سلطانلردن تولد ایدن ولد ذکور نه دعوی تخت و سلطنت ایتمش ونه اول خوفله پادشاهلر طرفدن اعدام اولمشدر . حتی صدر اسبق رستم پاشانک مهرماه سلطانن برقاچ نفر اولاد ذکوری اولوب معمر اولهرق بکر میشر اوتوزر یاشلرنده وفات ایلوب اسکدارده اولان جامع مشهور مشارالیه مدفونلردر . و صدر اسبق صوقلی شهید محمد پاشانک اسمیخان سلطانن متولد ابراهیم خان نام اوغلنک نسلی الی الان باقی و متسلسل اولوب پدری محمد پاشانک واقافه متولی اولمقددرلر . صدر اسبق جوان قپوچی باشی سیمین محمد پاشا دخی سلطان زاده در و سلطان مراد کریمه سی صفیه سلطانک حسین پاشادن متولد محمد بک نامنده براوغلی اولوب سکمان یاشنه قدر معمر اولهرق دولتده سپاه و سلحدار اغاسی و قپوجیلر کتخداسی و شق نانی اولوب صکره خاصلر ایله متقاعداً بشکطاشده حالا باقی اولان خانه سنده حتف انفه وفات ایدرک خانه سی جوارنده کائن خطیره ده موفوندر اول خانه ده الان میر مرحومک اوغلنک اوغلنک اوغلی اولهرق خواجکاندن دانش محمد بک ساکن اولوب صفیه سلطان زاده عنوانیه مذکوردر سلطان احمد خان ثالث کریمه لرنیک

زوجری اولان وزرا یانلرنده اولوب آنلردن اولادلری اولمش لکن حق تعالی
 حضر تری ذکور ویرمیوب بش آلتی نفر سلطان جمله سی قز طوغور مشلردر .
 آنلرده بر از زمان معمر اوله رق منقرض اولدیلر بعضیلرینک الیوم قز لری و اولغاری
 واردر الحاله هده موجود اولان سلاطین عظامدن هبه الله سلطاندن ماعداسنک
 زوجی اولمیوب آنک زوجی علاء الدین پاشا دخی منفور پادشاه عصر اولدیغندن
 اون بش سنه دنبرو آستانه یه کله میوب سیواسده متمکندر . اوتوز سنه دنبرو سلاطین
 عظامک اولادی اولماشدر . حاصلی ابتدای دولتدن تاسطان احمد ثالث عصرینه
 کلنجه ساطانلرک تولد ایدن ارکک اولادلری عمر لری اولدقجه معمر اولدیلر عصر
 مذکور دن صکره مطلقا ارکک اولادلری تولد ایتدی حالوبله در شمعی بو ایراد
 اولنان دلیلر تاریخردن نمایان ایکن کسنه اعتماد ایتمیوب « قانون سلطانلرک ارکک
 اولادی اولور ایسه اولدر تمکدر بونده معارضه لازم دکدر » دیر لر و الزام اولمازلر
 بونلره معادل ایکی یوزدن متجاوز مواد باطله سویلنور جمله سی بونلر کبی باطلدر .
 نامق افندینک کلامی بوراده ختام بولدی .

(وقایع سنه ۱۲۱۱)

سال جدید تاریخی اولمق اوزره سید عثمان سروری افندی (حق سلیم خانه هایون اید
 بوسال نوی) مصر عنی سویلمشدر . تاریخ انشادنده سروری افندینک اسلاف و اخلافه
 تفوقی معلومدر فی الاصل آده نلی اولوب مخلصی حزنی ایکن اوائل حالنده استانبوله
 ورودنده شیخ الاسلام اسبق توفیق افندینک دأر سنه کلوب مخلصی توفیق افندی
 سروری یه تبدیل ایلمشیدی سیادت پدرندن منتقل اولوب سید عثمان سروری
 ترکیبی بحساب امجد بیک اکیبوز اون بر اوله رق تاریخ لفظنک عدینه مطابق تصادف
 ایلدیکندن (مورخلک بکا داد حقدر) دیو افتخار ایلدیکنی فائق افندی توافقات
 غریبه صره سنده قید ایلمشدر . واشبو اون بر سنه سی دخولنده سروری افندی
 (بوسنه تاریخ سنه سیدر اوده بنم ییلمدر بوسنه میدان سخن بنمدر) دیدیکی دخی
 مرویدر . وفی الواقع بوسنه ایچنده پک کوزل تاریخلر سویلمشدر . دیوانه
 مراجعتله معلوم اولور . لکن تاریخ انشادی وادیسنده هر سنه میدان آنک اولوب
 بو یولده بالمله شعرا یه تفوقی مسلماتندر .

* عزل و نصب *

روم ایلی صدارتنک وقت تبدلی غره رجه وانا طولی صدارتنک وقت تبدلی غره
 محر مه مصادف اولمسیله سنه ماضیه رجه نده فحول علماء عصر دن اسبق صدر روم ایلی

تاتار جق عبدالله ملا افندی مکرراً روم ایلی قاضی عسکری اولدینی مثللو اشبو اون بر سنه سی محر می غره سنده دخی اعلم العلماء مفتی زاده سید محمد افندی هر تقدیر پیرفانی ایسه ده علم و فضله اکر اما اناطولی صدارتیه کتور لمشدر .

مفتی زاده افدینک اولوقت سنی یوزه قریب و کندوسی ذاتاً قید علایق نصب و عزلدن بعید بر ذات اولدینی حالده بوکره اناطولی صدارتیه کتور لمسی مجرد کندوسنک خواص تلامیذندن بولنان مشارالیه عبدالله افدینک الحاحنه مبنی ایدوکی و روم ایلی قاضی عسکر لری اوتهدنبرو اناطولی قاضی عسکر لرینه رسماً تقدم ایده کیشیکن عبدالله افندی بودفعه حق تعلیمه رعایه مفتی زاده افندی بی دائماً صاغ طرفه چکور ره رک کندوسنه تقدیم ایلدیکی مرویدر . خیلی وقتدنبرو دیوانده بویله ایکی ذات فضائل سمانک اجتماعی وقوع بولما مشیدی . رحمة الله علیهما .

آفرمان محافظی و قره سی سنجانی متصرفی میر میران عثمان پاشا غایت اختیار اولدیغندن غره محرمده رتبه سنک رفیعله درسعادت جوارنده دیلدیکی محله اقامت ایتک اوزره کمر کدن شهریه اوچ یوز غروش معاش تخصیص اولندی .

چلدر والیسی سلیمان پاشا زاده شریف پاشا مقدا چلدر ایالتک کندوسنه توجیهنده ضربخانه عامره یه تعهد ایلمش اولدینی مبالغی تسلیم ایتدیکنندن جوارنده کائن قبائل ایله حسن امتزاج ایلدیکنندن بشقه بالاده بیان اولدینی اوزره اغا محمد خانک تفلیس اوزرینه حر کتده اطرفنده اولان بعض رعایا چلدر حدودینه التجا ایلدیکننده حقلرنده اثر رحم و شفقت کوسترتمک مقتضای انسانیت و کندوسنجه وظیفه مأموریت ایکن رعایای مرقومه بی سبی واسترتقاق ایدوب بویسه خلاف رضای عالی بر حرکت اولدیغنه و تفلیس خانی اولان ارکلی خانی روسیه لولر حمایه ادعا سنده اولملریله بوماده بی دخی سر رسته قیل وقال ایدرک عزلی استدعایه ابتدار ایده جککری درکار اولوب روسیه لونک استدعای اوزرینه عزلی دخی مغایر شان دولت اوله جغنه مبنی واسط محرمده عزلیله چلدر ایالتی ارضروم والیسی یوسف ضیا پاشایه لاحقاً توجیه اولنوب انحق شریف پاشانک دخی بتون بتون بوشده براغلمسی تجویز اولمندیغندن اسماعیل محافظی میر میران محمد پاشانک اوزرنده بولنان آدنه ایالتی شریف پاشایه بالتوجیه محمد پاشایه دخی بر منصب توجیه اولنجه دک خزینه عامره دن اعطا اولنق اوزره ماهیه بیک التیوز یکرمی بش غروش معاش تخصیص قلندی . چند ماه مرورنده ارضروم والیسنک انهاسنه مبنی چلدر ایالتی شریف پاشانک دیوتی تأدییه ایتک شرطیه اخسحه خاندانندن و درگاه عالی قوجی باشیلرندن اسحق پاشا برادری محمد ثابت اغایه رتبه میر میرانی ایله توجیه ایلمش و بر مدت مرورنده ینه ضیا پاشانک انهاسی اوزرینه ثابت پاشایه رتبه وزارت ویرلمشدر .

اناپه محافظی وزیر سید مصطفی پاشا حسن اعتقاد صحابندن بزات اینک هر فصله
 بعده سیاست اعدام قلمش اولان بر مجذوب ذمی به اهل حالدن اولمق اعتقادیه فریفته
 اوله رق هر تکلیفه مامات ایتک و بیانی خدمتی اختیار ایلمک درجه لینه وارمش
 اولدیغندن بویه شان وزارت محل اوضاع عجیبانه دن فراغتی دفعات ایله نصیحت یولنده
 تنبیه اولنمش ایسه ده کار کر اولیوب ضروری عزلیله یرینه مقتدر بزاتک نصبه لزوم
 کور یه رک بعض ارباب شوری ایله لدی المذا کره میر میراندن کوتاهیه متسامی اولان
 ملک احمد پاشا زاده عثمان پاشا او قور یازار و مجرب الا طوار اولدیغنه مبنی بوایشه
 اهل کورلمش ایسه ده اول امرده بر کره در سعاده کتور یلوب و اطوار و کفتارینه
 باقیلورده صحیحاً الویره جکی اکلا شیلورسه اکا کوره مأموریتی اجرا اولمق اوزره
 در سعاده جلب و معاینه اولتوب اناپه محافظه سنه شایان کورلدیکنه مبنی ربیع الاولک
 طقوزنجی کونی عهده سنه رتبه وزارتله انقره سنجانی بروجه آرپه لقی تأییدا
 و قیصریه سنجانی دخی الحاقاً توجیه و سلفنه مخصوص اولان بدل خاص و سایر واردات
 اکا دخی تعیین و تخصیص ایله اناپه محافظه سنه مأمور قلمش . و بر کون اول دائره سنی
 تنظیم ایله محل مأموریتنه عزیمت ایده بیلمک اوزره خزینئه شاهانه دن یوز بیک
 غروش عطیه احسان و اولطرفده بولنان قبائله اعطا قلمق اوزره سابقلری مثللو
 تهپئه قنسان عطا یای سنیه کندوسنه تسلیم ایله اناپه جانبه ارسال اولنمشدر . نوری بک
 تاریخنده بومنوال اوزره محرر در .

اما هاشم افندی اورا قنده مندرج اولدیغنه نظراً فی الاصل ارضروم قریه لرندن
 تازه کل نام قریه اهالیسندن و سلطان محمد تمه لری طلبه سندن سید حافظ محمد نام یوباز
 سلطان محمد جامعی حولیسندده غلمان نزاعی ضمننده اوزرینه کلان یکچیریلری
 تارمار ایتک قیدنده ایکن بر قاچ نفرینی اهلاک ایدوب و کندوسنک دخی صاغ النک
 بر ایکی پرمانی مجروح اولوب فراره مجبور اولمش ایسه ده بوجنایتی اوزرینه روم ایلی
 و اناطولی طرفلرندن هر نره به کیتسه خلاصی ممکن اوله میه جغفی فکر و ملاحظه ایله
 بر ابازه سفینه سنه بنوب انسای راهده عادات قبائله دائر الدینی معلومات اقتضاسنیجه
 صوغوجغه واردیغنده ابادلر قبیله سنه دخیل دوشه رک قبائل خاخی ایله الفت و نسخه
 و یرمکه مباشرت ایدوب قبائل خاخی مرقومک نسخه سنی هر درده دوا و هر کونه
 یاره و بره یه بادیء شفا اولمق اوزره اعتقاد ایلد کلرندن بر او کوز و درت قویونه نسخه
 و یرمکه شروع ایله اول حوالیده خیلمیجه اشتهار و قبائلدن قز آلوب لسان و عادت لرینه
 کرکی کبی واقف اوله رق ایستدیککی وقت قبائلک بر چوغنی تحریکه اقتدار کسب
 ایلمشیدی . بوجهته وقت بوقت چر کستنده فتنه احداثیه بعض غوائل چیقار دقچه

فرح علی پاشا مرقومی گاه یانسه جب واحضار وکاه برایش ایله اشغال ایدرک فساده میدان ویرمز و چونکه اعدام ایلسه اباد قیله سنک اخر تلکی یعنی دخیلی اولدیغندن وقتیه بوده قربان اولور دیو آووده رق امرار وقت ایلر ایدی . فرح علی پاشانک وفاتندن صکره اشبو حافظ محمدله ترجمه حالی او اخر جلد رابعده بیان اولنان محمدبک شریک قتنه و فساد اوله رق حکومته قارشو حرکت ایلدکاری نقیب زاده مصطفی پاشانک معلومی اولدقده برر تقریبه ایکسینده کتوردوب اعدام ایتمکله بونلرک طرفدارلری در علیه یه کله رک سادات کرامدن شو یله بر ذاتی مصطفی پاشانک خدمتده اولان بر ذمی بلا بیورلدی قتل و اعدام ایلدی اتباعنک ضبطنه قادر اولمیان ذات قبانه نیجه حاکم اوله بیلور دیهرک دولتی تصدیع ایتملری اوزرینه مصطفی پاشانک رتبه سی رفعه استانکوی جزیره سنه نفی اولندی . مقدا آفد کرده بونجه فوجاتی و مؤخرآ اناپهده بر قاچ سنه خمیازه روزکاره تحملی کارکر اولدی دیو مصطفی پاشانک کیفیت عزانی هاشم افندی بوسیاق اوزره بیان ایتمکدن صکره عثمان پاشانک نصی بختده دخی سابق قوجه ایلی سنجاعی متصرفی عثمان پاشانک رجال دولت علیه دن بعضیلرینه تردد و انتسابی اولمغله سوق اولنوب در علیه یه احضار ورتبه وزارت احسانیه اناپه یه محافظ نصب و تعیین بیوریلوب مقدا فرح علی پاشا زماننده بنا و نزول امینی اولان سر بو ایندن شاطر حسین اغانک رسم مملکت معلومی اولدیغندن تسهیل اموری ایچون بافرمان عالی کتخدا نصب و تعیین و بالمعیه ارسال اولمش ایسه ده محل مرقومه وصولنده عثمان پاشانک توابعاتی اناپهده کسب منافع ایده ماملرینی حسین اغانک تکاسل و مساحه سنه حمل ایتمک لرینه مبنی امتزاج ایده میوب حسین اغا مازوناً در علیه یه عودت ایتمش ایکن آرقه سندن عثمان پاشانک تحریری اوزرینه لاجل التأدیب سینوبه نفی اولنوب چندماه صکره اطلاق اولندی دیو تحریر ایدر هر نه ایسه اناپه محافظانی بتون چر کسستانک والیلکی دیمک اولدیغنه نظر آپک مهم بر مأموریت اولدیغنی حالده فرح علی پاشادن صکره اوراده بروجه مطلوب براداره حسنه وجوده کتور یله ماش اولدیغنه احوال مشروحه دخی دلالت ایلر .

بالاده بیان اولدیغنی وجهله رئیس الکتاب راتب افندی منصبنک اهلی بر ذات معارف سمات اولدیغنی حالده قرنا ی شهر یاریدن اولان بعض متفندان عصرک خلاف مرضیلری اوله رق ریاسته کلش ایدو کندن بر طاقم عزویات و مقتریات ایله حقتده طبع همایونی مغبر ایتملریله صفرک اون دردنجی چهارشنبه کونی عزل ایله یرینه سابقاً دفتر امینی مصطفی راسخ افندی رئیس الکتاب نصب اولنوب آنک اوزرنده بولنان ایالات نظارتی دخی رئیس الکتاب اسبق فردوسی افندی یه حاله وینه یوم مرقومه

دیوان هایون ترجمانی قسطنطین بگزاده یورغا کی بک دخی عزل ایله یرینه ایسلاقی
 علسکساندر زاده قسطنطین بک دیوان هایون ترجمانی تعیین قلندی .

راتب افندی حقنده خصامسی یالکز عزلیله قناعت ایده میوب سمع هایونه بعض
 اراجیف القا ایله بر مرتبه دها غضب سلیم خانی تشدید ایتلریله او اصر صرفده
 ردوس جزیره سنه نفی اولدینی کبی یورغا کی دخی قبرس جزیره سنه و راتب
 افدینک دأره سنه متردد اولنردن مدرسیندن امامیه لی هاشم افندی لیمینی به وساحدار
 قلمی باش خلیقه سی مستان افندی خانیه به نفی اولندی .

ویورغا کینک بیوک قونداشی اولوب برمدت نبرو افلاق ویوده سی بولنان علسکساندری
 دخی عزل ایله یرینه برمدت افلاق و بغداد ویوده ده لقرنده مستخدم اولوب ایوم
 در سعادتده مقیم بولنان و حالا دیوان هایون ترجمانی سالف الذکر قسطنطین بکک
 باباسی اولان ایسلاقی علسکساندری بتکرار افلاق ویوده سی نصب و تعیین ایدلدی .
 افلاق و بغداد ویوده دلرینک حین نصبرنده دیوان هایوننده قوقه و خلعت الباسی
 رسوم مرعیه دن اولسلیله همان برآی صکره جه ترتیب دیوان اولنهرق رسم تشریفات
 اوزره ایسلاقی حضور هایونه دخول ایله مظهر التفات اولمشدر .

عبدالله بری افندی مقدا همشیره پادشاهی بکخان سلطانک کتخداسی اولوب بالاده
 بیان اولدینی اوزره دولت کتخدالغندن عزلنده سلطان سرانجه اولان معاملاتنک
 حسابنه دخی ابتدار اولمش و کچن شوال توجیه اتند عهده سنه توقیعی منصبی توجیه
 قلمش ایدی محاسبه نک نتیجه سنده سلطانک واردات معینه سندن بری افندی ذمتنه
 بر مقدار شی کچمش اولدینی تبیین ایتمکله اغبرار شاهانه یی موجب اولهرق بوکرده
 هم مبلغ مزبوره استرداد و همده ربیع الاولده بروسه یه نفی و ابعاد اولنهرق
 اوزرنده بولنان توقیعی منصبی دفتر دار سابق شریجی زاده دامادی امین افندی به
 توجیه اولمش ایسه ده بری افندی اجله ر جالک قدما سندن و فضل و حیثیت احجابندن
 امکدار بر ذات اولسلیله چند ماه مرورنده عنفو و اطلاق ایله در سعادتده کتور لمشدر .

دول اوروپانک در سعادتده بر رایلیچیلری بولدینی کبی طرف دولت علیه دن دخی
 مناسب اولان دولتیر نزدیکه بر رایلیچی ارسال ایله اوچ سنه مدت اقامت ایتمک
 و بعده یرینه دیکری کوندر ملک خصوصی قرار کیر اولهرق ابتدا انکلتیره جانبنه
 آگاه افندی کوندر لمشیدی کچن ایکیوز طقوز سنه سی او اصر نده دخی سابقا
 کتخدا کاتبی اولان ابراهیم عقیف افندی نمچه طرفنه و خواجکان دیوان هایونندن
 سابقا کیسه دار دفتری علی افندی پروسیا جانبنه بیوک ایلیچیلک ایله مامور اولمشدر
 ایدی در سعادتده مقیم فرانسه ایلیچیلیسی ایسه آراق آراق فرانسه دولتی دول

سأرمدن زیاده دولت علیه دوست و خیرخواه اولدینی افاده سیله جمله دن اقدم فرانسه یه ایلیچی کوندرلمسینی اخطارواستعدادن خالی اولمیوب آنجق فرانسه طرفدن دولت علیه یه بیوک ایلیچیک رتبه سیله برینک ورودی مصمم اولدیغدن کیفیت آنک ورودینه تعلیق اولنه رق بوجهتله عقیف و علی افندیلرک عزیمتلمری دخی تاخیر اولتمشیدی بوانئاده فرانسه فوق العاده بیوک ایلیچسی حدود عثمانیه داخل اولوب در سعادته کتورمک اوزره مهماندار تعین اولتمش ایدوکندن طرف دولت علیه دن دخی پارسه بر ایلیچینک تعین وارسانی لازم کلکله خلال ربیع الاولده علی افندی بیوک ایلیچیک ایله فرانسه یه مأمور اولوب آنک یرینه دخی عرب به جیلر کاتبی نائلی افندی برلین سفارتنه مأمور قلندی فقط نائلی افندی مراقی بر آدم اولدیغدن سفارته مراقی مشتمد اولمق احتمالی در پیش اولنه رق مؤخرآ آندن صرف نظرله مقدا بلغرادده املاک فروخته مأمور اولان علی عزیز افندی آنک یرینه برلین سفیری نصب اولتمشدر .

و آکاه افندی ن معین اولان اوچ سنه مدتی بوسنه ختام بولدیغدن یرینه خلال ربیع الآخرده ترسانه عامره انبارلری امینی اولان تألیفات صاحبی مشهور اسماعیل فرخ افندی خواجهک رتبه سی و سواری مقابله جیلکی پایه سی ایله لوندره سفارتنه مأمور بیورلدی .

درکاه عالی قوچی باشیلرندن اولوب مقدا رقه متسلمی نصب اولنان دیار بکرلی شیخزاده سید ابراهیم اغا محل مأموریتنه واردقده مورانی عبدی بک نام کیمسه ده میللو تیمورک و دیعه سی اولمق اوزره اوتوز بر بیک بو قدر یوز کیسه کسور غر و شلق آلتون ایله بعض اشیا سی ظاهره اخراج ایتمش اولدیغنی در سعادته عرض ایله برابر رقه نیک متسلمک ایله ضبط و ربطی قابل اوله میوب بهر حال کلیتلو عسکر و مکمل دائره یه توقف ایتمدیکی بیانیله رتبه وزارت استعدا ایلدیکندن و ذاتاً خدمات دولته محرب بولندیغدن بوانئاده عهده سنه بارتبه وزارت رقه ایالتی توجیه بیورلدی .

* وقوعات متنوعه *

بش التی سنه دنبرو و دینه واغستوس و قره فریه حوالیسندگشت و گذارور عایاه ایصال خسار ایده کلان اوچ یوزدن متجاوز اشقیما اوزرینه بر طرفدن سالنیک و الیسی و بر طرفدن یانه سنجاغی متصرفی میرمیران تپه دنلی علی پاشا سوق عسکر ایدرک جمعیتلری تفریق و بر خیلی سرکرده و عونته لری اعدام اولتمش اولدینی خبری او اخر محرمده در سعادته واصل اولدی .

وینه بوآناده روم ایلی والیسی حتی پاشا معیتنه مأمور قوجه ایلی متصرفی حسین پاشا طاغلی اشقیاسی سرکرده لرندن سناب نام شقی اوزرینه حرکت ایله فلهده اقامت ایتدیکی ائنده سناب متحصن اولدینی قله سندن بالقانه فرار ایتمش اولمسيله اوراده باصدیر یله رق یکریمی قدر عونیه سیه برابر اعدام اولمغله سر مقطوع لر ی اواخر محرمدہ در سعادتہ کلدی .

بو کره قپودان پاشا لینی جزیره سنه وصولنده اعیانی عبد الکریم اغادن رعایای شکیات ایتمکله در حال مر قومی ردوس جزیره سنه نفی ایدوب انجق جانب میری یه بر قاج یوز کیسه خدمت ایتمک و فیابعد خلاف رضا حرکت ایتامک اوزره عفوی بعض طرفدارانی رجا ایتدکرینه مبنی قپودان پاشا دخی جانب میری یه ایکیوز یکریمی کیسه آچه و یرمک اوزره عفوی باب عالی یه عرض ایتمشیدی . کیفیت سلطان سلیمدن استیدان اولندقدہ بومقولدر اطلاق اولندقلری کبی حرکات سابقه لرنده اصرار ایدر لر آچه ایله عفولری جائز دکدر دیو کرک کندوسنک و کرک آنکله هم حال اولان برادری یوسفک اعداملرینی امر ایتمکله اواخر صفرده ایکیسنک دخی سر مقطوع لر ی در سعادتہ وصول بولدی .

بو او انده قپودان پاشانک مدلولو جزیره سنه اقامتی ائنده قورصان تکنه لر ی قپودان لرندن ایجه محمد و بکر چاوش ائسای کشت و کذار لر نده کرید جزیره سی آچیلر نده یکریمی اتی پاره طوپ چکر اوتوز بش ذراع بر قطعه مالطیز شهتیه سنه بالتصادف سکنر ساعت قدر محاربه دن صکره شهتیه یی اخذ و تسخیر ایتدیلر . دروننده اوتوز ایکی نفر ذکور و ایکی نفر عرب خاتونی اوله رق اوتوز درت نفر اسرای اسلامیة وطلسان بر نفر مالطیز ظهور ایتمشیدی .

بعده مومی الیهما ینه قورصان تجسس سیه درنه صولر نده کزر کن پورطه طمرق نام محله یه اون سکنر قطعه طوپ چکر بر قطعه قورصان تکنه سنه راست کلوب بالحاربه آنی دخی اخذ و گرفت ایلدیلر . بونک دروننده دخی ایکی نفر قوالیر سرکرده لر ی ایله یوزاون بر نفر مالطیزلو بولندقدن بشقه اون اتی نفوس ذکور و ایکی نفر قاری اوله رق اون سکنر نفر اهل اسلام اسپر لر ی ظهور ایتدی .

ماه شوالک یکر منجی جمعه کیجه سی عزب قپوسی داخلنده حریق ظهور ایله یدی ساعت قدر ممتد و اطفا سنه سی ایدن ضابطان و نفر اتدن محضر اغا و سائر اوتوز قرق قدر نفر مجروح اولمشدر .

مقدما فسخ اولنان التمش اوچ یچق ذراع اوچ انبارلو قالیوندن دها بیوک اولمق اوزره ترسانه عامر ده بر قالیون انشاسنی سلطان سلیم خان اراده ایتمکله ایکیوز طقوز

سنه سی ربیع الاولک یکر می او چنجی کونی التمش یدی زراع الی قانه اوله رق برقطعه اوچ انبارلو قالیون و اون سنه سی ربیع الآخرینک اون بشنجی کونی دخی الی اوچ بچق ذراع برقطعه فرقتین واشبو اون برسنه سی ربیع الآخری غره سنده او توز درت ذراع شهتیه تعبیر اولنور برقطعه قروت و بونردن بشقه ذات شاهانه ایچون برقطعه فلکه انشالزینه مباشرت اولنوب اشبو اوچ قطعه سفینه ایله مذکور فلکه بردن ختام بولغله شعبانک یکر می دردنجی صالی کونی صدر اعظم و شیخ الاسلام و سائر حضوری معتاد اولنر علی الصباح ترسانه یه کیدوب و بعده سلطان سلیم خان دخی تهینه قنان قالیون هایونی تشریف ایدوب اختیار اولنان وقت مختار حولنده ابتدا اوچ انبارلو و بعده سائر لری دریاه ایندی رلمشدر.

قالیون نزولنده یالکز صدر اعظم و شیخ الاسلام ایله قودان پاتایه حضور هایونده کورک الباسی عادت ایکن شمعی یه قدر ترسانه ده بویله اوچ کینک بردن دریاه نزولی مشهود اولماسیله و سنه ماضیه توجیهاتنده ترسانه امینی اولان رئیس الکتاب اسبق راشد افدینک بوبابده اقدام مخصوصی سبقت ایلمش اولسیله بوکره مشارالیه ایله برابر اکا دخی حضور هایونده کورک الباسیله التفات بیورلمشدر .

اوچ انبارلینک نزولنه خواجه منیب افندی (صویه ایندی اوچ انبارلی سلیمیه سلامتله) مصرعی سویلمش و پیشوای مؤرخین سروری افندی (ایلدی اقبال اوچ انبارلی یه اتلر کبی) و (صاندق کیم اوچدی قوش کبی ایندی اوچ انبارلی یه) و (اوچ انبارلی یاپوب ایندی بوردی بجره مالک البحرین) و (اوچ آیلرده میسر قیلدی حق ایندی اوچ انبارلی) مصرعلرنی هربری بر تاریخ نام اولوق اوزره انشاد ایلمشدر . وینه سروری افندی اوچ کینک بردن نزولنه تاریخ اولوق اوزره (اوچ کمی ایندی برکونده هممله شه سلیم) مصرعی و فلکه هایون ایچون (اویدی صودیبا سنه بندل زینت رسان) تاریخی انشاد ایلدی کبی عینی افندی دخی (اوچ آیلر یوم صالی ساعت اوچده ایندی بو اوچ فلک) مصرعی تاریخ اوله رق سویلمشدر . فائق افندی مجموعه سنده خلفای عباسیه دن معتصم خلیفه سکرز آی سکرز کون مدته دنیایه کلوب سکرزنجی خلیفه اوله رق سکرز سنه خلافت ایدوب نقش خاتمی دخی سکرز حرفدن عبارت اولان (الحمد لله) لفظ شریفی اولدینی و قوسنده سکرز ملک طوروب سکرز ملکه قهر ایتمش و سکرز ارک و سکرز قز اولادی اولمش و سکرز شهر فتح ایلمش و سکرز کوشک بنا قیلمش ایدوکی جهتلرله کندوسنه خلیفه مثنی دیرلر دیو بیان ایتدی کبی سلطان احمد ثالث اوغلی سلطان مصطفای ثالث اوغلی سلطان سلیم ثالث ایکیموز اوچ سنه سنده جلوس ایدوب اوچنجی قودان

پاشای اولان کوچک حسین پاشانک قیودانلغنده اوچ آیلردن ماه شعبانده واقع یوم نئثاده ساعت اوچده اوچ کینک بردن نزولنی دخی توافقات غریبه صره سنده قید ایلمشدر .

اقدمجه ممالک محروسه یه کلش اولان نمچه جانبازلری ازمیره کیدوب رمضانک اون دردنخی کونی کولر کو پریمی نام محاکم قربنده اجرای صنعت جانبازی ایتلملیه اجناس ملل مختلفه دن تجمع ایدن سیرجیلر ایچنده وندیکه تابع زانطه جزیره سی اهالیسندن موجود اولان سکیز اون قدر اشقیانک بی ادبانه حرکتلرینه مبنی وندیک یساقجیلرندن بری اشبو زانطه لوردن برینه بردکنک ضربیه دفع ایلدکده مرقوملر یکریمی اوتوز قدر اوله رق مسلحاً تکرار محل مزبوره کله رک یساقچی بی ضرب و قتل ایدوب قاتلی دخی اله ویرمدکاری و بوتقریبه نزاع و قتال ظهور ایدرک اهل اسلام و رعایان بر از نفوس مجروح و مقتول اولدینی و وندکلورک ساکن اولدینی ساقز خاننده حریق و قوعوبولوب عظیم فساد و اختلال ظهورینه مبنی کمنه آتشک اطفا سنه باقه مدینی جهتله اون سکیز ساعت تمتد اولوب خیلی اموال و اشیا دخی یغما و غارت قلندینی و ازمیر لیماننده بولنان سفینه لردن ایچنده اموال منهوبه بولنانلر چیقوب کیده جک اولدقلرنده یکی قلعه دن مررلرینه رخصت ویرلماش ایدوکی ازمیردن تحریر و اشعار اولنسی اوزرینه ایدین محصلی قره عثمان اوغلی حسین اغانک مقدار کفایه عسکر استصحبایله ازمیره کللی ایچون امر عالی تحریر و در سعادتدن مخصوص مباشرلر تعیین و تسیر اوله رق قاتاک وندیک قونسلوسندن طلب و اخذ ایله مجازاتنک اجرایی و بو فتنه نک ایقاعنه سبب و محرک اولنلرک بای حال اله کتورلمسی و لیمانده بولنان سفینه لر بالتوقیف دروننده کی اموال مغصوبه و منهوبه نک بالتمام ظاهره اخراجیله احبابنه رد و تسلیم قانمسی امر و اشعار بیورلمش و چونکه اوتهدنبرو خرواتلر ایله وندکلو به تابع آطه لر اهالیسی استانبولده و سائر سواحله آرالق آرالق بی ادبانه وضع و حرکتدن خالی اولدقلرینه مبنی فیما بعد وندکلو به تابع خرواتلر ایله جزائر یونانیه اهالیسنک ممالک محروسه یه اوغرادلاملری ایچون فرمان عالی صادر اوله رق بوکا دائر در سعادتده مقیم سفرایه تقاریر رسمیه ویرلمشدر . صورتی زیدده (۱۲) رقیله ایراد اولنور .

او اخر ذی الحجده اسکدارده آچیق تر به محله سنده حریق و قوعه کلوب روزکار دخی شدتلی اولدیغندن یدی ساعت قدر تمتد و پک چوق خانه و دکانلر محترق اولمشدر .

* بعض نظامات و اصلاحات *

اشبو اون برسنه سی خلالنده یابلمش اولان نظاماتدن بری اقلامک صک و سبکی

و کیفیت قیودی حقنده و یریلان نظامدرکه بعض مزورین درلو حیل و دسائس ایله اصدار ایتدیردکلری اوامر علیه ده کندو استدعالری اوزره یازلمش اولان بعض تعبیراتی سر رشته ایدرک خلقی اضرار ایده کلدکلرندن فیما بعد بومقوله تزویرانه میدان و یرلامک اوزره یازیله جق اوامر علیه نک تنقیح و تصحیح مسوداتنه دقت و اعتنا و اصول و نظام و قانونه توفیق اولمق و خارج از اصول و نظام اوله رق و لوکه حکایه طریقیله اولسون برشی درج اولنماق و دیوان هایوندن یازیله جق اوامر بشقه قامده یازلامق و دفترخاقانی یه مغایر اولان حجج و اعلانات اقلامه قید اولنماق و اقلامه قید دوشورلمسی لازم کلان مواد حقنده صراحةً فرمان عالی اولمدجه قید دوشورلامک کبی قیود احترازیه درجیله اقلامک معاملاتنی تحت انتظامه الئمشدر .

وینه بوسنه موقع اجرا یه قونیلان مواد نظامیه دن بری دخی قهوه نظامیدرکه بین النار استعمالی عادت لازمه حکمنه کیرمش اولان قهوه یه بعض حبوبات خاطر ایله سحق اولندیغندن فیما بعد خالص اوله رق سحق اولنمی امر اولنوب انحق تخميصخانه نک غیر از مصارف واردات صافیه سی مقاطعه سی بدله وافی اولمدیغنی خالده بعضاً دخی التزامه و یریلوب ملتزم لر ایسه جر منفعلری ایچون هر درلو فنالقلری ارتکاب ایده کلدکلرندن فیما بعد تخميصخانه التزامه و یرلمیه رک امانه اداره اولمق و خالص قهوه سحق ایتدیرلمک اوزه برقیه قهوه دن آله کلان درت آچه رسمک اوزرینه ایکی آچه دخی ضم ایله الی یه ابلاغ اولئمشدر .

غریبدرکه بروقت دولت علیه ده قهوه و چبوق ایچنلر اعدامه مستحق ایکن بودورده واردات جدیده حصوله کلک ایچون هر درلو فضل و مذمته محل اولان قهوه خانه لرده صرف اولنه جق قهوه نک خالص اوله رق سحقی دولتجه نظامه ربط اولئمشدر . سبحان محول الحول و الاحوال .

بر وقتدنبرو خلاف شرط واقف اوله رق نیجه و وظائف احداث اولندیغندن و متولیلردن بعضیلری کندو متعلقات و طرفدارلرینه کندو تذکره لر یله مجدداً فودله ترتیب ایلدکلرندن او قافک مصارفنی تراید ایدرک مدیون و خراب اولدیغنه مبنی بوکره فیما بعد خط هایون صادر اولمدجه محدث وظیفه توجیهندن و متولی تذکره سیله فودله اعطاسندن حذر و مجانبت اولنمی امر و فرمان و خلافنده حرکت ایدرک شدیداً مظهر جزا اوله جقلری اعلان اولئمشدر .

وینه بو ائنده خبره جی او جانغی قانوننامه سنک بعض موادی شرح و ایضاح اولنه رق قانوننامه مذکوره ذیل اولمق اوزره بر نظامنامه قلمه آنوب دروننده متزوج بولنان یا خود متزوج حکمنده متأهل یعنی ولایتنده و راتی کندویه عائد یقین اقرباسی

موجود اولان تیمارلو نفراتک وقت حضرده بالناوبه مملکتلرینه کیتمک اوزره
 رخصت ویریه جککرینک مع صییان ثلثانه ابلاغی جائز اوله رق برثلثک دائماً
 درسعادتده موجود اولملری وبومناوبه اصولی وقت حضرده مخصوص اولوب ایام
 سفرده بالمله توانا اولنلرک موجود ومهیا بولملری وعلی الدوام خبره جیلر فن
 وصنعتلرینک نظریات و عملیاتی تعلیم وتحصیل ایله مشغول اوله رق هر سنه روز
 حضر وقاسمده معاینه وامتحانلری بالاجرا فننده مهارتی ظاهر اولنلرک دفتری صدر
 اعظمه تقدیم ایله باش محاسبیه ودفترخانه یه قید اولنمسی تحریر وصورت تعلیم وتعلملری
 وسفری حرکتلری ومحولاتک معاملاتی حقیقده بعض تفصیلات درج وتسطیر
 اوله رق اوائل رمضانده ایجاب ایدن محله ره علم وخبرلر اعطا اولنمش وینه اولتاریخده
 وعینیه اول سیاقده لغمجیلر ایچون دخی برقطعه ذیل قانوننامه تنظیم قلمشدر .
 دارالسعاده آغالرینک تحت نظارتلرنده بولنان حرمین خزینه سنک معاملاتی نقد
 صورتنده ایکن بر وقتدنبرو مأمورینک تکاسل ورخاوتلرینه مبنی مدار تسهیل
 امور اولوق اوزره مقاطعات اموالی اوقاف متولیلرینه حواله ایدوب وظائف
 مرتزقه بی اداده تکاسل ایدن متولیلر ایسه مؤاخذه اولندقلرنده بکا مال دیو
 وپردکاری شو آقچه بی تحصیل ایده مدم دیو تعلق ایده کدکارینه ومحولات
 خصوصنده دقت ونظامه رعایت اولنمدیغندن معجلات حاصلاتی بتون بتون ضایع
 اوله مرتبه سنه وارمش اولدیغنه مبنی ماه بماه وظایف معینه سنی آلمغه مألوف اولان
 واکثریا فقرا وعجزه دن بولنان مرتزقه گروهی کیمی اوچ وکیمی بش آبلق
 وظیفه لرین آله میوب کرات ومرات ایله رکاب شاهانه یه عرضحال تقدیمیه بث شکوی
 ایتدکارندن بشقه عمارتلرده طبخ اولنان شوربا وزرده وپلاو اکل اولنماز مرتبه یه
 کیش اولدیغی مسموع شاهانه اولدیغندن حرمین خزینه سنک محاسبه سی رؤیت
 اولندقدنصکره نظامه ربط اولنمسی ایچون اقدمجه اراده سنیه صادر اولوب
 بوخصوصه رئیس الکتاب اسبق فردوسی افندی مأمور قلمش اولمسيله واردات
 ومصارفات دفتلرینی یکان یکان رؤیت و بیک ایکیموز برسنه سندن بدأ ایله حسابلرینی
 تدقیق ایتدکده ایکیموز اون سنه سنده غیر ازتحصیلات مال حرمین ایله غیر از ممتعات
 سنین گذشته بقایالری جمعا ایکی بیک یدی یوز اوتوز طقوز کیسه درتیوز یتمش
 غروش اولوب تقاسیط اوقافه وصره شریفه ومصارف معتاده وسائر مطلوباته ویریه جک
 دیون دخی بیک طقوز یوز برکیسه بوقدر غروش بالغ اوله رق مبالغه مرقومه دن لدی
 التنزیل سکز یوز اوتوز سکز کیسه بوقدر غروش فضله قالمق لازم کدیکی حاوی
 برقطعه دفتر تقدیم ایتدکدن بشقه حرمین خزینه سنک برسنه لک واردات مقرره سیله

غیر از تعمیرات و ظهورات مصارف معتاده سنک بروجه مقایسه برقطعه موازنه
دفترینی دخی تنظیم ایشمدرکه صورتی زیرده (۱۳) رقیله ایراد اولنور .
مطالعه سندن معلوم اوله جنی وجهله حرمین خزینه سنک برسنه لك مصارفی واردات
معینه سندن تزیل اولندقدہ سنوی قرق سکنز بیک درت یوز الی یدی
غروش فضله سی کورینور .

قالدیکه حرمینہ تابع اولان مسقفاتک محلولاتی واردات جسیمه دن ایکن لایقیله
دقت و تحری اولندیغدن متولی وکاتب و جانی بینلرنده تقسیم اولنه کلدیکی جهتله
اون سنه ظرفنده محلولاتدن اون یدی بیک غروش واردات ظهور ایشمیدی .
بناءً علی ذلک محلولاتک کیفیت مزایده سی و وارداتک صورت محافظه سی ایچون
شروط و قیود لازمه درجیله اوقاف حرمین حقنده نظامات مخصوصه ترتیب قلمشدر .
بعده عمارت فودله لرینک تحقیقاتنه کیریشیلوب هپ عمارتلرده سیان اوله رق خاص
دقیقندن فودله طبخ اولنمی خصوصی دخی مؤخرأ نظامه ربط اولنمشدر .

* وقایع روم ایلی *

بو خالده اسکندریه یعنی اشقودره متصرفی قره محمود پاشانک قره طاغده مقتولاً
وفات ایلمش اولدینی خبری آنمغله بروجه آتی اجمالاً ترجمه حالی بیان اولنور .
مشارالیه قره محمود پاشا اشقودره لی محمد پاشانک اوغلی اولوب بیک یوز طقسان
اوچ تاریخنده باباسی محلولندن اشقودره سنجانجی رتبه میرمیرانی ایله عهده سنه توجیه
بیورلمش ایدی . اشقودره سنجانجی ارناودلغک قسم اعظمی اولان کغله لگ مبدئ
اولوب محمود پاشا دخی غایت جسور و جنکاور و اعمال عساکر امرنده مثلی ادر
بر ذات اولدیغندن بتون کغله نی امرینه رام ایتدکن بشقه تپه دللی علی پاشا
واو خریلی احمد پاشا کبی نامدار ذاتاری کندوسنه طرفدار ایدرک اطرافنده امرینه
مخالفت ایدنلری دخی سوق عسکر ایله قهر و تدهیر ایدر ایدی . بو جهتله اکثریا
بو سنه والیرلی ایله او بوشه میوب آره صره غوغا چیقاریر ایدی حتی بر آراق
پودغوریچه و اشبوزی قاعه لرینی تضییق ایتسندن ناشی مؤاخذیه مستحق کورلمش
ایکن غازی حسن پاشانک شفاعتیه فیابعد بو قاعه لره تعرض ایتماک شرطیله طقسان
طقوز سنه سننده اشقودره سنجانجی ینه عهده سننده ایقا اولمش ایدی . لکن
پودغوریچه و اشبوزی اهالیسی بوشناق قومندن اولدقلمی جهتله بوسنه ایالته ملحق
بولنمشلر ایسه ده اشقودره یه بک یقین یرده و قره طاغک اشقودره جهتنده
بولندقلرندن اشقودره یه الحاق لرینی محمود پاشا حل و موقع ایجابندن عد ایدرک تکرار

اشقودردن خروج ایله بو ایکی قلعه‌ی ضبط و تسخیر ایتدکن بشقه کدک بوسنه ایالتی مضافاندن اولان قره طاغ رعایای اوزرینه حرکت و تأدیبلرینه مبادرت ایتدکن صکره دولت علیه ایله صلح اوزره بولنان و ندیک دولتک بعض ممالکنی یغما و غارت عقبنده ایلبصان و کوریجه و اوخری حوالیسنی کشت و کذار و ذخیره و سائر مطالبه‌سیله اهالی بی ازعاج و اضرار ایلمسی حقنده موجب مؤاخذه و مسؤلیت اولوب اگرچه بو مقوله حرکاتی درسعادته بعض طرفدارانی تاویل ایله عفو ایتدرمک ایستلردی لکن اسما سلطانک اول حوالیده برخیلی مقاطعه‌لری اولوب اولوقتک حکمنجه مقاطعات حاصلاتی محلی مأمورلرینک احباب مقاطعاته مدهانه‌لری درجه‌سنه کوره تزاید و ترقی ایتدیرلمکده اولدینگی حالد اشقودردنک اطرافی هپ سنکستان و اهالیسی جنکجو و وحشی اولمغین سائر سنجاقلرده اولدینگی کبی بورالرده اوامر حکومت سهولت ایله جریان ایده مدیکندن اولوقت اسما سلطانک دائره‌سنده تنفذ ایدن بعض اشخاص اشقودره حوادثی دائماً اعظام و بوجهته سلطان عبدالحمیدی اغضاب ایدرک محمود پاشانک طرفدارلری دخی لهنده برشی دیمکه جسارت ایده مز اولدق‌لرینه مبنی محمود پاشا ایله اکا طرفدار اولان تپه دنلی علی پاشا و اوخریلی احمد پاشانک توغ و سنجاقلری رفع ایله ترتیب جزالری حقننده فرمان عالی اصدار ایتدیرلمش ایکن اول ائنده صدر اعظم علی پاشا عزل ایله یرینه قوجه یوسف پاشا صدر اعظم اولدقده محمود پاشا حرکات واقعه‌سندن اعتذار ایله استغای قصور ایلدیکنه مبنی ایکی یوز سنه‌سنده اوچی دخی عفو بیورلمش ایدی . بعده سفر اماره‌لری بلورمکه باشلایوب بو مناسبتله روم ایلی و ایسی عبدی پاشانک بلغراد جانبته ارسال اولدینگی محمود پاشا فرصت آخاذا ایله اسکوب سنجانگی قضالرینه و مناسره قریب نواحی‌یه و بوسنده واقع نقشیک و پره‌پول سمترینه بلوک باشیلر ارسال برله بورالرک اموال میریه‌سنی نفسنه تخصیص ایتدیکندن ایکی یوز بر سنه‌سنده تکرار ازاله‌سی حقننده فرمان عالی صادر اوله‌رق اوزرینه آیدوسلی محمد پاشا مأمور اولوب بوکره تپه دنلی علی پاشا تراله سنجانگی متصرفی بولنه‌رق محمود پاشان تفریق ایله او دخی محمد پاشا معیتته مأمور قلنمش ایدی . متعاقباً روسیه سفری اعلان اولمغین دولت علیه‌نک اشقودره غائله‌سیله اوغراشمغه وقتی قالمش ایکن برکره باشلانمش بولندیغندن درحال دفع غائله‌سی خصوصنه مسارعت اولندیسده آیدوسلی محمد پاشا فنا حالد منهزم اولدینگی ائنده اسما سلطان دخی وفات ایدرک محمود پاشا علیهنده بولنان آدلری دوچار اشکنجه اولوب بو ائنده نیچه دولتی دخی روسیه‌لو ایله بالاتحاد دولت علیه‌هنه اعلان حرب ایلمش اولدیغنه ووندکلو

هر نقدر دولت علیه دوستلق اظهارنده ایسه ده ینه اول طرفه دخی احتیاطکارانه حرکت اولتمق لازمه خالدن بولندیغنه نظراً اول حوالیده مدافعه خصمه مقتدر برینک بولتمسی لزومی کورنمکله بلغراد جانبی سرعسکری عبدی پاشا واسطه سیله اولنان تلمیح اوزرینه محمود پاشا استدعای عفو ابتهار ایدوب حالبوکه اولجه نمچه جنرالرندن بری وندیك رعایاسندن عسکر جمع ایدرک وقره طاغ وپیری وپالوپا ولویك ناحیه لری اشقیاسنی دخی استصحاب ایله اشبوزی جوارینه کلهرک بر طایبه انشا ایتدیرمش ایدوکنندن محمود پاشا همان اشقودردن حرکتله مرقوملره غلبه و طایبه لرنی هدم و بش قریه لرن احرارک ایدرک اول محاربه ده آلمش اسرا وکله لردن برمقدارینی برقطعه استرحامنامه ایله برابر درسعاده کوندردیکی ائنده سلطان عبدالحمید وفات ایلمش اولدیغندن سلطان سلیمک اوائل جلوسنده محمود پاشانک عفوئی خصوصی موضوع بحث اوله رق بعضیلر کندوسنه امنیت جائز دکدر دیدیلر بعضیلر دخی دور حمید خانیده بعض رجالک مزاجنه کوره حرکت ایتدیکی ایچون اوزرینه عسکر سوق اولنوب او دخی محافظه جان قیدیله مدافعه یه مجبور اولدی دیو معذور کوردیلر نهایت عفو اوله رق یکی بازار جانبی باشبونگی نصب اولنش وایکی یوز درت سنه سنده عهده سنه رتبه وزارتله اشقودره سنجانغه الحاقاً اناتولی ایالتی بالتوجیه یکی بازار جانبی سرعسکرلکی عنوانی ویرمش واودخی ایلرویه حرکت ایله بعض مواقعده نمچه لوری اوروب چاپول ایلدکن صکره ینه یکی بازار طرفه عودت ایلمش ایدی . مؤخرأ قرق بیگ عسکرله طونه سواحله حرکت ایلمک اوزره مأمور اولغین عساکر کلیه ایله و دین صحرا سنه نصب خیام اقامت ایدرک نمچه لویه کوز طانگی اولوب انجق اول ائنده زشتوی مصالحه سی منعقد اولسیله اشقودره یه عودت ایلمش ایدی .

بر منوال سابق بتون کغله ق محمود پاشانک النده کبی اولدیغندن اول وقتک حکمنجه خیلی قوتی اولدینی حالده بو وقوعات ایله بر مرتبه ده شهرت وشانی ترقی بولمش ایدی .

بالاده بیان اولدینی وجهله فرانسه اختلالی اوزرینه فرانسه قرانک برادرلری المانیا جانبیه فرار ایله ارباب اختلال اوزرینه حرکت ایچون طرف طرف عسکر جمعه ابتهار ایلدکری صروده (فوتنه ده وینج) نام شخصک واسطه سیله محمود پاشادن دخی استمداد ایتمش محمود پاشا دخی بر بقدر عسکر ویرمکی وعد ایدوب انجق بو عسکرک علفه سی قطع اولتمق اوزره اشقودره یه بالذات وینجک کلکی یاخود بر مأمور کوندرمسی لازم کله چکنه دائر محمود پاشانک وینج طرفه لاتینجه یازمش اولدینی برقطعه جوابنامه سنک ترجمه سی کورلمشدر . دولت علیه مقدم

و مؤخر فرانسه مسئله سنده بی طرفانی التزام ایلمش اولدینی حالد اشقودره متصرفک بویه خود بخود فرانسه جمهوری علیه عسکر ترتیب ایلمسی خارج از اصول دولت ایدی . لکن محمود پاشا اوزرینه کلان وزرایه غلبه ایدوب نهایت قوه قاهره سی سایه سنده وزیر و سر عسکر اولدیغنه مغرور اوله رق خود بخود بومثللو شیلره اجتسار ایدر اولمش ایدی . حالوکه بومثللو خود پسندانه اطواری دولتجه هضم اولنمز اولدیغندن ایکیوز سکز تاریخده تکرار فرمانلو اوله رق اوزرینه قوه کافیه ایله ابوبکر پاشا مامور اولوب محمود پاشانک برادری ابراهیم پاشا دخی جلب و تحلیف ایله برادری علیه اعمال اولنلق اوزره ابوبکر پاشا معین تعیین بیورلمش ایسه ده ابراهیم پاشا ابوبکر پاشا ایدرک و قایه نفسی داعیه سیله اردودن صاوشوب برادری یانه کیتمش و محمود پاشا برمدت اشقودره قلعه سنده محصور طور دقدن صکره بر آراق قلعه دن خروج ایله ابوبکر پاشانک اردوسی باصوب منهزم و پریشان ایتمش اولدینی حالد بالاده بیان اولدینی اوزره ایکیوز طقوز تاریخده اسپانیا قرالنک توسط و شفاعتیه ینه عفو اولندی .

مقدما نمچه محاربه سی اثناسنده قره طاغلو شماروب جوارلرنده بولنان پیری و پیالوپا ولویک و سائر ناحیه لر رعایاسیله برلشهرک محمود پاشایه قارشو طور مغه باشلا دقلرندن اشبو ایکیوز اون بر سنه سی محرمنده محمود پاشا پودغور یجه و اشبوزی طریقیه پیری ناحیه سی اوزرینه حرکت ایتدکده عصاتک جمعیتی کثرت اوزره بولدیغندن اشقودره به عودت و تکرار عساکر و افیه جمعه ینه پودغور یجه و اشبوزی طرفندن قره طاغ اوزرینه حرکت و کیجه عسکرینی ایجاب ایدن یرلره تفریق و تعیه ایله کندوسی دخی الی التمش نفرله بر خانه ده بیتوت ایتدکده قره طاغولر کیجه لین اول خانیهی باصوب محمود پاشایی شهید ایتمشدر .

قره طاغ ناحیه سی بوسنه ایالتی داخنده واقع هر سک سنجانچی مضافتندن اولوب کرک بوراسنک و کرک جوارنده واقع برطاقم طاغ ناحیه لرینک اهالیسی اورتودقس مذهبنده بولنوب دولت علیه نک خرچکنذار رعایا سندن ایدیلر . بو ناحیه لرک اموری سائر یرلرده اولدینی کبی بیر اقدار لر و مختار لر معرفیه کورد یریه لرک بشقه جه مامور مخصوصلری یوغدی فقط قره طاغده اوتدنبرو بر (ولادیه) متره پولید اولوب بونک و طیفه سی رعایانک امور مذهبه سنه نظارتدن عبارت اولدینی حالد صکره لر ی رفته رفته امور جسمانیه دخی مداخله ایدر اولدیلر و قره طاغولر مناعت موقعیه لرینه استناد ایله آره صره سرکشلیک یولنده طاورانوب مؤخرأ بعض دول اجنبیه نک افسادیه بتون بتون عصیان ایدیلر و برده اشقودره

طرفنده کی خرسیان تبعه نك اكثرى قاتوك مذهبنده بولنان لاتین طائفه سی اولوب
 لاتینلر ایسه از قدیم خرسیانلر حقدنه موضوع اولان تکالیفدن معاف و اهل
 اسلامک مظهر اولدینی هر درلو سر بسیت و امتیازاته مظهر و فقط خدمت عسکر یه ده
 ملت اسلامیه ایله مشترک اوله رق هر محاربه ده اهل اسلام ایله بر لکنده بولنور لر
 ایدی . و شوراسی پک غریبدر که دولت علیه نك خرسیان مذهبلر دن رسماً
 طایفدینی یالکز اورتودقس ایله ارمنی مذهبلری اولوب حتی مؤخر ااً استانبولده
 قاتوك مذهبی شیوع و انتشار بولدقده بونی قبول ایتیره نك منعه ایتدار ایلدیکی
 ائنده ارناودلقده کی لاتینلرک محافظه امتیازاته پک زیاده اعتنا ایدوردی . بناء علی
 ذلك قره طاغلورلر ایله اشقودره لاتینلری آره سنده اوتهدنبرو جنک وجدال
 اکسک اولمازدی و لاتینلر دائماً حکومتک خدمت عسکر یه سنده بولندقلری جهته
 آنلرک اعداسی اولان قره طاغلورلر حکومت علیه نده حر کته فرصت ارارلردی
 دشمن اولان دولتلر دخی آنلری دولت علیه علیه نده تحریکدن خالی اولمازدی .
 و داماد علی پاشا صدر تنده قره طاغلورلرک ظهوره کلان حرکات سرکشانه لری
 اوزرینه تأدیب و تربیه اولندقلری کبی بیک یوز سکسان ایکی سنه سنده سفر
 صددرلی رونما اولدقده قره طاغلورلر دخی عصیان ایدرک اطرافده واقع اهل اسلام
 قریه لرینه تعرض ایلدکلرندن اولوقت بوسنه والیسی بولنان دانه جی محمد پاشا قره
 طاغ اوزرینه حرکت ایدوب و قولاشین ناحیه سی قبتاتی قلاغوز ایدرک ولادیه نك
 مقری اولان چتینه یه قدر کیدوب قره طاغلورلری تحت اطاعته ادخال ایله خراج
 مقررلرین تحصیل واستیفا ایلمشیدی . مؤخر ااً قره طاغلورلرینه اطوار سرکشانه ده
 بولنشلر ایسه ده قره محمود پاشا هر سگ سنجاغندن پودغوریجه و اشبوزی و نقشیک
 قلعه لر یله بعض نواحی بی ضبط ایله اشقودره یه الحاق ایتدکنده بشقه قره طاغلورلری
 دخی تأدیب و تربیه ایدرک وریافه طریقسه چتینه یه کیده رک اوراده اردوسنی
 قوروب قره طاغلورلرک خراجنی اخذ واستیفا ایلمشیدی . لکن بویه هر سگ
 ناحیه لرینک وارداتی اخذ و قبض ایلمسی بوسنه والیرینک شکایاتی موجب
 اولمقده ایدی . بناء علی ذلك سلطان عبدالحمید خان دورنده محمود پاشا
 حقدنه اصدار اولنان فرمان عالیده محمود پاشانک تعداد اولنان تهملرندن
 بریسی دخی فضولی قره طاغ رعایاسی اوزرینه حر کته ایصال خسار ایلمش
 اولسی خصوصی ایدی . برمنوال سابق قره طاغلورلر دیگر جوارده بولنان بعض
 نواحی عاصیه ایله برلشهرک محمود پاشایه مقاومت ایدوب و برکیجه بقته باصوب آتی
 اعدام ایلملری استانبولده پک چوق ذواتک موجب ممنونیتی اولمشیدی . اولوقت

وقعه نویس بولسان نوری بك دخی بو وجهله محمود پاشا غائله سنك برطرف اولسنی وادیء ممنونیتده تحریر ایلمشدر . لکن آندن صکره قره طاغولور پك زیاده یوز بولوب پیالوپا ولویك و پیری وقوج و واسویك کبی اهالیسی خرستیان اولان نیجه ناحیهلر قره طاغه التحاق ایله بوراده ایوم مضرت عظیمه سی مشهود اولان برهیئت قویة عصیانیه تشکل ایتمشدر .

برمنوال مشروح محمود پاشانك وفاتی خبری آلدینی کبی برادری ابراهیم پاشا دخی عهده سنه اشقودره سنجاغك توجیه بیورلسنی استدا ایلدکده بوماده نك تنظیمی ایچون طرفدن در سعادته مخصوص آدم کوندر می لازمه حالدن کورملکله کیفیت حقی پاشا معرفتیه لدی الاخطار ابراهیم پاشا اشقودره مقتیسی ایله باش چوقدارینی در سعادته کوندر دکده محمود پاشانك دین میریسی ایله مخلفاتی بر خور ایدیلر ك جمعاً ایکی بیك کیسه یه قطعله بشیوز کیسه سی پشین وقصوری مقسطا ادا اولنق شرطیه اشقودره سنجاغی روم ایلی بکدر بکیلیکی پایه سیله ابراهیم پاشایه وایلبصان سنجاغی دخی یکنی محمد پاشایه توجیه بیورلدی .

مقدما اوخری سنجاغی ته دئلی علی پاشا زاده مختار پاشایه توجیه اولندقده قلت نمانسی جهتدن اداره سنده فضله مصارفه دوچار اوله چنی بیانیله لواء مز بورك اوغلی عهده سندن صرف و تحویلی علی پاشا استدا ایلمشیدی . لکن محمود پاشا ایله بینلرنده درکار اولان خصومه مبنی محمود پاشانك اول حوالیه تجاوزینی منع ایلمك مصلحتی ایچون اوغلی مختار پاشانك اوخریده بولنسی اولوقت ایجاب مصلحتدن بیله نرك علی پاشانك بو استدعاسنه موافقت اولنمیشیدی .

چونکه ارناودلر کغه و طوسقه عنوانلریه باشلوجه ایکی قسمه منقسم و اوخری سنجاغی ارناودلغك قسم اعظمی اولان کغه لقدمه داخل بولندینی و اشقودره کغه لغك ثابت مهم بر موقعی و بلکه کغه لرك مستند و مرجعی اولدینی حالده علی پاشا و عسکری هپ طوسقه اولوب بو ایکی قسم ایسه اوتهدنبرو یکدیگره ضد و مابین ایدو کندن محمود پاشایه قارشو کغه لقدم بر سنجاغك طوسقه عسکر یله ضبط و اداره سی خیایجه مشکل ایدی . و بونك ایچون اخریده اقامه سی لازم کلان عساکر کلیه نك مصارفه اوخرینك وارداتی کافی اوله مازدی . بونکله برابر میانده بر محاربه وقوعبولسه کغه ایله طوسقه محار به سنه منجر اوله رق غلبه لك محمود پاشا طرفنده بولنه چنی درکار اولوب علی پاشا ایسه اولوقت یانه طرفنده یرلشوب کورکشمك اوزره بولندیغندن او یله عاقبتی مجهول برغوغایه بلاشمقدن اجتناب ایلردی و کلا دخی او یله ذی قدرت ذاتلر ك محمود پاشا علیه نده بولندیرلسنی التزام ایدرلردی . بناء علی

ذلك اوخرى سنجاعى خواه و ناخواه مختار پاشا عهده سنده ابقا اولقمده ايدى
برمنوال سابق محمود پاشانك وقوع و فاته مبنى اشقودرجه اندیشه ايدجك بر حال
قالديغندن على پاشانك استدعاى سابقه بناءً اوخرى سنجاعى مختار پاشا عهده سندن
صرف و تحويل ايله روم ايلي بكار بكيلىكى پايه لولرندن روم ايلي اياتى قائمقامى
اولان اوخرى ايل احمد پاشا زاده محمد پاشايه بروجه آرپهلق توجيه بيورلمشدر .

بالاده بيان اولنديغى اوزره بالاستقلال دفع اشقيا مصلحتنه مأمور اولان روم ايلي
واليسى حقي پاشا اشقيا نك بروجه مطلوب استيصالرينه موفق اوله ميوب اشقيا بالقان
بوينده كى قرى و قصبته ايصال انواع خساره جبارتلرندن بشقه قوجى باشلردن
سابقا سلوى و يوده سى مجار على و كاور امام و سائر بونلر ك هوارينه تابع اولان
عصات و اشقيا بكدل اوله رق طرنوى و سلوى ولو فجه و پلونه قضالرينه و نيكبولى
طرفلرينه كونا كون فساد و مضرت القاسيله فقراى رعيتى ازعاج ايتلريله حقي
پاشانك مأموريتى حلب و ايلكنه تحويل ايله روم ايلي اياتى بلغراد محافظى مصطفى
پاشايه بالتوجيه اشقياى مرقومه اوزرينه صوفيه طرفندن والى مشار ايله و نيكبولى
طرفندن ساستره و اليسى عثمان پاشا و برو جانبندن دخى اناطولى و اليسى على پاشا
حركت ايتك اوزره مأمور اولديلر ديو نورى بك تاريخنده محرردر .

سالف الذكر مجار على پاسبان اوغلك آدملرندن ايدى و پاسبان اوغلى مقدا شرائط
معلومه ايله عفو اولمش ايكن باشنه بخار نخوت صعود ايدرك كاه رتبه وزارت استدا
وكاه و دين محصلغلك سنوى بشيوز كيسه آچهيه تحملى يوقدر ديو اشكا ايتك كبي
اطوار ناسزا اظهار ايدوب برطرفدن دخى طونه ياليسنده كندوسنه سرفرو
ايتمانلرى قهر و تدمير ايلردى بناءً على ذلك مجار على واسطه سيله طرنويه اورديروب
نيجه نفوسى افنا و ماللر يى غارت و بغيره ايتديره رك اموال مغصوبه يى علناً و دينه نقل
ايتديرمك كبي حرركات ناجايه اجتسار ايلمش ايدى .

مقدم و مؤخر بالقان بوينده كى قضا طاعلى اشقيا سنك تعديتيله يازده خسار اوله رق
اول حوالده لو فجه دن بشقه اشقيا انه كچمك قضا قالماشيدي لو فجه ليلر طاعلى
اشقيا سنى مملكترلينه اوغرا تمقلرى كبي بوكره دخى و طنلر ينى محافظه ايچون مقام
مدافعه ده ثبات ايدوب انجق بوندن طولاي اول و آخر اشقيا ايله جنك وجدالدىن
خالى اوله مامشدر .

شوحاله نظراً پاسبان اوغلك تا ديبى فرائض حاله دن بولمش ايسه ده آنك ازاله
فسادى باشلوجه تدبيره موقوف اولديغندن بعده اقتضاسنه بالقلمق اوزره اول امرده
طرف طرف متفرق بولنان طاعلو اشقيا سنك دفع مضرتى اقدم كورينوب و بو ايشده

حرب و ضرب اربابی اولان و زرانك استخدامی انب کوریلوب بوجهتله اناتولی و ایسی علی پاشادخی روم ایلی به کچمک اوزره مأمور ایدلمشیدی پاسبان اوغلی دخی برمدتجک آوودملق اوزره و دین محصلغینک امانه ضبطی اراده و دولت علیه نك رضاسنه موافق حرکته بولندیفی حالده کوندن کونه قدری مزدا د اوله رق مطلب اقصاسنه و صولی دخی ممکن اوله جفی طرفنه افاده اولمش ایسه ده بومثلو معامله بالجامه نك حسن تأثیری کوریه میوب کیتدکجه نخوت و غروری متزاید اولمشدر .

عاصم افندی حقی پاشانك اسباب عزائی نوری بکه مخالف اوله رق یازمش اولدیغندن تاریخنده بوخصوصه دائر اولان فقره لر بوجه آتی درج و علاوه قانور . شویله که : روم ایلی خلقی علی الاطلاق بغی و طغیانه مستعد اولوب اکثر اوجاقلو طاسلاخی اولغین آنا فنا نظام جدید عسکرینک توفری جمله سنک موجب تکدری و تنفیری اولدیغندن مقدار مصممه بلوغنده طرف سلطنتده قوت تامه و غلبه عامه پیدا اولمغه لامحاله درجنک اول متغلبه طائفه سنی رفع و ازاله برله ممالک محروسه نظامنه ابتدا اولنه جفی ملحوظ اولغین ممالکی و طرق و مسالکی اخلال بردولت علیه بی اشغال و صوب سلطنتدن تنفیر و امالال قصدینه مبنی عین الاعیان اوللرک اغماض و تخدیشلریله طاغلو نامنده طاغیلر پیدا و جوار سلطنته قدر اطاره شر و شقا ایلدیلر . مقاطعاتک تزاید فائضاتی و نظام جدیدک توارد محدثاتی سر رشته بهانه ایدوب برطرفدن دخی فقرا وزیر دستانی تحمیل بارکران و انواع تکالیف طاقت فرسا ایله بی تاب و توان ایلملریله آنلر دخی بالجمله بومظالمی طرف دولتدن نشئت ایدر اعتقادیه جانب سلطنتدن محزون و داد و استغاثه نك منتج سود اولمیه جفی تخیسل برله زار و زبون اولوب اغنیالری فقرایه ملحق و فقرالری عاجز تدارک سد رمق اولمغه ناچار بعضیلری نه حال ایسه برقاچ سلاح پیدا و طاغلو اشقیاسنه التحاقله رهزنامکی مسالک کسب و اقتنا ایدوب بوضورتله کیتدکجه طاغلو طائفه سی زیاده و ضرر و خسارلری و اصل رتبه اشتداد اولدی بونک اوزرینه قریحه هایوندن حقی بک رتبه وزارتله روم ایلی و ایسی تعیین ورخصت کامله ایله روم ایلی نك نظامنه مأمور قلندی الحق قویبجی مراد پاشا کبی بیخ مغیلازار طغیان برکنده ایدرک روم ایلی یی طرز عجیب اوزره نظامه ادخال ایلدی کندوسی وجیه و وقور و ذاتا شجاعندن بهره ور اولوب توجه پادشاهی دخی علاوه اولمغه و غالباً نیتلری دخی خلوصه مقرون بولمغه رأی و تدبیری مصیب و نفوذی واصل بعید و قریب اولدی . استانبولده خانه و خان و مدرسه تقیثی نظامی کبی چکمه لردن بدایله روم

ایلیک نهایت سرحد لره دك اوچ قولنده واقع قضاار اهلایرینی یکدیگره جبل متین کفالتله بسته و مساسل وبر قضادن قضای آخره یدنده تذکره جواز اولدقجه فرد واحدك عزیمتی محجور اولغله بلا تذکره اوللری کائنا من کان اخذ و قیسد و بند ایله طرفه ارسال اولمق بابنده نذر کرانه مربوط و مسجل ایدوب الحاصل عون باری ایله نام طامخی و باغی بی نشان و درون منافق کبی شائبه صفوتدن مهجور اولمش اول کشور شورا شور صاف مجلای امن و امان اولدی . چون حتی پاشانک بورسمه شان و شهرت و صرامت و وصولتی و نفوذ و مکتتی و روم ایلی بی بومثللو نظام و حسن حاله ادخالی دمبدم السنه واردین و صادریندن شایع و عامه خلق لساننده مدح و ثنای سائر و زایع اولوب مراج هایونه نظراً البته مشارالیهی مقام صدارته ایرادی وارسته ظنون اولغله وکلای و قتله از قدیم بینلر نده تضاد کامل و یکدیگرک قتل و اعدامیله متسلی اولیه جق مرتبه ده بغض و کینه لری قرار کیر ساحه دل اولوب بو جهته صدارته قدم نهاده اولدینی کون اول طامق مجموعنی بریده سیف قهر ایلیه جکی بی احتمال اولدیغنه مبنی عن اصل مشارالیهک طبیعتنده بر مقدار جه فظاظت و تهور و خشونت اولوب اضمار مافی الضمیره غیر مقتدر نابجا اوضاعه نامتحمیل زبان دراز و غیاب و حضورده خونه دولته سنک انداز مطلق اللسان و منطلق الجنان اولغله بکک لازمه سی و شجاعت تمه سی اولان دلیلک اسنادیله زبانزده کبرا و جابجا نظام مذکوره سعی و غیر تلرینی دخی نعل باز کونه شیوه سبیله اطروفه دیوانکی صورتیله حضور پادشاهیده نقل و انها ایدرک ختام مصاحته قدر حقنده و افرجه جنت عزو و نسبت و معاذ الله بو مقوله جسور دیوانه حامل مهر و کالت شاهانه اولدقده صوب سلطنته غیر کونه معامله ایده جکی ملحوظ اولدقدن بشقه از قدیم نظام جدید اختراعی منفور و منکری اولوب او جاقولو ایله بالاتحاد پشمش آشه صوقوبه جنی اول محذوردر دهرک بر طرفدن یوسف اغا والده سلطانی او ملاحظه ده کندوسنه ترفیق و بر جانبدن علی الاتفاق صادق اعتقاد استدکاری امنانک اقوال مدلسنه مبنی تخدیش دل پادشاه آفاق ایتملریله (من یسمع یخجل) مؤداسنجه درون خدیوانه نی توجیه مهر صدارتدن هزار کونه فسون و فسانه ایله تحویل و امهال و پادشاهی اغفال و مشارالیهدن تنفیر ایتملریله روم ایلیدن عزل و اناطولی یقه سنه ارسال ایلدیلر و صورت اعزامنی امر مهول هیئتنده اعظام ایدرک اول وزیر ذیشانی تذلیل و ارغام ایلدیلر . بوسبیله پشمش آشه صغوق صوقا تیلر و کندولری لیان امانده یاغه باتدیلر . وزیر مشارالیهک هنوز دبدبه کوس سطوتلری و لوله انداز کنبد دوران اولدینی او انده آستانه ده انجمن مطایبه و لطائفک نصرالدین خواجه سی اولان مرحوم سیدا افندی بر کون

یوسف اغانك مجلسنده بیحجابا تداول کؤس مصاحبت و تناول نقول منادمت ایتکده اولوب خلال صحبتده رسته مقال عالم آخرت طرفه سرداده انتقال اولمغه اغای مشار الیه زبان تلهفله آه و صداآه اکر سکرآت موت شهیدده سی خار زار سر راه اولمسیدی ترك کار و بار حیات ایله اختیار نمت ایلمک وجدانده پک آسان ایدی دیدکده سیدا افندی مقابله به آغاز ایله آنک چاره سی کنیدی قبضه اقتدار کزده در جناب دولتکتر حقی پاشانک صدارتی خصوصنده انماض ایلدیککیز صورتده البته مشار الیه مقام صدارته وارد اوله جنفی وارسته دلیل و شاهددر . اول کون جنابکیز اشبو دولتخانه کزده بیقیدانه حضور و آرام و کندو عالمکزده علی العاده دق و لوق کلام ایدرکن ناکاه مشار الیهک مسند و کالته ورود و عرض اوطه سنده قعود ایلدیکنی بر مخبر راست کفتار کلوب اخبار ایلدیکی آنده بی سکتته توقف همان روح روانکیز بدنگیزدن دفعه متزعج اوله جنفی بی اشتباهدر . جوابی لطائفدن شمار ومدعای سالف الذکری مؤید اولدینی درکاردر . مابقصه آیم پس روم ایلی اعیانلری سطوت پادشاهی ایله حقی پاشانک بو مرتبه ده سل سیف و سطوتی کندولرینی اضمحلل درجه سنه ایصال ایلدیکنی معاینه ایلملر یله من بعد فسخ ماده منازعه و ماینه ایدوب جمله سی پک تحت و یک پاره اولوب یکدیگرله تعاضد و عهد و امان ایدوب دولت عالیه طرفه صورت ظاهرده اقیقاد ایله صمیمی زنجیر اطاعتی منقسم قیلدیلر . بو جهتله اولکیدن زیاده طاغیر و باغیر پیدا اوله رق امنیت طرق و مسالک زائل و کیتدکجه طغیانلری مزداد اولدی . عاصم افدینک کلامی ایشه بوراده ختام بولدی .

عاصم افدینک سیدا افندی دیدیکی اولوقت وکلا دائرلرینه کیروب چیقار خوشکو و مجلس آرا برکیمسه اولوب انجق سوزلری اکثریا دلشکنک وادیسنده ایش .

فائق افندی مجموعه سننده دیرکه عصر سلیم خان نالنده مدرسیندن رئیس خیری افندی برادری سیدا افندی دیرلر طلومبه جی مزاجنده بر حریف واز ایدی خاقه پک طوقنور رسوا ایلردی حتی برادری خیری افندی بوزه نه رینه غرق اولدینی ائنده رحم و ماتم رینه بزم برادری پدر خیار آچه سیله پیدا ایلمش دیو اشکلکنه تعریض ایلمشدر . خاقه چوق طوقنوقلی سوزلری وارددر . بری دخی بودرکه بوستانجی باشیاقدن صدر اعظم اولان اسماعیل پاشا عزل ایله حلمی ابراهیم پاشا یکیکچری اغالغندن صدارته کلد کده مقدا خاصکی تیمارخانه سندن صدر اعظم اولمسیدی شمعی سلیمانیه تیمارخانه سندن آدم بولدیلر دیدی . و امین پاشا زاده امین بک برمدوح استانبول قاضیانی ایش ایدی . اثنای قضا سنده سلطان بایزیده فروخت اولمقده اولان ابریزلرک ایچنه فیابعد یشیل بویه اورلمیوب صاری

وقرمزی اور لسون دیو تنبھلہ نظام ویرمشیدی . بوندن مراد شرفایہ تعظیمدر
 اما امین بکک انشستہسی اولان چلبی افندی کہ امین بک ایلہ برخانہدہ مقیم اولورلر
 ایدی چلبی افندی کریمہسنی آستانہدہ کمسنہیہ ویرمیوب اوئانادہ استانبول کمرکچبسی
 اولان سلانیکلی مصطفی بک کہ صکرہ وزیر اولمشدر . آنک سلانیکدہ ساکن اوغلی
 عبدالرحمن بکہ ویرمکی مراد ایدوب سلانیکدن میر مرقومی کتوردوب خواجہ
 ایتدیروب ہزار اعزاز واکرام ایلہ کریمہسنی ویرمشیدی . یوقارودہ حالی مذکور
 اولان سیدا خبیثی انکلاترہ دن تحف کتورتتمک کبی سلانیکدن داماد کتورتتمک مسبوق
 دکلدر دیو تعریض ایتد کد نصکرہ امین بکک ابریز بویہسی نظامنی ایشیدوب مخصوصاً
 امین بکہ واروب سز شریف دکل ایکن شرفایہ بویلہ تعظیمکنر حق بوکہ ذخرا آخرت
 اولہ جق نسنہدر لکن اقدام برہمت ایدہ جک شی دخی واردر . رخصت عنایت
 بیوریلور ایسہ افادہ ایدہیم دیدکدہ امین بک بیورک الدن کلد کد نصکرہ دریغ اولنمز
 دیدکدہ شودائرہ کردہ مقیم اولان داماد بک حضر تلرینک باشندن یشیلنی دخی
 چیقارسہ کز شرفایہ بوندن بیوک تعظیم اولماز ایدی دیو نسل یهوددن اولسنی تلمیح
 ایلمشدر . فائق افندیکن کلامی دخی بورادہ تمام اولدی . والمعہدہ علیہ . بزینہ
 صدہہ کلہم .

* وفیات اعیان *

منکوبین رجال دولتدن طوغرامہجی زادہ عبداللہ افندی خلال محرمدہ وفات ایلہ
 غائبہ اقبال وادبارن نجات بولمشدر ..
 مومی الیہ کتخدای قلمی باش کاتبی ایکن قوجہ یوسف پاشا دخی قپودان دریاجزائرلی
 غازی حسن پاشانک قپو کتخداسی بولنق ملابسہ سیلہ بینارندہ حاصل اولان معارفہیہ
 مبنی یوسف پاشانک صدارتندہ کتخدای اولہرق بردن برہ بویلہ بر مقام معلایہ صعود
 ایلمش ایسہدہ بوایشک رجلی اولمیوب احوال عالمہ وقوفی دخی اولمدینی حالہ
 جرمنافع ذاتیہسنہ حصر مساعی ایدر بر ذات اولدیغندن کتخدایق امورینی ادارہدن
 عجزی رونما اولغله اردوی ہایون روم ایلی جانبہ کیدرکن انسانی راہدہ عزل
 اولوب نہ حال ایسہ بویلہ بررتبہ رفیعہیہ چیتمش بولندیغندن مناسب مناصب ایلہ
 کچندیلمکدہ ایدی دیو نوری بک تاریخندہ محرردر .
 وکلای دولت ایش کوردیرمچی برہیت اولوب وظیفہ اصلیلری ایش کورمچیلری
 تمیز واتخاب ایلہ امور دولتی اہلنہ تودیع ایتمکدن عبارتدر . بوچہتلہ دولتک وکلای
 صدق اتصافی صحیحاً انسان صرافی اولمیدر . یوخسہ الفت ومعارفہیہ بناء آدم قاہر مق
 وغیرت جاہلیہ حسبیلہ انسانیتدر دیومنسوبین ومتعلقانی درجہ اہلیت واستحقاقلرینک

اوست طرفه چيقارمق امور دولتک نا اهللر انه کچمسنی موجب اوله رق وظيفه اصلیه نك خلافتده حرکت و عاداتا دولته اهانت ديمک اولديغندن بوکاصل انسانيت دینلور . لياقت و استحقاق دائره سنده منسویینی کوزتمک و افعالسان عمومدا اعتراض اولمز و بو درجه سی انظار عمومیه ده مروءت و انسانیت عد اولنور . لکن بودخی تدریج و تائی ایله اولمیدر . زیرا مراتب دولته دفعه ترقی ائی برشی اولدیغی بالتجربه مثبت و مسلم اولان حالاتندر .

متقاعداً تکفور طاغنده مقیم اولان سید مصطفی پاشا بوئاننده فوت اولغین ماهیه مخصوص اولان بش یوزغروش معاشی خزینه مانده اولوب اموال و اشیایسی دخی دیونئی ادا ایتک شرطیه کریمه سنه ترک و احسان اولندی .

مشار الیه اوجاق امامی دیو معروف اولان امام خلیل افندیك اوغلی و دفتردار سید ابراهیم پاشانك كوچك برادری اولوب بيك یوزاوتوز آتی تاریخنده تولد و دفتردار مکتوبخیسنه دوام ایله مکتوبیء دفتری و طقسان ایکیده دفتردار و خلیل حمید پاشا صدارتنده کتبخدا اولمش ایکن خلیل پاشا کندوسنی استرقاب ایدرک عزل ایله درسعادتن تبعید صورتنده ارضروم جانبنه مأمور ایش و متعاقباً رتبه وزارت ویرلمش ایدی . ایکییوز ایکی سفرنده قائم مقامغه نصی تصمیم ایله هنوز اردوی هایون چیقمازدن مقدم استانبوله دعوت اولمش ایکن سردار اکرم یوسف پاشایی بعض قرناسی مشار الیه دن تنفیر و حقنده اولان حسن ظنی تغییر ایتلمه یله استانبوله کورکن اثنای راهده توقیف اولمش ایدی . ایکییوز ایکی سنه سی اوخرنده یینه یوسف پاشانك صدارتی هنکامنده باخط هایون درسعادته جلبله قائم مقام نصب اولمش ایسه ده زماننده باب عالینك احتراقی وقوعنه و بعض خصوصاتده دلخواه عالییه توفیق حرکت ایده مامسنه مبنی عزل اوله رق ماهیه بشیوزغروش معاش ایله تقاعد ایدلمش ایدی . بوکره خلال جمادی الاولیده وفات ایلدی . وزرا ایچنده معتدل و خلوق برذات مدوح الصفات ایش رحمة الله علیه .

وینه بوئاننده صارو خان سنجانلی متسلمی و آیدین محصلی قره عثمان زاده الجاج محمد اغانك اجل موعودیه و فاتی خبری وارد اولغله مخالقات بدلی اوله رقی جانب میرییه سکزیوز کیسه آنچه اعطا ایتک اوزره کافه املاک و اموالی و اشیایسی ورئه سنه ترک اولندی . شیخ الحرم نبوی ادریس آغانك دخی بوئاننده وفاتی خبری آلمغله خزینه دار حرم نبوی اولان الماس اغا شیخ الحرم نصب و تعیین قلندی .

یکچیری اغالغندن نائل رتبه وزارت اولوب ایچ ایل و نیکده سننجاقلری متصرفی اولان کله جی عثمان پاشا دخی بوئاننده فوت اولمشدر .

محول علمادن و صدور کر آمدن تاتار جق عبدالله افندی بو ائساده وفات ایله ختم رساله نفی و اثبات ایلمشدر مشار الیه قریمی عثمان افندیکنک صلبندن بیک یوز قرق اوچ تاریخنده متولد و التمش ایکیده مدرس اولمشیدی برار الق روم ایلی قاضیعسکری ایرانی زاده اسعد افندی یه تذکره جی اولوب اسعد افندی ایسه مناصب قضا تو جیهاتنده مدخول و نابهنگام معزول اولدیغنه و توجیه مناصب قضاند کره جمیلر یدیه اوله کلدیکنه منی عبدالله افندی دخی لینی جزیره سنه نفی اولمشیدی بعد الاطلاق التی آی قدر حر مین مفتشی و بعده قدس و مصر و مدینه منوره قاضیسی اولدقدنصکره ایکینوز ایکیده اناطولی صدارتی پایه سیله اردو قاضیسی اولوب اثنای راهده بر وسیله جزئییه ایله کندوسنی صدر اعظم یوسف پاشا عزل و نفی ایدوب و بعد الاطلاق بالفعل اناطولی و متعاقباً روم ایلی قاضیعسکری اولوب بعد الانفصال بالاده ذکر اولندیغی و جهله کوز لخصاره نفی اولنش و کیدوب کلد کدنصکره ینه روم ایلی قاضیعسکری اولوب مدت عرفیه سنی اجمال ایله منفصل اولمشیدی بو اوانده کندوسنه عارض اولان مرض حما علت رقه محول ایتمکله ذی القعدة نک اون طقوزنجی کونی عازم دار القرار اولوب ادرنه قپوسنده بعض اقربا سنک مدفون اولدیغی لعلی زاده صفه سننده دفن اولمشدر غایت ذکی و فاضل و زیاده جود و سماحته مائل بر ذات اولوب آنجق مسندینه یا قشمز صورتده خفت اظهار ایلمک و کثرت دیوندن مبالات ایتمامک ایله مدخول ایدی دیو نوری بک تاریخنده محرردر .

علماء اعلامدن و مکّه مکرمه پایه لولرندن چته لی السید احمد افندی بیک یوز سکسان یدی تاریخنده سلیمانیه جامع شریفنده قاضی بیضاوی تفسیرینه بدأ ایله بو ائساده ختم ایلمش اولدیغندن ذی الحجه نک ایکنجی بازار ایرتسی کونی جامع مذکورده برعظیم جمعیت اولوب بعض کبرا و رجال و علمادن بشقه صدر اعظم ایله قپودان پاشا دخی تبدیلاً موجود اولدقلمی حالدّه ختم تفسیر دعاسی اولنوب اون درت ذاته علم تفسیردن اجازت و یرمکله ختام مجاسده طرف صدراتپناهیدن خواجه افندی یه بول یکلو کورک و اجازت آلان افندیله عطیه لر اعطا بیور لمشدر .

* وقایع خارجییه *

بو ائساده ایران شاهی اغا محمد خانک امراسندن محمد صادق خان ایله جعفر قولی خانک نامه رسلیله مقام صدرا ته ایکی قطعه مکتوبلری کلوب خلاصه مضمونلری اغا محمد خان طرفندن ممالک خراسانک تسخیر اولندیغی ولزکی طائفه سنندن بعضیلری روسیه لو ایله اتفاق و دربند طرفنه نشر شراره شقاق ایلدکلرینه منی اغا محمد خان روسیه اوزرینه حرکت ایلمش اولدیغی بیانیله اتحاد دیانت حسینیه احراز ثبوبات

غزاه و جهادده مشترك اولق اوزره دولت عليه نك دخى روسيه يه اعلان سفر ايلمسى خصوصى مندرج ايدى . دولت عليه ايله دولت ايرانيه بالاتفاق روسيه اوزرينه سفر آچمش اولديلر واقعا ايكي طرف دخى مستفيد اوله سيلوردى لکن مقدا دولت عليه روسيه ونمجه کي ايكي قوی دشمن ايله نچه نچه يه کلديکي وقت ايران طرفدن بر حرکت اولميوپ شمدي ايسه دولت عليه هنوز محاربه غائله سندن قورتيله رق امور داخله سنك تنظيميله مشغول بولنديغندن سفر آچه جق وقتي دکل ايدى قالدیکه ارضروم واليسى ضيا پاشا طرفدن اغا محمد خان هند شاهي زمان خانه و بخارا خانه غلبه ايمش و شمدي طاغستان ايله اوغراشور آني دخى ضبط ايتدکن صکره نادر شاه کي بعض مواد ميدانه قويه رق ممالک دولت عليه يه هجوم داعيه سنده ايمش کي امنيتي سلب ايده جک شيلر يازيله کلديکندن اغا محمد خانه پکده امنيت اولنه ميوردى . بناءً عليه اعتذار سياقنده مقام صدارتن صادق خان ايله جعفر قولی خانه جوابنامه يازلمشدرکه صورتی (۱۴) رقبيله ذيل و علاوه قنور .

حالبوکه قترينه نك وفاتيله اوغلو پاولو پترو ويچک روسيه ايمپراطورى اولديني خبري خلال جمادی الآخره ده در سعادتده واصل اولمشیدی . و پاولو تخت ايمپراطورى يه جلوس ايتديکي کي ايرانلر ايله عقد مصالحه ايتديکندن بو صورتده شرق مسئله سي تمشدر . و در سعادتده مقیم روسيه ايلچيسنک مأمورتي بقا و تقریر اولنديغنه دائر چند ماه صکره پاولونک سلطان سلیمه دخى نامه سي کلشدر . بالاده بيان اولنديني اوزره فرانسه جمهوري طرفدن در سعادت بيوک ايلچيسي تعيين اولنان او بردويه بوسنه طريقيه در سعادتده کلوب تقديم ايده جکی هدايا دخى مؤخرأً بجزاً وصول بولمغه او اسطر رجیده ديوان عالی ترتيب ايله حضور هايونه داخل اوله رق نامه سنی تقديم ايلمشدر . فقط فرانسه ايلچيسنه استانبولده معتاددن زياده التفات و نوازش اولمسي محارب دولتلر ايلچيلرينک شکايتي موجب اولمش ديوا اوروپا غزته لرنده يازلدیغندن صحيح ايسه مناسب دکلدر ديوا لوندره سفيري آگاه افندی طرفدن باب عالی يه اخطار اولنمشدر .

در سعادتده مقیم ونديک (باليوزي) ايلچيسي اوچ سنه ده برتبدل ايده کلديکندن و بوسنه تبدل سنه سي اولديغندن بو ائنده وارد اولان سفیر جديد ايجون شعبانک ايکنجی صالی کوني ديوان ترتيب اوله رق بر معتاد حضور هايونه دخول ايله ملاقات ايلمشدر .

کچن سنه وقوعاتي صره سنده بيان اولنديني اوزره فرانسه جزالي ناپوليون بوناپارت ایتاليا حکومتلرينه غلبه ايمشیدی . مؤخرأً اوستريا اردوسنه دخى غلبه ايدرک

بوانداده لومباردیا ایالتی ضبط ایستد کد نصره بوراسنی جمهوریته تحویل ایلدی .
بعده پاپا حکومتک دخی برایکی ایالتی بالتفریق جمهور هیئتته افراغ ایلمش و بوجهته
ایتالیا قطعه سی فرانسه نك نفوذی آلتنده قالمشدر .

بالاده بیان اولندیغی وجهه اغا محمد خان داغستان سفر یله مشغول اوله رق اول
اثناده صادق خانی شوشی اوزرینه کوندر ووب وبعده کندوسی دخی کیدوب شوشی
قلعه سی ضبط ایستدکن صکره بر ماده دن طولای بعض خدمه وقر ناسنه کوجنوب
یارین بونلری قتل ایدرم دیویمین ایتمش اولدیغدن آنلر ده اولجه طاورانوب
ذی الحجه نك یکر منجی کیجه سی یئاغنده او یورکن اعدام ایتمشدر . ویاننده کی
مجوهراتی آلب صادق خان زردینه کیتمشدر . بناءً علی ذلک بو کیفیتدن صادق
خانک قبل الوقوع خبری اولدیغی بعض تواریخده محرردر . نه حال ایسه صادق خان
ایران حکمدارانی داعیه سنه دوشه رک اوردوسیله ایلر ویه طوغری حرکت ایلمشدر .

(وقایع سنه ۱۲۱۲)

حالبوکه اغا محمد خانک ولی عهدی و برادر زاده سی اولان بابا خان فتح علی شاه
عنوانیه اشبو اون ایکی سنه سی او ائلنده تخت ایرانه جلوس ایدرک صادق خانک
آزر باجماندن عراقه عزیمت ایله قزوینه مواصلت ایلدیکی خبرینی آلدیغی کبی همان
مقابله یه شفیع خانی کوندر مکله تلاقی فریقین وقوعنده صادق خان منهزم اوله رق
داعیه استقلالدن فراغت و اغا محمد خانک مجوهراتی فتح علی شاهه ارساله مسارعت ایله
عرض بیعت ایتمش ایدی . لکن فتح علی شاه بالآخره صادق خان ایله اغا محمد خانک
قاتلرینی اله کچوره رک جمله سنی نعمت حیاتدن دور و بر آراق عصیان ایدن برادری
حسین قولی خنی طوتوب کوزلرینی کور ایدرک خطه ایرانده کسب استقلال
ایلمشدر . واتخاذ ایلدیکی مسلك اداره اغا محمد خانک اصول اداره سنه نسبتله عدل
وداده اقرب اولسیله اهالی ایران کندوسنک حکومتدن خشنود قالمشدر .

بوسنه دونمای هایون آقدکزه چیقارلمیوب فقط لاجل الحافظه بره مقدار اینجه دونما ایله
امرای بحریه دن محمد بک کوندر لمشیدی . حالبوکه خلیجه بیوجک مالطه قورسانلری
عربستان سواحلنده براز جریملری طوتوب مالطه یه کوندر کدن بشقه موره
سواحلنده دخی طولاشه رق ابنای سبیله ایصال خسار ایلمکده ایدیلر .

وموره نك کلیدی مئابه سنده اولان اینه بختی محافظلرینک حضریه و واردات سائر لری
سنوی یوز کیسه آچینی تجاوز ایدرکن مؤخرأ محافظلره مخصص اولان خواصدن
بعضیلری مقاطعه اولوب بعض قری دخی جوار سنجاقلره نقل واکثر قضالرک
دخی حضریه لردن ماعدا محافظلره برآچه ویرمامک اوزره اللرینه فرمان اعطا

اولنمش ایدوکنندن رفته رفته محافظلرک واردات سنویه سی یکر می بش کیسه یه قدر
تزل ایتمک حسینیه محافظلر دخی چاره سزدا ره سنی تقلیل و بیانی برسنجاق متسامنک
دائر سندن خفیف درجه یه تنزیل ایتمش ایدی . بناء علی ذلک فیما بعد اینه بختی
داخلنده حضر یه مرتب اولان قضا لرک حضر یه لرینه مناسی وجهله بر مقدار شی
ضم و اغریبوز و تر حاله سنجا قلیرینک بعض قضا لرندن مجدداً معاش تخصیص ایله
اینه بختی محافظلرک واردات سنویه سی یوز یکر می کیسه یه ابلاغ اولنمش قرار کیر
اولدینی اناده اینه بختی محافظی میر میران عبدالله پاشا وفات ایتمکله سابقا موره
محصلی اولان درگاه عالی قپوچی باشیلرندن مصطفی اغایه خلال صفرده روم ایلی
بکلیکلکی پایه سی ورتبه میر میرانی ایله اینه بختی محافظانی اشبو نظام جدید اوزره
توجه اولندی .

وسالف الذکر ایجه دونما باشبوغنی محمد بک بو اناده اون سکر قطعه طوپ چکر
برمالطه قورصان سفینه سنی اخذ و گرفت ایلدیکی کبی ردوس متصرفی حسن قپودان
طرفندن دخی اون طقوز طوبلی برقطعه مالطیز سفینه سی اخذ و تسخیر اولنمش وینه
بوسنه برقطعه فرقه ایله بنفشه سواحلنه مأمور اولان بنفشه لی حسن بک دخی
چوقه آطه سی آچیق لرنده برقطعه قورصان غلره سی طوتمشدر .

دولت علیه نك برچوق غوائل داخلیه سی اولدینی حالده فرانسه اختلالی اوزرینه
اوروپانك درکار اولان قاریش قانی دخی بروقتن برو نظر دقتی جاب ایده جک
بر حالده بولدیغندن دائماً اوروپا طرفنه مدبصر بصیرت و بعض دول اوروپا زردینه
کوندریلان ایلیچلرک تحریراته حواله سمع دقت و رویت ایتمکده ایدی .

بالاده بیان اولدینی اوزره برلین سفارته تعیین اولنان عزیز افندینک پروسیا قریله
صورت ملاقاتنه و هداای سنیه نك کیفیت تقدیمه دئر بو اناده باب عالی یه وارد اولان
تحریراتنده کندوسنک سفارتی حقنده پروسیانک آستانه علیه ده مقیم ایلیچسی غلط
ایدرک تعیینات و سائر مصارفه دئر تکلفات ایله آزرده اولاملری اراده علیه سنی همان
دول سائر نك برلینده مقیم ایلیچلری مثللو مصلحتکار معناسنه (اوویه) در بیوک
ایلیچی معناسنه اولان (انباسادور) دکدر دیو تحریرینه بناء رأس حدوده مهماندار
تعیین اولنماش و برلینه وصول ایله برمسافر خانه یه نزول ایتمکندن ایکی کون
کچوب خوش آمدی رسمی اجرا ایدر برکسنه ظهور ایتماش اولدیغندن فرانسه
ایلیچسندن استکناه ماده ایتمکده جمله مزه عادت و رسملری بووجهله در . رسم
اولان ابتدا سز برآمدکنزی ارسال وکلدیکنزی افاده ایتمکدر دیو خبر ویرمنه
بناء اودخی ترجماتی باش وکیه لدی الارسال کلدیکنندن بک زیاده نمون اولدق

یاریںکی کون ساعت شو قدرده کلسونل کوریشلم دیو خبر کتور مسیله وقت معینده برنفر ترجمایله کیدوب پروسیا و کلاسیله کورشمش و (آوویه) اولیوب (انباسادور) یعنی بیوک ایلیچلیک ایله مأمور اولدیغنی و عزمی افندی نیک مأموریتدن فرقی یالکنز تعینات و مصارف سائر اولماق و برلینده اقامت ایده جک اولمق خصوصاً نردن عبارت ایدوکنی بعدالیمان از قدیم نامۀ هایون تسلیمنده اولان رسمی ترک ایتملرینی مطلوب ایتسی اوزرینه در سعادتده مقیم ایلیچیمزک تحریرینه نظراً تعینات و سائر رسوم اقتضا ایتیبوب دول سائر نک مقیم ایلیچیلری حقننده جاری اولان عادتمز اوزره بریوم مخصوص تعیین اولنه رق برنفر ترجمانکنز ایله کندو باشکزه قراله واروب نامہ کنزی ویرمکنز اقتضا ایدر لکن چونکه بیوک ایلیچ اولمق اقتضا ایدورسکنز یدیکزده اولان نامۀ هایونک مفادینی لسان فرنگی ایله برکاغده تحریر ایتک کرکسز که ایلیچیمزک غلطنی قراله افاده ایدوب عزمی افندی یه اولدیغنی اوزره رسم اجرا اولنه دیملریله نامۀ هایون ترجمه ایتدیریله رک بر صورتی کوندرلکده استانبولده کی ایلیچمز غلطندن محجوب اولدق عفو ایدرسکنز دیو پروسیا و کلاسی طرفندن کندوسنه اعتذار اولمش ایدوکی افاداسندن صکره عزمی افندی یه اجرا اولنان رسم اوزره آلی ترتیب اولنه رق پروسیا قرالیله نه وجهله ملاقات ایلدیکی بر تفصیل بیان اولمشدر .

بویابده افاده و استفاده چه وقوعه کلش اولان یا کلاسیله آ کلاسیله ایچون بروجه آتی سفرائک صنوف و درجاتی ایله بونلره دائر بعض تفصیلاتک درج واتیانی لازم کلشدر .

عالمده حقوق دینلان شی ایکی قسمه منقسم اولوب بری حقوق طبیعی و دیگری حقوق وضعیه در حقوق طبیعی طبیعت عامه یه موافق اولان حقوقدر . حقوق وضعیه عرف و عادتجه وقت و حال اقتضاسنجه موضوع و مرعی اولان حقوقدر . حقوق دولیه دخی بو وجهله ایکی یه منقسم اولوب حقوق دولیه طبیعی یه نظراً بالجمله دولتسارک استقلالی سیان عد اولدیغندن مصالح مخصوصه لرینه باقی اوزره دیگر دول نزدیک کوندر دکلری ایلیچیلر کافۀ مساوی اولمق لازم کلکله اوائلده بوقاعده یه توفیقاً بالجمله سفرا بررتبده بولنه رق بونلره لسان افرنجیده اکثریا (انباسادور) و بعضاً (پروکورر) دینلوردی و بعضاً حکمدارلر بعض مصالح مخصوصه لری ایچون (ازان) تعبیر یه مأمور مخصوصلر کوندر لرلر دیسهده بونلر سفارت صفتنی حائر دکلملر ایدی . مؤخرآ حقوق دولیه وضعیه اقتضاسنجه سفرا درجه و کالتسارینه کوره بر قاچ صنفه تقسیم اولمشدر . شویله که : هجرتک سکنز یوز و علی الخصوص طقوز یوز تاریخلرندن صکره

ایلچیلرک و متبوعاری اولان دولتلرک کبر و تعظملری حسبیله ظهوره کلان تشریفات و تکلفات عظیمه مستلزم مصارفات جسمیه اولمقدن ناشی ایکنجی درجه ده سفیر کوندر مکّه باشلادیلر بونلر حقدده آرتق اویله تکلفات عظیمه اجرا اولنمیوب مقیم معناسنه اولان (رزیدان) عنوانیه تسمیه اولنهرق بیوک تشریفات ایله (انباسادور) عنوانی بیوک ایلچیلره تخصیص اولندی. فقط مقیم ایلچیلر دخی (ازان) عنوانیه کوندریلان مأمور مخصوصاره تقدم ایدردی. صکره لری (ازان) عنوانی مصلحتکذار تعبیرینه منقاب اولدی. (پروکورر) عنوانی دخی محاککات جنایانده وکیل دولت معناسنه اولان مامورلره اطلاق اولنهرق سفرا القابنده قوللانماز اولمشیدی. بیک تارخیندن صکره بعض دولتلر ایکنجی درجه ده اولق اوزره (آنوییه) یعنی مبعوث عنوانیه سفیر کوندر مکّه باشلادیلر. بونلرک تشریفات ایستدالری معین و محدود اولمیوب حقلرنده بعضاً بیوک ایلچی واکثریا مقیم ایلچی معامله سی اولنور ایکن بیک یوز تارخیلندن صکره بونلرک رسوم و تشریفات دها زیاده تعین ایدرک اکثر دولتلرده بیوک ایلچیلرک مادونی و مقیم ایلچیلرک مافوقی عد اولمغه وبعده مبعوث مقامنده مرخص ایلچی عنوانی دخی قوللانمغه باشلادی. بر دولت نزدنده بویله مختلف عنوانلر ایله متعدد دول ایلچیلری بولندیغندن تقدم و تأخر بختنده بینلرنده عظیم منازعه و مشاجره لر واقع اوله کلدیکندن بیک ایکیوز اوتوز سنه هجریه سننده ویاننده منعقد اولان (قونقره) مجلس مکالمه دولیده مواد سائرتهک مذاکراتی صره سننده سفرا حقدده دخی بر معاهده امضا اولمشدر. شویله که: بیوک ایلچیدن صکره ایکنجی درجه ده بولنان سفیرلره (آنوییه) یعنی مبعوث ویاخود (منسترو) یعنی وکیل دولت تعبیر و مصلحتکذارلر دخی اوچنجی درجه ده اعتبار اولندی. و سفرائک متبوعی اولان دولتلرک نفوذینه و بیوکلیکنه وایمراطورلق وقرالیت کبی عنوان ورتبه لرینه و نزدنده بولدیقلری دولتلر ایله درجه دوستی وارتباطنه کوره حقلرنده مختلف تشریفات و متنوع معاملات اجرا اولنه کلور ایکن هر دولت کندو نزدنده بولنان سفرائک صنف ودرجه سنه کوره علی السویه معامله ایلمک و سفرائک مرکز مأموریتلرینه مواصاتلرینی رسماً اخبار ایتمکلی تاریخندن اعتباراً هر برصنک اسکیسی تقدم ایلمک و چونکه بیوک ایلچیلر بعضاً جلوس و مصالحه کبی فوق العاده بر مصلحت ضمننده و بعضاً دخی دائمی اوتورمق اوزره کوندریلوب فوق العاده عنوانی دها بیوک عد اولنهرق بعض دولتلر دائمی اوتورمق اوزره کوندر دکلری بیوک ایلچیلره دخی مجرد بر پایه اولق اوزره بعضاً فوق العاده عنوانی ویرمشلر ایسه ده چونکه (انباسادور) واردینی محله

کویاکه متبوعی اولان حکمدار بالذات بولنشجه سنه حکمدارک نائب منابی و وکیل مطلق دیمک اوله رق متبوعنک ذاتنه لازم کلان رعایت آنک حقننده دخی اجرا اولمق لازم کدیکندن بونک فوقده بشقه براده ودرجه اوله میه جغه منبی فیما بعد بیوک ایلیچیلر هپ براده ده اوله رق فوق العاده عنواننک رتبه و تشریفاتجه برفرقی اولماق اوزره قرار ویرلدی . ونمچه دولتک رومه ایمراطوری عنوانی حائز اولمسی ملبسه سیله در سعادته بولنان ایلیچیلری (اترنونس) عنوانیله معنون اولدقلری حالده بودخی صنف ثانی درجه سنده طوتمشدر . فقط مجلس مذکورده مقیم ایلیچی موضوع بحث اولمیوب مسکوت عنه قالمشدر . چونکه بالجمله سفرانک اعتمادنامه لری نزدنده بولندقلری حکمداره خطاب اولوب مصلحتگذارلرک مأموریتنی حاوی اولان تخریرات ایسه نزدنده بولندقلری دولتک خارجیه ناظرینه خطاب اولدیغندن سفارت ایله مصلحتگذارلق بیننده عظیم فرق اولدینگی کبی بیوک ایلیچی برمنوال مشروح ذات حکمدارینک وکیل مطلق و نایب منابی اولوب ایکنجی صنفده بولنان ایلیچی ایسه مجرد رؤیت مصالح سفارت ضمننده کوندرلمش بروکیل مخصوص دیمک اولدیغندن بوایکی صنف ایلیچیلر بیننده دخی فرق و تفاوت درکار و تشریفاتجه ده بینلرنده عظیم فرق وارد و بیوک ایلیچی ایله مصلحتگذار آره سنده عقلا دخی یالکنز بدرجه اولمق لازم کلور . لکن اولوقت پک چوق یرلرده مقیم ایلیچی عنوانیله سفیرلر بولنش اولدیغندن بوندن طولایی دخی بزراع چیقماق ایچون اوچ سنه صکره دول خسته معظمه یعنی اوستریا و فرانسه وانگلتره و پروسیا و روسیه دولتلرینک مرخصلندن مرکب اوله رق (اقسلا شاپل) نام بلده ده منعقد اولان مجلس مکلمه دولیه ده مقیم ایلیچیلر صنف ثانی ایله مصلحتگذارلر آره سنده اعتبار اولمق حسیله مصلحتگذارلردن بشقه اوله رق سفرا اوچ درجه یه منقسم اولمشدر . والیوم بواوچ درجه معتبر اوله رق لسانمزده دخی بیوک ایلیچی واورته ایلیچی و کوچک ایلیچی تعبیرلری جاریدر فقط برمنوال سابق بیوک ایلیچیلرک برفوق العاده صنفی اولدینگی کبی مؤخرأ بعض دولتلر کندی ایلیچیلرینک تقدمنه و سیله اولمق اوزره ایکنجی صنفده بولنان ایلیچیلرینه فوق العاده مبعوث و بعضیلری دخی وکیل مرخص عنوانی و یروب سائرلری دخی بویوله کیمکه باشلادقلردن الحاله هذه ایکنجی درجه ده بولنان سفرا یه فوق العاده مرخص اورته ایلیچی تعبیری جاری اولمشدر . بواورته ایلیچی بیوک ایلیچیلر کبی نزدنده بولندینگی حکمداردن ملاقات طلب ایده بیلورلر اما کوچک ایلیچیلرک بوحقی اولمیوب ایشلرینی عینیه مصلحتگذارلر کبی (مینسترو) وکلا ایله کورمکه مجبور اولورلر فقط حکمداره خطاباً بر اعتمادنامه

کتور مش اولدقلری جهتله ایلچیی عنوانی آلمش اوله یورلر بناءً علی ذلک بونارله مصلحتگذارلر بیننده اوله اساسلو ملاحظیه مستند برفرق یوقدر . ویانه مجلسنده مقیم ایلچیسدن بحث اولنماسی دخی بودقیقهیه منبیدر ظن ایدرم لکن مؤخرأ (اقسالشاپل) بلدهسنده بروجه مشروح مصلحتگذاردن بشقه سفرا اوچ درجهیه تقسیم اولنوب بوقرار مؤخرأ دول سائر طرفلرندن دخی برر بر قبول وتصدیق اولمشدر . حتی بیک ایکیموز قرق سنه هجریهسنده استانبولده اسپانیا اورته ایلچیسيله اسوجک مقیم ایلچیسى بیننده تقدم وتاخر منازعهسندن طولانی خیلی مشکلات ظهور ایدوب شویله که : قرار مذکور اقبضاسنجه اسوج ایلچیسى اوچنجه درجهده بولمق لازم گلش ایسهده چونکه ویانه مجلسنده مذکور دول خمسۀ معظمه ایله برابر اسپانیا وپورتکیز واسوج مرخصلری دخی بولمش ایکن صکره کی مجلسده آنلر بولمدينی جهتله قرار اخیری تصدیق ایتمش اولمالرینه واسوج ایلچیسى دخی بالذات پادشاه طرفندن قبول قلوب بناءً علیه بیوک ایلچى ایله مصلحتگذار آرهسنده بولنديغه نظراً اسپانیا ایلچیسنه تقدم ایتمک ایستمش ایسهده مؤخرأ دولتی طرفندن کندوسنه قرار اخیره توفیقاً اسپانیا ایلچیسنى تقديم ایتمک اوزره تعلیمات کلمشدر .

دولت علیه سفراسنه کلنجه : اوتهدنبرو دولت علیه برمصلحت مخصوصه ضمننده بعض دولتره فوقالعاده بیوک ایلچى کوندرر دیسهده دول سائرۀ نزدنده دائمی صورته اقامت ایدر ایلچیسى اولمیوب اوروپا حوادثی ترجمان دیوان هایون واسطهسیله درسعادنده کی دول اوروپا ایلچیلرندن وبعضاً افلاق وبغدان بکلری طرفندن آلور ایکن جلد خامسده بیان اولندينی اوزره سلطان سلیم ثالث حضرتلری نظامات سائرۀ صرهسنده دول اوروپا نزدنده دائمی ایلچى اقامه ایتمک اصولنی وضع ایتمک ارادهسیله ابتدا لوندریه برایلچى ارسالنی تصمیم بیوروب انجق دولت علیهده امثالسز برشی اولدینی جهتله اصول ورسومی معلوم اولدییغندن اول امرده نه یابلمق ونه یولده حرکت اولمق لازم کلهجکی بیسنمک ایچون درسعادنده مقیم انکلتره ایلچیسيله استشاریه قرار ویریلهرک بیک ایکیموز یدی سنه هجریهسی اواخرنده بیک باغچهسنده انکلتره ایلچیسيله اسبق روم ایلی قاضیسکری مرحوم تاتار جق عبدالله ملافندی ورئیس الکتاب راشد افندی حاضر اولدقلری حالده مخصوصاً عقد اولنان مجلس مکالمده ابتدا طرف دولت علیهدن لوندریه ایلچى کوندریلهجکی انکلتره دولته اخبار اولنهجق اولدینی حالده کیمه یازلملی دیو انکلتره ایلچیسندن لدی السؤال دول مصالحنی رؤیته مأمور (منسترویه) یعنی خارجه ناظرینه یازلمق ایجاب ایدر دیو جواب ویریلجک بروطرفدن مکتوب

یازلدینی حالده البته مقام صدارتدن یازیله جق مذکور منستویه طرف صدارتدن مکتوب عالی تسطیری مسبق بالمثل دکل بو حالده اول امرده ایلچی کوندرملک اوزره اولدینی طرف صدراعظمیدن مکتوب عالی ایله قراله و باش و کیله بیلدرسه بعده ایلچی ایله قراله نامه هایون و باش و کیله مکتوب یازیلوب کوندرله کوزل اولمازی دینلمسیله انکلز ایلچیسى بوراسى دولت علیه نك ید اختیارنده در . نصل دیلرسه او یله تحریر ایدر . مقصود مقدمجه ایلچینک کیده جکنی طرف دولت علیه دن انکلتریه بر اخبار درکه آنلرده ایلچی کله جکنی بیلورده لوازم اکرامنی اکا کوره تهیه ایتسونلر دیمی اوزرینه رئیس افندی کچنلرده پروسایه ایلچی کتدکه اول مکتوب یازیلوب اخبار اولندی هان ایلچی یه نامه هایون و مکتوب عالی ویریلوب اخراج و ارسال اولندی . بکا قالسه ایلچی کیده جکی وقت نامه هایون و مکتوب عالی اصدار ویدینه اعطا اولنور . ایلچی بکه دخی ایشته دولت علیه ایلچیسى انکلتریه کیده بور انکلتره دولته (قوریر) پوسته ایله یاز دولت علیه ایلچیسنک کله جکندن خیر اولسونلر دینور بترایدی دیدکده انکلتره ایلچیسى چونکه او یله در طرف صدراعظمیدن اولجه باش و کیله بر مکتوب یازلسون کفایت ایدر اگر ممکن اولماز ایسه طرف ریاستنهایدن خارجیه ناظرینه فقط بر اخبار اولنسون دیورم دیوب بونک اوزرینه پک چوق الحاث واقوال کذران ایدرک نهایت بر قرار قطعی ویریله میوب اولیای اموردن استیدانه تعلیق قلمشیدی .

چونکه دول اوروپاده وکلادن هربری مأموریتلرینی رأساً ایفا ایدوب باش وکالت بر عنوان اعتباری اولدیغندن آنده صدارت عظمی قوتی اولمدینی کبی رئیس افندی اگرچه امور اجنبیه ایشلرینک مرجعی ایسه ده بونده مستقل اولیوب مجرد کتابک رئیسى دیمک اوله رق مجلس مکالمه ده بیله اوست طرفنده صدوردن بری بواندیغنه نظراً ریاستده دخی خارجیه نظارتی قوتی یوغیدی بناء علی ذلک باب عالینک حالی اوروپا قایتولرینه نظیر اولمدینی جهته ابتدا ایلچینک کیده جکنی اخبارده صعوبت کوریلهرک مجلس مکالمه ده بوکا برقرار ویریله مامشدر .

بعده کیده جک ایلچینک انکلتره ده زیاده مکرم و ملتف اولسی بحثه نقل کلام اولنسیله بوباده انکلتره ایلچیسى تأمینات اعطاسیله برابر تعیین بیوریله جق ایلچی احباب درایت و فطانتدن و وکلای دولتک منتخب و ممتازی اولان ذواتدن اولسنی تصریح ایله ذاتنده جاب حرمت ایده جک حال و صفتده اولسنی تلمیح ایتدکن صکره ایلچینک صورت عزیمتی انکلز ایلچیسندن لدی السؤال ایلچینک عزیمتی

براً یا خود بجزراً اولور . بو ایکی شقک دخی ایکشر صورتی واردر . بری بو طرفده سفارتی اعلان ایدرک کیتمک و دیگرى بوراده سفارتی اعلان ایتیموب انکلتریه واردقده نامه سنی تسایم ایله سفارتی اعلان ایلمکدر . و بجزراً کتدیکی صورتده و ندکده یا خود مالطه ده لا اقل او توز کون قرانته بکلمسی لازم کلور یاز کوننده امر عسیر اولدقن بشقه اوچ درت آیده انجق انکلتریه وارده بیلور . و برده بکک سفینه ایله کتدیکی تقدیرده اثنای راهده مخالف دولتلار وار بیطرف بیراق ایله کیتلو اگر چه دوبره و نیک سفینه سیله کیتسه ضرر ایتمز لکن جبلتریه واروب آندن انکلتریه فرقیتمه سوار اوله رق انکلتریه او یله چه وارمق لازم کلور . بو تقدیرده دخی محاربه یه تصادف ایتمک احتمالی درکاردر . برأ کیدر ایسه ایلیچلیکنی اعلان ایدرک کیتدکده هر محله اجرای رسم ایتمک لازم کلور ینه محل مأموریتنه کیچ وارر و طول مدت یولارده بو رسملرله بیتاب اولور . اما دول اوروپا ایلیچیرینک عادتلی اوزره بو طرفدن چند نفر آدمیله سیاح صورتده کیتسه فقط زمونده بش التی کون قرانته دن صکره راحتله لوندریه ایکی آی ظرفنده وارر وهان اول طرفده سفارتی اعلان و مراسمى اجرا ایدر کر چه یولارده آنک سفیر اولدیغى بیلورلر . لکن کندوسى اعلان ایتماکله بیلمز کبی معامله ایدرلر بنم ملاحظه کوره بو صورت مناسب کورینور دیمش و برو طرفدن تعیین اولنه جق ایلیچی به قاعده دولت علیه اوزره بهر حال خلعت الباس اولنه جق بو صورتده سفارتک کتمى نصل اولور سوآلى ایراد اولنیجق اقدام مانع دکل خلعت الباس اولنسون سفارتک کتمى اثنای راه ایچوندر دیو جواب ویرمشدر . ابخاث سابقه آره سنده رئیس افندی کوندریله جک ایلیچینک اورته ایلیچلیک پایه سیله تعیین اولنه جغى افاده ایتمش ایدو کندن انکلتریه ایلیچیسى کلامه ایتدار ایله دیمندبرو کیده جک ایلیچینک رتبه سنی دوشنیور ایدم دولت علیه ایلیچیسى بررتبه ایله مأمور اولسه که اول طرفده تقدم خصوصنده برکونه نزاع وقوعه کسه زیرا دولت علیه ایلیچیسینک تقدمى انکلتره دولتی دخی ایستر اول طرفده موجود و مقیم اولان ایلیچیلرک متبوعى اولان دولتلردن نمچه ایله روسیه دولتلرنده ایمپراطورلق دعوا سنى اولغله و دولت علیه دخی جمیع دول غننده اعتبار مذکور یعنی عنوان پادشاهی ایله معتبر اولمق ملابسه سیله شمى انکلتره ده دولت علیه ایلیچیسى اقامت ایتدیکی کبی بهر حال ایمپراطورلق دعوا سنده اولان نمچه و روسیه دولترى ایلیچیرى ایله بینلرنده تقدم خصوصنده منازعه ظهور ایده جکنى بیلورم . الحاله هذه انکلتره ده اسپانیا و فلمنک و مقدملرده فرانسه نك ایلیچیرى فوق العاده بیوک ایلیچی و نمچه و روسیه

واسوج ودانمارقه وپروسيا وسچاليا دولترينك ايلچيرى فوق العاده اورته ايلچى وونديك وجنوز وپارمه وسائر بومقوله جمهورك ايلچيرى (منسترو) و(رزيدان) تعبير اولنور اورته ايلچيلردن دون اولغله دولت عليه ايلچيسى اورته ايلچى عنوانيه اولديغى كچى نىمجه وروسية ايلچيرى تقدم دعواسنه دوشرلر برصورت اولسه كه بوتقدم دعواسى اولسه فرضا دولت عليه ايلچيسنده (منسترو) رتبهسى اولسه سائر بومقوله ايلچيلره تقدم ايدر ياخود دولت عليه كندو ايلچيسنه فوق العاده اورته ايلچيلره تقدم ايدجك صورتله بروسط رتبه تخصيص ايتلودر. حتى درعليه ده مقيم نىمجه ايلچيسى معبش نىمجه دولتى طرفندن بررتبه اختراع اولنوب اويلهجه تخصيص اولمش اولغله درعليه ده اولان فوق العاده اورته ايلچيلر اكا تقدم ايدمزلر عادتاً بيوك ايلچيدن اشانغى و فوق العاده اورته ايلچيدن يوقارو بررتبه جديده مخصوصه در. لکن اويله دون رتبهى بن مناسب كورهم واكر عادتاً بيوك ايلچى رتبهسى اولور ايسه بيوك ايلچى صاحبلى اولان سائر دولترك ايمراطورلق دعواسى اولماغله دولت عليه نك عادتاً بيوك ايلچيسى سائر بيوك ايلچيلره تقدم ايدر. بونده نزاع يوقدر. فقط اورته ايلچى ايله عادتاً بيوك ايلچينك سنوى مصرفلنده ايكىيوز الى كيسه فرقى اولور ديو ختم كلام ايلمشدر.

وبونك اوزرينه دولتجه كيفيت لى المذاكره طرف دولت عليه دن اوروپايه كوندريله جك سفرانك عادتاً بيوك ايلچى رتبه سياه تعيين اولنلرينه قرار و يرلمشدر. و اوتهدنبرو سفرى دولت عليه ندينه مأمور اولدقلى دولتر طرفندن مهماندار تعيينيه تعيينات اعطا اولنديغى مثللو درسعاده كلان دول سائر ايلچيلرينه دخى بالمقابله مهماندار تعيينيه تعيينات ترتيب واعطا اولنه كلوركن فيما بعد فوق العاده بيوك ايلچيلر مستثا اولق اوزره اقامت ايلچيلرى يعنى دائمى صورتده اقامت ايدجك ايلچيلر حقنده تعيينات اعطاسى اصولى الغايدمش وبوصورتله ابتدا آگاه افندى لوندريه كوندرليكي كچى كچن سنه دخى على افندى فرانسه يه و عفيف افندى نىمجه يه و عزيز افندى روسياه و فرخ افندى آگاه افندى يرينه انكلترديه كوندرلمش ايدى. فقط سفارتك اصول ورسوم واصطلاحاتى هنوز لايقيه تعين و تقرر ايدم ماشيدى.

بناء على ذلك عزيز افندينك سفارتى برلينه اخبارده بر بيوك ياكلشلق وقوعه كمشدر. شويلاه كه: اول وقت اوروپايه كوندريلان عزيز افندى وسائرى عن اصل دولت عليه طرفندن اوروپايه كوندريلان ايلچيلر كچى فوق العاده بر مصلحتى بتوروبده عودت ايدجك اوليوب واردقلى دولتر نزينده اوچر سنه مدتله اقامت ايدجك

اولد قردن بولرله باب عالیجه اقامت ایلچیبی دینلمش ایدی . اوروپاچه مقیم
 تعبیری ایسه بیوک ایلچینک مادونی اوله رق بروجه مشروح مقدا ایکنجی درجه
 ومؤخرأ اوخجی درجه اعتبار اولمشدر . ایشته برلینه اخبار کیفیتده یاکشلاق بوندن
 نشأت ایلمش اولدینی سیاق حالدن اکلاشیلیور . فقط عزیز افندی دخی امور
 دیپلوماتیقیه ده معلوماتیز لغندن ویاخسود رئیس افندی تفهیمات لازمه یی ایفا
 ایده مدیکندن ناشی کندو رتبه سنک لوازیم و تفرعاتی لایقیه اکلایه مامشیدی .
 زیرا سلفی عزیمی افندی فوق العاده بیوک ایلچی اولوب کندوسی ایسه عادتاً بیوک
 ایلچی ایدی . وبره موال مشروح ویانه مجلس سنک انعقادینه قدر فوق العاده بیوک
 ایلچی ایله عادتاً بیوک ایلچی بیننده فرقی وار ایدی . وعزیز افندی مهماندار تعیین
 اولنماسنی پروسیانک در سعادت ایلچیبی طرفندن برلینه اخبار کیفیتده واقع اولان
 غلطنه حمل واسناد ایدوب رأس حدودده مهماندار بولمندیغنه جانی صقلمشیدی .
 حالبوکه سفارت اصولنک وضعنده سلطان سلیم بروجه سابق فوق العاده بیوک ایلچیلری
 استثنایله سائر ایلچیلر حقنده تعیینات اعطاسی قاعده سنی الغایدوب مهماندار
 تعیین ایسه تعیینات اعطاسی ایچون اولغله بالطبع مهماندار تعییننه لزوم قالمشیدی .
 فقط بیوک ایلچیلر ایله دیگر سفرا بیننده تشریفاتیجه عظیم فرقی اولدیغندن بونک
 تصحیحی لازمه حالدن اولوب بوبابده دخی پروسیا و کلاسی عزیز افندیکن خانسه
 کیدوب کوریشه رک بو خصوصده وقوعه کلان یاکشلاقندن طولانی اعتذار ایلمش لرایدی .
 پارس سفیری سید علی افندیکن بو اوانده در سعادت یازمش اولدینی مکتوبی فرانسهنک
 نه حالده بولندیغنه دائر برنوع معلومات اجمالیه ویره جکندن صورتی زیرده (۱۵)
 رقیله ایراد اولنور .

واپور و تیور یوللری و تلغراف کبی مخترعات عجیبه نک ظهورندن برو اوروپا مدنیتی
 فوق العاده ترقی ایدرک فرانسه دخی بر بشفقه حاله کیرمشدر . ققط اول وقت دخی
 فرانسه بونجه اختلالات ایله قان ایچنده یوزدیکی حالده ینه ثروت و معموریتی حال
 ترقیده ایدوکی بومکتوبدن اکلاشیلیور .

تفصیلات سابقه دن اکلاشیلیغی اوزره ریاست کتاب منصبی کوندن کونه کسب
 جسامت و اهمیت ایدوب اول عصره کوره بوایشه اهل اولنردن راتب افندی برهنوال
 سابق بعض قرنا و متفذانک غمز و نفاقیه عزل و نفی اولمش و بری افندی دخی
 سعایت رقبا ایله مزویء کوشه آداب و زهرا به نوش الم واکدار بولنش وراشد افندی
 فی الاصل سلطان سلیمک نزدنده پک زیاده مقبل و مقبول ایکن مؤخرأ بعض اسبابه
 منی مغضوب اوله رق بریحق سنه قدر معزولاً خانه سننده اقامت ایتدیرلکدن صکره
 حامیلری غضب شاهانه یی تسکین ایله اقدحجه ترسانه امینی نصب و تعیین قلمش ایدی .

راتب افندی اوزرینه رئیس‌الکتاب اون راسخ افندی ایسه مستقیم وایشنه مقدم برذات ایسه ده دقائق امور دولته واحوال دول سائرده وقوفی اولمدیغندن بویله نازک و قنده ریاست امور دقیقه سنی اداره دن عجزی رونما اولمغله بو اوچندن برینک ریاسته کتورلمسینه حال ومصلاحت لزوم کوسترمکده اولدینی حالده برمنوال سابق راشد افندی حقنده غضب شاهانه تسکین اولنوب ترسانه امانتنده مشهود اولان سعی وغیرتی دخی توجهات سنیه بی تجدیدایلمش اولمسلیه ریاسته کتورلمک استعدادی پیدا اولهرق اجرایی تصور وتصمیم اولدینی صروده راسخ افندی نامزاج اولهرق برمدت باب عالی یه کله مز اولدیغندن ایشلر تراکم ایتمک اوزره صفیکر می بشنجی جمعه کونی راسخ افندی عزل ایله راشد افندی ثالثاً رئیس‌الکتاب اولدی .

صدر اعظم عزت محمدپاشا سلطان سلیمک فوق العاده امل ایدندیکي نظامات جدیده اوزره اسباب حربیه نك استکمالته پک زیاده غیرت کوستردیکندن بشقه طبع سلیم پادشاهینک انشراحنه وسیله اوله بیه جک و سائلک استحصالنه دخی سعی ایده کلدیکي حسبیله بوندن اقدام بوغاز ایچنده ارناود کوی آقندیسینک اوست باشنده حسن خلیفه نام موقعده اشترا ایلمش اولدینی ساحلخانه ده واقع محل مرتفعده نفس نفیس هایون ایچون بر بنش کوشکی وایکی طرفنه برر حوض بنا وانشا واطرافنی انواع اشجار وازهار ایله تزئین ایدوب واشبو قصر عالیدن کورنیه جک برحمله دخی دارالسعاده اغاسی وساحدار اغا ایله خزینه دار اغایه مخصوص اولهرق بیوت عیدیه بی حاوی بردائر یاپدیروب کافه لوازماتی اتمام ایله تشریف شاهانه به انتظاردن بشقه برقصور قالمش ایسه ده سلطان سلیمی صراحة دعوت ایتمکدن تأدب ایدرک مجرد قصر مذکورک ذات شاهانه به مخصوص اولمق اوزره انشا اولمش اولدینی بیانیله قنی کون تشریف هایون ارزان بیور یله جغنی استفسار سیاقنده ساحدار اغایه برقطعه تذکره یازمشیدی وارد اولان جوابنامه ده ربیع الاولک اون بشنجی کونی سلطان سلیمک بنش طریقیه قصر مذکور تشریف بیوره جقلری مندرج اولمغله عزت پاشا اوچ درت کون مقدم ضیافت ترتینه مباشرت ایتمشیدی یوم مرقومده سلطان سلیم خان بجرأ طوغری ساحلخانه صدر اعظمی یه یناشوب و آندن اسب سوار اجلال اولوب صدر اعظمک خزینه دار ومهر داری بخور دان چکهرک قصر مذکور تشریف ایتدیکنده صدر اعظم طرفندن بر بوغچه کرانبها ایله بر اعلی دونامش ات عرض وتقدیم قنوب بوندن بشقه والده سلطان ایچون تهیه قنان بوغچه دخی حضور پادشاهی یه عرض واران ایدلمش ودارالسعاده اغاسنه وساحدار اغایه وسائر اندرون هایون اغالرینه دخی بشقه بشقه بوغچه لر ویرلمشدر سلطان سلیم

خان وقت عصره قدر قصر مذکورک پیشکاهنده واقع میدانده بعضا ساز استماعی
 و بعضاً پهلوان و تفنک اندازان تماشای ایله وقت کچورب و آندن صکره اخشام طعای
 ایدوب بعده ینه بحرأ بشکطاش ساحسرای هایونلرینه عودت بیورمشدر .
 فرداسی عزت پاشایی تلطیف ضمننده بنم وزیر صداقت شیمم مجدداً بنا واحیا
 ایلدیکک نزهتگاه غایت مفرح و محلنده اولدیغندن حظ ایلدم دونکی کون بنشله
 واروب تفرج و صفا ایلدم تقدیم ایلدیکک هدایان محظوظ اولدم طوغریسی تمام
 محلنده نظارتی خوش مسیره اولمش حق تعالی صفای خاطر و یروب سائر خدمات
 دولتده دخی نیجه نیجه محاسنه موقوف ایلسون آمین دیو بر قطعه خط هایون اصدار
 و ارسال ایتمکله درحال رئیس راشد افندیکنک قلمیله یاز یلان تشکر تقریرنده بو عبد
 عاجز لری موردن احقر و بلا استحقاق بونجه نعم و التفات شاهانه لریله موقر اولوب
 باخصوص مباشرت چاکرانمه قرین ختام اولان قصر هایونلرینی مجرد قبوللرینی
 تلطیف ایچون دونکی کون تشریف شاهانه لری تشکری هر وجهه خارج وسع
 و اقتدارم ایکن بو کون دخی بو وجهه مبارک خط شریف مراحم ردیف خدیوانه لریله
 بنده لرین حائز دینه فخر و مباهات بیورملریله بو عنایات مترادفه نک ایفای تشکر نده
 مسلوب الشعور اولوب هان دو چشم چاکرانه مدن اشک افشان اوله رق سجدهات
 شکر و تحمید ایله دوام ایام عمر و دولت شاهانه لری دعاسنه مواظبتدن غیری
 چاره ساز اوله مدیغم معلوم هایونلری بیور یله وادیلرنده عبارت ضراعت
 آیات درج اولمشدر .

بر مدت صکره یعنی ذی القعدة نک اون ایکنجی کونی بوغاز ایچننده واقع ارناود
 کوبنده علی السحر حریق ظهور ایدوب بر شدید لودوس روزکارینه تصادف
 ایتمکله قریه مزبورده واقع جمیع دکا کین و بیوت محترق اولدقندن بشقه وراسنده
 صدر اعظمک انشا ایلمش اولدیغی بنش کوشکی یانوب آندن دخی اشاعی یه سرایتله
 حمید پاشا زاده لریک و عزیز افندیکنک یایلری و مشهور حسن خلیفه یالیسی و ساخذخانه
 صدر اعظمی و جوارنده واقع براییکی کوچک یالی و مکتوبجی ابراهیم افندی یالیسنک
 حرم و ذوالوجهین دائره لری محترق اولمشدر .

بر منوال سابق دولت علیه جه مصالح اجنبیه کوندن کونه کسب اهمیت ایلدیکنه
 وراشد افندی تجدید اقبال ایدرک موافق هوا ایله ترسانه امانتندن مقام ریاسته
 یناشمش اولسنه نظرأ اولکییدن زیاده باب عالیده نافذ الکلمه و متکلم وحده اولسی
 لازمه خالدن کورینوب اودخی بویله نفوذ و استقلاله آلمش اولمسلیله اوصولرده
 طولاشوردی حالبوکه کندوسی نقدر متعظم ایسه عزت پاشا دخی اولقدر تعظم

و تفرد اصحابندن بولنسیله و بر صدر اعظم باب عالیده کندوسندن نفوذلی دیگر برینک بولنسنه راضی اوله مامسی امر طبیعی اولنسیله میانه لرنده برودت و مبانیت وقوعه کلوب عزت پاشا ایسه کرک مهمات سفر به نک تدارکنده و کرک خصوصات ذاتیهده فوق الغایه غیرت کوستره رک سلطان سلیمک پک زیاده توجهنی جلب ایله سائر غایه ایدوب مقام و کالت مطلقه یه الزم اولان نفوذ و استقلالی قزاقمشیدی .

بالاده بیان اولدینی اوزره ایران غائله سی بر طرف اولدینی کبی بو ائنده فرانسه ایله نمچه بیننده مصالحه منعقد اوله رق اورویا طرفنده کوریلان سکونته نظر آسایش عمومی امیددی رونما اولمش ایسه ده روم ایله طاغلو اشقیاسی غائله سی هنوز بر طرف اولدین پاسبان اوغلی عثمان اغانک اطوار و مشواری تحمل اولنیه جق مرتبه یه وارمش اولدیندن تدابیر کلیه یه تشبث اولنق لازم کلسیله تدارکات سفریه خصوصی هر ایشدن زیاده اهمیت کسب ایلمشیدی .

بناءً علی ذلک جادی الاولاده عساکرک بر قسط مواجی ویریلوب دور محاسبه کونی بر معتاد وارد اولان خط هایونده صدر اعظم کندوسنه ویرلش اولان استقلال کلی ایجابجه خدمه ورجال دولت علیه دن کندویه مخالفت ایدلاری در حال تأدیه مرخص اولدینی مندرج بولنشد . صورتی زیرده (۱۶) اشارتیه ایراد اولنور . خط هایون مذکور ی باب عالیده بر معتاد راشد افندی قرائت ایلدی . حالبوکه سهام مزایای هر کسدن زیاده اکا اصابت ایلردی .

بو وجهه صدر اعظمه استقلال تام ویرلسی اوزرینه بیوک راشد افندی کوچلمش ایکن سابقا سواری مقابله جیسی کوچک راشد افندی مقدا باشنه کلان فلاکتلردن متعظ و متیقظ اولوب بوسنه معزول قالمغه بو ائنده دولت کوسکنلکی وادیلرنده آتوب طوته رق وکلای حاضره نک عدم موفقیتلرینی و خلافتکیرانک فرجه یاب اولملرینی تمنی یولنده علناً بعض کلمات لایغه تفوه ایلمکده اولدیغنه مبنی بوندن بر آی صکره کندوی تأدیب و امثالی ترهیب ضمننده قبریس جزیره سنه نفی و تغریب اولنشد .

مقدما طوبچی او جاغنده کشاد اولان یکر می بش اورته نک هر برینه بالیز و شاهی و ابوس و سرعت طوپلری اوله رق اوزر طوپ ترتیب و طوپلره کوره ضابطان و نقراتی تنظیم اولنمشیدی . انجق بونلر هپ پیاده اولوب حالبوکه لدی الاقتضا بعض محارره عجاله طوپ یتشدرمک و صحرا ده یمین و یساردن وسائر محارره بر فرقه دشمن ظهور ایدر ایسه در حال واروب مدافعه سنه قیام ایتمک و سواری اوله رق استعمالی ممکن اولیان محارره سائر طوپچیلر مثللو پیاده اوله رق استعمال ایلمک اوزره سواری

طوپچیسی ترتیب اولنمق دخی لازم کلکله بو کره سواری سردن کچدی طوپچیلری اولمق اوزره هر اورته به برر طوپدن یکر می بش طوپ ترتینه قرار ویریلرک رفته رفته بومقداره ابلاغ اولنمق اوزره اول امرده اون طوپ طاقی ترتیب اولنوب پیاده طوپچیلرندن اوسته و یماق و طوپچی اوله رق هر طوپه اونر نفر تعیین اولنمش ایسه ده سواری طوپچیلرینک بار کیر باقق ایشی دخی اولدیغندن ایکی نفر ضم ایله هر طوپه برر اوسته و برر یماقدن بشقه اوله رق اونر نفر طوپچی ترتیب و طوپ اوسته سنه یوز آچه یومیه و یکر می آچه کسوه بها و یماغنه یمش آچه یومیه و یکر می آچه کسوه بها و نفراته الی بشر آچه یومیه و یکر میشر آچه کسوه بها تخصیص و سنوی بشیوز غروش معاش و یومیه سکز چفت نان و ایکی قیه لحم ایله بر سواری سردن کچدی اغاسی و سنوی بشر یوز غروش ایله بر علمدار و بر باش طوپ اوسته سی نصب و تعیین ایله طوپچی قانوننامه سنه ذیل اولنمشیدی . و بو ترتیب اوزره سواری طوپ عربجهیلری دخی ترتیب و بر طوپ ایله بر جبهه خانه عربه سنی اداره ایتمک اوزره سائر طوپلرک ترتیبی مع خلیفه الی نفر ایکن سواری طوپ عربجهیلرک ترتیبی ایکی نفر زیاده سیاه سکز نفر اوله رق بر نفر خلیفه به یمش آچه یومیه و یکر می آچه کسوه بها ویدی نفره قرقر آچه یومیه و یکر میشر آچه کسوه بها و یرلمک اوزره تنظیم و سنوی بشیوز غروش معاش و یومیه درت چفت نان و بر قیه لحم ایله بر باش خلیفه و سنوی بشیوز غروش معاش ایله خلیفه ملازمی تعیین اولنهرق کذلک عربجهی قانوننامه سنه تدیل قلمنشدیر .

* و فیات اعیان *

سلانیکلی مصطفی پاشا که بالاده بیان اولدینی اوزره کمر کچی ایکن چاوشبائی و متعاقباً روم ایلی والیسی اولوب کمرک امانتده حسن خدمت ابراز ایلمش ایسه ده اداره امور ایالت بشقه مصاحبت اوله رق بونده موفق اوله مدینی جهتله خلعت وزارت قدینه جسدان کورلمدیکنه بناءً چوق کچمکمزین وزارتی رفعله ساقز آطه سنه نفی ایلمش و بعده مملکتده اقامته رخصت و یرلمش ایدی . اشبو ایکیبوز اون ایکی سنه سی او ائلنده وفاتی خبری آئوب وزارتندن دولت مستفید اولمدیسه ده متمول ذات اولدیغندن اول عصرک اصولنجه مخلفاتندن خزینه مالیه متمتع اولدی .

اواسط صفرده صدور عظامدن مفتی زاده سید محمد افندی ایله خزینه دار شهر یاری اسکدارلی سعید اغا و خلال جمادی الاولی ده شیخ الاسلام اسبق مکی افندی و مامه شعبانده ایاصوفه کبیر شیخی بوزاوقلی محمد افندی و رئیس الکتاب اسبق عبدالله بری افندی و رمضانک اون بشنجی کونی رئیس الکتاب راشد افندی و یکر می

يدنجي كچه سي مدت ميديه دنبرو مدقوق اولان تشر يفتحي محمد نعيم افندي
وذي القعدة نك ايكنجى كوني شيخ الاسلام اسبق ابراهيم بك افندي وفات ايلمشدر .

* مفتي زاده سيد محمد افندي نك ترجمه حالي *

متوفاي مشار اليه محمد افندي انطاليه مفتيسنك اوغلو اولوب اياقلى كتبخانه ديوب
معروف اولان ذات فضائل سماتدر . بيك يوزاون ايكي تاريخنده تولد ايدوب يوزسنه
معمر اولمشدر . ترجمه حاليه دائر در دنجى جلده تفصيلات كافيه اولديغندن اورايه
مراجعت اولنه . مشار اليه التمش يديده مدرس وطقسان اوچده يكي شهر ملاسي
اولوب وايكيوز سنه سنده مكه پايه سي وايكيوز بشده صدارت اناطولى پايه سي آلوب
ايكيوز اون برده بالفعل اناطولى قاضيسكري اوله رق مدت عرفيه سنى اكمال ايله
انفصال ايتدك دنصكره اشبو اون ايكي سنه سي صفرينك منتصفنده وفات ايدوب
اسكدارده مسكينر قربنده دفن اولمشدر امور دنويويه اصلا صرف ذهن ايتيوب
كافه اوقاتي نشر علوم وفونه حصر اتمش وهرقنده ماهر وعصرنده بي همتا برفاضل
متبحر اوله رق عصرنده نجه مشاهير علمادن عد اولنانر حضورنده شاكردي مقامنده
دكل ايكن اطوار ورققارى تكلفدن آزاده درو يش نهاد وباك اعتقاد صالح وعابد
برذات كثير المحامد اولوب اقراى منقرض اولدقندن بشقه كنبوي اسماعيل افندي
وتاتارجق عبدالله افندي كبي مسلم عالم اولان شاكر داننك دخى آرقه سنى آلوب
كيتمشدر . آندنصكره در سعاده اول كعبده برذات اياق باصمديغندن خاتمه علماي
روم دينسه سزادر . سلطان سليم ثالث حضر تلى علوم ومعارفه زياده رغب
واعتبار ايتكله رمضان شريفلرده معتاد اولان حضور درس لرنده اجاث علميه تكثير
وتوسع ايدرك مقرر لر ايله مخاطبلر بيننده جريان ايدن مباحثات بياني مخصوصه
ومشاجره شكلنه كيروب يكديكري اقناع واسكات ايدمز اولدقندن نهايت كمسنه نك
برديه جكي قلاماق ومباحثاتك نتيجه سنده حق وصوابه معيار اتخاذا اولتمق اوزره
خواجه مشار اليه باراده سنه حضور درس لرنده بولمغه مأمور اولديغندن درس
كونلري حضورهايونه دخول ايله وضع اولنان مندره اوطوروب مباحثين ومناظرينه
محك رد وقبول اولدينى اولوقتك احوالنه وقوفى اولان بعض اساتذء كرامدن
مسموع اولمشدر .

* مكي افندي نك ترجمه حالي *

متوفاي مشار اليه مكي افندي اندرون هايونندن مدرسلك ايله چراغ اولنان جلب
خليل افندي نك اوغلى اولوب بيك يوز يكرمى التى تاريخنده مكه مكرمه ده تولد

ایتمشدر . در سعادت بعد الورود قرق یدیده طریق تدریسه داخل و تمش طقوزده سالنیک و سکسان بشده شام و طقسانده مدینه منوره مولویتلرینه نائل و طقسان سکرده استانبول قضا سنه و اصل و طقسان طقوزده صدارت اناطولی پایه سیله و ایکیوزده صدارت روم ایلی پایه سیله ممتاز الامائل اولدقن صکره متعاقبا بالفعل روم ایلی قاضی سکر لکیله بکام و ایکیوز ایکی صفر نده شیخ الاسلام اولوب اوچ آی اون درت کون مشیختن صکره عزلی و وقوع بولمش و ایکیوز بشده تکرار شیخ الاسلام اولوب ایکیوز التیده ینه معزول اولمش ایدی . بو کره سنی سکسان التیه بالغ اولدینی حالده روم ایلی حصار نده واقع ساحلخانه لر نده نزول اصابتیه جمادی الاولانک اون طقوز نده وفات ایدوب نمازی فاتح جامع شریفنده ادا اولندقن صکره عبدالرحیم افندی مدرسه سی خطیره سنده دفن اولمشدر . احباب علم و فضلن بر ذات اولوب قصیده برده بی تخمیس و قصیده برئنی شرح اتمش و تفسیر بیضاوی اوزرینه بعض تعالیقات یازمشدر . کوزل تعلیق یازاردی کلی و قفلی و واردر دائماً حصار فقراسنی صدقات و عطایا ایله کوزه درمش بی تکلف و خلوق و صاف نهاد بر ذات مکارم معتاد اتمش .

* عبدالله بری افندینک ترجمه حالی *

بری افندی رئیس الکتاب اسبق حاجی مصطفی افندینک مخدومی اولوب بیک یوز التی تاریخنده تولد اتمشدر . اوائل حالنده تحصیل علوم و فنونه بذل مقدور و مکتوبی صدر عالی او طه سنه مداومتی اثناسنده دخی بوش طور میوب تکمیل معارف و فضائله سعی موفور ایلمشیدی . سکسان ایکی سفر نده پدر یله برابر عزیمت و او طه ده امور مهمه تحریرینه مواظبت ایدوب خلال سفرده خلیفه و مؤخر ا فیضی سلیمان پاشا یرینه مکتوبی اولمش و بش التی سنه صکره خلیل حمید پاشانک صدارت نده راشد افندی بکلکچلیکن مکتوبی بجاغه نقل اولندقه بری افندینک پدری رئیس الکتاب بولنق حسیده بکلکچلیکی کندوسنه توجیه ایتدرمش و مؤخر آینه مکتوبی بجاغه نقل ایدلمش ایسه ده از قدیم دائره سنه منتمی اولان حرمین مفتشی موصالی علی افندی وفات ایدوب بعض جهتلرینی بلااستیذان اولادینه توجیه ایلدیکدن صدر مشارالیه مغبر اولوب نفی مراد اتمشکن توسط شفاعتیه قید نفیدن آزاد و فقط عزل ایله دائره آصفیدن ابعاد اولندقن صکره خلاف مرضیسی اولان سلحدار کتابتی ایله خانه سنده اقامت ایتدیرلمش ایدوکندن .

* بلیت *

بونوبهارده انجق آچلدی لاله و داغ * کشاد غنجه دل قالدی بر اهاره دخی

نشیده سی کندوسنه حسبحال و فقط ایکی یوز ایکی سفرنده اردوی هایوندن بکلکجیلاک ایله و ایکی یوز درنده خیری افندی بوزه نهرنده غرق اولدوقده برینه رئیس الکتاب اولغله مقضی الآمال اولمشیدی . بعده زشتوی و یاش مکالمه لرنده مرخص اولوب اتمام مأموریتدن صکره در سعادتله کلایکنده اگر چه ریاستده ابقا بیورلمش ایسه ده راشد افندی اول عصرده مقبل و مقبول اوله رق ریاسته کلمسی ماتزم بواندیغندن یدی سکز آی صکره بری افندی ریاستدن عزل و بیوک روز نامه یه نقل اولتوب بعده باش محاسبه جی اولدینی صره ده بیخان سلطان کتخدانی دخی و برلمش و اندن صکره کتخدای صدر عالی اولوب برسنه مرورنده عزل ایله عهده سنه نشانجیلاق توجیه بیورلمش ایسه ده اول ائنده سلطان مشار الیهانک اخذ و اعطا سندن طولای بعض خصوصات ایله اتهام اولته رق بروسه یه نفی اولنمشیدی . برقاچ آی ظرفده عفو و اطلاق اولنمش ایسه ده برمدتدنبرو بعض ذواتک مجرد استرقابندن ناشی واقع اولان معاملات نامرضیه سی و علی الخصوص اول وجهله بروسه یه نفی ایدلمش اولسی کندویه داغ درون و ایکی یوز اون برسنه سنده سایمان نام مخدومنک و فاتیه پک زیاده دلخون اوله رق کمال تأثرندن ناشی قواسنه ضعف و خلل طریان و اشبو اون ایکی سنه سی شعباننده وفات ایله غوائل دنیا و مهاجمه رقبادن تخلیص کریبان ایلمشدر .

الی الی تاریخنده دنیایه کلوب الی الی یاشنده وفات ایلمسی توافقات نادره دندر .

نعشی حضرت خالدده کاشغری زاویه سی یولنده پدری مصطفی افندینک اتصالنده مدفوندر . نوری بک تاریخنده برهنوال سابق صدارت کتخدالغندن عزلی ارتکاب رشوته مبنیدر دیو محرر ایسه ده فائق افندی دیرکه متوفای مومی الیه علم و فضل وهنرده اقران و امثالی سابق و شعر و انشا و اداره امور معتابهاده اسلاف و اخلافه فائق و کمال درایت و صدق و استقامته محبوبیتنه بناء اکرام و عنایات شاهانه سزا و لایق ایکن حیف که او ایله بر وجود غدر اخوان و هجوم رقبای بی امان ایله مراتب سامیه یه ارتقاسنده دلفکار و ایکی یوز ایکی تاریخنده صکره روی راحت کور میوب صدمات متعدده روزکار ایله داغدار اولدی . آثارندن وافر اشعار و موردالعقود نامیله صالحه سفریه یه دائر بر رساله بلاغت شعارلری و کتب کثیره هامش لرنده تعلیقات حقایق آیاتلری وار ایسه ده وفاتلرنده دامادی اولان زعیم زاده صادق افندی معرفت قدری بیلمز بر جاهل و نادان اولدیغندن جمله سن پراکنده و پریشان ایلدی . اثر خیرلرندن لاله لیده کائنات خانسی قارشوسنده بر مکتبی و اوقافی وار در . مرحومک علم و هنر ایله اتصافدن بشقه اخلاق حسنه و اوضاع مستحسنه سی زبان زد صغار و کبار و ایراد لطائف مضامینه مائل نادره کوی ظرافت شعار و غره ناصیه اعصار سنخی و کریم برذات محاسن و سیم ایدیلر .

* رئیس راشد افندینک ترجمهٔ حالی *

مشارایه راشد افندی دیوان هایون کتبه سندن قیصریه لی جعفر فوزی افندینک
صلبندن واصف افندینک تحریرینه کوره بیسک یوز التمش ایکی وفاق افندینک
تحریرینه کوره التمش بدی تاریخنده تولد ایدوب لیل ونهار تحصیل معارفه صرف
مقدرت وقلم مذکورده مداومت ایله ناصیهٔ حائنده لمعان ایدن انوار رشد
وسداد و مجبول اولدینی استعداد مادر زاد اقتضاسنجه امثال واقرائی میاننده تمیز
وسکسان ایکی سفرنده بالاستقلال رکاب هایوننده رئیس و کیلی بولنان اسماعیل رائف پاشا
کندوسنک درجهٔ قابلیتیی تقدیر ایله کتبهٔ سائره میانندن افزاز واموره همه دهه استخدام ایله
ممتاز ایلمش اولمق حسیله باب عالیده تحیز ایدوب اردوی هایونک در سعادتیه عودتنده
رائف پاشا بالاصاله رئیس و خیری افندی بکلکچی اولدقده اودخی بکلکچی کیسه داری
و خیری افندی رئیس اولدقده بکلکچی اوله رق قدر و اعتباری ترقی بولمش و خایل
حمید پاشا صدارته کلدکده فی الاصل مومی ایله حجر تریبه سنده پرورده اولمق جهته
مأموریتی مکتوبجیلغه نقل وانک انضمانده بودخی ید رشوت اولمق عزو و اسنادیله
عزل اولنوب در سعادتین طرد و ابعاد اولنمق مراد اولنمش ایکن نقد کیران عصرک
حمایه لر یله او ورطه دن رهایب و وارستهٔ اضطراب اولمش ایسه ده بوملاسه ایله
کوکب اقبالی قرین افول و برمدت کوشه کزین خول اولمشیدی . خیری افندی
ترسانه امانتندن ریاسته نقل و تحویل اولدقده اودخی ثانیاً بکلکچیلکک نائل
و ایکیوز ایکیده فیضی سامان پاشا یرینه منتهای مراتب کتاب اولان مقام ریاسته
واصل اوله رق اول ائنه ده اردوی هایون ایله برابر چیقوب مهاده محارباتندن
صکره اردونک روسجقه عودتنده رکاب هایوننده رئیس و کیلی بولنان نحیفی افندی
وفات ایتمکله امور دیوانیه و واقف واحوال دول افرنجیه بی عارف برینک اردوی
هایوندن جلب و ریاست و کالته نصب اولنمش لازم کیلکله اردوی هایون رجالندن
بو اوصاف ایله متعف برینک ارسالی یوسف پاشایه با امر هایون تحریر اولنمقندن ناشی
یوسف پاشا صاحب ترجمه بی بطانتهٔ اموری عد و اودخی منافعهٔ متفندان یوسف
پاشایه قارشواسن روز کارلری سد ایلمک اوزره بینلرنده جریان ایدن مقالوله
پیمان و یمین ایله تأیید و تأمین اولدینی عقبنده در سعادتیه کوندر یلوب بو طرفده
دخی سلطان سلیمک توجه و التفاتی قزاقمش اولدیغندن ایکی بیجق سننه ظاهرده
و کالت و باطنده بالاستقلال ادارهٔ امور ریاست ایدرک امور کایسه و جزئیته نیک رؤیت
و تمشیتی رد و قبولنه منوط اولمشیدی . اردوی هایون ایله کلان رئیس بری
افندینک در حال عزلی روا اولدینی مثللو راشد افندینک بوشده قلمسی دخی سزا

کورمديکندن اردوی هاپونك ورودنده چاوش باشی ویدی سکز آی مرورنده
 رئیس الکتاب اولوب بودفغه دخی ایکی سنه دن افزون او خدمته ملابس ومقرون
 اولوب احوالی مفتش اولان کبرای دولتک بعضیسندن متوحش اولدیغنه بناءً
 صورت استغنا واستفاده بولنمی حقنده موجب اغبرار اولغین ریاستدن عزل ایله
 ایکی سنه یه قریب خانه سنده اقامت ایتدکن صکره صدراعظم عزت پاشا وشیخ الاسلام
 افندیك نیازلریله ترسانه امانته نائل وبعده ایکیوز اون ایکی اوائلنده راسخ افندی
 یرینه ینه رئیس الکتاب اوله رق ینه مقصدی حاصل اولمش ایسه ده صدراعظم
 عزت پاشا ایله ینلرنده برودت ومباینت واقع ومستمر ونزد شاهانه ده عزت
 پاشانك هرسوزی مشمر ومؤثر اولمقدن ناشی پك زیاده انفعال ایله خسته حال
 اولوب نهایت سنه مرقومه رمضانك اوائلنده ناکاه نزول اصابت ایدرك ماه
 مرقومك اون بشنجی جمعه ایرتسی کونی وفات ایتدیکنده نغشی بازید جامع شریفی
 خطیره سنده دفن اولمشدر متوفای مومی الیهك ترجمهً حالی بیان سیاقنده واصف
 افندی دیرکه راشد افندی عزت پاشا ایله حضور وعباده همدم وهر حاله محرم
 ایکن مشارالیه بعض مواد ضمننده مومی الیهدن مستشعر اوله رق مطلع ریاستدن
 مقطع حیاته ندهك شاور وخالف معامله سیله مومی الیهی داغدار ومتأثر ایتمشیدی
 بو حال ایله مریض وخسته ودغدغه عالم فانیدن وارسته اولدی مومی الیه حدید
 الذهن ومتقطن ووقور ومتمکن صفت سخا ایله بنام وسرعت کتابتله پیشوای
 کتبه اقلام اولوب آنجق ناسه سوء ظنی غالب وهرکس مکرندن هارب اولوب ادنی
 سعایت ونفاق ایله شیفنی فدا ایتك عادتی ومکر ایله یکی آدمه تقیه صورتنده اکرام
 مقتضای مجرای مصاحتی اولوب تمادیء ایام اقبال ایله اقتسای اموال ووفاتنه دك
 ضعف حال نه اولدیغن بلمیوب محسود امثال اوله جق طرائف استملا کیه افراغ
 آرزوی بال ایدرك انتقال ایلی باین جمله مرکز صداقتده قائم وجودی لازم ایلی
 ترك ایلیکی اموال کثیره سنه جانب میریدن تعرض اولنمیوب خدمت و صداقتنه
 حرمت وآخرلره تازیانه شوق ورغبت اولمق ایچون طرف هاپوندن خسیس ونفیس
 نهیه مالک ایسه اولادینه احسان ایله وفاتند نصکره بیله مظهر اکرام پادشاه قدردان
 اولدی انتهی فائق افندی دخی دیرکه صدر وقت اولان عزت محمد پاشای ثانی
 صاحب ترجمه نك سوق وتشویقیله صدارته کتورلمشیکن مجرد ایکسنك دخی کبر
 وتعظمی میانه لرنده حدوث عداوتی ایجاب ایدرك عزت پاشانك سعایتی کندو حقنده
 کارگیر اولسنه انفعال واول غم مهلك وجودینی قرین علل واختلال ایدوب
 عاقبت اواسط رمضانده ارتحال ایلی .

* شیخ الاسلام اسبق ابراهیم بك افندینك ترجمه حالی *

مشارالیه پدري و زراى عصر محمود خانیدن عوض محمد پاشانك كمر كیاسكى هنكامى اولان بيك يوز يكرمى یدى تاريخنده تولد ایدوب قرق التیده طریق تدویسه دخول ایله الی ایکیده یکیشهر قنار والی طقوزده بروسه و التمش ایکیده مدینه منوره و التمش بشده استانبول قضاالینه وصول بولوب و تمش اوچ سنه سی اناطولی پایه سیله تکرار استانبول قاضیسی اولوب بشده بالفعل اناطولی قاضی عسکری و سکسان تاریخنده روم ایلی قاضی عسکری و سکسان بشده مکرراً روم ایلی قاضی عسکری اولدقدنصکره سکسان سکنر سنه سنده مقام مشیخته کتورلمش ایسه ده حدت مزاجی اولدیغندن صدر عصر اولان عزت پاشا ایله طولمه بغچه ده دونمای هایون خروجنده واقع ضیافتده بر ماده جزئی دن طولای معارضه ایدرک کمال تهور ایله قالقوب خانه سنه کیمسى موجب اغبرار پادشاهی اولمغله سکسان طقوز تاریخنده عزل اولنمش و خلیل حمید پاشا ایله درى زاده عطاء الله افندینك دفعه عزل لری وقعه سنك ظهورنده الی اولمق ملایسه سیله طقسان طقوزده تکرار شیخ الاسلام اولمش ایسه ده فی الاصل اطوار و کرداری موافق طبع شهر یاری اولماق حسیله ینه سنه مرقومه خلالنده عزل و اقریه نفی اولنوب مؤخرأ کندو استدعاسیله منقاسی بروسه یه نقل اولندقدنصکره سلطان سایمك جلوسنده او مثللو منفیلرک عفو و اطلاق صره سنده او دخی اطلاق ایله در سعادت کتورلمشیدی اولوقدنبرو خانه سنده اقامت اوزره اولدیغی حالده اشبو اون ایکی سنه سی ذی القعدة سنك ایکنجی کونی سکسان بش یاشنده اولدیغی حالده حلول اجل موعودیه ارتحال ایدوب بایزید جامع شریفی خطیره سنده دفن اولنمشدر نوری بک تحریرینه کوره اگر چه علوم و معارفدن بی بهره و غایت حدید و متهور و عزت نفسه مائل ایسه ده طوری کبارانه طویل القاهه کثیف اللحیه مهیب و عجیب بر ذات ایش و اصف افندی مشارالیهك ترجمه حالی بیان سیاقده اولکی مشیخته صدر اعظم عزت پاشا ایله و قوعبولان منازعه سندن طولای عزلتی بیان ایستد کدنصکره دیرکه طقسان طقوز جمادی الاول سنده مکرراً مفتی الانام و حلال مشکلات خاص و عام اولمشیدی . او خلالده اور تانغی خالی بولوب دست حرص و آزی دراز وقتی چوق کیمسه لری تجریم ایله محتاج نان و بیاز ایلدیکنه بناء شعبانك اون دردنجی کونی مشیختدن عزل اولنوب بعده آر په لنی اولان اقریه اجلا و جلوس هایونده منفیلرک سیلیری اخلا اولنوب بونلر دخی کلوب خانه لرنده مقیم گوشه انزوا و تاریخ مرقومه عازم سمت عقب اولدیلر . مشارالیه مهیب

و مشکل و تعزز نفس ایله مثل جسور و غضوب جوج و هیوب علم و کالدن بی بهره و نصیب و نفسانیت و اغراض ایله شهرهٔ بعید و غریب بر کیسه ایدی تجاوز الله عن سیئاته .

* بعض توجیہات *

بالاده بیان اولندی بی اوزره منصب ریاستده یکدیگره رقیب اولان بری و راتب و رئیس الکتاب راشد افندیلردن بری افندی شعبانده و راشد افندی رمضانده و فات ایدوب راتب افندی دخی سعایت رقبا ایله مبعوضا منفاده بولندی جهته اشاغیدن براهیتلوزانک مقام ریاسته کتورلمسی لازم کلیمکه چند روز ملاحظه دن صکره بش التی سنه دنبرو آمدجیلک خدمتمده بولان و اقران و امثالی میانده لیاقت و حیثیتی و فن انشاده مهارتی مسلم اولان احمد عاطف افندی رئیس الکتاب نصب اولمغله آمدجیلک دخی سابق مکتوبچی سر خلیفه سی غالب افندی یه احاله بیورلدی . چونکه ایکویوز طقوز سنه سنده ابراهیم نسیم افندی مکتوبچی اولدقده غالب افندی سر خلیفه اولوب رفیق افندی یه دخی ایکنجی خلیفه لک اعتباری ویرلمشیدی . انجق ابراهیم افندی رفیق افندی بی مستصحب اولدیغدن آنی سر خلیفه ایتمک ایچون اون بر شوالی توجیهاتنده غالب افندی بی خلاف مرضیسی اولان جبه جیلر کتابتی ایله اخراج ایتمشیدی . بو جهته غالب افندی منکسر الخاطر بولندی حالد و والده کتخداسی یوسف اغانک تصحیله بو کره آمدجی نصب اولمغله مجبور الخاطر قلمه شدرو . طربزون و الیسی و فاش محافظی بیجان زاده علی پاشا و فات ایتمکله و ارضروم و الیسی ضیا پاشا بعض اشقیای اکرادک استیصالنه مأمور اولمغله جانبک و طربزون سمتلردن جلب ایده جکی عساکرک اخراجنه مدار سهولت اولمق اوزره بو اوانده ارضروم ایالتی دخی الحاقاً ضیا پاشا عهدده سنه احاله بیورلمشدر .

* امور مالیه *

مضایقهٔ مالیه کوندن کونه ترقی ایتمک حسبیلله مجدداً بعض واردات تدارکنه حاجت مس ایتدیکندن حما و حصص و معرة النعمان و مزارع حصن الا کراد مقاطعه لری ایچون الی بر بیک بشیوز غروش فائض تقدیر وهر بر کیسه سی بر حصه اعتبار ایله هر بر حصه سی بشر بیک غروشه اولمق اوزره جانب میریدن طالبلرینه فروخت ایدمک و بونلرک فائضلری ایکی تقسیطه و بطله تقسیط اولی جزیران ابتدا سنده و تقسیط ثانیسی کانون اول ابتدا سنده ویرمک و محمولاتی ضبط اولمغله ینه طالبلرینه صانلق و قصریدی جائز اولمق اوزره اشبو اون ایکی سنه سی خلانده نظام ویرلمشدر .

و مقدماتاً ایراد جدید خزینه سی تشکیل ایله بعض واردات تخصیص اولندیغی صروده سنوی فائضی اون کیسه دن زیاده اولان میری و حرمین مقاطعه لری محلول اولدقجه صاتمیبوب ایراد جدید خزینه سنه ضبط اولنق و اون کیسه دن دون اولنلری سکنز سنه لك معجمله ایله برقاعده طالبلرینه فروخت قلمق خصوصی دخی تنظیم اولنمش . و اول صورتله ایراد جدید خزینه سنه ضبط اولنمش اولان مقاطعات میریه نك معجلاتی اوله رق بش سنه لك حسابیه برسنه مقایسه اولندیغنه نظر آ سنوی خزینه عامر هیه درت یوك یتش ایکی بیک بو قدر غروش مقطوعاً و حرمین مقاطعاتنك محلولاتی كذلك ضبط اولندقجه تحقیق اولنان فائضه كوره یه بش سنه لك اعتباریه معجمله سی ضربخانه یه اولوجهله ایراد جدید خزینه سی طرفندن تسلیم اولنمقده بولنمش اولوب بو اوانده اکرچه ایراد جدید خزینه سنه ایجه وسعت کیش ایسه ده منبع اصلی واردات اولان میری خزینه سنك مضایقه سی زیاده ایدوکنه و برده استانبولده رجال و کبارك تعیشی مقاطعات واسهم وارداتنه منوط اولدیغندن اون کیسه دن زیاده فائضی اولان مقاطعات صاتمیز اولدیغی جهته خلقجه دائره واردات تضایق ایلدیکنه بناءً بوکره فیما بعد سنوی فائضی اوتوز کیسه دن زیاده اولان مقاطعات شروط جدیده اوزره ایراد جدید خزینه سندن ضبط اولنوبده آندن اشاغی اولنلرک طالبلرینه فروخت اولنمشی و بو تقدیرجه مقطوعاً میری مقاطعاتنك معجمله بدلی اوله رق ایراد جدید خزینه سندن خزینه عامر هیه شهریه یه تقسیم ایله و یریه کلان درتیوز یتش بو قدر بیک غروشک ثلثانی اون کیسه ایله اوتوز کیسه آره سنده کی مقاطعات میریه معجلاتنه تقاصاً تنزیل اولنه رق برثلثی اولان یوز الی یدی بیک بو قدر غروشک بهر سنه ایراد جدید خزینه سندن کما فی السابق میری خزینه سنه ماهیه اعتباریه اعطاسی و کذلك فائضی حد معیندن زیاده اولوبده ایراد جدید خزینه سنه ضبط اولنه حق حرمین مقاطعاتنك بش سنه لك معجمله سنك ضربخانه عامر هیه تسلیم اولنمشی و بر محلول مقاطعه صاتیله جق اولدقده رغبات ناس منقطع اولنجیه دك لا اقل اوتوز کون علناً مزایده اولنوب هر کیم بش غروش زیاده و یرر ایسه اکا و یریه رك خاطر و شفاعته باقلماسی و سکنز سنه لکنندن نقصانه مقاطعه و یرلما مسی و نسوانه مقاطعه و یرلمسی اوته دنبرو ممنوعانندن اولوب نسوان طائفه سی ایسه جهت اخری ایله مدار تعیش تدارکنده عاجز بولندقلرینه منی بعد ازین اسهم قصر یدینك آنلره دخی تعمیم ایدلمسی و فقط محلول اولان اسهم حصه لری کماکان ایراد جدید خزینه سنه ضبط اولنوب اوج سنه لك معجمله سی میری ایسه خزینه عامر هیه و حرمین ایسه ضربخانه معموره یه ایراد جدید

خزینہ سندن تسلیم قلمسی خصوصاً نظام اتحاد اولنہرق قانوننامہ یہ ذیل اولندی .
 خبرہ جی ولغمجی او جاقلرینک معاش و یومیہ لری شهر یہ به مرتب اولوب اولوجهله
 ماه بماه اعطا اولنمقدہ ایسہده دولت علیہده اوتہدنبرو اوچ آیدہ علوفہ اعطاسنہ
 آیشلمش اولدیغندن بویله هر آی باشنده ایفاسی کوچ کلہرک بوندن صکرہ سائر
 او جاقلر کبی بونلرک دخی تخصیصاتی مواجبه ترتیب ایله طوئحی وعربہ جی
 او جاقلری کبی یولسلہ آلنوب قشلہ لرنده ضابطان مواجبه سننده سرکی فرشیله
 توزیع اولنق وکلہ جک سنہ جدیدہ محرمنده اخراج اولنہ جق مواجبدن بدأ ایله
 هر بار علوفہ چیقدیغنده دیوان هایونہ یالکز او جاقلرک چاوش وکاتبلری کلوب
 قبه آلتندہ لازم کلان مواجبلرینی آلمق اوزرہ قرار ویرلمشدر .

* قرہ طاغہ دائر حوادث *

بو اواندہ وکلای دولت علیہ داخلی و خارجی برچوق مسائل مهمہ ایله مشغول اولدینی حالده
 برلین سفیری عزیز افدینک بر قطعہ توصیه نامہ سیله در سعادتہ ایکی فرنک کلوب
 بریسی دیمتری قونتهده ویخ نام و عنوان ایله قرہ طاغ بکلکی داعیہ سننده بولنہرق
 بیہودہ بر طاقم تقریر لر تقدیم ایله باب عالی نی تصدیع ایلردی . شویله کہ : عزیز
 افندی برلینہ واردیغندہ مرقوم ویخ کیدوب کندوسیله لدی الملاقاة نم اصلم قرہ
 طاغ اودر مدت مدیدہ فرانسه ونمچہ ممالکنده اقامتدن صکرہ وطنمہ واردیغندہ
 قرہ طاغ اھالیسی بی پرنسلکہ قبول و انتخاب ایتدیلر انجق بعض امور مهمہ
 ضمنندہ انکلتریہ واروب اورادن برلینہ کلدیم سزک کلہ جککزی استماع ایله
 بورادہ توقف و انتظار ایتدم غرضم قرہ طاغ اھالیسنک سنوی مقدار معین
 جزیه ایله رعیتہ قبولیلہ زیر سایہ پادشاھیدہ محمی بیورلمقلغمز نیازی ایچون
 در سعادتہ کیتمکدر یدیمہ بر کاغد ویریکز دیمسیله عزیز افندی دخی مرقومک
 قول خودینی حکایہ یولندہ ایکیوز اون ایکی سنہسی ربیع الآخرینک یکرمی
 بشی تاریخیلہ مورخ یدینہ بر قطعہ توصیه نامہ ویرمش اولدیغنه مبنی مرقوم ویخ
 در سعادتہ بالورود بر نقر رفیقیلہ سنہ مرقومہ شعبانندہ باب عالی یہ کلہرک مذکور
 توصیه نامہینی بعدالتسلیم بر قطعہ تقریر دخی تقدیم ایلمشدر . تقریر مذکورده
 کندوسی فی الاصل اسلاو ملتدن وروم مذہبندہ اولوب مدت مدیدہ لهستاندہ
 خدمتی سبقت ایتمکله مقتول فرانسه قرالنک برادرلرینک مظهر توجه واعتمادی
 اولہرق کندوسنی عسکر جمعہ مأمور ایتلریلہ وقرون ماضیہده کندوسنک آبا
 واجدادی قرہ طاغده حکمدار اولنق مناسبتیلہ جمع و ترتیب عسکر ضمنندہ قرہ
 طاغہ واردیغندہ قرہ طاغ اولر اسکی حکمدارلرینک حیدینی کوردکلری کبی

كندوسنی حکمدارلغه دعوت ایدوب اودخی محظوظ اولمش ایسهده سالف الذکر
 قرال قرداشلرینک اردوسنه عودت ایتمک اوزره سوز ویرمش اولدیغندن
 دعوتلرینه اجابتی وقت آخره تعلیق ایدوب قرال قرداشلرینک عسکری پریشان
 اولدقن صکره قره طاغه عودت ایتدیکنده ملت عقد جمعیت ایدوب متره پولید
 ومدیرلری حاضر اولدیغی حالده رخصت کامله ایله کندوسنی حکمدار نصب ایله
 دیدینه برقطعه انتخابنامه ویرمش اولدقلمی مقدمات مموهسنی بسط وتمهید
 ایتدکن صکره طرف دولت علیهدن قره طاغ اهلایسنک حمایه اولنسی وبو
 انتخابلرینک تصدیقه کندوسنه بکک پایهسی احسان بیورلمسی و محاربه وقوعنده
 دولت علیه قره طاغ اهلایسندن عسکر ترتیب ایدهجک اولدقده علوفه ویرمسی
 وقره طاغ سمتدن دشمن هجومی منع ایچون مقدار کفایه عسکر تجهیزینه مرقوم
 وینجک متعهد بولنسی . و سنوی تعیین اولنهجق خراجی طرف دولت علیه
 هرسنه ادا ایتمسی . وبو خراجک قره طاغه الحاقی تنسیب اولنهجق اراضی به
 مناسب اولمسی . موادی مندرج بولمشدر . و مرقوم وینج ابتدا عسکر ترتیبی
 ایچون برمنوال مشروح قره طاغه واردیغنده اشقودره متصرفی قره محمود پاشا
 ایله بالخابره آندن دخی قرال قرداشلری نامنه اولهرق درت بیک عسکر ایسته مش
 واو دخی اعطاسنی وعد ایلمش اولدیغنی درمیان ایدوب اثبات مدعی ضمننده
 محمود پاشانک کندوسنه ایتالانجه یازلمش برقطعه مکتوبنی دخی ابراز ایتمشدر .
 مکتوب مذکورده عسکرک علوفهسی سویلشیلوب قرار ویرلمک اوزره یالانفس طرفه
 کلیکز یاخود بروکیل کوندریکز دیو محرر اولوب انجق تاریخی بش سنهک اسکی
 اولدیغی کبی کندوسنک قره طاغ بککنه انتخاب اولمش ایدوکنی حاوی قره طاغ اهلایسی
 طرفدن اولمق اوزره ابراز ایلدیکی انتخابنامهک ذیلنده دخی مرقومک ربط
 ایدهجکی عهد و شروطی قره طاغ اهلایسی قبول و تصدیقه متعهد ایدوکنه
 واره جعی دول نزدنده اعتماد حاصل اولمق ایچون ایالت مهریله مهور اشبو سند
 اعطا اولندی . میلاد حضرت عیسانک بیکیدی یوزطقسان بش سنهسی اغستوسنک
 ابتداسنده لوشین نام محله محرردر دیو یازلمش اولوب اشبو تاریخ عیسوی دخی
 هجرتک بیک اکیوز اون سنهسی اوائلنه مصادف اولمغه بوسنک تاریخی عتیق اولدیغی
 کندوسنه ایراد اولندقده دولت علیه اراده ایدر ایسه قره طاعدن جدیدنی جلب
 ایدرم دیمش ایسهده قره طاغ اولر هر تقدیر حال عصیان و سرکشیده بولمشلر ایسهده
 ذاتاً دولت علیه رعایاسندن اولوب زی و قیافتلری دخی رعایا قیافتی اولهرق قیافتجه
 ایله فرنگلره مشابهلری اولدیغندن باب عالیجه سوزلرینه اعتماد اولنه میوب سنک

تاریخچه و سیاق حاله نظراً بونلر بر قاچ سنه آخر طرفلرده کشت و کذار ایدرک
 نمچه و فرانسه دولتلی بیئرلرند و ندیکک انقسامی اوزرینه دولت علیه کیش
 اولملری شبهه و ملاحظه کتورر مواددن کورندیکنه منی تحقیق ماده ضمننده
 روم بطریقخانه سی طرفندن قره طاغ متره پولیدینه و سائر سوز صاحبزینه خیفه
 مکتوبلر یازیلوب آدملر کوندرلمشدر .

مرقوم و پنج بوآرده تکرار برقطعه مفصل تقریر اعطایله ایضاح مواد ایلمشدر .
 شویله که : قره طاغ اها لیسندن لدی الحاجه دولت علیه استخدام ایده چکی عسکره
 بیکر نفردن مرتب هر بر بلوک ایچون بهر ماه بروجه پشین اون برر بیک
 غروش اجرت و یرمک و وقت آسایشده دولت علیه سنوی اون بیک نفره بر آبق
 اجرت یعنی یوز اون بیک غروش و یروب نفرات مرقومه دخی هر سنه بر آی
 مدت تعلیمات حربیه به اشتغال ایتمک و قره طاغ لولره طرف دولت علیه دن دفعه
 یکر می بیک تفنک و اولقدر پشتو و چند قطعه طوپ و یرمک و فیما بعد قره طاغ لیلر
 ایله ارناودلر بیئرلرند هر کونه منازعه بی دفع ایچون زطه نهرینک برو اوته طرفنده
 واقع قره طاغ لیلرله محاط اولوب بیر نام محله اشقودره کولی قولنه وارنجه زطه
 ناحیه سی دیمکله معروف اولان محل ایله ساحل بجرده بار ایله نمچه ایمپراطوینک
 یکیدن ضبط ایلدیکی اراضی میاننده واقع یرلر قره طاغ الحاق ایدلمک و قره طاغ
 بکلکنک محلولیتی وقوعنده آخره کیفیت انتقالی حالا بکک و ملت مشورتک انضمام
 رأیله بر صورت حسنه به ربط اولتمق و قره طاغه یکیدن بک اوله جق کیمسه یابالذات
 در سعادت کله رک اصالة و یاخود مبعوثلر ارسالیله و کالة دولت علیه به صدق و عبودیت
 لوازمی اجرا ده ثابت قدم اوله جفته مین ایلمک و افلاق و بغداد بکلی حقنده مرعی
 الاجرا اولان رسوم قره طاغ بکی حقنده دخی اجرا قلمق و قره طاغ عساکرینک اوچ
 کونک مسافه دن زیاده قره طاغ حدوددن تباعدلرینی یاخود بجر ا اعماللرینی دولت علیه
 مطالبه و تکلیف ایتمک و ایجاب ایدرسه بالخابره طرفینک رضاسیله نظام و یرمک .
 و قره طاغ بکی او توز بش بیک عسکر ترتیب ایله ایام حضرده اون بیک نفرینه
 بر منوال مشروح سنه ده بر آی تعلیم فن حرب اولتمق . و بو اون بیک نفر هر وقت
 و خالده دولت علیه نک امری و رودندن سکز کون مرورینه دک مأمور قلنه جقلری
 محله عزیزته متهی بولتمق . و دیگر یکر می بش بیک نفری دولت علیه نک امری
 و رودندن نهایت او توز کون مرورنده حاضر و آماده اولمق . و بهر سنه شهر
 حزرانده قره طاغ اها لیسینی طرفندن اوچ یوز بیک قه پیانگی میری طرفته و یرمک
 شرائطی درج اولندقدن سکره پیانینگ قه سی یکر میشر پاره تقدیر اولنسه او چیوز

بيك قيه سنك بدلی یوزالی بيك غروش اولوب برموال سابق دولت عليه نك سنوی ویره چکی یوز اون بيك غروش عسکر علوفه سی بوندن تنزیل اولندقدہ قرق بيك غروش واردات صافیه قاله جنی وقره طاع بووجهه نظامه ربط اولندیفی حالده بدخواهانك اضلال والقاآتی بلیه سندن خلاص اوله جفندن بشقه اول طرفدن ممالك محروسه ایچون برسسدید اوله جنی مطالعه لرینی دخی علاوه مقال ایلمشدر .

قره طاغدن اوتوزبش بيك عسکر ترتیب ایتمک قابل اوله میه جنی اربانک معلومیدر . قالدیکه اولوقت برداً قطعه سندن پیری وواسویک وسائر ناحیه لر هنوز قره طاع ایله اتحاد ایتمش اولیوب نقشیک وقولاشینده بیله قره محمود پاشانک بلوکاشیلیری اوتوررایدی . مرقومک قره طاغه الحاقی ایستدیکی یرلرایسه اشبوزی وپودغوربیچه وژابایق اراضیسیله دکز طرفنده اسپچ ناحیه سی اولوب بو یرلرک قره طاغه الحاقی اصلا قابل دکل ایدی . بناءً علی ذلک مرقومک تکالیفی اصغا اولنه جق شیلردن اولمندیفی حالده قره طاغده نوجهه معامله جریان ایلمش اولدیغی بیلیمک ایچون بروجه سابق روم پتر یقخانه سی طرفندن تحقیق ماده اولنسی اراده بیورلمش ایدی . لکن متعاقباً مرقومک ورفیق غاسپارک برآغز حاقی دسیسه کار اولدقلری استخبار قلمشدر . شویله که : فرانسه جمهورینک درسعادتده بولنان مصلحتکندارینه وارد اولان اخباره نظراً مرقوم وینچ مقدما نمچه ممالکنده بولنان فرانسه شهزاده لرینه واروب بن خروات ولایتک بکیم فرانسه جمهورى علیه نه هجوم ایده جک دول متفقه عسا کریله برلکده اوله رق اون ایکی بيك خروات ایله فرانسه دیارینه دخول ایدرم دیوسوز ویروب الداتمش . وبعده فرانقفورت شهرنده قلنزناک ایله طویله رق هر نصلسه فرار ایله مجازاتدن تخلیص کریبان ایتمش وسائر محللرده دخی خرواتستان بکیم دیو طولاندریجیاق وادیلرنده کزوب انجق هر یرده صحیحی طویله رق بریرده کندوسنه یوز ویرلماش . ورفیق اولان غاسپار دخی بویله طولاندریجی و دسیسه کار بردر بدر شخص ایتمش دیومصلحتکندار مومی ایله طرفدن باب عالی به اخطار اولنمشدر .

* اخبار خارجه *

اقدمجه ویانه ایلچیسی عقیف افدینک ایمراطور ایله کیفیت ملاقاتنه دأترتحریرات مصله سی آلدیغی کبی متعاقباً پارس ایلچیسی علی افدینک دخی پارسه مواصلته وفرانسه جمهورینک مدیران خمسسه سیله ملاقاتی کیفیتنه دأترتحریراتی کلش اولدیغندن ارتق اوروپانک احوال بولتیقیه سنه دأترتحریراتلرینه انتظار اولنمقدہ ایکن عقیف افدی طرفدن نمچه دولتیله فرانسه جمهورى بیننده عقد مصلحه اولدیغی خبری آلمشیدی .

شویله که : بالاده بیان اولندیغی وجهله فرانسه جنرالی ناپولیون بوناپارته ایستالیاده غالب ومظفر اولوب افکار جمهوریه بی نشر وتروج ایله کندویه قوت ویرد کدنصکره نمچه اردوسنی تعقیب ایدرک اوستریا ممالکنه دخول ایله ویانه یه طوغری حرکت ایلدیکی ائنده تیروول وبوهمییا ومجارستان اهالیسی کافهٔ سلاحه طوراملریله فرانسه اردوسی برتهلمکه لی حاله دوشوب بووقته قدربی طرف طوران وندیك سناتوسی فرانسه اردوسنک بوخطره دن قوریتیه میه جنی اعتقادینه ذاهب اوله رق وندیك اهالیسنی فرانسه علیه نه تحریک وتشویق ایتمکله برچوق فرانسزلر وندیكلولر طرفندن قتل واعدام اولنمشیدی ، بوناپارته دخی بولندیغی تهلمکه بی فهم ایدوب اوستریاو بوندن استفاده قیدینه دوشمک لازمهٔ حالدن کورینورکن بعض مرتبه مصالحه یه میل کوسترمکله بوناپارته طرفندن واقع اولان تکلیف اوزرینه بیك یدی یوز طقسان یدی سنهٔ عیسویه سی نیسان فرنکیسنک اون سکزنده (لئوین) نام محلهه مقدما مصالحه تنظیم اولنمشیدی .

بونک اوزرینه (قامپوفورمئو) نام محلهه مکالمه یه شروع اولنوب خیلی وقت ممتد اوله رق نهایت تشرین اول فرنکیسک اون یدی سنده عقد اولنان مصالحه ده وندیك ممالکی ایکی دولت بینده تقسیم اولندی .

شویله که : اوستریا دولتی طرفندن بلجیقا مملکتی فرانسه یه ترک وایتالیاده لومباردیا دوقه لغیله ماتوه قلعه سنی حاوی اولمق اوزره اقدمجه بوناپارته طرفندن تشکیل اولنان (جیزالینا) جمهوری تصدیق اولنوب وندیكلویدنده بولنان جزأ سبعة ایله (البانیا) ازانوادلق طرفنده کی لودرینو نام لیمانک اشانغی طرفنده کی یرلر یعنی (پروزه) و (پارغه) و (ویجه) و (پوترپنتو) ناحیه لری فرانسه یه عائد اولمق اوزره وندیك شهری وکورفزی ودالمباجیا قطعه سی ایله بوندن اقدم وندیكلویدنده بولنان قاتار ولیمانی دخی اوستریالی اخذ ایلمشدر .

ذکر اولنان نواحی اربعه ازانوادلق جوار وساحل لری اولدیغندن فرانسه لو روم ایلیده دولت علیه ایله هم حدود اولمشدر .

بوناپارته ذاتاً وندیك جمهورینک سفائن ومهماتنه طمع ایتمکده اولدیغی حاله برمنوال سابق وندکلولرک فرانسز علیه نه قیام ایلمش اولملریخی تمام اجرای مافی الضمیره وسیله اتخاذایدوب بروجه سابق مقدمات مصالحه تنظیم اولندوقده وندکلولر استیان ایتمشدر ایسه ده اصفا ایتموب همان شهر مایسه وندیك اوزرینه سوق عسکر ایدرک موجود بولنان سفائن ومهماتی ضبط وکلیدسارده بولنان ذیقیمت اشیا بی وکتبخانه لرده اولان کتب نادره بی اخذ ایتد کدنصکره ممالکنک اکثرینی بروجه مشروح اوستریا یه ترک

ایتمش و بونجه سنه لردنبرو قوه بجریه سی هر طرفه مشهور اولان و ندیک جمهوری
محو اولوب تمشدر .

ایشته مذکور مصالحه خبری اشبو اون ایکی سنه بجریه سی جمادی الاول سنک
غره سنده (یح) ویانه شهرینه واصل اولدینی کبی عقیف افندی در حال رئیس افندی یه
برقطه تحریرات یازوب استافتا تعبیر اولنور پوسته ایله بلغراد محافظه و اودخی سر یعاً
استانبوله ارسال ایتمکله ماه مرقومک اون التنجی کونی استانبوله وصول بولدقده
هنوز بک اوغلنده کی سفرا خبر آلامش اولدق لردن تر جانلری واسطه لریله کندولرینه
اخبار کیفیت اولمش و بومقوله خبر لری باب عالی اوته دنبرو آنلردن آلورکن سلطان
سلیمک وضع ایلدیکی سفارت اصولک محسنتندن اوله رق بوکره آنلره معلومات
ویرلسی بادی مفخرت اولمشدر .

فرانسه ایلچیسو ایردبایه نک وفاتی اوزرینه قراستسیر فرانسه مصلحتکنداری تعیین
اولمشیکن مؤخرأ عزل ایله یرینه دوفن مصلحتکندار اولدی .

وینه بوئانده روسیه نک درسعات ایلچیسو اولان قوچو بک عهده سنه روسیه
خارجیه نظارتی توجیه اوله رق یرینه طامارا درسعات ایلچیسو نصب و تعیین اولندی .
کذلک بوئانده پروسیا قرالی وفات ایدرک یرینه جلوس ایدن اوغلونک اخبار
جلوسو حاوی وارد اولان نامه سنی خلال ذی الحجه ده پروسیا ایلچیسو دیوان
هایونه دخول ایله تقدیم ایلدی .

* احوال پولتیقه نک تعیری *

بالاده بیان اولنان (قامپو فورمیو) مصالحه سیله جمهوریت و سر بسیت افکارینک
غلبه سی تصدیق اولمش دیمک اوله رق پولتیقه نک شکلی دکشوب اول وقته قدر
بین الدول جاری اولان مناسبات کلیاً تغیر ایدرک احوال دول بشقه قابله کیرمش
اولدیغنه نظراً بومصالحه دن اعتبارا اوروپا تاریخنک بریکی فصلی باشلادی دینه بیلور .
بو انقلاب عظیمه سبب دخی دول متفقه نک اطوار غرضکاری و نفاق شعاریلریدر .

علی الخصوص پروسیا دولتی ایکی یوزلو برپولتیقه قوللانوب و نقض عهد تقیصه سنی
اصلا قید ایتیموب خفیاً روسیه لو ایله بالاتفاق لهستانک ایشنی ایستدیکنی کرته یه
کتوردیکی کبی متفقلرینی فدا ایدرک فرانسه جمهور یاه عقد مصالحه ایلمسی حسیه
رین نهری فرانسه ایله المانیا بیننده حد فاصل اوله رق بلجیقا قطعه سی فرانسه
جمهوری یدینه کچدی و فلمنک دخی فرانسه نک برایتی کبی اولدی و پروسیانک
و فاسزلنی دول متفقیه شاشقنلق و یروب آنلر دخی برر برر فرانسه جمهور یاه
اویوشه رق میدان مبارزه ده برأ اوستریا و بجرأ انکلتره یالکز قالدی . و بوجهته

ساردونیا دولتی فرانسه جمهورینک نفوذ و تحکمی آلتندہ قلوب ایتالیادہ جمهوریت افکاری میدان آلدی .

مؤخرأ اوستریا دولتی دخی قامپو فورمیو مصالحہ سنی امضا ووندیک جمهورینک انقاضیلہ جبر نقصان ایتک اوزرہ محاسنہ ارانہ روی رضا ایلدی .
وانکلتزہ دونماری دکزلردہ غالب مطاق قالدیسہدہ فرانسه جمهورینک نفوذی دخی براوروپا اوزرندہ صو کبی جاری اولہرق افکار جمهوریه واختلالیہ هرطرفی سیل کبی باصمغہ باشلدی .

بونجہ سنہلدنبرو قوۂ بحر یهسی هرطرفدہ مشهور اولان وندیک جمهورینک دفعۂ اضمحلالی دول وام سائرہ یه خشیت و جمهوریت افکارینک بویله انتشار یله روابط قدیمۂ دولیہ نک انحلالی ہپ حکمدارانہ دہشت و یرمشیکن اش۔ بواون ایکی سنۂ ہجر یه سنندہ واقع شہر شباط فرنکی ابتدا سنندہ فرانسه عساکری روم یه کیردی . و پاپانک حکومتی رفع والگا و رومہ دہ جمهوریت اصولی وضع واعلان اولندی . و سیچلیاتین دولتی مخاطرہ یه یاقلاشدی . و بونک اوزرینہ پاپا جبرأ فرانسه یه نقل اولنوب ایرتسی سنہ اورادہ فوت اولمشدر . تاج بخش حکمداران اولان پاپا حکومتک بویله رفع اولنویرمسندن طولایی دول اورویاپہ بر مرتبہ دہادہشت کلشدر .

دولت علیہ نک دول اورویا ایچندہ اک ابتدا عقد معاهدہ ایتش اولدینی فرانسلو ایلہ اوتہ دنبرو دوست مخلص بیلدیکی انکلتزہ لویہ سائرندن زیادہ میل و مناسبتی اولوب فرانسه اختلالنک وقوعندہ دخی ترکلردہ درکار اولان ثبات و متانت و خصیصۂ قنوت و انسانیت اقتضاسنجہ فرانسزلر هر یردہ منفور اولمشیکن ممالک محروسہدہ سر بست اولہرق هرطرفدہ حسن معاملہ کوردیلر و دولت علیہ فرانسلو حقدہ معاملہ سنی تغییر ایتک شو یلہ طورسون زیادہ نوازش و مساعدہ کوسترمش اولسی دول متفقہ ایلیچیرینک تعریض و اشتکالینی موجب اولمشیدی و دولت علیہ روسیہ و اوستریا محاربہ سنندن هنوز قور تلمش اولدینی جہتلہ اوستریانک مغلوبیتتہ نظر انتقام ایلہ باقیوردی و آنردن امین اولہ مدینی جہتلہ آنلرہ قارشو فرانسه ایلہ اولان اتفاق و اتحادینہ استناد و اعتماد ایلر ولدی الحاجہ فرانسه جمهورینی کندوسنہ قوۃ الظہر بیلوردی .

ایشته قامپو فورمیو مصالحہ سنہ قدر دولت علیہ نک طور و مسلکی بووجہلہ ایکن آندن صکرہ فرانسزلردن امید وار اولدینی حسن مقابلہ یی کورہ مدیکندن متأثر و متأسف اولہرق مسلک پولتیقہ سنی تبدیل ایتکہ مجبور اولدی .
شو یلہ کہ: فرانسزلر مذکور مصالحہ موجبنجہ جزائر یونانیہ ایلہ پرہ وزہ ساحلارینی

ضبط ایتدکاری کبی اسکی یونان حکومتلرینک ایامنی یاد وتذکیر ایدرک اول حوالیده کی روملری جمهوریتہ تشویق ایله جوارده بولنان رعایای دولت علیهنک اخلال اذهاننه ابتدار ایدر اولدیلر .

جنرال پونا پارتهنک بومالده اعلاناتی کوریلنجه بادیء شبهه واندیشه اوله رق وکلای دولت علیه اورکمه باشلادیغی صرده نمچه ایلیجیسی هر پرت اوستریا حصه سنه دوشن ممالک وندیك اهالیسی حقنده اوستریا لو معامله سی اولمسنی طلب ایلدیکی عقینده فرانسه مصاحتگذار ی طرفدن دخی اوخر رمضانده ویریلان برقطعه تقریرده قامپو فورمیو مصالحه سی موجبجه فرانسه تصرفه کچن قوروفه وزانطه وکفالونیه وسنمور وچوقه جزیره لری حقنده بوندنبویله فرانسه لو معامله سی اولنق اوزره ولات و حکام وضابطانه خطا با اقتضا ایدن اوامر علیه نك برآن اقدام اصدار ایلمسی و بونلر وندیك رعایای ایکن حققرنده اسناد اولنان سرکشکاره مبنی دفعالاختلال دولت علیه نك فوق العاده ویردیکی نظامک کأن لم یکن حکمنده طوتلمسی لازم کلهجکی مندرج بولمشدر . بوآطنه لیلرک وندیك تبعه سی ایکن جزائر وسواحل دولت علیه ده ضبط وربطلری مشکل اولدیغی جهتله بالاده بیان اولدیغی اوزره کچن سنه وقوعبولان ازمیر حادثه سی اوزرینه ممالک محروسه یه اوغرادلماقندن غیر ی چاره بولنه مامش اولدیغی حالده مؤخرأ فرانسه جمهوری تبعیتی ایله ممالک محروسه یه توارده باشلادققرنده نوجهله اداره اولنه بیله جکاری باشلوجه دوشونیه جک بر ماده اولوب دولت علیه ایسه ابتدا وندیك دولتک مقاسمه سنی تصدیق ایتک استمدیکندن فرانسه مصاحتگذارینک منوال مشروح اوزره طلب ایتدیکی اوامرک اصدارندن اجتناب ایله برابر وقتلرک تنک وتتنک اولدیغنه و بو اوامرک اصدار ی خصوصنده فرانسه مصاحتگذار ی اصرار ایتکده بولندیغنه مبنی علناً تردد کوسترمکی دخی موافق حال ومصاحت کوره مدیکندن بو باده بین الوکلا خیلی مذاکرات ومطالعات جریانندن صکره نهایت بو خصوصه برمسلك لین اتخا ذیله استیلان اوامرک ظاهراً تصدیق چیقمیله جق صورتده مناسب تعبیرلر وخفیفجه مضمونلر ایله تحریر واعطاسنه قرار ویرلمشدر .

وزیرده تفصیل اولنه جنی اوزره بو ائساده دولت علیه نك پاسپان اوغلی اوزرینه اولان تدارکاتی کویا بشقه طرف ایچون ایش دیو بعض اراجیف تکون ایلمش ایدوکندن طرف دولت علیه دن بو اراجیفک تکذیبیه فرانسه مصاحتگذارینه تأمینات ویرلمش اولدیغندن مصاحتگذار پارسه یازمش ایدوکنه مبنی مؤخرأ آلدیغی جواب اوزرینه جنرال بونا پارتهنک تنیه نامه سننده مندرج بعض عباراتک ایرات

ایندیکی شکوک و ظنونى رفع و ازاله ایچون مقدماتى ندیکه تابع اولان جزائر یونانیسه به مدیران طرفدن تعیین اولنان قومیسردولت علیه نك حقوقه دقت تامه ایله رعایت و دولت علیه رعایاسی تحریکدن محابنت اولنق خصوصاً لرینی اولطرفده بولنان فرانسه قوماندانلرینه افاده به مأمور قلندینی و دولت علیه دخى مدیران جمهوردن امین اولق لازم کله چکی بیانیه مصاحتگذار باب عالی به تأمینات و یرمش ایسه ده فرانسزلرک اطوار و مشاورى هرکون سلب امنیت انده جک صورتده ایدی . فرانسه اختلالنک آثار غریبه سندن برى دخى بودرکه بو ائانده بر یهودى آغزندن بر بیانیه قلمه آله رق طبع و نشر ایله قدس شریفده بر یهود حکومتی تشکیل اولنق اوزره هر طرفده اولان یهودیلر اتفاهه دعوت اولمشدر . (زهی تصور باطل زهی خیال محال) مواد مشروحه دن طولای و کلای دولت علیه نك فرانسه جمهورى حقه ده امنیتلری منسلب اولدیغی حالده پترسبورغدن او اصر رمضانده فوق العاده تاتار ایله کلان امر و تعلیمات اوزره روسیه ایلیچیسى اوروپانک اغتشاش و اختلاله و فرانسه جمهورینک معلوم اولان احوالنه نظراً روسیه دولتی بو ائانده مجرد کندو ممالکنک امن و آسایشی ایچون حدود اوزرنده بعض حرکات عسکر به اجرا و تدابیر حریمه به اشتغال ایله احتیاطاً اسباب تحفظه تشبث و بهرسنه تعلیم ایچون اخراجی معناد اولان سفائن حریمه به بوسنه دخى قره دکزه اخراج ایده جک اولغله بو حرکاتک مجرد تحفظی اولدیغی و طرف دولت علیه دن حسن وفاق و مصافاتک وقایه سنه رعایت اولندجه تحصیل امنیتی و خساردن حفظ و حراستی ایچون روسیه ایمراطورى دخى قوه جموعه سنی اعماله جان و دلدن راغب و حاجت مس ایندیکی کبی وقتیه خبیر و آگاه قلمسینی طالب ایدو کبی باب عالی به لدی التبلیغ روسیه دولتی خلوص نیت اوزره بولندجه طرف دولت علیه دن مخالف شرائط دوستی برحالت وقوع بولق احتمالی اولدیغی بیانیه حسب الموقوع روسیه نك فرانسه جمهورندن بر درلو خوف و اندیشه سی اوله میه جغه نظر آ ایمراطورک بوتدارکات سفیره دن دیگر بر مطلبی دخى اولق احتمالی در میان اولنه رق استکنه حاله ابتدار اولندقه روسیه ایلیچیسى طرفدن فرانسه جمهورى اسپانیایی جبراً انکلتره علیه نه قیام ایندیردیکی کبی دولت علیه به دخى روسیه علیه نه حرکت ایتمک اوزره اجبار ایلمسی احتمالدن بعید اولدیغی ایراد ایلمش ایسه ده باب عالیجه بو ملاحظه چندان موجه کورلیوب روسیه لونک بوتدارکاتسندن غرض صحیحی نه اولدیغی تفکر اولنقده ایکن ینه بو کونلرده پروسیا باش ترجمانی رئیس افسدی به کلوب روسیه دولتنک بر وقتدنبرو میزان پولتیقه دولیه به مغل اوله رق کسب ایلدیکی قوت و سطوته کسر و یرمک اسبابنه دولت علیه تشبث ایلمسه فرانسه

فرانسه جمهوری روسیه علیه اعمال اولمق ایچون سلطنت سنییه اعانه قرق
الی بیك عسکر ارسال ایده جکئی دولت علیه اشعار ایلمش اولدیی خبری
بر طرفدن پروسیا قرالنه وارد اولوب دولت علیه نك پروسیا دولته درکار اولان
امنیت واعتمادینه نظراً کندوسندن کتم واخفا اولنیه جنی مجزومی اولمقدن ناشی
فرانسه لو طرفدن او یله بروعد وقوع بولمش ایسه پروسیا قرالنه اخبار اولمق
اوزره بیان بیورلمسی استعدا ایله آغز آرادینغه رئیس افندی بوحوادثی تکذیب
ایدرك دولت علیه روسیه ایمپراطورینك طور وحرکتندن ممنون اولمسیله فرانسه
جمهورینك او یله برتکلیفی ظهور ایتسه دخی سلطنت سنییه نك مصلحتنه موافق
اولدینندن موافقت اولنیه جنی درکاردر دیو جواب و یروب انجق روسیه لونك
برمنوال سابق حرکات تحفظیه تشبی بوحوادثن نشئت ایلمش اولمق ملاحظه سنه
مبنی روسیه لویه تأمینات اعطاسی لازم کلدیکندن روسیه ایلچیسى ایکن بو ائنده
روسیه خارجیه نظری اولمق حسینیه پترسبورغه کیتمک اوزره اولان قوجوبك
خلال شوالده رئیس افدینك خانه سنه کلوب ملاقات ایتدکرنده رئیس افندی
طرفدن کندوسنه تأمینات لازمه اعطا اولنسی اوزرینه او دخی اوروپانك اختلال
احواله و بین الدول مرعی اولان موازنه نك انحلاله نظراً اوتهدنبرو دولت علیه
ایله روسیه دولتی بیننده جاری اولان شقاق فیما بعد مبدل حسن وفاق اولمق
ایجاب مصاحتدن اولدینغی علاوه مقال ایتشدیر .

اواخر شوالده پروسیا ایلچیسى ینه رئیس افندی یه کلوب نمچه ایله فرانسه بیننده
مصالحه عقد اولنیدسه ده المانیایه دائر جریان ایدن مکالماتک نه یه منجر اوله جنی
هنوز معلوم اولدینغی و بویکی دولت بیننده منعقد اولان شرائط خفیه نك بعضیسی
المانیایمپراطورلنی نظاماتنك فسخته دائر اولمق مظنون ایسه ده بعضیسی دخی
دولت علیه ده دائر اولمق محتمل ایدوکنی و دولت علیه نك اتحاد ایلدیکی بیطرفلق
مسلكی موافق حال و مصاحت ایسه ده اوروپانك احوال مستقبلسی مجهول اولدینندن
بو ائنده برأ و بجزراً تدارك اوزره بولنسی لازمه حالدن بولنیدینغی پروسیا قرالی
طرفدن دوستانه و خیرخواهانه اوله رق اخطار ایلمشدیر .

احوال مشروحه دن ناشی وکلای دولت علیه نك فرانسه جمهوری حقننده امنیت واعتمادلری
منسلب اولدینغی حالده جنرال پوناپارته نك طولون لیاننده ترتیب ایتمکده اولدینغی جسیم
دونمانک ارناولدلق طرفی ایچون اولمسی خاطره سی تخدیش اذهان ایلمش ایسه ده
برغزته ده فرانسه نك مصر طرفنده بعض محملره دونماسیله تعرضی وقوع بولمق احتمالی
مندرج بولنیدیندن فرانسه لونك انکلتره یه قارشو اولان سواحلنده کی تدارکات

کلیه سندن فضله آق دکز جهتنده دخی بو وجهله تدارکات جسمیه به تشبئی وکلای دولت علیه‌ینی بر مرتبه ده‌اشبهه واندیشه‌یه دوشور مکه چاره‌سز دیگر دولت‌طرفه تمایله مجبور اولدقلری حالده روسیه باش ترجمانی فونظون خلال ذی‌الحجه‌ده رئیس افندی‌یکلوب روسیه‌دولتی بهر سنه معتادی اولدینی وجهله تعایمات حربیه به مباشرت ضمننده تهیئه ایلدیکی کلیتو دونماسنی اخراج ایتمک اوزره اولوب بودونماقریم ایله خواجه بك اراسنده کشت وکدار ایده جک ایتمش وفرانسه لونک آق دکره دونما کوندره جکی روسیه ایمراتورینک مسموعی اولمغه قره دکره جانبی محافظه ایتمک ولدی الحاجه دولت علیه دونماسنه ملحق اولمق اوزره بودونمائی دولت علیه‌یه تقدیم ایدیور . خلاف مأمول دولت علیه ممالکنه فرانسه‌لو طرفندن برکونه تعرض وقوع بولور ایسه روسیه ایمراتوری دولت علیه ایله یکدل ویکجهت اوله جق بورالینی باب عالی‌یه افاده ایتمک اوزره ایلیچینسی مأمور ایتمشدر دیو تقریر ایتمکده رئیس افندی طرفندن بودونماک مقدراری لدی السؤال اون ایکی قطعه سی کبیر قیاق قالدیرر سفینه وباقیسی اینجه دونما اوله رق یوز قطعه سفاسندن مرتب اولدیغنی بیان ایلمشدر .

خصوصات مشروحه دن بجهله مقام صدارتدن حضور هاپونه تقدیم اولنان برقطعه تقریر عالیده روسیه‌لو برمدتدنبرو طرف دولت علیه‌یه تمایل صورتلرینی اظهار ایتمکده اولوب بواشعارلری دخی مقتضای دوستی وصفوتی التزاملرندن ناشی ایدوکی منفهم اولدیغندن غیری روسیه‌لو فرانسه نک حرکاتندن احتراز اوزره اولوب برکونه تعرضلری ظهورنده کندو ممالکنه دخی سرایتدن اجتنابی اولمغه کندو ممالکنی دخی اختلالدن وقایه بوجهله تدابیر احتیاطیه به تشبث ایلمش اولدینی آشکاردر دیو عرض اولنوب لکن سلطان سلیمک روسیه‌یه هیچ امنیتی اولدیغندن بومرتبه دوستلق اظهار ایلمسندن دخی اورکمکله تقریر مذکورک بالاسنه (نم وزیرم بوغاز قلعه‌لری بنالری تکمیل اولدیمی وضع اولنه جق طوپلر و مهمات تکمیلیمیدر هیچ برشی کیرو قالمیه رق تکمیل اولسون رشید افندی بعد العید برکره واروب باقسون بنالر ونفرات وطوب ووجه‌خانه وسائر لوازماتدن هیچ برشی کیرو قالمه‌سون) دیو خط هاپون کشیده ایتمش اولمسی اوزرینه مقام صدارتدن تکرار تقدیم قلنان تقریر عالیده بحر سیاه بوغازی قلعه‌لری مهمات و ادوات واستحکاماتنه بر موجب اراده‌ سنیه دقت اولنور انجق روسیه لونک بر مقتضای وقت وحال دولت علیه ایله اتفاق ایتمسی مصلحتی اقتضاسندن اولدینی جهتله بر نوع اتحاد مقدمه‌سی اولمق اوزره ابراز خلوص ایدیور ارتق تأمین وتلطیقی لازم کلور دیو عرض اولنمشیدی .

وبرده برمنوال سابق فرانسه لونك اطوار و مشواری و علی الخصوص طولون ترسانه سنده کی تداركات جسيمه لری وکلای دولت علیه به موجب انديشه اولمسیله رئیس الکتاب عاطف افندی موازنه پولىتقۀ اوروپا حقنده برلایحه قامه آلمشدرکه صورتی ذیلده (۱۷) رقمیه ایراد اولنور .

مطالعه سندن معلوم اوله جنی وجهله فرانسه اختلالندنبرو فرانسرلک اطوار و اغراضنه نظراً دولت علیه به بعض دول ایله اتفاقک لزومندن بحثله دولت علیه نك اکر چه حسب الموقع روسیه و اوستریا دولترینه مخالف اولان دولتر ایله اتحاد اوزره بولمسنه بالطبع لزوم کورینور ایسه ده وقت و حاله نظراً مصلحتنه موافق اولان مسلك موقت فرانسه جمهوری علیهنه متفق اولان دولترله برلکده متفق اولمقدر دیو بیان اولمغله لایحه مر قومه مجلس خاص وکلاده مطالعه اولندوقده فی نفس الامر فرانسه جمهورندن امنیت جائز اولمدیغی جهتله ماده تداركات لازمه به نسبت ایله برابر قوه معنویه نك استحصالی ضمننده مصاحترلی دولت علیه نك مصلحتنه او یغون اولان دولتر ایله خفیجه اتحاد معامله لری اظهار اولنق و بوبابده فرانسه جمهوری طرفه سررشته و یرلمیه رك تلطیف و تألیف ایله اله آلمنق لازمه حالندن اولدیغی حضار طرفندن بعد التسلیم الحاله هذه دولت علیه به ابراز خلوص ایتمک اوزره اولان روسیه و اوستریا و پروسیا دولتر ایله اتفاق ایده جک وادیلرده کورینوب ایشارک کلکیشنه انتظار اولنق و بر طرفدن دخی حسب المصلحه فرانسه لویه روی التفات و مدارا کوستریله رك کندویه سررشته و یرلمک اوزره قرار و یریله رك باراده سنیه رئیس افندی بویه بر حکیمانۀ مسلك اتخاذ ایتمک اوزره مأمور اولمشدر . بناءً علی ذلك سابق فرانسه مصلحتکنذاری فرانسیر فرانسه به عودت ایتمک اوزره اولدیغندن مصلحتکنذار لاحق دوفن ایله برلکده اوله رق عیدانخاندن صکره رئیس افندی نك خانه سنه کلوب بو اوانده اوستریا دولتیله فرانسه جمهوری بیننده برودت وقوعه کلدیکنندن اکر حرب ظهور ایدرسه دولت علیه اخاص و اصدق دوستی اولان فرانسه جمهورینه قوه عسکریه یا خود مالیه ایله اغانه ایده جکنی مدیران جمهوره بنه تبلیغ ایلسه ممنونیتلرینی موجب اوله رق حرب ظهور ایتدیکی تقدیرده دولت علیه به خیرلونیجه ایشارک کوریلور و مصلحه تقرر ایتدیکی صورتده دخی دولت علیه فرانسه جمهورینی بر مرتبه دهها جلب ایلمش اولور دیسی اوزرینه استانبولده یکی ایجاد اولنن دیپلومات لسانیه بعض عبارات مبهمه ایراد اوله رق کچشدیر لمشدر و اواخر ذی الحجهده رئیس افندی روسیه ایلمچیسيله کوروشدکده دخی براز دیپلومات آغزی صاته رق اسباب تأمینیه حصوله کتورلمشدر .

الحاصل ترکار ایکی یوزلیکن اصلاح ایتمک لری حالدۀ رئیس افندی بر مقتضای

وقت و حال مجلس وکلا قرار یله بیک یوزجی اوله رق لسان دیپلوماتی استعمال اتمک اوزره مأمور ایدلمشدر و قامپو فور میو مصالحه سندن صکره اوروپا پولتیقه سنک رنکی دکشوب دولت علیه ایسه اولسکی کبی بتون بتون اوروپا پولتیقه سندن خارج و بیکانه طوره میه جغنی اکلامش اولدیغندن باب عالی اوروپا پولتیقه سنه او یار بر لسان قوللانمغه مجبور اولدیغنه نظراً بوسنه بوجه بالا اوروپا ایچون بر تار یخ جدید اولدیغنی کبی دولت علیه نک دخی بر یکی دور یدر .

* فرانسه نک احوال دا خلیه سی *

بوناپارته نک همتیله فرانسه نک خارجاً نفوذی بویله ترقی ایدرکن مدیران خمسسه امور دا خلیه یه رابطه و بره میوب بر اوجده جمهوریت مفرطه افکارنده بولسان و بر اوجده قرالیت طرفداری اولان فرقه لرك فسادلرندن بشقه مضایقه مالیه دخی بر کمال ایدی .

چونکه مات مجلسنک اتخاذ ایلدیکی مسلك ایجابجه جمهورک وارداتی تنزل ایتکله برابر خزینه یه کلان آچه دخی غصب و غارت اولنوب مثلاً اراذله مجاناً کمک و قلوبلره دوام ایدنلره عادتاً کونده لک و یریلوردی بناء علی ذلک حکومت پاره سزقاله رق بر نوع قوائم نقدیه تداول ایتدیریلوب بونلرک فیئاتی ایسه اول درجه تنزل ایتمشیدیکه (متلک) نقد آچه ایله یارم فرانقه اتان کمک قائمه ایله ایکی بیک فرانقه و یریلور اولدی . و نهایت بوقائمه لرك چارشوفیئاتی مصارف اعمالیه سندن ده اشاعی دوشدی بونک سببی لدی التحقیق قرق درت ملیار فرانقلاب قائمه یاپلمش اولدیغنی ماده سی ایدوکی تبین ایتمشدر .

آچه مضایقه سی بو وجهله درکار اولسیله برابر افکار دینه محو اولوب اخلاق ملیه دخی فساد و ارمش اولدیغندن هرشیده خیانت و اهانت اصولی جاری اوله رق کیمسه نک کیمسه یه امنیتی قالماشیدی .

بوفالغک دفعی ضمنده مدیران خمسهدن بریسی معاشقه الهیه عنوانیه کویا یکی دین اولق اوزره بر آیین ایباد ایدوب انجق پاپاسلری اولدیغندن بوکا تابع اولنلردن کیم ایسترسه کلیسالر کیدرک اوراده و عظ و نصیحت ایلردی حالبوکه سامعینک اکثری بر طاقم ظالم و خونریزان اولوب اهل عرض طاقتدن کمسنه بو جمعیتلره دوام ایتدیکندن بو اختراعندن تهذیب اخلاقجه بر فائده کور یله مامشدر .

بناء علی ذلک اخلاق عمومیه پک فنا حالده بولنه رق اکثر اسافل و ادانیدن اولان مأمورین اخذ رشوت و اموال جمهوری سرقت ایله کسب ثروت ایدوب بو بولده جمع ایتدکری سبالغی دخی سفاهته خرج و تلف ایدرلردی .

و برده قانون مجلسارنده جمهور علیه اکثریت آرا پیدا اولوب بر طاقم مؤاflر دخی اختلافك موجب اولدیغی فالفلردن بخله رساله لر قلمه آله رق رأی ومطالعہ لرینی سر بسیتله نشر ایتمکة باشلامش لر ایدی .

مدیران دن ایکیسی دخی مخالفین ایله بر لکده اولدقلرندن رئیس مدیران اولان باراس دیگر ایکی ارقداشی ومبعوثان ملتك بر مقداری ایله اکثریته قارشو بر حال خطر ناکده بولمغله بوندن خلاص بولمق ایچون قوؤ جبریہ اجر اسندن بشقه چاره اولماغله جمهورك بر بیوک تهلكده اولدیغندن بخله اردو جنرال لرینه بیان حال ایدوب آنلر دخی هپ جمهور طرفداری اولدقلری جهته لدی الاقضا امداد ایدہ جکلرینی وعد و تعهد ایتمش لر ایدی . علی الخصوص اول ائنده ایتالیا ده بولنان یونا پارتہ اردوسندن انواع تشویقاتی حاوی محضر لر کوندر لمشیدی . بو صورتله مدیران ثلته کسب جسارت ایدرک پارس شهرینک محافظی اولمق بهانه سیله یونا پارتہ دن بر جنرال استملریله اودخی جـ رـ ال (اوجرو) نی کوندر مشیدی .

شهر ایلولده مدیران ثلته نک ترتیبی اوزره (اوجرو) کسنه نک خبری اولمقسزین پارسه مقدار کفایه عسکر جلیله بر کیجه بغته مبعوثانك تجمع ایتمکاری (توپلری) و (بوربون) سر ایلرینی احاطه ایتمش و بو سر ایلرک محافظه سنه مأمور اولان عسکر دخی اوجرو طرفه کچمش اولدیغی بشیوزلر مجلسی اعضاسنك معلومی اوله رق بعضیلری علی الصباح مجلسه کلک لکنده توقیف اولندقلری کبی ایکی مدیر دن بریسی فرار ایدرک دیگر ی حبس اولندقدنصکره هر کیم قر الیتک اعاده سنه تشبث ایدہ جک اولور ایسه اعدام اولنه جقدر دیو زقاق باشلرینه یافته لر یاششیدر لمش ومبعوثان دن یتمش قدری بعض مؤلفین ایله برابر امریقایه نفی ایدلمش و قرق ایکی غزته خانه قیادلمشدر .

بو صورتله مدیران ثلته کسب نفوذ ایدوب انجق بر منوال سابق جمهورك دیونی پک چوق اولدیغندن بو صیقمئیدن قور تلمق ایچون اصحاب مطلوبك هر برینه آله جفك ثلثانی پاپاس واصلزادکان و سائر مدن مصادره اولمش اولان املاک اوزرینه بونولر اعطایله تأدیہ ایدرک دیگر ثلثی اسهام عمومیه دفترینه قونسولیده نامیله قید ایتمش لر ایسه ده بونولرک هیچ اعتباری اولدیغندن مدیرانك بوتدیری افلاسه شیبه بر معامله اولمشدر .

بو مثالو حالاتدن بالطبع اهالی خشنود اوله میوب بو جهته امنیته خلل کله رک تجارت و صنایع بتون بتون کیرو قلمش اولدیغی حالده اهالیدن آغر ویر کولر دخی آنددیغندن اهالی نزدنده مدیران منفور اولوب اردو جنرال لرینک نفوذی ایسه بالعکس ترقی ایتمکده ایدی .

علی‌الخصوص بوناپارته انظار عمومی‌دهه پک زیاده مقبول اولوب فرانسه اهالیسی آنک هم‌تیله هر درلو مضایقه دن قور تلمق امیدینه دوشمش اولدقلری حالده بروجه مشروح جمهوره غایت مساعد اولان (قامپوفورمیو) معاهده‌سنی تنظیم ایدوب اگرچه بو معاهده‌ده یالکتر فرانسه ایله اوستریا بیننده کی احواله قرار ویریلهرک جرمانیا مسائلی بشقه‌جه مذاکره اولتمق اوزره بوناپارته‌نک تحت ریاستنده اولهرق بر (قونفره) مجلس کشاد اولتمش ایسه‌ده آزوقت صکره بو مکالماتی بشقه مأمورلره احواله ایدرک کانون اول خلاننده پارسه عودتنده فوق‌الغایه احترامات ایله قبول اولتمشدر . فقط بونک اوزرینه مدیران ثلثه بوناپارته‌نک نفوذ و اقبالنه حسد ایدرک آنک دفع و تبعیدی چاره‌سنی آرامغه قالمش مشر ایدی .

حتی دول اوروپادن بعضیلری بروجه بالا فرانسه جمهوریه عقد مصالحه ایتدکلری کبی برآرالتی انکلتزه ایله فرانسه بیننده دخی مصالحه مکالمه‌سنه مبادرت اولنمشیکن مدیران جمهور ناپلیون بوناپارته‌نک بروجه بالا شهرت و اعتبارینی چکمیوب آتی برایش ایله اشغال ایتک املنده بولندقلرینه مبنی او مکالمه دن صرف نظر اولنهرق انکلتزه اردوسی نامیله بر بیوک اردو ترتیب وقوماندانلغنه بوناپارته تعیین اولنوب او دخی انکلیزلر ایله محاربه‌یه حریص ایسه‌ده انکلیز دو نملارینی چکنه‌یه‌رک انکلتزه‌یه کچمک ممکن اولدیغندن بوناپارته دخی مصر الکاسنی ضبط ایله هند یولنی طوته‌رق او یوزدن انکلیزلری ازعاج ایلمک و بو یولده بر بیوک شهرت قازانوبده بو وسیله ایله فرانسه‌ده ایستدیکنی یاپه‌بیله‌جک بر نفوذ و اقتدار حاصل ایتک کبی خولیلاره صامشیدی .

چونکه از قدیم فرانسزلرک اذهاننده ام‌دنیا نی ضبط و تصرف ایلمک افکارنی جایگیر اولوب حتی اون دردنچی لویی نام فرانسه قرانته مصرک ضبطی حقدنه تقدیم اولتمش اولان بر لایحه‌ده فرانسه‌لویه کوره مصرک لزوم ضبط و اداره‌سی و نه یولده ضبط و اداره اولتمق لازم کله‌جکی و بوندن نقدر منافع جسمیه حاصل اوله‌جنی کیفیاتی بر تفصیل بیان اولتمش و بوجهته مصرک فرانسه ممالکنه الحاقی خصوصی فرانسه قرالرینک امل و آرزو ایتدکلری مواددن بولتمش ایسه‌ده فعله کلسی مشکل بر خولیا اولدیغنه اهل صلیب زماننده کی وقوعات دلیل کافی اولغنه بو کیفیت فرانسه قرالرینک ذهنارنده طولاشور بر خیال خام قییلندن اولدینی حالده بوناپارته بروجه مشروح بو امله دوشمش ایدی .

بناءً علی ذلك اشبو اون ایکی سنه هجریه‌سی اول بهارنده مدیران جمهور طرفدن انکلتزه‌یه هجوم ایچون فرانسه‌نک سواحل غریبه‌سنده کی لیمانلرنده تدارکات جسمیه‌یه

دوام اولندیغی انساده بوناپارته دخی کندی تصورینی فعله کتورمک اوزره فرانسه‌نک سواحل جنوبیه سنده واقع طولون وسائر لیمانلرده لزوم کوردیکی تدارکاته اقدام ایدیوردی .

بودونمانک هدف الحركاتی نرهمی اولدیغی معلوم دکل ایسهده بوناپارته کبی مشهور آفاق اولان برجنرالک بالذات بو ایشه اعتنا ایله مقید اولمسی فوق العاده برحال وحر کته دلیل اولمغه جمله عالمک نظر دقتی جلب اتمشیدی .

بوناپارته تدارکات سفریه سنی اکمال ایله طولون لیماندن چیقدیغی کبی مالطه آطه سنه کلوب جزئی محاصره ایله اشبو اون ایکی سنه سی ذی القعدة سنده جزیره مزبوریه ضبط واستیلا وقوالیر اوجاغنی الغا ایدرک اوراده بولنان بالجمله اسرای اسلامیه نک سیلیرینی تخلیه واهل اسلامک بوندن بویله مالطه قورصانلرندن خلاص بولدقیرینی بتون ممالک اسلامیه ده اعلان وتبشیر ایلیرینی کندولرینه تنیه وتوصیه اتمشدر .

اشبو مالطه قوالیرلری طریقنک بوکره بولتیقه جه عمری تمام اولدیغندن بومقامده اجمالاً احوال تاریخیه سنک بیانی مناسب کورلمشدر .

مائة خامسه هجریه واسطنده نصاری تجارندن بعضیلری قدس شریف زواری ایچون حضرت یحیی نامنه اوله رق قدس شریفده بر مسافر خانه بنا ایلمشار واهل صلیب عصرنده مسافر پرورلر عنوانیه یاری روحانی ویاری جسمانی بر طریقت احداث ایدوب قدس شریف زوارینک لوازماتی تدارک ایتدکن بشقه محافظه لرینی دخی التزام ایتمکله سلاح طاشیمغه مجبور اولوب زواری مغرب قورصانلرندن محافظه ایچون دکره چیقمغه دخی باشلامشدر ایدی .

یوسف صلاح الدین قدس شریفی ضبط ایلدکده آنلر عکایه وبعده یدی یوز اون سنه هجریه سنده ردوس آطه سنه چکیلوب کندولرینی حضرت یحیی قوالیرلری تسمیه ایتدیله . وسلطان سلیمان ردوسی فتح ایتدکده کندولرینه شارلکن طرفندن بخش واحسان قیلنان مالطه آطه سنده اقامت ایلیریه اولوقدنبرو مالطه قوالیرلری تسمیه اولندیله .

اوج یوزسنه قدر اورادن آق دکرده حکومت ایدرک غرب قوصانلریله اوغراشدیلر واهل اسلام تجار ورعایسنی صومغنی صنعت ایدندیله . وصره سفاهت وتسیب بولنه صایدقیرندن ملل نصاری عننده دخی اسکی حیثیت واعتبارلری قالدی . وبوکره احما وازاله لری اهل اسلامجه صحیحاً ممنون اوله جق بر کیفیت ایدی .

قوالیرلر سکز قسمه منقسم واوج قسمی فرانسه یه وایکی قسمی اسپانیایه وبرر قسمی ایتالیا ومانیا وانکلتریه منسوب اوله رق هر قسمک برر رئیس اولدیغی حالده ایچلرندن بالانتخاب نصب اولنور (غران متر) عنوانیه بررئیس عمومیلری وارایدی .

بروجه مشروح بونا پارتہ مالطہ بی ضبط ایتدکده قوالیرلر متفرق اولدیلر . واکرچه روسیه ایمراطوری پاولوی کندولرینه غران متر اولق اوزره انتخاب ایتدیلر ایسهده بوندن برفائده کورهمدیلر وارلق کندولرینه مقر حکومت اوله جق بریر بولهمدیلر . (مابار بقصه خود آیم)

بونا پارتہ بروجه بالا طولونده دونما وعسکر تجهیزینه ایتدار ایتدکده اول امرده بودونمانک ارناودلق سواحله تعرض ایتسی خاطرله کلش ایکن برغزته ده فرانسه لونک مصر طرفه تعرض ایتک احتمالی مندرج اولغله پارس ایلیجیسی سید علی افندی بودونما ماده سنی رسماً فرانسه جمهورندن سؤال ایتدکده مصر نیتی انکار ایله بشقه خصوصات ایچون اولدینی جوانی ویرلمشیدی . درسه عادتده کی فرانسز ایلیجیسندن استعمال حال اولندقدہ اودخی بویولده جواب ویردی .

دولت علیه ایسه بروقتدنبرو فرانسه جمهورندن مسلوب الامنیه اولدینی جهتله تدابیر احتیاطیه تک خفیجه مذاکره سی ایچون خواص وکلادن بعض ذوات حضور صدر عالی به جلب ایله عقد اولنان مجلس مخصوصده اول غزته کاغذینک ترجمه سی وسید علی افندینک بوخصوصه دائر وارد اولان تحریراتی قرائت اولندقدہ فرانسه جمهورینک مشاهد اولان مسالک و مقصدینه نظراً کندوسندن هر درلو حالت ملحوظ اوله رق آنا فانا تزیاد ایلمکده اولان طغیاننه سکونت کلنجیه دک شروفسادلرندن امنیت جائز اولدینی جهتله لوازم تحفظک خفیجه اجراسنه باقق لازمه دندر . علی الخصوص الکای مصر قرالاق زمانلرنده دخی فرانسه لونک مطمح نظری اولان بر محل اولدینی حالده یاقین رلر کبی ایستلیدیکی وقت برأ و بجرأ امداد ایرشدرمک قولای اولمدیغندن هان شمیدین مصره و مصرک کلیدی مٹابه سنده اولان اسکندریه و دمیاط ورشید طرفلرینه استحکام ویرلمک واجبه دندر . لکن امرای مصریه اوتہ دنبرو موسوس و متوحش آدملر اولغله آنلری بوماده دن آکاه ایتکسزین اسکندریه تک وسائر لازم کلان محارک تقویه سنه دفعه شروع اولنسه کندولره بر درلو امنیت واعتماد کلیوب تدارکات واقعه طرف دولت علیه دن کندولرینک علیه نه اولق وسوسه سنه ذاهب اوله جقلری آشکاردر دینلرک اول امرده آنلری آکاه ایتک و تدارکات مذکورہ تک فرانسه لو شرنندن تحفظ ایچون اولدیغنه ایناندرمق وبعده لازم کلان استحکاماتک اجراسی کندولره عرض و محضر ایله استدعا ایتدیرلمک لازم کله جکی جهتله بویولده امرای آکاه ایتک اوزره درایتلی بر ذات انتخاب اولنهرق بوخصوصه دائر کندوسنه تعلیمات مخصوصه اعطا اولتوب و ظاهرده بشقه ایشلر بهانه سیله سریعاً مصره کوندریلوب مواد عادیه به دائر حامل اوله جنی اوامر

شريفی مصر واليسنه ایصال ایتدکن صکره حالا مصرده بولنان درگاه عالی قوجی باشیلرندن سابقا سپاهیلر اغاسی علی بک ایله مخفیاً کوریشوب یدنده اولان تعلیمات خفیهی اکا تسلیم وبوماده نك چاوشلر کتخداسی معرفتیه کیزلوجه شیخ البلد ابراهیم بکه و آنک وساطتیه کندوسنک شریک نفوذی اولان مراد بکه افاده سنی بلذا کره سوزی پشوروب چونکه مراد بک خشین آدم اولدیغندن بو حالک اوزرینه فرانسه قونسلو سنه بارد معامله ایتسی ملحوظ اولدیغنه مبنی بویه ناملایم بر معامله وقوع بولیه جق و بوتدارکات مصر بکری علیهنه اولدیغنه اطمینان کله جک صورتلری بعد الاستحصال استحکامات خصوصنک فعله کلسی ایچون بکله استعدا ایتدر مک و سالف الذکر غزته ترجمه سنک بر قاچ نسخه سی دولت طرفندن کوندرلیدیکی بیایدیرلیه رک بعض تجار واسطه لریله بر تقریب مصر ایچنه نشر ایدمک وبونک اوزرینه امرای مصریه طرفندن کله جک عرض ومحضره کوره استحکامات خصوصنک استحصال وسائنه باقلمق اوزره قرار ویرلمش ومکتوبی خلفاسندن احمد اریب افندی بومأموریتله جانب مصره کوندرلمشدر .

زمان ایسه بک طار اولدیغندن او یله زمین وزمان ایله ایش کورمکه میدان یوق ایدی .

زیرا بونا پاره مالظنه نك محافظه سنه التي بیک عسکر براغوب آنلرک یرینه مالظیلرلدن لزومی قدر عسکر اخذ ایله اکمال نقصان ایتدکن صکره جانب مصره عزیمت ایله اریب افندی هنوز اثنای راهده ایکن دونماسیله اسکندریه ساحلنه وارمشدر .
تفصیلاتی سنه آتیه وقایعی صره سنده ذکر اولنه جقدر .

* روم ایلی وقایعی *

سنه سابقه وقایعی صره سنده بیان اولدینی اوزره بر وقتدنبرو روم ایلی قطعه سنی تحریب ایتمکه اولان طاغلی اشقیاسنک قهر وتنکیلی ایچون حق پاشا روم ایلی والیسی نصب اولمش ایسه ده موفق اوله مدیغندن عزل ایله یرینه بلغراد محافظی مصطفی پاشا روم ایلی والیسی ایله طاغلی اشقیاسی اوزرینه مأمور اولمشیدی .

انجق ایراد جدید خزینه سنه مخصوص اولان سمندره سنجاغنک تحصیل اموال میریه سی دخی اکاحول اولدیغندن یرینه صاحب اقتدار برذاتک قائممقلمق وجهله بلغراد ده بولنسی لازم کلمکله قلبه وجوهندن فضل بک زاده عثمان اغایی بلغراد محافظ قائممقامی نصب ایدوب کندوسی قلبه جانبنه حرکت ایتمشیدی . متعاقباً واقع اولان انهایسی اوزرینه اشبو اون ایکی سنه سی اوائلنده عثمان اغا عهده سنه روم ایلی بکلر بکیلیکی رتبه سی توجیه بیورلدی .

ینه طاغلی اشقیاسی اوزرینه مأمور اولان اناطولی والیسی (علو) علی پاشا دخی
خلال محرمده اسکدار ساحه سنه نزل و صدر اعظم و شیخ الاسلام و قبودان پاشا
ایله کورشدکن صکره سلطان سلیم خان کوکصو قصرینی تشریف ایتمکین صدر
اعظم ایله برابر حضور هایونه دخول و طرف شاهانه دن شفاها کندوسنه و صایای
لازمه ایفا بیوردقن صکره عود و قنول ایدوب و چند روز مرورنده داود پاشا
حجراسنه کچوب ادرنه جاننه حرکت ایتمشدر . لکن در سعادتده اقامتی اثناسنده
دائره سی خاتی اسواق و محمولات آره لرنده پک زیاده بی ادبانه حرکت ایتمکلرندن
بشقه داود پاشا حجراسندن حرکتلرنده بخشش استدعاسیله واقع اولان عربده لری
حیرت افزای شیخ و شاب ونه حال ایسه علی پاشا کیمنی تلطیف و کیمسینی تخویف
ایله اسکات ایدرک جانب مقصوده عنانتاب اولمش ایسه ده کندو قوسی خلقنک
دخی طاغلی اشقیاسندن قالور یری اولمیوب بویه اله آووجه صیغماز سرکش
عسکردن ایسه خیرکلیه جکی مسلماتدن اولدیغنه منی انجامکاره یعنی روم ایلی
طرفندن کله جک اخباره انتظار اولنور ایکن (زاد فی الطنبور نغمه آخری)
مفادنجبه حتی پاشانک سکود قصبه منی اوروب یغما ایتمدیرمش اولدیغی شکایاتی وارد
اولمشدر . شویله که : حتی پاشا حلبه کتمک اوزره کلیولی معبرندن عبور ایله سکود
نام قصبه تقربنده چونکه وزرانک غلبه لک دائره لری خلقیله بر طرفه حرکتلرنده
یول اوزرنده بولنان قصبات و قری اهالیسی عظیم مصارف و خساره دوچار
اوله کلدکلرندن و چند روز مقدم اناطولی والیسی علی پاشا بر منوال مشروح
در سعادتده کلورکن بورادن کچمش اولمسیله سکود اهالیسی هنوز آنک آجیسینی
اونوتماش اولدقلرندن متعاقباً قصبه مرقومه فقراسنه بر قاندها تحمیل بارکران
اولنماش اولماق ایچون حتی پاشانک قصبه یه کیرماسینی نیاز ایلدکلرنده اصفا ایتمیوب
تهدیددی حاوی بیورددی کوندر میسی اوزرینه اهالی تکرار استدعایه تشبث
ایلدکاری کچی پر حدت اوله رق معینده کی ارناود و سائر صنوف عسکریه نک جبراً
قصبه یه کیرملرینه رخصت و یرمکله آنلر دخی دشمن مملکته هجوم ایدرجه سنه
بر طرفدن قصبه یه آتشی و یروب و بر طرفدن دخی اوکلرینه کلانی قتل و هتک عرض
و غارت مثللو حالاته جرات ایلمش اولدقلری قرع سامعه دولت و اهالی دخی عرضحال
تقدیمیه عرض شکایت ایدوب سلطان سایمک املی ایسه اجرای عدل و داد ایله
اعمار بلاد قضیه سی اولدیغنه و وکلا دخی حتی پاشایی بتون بتون نظرندن
دوشورمک ایچون بویه و سیله لر ارامقده بولندقلرینه منی همان حتی پاشانک وزارت
رفع ایله استانکوی جزیره سنه نفی اولنوب عهده سنده بولنان حاب ایاتی دخی
بندر محافظی حسن پاشایه توجیه اولمشدر .

علو پاشا دخی روم ایلی جانبنده نتیجه مأمولیه مظفر اوله میوب اوچ آی صکره مرکز ایالتی اولان کوتاهییه اعاده قیلمشدر .

چونکه بو اوانده طاغلی اشقیاسندن ایاقده بولنان قره حسن وقره فیضی وامشالی سرکرده لر قره قضاسنه دخول ایله ایلیجه لر قریه سنده تحصن وقرار ایلمش اولدقلرندن فلهده اقامت اوزره اولان روم ایلی والیسی مصطفی پاشا اوزرلرینه موجود معیتی اولان عساکرله سلحداری حسین اغایی کوندرمکله اولنان مهاجمیه اشقیاطیانه میوب لیللاً مکرری قصبه سنه فرار ایتملریله سیاق حاله نظرأ بر ایکی محاربه لك ایش قالمشیکن علو پاشا قره حسنه تاتار ارسالیله رای ومکریده اقامته رخصت ویرمش اولدینی شایعه سی حسین اغایه وسائر مأمورینه ایراث فتور ایدرک کیرو چکلمش واشقیایه ضعف طاری اولمشیکن تکرار قوت کلش اولدینی وقره حسندن آریلوب اوچ فرقه اولدقلری وسائر بوکا مماثل طرفین بیننده وقوعه کلان اتفاقسزلق حسیله اشقیانک استیصاللری قابل اوله میوب فقط سرکرده لرندن بعضیلرینی علی پاشا دائره سنه آلدینی کبی بعضیلرینی دخی مصطفی پاشا معیتنه جلب ایدرک بوصورتله نائره شر وفسادلری اولدقجه اطفا اولنش ایدوکی جهتلرله علی پاشانک ارتق روم ایلیده اقامتی فقرایه بارکران اولمقدن بشقه برشیئی مفید اولیه جنی اکلاشیلهرق اناطولییه اعاده وطاقلی اشقیاسنک دفع فسادلری خصوصی رأساً مصطفی پاشایه حواله اولنش وسلحداری سالف الذکر حسین اغایه روم ایلی بکلیکی بایه سی ورتبه میر میرانی ایله چرمن سنجاغی توجیه قلمشدر .

لکن بروجه مشروح طاغلی اشقیاسی ایله اوغراشیلور ایکن ودینده پاسبان اوغلنک اطوار سرکشانه سی دوتئی بحضور ایتمکده ایدی . واکرچه طاغلی اشقیاسی غائیه سی میدانده اولدیغندن کندوسنه روی استمالت کوستریلوب حتی مقدماً طرنوی قضاسنی حجار علییه اوردردقده دخی انغماض ومساحه معامله سی اجرا ونصح وپند ایله اکتفا اولنشیکن مفید اولمقدن بشقه دهاده شماره ب مؤخرأ حجار علیی نیکبولی اوزرینه سوق ایدرک حصر وتضییق ایله قلعه سنی ضبط واستیلا وچوق کیسه لری اعدام ونیجه بیوت ودکا کین وجوامع شریفه یی احراق ایله اعیان ومتسلمنی ووجوه یکیچریاندن بعضیلرینی مفیداً دینسه جلب واوزوز بر اوغلی نام شخصی طرفندن نیکبولی متسلمی نصب ایلمش وبوندن صکره پاسبان اوغلنک سلوی وروسجق وشمعی وسائر بالقانک اوته یوزنده اولان قصبات وقرانی کافه تصرفه آلتق فکر فاسدنده اولدینی خبرلری پیدرینی روم ایلی والیسی وافلاق ویوده سی وروسجق اهالیسی طرفلرندن توارد ایتمکده بولنشدر .

بناءً على ذلك طونه ياليسنك يعنى طونه ايله بالفان آرسندهكى قطعه نك اهميتى آرتمغله ارتق وكلاى دولت خصوصات سائر دن زياده پاسبان اوغلك استيصالى چاره سنى جستجويه صرف افكار ايتمكده بولنمشلردر .

بالاده بيان اولندينى اوزره اوروپا بولتيقه سنك تغير ايمسى و (جزائر يونانيه) جزائر سبعة ايله نواحى اربعة يعنى ونجه و پره وزه و بارغه و پوترينتو ناحيه لر ينك فرانسه جمهورى يدينه كچمى دولت عليه جه جاى فكر و ملاحظه مواددن اولدينى حاله پاسبان اوغلى غائمه سى كسب جسامت ايتمكده اول باول آنك دفع وازاله سى اهم اولمغين بواوانده افكار وكلا اكامنحصر اولديغندن بروجه آتى تفصيل حاله ابتدار اولنور .

سرحد محافطى اولان يكيچر يله يماق تعبير اولنور . بونلر بروقتدنبرو بولسز حر كاته اجتسار ايدوب احيانا علوفه لرى براز تاخر ايتسه و يا خود مراملينه مساعد اولميان بر حال ظهور ايلسه در حال ولات و حكامك عليه نه قيام ايدر اولدق لردن دفع وازاله مضر تلرى لازم كله رك مقدمآ خوتين و بندر سرحد لردن دفع و تبعيد لريله اول حواليده صورت آسايش بديد اولدينى كچي بلغراد يماق انك دفع و تبعيد لرينه دخى تشبث اولنوب انجق بونده بعض مشكلات رونمود اولديغندن ابوبكر پاشا و بعده شنكلي مصطفى پاشا مأمور بيور يله رق و بلغراد قلعه سى محافظه سنه ايا تلو عسكرى قونيه رق امن و آسايش حصوله كتورلمش و اول حواليده نظام جديد خزينه سى ايجون خيليجه واردات جديده ترتيب ايدلمش ايدى . انجق بورادن فرار ايدن يماقان و دينده پازواند اوغلى عثمان اغا يانه تجمع ايدرك آنك جمعيت شقاوتى كثر و قوت بولدى .

پازواند پاسبان لفظنك غلط مشهورى اوله رق زمرة اشرادن بر شخصك اسميدر كه اطوار باغيانه و حر كات طاغيانه ايله ولايت و حكام و ضابطانه تحكم و سر كلك معامله سى اظهار و اراق و اراق و دين سرحدنده فته احدائيله اهالى يى بيزار ايلديكى روسيه سفر نده سردار اكرم بولنان قوجه يوسف پاشانك معلومى اولدقده كندوسنى اعدام ايتمكده اوغلى عثمان فرار ايمش ايدى . و غائمه سفر بر طرف اولدقندن صكره ميدانه چيقوب و يماقان زممره سنه التحاق ايدوب ذاتنده اسحاب در ايت و شجاعتن بولنمغه آز وقت ظرفنده سرحد مذ كورده شهرت بولمش و اول حواليده بولنان يماقره مرجع اولمش ايدى . بلغراد يماق لرى نظام جديد مرتباتى استتقال ايله حر كات سر كشانه يه اجتسار ايلم لردن ناشى وقوعه كلان فائق لرده پازواند اوغلى عثمانك الى اولدينى بيلنمش ايسده بالاده بيان اولندينى اوزره وقت و حال ايجانبجه

برمدت کندوسنک تلطیف واستمالت ایله قوللانلمسی التزام اولنمش ایدی . لکن
اوزمان رئیس الکتاب اولان مرحوم راشد افندینک نیکبولی مقاطعه سنه
واندرون هایونده متنفذ اولان سرکاتبی احمد افندینک فتح الاسلام مقاطعه سنه وسائر
اول حوالیده بولنان مقاطعاته زیاده ضمیمه لر اولدیغندن بونلری پازواند اوغلی عثمان
ترویج ایتیوب استانبولدن دخی بوضیمه لرك ابقاسیله برابر اول حوالیده نظام جدید
مربتاتنک تاسیسی امرنده اصرار اولمغله واستانبولده کی یکچیریلر ایسه کندوسنه
بادی قوت قلب اوله جق وجهله صحابت کوستر مکده اولمیرله پازواند اوغلی ارتق
عصیان یولنی طوته رق اوامر سینه یه مخالفت ایتدکن بشقه ارالق ارالق افلاق
وبغدان ویوه ده لرینه بلوکلر ارسالیله آنچه و ذخیره اخذ واستحصال ایلردی .
بومثلو حرکتنه نظر آپاسبان اوغلتنک تأدی بی لازمه خالدن اولمسیله برابر ارکان
دولتک بعضیلری مقاطعه لرندن طولای ذاتا دخی کندوسندن دلگیر اولدقلرینه مبنی
حقتده غضب شاهانه بی تشدید ایدر لر ایدی . و برده پاسبان اوغلی اوزرینه برسفر
آچیله جق اولدیغنی حالده قبودان دریا حسین پاشانک سرعسکر لکی مناسبت آلوب
حسین پاشانک نفوذ واقبالی ایسه سائر وکلا و مستفدان اوزرینه تغلب و تحکم درجه سنه
وارمش اولدیغندن اگر مظفر اولورسه پاسبان اوغلی غائله سی بر طرف اوله رق
بوصورتله مطلوب حصوله کله جکی و اوله مزایسه کندوسی اقبال و اعتباردن دوشه رک
باری آنک انف استکباری قیرلمش اوله جغنی وهیچ اولمز ایسه مدت غیابنده وکلا
نفس آلمش اوله جق قلمی مطالعه سی دخی کندولرنجه بر فائده ذاتیه ایدی .
الحاصل پاسبان اوغلتنک ازاله سی بین الوکلا قرار گیر اولوب انحق کندوسی
یکچیریلک ادعاسنده بولندیغندن بشقه طوعاً و کرهاً معیتده بولنانلرک اکثری
یکچیری اولمقدنناشی اوجاق قاعده سنجه حکم قانونیسی معلوم اولمق ایچون
یکچیری اغاسی اغا قپوسنده اوجاق اغالرنی جمع ایله ماده بی در میان ایدرک جمله سی
طرفدن اومقوله پادشاهه عاصی اولان شخصک یکچیریلکده وهیچ بردرلکده
علاقه سی اولدیغنی و بعد ازین اوجاق طرفدن قبول اولنمه جغنی متضمن برقطعه تقریر
تنظیم ایتدیرد کدنصکره جمادی الاخره نک یدنجی بازار کونی باب عالی ده مجلس عمومی
عقد اوله رق پاسبان اوغلتنک شمعی یه قدر ظهوره کلان حرکانه ودولت علیه نک آنک
حقتده وقوع بولان معاملاتنه دائر قلمه آلمش اولان ورقه وبعده بوکره نیکبولی
ماده سنه دائر اطرافدن توارد ایدن تحریرات متعدده ایله اوجاق رجالنک سالف الذکر
تقریرینی مکتوبیجی افندی قرائت ایلد کده تقریر مذکور ی یکچیری اغاسی وسائر اوجاق
اغالری تصدیق ایتد کدنصکره صدر اعظم عزت پاشا وجه شرعیسی شیخ الاسلام

افدیدن سؤال ایلدکده قلی مشروددر جوانی ویرمی اوزرینه عزت پاشاینه
 شیخ الاسلام افندی یه توجیه خطاب ایله ازاله سی مشروع اولدنی حالدہ دولت
 مامورلری پاسبان اوغلنک اوزرینه هجوم ایتدکله و دین قلعه سنه تحصن ایدہ جکی
 محقق اولوب بوصورتنده طوب و خمبره ایله تضییق لازم کلکله مطلوب شخص واحد
 ایکن قضیه ده مدخلی اولمان اهل اسلامک پایمال خسار اوله جنی درکاردر بوشبهه
 دخی حل اولسون دیمسیله شیخ الاسلام افندی فتوا امینه باقوب او دخی قیام ایله
 اهالی شخص مرقومی ویرمدکلری حالدہ تترس مسئله سنه قیاساً قلعه اوزرینه طوب
 آتلمق جائز اولور دیجک دانشمندان رجال دولت علیه دن دفتردار سابق عثمان
 افندی فتوا امینه تحویل نظر ایله و دینده بو قدر اطفال و نسوان مسلمین وار
 بوقیاس نوجهله صحیح و معتبر اولور پاسبان اوغلنک سرکشکی و اوامر علیه یه
 مخالفتی السنه عامه ده شیوع ایله مسموع اولقده در اگر تعدی و تحدی مثلوه
 اوضاع باغیانیه تصدی ایلدیکی واقع ایسه لاحال ازاله سی واجبدر لکن کتب
 شرعیه ده بیان اولدنی اوزره تعین ایتدکن بشقه بغی و خروجه جسارت ایدن
 شخصک امام المسلمین حضرتلری طرفدن اوچ دفعه شبهه و ضرورتی استقصا
 و ماده تعصبی رفع و الغا لازمه دندر دیر دیمز رئیس راشد افندی اوراسی بزم
 اوستمزه لازم دکل شرعیسنی علما افدیلر بیلور دیو سوزی قطع ایدوب و علمادن
 مراد شرعی بیلنلرمی دیمکدر یوخسه طریق علمیه اصحابیمدر اعتراضک ایرادینه
 میدان ویرلیوب همان رأس مسئله قرارگیر اولسیله تدابیر لازمه نیک مذاکره سنه
 نقل کلام اولنه رق اول بهاره قدر پاسبان اوغلنک برولره تجاوز ایدہ مامسی ایچون
 اولحوالی یه بعض وزرا و او جاق طرفدن بعض ضابطان ایله مقدار کفایه عسا کر
 مأمور واقامه ایدلمک وودینده بولنان یکیکچریلرک پاسبان اوغلندن مفارقت ایتلرینه
 دائرتنیهات نشر اولنق اوزره قرار ویرلدی و تعیین اولنه جق سرعسکر خصوصی
 در میان اولدقده همان ذهنلرده مرکوز و مصمم اولدنی وجهه حسین پاشادن
 غیری بوکا سزا بر وزیر اولدنی بیانیه جمه حضار آنی تنسیب و تصویب ایتدیلر .
 بو قرار اوزره مجلس طاغلدقن صکره رئیس افندی او طه سنده بعض متحیزان اجتماع
 ایله ایچلرندن بریسی ایشته فتوالرک ویریه جکی تحق ایندی انجق یوقاروده سویلمکه
 ادب مانع اولدی . تعیین اولنه جق عسکرک اکثری خالی الذهن اولوب اسلام اسلام
 اوزرینه قلیچ چکرمی دینلری الزام ایچون قاتل و مقتولک احکامی دخی استفتا
 اولسون دیمسیله جمه سی بلی بو خاطره کلدی دیه رک بو سوالی برکاغده یازوب طرف
 فتوا پناهه کوندر دیلر فرداسی شیخ الاسلام افندی طرفدن بو خصوصه دائر اولان

فتواری باب عالی به کوندردلی صورتلری زیرده (۱۸) رقمیله ایراد اولنور .
چندروز مرورنده حسین پاشا سرعسکر نصب ایله برآ ونهرآ پاسبان اوغلتک
اوزینه مأمور بیوریله رق معیتنه طویچی و عربه چی و خنبره چی و لغس او جقلرندن
متعدد اورتلر تعیین اولدوقدن بشقه اناتولی و ایسی و جبارزاده و فره عثمان اوغلی
وسائر متشخصان اعیان اناتولی و ادنه متصرفی عساکر کیه ایله وارضروم و ایسی
ضیا پاشا اول حوالیده واقع عشائر و قبائلدن وسائر دن تدارک ایده بیله چیکی عسکر
ایله بوسنه و ایسی سلحدار مصطفی پاشا بوسنه عسکر یله تعیین و سلستره و ایسی عثمان
پاشا ایله روم ایلی و ایسی مصطفی پاشا معیتلرینه مستقل اردولر ترتیب و قول کتخداسی
دخی یکچی او جاغندن تخریر اولنان نفرات ایله روم ایلی و ایسی معیتنه و مقدمه
روم ایلی بکلر بکلیکی پایه سیله عهده سنه اینه بختی سنجانلی توجیه اولنان مصطفی پاشا
عهده سنه رتبه وزارتله سالانیک ایالتی بالتوجیه اولاد فاتحان و سالانیک سائر ارباب
حرب و ضربتی ایله ادرنه موقعنه مأمور بیوریلوب اینه کوللی قپوچی باشی نعمان بکه دخی
اول حوالیدن بر مقدار عسکر جمع ایله سرعسکر پاشا معیتنه کلک اوزره ایکی توغ
ویرلمش و اقتضاسنه کوره طرف طرف خزینهلر کوندرلمشدر . و سالانیک ایالتی مصطفی
پاشایه توجیه اولتمق حسینیه بورادن منفصل اولان ابو بکر پاشایه اینه بختی سنجانلی
احاله بیورلمشیدی لکن بش اون کون صکره سالانیک ابو بکر پاشا عهده سنده بقا
اولنه رق مصطفی پاشایه دخی حلب ایالتی توجیه بیورلمشدر .

پاسبان اوغلی ایسه روم ایلیک صاغ قولنی یعنی صوا نهرندن قره دکزه قدر اولان
قطعه سنی دفعه اله کچورور و بده توسیع دائره مکنتمک داعیه سنه دوشه رک روسجق
و وارنه طرفه بشقه و بلغراد جهتنه بشقه قوللر ترتیب و تسیر ایله برابر صوفیه
و نیش طرفلرینک دخی ضبطنه ابتدار ایلمش و طونه ساحلنده روسجغه و بالقان بویندن
شمعیله قدر اولان یرلری استیلا ایدوب آره یرده یالکز بر لوفه قضاسی قالمش
ایدی فقط کندوسنجه بو جهته الزم اولان روسجق ایله وارنه قلعه لرینک
ضبطی خصوصی اولوب بو ایکی سنی اله کچوردیکی کبی و دیندن قره دکزه قدر اولان
محللرک تماماً ضبطنه ظفر یاب اوله جنی مطالعه سنندن ناشی همان قار و قیش دیموب
نیت فاسده سنک فعله کلسی ایچون هر طرفه صالدرمشدر .

شویله که : بالاده بیان اولنان نیکولی و قعه سنندن صکره کاور امام و قوجه محمد کبی
بعض سرکردگان اشقیایی وافر حشرات ایله کندو طرفداری اولان بازار جق
اعیان صرقلی اوغلی نام شقینک معیتنه کوندروب صرقلی اوغلی دخی بونلری یاننه
آله رق جمادی الآخره نیک یدنچی بازار کیجه سی بغته وارنه قلعه سنی محاصره

واوچ قولدن هجوم ایله ایچ قلعه یه قدر دخول و عطاران چارشوسنه قونداق براقوب احراق و خانه لری یغمایه تصدی ایلدکلر نده وارنه قاضیسی اولان لادیقی اوغلی علی افندی بالنفس اهالی ایله برابر مدافعه اشقیایه قیام و کیمی مجروح و کیمی اعدام و قلعه ایچنده قالانلری رای ایله رام ایدوب بقیه السیوف اولان اشقیایه دخی وارنه اطرافنده بولنان قریه لری یغما و بعض چفتلکاتی هدم و تخریب و رعایان بعضیلرینک برونلری قطع و بعضیلرینی قتل ایدرک بازار جغه عودت ایتمش و بومحاربه ده اعدام اولنان برخیلی اشقیانک رؤس مقطوعه لری در سعادته کوندرملکه قاضی افندی وسائر ایش ارلری مظهر احسان پادشاهی اولمشدر .

پاسبان اوغلتک بویله وارنه یه قدر ایصال خسار ایلمسنه نظراً افلاق طرفنه دخی تجاوزی ملحوظ اولوب افلاق و یوهده سی عکس اندری بک ایسه اختیار و بوسره ده افلاقت اداره و محافظه سنه عدیم الاقتدار اولق حسبیله مقتدر برینک و یوهده نصبه لزوم کورملکه جمادی الاخره نك اون بشنچی کونی عزل ایله یرینه مدت مدیده دنبرو دونمای هایون ترجمانلغنده مستخدم اولان خنجرلی زاده قسطنطین بک افلاق و یوهده سی نصب اولدی .

واکرچه دریا ترجمانلی دیوان هایون ترجمانلغنه مخرج اولوب اما افلاق و بغداد و یوهده لقلری منحل اولدجه دیوان هایون ترجمانی نصب اولنه کلدیکندن قسطنطین بکک دریا ترجمانلغندن دفعه افلاق بکلکی مقامنه سعودی فسار لولرک اصول مرعیه لریه اویماز اینده ده مقدما جزائری غازی حسن پاشانک همتیله مشهور ماوریانی بویله دریا ترجمانلغندن دفعه افلاق بکی اولوب سفر اخیره معیتده تجمع ایدن الی التمش بیک قدر عثمانلو عسکرینک حسن اعمال و استخدامنه موفق اوله رق بیوک بیوک ایشلر کورمش اولسی و قیودان پاشانک سرعسکرلکی ملاسه لریله قسطنطین بکک بویله دفعه افلاق و یوهده لغنه ترفیعی یاقشدرمشدر .

بوآنساده پاسبان اوغلی طرفندن مجار علی و غلش و رامی بیراقدار و پوربجه لی و چتاق ولی و موسلی و قره مصطفی نام سرکرده لر معیتلریله روسجق اوزرینه سوق اولنان سکنز اون بیک قدر پیاده و سواری دخی روسجغه اوچ ساعت مسافه سی اولان قاضی قریه سنه ورودلرنده روسجفک تسلیمیه پاسبان اوغلی طرفنه انقیاد اولنسی ایچون روسجغه خبر کوندرمشلر . روسجق ایسه سلستره ایالی والیسنک مقری اولوب روسجق اعیانی ترسنکی اوغلی اسماعیل اغا دخی سفر اخیره سالف الذکر افلاق و یوهده سی ماوریانی بکک معیتده کسب تعین و اثبات وجود ایتمش بک زورلی برآدم اولدیغندن پاسبان اوغلی طرفنه قلیچ ارانه سیله جواب قطعی ویرلش

اولدیغنه مبنی جمادی الآخره نك یکر می یدنجی کونی علی السحر اشقیای مرقومه روسجق اوزرینه هجوم واقحام ودرت ساعت .مقاتله قیام ایتدکن صکره منهزما قاضی قریه سنه عودت و فرداسی بش اون قطعه چته لری ورود ایله نهراً مهاجه ایتمشلر ایسه ده روسجق اسکله سنده موجود اولان چته لر ایله .مقابله و مدافعه اولنه رق آنلر دخی فرار و رجعت ایتمشلر ایکن ینه شقاوتی الدن براقیوب تکرار بتکرار هجوملر ایدرک دیدی کونیدی کیجه علی التوالی محاربه لر وقوعبولوب نهایت عودت و فراغت ایلدکلی و زشتوی طرفدن روسجغه وارد اولان جاسوسلرک تقریرلرینه نظراً بو کونلرده و دین جانندن اوچ بیک قدر اشقیای زشتوی به کله رک روسجق فرقه سنه التحاق ایده جکلری و روسجق اعیانی ترسنکلی زاده اسماعیل اغانک واقع اولان غیرت و صداقتی و روسجق اهالیسنک مشهود اولان ثبات و متاتی برکال اولدیغندن جمله سی شایان نوازش و عنایت اولدقاری بیانیله بالقانک اوته یوزینه کلیتو عساکر تعیینیه تقویه بازولرینه همت بیورلسی خصوصاتی اوائل رجبده سلستره والیسی کورجی عثمان پاشا طرفندن وارد اولان تحریراتده مندرج بولمشدر .

بو تحریرات سلطان سلیمه عرض اولندقدده صدراعظمه خطاباً بیاض اوزرینه اصدار بیوردیغی خط هایونده « عثمان پاشانک تحریراتی کوردم الحق مردلک ایتمش تمام خدمت و صداقت ایلدی کرک کندوسی و کرک قپوسی خلقی و کرک روسجق اهالیسی مرد و غیور آدملر ایتمش ایکی جهانده یوزلری آغ اولسون غیرت و خدمتلی غایت مقبول هایونم اولوب جمله به دعالمز ایلدیکی و عثمان پاشایه هر درلو مساعده شاهانهم مبذول اولمغله و اسماعیل اغا خاص قولم اولدیغنی اثبات ایلدیکندن نصل درلک ورتبه ایسترایسه همان عثمان پاشا چراغ ایلوب بو طرفه یازسون مقبول هایونم ایدوکی و هزار تحسینی حاوی بو خطمی درج ایدرک شمدی فرمان یازیلوب ایرشدرلسون » دیو امر ایتمکله همان منوال مشروح اوزره عثمان پاشایه و اسماعیل اغایه و سائر وجوهه خطاباً فرمان عالی تصدیر و عثمان پاشایه اعلی سراسره قابلو برثوب خلعت سنیه و چند روز مقدم کوندرلمش اولان یکر می بش بیک غروش اوزرینه بو کره دخی یکر می بش بیک غروش عطیه و ترسنکلی اوغلنه برثوب اعلی سمورقونلوش ایله اون بش کیسه عطیه و محاربه ده یارار لئری ظاهر اولنلره توزیع و اعطا اولنلق اوزره قرق کیسه عطیه ایله یکر می عدد شمسلی و سکمان عدد شمسه سزاعلی قپودلر کوندرلکدن بشقه ترسنکلی اوغلی ایله عثمان پاشانک اوغلی احمد بکه درکاه عالی قپوچی باشیانی احسانیه رؤسلی همان تحریر و تسیر بوندن اقدام سلستره اردوسی

دفتردارانی عنوانیه اول طرفه کوندلمش اولان قوجی باشی حسین اغایه شهریه ایله سکیان یازمسی و مقدا عثمان پاشانک استدعاسی اوزرینه اغناد قزاقلرینک برآن اقدام روسجغه جلبی خصوصنده ترسنکی اوغلی ایله بالاتفاق اقدام ایتسی و روم ایلی والیسنه دخی بالقان بوینه عسکر کوندرمسی و شمنی اعیانی چاوش زاده یه وهر ازغراد اعیانی حاجی عمر اوغله واسکی جمعه و عثمان بازاری و سائر اولخوالی یه جوار اولان قضا را اعیانلرینه دخی روسجغه امداد ایلملری ایچون متعدد امرلر تحریر اولنمشدر .

پاسبان اوغلی افلاق یقه سنه عسکر امرار یله قارشو طرفدن دخی روسجخی تضییق ایلمک داعیه سنده بولندیغدن افلاق طرفنده دائره سی مکمل بروزیرک وجودی لازم کلمکله اناطولی والیسی علو پاشا افلاق محافظه سنه مأمور اوله رق بوانساده کلیبولی یه ککشیدی . قپودان پاشا بومسئله اوزرینه بالاستقلال سر عسکر اوله رق تدارکات سفریه ایله مشغول ایسه ده ترسانه امورینی دخی الدن براغه مدیغدن اوچ انبارلیدن صکره انشاسنه مباشرت اولتمش اولان آتمش اوچ ذراع برقطه قالیون ایله برقوروت بوانساده ختام بوله رق شعبانک سکزنجی بازار ایرتسی کونی دریاه ایندی رلدیکی کبی همان اول کون ینه آتمش ذراع برقالیون انشاسنه مباشرت اولندقدن صکره قپودان پاشا کلیبولی یه واروب علو پاشا ایله کوریشهرک وصایای لازمه یی شفاهاً کندوسنه تبلیغ ایله درسعادتیه عودت وعلو پاشا دخی صوب مأموریتنه عزیمت ایلمشدر .

بوانساده اشقیانک بلغرادده دخی منهزم اولدقلری خبر مسرت اثری بالاده مذکور اولان روسجق ووقعاتی تعقیب ایلمشدر . شویله که: پاسبان اوغلنک برطرفدن دخی بلغراد قلعه سنی ضبط ایچون بلغرادلی قره عمر باشبوغلیغله کوندرمش اولدیغی برخیلی اشقیایور ییچه اطه سنی باصوب ویوده سنی اخذ ایله پاسبان اوغله کوندردکن صکره پوزروغجه یی ضبط ایتدکلرینه مبنی سمندره اهالیسنک دخی اشقیای مرقومه یه متابعت ایده جکلرینی سمندره قپودانی حس ایدرک بلغراد قائمقامی عثمان پاشایانه فرار ایتکله اشقیاکلوب سمندره قلعه سنه دخول ایتدکلری خبری عثمان پاشایه وارد اولدقده درحال ایزورنیک متصرفی حسن پاشایه و بکوردن ویوده سنی ولی افندی یه و سائر اقتضایدنله تحریرات کوندرمش اولدیغدن آنلر دخی تیزالدن تدارک ایده بیلدکلری قدر عساکر ایله امداده شتاب ایتشلر ایسه ده آنلرک سمندره یه وصولندن مقدم اشقیای اورادن بلغراد اوزرینه حرکت ایدرک برتقریب ایله بلغراد واروشنه دخول ایتدکلرنده قلعه ده بولنان دلاوران اوچ قولدن اشقیای اوزرینه هجوم ایتدکلری کبی اشقیای منهزم اوله رق برقاچ یوزوفیات وخیلی بیراق و مهمات وجهه خانه لری ترک

ایله فرار ایتیش و نامدار بیر اقدار لرندن اوج نفر سر کر ده لری و یوزالی قدر نفر لری
حیا طو تلمشدر .

بو اخبار ساره نك در سعاده و رو دنده دخی بلغراد قائمقامی عثمان پاشایه و ایزور نیق
متصرفی حسن پاشایه و بکوردان و یوه ده سی ولی افندی به و سائر لره کور کلر و قبودلر
و عطیه لر کوندر لمشدر .

پاسبان اوغلی مقدجه نیکبولی ایله سلوی بی پازده خسار ایتد کدن صکره نیش و صوفیه
اوزر لرینه دخی بر ر قول عسکر سوق ایلدی کی آوانده کوستندیل و تر حاله سنجقلری متصرفی
کرد سید عثمان پاشا دخی مأموراً نیشه کیتمک اوزره اولدییی حالد پاسبان اوغلنک
افساد و اخلالنه مبنی نیش اهلایسی عثمان پاشایی قبولدن امتناع ایتلریله عثمان پاشا شهر
کوینده استقرار اوزره ایکن و دین اهلایسندن ممش نام سر کرده معیتله ایکی بیک
قدر اشقیا شهر کوینه ایکی ساعت مسافه سی اولان دوبره دول نام قریه به کلیجک شهر
کوی اهلایسی خوف لرندن ناشی اشقیا طرفنه متابعته مجبور اولدقلرندن عثمان پاشا
صوفیه به طوغری عودت ایتیش ایسه ده صوفیه اهلایسی دخی اشقیا طرفدن کندولرینه
کلان مکتوبی وسیله ایدرک عثمان پاشانک صوفیه به کلام سنی طلب ایتلریله عثمان پاشا
ناچار منصبی اولان کوستندیل طرفه رجعت و رادومیرده اقامت ایلمش اولدیغنه
مبنی اشقیا کلوب صوفیه به دخول ایتیش ایدی .

لکن روم ایلی والیسی مصطفی پاشا مقدجه ایزلادی و بازار جق طرفلر نیک محافظه سی
ایچون تعیین ایلمش اولدیغی بش بیکدن متجاوز عسکر اوزرینه قارصلی علی اغایی
باشبوغ نصب و تعیین و سیروز اعیانی اسماعیل بکی عثمان پاشا معیتنه مأمور ایدرک ایکی
قولدن صوفیه اوزرینه هجوم ایتلرینی ترتیب ایتدیکی صر ده قزانلقده اقامت اوزره
اولان چرمن متصرفی سلحدار حسین پاشا ایله سلوی و یوه ده سی حسن اغایی دخی
پیاده و سواری اون بیک قدر عسکر ایله غبروه قریه سی اوزرندن طرنوی به کیتمک
اوزره مأمور ایلمش اولمسیله عثمان پاشا ایله قارصلی علی اغا صوفیه اوزرینه حرکت
ایدوب مقابله به کلان اشقیا ایکی قوله دخی منهزم اوله رق فرداسی صوفیه دن فرار
ایتدکلری کبی صوفیه اهلایسی طرفندن عثمان پاشایی دعوت ایچون آدم کلش اولدیغنه
مبنی عثمان پاشا اول کون اشقیایی بر قو فیه بالقاننه قدر تعقیب ایتد کدنصره عود و ققول
ایله صوفیه به دخول ایتدیکی ائنده حسین پاشا قولی دخی طرنوی به طوغری
ایلروله مشیدی . شویله که : رجبک یکر منجی کونی حسین پاشا حر با غبروه قریه سنی
ضبط ایدوب بو وقعهی سلویده بولان اشقیا ایشدکلری کبی فرار ایتلریله حسن اغا
و ازوب سلوی بی ضبط ایتشیدی .

اول اتاده روسجق جوارنده واقع قاضی قریه سنی اون بیک قدر اشقیا ایله قرارگاه
 اتحاد ایتیش اولان مجار علی اوزرینه سلسله والیسی طرفدن هجوم ترتیب اولدیغنی
 مجار علی لدی الاستاع رجبک یکریمی اوچنجی کیجه سی قاضی قریه سنی ترک ایله
 زشتوی طرفه فرار ایتمکین عثمان پاشا طرفدن تعقیب اولمغله اشقیا بر محامده توقف
 ایله میوب خائبا و خامراً یانظره نهر نی کذار ایدر ایکن نهرک وقت طغیاننه
 بالتصادف کیمیمی غرق اوله رق و کیمیمی عقبکیرانک اله دوشه رک خیلیمی تلف
 اولوب بوصره ده سلوی و یوه ده سی حسن اغانک اشقیا اتده اسیر اولان ایکی
 اوغلی دخی قور تلمشدر .

و بازار جق اعیانی صرقلی اوغلی یاننده بولنان کاور امام روسجق قولنده کی اشقیا به
 امداد ایچون بشیوز قدر اشقیا ایله بازار جق دن حرکت ایلمش ایسه ده اشقیانک
 بروجه مشروح منهزم و متفرق اولدقلری کونک فرداسی اول حوالی به وارد
 اولدقده اوزرینه ترسنکلی اوغلی الغار ایتمکله اودخی یانظره نهر نی عبور ایله
 زشتوی طرفه فرار ایتمشدر .

و بو وجهه منهزم اولان مجار علی فرقه سنک برطاقمی رجبک یکریمی بشنجی کونی
 طرنوی به کلمش ایسه ده اول کون حسین پاشا غبروه دن حرکتله اولجه کلوب
 طرنوی به کیرمش اولدیغندن اشقیای مرقومه بونی اکلا دقلری کبی هان عودت
 و فرار ایتمشدر .

و ترسنکلی اوغلی زشتوی اوزرینه حرکت ایتیش و زشتوی اهالیسی اشقیایه مماشادتن
 فراغت ایلمش اولدقلری جهته زشتوینک ضبطی قوه قریه به کلدیکی صره ده مجار
 علینک امینجک نام سر کرده معیتله طرنوی اوزرینه سوق ایلدیکی اشقیا دخی
 منهزم اولدقندن بشقه مجار علی معینده اولان بر آرنابود بلوکباشیسی بشیوز نفر
 سکبانیه حسین پاشا طرفدن جلب اوله رق برو طرفه کچمش اولدیغندن مجار
 علینک قوتنه ضعف کلوب نیکبولی به طوغری کیتمش و ترسنکلی اوغلی دخی
 زشتوی به کوروب ایکیوزدن متجاوز اشقیای حیا طو تمشدر فقط کاور امام ایله
 ارسلان اوغلی نام سر کرده لر فرار ایلمشدر .

و مقدا روسجق طرفنده کی اشقیایه تفرقه ویرمک اوزره ادرنه ده بولنان آدنه
 متصرف میرمیران یوسف پاشا شمعی به واروب سربست زاده قوچی باشی طاهر
 اغا و شمعی اعیانی چاوش زاده ویلیق چاوش زاده ویلیق اوغلی و هراز غراد
 اعیانی حاجی عمر اوغلی و وارنه و یوه ده سی و سائر ایش ارلری برلشهرک ابتدا
 پراودی قضاسنک تخلیصنه قیام ایتدکلر نده پراودی اعیانی حاجی مظلوم و قوز لیجه ده

اولان مناو اوغلی نام سر کرده لر صرقلی اوغلینک یانسه فرار ایتملریله بوا یکی قضا بلا محاربه ضبط اولندقدنصرکه اوائل شعبانده صرقلی اوغلینک اوزرینه حرکت و بازار جفک محاصره سنه مبارت اولندقدن صرقلی اوغلی کیجه فرار ایتمکله بازار جق دخی تخلیص اولندیغی و اشقیانک تعقیبنه مأمور اولان اغلردن هر ازغراد اعیانی حاجی عمر اوغلی صرقلی اوغلی حیاً طوتمش اولدیغندن کندوسی در سعادتیه کتورمک اوزره بولندیغی یوسف پاشا طرفدن در سعادتیه انها اولندقدن صرقلی اوغلینک حیاً در سعادتیه کتورلمسی تنسیب بیورلمدیغندن ارسال اولتان امر عالی موجبجه کندوسی حاجی عمر اوغلی اعدام ایله سر مقطوعنی در سعادتیه کتورمشدر مؤخر آ حاجی مظلوم دخی قوزلیجه تکیه سنده طوتیلوب کذلک آنکده حیاً در سعادتیه کتورلمسی مستحسن کورلما مکه محلنده جزاسی ترتیب اولنه رق سر مقطوعنک در دولته کوندرلمسی ضمننده یوسف پاشایه امر و اشعار بیورلمشدر .

پاسبان اوغلی مصاحتک اطرافلی طوتلیدیغنی کورلیجک سر حد نشینانی اغفال ایله بیله جک و ایشک شکلی دکشدره جک بر صورت آرایوب و دین محافظی عبدی پاشانک کتخداسی بوزاوقلی محمد افندی کندوسنک مجلوبی اولدیغندن و عبدی پاشا دخی کندو النده اسیر حکمنده بولندیغندن استغفای جرم و قصور زمیننده عبدی پاشایه برانها یازدیروب محمد افندی ایله در سعادتیه کوندرمش اولدیغنی استخبار اولندقدن بر موجب اراده سنیه طرف صدر اعظمیدن باش تبدیل کوندریله رک چکمهجه کیرده محمد افندی به تصادف ایتمدیکی کبی اعدام ایروب سر مقطوعیله برابر یاننده کی تحریاتی آلوب در سعادتیه کتورمشدر .

بالاده اشعار اولندیغنی اوزره لوفجه اها لیلی مقدم و مؤخر فداکارانه حرکتله گروه اشقیایه مقاومت ایدرک کرک طاغلو اشقیاسنی و کرک پاسبان اوغلی طاقنی مملکته اوغرا تمامشدر ایدی لکن دولت عسکرینی قبول ایدرک بوکره روم ایلی و الیسنک قوجیلر کتخداسی ایله بیکباشی پهلوان اغا لوفجهیه داخل اولملریله پلونه طرفنده کی اشقیایه اوزرینه هجوم ایچون طرنویده بولتان سلحدار حسین پاشا فرقهسی ایچون لوفجه قضاسی اس الحركات جدید اولدیغنی ائاده ایزلادی اعیانسک اوغلی طوسون اغا و فلهلی عبدالرحمن اغا ایوراجه اوزرینه حرکت ایتملریله اوراده بولتان اشقیایه فرار ایتمدیکندن طوسون اغا ایله عبدالرحمن اغا کلوب ایوراجه نی ضبط ایتمشدر ایدی . روم ایلی و الیسی مصطفی پاشا موجود معیتی اولان طوپچی و عمر به جی اورطه لریله و سائر قوه عسکریه ایله فله دن صوفیهیه حرکت ایروب قارضلی علی اغایی دخی بر قوفجه ده کی اشقیایه اوزرینه کوندرمشیدی آنجق مجار علی ورامو بیراقدار کلیتو

اشقیا ایله پلونه ده بولوب علی اغا دخی للملاحظه ایوراجه ده توقف ایدرک برقوقه اوزرینه اوچیک قدر عسکر ایله برقاق سرکرده کوندرمکله اشقیا خبردار اولدقلری کبی برقوقه اها لیسندن چایی اغا کبی پاسبان اوغلتک طرفداری اولنلر ایله برلکده فرار ایلمش اولدقلرندن بلا محاربه برقوقه یه دخول اولدینی ائنده سلحدار حسین پاشا دخی لوخه یه کلوب اورادن مجمع اشقیا اولان پلونه اوزرینه هجوم ترتیب اولدینی محار علی خبر آلدینی کبی درحال معینه کی اشقیا ایله برابر اسماعیل بوکاری طرفه فرار ایلمش اولملریله پلونه دخی بلا محاربه تخلیص اولمشدر . صوفیه ولوخه قوللری برلشوب ایرولیه رک و دینی بر محاصره حاله قوملری روم ایلی والیسی طرفندن امر اولمش ایدو کندن روم ایلی والیسک قوجیلر کتخداسی لوخه اعیانی حاجی اسماعیل اغا و بیکیباشی په لوان اغا ایله برابر برقوقه یه متوجها لوخه دن حرکت ایله رحوه قضا سنه واروب اورادن په لوان اغا چاپول طریقیه ایرویه کوندرلکده انهای راهده پاسبان اوغلی طاقندن بعض اشقیایه لدی التصادف واقع اولان محاربه دهر سرکرده دکان اشقیادن پلونه اعیانی طوپوز اوغلی ایله بعض اشقیا اتلاف اولنهرق باقیسی منهزما فرار ایتمش ایدی . بونک اوزرینه لوخه عسکری مجمع اشقیا اولان اسماعیل بوکاری قریه سی اوزرینه هجوم ایله محاربه یه قیام ایتدکارنده اشقیانک باشوغی اولان رامو بیراقدار فرار ایلمش ایسه ده معتبر سرکرده لرندن قره حسن ایله برخیلی نفراتی تلف اولهرق بقیه السیوفی فرار ایتمشدر . بو ائنده صوفیه قولی دخی برقوقه طریقیه لوم اوزرینه حرکت ایتلریله اول طرفه بولنان اشقیا و دین جانبته فرار ایدرک لوم قصبه سی دخی استخلاص اولمشدر .

بو ائنده بوسنه والیسی بلغراد طرفه حرکت ایدوب او قولده دخی اشقیا منهزم اولهرق سمندره قلعه سی استخلاص اولمشدر . و پاسبان اوغلی طرفندن سمندرنک امدادینه کوندریلان اشقیا بغته پوزر و خه قصبه سنه هجوم ایله واروشنه دخول ایتمشر ایسه ده دولت عسکری شرانبو قوسنی کشاد ایله براغوردن واروشه هجوم وایکی ساعت یقه یقه جنک ایدرک اشقیایه غلبه ایتلریله اشقیانک خیلی سرکرده و نفراتی تلف اولمش و التمش بوقدری حیاً طو تلمش و بعض ابنیه مستحکمه ده متحصن اولنلرک دخی اطرافنه آتش القا اولنهرق ابنیه ایله برابر احراق ایدلمشدر .

برمنوال سابق صوفیه ولوخه قوللری ایرولیه رک و دینه یا قلاشمش ایسه لرده آرده نیکبولی قلعه سی اشقیا یدنده قالدیغندن جرمن متصرفی حسین پاشا ایله ادنه متصرفی یوسف پاشا سلستره والیسی معینه ویریلرک نیکبولی اوزرینه سوق اولوب ترسنکلی اوغلی اسماعیل اغا دخی دیگر بعض رؤسا ایله قارشو یقه ده واقع قله اوزرینه

کوندرلمشیدی . ترسنکلی اوغلی قلهبی ضبط ایدرک نیکبولی قلعهسی برآ ونهرآ
حصر و تضییق اولنوب و سلسلته و الیسی بالذات بورایه کلوب خلال رمضانده
یورویشله نیکبولی قلعهسی دخی ضبط اولنهرق پاسبان اوغلی طرفدن محافظ بولنان
اوتوز بر اوغلی امین اغایله معینده کی بیکباشیلردن بشقه ایکی یوز بوقدر اشقیما
اعدام اولمشدر .

وقوعات مشروحه پیدرپی درسمعاده تحریر و اول عصرک عادی اوزره علامات
مظفریت اولمق اوزره هر قولدن کلهلر تسییر اولندجه درسمعادتدن دخی قول قول
مأمورین و سرکردگان و سائر خلعتلر و عطیهلر ارسال اولنه کلمشدر و خلال رمضانده
صوفیه قولنه مأمور اولان سالف الذکر قارصلی علی اغایه و سلسلته و الیسی کرچی
عثمان پاشانک دلیل باشیسی ایدین اغایه رتبه میرمیرانی احسان بیورلمش و چونکه ایام
شاده طونه یالینسده و بالقان طرفلرنده حرکت عسکریه پک مشکل ایکن بالجمله امرا
و ضابطان و مأمورینک بومرتبه سعی و اقداملری شایان تحسین و افرین اولغله سائر
یارارلنی ظاهر اولنلر دخی علی مراتبهم مظهر مکافات سنیه اولمشدر .

شوالک دردنجی کونی واقع اولان توجیهاتده دخی ادنه متصرفی یوسف پاشا ایله چرمن
متصرفی حسین پاشایه رتبه وزارت احسان بیورلمشدر . فی الاصل طاغلو اشقیما
سرکرده لرندن ایکن کندوسنه رای و امان ویرلمش اولدینی حالدده پاسبان اوغلی طرفه
تابع اولان امینجک برمنوال سابق پاسبان اوغلی طاقنک طرف طرف هزیمتلیرنی
کوردکده بروطرفلره کلوب قورتلحق فکریله بر مقدار اشقیما استصحاب ایدرک
طرنوی قراسندن و رانوه نامقریه به کلوب تحصن ایتدیکی ائشاده طرنوی و یوده سی
اولوب سلحدار حسین پاشانک قاچرمش اولدینی کوپرلی اوغلی ابراهیم دخی
بر مقدار سواری ایله آنک یانه وارمش اولدینی لدی الاستخبار اوزرلرینه ادرنده
بولنان حلب و الیسی مصطفی پاشا طرفدن جبار زاده و قره عثمان اوغلی طاقمی
میرمیران نعمان پاشا باشبوغلیله اولطرفه سوق اولغله امینجک اورالرده دخی
ثبات ایده میهرک و دینه طوغری قاچوب کیدرکن ائشای راهده بلغرادجق
قلعهسنی ضبط ایتمش اولان روم ایلی و الیسی سلحداری سلیم اغانک سواریلرینه
تصادف ایتمکله لدی الحاربه عونهد سنندن بعضیلری اتلاف اولمش ایسهده کندوسی
ودینه فرار ایلمشدر .

و برمنوال سابق لوم طرفنده منهزم اولهرق فرار ایدن سرکردگان اشقیادان مجار
علی و کاور امام ودلی مصطفی باشلرنده کی اشقیما ایله و دینه درت ساعت مسافه سی
اولان اچار پلنغه سننده قرار ایتمکین کرد عثمان پاشا طرفدن مقدار وافی عسکر

وايکي طوب ايله اوزرلرينه سوق اولنان پالاسلی محمد پاشا اچاره واردقده اشقيا مقابله به چيقوب طلوع شمسدن وقت غروبدهك تمتد اولان محاربهده اشقيادان بشيوز قدری تلف و برنجیسی مجروح اولدقدن بشقه یتیمش درت نفری دخی حیا طوتیلوب اننای معرکهده مجار علی ايله کاور امام دخی آتلرندن دوشمشلر ایکن هجوم اشقيا حسیله رؤس مقطوعه لرینک اخدی قابل اوله مدیغندن لاشه لرینی اشقيا بارکیرلره ارکاب ايله درون پلنغه به ادخال ایتشلر . نصف ایله پلنغه به آتش اوروب و دینه کیتمشلر خانه لر بربرینه قریب اولدیغندن اطفاسی قابل اوله میه جنی جهته دولت عسکری اول کیجه اطراف قریه لرده یتوت ایدوب ایرتسی کرد عثمان پاشا دخی اورایه کلرهك مواقع لازمه به باشبوغلا تعیین واقامه سیله اطرافه استحکام ویردکن صکره اچار اهالیسنی لومه اسکان ایتک اوزره پالاسلی محمد پاشا ايله برابر عودت ایلمشدر .

بوآناده افلاق و یوه دهه سی دخی چرنس قضاسنه بر مقدار عسکر ارسال ايله آطه کیر قلعه سنده پاسبان اوغلی طرفدن محافظ بولنان کنج عثمان اگا و سائر سرکردگان و مستحفظان قلعه بی بر تقریبه برو طرفه جلب ایتمش اولدیغندن بلغراد و سمندره طرفدن و دین پیشکاهنه کله جک اچق و چته قایقرینک مرور عبورینه مانع و مزاحم قالمش . و بو کونلرده امینجک فتح الاسلام قریه لرنده کشت و کدار ايله رعایایه ایصال خسار ایتدیکندن معیتده اولان ایدین پاشا ايله دلیل باشیسنی و کوکلی اغاسنی اولحوالینک محافظه سنه ارسال و معیتده کی اسلام عسکری سرکرده سی اولان جعفر ابراهیم بیراقداری دخی آطه کیر قلعه سنه کوندروب امر محافظه به استعجال ایلمشدر .

پاسبان اوغلی اوزرینه بالاستقلال سرعسکر اولان قبودان دریا حسین پاشا . همت و ادوات لازمه بی تهیه ایدوب موسم دخی ارتق حرکته مساعد اولغله شوالک یکر می اوچنجی بازار ایرتسی کونی سلطان سلیم بنش طریقله میراخور کوشکنی تشریف ایدوب حسین پاشا دخی ترتیب آلائی ايله ترسانه دن حرکت ایدرک قصر هایون پیشکاهندن کچر کن حضور هایونه جلب ايله بول یکلو کورک الباس اولدقدن صکره روم ایلی جانبنه عزیمت ایلدی .

تپه دنلی علی پاشا اون بش بیک عسکرله پاسبان اوغلی اوزرینه مأمور اولمق حسیله کندوسنی تطیف ضمنده اوغلی مختار پاشایه اغریبوز و قارلی ایلی سنجانچی توجیه اولمشدر .

بالاده اشعار اولدیغی اوزره حلب والیسی مصطفی پاشا پاسبان اوغلی اوزرینه مأمور

اوله رق ادر نه جانبنده بولنوب حلبده ایسه خلال رمضانه یکچریلر ایله سادات
 بیننده تحدث ایدن منازعه و مقاتله کسب امتداد ایلیکندن مقتدر وزرادن برینک
 حلبده بولنمی لازم کلکله همان مرعش والیسی محمد شریف پاشا حلب والیسی
 نصب اولنوب مرعش ایالتی دخی میرمیران درویش حسن پاشایه توجیه قلمشدر .
 قبودان دریا حسین پاشانک ادرنهیه وصولنده پاسبان اوغلی بشقه واسطهیه محتاج
 اولدیغندن طرفدن استیمان ایچون برادری کلوب نیاز عفو ایله دخیل دوشمش
 ایسهده کندوسنه امنیت اولنه مدینی جهته بونجه تدارکات جسیمهیه تشبث اولنمشیکن
 عفوی طرفنه کیدلمکه جسارت اولنه مدیغندن و برده حسین پاشانک نفوذ واقبالی
 وکلای دولته کران کلهرک توجه شاهانه دن مهجور و هیچ اولمز ایسه بر مدت
 در سعادتدن دور اولمی ملتزم لری اولوب پاسبان اوغلنک ازاله سی امرنده سرمو
 رخاوت و تسامح صورتندن مجانبت اولنمسیچون در سعادتدن اکید و شدید امر لر
 کلهرک عفو و استیمان قبولری سد اولنش ایدوکنندن حسین پاشا همان تدارکات
 جسیمه ایله و دین اوزرینه حرکت و و دین قلعه سنک محاصر سنه مبادرت ایلمشدر .
 شویله که : افلاق یقه سنده بولنان اناطولی والیسی علو پاشا اشبو بیک ایکینوز اون
 ایکی سنه سی ذی القعدة سی خلالنده قلفات ایله و دین اراسنده واقع آطه نک ضبطنه
 تشبث ایتدکه پاسبان اوغلی و دیننده موجود چته قایق لری طونادوب مقابله یه
 قیام ایلمش اولدیغندن طرفینک چته لری بر برینه چاتوب واقع اولان محاربه
 نهر یه ده اشقیا طرفی مغلوب اولمغله مذکور اطه ضبط اولندیغی اثناده و دینه
 قریب ویدبول نام قریه پیشکاهنده واقع اولان بر سواری محاربه سنده دخی اشقیا
 منهزم اوله رق و دینه فرار ایتشلردر و سر عسکر پاشا قریه مرقومه نک ایلروسنده
 واقع چوبان کور یسی نام محله کلهرک نصب خیام ایدوب روم ایلی والیسی مصطفی
 پاشا و بوسنه والیسی ساحدار مصطفی پاشا و سلسلستره والیسی کر جی عثمان پاشا
 و ادنه والیسی یوسف پاشا و تر حاله متصرفی کرد عثمان پاشا و چرمن متصرفی
 حسین پاشا و تپه دلتلی علی پاشا و بلا سلی محمد پاشا و قارصلی علی پاشا دخی طاقم طاقم
 کلهرک اردوی سر عسکر یه حاضر اولملریله بالمله وزرا حضور سر عسکر یه
 جلبله عقد اولنان مجلس مشورتده صودن صویه متریس حفریله و دین
 قلعه سنک حصر و تضییقه مسارعت اولنمق اوزره علو پاشانک دخی سواری ایله
 برویقه یه امرارینه قرار ویریلهرک وزرا و میرمیرانلرک اردو موقع لری تعیین ایله
 اجرا آتته تشبث اولنش ایسهده اول امرده امینجک نام سر کرده اشقیانک متحصن
 اولدیغی نومه سل قریه سنک داخل متریس ایدلمک اوزره ضبطی لازم کلکله

ذی الحججه نك اون ایکنجی کونی بوقریه اوزرینه هجوم اولدوقده امینجهکه امداد ایچون ودیندن دخی بر مقدار سواری چیمغله اول کون اخشامه قدر ممد اولان محاربه ده برخیلی اشقیاتلف و مجروح اولدوقدن بشقه امینجک دخی قولندن و کوسکندن یاره لهرک اخشامدن صکره و دینه فرار و اوراده ترک حیات مستعار ایلمشدر بوصولته نوه سل قریه سی ضبط اولنهرق امر محاصره اکیال اولنسی اوزرینه پاسبان اوغلنک بر نفر تاتاریله استغفای قصور سیاقده عریضه سی کلوب عفوینه مساعده اولنورایسه سرعسکر پاشایه کله جکنی تاتار افاده ایلدکده سرعسکر پاشا طرفدن کلورایسه کندوسنی قور تاریم یالکر یاخود بش اون نفر آدمیله کلسون کلسی کندیسنه بادیء سلامت اولور جوابیله اعاده اولنش ایکن تاتار مرقوم یته کلوب منوال سابق اوزره عرض نیازیتدیکندن کلورایسه کلسون کلزایسه سندخی بعد الیوم کله کلورایسک سنیدخی قتل ایدرم دیو اعاده ایتدکن صکره و دین علماسندن حاجی علی افندی نامنده بر بیسایه تکرار بر کاغدی ظهور ایدوب اودخی لساناً استعفا و استدعایه تشبث ایلدکده و دین قلعه سنک بو محاصره دن قور تلمسی ان شاء الله شقیء مرقومک ازالهء وجودیله اولور ایشکزه الویره نی ایشلیکر جوابیله اودخی اعاده اولنغله بعده و دین محافظی عبدی پاشا طرفدن اندرون باش چاوشیله تحریراتی ظهور ایدوب اکا دخی ردایله جواب ویرلیدیکندن پاسبان اوغلیله سائر محصورین ارتق مایوسانه جان و باشلی قیدینه دوشوب برو طرفدن دخی قلعه نك حصر و تضییقه دوام اولمشدر .

و دین محافظی عبدی پاشا بر مدت پاسبان اوغلی یدنده اسیر حکمنده طوروب فقط نام و عنوانی باقی اولهرق پاسبان اوغلی دردولته مراجعت ضمنده آنک طرفدن بعض تحریرات یازدیر یوردی مؤخر آ پاسبان اوغلنک محافظ مشار الیهی اعدام ایلدیکی تاریخ عاصمه محرردر .

(وقایع ۱۲۱۳ سنه)

بروجه سابق هر طرفدن و دین قلعه سنک محاصره سنه قیام ایله بربری اوکنده متریسار آله رق و ضویراق سوریه رک همان قورشون منزلی قدر واروشه تقرب اولنغله برآ و نهر آ آیلان طوب و خیره دانلرندن خانه و خان و جامع و دکانلر منهدم و محترق اولدیفندن درون قلعه ده تمکن ایده جک یر قالمیوب هر کس قلعه دیواری دیپلرنده زمینکلر حفر ایله محافظه نفسه ابتدار و برکیجه اشقیا چرمن متصرفی حسین پاشا اردوسنی باصمش ایسه لرده برشی پایه میوب منهدماً و دینه عودت و فرار ایتمشدر لکن بویله طوبلاشمغله وقت اوزایه جغه بناء وزرا و سائر سرکر دکان ایله بلذا کره هر طرفدن یوروش اولنق اوزره قرار ویریه رک محرمک اون التنجی

جمعه ايرتسی کونی هر طرفدن هجوم اولمش ايکن اشقيانك واروش خندقلردن و خندق کنارينه يادقلى طايه لردن طوپ و تفنگ ايله قوياً مدافعه لری و خندقلرک صوايله مملو اولسی حسیله دولت عسکرينک خندقلره دخولی میسر اولیوب مجبوراً مریسلرینه عودت ایتمشلردر فقط ایچلردن خیلیمجه آدملر و نیجه نامدار سرکرده لر شهید و پک چوق کیمسه لر مجروح اولمشدر .

نوری بك تاريخنده سرعسکر پاشا طرفندن درسعاده وارد اولان تخریراتدن روایت ايله محاربات مذکوره ده حاجی عثمان پاشانک تفنگچی باشیسیله بر ایکیوز مقداری دلاوران نوش سلافه شهادت ايله عازم خان اولدقلى محرردر حالبوکه اول محاربه لرده بولنان و اولوقتلره يتيشان ذواتدن تحقیقمزه کوره یالکزر لوخه قولنک بوندن زیاده ضایعاتی واریتمش چونکه جلد سادسه بیان اولدیغی اوزره طاعلو اشقیاسی و مؤخرأ پاسبان اوغلنک سرکرده لری بالقان بوینده کی قضالری هپ نیجه تغلب و تحکمه آلمش اولدقلى حاده لوخه اهالیسی وطنلری اغورنده بذلجان ایدرک بومقوله اشقیایی درون مملکتده اوغراتمامش اولدقلى جهته اول عصرده لوخه عسکرى خیلیمجه شهرت بولمش اولدیغدن سرعسکر پاشا بالذات آنلری هجومه تشویق ایتسیله اشقییا محاربه لرنده فرط جسارت ايله مشهور اولان یولار قران اوغلارندن احمداغا زاده سلیمان اغا لوخه بیراغنی چکوب خندق کنارینه قدر کیده رک اوراده بیراغنی رکر ایتمش ایسه ده قلعه دن یاغمورکی قورشون و مسکت دانلری یاغدیریله رق سلیمان اغا قورشون ايله ایاغندن یاره لشمش و یاننده کی عسکرک اکثری شهید و مجروح اولوب قلمش اولدیغدن لوخه بیراغنی خندق کنارندن و سلیمان اغا دوشدیکی یردن پک کوچ حال ايله کبرو آتیه بیلمشدر .

مقدما طاعلو اشقیاسنک لوخه قصبه سنک اوزرینه هجوملرنده بوسلیمان اغا ایلرو مدافعه یه سکر دنلردن اولوب اولوقت باشنه قورشون اصابتله دوچار اولدیغی تهلکه کی صاوشدرمش ایکن بوکره ایاغندن مجروح اولوب لوخه یه اعاده اولندقدنه یاره سی متشنج اولغله و برادری علی افندی [۱] یاره سنه باقدیرمق اوزره استقبالنه شستاب ایلمش ایسه ده و دیندن اورایه کلنجه خیلی مسافه اولدیغدن اولوقت قدر ایش ایشدن کچمش اولدیغی جهته سلیمان اغا لوخه ايله پلونه اره سنده برقریه ده وفات ایتمشدر . غریبدرکه سلیمان اغا دها محظطره لو بریاردی مملکتنده رلوجرا حارل معرفتیه کچمشدرمش ایکن دولت اردوسنده ایاغنده کی یاره یه باقلمدیغدن تشنج ايله وفاتنه سبب اولمشدر . اوزمان اردولرده درکار اولان نظامسزلقدن ناشی محاربه لرده شهید اولنلردن بشقه

[۱] علی افندی پدرم الحاج اسماعیل اغانک پدری اولان الحاج علی افندیدر .

مجرور اولئرک دخی چوغی باقسزلقدن تلف اولوب کیدردی الحاصل بو قلعه یورویشنده پک چوقیکیتلر تلف اوله رق اردوی سرعسکری یه خیل ضعیف کیشیدی . بوندن بشقه جیخانه آزالمش ایدی . و بویه برمتین قلعه طایبه لرینک هدمی بیوک طویلره محتاج اولدینی اکلاشلدی بناءً علیه مجدداً مقدار کافی مهمات ایله بیوک طویلر کوندرلمی جانب سرعسکریدن در سعاده عرض وانها ایدلدی .

بالاده بیان اولدینی اوزره فرانسه لونک طولون ترسانه سنده کی تهیئات جسیمه سندن دولت علیه شبهاته دوشوب تدابیر احتیاطیه یه مجبور اولدیغدن باری شو پاسبان اوغلی غائله سنک چارچابوق بتورلمی لازمه حال ومصلحتدن کورلمش ایکن قپودان پاشانک یکیدن طوپ ومهمات ایستهمی ایشک اوزایه جغه دلیل اولمغله سلطنت سنیه یه خیایدن خیل اندیشه یی موجب اولدی .

وبو ائشاده بوناپارتنک مصره سوء قصدی تحقق ایتمکه دولت علیه نک برأ ومجرأ تدارکات کلیه یه تشبث ایلدیکندن بختله تیقظ وانتباه اوزره بولمق ایچون ولات وسائر مأمورینه اوامر علیه ارسال اولتمش ایدی وبوسنه والیسنه یازیلان امر عالیده دو برو ونیک جمهوری رعایای دولت علیه دن معدود اولمغله اورایه دخی دشمن طرفدن تعرض وقوعه کاورسه محافظه سی لازم که جکندن بر میرمیران معیتله دو برو ونیک حدودینه بر مقدار عسکر سوق اوله رق جمهور مذکور وبکبری طرفدن خبر وارد اولدینی کی درون مملکته دخول اوله رق دشمنک تجاوزنده بالاتفاق مدافعه ومحافظه یه اهتمام اولتمی خصوصی درج وتذکار قلمش ایدی .

متعاقباً فرانسه لونک بوسنه اوزرینه سوق عسکر ایده جکی استماع اولندی . بوسنه والیسی ایسه و دین اردوسی سرعسکری اولان قپودان پاشا معیتده بولندیغدن والی مشار الیهک بوسنه یه اعاده سی خصوصی دخی قپودان پاشایه اشعار اولمغله بوسنه والیسی محل مأموریتنه کیتدیکی کی کذلک قپودان پاشا معیتنه مأمور اولان تپه دللی علی پاشا دخی امر محافظه ایچون یانیه یه کیتدی .

بو جهته اردوی سرعسکری یه بر مرتبه دهاضعف کادی . متعاقباً مصر سفری تحقق ایدرک دولت علیه او طرفه حصر افکار ایتمکه بشقه طرفه عطف نظر ایده جک وقتی اولدی . سرعسکر بولنان قپودان پاشا ایسه عاصم افدینک خلاصه تفصیلاتنه نظر آعاقل ورشید بر ذات ایسه ده اندرون همایونده پرورده اولوب احوال خارجیه نک حقائق و دقائقدن غافل وتجربه سزلکی حسبیله امور حر بیده راجل ومی اقبال ایله مست وفرط توجه پادشاهیدن ناشی بالادست اولمغله بی پروا وضع وحرکتی وتنک حوصاله اولدینی جهته منفعل اولدینی رؤسای عسکر یه حقلرنده ایجابنه کوره کظم غیظ ایله رفق

و ملائمت معامله سی ایدہ میوب همان اظهار خشم و کین ایله تهدیدہ سرعتی حسیلہ و پاسبان اوغلنہ ظفر بولدینی کبی کرد علو پاشا و تپہ دلتلی علی پاشا و سائر اعیان متغلبہ یہ نوبت کله جگنی طور و حالندن استدلال ایتلمیله اردو ارکانندن اولنلرک اکثری آنک مظفریتنی استمز لردی .

قالدیکه حسین پاشانک اوضاع متحکمانہ سندن دلکیر اولان بعض اکابر آنک اضمحلالتی تمنی ایدرک داخلی و خارجاً شقاق و نفاقدن خالی اولمازلردی ایشته بومثلو سبیلردن ناشی و دین اردوسی برائی حالده دکل ایدی .

بناءً علیہ برکون علو پاشا سرعسکر پاشا یانندن قالقوب کندو موقعته کیدرکن دفعهً و دیندن برفرقه اشقیا چیقوب کرد عثمان پاشانک متریسلرینه و بعده سرعسکر پاشا طرفنه هجوم ایتکله عثمان پاشا شهید و سرعسکر پاشا قولنده آثار پریشانی بدید اولدینی ائناده علو پاشا عادتاً سیرجی اولوب امداد ایتدکن بشقه امداد ایدہ جک اولنلری دخی منع ایله کندو یاننده توقیف ایتدکن ناشی بونجه تکلفات ایله ترتیب اولنان اردو منہزم و پریشان اوله رق بوقدر مصر فلر و امکلر محو و هبا اولوب کتمشدر . موسم شتا تقرب ایلمش اولدیغندن تکرار اردویی طوبلا یوبده و دینی محاصره قابل اولیوب فقط باری اشقیانک زیاده جه فرجه بولما لری ایچون عسا کرک و دین جوارنده مشتانشین اولملری اقتضای حالدن اولمسيله علو پاشا عسکری طاغتمیوب مواقع مناسبه ده مشتایه یرلشدر ملک اوزره یرندن حرکت ایتماسی ایچون کندوسنه تذکره سرعسکری یازلمشیکن مفید اولمیوب اون بشیک قدر سواری و پیاده عسکری استصحاب ایله لومه عودت و بعده مشتامصلحتنک مذاکره سی ضمننده بش اون کون قدر برقوقچده توقف ایلمسی تئیه اولنمشیکن اورایه کیتمیوب ایوراجیه عزیزمت و بتون بتون مصلحت دولتی ترک ایله براوجدن عسکری صوفیه به ارساله و برطرفدن پاسبان اوغلی ایله مخبره به مبادرت ایلمشیدی .

بو علو پاشا که فی الاصل جزا لرلی حسن پاشا معینندن میر میرانلق ایله چیقوب بعده وزیر واکر اددن اولمق حسیلہ علو پاشا دیو شهیر اولمشدر فقرا یه ظلم و تعدیسی و طرف دولته اطوار باغیانہ سی معلوم ایکن بحسب الاقتضا اجرای جزاسی وقت مرهونته تعلیق اولنه کلوردی بوکره دخی بروجه مشروح سرعسکر اردوسنک انہزامنه سبب اوله رق اهاتی تین و او دخی پاسبان اوغلی کبی برفته اولدینی تعین ایتکله آرتق ازاله و وجودینی قبودان پاشا تصمیم ایدرک همان راحوه به عودتندہ بعض مواد مذاکره سیچون تحریرات ارساله دعوت و ورودندہ کندوسیچون راحوه ده مخصوص قوناق تھیئه سیله بر ایکی کون اغفالنه مبادرت ایلد کندنصرکه

بر کونینه بعض مواد مذاکره سی ضمننده کندو قوناغنه دعوت ایله اخشامه قدر
 اصرار وقت اولنه رق بر لکده اخشام نمازی بعد الادا بر معتاد اتباع و خدمه طشره
 چیقوب تناول طعامه ابتدار اولدینیی حالده مقدمه ترتیب اولدینیی اوزره قپودان
 پاشا تبعه سندن بر قاسچی مساحاً او طیه دخول ایتدکارنده علو پاشا ایاق سسندن
 ایچرویه آدم کیردیکنی احساس ایله آرقه سنه باقوب آنلری کور یجک متعجبانه سر عسکر
 پاشا طرفنه اماله نظر ایتدیکی آنده سر عسکر پاشا کندو یاننده تعیمه ایتمش اولدینیی
 چفته قورشونلی پشتوی اوزرینه بوشالتدقده قورشونلرک بری چهره سنه ودیکری
 کوکسنه اصابت اید یجک هول جان ایله بلند کی پشتوی بوشه بوشالدوب یاننده کی
 پاله ایله مدافعه قیدنده ایکن او طیه کیرمش اولان سالف الذکر تبعه سر عسکری
 در حال اوزرینه هجوم ایله اعدام ایتمشلر سر مقطوعی جمادی الآخره نک اوزن التنجی
 کونی در سعادت واصل اولدقده بر معتاد قبه هایونه وضع ایله اوچ کون تشهیر قلمشدر .
 علو پاشادن منحل اولان روم ایلی ایاتی بوندن اقدم بحر سفید بوغازی محافظی
 نصب اولنان زینخلی حسن پاشایه و مرحوم کرد عثمان پاشادن منحل اولان ساستره
 ایالتی نیکبولی سنجانی متصرفی حسین پاشایه و نیکبولی سنجانی علو پاشا کتخدا سی
 سید مصطفی پاشایه توجیه بیورلمشدر و بو اوانده خوتین محافظی حسام الدین پاشا
 حلول اجل موعود یله وفات ایتکین فی الاصل سکبان باشی ایکن مؤخرأ رتبه و زراته
 نائل اولدقند صکره و زراتی رفعله از میدده اقامت اوزره اولان یکن محمد پاشا
 جمادی الآخره نک اوزن سکرنده ابقای وزارتیه خوتین محافظی نصب ایدلمشدر .
 بر منوال سابق و دین اردوسنک انهم از مندن صکره قپودان پاشا دخی آرتق اولطر فده
 طور میوب مصر سفری ایچون لازم کلان تدارکات بحر یه نک اکمالی ایچون
 در سعادت عودت ایلمشدر .

و بو وقعه اوزرینه پاسبان اوغلتک صیت و شهرتی دوبالا اولوب آنک اطوار
 باغیانه سی سائره دخی سرایت ایدرک طرف روم ایلی اعیانلری طوائف ملوک
 طر زنده رفع لوای طغیانه باشلادیلر و بعضاً یکدیگریله محاربه ایدوب غالب کلنلر
 مغلوبک بلده سنی قلیچی اکیکی کی ضبط ایدر اولدیلر بو صورتله و دین جهتی پاسبان
 اوغلتک دست تغلب و تحکمنده قالدینیی کی روسجق و شعنی طرفلری ترسنکلی
 اوغلتک و ابرائیل یقه سی ناظری اولان احمد اغانک و ساستره جانی یلیق اوغلتک
 و یانیه و مورده طرفلری تبه دنلی علی پاشانک و سائر جهتلر کذلک برر متغلبک النده
 قالدی و آندن صکره مدت میدده روم ایلی قطعه سی تحت انضباط و انتظامه آله مدی .
 و دین قلعه سی ینه اشقیانک یوه سی اوله رق اورایه استناد ایله هر طرفی اوروب

یغما ایدرلردی بوجهتله اول جواردده بولنان قضالر پاسبان اوغنه سرفرو ایتمه
مجبور اولدی فقط لوغجه اهلینسی کاف السابوق متحدانه وفدا کارانه حرکته بلده لرینی
بیکنه دن محافظه یه غیرت ایتمکده اولدی لر .

چونکه ترسنکلی اوغلی روسحق حوالینسی زیر دست تحکمه آلدینی کبی ر قوغجه لی
یوسف اغادخی بالقان بونی پنجه تغلبنه آلق داعیه سنده بولنوب حتی پلونه حوالینسی
قبضه تصرفه آلمشیدی بعده لوغجه یی دخی ضبط ایلمک ایستیوب لوغجه اعیانی آغو
چریباشینک مأموریتله افلاق جانبنده بولنسنی فرصت آنخاذا ایله طرف دولت علیه دن
شغنی جانبسه مأموریتی اولدیغنی اعلان ایدرک لوغجه یه کیره جک اولدقده دولت
مأموری صفتیه کیش اولدیغندن آغو چریباشینک وکیلی اولان حاجی ایوب اغا
ممانعت قیلنده بولننوب یوسف اغا ایسه لوغجه یه کلدیکی کبی عسکرینی جامعله
و خانلره یرلشدر دکن صکره اول امرده حاکم و مقفی یی اعدام ایله سائر خوف
ودهشت ویرججک لوغجه وجوهندن قوتو سلیمان اغا مملکتک ایلروکلنلرینی جلبله
یوسف اغانک سوء نیتی بیان و صوک درجه یه قدر غیرت ایتک اوزره جمله سیله
عهد و پیمان ایدرک بالاتفاق یوسف اغانک عسکری اوزرینه هجوم ایتدکارنده یوسف
اغا فرار ایله تخلیص کر بیان ایتش ایسه ده عسکرینک اکثری تلف اولمش ایدی
بوصورتله قوتو سلیمان اغا لوغجه اعیانی اولمش ایسه ده مناو علی پاشا برتقریب ایله
آنی پلونه یه جلب ایدرک اوراده حمله ایله اعدام ایتدکن صکره بر طرفدن پلونه
وبر طرفدن سلوی قضالری اهلینسی دخی نفیر عام اوله رق سوروب مجموع قوتیه
لوغجه اوزرینه هجوم ایتدکده اهالی چیقوب آنی بوزهرق جمعیتی طاغتمش لر و کماکان
منفرداً یاشامق اوزره باشلو باشلرینه قالمش لر ایدی . بعده آغو چریباشی افلاقدن
کلوب لوغجه اعیانلغنده استتقرار و درون بلده یه بیکنه لر ی اوغراتمامق اوزره امر
محافظه یه استدار ایلمشدر . مع ذلک لوغجه اهلینسک او امر پادشاهی یه درجه انقیادلری
بزوجه مشروح و دین محاصره سنده ابراز ایتدکری آثار غیرت و حمیت ایله مثبتدر .
آغو چریباشینک وفاتندن صکره حاجی ایوب اغا لوغجه اعیانی اولوب کماکان مملکتک
محافظه سنه قیام ایتشدر . فقط برمنوال سابق و دین اردوسنک انهرامندن صکره اشقیبا
فرقه لری کثرت اوزره تعرض ایدر اولدیغندن لوغجه دلی قانلیلرینک کیمی پاسبان
اوغلی سفرنده و کیمی اشقیبا محاربهلرنده تلف اولمش بولندیغندن حاجی ایوب اغا
لوغجه نک اطرافه خندق چویروب بعده شرانپو و متعدد قلعه لر دخی پایدر مشدرکه
حالابعض آتاری باقیدر . بناء علیه طاغلو اشقیبایی بالقانک ایکی طرفنده کی قصبات
و قرایی تخریب ایلمش ایکن لوغجه قصبه سنه کیره مامشدر .

بوقضالك وقوعاتی روم ایلینك احوالنه نمونه اولمق اوزره یازلدی سائر قضالر وناحیهلر دخی آنلره قیاس اولنه .

اِسْتِطْرَادْ

بالاده اشعار اولدینی اوزره بلغراد جانبدن ترتیب اولنان نظام جدید وارداتنك استیفاسنه بلغراد محافظی شنکلی مصطفی پاشامامور اوله رق بعده روم ایلی والیسی اولدقده دخی بو مأموریت عهدہ سنده ایقا اولنوب انجق مطرود اولان یماقنر قتنه واختالادن خالی اولمدقلری جهتله بونلره قارشوقوتلو بولنق اوزره دائره سنی برطاقم طاغلو اشقیاسی ایله طولدیرمش ایدی . بونلر ایسه تحت اطاعت وانضباطده برعسکر اولمدیغندن صرپ رعایاسی حقنده ایجاد مالم یکن قیامندن اولان جور وتعدیله تصدی ایلدکلری حالده پاسبان اوغلتك اعانه سیله یماقان گروهی طغیان ایله طرف طرف واقع اولان محاربهلر اتماسنده بونلر دخی بر طرفدن رعایایه یك زیاده ظلم وتعدی ایلدکلرندن وقوعات مشروحه صرپ رعایاسنك عصیانه میل ایتملرینه وبعد زمان بر صرپ بکلکنكک ظهورینه مبدأ اولدی دینله بیلور .

وبو محاربهلرده طرفیندن تلف اولان عساکر روسیه ونمجه سفر لرنده بالاتحاد دولت وملت اغورنده بذل تاب وتوان ایدن دلاوران اولدیغنه مبنی طرفیندن وقوعه کلان ضایعات هپ دولت علیه عائد ایدی . اشته محاربه داخلیه محاربه خارجیه دن دها مضر در دیدکلرینك حکمتی بودر .

مذکور محاربهلرده مشاهیر سرکر دکاندن نیجه نادر الوجود ذاتلر ضایع وتلف اولدینی کبی غریبدرکه کچن سنه وبو سنه اکبردن دخی خیلی ذوات اجل موعودیه وفات المشدر .

کچن سنه وفات ایدنلرک تراجم احوالی بالاده مرور ایتدی . بو سنه وفات ایدنلرک ترجمه حاللری دخی بومقامده بیان اولنور .

* وفیات *

رجبک اون برنجی کونی مشهور تعلیق خطاطی محمد اسعد یساری افدینك نقطه وجودی قلمتراش اجل موعودی ایله صحیفه عالمدن حک اولندی .

مرحوم مومی الیه یساری افندی نصف یمنی مفلوج ونصف یساری رعشه دار اولدینی حالده تولد ایدوب قدرت بالغه صمدانیه اثری اوله رق صغر سنده دست یساری ایله تعلیق خطنه ورزش ومرحوم دده زاده دن مشق وتعلمه سعی وکوشش ایله خط تعلیقده صاحب ید طولی وبالجمله خطاطلره غلبه سی هویدا اولمشدر .

حتی خطاطین عصر عندند عماد روم و صریح کلاک اشتهاری و اصل هر مرزوم اولان شیخ الاسلام ولی افندی یساری افدینک حالی وجودت خط بیمالی کورد بجه جناب حق بو ذاتی بزم انف استکبار منزی قرقمق ایچون کوندر مشدر دیر ایتمش . بو وجهله یساری افدینک شهرتی تزیاید ایدرک صغیر و کبیر کندوسندن مشق و تعلمه هوسکار اولوق حسیبله طریق قضاده ترفیع رتبه ایله نائل امل و سرای خواهجه سی اولوب نوبنو عطایای سینه ایله مکرم و مبعجل اوله رق قیدضر ورتدن آزاده و جها کابر عندند اعتباری زیاده اولمش ایدی . بروقت دنبرو وجود علینله بعض عوارض منضم و کوندن کونه مشتمد اوله رق بو اوانده بروفق (کاغد درید و قلم شکست) عالم فانیدن دستشوی فراغت اولمشدر .

آثار خیریة سلاطین و کبار دن نیجه معابد و ابنیه ساره ده خطیله اولان تواریح و قصائد و قطعات موجب الفوائد اخلاف معارف اتصافه کوزل یادکار در .

بو اوانده برلین ایلیجیسی عزیز افدینک و فاتی خبری وارد اولغله یرینه خواجکان دیوان هایوندن و کتخداکاتی خافاسندن اسعد بک نصب اولندی .

بوسنه والیسی سلحدار مصطفی پاشا که اندرون هایونده پرورده اولمش مخلص و خیر خواه دولت بر وزیر ایدی بو اوانده وفات ایتمکله بوسنه ایالتی کرچی عثمان پاشایه توجیه اولتمشدر .

ور جبک یکریمی التتجی کونی غلطه مولویخانه سی شیخی غالب افندی سماعخانه عالم فانیدن چیقوب کیتدی وینه اول کون قضایای اتفایه دن اوله رق اسکدارده مولوی شیخی نعمان بک دخی عزم دار بقا ایتمدی .

مرحوم مومی الیه غالب افندی مولویخانه قیوسی سمتده ساکن رشید افندی نام برذاتک صلبندن بیک یوزیتمش بر تاریخنده تولد ایدوب (اثر عشق) ترکیبی ولادته تاریخ دو شمشدر صغر سننده تحصیل علوم و معارفه ورزش ایدرک مر کوز فطرتی اولان استعداد خدا داد اقتضاسنجه آز مدته عربی و فارسیده اقرانه تفوق ایتمش و هوای جاه و رتب دن یویه نی تارک و طریق صوفیه یه سالک اوله رق درگاه مولویده هیئت درویشی یه کیروب تکمیل چله ایتمک اوزره قونیه یه کیتمش ایدی پدر و مادری افتراقه طیانه میوب چلبی افندی طرفندن بر تقریب ایله اعاده سنی نیاز ایتملریله چلبی افندی دخی کندوسنی چونکه مقصود کز ترک ماسوا و تحصیل قرب خدادر بویه دیار غربتده لباس فقری اختیار و متاعب چله یه اصطبار هنر دکلدن مردلک مسقط رأسکز اولان آستانه سعاده و اروب قرب و جوار کزده واقع یکی قیودر کاهنده مألوف انس و اختلاطی اولدیغکز امائل و اقران و احبا و خلان اره سننده اختیار

مسلك درویشی ایله تکمیل چله ایلمکدر دیو ظریفانه الزام ایله در سعادت اعزاز
ایتمکین اودخی کلوب مقتضای تنیهلری اوزره یکی قپو مولویخانه سنده پوست نشین
اولان سید افدیندن اخذ دست انابت و تغییر زی و صورت ایله تمام بیک برکون
چله معتادینی تکمیل ایدرک بعد بر مدت حجره نشین اولدقن صکره غاطه مولویخانه سی
مشیختی ایله بکام و مشایخ طرق علیه ایچنده علم و معرفت ایله مشهور و بنام اولمشدر
فی الاصل مخلصلری اسعد ایکن ابنای زمانه دن (لوشعر لنقصه لما شعر) مآلنه مظهر
اولان بعض متشعرینه التباسدن احترازاً صکره دن غالب تخلص ایتمشدر .

مرتب دیوانی و حسن عشق نامنده برمنظومه سی و شعراء مولوی به مخصوص تذکرة
الشعراسی و تصوفدن بر رساله سی و سینه چاکک جزیره مشویسنه شرحی واردر .
وفاته تاریخ اولقی اوزره وقعه نویس نوری بکک مخدومی مدرسیندن محمد نبیل
افندی (کوچدی غالب دده یاهو دیوب اهل حاله) مصراعنی سویلمشدر .

غاطه آستانه سی در سعادتده کی مولوی آستانه لرینک جمله سندن اسکي اولدینی و دروننده
شارح مشوی انقره وی اسماعیل افندی و سائر اعززه کرامک تره لری بولندینی حالد
غایه الغایه مشرف خراب و بلکه آشیانه بوم و غراب اولوب سلطان سلیم ایسه طریق
مولوی به منتسب و غالب افندی به زیاده سیله متوجه اولدیغندن تکهی مجدداً انشا
ایتدرمشیدی و غالب افندی به نوبنو عطیه لر تسیار و بعض لیالی مبارکه و ایام
سأزده حضور هایونلرینه احضار ایله تماشای آیین و اذکار عقبنده بخش عطایای
بیشمار ایلمش .

غرة ذی القعدة ضربه خانه امینی مصطفی عفت بك دارالضرب فندان محابه خاموشانه
ارتحال ویرینه خواجهکان دیوان هایوندن کفجه ناظری شا کر افندی ضربه خانه
امانیه کفجه امالی مالامال ایلدی .

متوفای مومی ایله قیصه بویلو و قبور و لکن کامل الشعور بر ذات اوله رق قبور مصطفی
بک دیو معروف ایدی . و فی الاصل خواجهکان دیوان هایوندن مصرف کاتبی سلیمان
افدینک اوغلی اولوب عنفوان جوانیسنده خانه کیلاره چراغ اولمشیدی . اندرون
هایون متشخصلرندن بری مرحوم راغب پاشایه آنک قامیله بر تذکره کوندروب
صحت املا و تعبیراتنده اولان حسن ادا طبع راغبه خوش کلمکله شخصی کورمدن
قابلیت و استعدادینی سلطان مصطفی خان حضر تلرینه توصیف ایله قرب پادشاهی به
شایسته در دهرک مابینجیلک ایله چراغ بیورلمسی عرض ایلدکده قیصه بویلو و قبور
اولدینی جهته شایسته خدمت اولدینی طرف شاهانه دن بیان بیورلمشیکن راغب
مرحوم (لا تظنن حدة الظاهر عیبا . فهی فی الحسن من صفات الهلال . و کذا القسی

محدثات . فہی انکی من الظبا والعوالی) مآلی مقدمہ ایدرک تکرار نیاز ورجا ایلدیکنه بناء میر مومی الیہ قرناہی شہر یاری اعدادینہ الحاق اولمشیدی . وا کرچہ اول عصرک حکمنجہ راغبک دور صدارتندہ احتمال نقل اخبار ایلہ سرائر اطوارہ مطلع ایدلمز ایدی اما راغبک وفاتندن صکرہ بو احتمال موہوم بر طرف اولہرق زیادہ سیلہ اعتماد شاہانہیہ نائل اولمشیدی . فائق افندی مجموعہ سندنہ دیرکہ سلطان مصطفی خان ثالث مرحومک مابینجیلری اولان شاعر مشہور ناشد ابراہیم بک افندی ایلہ نیجہ زمان صکرہ ضربخانہ امینی ایکن فوت اولان قبور مصطفی بک خدمت مشار الیہدہ بر بر لرینہ ضد و منافس اولمربیلہ بر کون خاقان مشار الیہ بر مناسبتہ مصطفی بکک مہرینہ نظر ایتدکدہ سادہ اسمی محکوک اولدیغندن بویلہ مہری نیلرسین بزم ناشد سکا بریت سویلہ سون آنی مہر اتخاڈ ایلہ دیو فرمان بیور مغلہ ناشد بک دخی حضور هایونندہ بولنوب بالبداہہ افندم بن مصطفی بکہ بر مہر بیتی سویلدم اما بکنمیور دیدکدہ خاقان مرحوم بیتی سؤال ایتمکلہ در حال (بخاک قبر ناپاک یناکی * شود حاصل مراد قبور اکی) بیتی انشاد ایلدکدہ خیلی قہقہمایہ باعث اولمشدر . صاحب ترجمہ درویش مشرب بر ذات اولوب بروجہ مشروح مقرب پادشاہی اولمشیکن کندو طلیبہ طشرہ چیقہرق خواجکان دیوان هایون عدادینہ ملحق اولدینی اتنادہ تجدد سلطنت وقوعیلہ سلطان عبدالحمید خان حضر تلیری تحت سلطنتہ جلوس ایتدکدہ بعض اصحاب حسد وغرضک افتراسیلہ نفی وبعده اطلاق اولندقدن صکرہ مدار تعیش اولمق اوزرہ بعض مناصبہہ استخدام اولنہرق بو وجہلہ تعداد نقود ایام ایدرکن ولی نعمت زادہ سی اولان سلطان سلیم خان حضر تلیری جلوس ایدبجک کتخدای رکاب وبعده حسرة الرجل اولان ضربخانہ امانتہ نیل ایلہ کامیاب اولہرق رفاه حال ایلہ عمر سورمکدہ ایکن بوکرہ علت نزول ایلہ سرمایہ عمری بتوب کیتمشدر .

وقعہ نویس خلیل نوری بک کہ نائل عبد اللہ پاشا زادہ فیض اللہ شاکر بکک اوغلی وشیخ الاسلام مصطفی عاشر افندیکنک دامادی اولوب تحصیل واکمال معارفہ مکب وبیہودہ اضاعہ اوقاتدن محتنب بر ذات ایش . بو اواندہ طی طومار حیات ایتمکلہ یرینہ واصف افندی وقعہ نویس اولدی .

* وقایع متنوعہ *

حبوبات ناظری بولنان احمد عزمی افندی مسنجنہ بر ذات اولہرق امور ذخائرک ادارہ سندنہ قنور ورخاوتی رونما اولمغلہ صفرک یکرمی ایکنجی کونی عزل ایلہ یرینہ رئیس الکتاب سابق راسخ افندی تعیین قلمشدر .

زیرده بیان اوله جغی اوزره بواننده مصر سفری مقدماتی ظهور ایتمکله اولکیدن قات قات زیاده باروت اعمالی لازم کلوب باروتخانه لر نظارتی اوزرنده اوله رق کتخدای صدر عالی اولان محمد شریف افندی بوباده موفق اولمش ایسه ده بویه وقتسده هم کتخدالق وهمده باروت اداره سی متعسر کورنمکله صفرك یکرسی دردنجی کونی کتخدالقدن عزلیله یرینه ابراهیم افندی کتخدای صدر عالی وانک یرینه باش خلیفه رفیق افندی مکتوبجی و خلفادن فیضی افندی باش خلیفه اولمشدر وینه بواننده قودان پاشانک انهاسی اوزرینه روم ایلی والیسی اولوب ودین اردوسنده بولتان شنکلی مصطفی پاشا عزل ایله روم ایلی ایالتی اناطولی والیسی علی پاشایه و اناطولی ایالتی سلستره والیسی کرچی عثمان پاشایه و سلستره ایالتی ترحاله متصرفی کرد عثمان پاشایه توجیه بیوریلوب بعده شنکلی مصطفی پاشا دخی منصبی اولان بلغرا ده اعزام اولمشدر .

بوسنه قوجه ایلی و بروسه طرفلرنده برطاقم شقاوت پیشه لر رایت افراز بنی و فساد اولغله اوزرلرینه قوجه ایلی متصرفی سید حسین پاشا مأمور اولوب تقویة نفوذی ایچون عهدسنه رتبه وزارت ایله الحاقاً بالیکسری سنجاغی توجیه بیورلمشدر . بوندن اقدام ترسانده انشاسنه مباشرت اولنمش اولان آلتمش اوچ بیق ذراع برقطعه قلیون ایله ایکی عدد بومبه سفینه لری ختام بوله رق شعبانک سکنزنجی کونی دریاه ایندرلمشدر . بوکا دائر سروری افندی

شه سلیم ایندردی ایکی دفعه در اوچ فلک نو* کوش ایدوب طالادی یکی باشند عدو بحر غمه رخس فکره ایتدم ارخای عنان تاریخ ایچون* اوچ کمی یول بولدی کسزآت کی قوشدی یمه قطعه سیاه

« آت کبی بردن سکر دوب اوچ کمی بولدی یمن »

و « دریاه اوچ فلک جسم ایتدی اقرن مانند جو »

و « قوش کبی اوچ قطعه قلیون اوچ دیلر سوی یمه »

مصر اعلی بن بشقه بشقه تاریخ اولمق اوزره نظم ایلمشدر .

افلاق ویوده سی اولان خنچرلی اوغلی قسطنطین بك مصالح ملکیه دولت علیه به مضر بعض حرکاته جسارت ایتدکن بشقه افلاق رعایاسنه دخی ظلم و تعدی ایدکله یکندن بواننده صدراعظم اغالردن بری بشقه بر مأموریتله کوندر یله رک اعدام ایتدیریلوب کرک یاننده و کرک درسعادته اولان اموال و املا کی جانب میری به ضبط ایله یرینه سابقاً افلاق ویوده سی علسکاندری بك مکرراً ویوده نصب ایدلمشدر . بغداد ویوده سی اولان علسکاندری بك دخی بواننده استغفا ایتمکله اوائل شوالده عزل

ایله یرینه دیوان هایون ترجمانی ايسلاقی بکزاده قسطنطین بک بغداد ویوه دهسی نصب اولمشدر .

وینه بوئانده حتی باشانک وزراتی ابقا اولنه رق کندوسنه حانیه سنجانچی احسان قلنمشدر .
مقدما انئی سفرده روسیه دیارینه فرار ایتیش اولان بطال باشانک عقیوله طوغارینک ابقاسنی روسیه ایمراطوری رجا وشفاعت ایلمش اولدیغندن اواخر شوالده وزارتی ابقا ایله عهدسنة مسقط رأسی اولان طربزون ایالتی توجیه بیورلمشدر .

* مصره دأر مکالمه *

بالاده اشعار اولندیغی اوزره بوناپارته نك طولونده تهیئه ایتدیکی دونمانک ارناودلق سواحله تعرض ایتمی اول امرده خاطر لره کیشیکن مصره تعرض ایتمک احتمالی بعض اوراق حوادثده کورلمش و صکره بودونمایه عربجه بیلور و عربستان احواله آشنا بعض کسانک مأمور ایلمش اولسنه نظرأ مصر طرفه تعرض ایلمک احتمالی قوت بولمشدر .

واکر چه مجاس وکلاده کیفیت لدی المذاکره فرانز لرك مصر طرفه سوء قصد لری حقنده شیوع بولان حوادثن تجاهل اولنه رق تیزالدن لازم کلان بعض تدابیره ابتدار اولتمق اوزره قرار ویرلمشیدی لکن مصر بحی پارسده بشیوز مشورتی مجلسنده جریان ایلمش اولدیغندن ارتق تجاهل اولنه بیله جک درجه بی کچمکله محر مک بشنچی کونی فرانسه مصلحتکناری روفن رئیس الکتاب عاطف افدینک خانه سنه جلب ایله عقد اولنان مجاس مکلمه ده اشبو مصر حوادثی کندوسندن سؤال اولندقده (طولون ترسانه سنده کی تدارکات نه مصلحته مبنی اولدیغندن قطعاً خبریم یوقدر بوکاد اتر مدیران جمهور طرفندن بکا حرف واحد یازلامشدر اورته ده طولان حوادث غزته لردن مروی اوله رق بنم دخی مسموعم اولمشدر لکن کذب وصحتی بالکلیه مجهولدر) دیو جواب ویرمش ایسه ده رئیس افندی طرفندن تکرار حقیقت ماده یه دأر لاوغم بر طوغری جواب ویرمسی مصرانه تکلیف اولتمغله مصلحتکنارینه بوکا رسماً معلوماتی اولدیغنی بیان سیاقنده (بن دولت عمایه خلاف سویلیهم اوتوز قرق سنه قدر اولدی ممالک محروسه ده اقامت ایدیورم نزد سلطنت سنیه ده خیر خواهغم بالتجربه معلوم اولمشدر کلیاً مجهولم اولان بر ماده دن فصل خبر ویره یم امارتیس افدینک مسموعی اولان حوادث مده شه بنم دخی مسموعم اولمشدر و بونک ایچون بن دخی غایت مضطربم حتی مقدما آستانه سعادتده اولوب اوبردوبایه نك - فارتی زماننده پارسه عودت ایدن وانطور نام ترجمان بو دفعه مارسلایه کلوب طولونه مأمور اولدیغنی بکا تحریر ایتمشدر و طرفه کلان کاغنده محل مأموریتی مجهولی اولدیغنی و کندوسی خبر اولمازدن مقدم بنم خبردار

اوله جعم مضمون ایدوکنی ایما ایدر آنک مأموریتله طولونه ورودی بکا بر قاتدها موجب وسوسه اولمشدر زیرا وانظور عربی وترکی تکلم ایدر ترجمانلردندر ایشته حقیقت حال بودر لکن عدم وقوفم حسبیه مطلوب اولان جوابی ویره مم معافیله اراده بیوریلور ایسه کندو ملاحظات و مسموعاتی افاده ایدیم (دیمی اوزرینه رئیس افسدی (بن وکالی حسبیه باعث اطمینان اوله جق بر جواب ویره بیلور امیدنده ایدم چونکه عدم وقوفندن بحث ایدیور باری ماحوظات و مسموعاتی افاده ایتسون استماع ایده لم) دیور رخصت ویرمکین روفن کلامه آغاز ایله (فرانسه لو مصر تجارتنه نه مرتبه محتاج اولدینی بیاندن مستغیدر ووسعت تجارت امینت ورفاه ایله حاصل اولدینی بی اشتباهدر مصرده کی فرانسه تجاری ایسه بکلرک مظالمه و مطالبات بی نهایه لرینه تاب آور اوله مدقلردن علی الدوام استدانیه محتاج اولدقلری و اوتوز سنه دنبرو فرانسه وکلاسنه بٹ شکوادرن خالی اولمدقلری معلومدر بو کیفیتلری فرانسه ایلچیلری دولت علیه به افاده ایدوب انجق دولت علیه نك حکمی نافذ اولمدینی جهتله رابطه ویریه میهرک اوکونه مظالم و مطالب مندفع اوله مدی وثمره مشاهده اولمدیغندن فرانسه ایلچیلری دخی شکایتدن فارغ اولدی حتی مقدا علی بکک وقتنده فرانسه دولتی طرفندن مصر اوزرینه وارلمق تصمیم اولمشیدی و غرب او جاقلری طرفندن تعرض وقوعنده عهد نامه هایون شروطی موجبجه حرباً دفع تعرضلینه فرانسه دولتی مرخص اولدینی معلومدر و بویه بر حال ظهورنده دولت علیه ایله مربوط اولان مصالحیه هیچ برکونا خلل ترتب ایتدیکی کی دفع تسلط ضمننده مصر بکلرینک علیه نه وارلمقده برأس اولمدینی ملاحظه اولمشیدی بعده عهد قریبده مراد بکک فرانسه بازرگانلرینه جور وظلمی مشدد اولمغله مرحوم جزاثرلی غازی حسن پاشانک مأموریتی مستلزم جمله اسبابدن بری فرانسه لونک شکایتی ایدی برمدت متنبه اولوب فرانسه ده قلب احوال ظهورنده تکرار تعدی به ابتدار ایتلمیله ورتباق اثنای سفارتنده برقاچ کره شکایته ابتدار وکارکر تاثیر اولمدینی بالمشاهده سکوتی اختیار ایتمشیدی بوضورتده مصر الکاسنده مقیم فرانسه بازرگانلری عادت مستمرلری اوزره مدیرین جمهور طرفنه بٹ شکوادرن خالی اولمالری ماحوظ اولدیغندن غیری دولت علیه نك مصره حکمی نافذ اولیوب منافی دخی اقل قلیل اولدیغنه نظرأ هم بکلرک تسلطی رفع ایتک وهم انکالرملوی هند منافعدن محروم ایدرک تجارتلرینه کلی کسر ویرمک داعیه سیله مصر طرفنه وارلمسی استبعاد اولنه جق کیفیتدن دکدرن ظن ایدرم لکن بو افاداتم محضا ملاحظه قیلندندر و مصره وارلدینی تقدیرجه نه وجهله واریله جقدر مصر

الکاسنه قصد وارمیدر یوخسه دولت علیه ایله بالمخبره قرار کیر اوله جق وجهله می حرکت ایده جکار در بونلر عقامتک ایرمدیکی کیفاتنددر برده بو طرفده مؤخرأ وندیکن اخذ اولسان آطه لر ایله بر مبادلله صورتی روایت ایدر لر بو روایتک وقوعی وارمیدر یوقیدر دولت علیه نک معلومی اولمق کر کدر بوماده یه دأر پارسده مقیم علی افندی یه مدیران طرفسدن برشی افاده اولندی می آنک بومصر حوادثی بهر حال مسموعی اولمشدر لازم کلنلردن سؤال ایتدی می (دیجک رئیس افندی حد تلنوب (مصاحتکدارک بوسوزلری جدأ ایسه معلوم اولان عقل ودرایتیه منافضدر هزلأ ایسه ماده نک جسامتیه موافق دکلدر بوقدر ایلیجی مکالمه لر نده بولندم بوسیاقده کلام ایشتمدم عادتدن خارج مألوف اولمدیغمز بر طوردر مصر بکارینک عهد وشروطه مغایر حرکتلری وقوعنده حقوق ملل قواعدینه و بین الدول مرعی ومعتبر اولان معاملاتیه نظر آیه دولت علیه یه مراجعت اولنوب اقتضاسی نه ایسه اجرا اولنور اما بالدفعات شکایت اولنمشیکن ثمره سی مشاهده اولندی سوزینی ینه کندو کلامیله رد ایدرم زیرا مرحوم حسن پاشانک مصره تعیینی مستلزم جمله اسبابدن بری فرانسه نک شکایتی اولدیغنی دین کندو اقرار ایتدی بوضورتده دولت علیه غوائلدن مأمون اولدیغنی حالده بر دوست دولتله اولان عهد وشروطی تنفیذ ایچون نیجه مصارفی ارتکابدن اجتناب ایتدیکی وحاکم الملکه مراجعتک ثمره سی تماماً مشاهده اولندیغنی مثبت اولدی قالدیکه بعضأ اختلال ظهوری وکاه بکاه سرکشارک اطاعت مفروضه دن خروجی مصر الکاسنه مخصوص اولیوب محال سآره ودول سآره ده وقوعوبولان حالاتنددر خصوصاً فرانسه ده تبدل نظامدن صکره هر خطه سننده نیجه اختلالر ظهور ایتدی وحالا ظهور ایتکده در اختلال وار ومدیرانک حکمی نافذ کل دیو دولت علیه مثلا مارسیلیایه دونما وعسکر کوندرسه فرانسه جمهوری روا کوررمی دولت علیه اعلان حرب ایتدی دیمز می دولت علیه نک بوکونه حرکتی تجویز ایتسنه برکونه سبب یوقدر دینورسه فرانسه نک زیاده مضایقه سی وقط وجوعه ابتلاسی هنکامنده رعایای دولت علیه نک مأذوناً مارسیلیایه وحوالیسنه ایصال ایتدیکی ذخائر وفیره نک ثمنی الآن تامیله ادا اولنمیوب بوسبیدن وافر بازرکانلر من کمال مضایقه ده اولدقلری ومارسیلیا وطولون وسائر اسکله قورسانلری نیجه بازرکان کیلریمزه مساط اولوب خلاف عهد اول کیلردن بعضی سی ضبط وفروخت وبعضی سی الی الآن توقیف اولندیغنی معلوم دکلیدر دوست اولان دولتله بیننده بومقوله حالات ظهور ایتدیکه ینه بالمخبره دوستانه رابطه ونظام ویریه کلشدر معاهد اولان دولتله جزئی سبب ایله بر برینک ملکنه تعرض

ایستادن صکره عهد و شروط نه ایشه یرار خصوصاً که مصر الکاسی غرب
 او جاقلرینه مقیس اولمدینی و خواص ممالک محروسه تاجداریدن اولدینی محتاج بیان
 دکدر غرب او جاقلرینک حفسده مصاحتکذار دوستمزک ایراد ایتدیکی شرطک
 عهدنامه هایبونده مندرج اولسی اول او جاقلرک ممالک محروسه سائردهن مستنا
 اولدیغنه دلالت وانحه ایله دلالت ایتزمی هم مصاحتکذار دوستمز کوش هوشنه
 ایوجه القا ایتلیدر که مصر الکاسی پادشاه عالمنه افندمزک دارالسلطنتی کیدر
 جناب خلاقماب تاجدارینک اقدم واشرف القابی خادم الحرمین الشریفین
 اولدینی معلومکدر اراضی مقدسه مذکوردهنک سنوی غلالی مصردن مرتبدر
 کسوه شریفه دخی هرهنه آنده نسج واعمال وحجاج ایله ارسال اولنور بومصارف
 کلیه مصر وارداتندن افزاز اولندقدن صکره فضلهسی کلوب خزینه عامریه تسلیم
 اولنور حتی مقدملرده اسکداره چکدیری کوندریلوب آلی وطاول وسورنا ایله
 کاور ایدی بر وقتدبرو بوتکلف دفع اولنوب کانجیلر اسنافته احاله اولنورق هرهنه
 آنلردن تحصیل اولنور . دولت علیهنک مصر الکاسندن صورتاقت انتفاعی اکثر
 وارداتنک اوتهدنبرو اول اراضی مبارکهیه صرف اولدیغنه مبنیدر فاتح مصر اولان
 سلطان سلیم خان حضرتتلیرنک وضعی بویله در اراضی مبارکه مذکوریه
 خدمت ایسه مقتضای دیانتدر بصورتده مصر الکاسنه تعرض معاذالله تعالی دین اسلامه
 تعرض ایتکدر . ساق واحد اوزره دفع صال خصوصی کافه مال اسلامیهیه فرض
 اولهجنی بوماده مواد سائریه مقیس اولیوب چوق ملاحظه کوتورر مواد
 عظیمه دن ایدوکی ادنا مطالعه ایله عیان اولور اما فرانسه جمهوری بلا سبب بلکه
 مصلحتنه منافی مجرد بعض ملاحظات دورا دور ایچون خود بخود نقض عهدی
 ارتکاب ایدر ایسه اوصورت بشقه در یوخسه مصاحتکذار دوستمزک کندو
 ملاحظات و مسموعاتی اولهرق ایراد ایلدیکی مخابره ومبادله صورتلری اضغاث احلام
 قیبلنددر بن آنی باعث اطمینان قلب اولهجن بر جواب آلق امیدیه احضار ایتش
 ایدم لکن کندوسی ویردیکی جوابلر ایله اول حوادثی تمام تصدیق ایتدی (دیمسیله
 مصاحتکذار بر مرتبه دهها اضطراب کوستره رک (بن بوتدارکات البتده مصر اوزرینه در
 دیمدم کندو ملاحظه اولهرق عقلمه لایح اولانی سویلدم دوران ایدن حوادث
 معلومدر . بن رئیس افندیکن زیاده مضطربم خلاف بیلمم وانظور ترجمانک طولون
 طرفه مأمور قانسی بکاموجب فکر واندیشه اولمشدر . قالدیکه جمهور طرفندن
 بومادهیه دائر قطعاً وقاطبه خبرم یوقدر بوخلده مطلوب اولان جوابی نصل
 ویره بیلورم دولت علیه نی تغلیطمی ایدهم حتی آستانه سعادتده مقیم فرانسه

بازرگانلری یا مه کلوب بو کیفیتنی سؤال ایتدیلر و بویله برحلت وقوعنده حالز نیجه اولور دیو خوف وهراس اوزره اولدقلرینی بیان ایلدیلر بن ایسه آنلره تسلیت و یروب بومقوله حالات وقوعنده طرف دولت علیه دن وقتاً من الاوقات تعرض اولندیفی مسبق بالمثل دکدر نهایت بی مؤاخذه ایده بیلور دیو نو عماً اضطر ایلرینی دفع ایتدم) دیمنه مقابله رئیس افندی (سبحان الله بونه غریب کیفیتدر مصلحتکذار دوستمزك جمهوری طرفدن تعلیقاتی یوقیدر دولت علیه حقتده فرانسه جمهورینک نیته واقف دکیدر فرانسه جمهورینک وکیلی اولمغله دولت علیه حقتده نتی نه کونه اولدیغنی هم بیلیمک و همده اقتضا ایتدکجه افاده ایتمک لازمه مأموریتدر ظن ایدرم) دیو تعریض کونه اظهار انفعال ایله سوزی کسدرمش و صغوقلقله مجلسدن قالمشدر بو اوآنده کویا که فرانسه دونمائی استانبوله کلوب و دولت علیه دونمائیله برلکده قره دکزه واروب قریمی فتح ایتد کدن صکره ایکی دولت له فراریلرینی استصحاب ایله لهستانی استخلاص ایتمک اوزره روسیه اوزرینه حرکت ایده جک ایش کی بعض اراجیف اشاعه اولمقده بولنش ایسه ده بونلرینه تغلیط اذهان ایچون فرانسزلر طرفدن نشر اولنش اراجیف ایدی .

و طولون دونمآسه عربی بیلور کسانک مأمور ایدلسی طولون تدارکاتک مصر اوزرینه اولق روایتنی تأکید و فرانسه مصلحتکذارینک بروجه مشروح ایراد ایلدیکی ملاحظات ایسه بونی بتون بتون تأکید ایلدیکندن دولت علیه دخی آرتق بروقتدبرو اتحاد بیورمش اولدیغنی مسلك جدیدی ایجابجه فرانسه علیهنده اوله بیله جک دولتری جلب و تألیف ایله اتفاق ایتمک تدابیرینه دوام ایله برابر بر طرفدن دخی تدارکات سفریهیه تشبث اولنمشدر .

رو و فنک بروجه مشروح کندی ملاحظاتی اوله رق ایراد ایلدیکی افکار باطله همان دولت علیه نک لوندره ایلچیسی اولان اسماعیل فرح افندی یه اشعار قلمشدر .

* پوناپارته نک اسکندریه یه استیلاسی *

بروجه بالا فرانسه دونمآسنک طولون لیماندن خروچی خبر آلدینی کبی دونمآی هایون ایله آفدکز بوغازنده لنگر انداز اولان قبودانه بک و دریا ترجمانی هر طرفه قایقار ارسالیله اشو فرانسه دونمآسنک نه طرفه توجه ایده جکنی تجسس ایتمکده بولمشدر ایدی متعاقباً فرانسزلرک مالطه آطه سنی ضبط واستیلا ایلدکری خبر آندی انجق پوناپارته نک بویله بر جسم دونمآ ایله حرکتیه مالطه نک ضبطی هدف مقصد اوله میوب مالطه سفری بودونمآنک برنجی مر حله سی حکمنده بولندیغندن

یونان پارتی نه مالطه دن نه جهته توجه ایده چکنه هر طرفدن مدنظر دقت اولمقده ایدی فقط مصر طرفده تعرض اتمسی احتمالی قوت بولمیشیدی .
 و فرانسه دونماسنک طولوندن چیقدیغی خبر آلمسی اوزرینه انکلتزه دولتک اون درت قطعه بیوک جنک سفینه لردن مرکب بردونماسی دخی فرانسه دونماسنک پشینه دوشوب طولاشمقده ایدی فقط مالطه آطه سی آقدکزده طولاشان سفان ایچون بک اهم والزم بر موقع و مرکز اولدیغدن فرانسه لو یدینه کچمه سی انکلیزله زیاده اندیشه یی موجب اولمیشیدی .

بناءً علی ذلک انکلیز دونماسی سواحل دولت عالیهدن نزه اوغرار ایسه ماکولات و مشروباتجه و خصوصات سائر جه معاونت و تسهیلات لازمه اجراسنه همت اولمق اوزره هر طرفه امرلر یازلمشدر . چه فائده که بونلر محملرینه واروبده انفاذ احکامنه مبادرتدن اقدام فرانسه دونماسی اسکندریه یه وارمشدر .

شویله که : فرانسه دونماسنک اسکندریه مصر طرفنه تعرضی ملحوظ قوی اولدیغدن سالف الذکر انکلیز دونماسی اشبو ایکویوز اون اوچ سنه سی محرمک اون اوچجی کونی اسکندریه پیشکاهنه کلهرک آچقده طوروب صندال ایله لیمانه کوندرمش اولدیغی مأمورلر اسکندریه اشرفسندن کمرکچی سید محمد کریم ایله بالملاقاة (فرانسلر برحسیم دونما ایله دکره چیقدیلر آنلری تحری ایدیوروز نه طرفه کیتدکری معلوم دکل لکن بو طرفله سوء قصدلری اولدیغی بعض حالاتدن اکلاشلدی بورایه کلورلر ایسه سز آنلرک دفعنه قادر اوله ماز سکز سزی محافظه ایتمک استرز) دیدکلرنده سید محمد کریم انکلیزلرک بوسوزینی حیله و دسیسه یه حمل ایله خشین و درشت جواب و یرمکله انکلیزلر (چونکه بزم اختضارات دوستانه مزی قبول ایتیمورسکز باری بز آچقلرده مکث ایله قاعه یی دشمندن محافظه ایده لم سزهمان بزه صو یاشدیریکز و بهاسیله ذخیره و یریکز) دیمشدر ایسه ده سید محمد وسائر اعیان شهر اعتماد ایتیموب (بو بلده دولت علیه ممالکننددر بوراده فرانسلرک وسائرک ایشی یوقدر سزایشیکزه کیدیکز) دیوجواب و یرملریله انکلیزلر دخی بک ایو اما صکره سز پشیمان اولور سکز دیوب دونمالرینه عودت ایتمشدر وهان فرانسه دونماسی ارامق اوزره دکره آچیلوب کیتمشدر .

سید محمد کریم مراد بکه منسوب و کمرکچلکه آنک طرفسندن منصوب اولدیغی جهتله درحل بوکیفیتی مراد بکه تحریر ایلمش و بلده نک محافظه سیچون عسکر ایسته مش ایدی .

بوکیفیت مصرده ایشیدلدیکی کبی درلو سوزلر تحدث ایدوب انحق متعاقبا انکلیز

دو نمانسك كيتديكي خبر آلمغله اراجيف بر طرف اولمشدر امرای مصریه قوتلرینه
 كوه نوب بو حواده قطعاً قولاق آصامشدر ویاكز فرانسه لو دكل بتون دول افرنجیه
 كلسه قارشولرنده طوره میوب جمله سنی آتلینك ایاقاری آلتنده چكنه یه جكلری
 زعمنده بولندقرلندن غافل طور مشدر .

فرانسز دونماسی ایسه محرمك اون یدنجی كونه مصادف اولان بیک یدی یوز
 طقسان سکز سنه میلادیه سی تموز افرنجیسنك برنده اسکندریه پیشگاهنه كلد كده
 الی سکز پاره طوب چكر عقاب بحری نام ریالیه هایون سفینه سی اوراده بولمغله
 قبودانی ادریس بك استكنانه حال ضمنده ملازم امین قبودانی لدی الارسال
 سرعسكر ناپلیون پوناپارته طرفندن بنم كسه یه ضررم یوقدر دشمنز اولان انكلیز
 هند اقلیمنی لدی آنك تخایضنه كیده یورم بتون دنیا ایله دشمن اولسم عثمانلو ایله
 دوستم فقط بكا طوب آتارسه كز برتكنه درتیوز تكنه ایله باشه چقماز بیهوده
 قالیونی تلف ایتمش اولورسكز دیو جواب ویرمكله ادریس قبودان دخی چاره سز
 مقابله داعیه سندن فراغت ایلمشدر .

بودونما اوتوز قطعه بیوك جنك كیلری ودرتیوزدن زیاده سفان نقلیه ایله كلیتلی
 عساكر بریده ن مرکب ایدی .

معلم نيقولانك تاريخنده (بودونما درتیوز الی كمی اولوب عسكری دخی التمش بیک
 ایدی كه اوتوز بش بیک جنكاور نفر ویکرمی التی بیک شجاعت و مهارت ایله
 معروف امرأ ورؤسای عسکر اولوب باقیسی اصحاب معارف و صنایع و مأمورین
 شأره ایدی) دیو محرردر .

اسکندریه اهالیسی بویه برجسیم دونمانك ورودندن متوحش و متحیر اولوب
 كركچی سید محمد کریم همان استمداد ضمنده فریاد نامه لر ایله مراد بکه متعدد
 ساعیلر کوندر مشدر .

حال بوکه پوناپارته اسکندریه پیشگاهنه واصل اولدیغی کبی اسکندریه ده کی فرانسز
 قونسلوسنی ایستیوب اودخی اون نفر اهل اسلام ایله کیند كده ایکی کون اول انكلیز
 دونمانسك اوراده اولدیغی خبر آلیجق همان اول کون عسکرینی قره یه چقارمق
 ایسته مش ایسه ده اسکندریه قلعه سندن مدافعه اولنه جنی اكلاشدیغندن لیمانه کیرمکه
 جسارت ایده میوب برقاچ ساعتك مسافه ده واقع مرابط قویی دینلان محله قره یه
 چیقلمسنی ترتیب ایله هر نقدر اخشام اولمش و روزکار شبدتلی اولمق حسیده دکر
 قبارمش ایسه ده عسکرک قره یه چیقمسنی امر ایدرك هر کسندن اول کندیسی
 چیقمشدر بونك اوزرینه عسکر فلیقه لر ایله قره یه طاشمنغه باشلا یوب طالفه لرك

جسامتدن فلیقه‌لر دورلمک درجه‌سنده اولدینی خالد پوناپارته عسکرک اخراجی امرنده مسارعت ایتمکده ایدی ایشته بوئانده اوزاقدن بر بیوک کمی کورینوب انکلیرک بکلک سفینه‌سی ظن اولمغله پوناپارته (ای بخت نبی ترکی ایده جکسین بش اون کون دها بکا یاور اولمازمیسین) دهرک دوچار یاس وفتور اولمشیکن اول کمینک کیروده قالمش بر فرانسز فرقتینی اولدینی اکلاشلماغله مستریج اولمشدر واول کیجه عظیم زحمت و مشقت چکهرک بشیک قدر عسکر قره‌یه چیقاره بیلوب انجق تدارک اسباب محافظه امرنده اهل اسلامه میدان ویرمامک ایچون دقیقه فوت ایتمهرک در حال اسکندریه اوزرینه یوریمکه باشلامش وشفق وقتی اسکندریه پدشکاهنه واصل اولمش ایدی قلعه‌نک اکثر محلاری خراب ووجه‌خانه وسائر ادوات حربیه‌سی نایاب اولوب اطرافی فقط بر قاق قله و براسکی دیوار ایله محاط ایدی پوناپارته عسکرینی اوچ قول ایدرک طرف طرف شدتلو هجوم ایتمکده اهالی بحیره کاشفی و عربان عسکر یله مدافعه‌یه قیام ایتمش ایهده حمله اولاده عربان عسکر ی منهزم اوله‌رق اکثری اطرافه پریشان وبقیه‌سی درون قلعه‌یه کزیران اولوب آنلرک اردنجه فرانسزلر دخی هجوم ایتماری اوزرینه خانه و دیوارلر اراسنده تترس ایدن اهل اسلام مقابله وایقادر نأرة جنک و مقاتله ایتمکله بردهشلو زقاق محاربه‌سی باشلیوب طرفیندن برره مقدار تلفات وقوعه کیش و بو محاربه‌ده قله بر نام مشهور فرانسز جنرالی دخی آغرحه یاره لشمس ایکن بر عثمانلو سرکرده‌سی ارایه کوروب بعض مقاولات ایله طرفینی صالحه یاشدیر مشدر .

شویله که : پوناپارته بن مملکتی یغما ایتمک و یاخود عثمانلی لندن آلمغه کدم مرادم بلدی کوله منلرک ظلمندن قورتامق و فرانسزلره ایتمکاری حقاراتک انتقامی آلمقدیر دهرک مأمورلرک تبدیل اولنیمه جغنه و جوامع و مساجد کفی السابق مفتوح اولوب هر کس عبادتته دوامده سر بست اوله جغنه و کیمسه‌نک مال و جاننه بر ضرر کلیه جکنه متعهد اولمغله بو شرائط قبول اولنهرق اول کون اسکندریه فرانسزلره تسلیم اولندی و ناپلیون طرفندن هر کس ایشیله مشغول اولمق ایچون دلالر ندا ایتمیرلدی وقلعه‌یه فرانسز سنجانی چکلدی وهر کس سلاحنی تسلیم ایله کوکسینه فرانسه کلی تعبیر اولنور اوچ رنگلی یعنی بیاض و قرمز ی و مائی رنگلرله ملون اولان قوقارده نشانی تعلیق ایتمک اوزره امر ویرلدی .

بوئانده باجمله فرانسز عساکری مهمات وسائر لوازمات ایله قره‌یه چیقمش اولدقلرندن پوناپارته آرتق ممالک مصریه‌نک ضبط واستیلاسی تدابیرینه تشبث ایلدی و بو بونده اولان تدبیر و مطالعہ‌سی کوله منلرک نفوذینی کسر ایله حکومت دولت

عليه نك ابقاسنه چاليشور كې كورينوبده بعده دولت عليه به بشقه طرفدن بدل
كوستره رك مصر حقنده بر مصالحه مقاولاتنه كيريشمك وبر طرفدن دخى شيخلرك
نفوذ واعتبارينى تزويد ايله كندولرينى اميده دوشوره رك آلماتق خصوصلردن
عبارت ايدى .

بناءً عليه ابتدا عسكرينه بر نطق ايراد ايدرك اهالينك مال وجائنه تعرض ايتامك
ومذهب وعادتلرينه رعايت ايتك اوزره تعليمات قويه ويردكدن صكر قلمه آديرمش
اولديغى عربى العباره بر قطعه اعلان نامه يى طبع وتمثيل ايله نسخ عديده سنى بلاد
مصريه به نشر ايلمشدر . بونده دين اسلامه رعايتندن بحثله كوياكه مصره كليشى
مجرد طرف دولت عليه دن مأموراً امرای مصر ك تأديي ايجون اولديغنى بيان
واحتالدر كه بنم ايجون سزه دين دشمنى دينى ابطال ايجون كليور ديرلر صاقين
اينانميكز بن سزى ظلم وتعديدن تخايص وحتكزى احقاق ايجون كلم الله وپيغمبره
وقرآن عظيم الشانه كوله منلردن زياده احترام واردر كې اهالينك اغفالنه دائر
بر چوق سوزلر درميان ايلمشدر كه صورتيله ترجمه سى ذيلده (۱۹) رقيه ايراد اولتور .
وينه بوناپارته كندويه بيعت وتبعت اولتمق اوزره مصر واليسى لوقاجى ابوبكر پاشايه
دخى دعوتى متضمن تحريات مخصوصه كوندرمش ايدى كه صورتى زيرده (۳۰)
رقيه علاوه قنور .

بعده بوناپارته اسكندريه مأمورلرينى كافة يرلرنده ابقا فقط ويركونك تحصيلي
ايجون فرانسز مأمورلرى تعيين وامور ملكته باقق ايجون اسكندريه وجوهندن
مركب برديوان تشكيل واسكندريه نك محافظه سنه اوچ بيك عسكر افراز ايله
جنرال قله بر ياره لى اولديغندن كسب صحت ايدنجيه دك اسكندريه ده قالمق اوزره آنى
دخى قوماندان نصب واسكندريه به مجدداً استحكام ويرمك اوزره غايت ماهر
بر مهندس مأمور ايدى وچونكه دونماسنك سلامتى كندوسنجه اك مهم بر مسئله
اولديغندن اسكندريه ليمانه ادخالى محذوردن سالم اولوب اوليه جغنى كشف ايتك
اوزره اهل خبره دن مركب بر قوميسيون تشكيل ايله ليمانه كيرمسى جائز اولديغنى
تقديرده فورفيه كيدوبده اوراده حال تحفظيده بولتمسنى امر وتنيه ايتدكدن صكره
تداركات سفر يه به باشلادى ونيل مبارك موسم فيضانندن اول قاهره مصرى اله
كچورمك املنده اولديغندن همان دونماده كى صنداللى يرلشديروب عسكر ك آغرفنى
ومهمات وطوپلرى بونلره تحمیل ايله ترتيب ايتديكى انجه دونمارشيدده واروب
اورادن نيل ايله رحمانيه به واصل اولدقده اردويى بكلمك اوزره ترتيب ايتدى .
بر قاچ كون اسكندريه ده بوتربيات ايله مشغول اولدقندن صكره بيك يدى يوزطقسان

سكز سنه ميلاديه سي تموز فرنيكسك التيجي كوني اسكندريه دن حر كته بركون اول قاهره مصره وارمق آرزو سيله دمنهور چولندن يوله روان اولدى مقدمه الجيشي جنرال ديزمك قوماده سنده اوله زق اصل اردو ايكي ساعت كيرون كيديوردى .
فرانسه دونمايى بروجه مشروح خارجه طوروب انجق كوچوك كميلرى ليمانه ادخال اولمش وفرانسه اميرالى رباله هاپون ايله برابر دولت عليه نك موجود اولان بالجه اسلام وخرستيان تجار سفينه لرنى اسكندريه ليمانده توقيف ودرولن رنده اولان پرنچ وارزاق سائرهي اخذ وضبط ايلمشدر .

برمنوال سابق فرانسه دونماينك اسكندريه وروونده كهر كجي سيد محمد كريم طرفدن افنديسى مراد بكه عرفحال اولنغله مراد بك فرانسزلرك اسكندريه تعرضلرنى اوكرنديكى كسي پر آتش غضب اوله رق همان جيزه ده مقيم اولديغى خانه سندن چيقوب وقصر عينده مقيم اولان شيخ البلاد ابراهيم بكك يانه واروب بالجه امرا واعيان وعاملا ومشايخ دعوت اوله رق ومصر واليسى ابو بكر پاشا قلعه دن اينوب قاضي بلده ويدي اوجاق اغالرى وسائر سوز صاحبلرى دخى حاضر اوله رق برجسيم ديوان عقد ايله كيفيت درميان اولدوقده مراد بك كندو حقه ده دولت عليه نك فى الاصل مغرب اولديغى بيلديكندن بكر پاشايه خطابا (فرانسزلرك بورايه كليشلى مجرد دولت عثمانيه نك اذنيه در البته وزيرك دخى بونته علمى واردر . لكن بزم قوتمز سزه ده آنلره ده يتشور) ديحك بكر پاشا (باق مراد بك سكا كوره بويله بيوك سوز سويلمك الويرمنز آل عثمان دولتى فرانسزلرك بلاد اسلاميه دخولارنى تجويز ايلمك احتمالى يوقدر بويله سوزلردن واز كچوب همان مردانه طور آنكز وچنكه حاضر لانكز) ديمسى اوزرينه ايجاب مصلحت لدى المطاعه ابتدا مصرده كي فرانسه قونسولوسيله تجارينك بركونه حيله وخيالته يول بوله ماملرى ايچون حبسلرينه قرار ويرلمكله جمله سي قلعه ده حبس اولمشلر بعده هر كس فرانسزلر ايله محاربه يه حاضر اوله رق همان بكر پاشا ايله ابراهيم بك مصرده قالمق ومراد بك اردو ايله مقابله اعدايه شتاب ايلمك خصوصه قرار ويريله رك تداركات سفر يه تشبث اولمشدر .

لكن بوتداركاته اقليم مصرى مائل ايدمش اولان امرا كيسه لرندن برشى خرج ايتيموب مصارفى اهالى اوزرينه توزيع و تحميل ايلمش اولدقلرندن برقاندها مترعج ومتفر اوله رق امرا بيكيدن هدف تيرانكسار اولمشدر .

بروجه مشروح ديوانده مدافعه اعدايه چيقالمق اوزره قرار ويرلديكى صره ده سبكمغزان حضاردن بعضيلرى بزلر دشمن ايله چنكه چيقمزدن مقدم بوراده كي

نصاری اعدام ایتلیز دیملی اوزرینه بکر پاشا و ابراهیم بك یوق یوق بومکن اوله من آنلر پادشاهک رعایا سیدر حمایه لری اوزریمزه لازمدر دیو بویه بر بلائی دفع ایتدکن بشقه پیدر پی نصاریه یکچری اغاسنی ارسال ایله امنیت ویرلر و رعایاه تعرض اولنماق اوزره هر طرفه امرلر کوندریرلر ایدی .

مصر اقلیمی غایت جاهل و هر درلو معارفدن غافل اولان برطالم کوله منلرک زیر دست تحکم و تغلبنده اوله رق مصر والینسک نفوذی چندان جاری اولدیغنه باقیلور ایسه بویه بر تکلیف جاهلانک قبول اولنیورمسی اگر چه خاطره تبادر ایدر انجق شریعت اسلامیه نک بومقوله انسانیتسزلکه قطعاً مسانعی اولدیغندن شمده یه دک ملت اسلامیه ده اهل ذمت نصاری حقیقده اولیه بر غدارانه معامله وقوعه کئامش اولدیغنی کبی بوکره دخی بعض سبکمزاتک لسانه کلش ایسه ده دفعه دفع و منع ایدیلیورمشدر ملت اسلامیه نک هر عصرده درکار اولان بومثلا و قنوت و انسانیتلری اسپانیا خرسیتیانلرینک اهل اسلام حقیقده ایتدکاری معاملات غدارانه ایله موازنه ایدلکده اسلامک درجه شرف و مزیتی میدانه چیقار .

فرانسه دو نمانسک بروجه مشروح اسکندریه به کلدیکنده اسکندریه پیشکاهنده بر روم کیسی بولنوب فرداسی فرانسزلر قره یه عسکر چیقاروبده غوغایه باشلادیغنی کبی بوکمی هان یلکن آچهرق آطه لر طرفه فرار ایتمش ایدی . بو ائنده آفدکنر بوغاننده بولنان قپودانه بک و دریا ترجمانی طرفدن فرانسه دو نمانسک احوالی تجسس ضمننده اطرافه کوندرلمش اولان قایق لردن بری رادوس آچیق لرنده مذکور روم کیسنه تصادف برله واقعه دن خبردار اولیجق اول کمی قپودانه بکه کتوروب قپودانی بالاستنطاق افاده سی ضبط اولنه رق صفرک اوچی تاریخیه مؤرخ وقپودانه و دریا ترجمانی طرفلرندن مشترکاً مهور برقطعه عریضه ایله در سعادته بیلدیرلمشدر .

دولت عالیه پاسبان اوغلی غائله سی ایله مشغول اوله رق بروجه سابق قپودان پاشا طرفندن استیلان مهمانک ارساله اقدام وودین اردوسنک تقویتنه اهتمام اوزره ایکن بغته فرانسزلرک اسکندریه نی استیلاری خبر وحشت اثری واصل اولیجق حال بتون بتون بشقه لشه رق افکار دولت آرتق حصراً مصر طرفه مصروف اولمق لازم کمشدر .

الحاصل دولت عالیه غوائل داخلیه ایله مشغول ایکن بغته بر فرانسز سفیرینک ظهورندن ناشی وکلا دمبسته حیرت اوله رق همان کمال مسارعت ایله تدابیر ممکنه نک اجرا سئنه تشبث بیورلمشدر و غرب او جاقلریله اولکون و بارقورصالرینه دخی دریاه چیقمق اوزره امر ویرلمشدر .

و بوحالده مورہ ایالتک تقویت و استحکامی لازمکلوب مورہ و ایسی صدراسبق حسن پاشا ایسہ غایت اختیار و رکوب و نزولہ و ادارہ امورہ عہدیم الاقدار اولدیغندن دیلدیکی یرده اقامت ایتمک اوزرہ وزارتق رفعلہ یرینہ حلب و ایسی اولوب ادرنہده بولنان مصطفی پاشا مورہ و ایسی وزینخنہده مرفوع الوزارہ اقامت اوزرہ اولان سید الحاج حسن پاشا دخی حین اقتضاده زینخنہ حوالیسندن بوغازہ کلیتو عسکر جلب و جمع ایتمک اوزرہ ابقای وزارتیلہ آقدکز بوغازی محافظی نصب و تعیین و قرمان و ایسی پکمزجی محمدپاشا عہده سنہ قبریس جزیرہ سی محافظانی و بروجه آرپہلق الحاقاً قرہ حصار صاحب سنجانی توجیہ اولنمش و حسن پاشانک بوغازہ وصولنہ دکن بوغازده اولان قلعه لک ادوات و مهماتنہ نظارت ایتمک اوزرہ دفتر دار سابق عثمان افندی سریعاً بوغازہ ارسال قلمشدر .

بوصرہده اناطولی و ایسی اولوب پاسبان اوغلی اوزرینہ مأمور بولنان علی پاشانک کتخداسی سید مصطفی پاشانک ابقای وزارتیلہ خانیہ محافظلغنه مأمور ایلمشدر .
شام و ایسی و امیر الحاج اولان عظم زاده عبدالله پاشا بروجه مطلوب ادارہ امور حاجہ موفق اوله مدیغندن مأموریتی مرعش ایالتہ تحویل اولنہرق شام ایالتیلہ امارت حاج منصبی درکاه عالی قیوچی باشیلرندن میراخور اول پایه سی اولوب سابقاً حلب محصلی بولنان ابراہیم اغا عہده سنہ بارتبہ وزارت توجیہ اولنمشدر .

و بوکونلرده جزائر غرب و ایسی حسن پاشا وفات ایتمکله جزائر اھالیسنک استدعالری اوزرینہ خزینہ جی مصطفی بک جزائر و ایسی نصب و تعیین قلمشدر .
و در دست اولان مهمات و اینیہ قلاع مسئلہ لری و سایر مهام معجلہ ادارہ سنہ مدار اولمق اوزرہ دخان کمرکاری اسھامندن بشمرکیسہ فائضو یوز سھم افزا ایلہ سکزر سنہ لکنہ رجال و نسواندن طالب اولنلرہ فروخت و محلولی و قوعوندہ نظامی اوزرہ ایراد جدید خزینہ سندن ضبط اولنمق اوزرہ تنظیم اولنمشدر .

بالادہ اشعار اولندیغنی اوزرہ دولت علیہ نک دول اوروپا ایچندہ ال ابتدا عقد معاہدہ ایتمدیکی فرانسه دولتی اولہرق ہر دولتدن زیادہ اکا امنیت ایدردی کہ فرانسه قرالی فرانسوہ شارلکندن کوردیکی تضییقات اوزرینہ سلطان سلیمان حضر تلرندن استمداد ایتمکله او دخی اردو و دونماسوقیلہ امداد و معاونت ایدوب اولوقدنبرو میانہ ده قرار کیر اولان مناسباتک خللدن وقایہ سنہ دولت علیہ طرفدن دقت و اعنا و استانبولہ ہر دولتدن زیادہ فرانسنہ نک اخطاراتی کوش قبول ایلہ اصفا اولنہ کلشدر حتی دولت علیہ یہ عظیم مضرتی اولان قینار جہ معاہدہ سی دخی فرانسنہ لونک اخطار و تشویقی اوزرینہ اچلمش اولان سفرك نتیجہ و خیمہ سیدر و فرانسنہ اختلالنک حدوشندہ

فرانسزلر هر طرفدن مطرود و منفور اولمشيكن دولت عليه اوتنه دنبرو فرانسه ملتي حقنده مبذول اولان رعایتكارلغني دريغ ايتيموب اشبو اوان اختلالده دخي فرانسه تبعه سي ممالك محروسه ده غایت سربست اوله رق تجارت ايتمكده اولديلر و فرانسه ده هر تقدیر قرالیت الغا ايله جمهوریت اصولی تشکيل اولنديسه ده دولت عليه فرانسه لوي اوستريا و روسيه دولتلرينه قارشو کندوسنه معين و ظهير بيلوردی و فرانسه يه بومرتبه ميل و رکونی سائر دول اوروپانک رقابتي دعوت ايدوب علی الخصوص بويله اختلال هنگامنده دخي دولت عليه نك فرانسه پوليقيسه مر بوطیت حالنده دوام و ثبات ايلمسندن طولاني دول اوروپا و علی الخصوص انكلتره دولتي طرفدن کراراً سرزنش اولمشيیدی حتی بوکونلرده دخي انكلیز ترجماني ايلچيسي طرفدن اوله رق رئیس افندی يه (دولت عليه برقاچ سنه دنبرو دوست قديمی اولان انكلتره دولتي فراموش ايتدی و فرانسه لودن دوستلق مأمول دکل ايکن اکا زياده رعایت ايلدی) يولو شکایت آمیز سوزلر سويلمشدر .

حال بويله ايکن ناپليونک اصول دول و حقوق ملل خارجنده و مروت و انسانيتک اوتنه سنده اوله رق بغته کلوبده اسکندريه يي استيلا ايديورمسی پک غريب و محير عقول برکيفيت کورلمشدر واکرچه ونديک دولتک امحاسنده يونان جزيره لری فرانسه جمهوري يدينه کچهرک دولت عليه ايله همحدود اولديغنده ناپليون طرفدن موره و حواليسي رعایاسنک اخلال اذهانی موجب اوله جق بعض نشرياته ابتدار اولندقده دولت عليه شبهه يه ذاهب اولديسه ده فرانسه جمهورينک حقوق ملل و عهد دولی نابومرتبه پايمال ایده جکني و بونجه سنه لر دنبرو يار وفادار بيلديکی فرانسه لونک بوقدر و فاسزلق و عهد شکنک ایده جکني امید ايلمزدی .

ناپليون کبي عقل و حکمت ايله معروف اولان برذاتک بويله سرسری تسبثانه ابتداری و مديران جمهورک بوکاموافقتی و فرانسه ملتک سکوت و رضامی اختلالک اخلاق عموميه يي نه مرتبه اخلال و افساد ايلمش اولديغنه برديلدر .

وناپليونک بو تسبثاتی مجرد مصر طرفنده کسب شهرت ايدوبده بعده فرانسه يه عودت ايله مکافات آرامق و مديرانک يرينه کچمک غرضدن عبارت ايدوکی ملحوظ قوی اولوب بوکامديرانک موافقتی دخي مجرد ناپليونک انظار ناسده کوندن کونه اعتباری تزايد ايتمکده اولديغندن اکا حسد ايتميريله بر ساعت اول بر طرفه کيدوبده فرانسه دن اوزاق برمحلده بولتمی املندن عبارت اولق کرک ایدی .

الحاصل بومصر سفری مجرد برقاچ کيمسه نك افکار شخصيه لرندن نشئت ايتمش برماده اولوب يوخسه ناپليون عربستانده طولاشه جغنه فرانسه نك اصلاح احواليله مشغول اولسيیدی و طننه دهاکوزل خدمت ايتمش اوله جغنی درکار ایدی .

غزبدر که پوناپارته اسکندریه بی ضبط ایستد کده بالاده بیان اولدینی اوزره نشر ایتمش اولدینی
اعلانامه ومصر والیسنه یازمش اولدینی تحریر ائک وماطله آطه سی فتحنامه سنک بر قطعه
صورتلرینک لقیه استانبولده کی فرانسه مصاحتکنذارینه کوندر دیک ایکی قطعه
مکتوبنک برنده (عسکر من اسکندریه قربنده قره یه اخراج ایتدیر یلوب جزئی
بر تفنک جنبکی وقوعندن صکره شهر مذکور ی ضبط ایلدک الحاله هده مصره
عاز من بزم نیت راسخه من بوندن بویله دخی دولت علیه ایله رابطه حسن آمیزشک
وقایه سی ایدوکنی دولت علیه یه بیلدیره سین جانب سلطنت سنیه یه بیوک ایلچیلک
ایله بر یسی مأمور اولدی قریباً اول طرفه واصل اولور) دیو تحریر و دیکر نده
دخی (فرانسه جمهورینک نیتی دولت علیه ایله بوزش مق اولیوب بو حرکت مقدملرده
دفعات ایله تونس و جزائر اوزر لرینه ظهور ایتمش حرکتلر کی عد اولملودر بزم
نیتمز ایکدر بری تجار من حقه کونا کون تعرضاری ظهور ایتمش اولان بکلرک
تأدی وایکنجیسی انکلتره تجارتنه ایراث خلل ماده سیدر بویله جه دولت علیه یه
افاده ایدم سین دولت علیه نک قوتی بیلمیان آدم لک تأدیندن محظوظ اوله جنی
اوروپانک شم دیک حاله نظر آبز دولت علیه نک حقیق قوه الظهری ایکن دولت
علیه اوزرمزه سفری اختیار ایده جک در جه مقتضای مصاحتنی بیامامک ممکن
اولدینی ماملدر) دیو تسطیر اولمشدر .

ایشته بوده فرانسه اختلالنده ایجاد اولمش بر دیپلومات لسانیدر که قورصانلق
یولنده بر دولتک ممالکنی بقتة غضب ایدوبده یه دوستلک دوامندن بحث اولنیور
واستانبولده فرانسه مصاحتکنذار ی دخی پوناپارته نک بو حرکته اعلان حرب
نظریله باقلاماق اوزره باب عالی اقباعه چالیشوردی .

هر نه حال ایسه فرانسه جمهورینک مصره سوء قصدی تحقق ایدجک دولت علیه
دخی روسیه وانکلتره دولتله فرانسه علیه نه عقد اتفاق ایتک اوزره مذاکره یه
کیرشمشدر و صفرک اون دردنچی کونی رئیس افندی انکلیز ایلچسی ایله
ملاقات ایدوب بوکا دائر مداوله افکار اولمش و بوتار یخندن صکره نظر دولت
علیه ده انکلتره دولتی فرانسه یه بدل اوله رق هر خصوصده سلطنت سنیه نک محرم
اسراری ومتفق وفا شعار ی بولمشدر .

وبوصره ده انکلتره دولتی در سعادتده کی مصاحتکنذارینه اورته ایلچیلک رتبه سی
یرمشدر .

فرانسه پولتیقه سی بالذات سلطان سلیم التزام ایدر ایدوکندن طولانی بو حالتدن
پک زیاده صیقلمش وموسم بهارده آینه لی قواق سراینه نقل ایتمشکن اورانک هواسی

دخی طبعنه موافق گلدیکندن اعیان اندرونند بعضیارینی استانبول سراینه کوندروب کندوسی صفرک اون ایکنجی و حزیرانک اون بشنجی پنچشنبه کونی خاص او طه اعیانی و چوققداران و سرهنکان ایله بشکطاش ساحلسرینه نقل بیورمش وهمان صیقی صیقیه لوازم سفریه تدارکنه تشریف ایدلمشدر .

* پوناپارته نك مصری استیلا ایلدیکی *

برمنوال سابق اسکندریه استیلاسی خبری آلدقدنصکره بش کون ظرفنده امرای مصریه تدارک لرین کوره رک مراد بك جسر اسود نام محله نصب خیم اووراده ایکی کون مک و آرام ایتدکن صکره یکر می بیک قدر عسکرله فرانسزک اوزرینه حرکت و قیام ایلمش و مهمات و ذخائرینی دخی کرید عسکرله نهراً سوق ایتمشدرکه طرابلسلی علی پاشا ایله عظم زاده نصوح پاشا دخی آنلرله برابر ایدی .

چونکه علی پاشا جزائر غربدن و نصوح پاشا دخی طرف دولتدن مطرود اوله رق مراد بکه التجا ایلمش اولدقلری جهته اولوقت ایکیسی دخی آنک دخیلی ایدیلر . مراد بك بو وجهه حرکت ایتدکنصکره اثنای راهده مصره خبر کوندروب دشمن سفینه لرینک مرورینه مانع اولمق ایچون مغزل برجنک طرف شرقیسندن غربیسنه وارنجه رشید بوغازینه چکامک اوزره یوز اوتوز آرشون طولنده غایت قالین برتیور زنجیر اعمال و مذکور بوغازده اوفق قایقلر بر برینه ربط ایله کویری تنظیم و طوب و جبخانه وضع اولمشی اشعار ایلمشدر بو تدبیرله هپ طرابلسلی علی پاشانک رأی اولوب بوصورته فرانسسه سفینه لرینک مرورلری منع اولتور ظن ایدرلردی .

حالبوکه اول عصرده پوناپارته اردوسی الك معلم و منتظم برحالده اولوب مصرده ایسه هنوز تعالیم عسکر بحتی میدانه چیقماش اووروپاده اختراع اولنان صنایع آتشیازی مسئلهسی موضوع بحث ایدلماش اولدیغندن فرانسزله قارشو علی پاشانک ایده جکی تدابیر حربیه نك تأثیری اوله میه جنی درکار ایدی .

واقعا گوله من سواریسنک شجاعتلرینه و جندیلیکده مهارت لرینه دیه جک اولیبوب پوناپارته دخی آنلری دنیانک برنجی سواریسنی دیو وصف و ثنا ایتشیدی لکن مراد بکک استصحاب ایلدیکی عسکر منتظم اولدقدن بشقه عددجه دخی فرانسز اردوسنه نسبتله بک ناقص ایدی .

مونه قوقولی درکه پنجه و تراشیده طوائف و مللک اعتمادلری هنر و معرفت لرینه و رابطه و انتظام لرینه و تعالیم و تربیه کورماهش اقوام و اممک استظهار و استنادلری مجرد کثرت لرینه و شدت ایله هجوم و اقتحام لرینه در .

الحاصل مراد بک اردوسی پوناپارته اردوسه بر وجهه مقاومته مقتدر دکل ایدی لکن کندوسی عسا کر منتظمه تک آتشی نه درجه شدتلی اولدیغنی بیلمدیکندن فرانسه اردوسنی هان آنلره چکنتمک زعمیله مغرورانه و غافلانه رحمانیه طوغری حرکت ایلمش و کشف ایچون ایلرویه بیک قدر سواری سوق ایتمش ایدی . پوناپارته دخی بالاده بیان اولدیغنی اوزره دمنهور چولندن حرکت ایدرک فرانسز عسکری صیجانغی چوق کولکه سی یوق نهایی کورنمز احوالی بیلممز برچوله دوشدکارنده هیچ کورمدکاری برقوم دریاسنک اورتیه سنده صیجاق و قیاق قوم طالغهری آره سنده پر یحساب و صیجاقدن و صوسزلقدن یتاب اولدقلری حالده کشف ایچون طولاشان کوله منلر دخی قومدن چیقار کبی بر آراتق اوزاقدن کورینور و در عقب غائب اولورلر و پیش و پسدن و صاغ و صولدن تنها بولدقلری فرانسزلی چارپوب اعدام ایدرلرایدی .

احوال مذکور فرانسزله بک زیاده دهشت و یروب نه حال ایسه اسکندریه دن حرکتلرندن درت کون صکره نیل کنارینه واصل اولدقلرنده برقاچ یوز کوله من سواریسی جنرال دیزه فرقه سی اوزرینه طولی دیز کین هجوم ایتمشلر ایسه ده فرانسزله مسکت و صالحم آتشیله طاعیلوب کوزدن نهان اولمشلر فقط بوندن کوله منلرک اردوسی قریب محله اولدیغنی اکلاشلمغله فرانسزله هان جنکه حاضر لشمشلر ایدی . و بروجه بالا صندالردن ترتیب اولسان ایجه دونمزلری هنوز کلامش اولدیغندن اوچ کون قدر رحمانیه ده توقف و انتظار ایدوب مراد بک دخی رحمانیه جوارنده فرانسزله و رودینه منتظر ایدی .

تموز فرکتیک اون اوچنجی کونی فرانسز صندالری رحمانیه واصل اولدیغنی کبی هان فرانسز اردوسیه برابر ایلرویه حرکت ایتدیلر و صندالر ده ایلر و حرکت ایلمش اولدقلرندن مراد بک جریملریله لدی التقابل محاربه نهریه به مباشرت اولدیغنی اثناده فرانسز اردوسی دخی یتشدی و پوناپارته عسکرینی بش فرقه به تقسیم و هر فرقه بی بر مربع قلعه شکلنه قویوب آغرانی بونلرک اورتیه سنه وضع ایله طویلری دخی گوشه لرینه تعبیه ایلدی .

محرک یکر می طقوزنجی جمعه کونی ایدی که جنکه ابتدار اولنمشیدی شویله که : مراد بک بیکر بیک ایکشر یوز سواری فرقه لر یله بوقلرله اوزینه هجوم قومانده سی و یردکه کوله منلر طولی دیز کین فرانسزله اوزرینه هجوم ایدرک بر ال طبانجه بوشالتقدن صکره سل سیف ایله فرانسز صفرینک اوزرینه صالدرمشلر ایسه ده شدتلو برطوب آتشیله خیلیجه سی تلف اوله رق بقیه سی دخی سونکولره تصادف ایله صفری بوزه مدقلرندن اوتیه برویه طولاشور و برطاقی اوریلوب ره دوشرایدی .

ایشته بواناده مراد بکک جبه‌خانه ایله مملو کمیسنه بر خیره دوشمکله باروت آتش آلدیغی کبی مذکور کمی ویاننده کی کمیلر آتش آلوب قره‌ده کی جبه‌خانه دخی سرایت ایتمکله طوبجی باشی کریدی خلیل اغا و معیتده کی قالیونجی عسکری ایله سائر افراد عسکره‌نک هوایه اوچدقلرینی مراد بک کور یجک واله و مضطرب اولدیغی حالده فرانسزلر آنک اوزرینه شدتلی آتش ایتملرله مراد بک همان احوال و ائقالنی ترک ایدرک فراره قرار ویردی .

مراد بکک انهزامی خبری مصرده شیوع بولیجق اهالی‌یه خوف و دهشت گلش و ابراهیم بک بولاق طرفه کچوب والی پاشا و علما و اشراف بریره اجتماع ایله لدی‌الاستشاره بولاقدن شبره‌یه وارنجه متریس آلمق و امرا و کاشفان بولاقده ابراهیم بک معیتده بولمق تدبیرینه قرار ویرلمشدر .

صفرک ایکنجی بازار ایرتسی کونی مراد بک انبایه‌یه واصل اولوب اورادن پشیله قدر طرابلسلی علی پاشا و سائر امرا متریس حفریله مشغول اولدیلر و چیزه‌ده انشا اولسان سفینه‌لری ساحل انبایه‌یه نقل ایله ایچلرینه طوب و جبه‌خانه وضع اینتدیلر و انبایه قریه‌سینی دئرامادار متریس ایچنه الدیلر لکن فن استحکامجه بومتریس‌لرک پک چوق قصور و نقصانی اولدقدن بشقه وضع اولسان طوپلرک عرب‌لری اولمیوب قونداق اوزرنده اولدیغندن لدی‌الحاجه یرلرندن اویناتمق قابل دکل ایدی .

وینه اول کون متریس‌لره دخول ایچون نفیرعام اولنوب اهل سوق دکانلرینی سد ایله متریس‌لره کیتدکلرندن درون مصرده عجزه و نساوندن بشقه کسنه قالمامشدر . ابراهیم بک مصره مجاور اولان عربانه خبر کوندروب شبره نواحیسندن بولملرینی اشعار ایلدیکی کبی مراد بک معیتده دخی بحیره و چیزه و سعید امشالی محللردن عسار کثیره کلرک کوندن کونه عسکر زیاده‌لشمکده ایدی .

بوتداریکات ایله برابر امراینه مطمئن اوله میوب اسکندریه‌نک استیلاسی خبر آلدیغی و قدنبرو تحف و تفاریقه دائر اولان شیلرینی کیزلی کیزلی فقرا خانلرینه نقل ایده‌کلدکلرندن آنلرک بووجهله تالاشلری خلقی بتون بتون دهشت واضطرابه دوشورمشدر .

ودرون مصرده تجارت طریقله مقیم اولان افرنج و سائر نصارادن امرای مصریه مال طلبیله بعضیلرین قلعه‌ده حبس و بعضلرین خانلرندن تضییق ایدرک اموال و اشیلرین غصب و راضی اولمیلاری قتل ایدر اولدقلرندن بوا مرشعیع جانب حکومتدن منع اولنمشدر یوخسه بوتقریبله مصرده پک چوق فناقلر و قوعه کلوردی .

یوما فیوما دشمنک یا قلاشمقده اولدیغی خبرلری توارده باشلایوب فقط نیلک قنی

جهتدن كله چكى اكلاشييله مديغندن مراد بلك اردوسى نيل ايله اهراملر آره سنده اولوب ابراهيم بك دخى كندو عسكريه مصر يقه سنده يعنى نيلك صاغ طرفنده توقف ايله دشمنك ورودينه منتظر ايديلر بو وجهله قوتك ايكيه انقسامى ايسه دشمنه برنوع خدمت ايدى ومراد بلك ياننده اون بيك قدر كوله من وبرقاچ بيك عربان عسكريه فلاحلردن دخى كلتلو نفرعام وار ايدى انجق عربانك غرضى برغلبه وقوعنده اموال غنائمن حصه المقدن عبارت اوله رق روزكاره تابع برخاق اولوب نفرعام ايسه چندان ايشه يارار عسكر اولديغى دركاردر .

فرانسه اردوسى صفرك التنجي جمعه كون جسر اسود نام محله كلوب فرداسى فچردن اول حركتله طلوع شمسده فرانسزلره صاغ طرفدن اهراملر وصول طرفدن شهر مصر كورندكده پوناپارته عسكريه خطابا (عسكر ايشته مصر فاتحلياره روبرو جنك ايله جكسكز درخاطر ايديكز كه شو اهراملرك تپه لرندن قرق (مائه) جيل سزى تماش ايدبور) ديدكدن صكره سرعتلو عارش ايدوب چوق كچمكسزبن كوله من آتولورى برخط اوزره كورنمكه باشلا ديفنى كچي محاربه ترتيباتنه مسارعت ايلدى وار دوسى بش مربعه تقسيم ايدوب كندوسى جنرال دوغه ايله اورته ده و جنرال ديزه ايله جنرال رنيه چول طرفنده يعنى صاغ جناحده و جنرال منوايله جنرال بون نيل طرفنده يعنى صول جناحده ايدى .

مراد بك دخى پياده بي متريسلره تعبيه ايدرك سواريسنى نيل ايله اهراملر آره سنده كي صحرايه يورتمشيدى . و اول كون صباحلين دمياطدن كلان مغربيلر ايله ارناود عسكرى انبايه متريسلرينه كيروب مصر واليسى دخى مراد بلك اردوسنه اعانه برقاچ بيك كيچرى ايله برقاچ يوز سواري كوندرمشيدى عربان سواريسى دخى مراد بك اردوسنك صول جناحنده اهراملر جوارنده ايدى .

طرفين يكديكره طوب منزلى قدر ياقلاشدقلرنده پوناپارته مراد بلك اردوسنى كوزدن كچروب طوپلرك قونداق اوزرنده اولديغى كوريجك عساكر اسلاميه نك متريسلردن چيقه ميه جغنى اكلامغه و كوله من عسكريه بوزدقدن صكره متريسلرك ضبطي كندوسنجه امر سهيل اولديغى بيامكله اول امرده كوله منلرى احاطه ايله آنلرى متريسلرده كي عسكردن آرمق اوزره طوغرى كوله منلرك اوزرينه يوريدى بو كا مقابل مراد بك دخى متريسلرده برايكي بيك قدر كوله من براغوب باقى سواريليله فرانسه اردوسنك صاغ قولى اوزرينه غايت دهشتلو برهجوم ايتديسه ده مربع قلعه شكلنده اولان فرانسز فرقلرى هر طرفدن آتش بوسكوره رك برندن اوينادلق قابل اوله مدي .

ایشته بو صرده دفتردار ایوب بك معیتده کی کوله من سواریلریله فرانسزلر اوزرینه هز برانه وفداکارانه بر هجوم ایدرک نیجه اعدای آتلیک ایاقلی آلتده یایمال ایتدیله ایهده کندولریدخی دانه طوب و تفکه هدف اولوب کتدیله . هله ایوب بك بتون بتون نابید و کوله منلرک مشاهیر و متحیرانندن نیچهری شهید اولمشدر .

برشرقیده بولان عسکر جنکی لدی المشاهده امرادن بر جماعت سفینه لره رکوب ایله قارشویه کچمکه باشلامشدر ایهده سفینه قلیل اولدیغندن جمله سی بنه میوب آزار آزار کچمکه اولدقلری حالده روزکار شدید و مخالف اولدیغندن نیلده فورطنه ظهور ایله عسکرک کوزلرینه طوغری کلوب دو کیلان توزدن کوز کوزی کورمزدی . بناء علیه بونلر قارشویه کچوب و کتولیرینی دروب طوبلایوبده جنکه حاضر اولمدین بر غربی فرقه سی منهزم اوله رق سوارینک کیمی نیلده غریق و کیمی فرانسزلره اسیر اولدی .

بر طرفدن دخی فرانسزلر متریسلر اوزرینه هجوم ایدرک طرفیندن شدتلو طوب و تفک جنکی اولوب حتی انباده کی ارناودلر افنای وجود ایدنجیه دک جنک ایتشلر ایدی . لکن عساکر اسلامیه فرانسزلرک آتشنه طیانه میوب نهایت فرانسز عساکری متریسلری دخی ضبط ایتلریله مراد بك یاننده کی آدملریله چیزیه فرار و بر چاریک قدر آنده استقراردن صکره جهت قبله یه کتدی .

و بوجه مشروح بر غربی فرقه سی منهزم اولدقدن صکره فرانسزلر طوبلیرینی بر شرقی اوزرینه چو یروب آتش ایتکه باشلادیغی کبی اوراده کی عسکر دخی طاغیلوب والی پاشا و ابراهیم بك عادلیه سمته عزیمت ایتدی . اهالی مصر دخی فریاد و فغان ایدرک اخشامدن اولجه شهره کیردیله .

و بوجه سابق مراد بك چیزه دن جهت قبله یه عزیمتده انباده کی مهمات کمینسک یوقارو چکدیرلمسی امر ایتش اولدیغندن یوقارویه طوغری چکیلورکن قره یه اوتورمغله دشمنه قلامق ایچون احراق اولمسی امر ایتسی اوزرینه کبی یه آتش ویریلوب شعله سی مصردن کورلیدی کبی فرانسزلر چیزه و بولاق بلده لیرینی یاقدیله ظن اولوب بو ائنده فرانسزلر قتل نفس وهتک عرض ایدرک کلپورلر مش دیو بین الناس اراجیف دخی سویلنمکله اهالینک پک چوغی کیجه لین مصردن چیقوب کیمی شرق طرفه و کیمی صعید ایچنه طوغری کیدوب قیرلره طاغلمشدر حالبوکه کیده جکلری یری و یولی بیلمزله ایدی و صحرا ره چیقدقلری کبی عربان و فلاح کروهی آنلری صویوب عربان ایلمشدر .

الحاصل اول کيجہ مصرده هيج کورلمدک مصائب ظهوره کشدر فرداسی بازار کونی فرانسز لک برو طرفه تجاوز ایتماش اولدقلری اکلاش لده قاضی وعلما و مشایخ جامع ازهرده اجتماع ایله لدی المشاوره ویریلان قرار اوزره جمله طرفدن طلب رای و امان ضمنده بر مکتوب یازیله رق فرانسزجه بیلور بر مغربی به بر کیمسه ترفیق ایله کوند رلمش واروب مکتوبی ناپلیونه و بردکارنده قنی سزک عظما و مشایخ کنز امنیت و استراحت لری ایچون حضور مزه کلکی نیچون تأخیر ایتدی لر دیمکله مغربی دخی سزدن رای و امان استر لر دیدکده بن آنلره امانی متضمن کاغدی مقدم ارسال ایتماش ایدم خوشمندی ینه یازلسون دیو بر کاغذ تحریر و مغربی به تسایم و ارسال ایلمشدر . بو مکتوبک صورتی دخی ترجمه سیله برابر زیرده (۲۱) رقمه علاوه اولتور .

بو مکتوب مصره واصل اولدینی کبی خلق راحت و حضوره واره رق شیخ مصطفی الحاوی و ابراهیم الفیومی و دیگر بعض ذوات بنوب پوناپارته نک یانه وارد قلدنده پوناپارته آنلره ریشیخند ایله سز لر کبار مصر دن ایکن بر طرفه کیدوب نیچون جمعیت ایله کلدیکنز بقیه علما و مشایخه یازکنز کلسونلر قورقسونلر دیمکله در حال پوناپارته نک رای و امانی و حضورینه دعوتی خصوصی تحریر و اعلام ایتلری اوزرینه شیخ شرقاوی ایله بعض ذوات کیتمشلر ایسه ده نقیب الاشراف عمر افندی ایله دیگر بعض ذوات مطمئن اوله میوب کیتماشلردر .

و اول کون اوباش و ارادل طاقی اجتماع ایدرک ابراهیم و مراد بک ایله دیگر بعض امرانک خانه لرینی یغما و غارت ایله بولدقلرینی اوجوز بها ایله صامشلردر .
صفرک اوننجی بازار ایرتسی کونی فرانسز لر مصره داخل اوله رق پوناپارته النی محمد بکک اوز بکیده کی قوناغنه نزول ایتمشدر النی قازاندینی آچهبی بوقوناغنه صرف ایله هنوز اکیال ایتماش ایکن هزار تکلف ایله فرش و تزین ایلدیکی او طه لر پوناپارته به نصیب اولمشدر .

پنجشنبه کونی مشایخ و اوجاقلی حکومت فرانسویه طرفدن دعوت اوله رق مشایخن اون نفری دیوان اعضالغنه تعیین اولمشدر . والی پاشا کتخداسی مصطفی بک ایله قاضی بلده پشمقچی زاده ابراهیم ادهم افندی دخی بومجلسده حاضر ایدی . کوله من جنسندن بریسنه منصب توجیهی ایستلمدیکندن ارباب دیوان طرفدن دخی مصرده عوام ناس انجق ترکلردن خوف ایتدیکی و آنلره ترکلردن بشقه سی حکومت ایدمه جکی اخطار اولنمغله اولکون خاندان قدیمدن محمد اغای مسلمانان مستحفظان اغاسی و حسن اغا احتساب امینی نصب اولنق کبی بعض توجیهات اجرا ایدلمشدر .

بعده بر طلیمین نامنده بر خرستیان مستحفظان کتخداسی نصب اولنه رق دبدبه ودارات ایله مصرده کزوب حل وعقد اموره مبادرت ایلمشدر بو ایسه مقدا بر دکانده شیشه صتار ادانیدن بر شخص اولدیغندن انظار انامده پک چرکین کورنمشدر .

بوندنصکره فرانسه عسکری فوج درون مصره داخل اولوب انحق کمنه نک مال وعرضه تعرض ایتمدکدرندن بشقه آلدقیری اشیانک قیمتندن زیاده آچه سنی ویرلر ایدی واخذ واعطایه وسعت کلدیکندن فقرا طاقی کسب رفاه وراحت ایتمیدی فقط اهالی مصرک عادت مالوفه لرینه مخالف اوله رق اسواقده باده وعرق صوکی عانی صاتیلور اولدیغندن بوراسی اهل اسلامه چرکین کورینور ایدی اما بکلرک سایه سنده دنیاه صیغه میان اتباعی گروهی که ارباب دیوان شفاعتیه آزاد اولمشلر ایدی جامع ازهرده اسوء حال ایله صدقه یه محتاج اولمشلر ایدی (فی ذلك عبرة لاولی الالباب)

بواننده خلق دیوانه دعوت اولنه رق مسلم وغیر مسلم بالجمله تجار اوزرینه بشیوز بیک ریال توزیع ایله استیفا سنده شدت کوسترلمشدر ومقدحه امرانک خانهلرندن نهب اولنان اموالک ظاهره اخراجی ایچون دینجیلر شیخی حبس وتضیق اولندیفی کبی بر طرفدن دخی امرانک اخفا اولنان اموال وایشیاسنک کوشه بکوشه تحریسنه ابستار اولندیفی صره ده امرانک زوجهلری خانهلرنده ساکن اولسونلر فقط زوجلرینک ماللرینی میدانه چیقارسونلر دیوا اعلان اولنوب مراد بکک زوجه سی نفیسه خاتم کندوسی ومعلقاتی ایچون مقطوعاً یوزیکرمی بیک فرانسنر التونی ویرمش وسائر امرار زوجهلری دخی بویله طوپردن بتورمه صورتیهله تجریم اولمشدر والحاصل دیوانک ایشی بومثللو مصادرات وجرایمدن عبارت بولنمشدر . برمنوال مشروح پوناپارته مصری ضبط ایتمدکدن صکره مصالح ملکیه نک مرکز ومرجی اولق اوزره علما واشراف بلده دن مرکب بر دیوان تشکیل واطرافه جنراللر ومأمورلر ارسال ایله اقالیم مضریه نک امر اداره سنی تأسیس وقعله ده کی ضربخانه یی کشاد ایله سلطان سلیم نامنه اوله رق سکه قطعنه ابستار ایدوب انحق بکر پاشا ایله ابراهیم بک بلیسده ومراد بک صعید طرفنده بولندقلرندن اقالیم مصریه یی کاملاً قبضه تصرفه آلق اوزره اورالری بونلرک اللرندن نزع ایتمک کندوسنیجه لازمه حالدن بولنسیله ابتدا بلیس طرفنه حرکتی تصمیم ایدرک وایخر صفرده اولطرفه توجه ایتمشدر .

انحق اولجه حجاجک عقبه دن مکتوبلری لککله اعضای دیوان پوناپارته دن امیر الحاج

صالح بك ايجون رای و امان ایستد کارنده یاننده کوله منلر و سائر عسکر اولیوب
 آحاد ناس کبی کلک شرطیه امان و یریرم دیمسی اوزرینه آنلر دخی یا حجاجی مصره
 کیم ایصال ایده جک دیملریله درت بیک فرانسه عسکری کوندیررز حجاجی مصره
 کتورلر دیمکله قافله حجاج طرفه تأمین و تلطیف یولنده کوندیریلان تخریرانده
 دارحمرایه کلوبده بعده کوندیریله جک خبره منتظر اولملری اشعار اولتمش ایسه ده
 بوتخریرانک وصولندن مقدم حجاجک بلیس طرفه کللری ايجون ابراهیم بك
 طرفدن یازلمش اولمسی اوزرینه آنلر دخی اورایه عزیمت ایتمشلر بو ائنده ایسه
 پوناپارته ابو زبل عشیرتی اوروب غارت ایتدکن صکره اوائل ربیع الاولده
 بلیس طرفه توجه ایلمش ایدو کندن ابراهیم بك صالحیه طرفه حرکت ایدوب
 یوکلرینی و حرملرینی عربانک تحت ضمان و کفالتده اوله رق اول طرفده براقشیدی .
 بناءً علی ذلک حجاجک برطاقی عربان ایله مقالله ایدرک غریبه و منوفیه و قلیوبیه
 طریقلریله مملکتلرینه کیتمش و برطاقی بلیسده قالوب بعضیلری دخی صالح بك
 ایله برابر ابراهیم بك طرفه عزیمت ایتمش ایدی متعاقباً پوناپارته بلیسه ورودنده
 اوراده بولنان حجاجی مصره کوندرمشدر اما حجاج سائره بوجه مشروح متفرق
 اوله رق چولارده درلو سفالتلره دوچار اولوب چوغنی عربان یوللرده نهب ایله
 عربان ایلمشدر .

پوناپارته بکر پاشا ایله ابراهیم بکی تعقیب ایتمک و ابراهیم بکک عربانه تودیع ایلمش
 اولدینی یوکلرینی اله کچورمک اوزره بلیسدن صالحیه طرفه حرکت ایتدکده
 ابراهیم بك کیفیتدن خبردار اولوب امیرالحاج صالح بك دخی اولجه آنک یانسه
 کلش اولدیغندن همان معیتلرنده کی کوله منلرله مقابله و مدافعهیه شتاب ایدرک فرانسه
 سواریسيله لدی الملاقاة چونکه عساکر اسلامیه نك کوزلرینی ییلدیران فرانسلرک
 طوب و تفک آتشی اولوب یوخسه فرانسه سواریسینی کوله من سواریسینک هجومه
 بر وجهله طیانه میه جنی درکار اولدیغندن فرانسلر فنا حالده منهزم و منکسر اولوب
 بوکا پوناپارته واقف اولدینی کی درحال طابورلر سو قیله بالنفس امداده مسارعت
 ایلمش ایسه ده آنک ورودینه قدر فرانسه سواریسینک کلی تلفاتی وقوعه کلشدر .
 فقط بوضردده عربانک یوکلره سوء قصد ایتدیکی ابراهیم بکه اخبار اولنغله چاره سز
 فرانسه جنکندن فراغت ایدرک همان عربان اوزرینه هجوم ایله اموال و اشیاسنی
 تخلیص ایتدکن صکره دیگر کوله منلرله برابر غزه طرفه کیتمش و بونک اوزرینه
 پوناپارته دخی مصره عودت ایتمشدر .
 صالح بك برمنوال مشروح حج شریفدن عودتسنده مملکتک فرانسلر دیدنه

کدیکنی و خاتمانک خراب اولدیغنی تحقیق ایدیجک واله و حیران و بعد المحاربه غزه طرفه رجعتده نه یاباجغنی و نه طرفه کیده جکنی شایروب وادیء فلا کتده سرکردان اوله رق دوشه قالقه محمل شریف ایله قدس شریفه واروب حال بوکه شهره دخولنده اهالی لغت اولسون سزه ظالململکت اسلامی فرانسزلره ویردیکنز و شمدی بزم دیار مزیده خراب ایتک ایچونمی بورالره کلدیکنز دیو علناً سب ایلدکارندن صالح بك بر مرتبه دها دغون اوله رق فرط ذل و احتقار ایله برخانه به اینمش و کدرندن نامزاج اوله رق چوق کچمکسزین قهرندن فوت اولمشدر . ابراهیم بك ایله معینده کی کوله نلر چوللرده بك چوق سفالت و مشقتلر چکه رك شام طپراغنه داخل اولدقلرنده آنلر دخی اهالیدن بودرلو غلیظ سوزلر ایشیده رك جرعه نوش زهر ا کدار اوله کلمشدر در کله لم فرانسزلرك احوالنه .

برمنوال سابق پوناپارته بکر پاشا ایله ابراهیم بکی خطه مصریه دن طردایتد کدنصرکه صعیده بولسان مراد بکه مأمور مخصوص کوندروب فرانسه جمهورینه بیعت و تبعیت ایله کسب رفاه و راحت ایتک اوزره اکا صعید حکومتی وعد ایلمش ایسه ده کیدن مأمور بو خصوصی مراد بکه لدی الافاده سن پوناپارته به سویله اکا اون بیک کیسه خر جراه ویره لم عسکرینی آلوب اسکندریه به کیتسون هم کیندو عسکرینی تلف اولمقدن و همده بزى جلا دلقدن تخلیص ایله راحت مزه ترك ایتسون دیو جواب ویرمکله اول مأمور دخی مصره کلوب وقوع حالی تبلیغ ایدیجک پوناپارته غضبه کله رك بر فرقه عسکریه ایله جنرال دیزه بی مراد بك اوزرینه مأمور وارسال ایلمشدر .

بو اثناده ایسه انکلیز امیرالی مشهور نلسون کلوب ابو خور ساحلنده فرانسه دونماسنی احراق ایلمشیدی .

شویله که : فرانسزلر اسکندریه بی استیلا ایتدکارنده چند قطعه فرقین و سفان صغیره حریه ایله سفان نقلیه لیرینی لیمانه ادخال ایدوب باقی بیوک جنک کیملری اسکندریه جوارنده واقع ابو خور پیشکاهنده لنگر انداز اولمشلر ایدیکه بونلر یکر می اوچ قطعه اولوب بری یوز سکسان پاره طوب چکر نصف دنیا دیو معروف اولان (اوریان) نام اوچ انبارلی بر سفینه عظیمه اولوب امیرال کیمسی ایدی بونده فرانسزلرك ایتالیدان اخذ و نهب ایلمش اولدقلری بك چوق تحف و تفاریق وار ایدی امیرال نلسون تموز فر نیکینک یکر می برنجی کونی فرانسه نك اشبو بیوک دونماسی او کندن کچوب ودر حال دومنی اماله ایدرك قره ایله فرانسه دونماسی آره سنه کیروب قیچ طرفدن تیور بر اقدینی کبی انکلیزلرك بویه خلاف مأمول واقع اولان حرکت مهارتکارانه سی

وهله اولاده فرانسزلره شاشقنلق ویرمکله اوچ ساعت محاربه دنصکره فرانسه نك اون قطعه بیوک کمیسی عرض تسلیمیت ایلمشدرکه ختام محاربه ده طقوزی انکلیزلر یدنده قالمشدر وسالف الذکر اوریان نام امیرال کمیسی محترق و فتراتی تلف اولمشدر وفرانسزلرک یتمش درت طوبولو دیگر بر سفینه سی قره به دوشد کدنصکره احراق و دیگر اوچ قطعه کمیلری انکلیزلر طرفدن اخذ وضبط اولندقدن صکره تخریب ایدلمشدر وفرانسزلرک یالکز بری سکسان و دیگری یتمش درت طوبولو ایکی قالیونی و قرقر طوبولو ایکی فرقتین و اون درت طوبولو ایکی قوروت و ایکی بومبه کمیلری قاجوب قور تلمشدر .

امیرال نلسون مذکور اقطار نامه لردن التیسنی لاجل تعمیر جبلتره یه تسیار واوچنی زیاده زده لشمش اولدقلری جهته احراق بالنار ایتد کدنصکره اسکندریه بی ابوقه اتمک اوزره اوچ قطعه قالیون و درت قطعه فرقتین ایله (هود) نام امیرالی براغوب کنیدیسی هم کمیلرینی تعمیر ایلمک و همده طولوندن چیقه جفی استماع اولسان دیگر فرانسز دونمسانی قارشولامق ایچون سیچلیایه عزیمت ایتمشدر .

اسپانیا دولتی انکلتره علیه اوله رق فرانسه جمهوری ایله متفق اولدینی کبی پورتکیز دولتی دخی بالعکس فرانسه علیه انکلتره دولتیله متفق اولدیغندن بوکره پورتکیز دونمسانی امیرال نلسون معیتده بولتمق اوزره اسکندریه سواحلنه کنش ایسه ده ابوخور جنکنه یتشه میوب نلسون دخی سیچلیایه کیمش اولدیغندن پورتکیز دونمسانی نلسون ایله ملاقات ایچون همان دونوب اولطرفه کیمشدر .

اشبو ابوخور وقعه سی اوزرینه فرانسزلر وهم وهراسه تابع اوله رق اسکندریه لیماننده بولسان ریاله هایون ایله دولت علیه سفائن تجاریه سننده موجود اولان جبخانه بی ایستیوب آلمشدر . فقط ریاله ادریس بک احتیاطاً جبخانه سنده بره مقدار باروت صاقلامش ایدی و ریاله هایونده منصوب اولان دولت علیه سنجاغنگ یرینه فرانسه باندره سی چکلمک خصوصی فرانسزلر کراراً تکلیف ایتمشر ایسه ادریس قپودان مخالفده ثبات ایدوب فرانسزلر دخی ارتق اصراردن واز کچمشلر وبوندن صکره اسکندریه ده بولسان اوتوز ایکی قطعه دولت علیه تجار کمیلرینک سیلارینی تخلیه ایله اورادن عودت وحر کتیرینه رخست ویرمشلردر .

فرانسه دونمسانی اولوجهله دوچار انکسار اولسی و سواحلی انکلیزلرک ابوقه ایلمیسی اوزرینه بوناپارته نك ارتق فرانسه دن امید امدادی منقطع اولوب برار دوا یسه آره صره عسا کر جدیده ایله تازه لئمدکجه پایدار اوله میه جفی درکار اولدیغندن بومصر سفیرنک نتیجه سی فبالغه منجر اوله جفی درپیش مطالعه ایدرک متحیر و مضطرب

و نصرانیتی انکار و غیرت اسلامیہ بی اظہار ایہ اهل اسلامی ایجہ اغفالہ ابتدار
ایده کلمش ایسه ده ینه جانب اسلامیاندن امنیتی منسلب اولدیغنه و کندوسنجہ بعض
حیل و دسائس ایله براز وقت قزانوبده برارالق عرض و ناموسیله مصردن یقہ بی
صیرمغه چالشمقدن غیری چاره اولدیغنه مبنی اشبو ابو خور و قعه سندن صکره
بر مرتبه دها اهل اسلامی جلب و تألیف قیدینه دو شمش ایدی .

بو ائساده ایسه و فاء نیل موسمی حلول ایلمش ایدو کندن سابقلده اوله کلدیکی
وجه اوزره بوناپارته اسواق و محلات مصری تزین ایتدییره رك ناس بانچه لره
و مقیاس نیل کنارینه چیقوب اودخی قاضی بلده و والی پاشا کتخداسی و سائر
اعیان و اشراف ایله برلکده آتاره را کباً طوب شنلکی ایدرک مقیاس نیله وارمش
ایدی و ابو خورده دو نمانسک احتراقندن طولانی قلبنده مشتعل اولان آتش انفعالی
کتم و اخفایه چالیشوردی ابو خور و قعه سی ایسه مصرده ایشیدیلهرک افواه ناسده
دائر ایدی حالبوکه بو مثللو حوادثک انتشاری بوناپارته نک پولتیقه سنه پک مضر
کورندیکندن بونی سویلیان کیمسه لری حبس و تصدیق ایدرک بو حوادثک تفوهنی
شدیداً یساغ ایتمشدر .

و مولدنبوی حائلنده اهل اسلامی تطیب ایچون بوناپارته دأب دیرین اوزره منقبه
ولادت نبویه قرآنی امر ایدوب مصارفی ایچون شیخ بگریه او چیوز ریال و یرمش
و مولد محلی قنادیل ایله تزین اولنوب بالذات بوناپارته و سائر رؤسای فرانسه
آلای ایله اورایه کیتمش و طویلر آتیلهرق منقبه ولادت نبویه او قوتمش و اول
مجلسده شیخ بگریه کورک الباس ایله نقابت اشراف منصبی توجیه و بعده جمیع
ساداته تبریکنامه لر تحریر ایتمشدر .

و ربیع الاولک بکر میسنده والی پاشا کتخداسی مصطفی بک امیرالحاج نصب اولنهرق
محکمه یه کلوب اوراده مشایخ دیوان حضورنده خلعت کیدیرلمش و بوناپارته طرفندن
مهمات حاجک ترتینه اهتمام ایله محمل جدید یابدیرلمشدر .

و ینه بو ائساده بوناپارته مشایخی دعوت ایله سراینده لدی الاجتماع اوچ رنگلی یعنی
بیاض و قرمز و لاجورد یوللو قوردونلر چیقاروب برنی شیخ شرقاویسک
اموزینه وضع ایدیلجک شیخک لونی متغیر اولهرق قوردونی یره آتوب اعتذار ایتسی
اوزرینه ترجمان یا مشایخ سزه سرعسکرک محبتی اولدیغندن احتراماً بونلری تعلیق
ایتمک ایستیورکه قدریکز مزداد اولهرق بین الناس متمیز اوله سکنز دیمکله اکاجواباً
مشایخ دخی اوت لکن بونکله بزم عندالله و عندالمسلمین قدرمز ضایع اولور
دیدکلرنده بوناپارته نک خلیججه جانی صیقلمشدر . و بونک اوزرینه باری کو کسارینه

قو قارده طاقسونلر دیو امر ایلد کده مشایخ بر قاج کون بینلرنده مشورت ایتک اوزره رخصت آوب کیتمشلر بعده هر کس قو قارده طاقسون دیو دلالر ندا ایتدی رملکله نه ضرری وار در دیو طاقانلر اولمش ایسه ده اکثر اهالی ابا واستکراه ایلدکری جهته صکره دن منع اولنهرق اعیان و اشرافه تخصیص قانوب آنلر دخی پوناپارته نک یانه کیدرکن طاقارلر و چقدقلرنده ینه آتارلر ایدی بعده چوق سورمیوب بتون بتون ترک ایلمشدر .

بوناپارته نک غرضی بر منوال سابق اهالیء اسلامی تألیف واستالت ایله بر از وقت دها الدادوب آو وتمقدن عبارت اولدینی حالده مملکتک افکار وعاداتی بیلمدیکندن بو بؤخده تمهید ایلدیکی مقدمات هپ عکس قضیهی منتج اوله یوردی ایشته مشایخه قوردون طاقق دخی بو قیلدن اولمشدر .

و برده فرانسزلر اهل اسلام قاری وقیزلرندن بعضیلرینی یوزلری آچیق اولهرق یوللرده کزدریر اولدیلر بو ایسه ملت اسلامیه نک جاننه طوقونمغله برابر ایدی . کذلک اسواقی توسیع ایچون شونک بونک دکاتی هدم ایتدکلرندن بشقه اوزبیکه برکسنده عربیه بولی آچق ایچون بعض جوامع ومساجد هدم اولنوب بودخی اهل اسلامه پک کران کشیدی .

و کیجه لری هر کس خانه سی اوکنده قنیل یاقق ایچون اجبار اولنوب بو خصوصده جزئی قصور ایدنلر حقنده آغر جزالر ترتیب اولنوردی .

بومثللو ترتیبات بلدیله اوروپاچه مستحسن اولوب هر نرده اولسه بالتدریج اجراسی اصلاحاتدن معدودایسه ده مصر اهالیسی بویه مألوف اولدقلمی موادک دفعهً اجراسنه تشبث اولنمندن طولانی علی العموم بیزار اولهرق فرانسزلرک معاملاتندن نفرت ایتشلر ایدی .

وفرانسزلرک اردوسی مصرده محصور حکمنده بولنمسیله دوچار مضایقه اولدقلمندن آغر ویرکو ورسومات طرح ایدوب بو ایسه عامهً اهالیء مصریه بیه موجب مضایقه اولهرق بوندن طولانی جمله سی شکایت وفریاد ایتمکده ایدی .

ایشته فرانسزلر بودرلو عرف وعادته مخالف معاملات ایله ابتدا اهل اسلامی وبعده برر صورته نصارایی کندولرندن متنفر ودلگیر ایلمشدر .

و چونکه پوناپارته اسکندریه یی ضبط ایتدکده کافی السابق امر اداره بیه باقق اوزره سید محمد کریمی مأمور ایدوب اودخی ذاتاً مراد بکک آدمی اولدیغندن بو ائساده بعض مخابرات خفیه ضمنده مراد بکه کوندرمش اولدینی تحریراتی فرانسزلرک الله کچمکله خلال ربیع الاولده مصره جلب ایله اعدام اولنمشدر سید محمد ایسه اشرف

ومتحیزانند بزات اولدینی جهتله اعدامندن طولایی اهل اسلامک فرانسزلر
حقنده اولان عدوات قلبیهلری تزیاید ایلمشدر.

و شمسک برج میزانه نقلی حبسیله موسم اعتدال حریفی حلول ایدوب بوایسه
فرانسه جمهوریتنک یوم تشکیکنه مصادف اولمسیله فرانسزلرجه اک بیوک بریورطی
کونی اعتبار اولندیغنه بناء بورسک اجراسی ایچون درون مصرده واقع اوزبیکه
میداننه بریوک و مزین عمود دیکلوب اوزرینه بالاده بیان اولدینی اوزره اعدام
اولمش اولان فرانسه قرالیله قرالیجه سنک صورتلری ترسیم و عموددن یره قدر
اوج رنکلو لوحه لر وضع ایله بونلرک اوزرینه دخی مصره کلکلر نده کوله منلرایله
ایتدکلری محاربه لرو بو محاربه لرده شهید اولان ایوب بک ایله دیکر کوله منلرک رسملری
تصویر ایدیلوب فرانسز بوکا شجره حریت در دیرلر و مصر لولر ایسه بودیرک
فرانسزلرک بزه صوقدینی قازیقدرکه مملکتیزک استیلاسنه علامتدر دیرلرایمش.

الحاصل اهل اسلامک جلب و تألیفی بوناپارته نک ملتزمی اولدینی حالده مصرده
احداث ایلدیکی بدعتلر موجب نفرت عمومیه اولمشیدی فقط مصره کله لیدنبرو
ساطان سلیمک اراده سیله کلام دیو اشاعه ایتکده اولدیغندن و طرف دولت علیه دن
مأمور اعظم زاده عبدالله پاشا شامدن مصره کله جک دیواکا قوناق تهیسه و تفریش
ایتمک کبی دیسه لر ایله خلقی اغفال ایده کلدیکندن آنلر دخی آلدانه رق فرانسزلرک
مصرده تقریر و ابقاسنه دائر طرف دولت علیه دن اوامر سنیه و رودینه منتظر
اولمشلر ایدی بووجهله فرانسزلر مصر لولری اوج آی قدر اغفال ایتمشلر ایسه ده
دیدکلری و قتلر کلوب کچرک طرف دولت علیه دن کمنه کلدیکندن بشقه عکسنه
خبرلر آلدیغندن عامه اهالیکنک افکاری فرانسزلر حقنده متغیر اوله رق هر طرفه
اختلاله قیام استعدادلری پیدا اولمشدر.

وخلال ربیع الاولده بوناپارته طرفدن مأمور مخصوص ایله جزار پاشایه ارسال
اولنان مکتوبده مدت مدیده دنبرو فرانسه لونک دولت علیه ایله اتفاق اوزره اولدینی
معلومدر فقط انکلیزلر بزم هنده کی یرلرمزی استیلا ایلدیکندن و بینمزده عدوات
مستقر اولدیغندن اقطار مصریه به کلککه مجبور اولدق بوده دولت علیه نک اذن
واراده سیله در بوندن مقصد اولا دولت علیه به عاصی اولان کوله منلری استیصال
ثانیا مملکتک اسباب اصلاحیه سنی استکمال ایتدکدن صکره انکلیزلردن ممالکمز
استخلاص ایچون هنده کیتمکدر ایشته سلطانه عاصی اولان کوله منلرک ایشنه ابتدار
ایتدک و کلیشمز دکل الا اهل اسلامی حمایه و شعائر دینی اعلا ضمننده اولوب محمل
حج شریفی مقام منیفه تسیر و سکه و خطبه یی ساطان سلیم حضر تلرینک نامه
ابقا یلرز بزدن امین و مطمئن اوله سز و ابواب تجارقی کشاد ایلیه سز دیو محرر

اولوب جزار پاشا ایسه فرانسزلك مدافعه سه مأمور اولدیغندن و ذاتاً فرانسز لرله آره سنده برودت و عداوت اولوب حتی ایاتی داخنده کی فرانسه قونسلسلرینی طرد ایلمش ایدو کندن پوناپارته طرفندن کیدن نامه رسی یانسه چیقار میوب هان طرد و اعاده ایلدیکی پوناپارته نك معلومی اولیجق زیاده غضبناك اوله رق هان اولوقت جزارلك اوزرینه حرکت ایتمکی تصمیم ایتمشدر .

جزار پاشا ایسه طرف بطرف بلاد مصر یه یه خبر لر ایصال ایله فرانسز لر علیه نه حرکت و قیام ایتمک اوزره اهالی بی تشویقه باشلامشیدی شام طرفه کچن ابراهیم بک ایله سائر امرای مصر یه دخی بووادیده اهالی و عربانی تحریک ایچون هر طرفه کاغذ کوندر یلر ایدی حتی ابراهیم بک طرفندن اوائل ربیع الآخر ده مشایخ مصره خطابا وارد اولان مکتوبده ای مشایخ رعیه کزی محافظه ایله مطمئن اولککز که پادشاه اسلام افندیمز حضر تلی کیتلو عسکر تهیه و تنظیم بیوروب ان شاء الله تعالی قریباً طرفکره کلور ز دیو محرر بولنمشدر .

بو مکتوبک مضمونتی تکذیب ایله بر مدت ده اهالی مصری اغفال ایچون پوناپارته بر نسخه سی دولت علیه یه و بر نسخه سی شریف مکیه کوندر ملک اوزره مشایخ آغزندن بر عریضه قلمه آلوب طبع و تمثیل ایله نسح عدیده سی زقاق باشلرینه یاپشدر یلمشدر بو عریضه ده فرانسز لک مصره ورودیله کوله منلردن بشقه سه نصل امان و یردک لردن بجنه سلطان عثمانی یه دوست و دشمنلرینه اک زیاده دشمن اولوب سکه و خطبه دخی نام پادشاهی یه در و شعائر اسلام کاکان اقامه اولنقمده در و فرانسز لر مسلم اولوب قرآنه و نبی ذیشانه احترام و حجاجه اکرام ایدیورلر و موسم و فاء نیلده اهل اسلامک سرورینی استجلاب ایده جک و جهله شهر آیین یاپدیلر و مولد نبوی یه احترام ایستدیلر و آنلرله رأیمز متفق اوله رق مصر و ایسی بکر پاشا کتخدا سی مصطفی بک امیرالحاج نصب اولندی و حالاً حرمینک مهماتی اکاله سعی ایتمکده در لر و السلام دیو تحریر اولنمشدر .

لکن جزار پاشا ایله ابراهیم بکک اولوجهله واقع اولان مساعیسنک خارج و داخل مصرده عظیم تأثیراتی اولوب قبلیه و بحر یه و غریبه و شرقیه اقلیملرنده اهالی فرانسز لر اوزرینه قیام ایله محل محل مقاتله لر و وقوعه کاهه رک طرفیندن تلفات کثیره و وقوعه بولمشدر علی الخصوص منصوره قصبه سنده مستحفظ بولنان فرانسز عساکری اوزرینه اهالی هجوم ایله جمله سنی اعدام ایتمشدر دمیاط جوارنده دخی خیل محاربه لر و وقوعه کلمشدر و صعید ایچنده مراد بک ایله واقع اولان محاربه لرده دخی کیتلو فرانسز عساکری تلف اولمشدر و بو ائنده متفرقه ابراهیم آغا پوناپارته طرفندن سویش قبتانی نصب

اوله‌رق بر مقدار فرانسز عسکر یله ارسال اولدوقده یولده عربان چیقوب ابراهیم اغانی وسائرینی قتل ایله ایچلرندن پک آزی قورتلمشدر مصرده دخی اختلال استعدادی خلیجه قوت بولمشیدی .

بناءً علی ذلك یونپارته ضابطهً بلدییه اعتنا و مغار به طائنه سندن ایشسز کوجسز طاقنک اوچ کونه قدر مصردن چیقوب کیتلمری ایچون دلالر ندا ایتدیرمش ایسه ده مغار به کروهی یونپارته نیک سراینه طوبلانوب فریادایدرك نزهه کیده لم بریر کوستریکنز قره یولی مسدود دکزی انکلیزلر محاصره ایش اسکندریه کیتسک آج و صوسز هلاک اولوق مقرر در دیملریله عفو و اغماض اولمشلدر وینه بواننده مصرده دلالر ندا ایتدیریلرک دولت لقر دیسی یساغ ایدلمش و مجروح یاخود بوزغون عسکره تصادف اولدوقده سابقرده اولدینی کبی استهزا ایدلمک منع اولمشدر .

وینه خلال ربیع الاخرده مشایخ و او جاقلو و معتبران تجار و صناید قبطیان دیوان مصره دعوت و احضار ایله مجلس عمومی عقد اوله‌رق قرائت اولنان بیاننامه ده مصرک درکار اولان قابلیت موقعیه و ثروت طبعیه سندن ناشی تصرفه ام سالفه طمع ایدرك اهل بابل و یونانیلر و عرب و ترک اکا مالک اولوب آنجق مصری اک زیاده خراب ایدن ترکلر درکه آنر میوه بولدقلری کبی آغاجی کو کندن قلع ایدرلر . بناءً علی ذلك اهالی مصر النده برشی قالمیوب فقر و فاقه یه دوچار اولمشلدر . بعده فرانسز طاقنه سی ایشلرینی یولنه قویقدنصکره مصرک بو حکومت جاهلانه و متغلبانه دن تخلیص و اراحه سنه مشتاق اوله‌رق بورایه کلدیلر و مظفر اولدیلر مع هذا کمنه یه تعرض و زور ایله معامله ایتدیلر غرضلری ایسه مصرک امورینی تنظیم و اهالیسنک خاطرینی استجلاب ایله ابقای نام ایتمکن عبارتدر اهالی مصره لازم اولان دخی سوء ظنی ترک ایله خلوص و مودت مسلکنی اتخاذا ایتمکنر کبی واهی سوزلر مندرج ایدی بوبیاننامه او قوندنصکره شیخ شرقاوی شیخ البلد و رئیس ملت نصب اوله‌رق مجلسه ختام ویرلشدر . مصر لولرک فرانسزلر حقمنده اولان عداوت قلبیه لری ایسه بودرلو اغفالات ایله زائل اوله‌رق درجه یی کچمش ایدی .

یونپارته دخی اهل اسلامک بو وجهله تغیر افکارینی تظنن ایدرك تدابیر احتیاطیه یه تشبث ایدوب محله باشلرنده کی بیوک دروازه لری هدم ایله زققلری آچمه باشلادقن بشقه رئیس المهندسین اولان جنرال کفارلی که بر ایانغی مقطوع اولوب یرینه آغاچدن ایاق استعمال ایتدیکی جهته مصرده ابو الخشبه دیو تلقیب اولنمش ایدی . علوم هندسیه و فنون حربیه ده ید طولی صاحبی بر ذات ایدی آنی استصحاب ایله شهرک اطرافنی طولاشه رق استحکام نقطه لری تعیین ایدوب بواسه اهل اسلامه زیاده

تلاش و اندیشه و یرمشردر . و جمادی الاولینک اوائلده اهالی مصر اوزرینه برآغر
ویرکو طرح و توزیع اولنوب بودخی طرف طرف قیل و قال تکوننه بادی وقوه
قریبه ککش اولان اختلاک ظهورینه سبب عادی اولمشردر .

شویله که : ماه مرقومک اوننجی کونی بعض ذوات جامع ازهرده اجتماع واستشاره
ایله همان فرانسز لر اوزرینه قیام و حرکت قرار و یریلهرک هر طرفده بوکون
غزرا کونیدر اعدادن اخذنار ایدلم و مغلوبیت عارینی اوزرمزدن آنهلم دیو ندا
ایله اهالی بی جنکه تشویق ایتملری اوزرینه محل بمحل اهالی قیام و حرکت باشلامشدر .
مصر قائمقامی دبوی نام جنرال بونی مجرد ویرکو طرحندن نشأت ایتمش بر کیفیت
ظن ایدرک همان یدی سکز نفر ایله جمعیتک تسکینه شتاب ایدوب بو حرکت ایسه
بالاده مذکور علل و اسباب کثیره دن نشأت ایتمش نفرت و عداوتک نتیجه سی
اولان بر باشلو اختلال اولدیغندن جنرال دبوی باقر جیلر چارشوسندن کچرا یکن
اولاد ترکدن بری باشنه بر جوب اورمغله بیهوش اولهرق آتدن اشاغی دوشمش
و چوق کچمیوب فوت اولمشردر . و بتون اهالی سلاحنوب مغاربه طائفه سی دخی
آنلره التحاق ایله راست کلذکلی فرانسز لری قتل و اعدامه باشلامشدر . فرانسه
عساکرندن برخیلیسی متفرق اولوب ولیمان بیلمدکلی جهته ایشک حقیقتنی
اکلایه میوب پک چونغی بولندقلری محالرده اتلاف اولمشلدر . پوناپارته جیزده
بولنوب کیفیتن خبردار اولدینی کبی مصره کله رک طرف طرف فرقلر ترتیله
اختلالی باصدرمغه سی ایتمش ایسه ده اهالی زقاق باشلرنده استحکاملر یاپوب مدافعه
و مقاتله ده اصرار ایدرک اوچ کون بو وجهله محاربه تمتد اولمش و فرانسز لر
عظیم تلاش و یرمش ایدی . فقط پوناپارته عسکرینی طو پلایوب و شهری احاطه
ایله طویلرینی زقاق باشلرینه یرلشدیروب قلعه دن دخی کله و خنبره دانه لری یاغدرمغه
نیجه اینیه جسمه ییقلمغه و زقاق باشلری آچلمغه باشلایوب بو جهته اهالی به ضعف
کله رک فرانسز لر اهل اسلامک متریسارینی ضبط ایتدکن بشقه جامع ازهره کیروب
بولدقلرینی یغما و غارت ایتمشدر . و اهالینک اوزرنده بللوا باشلوب رضابط اولدیغندن
متفرق اولملریله باشه چیقارایش اولدیغی اکلاشلدقه بعض مشایخ طرفدن اولنان
توسط و شفاعت اوزرینه پوناپارته طرفدن دخی عفو عمومی اعلان اولهرق غوغا
باصلمش و فقط اوک آیاق اولنلر طوتیلوب اعدام ایدلمشدر .

و مصر اهالیسی اختلاله حاضر اولدقلرنده صید شیخی شیخ شواری به مکتوب
کوندروب استمداد ایلمش اولدقلرندن اودخی عمر بانی جمع ایله یوم معینده مصره
ککش ایسه ده آنک ورودی بر وجه مشروح فرانسز لرک شهری احاطه ایله طوپ

و خبره آتمغه باشلادقلری وقته تصادف ایدوب عربان گروهی ایسه اسلحه ناریه یه طیانه مدقلرندن همان کلدکلی کبی رجعت ایتشلر ایدی بوندن طولانی پوناپارته شیخ شواری بی طوتدیروب مصره جلبله اعدام ویرینه برادرینی صعید شیخی نصب و تعیین ایلمشدر و نیت سابقه سی اوزره مصرک درت طرفنده عظیم استحکاملر یایدردقندن بشقه قلعه ده دخی مجدداً برجلر انشا ایله ایچلرینه بیوک طوپلر وضع ایلمشدر .

معلم نیقولاً بووقعه ده فرانسر عسکرندن ایکی بیگ واهالیدن بش بیگ قدر آدم تلف اولدی دیو تحریر ایتمشدر . و بوندن صکره مغاربه طائفه سنک توانالری سیچلوب فرانسه خدمت عسکریه سنه آلهرق پوناپارته بو صورتله اکمال نقصان قیدینه دوشمش ایسه ده بووقعه فرانسه اردوسنه خیایچه شاشقناق ویرمش و کرکی کبی پریشانلق کتورمشدر .

حتی مؤخر آکرید صولرنده طوتیلان برفرانسر سفینه سنده مصر ده کی فرانسرلردن بعضیلرینک فرانسه ده کی اقربا و احبسانه یازمش اولدقلری کاغذلر اله کچمکله ترجمه ایتدیرلرلکه انکلیرلر اسکندریه یی آبلوقه ایتدی فرانسه ایله مخابره منقطع اولدی جمله من رجعت ایچون فرسته مترقبز لکن درکار اولان موانع حسیله نامیسدز بو طرفه التمش بیگ عسکرله کلدک شمدی انجق اوتوز بیگ قالدی پوناپارته هندی ضبط ایدیم دیر ایکن بتون عسکرینی تلف ایده جکدر .

و بوندن صکره دخی پوناپارته مشایخ مصر آغزندن اولهرق اعلاننامه لر نشر ایدوب اهالی یه اطاعتدن خروج ایتاملری ایچون تنیهاات لازمه اجرا و جزار پاشا ایله ابراهیم و مراد بکلرک طرف دولت علیه دن اولوق اوزره نشر ایتدکاری سوزلر هپ یلاندر فرانسرلر پادشاه اسلام حضرتلرینک دوسته دوست و دشمنه دشمندر دیوینه اهالی بی اغفاله سعی اوفی ایتمش ایسه ده بووقعه دن صکره اهل اسلام ایله فرانسرلر آره سنده پک زیاده مباینات و عداوت پیدا اولهرق طرفینک یکدیگره اصلا امنیتی قالمشدر .

و دولت علیه فرانسه لویه اعلان حرب ایدرک هر طرفده و علی الخصوص شام و برالشام طرفنده تدارکات جسیمه یه تشبث ایدوب جزار پاشا ایله ابراهیم بک دخی بو طرفلره دولت عسکرلی کلکه باشلادی قریباً مصره کاه جکزر دیو بلاد مصریه یه ایصال پیام ایتمکده اولدقلرندن مصر لولر اسارتدن خلاص ایچون شام طرفندن عسکر و رودینه درت کوز ایله منتظر ایدیلر .

* دولت علیه نك مصر حقنده اولان تداییر و تشبثاتی *

فرانسز لرك بروجه مشروح مصری استیلا ایتلمری اوزرینه باب عالیده و شیخ الاسلام قوناغنده بر قاچ دفعه عقد مجلس مشورت اولنوب اولامصر سرعسكر لکی صیدا و ایسی جزار احمد پاشا عهدہ سنده تقرر ایلمش ایسه ده جبل لبنان خلقنه چندان امنیت اولنه میسه جنی جهته آنک اولحوالییدن انفکاک کی جائز اولماز دیو مصر سرعسكر لکی شام و ایسی و امیر الحاجی ابراهیم پاشا عهدہ سنه صرف و تحویل ایله جزار پاشایه دخی سواحل سرعسكر لکی توجیه بیورلمش و بالجمله سواحل و جزائر مأمور لرینه احتیاط کارانه حرکت ایلملری ضمنده اوامر علیه کوندرلمش و عظم زاده عبدالله پاشا دخی امرای مصریه ایله بالاتفاق مصرک تخلیصنه سعی ایتمک اوزره عهدہ سنه مصر ایالتی توجیه ایلمش اولدیفنی نوری بک تاریخنده محرر در .

عاصم افندی تاریخنده دخی جزارک اول انشاده وارد اولان تخریر اتنده جانب میریدن باتمسک بر مقدار آنچه اقراض و اعانه اولنه رق عهدہ سنه سرعسكر لکله مصر و ایلیکی توجیه بیوریلور ایسه بعونه تعالی مصرک تخلیصندن صکره قرض مذکور ی تأدییه ایله تمسکنی استخلاص ایتمک تعهدی مندرج اولمغله کیفیت مجلس مشورته در میان اولندوقده اصحاب شوری طرفندن جزارک بو ایشه اهلیتی اقرار و تصدیق اولندیفنی صره ده فخل قطار کبار عصر اولان والده کتخداسی یوسف اغا جزارک فی الواقع بوایشک عهدہ سنندن کسی اغلب ملحوظدر لکن صکره کندو سنی مصر دن کیملر چیقاره حق دیمسی اوزرینه کمسنه طرفندن مداخله ایدیله میهرک جزارک سرعسكر لکندن صرف نظر اولنوب روسیه وانکلتره دولتلیله مؤیداً عقد رسته اتفاق و مملکت اسلامیه ده دشمن براینک اقا نیم ثلثه کی تشائی خصوصه تشمیر شاق وفاق ایلدیلمر دیو اعتراض ایتدکدن بشقه طائفه کفار دن استمداد و استعانت جواز داده شریعت اولدیفنی دخی علاوه کلام ایلمشدر .

حالبوکه جزارک قوتی کندو یوردنده اولوب یوخسه بر منتظم فرانسز اردوسیه میدان محاربه سی ایتمکه مقتدر دکل و علی الخصوص اسکندریه پیشگاهنده بر مکمل فرانسه دونتماسی موجود اولدیفنی خالد فرانسز لری مصر الکاسندن چیقارمق مشکل ایدی بناء علیه اول وقت دولت عایه انکلتره دولتیله عقد اتفاقه مجبور اولدقدن بشقه فرانسه اختلالی اوزرینه اوروپا الت اوست اوله رق عالم بر بشقه عالم اولغه یوز طوتوب بویه بر قارغشلاق و قنده ایسه دولت علیه نك پولتیقه سنه او یغون اولان دیگر دولتله اتفاقی تحت مجبوریتده ایدی لکن عاصم افندی عصرک احوال

پولتیقه سنه واقف اولدیغندن ومنتظم اردو ندر وزمانه ده محاربه نه درلو اسبابه موقوفدر بورالینی بیلمدیکندن یالکز جزارك سرعسكر لکیله ایش بتر زعمنده بولنشدر . قالدیکه زیرده بیان اولنه جنی وجهله مصرک استخلاصی ایچون وقوعه کلان تکلفات عظیمه دخی بومسئلهنی صورت واضحده اثبات ایلمشدر . وملت اسلامیه ده دول نصاری ایله بالدفعات اتفاق معاهده لری یابلمش و بونلر هب علمای اعلام حضراتنک تجویز وافتالری ایله وقوعه کلشدر اماعاصم افندی علوم عربیه ده معلومات کافیه اصحابندن برذات جلیل القدر اولدینی حالده علم فقهده بی بهره اولدیغندن بو مثللو احکام شرعیه ده کلامی شایان وثوق و اعتبار دکلدر .

بروجه مشروح پوناپارته نک مصری استیلا ایلمسی اوزرینه دولت علیه نک همان فرانسه جمهورینه اعلان حرب ایتمسی لازم کیش ایسه ده اسباب سفریه سی ناقص اولدیغندن بر طرفدن اکل تدارکاته و بر طرفدن دخی بعض دول اوروپا ایله عقد اتفاق ایچون مذاکراته ابتدار ایتکله اعلان حربک بر از تأخیرنی مناسب کورمشیدی . لکن مصرک استیلاسی حوادثی ممالک اسلامیه ده شایع اولدینی کبی علی العموم اهل اسلامک افکارینه هیجان کله رک هر کس فرانسرله دیش بیله مکه باشادیلر فرانسه مصلحتکنذاری ایسه کافی السابق سفارتخانه سنده سربست اوطورور و فرانسه تجاری سربستانه کزوب طوزار اولدیغندن بین الناس سوز چوغالدی وانکلتره دولتیله عقد اولنه حق معاهده اتفاقه اساس اولمق اوزره رئیس افندی ایله انگلیز سفارتی بیننده بعض مواد قلمه آنه رق انکلتره کوندرملک اوزره اولدینی حالده هنوز دولت علیه نک فرانسه لو حقنده نه معامله ده بولنه جنی اعلان اولمدیغندن انکلتره سفارتی طرفدن بوبابده دولت علیه نک نیتی نه ایسه صراحتاً بیان اولنمسی خصوصی مصرانه استعلام اولنمغه باشلامشیدی . و برده مقدا فرانسرلر طولون ترسانه سنده دونما ترتیبیه مشغول اولدقلری وقت کویا که بودونما درسعاده کله رک دولت علیه دونماسیله برلکده قره دکزه چیقوب قریمی استخلاص ایتدکن صکره لهستانی ایاقلاندرمق اوزره بالاتفاق اول طرفه سوق عسکر اولنه حق ایمش یوللو سوزلر اشاعه ایلمش اولدقلری کبی بوکره اسکندریه یه واردقلرنده دخی اهالی مصره کویا دولت علیه نک امریله کیش اولدقلرینی اعلان ایدوب اوروپاده دخی دولت علیه فرانسه لویه هند یولنی آچیش و پوناپارته نک مصره کیدیشی دولت علیه نک امریله ایمش دیو نثر اراجیف ایلمش اولدقلرندن بواراجیفک تکذیبی دخی دولت علیه کوره لازمه حالدن ایدی .

بناء علیه هیچ اولماز ایسه فرانسه جمهوریه قطع مخبره رسمیه اولنمق لازم کلدیکندن

بوتك حكيمانه و نازكانه افاده سی ضمنده فرانسه مصلحتكذارى روفن جلب ايله
رئیس افندی كندوسنه بومصر مسئلهسندن طولايي ملت اسلاميهده كوريلان اثر
انفعال اوزرينه ايشلر برصورت حسنه كسب ايدنجيهده بعض تدابير ظاهره بيه تشبث
اولمق لازم كلديكي مقدمه سييله كلامه بدا اولنهرق ممالك محروسهده بولنان فرانسه
تجاری دولت عليهك مسافريدر فقط جملهسی بولندقلری يرلرده طوروب كمنسه ايله
اختلاط ايتاملری ايچون طشره لره اوامر عليه يازلديني و كندوسی سفارتخانهسندن
وترجمانی طنطنان كندو خانهسندن چيقمامق و درسعادتده بولنان فرانسه تجاری
دخی اولدقلری محللرده قالمق اوزره جملهٔ اختلاطدن ممنوع اولدقلری بيانيه
سفارتخانه او كنده كي نشانك دخی قالدیرلمسی و شاید برمخاربه لازم كلور ايسه
من غير رسم ترجمان هايون واسطه سييله اجرا اولنمی و ايچابنه كوره ترجمانك
من غير رسم رئیس افنديك خانهسنه كله بيلمسی كندوسنه تبليغ اولندقدده روفن
بزم يقينده ايلچيمز كله جكدر باری اولوقته قدر صبر اولنسه كبی كلمات لاغیه ايله
اغفال قيدنده بولنمش ايسهده بوقرارك اجراسی ايچاب حال و مصلحتدن اولديني
كندوسنه قطعی و فقط ملايمانه اولهرق بيان اولمشدر .

فرانسه مصلحتكذارى صكره دن مخابرات رسميهك موقتا اولسون قطع اولنامسی
ايچون مخابره بيه تشبث ايتدكدن بشقه بوكا فلمنك ايلچيسنی دخی توسط ايلمشدر .
فلمنك جمهورى ايسه بو اوانده فرانسه جمهورينك پنجهٔ تحمك و تغلبنده ایدی .

بناء علی ذلك صفرك يكرمی التتجی كونی كوچك صوده صدورعظامدن عصمت بك
افندی و رئیس الكتتاب عاطف افندی فلمنك ايلچيسيله ملاقات ايتدكدرنده كله جك
فرانسه ايلچيسنك وصولنه قدر فرانسه مصلحتكذاريله مخابرات رسميهك منقطع
اولمامسی خصوصه دائر اوزون اوزادی بيه بحث ايتمش ايسهده اشبو مصر مسئلهسی
ملت اسلاميهك زياده انفعالی موجب اولديغندن اراتق فرانسمزلك ميدانده سر بست
كزملری موافق حال و مصلحت اوله ميه جنی و فقط دولت عليه ممالك محروسهده
بولنان فرانسه تبعهسی حایهٔ مخصوصهسی آلتنه آلمش اولديني بيانيه شمديكي حالدده
مخابرات رسميه قابل اوله ميه جنی اكا دخی قطعيا افاده ايدلمشدر .

وايكي كونصكره پروسیا ايلچيسيله ملاقات اولندقدده دولت عليهك فرانسه بيه
اعلان حربی تأخير ايتمی اكمال تداركات ايچون اولديني محرمانه اولهرق كندوسنه
اكلا دلمشدر .

و بحرسفيد بوغازندن دخول و خروج ايدده جك سفائن حقتده بو كره بوقلمه اصولنك
اجراسنه قرار ويريلهرك درسعادتده بولنان دول اوروپا سفرا و مصلحتكذارلرينه

برر قطعه تقریر رسمی یازیلوب تعهدی حاوی جواننامه‌لری دخی آئمشدر تقریر مذکورک صورتی ذیلده (۲۲) رقیبه ایراد اولنور .

وبروقدنبرو وهاایلرک طغیانی حسیله عرض و بیان حال ایتمک اوزره مقدا شریف مکه طرفدن درسعاده مخصوص مأمورلر کوندرلمش و مقدم ومؤخر در دولتدن استمداد ضمننده شریف طرفدن فریادنامه‌لرککش اولمسیله وهاایلرک اوزرینه دولتجه تدارکات کلیه لازم کلوب اوروپا احوالک قاریشقلغی ایسه بونک اجرانسه مانع اولدیغندن حجازک قوه موجوده سیله وهایلره مقاومت ومدافعه‌یه چالیشیلوردی انجق وهاایلرک قوتی کوندن کونه زیاده اولمقده بولدیغندن نتیجه‌سی وخیم اوله‌جفی اکلاشلماغه حقیقت حالی شفاهاً عرض ایتمک اوزره ایکیوز اون ایکی سنه‌سنده شریف مکه طرفدن شیخ احمد ترکی نامنده برذات استانبوله کوندرلمشیدی بوسنه ایسه مکه مکر مهده عظیم باران نزول ایله بیت شریفی سیل باصوب همان حجر اسعده قدر صو چیقمش ومکه مکر مهده خیلی خانهلر ییقلمش اولدیغنی جهتله طرف دولت علیه‌دن مأموراً کوندریلان عبدالله افا نام ذات بوسیلدن خراب اولان یرلری تعمیر ایلدیکی صروده فرانسرلرک خوفیه جده‌ده برج یمانی‌یی دخی بناایتدیرمشیدی مومی‌ایله شیخ احمد ترکی درسعاده کلوب عودتنده مصرده ایکن فرانسرلرک اسکندریه‌یی استیلا ایلدکریخی استخبار ایدیجک بوخبر موخش اثر ایله مکه مکر مه‌یه وارمشدر مؤخرآ پوناپارتته‌نک وهایلری جلب وتالیفه چالشدیغنی حوادثی استماع اولنمغله سوء نیاتنه دائر هر جانبه طرف دولت علیه‌دن تسهینامه‌لر کوندرلدیکی صروده بوندن رئیس وهایبان اولان عبدالعزیزک دخی آگاه ایلمسی خصوصی شریف مکه ایله شیخ‌الحرم حضرت نبوی طرفلرینه اشعار وتوصیه قلنمشدر وهایلر ایسه زیرده بیان اولنه‌جفی وجهله همدذهبلرندن بشقه سنه مشرک نظرله باقدقردن فرانسرلرک مصری استیلالریخی اصلاقید ائیمه‌جکاری درکارایدی نه‌چاره‌که اولوقت وهاایلرک مشوار وافکاری هنوز دولتجه کرکی کبی معلوم اولمامشیدی .

وبوخلالده اوستریا دولتی فرانسه جمهوریه مساله اوزره اولدیغندن دولت علیه فرانسه سفرینی کشاد ایده‌جک اولدیغنی تقدیرده اوستریا طرفدن اشتباه اوزره اولمسیله رسماً استیضاح کیفیت ایلدکده اوستریا دولتی بیطرف طوره جغفی وشاید بیطرفدن چیقه‌جق اولور ایسه دولت علیه‌نک مصلحتنه موافق صورتده بولنه‌جغفی بیان ایله تأمینات ویرمشدر .

وانکلتره دولتیله هنوز اتفاق معاهده‌سی امضا اولنماش ایسه ده انکلز دوئلماسی فرانسه دوئلماسنک پشنه دوشوب آقدکرده طولاشمقده اولدیغنی بو اسناده خبر

آلمش وانكليز كيملى سواحل دولت عليه دن نزهه اوغرار ايسه معاونت لازمه
ايفاسى ايچون سواحل و جزائر مأمورلرينه امر اولدني حالد فرانسه كيملرينك
دولت عليه ليمانلرينه قبول اولتماسى ضمننده هر طرفه اوامر عليه كوندرملك و ممالك
محروسه ده بولنان فرانسه قونسولوس و تاجرلرى اختلاطدن منع ايدملك كجى اعلان
حربك مقدمه سى اولان خصوصاته تشبث اولتمشيدى .

شوحالاته نظراً دولت عليه نك هان فرانسه جمهورينه اعلان حرب ايتك اوزره
بولنديغى اكلاشديغندن و اعلان حربك تاخيري فرانسه پولىتيقه سنه موافق اولديغندن
فرانسه جمهورينك متفقى اولان اسپانيا دولتلك درسعادتده مقيم مصاحتكذارى
رئيس افندى ايله ملاقات طلبنده اولمسيله ربيع الاولك دردنجى كوني بلك
بانچه سنده صدور عظامدن عصمت بك افندى حاضر اولديغى حالدده رئيس افندى
ايله لى الملاقات اسپانيا مصاحتكذارى فرانسه سفينه لرينك دولت عليه ليمانلرينه
قبول اولتماسى وانكليز سفينه لرينه معاونت اولتمسى ايچون طشره لره اوامر عليه
يازلمش بوايسه انكلتره لونك فرانسه لو اوزرينه ترجيخى مشعر اوله رق فرانسه
ايلچيسنك و رودنده تصعيب مصلحتى موجب اولوركجى وادى خير خواهيده بعض
مقالات بيعنى ايراد ايلوب حالبوكه مراسم و عهد مائه و دوله نك خارجنده اوله رق
ممالك دولت عليه نك برقطعه سنه سوء قصد ايدن دونما اوزرينه آنى تعقيب ايدن
دونماتك ترجيخى شوييه طورسون اكا دشمن و بوكا دوست متفق نظر يله باقق
امور طبيعده دن اولمسيله اسپانيا مصاحتكذارينك بودرلو سوزلرينه طرز جدلى
اوزره جوابلر و يربله رك نهايت فرانسه ايلچيسنك و رودينه انتظار ايله اعلان
حربده تعجيل اولتماسنى توصيه ايلدكده رئيس افندى طرفندن دخى دولت عليه
هنوز اعلان حرب تصميمنده اوليوب انحق مصر مسئله سندن ناشى اهل اسلام
بينده واقع اولان انفعال و انواع قيل و قال اوزرينه خلق اقباع و اسكات ايچون
چاره سز بعض تدابير تشبث ايلمش اولديغى بيانيله رد جواب اولمش وهان اسباب
سفر يه نك اتمامه اقدام اولتمقده بولتمشدر .

وروسيه دولتيه اكر چه هنوز معاهده اتفاق عقد اولتماش ايدى لكن قره دكزده كى
روسيه دونماسى دولت عليه دونماسيله بالاتفاق فرانسه لوعليه نه حركت ايتك اوزره
درسعادتده كلسيچون روسيه ايمراطورى طرفندن دونما اميرالنه امر كيمش اولديغندن
بوكونلر روسيه دونماتك استانبوله كلك اوزره اولديغى استخبار اولتمقده قره دكز
سواحلنده كى مأمورين دولت عليه با اوامر عليه بيان حال قلمشيدى .
ايشته بواننده نلسونك بالاده بيان اولديغى اوزره ابوخورده فرانسه دونماتنى

احراق ایلمش اولدنی خبر آندقدہ درحال ربیع الاولک اونبرنجی کونی باب عالیدن انکلیز مصلحتگذارینه تشکر نامه یازیلہرق انکلترہ دولتنہ و امیرال نلسونہ بیان محظوظیت اولنسی التماس قلمشدر متعاقباً اشبو ابوخور وقعه سنک تفصیلاتنہ دائر انکلیز دونماسندن تحریرات کلیجک انکلیز مصلحتگذاری باب عالی یه دعوت ایله کورک کیدرلمش و امیرال نلسونہ مجوہر چلنک ومعیتی نفراتنہ تقسیم اولنق اوزرہ ایکی بیسک آلتون کوندرلمش و درسعادتنہ انکلیز ایلچیلری بش چفته یه سوار اوله کلورکن بوندن بویله دومنی یدی چفته یه سوار اولملری ایچون پایه ویرلمشدر . انکلیزلرک بومظفرتی متفقلرینه قوت وجسات ویرمش وفرانسزلی خیلی تلاشہ دوشورمش ایدی دولت علیہ دخی تدارکاتی کوروب همان فرانسه جمهورینہ اعلان حرب ایتمک اوزرہ حاضر لانتشیدی .

اسکندریه ورشید ودمیاط کبی لازم الاحتیاط اولان محللرده اولجه برمدتجک اولسون مدافعیه کافی اوله جق قدر تدارکات احتیاطیه تشبث ایلمش اولسیدی فرانسزلر مصر طرفندہ بومرتبه فرجه یاب استیلا اوله مزدی .

صدراعظم عزت پاشا ایسه خیلی مدت مصر والیدکی ایتمش اولدیغندن لازم المحافظہ اولان معابر ومواقعنہ نصل استحکام ویرلمک لازم کله جکنہ دائر وقوف تامی اولمق لازم کلوب حالبوکه برقاج آیدنبرو فرانسزلرک جانب مصره سوء قصد ایده جکاری مسموع اولدیغندن بومدت ظرفندہ مصرجه لازم کلان اصول محافظه واحتیاطکاری یه اہتمام ایتمسی لازم کلوردی دیو سلطان سلیم خان حضر تلیری اکا وآنکله ہم افکار اولان شیخ الاسلام اولان دری زاده عارف افندی یه مغبرالخطاط اولمغله ربیع الاولک اون سکزنجی پنجشنبہ کونی علی السحر عزت پاشادن مہرهایون استرداد ایله بالقضانہ ده اقعاد اولندقدن صکرہ رئیس العلماعاشرافندی قیالرده واقع ساحلخانہ سندن جلب ایله شیخ الاسلام نصب اولنوب سر بوابین درکاه عالی عزت احمد پاشا زاده درویش عبد الله بك عہدہ سنندہ رتبہ وزارتہ صدارت عظمی قائم مقامانی توجیہ بیورلمش ومہر صدارت دخی مقدا معدن امانتندہ ومؤخرأ بعض اشقای عشارک تأدیب وتربیہ سی امرندہ حرکات واقعه سی مقبول طبع سلیم پادشاهی اولان ارضروم والیسی ضیا یوسف پاشایه کوندرلمش وعزت پاشا ساقر اطہ سنہ وعارف افندی بروسیہ نفی واجلا ایلمشدر .

برقاج آی صکرہ عارف افندی بیکدہ کی ساحلخانہ سنندہ اقامت ایلمک اوزرہ عفو واطلاق بیورلمشدر .

وچونکہ درویش پاشانک قائم مقامنہ دائر صادر اولان خط هایونندہ فرانسه لو

اوزرينه سفر اعلانی ولوازم جهاديه به ابتدار اولنسی خصوصری مندرج اولديغندن آرتق اعلان حربك تأخيرينه محل قالمش اولدینی جهته همان ربیع الاولك یکر می برنجی کونی فرانسه مصلحتگذاری باب عالی یه احضار اولنه رق پوناپارته نك مصری استیلا ایله نقض عهد ایلمش اولسی طرف دولت علیه دن سفری ایجاب ایلدیکی رئیس افندی طرفدن افاده اولدقدن صکره کندوسیله بالجمله سفارت خدمه سی بر معتاد یدی قاهیه ارسال و توقیف ایله اعلان حرب اولنمش و بوکا دائر قلمه آلنان بیاننامه نك برر صورتی قاعده اوزره دول اوروپا سفارتلرینه ویرلمشدر صورتی زیرده (۲۳) رقمیه ایراد اولنور .

هاشم افدینك مسوداتنده فرانسه مصلحتگذاری نك یدی قاهده حبس اولنسی اوزرينه یدی قاهده دول ایلیچیری حبس اولنه کلمشدر فرانسه ایسه شمعی دولت دکلدردیو بعض سفرا طرفدن تعریض اولدینی مندرجدر .
وبوئانده پوناپارته نك برشام طرفه حرکتی استماع اولنغله لوند چفتلکننده تعلیم اولنان نظام جدید عسکرندن یدی یوز مقداری جزار پاشا معیتنه کوندرلمشدر .

{ ذیل } -

(۱)

* خبره جی قانوننامه سنك خلاصه مواد مندرجه سی *

خبره جی نفراتی فن هندسه و صنایع آتشیازی بی ماهر استادلردن مشق و تعلم ایله لدی الاقتضا سائر طوائف عسکریه دن زیاده عملیات آتشیازی بی اجرا ایلملری ملاحظه سنه منبی زعامت و تیمارلو خبره جیانندن بشقه مجدداً یومیه ایله دخی خبره جی نفراتی تحریر اولنمش ایکن شروط و نظاملرینه رعایت اولنمدینی جهته اکثر خبره جی دیرلکلری شوکا بوکا ماکل اولوب موجود نفرات دخی فلرینی تحصیله هوسکار اولدقلرندن مجدداً نظامه محتاج اولدقلرینه منبی فیما بعد خبره جی باشینك شروط نظامه مخالف حرکتی ظهور ایتمدیکجه عزل اولنماق وبالجمله خبره جی نفراتی آستانه سعادتده ساکن اولوب علی الدوام تعلیم و تعلم ایله مشغول اولمق و توجیهاتلری مجرد استحقاق ایله اوله رق رجا و شفاعت ایله اولماق مواد ثلثه سی اساس اتخاذ اولنهرق بووجهله شروط مؤکده بیاننه شروع اولنورکه متحیزان رجال دولت علیه دن بری خبره جی اوجاغنه ناظر و مستقیم و دیندار و ضبط و ربط و عساکره و شرائط نظامی اجرایه صاحب اقتدار برذاتك خبره جی باشی اولمق اوزره اوجاغنه اگا نصب و تعیینیه وقوعبولان توجیهاتی مشترکا عرض ایله لر و خبره جی باشیلردن

هدیه و جائزه نامیله برشی آلتیوب آنلر دخی ضابطاندن و نقراتدن برشی آلمایه لر
 و خبره جیلر ایچون مستقلاً بر قشلا انشاقلنه واشبو بیک ایکی یوز یدی سنه سی
 روز خضر نده کرک یومیله و کرک تیمارلو بالجمله خبره جی نقراتی استانبولده اثبات
 وجود برله یکان یکان یوقلانوب موجود اولمیانلرک یومیله لر ی خزینه مانده و تیمارلری
 ضبط و موجود بولنانلر قانون و قاعده لر ی اوزره امتحان اولنه رق استعداد و مهارتی
 نمایان اولنلرک نانپاره لر ی علی الدوام عهده لر نده ایقا و مهارتی اولمیانلره و لایتلرینه
 کیتیمیوب و آخر کسب و کاره سلوک ایتیمیوب دائماً قشله لر نده مشق و تعلم ایله مشغول
 شرطیله بر یچوق سنه مهلت و یریلوب بومدت نظر فنده کسب مهارت ایدنلرک
 نانپاره لر ی کماکان عهده لر نده ایقا و ایمانلرک نانپاره لر ی رفع و ضبط اولنه و یوقلمه
 انساننده فی الاصل متأهل بولنانلر تحقیق اولنوب فیابعد ضابطاندن غیر ی نقراتک
 تأهلنه رخصت و یرلیه و بعده هر خبره نك چاپنه کوره ایجاب ایتدیکی قدر نقرات
 تعیین اولنق اوزره اول امرده الی خبره ایچون اوزر نفر خبره جی و بشر نفر
 ملازمدن بش یوز نفر خبره جی و ایکی یوز الی نفر ملازم ترتیب و هر اون نفرک
 بر ی خلیفه و طقوزی یماق اعتبار اولنوب هر خبره یه برر علامت وضع ایله اول
 خبره نك نقراتی دخی اول علامته علامتنه و هر بش خبره نك نقراتی اوزرینه فننده
 ماهر بر ی سر خلیفه نامیله ضابط و ایچلرندن درایتلو و صاحب نفوذ بر ی اوجاق
 کتخداسی و بر ی چاوش و بر ی اوجاغه علمدار نصب اولنه رق اشبو اوجاق
 ضابطانی بلا موجب عزل و نصب قبول ایتیمیوب و ترتیب طریقاری دخی یولیه اولوب
 شویله که : خبره جی باشلیق منحل اولدقده اوجاق کتخداسی خبره جی باشی نصب
 اولنه رق آنک یرینه دخی چاوش و آنک یرینه علمدار و آنک یرینه سر خلیفه لرک
 اسکیسی و آنک یرینه کندوسنک زیر اداره سنده اولان بش نفر خلیفه لرک اسکیسی
 و آنک یرینه یولیه یماق لر دن لازم کلانی تعیین ایله سلسله لر ی یوریدیلرک بوصورنده
 ملازم اول یماق اولوب خار جدن رغبت ایدنلر دن بر ی دخی مجدداً ملازمته ادخال
 و ملازم لرک حین تحریر نده بر ی قره قوللقجی و بر ی آشجی و بر ی سقا و ایکیسی
 عربه جی یازیلوب عربه جیلرک مستعدی باش ملازم و دیکری ملازم ثانی و سقا
 ملازم ثالث و آشجی ملازم رابع و قره قوللقجی ملازم خامس اعتبار اولنه رق باش
 ملازم یماق اولدقده سلسله ترتیلری بو وجهله یوریدیله و نقراته علم حاللرینی اوکرتمک
 و وعظ و نصیحت ایتمک اوزره اوجاغه برخواجه و اوقات خسه یی ادا ایتمک ایچون
 برامام تعیین اولنه و خبره جی باشی اوزر نده خبره جی زعامتی یا خود تیماری و ارایسه
 خاصه ضبط اولنه رق کندوسنه سنوی یدی بیک غروش معاش و ایکی بیک بش یوز

غروش بدل تعینات و سائر ضابطانه نمالوجه زعامتار تخصیص اولنوب شویله که :
 کتخدانک زعامتی درت بیک بش یوز غروشه و چاوشک زعامتی ایکی بیک غروشه
 و علمدارک زعامتلی بیک بشیوز غروشه و سرخلیفه لرك بیکر غروشه و خلیفه لرك
 زعامتلی یدیشر یوز الیشر غروشه ابلاغ و یماقلرک اولنه یکر می درت آچه و نانیسنه
 یکر می آلتی و نالته یکر می سکز و رابعنه اوتوز و خامسنه اوتوز ایکی و سادسنه اوتوز
 درت و سابعنه اوتوز آلتی و نامنه اوتوز سکز و تاسعنه قرق آچه و ملازملره علی السویه
 یکر میشر آچه یومیه اعطا و فیابعد زعامت و تیمار ضابطانه مخصوص اوله رق نفرات
 بالتدریج هپ یومیه لو اولمق مقرر اولدیغدن عتیق تیمار لو خبره جیانک محلوللری
 آخره و یرلیوب و اولاده و یرلمک دخی قانون اولیوب خاصه ضبط ایله یرلرینه
 یومیه لو نفرات تحریر و فقط متوفانک اولادی رغبت ایدرسه سلسله و قوعنده
 ملازمته ادخال قلنه و الیوم خبره جی اولمق اوزره مقید اولان زعامت و تیمار لرك
 اشبو بیک ایکی یوز یدی سنه سی محرمندن اعتبار ایله فیابعد بریمی قصر ید کچماک
 اوزره دفتر خانه عامر ده قید اولمغله بوندن بویله خبره جی زعامت و تیمار لری قطعاً
 قصر ید اولنیه و یومیه لو نفرات ایله ملازملره بهر یوم یار میشر قیه نان ایله بشر
 پاره قاتق بها و سنه ده برر قات البسه و هر خبره طاقی ایچون شمع و قندیل و حطب
 و کمور و سائر بهاسی اولمق اوزره سنوی یوزر غروشدن بش بیک غروش
 و یریه و سفر و حضرده نفرات مرقومه دن فرار ایدن اولور ایسه هان بولدقلری
 محله تأدیب و یومیه سندن کف ید و خدمتی ترک ایتمک استیانلر اولور ایسه
 یومیه سنک حین توجیهندن برو آلمش اولدینی علوفه تماماً کندولرندن استرداد
 اولنه و بوندن بویله خبره جی نفراتنک تیمار لوسی سواری و یومیه لوسی پیاده
 اوله لر و سفر لرده بعضاً خبره اعمال ایده جک محل اولمادینی صورتده خبره جیلر
 خبره آتمق ایچون احداث اولنش اولان نوایجاد ابوس طوپلرک اعمالنده استخدام
 اوله لر و خالی کونلرده اضاعه وقت ایتموب طوپ و تفنک آتمق خصوصلرینی
 و سائر صنایع جدیده حریبه بی تعلم ایده لر و علیل و اختیار و عمل مانده اولنلری
 کمر کدن و آخرنه مقاطعاتدن یومیه لری قدر و وظیفه ایله و دشمن قارشوسنده
 مجروح و عمل مانده اولنلری دیلدکاری مقاطعاتدن یومیه لرینک ایکی قاتی وظیفه
 ایله تقاعد قلنلر .

* لغمچی قانوننامه سنک خلاصه موادی *

لغمچی نفراتی اوته دنبرو فن هندسه و صنایع معماریه ده ماهر اولمق شرائط
 نظاملرندن ایکن اختلال نظاملری حسیبله زعامت و تیمار لری محلول اولدقجه

رجا وشفاعت وطمعه تبعیت ایله نا اھله توجیه اولنه کلدیکندن فی الاصل ایکی یوز قیده منحصر والحالہ ہذہ نفراتی ترتیب قدیملرینی متجاوز اولدینی خالدہ ایچارندن لدی الحاجہ لغم باغلیہ جق کمنسہ قالمش اولمسیلہ او او جاغک دخی مجدداً احیاسی ضمنتہ ارادۂ قطعیه صدور ایتکلہ ایمدی رجال دولت علیہ دن خبرہ جی او جاغنه ناظر نصب اولنه جق ذات بو او جاغہ دخی نظارت ایلیہ و برمنوال سابق عینیلہ خبرہ جیلرکی لغمجیلرک دخی اشبو یدی سنہ سبی روز خضرندہ یوقلامہ و امتحان اصولارینک اجراسیلہ فنندہ مهارتی اولمیانلرہ تحصیل مہارت ایتک اوزرہ ایکی سنہ مہلت ویریلہ و سنہ مرقومہ محرمدن اعتباراً لغم جی زعامت و تیمارلرینک قصر یدی جائز اولیہ و تیمارلو لغمجیاندن فوت اولنلرک و بر موجب شروط استانبولده قشله لرنده اثبات وجود ایتیانلرک و ایکی سنہ یه دک تحصیل فن ایدہ میانلرک نانپارہ لری محلودن و رفعدن آخرہ ویرلیوب تیمارلو ایکیوز قیده تنزل ایدن جیہ دک خاصہ ضبط و ایکیوز تیمارلو لغمجیاندن بشقہ او توزر آقچہ یومیہ ایله الی نفر ملازم تحریر اولنه و لغمجیلر ایکی صنفہ تقسیم و بر صنفہ لغم باغلامق فنی و دیگر صنفہ کوپری و طابیه و قلعه یایمق و متریس آلق مثللو صنایع معماریه و فنون هندسہ تعلیم اولنمق اوزرہ خبرہ جیلر ایچون بنا اولنه جق قشله جوارنده بونلر ایچون دخی یوز یکر می بشر نفرہ وافی ایکی قشله انشا و لغم جی باشی یه سنوی بشیک غروش حاصل و برر زعامت و سنوی بیک ایکی یوز الی غروش بدل و تعیینات تخصیص و ضابط اولان کتخدا و چاوش و علمدارک تیمارلری بی حاصل اولدینی صورتده علی مراتبہم اقتضا سنہ کورہ الحاق ایله تیمارلری حاصلاتی درجہ کفایہ یه ابلاغ و یومیہ لو ملازملرہ یومیہ یارمیشر قیہ نان ایله بشر پارہ قانق بها اعطا اولنسی و فرار یا خود ترک خدمت ایدنلر حقنندہ بر وجہ مشروح خبرہ جیلر حقنندہ اجرا اولنه جق معامہ نک اجرا والحالہ ہذہ ترسانہ عامرہ ده اولان مهندسخانہ کبی خبرہ جی و لغم جی قشالترینک جوارنده دخی بر مهندسخانہ تأسیس و انشا قلنہ .

ایالات عسکری تعمیر اولنان اشکنجی زعما و ارباب تیمار مثللو خبرہ جی و لغم جی زعما و ارباب تیمارک نانپارہ لری اولادلرینہ انتقال ایلمنسہ صکرہ دن مساعدہ سنہ ارزان بیورلغله اولوجہلہ قانونلرینہ ذیل اولنمشدر .

(۲)

* طویچی قانوننامہ سنک خلاصہ موادی *

طویخانہ او جاغنه باعث تراید شان اولق ایچون جبہ جی او جاغی مثللو بر توغ احسان اولنه و طویچی باشی اغا جبہ جی باشی مثللو سراسرہ قاپلو اوست کورکی و دیوان

رختی استعمالیه قرین امتیاز اوله و کندوسنه سنوی اوتوز بیک غروش معاش
 ایله یومیه یکرمی قیه قلم و قرق قیه نان اعطا اولنوب بلا جرم عزل اولنیه و کبرای
 رجال دولت علیه دن بری ناظر نصب اوله رقی او جاغک کافه اموری ناظر و اغانک
 بالاتفاق معرفتلیله رؤیت و سرعت نظارتیه طو بچیلر کتابتی برلشدیریلهرک سنوی
 الی بیک غروش معاش و یومیه سکر قیه قلم و اون الی قیه نان ایله خواجه کاندن
 بری طو بچیلر کاتبی و ناظر و اغان معرفتلیله او جاق رجالی ایچنده امکدار و ایشکذار
 و طو بچیلق فننده ماهر قغیسی ایسه سنوی یدی بیک بشیوز غروش معاش و یومیه
 سکر قیه قلم و اون الی قیه نان ایله کتخدا و چور باجیلرک مستعدانندن بری کتخدا
 یری اولق اوزره بالاتخاب باب عالیدن استیذان ایله تعیین قلنه و او جاق رجالی
 ایسه بالاستشاره او جاقونک اهل عرض و فننده ماهر اولنلرندن اورطه چور باجیلری
 و ضابطان سائره ترتیب و تعیین اولنوب اشبو او جاق توجیهاتنده وجه ترجیح
 و اتخاب مجرد لیاقت ذاتیه اوله رقی شفاعت و خاطره رعایت جائز اولمیه جنی مثللو
 زاده لکه دخی اعتبار اولنیه و کرک طو بچی باشیدن و کرک سائر ضابطانن جوائز
 و عوائد و هدیه و رسوم سائره آئمه و چور باجیلرک کار کذار و صداقتکار لرندن بری
 او جاق چاوشی نصب اولنوب آنک معیتنده بولمق اوزره مناسب برکیمسه دخی قپو
 چوقه داری نصب و تعیین اولنه و چور باجیلره علی العموم سنوی بیکر غروش معاش
 و یومیه ایکشر قیه قلم و دردر قیه نان و کتخدا یری اولان ذاته چور باجیلانی معاش
 و تعیینانندن فضله اوله رقی سنوی بیک بشیوز غروش معاش و یومیه اوچ قیه
 قلم و الی قیه نان و او جاق چاوشنه کذلک چور باجیلانی وظیفه سندن فضله اوله رقی سنوی
 بیک بشیوز غروش معاش و یومیه ایکی قیه قلم و درت قیه نان و قپو چوقه دارینه یالکر
 سنوی یدیوز الی غروش معاش و او جاق کاتبی معیتنه تعیین اولنان ایکی نفر کاتبه سنوی
 بشر یوز غروش معاش تخصیص و مع کسوه بها یومیه طقسان آچه ایله او جاغه برسراج
 باشی و کذلک مع کسوه بها یومیه یکر میشر آچه ایله او جاغه اوتوز نفر قوللقچی و اونر
 آچه ایله یکرمی نفر قوللقچی ملازملری تعیین قلنه و حالاً کشاده اولان یکرمی اوچ
 اورطیه اول امرده ایکی اورته علاوه سیله یکرمی بشه ابلاغ و اشبو یکرمی بش
 اورطه نک بریسی اغان اورطه سی و بریسی کتخدا اورطه سی اعتبار و یکرمی بش اورطه نک
 هر برینه بر منوال سابق برر چور باجی نصب اولندقدن بشقه برر او طه باشی و برر
 و کیلخرج و برر بیر اقدار ایله برر آشچی باشی و باش قره قوللقچی و سقا و اون بشر نفر
 قره قوللقچی و اغان اورطه سنه فضله اوله رقی یکرمی نفر قره قوللقچی اتخاب و تعیین
 اوله رقی مع کسوه بها یومیه اولق اوزره او طه باشیلره یوز یکر میشر و وکیلخر جله

یوزر و بیراقدار لر طقسان بشر و آشجیلره طقساز و باش قره قوللقجیلره آلتشر
 و سقارله قرق بشر و قره قوللقجیلره اوتوز آچه تخصیص و هر اورطیه دردی
 سرعت طوبی و ایکسی ابوس و ایکسی شاهی و ایکسی بالیز اوله رق اونر طوب اعطا
 اولنق اوزره جمعا یکسوز الی طوب ترتیب و هر طوبه مع کسوه بهما یومیه اولق
 اوزره طقسان آچه ایله برطوب اوسته سی و التمش آچه ایله بریماق و اوتوز الی
 آچه دن الی آچه یه دک ایکشر آچه تفصوت ایله سکز نفر طوبچی تخصیص و نفراتک
 ترتیب یومیه لری خصوصده مجرد لیاقت و مهارته نظر و اعتبار و بونلرک بریمی
 کورلده قاچنجی اورطه نک قاچنجی اوسته سی یاخود قاچنجی اوسته نک قاچنجی
 نفری اولدنی بیلنمک ایچون هر برینک کسوه لرینه اورطه سنک نشانی ایله رقلری
 وضع و هر اورطیه و یریلان طوبلرک اوزرینه یاغلی بو یا ایله اول اورطه نک نشانی
 نقش اولنه و اغالق یعنی طوبچی باشلیق منحل اولدقده چونکه طوبچی باشی اولنلرک
 عاقل و دیندار و اهل عرض و وقار و سفر و حضرده ضبط و ربط نفراته صاحب اقتدار
 اولسی شرط اولدیغدن کتخدا طوبچی باشلیغی اداره یه مقتدر اولوبده خارجدن
 اغا نصبنه احتیاج مس ایتمز ایسه کتخدا طوبچی باشی اولوب آنک یرینه دخی کتخدا
 یری و آنک یرینه چور باجیلرک اسکسی و آنک یرینه او طه باشی آنک یرینه و کیلخرج
 و آنک یرینه بیراقدار و آنک یرینه اورطه سنک طوب اوسته لریله آشجیسنک اسکسی و طوب
 اوسته لنی منحل اولدقده یماغی طوب اوسته سی اولوب آنک یرینه دخی نفراتک فننده
 اک زیاده کسب مهارت ایتمش و مهارته مساوی ایسه لر اسکسی کچمک اوزره سلسله
 توجیهات لری یوریدیه و سرعت طوبلری متریس طوبی اولیوب صف جنکارنده مستعمل
 اولدنی جهته آروجه محافظه نفرانه دخی محتاج اولدیغدن هر سرعت طوبنه مخصوص
 اولان اونر نفر سرعت جیلردن بشقه ینه طوبچی او جانغی نفراتی اولق اوزره یکرمی
 بشر آچه یومیه ایله اونر نفر تفنک انداز تعیین اولنهرق بونلر علی الدوام تفنک اندازلق
 تعلم و بونکله بیله طوبچیلایق تحصیلنه دخی سعی ایده لر چور باجیلرک البسه دیوانیه لری
 ال سایه چوقه دن شمسلی بول یکلو فرجه اولوب و اورطه آشجیلری و او طه باشی
 و بیراقدار و و کیلخرج دخی یشیل چوقه دن سرحدلی و طوب اوسته لری کوز
 و یماقلری فسدتق و ماعدا طوبچی نفراتی یشیل و تفنک انداز نفراتی مور چوقه دن
 نیتن و علی السویه مائیله چوقه سندن پوتور کیوب جمله سی قرمنی فس اوزرینه
 استانبول کاری سیاه پوشی صاره لر و اسکیدن اسامی یه متصرف بولنان اشکنجی
 طوبچیلر مهارت و لیاقتلرینه کوره ضابط نفر اولوب بونلردن تحصیل فنه سعی ایتمیان
 و تعلیمه کیان و قشلاسنه دوام ایتمیان بولنور یاخود وفاتیله یومیه سی محلول اولور ایسه

اسامیلری خزینہ مانده ای دیله واشبو قانون جدیددن مقدم یدنده کرک اشکنجی و کرک تقاعد یومیه سی بولنان ضابطلر اسامیلرینی خزینہ مانده اولوق اوزره کتوروب ناظره تسلیم ایدلر و فیما بعد کرک اشکنجی و کرک تقاعد یومیه لری آلوب صالتمیه و چور باجی اولدجقه نفراتک تأهل ایتملرینه رخصت ویرلیه و پادشاه قولنک خدمتکاری اولسی جائز اولدیغندن کرک او جاقلو و کرک سائری طوبیحیلردن بری خدمتکار ایلمیلر و طوبیحیلغه یازیلوبده برمدت صکره ترک خدمت ایتمک استیالردن آدلقلری یومیه لر تماماً استرداد و فرار ایدنلر شدیداً تأدیب و او جاعده بیروعمل مانده اولانلر کمر کدن نصف یومیه لریله و جنسکده مجروح و عمل مانده اولنلر زیاده ایله تقاعد ای دیله و طولبه جی نفراتی هیئت اصلیه و نظام سابقلری اوزره ایفا اولنلر .

فی ۱۵ رجب سنه ۱۲۰۷

عربه جیلر قانوننامه سی دخی بوسیاقده اولوب آنجق طوبیحی او جاعنه ناظر اولان ذاتک عربه جی او جاعنه دخی نظارت ایلمسی مذکور قانوننامه ده تصریح و سنوی عربه جی باشی به اون بش بیک غروش معاش ایله یومیه بش قیه لحم و اون قیه نان و عربه جیلر کاتبه و کتخدایه دردر بیک غروش معاش ایله یومیه ایکشتر قیه لحم و دردر قیه نان و چور باجیلره یدیشر یوز الیشر غروش معاش و یومیه ایکشتر قیه نان و کتخدایرینه و چاوشه چور باجیلقلری معاش و تعییناتی اوزرینه ضم اولوق اوزره برر منلی و او طه باشیلره طقساز و وکیلخزجک یتمشر و بیراقدار لره التمش بشر و خلیفه لر ایله آشجیلره التمشر و باش قره قوللقجیلره قرق بشر و سقارله قرقر آچه یومیه و عربه جی نفراتنه اوتوز ایکیدن قرقه و ارنجه ایکشتر آچه تفاوت ایله یومیه لر تخصیص و بو کره عربه جیلر او جاعی بش اورطه یه تقسیم و هر اورطه یه برر چور باجی و او طه باشی و وکیلخزج و بیراقدار و آشجی و باش قره قوللقجی و سقا و یکر می درت آچه یومیه ایله اونز نفر قره قوللقجی و هر طوب عربه سنک برر خلیفه سی و بشر نفر عربه جیسی اولوق اوزره هر اورطه یه بیک میشر خلیفه و یوزر عربه جی و او جاعنه یتمش آچه یومیه ایله بر باش قره قوللقجی و بیکر میشر آچه یومیه ایله طقوز نفر قوللقجی ترتیب اولنمشدر .

فی غره ن سنه ۱۲۰۷

برمنوال سابق هر سرعت طوبینه ترتیب اولنان اونز نفر تفنک اندازلرک بری اوسته و بری یماق و سکرزی نفر اولوق و اوسته لره التمشر آچه و یماق لره قرق بشر آچه یومیه اعطا اولنوق اوزره صکره دن طوبیحی قانوننامه سنه ذیل اولنمشدر .

فی ۹ ن سنه ۱۲۰۷

مؤخر آ ذکر اولنان تفنك انداز نفراتنك يوميه لرينه دخي بشر آچه ضم ايله او توزير
آچه يه ابلاغ اولمشدر .
في ۲۸ ب سنه ۱۲۰۸ .

مؤخر آ هر عرب به جي اورطه سنه دردر مرانقوز و ايكيشر چلينكيسر سراج و دردر
نعلبنده ترتيب اولنه رق بونلرك اهل اسلامدن اولملري شرط اوليوب اهل ذمتدن
دخي اوله ديو عرب به جي قانوننامه سنه ذيل قلمشدر .

بعده سرحدات خاقانيه محافظه سنده بولنان طوطجي و طوپ عرب به جي نفراتنك
موجودلري تحقيق و تصحيح اولندقدن صكره طوطخانه او جاني طرفدن مداخه
اولنيه رق بهر سنه مواجبلي ينك طوغريدن طوغري يه جانب ميريدن اعطا اولنسي
دخي كذلك قانوننامه هايونه ذيل اولمشدر .

* وزارت قانوننامه سنك خلاصه مواد مندرجه سي *

فيا بعد و زراي عظام و مير ميران كرامه منصب توجيه و ابقاسنده بو دفعه باخط هايون
تشريفاته قيد ايتديريلان نظام جديد مقتضاسنجه آلمسي لازم كلان جائزه معينه دن
زياده جائزه و عبوديت و بوغچه بها و سائر برنسنه خفي و جلي مطالبه اولنيه و جائزه
معينه دخي سنه ده بر دفعه توجيه و يا خود ابقالرنده آلتوب سنه سي تكميل اولمقسزين
حسب الاقتضا عزلي لازم كلور ايسه كندويه ديكر منصب و يرلد كده مقدم و يرديكي
جائزه اول منصبك جائزه سنه تقاص اولنوب بشقه جائزه مطالبه اولنيه و وزراي عظام
و مير ميران كرام منصبلرنده اقل مرتبه اوج سنه و نهايت بش سنه دن اول عزل و تاديب
موجب جرمي ظهور ايتمكسزين عزل اولنيه و بش سنه بر منصبه دوام اوزره
اقامت ايدن برواليدن اهالي خشنود و طور و طرزي رضاي دولته موافق اولديني
و ابقاسنده بر كونه محذور اولديني تقديرده بش سنه يي تجاوازي تدي ديناميوب منصبي
ابقا اولنسي جائزه اوله كرك و زرا و كرك مير ميران بر منصبدن ديكر منصبه نقل
و تحويل اولنه حق اولدق لرنده مسافه بعيده ده اولان منصبه تحويل اولنميوب اولديني
منصبك جوارنده مناسب منصب قنغيسي ايسه اكانقل اولنه و سفر هايون و قوعبولدقچه
يا خود ضرورت ملكيه مس ايتدكجه اناطوليده منصب متصرفلري اولنلره روم ايلي
منصبي توجهيله اناطوليدن روم ايلي يه و كذلك روم ايليدن اناطولي يه امرارلري تجويز
اولنيه و قديه و حانيه و رسمو وجده كبي كثر اوزره دواب و مواشي نقلي ممكن
اولميان منصبلر دواب و مواشيسي كثير اولميان وزرايه و يريله و بومنصلر دن انفصال
ايله اناطوليدن و روم ايليدن منصب و يريله جك اولنلره دخي دفعه دواب و مواشي
تداركي نقلتدن و ارسته اولق ايچون سواحل منصبلر دن مناسب اعطا اولنه مير ميران
كرامه دخي سياق مشروح اوزره توجيه منصب اولنق لازم كلوب انحق بوبابده

دخی وزرای عظامك تزايد نفوذ واستقلالاری ایچون هر ایالت داخلنده اولان سنجاقلرك اشبو قانون اوزره توجیه ویا خود باقلاری موسمی کلد کده ایالت والیبری عرضاریله اوله و بوشده اولان ودولتجه معلوم الاحوال اولمیان میر میرانلر لایقی اوزره وزرا معینته تعیین اولمقی ایچون استانبوله جلب اولنوب ذاتلری معلوم اولدقدن صکره اقتضاسنه کوره مناسب اولان وزرا معینلرینه تعیین وارسال اولنه واشبو میر میرانلر والیبر معینلرنده اقامت ایدوب داخل ایالتلرنده اولان سنجاقلرك متصرفلری اوچ و یا بش سنه مرور ایتدکجه مناو به اوزره لیاقتلرینه کوره اول سنجاقلری اشبو معینلرینه کوندریلان پاشالره عرض ایلهلر و بلا منصب میر میرانك وزرا یاننده کتخدالقی مثللو خدماتده استخدای جاتز اوله اناطولی وروم ایلیده اولان ایالتلر یکریمی سکز منصبدن عبارت اولوب ایالات مذ کوره شونلر درکه بیان اولنور مصر و شام و بغداد و بصره و شهر زور و حلب و قرمان و رقه و دیار بکر و آذنه و صیدا و موصل و اناطولی و طریزون و ارضروم و چلدیر و وان و قارص و مرعش و سیواس و جده و طرابلس شام و کرید وروم ایلی و سلستره و بوسنه و موریه و ایالت جزائر اشبو یکریمی سکز ایالتدن قارص و مرعش و آذنه بشقه بشقه وزیره متحمل اولمیوب موصل ایله طرابلس شام دخی اکثریا بکلر بکیلره ویرلدیکندن مناصب مذ کوره یکریمی اوچه تنزل ایتمکله و الحاله هده شهر زور ایله بصره ایالتلری دخی بغداد و ایلسنک عهده سنده بولمغله اشبو شهر زور و بصره ایالتلری تفریق و آخر وزیرلره توجیه اولننجیه دکین شمیدیکی حالده وزیرایه مخصوص مناصب یکریمی بر ایالتله و بلغراد و وودین سرحدلرینه منحصر قلوب وزرا ایسه کثرت اوزره اوله رق ایوم موجودلرینه اشبو مناصب کفایت ایتدیکندن فی بعد وزرای عظامك عددی یکریمی اوچدن زیاده اولیه فقط بصره و شهر زور ایالتلرینک آخره توجیهی و انابه طرفنه بحسب الاقتضا بروزر تعیینی لازم کلد کده اولوقت یکریمی اوچی تجاواز ایتمک جاتز اوله و حل الهی و قوعیله مجدداً یرینه وزارت توجیهی لازم کلد کده میر میراندن و سائر دن دولت علیه نك مجربی و تربیت کرده سی واصل و منشی معلوم اولوب طشره لرده اجرای احکام و تسوییه مهمه قادر و حق و باطلی فرقه مقتدر و عاقل و دیندار و امکدار منصف و معتدل و صادق و مستقیم ذواته و یریلوب دولتی بیلمز نا اهل و دره بکی و دلیل باشی مقوله لرینه و مجهول الاحوال کمنس لره بروقتده رتبه وزارت و مراتب سامیه دولت و یرلمک بروجهله تجویز اولنیه بوقانونک اجرا سنه علی الدوام کلیله رعایت اولنوب طرف شاهانه دن برینه وزارت توجیهی اراده اولندقدنه اگر اول کیمسه بوشروطک خلافی نا اهل مقوله دن ایسه شروط

قانوننامه‌ی منافی اولدیی بیانمک ایچون کیفیت رکاب هایونه عرض ایله افاده اوله
 وحسب الاقتضا وزیر اعظم طرفندن بالذا کره برینه رتبه وزارت اعطاسی تصویب
 اولدوقده شروط قانوننامه‌ی موافقتی وقانوننامه‌نک بوقرهمسی صدر اعظم طرفندن
 حضور هایونه عرض اولنوب نزد هایونده دخی قانونه موافقتی تحق ایدر ایسه
 توجیبه رأی هایونه موقوف اوله مجدداً میر میرانلق توجیبه لازم کلدکده دخی
 میر میرانلقدر دیو مساعحه واعماض اولنمیوب عینیه وزارت توجیهنده اولان اهتام
 واعتما مثللو شروط مذکوریه رعایت قلنه .

تسهیل مصالح عباد ایچون حسب الاقتضا اطرافه مباشر تعیینی بعضاً اگرچه لازم
 کلوب انجق بو کیفیت ظلم وتعدییه وسیله اوله کلدیکندن بعد ازین اشبو مباشر
 مادهسنه وزرای عظام ومیر میران کرام زیاده سیله دقت ایدوب بلا اقتضا بر محله
 مباشر کوندرمیهر مصنوع ومجهول مادهلر وبتش کیتمش وبرقاچ دفعه
 شرعله رؤیت اولنمش ویاخود استماعی ممنوع عتیق خصوصلر ویاخود محض
 افترا وبهتان مقولهسی امور ایچون مباشر کوندرمکدن و بیوردلی تحریر
 ایله سکنه مملکتی اضارادن زیاده سیله اتقا اولنه بر ماده ایچون عرفحال
 تقدیم اولدوقده اول امرده تحقیق ایلمکسزین مباشر کوندرلیه وتخصیص
 اتباع خدمتلمک ایچون مباشر کوندرمکدن زیاده اجتناب قلنه وحسب الضروره
 مباشر کوندرلمک لازم کلدیکی حالد دخی اگر کیده جکی ماده برقریه ویا بر قضا
 وقصبه وشهره متعلق ایسه مصلحت ختام بولدوقده قرب وبعیدینه کوره خدمت
 مباشریه بروجه اعتدال ویریه قریه به متعلق ایسه قضایه مباشریه طرح اولنیه وشهر
 وقصبه به متعلق ایسه قریه لره توزیع ایتدیرلیه مباشرک مدت قرارنده ایش بتجیه دک
 ما کولاتی اقتضا ایدن طرفندن ویریلوب غیر یلر تشریک قانمییه واکرماده برکسنه نک
 ذاته متعلق ومخصوص ایسه مکئنده مصرفی وختامنده مباشریهسی اول کسنه
 طرفندن ویریلوب قصبه وقرایه حصه طرحندن توقی قلنه واکر مدعی متمر دایسه
 شروطی اوزره مباشریه مدعیدن زجرأ تحصیل اولنه مدعا علیه معاند ایسه کذلک
 مباشریه آندن تحصیل قلنه اشبو مباشریه ماده سنده کمال اوزره حقانیت وانصافه
 رعایت ایتدیریه .

وزرای عظام اتباعی علی الدوام اهل عرض ورضا پرور وهر وجهه خدمات لایقه یه
 قابلیتو اوله کش ایکن براز وقتدنبرو اجناس مختلفه وزرا خدمت لرنده قبول اولندیغندن
 ایچلرینه اجلاف مقولهسی دخول ایتمکله او مقوله دن خلاف رضا وضعه جسارت
 ایدن واولدقاری دائره نی ترک مثللو حرکتده بولنان معدود ایکن بولنرک وضعلری

سائر اهل عرضه دخی عزرو واسناد اولمغله وزرا دائره سنك پريشانلغنى واهل
عرض مقوله لر ينك عدم نظام حاللرينى مستوجب اولمقدن ناشى فيابعد وزراى
عظام وميرميران كرام دائره لر نده بولنان ايچ اغاسى ودليل وتفنگى و بالمله اتباع
اولدقلى دائره لر نده دوام اوزره عرضلر يه مقيد اوله رق خدمات لازمه لر يه قيام
ايدوب خود بخود مفارقت ايدمه لر و ايجلر نده تهمت و قباحتلرى ظهور ايدنلرى
مخدوملرى تاديب ايدوب متنه اولمیانلرى و ارايسه رد و طرد ايله فيابعد بر محله
قبول اولنماق ايچون يدلر يه اذن بيورلديسى دخى و يرلميه ويدنده اذن بيورلديسى
اولمیان اتباع بر دائره نده قبول اولنميو ب اولمقوله لر دن سرسرى كشت و كذار ايدنلرى
بولنور ايسه حكام و ضابطان معرفتلى يه اخذ و تاديب قلنه و اكر بر وزيرك دائره سى كثير
اولوب كیده چكى منصبك اولقدر اتباعه تحملى يوق ايسه لزومى اولمیان اتباعى آخر محله
انتساب ايچون هر قاچ نفر ايسه يدلر يه ايالت مهر يه ممهور اذن بيورلديسى اعطا ايله
وزراى عظام وميرميران كرام قپو كتخدالقرلى فيابعد خدمه دولتن معتمد و صادق
وصاحب اقتدار ذواته تخصيص اولنوب مجهول الاحوال كسمله لر قپو كتخدالغنه تقرب
اولنيه و فيابعد وزرا قپو كتخدالغنى التى نفره منحصر اولوب زياده اولماق خصوصه
دقت اولنه و ميرميران امورلرى دخى اشبو وزرا قپو كتخدالرينه منحصر اولوب
خارجدن كسمله نك مداخله سى تجویز اولنيه و قپودان پاشالرك اكثر اوقاقى آستانه ده
كچوب قپو كتخدالرينى بعضاً كندو آدم لر ندن استخدام ايدمه كلكلرى و بو اصولده
قپو كتخداسنه محتاج اولمدقلى ظاهر اولمغله قپودان پاشالر اشبو قپو كتخدالغنى
ماده سندين مستثنا اوله لر ايالات والويه مناصبنك حاصلاتنه كوره قپو كتخدالرينه بر
مقدار شى تعيين و تشریفاته قيد اولنه رق آندن زياده برشى طلب ايتمه لر و قپو
كتخدالرى انجق مخدوملر ينك تحريراتيله منصب امورينى و ولايات مصالحنى رؤيت
و وارد اولان تحريراتى باب على يه اعطا و اراق اراق سؤال و اخطار ايله ماده يى
اونو تدريميوب جوابى اخذ و مخدوملرينه ارساله مقصور اوله لر .

(۴)

* لوند چفتلكى قانوننامه سنك خلاصه و جهله صورتى *

الحالة هذه لوند چفتلكنده موجود معلم عسكرك اوجاق اولمق اوزره رابطه سى
خصوصه اراده سنیه حضرت جهاندارى متعلق اولديغدن اساس نظامى درميان
ومذاكره و اصول و فروعى مطالعه اولنوب بروجه آتى تنسيق استصواب اولمشدر .
دولت عليه نك قوانين قديمه سندين خارج اولماق ايچون اشبو عسكر قديم اوجاق
اولان بوستانيان خاصه اوجاغنه ملحق اوله رق بوستانى تفنگچيسى اوجاغنى اولوب

رجال دولت علیه‌دن بر ناظر و درگاه عالی قوجی باشیلرندن بر انا نصب ایله بالمله امور و خصوصلری ناظر و انا معرفتلیله اتفاقاً رؤیت و خواجکاندن برکاتب و ایکی کاتب یماغی و ایکی نفر کاتبی تعیین و بوکونه معلم عسکرک لاقلا اونا ایکی بیکه ابلاغی طبیعت مصالحتدن اولمقدنناشی زیرده بیان اولندیغی وجهله مع ضابطان بیک التیوز ایکی نفر بوستانی تفکجیسی لوند چفتلکنده و ماعداسی انا تولیده و روم ایلیده مناسب محللر ده اقتضاسنه کوره بیک التیشر یوز ایکی یاخود نصفی اولان سکزیوز بر نفر ترتیب و تعلیم اولمق اقتضایتمک حسبیه اول امرده لوند چفتلکنه تخصیص اولنان سالف الذکر بیک التیوز ایکی نفر تمیم و مصارفی تنظیم ایله تحقیق اولنوب قصورینک دخی مصارفی مقایسه ایله معلوم اولدقده ایرادی بولنوب تخصیص و بعده لوند چفتلکندن معلملر کوندربله رک طشره لرده عسکر ترتیب ایله رفته رفته اون ایکی بیکه ابلاغ اولدقدن صکره استصواب اولنور و ایرادی بولنور ایسه دخی زیاده ترتیب اولنه زیرده دفتر کونه ترتیب اولندیغی اوزره بیک التیوز ایکی نفر ضابطان و نفراتدن عبارت اون ایکی بلوک اوله رق بر اوزره اعتبار و اواجاقا سندن ماعدای مذکور اوزره ایچون ارباب استحقاقدن بیکباشی و کتخدا و اغانی یمین و یسار و ملازملر و طوبجی باشی و عربه جی باشی و طوبجی و عربه جی و جبه جی چاوشلری و بلوکباشی و ملازم و علمدار و ضابطان سائره سی تخصیص و هر بلوکه ایکیشر نفر سقا و اسامیلری نفرات اسامیسنه مساوی اولمق و نفر لکه ملازم بولمق اوزره التیشر نفر قره قوئلجی و نفرات مرقومه اوقات خمسینی جماعته ادا ایلملری و برکوی رساله سی و عوامه لازم اوله جق قدر مسائل دینه اوکر نملری ضمنده کذلک هر بلوکه برر امام تعیین و بیکباشی مع ضابطان بیک التیوز ایکی نفر دن عبارت اولان اون ایکی بلوکک ضابطی و بشیوز باشی حکمنده اولان اغانی یمین و اغانی یسار یدیوز سکسان یدی نفر دن عبارت اولان التی بلوکک و یوز باشی یوز اوتوز نفر دن عبارت اولان بر بلوکک ضابطی اولوب زیرده اشارت اولندیغی اوزره ضابطانه تیمارلر حاصلاتندن معاش ترتیب و نفراته یومیه توجیه و نان عزیز تعییناتلری عیناً و یریلوب بدل لحم و قاتق بهالری علوفه لریله معاً ماه بماه ایراد جدید خزینه سندن اعطا قلنه و سالف الذکر یومیه لوفراته روز خضرده برر طاقم کسوه و برر یمینی و برر چرزه تیمارلر حاصلاتندن اوله رق ایراد جدید خزینه سندن و اسلحه لری جانب میریدن اعطا اولنه و نفراتدن بری ضابط اولدقده لونی و نوعی معلوم اولمق ایچون برر طاقم لباس و یریلوب بعده اقتضای ایلدکده لباس مذکوری کندو معاشندن تجدید ایله و ابتدا برکسنه تفکک انداز نفری و بعده اون باشی و چاوش و علمدار و ملازم و بلوکباشی یعنی یوز باشی

وملازم اغا وبعده بلوك اولده ايسه اڭاي يمين يعنى صاغ قول اڭاسى وبلوك ثائيدده ايسه اڭاي يسار يعنى صول قول اڭاسى وبعده كتخدا وسكره بيكباشى اولوب او جاق اڭالغى منحل اولدقده ينه قپوجى باشى اڭالردن مناسب برى نصب وياخود بيكباشيلرك عاقل وكار كذار وصدافكار لرندن برينه قپوجى باشياق علاوه سيلاه توجه اولنه و بو ترتيب اوزره يولى ايشلمسى اسكيك اعتبار يلاه اولوب انجق فننده مهارت واستعدادى يوغيسه اشاغيدن ارباب استعدادك تقديمى جائز اوله وكذا بر كمنه ابتدا طوپچى نفرى وبعده طوپ خليفهسى وطوپ اوستهسى وچاوش وبعده طوپچى باشى وكذا ابتدا بر كمنه طوپ عربه جيسى وبعده عربه جى خليفهسى وچاوش و عربه جى باشى وكذا ابتدا برى جبه جى قره قوللقجيسى وبعده نفر وبعده جبه جى چاوشى وبعده جبه جى باشى وكذا ابتدا برى سور نازن و طبليزن اولدقده اسكيه رك يوليله قنقى طرفده ايسه ملازم وبعده سر سور نازن وياخود سر طبليزن وبعده مهتر باشى اولوب و بونلرك جملهسى بروجه مشروح يوليله اسكيه رك ترفيع اولنوب انجق مهارت واستعدادى يوغيسه مادونى مستعد بولنديغى حالده تقديم قلنه اشبو اون ايكي بلوك هر برينه بر طوپ ترتيب اولنوب نفرات مر قومه ليل و نهار قشله رنده موجود و تعليم و تعلم يلاه مشغول اوله لر و فرار ايدنلرى تاديب اولنه وضابطان و نفرات دن برى او جاعه كيرديكى تاريخندن اوچ سنه مر ورنده دير لگندن كچوب او جاعى ترك ايتك استرايسه او جاعه كيره لى علوفه و تعينات و كسوه دن آلد يغى تماما رد و اعطا ايتك شرطيله او جاقدن اخراجنه مساعدده جائز اوله و معاشلو ضابطان دن او جاقده اختيار و عمل مانده اولنر معاشلرينك نثى ايله و سفرده مجروح و عمل مانده اولنر معاشلرينك نصفيله ياخود دهاز ياده جه سيلاه و يوميه لو نفرات دن او جاقده اختيار و عمل مانده اولنر يوميه و تعينات بهالرينك نصفيله و سفرده مجروح و عمل مانده اولنر تمام يوميه و تعينات بهالرينك وياخود دهاز ياده جه سيلاه تقاعد اولنر . و معاشه متصرف اولنر سوارى و يوميه لو اولنر پياده اوله و سوارى اوله جق معاشلو ضابطانك حين مأمور يتلرنده دواب و مواشيسنى كندولرى رؤيت ايدوب فقط تعيناتى جانب ميريدن و يريله طوپچى و عربه جى او جاقلىرى مثللو ناظر و اڭا معرفت ليله او جاعنك باجمله رجال وضابطانى انتخاب و شروط موجبجه على مراتبهم نصب اولنه او جاعه دائر عرضلى ناظر ايله اڭا برابر تمهير ايله لر فرلك يوميهسى نهايه النهايه يكرمى بش ياشنى تجاوز ايتماش پاك واصيل و توانايكترلره حسن رضاسيلاه توجه اولنوب تقدرد حديث السن ايسه دنخى تحريرى جائز اوله و بيكباشى وضابطان سائر يوميه لو نفراتى خدمتكار ايتيوب آخردن خدمتكار قوللانر لو خدمتكار كسوهسى نفرات كسوهسى كى اوليوب فقط بر آطه كيه لر .

* معاشلو ضابطان وسائر ديه سنوی و یريله جك مع تعینات بها معاش *
 * ايله اینگ و یريله جك نان عزیز تعیناتك مقدری *

سنوی	یومیه نان	قیه	غروش
۱۲۰۰۰	۱۰	(اوجاق ماہورلری)	
۰۰۰۰	۲۵	اوجاق اغاسنه	
۴۰۰۰	۳-	چفتلك خدمه سنه	
۲۰۰۰	۲	اوجاق كاتنه	
۱۰۰۰	۲	ایکی نفر كاتب یماغنه	
	۲	ایکی نفر كاتنه	

(اورطه ضابطانی)

۴۰۰۰	۵	بیكباشی یه
۱۲۵۰	۲-	كتخدایه
۱۰۰۰	۲	طوبیجی باشی یه
۵۰۰	۱	طوبیجی چاوشنه
۸۰۰	۲	عربه جی باشی یه
۴۰۰	۱	عربه جی چاوشنه
۵۰۰	۱-	جبه جی باشی یه
۳۰۰	۱	جبه جی چاوشنه
۶۰۰	۱-	مهتر باشی یه

(بلوك ضابطانی)

۱۰۰۰	۲	یمین و یسار اغالرینك هر برینه
۷۵۰	۱-	كذلك ایکی ملازم اغالرینك هر برینه
۵۰۰	۱-	اون ایکی بلوك باشیلرك هر برینه
۴۰۰	۱	یكرمی دوت ملازم لرك هر برینه
۳۵۰	۱	اون ایکی عامدارك هر برینه
۳۰۰	۱	اون ایکی چاوشلرك هر برینه

* یومیہ لواولان ضابطان و نفرات و سائرہ نك مع تعیین بہا یومیہ لرینك *

* مقداری *

بهرینہ ویریلان یومیہ نك مقداری	عدد نفوس	آچہ
(اورطہ ضابطانی و سائر خدمہ سی)		
جہ خانہ جی نفراقی	۸	۵۰
جہ جی قرہ قوللقجیسی	۲	۵۰
بلوک اماملری	۱۲	۸۰
سر سورنازن	۱	۹۰
ملازمی	۱	۷۸
سرطبلیزن	۱	۹۰
ملازمی	۱	۷۸
سرزلزل زن	۱	۹۰
ملازمی	۱	۷۸
سر نقارہ زن	۱	۹۰
ملازمی	۱	۷۸
(بلوکارہ مخصوص اولا ضابطان ایلہ نفرات)		
اون باشی	۰۱۲۰	۷۰
نفرات	۱۰۸۰	۵۰
طوپ اوستہ سی	۱۲	۷۸
طوپ خلیفہ سی	۱۲	۶۶
طوپچی نفراقی	۹۶	۵۸
عربہ جی خلیفہ سی	۱۲	۶۶
عربہ جی نفراقی	۶۰	۵۰
سورنازن	۱۲	۶۶
طبلیزن	۱۲	۶۶
سقا	۲۴	۵۰
قرہ قوللقجی	۷۲	۵۰

ضابطان و نفراتك وقت حضرده عمامہ لری برآطہ اولوب لکن وقت سفرده برآطہ کیمك مشقتی موجب و علی الخصوص حین محاربه ده و شدتلو روزکارلرده باشلرنده

طور میه جنی بدیہی اولدیغندن وقت سفردہ وحین مأموریتلرنده برآطه یرینه یککنسق اوله رق مناسب برکونه عمامه ویریلوب آنی کیمه لری جائز اولق ونقرات مرقومه آستانه ده اولدجه علوفه وتعیینات بهالری ماه بمه ایراد جدید خزینہ سندن ویریله کلوب لکن بر محله مأمور اولدقلرنده نان عزیز وشعیروصمان جانب میریدن ویریلوب علوفه وتعیینات بهالری ینہ ماه بمه اعطا وقلم ایله حسابی رؤیت وایراد ومصرف اولق شرطیله ایراد جدید خزینہ سندن علی الحساب مقدار کفایه آچمه اعطا اولنق ماده لری صکره دن قانونامه مذکورہ ذیل اولنمشدر .

فی ۲۱ ص سنه ۱۲۰۹

اوجاغ مرقومده اولان معاشلوضابطانک تاهلرینه رخصت ویریلوب لکن نفراتک مجرد اولملری لازمه دن اولغله بوماده دخی مؤخرأ قانونامه مذکورہ ذیل قلمشدر . برضابطلق محلول اولوبده مادونی مستعد بولنمز وخارجده مستعد بولنور ایسه امتحان اولنوب خارجده اولان کمسنه قنده ماهی ظهور ایدر ایسه ضابطلغه ادخالی جائز اولمسی مصطفی رشید افدینک تقریری موجبجه لوند چفتلکی قانونامه سنه ذیل اوله دیوخط هایون صادر اولغله اولوجهله قانونامه مذکورہ ذیل اولنمشدر .

فی غره ذ سنه ۱۲۱۰

(۵)

* عزت پاشانک صدارتنه دائر صادر اولان خط هایون *

سنکه وزیر اعظم وبالاستقلال وکیل مطلقم سین سنی سلام سلامت انجام شاهانه مله تطیغ ایلدیکمدن صکره معلوم صداقت مرسومک اولسونکه سلفک صدر سابق ملک محمدپاشا غایت پیرواختیار اولغله اموردولتی ادارهده فتوری درکار اولدیغندن امور نظامیه سلطنت سنیه مه صرف ذهن ایده میوب هر نقدر خطوط هایونمله کندویه تنیه ورخاوت ایلمیوب هر خصوصه اقدام وسی واهتمام ایلمسی تأکید اولنمشیکن بر فائده بی منتج اولمدیغی نژد شاهانه مده محقق اولغله صدارتدن عزل برله یرینه عاقل ومدبروصادق ومتبصر بروزیرک نصبی اقتضا ایلیوب سن وزرای عظام ایچنده ممدوح الافعال دولت تربیه سی اولدیغندن ضبط ایلدیکک مناصبه دخی حسن سلوک ایله معروف وعاقلانہ حرکت واطواریله موصوف اولوب عنایت رب العالمین ایله خدمت صدارتده دخی دین ودولتمه لایق ورضاء اللهه موافق اطوار وحرکتہ موفق اوله جنک ظاهر اولغله قریحه ملوکانه مدن مقام وکالت کبرایه استقلال تام ایله نصب اولنمش سیندر . کوره یم سنی کافه امور دولتی سکا احاله ایلدم نظام دولت

عليه می هر اموره تقدیم برله خیر خواهان دین و دولت و کار آشنایان سلطنت ایله مذاکره و هر مصلحتده اربابی استخدام ایلیه رك نظام دولت و رفع مظالم ایله استراحت رعیت و عمار مملکت خصوصاً لرینه غایت دقت و طشره لرده اولان عصات و اشقیایی سیاست ایلوب خصوصاً سرحدات استحكاماتنه و درون لرینه اصناف و نفقات و انواع لوازمات وضعنه سعی و غیرته اصلا قصور ایلمیوب هر اطوار کی شریعت غرایه تطبیق و عباد الله اوزر لرینه نشر عدالت و ظلمه بی مظهر سیاست و صداقتکارانی تلطیف و تحصیل رضای شاهانه مه غیرت ایلیه سن . جناب فیاض مطلق کافه امورده خیره موفق ایلیه آمین .

(۶)

* تصحیح سنه ایچون صادر اولان فرمان عالی *

مارت شهور رومیته دن اولوب و شمسیه اطلاق اولنان سنه نك ابتداسی اولوب و دائماً مستقر و تغیر قبول ایتمیوب كذلك شمس تحویل بروج اعتبار یله اوچوز التمش بش کون ایله یوم واحدك یکر می بر جزئندن بر جزء کون مارت حسابجه کامل برسنه شمسیه اولور و شهر محرم شهور عربیه دن اولوب و قمریه اعتبار اولنان سنه نك ابتداسی اولوب تقریباً برآی اوتوز و برآی یکر می طقوز کون اولمغله اوچوز الی درت کون بر سنه قمریه اولور بو صورتده سنه قمریه شمسیه سنه سندن هر بر بیلده اون بر کون و بر کونك یکر می جزئندن بر جزء کون نقصان اولدیغندن قمریه ایله شمسیه سنه لر ی مابیننده اوتوز اوچ سنه ایله درت آیده برسنه تفاوت اولوب بحسب التفاوت شهور عربیه فصلدن فصله انتقال ایدوب موسم حج و صیام گاه بهار و گاه شتایه مصادف اولوب مارت علی الدوام ابتدای بهارده برقرار و سنه قمریه متداخل و دوار اولمغله بیك سکسان التی سنه سنده ابتداء مارت ذی الحجه نك یکر می بشنجی کوننده واقع اولوب و سکسان یدی سنه سی ایچنده مارتك سنه سی تمام اولمیوب سکسان سکز محرمنك بشنجی کونی سنه سی تمام ایتمکله قمریه نك سکسان یدی سنه سنده مارت واقع اولمامش اولور .

سنه سابقهده توجیه و درعهده اولنان میری خدمت لری بیك سکسان یدی سنه سنه محسوب اولوق اوزره توجیه و خزینه دفتر لرینه بو وجهله قید و تحریر اولتمش بو اعتبار صحیح اولمیوب تداخل صورتی نمایان اولدیغندن غیر ی اختلاف سنه ایله نزاعدن خالی اولنماز سکسان یدی سنه سنده مارت واقع اولمغله سنه سابقهده و بریلان مارتی خدمت لرك دفتر لرده محال لری سکسان سکز محرمنده واقع مارتدن اولوق اوزره

سندلری تصحیح اولمق ایچون تلخیص اولنوب عرض اولندقده موجنبجه قید
و تصحیح اولمق بابنده فرمان عالی صادر اولمغین وجه مشروح اوزره قید اولمشدر .

فی ۱۹ جا سنه ۱۰۸۸

(۷)

* عاطف افندیڭک تقریری *

جناب نسقاساز امور کائنات جل شانہ عن النقائص والشبه والآفات حضر تلریڭک
ارادۀ علیۀ ازلیہی بوکارخانۀ دهر محدثک نظام وایجادینہ تعلق ایلدکده خرابه زار
غبرای سفلیہ اسکان وایوا ایلدوکی نوع بنی آدمک جهت معاش وضابطۀ انتعاشلریڭی
رابطۀ دقائق معاملاتہ ربط و تعلق ایلیوب تعلیم نکات عائدات وتفہیم رموزات
واردات سیاقندہ کتاب مستطاب حکمت مأبندہ (وهو الذی جعل الشمس ضیاءً
والقمر نوراً وقدرہ منازل لتعلموا عدد السنین والحساب ما خلق اللہ ذلک الا بالحق
یفصل الايات لقوم یعامون) نص کریمی ایله اراءت طریق هدایت رفیق ایتمکله
عمدۀ دانشوران اهل زکا و قدوۀ فطانت دثار فرق رشد ودها اولان علما و حکمانک
مضبوط جرائد آنارلری اولان قواعد روزنامۀ مصنفاتی مدار ضابطۀ کافہ معاملات
اولمغله کانون دولت و آیین سلطنتک ابتدای ظهور ندبرو کافہ انامک خصوصاً
واردات خزان ملوکک جهت ضابطہ سی شرائط حسابہ منوط ودقائق مسائل ضرب
وتقسیمہ مربوط اولدیغنه بناءً فرقہ کتبه و زمرة خدمۀ خزینہ نک قوۀ فکریہ لری
دائماً وظیفۀ حاللرینہ مصروف و عنان همتلری ہر بار سمت دقائق امورہ معطوف
اولمسی لازمہ حاللرندن اولدیغی امر بدیہی اولوب لکن ذیل محررانہ مقصود
اصلی اولان دقائق امرک صحتی تشیید و تأیید ایچون مسائل ارباب ہیئتک خلاصہ
مقاللرندن بعض قواعد مرعیہ نک اشبو مجلدہ تحریری اختیار اولندی .

خلاصہ می بودرکہ زمان ہجرت نبویہ علیہ افضل التحیہ حضر تلری متعین و متفق
علیہ اولدیغنه بناءً سنہ مزبورہ محرمنک اولی تاریخ اسلامہ مبدأ اعتبار اولمشدر
واهل شرع عندندہ بوتاریخ عربینک شہوری رؤیت ہلالدن رؤیت ہلالہ دک
اولان مدندر بوشہور کاه اوتوز و کاه یکریمی طقوز اولور زائد و ناقص اولماز
ودرت آی متوالیا اوتوز و اوچ آی متوالیا یکریمی طقوز اولمق جائزدر و ہراون
ایکی شہرہ برسہ اطلاق ایدرلر و بوسورندہ شہور و سنون قریہ حقیقیہ اولور
لکن شمس و قمرک حرکتلرندہ و اوضاع مساکندہ و قمرک شمسدن بعدندہ
اولان اختلافات سببی ایله رؤیت ہلالدن رؤیت ہلالہ دک اولان مدتی ضبط ممکن

اولدینگی اجدن امور شرعیه تعلق اولیان امورده حساب واهل نجوم شمس و قمرک سیر اوسط اعتباریله اجتماعری بیننده اولان مدته برشهر دیرلر وهر اون ایکی شهره برسنه دیرلر و بوضورته شهور و سنون وسطیه اولور و بواعتبار ایله هر شهر یکریمی طقوز کون اون ایکی ساعت و قرق درت دقیقه دن عبارت اولدینگی ادوات رصدیه ایله تحقیق و اثبات ایلدیلر و رأس سنه قریه اولان شهر محرمی اوتوز و صفری یکریمی طقوز اعتبار ایلوب بومنون اوزره الی آخر السنه برین اوتوز و برینسی دخی یکریمی طقوز عد ایلهرک سنه کامله قریه نك اعداد یومیه سنی اوچوز الی درت کونه ابلاغ ایلدیلر وهر شهرده ترك و اعمال ایلدکلی قرق درت دقیقه کسوردن برسهنده مجتمع اولان بشیوز یکریمی سکر دقیقه که حسب الساعه سکر ساعت و قرق سکر دقیقه ایدر سنوی اولمقدار ساعات و دقائقدن هر اوتوز سنه اون بر کون زائد بولدقلی جهندن اوتوز سنه ذی الحجهی اون بردفه اوتوز کون عد ایدوب اول سنه لره کیسه دیرلر و علی هذا التحقیق سنه قریه وسطیه اوچوز الی درت کون و سکر ساعت و قرق سکر دقیقه اولمش اولور و سنه شمسیه نك مدتی زنج کورکانی رصدی مصداقجه اوچوز التمش بش کون و بش ساعت و فرقی طقوز دقیقه اولوب بینهماده تفاوت علی وجه التقریب اون کون یکریمی بر ساعت اولمق اقتضا ایتکله تاریخی قری اولان و ظاهره ماده داخل علی وجه الضروری ظاهر اولور .

بوضورته تاریخی شمسی اولان مقاطعات عمالی هر اوچ سنه که اوتوز الی شهر ایدر ایام مجتمعه متفاوتدن هر برسهنده حاصل اولان ایامک اوچ سنه مجتمع اولان برشهر کاملی اعتبارده مجبور اولوب اوچ سنه اوتوز الی آی وظائفی یاخود شهری اعتبار اولنان سائر مصارفات متضیهی بر آی زیاده سیله اوتوزیدی آی اعتبار ایلهرک هر اوتوز اوچ سنه برسهنه ک مصرفی و وظائفی زیاده و یرمکه مجبور اولورلر بو کیفیتک خبایای خفادن خارجه اخراجنه جهت تمثیلی بودر که مثلا سنه قریه نك اجزاسندن عبارت اولان شهور عربیه دن رأس سنه اعتبار اولنان غره محرم ایله شهور رومیه دن رأس سال شمس اعتبار اولنان مارت مثلا الی اوچ یاخود الی درت سنه هجریه دن اعتبار اولمق لازم کلسه بالاده ذکر و تفصیل اولدینگی اوزره کسور متفاوتدن مجتمع اولان کیفیات دقیقه موجبنجه بیک سکسان یدی تاریخنه مرتقی اولنجه برسهنه قریه داخل و بیک سکسان یدی تاریخندن دخی بیک یوز یکریمی برسهنه هجریه به کلنجه ایکی سنه قریه و بیک یوز یکریمی سنه هجریه دن بیک یوز الی درت سنه هجریه سنه کلنجه اوچ سنه قریه داخل ایدوب

حسب الدقة سنة هجرى عددى بيك يوز الى درده منتهى اولدوقده سنة قمرية عددى
كبي يوزسنة اوليوب بلکه طقسان يدى سنه اولمق اقتضا ايلمکله اوچ سنه ناقص
اولمش اولور السنة خدمه خزينه وكافة ناسده الى درت مارتى الى بش مارتى ديو
تعير اولنور بوغلطه اعتبار سببى ايله ميانه ده اوچ سنة قمرية متداخل اولوب قليل
وكثير مصارف خزينه هر نه ايسه ذكر اولنديقى اوزره بيك الى سكر سنه سندن
بيك يوز الى درت سنه سنه كلنجه ميانه ده مرور ايدن طقسان التى سنه ده اوچ سنه لك
مصرف زياده ويرلمش اولوب اصطلاحات كتبه خزينه ده (واجب عن سنة فلان)
ديو يازيلان تعبيرك شرائط وضعيه سنه اصلا اعتبار اولنماش اولور .

وبو ماده يه نص كرىمدن دخى اشارت اولنديقى كبار مفسرين حضراتى ثبت جريده
آثار بيورمشار (وفى الفرقان اشاره الى هذا التفاوت كما روى عن على ابن ابى طالب
رضى الله عنه وماله انه سأل يهودى عنه وقال وقع فى كتاب الله الكريم) (ولبشوا فى كهفهم
ثلثمائة سنين وازدادوا تسعا) وفى التوريه ثلثمائة سنين فقط وليس فيها تسعا فكيف
يكون التطبيق والتوفيق فاجاب عنه رضى الله عنه ان السنة الواقعة فى التوريه على حساب
الشمسية وما وقع فى القرآن على حساب السنة القمرية ولهذا قال الله تعالى وازدادوا
تسعا هذا اشاره الى تداخل تسعة سنين فى ثلثمائة سنين كذا)

بناءً على ذلك دولت عليه ابديونند خزينه سى عائداتندن عبارت اولان كافة وارداتك
وعامة مصارفاتك مجموعى سنة كاملة اعتباريله جارى اولديغنه بناءً عائدات معينه
بعضيسى شهور شمسيه وبعضيسى دخى شهور قمرية اعتباريله مشوت صحائف جرائد
اولوب لكن رأس شهور شمسيه اعتبار اولنان مارتدن غايه شباطه وارنجه مقدمه
مذكوره ده وصف وتفصيل اولنديقى اوزره ميانه ده كذران ايدن اعداد ايام
حسب العدد اوچيوز التمش بش كون ورأس شهور قمرية اعتبار اولنان محرمدن
دخى غايه ذى الحجه يه منتهى اولنجه مرور ايدن اعداد ايام دخى اوچيوز الى درت
كوندن عبارت اولوب لكن فى الاصل رأس تاريخ هجرية اعتبار اولنان سنة قمرية نك
اعداد ايامى سنة شمسيه ايامى عددندن او نبركون نقصان اولديغنه بناءً كل سنته تقريباً
اونبر كون تفاوت نقصانى سببى ايله هر او توز اوچ سنه ده بر دفعه شهور قمرية نك
تداخلى وقوعندن فساد حساب خزينه اقتضا ايلوب خصوصاً يوز يكر مى بر سنه سنه
واقع اولان تداخلدن اشبو بيك يوز الى درت سنه سنه كلنجه او توز اوچ سنه مرور
ايدوب الى درت سنه سنه فكر وملاحظه اولنان ماده تداخل واقع اوله جفته بناءً
بسط وتمهيد اولنان محذوراتدن حادث وعارض اوله جق علت تداخله امكانى اولنديقى
وجهله تهيه تدابى لازمه حالدن اولديغنه بناءً بعض عمده كتاب و نقاوه اهل حساب

ایله طریق مداومی ملاحظه اولندقدنه بالاده تفصیل اولندیغی اوزره تگون تداخل سببی ایله و رای پردۀ خفاده متکون اوله جق محذورات خفیه دن بشقه فضله کورینوب خزینۀ عامر هیه بارکران ظهورات مثابه سنده عارض اوله جق او جاقلق مواجباتی مصرقلری (عن) اعتبار اولنان غرۀ محرم رأس شهور شمسیه دن اعتبار اولنان مارتۀ تحویلدن غیری چاره سی اولمیوب لکن ذکر اولندیغی اوزره سنۀ کامله سی اوچوز الی درت کوندن عبارت ایام سنۀ قریه مصرقلک عن غرۀ محرم دن ایکن سنۀ کامله سی ایامی اوچوز التمش بش کوندن عبارت سنۀ شمسیه مارتۀ منصرف اولدیغی صورتده ظاهر حالده سنۀ شمسیه یه نقل سببی ایله اونبر کونلک مصرف یومیۀ زائد اولوب لکن حقیقت حاله نظر آتدخال نزاعنه علت مستقله اولان سبب خفی اشبو صورتده ظاهر و بیدار اولان اونبر کوندن عبارت اولوب و مقصود اصلی دخی بهر سال سنۀ شمسیه ایله سنۀ قریه ایامی بینده تفاوت اعداد نسبیۀ دن تگون ایلیان اون برکونکۀ اوتوز اوچ سنۀ ده بر دفعه مع تفاوتۀ اوچوز التمش بش کوندن عبارت برسنۀ کامله معنویۀ نک نزاعی ماده سنک انحاسی اولغله بو صورتده مثلاً یومی برکیسۀ رومی مواجبی اولان برقلعه نفراتی یومیۀ سی غرۀ محرم دن اعتبار اولندیغی صورتده سنۀ مزبورۀ ذی الحجه سی غایتنه دک ایام سنۀ کامله اعتبار اولنان اوچوز الی درت کوندن اقتضا ایدن اوچوز الی درت کیسینی ینه تماماً آلق و ماده نزاع تفاوتی محو و زاله ایچون سنۀ شمسیه یه نقل سببی ایله متکون اولان اونبر کوندن انماض و تعامی اولمقدۀ او جاقلق احتجائی نفراتۀ بردرلو غدر ملحوظ اولدیغی امر بدیهی اولغله اول مقوله محرمی اولان او جاقلق یومیۀ سی سنۀ قریه ایامندن عبارت اولان اوچوز الی درت کونلک مواجباتی یه تماماً آلق و سنۀ شمسیه یه نقلی سببی ایله متفاوت کورینن اونبر کون مسکوت عنه قالمده بأس ظامری ملحوظ اولمیوب لکن بو امر خفی المنافعک نکتۀ مکتومه سی دقائق حسابندن بی خبر نفرات قلاعه دفعۀ تفهیمی نوعاً صعوبتلو اولدیغی جهتدن تدریجی تفهیمه وسیله اولسون ایچون بو کیفیتک مقدمۀ شروعی بعنایۀ الله تعالی بودفعۀ فتح و تسخیری میسر و نفراتی مجدد اوضع و تحریر اولنه جق بلغراد قلعه سندن و مضافتندن اولان قلاع و پلنغه نفراتندن بدأ اولنسی مستحسن کورلمکله ابتداء امرده نفس بلغراد قلعه سنک الآن تحریرینه مباشرت اولنان پیاده و سواری یرولو نفراتندن شمسی یه دک هر نه مقدار نفراتی تحریر اولنمش ایسه انشاء الله تعالی یوز الی سنۀ سی ذی الحجه سنک اون اوچنجی کوندن واقع اوله جق الی ایکی سنۀ سی مارتی دخولنه دک هر نه مقدار یومیۀ لری یورر ایسه بشقه جه اجمال اولنوب اقتضا

ایدن یومیهلرندن مجتمیع اولان آچمه بشقه ویرلمک والی ایکی سنه سی مارتند نصکره سنه شمسیه اعتباریله یومیهلری مارت ابتداسندن یوریمک وان شاء الله تعالی سنه سی تکمیلنده بالاده بسط وتمهید اولندیغی اوزره سنه قریهده آله جقلری او چیوز الی درت کونلک یومیهلری او چیوز الی درت کون اعتباریله تماماً ویریلوب نزاع تفاوتی ازاله ایچون سنه شمسیه نقل سببی ایله ایام سنه شمسیه دن فضله کورینن اونبر کونه تعرض اولماق وسندی اجماللری سنه شمسیه اعتباریله او چیوز التمش بش کوندن باغلوب اونبر کونلکی دفع نزاع تداخل نامیله فرو نهاده و او چیوز الی درت کون اعتباریله مواجبلری ویرلمک وبوسیاق مرعیه بلغراد اقلامندن اولان قلاع و پلنغه لرده مرعی و معتبر طو تلمق اوزره محلنه قید و بلغراد خزینه سی طرفنه منفصلاً صورتی واقضاً ایدن احکامی یازلمق بابنده امر وفرمان دولتو سلطام حضر تلی نیکدر .

(۸)

* لوندیره سفیری آگاه افندی نیک تقریری *

اشبو ماه رجب شریفک سکزنجی پنجشنبه کونی شرفیاب حمول اولدیغ نامۀ عنایتیۀ ملوکانه وهدیه بهیۀ حضرت خسروانک بجرأ وبرا آلائی والا وکمال ترحیب بیهمتا ایله توصیلی و تسلیمی مرتب و مصمم اولدیغنه بناءً اوچ کون مقدم انکلتره دولتک بشرفیاتی مقامنده اولان شوالیر قرال حشمت اشمالک سرکاتبی ایله برابر طرفرزه کلوب قرال مشارالیه طرفسندن ترتیب واجرا اولنه جق رسوم آلائی افادیه مأمور اولدقلرینی بیان وبوبابده هروجهله تلطف واحترامز خصوصی اخص مطالب ومرامی ایدوکنی ادرا واعلان ومقدما نهر طایمسندن عبور ایچون تدارک اولنان معنون قایقلا آماده ومختصر آنجق بحکمة الله تعالی بوسنۀ مبارکه ده شدت شتا متمادی وزیاده اولغین اکثر اوقاتده نهر مذکور منجمد وآلائی بحریده تکلف ومشاق هویدا وترکی اولی اولوب هان آلائی بری ایله اکتفاسنه بالندا کره التماسزده مساعدده وقرار ویردکده نهر مزبور اوزرنده واقع لوندیره شهرینه تخمیناً مسافۀ بعدی برساعت اولان چلسی نام سرای عالیده ترتیب ضیافته قرال جانبندن برفلد مارشال مأمور اولدیغی وپیاده وسواری کزیده عساکری ضابطانیله موجود بولنه جقلری وسرای مذکوره واردیغمزده فلد مارشال مرسوم بزى استقبال وقرال طرفسندن مأموریتی افاده ایله بو خدمت کندویه باعث فخر واقبال اولدیغی طرفرزه تشکر و اشاره ایلیه جکنی وقرال مشارالیهک التیشیر بارکیلی برهنطوی بزم ایچون بری دخی نامۀ هایون ایچون وایکی عددی دخی لاجل

الاحتیاط تزین آلائی و مناسبات ایچون درونلرنده آدم اولمیه رق کوندریله جکی
 و بوندن بشقه قرالیچه جنابلرینک و ولی عهدی اولان پرنج دهغالک وایکنجی
 و اوچنجی اوغالریله قرداشنک برر عدد هنظولری درونلرنده معتبر آدملریله
 وسائر کبرادن بومثلو معنون هنظولر ایله یکریمی مقداری میلور موجود و آلایده
 برابر بولنه جقلری و ولی عهد اولان مومی ایله پرنج دهغالک باش شامیرلانی میلور
 چرسی مهماندارلغمز خدمتته تعیین قلندیغی و یوم مز بورده فرنکی حسابیله
 ساعت اونده ایکن یعنی وقت زوالدن ایکی ساعت مقدم سرای مز بورده موجود
 بولماز و ترتیب اولنان ضیافته تعیین قلنان کبرایله برابرجه اولماز و بعد
 الطعام حرکت و قیام اولنق و هدیة هایبوندن اولان آتار تسریج و تزین اولنوب
 پیشکاهمزده یدکده کتمک و سرای مز بوردن بدأ آلائی و مرتب اولان محللاردن
 گذار اولنه رق ساعت برده ایکن یعنی زوالدن بر ساعت صکره قرال سراینه
 وارلق و بوندن دخی مهماندارلغمزده مأمور دیگر میلور بزی استقبال ورکابمز
 دوشوب تخصیص قلنان اوطیه واریلوب بر مقدار توقف ایله تنفس و آرام
 حصولدن صکره خطوات تعظیم و اجلال ایله نامه عنایتلامه ملوکانه نک توصیل
 و تسلیمنه ابنتار اولنق خصوصلرینه بالندا کره قرار ویرلدی . فرداسی فلدمارشال
 مرسومک طرفزه برکاغدی کلوب مالی قرال جنابلری طرفندن ترتیب ضیافت
 و توقیر و احترامزه مأمور اولدیغی و بومقوله مبارک و خرم مأموریت کندویه
 سرمایه دولت و باعث فخر و منقبت ایدوکنی و وقت معین و معهودده سرای مذکورده
 بولماز و بعونه تعالی واردیغمزده اکرام و احترامز خصوصنده بذل ما حصل
 قدرت ایده جکنی اعلام و دعای دوام دولت علیه قیام ایله ختم کلام ایدر .

بونلردن ماعدا هدیة هایبوندن اولان بوغچهلر و مجوهر صورنجبلر و پشتولر ایله
 قهوه فرده لرینک آلایدن برکون مقدم قرال سراینه ارسال و توصیلی مناسب کورلدیکی
 قرال مشار الیهک باش شامیرلانی طرفزی آگاه ایتمکین برمنوال محرر حرکت
 اولنوب یوم چهارشنبه وقت عصره قریب سالف الذکر هدیة ملوکانه اسم و رسملرینی
 مبین یاقته لری اوزرنده اوله رق عربلهه تحمیل و باش ترجمانز قوللری ایله
 تسبیل و مومی ایله باش شامیرلانه تسلیم و توصیل ایتدیریلوب فرداسی پنجشنبه کونی
 علی الصباح هدیة هایبوندن اولان آتار و طاققلری آدملریز قوللری ایله سرای
 مذکورده کوندریلوب تسریج و تزینلرینه اهتمام و بزلر وارنجیه دک حاضر و آماده
 اوللری تنیه و اقدام اولنمشیدی . وقت معهود دخواننده بو بعد عاجز سرکاتبی
 افندی بنده لری و ترجمانز قوللری ایله عربله ریمزه سوار واجابت دعوته ابنتار

اولوب قرب سرايه وصولزده قوالير تعبير ايتدكاري آتلو عسكرى ضابطانيه
ايكي جانبه ديزلش دران بير اقرلين كشاد و موزيقه ديرلر طبل و علملري ولوله كير
كئبد هفتاد اولوب سراي قپوسنه دخولزده پياده عسكرى دخي بوضورته
صف بسته و تعليم هنره اقداملري ائناسنده ميانلرندن گذار و موقوف سرايه وصول
و قرارده فلد مرشال مرسوم و سائر بولنان ضابطان و اكابري بزي استقبال
واوطيه وارديغمزده مرسوم ينده اولان كاغدي قرائت برله ترچانمز و ساطتيله
طرفزده ارائت اولندي . مالي امر محاربه و مدافعه ده بذل مجهود و افاء وجود
ايه اثبات شجاعت و ابراز خدمت و غيرت ايدنلره مقابله خدمتلىنه مكافاة ايچون
بنا و انشا اولنش اشبو سراي دلارائك ضابطي بولنديغم حسييله طرف دولت عليه دن
مثلي نامسبوق بو كونه مبارك و خرم و محض لطف و كرم ايلچليك ايله تشريفكز
و قرالم طرفندن اجراي مراسم مهمانوازيلري خدمته مأمور اولماز بكا باعث
فخر و مباهات و سرمايه رفعت و سعادتدر . جناب واهب الآ مال ايكي دولت بيننده
برقرار و كمال بولش صفوت و موالاتك تزايديني موجب طرفينك مرام مخصوص
خير انجاملري اولان تجارث ماده سنك تايد و حصولي ميسر ايدده و جناب
سعادتكزي هر حالده موفق ايدوب رفاه حال و صفاي بال ايله دائما خرم و شادكام
ايله ديوب تكميل ثنا و دعاسنده طرفزدن دخي دولت عليه ايله انكلكتره دولتي
بيننده خلوص و موالات و صاف اندر صاف موافاة دمبدم مزداد اولديغنه بناء
شوكتلو كرامتلو قدرتو ولي نعمتم پادشاه عالم پناه افدمنز حضر تارينك ميل درون
كرامتمشحون شاهانه لري مخصوص اولوب تزويد مودت و اهالي طرفينك باعث
استيناس و الفتلري ايچون امر تجارثك تمهيدى اراده سنه لري اولغين بو بابده
انكلكتره لو حقهنده طرف دولت عليه دن بر وجهله دريغ اولمديني بعونه تعالى
رفته رفته مشهودكز اوله جق ثمره دن معلومكز اولور . سز دوستمرك بو
مأموريتي ربتلو منزلتو قرال حشمت اشمال جنابلرينك طرفزه بر لطف عظيمندن
معدود اولوب غايته نمون و محظوظ اولدم هر حالده مستدام عمر و عافيتده اوله سز
جوابندن صكره مهماندارمز ميلور چرسى دعوتمزه كلوب افاده مأمورينه شو
وجهله مبادرت ايلديكه دولت عليه ابدى الدوامك حقهنده حشمتلو مكتلو قرالم
جنابلرينك صفوت و موالاتي بر كمال و شوكتلو كرامتو شجاعتو پادشاه اسلام
و شهنشاه و الامقام حضر تلري جناب سعادتكزي بو مبارك مأموريته اتخاب و بو
جانبه ايلچليك ايله ارسال بيورملري دخي غايته باعث محظوظيت و ممنونيم اولمشدر
ديو شفاها صدور ايدن ككاتي قرالم طرفندن مأموريم حسييله جناب شريفكزه افاده

و تابع پیام ایدرم و بومأموریت بکا سرمایه دولتر دیدکده طرفزدن دخی دولت
 علیه ایله انکلتره دولتی بیننده دوستلق حقیقی اولدینی غیرخفیدر باخصوص شوکتلو
 کرامتلو قدرتلو ولی النعم پادشاه عالم پناه افندمز حضر تلرینک میل درون و توجه
 صفوت نمون شاهانه لری تزیاید محبت و مودت ایدوکنه مثلی نامسبوق اشبو ایلیچیلک
 ماده سی شاهددر . قرال حشمت احتفال جناب لرینک دولت علیه حقنده بو کونه
 اظهار خلوص و صداقت لرندن و تخصیص بو ایلیچیلک مزدن محظوظ و ممنونیت لرندن
 و طرفزه جناب کز و ساطیبه بیاندن بغایت ممنون اولدم . و عندهمه بر لطف عظیم
 و عنایت جسیمدن معدوددر . همواره مستدام عمر و عافیتده اوله سر جوابیله ختم
 کلام اولندی بعده تهیه و آماده اولنان ضیاقتدن شکرله و میوه تناولی و شرب قهوه
 ایله اکثفا اثناسنده آتار دخی مزین و مز رکش برر ملس آدم لریمز یندنه ساحه
 سرایده حاضر و مهیا دولاشدیرلمده ایکن وقت موعود دخول و ترتیب آلائی تماماً
 حصول بولدینی خبر ویرلدکده نامه عنایتیه ملوکانه کمال تعظیم و اجلال ایله بعدالتیم
 سرکاتمز افندی قوللری دیدینه تسایم اولنوب حضار مجلس پیشکاهمز دوشوب
 هنطوه بنجیه دک تشییع ایلدیلر . قرال مشارالیهک بزم ایچون تخصیص اولنان
 معنون هنطویه مهماندار مز طرف یسارده و تشریفاتی مقامنده اولان شوالبیر ایله
 ترجمانز قوللری مقابله مزده اولمق اوزره خراسانی دستار و سمور فائض السرور
 ایله هنطوه سوار و اتباع مزدن سکر نفر قوللری اورته قوشاق رکابمزده و کذلک
 درت نفر چوقدار دخی و رامزده نامه هایون هنطوی پیشکاهنده یوریمکه تنظیم
 و تصمم و پیشکاه آلایده سرکاتی میلورک هنطوی دلیل اولوب وراسنده رخت
 و بساط ایله مزین بررأس بارکیرمز اوزرنده آل سایه شمسه لی قبود ایله میراخور
 مقامنده برنفر آدممز وراسنده هدیه هایوندن اولان آتار برر برر یدکده چکیله رک
 وکه وکاه ایکی طرفه سهیل اوره رق و جنبش رقتسارلری کالده اوله رق یوله عزیم
 و خرام و آردلری صره بو عبد عاجز بعده سرکاتمز نامه هایون ایله بعده قرال
 جناب لرینک ایکی عدد هنطوی و صکره قرالیچه جناب لرینک و برنج دهغال و برادری
 دوقده قله رنج و قرال مشارالیهک برادری دوقده غیلوسزک برر قطعه هنطولری
 دروننده معتبر آدملری اوله رق علی التتالی بر برینی والی و تالی اولوب بعده بو عبد
 عاجزک التی بارکیلی برر قطعه هنطوی دروننده معیت مزده اولان کشی زاده لر و ترجمان
 ثانی لیغور شقو قوللری را کب اولمشیر ایدی .

بونلرک وراسنده کبرادن یکریمی مقداری میلورلر بو مثللو مکلف هنطولر ایله طورنه
 قطاری دیزلوب ازدحام ناسدن آلایه کساد و فساد کلامک ایچون ایلروده و صاغده

وصوله الارنده دکنک ایکسوز نفر ضابطان پیاده یوریه رک و یوللری تطهیر
 ایدرک احتشام تام واحترام مالا کلام ایله توجه و عزیمته قیام اولندی . بالاده بیان
 اولندی اوزره ایکی جانبده صف بسته و ایستاده اولان سوارلی و پیاده ضابطانیه
 اثنای کذارمزده سابق سابق اوزره اظهار مهارت و ادای مأموریه سمی و غیرت
 ایلدیلر . سیر و تماشایندلر متحیر و سرگردان اوله رق و زحام ناسدن قطعاً عارضه
 توقف و قوعبولیه رق سنجه مز بارق تعبیر اولنور قرال باغچه سنه وارلدقده قرالیچه
 جنابلرینک سرایی بو محله اولوب قرال و قرالیچه و کریمه لری و سائر اقارب و تعلماتی
 بوسرایی نچرلرنده سیر آلایه ناظر اولملریله بو کونه مشعشع و مزین دوناتمش آت
 مشهودلری اولمدیغندن غایت خوشلرینه کلوب آتلری حضورلرینه احضار و حواله
 امعان انظار ایله تحصیل مسارلرنده نصف چاریک مقداری هنظورلرده توقف و آرام
 وینه عزیمته قیام اولندی . عزین بارق تعبیر اولنسان باغچه نک قپوسندن خروج
 و بیقادیل تسمیه اولنور ره راسته ولوج اولنوب احسن وجهله سنجه مز تعبیر اولنسان
 قرال سرایی قپوسی پیشکاهنه وصولمزده آتله تسلیم اولنه جق محله ارسال و قرال
 حشمت اشمالک سرکاتی ایله دیگر مهماندارمز پوسقونام میلور استقبال
 ایدوب تخصیص قانسان او طیه استراحت و آرام ایچون خرام اولندی . بو محله
 دخی سرای ضابطانی صف بسته بولنوب مرورمزده اثبات هنر ایلدیلر . بو ائنده
 نامه عنایتمایه ملوکانه سرکاتمز افندی بنده لری یدنده تخمیناً برچاریک مرورنده قرال
 مشارالیه دیوان او طه سنده کندویه مخصوص اولان آل قظیفه دن اشمله لی صندلی
 اوزرنده بالمله اکبر و رجالی و دول ایلچیلری ایکی جانبده صف بسته قیام و رسم
 دیوان واحشام تمام ایله دعوتمز بر میلور کلوب تبلیغ پیام ابتدا معیتمزده
 اولان کشتی زاده لر یانلرنده رفاقت ایچون بر میلور برابر یوریه وب و رلرنده
 ترجمانلریز و انکلتره دولتک ترجمانی و قرال مشارالیه ک سرکاتی و بوندن صکره
 سرکاتمز افندی بنده لری یالکزجه نامه هایون ایله پیشکاهمزده بو عبد عاجز صاغ
 طرفده مهماندار و جانب یسارده تشریفاتیچیلری اولان میلور ایله حرکت و او طه دن
 خروجمزده تکرار دعوتمز اکبر رجالدن میلور آلسفورت کلوب تبلیغ پیام
 و دیوان او طه سی قپوسنه خرام اولندقده ایلروده کیدن کشتی زاده و ترجمانلر
 رفیق لری ایله ایکی طرفه آچیلوب قرال مشارالیه ک باش شامیرلانی بزی استقبال
 و صاغ طرفه کچوب مهماندار دخی صولده قلوب سرکاتمز یدنده نامه عنایتمایه
 شاهانه یاننده اوله رق دیوان او طه سی قپوسنه دخولمزده نامه هایونه تعظیا قرال
 مشارالیه دفعه باشدن شایقه سن الینه آلوب اجرای مراسم احترامه حرکت و قیام

و او طه نك اور طه سنه وار لدقده یرندن قیام بز دخی بو ائنده مقابله سنه خرام ایلدك
 دولت علیه ابدی الدوام ایله انكلكتره دولتی بیننده من قدیم الایام مؤسس و مھمد اولان
 بنیان مشید الاركان موالاته و موافاة دمیدم مبرم و مستحکم اولمقده اولوب ماتقدم نبرو
 طرفیندن معتبر و محترم اولان عهد و موثیقك ثمره سی اولان امر تجار تك ترویج
 و تكثیرینه مدار اعتنا اولور و سائل و حالاتك استحصالی و طرفین رعایاسنك جانین
 ممالكنده تجارت و سیاحتیرینه كمال رفاهیت ایله كشت و كذار لری و فروعات
 ولوازماتك استكمالی و بین الدولتین اولكیدن بر قاچ قات زیاده دوستق و صفوتك
 تزیادی و اتحاد و اتفاقك تمھیدی ایچون مجدداً شروط تنظیمی اخص مطالب دولت علیه
 اولمق ملابسہ سیله بوداعیلری طرف سلطنت سنیه دن بیوك ایلچیلك ایله ارسال
 قلمشدر بعون الله تعالی امید وار خدایمكه بومقوله خیری عام دولتین اھالیسنه نفع
 و جداسی تمام مطالب و امنیة خیر انجامك بو عبد عاجز یوزندن قرین ختام اولمسیله
 جمله مز مسرور و شادكام اولم دینیلوب ترجمانز و ساطیتله تبلیغ پیام و مرام اولندقده
 قرال مشارالیه جناب لری دخی بو وجهله جوابه بدأ كلام ایلدیکه شوكتلو كرامتلو
 مھابتلو پادشاه اسلام و شهنشاه واجب الاحترام حضر تیرینك طرفه میل درون
 صفوتمون و توجه خصوص مودت مشحون ملوكانه لری دركار و زیاده ایدوکی مجزوم
 ایکن افاده و افھامكز بر قاچ قات دخی تأیید و تشیدینه باعث و بادی اولوب عن صمیم
 البال اعتماد و قبولم بر كمال اولمشدر اشبو ایلچیلككز ماده سی طرفدن بونك بر نمونہ سی
 عد اولمشدر مقابله بالئلی طرفدن دخی لازم كلوب قدیم نبرو دولتین میاننده تأیید
 بولان اتحاد و حسن معاشر تك بوندن بویله دخی ثبات و تكثیرینه كرمیتله میل
 و رغبتمه دولت علیه شك و شبھه ایتیمه و سزى اتخاب و بومقوله مبارك و خرم ایلچیلكه
 مأمور قلمكز دخی زیاده سیله باعث محظوظیت و ممنونیتم اولمشدر .

و شوكتلو كرامتلو شجاعتملو پادشاه اسلام حضر تیرینك دولت و اقبال و اجلال لری
 تزیادینه عن صمیم البال میل و رغبت و خواهشمی صداقتله افاده كزی مأمول و التماس
 ایدرم دیو دیوان ترجمانی و ساطیتله مالی طرفزه تلقین اولندقده بعون الله تعالی
 ثمره صداقتمزى بوندن بویله اقتطاف و اجتناب بیوره جقارنده شبھه اولنیمه دینلدكن
 صكره سر كاتمز یدندن نامه عنایتیامه ملوكانه كمال تعظیم ایله اخذ اولنوب حالاً اریكه
 پیرای سلطنت عثمانی شوكتلو كرامتلو مھابتلو قدر تلو ولی نعمتم افندم پادشاه عالم پناه
 سلطان سلیم افندمز حضر تیرینك سز حشمتلو مكنتملو منزلتلو دوستلیرینه تمھید
 موالات و مودت خسروانه لیرینی مشعر نامه عنایتیامه ملوكانه لریدر دیرك بعد التلیم
 قائماً یداً بیید تسلیم و خطوات تعظیم ایله اخذ ایدوب دول امورینی رؤیتہ مأمور

میلور غر توپله تودیع ایتدکده مکتوب حضرت صدارتناهی دخی سیاق مشروح
 اوزره توویل اولندقدن صکره قرال مشارالیه سرکاتیز و تر جانلر ایله السنه تحصیبه
 مشغول کشی زاده لر تعریف و توصیف اولنوب ادای آداب سفارت ختام و حضور ندن
 عود و خرام اولندی و رامزدن سرکاتی میلور کلوب هدیه هایونیدن و علی الخصوص
 آت طاقلر ندن و پشتولردن غایتله محظوظ و ممنون اولدقلری تشکرینی جنابکزه
 افاده یه قرال طرفندن مأمورم دیرک افهام و تبلیغ پیام ایلدکده دوستک تحف
 و هدیه سی دوست صادق محظوظ ایدر و قرال جنابلرینک بوتلفت و تطفلری دخی
 ختامه مسک قیلندن اولوب حاصل اولان سرور حد تعریفدن بیروندر دینلدکن
 صکره قرالیچه جنابلرینک طرفندن دخی دعوتیزه ایکنجی شامبرلانی کلوب خیر
 و یردکده سیاق سابق اوزره واریلوب باش شامبرلانی اولان میلور پرتون ایله
 او طه سنه دخولده دفعه قیام بز دخی مقابله و حداسنه خرام و دولت علیه ایله
 انکلتزه دولتی بیننده مشید و مشدد اولان مصافاة و موالات و صدق و خلوص
 و موافاتک ثمره سی اوله رق شوکتلو شجاعتلو ولی نعمتم پادشاه عالمناه افدمن
 حضر تلرینک درون کرامت نمون شاهانه لرنده باختصاص بولغله انکلتزه دولته
 توجه ملوکانه لری درکار و بودوستاق و محبت برقاچ قات دخی زیاده سنه و سیاه انیله
 اولوق ملبسه سیله بوداعیکیزی بیوک ایلچیلک ایله بوجانبه مأمور قیلمشلردر .
 جنابکز ایله بومثللو شوق و کرمیتله ملاقاتمدن و مظهر التفاتکیز اولدیغمدن تزیاید
 محبت و مودته دلالت ایدر برنونه اولدیغندن شوکتلو کرامتلو قدرتلو ولی نعم
 افدمن دخی محظوظ اوله جقلرنده اشتباه بیورلیه دینلدکده قرالیچه جنابلری دخی
 شوکتلو کرامتلو مهابتلو پادشاه اسلام و شهنشاه و الامقام حضر تلی طرفندن
 بومثللو مسعود و خرم ایلچیلک مشاهده سی باعث ممنونیم اولوب باخصوص جناب
 سعادتکیزی بومأموریته اتخابلری ماتقدمدبرو اشبو دولتین بیننده تأیید بولان
 دوستاغک ثبات و دوامنی و بعونه تعالی بوندن بویله دوام اقامتکیز ایله توافر و تزیایدنی
 موجب اوله جنجی بی اشتباهدر دیو بومضمونی حاوی یدنده اولان کاغدی قرائت
 و ترجمانیزه ارائت ایلدکن صکره شفاهاً تشکرینی شو وجهله بیانه آغاز ایلدیکه هدیه
 بهیه ملوکانه دن غایتله ممنون و محظوظ و باخصوص بیوک کرمه سی حقدنه اعطاف
 مرحام الطاف خسروانه معطوف و ملحوظ و بین الاتراب مجوهر صور غج احسانیه
 قدر و شانی امتیاز بیورلدیغندن حاصل اولان سرور و حبور حد واحصاده نامحصور
 ایدوکی تقریر و بیان و دعای دوام ایام عمر و دولت و تزیاید اقبال فر و شوکت
 حضرت پادشاهانه ایله مرطوب اللسان اولوب ختم دعا و کلام ایتدکده ان شاء الله تعالی

بومحظوظیت وتشکریکیزی اذن ورخصتکنز ایله عتبه علیایه تحریر وافاده ایدرم شوکتلو قدرتلو کرامتولو افندمنز دخی بومعامله بالجمله کزدن غایتله محظوظ اوله جقدردر دینلکده بو عنایت عندمده ایلیچی افندی حضر تتری طرفدن برلطف وکرمدن معدود در دیوب شوقلی ومحببتلی برکوزل مجلس اولوب معیتمزده اولان مأمورین قوللری بونلره دخی تعریف وتوصیف ایله عود وانصراف اولندی .

بومجلسده هدیه هایوندن اولان مجوهر صورنجبری کمال حبور وسرور وشوق ودوق نامحصورلرندن ناشی دعوای محبتلرینی اثبات زمیننده قرالیچه جنابلری محل قالی اولان صول بوکرینه صوقوب وکریمه سیدخی فرق رأسنه طاقوب حرز جان وکشور ممالک رومه طرف سلطنت سنیه دن مجدداً سلطان عالیشان اولدق وادیلرنده دوکشه ومیلدیلره اظهار شکوه وشان وخیلیدجه طمطراق وعنوانلری مشاهده اولندی . عون وعنایت باری وآثار توجه حضرت اولیای نعمی برکاتیه شان والانشان دولت علییه یق وناموس سلطنت سنیه به احری وافوق ادای آداب سفارته بووجهله موفق اولندقدن صکره اوقات سائرده قرال مشارالیه وقرالیچه ایله ملاقات اولندیفی وجهله بردفمه دخی ملاقاتمز اراده وطرفمزه افاده اولندقدن التماسلرینه مساعده والتکرارحسن مضموننه رعایت وهمت اولنوب اوقات سائرده دن زیاده فقط دستار خراسانی ایله ینه قرال مشارالیهک دیوانه واریلوب ملاقاتمزده هوانک کشایشی وقرق کوندنبرو ومتواری اولان قرص شمس منور یوم مزبورده علی الدوام ضیا کستر وشعشعه پاش کشور خاور اولمسی دولت علیه نک اقبال وبختیارلغه تقال خیر ایله التفات آمیز بعض کلمات ایراث ولایق ومقتضایی وجهله جوابداد اولدق بعده مشارالیه قرالیچه جنابلری ایله دخی مکررا ملاقات وخیلیدجه ملاطفت انکیز کلمات اولندقدن صکره خدمت تمام اولوب خانه مزه عود وخرام واستراحت وآرام اولندی . فی الحقیقه یوم مزبورده مساعده هواوشمس منیر افاضه انوار واضوا ایتمکله آلیمزه قات اندرقات رونق وتاب ویروب پرتو افزا اولمشدر . ومثلی وعدیلی نامسبوق مسموع ومنظورلری اولمامش برکوزل آلی اولدی دیومعرض فخر ومباهاتده زبازد خواص وعوامدر . حدآثم حدآثم فرداسی جمعه کونی ولیعهدی اولان پرنجده غال جنابلرینه طرفمزدن ترتیب اولنان هدایای ناچیزانه ترجمانمز ایله ارسال وایکنجی اوغلی دوقده بورقه مکمل رخت وبساطیه بارکیرمز وتیروکان وزوجه سی دوکشه یه بوغچه وکل یانچی واوچنچی اوغله سیفمز ودونامش تفنک وتیروکان وقرالیچه یه والتی نفر کریمه لرینه بوغچلر کل یاغلریله بشقه بشقه کوندرلمکله استفسار خاطرلرینه رعایت وتشریفاتیجی وسرکاتبه ومهماندارلر

و شامبر لانه بوغچه لار اهدا و سائر اقتضای د نلره وجه لابق اولان اوزره تبرک لار اعطاس یله مراسم مراعات لری طرف زدن اجرا اولنهرق اظهار شکوه و شان سلطنت سنیه به بدل وسع و مقدرت اولندی .

(۹)

* رکاب هایونه دوبره و نیکو طرفندن وارد اولان عرض حالدر *

شوکتلو قدرتلو عظمتلو کرامتلو عدالتلو مهابتلو عنایتلو و نصرتلو بوقفرا قوللرینه مرحمتلو آل عثمان پادشاه افندمز سلطانی پادشاه شرق و غرب و جهانک یدی اقلیمک و چار گوشه سنک شهنشاهی و سلطانلرک سلطانی حضرتلرینک مبارک خاک پای کیمیا تأثیرلرینه یوزلر و کوزلر سوروب انواع انقیاد و اطاعت و انبساط برله دعا و ثنای بی نهیاه قلندقدن صکره رساله عبودیت نما ایله معروض بیقدرلری بودرکه بوقوللری اوزرلرینه اداسی لازم کلان جزیه شرعیهلرینی خزینئه عامریه تسلیم ایچون جمهور عاجزانه مز امراسندن جوانی قبوغه و جوانی صورغو نام ایلچیلریمز تعیین و معتاد جزیه ایله درگاه معدلت پناهیلرینه ارسال اولمشلدر . ان شاء الله تعالی روماله پادشاهانه لری بیورلدقده اباعن جد قلوب صداقت آوده مزده مرکوز اولان عبودیتیزی اثبات و تصدیق ایلدکلرنده عنایت شوکت مقرونلرندن تضرع اولنورکه ایلچیان مسفوران منظور عین عطوفت پادشاهانه لری بیورلغله زیر جناح موجب الفلاح جهاندار یلرنده محمی و اجداد کرام سعادت اقرارلرندن مظهر اولدقلریمز الطاف کریمانه پادشاهانه لری بودفعه دخی قوللری حقتنده مبذول و بیدریغ بیورلمق مرجو و مستعدار .

تحریراً فی دوبره و نیک ماه اوربل او اسطنده سنه عیسویه ۱۷۹۳

الحقیرون و بندکان صادق و نابت

قدم و قدیم خراجگذار قوللری

دوبره و نیک کنزی و سائر بکلری

(۱۰)

* اخراج مواجب حقتنده صادر اولان خط هایون *

سنکه وزیر اعظم مدوح الشیم و وکیل مطلق قوی الهمم عزت محمد پاشا سن طرف کامل الشرف شاهانه مدن سنی سلام مسرت ابتسام ایله تلطف و اکرام ایلدکلن صکره اشبو قسطنین مواجبک زمانیه تدارک و توزیع و تقسیمنده درکار اولان اهتیمک و خدمت صدارت عظمایه مأمور اولدیغک ایام دنبرو جزوی و کلی امور و نظام

وتمشیدند تقييد تام ودقتك و حفظ و حراست ناموس و دين و دولت و نشر آثار عدالت و انصاف و بالجملة اراده ملوكانهم تعلق ايدن خصوصاً رى اتمامده رضى هايونمه موافق حرکت و اظهار صداقت و استقامته اقدام و همتك نزد ملوكانهمده قرين ساباش و تحسين اولمغه جناب پروردگار كافه امور كده سنى توفيقات عليه سنده مظهر و هر حالده انواع بروخيره مصدر ايدوب عون و عنایت خدا سنك ايله برابر و سكا اطاعت و صداقت و اعانت و دين و دولتمه صادقانه خدمت ايدناره معين و ياور اولسون هر وجهه صداقت و استقامت و تحصيل رضى خسروانهمه مبادرتك موبوم معلوم هايونم اولمغه خير دعای شاهانهمه مظهر و التفات خاص ملوكانهمه موقر اولديغنى و سندن هر وجهه خشنوديمى جابه اعلان و اشعار ايچون اشبو خط هايونم اصدار و خلع فاخره خداوندكارانه بيكر مدن بر ثوب سمور فائض الحبور ايله برقبضه خنجر ثريا ساجدار اغا قولم ايله سكا تسيار اولنمشدر . ايمدى و وصولنده خطوات تعظيم ايله استقبال و خلعتى وضع دوش حميت پوش استقلال و خنجرى بند ميان غيرت و استيهال ايدوب بوندن بويله دخى امور دين و دولتمده سندن مأمول و مطلوب شاهانهم اولان كافه مصاحتي صداقت و استقامته غيورانه رؤيت و اسعاره زياده سيبه دقت و تقويت و استحکام قلاع و سرحدات و دفع رفع اشقيا و بغات و تنظيم امور مهمه و لوازماتده و الحاصل دين و دولتمه خيرلو و نافع شان و شوكت شاهانهمى شامل و جامع اوله جق كافه خصوصاتده اولكيدن برقاچ قات زياده مساعى مشكوره و خدمات مبروره ابرازينه غيرت و عدالت شاهانهمى هر طرفده نشر و اجرايه و رفاه و راحت فقراى رعايا و عمار بلاد و قرايه صرف ذهن و رؤيت ايله سن هر حالده رب العالمين سكا توفيقات عليه سنى قرين ايدوب سنك ايله برابر صداقت و سكا اعانت و تحصيل رضاكه دقت و خلوص ايله خدمت ايدن رجال دولتمه و بالجملة او جاقولو قوللريمه دستكير و معين اولسون آمين بحرمه سيد المرسلين .

(۱۱)

* عزت پاشايى تلطيف ايچون صادر اولان خط هايون *

بنم وزير روشنضميرم بوكون لوند چفتلكنه توجه و عزيمت و اعظم مصالح دولتم اولان امور حربيه اعتنا و دقت ايلديكك موجب محظوظيت طبع ملوكانهم اولوب هر اطوار رضا جويانه و حرکات صادقانه كدن كمال خشنوديمى اعلان و دخلواه شاهانهم اوزره لوازمات جهاديه تداركنه صرف مقدرت ايلديكك نزد خسروانهمده قرين تحسين اولديغنى بيان سياقنده تلطيفاً و تشويقاً اشبو خط هايون التفاتمونى املا

و بر قبضه خنجر له معاً طرف صادقانه که اسرا ایلام وصولنده خنچری میان غیر تنکه بند ایلیوب وسکا اولان توجهات سنیه هایونمی بیلوب عهدۀ استقلالکه احاله ایلدیکم کافۀ مصالح دولتمی وجه لایقی اوزره اداره یه تشمیر بازوی اهتمام خصوصاً تنظیم مهمات و تدارک لوازمات واستحکام سرحدات ماده لرینه سعی مالا کلام ایلیه سن جناب باری هر حالده توفیقات علیه سن رفیق ایلیوب دائماً صفای خاطر ویرسون آمین .

(۱۲)

* وندیکه تابع جزائر یونانیه اهالیسی حقنده آتخا اولنان نظام *

فوق العاده بی حاوی سفارتلره ویریلان تقریر *

ممالک محروسه سواحلمنده و آق دکز جزیره لرنده باخصوص از میر شهرنده متمکنا اقامت و تجارت سفائینه اول محله ره ورود ایدن خروات و کفالونیه و چانظه و قورفولو وندیک رعایاسی اوته دنبرو خشین و عنود طوائف خبائت آلود اولدقلرندن بولندقلری محله ره اهالی و رعایانک انسلاب امنیتنی موجب اختلال نظام بلادی مستوجب نیجه افعال شنیعه ایله مألوف اولوب اراق اراق احداث غوغا و جدال و عباد اللهه و جوهر متوعه ایله نیجه خسارتلر ایصالندن خالی اولمالمریله بو کیفیت بالدفعات در سعادتده مقیم وندیک ایلیچلرینه اشعار و بومقوله خبائتکارانک منع و دفعنه دقت و قونسلوسلری دخی اول اشخاص شناعت اختصاصی حمایه دن مجانبت ایلملری الزم لوازمندن ایدوکی تکرار علی التکرار مومی الیهم وندیک ایلیچلرینه اخبار اولندیغنه مبنی علی الدوام بو امر مهمه نظارت و بوبابده قونسلوسلرینه اقتضا ایدن وصایای بروجه اکید تلقین برله حسن و نظامه مغایر اوضاع و اطوار دن بومقوله اشخاصه اظهار صحابتدن دائماً تحذیر ایلملری لازمه دن ایکن دقت اولندیغندن حسن جواریته و شرط مودته مغایر محل بمحل نیجه فسادات و جمیع اهالی وسکنه نك عدم امنیتلرینی مستلزم نیجه حالات کریهه و وقوع بولمقده اولوب حتی بوندن اقدجه شهر از میرده اهل اسلامدن وزمرۀ یکچریاندن برنفر یساجچی بی آلت حرب ایله ضرب و قتل ایلدکلرندن ماعدا فرداسی یساجچی مزبورک سائر یولداشلری دخی درون شهرده حرب و جداله مجاسرت و انشای جدالده تگون ایدن حریق و سیله سیله اهالی و رعایانک اموال و اشیاسنی دخی غضب و غارت و بوجهلله اظهار انواع شناعت و فضاحت برله از میر کبی بلده معموره نك بودرجه خسارته مبتلا اولمسنه باعث اولدقلری عامه نك معلومی اولان کیفیاسندن اولمغله طائفۀ مرقومه نك اراق اراق متجاسر اولدقلری

فضاحتك احتمال وقوعی فیما بعد منع وفسادلرینی کلیاً دفع برله شهر مذکورى حسن رابطه و نظامه افراغ و كرك از میر شهرینك و كرك سائر اسكله لرك طوائف مذكوره مضرتندن مصونیتى مستلزم اوله جق و سائلى تحصیل و اسبابغ ایتك خصوصى درجه و جویده اولدیغنه بنساء الحاله هذه طوائف مذكوردن از میر شهرنده و سائر محللرده مقدما توطن و تأهل ایدوب اهالىء مملكتنه مخصوص كار و كسب ایله مشغول اولان اشخاصدن رعیتى قبول ایدنلرك ماعداسى طرد اولنوب تكرر عودته جسارت ایدرلر ایسه سارق عد اوله رق زندانه وضع اولنق و ونديك سفائی ایله ورود ایدنلر مساح كز میوب و بلا موجب قره یه چیمیوب كیلرنده قرار و بیوتوت ایلمك و نزاع و یاخود آخر تهمتلری و قوعنده و ندیکلو اولدقلرینه قطعاً اعتبار اولنمیه رق جمیع دولده اوله كلیكی وجه اوزره ضابطان بلده طرفندن اخذ و حبس و تادیب اولنق و اشخاص مرقومه دن متأهل اولمیانلر رعیتى قبول ایدرلر ایسه قبول اولنق اوزره قرار کیر اولان اشبو نظام با فرمان عالی از میر و سائر اقتضا ایدن محللره اشعار اولنمغله نظام مذکور فلان دولت ایلیجیسی دوستمرك دخى معلومى اولق ایچون اشبو تقریر تحریر و املا اولدى .

و فقط مسقو ایلیجیسنه ویریلان تقریرده طوائف مذكوره دن روسیه ده توطن و تمکن ایتس اولوب بعض امور لازمه رؤیتى ضماننده یاخود برای تجارت ممالك محروسه اسكله لرینه ورود ایلدكلى حالدده قونسولسرك یاننده موجود ممضى دفتر ایله مثبت اولنلر دن ماعداسنه روسیه لودر دیو صاحب چیقماق و آق دكزه كشت و كذار ایدن روسیه سفائتك بعضاً ملاحلری اولمقوله اشخاصدن مركب اولدقلى معلوم اولنغله مجرد روسیه سفینه لرنده كیچیلك ایتلری حسینله روسیه لودر عد اولنمیوب بووسیه ایله روسیه قونسولسلى صاحب چیقمیوب اجرت ایله ایشلر خدمه مثللو یه و ندكلو عد اولنق اقتضایده چكى تعبیری درج اولنمشدر .

(۱۳)

* حرمین خزینه سنك موازنه دفتری *

	واردات
مقاطعاتدن	۱۲۲۱۲۲۵-
اوقافدن	۰۰۷۶۵۶۹
	۱۲۹۷۷۹۴-
	مصارفات
وظائف و مصارف اوقاف	۴۳۳۵۷۸

صره شریفه ایچون ویریلان	۲۲۷۴۶۸
انعامات صره شریفه	۰۰۲۳۹۶
حرم هایون ایچون شهریه	۰۶۸۴۰۰
دارالسعاده اغاسنه بدل خاص اوله رق معیشت	۰۶۰۰۰۰
مشار الیهک شهریه سی	۰۵۰۰۰۰
خازن شهر یاری اغایه معیشت	۰۳۰۰۰۰
مومی الیهک شهریه سی	۰۱۰۰۰۰
دارالسعاده اغاسی کاتبته معیشت	۰۰۶۴۸۰
مومی الیهک شهریه سی	۰۱۵۰۰۰
خلفایه	۰۰۱۰۰۰
مکه و مدینه قاضیلرینه خر جراه	۰۱۰۵۰۰
مژده جی باشی یه وسقا باشیلره خر جراه	۰۱۱۲۵۰
برای قیامه ووظائف وانعامات	۰۰۴۰۳۹-

مصارفات

قرائت مولد شریف انعاماتی	۱۹۷۵
بهرسنه طرف شاهانه یه تقدیم اولنان فائض مقاطعات	۷۶۹۶
کتابخانه اندرون هایون	
معیشت متولیء وقف سلطان بایزید در ادرنه	۱۰۰۰
معیشت کاتب وقف شهزاده	۰۳۰۰
معیشت کاتب وقف غاطه	۰۱۲۵
بهای نان و بشلک اغایان حرم هایون	۰۲۴۰
مصارف راه آب عین عرفات	۳۰۰۰
قرائت مولد شریفده دارالسعاده انعام هایون	۵۰۰۰
صره اخراجنده كذلك دارالسعاده اغاسنه انعام	۱۰۰۰۰
شریف مکه نك سكبان باشیسنه انعام هایون	۰۸۲۵
نجاب شریفه	۰۲۵۰
مصارف ماه خر قه شریفه	۲۶۶۳
مرحومه صالحه سلطانك باش اغاسی احمد انانك ماهیه سی ایچون	۱۲۰۰
تکیه لرك محرمیه سی	۲۳۵۰
چوقدار وتاتار امیرالحاجه انعام	۰۱۴۰

مصارفات	
اهالیء حرمینہ انعامات	۵۲۳۵-
مصارف قرائت مولد شریف در اندرون هایون	۱۲۲۶-
اوج دفعه خلوت هایون مصارفی	۷۵۰۰
زیاده مصارف وقف سلطان احمد خان اول	۱۷۵۰۰
حین حسابده اوقافک مطلوباتی بروجہ تخمین	۱۰۰۰۰۰
عمارات سلاطین عظامک الی بیک کیل دقیق بهاسی بروجہ تخمین	۱۵۰۰۰۰
	۱۲۴۸۳۳۷-
المیزان	
بروجہ بالا واردات	۱۲۹۷۷۹۴-
بروجہ بالا مصارفات	۱۲۴۸۳۳۷-
مال حرمینک فضلہ سی	۴۹۴۵۷

(۱۴)

* جانب ایرانہ جو ابنامہ آصفی *

دولت علیہ عالیہ جہانبانی یعنی سلطنت سنیہ سامیہ عثمانی ایلہ ایرانیان شہامت نشان دولتی میانندہ ابواب موالات و تواد مفتوح و آیات مصافات و اتحاد صفحہ جانینہ مبین و مشروح اولمق لازماید و کفی حاوی و بوائتادہ جماعت لڑکیہ دن بعضیلرینک روسیہ لویاہلہ موافقت و در بنددہ تحریک سلسلہء شرارت ایلدکیرینہ بناءً محل خیول سپاہ ایتمک ممکن اولان طرفہ قدر عنان عزیمت امالہ اولتنامق اوزرہ استیصال اصحاب ضلال و فساد و استحصال مشوبات غزرا و جہادہ حالا سیابان زمین پیرای فحامت و رونق فزای عرصہ جلادت شہامتلو محمدخان صلابت منقبت حضر تلرینک نیت و ہمتلری مصروف اولوب بین الجانیین جہت جامعہ اسلامیہ بہ نظراً جانب سنی الجوانب دولت علیہ دن دخی سرعسکر ظفر پیکر تعیین و تسیاریلہ جہاد و غزرا ثوابی تحصیلدہ شرکت و بوکارده موافقت اولنسی ایچون خان مشارالیہک امریلہ اشعار حالہ مبادرت اولندیغنی محتوی بودفعہ فرستادہ و اسرا قلنان مکتوب مودت اسلوبکز تعیین اولنان مبعوثلریکز و ساطلریلہ مقام صدر تعظمامزہ وارد و واصل و مفہوم صداقت مرسومہ اطلاع محبانہ من محیط و شامل اولمشدر . الحالہ ہذہ شہنشاہ خورشید افسر جمشید سریر و پادشاہ جہان آرای کشور کیر پیرایہ چار بالش اورنک عظمت و زیب افزای طاق آرایش ابہت و شہامت خسرو قہرمان

شکوه داراسپاه خاقان کیوان غلام فلک بارکاه طرازنده متکای خلافت و شهر یاری
 برازنده دیهم دولت و بختیاری شوکتلو کراملو مهاتلو قدرتو ولی نعمتم اقدم
 پادشاه فرخنده جناب و خداوند هایون القاب حضرت تلرینک دولت علیه سرمدی
 القیام و سلطنت سنیه ابدی الدوام لریله دولت ایرانیه بینلرنده حب و وداد و صفوت
 و تواب پایدار و اتحاد ملیه اسلامیه تقریبیله دخی مودت و مسالمت بدیهیه الازدیاد
 و موالات جلایه السداد درکار اولوب اقامت دین مستین احمدی و ادامت شرع
 مبین محمدی به رعایت پادشاهی و علی الخصوص امر ذی الجلال الهی مقتضاسی اوزره
 سلطنت سنیه عثمانیه نك احراز ثنوبات سرمدی به همت و الا نهمتی بدیدار و ذکر
 اولنان روسیه دولتی و متفق اولان نمچه دولتی ایله دولت علیه بیننده منعقد اولان
 سلم و صفوت بوندن اقدم بعض اسبابه بناءً مبدل عداوت و خصومت اولدینی
 هنکامده سلطنت سنیه قوی شوکت جانبدن و جوب شرعی مقتضاسی اوزره مجرد
 اعلائی کلمه الله العلیا ایله اقامه فریضه جهاد و غزائیت خالصه سیله دولتین
 مذکور تینک برأ و بحراً ترتیب کرده لری اولان عسکر لرینه تعیین لشکر نصرت اثر
 اسلامیان ایله مقابله اولنوب بر طرفدن اعانت اولنمق سرین جنک و پیکار ایله متوکلاً
 علی الله المستعان و مستمدا بروحانیه حبیب الرحمن امر جهاده منفرداً صرف
 مقذور و احراز ثنوبات غزایه سعی موفور اولدینی جمله به معلوم و آشکاردر .
 مشاغل محنت سفریه و غوائل مشقت حربیه بروجه محرر احراز ثنوبات غزا
 ایچون برقاچ سنه اختیار اولنقدن صکره بالآخره آسایش عباد ضمننده طرفینک
 خواهش و طابی ایله میانده نیجه شرائط عهود توثیق و روابط قیود و عقود تسمیق
 اولنرق دولتین مذکور تین ایله جواز شرعی اوزره مصالحیه ابتدار واحد
 طرفیندن بری آخری حقدنه نقض عهد ایتمدکجه دیگر طرفدن دخی نقض عهد
 اولنمیوب و قایه شرائط صالح و صلاحه جانیندن اقدام اولنمق شرطی دخی عهدنامه لرده
 تصریح و اشعار اولنمق حسبیله سلطنت سنیه اولوقدن برو تنظیم و تمیم امور داخلیه
 و تحکیم رصانت سرحدات خاقانیه مهم لازم الاهتنامه اشتغال و ایجاب شرع
 مطهر اوزره و قایه شروط معاهده به و بو وجهه دخی ایفای سنن سنیه به دقت
 بیهمال ایتمکده اولوب قالدیکه جهاد و غزا مؤمنینه فرض کفایه اولدینغه نظراً
 دولت عایه نك شمذیک حالده و قایه صلح و صلاحه مباردتی ابواب غزا و جهادک
 انسدادینی ایجاب ایتمیوب سلطنت سنیه ایله جهت جامعه اسلامیه سی اولان شجعان
 حمیت نشان و جلادت کاران هیجان پرستان موحدینک برأ و بحراً بعض محللرده
 احراز ثنوبات جهاد و اعلائی کلمه رب العباده سعی و اجتهاد لری فریضه مذکوریه

اسقاط ایده جکی و دولتین مذکور تین طرفندن مغایر عهود و مواتیق طور و حرکت ظهوره کلمکمزین دولت علیه شوکت بنیان و سلطنت سنیه ابهت نشان طرفندن خود بخود اعلان حرب به ابتدار مساع شرعی اوزره عقد اولنان بالاده مسطور شروط عهودك خلافي اولمق لازم کله جکی ارباب الباب عندلرنده و ارسته قید آشکاردر . قالدیکه دولت علیه عثمانیه ایله دولت ایرانیه بیننده منعقد و مربوط اولان حبل المتین مصافات و مساله مصون عن الانفصال و جهت جامعه اسلامیة مالبسه سیله ایرانیان حقنده توجهات درونیه جهانبانی درکار و تام اولغله بین الدولتین لازم الایضا اولان مراعات خیریت آیات حقیقیه و موالات صفوت بینات صدیقیه نك اجراسنه بعدازین دخی هم سنیه مصروف اوله جنی بیانی و درکار اولان تحاب و تواد نو بنو قبول ترقی و ازدیاد ایتمکده ایدوکی اعلانی تأیید مبانی و د و محبت و تشدید ارکان صدق و مخالصته ذریعه اتخاذه مکتوب مودت تحریر و مبعوثکر مومی الیهم معاودتیه تسیر اولمشدره ان شاء الله تعالی لدی الوصول کیفیت قرین علم درایتکار یلری اولدوقده فیما بعد دخی ایفای مقتضای خلتپوری به رعایت اولندجه صوب محبانه مزدن دخی اجرای مبتغای خلوصوری به و تزیاد حب و و داد و ترقی و صفوت و سداد حالته اقدام و دقت اولنه جنی بی اشباهدر .

(۱۵)

* پارس ایلیچسی سید علی افندیك تحریراتی *

دولتو عنایتلو مرحتلو ولی النعم و فی الهمم افندم سلطاتم حضرتلری فریضه ذمت عبودیتیم اولدینی اوزره لیل و نهار دعای فروئی ایام عمر و دولت و اقباللریله مداوم اولدیغ نزد دولتلرنده روشندر . بر مقتضای مأموریت مارسلایه وصول و عادت افرنجیه اوزره اوتوز آتی کون نظارت خمیازه سیله کذارنده اوان ولدی الختام مارسلیا شهرینه چیقلوب بش کون اقامت ایله اهالیسی مکفاته قیام ایلدیلر خمار ذوق عقینده اوله کلدیکی ظاهر ایکن بو طرفده عکس قضیه ایله اول امرده خمار و بعده انواع ذوق نادیده تعاقب ایتمشدر . شهر مز بوردن پارس شهرینه کلنجیه دك هر قنئی شهره تصادف و بیتوت اولندی ایسه بر برندن اورنك آلهرق و یکدیگره اگرآمده تفوق ایتمک داعیه لرلیله یکرمی بش کون علی التساوی سور اتصالی ایله له الحمد پارسه دخول اولندی . فی الحقیقه طائفه مرقومه بالطبع دولت علیه و ملت اسلامیة به حب اولدقلری و جوهندن اولوب خدمته مأمور اولنلرک روشندن آشکار ایسه دخی دنیایی بیلمز دهقانلرندن دخی مسموع اولمشدر . بنا برین دولت علیه نك شان ابهت نشانی بو طرفده عظیم و هرکس حالجه بو بعد عاجزه توقیر

و تکریم ایله اجرای لوازم محبت ایده یورلر مارسیلادن پارس شهری ایکی یوز اون ساعت مسافه دن عبارت ایکن اشبو مسافه کان اشجار و بساتین و مزروعات و باغ و حدایق ایله آراسته اولمش برکیر باغچه کیدر بر شبر محلی خالی و عمارتدن بری دکدر . امور لرنده مقدم اولدقلری رعنا معلوم دولتلریدر دغدغه اختلال سببیه پریشانلق مستلزم ایکن ذره قدر علایم خرابی کورلما مشدر . فقط استیلا تقریبیه طولونده و بعض کونه محاربات ایله لیون نام شهر جسمیده براز خانلر منهدم اولمش ایسه دخی ینه بر طرفدن تعمیر اولنقمده در . شهر دلارای پارس معمور و آبادان و انواع حدایق فرح نشان ایله غبطه فرمای فرنگستان اولغله کل لیلۀ برر باغچه ده سازنده و خوانندکان و درلو درلو آتسبازلقلر ایله سکنه سی خندان و شادماندر .

وقت صیفده باغچلر اولدینی کبی هنگام شتاده درون شهرده اولان یکریمی دوت عدد قومدیه یعنی خیالخانلرده اجرای ذوق دائمیه مبتلاردر سیره کیدن بر آدم بش فرقه که هر بری بزم سکه یه کوره یکریمی التی پاره در ویرر . بر کوچک لیمون قطعه سنده سگری دو کدیرمه بی بر فرقه یه اشترا و شیرین مذاق اولور بو طرفده آچه صوکی در . اما حریفقر بولیور . و خرج ایده یور . نسوانی بغایت معتبر و سرپرستدر . حتی ذکورندن صاحب امتیاز و مرتبه اولنلری موجود ایکن ادنا برزن مجلسه کسه صدر مجلس تخلیه و قیام و آشنالق ایله اول محله قعود ایتدیروب کندوسی ایاقده قالور . مانی نک دیار عجمده انوشیروانک پدری وقتنده نشر ایلدیکی مذهب باطلی بوسمتلرده دستور العملدر میانه ذکرده اتفاق نایاب منزله سنده در هنوز کرکی کبی تفهم اولنه مدی اما ظاهر یسی بو وجهله اولملی ان شاء الله تعالی بعدازین خاکهای دولترینه تجریر اولنور . اشبو صفراخیرک اوچنجی مبارک جمعه کونی ترتیب اولسان آلائی ایله نامه هایون مدیران جمهوره تسلیم وادا و شان دولت علیه اوزرینه مراسم اعزاز و اعظام کاینبنی مراسمات و اجرا اولندی . قالدیکه : مرحمتلو افندم افندیلمزک بیوردقلری کبی حرکت و تصرف غایت مضر اولغله رعایت رحد و وسط دخی ذلدن خالی دکل ایسه بیله ناچار اختیار اولنور لکن اول امرده معینات مرتبه کفایه دن دون و برسنه ضروری شان دولت علیه محافظه سیچون اقدار بیورملق خصوصی مقدا نیاز اولنمش اولغله حق بندکانه مده ابد مرهون اولان عنایت کامله لری درکار و اسباغ بیورملق باینده امر و فرمان دولتلو عنایتلو ولی النعم افندم سلطانم حضرتلرینکدر .

مهر

فی ۹ ص ۲۱۲

یاعلی الاعلا

(۱۶)

* صدر اعظمك استقلالنى حاوى خط هايون *

بنم وزير اعظم صداقتكار و وكيل مطلق حيت شعارم عزت محمد پاشا سنى سلام سلامت انجام هايونماه بعد التلطف معلومك اولسونكه خدمت صدارت عظماده مرحالكي رضاي حق و رضاي شاهانه مه تطبيق ايله تنظيم امور دولت و تسويۀ مصالح عباد رب عزت خصوصنده عاقلانه و رضا جويانه سعی و غيرتك معلوم هايونم اولغله سندن و جوهله راضي اولديغ اشتهاهدن عاريدر . عهدۀ صداقتك محول اولان مهمك جمله سنده و باخصوص او جا قلم قيو قوللرمك بو دفعه بر قسط مواجبري تدارك و توزيعنده ظهوره كلان خدمتك پسنديدۀ ملوكانه م اولغله مظهر دعای خير خسروانم اولمش سندر . خدمت مذكوره كي تحسين و سنى تلطف و استقلالنى تأييد ايله تشریف ضمنده خاصه كوركلر مدن بر ثوب سمور كورك و برقبضه مجوهر خنجر خزينه داراغا قولم ايله ارسال اولغله استقبال و تحييل برله كورك و خنجرى زيور دوش و ميان و دعای دوام عمر و دولتمى مرفوع بارگاه رب منان ايلدكدن صكره مجبول اولديغك صداقت و غيرت مقتضاسى اوزره او جا قلم و قايۀ نظامرينه و سرحدات شاهانه مك تكميل لوازم تقويه ليرينه و ممالك محروسه م سكانك مظالم و تعديتدن صيانليرينه و ظلمه و اشقيا كروهنك دفع و جود ليريه عباداللهك استراحتليرينه و آستانۀ عليهم سکنه سنك جلب و تكثير ارزاقلى و تعديل و اقتصار اسعار خصوصليرينه و او جا قلمده اولان مهماتك بر كون اول تكميل نقصانليرينه و خدمه و رجال دولت عليه مدن امريكه متابعت و امتثال و امور مأموره ليرينه سعی بيهمال ايدنلرى لايقى اوزره تلطف و اكرامليرينه و سكا مخالفت و خدمت لازمه لرنده قصور ايدنلرى طرف شاهانه مدن سكا و يريلان استقلال كلى مقتضاسى اوزره لازم كلان تأديبلرينك بلا توقف اجراسنه صرف لياقت و الحاصل كافۀ مهام سلطنت سنيه مده اولكندن بر قاچ قات زياده اقدام و غيرت ايله سين جناب حق موفق ايله آمين .

(۱۷)

* موازنۀ پوليقيقه يه دائر رئيس الكتاب عاطف افنديك لايحه سى *

بر قاچ سنه مقدم فرانسده شعله انداز ظهور و اطراف و اكنافه شراره فشان شروشور اولان آتش فتنه و فساد سنين و فيره دنبرو ملاعين ملاحظه نك تصور كرده سى اولوب ايقتاظنه فرصت بين اولدقلى بر قتنۀ نائمۀ اولديغى ارباب و قوف عندنده معلوم اولان مواددندر . شويلاه كه: وولترو رو صوديمكله معروف و مشهور

(اولان)

اولان زندیقرك و آنر مثللو دهريلرك حاشائهم حاشا سب حضرات پاك دامنان انيا
 و قدح و ذم ملوك كبرادن و جمع ادياني رفع و الغاوشيرنيء مساوات و جمهوريتي ايمان
 عبارت اولان الفاظ و تعبيرات سهل المأخذ ايله صورت استهزاده لسان عوام اوزره
 طبع و نشر ايتدكاري تأليفات متعدده لرينه (ولكل جديدلذة) ديهرك صيبان
 و نسوانه و ارنجه اكثر ناس ميل و رغبت و مطالعه لرينه مداومت ايتدكجه الحاد و فساد
 مرض فرنگي كبي عروق دماغ لرينه ساري اوله رق اعتقاد لرني افساد ايتمكله اختلا لك
 اشتدادی هنگامنده سد كنائس و قتل و طرد رهاين ايله رفع دين و مذهب
 ماده سندن كمسنه كو جنميوب تأليفات تلبیس غايات مذكوره بيان و اجراي نفسانيت
 و يا خود جلب منفعت ايجون ايقاظ فتنه و فساد ايدن گروه مكر وه طرفدن لايقتع
 عوام ناسه اعلان اولدني اوزره كويا سعادت كاملهء دنيوه يي احراز ايتك
 امنيه سيله لفظي مراد اولان اشبو مساوات و سر بستيه جان آتديلر مع هذا هر دولتك
 اس اساس رابطه و نظامي التزام اصول و فروع شرع و دين و مذهب اولوب آسايش
 بلاد و ضبط و ربط عباديالكر اجراي سياست ايله ميسر اوله مديني و قلوب عباداللهه
 خوف خدا و ملاحظه عقبا و جودينه محتاج ايدوكي قضاياي مسلمة الثبوتن و ازمنه
 سالفه بو اوقاتده كافه دول و جاهيرك كرك حق و كرك باطل برر دين مخصوصي
 اولدني معلوم ايكن فرانسه ده ظهور ايدن ارباب فتنه و فساد مثلي نامسبوق و جه اوزره
 شمديك همان اغراض فاسده لرني اجرايه مدار سهولت اولمق ايجون و خامت
 عاقبتی قطعاً ملاحظه ايتمكسزین اعلان الحاد برله عوام ناسدن خوف خدا و ملاحظه
 عقبا ماده سني رفع و ازاله و نيجه افعال شنيعه اباحه سيله عار و ناموسي كيا اماحه ايدرك
 فرانسه اهاليسني بهاي قيافته قويمق مقدماتني بسط و تمهيد ايتديلر . و يالكز بوكا
 دخي قناعت ايتيوب هر محله كندولرينه مماثل هوا دارلر پيدا ايدرك دول سائر
 كندو نظام و ملكارني و قايه قيدينه دوشمك و بونره هجوم و تعرض ايتماك و سائلني
 استحصال ايجون حقوق انسان تعبير ايتدكاري بيانامه طغيان مالاريني جميع السنه
 ترجمه ايتديروب هر طرفه نشره ابتدار و عامه ام و ملل متبوعلري اولان ملوكك
 عليهنه طغيانه و طرح دعوت خصوصي پيشه و كار ايدنديلر لكن اكثر اوروپا دولتك
 عهد و ميثاق و قهر و تدمير لرينه اتفاق ايلدكاري مشاهده ايتدكارنده همان حيله
 و خدعي باز و تغليط و اغساله آغاز ايدوب بعض دولي تفريق و بو تفريق هجوم
 عامه يي تخفيف ايجون بر طرفدن توسيع ممالك و دول سائر نك امور داخله سنه
 و طور حكومت و نظامنه قطعاً مداخله و تعرض نيتنده اولدقاريني و محاربه دن

مراد لری مجرد وقایهٔ ملك و اغیار و اجانبك نابر جا تعرضی منع و رفع بر له فرانسه ممالککنده مختار اهالی اولان جمهوریت صورتی تأسیس و ابقا اتمك اولدیغنی اعلان بر له اظهار نصفته ابتدار و بو طرفدن نیجه مواعد و فوائد عرضیه بعض دولی جالبه سعی بی شمار ایدوب اختلاف مصالح حسیه بعض دول داخل شیرازهٔ اتفاق اولقدن بجانب و بی طرفاق مسلکنی اختیار و بعضیسی دخی زمرهٔ متفقینه داخل اولمشیکن اوائل محاربهده اجرای لوازم اعانت و غیرتدن فراغت و شق عصای میثاق ایله سلم و مهادنہنی موافق مصلحت عد و شمار ایتکله شیرازهٔ اتفاقه کلی خلل تطرق ایدوب فرانسه لونك محمات مایوسه سنه بروجه له تاب آور طاقت اوله میان دولت لر دخی شقاقی و فاقه و فرانسه لو ایله دوشمنلری علیهنه اتفاقه تبدیله مجبور اولدقلرنده میدان معرکهده یالکز نمچه ایمپراطوریله انکلتزه دولتی قلوب انکلتزه دولتی قوت بحریه سی جهتیله هر تقدیر فرانسه یه و متفقرینه غالب ایسه ده برآ ایصال مضرت ایده مدیکندن نمچه ایمپراطوری منفرداً مقاومت ایده میوب نوجه له مصالحیه مجبور اولدیغنی معلوم اولان کیفیتندر . برمنوال مشروح فرانسه نك کمال فخرت و مضایقه لری هنکامنده توسیع ممالک و دول سائر هیه تعرض نیتنده اولدقلرینی اعلاندن مراد لری محضا حیه و آل و اوروپا دولتی تغلیط و اغفال اولدیغنی معلوم اولان حالتندر . زیرا غالبیت مطلقه لری حسیه مقاصد مافی البالری بی پروا قوه دن فوله اخراجه دسترس اولدقلرنده و فلمنك جمهوریتی ترك حرب و شقاق و دیلدکاری شرط ایله ربط اتفاقه مجبور ایتدکارنده فلمنك مملکتك کلیدی و سد سیدی مثابه سنده اولان نیجه قلاع مستحکمه بی ناحیه لریله فرانسه ممالکنه الحاق ایتدکارندن بشقه طور حکومتی تبدیل و فرانسه نك اصول حکومتیه تطبیق ایتدردیلر . ثانیاً ساردنیا قرالی ممالکندن ساوویا ایالتی و ایچ دکز سواحلنده واقع قونظه ونیس نام دیگر ایالتی و فرانسه ایله ایتالیا بیننده کائن جبال شاهقه ده قول دیتانو تعبیر اولنور صعب المرور بوغازی و برقاچ قلعه بی محاربه ائناسنده تغلباً فرانسه یه الحاق بر له قرال مرقوم ایله لدی المصلحه اول ایالات و بلدان و بقاعی عهداً و شرطاً فراغنه مجبور ایتملریله بو محارک ضبطیه فرانسه جمهوری دیله دیکی و قنده ساردنیا قرالنك ملکنه و ایتالیا یه سهولته مرور و هجوم ایده بیلور . ثالثاً اسپانیا ایله لدی المصلحه ثمرهٔ اتفاق اوله رق فرانسه عساکرینك مسخری اولان ممالکی اگر چه کیرویه رد ایتدیلر انجق یکی دنیاده اسپانیانك زیر تصرفنده سان رومنونام جزیرهٔ معظمه نك قطعه سنی عوض طریقیه ضبط ایتدیلر . رابعاً مقدما ریم پاپا ایله لدی المصلحه نقود و فیره و نیجه تحف سائر آلدیغندن بشقه زیر حکمنده کبی اولان جزایین جمهورینه الحاق ایچون اوج

قطعه ایالتی دخی ضبط ایتدیلر . خامسا قبل الحاربه نمچه ایمراطورینه تابع اولوب
 نیجه دولك حسرتی اولان پیازی پاسی یعنی اراضیء منخضه تعبیر اولنور ایالات
 معموره معظمه بی فرانسه ممالکنه الحاق ایتدکنرندن ماعدا ایمراطور مر قومک ایتالیاده
 متصرف اولدینی لومباردیہ قطعه سنی لندن نزع برله مطلوب اهلیدر دیه رك فرانسه نك
 نظامنه مماثل قوانین واحكام وضع ایدرك جزالین نامیله صورت استقلالده جمهوریت
 قیافته قویدیلر . ورین نهرینك صول طرفده نیجه ایالات و بلدانی جبراً وقهرأ
 جمهوریت صورتنه بعد التحویل فرانسه ممالکنه الحاق ایتدیلر . نمچه ایمراطور یله
 بومصالحه یه دلخواهلی اوزره رابطه ویرمك ایچون پوناپارته جنرال ونیدك جمهوریه
 برغوغا احداث ایدوب ونیدك جمهوریه اوائل محاربه دنبرو بیطرفلق مسلکنی اختیار
 ایدرك فرانسه جمهورینه اظهار محبتدن خالی اولماهشیکن مجرد اجرای مقاصد لریچون
 طور حکومتلرینی تبدیل ورفاه عامه بی تحصیل زمینده برآلای سفهانی سرکاره
 کیروب نفود موجوده وبالجمله مهمات وسفاین حربیه سنی غضب ایتدکن صکره
 مقاسمه یه قرار ویروب هر نه حال ایسه نمچه ایمراطوری ایله بووجهله مصالحه یه قرار
 ویردکن صکره صورت ظاهره ده تسلطی ایجاب ایدر مصلحت قالمغله تعرضدن
 مجانبتری اقتضا ایدر ایدی . لکن نیتلری آسایش اولیوب اغراض فاسده لری
 اجرایه و برای تعاون و تعاضد کندولری کبی نیجه متهملر پیدا ایتمک ایچون افساد
 کافه ملل و امم واخلال شیرازه نظام عالم داعیه سی جایکیر ضمیر خیانت سمیرلری اولغله
 برمنوال مشروح ریم پایا ایله دیلدکلری صورتده ربط مصالحه ایتدکن صکره روما
 شهرنده مقیم ایلچیلری پوناپارته برادری بفته احداث ایلدیکی غوغایی وسیله اتخاذ
 ایدرك تکمیل عرض وناموس صورتنده سوق عساکر ایله اسباب حفظ وحصانتدن
 عاری بولنان اول مملکتی دخی جمهوریت صورتنه تحویل ایدوب اول ائنده سنین
 وفیره دنبرو آسوده حال اولان الوجیا جمهورینه دخی بلاسب مساط اولوب جمهور
 مذکور دول متفقین طرفدن اشبو محاربه یه کرات ایله دعوت اولنشیکن مداخله دن
 مجانبت و فرانسه جمهوریه طرفه ابراز آثار دوستی به مداومت ایتدیکی ایچون الحاله
 هذه مقابله سنده بوکونه معامله یه مظهر قلمسی مغایر حقانیت اولدینی مقدماتیه
 قلوب قاسیه لرینی تلین ایچون هر تقدیر پارس جانبنه معبوتر ارسال و بوبلای عظما
 وداعیه دهیانك دفعنه سعی بیهمال ایتمش ایسه لر مفید اولیوب اجرای سوء قصد
 اصرار ویا اصول نظام مملکتی فرانسه نظامنه تطبیق برله رضامتی تحصیل ایدرسکنر
 ویا خود اوزریکزه هجوم ایدرز دیه رك عساکر وفیره سوق و تسییار ایلدکلرینی
 الوجیا جمهوریه مدیرلری مشاهده ایتدکنرنده دفع صائل اسبابنه غیورانه تشبث

ایدوب الوجیا اھالیسی ہر نقد رکال شجاعتہ مشہور بر قوم ایسہ دخی فرانسلونک سرعت هجومی حسیلہ کرکی کبی تدارکاری کورہ مدکارندن بشقہ فرانسلو عادت مستمرہ لری اوزرہ بینرندہ تخم فساد و شقاق القا ایتملریہ ضرباً وقہراً درون مملکتہ دخول واغراض فاسدہ لرینی قرین حصول ایتمیلر . بوتفصیلاتدن مراد ۰۰۰۰ م ۰۰۰۰ فرانسلو دوست و دشمن بیلمیوب مراملری ہان نہب و غارت و نیت قرار دادہ فاسدہ لری جمیع دولی ہرج و مرج ایتمک اولدینی و ضعیف الحال و مدافعہ و مقاومندہ بیماجال اولان دولہ قطعاً مہل و یرمیرک نجہ تکالیف عنیفہ ایلہ جر نقود و اموال ایتمکدن صکرہ قناعت ایتمیوب بغتہ مظهر قہر و استیصال و دخلواہ لرینی اجرا ایچون حال پراختلال فترتہ ایصال ایدوب قوی الاقتدار اولان دولہ کندی مصلحتلریچون شمڈیک مدارا و صورتا مراسم دوستی بی ایفا ایتمکدہ درلر . اما خفیہ و بعضاً علناً رعایاسنی طغیان و عصیانہ اغرا ایدرک انلرک حقندہ دخی اجرای مفاسد ایچون مترقب فرصت اولدقلری بی اشتباہدر . اوتہ نبر و جہور اولان و نڈیک والوجیا و جنویز و سائر جاہیرہ بوکونہ معاملہ ایتمکدن صکرہ دول سائرہ نک نہ مقولہ مخاطرہ دہ اولدقلری استدلال اولتمق آساندر . زیرا جمیع ملوک فرانسلہ جہورینک شروفساندندن قطعاً امین اولمدقلری کبی فرانسلہ جہوری دخی آنلردن دائماً خوف و ہراس اوزرہ اولدینی و قوتلرینہ ایراث ضعف ایچون زیر دستان و رعایالری نک دماغنہ شیرینی سربستی چالہرق عصیانہ تحریک برلہ افساددن خالی اولمہ جقلری وارستہ قید بیان و مثلی نامسبوق اشبو قتنہ و فساد و بای ملکیتہ متابہسندہ اولمغہ فرانسلو ایلہ اختلاطی زیادہ اولان دولتلر زیادہ مخاطرہ دہ بولندقلری واضح و نمایاندر . بوصورتدہ اوروپا دولی متعاقباً سر نکون اولمق مخاطرہ سندن محفوظ اولمق ایچون مصلحتلرینہ اوفق اولان فرانسلہ ملتیلہ اختلاطی کلیاً قطع ایدوب جاہسی خلوص بال ایلہ اتفاق و بوداہیہ دہیانک اندفاعنہ عہد و میثاق ایتمکدر . قالدیکہ بوفتنہ نک اوائل ظہورندہ اکثر دول اتفاق ایتمش ایکن نہ ایش کوردیلر بلکہ بو آتش فسادک زیادہ اشتعالنہ باعث اولدیلر دینورایسہ خفی دکلدرکہ اولوقت اتفاق ایدن دول بومادہی استحقار و دفع و تسکینی امر سهل عد و شمار ایدوب اقتضا ایدن تدبیری اجرا و فرانسلہ درونندہ طرفکیلر پیدا ایتمکدن بشقہ ہر بری خاصہ سنہ باقہرق بو اختلال اٹساندہ بر حصہ قائمق زعمیلہ بعض فرانسلہ ممالکنی مقاسمہ داعیہ سنہ دوشملریلہ بوکونہ اتفاق بانفاقلری شقاقہ مبدل اولمشدر . ازجملہ متوفی پروسیا قرالی لہدہ دخلواہی اوزرہ ایشینی کورد کدن صکرہ نمچہ ایمرطورینی انتفاعدن محروم ایتمک ایچون فرانسلہ جہوریلہ خفیہ مذاکرہ بہ ابتدار و مصالحیہ قرار ویرنجہ

شیرازة اتفاقه کلی خلل کلوب ذی قدرت اولان المان حکمدار لرندن نجهلری پروسیاقرالنه متابعت و بیطر فلغه میل و رغبت ایتدیلر ایشته بوسیدن فرانسه لونک استدر اچی کوندن کونه متزاید و افزون اولمغه باشلادی قالدیکه جمیع اطوار لرندن و مؤخرأ و قوعوبولان بیج وقعه سندن مستببان اولدینی اوزره فرانسه لونک اقصای مرامی عهد و شرط بیلمیوب جمیع دولی برر برر جمهوریته یعنی فترت صورتنه تحویل ایتمک و برطر فدن دخی توسیع ممالک ایلیمک اولدینی معلوم اولمغله بودفعه اوروپا دولی اجرای نفسانیت و ترویج مصلحت داعیه سنی کلیأ بر طرف ایدرک مجرد بوآتش فتنه و فسادی اطفأ ایتمک نیتله عقد رابطه اتفاق و فرانسه ده کندو مصلحتلر یچون خلقی تغلیط و اضلال ایدن زمره فسدنه نک مضرق مندفع اولنجه یه دکن ترک حرب و قتال ایتامک اوزره عهد و میثاق برله برأ و بحرأ و ارقوتلرینی بازویه کتوره رک و بذل اموال ایله فرانسه دروننده خواص و عوامدن طرف کیرلر پیدا و درون و بیرونده موجود جمهور خلاف کیرلرینی تشجیع ایلسه رک هر طرفدن هجوم ایتدکبری حالده فرانسه لونک ایتالیا ده صورت استقلالده احداث ایلدکبری و معنای سربسیتنه منافی تحت القهر دیله دکبری کبی اداره ایتدکبری جماهیرک اهاالیسی تکالیف طاقتفرسا و مطالبات بی انتهارندن بیزاروغایت نفرتلری بدیدار اولمغله کرک بولر و کرک غیظ مضمرلری نمودار اولان بالاده مذکور الوچیا اهاالیسی دولک عمومی اتفاقی انتهاز فرصت برله مایوسانه حرکت و یورد و مکانلرینک موجودی اولان فرانسزلی قتل عام ایله قهر و استیصاله مباشرت ایتلری ملحوظ اولدیغندن غیری بحسب المجبوریه بالکراهه فرانسه لونک امر و نهینه مطیع و منقاد اولان اسپانیا دولتی تقریق و بوآشاده کمال مخاطره ده بولسان انکلتیره بی دخی تخلیص ایتمک فوآند عظیمه سی حاصل اولور .

زیرا معاذالله تعالی انکلتیره دولتی فرانسه لونک تصمیمی اوزره قرین اختلال اوله جق اولور ایسه مجموع اوروپا مختل و مشوش اولوب کافه دول مخاطره عظیمده اوله جقلری بی اشتباهدر . لکن اوروپا دولی خلوص قلب ایله اتفاقه عزیمت و برأ و بحرأ فرانسه لوی محصور قیله رق غیورانه هجومه مباشرت ایتدکرنده تمادی اختلال و محاربه دن وجوهله بیزار و آسایشه درونی خواهشکار اولان فرانسه اهاالیسنه موجب یأس اولوب اعاده حربی کندو مدیرلرینه عزو ایدرک بینلرنده بادی عشاق و اختلال و بوتقریب مستتزم تبدیل و تقلب احوال اولسی مقرردر . و بالعکس هر بدولت دور بینلک قاعده سنه مغایر اولوقت ترویج مصلحت و اجرای نفسانیت داعیه سیله سکون و آرامی اختیار ایده جک اولور لر ایسه فرانسه لونک قاعده لری اوزره ارباب مشورتلرینک تجدید ثلثی ایچون نصب و اختیار اولنه جق و کلای ملت اکثریا

قتل نفوس و غصب اموال ايله معروف و منفور عالم اولان ياقوبين زمرة سندن اولغله بوندنصره اولكيدن اشنع اطوار و افعال ظهوره كله چكي و اولوقت پشيماني و ندامت قطعاً مفيد اولميه جغني نمودار در . ملاحظات سالفه يه نظراً دولت عليه ابدى الدوام دول سائره نك بولندقلري مخاطره يه داخلמידر دكيدر جاي مطالعه و ملاحظه در . دولت عليه بومحاربه نك ابتدا سندنبرو هر نقدر بيطرفلق مسلكني اختيار ايتش ايسه دخي دول سائره نك دفعاتله شكائتي مستوجب اوله جق مرتبه ده فرانسه جمهورينه اظهار ود و محبتدن و طور و حر كتيه معنوي اعانتدن خالي اولمدي و فرانسه نك زياده مضايقه سي و كمال خط و جوعه ابتلاسي هنكمنده ممالك محروسه دن ذخاير و فيره اخراجنه و فرانسه اسكله لرينه نقل و ايصاله رخصت برله دغدغه جوعدن تجليص ايتدي فرانسه جمهوري و جنراللري ايسه مقابله سنده دولت عليه رعاياسي اضلاله قولاً و فعلاً سعيدن خالي اولمدي خصوصاً و نديك مقاسمه سنده جزيره لري و قره ده واقع ناره يه قريب پوترانلو پراغا پروزه و وويجه نام درت قطعه قصبه بي ضبط ايتسي و آنلر قدامي يونانيه نك كيفيت اداره سني تذكر ايدر ك سر بستيت صورتنه قويمسي دماغلر نده اولان نيجه فسادلره دلالت ايدر بر معنا اولديني و ارسته قيد بياندر . الحاله هذه انكلتره عليهنه اولان تداركاتدن بشقه ايچ دكزده طولون ترسانه سنده اولان تداركات قويه دخي معلومدر . بوكونه تداركاتك تحتنده برفساد عظيم اولمسي احتمالدن بعيد دكلدر . بنابر ين شويوله و قنده دولت عليه بونلرك مخوف اولان شرطلرندن مصون اولمق ايچون قوي تداركده بولنوب علي الدوام اسباب حفظ و حراستي بوشلميه رق هر حال و حر كتليخني تحري و تجسسندن خالي اولماق و اجبات امور دندر لكن صورت مصالحده اولان محاربه معنويه نك امتدادي آنا فائاً مصارف كلييه محتاج اوله جغه بناءً اولاكيلتوب آچه تداركنك امكاني نوجهله در مطالعه اولمق و ثانياً اجراي لوازم حزم و احتياطه هر نقدر سعي و اقدام اولنسه بغته هجوم و قوعنده دولت عليه نك وسعت ممالكنه نظراً كافه ممالك تعرضدن حمايتي امكان عايدن خارج بر كيفيت اولديني ظاهر و هويدا اولغله بالاده مذكور اولديني وجهله عمومي اتفاقك ربطلي تقدير نده دولت عليه نك دخي داخل اتفاق اولمسي عجباً مصالحتنه موافقميدر دكيدر ملاحظه قانمق و بوماده لر ك حسن و قبحي بيلنوب اقتضايدن مسلكي اكا كوره اويدر مق لازمه وقت و حال دندر زيرا هر دولت ك ايكي نوع مسلكي اولمق لازمدر . بري كافه افعال و حر كاتده اساس اتخاذ اولنان مسلك دائمدر . و بري مقتضاي وقت و حاله نظراً بر مدت ايچون اتخاذ اولنان مسلك حايددر . دولت عليه نك دائمي مسلكي موقع حسيله طبيعي

دشمنلری اولان روسیه ونمجه دولتلرینک تزايد قوتی منع ایتک وآنلرک قوتنه ایراث کسر ایده بیله جک طبیعی دوستی اولان دولتلر ایله مرتبط اولمقدرلکن وقت وحاله نظراً مصلحتنه اوفق اولان مسلك شمديک بوآتش فتنه وفسادک اطفاسنه وار قوتی بذل ایدوب حصول مرام میسر اولدقدنه ینه مسلك دائمی مقتضاسی اوزره حرکت ایتمکدر . ونديک مقاسمه سی نیجه دولک خلاف مرضیسی ایدوکی شک وشبهه دن معرا اولمغله بوتقريب نمچه ایمراطورینه ایالات سابقه سی اعاده اولنه رق ونديک جمهورینک دخی صورت اولیسنه ارجاعی میسر اولمق فائده سی حاصل اوله بیلور . زیرا اصول مشروحه اوزره عموم اتفاقک ربطی تقدیرنده اساس اتفاق فرانسه دولتی محاربه دن اول بولنديغی صورت وهیئته تحویل وجمع ایالات مغصوبه نی احبابنه رد ایله بین الدول موازنه نی تحصیل ایتک شروطنه مبنی اولمق اقتضا ایدر . همان جناب مرتب امور دول حال وآیه ده دولت علیه به مضر صور ناملامه نك دفعنی موجب اوله جق تداییرک اجراسنده اولیای امور افتدیلر یزی موفق ایلیه .

آمین ثم آمین

(١٨)

* پاسبان اوغلی حقنده ویریلان فتاواوی شریفه *

پاسبان اوغلی دیمکله معروف عثمان نام شقی برمقدار اشقیایی باشنه جمع و مزبورلره رئیس اولوب قتل نفوس وسفک دماء وتخریب قصبات وقرا وتعذیب فقرا وانواع خسارت عادت مستمره لری اولدیغندن ماعدا پادشاه عالمپناه حضر تلرینه اطاعتدن خروج وباغی اولدقلرندن صکره قلاع سلطانیه دن برنده مجتمعی اولدقلری حالده متهیناً للقتال جمعیتلری اوزره بغی وطغیانلر ندره مصر اولسه لر مزبورلر ایله اهل حرب محاربه سی مثلاً طوب وخبیره وتفنک وسائر آلات حرب ایله محاربه ومقاتله اولمق مشروع اولورمی : الجواب اولور .

پاسبان اوغلی دیمکله معروف عثمان نام شقی برمقدار اشقیایی باشنه جمع و مزبورلره رئیس اولوب قتل نفوس وسفک دماء وتخریب قصبات وقرا وتعذیب فقرا وانواع خسارت عادت مستمره سی اولدیغندن ماعدا پادشاه عالمپناه حضر تلرینه اطاعتدن خروج ایدوب باغی اولسه لر مزبور عثمانک واکا تابع اولوب آنکله اتفاق واتحاد ایدوب معین اولنلرک (فقاتلوا الی تبغی حتی تفی الی امر الله) نص کریمی منطوقیجه قتالری حلال وواجب اولورمی : الجواب اولور .

بوصورته پادشاه عالمپناه حضر تلری طرف شریفلرندن مزبورلره قتاله مأمور اولان مسلمیندن مزبورلری قتل ایدنلر غازیلر اولوب قتل اولنلر شهید اولورمی : الجواب اولورلر .

بوصورته مزبور عثمان واكاتبه بغات واشقيا قلاع سلطانيه دن بري مسكن اتحاد
 ايدوب تحصن ايتمش اولسه لرعا كر اسلام قلعة مرقومه بي محاصره وعلى اى وجه كان
 مزبور عثمان وسائر اكا تابع اشقياي اخذ وجزالري تريب شرعا لازم اولورمى :
 الجواب اولور .

كتبه الفقير السيد محمد عارف درى زاده عنى عنه

(١٩)

* ناپليون پوناپارته نك اسكندريه بي ضبطندن صكره بلا دمصريه *
 * اها ليسنه نشر ايتديكي اعلاننامه نك صورتيدر *

بسم الله الرحمن الرحيم لاله الا الله لا اولده ولا شريك فى ملكه من طرف الجمهور
 الفرانسواى المبني على اساس الحرية والتسوية المرعسكر الكبير اميرالجوش
 الفرانسواى يعرف اهالى مصر جميعهم ان من زمان مديدالصناجق الذين تسلطوا
 فى البلاد المصرية يتعاملون بالذل والاحتقار فى حق الملة الفرانسواية ويظلمون تجارها
 بانواع الباص والتعدى فحضر الآن ساعة عقوبتهم واحسرتا من مدة عصور طويلة
 هذه الزمرة المماليك المجلوبين من بلادالابازا والجرستان يفسدون فى الاقليم الاحسن
 الذى لا يوجد فى كره الارض كلها فامارب العالمين القادر على كل شىء قد حتم على
 انقضاء دولتهم يا ايها المصريون قديقولون لكم انى ما نزلت فى هذا الطرف الا بقصد
 ازالة دينكم فذلك كذب صريح فلا تصدقوه وقولوا للمفتين انى ما قدمت اليكم
 الا لكيا اخلص حقاكم من يد الظالمين وانى اكثر من المماليك اعبده الله سبحانه وتعالى
 واحترم نبيه محمدا والقرآن العظيم واقول ايضا لهم ان جميع الناس متساوون عندالله
 وان الشىء الذى يفرقهم من بعضهم بعضا فهو العقل والفنائل والعلوم فقط وبين
 المماليك بالعقل والفضل والمعرفة التى تميزهم عن الآخريين وتستوجب انهم يملكون
 وحدهم كما يملكون به حياة الدنيا حيثما يوجد ارض مخصصة فى مخصصة للمماليك والجوارى
 الاجل والجميل الاحسن والمساكن الاشهى فهذا كله لهم خاصا ان كانت الارض
 المصرية التزام المماليك فليوردنا الحجة التى كتبها الله لهم فلكن رب العالمين هورؤف
 وعادل على البشر بعونه تعالى من اليوم فصاعدا لا يستثنى احدامن اهالى مصر عن الدخول
 فى المناصب السامية وعن اكتساب المراتب العالية فالعقلاء والفضلاء والعلماء بينهم
 سيدبروا الامور وبذلك يصلح حال الامة كلها

سابقا فى الاراضى المصرية كانت المدن العظيمة والخليجات الواسعة والمتجر المتكاثر
 وما زال ذلك كله الاطمع وظلم المماليك ايها القضاة والمشايخ والائمة ويا ايها الشرباجيه
 واعيان البلد قولوا لامتكم ان الفرانسوايه هم ايضا مسلمون خالصون واثباتا لذلك

قد نزلوا في رومية الكبرى وخبروا فيها كرسي البابا الذي كان يحث دائما النصارى على محاربة الاسلام ثم قصدوا جزيرة مالطه وطردها منها الكواريه الذين كانوا يزعمون ان الله تعالى يطلب منهم مقاتلة المسلمين ومع ذلك الفرانساويه في كل وقت من الاوقات صاروا المحيين الاخاصين لحضرة السلطان العثماني واعداء اعدائه ادام الله ملكه وبالمقلوب المماليك امتنعوا من اطاعة السلطان غير ممثلين لامره فما اطاعوا اصلا الا لطمع انفسهم طوبى ثم طوبى لاهالى مصر الذين يتفقون معنا بلا تأخير فيصالح حالهم ويعلى مراتبهم طوبى ايضا للذين يقعدون في مساكنهم غير مائلين لاحد من الفريقتين المحاربتين فاذا يعرفونا بالاكثر يتسارعون اليها بكل قلب لكن الويل ثم الويل للذين يتحدون مع المماليك ويساعدوهم في الحرب علينا فما يجدون طريق الخلاص ولا يبقى منهم اثر

(المادة الاولى) جميع القرى الواقعة في دائرة قريبة بثلاثة ساعات عن المواضع التي يمر بها العسكر الفرانسوى فواجب عليها ان ترسل للسرعسكر بعض وكلاء عن عندها لكيما يعرف المشار اليه انهم اطاعوا وانهم نصبوا السنجاك الفرانسواى الذى هو ابيض وكحلى واحمر (المادة الثانية) كل قرية التي تقوم على العسكر الفرانسواى تحرق بالنار (المادة الثالثة) كل قرية التي تطيع للعسكر الفرانسواى الواجب عليها نصب السنجاك الفرانسواى وايضا نصب سنجاك السلطان العثملى محبنا دام بقاءه (المادة الرابعة) المشايخ في كل بلدي ختموا حلالا جميع الارزاق والبيوت والاملاك متاع المماليك وعليهم الاجتهاد الزائد لكيلا يضيع ادنى شئ منها (المادة الخامسة) الواجب على المشايخ والقضاة والائمة انهم يلازموا وظافتهم وعلى كل واحد من اهالى البلدان يبق في مسكنه مطمئين وكذلك تكون الصلاة قائمة في الجوامع على العادة والمصريين باجمعهم ليشكروا فضل الله سبحانه وتعالى من انقراض دولة المماليك قائلين بصوت عال ادام الله اجلال السلطان العثملى ادام الله اجلال العسكر الفرانسواى لعن الله المماليك واصلاح حال الامة المصرية تحريرا بمعسكر اسكندريه في ثلثة عشر من شهر مسيدور سنة ١٢١٣ هجرية

* مذكور اعلانه نك ترجمه سى *

حريت ومساوات اساسه مبنى اولان جمهور فرانجه طرفندن سرعسكر كبير اميرالجيوش الفرانسوايه پونا يارته جميع اهالى مصره بيان ايدر كه بك چوق وقتلر دنيرو اول سنجاقلر (امرا) كه مصرده تسلطن ايدر لر فرانجه ملتته ذل واحتقار معامله سى برله تجارينه انواع جور وتعدى وظلم وغدر ايدر لر شمدي آنلر ك وقت عقوبتلى ايرشمدر وآه يازق كه بونجه وقتلر دنيرو ابازه وكرجستان ممالكندن مجلوب اولان

اشبو کوله من طائفه سی بتون کره ارضه مثل بولنیا اقلیم احسن مصری افساد
 ایده کلمش در هر شیئه قادر اولان رب العالمین حضرت تلرینک اراده الهیه سی ایسه
 آنلرک انقضاء ملک و دولتارینه تعلق ایلمشدر ای مصر لولر بن بو طرفه انجق سزک
 دینکزی ازاله قصدیه کلمش دیو القا ایدر لر بو ایسه کذب صریحدر آتی تصدیق
 ایتمکزی و مفتریره دیککز که بنم بو طرفره توجهم انجق سزک حقکزی ظالمردن
 آیویرمک ایچوندر بن کوله منلردن دها زیاده الله تعالی به عبادت و نیسی محمد و قران
 عظیمه حرمت ایدرم وینه آنلره دیککز که جناب اللهک عندنده هر کس متساوی
 الاقدام اولوب بینلرنده مدار تمیز فقط عقل و فضائل و علوم ایکن کوله من طائفه سنک
 عقل و معارف و فضائله دائره نه سرمایه لری واردر که آنلری سائرلردن تمیز واک اعلی
 شیرک آنلره انحصارینی اقتضا ایلیه که نروده منبت اراضی و ارایسه آنلرک و کوزل
 آنلر و اعلی قوناقلر و جواری حسنیه آنلره مخصوص اگر مصر آنلرک مالکانه سی
 ایسه اللهک آنلره یازدینی حجتی بزه کوسترسونلر لکن جناب رب العالمین قوللرینه
 رؤف و عادلدر بو کوندن صکره مصرده مناصب سامیه ورتب عالییه ارتقاده اهالی
 مصردن کمسنه استننا اولنیه جقدر و آرتق عقلا و فضلا و علما میانلرنده مدبر امور
 اوله جقدر و بونکله کافه امتک حالی کسب صلاح ایدر و قتیله اراضی مصریه ده
 عظیم شهرلر و واسع خلیجبار و چوق تجارت و ارایدی بونلری هپ ممالیکک
 طمع و ظلملری احما ایلمشدر ای قضاة و مشایخ و ائمه و چور باحیان و اعیان بلده
 جماعت و نفراتکزه سویلیک که فرانجه لولر خالص مسلمین عدادندندر بونک اثباتی
 بودر که نصاریی مسلمانلرله محاربهیه دائمی حث و ترغیب ایدن ریم پاپانک تحتکاهی
 قزل المایه و اروپ تخریب ایلدیلر صکره مالطه جزیره سنه قصد ایدرک مسلمین ایله
 محاربهیه فرض عین زعم و اعتقاد ایدن قوللرلری طرد و تبعید ایتمدیلر بونلرله برابر
 حالا پادشاه اسلام ادام الله ملکه حضرت تلرینک فرانجه لولر محب خالصی اولوب
 دشمننه دشمنلردر کوله من طائفه سی ایسه بالعکس امر سلطانی به امثال ایتیه رک
 اکا اطاعتدن امتناع ایلدیلر و اصلا انقیاد ایتمدیلر مکرکه طمع نفسلری ایچون اوله
 نه موطلی نه موطلی بزم ایله بلا تأخیر اتفاق ایدن اهالیء مصره که کندولری
 صرفه الحال و مرتبه لری عالی اولور کذلک نه موطلی شول کمسنه لره که طرفین محاربین
 جانبلرینه تمایلدن مباحثت ایله منزللرنده مقیم اوله لر و بزی کرکی کبی اکلا دقلرنده
 خلوص قلب ایله طرفزه مسارعت ایله لر لکن واه شول طائفهیه واه که کوله منلر
 ایله اتحاد و بزم ایله محاربهده آنلره اعانه ایدر لر آنلر طریق خلاص بوله میوب
 صحیفه عالمدن اثرلری حک اولسه کر کدر .

برنجی ماده فرانجه عساکری بر موضعدن مرور ایدر ایکن اول موضعه

اوج ساعت بعدی اولان جمیع قرا اھالیسی سر عسکر جمهوره ایچلرندن برقاچ نفر آدم ارسال ایله لرکه سر عسکر مشارایه آنلرک اطاعتلرینی معلوم ای دینه سفید و سرخ و سیاه الواندن مرکب فرانجه باندره سین نصب ایله لر .
ایکنجی ماده هر بر قریه که فرانجه لویه مقاومت و مدافعه کوستره اول قریه بالکلیه احراق اولنور .

او چنجی ماده بر قریه اھالیسی که فرانجه لویه اطاعت کوستره فرانجه باندره سین نصب ایتمک شرطندندر . کذلک محبمز اولان پادشاه اسلام دام بقاه حضر تلرینک دخی سنجاغنی برابر نصب ایله لر .

دردنجی ماده بلده نک مشایخی کوله منلرک جمیع ارزاق و بیوت و املاکلرینی تمهیر ایدوب ادنی برشی ضایع اولماق اوزره اھتمام ایله لر .

بشنجی ماده مشایخ و قضاة و ائمه هر کس کندو فصلحتلریله مشغول اولوب اھالی مطمئن مسکنلرنده اوله لر و عادت بلده اوزره جوامعه نمازلر ادا اولنوب باجمعهم هر کس کوله منلرک انقراض سطوتلری شکرینی حاوی جناب اللھک نعمته شکر و ثنا ایدلر و صوت بلند ایله دولت علیه و عسا کر فرانجه و یه نک دیمومیت اجلانه دعاوی و کوله منلر لغت و نفرین ایله لر .

(۲۰)

* پونا پارتہ نک اسکندر یه دن مصر والیسنه کوندر مش اولدینی *

* تحریراتک صورتیدر *

مصر بکلرینک فرانسه تجاری حقارینه واقع اولان انواع تعرض و تعدیلرینه مبنی تأدیبات لایقہ لری اجرا اولنمی خصوصی بالدفعات فرانسه جمهوری طرفندن جانب سلطنت سنیہ استعدا اولدقجه بکلرک خشونت مزاجلری تقریبیه اصول حق و سداده عدم تبعیتلرینی و دولت علیه نک قدیمی و حقیقی دوستلری اولان فرانسه لونک تکدیرینه دولت علیه نک قطعاً رضاسی اولمدیغندن قطع نظر بکلره صاحب چقیمدیغنی افاده و بیان ایتمش اولمغله فرانسه جمهوری مقدملرده تونس و جزائر بکلری حقنده بالدفعات حرکته مجبور اولدینی مثللو بودفعه امرای مصرک تعدیلرینی فیما بعد دفع ایچون قوی بر عسکر تعیین و ارساله قرار ویرمشدر .

سن بکلرک ضابطی اولمق اقتضا ایدر ایکن مصرده یدکده قوت و حکومت برآمدقلرندن بو طرفه وصولرندن محظوظیتک لازم کلور بزم دین محمدی حقنه و پادشاه آل عثمان خلافه ادنی بر حرکت سوداسنده اولمدیغمز و اوروپا دولتلری ایچنده یالکز فرانسه ماتی دولت علیه نک متفق اولدینی معلومک اولمش حالاندن

اولغله ايمدى بلكرك ساسايه خيشه لرينه بزم ايله بالمعيه لغت او قومق ايجون استقبالمزه
كلك مطلوبدر .

(٢١)

* پونا پارتته نك اهالى مصره ويرديكى راي و امان كاغديدر *

من معسكر الجيزه خطاباً لاهل المصر .

اننا ارسلنا لكم في السابق كتاباً فيه الكفايه و ذكرنا لكم اننا لم حضرنا الا بقصد ازالة
الماليك الذين يستعملون الفرانساويه بالذل والاحتقار و اخذوا مال التجار و مال
السلطان و لما حضرنا الى البر الغربى خرجوا الينا فقابلناهم بما يستحقون و قتلنا بعضهم
واسرنا بعضهم عندنا و هرب بعضهم و نحن في طلبهم حتى لم يبق منهم احد بالقطر المصرى
واما المشايخ و العلماء و اصحاب المراتب و الرعيه فيكونوا مطمئنين و في مساكنهم مرتاحين .

* مذكور كاغدك ترجمه سى *

جيزه اردوسندن اهل مصره خطاب اولنوركه :

بز مقدم سزله مواد لازمه يى متضمن و محيط مکتوب كوندروب آنده ذكر
ايتشيدك كه بزم مصره عزيزتمز انجق فرانسه ملتني تحقير و تجار و دولتك اموالني
غضب ايدن بلكرك ازاله سى ايجون اولوب بر غربى يه و اصل اولديغمزده مز بورلر
قارشو چيقدق لرندن مستحق اولدق لرى و جهله آنلره مقابله ايتدك و بعضيلرين
قتل و بعضيلرين اسير ايلدك و بعضيلرى دنخى خوف لرندن فراره آغازه ايتدى بز ايسه
قطر مصرده بولردن احد قالمينجه به دكين جستجودن خالى دكلز اما مشايخ
و علما و اصحاب رواتب و الرعيه مسكنلرنده فرنج و مطمئن اولسونلر .

(٢٢)

* بحر سفيد بوغازنده يوقلمه اصولنك اجر اسنه دائر سفر ايه ويريلان *

* تقرير رسمى صور تيدر *

الحالة هذه بحر سفيد بوغازندن دخول و خروج ايدنه جك سفائن حقهده دفع اشتباه
ضمننده حسب الوقت و الحال لازم و مهم اولان نظامك اجراسى دولت عليه نك
اقدم مصالح ملكيه سندن اولدينى بيدار و ازمان سابقه ده اولدينى و جهله آستانه
عليه ده بحر سفيد ماذوناً با اوامر شريفه عبور ايدن مستامن سفينه لرندن غيرى
طشره دن بوغازه دخول و در سعاده و وصول اراده سنده اولان دول سفاينك
هر قفى ملتن اولور ايسه اولسون بلاشبهه دوست و دشمنك لرى كر كى كبي فرق
و تميز اولنمدجه قلاع محفوظه بادشاهى يه تقرب و بر و جهله بوغازه دخول لرينه قطعاً
جواز و رخصت و يرليوب على الدوام بو خصوصه متبصرانه و متيقظانه حر كته دقت

واهتمام لازم وقت و حال دن ایدوکی مستغنی تعریف و اشعار اولمغله بو کیفیت اول
 امرده آستانه علیه ده مقیم اولان دول اوروپا ایلیچی و مصلحتگذارلری دوستلریز
 اخبار و آنلر دخی بوغاز حصارلرنده مقیم قونسوس و قونسوس و کیلارینه تحریر
 و اشعار ایله بعد ازین طشره دن ایچرو بوغازه دخول مراد ایدنلر قنبی ملتدن
 و مقوله اشخاصدندر ویدلرنده اعتباره شایسته سندات وارهیدر و اوضاع و اطوارلرندن
 خیانت و مکر و حیله و مفسدت ملحوظمیدر حقیقتی اوزره کیفیتلری بوغاز
 مذکورده اولان دولت علیه مأمورلرینک علم الیقین معلوملری اولمق خصوصنک
 تحت رابطه ایدخاللی لازم کلدیکنه بنه بوغازدن ایچرو دخول ایده جک سفاین
 لاحاله سلطانیه ایله سلطان حصارلی قلعه لری بیننده واقع چوملکچی کاور کوی تعمیر
 اولنور محله لنگر انداز اوله جنی حسیله او مقوله طشره دن ایچرو بوغازه دخول
 ایده جک سفینه محل مذکورده ورود ایلدیکی کبی قلعتهن مذکور تین ضابطانی و مکرمک
 اهینی و سائر مأمورلر طرفلرندن یوقنوب اولطر فده موجود اولان قونسوس و قونسوس
 و کیلاری دخی واروب بالمعینه کندولرینک صحیح تجار سفینه سی اولدیغنی تصدیق
 و درونلرنده قطعاً شک و شبهه اولدیغنی اخبار ایدوب هر قنبی دولته متعلق ایسه اول
 دولت قونسوسی و یا خود قونسوس و کیلنک شهادتی کفالت مقاننده قائم اولمق شرطیله
 بو جانبه مرورلرینه رخصت و یرلمک و الا او مقوله سفینه محل مرقومده لنگر انداز اولمیوب
 یا خود لنگر انداز اولدقده دخی کرکی کبی یوقنوب ذکر اولنان قونسوسلر و و کیلاری
 دولت علیه ایله مصافات اوزره اولان دولت تجار سفینه سی و امین اولدیغنی خبر
 و یرمدن علی الغله عزیمت ایدر ایسه بلا توقف طوب انداختیله منعه اقدام
 و او مقوله ننگ اغراق و احراقه اهتمام و دوستلقلری ظاهر و متحقق اولان دول
 سفینه لری بیهوده توقیفدن اتقاء تام اولمق ایچون نظام مذکور اشعار و خلافی
 حرکتدن انذار سیاقنده اولطر فده اولان دولت علیه مأمورلرینه ازمان سابقه ده
 اولدیغنی وجهله بودفعه اصداری لازم کلان اوامر شریفه در دست صدور اولمقدن
 ناشی اول امرده دولت علیه ایله مصافات اوزره اولان دول طرفلرندن الان
 بوغاز حصارلرنده مقیم اولان قونسوس و قونسوس و کیلاری کیمار ایدوکی
 و هر وجهله امین و معتمد و موثوق الاقوال اولدقلری در علیه ده مقیم رغبتلو
 ایلیچی و مصلحتگذار دوستلریز طرفلرندن سند مثللو برر قطعه تقریر کاغدلری
 تقدیمیله تصدیق اولتمسی و نظام مذکورک کاملاً اجرا و انفاذی ضمنده بو باده
 دولت علیه مأمورلرینه اظهار موافقت و ادنی مرتبه نظام مذکورده خالی ایرائی
 موجب اوله بیلولور حالت وقوعه کلامسنه دقت ایلملری ایچون اولطر فده اولان
 قونسوس و قونسوس و کیلارینه بلا تأخیر مؤکد کاغدلر تحریری و صورتلرینک

طرف دولت عليه به تقدیمی دولت عليه نك مأمول ومنتظر دوستانه سی اولدینی افاده سیله طرف دولت عليه دن اقتضا ایدنلره رسماً بشقه بشقه تقریر لر ویرلمکله سلطنت سینه نك دوست احب وهمجواری اولان دولتک درسعادتده مقیم رغبتلو درایتلو ایلیچسی دوستمزه دخی اشبو تقریر اعطا اولندی .

(۲۳)

* فرانسه اوزرینه اعلان حربی متضمن بیاننامه در *

دولت عليه ایله فرانسه دولتی بیننده قدیم الایامدنبرو درکار اولان سلم ووفاق هیچ بر وقته مبدل خصومت وشتقاق اولموب بوآنه دک هروجه عارضه خللدن مصون اوله رق عهد وشروطک کاملاً ایضا و مراسم و دوولانک کما یبغی اجراسنه طرف دولت عليه دن دائماً ومستمرأ کرکی کبی رعایت وهر حالده ابراز آثار دوستی وصفوت عامه دول عندنده معلوم اولان حالاتدن اولدیغندن ماعدا بوندن آتی سنه مقدم ظهور ایدن اختلالک ابتداسنده اکثر دول بینلرنده عهد و میثاق و فرانسه علیهنه اتفاق اولدوقده زمام حکومتی نزع ایدن فرانسه مدیر لرینک اطوار وحرکاتی ناروا اولدینی بیدار ایکن دولت عليه مجرد فرانسه ماتی ایله درکار اولان قدیمی دوستلغه رعایه بیطرفانی اختیار ایدوب دول متفقه طرفلرندن سلطنت سینه ایله فسخ رابطه برله دائره اتفاقرینه دخوله بالدفعات دعوت اولنمشیکن واول ائشاده فرانسه نك کراحت احوالی یوماً فیوماً کسب اشتداد ایتک اوزره اولدیغندن بشقه دول متفقه عساکرینک پارسه تقریبی وبعده شمال جانبنده فرانسه نك کلیدی مثابه سنده اولان والنسین وقونده وکنو انام حصون حصینه نك نمچه عسکری جانبندن وایچ دکزده فرانسه نك ترسانه یکانه سی اولان طولونک ایچنده بولنان سفاین حربیه ایله انکتره لو طرفندن ضبط و تسخیری و فرانسه مالکی دروننده قرال طرفدار لرینک قوت جمعیتی حسیله فرانسه نك ضعف حالی نمایان ووجوه متنوعه ایله فحرت و مضایقه سی مستبان اولدینی حالده دولت عليه دخی دول سائریه موافقت ایده بیلور ایکن عامه به معلوم اولان حقانیت لازمه سی اوزره بیطرفلق مسلکندن قطعاً عدول ایتدیکی و فرانسه مملکتک برأ و مجراً محصوریتی حسیله شدت فحطه ابتلاسی هنکامنده دولت عليه دخی کلیاً فسخ رابطه ایتش اولسه فرانسه اها لیسنک کلی خلل و یأسنی مستنزم اوله جق درجه ده اشتداد فحرت حاللری مقرر ایکن دولت عليه فسخ رابطه ایتدیکندن بشقه آنا فنا حقلرنده مبدول اولان مساعده سینه بی دفعاتده دول سائره نك شکایتنه بادی اولدینی معلوم دکیدر مدت محار بده دولت عليه نك بیطرفلغندن فرانسه لو نمرته انتفاع ایتدکری وقایع حربیه وحالات مشهوده به جزئی امعان نظر ایله ظاهر

اولان مواد دندر طرف دولت علیه دن بو وجهله نوبنو ظهور ایدن آثار مروته مبنی فرانسه لو دخی علی الدوام دوستلقده ثبات و قیام ایلملری لازم کلدیکی آشکار ایکن برقاچ سنه دنبرو فرانسه ده علو کیر اشتداد اولان آتش فتنه و فساد حسیدله زمام حکومتی ید تغلبلرینه حصره. فرجه بولان اشخاص محل بمحل واسطه لر پیدا ایدرک مصالحت خاصه لرینی ترویج و حکومتی کندولرینه تأیید ایچون منتظم الحال اولان دول سائر نظامی فرانسه نك احوالی مثلو قرین تشویش و اختلال ایتمک و رفع جمیع ادیان و تخریب ممالک و بلدان و غضب اموال اهالی و سکان و فسخ روابط افراد انسان اصولندن عبارت اولان لفظی مراد سربسیت پرتر و لرلیه ابلهان ناسی تغلیط و اضلال و نوع انسانی و حوش منزله سنه ایصال ایلمک داعیه سنده اولدقلرندن دور و نزدیک بلا تمیز کرک دوست و کرک دشمن اولان دولتلرک رعایاسی و جوه متنوعه ایله تحریک و افساد و طبعی ملوک و حکاملری علیه طغیان و عصیانه دعوتی اعتیایدوب بر طرفدن در سعادتده مقیم ایلمچیلری دخی هر محله مألوف اولدقلری اطوار رو بهانه مکارانه ایله جانب سلطنت سنیه به عرض محبت و نیجه حیل و دسایس ایله دولت علیه یی تغلیطه و سائر دوست دولک علیه تحریک مصالحتی ترویجه مواظبت و بر جانبدن دخی ایثالیاده کائن فرانسه عساکری قوماندان و جنراللری رعایای پادشاهی یی اضلال زعم فاسدیه روم ایلی و موره و آق دکز جزائرینه خدیعت و دسایس ایله مشهور مبعوثلر ارسالندن و نیجه اوراق احتیال امال نشرینه مبادرتدن خالی دکلر ایدی حتی پوناپارته نك مانیه طائفه سنه ارسال ایتمدیکی کاغد و سائر نشر ایتمدیکی اوراقل مال خدیعت اشتمالی عامه به معلومدر .


دولت علیه ذکر اولنان قوماندان و جنراللرک بو مقوله حرکتلرندن فرانسه مدیرلرینه شکایت ایتمدیجه جنراللریمزک دوستلغه منافی برکونه حرکتلرنده رضامن یوقدر فیما بعد منع و تحذیر ایدرز مرادمز دولت علیه ایله درکار اولان قدیمی دوستلغی آنا فنا تا کید ایتمکدر دیو رسماً ویردکاری جوابلره نظراً مرقوم جنراللر اجرای مفسدتن فراغت ایتمک اقتضا ایدر ایکن اطوارلرینی قطعاً تغیر ایتمکدری و تمرد فسادلری اولکیدن زیاده مشتمد اولدینی مشهود اولدیغندن مدیرینک جوابلری محضاً حیل و آل اولدینی و مأمورلرینک حرکات مفسدانه سی حامل اولدقلری تعلیماتک مقتضاسندن نشئت ایدر برحالت ایدوکی و بنابرین فیما بعد شکایتک دخی هیچ برکونه فائده سی اولیه جفی هر نقدر معلوم اولمش ایسه دخی فرانسه مدیرلری شاید تبدیل مسالک ایدر و افساد و اختلال نظام عالم سودای خامندن و از کچر یا خود بو اختلالک ظهورندنبرو مجرد چند تبهکارلرک مصالحتی

ایچون جمیع فرانسه اها لیسنگ دوچار اولدقلری محن مشاق طاقفر سایه عدم
 اضطبار ایله فلاکتزده اولان فرانسه نك احوالی آخر صورت کسب ایلمر مأمولیه
 معادات خفیه خصومت جلیه هی منتیج اولمامغیچون دولت علیه ینه مسلکینی تغییر
 ایتیموب سکوتی اختیار ایلمش ایدی . بوندن ماعدا فرانسه مدیرلری دول سائره
 ایله محاربه لری اولئنده توسیع ممالک قیدنده اولدقلرینی وقبضه تملک وتصرفلرینه
 داخل اوله حق ممالکی ردایده جکلرینی اعلان ایتمش ایکن محارب بولنان دولتلردن
 نزع ایده بیلدکلری نیجه ممالک واسعه هی فرانسه یه الحاق ایتدکلرینه قناعت ایتیموب
 القای تفاق ایله دول متفقه بینده ظهور ایدن انقلاباندنن شای احترازی کلیا بر
 طرف ایتلمر یله مقاصد خفیه لری ظاهره اخراج ایدرک دولت مثللو بیطرفانی
 اختیار ایدن نیجه سر بست ومستقل جمهور و حکومتک بلاسب محض غدر اولمق
 اوزره مسلط اولوب اسباب محافظه دن خالی بولنان مملکتلرینه هجوم واقیحام
 وجبراً وقهرراً مراملرینه رام ایتدکدن صکره ممانعت ایدر اولدیغندن بالکلیه
 هتک پرده ناموس ایلیه رک عهد و شرط بیلمدکلرینی ودوستلق و خصومت
 عندلرنده مساوی اولدیغنی عامه یه بیلدیرمکیچون کندولرینه اظهار دوستیدن
 غیری معامله سی اولمیان دولت علیه نك اعز ممالکی اولان مصر کی مملکتته حقوق
 ملله و بین الدولتین مرعی اولان قواعد معتبره یه مغایر مثل نامسبق وجهله
 قورسان کبی بغته هجوم واقیحام و بالمحاربه ضبطه قیام ایتدیلر فرانسه لونک
 مصره تعرض نیتده اولدقلری حوادئک ابتدا ظهورنده آستانه سعادتده فرانسه
 طرفدن مصلحتکذارلق ایله مقیم روفن مکالمه دعوت برله کیفیت کندوسندن
 رسماً سؤال اولندقدقه قطعاً خبر و آگاهی اولدیغنی و کندو ملاحظه سی اوله رق
 فرانسه لونک اشبو سفری تحقق ایدر ایسه مجرد بکلردن اخذ انتقام وانکلتره لونک
 هند تجارته ایصال ضرر و کزند مصلحتته مبنی اولمق محتمل ایدو کفی بیان ایتمکله
 فرانسه لونک مصر طرفه بر کونه تعرضی وقوعنده هر نه علته وهر قنعی سببه مبنی
 اولور ایسه اولسون اعلان حرب عداوتنه جنی واز قدیم میانه ده درکار اولان ود
 و محبت شرعاً و ملکاً مبدل عداوت و خصومت اوله جنی و سلطنت سنیه مصر الکلسنگ
 بر اوچ قومندن واز کچمک احتمالی اولدیغندن اول اراضی مباحه نك استخلاصی ایچون
 ملت اسلامیه نك حرکتی موجب اوله جنی و مصر بکلرینک تأدیبی لازم کیش
 ایسه متبوعلری اولان دولت علیه طرفدن اجرا اولمق اقتضا ایتمکله فرانسه لونک
 بو خصوصه مداخله سی حقوق ملله مغایر بر کیفیت اولدیغنی وانکلتره دولتی سلطنت
 سنیه نك احب دوستی اولمغله دولت علیه کندو ملکنندن فرانسه عسکری مرور یله
 انکلتره تجارته ایصال خساره تصدیلرینه بر وجهله رضا داده اولدیغنی و بنابرین

فرانسه لوندك مصره عزيمتى ولو يالكز بومصلحته مبنى اولسه ينه اعلان حرب اتخاذا ولنه جنفى بوجه تفصيل كوش هوشنه القا و بويه جه مدير لرى طرفه محاله تبليغ ايلمسى لازمه خالدن ايدوكى كندوسنه انبا اولديغندن بشقه پارسده مقيم دولت عليه سفىرى على افدى يه دخى مفاهيم مذكور هني حاوى تحريرات تسيير و كيفيتى رسماً سؤال ايلمسى افدىء مومى اليهه تنبيه و تحرير اولتمش ايدى . روفنك مدير لرى طرفه كوندرديكى كاغد و طرف دولت عليه دن سفير مومى اليهه ارسال اولنان تحريراتك وصولندن مقدم روفنه تاريخ عتيق ايله ورود ايدن كاغذك مفهومنده پوناپارته نك مصر مأموريتى صحيح اولوب لكن كويا مصر بكلىرىنى تايدىب برله تحصيل منافع تجارت و انكلاتره دولته ايصال خسار ايتك مقصدينه مبنى اولديغى وبومصالحك تنظيمى ايجون دولت عليه نك مصلحتهه انفع نيجه صور حسنه نك عرضنه مأمور بر ايلچى تعيين اولنديغى و دولت عليه بوخصوص ايجون فرانسه جمهورينه اعلان حرب به تصدى ايدر ايسه بهر حال ايكي دولت ايمپراطورينك دخى هجومه مظهر اوله جنفى مال بطلان اشتمالى مندرج ايدوكى مصلحتكذار مرقوم رسماً تفهيم و مذكور كاغذك برصورتى دخى تقديم ايتمش ايكن دولت عليه سفىرى اولان افدىء مومى اليه مقتضاي مأموريتى اوزره پارسده امور اجنيه ناظرى تاليران ريغور ايله لى الملاقاة طرف دولت عليه دن ورود ايدن تحريراتى و مائى افاده و بيان برله بر جواب قطعى المفاد اعطاسنى رسماً طلب ايتديكى شخص مذكور غالباً مقدمات روفن طرفه تحريرى ايلديكى سالف الذكر كاغذك مائى فراموش ايتديكندن مصر جانبنه عزيمتلىرى كليا انكار و پوناپارته نك مأموريتى مالطه جزيره سنك ضبط و تسخيرينه منحصر ايدوكى و مالطه قوالرلرينك اضمه حلالى كافه مسلمينه خيرلو بر مصاحبت اولغاه دولت عليه نك باعث ممنونيتى اولق لازم كلديكى و سلطنت سنيه ايله اوتنه دن برو دركار اولان دوستلغك و قايه سى و آنافا ناً تا كيدى بغايت ملتزملرى اولديغى اوتانيمه رق بسط و اشعار و فتح هميان حيله بازى يه ابتدار ايلديكى افدىء مومى اليهك جوابنامه سندن مستبان اولغاه مصلحت كذار مرقومك افاده سييله ناظر مرسومك جوانى بيتنده دركار اولان تناقص تام دولت عليه ني آچيقندن تغليظ و اغفال و مصر ماده سنك نصورت كسب ايلديكندن اول ائشاده هنوز خير اوله مدقبرندن تحصيل اطلاع دكين امرار وقت قصديه برصورت مكر وهه احتيال اولديغنه بناءً بو حالت غريبه فرانسه مدير لرينك كمال كبر و غرور لرندن جمع دول عندنده مرعى و معتبر اولان اصولى نهاده طافچه نسيان ايلدكلىرينه و بالجملة اقواللرى اعتماد ناسزا اولديغنه دليل واضح دكيدر الى الآن مرئى و مشاهد اولان اطوار تحكمانه و حرركات تغلبانه لرينه

نظراً جایگزین ضمیمه‌ری افساد نظام عالم و تشویش رابطه ملل و امم بر له اقتضاسنه کوره
 گاه زیر کاهدن اجرای آب حيله وآل وکاه آچيقدن جنك و قتال ايله منتظم الحال
 اولان جميع دولك شیرازه نظامنی مختل و پریشان ايدرك ايتالياده ايتدکاری کبی
 جماهير صغيره کثیره احداث ايدوب فرانسه جمهوري ام الجماهير اوله رق هر محله
 ديلديکی وجه اوزره حل عقد امور و عموماً فتق و رتق مصالح جمهور ایتک اولدینی
 جلی و آشکاردر ايمدی مصر باب حرمین محترمین اولوب بو خصوص بالجمله ملت
 اسلامیه راجع بر ماده جسميه اولديغندن دولت عليه مقدما بر منوال مشروح کرک
 مرسوم مصاحتکنذاره و کرک پارسده مقيم سفیری وساطتيله فرانسه مدیر لرینه
 صراحة بیان و اعلان ایتدیکی وجه اوزره فرانسه لونک بلا سبب بغته ظهور ایدن
 تعرض و عداوتنه شرعاً مقابله لازم کلدیکندن عون عنایت حضرت خدای معینه
 توکلاً برأ و بجزراً دفع شرور اعدا و قهر و تدمیر خصما سبابنه تشبث اولمغله فرانسه
 علیه غزا و جهاد جميع مسلمينه فرض عين اولدینی مقرر اولمغین مصاحتکنذار
 مرقوم متعینان خدمه سفارتاه مومی ايله علی اقدی و معیتنده اولانلرک پارسدن ورودینه
 دکن رهن طریقيله یدى قله یه ارسال و آستانه سعادتده و بالجمله ممالک محروسه ده موجود
 فرانسه قونسولساری و تجار و امواللری مصر الکاسنده حرب اسیری اولمیه رق
 توقیف قلنان دولت عليه یه تابع تجار و اموال و سفینه لرینک و بکلک کمیلرینک
 و ایچلرنده موجود نفراتک سیلیری تخلیه اولنجیه ده دکن کذلک رهن اولمق اوزره
 امانه توقیف اولمشدر فرانسه ده رایت افراز قته و فساد اولان ارباب تغلبک دفع
 شروری یالکز دولت عليه نک دکل بلکه جميع اوروپا دولتتک آسایش و امنیتنی
 مستلزم اوله جفی بیدار اولمغله بو باده جميع دوست دولک توجه قلوبی و ظاهراً
 و باطناً اجرای لوازم دوستی و اعانه یه مبادرتلری مأمولدر .

﴿ انتهى الجلد السادس ﴾



در سعادت

(مطبعة عثمانیه)

۱۳۰۹



